


God Ago Maror  
Muturta Agamukan



The New Testament in the Bargam Language of Papua New Guinea

**God Ago Maror Muturta Agamukan**  
**The New Testament in the Bargam Language of Papua New**  
**Guinea**  
**Nupela Testamen long tokples Bargam long Niugini**

copyright © 2001 Wycliffe Bible Translators, Inc.

Language: Bargam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-05

---

PDF generated using Haiola and XeLaTeX on 21 Feb 2024 from source files dated 31 Aug 2023  
e6d4bba7-efc9-5580-b990-ee6b0ef92064

## Contents

Matyu . . . . .	1
Mak . . . . .	49
Luk . . . . .	78
Jon . . . . .	128
Aposel . . . . .	163
Rom . . . . .	210
1 Korin . . . . .	233
2 Korin . . . . .	254
Galesiya . . . . .	269
Efesus . . . . .	277
Filipay . . . . .	285
Kolosi . . . . .	291
1 Tesalonaika . . . . .	297
2 Tesalonaika . . . . .	302
1 Timoti . . . . .	305
2 Timoti . . . . .	312
Taitus . . . . .	317
Filemon . . . . .	320
Hibru . . . . .	322
Jems . . . . .	339
1 Pita . . . . .	345
2 Pita . . . . .	352
1 Jon . . . . .	356
2 Jon . . . . .	362
3 Jon . . . . .	363
Jud . . . . .	364
Revelesen . . . . .	366

## Matyu o Yesus awagamun Matyu mar tonta Gamuk ameb lehaqta

Yesus awagamun dimunta Matyu mar tonta kab Yesus in ago kabiy alulin emim le in wol eman moqim in eraqim ago wal-mataw gihulosad Heven-ib Amam ago hib tugwalahta na awagamun bunmo Matyu ago wagam kab giqu bugaqta. Matyu in Juda on mataw Yesus anan helmo haqiyta na ginadin emad in wagam ka mar tonta.

Daq ayah diqta Matyu i giqisihunta na kazaq. Kwaziqmo God gamuk asor awaz meqinta bilaqan ago nantut mar tonan usta. Ussa abeb Yesus gwahtiqim gamuk na bunmo tuwol net bug. Gamuk na ni kazaq naguneq teq ahol waq: Matyu 1.22-23; 2.4-6; 2.14-15; 2.23; 4.13-16; 8.16-17; 12.15-21; 13.34-35; 21.2-5; 21.16; 26.24; 26.31; 26.54; 27.6-10.

Teq nagah araq ayahta Matyu wagam kab bilamta na kazaq. Yesus in Amam God ago on mataw bunmo gigo king iyeq osdaq haqad in ago kabiy daq emyaqta. Ad in anad on mataw bunmo inmo ahaqenib iyeq anad muziniy haqad in gibilenyaqta.

Wagam Matyu mar tonta ka aduganib Yesus gamuk sisaqta bilamta abaynaginmo giqusaq. 1) Matyu 5.1-7.29 nab Yesus garah araq abigmanib gwalehim on mataw God ago maror anan gibilanta na agamukan usaq. 2) Matyu 10 nab Yesus in ago disaipel giqemid uliq-uliqgo leheq in ago suleq gibilen daqay haqad gamuk gibilanta na usaq. 3) Matyu 13 nab Yesus in mataw God ago maror giqisihunnan haqad gamuk awowun kabemmo bilamta na giqusaq. 4) Matyu 18 nab on mataw Yesus ago nan huritad osayta na in ezaq an wamuzad os daqay na ago agamukan usaq. 5) Matyu 24.1-25.46 nab uliq Jerusalem-ub Juda gigo Tempel meqniydaqta na agamukan teq Yesus in ta boldaqta na ago ananin usaqtamo.

### Yesus og kab gwahtimta awagamun

*Yesus asesan ginan  
(Luk 3.23-38)*

<sup>1</sup> Ari ka Yesus Kraiss asesan diqmo ginan. Yesus in Devit asenlubta. Teq Devit in Abraham asenlubta.

<sup>2</sup> Ari Abraham in Aisak amam.  
Sa Aisak in Jakob amam.

Sa Jakob in Juda amaqbaban nenaq gimam.

<sup>3</sup> Sa Juda in Peres ama Sera inaq gimam.  
Giger na ginen anan Tamar.

Sa Peres in Hesron amam.

Sa Hesron in Ram amam.

<sup>4</sup> Sa Ram in Aminadab amam.

Sa Aminadab in Nason amam.

Sa Nason in Salmon amam.

<sup>5</sup> Sa Salmon in Bowaz amam. Teq Bowaz anen Rahab.

Sa Bowaz in Obet amam. Teq Obet anen Rut.

Sa Obet in Jesi amam.

<sup>6</sup> Sa Jesi in Isrel gigo king Devit amam.

Teq Devit in Solomon amam. Solomon anen in kwaziqmo mat anan Uriya haqayta na awe iyim osta.

<sup>7</sup> Sa Solomon in Rehobowam amam.

Sa Rehobowam in Abiya amam.

Sa Abiya in Asa amam.

<sup>8</sup> Sa Asa in Jehosafat amam.

Sa Jehosafat in Jehoram amam.

Sa Jehoram in Usiya amam.

<sup>9</sup> Sa Usiya in Jotam amam.

Sa Jotam in Ahaz amam.

Sa Ahaz in Hesekiya amam.

<sup>10</sup> Sa Hesekiya in Manase amam.

Sa Manase in Emon amam.

Sa Emon in Josaya amam.

<sup>11</sup> Sa Josaya in Jekonaya amaqbaban nenaq gimam.

An Jekonaya amaqbaban nenaq gigo kamub Babiloniya mataw bolim Isrel nenaq bab emim in Isrel on mataw giwazim giqad lehim in gigo ogib giqeman in begbeg iyim osiyta.

<sup>12</sup> Ari in Isrel giqad Babiloniya-ib lehiyta nab Yesus asesan asor gwahtiqiyta na ginan kazaq:

Jekonaya in Sealtiyel amam.

Sa Sealtiyel in Zerubabel amam.

<sup>13</sup> Sa Zerubabel in Abiyut amam.

Sa Abiyut in Eliyakim amam.

Sa Eliyakim in Azor amam.

<sup>14</sup> Sa Azor in Zadok amam.

Sa Zadok in Akim amam.

Sa Akim in Eliyut amam.

<sup>15</sup> Sa Eliyut in Eleasar amam.

Sa Eleasar in Matan amam.

Sa Matan in Jakob amam.

<sup>16</sup> Sa Jakob in Josep amam.

An Josep in Mariya aduw iyan Mariya in

Yesus am, on mataw anan Kraiss\*

<sup>17</sup> Nazaq iyan Abraham asenlublib iyim bolim Devit-ib iyta nab Yesus asesan in 14 nazaq iyiy. Ad Devit asenlublib iyim bolim Isrel on mataw Babiloniya-ib begbeg iyim osiyta nab in asesan 14 nazaq iyiy. Ad Isrel

\* 1:16: Gamuk Kraiss ka alulin "God mat emid bo i gilumsihdaqta na amatin" haqayta. haqayta na.

on mataw Babiloniya-ib begbeg iyim osim bolim Kraiss gwahtimta nab in asesan 14 nazaq iyiyimo.

*Mariya in ago amun Yesus am  
(Luk 2.1-7)*

<sup>18</sup> Ari Yesus Kraiss anen amta awagamun kazaq. Mariya anan bilaqiy, In teq Josep waqdaq haqiy. Haqan teq Mariya ayow Josep inaq an a hi waqsamo God ago Bugaw Dimunta Mariya aholib bolan in agem tiqiy. <sup>19</sup> Agem iysa aduw Josep nazaq in ago aw ahol waqad anad emyaq, Ya Mariya tuhulosdaiq haqyaq. Haqad teq in mat dimunta iyim in awe mebay ugnan anad a hi bilaqyaq. In anad emyaq, Ya nan kabemmo a hi bilaqad kiskismo tuhulosdaiq haqyaq.

<sup>20</sup> Haqad in anad nazaq emad luwad kam araqaq in ussa ago sen qway aduganib Iyahta ago angelo araqaq in ameb tugwahtim. Gwahtiqim in bulon, Devit ases Josep ham. Ni ningo aw Mariya waqgo hi rab ham. Ni hurit ham. Amun nawa ningo aw agemab usaqta na God ago Bugaw Dimunta inmo ugta ham. <sup>21</sup> Ugan ningo aw na amun matta araqaq tiqemdaq ham. Emid ni anan Yesus biydaq ham. Na ezaqgo in teq ago on mataw gigo daq meqinta giwalemad gimen dante wastitayid in God agerab tileh daqay ham.

<sup>22-23</sup> Nazaq iyan daq na in Iyahta ago gamuk araqaq in kwaziqmo ago nantut aqezab eman gwahtimta na tuwolnet bug. Gamuk na kazaq bilam,

Ne huritiy ham. Aw araqaq mat inaq asit a hi usta na agem iyeq amun matta araqaq tiqemdaq haqad in bilam ham. Emid teq mataw amun na anan biyeq Emanuwel tihaq daqay haqad in bilam ham. *Aisaya 7.14*

Teq gamuk Emanuwel na alulin in kazaq: "God i ginaq osauqta" haqayta.

<sup>24</sup> Ari Josep usim ago sen qway na tihiqiy in tiqeram. Eraqim Iyahta ago angelo bulonta nazaqmo in emim awe Mariya tuwam. <sup>25</sup> Waqim teq in asit inaq a hi ussa le awe amun matta na tiqam. Eman Josep in amun anan Yesus haqad tibiy.

## 2

*Zeq gwalaqta ban mataw aseseqta Yesus ahol waqnan boliy*

<sup>1-2</sup> Ari Herot saw Judiya-ib king iyim ossa Mariya in saw nabmo uliq Betlehem-ub Yesus tiqam. Eman teq zeq gwalaqta ban kantri araqaq ago mataw aseseqta ginad awaz meqinta asor uliq Jerusalem-ub bolim mataw haresmo susumun negeq bilaq yaqay, Amun muturta Juda gigo king na edob diq osaq? haq yaqay. I in ago ulig saw zeq gwalaqta ban ahol waqim i nagunim

bol haq yaqay. I amun na ahol waqeq teq i amen lotu emam haqad i bol haq yaqay. <sup>3</sup> Haqsa Herot gamuk na huritim ritan. Sa Jerusalem-ub on mataw bunmo riteniyimo.

<sup>4</sup> An Herot in Isrel gigo mataw tamaz emayta gigo aseseqta na teq mataw Moses ago gunun hurit kemiya na bunmo gi-humab wolim tisusumun nag, Mat ne anan Kraiss haqayta na uliq edob diq gwahtiqdaqta? ham. <sup>5-6</sup> Haqan mataw aseseqta na buloniy, Saw Judiya-ib uliq anan Betlehem haqayta nab in gwahtiqdaqta haqiy. God ago nantut gamuk nazaq mar tonan usaqta haqiy. Gamuk na bilam,

Uliq Betlehem saw Judiya-ibta ham ni saw Judiya-ib uliq gibin inaqta na gi-haqenibta a haiq ham haqiy. Na ezaqgo ne gilikmanib teq maror araqaq ayahta tugwahtiqdaq ham haqiy. Gwahtiqeq teq in yaqgo on mataw Isrel tigiwamuzdaq haqad in bilam haqiy. *Maika 5.2*

<sup>7</sup> Haqan Herot gamuk na huritim in ulilemimmo nan eman saw zeq gwalaqta ban mataw ginad awaz meqinta na gigo hib tilah, in boleq Herot ahol waq daqay haqad. An mataw na bolan in tisusumun nag, Kam gineh diq ulig na gwahtim? ham.

<sup>8</sup> Haqan mataw aseseqta na tubuloniy. Bulonan Herot gigeqman Betlehem-ub lehsa in gibilan, Ne leheq amun na nagun naqmo diq hiqiyiy ham. Naguneq ne ahol waqeq teq boleq ya ibileniy ham. Ibilenid ta ya leheq in ayon lotu tiqemdaqmo ham.

<sup>9</sup> In nazaq gibilenan huritadmo in tilehiy. Lehad ulig teko zeq gwalaqta ban ahol waqiyta na in ahol a ta waqiy. Ahol waqsa ulig na ameb lehim bit amun usaqta nabmo titur. <sup>10</sup> Tursa in ulig na ahol waqad in ginad tidimniy naqmo diq hiqiy yaqay.

<sup>11</sup> Ginad dimniysa in le bit aduganib gwahtiqim amun anen Mariya inaq ossa tigibiyiy. Gibiyad in gibakbakan ulum laquwim ginobun mulbunim ogib woqsa in amun amen lotu emad abin tiqiluwiy. Ad teq in amun ayon naw a boliyta na hasim tuqugiy. Naw na gol teq masil dimunta teq nal ahuran dimun diqta na tuqugiy.

<sup>12</sup> Ugadmo in nab tuqusiy. Ussa in gigo sen qway aduganib God kazaq gibilan, Ne muleqeq Herot ago hib ta hi lehiy ham. Haqan in usim eraqim dan ta araqaq muzim giquliqab muleqim tilehiy.

*Josep ago aw amun nenaq Isip-ub wolehiy*

<sup>13</sup> Ari mataw aseseqta kantri araqaqta na muleqim gigo uliqab ta lehsa Josep a ta usim sen qwaysa Iyahta ago angelo tubulon, Ni eraq ham. Herot teq ningo amun na wol emnan tinagundaq ham. Ni

amun anen inaq giwaqeq giqad kantri Isip-ubmo tukeq woleh ham. Ni nab leheq ossa ya a ta nibilenid teq ni giqad ta boldaq ham. <sup>14</sup> Haqan tarom nabmo Josep eraqim amun na anen inaq giwaqim giqad Isip-ub tuwolehiy. <sup>15</sup> Wolehim ossa Herot tumoqan teq in ta muleqiy. Nazaq iyan daq na in Iyahta ago gamuk in kwaziqmo eman ago nantut aqezab gwahtimta na tuwolnet bug. Gamuk na bilam, Ya itatin lilewunid in Isip huloseq gwahtiqdaq haqad in bilam. *Hosea 11.1*

*King Herot bilaqan onmin matmatta susibta ginol eman moqiy*

<sup>16</sup> Ari zeq gwalaqta ban mataw ginad awaz meqinta na in Herot ame titonim dan ta ara q waqim in gigo uliqab ta lehiyta na ago Herot tuhurit. Huritim in agem meqin diq iysa in ago bab mataw asor giceman Betlehem-ub lehim in uliq sinsin nagab onmin matmatta ginen muturmo gicemiyta gigo ulig gigermo a hi iyayta nagan tiginol em bugiy. Na ezaqgo Herot in mataw marorta na susumun negim kam gineh diq ulig gwahtiqan in ahol waqiyta na ago in huritta iyan in onmin nazaqta ginol am. <sup>17</sup> Nazaq iyan daq na in kwaziqmo God ago nantut Jeremaya gamuk bilamta na tuwol net bug. In kazaq bilam, <sup>18</sup> Uliq Rama-ib aw ara q gaq wazad ek tonaq ham. Na Jakob awe Resel in ago onmin ginan gaq wazaq ham. Gaq waza on mataw anad waqsa in hulosaq ham. Na ezaqgo in ago onmin na tumoqiyta na ago ham. *Jeremaya 31.15*

*Josep ago aw amun nenaq Isip hulosisim Isrel-ib ta lehiy*

<sup>19-20</sup> Ari Josep Isip-ub ossa Herot tumom. Moqan teq Josep usim sen ta qwayan Iyahta ago angelo na gwahtiqim tubulon, Ni eraq ham. Mataw ningo amun wol eman bilaqiyta na tumoq bugiy ham. Ningo aw amun giwaqeq giqad Isrel-ib ta gwaleh ham. <sup>21</sup> Haqan in eraqim amun anen inaq giwaqim nenaq Isrel-ib tugwalehiy.

<sup>22</sup> Gwalehim Herot atatin Arkelaus amango ban waqim saw Judiya-ib on mataw gigo king iyim osa qta na ago Josep tuhurit. Huritim in saw Judiya-ib lehnan rab. Ad in usim sen ta qwayim gamuk ara q kazaq hurit. Ni saw Judiya-ib hi leh ham. Haqan Josep eraqim saw ta ara q anan Galiliy haqayta nab ago aw amun nenaq tilah. <sup>23</sup> Lehim in uliq anan Nasaret haqayta nab tuqosiy.

Nazaq iyan daq na in God ago gamuk ara q nantut bilaqiyta na tuwol net bug. Gamuk na bilam, In anan mat uliq Nasaret-ibta haq daqay ham.

### 3

*Jon mataw huz negyaqta na in on mataw gamuk gibilenyaaq*

*(Mak 1.2-8; Luk 3.1-18; Jon 1.19-28)*

<sup>1</sup> Ari Yesus uliq Nasaret-ib osim ayah tiqiy bugan kam nagab Jon mataw huz negyaqta na tugwahtim. Gwahtiqim in saw Judiya-ib og ara q amatawun haiqtab osad teq in on mataw God ago gamuk tigibilenyaaq. <sup>2</sup> In bilaqyaq, God ago maror bolim sinsin tiqiy haqyaq. Nazaq iyan ne ginad buliyeq gigo daq meqinta gileh ugiy haqyaq.

<sup>3</sup> Ari kwaziqmo God ago nantut Aisaya mat anan bilamta na amatin in Jon-mo. Teq Aisaya bilam,

Mat na aqez saw amatawun haiqtab lileyim bilaqyaq, Ne Iyahta ayon dan balaw toniy haqyaq ham. Ad ne in ayon dante na wastitayid titnonan haqyaq ham. *Aisaya 40.3*

<sup>4</sup> Haqan Jon gwahtiqim osad in ago tubusan karuw anan kamel haqayta na asan ulim emiyta. Teq in karuw asan asor am gan nog ahulib am wazeq luwyaqta. Luwad in ago didaq kasum teq garanab kubi q akokin neqyaqta.

<sup>5</sup> Ari Jon in God ago gamuk na bilaqsa uliq Jerusalem-ub teq saw Judiya-ib teq yuw Jordan aqurumnib uliq sinsin usayta nagab on mataw kabemmo Jon ago hib tubol yaqay. <sup>6</sup> Bolad in gigo daq teq ginad meqinta ulum hassa Jon giqad le yuw Jordan-ib gihuz negyaq.

<sup>7</sup> Sa Farisi teq Sadyusi kabemmo yuw huznan bolsa Jon tigibiy. Gibiyad in ginadad gibilan, Ne ured amidgotniz ham. God teq ne ginan agem meqniysa gimeqin tondaqta na nog gibilenan ne tukim gigbeb leh nog iyay? ham. <sup>8</sup> Ne ginad meqniysa gigem buliyeq teq ne gigo daq nazaqmo tubuliydaq ham. <sup>9</sup> Luweq ne ginad kazaq em daqay ham. I Abraham asenlulibta haq daqay ham. Nazaq iyan God anad dimunta igad a hi gimeqin tondaq haq daqay ham. Nazaq ne ginad hi emiy ham. Ya ne gibilenaq ham. God gig kag gibilenid buliyeq Abraham asenlulniz iygo azawayin in aholib usaqta ham. <sup>10</sup> Talgis ay abeqarib tuqusaq ham. Ay bunmo anon dimunta a hi emaqta na in qwayeq faqab hunegid le tuqoydaq ham.

<sup>11</sup> Ne ginad buliyim gigo daq meqinta gileh ugan teq ya ne yuwibmo huz negaiqta ham. Ari mat ara q teq ya ibeh boldaqta na abin in ya ibin uriyamta ham. Ya in ahaqenibta ham. In yaqgo Iyahta ham. Ya in ago kabibiy mat samanta ham. In boleq nagah giger God ago Bugaw Dimunta teq faq inaq gimalib ne tuhuz negdaq ham. <sup>12</sup> In abenab sabol wazim in

ago wit wolayta asawnib wit tigiluwiynan ham. Giluwiyyad in wit anagin dimunta na ginuweq ago wit abitnib humab tuwoldaq ham. Humab wolad in wit asan meqinta na ginuweq faq a hi miyaqtab hunegid le tuqoydaq ham.

*Jon Yesus huz ug  
(Mak 1.9-11; Luk 3.21-22)*

<sup>13</sup> Ari kam nab Yesus saw Galiliy hulosis Jon huz yagdaq haqad yuw Jordan-ib Jon ago hib tubol. <sup>14</sup> Bolan Jon huz ugnan hulosaq. Ad in bulon, Ya ni a hi huz nigdaiq ham. Ninmo teq ya huz yagdaq ham. Ni ezaq haqad yaqgo hib bol? ham. <sup>15</sup> Haqan Yesus amenin emim bulon, Nab iysa ya bilay nazaq muran ni em ham. I God anad muzinad daq dimunta ka tiqemam ham. Daq dimdimunta God anan anad bilaqagta na i ara q diq a hi hulosis ham. In nazaq haqanmo Jon aqez muzinin tuhuz ug. <sup>16</sup> Huz ugan Yesus hidmo yuw hulosis dubub gwaladmo ame gwalehim kait misireq nog iyim aqez hassa in ahol wam. Ahol waqsa God ago Bugaw Dimunta ah husta nog iyim hitiqim bolim aholib tisoqot. <sup>17</sup> Soqotan Heven-ib God aqez kazaq bilam, Mat ka ya itatin ham. Ya in anan inad bilaqsa ya igem dimun diq iyaqta ham.

#### 4

*Satan Yesus ulum wam  
(Mak 1.12-13; Luk 4.1-13)*

<sup>1</sup> Ari daq na abe ban God ago Bugaw Dimunta in Yesus waqim ad saw ara q amatawun haiqtab tilah, Satan in Yesus anad ulum waqdaq haqad. <sup>2</sup> A lehan saw nab Yesus didaq haiqmo ossa kam 40 nazaqmo tihiqiy. An abeb in agemnan tumoqyaq.

<sup>3</sup> In agemnan moqad ossa Mat I Gilum Waqagta na bolim tubulon, Ni God atatin iyeq teq ni gig ka bulonid in buliyeq bret iyid ni neq ham. <sup>4</sup> Haqan Yesus amenin emim bilam, God ago marib gamuk ara q kazaq bilam ham.

Bret amomo in mat eman kayeqmo a hi osa qta haqad in bilam ham. Mat God aqezab gamuk gwahtiqagta na bunmo huritim muzinad teq in kayeqmo osa qta haqad in bilam ham. *Lo 8.3*

<sup>5</sup> In nazaq bilaqan Satan in waqim ad God ago uliq tawonta Jerusalem-ub tilah. A lehim in Tempel abigmanib Yesus eman titur. <sup>6</sup> Tursa in bulon, God ago marib gamuk ara q kazaq bilam ham,

God in ago angelo gibilenid in tinibiy muz daqay haqad in bilam ham. Nibiy muzad in boleq gibenab tinisor daqay haqad in bilam ham. Luweq ni nisen gigib woltaydaq

haqad in bilam ham. *Buk Song  
91.11-12*

Nazaq iyan ni God atatin iyeq teq ni sortukeq woq ham. Woqsa ni nimam nilumsihsa ya nibiyiq ham. <sup>7</sup> Haqan Yesus bilam, Teq God ago marib gamuk ta ara q kazaq usaqmo ham. Na in bilam,

Iyahta in ningo God haqad in bilam ham. Nazaq iyan ni girerey emad in hi ulum waq haqad in bilam ham. *Lo 6.16*

<sup>8</sup> Haqanmo Satan in Yesus waqim ad garah ara q sisaqta abigmanib tugwalah. A gwalehim in kantri aseseqta gigo nagh dimdimunta bunmo tiqisihun bug. <sup>9</sup> Isihun bugad teq in Yesus bulon, Ni yaqmen nibakbakan ulum laquwad ya ibin iluwid teq ya nagh ko bunmo tinigdaiq ham. <sup>10</sup> Haqan Yesus bulon, Satan ni tuk ham. God ago marib gamuk kazaq bilam ham.

Iyahta in ningo God haqad in bilam ham. Ni in amomo abin iluwad ago kabiy emdaq haqad in bilam ham. *Lo 6.13*

<sup>11</sup> Ari Yesus nazaq haqanmo Satan in hulosisadmo tilah. Lehsa teq God ago angelo asor bolim Yesus tuqulumsihiy.

*Yesus saw Galiliy-ib ago kabiy alulin am  
(Mak 1.14-15; Luk 4.14-15)*

<sup>12</sup> Ari Yesus in Jon irquriya na huritim in muleqim saw Galiliy-ib tilah. <sup>13</sup> Lehim in uliq Nasaret hulosis le uliq Kapaneam-ub tuqos. Uliq Kapaneam na in Juda gisesan Zebulun ayow Naptaliy ina q gigo og amuganib yuw akurorqan anan Galiliy haqayta na aqurumnib usaqta. <sup>14</sup> Yesus le uliq Kapaneam-ub tuqossa teq daq na in God ago gamuk kwaziqmo nantut Aisaya bilamta na tuwol net bug. <sup>15</sup> Gamuk na bilam,

Saw Zebulun teq saw Naptaliy in yuw ayahta akurorqanta aqurumnib usaqta ham. Saw giger na in yuw Jordan aqurumnib kazaq ban usaqta ham. Teq mataw saw giger na ginan Galiliy haqayta ham. Ad in bilaqay, Saw nab on mataw en ta asor Juda a haiqta kabemmo Juda gilikmanib osay haqayta ham.

<sup>16</sup> On mataw saw nab osayta na in ginad a hi em hasad meqin diq os yaqayta ham. Bilaqne in romriqab os yaqayta nazaqmo ham. Teq muran mataw na saw anuwan ayahta ahol tuwaqiy ham. Saw anuwan na bilaqne tarommo saw hastitaysa zeq ahokan gwalaq nazaq nogta in ahol waqiy ham. *Aisaya 9.1-2*

<sup>17</sup> Ari Yesus uliq Kapaneam-ub lehim tuqosad teq in gamuk alulin emim tibilam, God ago maror bolim sinsin tiqiy ham.

Nazaq iyan ne ginad buliyeq gigo daq meqinta gileh ugij ham.

**Yesus in God ago maror  
agamukan bilaqad in on  
mataw gigo moq wastitayan  
dimniy yaqay**

*Yesus mataw aweweqmo gililewunan in muzim inaq lehiy*

*(Mak 1.16-20; Luk 5.1-11)*

<sup>18</sup> Ari Yesus yuw-kurorqan Galiliy aqu-rumun muzim lehad luwim in maqbab gigermo dob hunegim nabiq waqad luwsa tigibiy. Araq na anan Saimon. In anan araq Pita haqayta. Teq in amikqan anan Andru. In giger kabiy naqmo em yaqayta amatawun. <sup>19</sup> Yesus mataw giger na gibiyad gibilan, Ne ya imuzeq bolij ham. Bolsa ya giqisihunid ne nabiq waqayta nazaqmo teq ne mataw tigiwaq daqay ham. <sup>20</sup> Haqan hidmo giger na dob hulosan ussa in Yesus muzim inaq tilehiy.

<sup>21</sup> Lehad luwim Yesus maqbab gigermo a ta gibiy. Mataw na in Sebediy atatiniz Jems ama Jon inaq. In gimam inaq muyib dob wastitayad ossa Yesus giger na tigililewunmo. <sup>22</sup> Gililewunan hidmo in gimam hulosan muyib ossa in Yesus muzim inaq tilehiy.

*Yesus on mataw suleq negad teq in kabemmo giwastitayan dimniy yaqay*  
*(Luk 6.17-19)*

<sup>23</sup> Ari Yesus saw Galiliy-ib uliq bunmo lehad in on mataw gigo bit humab wolayta nab suleq negad in God ago maror og kab gwahtimta na agamukan tigibilyaq. In gamuk dimunta na gibilenad teq in gigo moq teq gihol asor meqniyta na bunmo tigiwastitayyaqmo. <sup>24</sup> In nazaq emsa abin saw Siriya-ib uliq bunmo tilah. Lehan mataw gigo moq inaq na bunmo giqad Yesus ago hib tubol yaqay. Mataw gigo moq amo amo inaqta na teq mataw gihol titiyaqta na teq mataw gihol gibensen agadan iyim in ogib woqim gibensen ayim gihol harara nemaqta na teq mataw gigo bugaw meqinta giholib usaqta na teq mataw gibensen momta nagan bunmo giqad bolid Yesus in giwastitayyaq. <sup>25</sup> Teq on mataw dauh biyahta saw Galiliy-ibta teq saw Dekapolis-ibta\* teq uliq Jerusalem-ubta teq saw Judiya-ibta teq yuw Jordan aqurumnibta na kabemmo in Yesus muzeq inaq leh yaqay.

\* 4:25: Nan Dekapolis ka alulin in 'Uliq 10' haqayta.

**5**

*Yesus on mataw tidimniyim osayta na ginan bilam*

*(Luk 6.20-23)*

<sup>1-2</sup> Ari Yesus on mataw dauh biyahmo gibiyad in garah araq abigmanib tugwalah. Gwalehim in os woqim ossa ago disaipel agerab tubolij. Bolan Yesus gamuk negim kazaq gibilan,

<sup>3</sup> Ni nog bilaqaq, Ya God ago maror aduganib gwahtiqdaiqta na ago ya mat dimun a haiq haqayta na ni tidimniyim osaq ham.

Na ezaqgo ni teq God ago maror aduganib gwahtiqeq anonon diqmo tuqosdaq ham.

<sup>4</sup> Ni nog ninad meqniysa gaqad osaqta na ni tidimniyim osaq ham.

Na ezaqgo God teq ni ninad tuwaqdaq ham.

<sup>5</sup> Ni nog daq haresmo a hi emad tok nemim luwaqta na ni tidimniyim osaq ham.

Na ezaqgo ni teq mat nibin inaqta tiqiydaq ham.

<sup>6</sup> Ni nog didaq teq yuwnan moqaqta nazaqmo ni God ago daq titnonta anan moqaqta na ni tidimniyim osaq ham.

Na ezaqgo God teq nagah ni anan moqaqta na nigid tiniyunindaq ham.

<sup>7</sup> Ni nog on mataw ginan ninad meqniysa ni ninad negaqta na ni tidimniyim osaq ham.

Na ezaqgo God teq ni ninan anad meqniysa in anad tinigdaqmo ham.

<sup>8</sup> Ni nog nigem dimun diqmo anumlan haiqmo usaqta na ni tidimniyim osaq ham.

Na ezaqgo ni teq God ahol tuwaqdaq ham.

<sup>9</sup> Ni nog mataw gilikmanib an mug teq an wol bayan woqaqta na ni tidimniyim osaq ham.

Na ezaqgo mataw teq ni ninan God atatin tihaq daqay ham.

<sup>10</sup> Ni nog God ago daq titnonta emsa mataw afaqan nigayta na ni tidimniyim osaq ham.

Na ezaqgo ni teq God ago maror aduganib gwahtiqeq anonon diqmo tuqosdaq ham.

<sup>11</sup> Ni nog niholib ya ibin ussa mataw nibilawunad teq in ni nimeqin tonad nimalib nan katiyta emayta na ni tidimniyim osaq ham. <sup>12</sup> Ni ninad dimniysa nigem dimun diq iyan ham. Na ezaqgo ningo naw ayahmo Heven-ib nawa nibaq tunim usaq ham. Kwaziqmo mataw in God ago nantut ginan gigem meqniysa in nazaqmo gimeqin ton yaqaymo ham.



*Kamis agon hiqiyta ago gamuk awowun  
(Mak 9.50; Luk 14.34-35)*

<sup>13</sup> Ari Yesus gamuk bilaq tutim a lehad in bilam, Kamis didaq eman aneq dimniyaqta nazaq nogmo ne og kab osayta ham. Teq kamis agon hiqiyid i ezaq tonid teq kamis na agon inaq a ta iydaq? ham. Kamis nazaqta na akabiyan haiqta ham. Mataw ogib hunegim gisenab tubaysisiyayta ham.

<sup>14</sup> Ne og kab saw anuwan nogta iyim osayta ham. Ne ginad emiy ham. Uliq araq garah abigmanib usad in ulilemim a hi usaqta ham. Na ezaqgo taromab mataw na gigo faq oysa mataw ahol waqayta ham.

<sup>15</sup> Ad nazaqmo mataw lam miderim kura-mab a hi sihenayta ham. Haiq ham. In lam miderim ulilib othenan oysa bit nab mataw bunmo anuwanib osayta ham.

<sup>16</sup> Ad nazaqmo ne gigo daq dimunta ne mataw gimeb ulalabmo emsa in ahol waqiy ham. Ne gigo daq dimunta na lam anuwan oy nog iysa mataw ahol waqad teq in ne Gimam Heven-ib Osaqta na abin tiqiluw daqay ham.

*Yesus God ago maror alulin anan bilam*

<sup>17</sup> Ne luweq ya inan bilaq daqay, Mat ka God ago maror Moses mar tonta na teq gamuk God ago nantut mar toniyta na baymuznan bol haq daqay ham. Nazaq ne ginad hi emiy ham. Ya gamuk na baymuzgo a hi bol ham. Ya gamuk na muzinad wol net buggo haqad ya bolta ham.

<sup>18</sup> Ya helmo ne gibilenaiq ham. Og kait inaq us tutsamo God ago maror agamukan asit diq araq a hi hiqiydaq ham. Mar na bun diqmo kuluwa-kuluwmo ussa le nagah bunmo in anan bilamta na tugwahtiqaq ham.

<sup>19</sup> Nazaq iyan mat God ago marib gunun araq amik diqta itiyonad teq in nazaqmo mataw giqisihunid in emsa mat na God ago maror aduganib abin amik diq iydaq ham. Ari mat God ago marib gunun bunmo muz bugad teq in nazaqmo mataw giqisihunid in emsa mat na God ago maror aduganib abin tidimniydaq ham.

<sup>20</sup> Ya ne gibilenaiq ham. Ne gigo daq titnonta ne emayta na in mataw Moses ago gunun hurit kemiya na giyogniz Farisi nenaq gigo daq a hi giquriyamid ne God ago maror aduganib le a hi gwahtiqaq daqay ham.

*Yesus an anobun wastitay ago bilam  
(Luk 12.57-59)*

<sup>21</sup> Teq ne gisesan gigo gunun araq ne huritiya na in kazaq bilam ham.

Ni mat wol emid hi moqan haqad in bilam ham. Ad mat in mat araq wol emid moqid mat na hazizirib leheq ago daq na amenin tuwaqdaq haqad in bilam ham.

<sup>22</sup> Ta teq yaqmo kazaq ne gibilenaiq ham. Ni nigem meqinta nimaqbab ugeq ni hazizirib titurdaqmo ham. Ad ni nimaqbab bilawuneq ni kaunsel ayahta na gimeb tugwahtiqaq ham. Ad ni nimaqbab buloneq bilaqdaq, Ni agadan haqeq ni saw faq oyad a hi miyaqta nab tilehdaq ham.

<sup>23-24</sup> Nazaq iyan ni God naw ugnan haqad ago tamaz em abanab naw tiqemad nab ni niyow meqin tonta na anadin emeq ni ningo naw ban nab hulosaq niyowgo hib leh ham. Leheq niyow inaq an anobun wastitayeq teq ni muleqeq ningo naw na God ug ham. <sup>25</sup> Ari ta mat araq nan nignan haqad ninaq hazizirib lehad hidmo danib ni inaq gamuk na wastitayiy ham. Luweq mat na niwazeq meqistret abenab niqemdaq ham. Niqemid meqistret niwazeq hurmey gibenab niqemid hurmey niwazeq bit giqirquran osaytab tiniqem daqay ham. <sup>26</sup> Ya helmo ne gibilenaiq ham. Ni bit na hidmo a hi hulosaq ham. Ni bit nab osad ningo daq meqinta amenin zay bugeq teq ni asanib tugwahtiqaq ham.

*Yesus mataw an alulib hureqayta na ginan bilam*

<sup>27</sup> Teq ne gisesan gigo gunun araq ne huritiya na in kazaq bilam ham.

Ni an alulib hureqeq inaq hi usiy haqad in bilam ham.

<sup>28</sup> Ta teq yaqmo kazaq ne gibilenaiq ham. Mat in aw tuwaqim teq in aw ta araq amebmo ahol waqad in utetad anadibmo bilaqqaq, Ya aw ko waqeq inaq us nagta haqqaqta, mat na in awe meqin tonim an haresmo huramta nog tiqiy ham. <sup>29</sup> Teq ni nimeqmagin niqabun kat nigid ni ninad helta hulosaq tonad ni nimeqmagin na othaseq hunegid lehan ham. Ni nihol asormo os dimuntab lehdaqta na in dimun ham. Ari ni nihol anaghan bunmo ussa in ni niwazeq nihunegid ni saw faq oyaqtab lehdaqta na in meqin diq ham.

<sup>30</sup> Teq ni niben niqabun kat nigid ni ninad helta hulosaq tonad ni niben na uroteq hunegid lehanmo ham. Ni nihol asormo os dimuntab lehdaqta na in dimun ham. Ari ni nihol anaghan bunmo ussa ni saw faq oyaqtab lehdaqta na in meqin diq ham.

*Yesus mataw aw tuwaqim teq muzayta na ginan bilam  
(Matyu 19.9; Mak 10.11-12; Luk 16.18)*

<sup>31</sup> Teq ne gisesan gigo gunun araq na in kazaq bilam ham.

Mat araq anadibmo awe tumuznan haqad in sansandek mar toneq awe ugad teq in tumuzdaq haqad in bilam ham.

<sup>32</sup> Ta teq yaqmo kazaq ne gibilenaiq ham. Mat araq awe in mat ta araq uteteq inaq

luwsa aduw diq na in aw na muznan in tumuzdaq ham. Ari in awe daq araƣ meqinta a hi emsa aduw anadib samanmo muzeƣ in awe na timeqin tondaq ham. Na ezaqgo in ago aw muzta na le mat muturta a ta waqim in bilaqne aduw hulosisim mat araƣ inaƣ luw nog iyaqta ham. Sa mat muturta na in aw aduw muzan osta na waqim inaƣ osad in bilaqne mat ta araƣ ago aw inaƣ luw nog iyaqtaqto ham.

*Mataw gigo gamuk zaway ugad helmo ulilib haqayta na ago Yesus bilam*

<sup>33</sup> Teƣ ne gisesan gigo gunun araƣ ne huritiyta na in kazaƣ bilam ham.

Ni nagah araƣ abinib Iyahta bulondaq, Helmo ya ninmen kabiy ka tiqemdaiq haqeq na ni nazaqmo diq tiqemdaq haqad in bilam ham. Ni a hi katiydaq haqad in bilam ham.

<sup>34</sup> Ta teƣ yaqmo kazaƣ ne gibilenaq ham. Ni ningo gamuk ulumsihnan haqad nagah araƣ anan hikidik biy ham. Ad ni helmo haqad Heven anan hi biymo ham. Na ezaqgo saw nab God in ago ban tawontab osad nagah bunmo giwamuzaqta ham. <sup>35</sup> Teƣ ne helmo haqad og ka anan hi biyiymo ham. Og ka in God asen abanan iysa in asen emim osaƣta ham. Teƣ ne helmo haqad uliq Jerusalem anan hi biyiymo ham. Uliq ayahta na in God ago king ago uliqta ham. <sup>36</sup> Teƣ ne helmo haqad negmo gihol anan hi biyiymo ham. Na ezaqgo ne gifagnib giqensan araƣ emid husta o dubta iygo ne zaway haiqgam ham. <sup>37</sup> Ne nan heltaqmo bilaqiy ham. Egemo ne bilaqiy ham. Teƣ haiqgammo ne bilaqiy ham. Ari gamuk hares mataw in gigo nan ulumsihnan haqad bilaqayta na mat meqinta naqmo in giqezab eman gwahtiqaqta ham.

*Mat araƣ nimeqin tonid ni amenin hi emgo Yesus bilam*  
(Luk 6.29-30)

<sup>38</sup> Teƣ ne gisesan gigo gunun araƣ ne huritiyta na in kazaƣ bilam ham.

Mat araƣ ni nime ulum hasid ni amenin in ame tuqulum hasdaqmo haqad in bilam ham. Teƣ mat araƣ ni nite wolworid ni amenin in ate tuwolwordaqmo haqad in bilam ham.

<sup>39</sup> Ta teƣ yaqmo ne kazaƣ gibilenaq ham. Mat araƣ ni nimeqin tonid ni amenin hi em ham. Ad mat araƣ ni nimanmanan niqabun wolid ni nihol buliyid in nimanmanan ninasaran wol tonanmo ham. <sup>40</sup> Mat araƣ ningo niholsihen waqnan haqad hurmey gigo sansandek na nigid ni niholsihen na ugad ni ningo saket inaƣmo ug ton ham. <sup>41</sup> Ad mat araƣ in ago es afaqanta kilomita amulikmo sorgo nibe yaheq nibilenid ni ago es na sor tuteq ad kilomita amulikmo a ta leh ham. <sup>42</sup> Mat

araƣ ningo nagah anan sunid na ni ug ham. Ad mat araƣ ningo nagah waqeq teƣ amenin emgo nibilenid na ni ugad hi baymuz ham.

*Ne gibabun ginan ginad bilaq ago adan*  
(Luk 6.27-28, 32-36)

<sup>43</sup> Teƣ ne gisesan gigo gunun araƣ ne huritiyta na in kazaƣ bilam ham.

Ni nimaqbabanmo gilowan tonad ningo bab ni nigem meqinta neg haqad in bilam ham.

<sup>44</sup> Ta teƣ yaqmo kazaƣ diq ne gibilenaq ham. Ne gigo bab ginan ginad bilaqan ham. Ad mataw ne gibilawunsa ne in gimen God bulonid in gidimun tonan ham. <sup>45</sup> Ne nazaq toneq teƣ ne Gimam Heven-ib Osaƣta na atatniz diqmo iyeq tuqos daqay ham. Gimam Iyahta na in ago zeƣ eman mataw meqmeqinta teƣ dimdimunta inaƣmo gimalib worireqaqta ham. Ad in urom eman mataw daq dimun emayta teƣ daq meqin emayta inaƣmo gigo hib woqaqtaqto ham. <sup>46</sup> Mat araƣ ni ninan anad bilaqsa ta ni in anan ninad bilaqta na in nagah a haiq ham. Ne daq na amenin araƣ God abenab a hi waq daqay ham. Mataw gibin meqinta takis waqayta na in nazaqmo emayta ham. <sup>47</sup> Teƣ ne giyognizmo nenaq gamuk emayta na in nagah a haiqmo ham. On mataw en ta asor Juda a haiqta nagan in nazaqmo emayta ham. <sup>48</sup> Nazaq iyan ne Gimam Heven-ib titnonimmo osaƣta nazaqmo diq ne titnoneqmo osiy ham.

## 6

*Mataw gina haiqta gilumsihgo agamukan*

<sup>1</sup> Ne gihol waz naqmo hiqiyiy ham. Luweq ne ginad em daqay, I daq dimdimunta mataw gimeb emsa in i gibiyad i gibin tiqiluw daqay haq daqay ham. Ne nazaq emeq ne Gimam Heven-ib Osaƣta na abenab naw araƣ dimunta a hi waq daqay ham.

<sup>2</sup> Mataw gimileq meqinta na in mataw gina haiqta nagah tinegnan haqad in mat araƣ bulonan in bit humab wolaytab teƣ uliq gemab taur ulam negaƣta ham. Mataw na ginad kazaƣ emay ham. Mat ka taur ulamsa mataw bunmo gime bo gibiyad i mataw ginaghan haiqta ka nagah negsa in i gibiyad gibin tiqiluw daqay haqayta ham. Ya ne gibilenaq ham. Mataw na in gigo naw nawaqmo tuwaqiy ham. In God abenab naw araƣ dimunta a ta hi waq daqay ham.

Nazaq iyan in emay nazaq ne hi emiy ham. <sup>3</sup> Ne mat ana haiqta ulumsihnan haqad ne mataw gime titnoneqmo ulumsihiy ham. <sup>4</sup> Ne nazaq ulilemeqmo daq emsa mataw ne a hi gibiy daqay ham. Id teƣ ne

Gimam daq ulilemabta ahol waqaqta na in ne naw dimunta tinegdaq ham.

*Mataw God inaq gamuk emad bulon daqayta na ago Yesus bilam*  
(Luk 11.2-4)

<sup>5</sup> Teq mataw gimileq meqinta na in God inaq gamuk emnan haqad in bit humab wolaytab teq uliq gemab ulalab turad in God inaq gamuk emayta ham. In ginad emay, I God inaq gamuk emsa mataw i gibiy daqay haqad in nazaq emayta ham. Ya helmo ne gibilenaig ham. Mataw na in gigo daq na anawun nawaqmo tuwaqiy ham. In God abenab nagah ara q dimunta a ta hi waq daqay ham.

Nazaq iyan in emay nazaq ne hi emiy ham. <sup>6</sup> Ne God inaq gamuk emnan haqad ne bit aduganib gwahtiqeq dan oteq teq ne Gimam ulilemim osa qta na inaq gamuk emiy ham. Sa ne Gimam daq ulilemabta ahol waqaqta na in amenin dimunta tinegdaq ham.

<sup>7</sup> On mataw en ta asor Juda a haiqta nagan in gigo god katiyta inaq gamuk emad in gamuk samanta kabemmo inaqmo bilaqim a lehayta ham. In ginad emay, I daq kazaq emsa teq i gigo god i giqez tuhuritdaq haqayta ham. <sup>8</sup> Ta teq ne in gigo daq na hi muziniy ham. Na ezaqgo ne nagah ara q ago siqim iyayta na anan Gimam Iyah a hi bulonsamo in tekomo tuhuritta ham. <sup>9</sup> Ari ne God inaq gamuk emnan ne kazaq buloniy ham.

I Gimam Iyah Heven-ib osa qta, Ni on mataw bunmo giqemid in ni ninan waziniy.

<sup>10</sup> Ad ni ningo maror emid og kab gwah-tiqan.

Sa mataw Heven-ib ninad muzinayta nazaqmo ni mataw og kabta giqemid in ni ninad muziniymo.

<sup>11</sup> Kam amulik-mulikmo ago didaqta ni ig.

<sup>12</sup> Ad mataw i gigo hib daq meqinta emsa i walemad anadin a ta hi emauqta nazaqmo ni i gigo daq meqinta giwalemad anadin ta hi emmo.

<sup>13</sup> Nagah i gilum waqdaqta na ni wasihid i giholib hi gwahtiqan.

Sa mat meqinta na i gimeqin tonsa ni i gilumsih.

<sup>14</sup> Ad Yesus bilam, Ne huritiy ham. Mataw ne gimeqin tonsa ne in gigo daq na walemad anadin a ta hi emsa ne Gimam Heven-ib Osa qta na in ne gigo daq meqinta tigiwalemdaqmo ham. <sup>15</sup> Ari mataw ne gimeqin tonsa ne in gigo daq na a hi walemsa Gimam Iyah in ne gigo daq meqinta a hi giwalemdaqmo ham.

*Yesus mataw didaq udinayta na ago bilam*

<sup>16</sup> Mataw gimileq meqinta na in didaq tuqudinad in ginobun iyim giwaq meqin diq iysa luwayta ham. In ginad emay, I ginobun iyeq luwsa mataw i tigibiy daqay haqad in nazaq emayta ham. Ya helmo ne gibilenaig ham. Mataw na in gigo naw nawaqmo tuwaqiy ham. In God abenab naw ara q dimunta a ta hi waq daqay ham.

Nazaq iyan in emay nazaq ne hi emiy ham. <sup>17</sup> Ne didaq tuqudinnan haqad ne ginobun suholeq giqensan otsireqiy ham. <sup>18</sup> Ne nazaq emid teq mataw ne didaq udinayta na ago a hi hurit daqay ham. Ta teq ne Gimam ulilemim osa qta na in amomo ne tigibiydaq ham. Ad ne Gimam daq ulilemabta ahol waqaqta na in ne gigo daq dimunta na amenin dimuntamo tinegdaq ham.

*Mataw Heven ago nagah dimunta gi-holyon humab emgo Yesus bilam*  
(Luk 12.33-34)

<sup>19</sup> Ari Yesus kazaq bilam, Ne giholyon nagah dimdimunta og kab humab hi emiy ham. Og kab bidbid teq hurhur in nagah meqin tonayta ham. Teq mataw girin inaqta na in gel wolim gwahtiqim nagah rin tonayta ham. <sup>20</sup> Nazaq iyan ne Heven-ibmo nagah dimdimunta giholyon humab emiy ham. Uliq nab bidbid teq hurhur haiqta ham. Teq mataw gel wolim gwahtiqim nagah rin tonayta na haiqmo ham. <sup>21</sup> Ne ginad emiy ham. Uliq edob ne gigo nagah dimdimunta usdaqta nabmo teq ne ginad ayahmo tuqusdaqmo ham.

*Ni nimeqnaqin nihol anuwan ugaqta*

(Luk 11.34-36)

<sup>22</sup> Ni nimeqnaqin nihol bunmo anuwan ugaqta ham. Ni nime dimun iyid ni nihol bunmo anuwan inaq tiqiydaq ham.

<sup>23</sup> Ari ni nime meqin iyid ni nihol bunmo aromriq inaq tiqiydaq ham. Nazaq iyan ni nimuganib anuwan us nagta na in romriq iyid romriq na in ni niholib ayahmo diq tiqiydaq ham.

*Mat ara q mataw aseseqta giger gigo kabibiy mat a hi iydaq*

(Luk 16.13)

<sup>24</sup> Ari mat ara q in mataw aseseqta giger giqez a hi muzdaqta ham. In nazaq tonad luweq in ara q agem meqinta ugad ara q in agem dimunta ugdaq ham. Teq in ara q anadin diq emad ara q in gileh ugdaq ham. Nazaq iyan ne mani anadin diq emad ne God aqez a hi muzin daqaymo ham.

*Yesus mataw ginad meqniysa ginad kabemmo emayta na ginan bilam*

(Luk 12.22-31)

<sup>25</sup> Nazaq iyan ya ne gibilenaig ham. Ne gigo luw os anan ginad hareshmo hi emiy ham. Ad "I teq naga neqam?" o "I teq

naga uluwam?” haqad ne nazaq ginad hi emiy ham. Teq ne giholgo ginad haresmo hi emiy mo ham. Ad “I teq naga amalib i gihol isiham?” haqad nazaq ne ginad hi emiy ham. Ne didaq neqgomo og kab a hi osayta ham. Ad ne gihol in tubusanib sihengomo a hi usaqta ham.

<sup>26</sup> Ne ah gibiyiy ham. In didaq a hi leyayta ham. Ad in didaq tayim didaq abitnib a hi emaytamo ham. Teq ne Gimam Heven-ib Osaqta inmo didaq negsa neqayta ham. Ari in nagah amik diqta na anononmo wamuzaqta nazaqmo in ne a hi giwamuzdaqmo ye? ham. Haiqqam ham. Ne ah ayahmo giquiryamiyta ham. <sup>27</sup> Ne gilikmanib nog diq inmo ahol anan anad meqniysa in ahol moqdaqta akaman na ulum riyawuneq asitmo a ta osdaq? ham. Na haiqqam ham.

<sup>28</sup> Ad nagaqgo ne tubusango ginad haresmo emayta? ham. Ne mazrewrew kabiyab gwalqaqta na anadin emiy ham. Teq in ezaq gwalqaqta na ne ahol waq kemiy ham. In aholyon kabiy araq a hi emaqta ham. Ad in aholyon tubusan a hi initaqtamo ham. <sup>29</sup> Teq ya ne gibilenaq ham. Kwaziqmo Isrel gigo king Solomon in ago balaw dimdimunta aholib emyaqta ham. Ta teq in ago balaw araq dimun diqta mazrewrew nogta haiqqam ham. <sup>30</sup> Muran mazrewrew na kabiyab gwalim turaq ham. Sa babeq mataw uroteq faqab ginuwid gwaldaq ham. On mataw, ne ginad God anan helmo haqayta na in amik diq ham. God nagah samanta na balaw tonad in nazaqmo ne giholyon tubusan a hi negdaqmo ye? ham. Haiqqam ham. In tinegdaq ham.

<sup>31-32</sup> Ne nagah osgota na a hi waqeq ne meqin osdaqayta na ago ne Gimam Heven-ib osaqta na tuhurit ham. Nazaq iyan ne ginad haresmo emad, “I teq naga neqam?” o “I teq naga uluwam?” nazaq ne ginad hi emiy ham. On mataw en ta asor Juda a haiqta nagan in nagah osgota na waqgo haqad giholtuw bulad luwayta ham. <sup>33</sup> Teq negmo nazaq hi emiy ham. Itureqmo ne God ago maror aduganib gwahtiqeq in ago daq dimdimunta emgo ne giholtuw bulad luwiy ham. Ne nazaq emsa teq God nagah osgota na bunmo inaqmo tinegdaq ham.

<sup>34</sup> Nazaq iyan ne kam babeqta na anadin diq hi emiy ham. Kam babeqta na inmo ago afaqan araq inaqtam ham. Luweq ne babeq ago afaqanta na waqeq kam muranta na ago inaq wastoneq ne loyinsa in afaqan ayah diqta iydq ham.

## 7

*Ne on mataw gigo daq hi ulum kemiy  
(Luk 6.37-38, 41-42)*

<sup>1</sup> Ne mataw gigo daq ulum kemad, “Ka mataw meqin” nazaq ne ginan hi bilaqiy ham. Luweq God ne gigo daq ulum kemad ne ginan nazaq bilaqdaqmo ham. <sup>2</sup> Na ezaqgo ne mataw gigo daq ulum kemim ginan bilaqayta nazaqmo teq God in ne gigo daq ulum kemeq ne ginan bilaqdaqmo ham. Daq ezaqta ne mataw gimen emayta nazaqmo God in amenin ne gimen tiqemdaqmo ham. <sup>3</sup> Nagaqgo ni niyow ameb rohroh amik diqta ussa ni ahol waqad ta ninmo nimeb ay anabun ayahta usaqta na ni ahol a hi waqaq? ham. <sup>4</sup> Ni ninad ezaq emad ni niyow bulonaq, Ya iyow haqaq ni nimeb rohroh usaqta na ya walemnan haqaq? ham. Haqad ta ninmo nimeb ay anabun ayahta na usaq ham. <sup>5</sup> Ni nimileq meqin diq ham. Itureqmo ninmo nimeb ay anabun usaqta na walemeq nime saw anononmo ahol waqad teq ni le niyow ameb rohroh usaqta na walem ham.

<sup>6</sup> Ne gihol waziy ham. Mataw asor in bilaqne bul gaun nog ham. Ne God ago gamuk dimdimunta negsa in bilaq daqay, Na nagah amik diq haq daqay ham. Bilaqne popkok dimdimunta anawun ayahmota hunegan bul ginognib woqan in ahol waqad bay ninalayta nazaq nog ham. Ad ne mataw meqinta na ginan maqbab haqsa abeb in gihol buliyeq ne gibabun diq iyeq teq in ne tigimeqin ton daqay ham. Bilaqne gaun anamreniz didaq negsa in gihol buliyim gimugayta nazaq nog ham.

*Mataw God bulonsa in nagah  
dimdimunta negaqtta  
(Luk 11.9-13)*

<sup>7</sup> Ne nagah araq anan God susumun ugid teq in tinegdaq ham. Ne nagah araq nagueq teq ne ahol tuwaq daqay ham. Ne dan ez wolhamsa teq God ne giyon dan tihās negdaq ham. <sup>8</sup> On mataw nagah anan God susumun uqayta na in nagah na waqayta ham. Teq on mataw nagah nagunayta na in nagah na ahol waqayta ham. Ad on mataw dan ez wolhamayta na God teq in giyon dan tihās negdaq ham. <sup>9</sup> Ne gilikmanib mat araq atatin in bret anan amam bulonid amam gig ugdaq e? ham. Haiqqam ham. <sup>10</sup> Ad in ago amun na nabiq anan bulonsa amam in nagah ahulinaqta gimugaqta araq waqeq ugdaq e? ham. Na haiqmo ham. <sup>11</sup> Ne mataw ginad meqinta usaqta ham. Teq ne gigo onnin nagah dimdimunta neggo ne tuhurit kemiya ham. Ari ne Gimam Heven-ib osaqta na in nazaq ago on mataw a hi gitondaqmo ye? ham. Haiq ham. On mataw in Gimam Iyahta na inaq gamuk bilaqad bulonsa in ago nagah dimdimun diqta tinegdaq ham. <sup>12</sup> Nazaq iyan on

mataw in ne ezaq gitonid ne ginad dimniy-daqta nazaqmo ne in gigo hib daq emiymo ham. Daq naqmo in God ago maror Moses mar tonta na teq God ago nantut gamuk mar toniyta na bunmo alulin diq ham.

*Ne dan ez amikta nab le gwahtiqliy  
(Luk 13.24)*

<sup>13</sup> Ne dan ez amik diqta nab le gwahtiqliy ham. Dan mataw muzim le hiqiyayta na agarahin haiqta ham. Teq dan meqinta na ago dan ez ayahmo diqta ham. Nazaq iyan on mataw kabemmo dan ez nabmo le gwahtiqliyayta ham. <sup>14</sup> Ari dan ni muzeq le saw kayeqmo kuluwa-kuluwmo osaytab gwahtiqliydaqta na in garah aseseqta kabemmo inaqta ham. Ad dan dimunta na ago dan ez amik diqta ham. Nazaq iyan on mataw gilikmanib amulik-mulikmo in dan ez na nagunim ahol waqayta ham.

*Ne nantut katiyta na gigo gihol asawan woltayiy  
(Luk 6.43-44; 13.25-27)*

<sup>15</sup> Ne nantut katiyta na ginan ne gihol asawan woltayiy ham. Ne mataw na giloyinsa in mataw midemqan diqta bilaqne sipsip nog iy daqayta ham. Teq in ginadmo diq na in ne kat negeq ne gimeqin tonnan ham. Bilaqne gaun kwasikta sipsip gimug emim gineqayta nazaq nog ham. <sup>16</sup> Mataw katiyta na gigo kabiy anon emsa teq ne in gigo tuhurit kem daqay ham. Mataw am اساسiqin inaqta ahulib wain anagin waqayta ye? ham. Teq in sisihun meqinta abiyoran inaqta na amuganib ay fik anon waqayta ye? ham. Haiqmo diq ham. <sup>17</sup> Na nazaqmo ham. Ay dimdimunta bunmo ginon dimunta emayta ham. Teq ay meqinta anon meqinta emaqta ham. <sup>18</sup> Ay dimunta anon meqinta a hi emdaqta ham. Teq ay meqinta anon dimunta a hi emdaqta ham. <sup>19</sup> Ay bunmo anon dimunta a hi emayta na mataw in qwayim hunegan faqab lehayta ham. <sup>20</sup> Nazaq iyan ne mataw katiyta na gigo kabiy anon emsa ahol waqad teq ne in gigo tuhurit kem daqay ham.

<sup>21</sup> On mataw kabemmo ya inan samanta biyim bilaqay, Iyahta, Iyahta haqayta ham. In ginad emay, I Yesus anan Iyahta biyadmo i God ago maror aduganib le tugwahtiqliqam haqay ham. Hikidik ham. Mat ya imam anad muzaqta naqmo in ya imam Heven-ib osaqta na ago maror aduganib tugwahtiqliydaqta ham. <sup>22</sup> Abeb mataw kabemmo yaqgo maror aduganib gwahtiqliqan tonadmo in ya ibileneq bilaq daqay, Iyahta, Iyahta haq daqay ham. I ogib osad ni nibinib nagah abeb teq gwahtiqliydaqta na ago i bilaqad luwta haq daqay ham. Teq i nibinib mataw giholib bugaw meqinta gimuzta haq daqay ham. Ad i nibinib

daq azawayin inaqta kabemmo emta haq daqay ham. <sup>23</sup> Haqid teq ya gibilendaq, Ya ne gigo a hi hurit haqdaq ham. Ne mataw daq meqinta emayta ne ya ihuloseq kozaq lehiy haqdaq ham.

*Bit emgo adan gigermo  
(Luk 6.47-49)*

<sup>24</sup> Nazaq iyan on mataw yaqgo gamuk ka huritim muzinayta na in bilaqne mat ago bit gig ayahta amalib amta nazaq nog iy daqay ham. <sup>25</sup> Mat na bit tiqeman teq urom ayahmo wom ham. Woqsa uq hitiqad tim ayahta inaqmo eraqim sibim le bit na othasan teq haiq ham. Bit na a hi wom ham. Na ezaqgo mat na gigo diq amalib ago bit alulin am ham.

<sup>26</sup> Ari on mataw yaqgo gamuk ka huritim teq a hi muzinayta na in bilaqne mat agadanta ago bit ibur amalib amta nazaq nog iy daqay ham. <sup>27</sup> Mat na bit tiqeman teq urom ayahta woqan uq hitim ham. Uq hitiqad tim inaqmo sibim le bit othasan bit na atoranno woqim timeqniy has ham.

<sup>28</sup> Ari Yesus gamuk na bunmo bilaq bugan tihiqiyon on mataw dauh biyahta na in ago suleq huritim in gihol turuh nem yaqay. <sup>29</sup> Na ezaqgo Yesus ago gamuk in mataw Moses ago gunun hurit kemiya na gigo gamuk nog a hi iyyaq. In ago gamuk bilaqne God inmo abin ugan in suleq bilamta nazaq nog iyyaq.

## 8

*Yesus mat araq ago moq lepra inaqta wastitayan dimniy*

*(Mak 1.40-44; Luk 5.12-14)*

<sup>1</sup> Ari Yesus garah nab osim gewoqanmo on mataw dauh kabemmo muzim inaq tileh yaqay. <sup>2</sup> Lehsa mat araq ago moq lepra inaqta bolim Yesus agerab abakbakan ulum laquwim turad teq in bulon, Iyahta ham ni ninad bilaqsa teq ni ya iwastitayid ya God ameb isan anumlan ka tihiqiydaq ham. <sup>3</sup> Haqan Yesus aben itiwunim mat na wazad bulon, Ya inad bilaq ham. Ni nisanib ninumlan usaqta na hiqiyon ham. Haqan muran diq nawaqmo mat na ago moq lepra tihiqiy. <sup>4</sup> An Yesus in mat na adek wazim bulon, Daq kawa ya emta ka ago ni mat araq hikidik bulon ham. Ni leheq mat tamaz emaqta naqmo nihol isihun ham. Isihunad teq Moses bilamta nazaqmo ni nihol anawun em ham. Emid teq mataw ningo moq tihiqiyta na ago tuhurit daqay ham.

*Yesus bab mataw gigo ayahta araq ago kabibiy mat wastitayan ahol tidimniy*

*(Luk 7.1-10)*

<sup>5-6</sup> Ari Yesus le uliq Kapaneam-ub tugwahtiqliqan teq Rom gigo bab mataw 100

nazaq gigo ayahta araq bolim in anad awaz meqin amalib Yesus bulonim bilam, Iyahta ham. Yaqgo kabibiy mat kowa bitab moqad usaq ham. In abensen moqan ahol titiy naqmo hiqiysa usaq ham. <sup>7</sup> Haqan Yesus bulon. Ya teq leheq wastitayid in tidimniydaq ham. <sup>8</sup> Haqan bab mataw gigo ayahta na amenin emim bilam, Iyahta ham ni yaqgo bit aduganib le gwahtiqaqta na ago ya mat dimun a haiq ham. Ya inad emaiq ham ni kabmo turad gamuk bilaqidmo yaqgo kabibiy mat na ahol tidimniydaq ham. <sup>9</sup> Na ezaqgo ya inaqmo yaqgo mat danmebta ahaqenib osaiqta ham. Ad yaqgo mataw bab emayta na in ya ihaqenib osaytamo ham. Ossa ya araq bulonaiq, “Ni leh” haqsa in lehaqta ham. Teq ya araq bulonaiq, “Ni bol” haqsa in bolaqtamo ham. Ad yaqgo kabibiy mat bulonaiq, “Ni kabiy em” haqsa in kabiy na emaqta ham. Nazaq iyan ya inad emaiq ham ni gamukmo bilaqid yaqgo kabibiy mat na ahol tidimniydaq haqaiq ham.

<sup>10</sup> Haqan Yesus mat na ago gamuk huritim ahol turuh nam. Ad in mataw muzim inaq bolyta na gibilan, Ya ne gibilenaiq ham. Mat ka in juda mat a haiqta ham. Teq in juda mataw bunmo giquriyamim ya inan helmo diq haqaiqta ham. <sup>11</sup> Ad ya ne gibilenaiq ham. Zeq gwalaqta ban teq zeq wolehaqta ban on mataw amo amota kabemmo boleq in Abraham, Aisak teq Jakob nenaq God ago maror aduganib didaq neqad tuqos daqay ham. <sup>12</sup> Ari on mataw Gimam Iyah ago maror aduganib danmeb le gwahti qnagiya na God in gimuzid asanib gwahti qe q romriqab tuqos daqay ham. Osad in ginad meqniysa gaqad gite guruwad os daqay ham. <sup>13</sup> Haqad in bab mataw gigo amebta na bulon, Ni leh ham. Ni ninad helta usaqta nazaqmo in tugwahti qda q ham. An kam nabmo mat na ago kabibiy mat na ahol tidimniy.

*Yesus Pita alen aqawun wastitayan dimniy*

*(Mak 1.29-31; Luk 4.38-39)*

<sup>14</sup> Ari Yesus le Pita ago bitab gwahti qim in Pita alen asan afan iyad banab ussa ahol wam. <sup>15</sup> Ahol waqad in le aw na abenab wazanmo in asan afan iyim usta na tuhulos ug. Hulos uganmo in eraqim Yesus amen didaq anaran usta na waqim a bolim tuqug.

*Yesus on mataw gigo moq inaqta kabemmo giwastitayan dimniyiy*

*(Mak 1.32-34; Luk 4.40-41)*

<sup>16</sup> Ari teq zeq wolehsa imisor diq tiqiyam mataw in giyogniz kabemmo giholib bugaw meqinta usaqta na giwaqim giqad Yesus ago hib tuboliy. A bolan Yesus gamukmo bilaqsa bugaw meqinta na tituk yaqay. Sa in mataw gigo moq inaq

na giwastitayan gihol tidimniy yaqaymo. <sup>17</sup> Daq nazaq gwahti qad in God ago nantut Aisaya aqezab gamuk gwahtimta na tuwol net bug. Gamuk na bilam,

In i gigo moq teq gihol asor meqniya na inmo ahol ugim soran i gihol tidimniy ham. *Aisaya 53.4*

*Yesus muzeq inaq lehgo adan (Luk 9.57-60)*

<sup>18</sup> Ari on mataw dauh biyahta Yesus lilut ugim tursa in gibiyad ago disaipel gibilan, I yuw urumun kozaq ban lehuq ham. <sup>19</sup> Haqad in tilehsamo mat araq Moses ago gunun hurit kamta na bolim Yesus bulon, Tisa ham. Uliq saw edob ni lehda qta nab ya nimuzeq ninaq tilehdai qmo ham. <sup>20</sup> Haqan Yesus bulon, Ni ninad em haseq teq ya imuzeq bol ham. Gaun kwasikta kuduqib usayta ham. Ah in gigo rir inaqta ham. Ari Mat Atatin in ago us osad anamur emdaqta abanan araq diq haiqqam ham.

<sup>21</sup> Haqan teq Yesus ago disaipel ta araq bolim bulon, Iyahta ham ni ya ihulossa ya leheq imam tumomta na yay tonad teq ya boleq nimuzeq ninaq tilehdai q ham. <sup>22</sup> Haqan Yesus bilam, Nab iyan ham. Mataw giwitan moqim usad in God anadin a hi emayta na in gimo an wamuzad an yay toniy ham. Sa ni ya imuzeq bol ham.

*Yesus bilaqan tim ayahta kute nam (Mak 4.35-41; Luk 8.22-25)*

<sup>23</sup> Ari Yesus muyib gwalsa in ago disaipel muzim inaq tugwaliymo. <sup>24</sup> Gwalim lehadmo Yesus ame rursa wo muyib ussa tim ayahta eraqim kamis wolan muy isihnan tonya q. <sup>25</sup> Isihnan tonsa disaipel bolim Yesus bulonan tigeram. Eraqan in buloniy, Iyahta haqiy ni i gilumsih haqiy. I tumoqnar tona uq haqiy. <sup>26</sup> Haqan in gibilan, Ne nagaqgo rabay? ham. Ne ginad helta na amik diq ham. Haqad in eraqim tim kamis inaq ginadan in kute tinemiy. <sup>27</sup> Kute nemanmo disaipel ahol waqad in gihol riten lam. Admo in bilaqiy, Ka naga matin diq? haqiy. Tim yuw inaq in aqez huritayta haqiy.

*Yesus mataw giger giholib bugaw meqinta gimuz*

*(Mak 5.1-17; Luk 8.26-37)*

<sup>28</sup> Ari Yesus le yuw-kurorqan Galiliy aqu-rumun kozaq ban tugwahtim, uliq Gadara gigo og saw ban. Gwahti qanmo mataw giholib bugaw meqinta usayta giger in hodhod hulosis bolim danib Yesus ahol tuwaqiy. Mataw na agadan iyim saw nab kwasik diq iyim luwsa on mataw dan nab a hikidik luw yaqayta. <sup>29</sup> In giger Yesus ahol waqadmo lileyim bilaqiy, God atatin haqiy ni i ezaq gitonnan bol? haqiy. I

meqniyamta akaman na a hi gwahtiqsamo ni i gimeqin tonnan kab bolya haqiy.

<sup>30</sup> In nazaq haqsamo bul gihumaban araq ayahta pesan nogmo didaq neqad turiy. <sup>31</sup> Tursa bugaw meqinta nagan ginad meqniysa Yesus bulon yaqay, Ni i gimuznan iysun ni i gimuzid bul gihumab inaq ko gimuganib lehuq haq yaqay. <sup>32</sup> Haqsa Yesus gibilan, Ne nabmo lehiy ham. Haqanmo mataw giger giholib bugaw giqusiya na gwahtiqim le bul na gimuganib woqanmo bul bunmo sibitayim lehim garah asibsibranib bay hilek tonim yuwmeb woqim tumoq bugiy.

<sup>33</sup> An mataw bul giwamuzim osiyta na in daq na ahol waqad in tukim giquliqab tilehiy. Lehim in mataw giholib bugaw meqinta usim teq gihulos negiyta na ago ananin in gigo walmataw tigibilen bugiy. <sup>34</sup> Gibilenan in huritim uliq na huload bunmo Yesus ahol waqnan tilehiy. Lehim in Yesus abe yahad buloniy, Ni saw ka huloseq leh haqiy.

## 9

*Yesus mat araq abensen aditin moq bugta wastitayan dimniy*

*(Mak 2.1-12; Luk 5.17-26)*

<sup>1</sup> Ari Yesus muyib gwalim yuw urotim urum kozaq ban le gwahtiqim in ago uliqab tilah. <sup>2</sup> Lehanmo mataw asor in mat araq abensen aditin tumoq bugta banab ussa in sorim a bolsa Yesus tigibiy. Gibiyad in mataw na ginad helta ahol waqadmo in mat moqaqta na tubulon, Yaqgo amun ham ni ninad hi meqniyan ham. Ya ningo daq meqinta bunmo tigiwalem bug ham. <sup>3</sup> Haqan mataw Moses ago gunun hurit kemiya ta asor in gamuk na huritim in gihol bulonim bilaq yaqay, Mat ko in God bilawunad ago ban waq nog iyaq haq yaqay. <sup>4</sup> In nazaq ginad emsamo Yesus tuhurit. Huritim in bilam, Nagaqgo ne ginad meqinta nazaq emay? ham. <sup>5</sup> Ya naga gamukin bilaqid teq ne nan a hi yag daqay? ham. "Ya ningo daq meqinta tigiwalem" haqdaiq o "Ni eraqeq loq gel" haqdaiq? ham. <sup>6</sup> Teq Mat Atatin in og kab daq meqinta walemgo azawayin aholib usaqta na ago ne hurit daqay haqad ya kazaq diq bilaqdaiq ham. Haqad in mat abensen moqan banab usaqta na tubulon, Ni eraqeq ningo us ban waqeq ad ningo bitab a leh ham. <sup>7</sup> Haqan mat na eraqimmo ago bitab tilah. <sup>8</sup> An on mataw nab turiyta na in nagah na ahol waqim tirabiy. Rabad teq in God abin tiqiluw yaqay. Na ezaqgo God inmo ago zaway na eman mataw gigo hib ulal iyta na ago.

*Yesus Matyu bulonan in muzim inaq lah*  
*(Mak 2.13-17; Luk 5.27-32)*

<sup>9</sup> Ari Yesus lehad luwim in mat araq anan Matyu haqayta takis abitnib ossa ahol tuwam. Ahol waqadmo in bulon, Ni ya imuzeq bol ham. Haqan Matyu eraqim Yesus muzim inaq tilah.

<sup>10</sup> An daq na abe ban Yesus le bitab didaq neqad tuqos. Ossa mataw gibin meqinta takis waqayta teq mataw daq meqinta emayta nenaq kabemmo bolim Yesus ago disaipel nenaq didaq neqad tuqosiyimo.

<sup>11</sup> Ossa Farisi nazaq gibiyad in Yesus ago disaipel tisuusun negiy, Doq tonnan ne gigo tisa in mataw takis waqayta ko teq mataw daq meqinta emayta ko nenaq didaq neqad osaq? haqiy. <sup>12</sup> In nazaq haqan Yesus huritim gibilan, Mataw gigo moq haiqta na in le dokta ahol a hi waqayta ham. Mataw gigo moq inaqta naqmo dokta ago hib lehayta ham. <sup>13</sup> Ne leheq God ago marib gamuk araq usaqta ka ago alulin diq ne hurit kemiy ham. Gamuk nab God bilam, Ne yaqmen tamaz emad karuw anat urotayta na ya hulosaq haqad in bilam ham. Ne mataw gigem neg daqayta naqmo ya ahol waqnan inad bilaqayta haqad in bilam ham. *Hosea 6.6*

Haqad Yesus bilam, Nazaq iyan ya on mataw titnonta gililewunna a hi bol ham. Ya on mataw daq meqinta emad osayta naqmo gililewunna bolta ham.

*Mataw didaq udinayta na ago Yesus bilam*

*(Mak 2.18-22; Luk 5.33-39)*

<sup>14</sup> Ari kam nab Jon ago disaipel bolim in Yesus susumun ugim bilaqiy, Ezaq tonim sirisirimo i Farisi nenaq didaq udinsa ta ningo disaipel didaq a hi udinayta? haqiy.

<sup>15</sup> Haqan Yesus gibilan, Mat araq aw waqnan tona in ayogniz boleq inaq osad in ginad meqniysa gaq waz daqay ye? ham. Haiqqam ham. Na ezaqgo in giyow na inaq osad in ginad dimniysa osayta na ago ham. Ari abeb mataw asor boleq mat aw waqayta na ayogniz gibenab tuwaq daqay ham. Kam na teq boldaqta ham. Bolid teq mat na ayogniz didaq tuqudin daqayta ham.

<sup>16</sup> Haqad in bilam, Mataw tubusan murta waqim amalib tubusan kwaziqta misiramta inaq a hi initya ham. Luweq in tubusan kwaziqta na suholsa tubusan murta na irnik toneq le amik iyadmo in tubusan kwaziqta na bulsireqid ayahmo diq a ta tartaydaq ham.

<sup>17</sup> Ad nazaqmo mataw wain ayun murta memeq asan kwaziqtab a hi tenaytamo ham. In nazaq tonid wain aqurin gwalad huhuw nemsamemeq asan kwaziqta na tartayid wain ayun mutbaleq ogib woqsa memeq asan na timeqniydaqmo

ham. Nazaq iyan mataw memeq asan muturtamo waqim wain ayun muturta tenayta ham. Tenan wain ayun teq memeq asan inaq araqibmo dimunmo usaqta ham.

*Yesus aw araq ned hunegaqta wastitayan teq in maror araq amiy tumomta wazan eram*

(Mak 5.22-43; Luk 8.41-56)

<sup>18</sup> Ari Yesus in Jon ago disaipel ne-naq gamuk bilaqad tursa Juda gigo mat marorta araq bolim Yesus agerab abak-bakan ulum laquwim turad bulon, Ya imiy muran diqmo tumoqim usaq ham. Teq ni boleq niben aholib emeq wazid in kayeq ta iyan ham. <sup>19</sup> Haqanmo Yesus ago disaipel nenaq eraqim mat na muzim inaq tilehiy.

<sup>20</sup> Lehsa aw araq ulig 12 nazaq moqad ned hunegad luwyaqta na in Yesus aglehun ban bolim ago tubusan adek tuwaz. <sup>21</sup> Na ezaggo in tekomo ahol bulonim bilam, Ya iben Yesus ago tubusan adekmo wazeq teq ya ihol tidimniydaq ham. <sup>22</sup> Haqad in Yesus ago tubusan adek wazsamo Yesus ahol buliyan ahol waqad bulon, Ya imiy ham ni ninad hi meqniyan ham. Ni ya inan helmo hamta naqmo niqeman ni nihol tidimniy ham. Haqsamo aw na ahol tidimniy.

<sup>23</sup> Ari Yesus le Juda gigo mat marorta na ago bitab tugwahtim. Gwahtiqim in on gaq wazsa mataw kadug ulamad gihulan kabemmo emsa gibiy. <sup>24</sup> Gibiyad in gibilan, Ne eraqeq kozoq lehiy ham. Amun aw na a hi mom ham. In usaq ham. In nazaq haqan on mataw na bunmo in aqez tiyuquwuniy.

<sup>25</sup> Yuquwunsa Yesus gimuzan asan ban gwahtiqsa in le gwahtiqim amun aw na aben wazan in eraqim titur. <sup>26</sup> An teq Yesus daq amta na abin saw nab uliq bunmo tilah.

*Yesus mataw gigermo gime haiqta gi-wastitayan dimniyiy*

<sup>27</sup> Ari Yesus uliq na hulosis lehsa mataw giger gime haiqta in muzim inaq lehad teq in lileyeq bulon yaqay, Devit atatin\* haq yaqay ni i ginan ninad meqniyan haq yaqay. <sup>28</sup> Haqsa Yesus le bitab tugwahtiqanmo mataw giger gime haiqta na in ago hib tuboliy. Bolan Yesus tisuusumun nag, Ya ne giwastitaydaiqta na ago ne ginad helmo haqay ye? ham. Haqan in bilaqiy, Iyahta haqiy i helmo tihaqauq haqiy. <sup>29</sup> Haqan Yesus aben mataw giger na gimeqgnagib emim gibilan, Ne ya inan helmo haqayta nazaqmo in ne giholib gwahtiqan ham. <sup>30</sup> Haqanmo mataw giger na gimeqgnagin tiriram. Gime rirqan Yesus gamuk awaz

meqin diqta gibilenim bilam, Daq kawa ne giholib gwahtimta ka ago ne mat araq diq hikidik buloniy ham. <sup>31</sup> Haqan teq haiq. Mataw giger na Yesus giholib daq amta na bilaqsa abin saw nab uliq bunmo tilah bug.

*Yesus mat araq aqez haiqta wastitayan dimniy*

<sup>32</sup> Mataw giger na Yesus hulosis tilehsa on mataw in mat ta araq aqez haiqta aholib bugaw meqinta usaqta waqim Yesus ago hib a boliy. <sup>33</sup> A bolan Yesus bugaw meqinta na muzan lehan teq mat aqez haiqta na gamuk tibilaqyaq. Gamuk bilaqsa on mataw ahol waqad in gihol turuh nemsu bilaq yaqay, Kwaziqmo nagah araq kazaqta Isrel-ib a hi gwahtimta haq yaqay. <sup>34</sup> Haqsa teq ta Farisi bilaq yaqay, In bugaw meqinta gigo danmebta na ago zaway amalib bugaw meqinta gimuzaqta haq yaqay.

## Yesus in ago disaipel kabiy nag

*Yesus on mataw ginan anad meqniy*

<sup>35</sup> Ari Yesus uliq saw bunmo tilehad luwyaq. Luwad in mataw gigo bit humab wolaytab gwahtiqeq suleq negad teq in God ago maror og kab gwahtimta na agamukan tigibilenyaq. In gamuk dimun diqta na gibilenad teq in mataw gigo moq teq gihol asor meqniyta na bunmo giwastitaysa in gihol tidimniy yaqay.

<sup>36</sup> Sa Yesus on mataw dauh biyahta na gibiyad in ginan anad timeqniy. Na ezaggo on mataw na meqin diq osad in gimo gihol ulumsihgo biyab a hi iy yaqayta na ago iyan. Mataw na bilaqne sipsip ginamren haiqta os nog iy yaqayta. <sup>37</sup> Nazaq iyan Yesus in ago disaipel gibilan, Kabiyab didaq kabemmo tizilimim giqusaq ham. Teq kabibiy mataw kabemmo diq haiq ham. <sup>38</sup> Nazaq iyan ne kabiy anamren inaq gamuk emad bulonsa in kabibiy mataw kabemmo giqemid boleq in ago didaq na giwaaq ugiy ham.

## 10

*Yesus Aposel 12 na gitowun am (Mak 3.13-19; Luk 6.12-16)*

<sup>1</sup> Ari Yesus in ago disaipel 12 na gibilenan agerab tuboliy. Bolan in ahol abinib bugaw meqinta gimuzgo azawayin tinag. Negad in moq bunmo wastitaygo azawayin teq mataw gihol asor meqniyta na bunmo giwastitaygo azawayin tinagmo.

<sup>2-4</sup> Teq Aposel 12 na ginan kazaq: Saimon, in anan araq Pita haqayta teq Saimon amikqan Andru teq Sebediy atatinz giger

\* **9:27:** Isrel on mataw ginad em yaqay, God mat emid bo i gilumsihdaqta amatin na in i gises Devit asenlulib tugwahtiqdaq haq yaqay. Haqad luweq Yesus in mat naqmo iyaq haqad teq mataw asor in anan 'Devit atatin' haq yaqay.



Jems ama Jon inaq teq Filip teq Bartolomyu teq Tomas teq Matyu mat takis waqyaqta na teq Alfiyus atatin Jems teq Tadiyus teq Saimon mat Rom nenaq bab emyaqta amatin na teq Judas uliq Kariyot-ibta na. Mat naqmo in Yesus waqim bab gibenab amta.

*Yesus Aposel 12 na kabiy nag  
(Mak 6.7-13; Luk 9.1-5)*

<sup>5</sup> Ari Yesus in mataw 12 na giqeman lehsa in gibilan, Ne on mataw en ta asor Juda a haiqta nagan gigo hib hi lehiy ham. Ad ne Samariya gigo uliq araqab le hi gwah-tiqiymo ham. <sup>6</sup> Ne Isrel on mataw gimomo gigo hib lehiy ham. Mataw na in bilaqne sipsip nabag haresmo le luwayta nog ham. <sup>7</sup> Ne leheq luwad gamuk dimunta kazaq gibileniy ham. God ago maror bolim sinsin tiqiy haqad ne gibileniy ham. <sup>8</sup> Ad ne on mataw moqayta na giwastitayid dimniyyi ham. Mataw tumoqiya na ne giwazid ta eraqiy ham. Ad mataw gigo moq lepra inaqta na ne giwastitayid in gihol dimniyan ham. Ya zaway negta na ne samanmo waqiy ham. Ne zayim a hi waqiya ham. Nazaq iyan ne on mataw samanmo tigilum-sih daqaymo ham. Gilumsihad ne amenin waggo hi bilaqiy ham.

<sup>9</sup> Ad ne mani gol teq mani silva teq mani kapa-ta araq waqeq ad hi lehiy ham. <sup>10</sup> Teq ne ziy araq es siheneq danib a lehgo hi waqiymo ham. Tubusan amulik giholib usaqta naqmo ne a lehad araqmo ta hi waqiy ham. Ne gigo gisendugan gisenab hi emiy ham. Ad ne katek wazeq ad hi lehiymo ham. Na ezaggo ne mataw gimen kabiy samanmo a hi em daqayta ham. Ne yaggo kabiy emsa mataw didaq nagah tineq daqay ham.

<sup>11</sup> Ari ne leheq uliq araqab gwahtiqeq nab ne on mataw gibiy kemiy ham. Uliq nab nog in mat dimunta teq titnonta na ne ahol waqeq teq ne mat naqmo inaq oseq le ne uliq na tuhulos daqay ham.

<sup>12</sup> Ne bit aqez araqab loqeq on mataw nabta gibilen waqiy ham. <sup>13</sup> In on mataw dimdimunta iyid teq ne gigem dimunta in gigo hib tilehdaq ham. Ari in dimunta a haiq iyid ne gigem dimunta negiyta na in ne gigo hib muleqeq ta boldaq ham. <sup>14</sup> Bit nab mat araq ne giwazinad nenaq a hi osid teq ne bit na huload gisen aqogin wolhamid nab woqan ham. Ad nazaqmo uliq araqab on mataw ne gigo gamuk a hi huritid ne uliq na huload gisen aqogin wolhamid uliq nab woqanmo ham. <sup>15</sup> Ya ne helmo gibilenaiq ham. Abek God hazizir ayahta emdaqta nab uliq giger Sodom teq Gomora afaqan waq daqayta nazaq nog uliq na a hi waq daqay ham. Uliq ne gibaymuz daqayta na in uliq giger

na giquriyameq afaqan ayah diqta tuwaq daqay ham.

*Yesus bilam, Afaqan kabemmo teq gwahtiqdaq ham*

*(Mak 13.9-13; Luk 21.12-17)*

<sup>16</sup> Ne huritiy ham. Ya ne giqeman ne bilaqne sipsip gaun kwasikta gilikmanib leh nog iyay ham. Nazaq iyan nagah ahulinaqta anad em hasim daq emaqta nazaqmo ne gihol waz naqmo hiqiyiy ham. Ad ah muluk kiskismo luwaqta nazaqmo ne luwiymo ham. <sup>17</sup> Ne mataw ginan gihol waz naqmo hiqiyiy ham. In teq ne giwazeq kaunsel gibenab giqem daqay ham. Ad in gigo bit humab wolaytab ne giwazeq ginol titay daqay ham.

<sup>18</sup> Ne ya inan helmo haqad imuzad luwayta na ago in ne giwazeq in gigo king teq in gigo gavman aseseqta gigo hib ne giqad tileh daqay ham. Giqad lehid teq ne nagah gimeb ahol waqiya na awagamun gibilensa mataw aseseqta teq on mataw en ta asor Juda a haiqta nagan in tuhurit daqay ham. <sup>19</sup> Mataw na ne giwazeq giqad mataw aseseqta gimeb lehid ne hi rabyi ham. Ad ne naga gamukin bilaq daqayta na ago ginadnad hi emiymo ham. Kam nabmo teq God in ne naga gamukin bilaq daqayta na tinegdaq ham. <sup>20</sup> Nazaq iyan negmo diq gamuk na a hi bilaq daqay ham. Haiqgam ham. Ne Gimam ago Bugaw Dimunta naqmo in gamuk emid ne giqezab gwahtiqdaqta ham.

<sup>21</sup> Kam nab teq mataw in gimaqba-ban giwazeq bab gibenab giqemid in ginol emid tumoq daqay ham. Sa gimaman in nazaqmo gigo onmin giwazeq bab gibenab giqem daqaymo ham. Teq onmin in nazaqmo ginenmaman gihar negad bab gibenab giqemid in ginol emid tumoq daqaymo ham. <sup>22</sup> Ya ihol abin ne giholib usaqta na ago on mataw bunmo gigem meqinta ne neg daqay ham. Ari mat aw nog in zaway diq iyeq ossa le in gigo kam abeb-tanta iydaqta nab teq God in gilumsiheq ta giwaqdaq ham. <sup>23</sup> Teq uliq araqab on mataw eraqeq ne gimeqin tonsa ne tukeq uliq ta araqab lehiy ham. Ya helmo ne gibilenaiq ham. Ne Isrel gigo uliq a hi wolnet bugsa Mat Atatin tuboldaq ham.

<sup>24</sup> Ne ginad emiy ham. Disaipel araq in ago tisa uriyameq danneb a hi lehdaq ham. Sa kabibiy mat in ago ayahta a hi itiyondaqmo ham. <sup>25</sup> Disaipel na in ago tisa nogmo iyid na in dimunmo ham. Teq kabibiy mat na in ago mat ayah nogmo iyid na in dimunmo tiqiydaqmo ham. Nazaq iyan mataw bit anamren bilawunad anan Belsebul haqeq in nazaqmo bit anamren na ago asenlul ginan meqin diq tibilaaq daqaymo ham.

*On mataw nog diq rabun daqayta?*

(Luk 12.2-7)

<sup>26</sup> Nagah bunmo mataw giqisihan usaqta na abeb teq God hasid mataw bunmo ahol tuwaq daqay ham. Ad nagah bunmo mataw gikasnaknib usaqta na abeb teq God emid ulalab tugwahtiqaq ham. Nazaq iyan ne yaqgo gamuk mataw gibilengo hi rabiyy ham. <sup>27</sup> Ya romriqab gamuk gibilenaiqta na ne saw anuwanibmo mataw gibileniy ham. Ad ne gamuk kiskismo gidekib huritayta na ne bit ahuqunib gwale turad teq ne dedibmo lileyeq mataw gibileniy ham.

<sup>28</sup> Mataw ne gisanmo wol em daqayta ham. Ari in ne giwitan wol emgo in gigo zaway haiqta ham. Nazaq iyan ne mataw hi girabuniy ham. Haiq ham. Mat araq ne rabun daqayta nawa osaq ham. In mataw gisan teq giwitan inaqmo gihunegan saw faq oyad a hi miyaqtab wolehim timeqniy hasayta ham.

<sup>29</sup> Mataw mani asit diqmo hulosis ah amikmikta giger gizayayta ham. Teq ah amik diqta nagan giholib daq araq gwah-tiqsa ne Gimam Iyah tuhuritaqta ham. <sup>30</sup> Ad God ne gibiy kemad ne gifaqniy giqen-san na in ginulinim ganim diq usaqta na in tuhurit bugta ham. <sup>31</sup> Nazaq iyan ne hi rabiyy ham. Ne ah amikmikta na nog a haiq ham. Ne ah amikmikta na ayahmo giquriyamiyta ham.

*I Yesus abin bilaqgo gimebay hi woqan*  
(Luk 12.8-9)

<sup>32</sup> Ari mat aw nog in mataw gimeb bilaqdaq, Ya Yesus-mo ago matta iyim osaiqta haqdaqta na ya nazaqmo ya imam Heven-ib osaqta na ameb mataw na ginan bilaqdaiq, In yaqgota tihaqdaiqmo ham. <sup>33</sup> Ad mat aw nog in on mataw girabunad gimeb gileh yagid ya nazaqmo ya imam Heven-ib osaqta na ameb mataw na gileh tineqdaiqmo ham.

*Yesus on mataw gihusernan bol*  
(Luk 12.51-53; 14.26-27)

<sup>34</sup> Ne luweq ginad em daqay, Ya og kab on mataw bunmo giqemid zib alowab osgo haqad ya bolta haq daqay ham. Haiqgam ham. Ya bab emid gwahtiqaq haqad bolta ham. <sup>35</sup> Na in kazaq ham. Mat araq ya inan helmo haqsa in amam gileh yagdaq ham. In giger nazaq emad,

Mat na amam inaq an gihar ug daqay ham.

Ad nazaqmo amun awta anen inaq an gihar ug daqay ham.

Sa aw in aduw anen inaq an gihar ug daqaymo ham.

<sup>36</sup> Mat asenlulmo diq eraqeq mat na bab ug daqay ham.

<sup>37</sup> Ari mat in anenmaman ginan anad bilaqsa teq in ya inan anad a hi diq bilaqsaqta, mat na in yaqgo disaipel iyeq osgo dimun a hi iyaq ham. Ad mat in atatin o in amiy anan anad bilaqsa teq in ya inan anad a hi diq bilaqsaqta, mat na in yaqgo disaipel a hi iyaqmo ham. <sup>38</sup> Teq mat in ago kruse waqim abetarib emim ya imuzim a hi bolaqta, mat na in yaqgo disaipel iyeq osgo dimun a haiqmo ham. <sup>39</sup> Na ezaqgo mat inmo ahol anadin emdaqta na in nabag tihiqiydaq ham. Ari mat yaqgo kabiy emad ahol nog hulosaqta na in dimunmo kuluwa-kuluwmo tuqosdaq ham.

*Mat Yesus ago on mataw gilumsihdaqta na in teq naw araq dimunta tuwaqdaq*  
(Mak 9.41)

<sup>40</sup> Ari on mataw ne giwazinad in bilaqne ya iwazinayta nog tiqiyaymo ham. Ad in ya iwazinad in mat ya iqeman bolta na tuwazinaymo ham. <sup>41</sup> Mat aw nog in God ago nantut araq bolsa ahol waq hasad wazinayta na, on mataw na in God ago nantut naw waqayta nazaq in tuwaq daqaymo ham. Ad mat aw nog in mat araq titnonta bolsa ahol waq hasad wazinayta na, on mataw na in mataw titnonta bunmo naw waq daqayta nazaq in tuwaq daqaymo ham. <sup>42</sup> Ad mat aw nog in yaqgo disaipel gibin haiqta kagan gigo araq ahol waq hasad anan Yesus ago disaipel haqad yuw soqoreq ugid uluwdaqta na, ya ne helmo gibilenaiq ham. On mataw na God abenab naw dimunta tuwaq daqaymo ham.

## Yesus in naga matin diq?

### 11

*Jon mataw huz negyaqta na in ago disaipel giqeman Yesus ago hib lehiy*  
(Luk 7.18-35)

<sup>1</sup> Ari Yesus in ago disaipel 12 na suleq negim tihiqiyan teq in uliq na hulosis saw Galiliy-ib uliq-uliqgo lehad tiluwayaq. Luwad in God ago gamuk on mataw tigi-bilenaq.

<sup>2</sup> Sa Jon irquran osad in Kraiss kabiy emaqta na abin tuhurit. Huritim in ago disaipel asor giqeman Yesus ago hib tilehiy. <sup>3</sup> Lehim in Yesus tisuusum ugiy, Ni i nibaq tunim osta naqmo amatin ni bol o haiq mat ta araq teq abeb boldaqta i baq tunam? haqiy. <sup>4-5</sup> Haqan Yesus in gigo gamuk amenin emim bilam, Ko gibiyiy ham. Mataw gime haiqta saw ahol tuwaqay ham. Mataw gisen meqinta tiloq gelay ham. Mataw gigo moq lepra inaqta gisanib ginunlan usta na tihiqiyaq ham. Ad mataw gidek haiqta gamuk tuhuritay ham. Teq mataw tumoqiya kayeq iyim

ta eraqay ham. Mataw ginaghan haiqta God ago gamuk dimunta tuwaqay ham. Ne muleqeq leheq nagah ne gimeb kawa ahol tuwaqiyta ka teq gamuk kawa ne tuhuri-tiyta ka bunmo Jon buloniy ham. <sup>6</sup> Mat ya ibiyad anadnad a hi emad teq in ya inan helmo diq haqaqta, mat na tidimniyim osaq ham.

<sup>7-8</sup> Ari Jon ago disaipel muleqim tilehsa Yesus in on mataw biyahta nab turiyta na Jon anan gibilenim bilam, Kwaziqmo ne nog diq ahol waqnan saw amatawun haiqtab lehiy? ham. Ne mat araq bilaqne tuqir tim retsa ahol wolad ahulan iysa ne ahol waqnan lehiy ye? ham. Teq ne nog diq ahol waqnan saw nab lehiy? ham. Ne mat araq tubusan dimunta muturta welim tursa ahol waqnan lehiy ye? ham. Mataw tubusan dimunta muturta welayta na in king gigo bit aseseqtab osayta ham. <sup>9</sup> Ne ya ibileniy ham. Ne nog diq ahol waqnan lehiy? ham. Ne God ago nantut araq ahol waqnan lehiy ye? ham. Helmo ham. Mat na in God ago nantut araq ham. Teq mat nawa na in God ago nantut kwaziqmo osiyta na bunmo giquriyamta ham. <sup>10</sup> Mat naqmo God ago marib ananin mar tonan usaqta ham. Gamuk na bilam,

Ahol waqiy ham, ya teq mat araq emid in yaqgo gamuk ad danneb lehdaq haqad in bilam ham. Leheq in ninmen dan tuwastitaydaq haqad in bilam ham. Wastitayid teq ni lehdaq haqad in bilam ham. *Malakay 3.1*

<sup>11</sup> Ya helmo ne gibilenaiq ham. Jon mataw huz negyaqta na in mataw og kab gwahti-qiyta na bunmo giquriyamim in abin ayah diqta ham. Ta teq mat aw nog God ago maror aduganib gibin amik diq usaqta na in Jon tuquriyamiya ham.

<sup>12-13</sup> God ago nantut kwaziqta na bunmo teq God ago maror Moses mar tonta na in nagah abeb teq gwahti-qidaqta na ago bilaqan ussa bo Jon ago kamubmo iy ham. An Jon mataw huz negyaqta na ago akam-nib iyim bo muranmo God ago maror og kab gwahtiqim awaz diq meqniyim lehaqta ham. Sa mataw asor in giwaz diq meqniyim maror na geg ugad in ginadibmo wasihnan tonayta ham. <sup>14</sup> Ari ne yaqgo gamuk ka huritnan iysun ne huritiy ham. God ago gamuk bilam, Elaija bolid teq Krai boldaq haqad in bilam ham. Teq ya ne gibilenaiq ham. Elaija boldaq hamta na in Jon-mo anan bilamta ham. <sup>15</sup> Mat aw nog in gidek inaq iyeq teq in gamuk ka huritiy ham.

<sup>16</sup> Ya on mataw kam kabta gigo daq anan bilaqnan teq ya gamuk awowun ezaq diqta amalib bilaqdaiq? ham. In bilaqne on-min maket-ib an bulonad osayta nazaq nog ham. <sup>17</sup> In bilaqay,

I ne gimen kadug ulamsa ne ginad dimniysa a hi doray haqayta ham.

Teq i gaq wazsa ne ginad meqniysa a hi gaqay haqayta ham.

<sup>18</sup> Ari Jon bolim didaq amo amo a hi neqad wain ayun a hi uluwyaqta ham. Sa ne in anan bilaq yaqay, Bugaw meqinta aholib usaq haq yaqay ham. <sup>19</sup> Ta teq Mat Atatin bolim didaq neqad wain uluwsa ne bilaqay, Mat ko meqin haqayta ham. In didaq kabemmo neqad wain ayun ayahmo uluwaqta amatin haqayta ham. In mataw gibin meqinta takis waqayta na teq mataw daq meqinta emayta na giyowmo diq haqayta ham. O tob iyan ham. Abeb ya Jon inaq i gigo kabiy anon tiqemsa teq i giger ginad em hasim daq emta na ulal tiqiydaq ham.

*On mataw ginad gigem a hi buliyayta na oseq timeqniy daqay*  
(Luk 10.13-15)

<sup>20</sup> Ari Yesus uliq kagan gigo hib daq azawayin inaqta kabemmo amta ka tigi-nadyaq. Na ezaqgo in daq azawayin inaqta emsa on mataw uliq nagabta ginad a hi buliyayta na ago iyan. <sup>21</sup> Ginadad in kazaq bilam, Uliq Korasin teq uliq Betsaida ham ne teq timeqniy daqay ham. Kwaziqmo mat araq leheq daq azawayin inaq ya ne gigo hib emta nazaq in uliq giger Tair-ib teq Saidon-ib emid on mataw na ginad tubuliy nagiy ham. Ginad buliyeq in gigo daq teq ginad meqinta gileh ugad in tubu-san asorqan abiyornaqta weleq butbut huz nagiy ham. Teq ne yaqgo daq azawayin inaqta na ahol waqim ne ginad buliyim gigo daq meqinta gileh a hi ugiy ham. <sup>22</sup> Nazaq iyan ya ne gibilenaiq ham. Abeb God hazizir ayahta emdaqta nab Tair teq Saidon afaqan waq daqayta nazaq nog ne a hi waq daqay ham. Ne in giquriyameq afaqan ayah diqta tuwaq daqay ham.

<sup>23</sup> Teq uliq Kapaneam ham ne gibin iluwid Heven-ib gwalehdaq e? ham. Haiqqam ham. In ne gihunegid ne mataw tumoqiya gigo sawab tuwoleh daqay ham. Na ezaqgo kwaziqmo mat araq leheq ya ne gigo hib daq azawayin inaq emta nazaq in uliq Sodom-ub emid uliq na og kab a hi hiqiyid i muran ahol waq nagta ham. <sup>24</sup> Nazaq iyan ya ne gibilenaiq ham. Abeb God hazizir ayahta emdaqta nab uliq Sodom afaqan waq daqayta nazaq nog ne a hi waq daqay ham. Ne in giquriyameq afaqan ayah diqta tuwaq daqay ham.

*Yesus bilam, Ne yaqgo hib boleq ginamur emiy ham*  
(Luk 10.21-22)

<sup>25</sup> Ari kam nab Yesus kazaq bilam, O ya imam ham, Heven-ib teq og kab inaqmo ni Iyahta iyim osaqta ham. Ni mataw ginad

awaz meqinta na teq mataw gimaqbel inaq iyim igmo ag haqad osayta na ni yaqgo kabiy alulin a hi giqisihunta ham. Haiq ham. Mataw gihol wazan woqsa in onmin gibin haiqta os nog iyayta naqmo ni yaqgo kabiy alulin tigiqisihunta ham. <sup>26</sup> Ya imam ham ni ninad nazaqmo usan ni tiqam ham. Nazaq iyan ya esey nigaiq ham.

<sup>27</sup> Haqad Yesus ta bilam, Ya imam in ago kabiy bunmo ya ibenab tiqam ham. Mat araq diq in yaqgo a hi hurit ham. Ya imam amomo in yaqgo huritta ham. Teq mat araq ya imam ago a hi huritmo ham. Ya in atatin iyim ya imomo in ago huritta ham. Ad on mataw ya inad bilaqsa imam giqisihunaiqta naqmo in ya imam ago huritaytamo ham. <sup>28</sup> Ne on mataw kabiy awaz meqinta emad afaqan sorayta na ne bunmo yaqgo hib boliy ham. Bolid ya giqemid ne ginamur tiqem daqay ham. <sup>29</sup> Ne boleq yaqgo kabiy soriy ham. Ad ne yaqgo daq ahol waqad nazaqmo ne emiy ham. Ya ihol wazan woqsa ya ibin a hi iluwaiqta ham. Ne nazaqmo toneq teq ne ginamur emad gihol sinamolsa tuqos daqay ham. <sup>30</sup> Na ezaqgo ya kabiy neg-daiqta na in awaz meqin diq a haiq ham. Ad ne yaqgo afaqan sor daqayta na in afaqan diq a haiqmo ham.

## 12

*Mataw Juda gigo lotu akamnib kabiy a hi emayta na ago Yesus bilam*  
(Mak 2.23-28; Luk 6.1-5)

<sup>1</sup> Ari Juda gigo lotu akaman araqab Yesus ago disaipel nenaq kabiy araq wit leiyta aduganib gwahtiqim tilah yaqay. Lehad ago disaipel gigem moqsa in wit anagin asor guraqim tineq yaqay. <sup>2</sup> Neqsa Farisi asor gibiyad in Yesus buloniy, Ni ko gibiy haqiy. Ninggo disaipel in lotu akaman ago gunun itiyonim kabiyab wit tuguraqay haqiy.

<sup>3</sup> Haqan Yesus gibilan, Nabag ne Devit ago dauh nenaq gigem moqsa Devit daq amta na awagamun ne ahol a hi waqiy-ya ham. <sup>4</sup> Devit agemnan moqad le God ago bit aduganib gwahtiqim in gunun itiyonim God ameb bret eman osta na tinam ham. Helmo, Devit bret tawonta na neqdaqta abin haiqta ham. Sa in ayogniz na in bret na neqgo gibin haiqtamo ham. Mataw tamaz emayta naqmo gimomo bret na neqayta ham. Ta teq Devit ayogniz nenaq gigem moq titaysa neqim in daq meqinta a hi emiy ham.

<sup>5</sup> Teq God ago maror Moses mar tonta na aduganib gamuk araq usaqta ka ne ahol a hi waqay ye? ham. Gamuk na bilam, Mataw tamaz emayta na in Juda gigo lotu akamnib Tempel-ib kabiy emad in lotu

akaman ago gunun na itiyonayta haqad in bilam ham. Ta teq in God ameb gihol a hi meqin tonayta haqad in bilam ham. <sup>6</sup> Ya ne gibilenaiq ham. Nagah araq Tempel uriyamta in kawa ne nenaq osaq ham. <sup>7</sup> Teq God ago gamukib nan ta araqmo usaq ham. Gamuk na bilam,

Ne yaqmen tamaz emad karuw anat urotayta na ya hulosaq haqad in bilam ham. Ne mataw ginan ginad meqniydaqta naqmo ya ahol waqnan inad bilaqdaqta haqad in bilam ham.

*Hosea 6.6*

Ne gamuk na adugan hurit kemeq teq ne mataw giholib daq meqin haiqta ka ginan meqin a hi bilaq nagiy ham. <sup>8</sup> Na ezaqgo Mat Atatin in lotu akaman anamrenmo diq iyim inmo mataw kam nab ezaq luw os daqayta na ago tigibilendaqta ham.

*Juda gigo lotu akamnib Yesus mat araq aben meqinta wastitayan dimniy*

(Mak 3.1-6; Luk 6.6-11)

<sup>9</sup> Ari Yesus saw na hulosis uliq ta araqab lehlim in mataw na gigo bit humab wolaytab tugwahtim. <sup>10</sup> Sa mat araq aben akogan anedan mayim aditinmo usaqta in nab osmo. Ossa Farisi in Yesus ulum waqnan haqad tuboliyimo. Bolim in Yesus kat ugid nan araq ginad a hi usaqta bilaqid i tuwazam haqad in Yesus kazaq susumun ugiy, I gigo lotu akamnib i mat moqdaqta wastitayid dimniydaq o haiq? haqiy. I Juda gigo maror ezaq bilamta? haqiy. <sup>11</sup> Haqan Yesus gibilan, Ta ne gilikmanib mat araq ago sipsip lotu akamnib yayib woqid mat na wazeq hureqid a hi gwaldaq e? ham. Haiqqam ham. In hureqid tugwaldaq ham. <sup>12</sup> Teq mat in sipsip nog a haiq ham. Mat in sipsip ayahmo uriyamta ham. Nazaq iyan i lotu akamnib mataw gidimun tonamta na ago agununin haiqqam ham. <sup>13</sup> Haqad in mat na bulon, Niben itiwun ham. Haqan mat na aben meqinta na itiwunan in aben dimunta na nogmo tiqiy. <sup>14</sup> An teq Farisi na gigem meqniysa asanib gwahtiqim humab emim in ezaq toneq Yesus wol emid moqdaqta na agamukan tibilaq yaqay.

*Yesus in God ago kabiyat mat dimunta*

<sup>15</sup> Sa Yesus in Farisi ginad na tuhuritim in uliq na huloadmo tilah. Lehsa on mataw dauh kabemmo muzim inaq lehsa Yesus in wastitayan gihol tidimniy yaqay. <sup>16</sup> Gihol dimniysa Yesus atoranmo gibilenyaq, Ne ya ihol abin ka ulalab hi bilaqiy haqay.

<sup>17-18</sup> Yesus daq nazaq emad in God ago nantut Aisaya agezab gamuk gwahtimta na tuwol net bug. Gamuk nab God bilam, Ka yaqgo kabibiy mat ham. Yaqmo in anan bilaqan osaqta ham. Ya in anan inad bilaqsa igem tidimniyaq ham. Teq ya

igo Bugaw Dimunta emid in aholib tilehdaqta ham. Lehid teq yaqgo kabibiy mat na in yaqgo daq titnonta agamukan on mataw en ta asor Juda a haiqta nagan tigibilendaq ham.

<sup>19</sup> In mataw nenaq an a hi mugdaqta ham. Ad in uliq gemab turad gamuk atoranmo a hi bilaqdaqta ham. <sup>20</sup> Yaqgo kabibiy mat na amidemqanmo luwdaqta ham. Luwad in tuqir araq asitmo talquweq tursa ahol waqad a hi orqaydaq ham. Ad in lam araq ago faq miynan tonsa ahol waqad in a hi wolmiydaq ham.

In ago daq nazaq amidemqan diqmo emad luwsa teq on mataw uliq saw bunmo God ago daq titnontab tuqos daqay ham. <sup>21</sup> Ad teq on mataw en ta asor Juda a haiqta nagan in mat naqmo anan helmo haqad in God teq gilum-sihdaqta na akaman baq tuneq tuqos daqay ham. *Aisaya 42.1-4*

*Mataw asor bilaqiy, Yesus bugaw meqinta Belsebul inaq kabiy emaqta haqiy (Mak 3.20-30; Luk 11.14-23; 12.10)*

<sup>22</sup> Ari kam nab on mataw in mat araq aholib bugaw meqinta usaqta waqim Yesus ago hib a boliy. Mat na ame haiqta teq in gamuk a hi emyaqta. A bolanmo Yesus in mat na wastitayan in gamuk bilaqad teq in saw ahol tuwaqyaq. <sup>23</sup> Sa on mataw dauh biyahmo nab osiyta na in gihol turuh nemsu bilaqiy, Luweq mat ka in Devit atatin\* i baq tunim osauqta naqmo iydaq daqagya? haqiy. <sup>24</sup> Haqsa ta Farisi in mataw giqez nazaq huritim bilaqiy, Haiq haqiy. Mat na in bugaw meqinta gigo danmebta Belsebul ago zaway amalib bugaw meqinta gimuzaqta haqiy.

<sup>25</sup> Haqsa Yesus mataw na ginad hurit kemim gibilan, Kantri araq ago on mataw gihol husereq an gihar uqad an wolad oseq in tihiqiy bug daqay ham. Teq uliq araqab o bit araqab on mataw gihol husereq an gihar uqad an wolad osad in zaway iyeq a hi tur daqay ham. <sup>26</sup> Ad nazaqmo Satan inmo ago kabibiy mataw ginaq an gihar uqad gimuzid in gihol huserid giger tiqiy daqaymo ham. In nazaq toneq Satan ago zaway hiqiysa ago kabiy tuwoqdaq ham.

<sup>27</sup> Ari ya Belsebul ago zaway amalib bugaw meqinta gimuzid ta ne gigo gisenlul asor na in nog diq ago zaway amalib bugaw meqinta gimuzayta? ham. Nazaq iyan ne ya ibilawunayta na negmo gigo gisenlul naqmo in tuqulum kem daqay ham. Ulum kemeq in bilaq daqay, Gamuk nawa ne bilaqayta na ne katiyay haq daqay ham.

<sup>28</sup> Ari God ago Bugaw Dimunta ilumsihsa ya bugaw meqinta gimuzsa teq ne ginad emiy ham. God ago maror ne gilikmanib tubol haqiy ham.

<sup>29</sup> Mat araq ezaq toneq teq in mat awaz meqinta ago bit aduganib gwahtiqeq ago nagah ginuwdaq? ham. In mat awaz meqinta na abensen irqureq teq in mat na ago bit aduganib gwahtiqeq ago nagah tiginuwdaq ham. <sup>30</sup> Ne ginad emiy ham. On mataw ya inaq kabiy a hi emayta na in ya ibabun ham. Teq on mataw ya inaq yaqgo dauh a hi girom tonayta na in yaqgo mataw gimuzan hares-haresmo lehayta ham.

<sup>31</sup> Nazaq iyan ya ne gibilenaiq ham. God in on mataw gigo daq meqinta teq in bilawunayta na bunmo tigiwalem bugdaq ham. Ari in God ago Bugaw Dimunta bilawunid God in gigo daq meqinta na a hi walemdaq ham. <sup>32</sup> Teq on mataw Mat Atatin bilawunid God in gigo daq meqinta na tuwalemdaq ham. Ari on mataw God ago Bugaw Dimunta anan meqinta haqid God in gigo daq meqinta na a hi walemdaq ham. Muran kam kab teq abeb kam murta teq boldaqta nab daq meqinta na in giholib tuqus tutdaq ham.

*Ay meqinta anon meqinta emaqta (Luk 6.43-45)*

<sup>33</sup> Ne gime haiq e? ham. Ne ay alowan tonid in anon dimunta emdaqta ham. Teq ne ay meqin tonid in anon meqinmo emdaqta ham. Mataw ay anon ahol waq kemim teq in ay ezaqta na ago ginad em hasay ham. <sup>34</sup> Mataw meqinta ne bilaqne nagah ahulinaqta ginaqmugnaqta nog ham. Ne mataw meqinta iyim iyan ezaq teq ne giqezab gamuk dimunta gwahtiqdaq? ham. Nagah mat agemab ayahmo usaqta naqmo in aqezab gwahtiqdaqta ham. <sup>35</sup> Mat dimunta agemab anad dimunta kabemmo ussa in daq dimunta emaqta ham. Sa mat meqinta agemab anad meqinta kabemmo ussa in daq meqinta emaqta ham. <sup>36</sup> Ya ne gibilenaiq ham. Abeb God hazizir ayahta emdaqta nab teq on mataw bunmo in ginad ezaq emad gamuk hares alulin haiqta bilaqiyta na in tibilaq kem daqay ham. <sup>37</sup> Na ezaqgo ningo gamuk naqmo in ni nilum kemdagta ham. Ni niqezab gamuk dimunta gwahtiqsa abeb God in ni ninan mat dimunta haqdaq ham. Ad nazaqmo ni niqezab gamuk meqinta gwahtiqsa abeb God in ni ninan mat meqinta haqdaq ham.

*Mataw asor daq azawayin inaqta ahol waqnan bilaqiy (Mak 8.11-12; Luk 11.29-32)*

\* 12:23: Matyu 9.27 nab teq ni gamuk 'Devit atatin' ka alulin ahol waqdaq.

<sup>38</sup> Ari mataw Moses ago gunun hurit kemiyta na asor teq Farisi asor in Yesus buloniy, Tisa haqiy ni daq araq azawayin inaqta emsa i ahol waquq haqiy. Ahol waqeq teq i bilaqam, Helmo ni God-mo ago kabiy emaqta haqam haqiy. <sup>39</sup> Haqan Yesus amenin emim gibilan, Ne on mataw muran kam kabta ham, ne on mataw meqinta God gileh ugayta ham. Ne daq azawayin inaqta naqmo ahol waqnan bilaqayta ham. Teq God in daq araq azawayin inaq a hi em negdaq ham. God ago nantut Jona aholib daq gwahtimta naqmo ne ahol tuwaq daqay ham. <sup>40</sup> Jona kam ezeqmanmo nabiq ayahta na agemab usta ham. An nazaqmo Mat Atatin kam ezeqmanmo og aduganib tuqusdaqmo ham.

<sup>41</sup> Abeb God hazizir ayahta emdaqta nab on mataw Niniwe-ibta na in mataw muran kam kabta nenaq eraqeq God ameb turad teq Niniwe mataw na in mataw kam kabta gigo daq meqinta emid ulal tiqiydaq ham. Na ezaggo on mataw Niniwe-ibta na in Jona ago gamuk huritim in ginad buliyim gigo daq meqinta gileh ugiy ham. Teq ne ahol waqiy ham. Mat araq Jona uriyamta na in kawa ne gilikmanib osaq ham. Ta teq ne in ago gamuk huritim ginad a hi buliyayta ham.

<sup>42</sup> Ad God hazizir ayahta emdaqta nab teq aw marorta kwaziqmo saw araq pesantab osta na in on mataw muran kam kabta nenaq eraqeq God ameb turad teq aw na in mataw kam kabta gigo daq meqinta emid ulal tiqiydaqmo ham. Na ezaggo aw marorta na in uliq pesan diqtab osad Solomon abin huritim in eraqim Solomon ago gamuk dimunta huritnan haqad ago hib tilah ham. Teq ne ahol waqiy ham. Mat araq Solomon uriyamta na in kawa ne gilikmanib osaq ham. Ta teq ne in ago gamuk dimunta huritnan gituw hiqiyayta ham.

*Bugaw meqinta muleqim ta bol*  
(Luk 11.24-26)

<sup>43</sup> Haqad Yesus bilam, Bugaw meqinta araq mat hulos ugim gwahtiqim haresmo saw ayuwun haiqtab lehim luwaqta ham. Luwad in ban araq anamur emad osdaqta na nagunaqta ham. Teq haiq ham. In ban araq nazaqta ahol a hi waqayta ham. <sup>44</sup> In ban araq ahol a hi waqim teq in ahol bulonim bilaqaq. Bit kwaziqmo ya osta nab ya muleqeq ta lehdaig haqayta ham. Haqad in bit nab muleqim ta lehim bit na samanmo ussa asawun wolrironim anaghan bunmo wastitayim abanab eman ussa in ahol waqayta ham. <sup>45</sup> Ahol waqim teq in lehim bugaw meqin diqta 7 nazaq in daq meqinta emgo uriyamiyta na gililewunim giwaqim nenaq ta bolim

in bit nab gwahtiqim osayta ham. Mebmebmo bugaw amulikmo mat na aholib ussa in ahol meqin dimun nog osyaqta ham. Ari muran teq bugaw 8 nazaq bolim mat na aholib ussa in ahol timeqniy hasim osaqta ham. Ad daq nazaqmo on mataw meqinta kam kabta ka giholib tugwahtiqdaqmo ham.

*Yesus anenan teq amagniz na gingan?*  
(Mak 3.31-35; Luk 8.19-21)

<sup>46</sup> Ari Yesus on mataw biyahta na gibile-nad ossamo in anen teq amagniz in naq gamuk bilaqnan haqad bolim asanib taturiy. [ <sup>47</sup> Tursa mat araq Yesus bulon, Ko gibiy ham. Ni ninen teq ni nimagniz bolim in ni ninaq gamuk bilaqnan haqad kowa asanib turay ham.] <sup>48</sup> Haqan Yesus in mat na ago gamuk amenin emim bilam, Ya inen teq ya imagniz gingan diq? ham. <sup>49</sup> Haqad in aben ago disaipel gigo hib itiyad bilam, Ka gibiyiy ham. Ya inen teq ya imagniz kawa osay ham. <sup>50</sup> Mat aw nog in ya imam Heven-ib osaqta na anad muzad ago kabiy emayta naqmo in ya ima teq in ya ihiy teq in ya inen ham.

## 13

*Mat araq kabiyab wit anagin hunagta ago gamuk awowun*  
(Mak 4.1-9; Luk 8.4-8)

<sup>1</sup> Ari kam nabmo Yesus bit hulosim asanib tugwahtim. Gwahtiqim in lehim yuw-kurorqan Galiliy aqurumnib tuqos. <sup>2</sup> Ossa on mataw dauh kabemmo bolim Yesus agerabmo diq loqsa iyan Yesus giban emim muy araqab gwalim tuqos. Ossa on mataw na yuw aqurumnib turiy. <sup>3</sup> Tursa Yesus suleq kabemmo negad gamuk amo amo tigibilenyaq. Ad in gibilan, Ne huritiy ham. Mat araq ago kabiyab wit anagin hunegnan tilah ham. <sup>4</sup> In lehim wit anagin hunegad luwsa asor danib woqan ah bolim tineqiy ham. <sup>5</sup> Sa wit anagin asor saw agigin inaqtab og asitmo usaqta nab wom ham. Woqim og ayah diq haiqqam iyan wit hidmo tugwal ham. <sup>6</sup> An zeq gwalim oysa wit na aninin haiqqam iyan in mayim tumom ham. <sup>7</sup> Sa wit asor am asasuqin inaqta na aduganib wom ham. Woqan am asasuqin inaqta na gwalad isihan wit na abesbesan iy ham. <sup>8</sup> Teq wit asor og dimuntab woqim anon tiqam ham. Asor anon kabemmo diq 100 nazaq giqam ham. Sa asor anon 60 nazaq giqam ham. Sa asor anon 30 nazaq giqam ham. <sup>9</sup> Mat aw nog in gidek inaq iyeq teq in gamuk ka huritiy ham.

*Yesus anad ezaq emad gamuk awowunmo on mataw gibilenyaq*  
(Mak 4.10-12; Luk 8.9-10)

<sup>10</sup> Ari disaipel in Yesus ago hib bolim tisuşumun ugiy, Ni ezaq haqad gamuk awowunmo amalib on mataw gibilenaqta? haqiy. <sup>11</sup> Haqan Yesus in gigo gamuk amenin emim gibilan, Negmo God ago maror aduganib osayta ham. Nazaq iyan God ago maror abe alulin ulilemim usaqta na in negmo tigiqisihunaq ham. Ari on mataw asan banta na in a hi giqisihunaq ham. <sup>12</sup> Na ezaqgo in on mataw gigo nagah inaqtta na bunno nagah asor a ta negid in gigo nagah kabemmo diq tiqiydaq ham. Teq in mataw ginaghan haiqta na gibenab nagah asitmo wazayta na walem bugdaq ham.

<sup>13</sup> Daq naqmo ago ya gamuk awowunmo bilaqaiqta ham. Ya mataw asanibta na gamuk awowunibmo gibilensa in gime saw waqad teq in nagah arağ ahol a hi waqayta ham. In gidek emad teq in gamuk a hi huritad ginad a hi em hasayta ham. <sup>14</sup> Mataw na daq nazaq emad in God ago nantut Aisaya gamuk bilamta na tuwol net bugay ham. Aisaya bilam,

Ne gamuk huritad teq ne ginad a hi em has daqay haqad in bilam ham. Ne gime saw waqad teq ne nagah arağ ahol a hi waq daqay haqad in bilam ham. Na ezaqgo on mataw ka gigem soqotim usaqta haqad in bilam ham. Sa in gideksan ituqim usaqtamo haqad in bilam ham. Mataw ka gime miyim osayta haqad in bilam ham.

<sup>15</sup> God in nazaq giqeman luweq in gime nagah ahol waqad teq in gidek nan huritad in ginad em has nagiy haqad in bilam ham. Ginad em hasad gigem buliyeq in God ago hib ta bolid God giwastitayid tidimniy nagiy haqad in bilam ham. *Aisaya 6.9-10*

<sup>16</sup> Teq negmo ginad dimniyan ham. Ne gime nagah ahol tuwaqayta ham. Ad ne gidek gamuk tuhuritayta ham. <sup>17</sup> Ya helmo ne gibilenaq ham. Kwaziqmo God ago nantut kabemmo teq mataw dimdimunta kabemmo in nagah muran kawa ne ahol waqayta ka in ahol waqnan ginad diq bilaq yaqayta ham. Teq in moqim ahol a hi waqiyta ham. Ad gamuk kawa ne huritayta ka in huritnan ginad bilaq yaqaytamo ham. Teq in moqim a hi huritiyta ham.

*Mat kabiyab wit anagin hunagta na ago alulin*

*(Mak 4.13-20; Luk 8.11-15)*

<sup>18</sup> Ari mat didaq anagin kabiyab hunagta ago gamuk awowun na alulin ne huritiy ham. <sup>19</sup> Mat aw nog in God ago maror agamakan huritim ginad a hi em hasayta na in bilaqne wit anagin danib woqaqta na nog ham. God ago gamuk mataw na

gigemab leyan ussa Satan hidmo bolim gamuk na gigemab ta walemaqta ham.

<sup>20</sup> Teq mat arağ in wit anagin og agigin inaqtta woqaqta na nog ham. In God ago gamuk huritim in anad bilaqsa hidmo waqayta ham. <sup>21</sup> Teq mat naqanta in bilaqne wit aninin haiqta nog ham. In God ago gamuk agemabmo diq a hi wazad in muzinad sisaqmo a hi luwaqta ham. Na ezaqgo in God ago gamuk muzinaqta na ago mataw in meqin tonad afağan amo amo ugsa in hidmo God hulosaqta ham.

<sup>22</sup> Teq mat arağ in wit anagin am asasuqin inaqtta aduganib woqaqta na nog ham. Mat naqanta in God ago gamuk huritayta ham. Teq in og ka ago nagah kabemmo anadin emsa mani-mo in kat ugad anad hureqaqta ham. Nagah nagan in God ago gamuk isihsa iyan gamuk na in mat na agemab anon a hi emaqta ham.

<sup>23</sup> Teq mat arağ in wit anagin og dimuntab woqaqta na nog ham. Mat naqanta in God ago gamuk huritim anad em hasaqta ham. Anad em hasa God ago gamuk in agemab anon emaqta ham. Mat arağ agemab in anon kabemmo diq 100 nazaq giqemaqta ham. Sa mat arağ agemab in anon 60 nazaq giqemaqta ham. Sa mat arağ agemab in anon 30 nazaq giqemaqta ham.

*Bonbon meqinta kabiyab gwalta ago gamuk awowun*

<sup>24</sup> Ari Yesus gamuk awowun arağ ta gibilan. In bilam, God ago maror in bilaqne mat arağ ago kabiyab wit anagin dimunta hunagta nazaq nog ham. <sup>25</sup> Hunegan teq taromab mat na ago bab bolim bonbon anagin wit alikmanib hunegim lah ham.

<sup>26</sup> An abeb wit na gwalim anon tiqemsa nab teq kabiyab mataw in bonbon na wit inaq arağib tursa ahol tuwaq kemiy ham.

<sup>27</sup> Ad in lehim kabiy na anamren tubuloniy ham. Mat ayah haqiy i bilaw ni ningo kabiyab wit anagin dimunta hunag hawta haqiy ham. Teq ta ezaq tonim i lehim bonbon meqinta ko wit inaq tursa i ahol waw? haqad in bilaqiy ham. <sup>28</sup> An kabiy anamren gibilan, Na i gibabun arağ daq na am haqad in bilam ham. Haqan kabibiy mataw na susumuniy, I leheq bonbon ko titeqam e? haqiy ham. <sup>29</sup> Haqan in gibilan, Haiq ham. Luweq ne bonbon na titeqad ne wit inaqmo titeq daqay haqad in gibilan ham. <sup>30</sup> Nab iyan ham. Sa garabmo gwalsa le didaq waqgo akaman iyan haqad in bilam ham. Didaq waqgo akamnib teq ya kabibiy mataw gibileneq bilaqdaiq, Ne bonbon meqinta ko titeqeq gituq toneq faqab em oygo humab emiy haqdaiq haqad in bilam ham. Ad wit dimunta na ne

titegeq yaqgo didaq abitnib nab humab emiy haqdaiq haqad in bilam ham.

*Ay mastet anagin ago gamuk awowun  
(Mak 4.30-32; Luk 13.18-19)*

<sup>31</sup> Ari Yesus gamuk awowun araq ta bilam, God ago maror in bilaqne ay mastet anagin amik diqta amulikmo mat araq ago kabiyab layta na nog ham. <sup>32</sup> Didaq anagin bunmo gilikmanib mastet anagin in amik diqta ham. Teq in gwalim ayah iyim in kwasin-kwasan kabiyabta na bunmo giquriyamaqta ham. Giquriyamim in bilaqne ay diq gwal nog iyan ah bolim abenab giholyon rir emim osayta ham.

*Yis ago gamuk awowun  
(Luk 13.20-21)*

<sup>33</sup> Ad Yesus gamuk awowun araq kazaq ta bilam, God ago maror in bilaqne yis nogta ham. Aw araq yis na waqim mel deg ezeqman nazaq inaq buliyan yis ulilemim ussa mel na bunmo huhuw tinam ham.

*Yesus gamuk awowunmo on mataw gibilyaqa  
(Mak 4.33-34)*

<sup>34</sup> Ari Yesus in on mataw dauh bunmo gamuk awowunmo amalib gibilyaqa. In gamuk bilaq siregeq a hi gibilyaqa. Haiqgam. In gamuk awowunmo negyaqa. <sup>35</sup> In daq nazaq emad in God ago nantut araq gamuk bilamta na tuwol net bug. Gamuk na bilam,

Ya ite akeq nagah God ulileman usta na anan ya gamuk awowunmo amalib tibilaqdaiq ham. Nagah na og ka mutur gwahtimta nab iyim bo muran kam kabmo in ulilemim usta ham. Ussa nagah na ago agamukan ya muran kam kabmo tibilaqdaiq ham. *Buk Song 78.2*

*Bonbon meqinta kabiyab gwalta na ago alulin*

<sup>36</sup> Ari Yesus on mataw gihulosim le bit araq aduganib tugwahtim. Gwahtiqan ago disaipel in agerab bolim buloniy, Ni teq gamuk awowun bonbon meqinta kabiyab gwalta na adugan ni i tigibilendaq e? haqiy. <sup>37</sup> Haqan Yesus amenin emim kazaq gibilan, Mat wit anagin dimunta hunegaqta na in Mat Atatin ham. <sup>38</sup> Teq kabiy na in og ka ham. Wit anagin dimunta na in on mataw God ago maror aduganib osayta naqmo ham. Teq bonbon meqinta na in Satan ago on mataw ham. <sup>39</sup> Ad bab bonbon meqinta kabiyab hunagta na in Satan ham. Teq didaq waqgo akaman na in og ka ago kam abebtanta ham. Ad kabibiy mataw na in God ago angelo ham. <sup>40</sup> Mataw bonbon meqinta humab wolim faqab eman oyaq nazaqmo teq og ka ago kam abebtanta nab in tiqem daqay ham. <sup>41</sup> Kam nab Mat Atatin

in ago angelo giqemid in og kab boleq God ago maror aduganib nagah meqinta mataw ginad hureqsa in ginad helta hullosnan tonayta na teq on mataw God ago gunun itiyonayta na bunmo tiginuw bug daqay ham. <sup>42</sup> In ginuweq a le hunegid faq ayahtab le tuwoq daqay ham. Woqeq osad teq in gaqad gite sisad tuqos daqay ham. <sup>43</sup> Kam nab on mataw dimdimunta na ulal iyeq in God ago maror aduganib zeq anuwan oy nog iyad tuqos daqay ham. Mat aw nog in gidek inaq iyeq teq in gamuk ka huritiy ham.

*Nagah araq dimun diqta ulilemim usaqta na ago gamuk awowun*

<sup>44</sup> God ago maror in bilaqne nagah araq dimun diqta og araqaq ulileman usaqta nazaq nog ham. Mat araq og nab lehim nagah na ahol waqim teq in a ta ulilam ton ham. Ulilemim in anad dimniysa lehim ago nagah bunmo giwaqim a le gizayim amenin mani waqim teq in lehim og na zayan nagah dimunta ulilemim usaqta na inmo ago diqta tiqiy ham.

*Kaliloy pokpok anawun ayahmota na ago gamuk awowun*

<sup>45</sup> Teq God ago maror in bilaqne mat mani akabiy an emaqta araq in kaliloy pokpok dimdimunta nagunad luwaqta nazaq nog ham. <sup>46</sup> Mat na pokpok nagunad luwim in araq dimun diqta ahol tuwam ham. Ahol waqim teq in lehim ago nagah bunmo giwaqim a le gizayim amenin mani waqim teq in lehim pokpok na aholyon tizay ham.

*Nabiq ago dob ago gamuk awowun*

<sup>47</sup> Teq God ago maror in bilaqne nabiq adobun kamisib hunegan wo ussa nabiq amo amo bolim dob nab woqiyta nazaq nog ham. <sup>48</sup> Nabiq kabemmo dobub woqan dob ate gwalan mataw hureqan bo dubub tugwal ham. Gwalan mataw na nabiq dimdimunta giwaqim degib giqemad nabiq meqmeqinta nag in gihunegiy ham. <sup>49</sup> Ari og ka ago kam abebtanta in nazaqmo tugwahtiqdaqta ham. Angelo boleq mataw meqmeqinta mataw dimdimunta gilikmanib osayta na giluwiyeqmo tigiwaq daqay ham. <sup>50</sup> Giwaqeq giqad le faq ayahtab gihunegid le tuwoq daqay ham. Woqeq in faq nab osad teq in gaqad gite sisad tuqos daqay ham.

<sup>51</sup> Haqad Yesus in ago disaipel susumun negim gibilan, Ne gamuk ka adugan bunmo ginad tiqem hasiy ye? ham. Haqan in buloniy, Ege haqiy. <sup>52</sup> Haqan Yesus gibilan, Mataw Moses ago gunun hurit kemiya na asor in God ago maror agamukan muturta huritim muzinim in disaipel tiqiyiyta ham. Nazaq iyan mataw



na in bilaqne bit araq ayahta anamreniz nog iyayta ham. Bit anamreniz na in gigo nagh kabemmo bit aduganib usaqta nab in nagh muturta teq kwaziqta inaqmo giwaqim asanib ad gwahtiqim mataw giqisihunayta ham.

*On mataw uliq Nasaret-ibta Yesus gileh ugiy*

*(Mak 6.1-6; Luk 4.16-30)*

<sup>53</sup> Ari Yesus gamuk awowun na bilaqim tihiqiyan in uliq na hulosisim tilah. <sup>54</sup> Lehim inmo ago uliq diq Nasaret-ib tugwahtim. Gwahtiqim in Juda gigo bit humab wolaytab lehim God ago gamuk asuleqin on mataw tigibilyaq. Gibilensa in huritad gihol riten nog iy yaqay. Gihol riten nog iysa in bilaq yaqay, Mat ko ago anad awaz meqinta na teq in daq azawayin inaqta emaqta na in edob diq wam? haq yaqay. <sup>55</sup> In mat bit emaqta naqmo atatinta haq yaqay. In anen Mariya-mo haq yaqay. In amagniz Jems teq Josep teq Saimon teq Judas haq yaqay. <sup>56</sup> Teq in ahiyan bunmo kawa i nenaq osauq haq yaqay. Mat ko daq zawayta nagan edob diq wam? haq yaqay. <sup>57</sup> In nazaq haqad Yesus anan gigem timeqniy yaqay. <sup>1</sup> Gigem meqniysa Yesus gibilan, God ago nantut abin uliq bunmo usaqta ham. Ari inmo ago uliqab teq in ago bitabmo diq in ahol abin haiqta ham.

<sup>58</sup> Ari on mataw na Yesus anan helmo a hi haqsa iyan in uliq nab daq azawayin inaqta kabemmo a hi am.

## 14

*Jon mataw huz negyaqta na wol eman mom*

*(Mak 6.14-29; Luk 3.19-20; 9.7-9)*

<sup>1-2</sup> Ari kam nab king Herot in on mataw Galiliy-ibta giwamuzim osad in Yesus kabiy daq emyaqta na ago abin tuhurit. Huritim in ago kabibiy mataw gibilan, Ko Jon mataw huz negyaqta naqmo ham. God in hodhodab wazan eraqan in aholib zaway ayahmo usaqta ham. <sup>3-4</sup> Na ezaqgo kwaziqmo Herot in ama Filip awe Herodiyas hureqim wam. Waqan Jon in Herot bulonyaq, Ni God ago gunun ayahta itiyonim aw na wanta haqyaq. In nazaq haqsa teq Herot bilaqan in ago mataw asor lehim Jon wazim tiqirquriy. <sup>5</sup> Irquran ossa Herot in wol emgo anad emyaqta teq on mataw bunmo Jon anan God ago nantut araq haqsa iyan in wol emnan rabyaq.

<sup>6</sup> Ari kam araqab Herot anen iqamta na akaman tugwahtim. An mataw asor bolim Herot inaq humab wolim didaq neqad osiy. Ossa Herot awe Herodiyas amiy bolim mataw na ginognib dorsa Herot in ahol waqad anad tibilam. <sup>7</sup> Anad bilaqsa in amun aw na bulon, God ya ibiysa ya helmo

diq bilaqaiq ham. Ni nagh araq ninad usaqta na anan ibilenid ya tinigdaiq ham.

<sup>8</sup> Haqan amun aw na in anen Herodiyas anad huritnan tilah. Lehan anen anadta bulonan in ta bolim Herot tubulon, Ni Jon mataw huz negyaqta na anat urotoq afaqin degib emeq a bo ya yag ham. <sup>9</sup> In nazaq bilaqan king na afaqan tiqiy. Afaqan iyad teq in helmo ulilib hamta na anadin emad in mataw na gimeb amebay woqnan hulosis. Nazaq iyan amun aw nagh anan bilamta na in em uggo tibilam. <sup>10</sup> Ad in nan eman lehan mataw giqirquran osayta na abitnib in Jon anat urot tayim afaqin tuwaqiy. <sup>11</sup> Waqim in degib emim a bolim aw barasta na tuqugiy. Ugan in waqim anen ago hib ad tilah. <sup>12</sup> An abeb Jon ago disaipel huritim in bolim asan waqim a lehim tiyay toniy. Yay tonim teq in lehim Yesus tubuloni.

*Yesus on mataw 5,000 nazaq didaq naq*  
*(Mak 6.31-44; Luk 9.10-17; Jon 6.1-13)*

<sup>13</sup> Ari Jon wol emiya na ago Yesus huritim in muyib gwalim saw na hulosisim saw araq amatawun haiqtab tilah. Lehsa on mataw kabemmo huritim in gigo uliq hulosisim in yuw aqurumun muzim gisen-abmo Yesus muzim inaq tilehiymo. <sup>14</sup> An abeb Yesus bo tugwahtiqim in muy hulosisim dubub gwalimmo ame le on mataw kabemmo gibiyad in ginan anad timeqniy. Anad meqniysa in gigo asor gigo moq inaq na giwastitayan gihol tidimniyiy.

<sup>15</sup> Sa imisor zeq tuwolehsa Yesus ago disaipel bolim tubuloni, Saw ka amatawun haiqta haqiy. Teq zeq tuwolehqmo haqiy. Nazaq iyan ni on mataw giqemid in uliq sinsin usayta kogab lehad giholmen didaq zayegeq neqiy haqiy. <sup>16</sup> Haqan Yesus bilam, Na nagaqgo in leh daqay? ham. Nemo didaq negid neqiy ham. <sup>17</sup> Haqan in buloni, I gigo didaq ka kabem a haiq haqiy. Bret abaynaginmo teq nabiq gigermo kawa usaq haqiy. <sup>18</sup> Haqan Yesus gibilan, Nagh nag ne giwaeqgeq yaqgo hib a boliy ham.

<sup>19</sup> Haqad in on mataw gibilenan in saw nab sisihunibmo tuqos woqiy. Os woqim ossa Yesus bret abaynagin na teq nabiq giger na waqim ame ulilib gwalsa in God esey ugim teq in bret na orqayim ago disaipel tinag. Negan disaipel waqim on mataw tinegiy. <sup>20</sup> Negan in bunmo didaq na neqan tigiyunin bug. Giyuninan disaipel didaq abeyan hulosisyita na ginuwim kuram 12 nazaqmo gisihenan ate tugwal bug. <sup>21</sup> Ari mataw didaq neqiyta na ginulin-qan kabemmo diq 5,000 nazaq. Ad in on teq onmin a hi ginuliniy.

*Yesus yuw amalib bayim lah*  
*(Mak 6.45-52; Jon 6.16-21)*

<sup>22</sup> Ari Yesus in ago disaipel giqeman muyib gwalim in ameb yuw-kurorqan

Galiliy urotim aqurumun kozaq ban tilehiy. Lehssa inmo osim mataw dauh biyahta na giqeman giquliqab tilehiy. <sup>23</sup> Giqeman lehssa teq in amomo God inaq gamuk emnan haqad garahab tugwalah. In gwalehim ossa imisor diq tiqiyann in amomo garah nabmo tuqos. <sup>24</sup> Ossa muy pesanmo tiqiyann tim ayahmo eraqim muy anobun ban bolad in kamis wolsa eraqim muy tuqothasyaq. <sup>25</sup> Othassa saw tihastitaynan tonsa tarom asor ussamo Yesus in ago disaipel gigerab yuw bayim tilah. <sup>26</sup> Lehssa disaipel in Yesus yuw bayim bolsa ahol waqadmo in ritenim an buloniy, Ko wit araqagya haqiy. Haqad in rabad tiqek ton yaqay. <sup>27</sup> Ek tonsa Yesus hidmo gibilan, Ne giwaz meqniyyiyy ham. Ka yaqmo lehaiq ham. Ne hi rabiyy ham.

<sup>28</sup> Haqanmo Pita amenin emim bilam, Iyahta ham ka ninmo iyeq teq ni ya ibilenid ya nazaqmo yuw bayeq nigerab lehiq ham. <sup>29</sup> Haqan Yesus bulon, Ni bol ham. Haqan Pita muy hulosisim yuw bayim Yesus agerab tilah. <sup>30</sup> Lehssa tim awaz meqin diq sibsa in tirabyaq. Rabad in yuw aduganib tuwolehyaq. Wolehadmo in lileyim bilam, Iyahta ni ya iwaz ham. <sup>31</sup> Haqasamo hidmo Yesus aben emim Pita tuwaz. Wazad in bulon, Ni ninad helmo haqaqta na amik ham. Ezaq haqad ni ninad giger usaq? ham. <sup>32</sup> Haqad in giger muyib gwalanmo tim timidam. <sup>33</sup> Mideman mataw muyib osiyta na in Yesus abin iluwad bilaq yaqay, Helmo ni God atatinmo diq haq yaqay.

*Yesus uliq Genesaret-ib mataw moqayta kabemmo giwastitayan dimniyyi*  
(Mak 6.53-56)

<sup>34</sup> Ari Yesus ago disaipel nenaq yuwkurorqan Galiliy urotim lehim urum kozaq ban uliq Genesaret ago lan ezab tugwalyi. <sup>35</sup> Gwalan mataw saw nabta na in Yesus ahol waq hasim in uliq sinsin usayta nagab nan eman lehan mataw in giyogniz gigo moq inaqta na bunmo giqad Yesus ago hib tuboliy. <sup>36</sup> Bolim in ginad awaz meqin amalib Yesus bulon yaqay, Ni on mataw gigo moq inaq ka gihulosid in giben ningo tubusan adekmo waziy haq yaqay. Haqsa on mataw Yesus ago tubusan adek waz yaqayta na bunmo gihol tidimniyy yaqay.

## 15

*God ago maror i gisesan gigo gunun giquriyam*  
(Mak 7.1-13)

<sup>1-2</sup> Ari kam nabmo Farisi asor teq mataw Moses ago gunun hurit kemiyta na asor in Jerusalem hulosisim Yesus ago hib tuboliy. Bolim in susumun ugim bilaqiy, Ezaq haqad ningo disaipel i gisesan gigo gunun itiyonim giben a hi suholimmo didaq neqayta? haqiy.

<sup>3</sup> Haqan Yesus in gigo gamuk amenin emim gibilan, Ta ne ezaq haqad ne gisesan gigo gunun muzinad teq ne God ago gunun itiyonayta? ham. <sup>4</sup> God bilam, Ni ninen nimam giwazinad gilumsih haqad in bilam ham. Teq in bilam, Mat araq anen amam a hi giqudinad gamuk meqinta amalib gibilawunid ne wol emid moqan haqad in bilam ham. <sup>5</sup> Ta teq negmo kazaq bilaqayta ham. Mat araq in anen amam gibileneq bilaqdaq, Yaqgo nagah ne gilumsihgo usta na ya inad buliyim God abinib eman usaqta haqdaq haqad ne bilaqayta ham. <sup>6</sup> Mat na gamuk awaz meqinta nazaq bilaqeq teq in anen amam giwazinad a ta hi gilumsihdaqta haqad ne bilaqayta ham. Nazaq iyan ne God ago gamuk bayan woqim samanta ussa ne gisesan gigo hib gunun waqiyta naqmo ne wazan eraqaqta ham.

<sup>7</sup> Ne mataw gimileq meqin diqta ham. God ago nantut Aisaya in ne gilum kemim ne gigo daq na anan hel diqmo bilam ham. <sup>8</sup> In bilam,

On mataw ka giqezabmo God abin iluwayta haqad in bilam ham. Teq in ginad gigem pesanmo God ago hib usaqta haqad in bilam ham.

<sup>9</sup> Mataw na God abin samanta iluwayta haqad in bilam ham. In mataw og kabtaqmo gigo gunun anan bilaqay, God ago maror dimunta haqayta haqad in bilam ham. Ad in gunun naqmo mataw giqisihunayta haqad in bilam ham. *Aisaya 29.13*

*Yesus daq meqmeqinta mataw giqeman God ameb gihol anumlan inaq iyaqta na ginan bilam*

(Mak 7.14-23)

<sup>10</sup> Ari Yesus on mataw biyahta na gibilan bolan in gibilan, Ne gamuk ka huriteq teq ginad em hasiy ham. <sup>11</sup> Nagah bunmo mataw wazim giteb eman lehaqta na in mataw gihol eman God ameb anumlan a hi iyaqta ham. Haiq ham. Nagah mat aduganib usim bo aqezab gwahtiqaqta naqmo in mat ahol eman God ameb anumlan inaq iyaqta ham.

<sup>12</sup> Haqanmo disaipel in agerab loqim buloniy, Se haqiy ni Farisi gigo gamuk bayan woqsa in huritim gigem timeqniyyaq haqiy. <sup>13</sup> Haqan Yesus bilam, Didaq ahokan bunmo ya inam Heven-ib osaqta a hi layta na in titeqdaq ham. <sup>14</sup> Mataw na gihulosid luwiyy ham. In gime haiqta ham. Gime hiqiysa in mataw gibilenay, Dan kawaqmo usaq haqayta ham. Bo kazaq lehiy haqayta ham. Teq mat ame haiqta in mat ta araq ame haiqtamo dan isihuneq a lehadmo in giger garabmo le yayib tuwoq daqay ham.

<sup>15</sup> Haqan Pita bilam, Nagah mat eman ahol anumlan inaq iyaqta ago gamuk

awowun na alulin ni i gibilen ham. <sup>16</sup> Haqan Yesus bilam, Ne kam gineh teq ginad em daqay? ham. <sup>17</sup> Nagah mat ateb eman agemab wolehaqta na in abekoqib lehim le yayib wolehaqta ham. Na ne ginad a hi emay ye? ham. <sup>18</sup> Ari nagah mat aqezab gwahtiqaqta na in mat agemab usim teq gwahtiqaqta ham. Nazaq iyan nagah naqmo in mat na eman God ameb ahol anumlan inaq iyaqta ham.

<sup>19</sup> Daq meqinta mataw gigemab gwahtiqaqta na kagzaq ham. Ni ninad meqmeqinta nigemab usaqta na teq ni mat wol emaqta na teq ni an alulib hureqim inaq usaqta na teq ni an a hi waqadmo an haresmo hureqim inaq usaqta na teq ni rin tonaqta na teq ni hazizirib mat ara q kat ugaqta na teq ni mataw gibilawunaqta na ham. <sup>20</sup> Daq nagan bunmo in mat eman God ameb ahol anumlan inaq iyaqta ham. Ari mat aben a hi suholadmo didaq neqaqta na in ahol eman God ameb anumlan inaq a hi iyaqta ham.

*Saw Kenan-ib aw ara q Yesus anan helmo ham*

*(Mak 7.24-30)*

<sup>21</sup> Ari Yesus uliq na hulosisim in uliq giger Tair teq Saidon gigo saw ban tilah. <sup>22</sup> Lehan Kenan-ib aw ara q saw nab osyaqta na bolim in lileyim bilam, O Iyahta ham. Ni Devit atatin\* ham. Ni ya inan ninad meqniyan ham. Bugaw ara q meqinta ya imiy meqin diq tonaq ham. <sup>23</sup> Haqan Yesus amenin ara q a hi bilam. An Yesus ago disaipel bolim buloniy, Aw ka i gimuzad gillilewunad luwaq haqiy. Nagah in anan bilaqaqta na ni em ugidmo in lehan haqiy. <sup>24</sup> Haqan Yesus bilam, God iqeman ya Isrel on mataw gimomo gigo hib bolta ham. Isrel on mataw na in bilaqne sipsip nabag lehiyta nog ham. An ya on mataw naqmo ginagunim bol ham. Ya mataw en ta ara q gigo hib a hi bol ham.

<sup>25</sup> An aw na bolim Yesus agerab abak-bakan ulum laquwim turad bulon, Iyahta ham ni ya ilumsih ham. <sup>26</sup> Haqan Yesus amenin emim bilam, Ni hulossa yaqgo onmin didaq negid giyunin bugid teq ham. Luweq ya onmin gigo dida qta na waqeq gaun negid neqsa yaqgo onmin gigemnan moq daqay ham. Daq nawa na in dimun a haiq ham. <sup>27</sup> Haqan aw na bilam, Iyahta ni helmo bilaqaq ham. Ta teq gaun in gimam ago ban ahaqenib didaq aneglan woqsa in neqaytamo ham. <sup>28</sup> Haqan Yesus bilam, Ni ninad helmo haqtaqta na ayahmo ham. Nagah anan ninad bilaqaqta na in ningo hib tugwahti qda q ham. Yesus nazaq

bilaqan muran diq nawaqmo aw na amiy ahol tidimniy.

*Yesus mataw kabemmo gigo moq inaqta giwastitayan dimniyiy*

<sup>29</sup> Ari Yesus uliq na hulosisim in yuw-kurorqan Galiliy agurumun muzim lehim in garah ara qab gwalehim tuqos wom. <sup>30</sup> Os woqim ossa teq on mataw kabemmo in ago hib gaboliy. Gabolad in mataw gisen meqinta teq gime haiqta teq giditin kok tonta teq gizez haiqta teq gigo moq amo amo giholib usaqta kabemmo in Yesus ago hib giqad gaboliy. Giqad gabolim Yesus anognib giqeman teq Yesus in giwastitayan tidimniyiy. <sup>31</sup> An on mataw biyahta na in mataw gizez haiqta na gamuk tiqemsa teq mataw giditin kok tonta na gihol tidimniyisa teq mataw gisen meqinta na eraqim tiloq gelsa teq mataw gime haiqta na saw ahol tuwaqsa in nazaq gibiyad in gihol turuh nemyaq. Gihol turuh nemsan in Isrel gigo God abin tiqiluw yaqay.

*Yesus on mataw 4,000 nazaq didaq nag (Mak 8.1-10)*

<sup>32</sup> Ari Yesus in ago disaipel gibilenan bolan in gibilan, Ya on mataw ka ginan inad timeqniyaq ham. Ya nenaq kam ezeqmanmo osan in gigo didaq tihiqiy ham. In didaq haiqmo gigemnan moqsa ya samanmo giqemid lehnan ituw hiqiyay ham. Luweq in lehad danib gime sin-sanid woq daqay ham. <sup>33</sup> Haqan disaipel buloniy, Saw ka saman diqta haqiy. I edob bret kabemmo giwageq on mataw humab ayahta kazaq ka i negid neq daqay? haqiy. <sup>34</sup> Haqan Yesus tisuusumun nag, Ta negmo gigo bret ganim diq usaq? ham. An in bilaqiy, I gigo bret 7 nazaq diq teq nabi q amikmikta amulik-mulikmo kawa usaq haqiy.

<sup>35</sup> Haqan Yesus on mataw gibilenan in ogib os woqim tuqosiy. <sup>36</sup> Ossa teq Yesus in bret 7 na nabi q inaq giwaqim God esey ugim teq in orqayim ago disaipel tinag. Negan disaipel waqim on mataw tinegiy. <sup>37</sup> Negan on mataw bunmo neqan tigiyunin bug. Giyunin bugan didaq abeyan asor osan in kuram 7 giwaqim amalib tigisiheni y. <sup>38</sup> Mataw didaq neqiyta na ginulin-qan kabemmo diq 4,000 nazaq. Teq on onmin nenaq a hi ginulin bugiy. <sup>39</sup> An Yesus on mataw giqeman tilehsa teq in muyib gwalim og anan Magadan haqayta na ago saw ban tilah.

## 16

*Mataw Yesus daq ara q azawayin inaqta emsa ahol waqnan bilaqiy (Mak 8.11-13; Luk 11.29-32)*

\* 15:22: Matyu 9.27 nab teq ni gamuk 'Devit atatin' ka alulin ahol waqda q.

<sup>1</sup> Ari Farisi asor teq Sadyusi asor in Yesus ulum waqnan haqad agerab tuboliy. Bolim in bilaqiy, Ni Mat Iyah ulilib osaqta na bulonid in daq araq azawayin inaqta emid i ahol waquq haqiy. Ahol waqad teq i ni ninan helmo tihaqam haqiy. <sup>2</sup> Haqan Yesus amenin emim bilam, [Zeq wolehad imisor iysa kait akakaqan iysa ne ahol waqad bilaqay, Kam tidimniynan kait akakaqan iyaq haqayta ham. <sup>3</sup> Ad tarommo onqas dubta tiqad kait akakaqan iysa ne ahol waqad bilaqay, Muran urom woqad tim sibdaq haqayta ham. Ne kait awaqan ahol waqad nagah teq gwahtiqaqta na ago ne ginad em hasayta ham. Ta teq muran kam kab ne nagah ahol waqad ginad a hi em hasay ham.] <sup>4</sup> On mataw kam kabta ham ne on mataw meqinta God gileh ugayta ham. Ne daq azawayin inaqta naqmo ahol waqnan bilaqayta ham. Ta teq God in daq araq azawayin inaqta a hi giqisihundaq ham. Kwaziqmo Jona aholib daq gwahtimta naqmo ne ahol waq daqay ham. Haqad Yesus in gihulosad tilah.

*Farisi teq Sadyusi nenaq gigo gamuk awowun*

*(Mak 8.14-21)*

<sup>5</sup> Ari disaipel yuw-kurorqan Galiliy urotim le urum kozaq ban tugwahtiqiy. Teq in gidek zizalan bret asor waqim ad a hi boliy. <sup>6</sup> Sa Yesus gibilan, Ne Farisi teq Sadyusi gigo yis anan gihol waz naqmo hiqiyiy ham. <sup>7</sup> Haqan disaipel in gimo an bulonim bilaqiy, Ka i bret waqim ad a hi bolan daqag in bilaqayya haqiy. <sup>8</sup> Haqsa Yesus in gigo gamuk tuhuritim in bilam, Mataw ham ne gigo ginad helmo haqayta na amik diq ham. Ezaqgo ne bilaqay, I bret haiq haqay? ham. <sup>9</sup> Ne ginad a hi emad os tutay ye? ham. Mataw 5,000 nazaq bret abaynagin neqan teq ne abeyan ginuwim kuram kabemmo gisiheniya na ne anadin a hi emay ye? ham. <sup>10</sup> Teq mataw 4,000 nazaq bret 7 neqan ne abeyan ginuwim kuram kabemmo gisiheniya na ne anadin a hi emaymo ye? ham. <sup>11</sup> Ezaq diq tonim ne ginad a hi emay? ham. Ya bret diq anan a hi gibilen ham. Ya bilay, Ne Farisi teq Sadyusi gigo yis anan gihol waz naqmo hiqiyiy hay ham. <sup>12</sup> In nazaq haqan teq disaipel ginad tiqemiy. Yesus in bret ago yis anan a hi bilam haqiy. In Farisi teq Sadyusi gigo daq in on mataw giqisihunayta naqmo i anan gihol waz naqmo hiqiyam haqad in bilamta haqiy.

*Pita Yesus ahol alulin bilaq siram*

*(Mak 8.27-30; Luk 9.18-21)*

<sup>13</sup> Ari Yesus uliq ayahta Sisariya Filipay gigo saw ban lehim kam nab in ago disaipel susumun negim bilam, On mataw in Mat Atatin anan nog diq haqsa ne huritay?

ham. <sup>14</sup> Haqan disaipel buloniy, Mataw asor ni ninan Jon mataw huz negyaqta na amatin haqay haqiy. Sa asor ni ninan bilaqay, Ni Elaija haqay haqiy. Sa asor bilaqay, Jeremaya o God ago nantut kwaziqta na gigo araq daqag ni haqay haqiy. <sup>15</sup> An Yesus a ta susumun nag, Ta negmo ya inan nog diq haqay? ham. <sup>16</sup> Haqan Saimon Pita amenin emim tibilam, Ni Kraish ham. God mat emid bo i gilumsihdaqta amatin na ninmo ham. Ni God kayeqmo osaqta na atatin ham.

<sup>17</sup> Haqan Yesus bulon, Jona atatin Saimon ham, ni tidimniyim osaq ham. Ogib kab mat araq in ya ihol alulin nawa ni tibilamta na in a hi niqisihun ham. Haiqqam ham. Ya imam Heven-ib osaqta naqmo in ya ihol alulin na tiniqisihun ham. <sup>18</sup> An ya kazaq nibilenaiq ham. Pita ni gig nog ham. Ni nimalib teq yaqgo on mataw giqemid in nab zaway iyeq titur daqay ham. Tursa nagah zawayta mataw tumoqiya gigo uliqab boleq gigothassa in a hi hiqiy daqay ham. <sup>19</sup> Ya teq zaway kazaq tinigdaiq ham. Og kab mat araq God ago maror aduganib gwahtiqaqan tona ni wasihdaqta na tekomo God in mat na wasihgo anad tiqamtamo ham. Ari mat araq God ago maror aduganib gwahtiqaqan tona ni bo gwahtiq haqdaqta na tekomo God in mat na gwahtiqgo anad tiqamtamo ham. <sup>20</sup> Haqad Yesus in ago disaipel gunun negim atoranmo gibilan, Ne ya ihol alulin ya mat God iqeman bolta anan Kraish haqayta na ago ne mat araq hikidik buloniy ham.

### **Yesus teq moqdaqta na ahol loyinad in ago daq bunmo ago disaipel giqisihun**

*Yesus bilam, Ya moqeq teq ta eraqdaiq ham*

*(Mak 8.31-9.1; Luk 9.22-27)*

<sup>21</sup> Ari kam nabmo Yesus ago gamuk amebta in moqdaqta na alulin emim in ago disaipel gibilenim bilam, Ya Jerusalem-ub lehmo tilehdaiq ham. Lehid mataw marorta na teq mataw tamaz emayta gigo aseseqta na teq mataw Moses ago gunun hurit kemiyta na in santitiy ayahmo tiyag daqay ham. Yagad teq in ya inol emid tumoqdaiq ham. Moqeq ya kam ezeqmanmo usid teq God iwazid ta eraqdaiq ham. <sup>22</sup> Haqan Pita nazaq huritadmo in Yesus waqim dan adek ban a lehim teq in wadim bulon, Iyahta ham haiq diqmo ham. Daq meqinta nagan niholib a hi gwahtiqdaq ham. <sup>23</sup> An Yesus ahol buliyim in Pita kazaq bulon, Satan ni tukeq ya igilehun ban leh ham. Ni ya idanin qwaynan tonaq ham. Ni God anad a hi muzaq ham. Haiq

ham. Ni mat og kabtaqmo anad muzaq ham.

<sup>24</sup> Haqad in ago disaipel bunmo kazaq gibilan, Mat araq ya imuzeq bolnan haqad anad emeq in ahol wazid woqan ham. Ad ya afaqan soraigta nazaqmo in sornan anad bilaqsa in ago kruse sorid abetarib gwalan ham. In nazaq toneq teq in ya imuzeq bolan ham. <sup>25</sup> Na ezaqgo mat nog inmo ahol anadin emad asan alowan tonaqta na in ahol awitan tihik hulesdaq ham. Ari mat nog in ya inadin emad ahol nog huloddaqta na in dimunmo kuluwakuwmo tuqosdaq ham.

<sup>26</sup> Nagaqgo mataw og kab osad in giholyon nagah kabemmo diq rom tonayta? ham. Abeb in moqid in gigo nagah giholyon rom toniyta na ezaq teq gilumsihdaq? ham. In gihol awitan tihik hulesdaq ham. Teq in nagah ogibta na amalib gihol awitan zayeq os dimuntab le tugwahitiq daqay ye? ham. Na haiqmo ham.

<sup>27</sup> Abeb Mat Atatin in amam ago ahol anuwanib ago angelo nenaq tuboldaqta ham. Boleq in on mataw bunmo gigo daq in emiyta na ahunibmo amenin tinegdaq ham. <sup>28</sup> Ya helmo ne gibilenaig ham. On mataw muran kam kab osayta ka gigo asor a hi moqadmo in Mat Atatin king iyeq bolsa ahol tuwaq daqay ham.

## 17

*Yesus ahol awaqan lul araq diq iy*  
(Mak 9.2-13; Luk 9.28-36)

<sup>1</sup> Ari abeb kam 6 nazaq tihiqiyani Yesus in Pita teq Jems ama Jon inaq giwaqim nenaq garah araq sisaqta abigmanib tugwalehiy. Gwalehim in nab giholbinmo tuqosiy. <sup>2</sup> Ossa mataw na gimeb Yesus ahol buliyim awaqan lul araq diq iy. In anobun zeq anuwan nog iysa ago tubusan hus diq saw anuwan nog iy. <sup>3</sup> Sa disaipel nazaq Yesus ahol waqad ossamo Elaija ayow Moses inaq giwitan tugwahtiqiy. Gwahtiqim in disaipel gimeb Yesus inaq gamuk bilaqad turiy.

<sup>4</sup> Tursa Pita in Yesus bulon, Iyahta ham i kab osauqta ka in dimun diq ham. Ni ninad bilaqid ya kab baybay ezeqmanmo tiqemdaig ham. Araq ninmen teq araq Moses amen teq araq Elaija amen ham.

<sup>5</sup> In nazaq bilaqad tursamo onqas anuwan inaqtta gehitiqim tiqisish. Giqisihan God aqez onqas na aduganib bilam, Ka ya itatin ham. Ya in anan inad bilaqsa ya igem dimun diq iyaqta ham. Ne in aqez huritiy ham. <sup>6</sup> An disaipel God aqez na huritim gihol rabsa in ogib woqim tuqosiy. <sup>7</sup> Ussa Yesus gigerab bolim giwazad gibilan, Ne hi rabiy ham. Eraqiy ham. <sup>8</sup> Haqan in ogib usad gimemo gwalehim in mat araq

ahol a hi waqiy. In Yesus amomo tursa ahol waqiy.

<sup>9</sup> Ari in aweweqmo garah na hulosityon gewoqadmo Yesus disaipel ezeqman na gidek wazim gibilan, Ne muran sen qway nog iyim nagah ahol waqiyta ka ne mat araq hikidik buloniy ham. Abeb God in Mat Atatin hodhodab waz ta eraqid teq ne nagah ka ago tibilaq daqay ham.

<sup>10</sup> Haqan disaipel tisuusumun ugiy, Ta ezaqta ago mataw Moses ago gunun hurit kemiyta na bilaqay, Elaija danmeb bolid teq Kraiss abeb boldaq haqayta? haqiy. <sup>11</sup> Haqan Yesus bilam, Helmo ham. Elaija boldaqta ham. In boleq nagah bunmo tuwastitaydaqta ham. <sup>12</sup> Ta teq ya ne gibilenaig ham. Elaija tubol ham. Bolan mataw in ahol a hi waq hasiy ham. Ahol a hi waq hasad in ginadibmo mat na aholib daqdaq emim timeqin toniy ham. Ad teq in nazaqmo Mat Atatin ayon emsa in santitiy ayahmo tuwaqdaqmo ham. <sup>13</sup> Yesus nazaq haqanmo disaipel ginad tiqemiy, Yesus in Jon mataw huz neqyaqta naqmo anan bilaqay haqiy.

*Yesus amun araq aholib bugaw meqinta muz*

(Mak 9.14-29; Luk 9.37-43)

<sup>14-15</sup> Ari Yesus ago disaipel ezeqman na nenaq on mataw biyahta na gigerab gewoqanmo mat araq bo Yesus agerab loqim abakbakan ulum laquwim turad bilam, Iyahta ham ni yaqgo amun matta ka ninad ug ham. In agadan iyad ahol meqin diq iyaqta ham. Sirisirimo in faqmeb teq yuwmeb woqaqta ham. <sup>16</sup> Sa ya waqim ningo disaipel gigo hib a bolan in wastitaygo biyab a hi iyiy ham. <sup>17</sup> Haqan Yesus bilam, On mataw kam kabta ne God anan helmo a hi haqayta ham. Ad ne ginad titnonim diq a hi usaqta ham. Kam ganim teq ya nenaq a ta osdaig? ham. Kam ganim teq ya ne ginad siqim iyaqta na ago a hi bilaqad ya ne gigo afaqan sordaiq? ham. Ne amun yaqgo hib kab a boliy ham. <sup>18</sup> Haqan in amun a bolan Yesus bugaw meqinta na tuwad. Wadanmo bugaw meqinta na amun tuhulos ug. Hulos ugan nawaqmo amun na ago moq tihiqiy.

<sup>19</sup> Abeb disaipel in gimomo Yesus ago hib bolim buloniy, I ezaq iyim bugaw meqinta ko a hi muz? haqiy. <sup>20</sup> An Yesus gibilan, Ne ginad helmo haqayta na in siqim diq na ago ne bugaw meqinta na a hi muziy ham. Ya helmo ne gibilenaig ham, Ne ginad helmo haqayta na amik diq ay mastet anagin nog usid teq ne garah ka buloneq bilaq daqay, Ni eraqeq kobmo leh haqid in ne giqez tumuzdaq ham. Ad teq ne nagah araq a hi em daqayta a hi iy daqay ham. [ <sup>21</sup> Teq bugaw meqinta muzgo adanteqin

araq araq haiqqam ham. Ne God amomo bulonad susumun ugad teq ne didaq udiniy ham. Dante amulik naqmo amalib teq ne bugaw meqinta muz daqayta ham.]

*Yesus ame gigerta bilam, Ya moqeq teq ta eraqdaiq ham*

(Mak 9.30-32; Luk 9.43-45)

<sup>22</sup> Ari Yesus ago disaipel nenaq saw Galiliy-ib humab wolim osad teq in ago disaipel gibilan, Mat araq teq Mat Atatin waqeq mataw gibenab tiqemdaq ham. <sup>23</sup> Emid teq in wol emid tumoqdaq ham. Moqeq kam ezeqmanmo usid teq God in wazid ta eraqdaq ham. Haqan disaipel gihol afaqan diq iyiy.

*Yesus Tempel ago takis zay*

<sup>24</sup> Ari abeb in le uliq Kapaneam-ub tugwahtiqiy. Gwahtiqanmo nab mataw Tempel ago takis waqayta na in Pita ago hib bolim tisusumun ugiy, Ne gigo tisa ko Tempel ago takis zayaqta ye? haqiy. <sup>25</sup> Haqan Pita bilam, Ege ham in zayaqta ham. Haqad in muleqim bitab ta bolim in nan na ago asit a hi bilaqsamo Yesus inmo gamuk na wazan eraqan in tisusumun, Saimon ham ni ninad ezaq emaq? ham. Og kab mataw king iyim osayta na in gigan gigo hib takis waqayta? ham. In gimo gigo onmin gigo hib takis waqayta o haiq in mataw ta asor gigo hib waqayta? ham. <sup>26</sup> Haqan Pita bilam, In mataw ta asor gigo hib takis waqayta ham. An Yesus bulon, Ni dimunmo tibilam ham. King gigo onmin takis a hi zayayta ham. In samanmo osayta ham. <sup>27</sup> Nazaq iyan i takis a hi emamta na in dimunmo ham. Ta teq luweq i mataw na gigem wizid in i ginad daqay ham. Nazaq iyan ni yuwub leheq aul huneg ham. Hunegeq nabiq danmebta ni tugotdaqta na ni waqeq ate hiksisi ham. Hiksiseq teq in ateb mani araq ussa ni ahol tuwaqdaq ham. Mani na ni waqeq a le ya ninaq giholyon takis na ni zayad neg ham.

## 18

*God ago maror aduganib nog in mat ayah diqta?*

(Mak 9.33-37; Luk 9.46-48)

<sup>1</sup> Kam nab Yesus ago disaipel in Yesus ago hib bolim tisusumun ugiy, God ago maror aduganib nog in ayah diqta? haqiy. <sup>2</sup> Haqan Yesus amun amikta araq bulonan bolan in amun na eman disaipel gilikmanib titur. <sup>3</sup> Tursa Yesus gibilan, Ya helmo ne gibilenaq ham. Amun kazaqta ka abin haiqta ham. Teq ne ginad buliyeq amun abin haiqta ka nogmo a hi iyeq ne God ago maror aduganib a hi gwahtiq daqay ham.

<sup>4</sup> Ari mat nog inmo ahol wazid woqsa in amun abin haiqta nog iyeq mat naqmo God ago maror aduganib abin ayahta tiqiydaq ham.

*Yesus daq hihiq mataw ginad helta meqin tonaqta na ginan bilam*

(Mak 9.42-48; Luk 17.1-2)

<sup>5</sup> Mat nog in amun kaqanta ya ibinib bolsa ahol waqad wazinaqta na in ya iwazinaqmo ham. <sup>6</sup> Ari ne gigo araq in onmin amikmikta ya inan helmo haqayta na gigo araq\* baymuzsa in anad helta na hulonsan tonid mat naqanta in yaqgo faq meqin diq tuwaqdaq ham. Na in kwaziqmo gig ayahta anatgumnib am wazeq hunegid kamismeb woqid yuw tineq nagta ham. Neqid mat na moqeq daq meqinta na a hi emeq in yaqgo faq meqin diqta na a hi waq nagta ham.

<sup>7</sup> Daq meqinta mataw ginad hureqsa in ginad helta hulosaqta na og kab tugwahtiqdaqta ham. Teq mat aw nog daq nazaq em daqayta na in timeqniy has daqayta ham.

<sup>8</sup> Ni nibensen araq kat nigid ni ninad helta hulonsan tonad ni nihol asor na uroteq hunegid lehan ham. Ni niben o nisen amulikmo inaq iyeq ni God inaq kuluwa-kuluwmo osdaqta na in dimunmo ham. Ari ni niben nisen giger inaq iyid in nihunegid ni faq a hi miyaqta nab lehdaqta na in meqin diq ham. <sup>9</sup> Ari ni nimeqnagin araq kat nigid ni ninad helta hulonsan tonad ni nimeqnagin na othaseq hunegid lehan ham. Ni nimeqnagin amulikmo inaq iyeq ni God inaq kuluwa-kuluwmo osdaqta na in dimunmo ham. Ari ni nimeqnagin giger inaq iyid in nihunegid ni os meqinta na ago faqab lehdaqta na in meqin diq ham.

*Sipsip araq nabag lahta ago gamuk awowun*

(Luk 15.3-7)

<sup>10-11</sup> Ne gihol wamuziy ham. Luweq ne onmin amikmikta na gigo araq baymuz daqay ham. Ya kazaq ne gibilenaq ham. In gigo angelo gibiy muzayta na in Heven-ib ya imam anobun tutimmo ahol waqayta ham. <sup>12</sup> Teq ne ginad ezaq emay? ham. Mat araq in ago sipsip 100 nazaq giwamuzad luwsa ta araq nabag lehid mat na le a hi nagundaq e? ham. Haiqqam ham. In ago sipsip 99 na gihulosid garahab luwsa in leheq sipsip amulikmo nabag lahta na tinagundaq ham. <sup>13</sup> Ya helmo ne gibilenaq ham. Mat na in ago sipsip nabag lahta na ahol tuwaqeq ari in ago sipsip kabemmo garahab luwad nabag a hi lehiyta

\* **18:6:** Mataw asor ginad emay, Yesus onmin amikmikta ginan bilamta na in ago disaipel ta asor gihin haiqta na ginan bilam haqay.

na ginadin a hi emdaq ham. In ago sip-sip amulikmo nabag lehan in nagim le ta wamta naqmo ago in anad dimniy naqmo hiqiydaq ham. <sup>14</sup> Na nazaqmo ne Gimam Heven-ib osaqtta na in onmin amikmikta na gigo araq aban iygo in anad a hi bilaqdaq ham.

*Ni nimaqbab araq daq meqinta emid ni inaq wastitaydaqta adan*  
(Luk 17.3)

<sup>15</sup> Ni nimaqbab araq daq araq meqinta niholib emid ni leheq ahol waq ham. Ahol waqad ni inaq negmo giger giholbinmo osad ni ago daq meqinta na anan bulon waq ham. In ningo gamuk huritid teq ni nimaqbab na hureqid in God ago hib ta boldaq ham. <sup>16</sup> Ari in ni niqez a hi huritid ni boleq mat amulik o giger nazaq giwaqeq nenaq ta leheq nimaqbab na inaq gamuk na wastitay waqiy ham. Na ezaqgo mataw na in giqez ni niqez inaq wastonid ningo gamuk awaz timeqniydaq ham. <sup>17</sup> Ari ni nimaqbab na in ne giqez a hi huritid ni on mataw yaqgo nan huritayta na bunmo gibilen ham. Gibilenid in ni nimaqbab na bulonsa in giqez a hi huritid teq ne bunmo mat na aholib hiqiyiy ham. Ne on mataw en ta asor Juda a haiqta nagan teq mataw takis waqayta na giholib hiqiyayta nazaq ne mat na aholib hiqiyiyimo ham.

<sup>18</sup> Ya helmo ne gibilenaiq ham. Og kab ne gigo mat araq in ago daq meqinta hulonsan atuw hiqiya ne baymuzsa God tekomo mat na baymuzgo anad tiqamtamo ham. Ari mat na in ago daq meqinta na hulosis ne ta waqid ne gimuganib ta bolid God tekomo mat na ta waqgo anad tiqamtamo ham. <sup>19</sup> Ad ya ne a ta gibilenaiq ham. Og kab ne gigo mataw giger in nagah araq anan gigem amulikmo iyad ya imam Heven-ib osaqtta na bulonsa in nagah anan ginad usaqta na tinegdaq ham. <sup>20</sup> Na ezaqgo mataw giger o ezeqman nazaq ya ibinib humab emeq ossa teq ya in gilikmanib tuqosdaiqmo ham.

*Kabibiy mat araq ayow inaq an anobun a hi wastitayta gigo gamuk awowun*

<sup>21</sup> Ari kam nab Pita bolim Yesus kazaq susumun ug. Iyahta ham ya imaqbab araq imeqin tonsa ya ime ganim in ago daq na walemad anadin a ta hi emdaiq? ham. Ya inad emaiq. Ya ime 7 nazaq ago daq meqinta walemdayta na in kabemmo diq haqaiq ham. <sup>22</sup> Haqan Yesus bilam, Haiq ham. Ni nimaqbab ame 77 nazaq nimeqin tonid ni nazaqmo nime 77 nazaq in ago daq meqinta na walemad anadin a ta emdaq ham.

<sup>23</sup> Ni hurit ham. God ago maror aduganib daq usaqta na in bilaqne king araq ago kabibiy mataw in gigo ayahta ago mani

asor samanmo waqiyta nazaq nog ham. <sup>24</sup> Abeb king na in ago mani amenin waqgo alulin emsa mataw in ago mani waqiyta na gigo araq in ago hib tubol ham. Mat na in king ago 10 milyon kina wamta ham. <sup>25</sup> Waqim teq in mani na amenin emdaqta na araq diq aholib a hi us ham. Nazaq iyan in ago ayahta na bilam, Mat ka ago aw amun nenaq gizayid in leheq mat araq ago kabibiy mataw samanta iyeq osiy haqad in bilam ham. Ad in ago nagah bunmo gizayeq mani na ne waq a bo ya yagiy haqad in bilam ham. I daq nazaq emid teq mat ka in yaqgo mani amenin asormo tiqemdaq haqad in bilam ham. <sup>26</sup> Haqan kabibiy mat na nazaq huritadmo in king agerab abakbakan ulum laquwim turad bulon, Ni ya inan ninad meqniya ni asit ibaq tun haqad in bilam ham. Ya ningo mani wayta na amenin bunmo tinigday haqad in bilam ham. <sup>27</sup> An kabibiy mat ago ayahta na in anan anad meqniya in ago hib amenin usta na tuwal em bug ham. Ad in mat na hulosan tilah ham.

<sup>28</sup> Teq kabibiy mat na asanib gwahtiqlim lehim in aholyow araq in inaq araqib kabiy emayta na ahol tuwam ham. Ahol waqad in ayow na anatgumnib waz naqmo hiqiyadmo bulon, Yaqgo 100 kina niholib usaqta na muran diqmo ni yagdaqta haqad in bulon ham. <sup>29</sup> Haqan in ayow na huritadmo in abakbakan ulum laquwim turad bulon, Ni ya inan ninad meqniya ni asit ibaq tun haqad in bilam ham. Ya mani wayta na amenin bunmo tinigday haqad in bilam ham. <sup>30</sup> Teq haiq ham. Mat na hulosa ham. Ad in ayow na wazim a lehim bit giqirquran osaytab tiqam ham. Emad in bulon, Ni bit kab oseq le ni yaqgo gimeq wanta na amenin em bugeq teq ni gwahtiqlaq haqad in bilam ham.

<sup>31</sup> Ari mat na ayogniz asor in inaq araqib kabiy emayta na in daq nazaq ahol waqad in gigem meqin diq iyiy ham. Gigem meqniya in lehim daq gwahtimta na awagamun bunmo in gigo ayahta tubulony ham. <sup>32</sup> Bulonan kabibiy mat na ago ayahta inmen nan eman bolan in bulon, Ni kabibiy mat meqin haqad in bilam ham. Teko ni qaşa ya ningo amenin usta na walem bugta haqad in bilam ham. <sup>33</sup> Ya ni ninan inad meqniya haqad in bilam ham. Ta ezaq haqad ni niyow na anan ni ninad a hi meqniymo? haqad in bilam ham. <sup>34</sup> Haqad agem meqniya in mat na waqim bit giqirquran osayta nab a tilah ham. A lehim in mataw bit na wamuzayta gibenab emim gibilan, Ne mat ka santitiy ugsa le in yaqgo gimeq wamta na amenin em bugeq teq in gwahtiqan haqad in bilam ham. <sup>35</sup> Haqad Yesus bilam, Ya ne gibilenaiq ham. Ne giyogniz nenaq an anobun a

hi wastitayid ya imam Heven-ib osaqta na in nazaqmo ne tigitondaqmo ham.

## 19

*Yesus on mataw an tuwaqim teq an ta hulosaqta na ginan bilam*

*(Mak 10.1-12; Luk 16.18)*

<sup>1</sup> Ari gamuk na tihiqiyan Yesus saw Galiliy hulosaqta in yuw Jordan urotim saw Judiya-ib tilah. <sup>2</sup> Lehsa on mataw kabemmo muzim inaq tilehiymo. Lehan nab teq Yesus in gigo asor gigo moq inaqta na giwastitayan tidimniy yaqay.

<sup>3</sup> Sa Farisi asor Yesus ulum waqnan haqad agerab tuboliy. Bolim in tisu sumun ugiy, I Juda gigo maror bilam, Mat anadibmo ago aw muznan in tumuzdaq hamta na in daq dimun o daq meqin? haqiy. <sup>4</sup> Haqan Yesus amenin emim bilam, Ne tobag God ago gamuk ka ahol a hi waqiy daqagya ham. Gamuk na kazaq bilam ham. Mebmebmo diq God nagah bunmo gige-mad in on mataw matmatta teq onqonta inaqmo giqam haqad in bilam ham. *Jenesis 1.21; 5.2*

Teq in bilam,

<sup>5</sup> Daq alulin naqmo ago mat in anen amam gihuloseq in awe aholib tisoqotdaq ham. Soqoteq in giger gihol amulikmo iyeq tuqos daqay haqad in bilam ham. *Jenesis 2.24*

<sup>6</sup> Nazaq iyan mat awe inaq in gihol giger a ta hi iyayta ham. Haiggam ham. In giger gihol amulikmo tiqiyim osayta ham. Nazaq iyan nagah God am tuwazan usaqta na mat ara q ta hi urotan ham.

<sup>7</sup> Haqanmo Farisi amenin emim buloniy, Nazaq na teq ta ezaqta ago Moses gunun igim bilam, Mat ara q aw muz agamukan mar toneq ago aw ugadmo in tumuzdaq haqad in bilam? haqiy. <sup>8</sup> Haqan Yesus gibilan, Ne gigem soqotim usad God anad a hi muzinsa iyan Moses ne gihulosan ne on gimuzayta ham. Ta teq kwaziq diqmo God nagah bunmo giqamta nab daq naqanta a hi usta ham. <sup>9</sup> Ad yaqmo kazaq ne gibilenaiq ham. Mat awe muzad aw ta ara q murturta waqayta na in bilaqne mat ta ara q ago aw inaq luw nog iyaqta ham. Ari mat na awe in mat ta ara q uteteq inaq luwsa aduw diq na in aw na muznan in tumuzdaq ham.

<sup>10</sup> Haqan disaipel buloniy, Mat in aw inaq gigo daq nazaq usid ari in an hi waqiy haqiy. <sup>11</sup> Haqan Yesus kazaq gibilan, On mataw bunno in ne gigo gamuk na a hi hurit daqay ham. God in mataw asormo zaway negan in aw a hi waqadmo samanmo osayta ham. <sup>12</sup> Mataw aw a hi waqayta na alulin amo amo ham. Mataw asor ginen nazaqmo giqeman in ginad aw

waqgo hulosaqta ham. Ta asor gikayogin ayan in aw a hi waqayta ham. Ad mataw ta asor in God ago maror anadin emad in aw waqgo gihol wasihayta ham. Mat nog in ne gigo gamuk na huritad teq in muzinnan iysun in muzinan ham.

*Yesus onmin amiknikta gidimun tonad gibar ton*

*(Mak 10.13-16; Luk 18.15-17)*

<sup>13</sup> Ari kam nabmo on mataw gigo onmin amiknikta giqad Yesus ago hib tubol yaqay, Yesus aben in giholib emeq giwazad gimen God bulondaq haqad. Teq haiq. In onmin giqad bolsa disaipel ginadad tigimuz yaqay. <sup>14</sup> Sa Yesus gibilan, Ne onmin gihulosid yaqgo hib bolyi ham. Ne hi giwasihiy ham. On mataw naqantaqmo God ago maror aduganib gwahtiqayta ham. <sup>15</sup> Haqadmo in onmin na gimalib aben emim giwazad teq in tilah.

*Mat ara q ago nagah kabemmo usaqta na Yesus inaq gamuk bilam*

*(Mak 10.17-31; Luk 18.18-30)*

<sup>16</sup> Ari Yesus tilehsamo mat ara q in ago hib bolim bulon, Tisa ham ya daq dimun doqag diqta emeq teq ya os dimunta kuluwa-kuluwmo osayta na iholyon tuwaqdaiq? ham. <sup>17</sup> Haqan Yesus bulon, Nagaqgo ni nagah dimunta ago ya susumun yagaq? ham. Mat amulikmoqmo in dimunta ham. Ari ni kayeqmo kuluwa-kuluwmo tuqosnan haqad ni gunun bunmo Moses bilamta na muz bug ham. <sup>18</sup> Haqan mat na bulon, Na naga gununin diq? ham. Haqan Yesus bilam, Gunun ni muzdaqta na kawa ham. Ni mat ara q wol emid hi moqan ham. Ni an alulib hureqeq inaq hi us ham. Ni hi rin ton ham.

Ni hazizirib mat ara q hi kat ug ham.

<sup>19</sup> Ni nizenmaman giqez hurit ham. *Kisim Bek 20.12-16*

Ad ninmo nihol anan ninad bilaqay nazaqmo ni niyow anan ninad bilaqan ham. *Wok Pris 19.18*

<sup>20</sup> Haqan mat minminta na in Yesus bulon, Gunun nagan bunmo ya tumuz bugta ham. Ta ya daq ezaq diqta emnagta a hi emaiq? ham. <sup>21</sup> Haqan Yesus bulon, Ari ni mat dimun diqta tiqiy hasnan iysun ni leheq ningo nagah bunmo giza-yeq amenin waqeq mataw ginaghan haiqta neg ham. Ni nazaq toneq teq ni Heven-ib ningo nagah kabemmo diq inaq iyaq ham. Ad ni daq na emeq teq ni ya imuzeq bol ham. <sup>22</sup> Haqan mat minminta na gamuk nazaq huritim in anobun iyim anad ayahmo meqniysa tilah. Na ezaqgo in ago nagah dimdimunta kabemmo usta na ago iyan.

<sup>23</sup> Sa Yesus in ago disaipel gibilenim bilam, Ya gamuk helmo ne gibilenaiq ham.



Mat ago nagah kabemmo usaqta na in God ago maror aduganib gwahtiqqo afaqan diq ham. <sup>24</sup> Ya ne a ta gibilenaiq ham. Karuw ayahta anan kamel haqayta na in nidel akwiyaknib le tugwahtiqaq e? ham. Hikidik ham. Ad nazaqmo mat ago es kabemmo ginadin emaqta na in God ago maror aduganib le a hi gwahtiqaqmo ham.

<sup>25</sup> Haqan disaipel gamuk na huritim gihol turuh nam. Gihol turuh nems a in bilaqiy, Nazaq iyid teq mat araq diq God ago os dimunta nab le a hi gwahtiqaqya haqiy. <sup>26</sup> Haqan Yesus gibiyad gibilan, Mataw in gimo gigo zaway amalib le a hi gwahtiq daqayta ham. Ari God-mo mataw gilum-sihsa teq in le tugwahtiq daqay ham. Na ezaggo God in nagah araq a hi emdaqta a haizq ham.

<sup>27</sup> Haqan Pita amenin emim bulon, Ni i gibiy ham. I nagah bunmo gihulosim i ninmo nimuzim ninaq tilehauq ham. Teq God amenin ezaqta tiqigdaq? ham. <sup>28</sup> Haqan Yesus in disaipel bunmo gibilan, Ya helmo ne gibilenaiq ham. God nagah bunmo og kab giwastatayid mutur iydaqta akaman nab Mat Atatin abin ayahta inaq iyeq ago ban tawontab tuqos woqdaq ham. Kam nab teq ne mataw ya imuzim boliyta na ne nazaqmo marorgo ban 12 nazaq nab ne tuqos daqaymo ham. Osad ne Isrel gigo gem 12 na tigibiy muz daqay ham.

<sup>29</sup> Teq mat aw nog in ya imuzeq bolnan haqad in gigo bit teq gimaqbaban teq gihyan teq ginenmaman teq gigo onmin teq gigo og gihulosiyta, on mataw na bunmo teq in gigo nagah na amenin 100 nazaq tuwaq daqay ham. Ad teq in God ago os dimuntab gwahtiqeq kuluwa-kuluwmo tuqos daqay ham. <sup>30</sup> Kam nab teq mataw gibin inaq iyim og kab osayta na kabemmo gibin hiqiyta bo abeb tiqiy daqay ham. Sa mataw kabemmo og kab gibin haiqta na in gibin inaq iyeq le danneb tiqiy daqay ham.

## 20

*Mataw am wain akabiy an emiyta gigo gamuk awowun*

<sup>1</sup> Ari Yesus bilam, God ago maror in bilaqne mat araq tarommo lehim kabibiy mataw asor in ago ogib am wain akabiy an em daqay haqad giwamta nazaq nog ham. <sup>2</sup> Mat na lehim kabibiy mataw gwaqad gibilan, Kam amulik-mulikmo ya gimeq amulik-mulikmo amalib ne tizay-daiq haqad in bilam ham. Haqan mataw na 'dimunmo' haqiy ham. An mat na giqeman in wain akabiy an emnan tilehiy ham.

<sup>3</sup> Lehsa 9 kilok nagzaq mat na maket-ib lehim mataw asor samanmo kabiy haiqmo tursa in gibiy ham. <sup>4</sup> Gibiyad in gibilan, Ne inaqmo leheq wain akabiy an emiy haqad

in bilam ham. Emid teq ya ne kabiy em daqayta na amenin anononmo tinegdaiq haqad in bilam ham. <sup>5</sup> Haqan mataw na tilehiymo ham. Lehsa 12 kilok teq 3 kilok mat na lehim in a nazaqmo ta am ham. <sup>6</sup> Emim teq 5 kilok imisor in lehim mataw asor samanmo tursa in gibiy ham. Gibiyad in gibilan, Ne nagaqgo kam kab sisaqmo samanmo turiy? haqad in bilam ham. <sup>7</sup> An mataw na bilaqiy, I mat araq kabiy a hi igaq haqiy ham. Haqan mat na gibilan, Ne inaqmo leheq yaqgo wain akabiy an emiy haqad in bilam ham.

<sup>8</sup> Ari imisor diq tiqiy anamren na in mat kabibiy mataw gibunib turaqta na bulon, Ni kabibiy mataw gibilen bolid mani neg haqad in bilam ham. Itureq ni kabibiy mataw abeb bolim kabiy emiyta na gizay haqad in bilam ham. Gizayeq teq ni ta mataw ameb bolim kabiy emiyta na gizay haqad in bilam ham. <sup>9</sup> An mataw 5 kilok imisor bolim kabiy emiyta na gwahtiqim in amulik-mulikmo mani ameta amulik-mulikmo waqiy ham. <sup>10</sup> Waqsa mataw ameb diq bolim kabiy emiyta na in ginad emiy, I mani ayahmo waqam daqagya haqiy ham. Haqimmo haiq ham. In nazaqmo mani ameta amulikmo waq toniyimo ham. <sup>11-12</sup> In mani na waqim ahol waqan ayah a hi iyan in gigem meqinta kabiy anamren ugad bilaqiy, Mataw abeb bolim kabiy emiyta na in kam sisaq diq kabiy a hi emiyta haqiy ham. Mataw abeb na gigo mani nogmo i gigo haqiy ham. I tarommo kabiy atoran diq emim zeq ginoysa bo imisor tiqiy haqiy ham. Teq ni ara qibmo i gizayaq haqiy ham.

<sup>13</sup> An kabiy anamren in mataw na gigo araq bulonim bilam, Kadoy ham ya ni a hi nimeqin ton haqad in bilam ham. Ya ninaq ni mani ameta amulikmo waqgo a hi bilawta ye? haqad in bilam ham. <sup>14</sup> Ningo mani na ni waqeq a leh haqad in bilam ham. Mani nawa ya nigta nazaqmo ya mataw abeb boliyta na neggo inad bilaqan ya tinegmo haqad in bilam ham. <sup>15</sup> Nagah na in yaqgo haqad in bilam ham. Ya inadibmo a hi gizaydaiq e? haqad in bilam ham. Nagaqgo ni nigem meqniyaq? haqad in bilam ham. Ya daq dimunta emaiq haqad in bilam ham. <sup>16</sup> Haqad Yesus bilam, God ago maror aduganib daq nazaqmo usaqta ham. On mataw abeb iyim osayta na in bo danneb iysa ta asor danneb iyim osayta na in le abeb tiqiy daqay ham.

*Yesus ame ezeqmanta bilam, Ya moqeq teq ta eraqdaiq ham*

*(Mak 10.32-34; Luk 18.31-33)*

<sup>17-18</sup> Ari Yesus in mataw biyahmo ne-naq Jerusalem-ub tugwalehyaq. In danib gwalehad luwad in ago disaipel 12 na

giwaqim giqad lehim giholbin osad teq in gibilan, Ne huritiy ham. Muran i Jerusalem-ub tugwalehaq ham. Nab teq mat araq in Mat Atatin waqeq mataw tamaz emayta gigo aseseqta na giyogniz mataw Moses ago gunun hurit kemiyta na nenaq gibenab tiqemdaq ham. Emid in ayon tibiaq daqay, Wol emid moqan haq daqay ham. <sup>19</sup> Haqad in mataw en araq Juda a haiqta na gibenab emid in Mat Atatin bilawunad woltitayad teq in ayib abensen dom wolid tumoqdaq ham. Moqeq kam ezeqmanmo usid teq God wazid ta eraqdaq ham.

*Jems ama Jon inaq maror iyeq osnan bilaqiy*

*(Mak 10.35-45)*

<sup>20</sup> Ari kam nab Sebediy atatniz giger Jems ama Jon inaq in ginen inaq Yesus ago hib tuboliy. Bolim in ginen Yesus anognib abakbakan ulum laquwim turad in Yesus ago hib nagah araq waqgo haqad tisusumun ug. <sup>21</sup> An Yesus bulon, Ni naga waqnan? ham. Haqan aw na bilam, Yaqgo onmin giger ka in ningo maror aduganib maror aseseqta iyeq osgo haqad ni gitowun emeq bilaq ham. Araq niben niqabun ban ossa araq niben ninasaran ban osdaq na ago ni bilaqsa mataw ka huritiy ham.

<sup>22</sup> In nazaq bilaqan Yesus amenin emim gibilan, Ne nagah anan susumunayta ka ago ne a hi hurit kemiy ham. Abeb mataw gileh yagsa santitiy ayahmo tiqiqisih bugdaq ham. Ne giger teq gog ayuwun agon meqin diqta ya uluwdaiqta na asor ne tuquluw daqaymo ye? ham. Haqan giger na bilaqiy, Na i tuquluwamta haqiy. <sup>23</sup> An Yesus gibilan, Helmo ham. Ne giger teq yaqgo gogib yuw tuquluw daqayta ham. Ari nog diq ya iben iqabun ban osdaqta na teq nog ya iben inasaran ban osdaqta na in yaqgo nagah a haiq ham. Ya imam in mataw gangan gimen ban tuwastitayan usaqta naqmo in ban na tuwaq daqay ham.

<sup>24</sup> Ari disaipel 10 na gamuk na huritim in maqbab giger na gigem meqinta negiy. <sup>25</sup> In nazaq tonsa Yesus gibilenan agerab bolan in gibilan, On mataw en ta asor Juda a haiqta nagan gigo maror aseseqta in gihol abin iluwad igmo ag haqad osayta ham. Ad in gigo walmataw giqemid in gimo ginad muzad gihaqenib iyeq osgo in giwaz meqniyayta ham. <sup>1</sup> Na ago ne tuhuritiyta ham. <sup>26</sup> Teq ne in gigo daq na hikidik muziniy ham. Ne gilikmanib mat nog in mat ayahta iyeq osnan haqad in ahol wazid woqsa in ne gilumsiheq gimen kabiy eman ham. <sup>27</sup> Ad mat nog in ne gigo mat amebta iyeq osnan haqad in ne gigo kabibiy mat

samanta iyeq osan ham. <sup>28</sup> Ne Mat Atatin em nogmo ne emiy ham. In mataw giqemid inmen kabiy sorgo a hi bol ham. In mataw gigo kabibiy mat nog iyeq in gigo afaqan inmo ahol ugad teq in ahol amalib mataw kabemmo gizaqey bab gibenab ta giwaqgo haqad in bolta ham.

*Yesus mataw giger gime haiqta giwastitayan dimniyiy*

*(Mak 10.46-52; Luk 18.35-43)*

<sup>29</sup> Ari Yesus ago disaipel nenaq uliq Jeriko hulosal tilehiy. Lehsa on mataw kabemmo Yesus muzim inaq tilehiymo. <sup>30</sup> Sa mataw giger gime haiqta dan adekib osad in Yesus bolagta na abin tuhuritiy. Huritim in dedibmo lileyim bilaqiy, Iyahta haqiy. Devit atatin\* haqiy. Ni i ginan ninad meqniyan haqiy. <sup>31</sup> Haqan on mataw biyahta na in mataw giger na ginadad gibileniy, Ne giqez hiqiyiy haqiy. Haqan haiq. In dedibmo a ta lileyim bilaqiy, Iyahta haqiy. Devit atatin haqiy. Ni i ginan ninad meqniyan haqiy. <sup>32</sup> Haqsa Yesus ahol wasihim turad in giger na gililewunim gibilan, Ya ne ezaq gitondaq? ham. <sup>33</sup> Haqan in buloniy, Iyahta haqiy ni i gime wastitayid dimniyan haqiy. <sup>34</sup> Haqan Yesus in ginan anad meqniyisa in aben mataw giger na gimeqagnib tiqam. Eman muran diq nawaqmo in gime hastitayan in saw ahol tuwaq yaqay. Ad in Yesus muzim inaq tilehiy.

## **Yesus le uliq ayahta Jerusalem-ub gwahtiqim teq in on mataw suleq negyaq**

### **21**

*Yesus king nog iyim le uliq Jerusalem-ub tugwahtim*

*(Mak 11.1-11; Luk 19.28-40; Jon 12.12-19)*

<sup>1-2</sup> Ari Yesus ago dauh nenaq le Jerusalem sinsin tuqugad in le uliq Betfage-ib tugwahitiqiy, garah Oliv asenab. Gwahtiqim nab Yesus in disaipel giger giqeman danmab lehsa in gibilan, Ne le uliq ginobun ban usaqta kob gwahtiqeqmo donki araq amidon inaq am giwazan turayta na ne tigibiy daqay ham. Na ne giqamun haseq giwaqeq giqad yaqgo hib a boliy ham. <sup>3</sup> Sa mat araq nan bilaqid teq ne kazaq buloniy ham. Iyahta karuw giger ka gigo hib ago kabiy inaq haqad ne buloniy ham. Bulonid teq in hid naqmo giqemid tubol daqay ham.

<sup>4</sup> Yesus nazaq bilaqim in kwaziqmo God ago nantut gamuk bilamta na tuwol net bug. <sup>5</sup> Gamuk na bilam,

\* **20:30:** Matyu 9.27 nab teq ni gamuk 'Devit atatin' ka alulin ahol waqdaq.

Ne on mataw uliq Sayon-ibta kazaq gibileniy ham. Ahol waqiy haqiy ham. Ne gigo king nawa donki amalib osim tubolaq haqiy ham. In ahol wazan woqsa donki amidon amalib osim bolaq haqad ne nazaq gibileniy ham. *Aisaya 62.11*

<sup>6</sup> An disaipel giger na lehim Yesus gibilanta nazaqmo in tiqemiy. <sup>7</sup> In donki anen amidon inaq giwaqim giqad tuboliy. Bolim in gigo tubusan asor donki gimalib eman Yesus tubusan na amalib tuqos. <sup>8</sup> Ossa on mataw kabemmo in gigo tubusan danib gihureniy. Gihurensa asor in ay aben qwayim danib rireninyo. <sup>9</sup> Samo on mataw Yesus anobun ban danneb lehad asor agilehun ban muzim inaq bolad in lileyim bilaq yaqay,

Devit atatin\* ka abin sorid ulilib gwalan haq yaqay.

Mat ka Iyahta abinib bolan i ginad bilaq gigayinaq haq yaqay.

I God abin sorid ulilibmo diq gwalan haq yaqay.

<sup>10</sup> Ari Yesus le uliq Jerusalem-ub tugwah-tim. Gwahtiqtasmo on mataw uliq nabta na bunno gihol turuh nemsu bilaq yaqay, Ko nog diq? haq yaqay. <sup>11</sup> Haqsamo on mataw biyahta Yesus muzim inaq boliyta na bilaq yaqay, Ka God ago nantut Yesus uliq Nasaret saw Galiliy-ibta naqmo amatin haq yaqay.

*Mataw Tempel-ib mani akabiyan emsa Yesus gimuzan asan ban gwahtiqtay*

*(Mak 11.15-19; Luk 19.45-48; Jon 2.13-22)*

<sup>12</sup> Ari Yesus Tempel agelin aduganib le gwahtiqtim in mataw nagah gizayad osiyta na gimuzan asanib tukim tilehiy. Lehsa Yesus in mataw mani amo amo waqad amenin bit na ago mani negayta na gigo ban otbuliyan tuwom. Ad teq in mataw ah†

<sup>13</sup> Ad in mataw na gibilan, God ago marib in gamuk araq kazaq bilam ham.

Mataw yaqgo bit anan bilaq daqay, God inaq gamuk emgo abitan haq daqay haqad in bilam ham. *Aisaya 56.7*  
Ta teq ne bit ka eman in mataw rin tonayta gigo bit nog tiqiyay ham.

<sup>14</sup> Teq Yesus Tempel-ib luwsa mataw asor gime haiqta teq gisen meqinta in ago hib bolsa in giwastitayan tidimniyiy. <sup>15</sup> Sa mataw tamaz emayta gigo aseseqta na teq mataw Moses ago gunun hurit kemiya na in Yesus daq azawayin inaq na emsa ahol tuwaqiy. Ahol waqsa teq ta onmin in Tempel agelin aduganib turad in lileyim bilaq yaqay, I Devit atatin ka abin wazid

ulilibmo gwalan haq yaqay. Haqsa mataw aseseqta gamuk na huritad in gigem meqin diq iy yaqay. <sup>16</sup> Gigem meqniysa in Yesus buloniy, Onmin ko ni nibin iluwsa ni a hi huritay e? haqiy. Haqan Yesus gibilan, Ya huritay ham. Ta ne God ago marib gamuk araq mar tonan usaqta na ne ahol a hi waqiy daqagya ham. Gamuk na bilam, Ni onmin amikmikta teq onmin susibta giqez eman in ni nibin soran ulilibmo gwalay haqad in bilam ham. *Buk Song 8.2*

<sup>17</sup> Haqadmo in mataw na gihulosad uliq Betaniy-ib tilah. Lehim tarom nab in uliq nab tuqos.

*Yesus bilaqan ay fik araq may*  
*(Mak 11.12-14, 20-24)*

<sup>18</sup> Usim tarommo diq Yesus eraqim uliq Jerusalem-ub muleqim ta lah. Lehad danib in agem tumoqyaq. <sup>19</sup> Agem moqsa in ame le ay fik araq dan adek ban tursa ahol waqad agerab tilom. Loqim in anon araq ahol a hi wam. Haiqgam. Aben samanmo ananmo us. An in ay fik na bulonim bilam, Ni ninon a ta hi emdaq ham. Haiq diqmo ham. Haqan hid naqmo ay fik na tumay.

<sup>20</sup> Mayan disaipel ahol waqad gihol riten lamsa bilaqiy, Ay fik ko ezaq tonim hid naqmo may? haqiy. <sup>21</sup> Haqan Yesus gibilan, Ya helmo ne gibilenaq ham. Ne helmo diq haqad ginad giger a hi emeq ya ay fik bulonan mayta kazaqmo ne tiqem daqaymo ham. Ad ne garah ko bulonid in ne giqez muzeq sor tuqeq le kamismeb tuwoqdaq ham. <sup>22</sup> Ne ginad em hasiy ham. Ne helmo haqad God inaq gamuk emeq teq nagah ne anan susumunayta na ne tuwaq daqay ham.

*Mataw aseseqta in nog Yesus ahol abin uqta na anan susumun ugiy*

*(Mak 11.27-33; Luk 20.1-8)*

<sup>23</sup> Ari Yesus Tempel agelin aduganib lo gwahtiqtim in on mataw suleq tinegyaq. Suleq negsa mataw tamaz emayta gigo aseseqta na teq Juda gigo mataw marorta na in ago hib bolim atoranno susumun ugiy, Ni nibin ezaqta iyim ni daq kagan emaq? haqiy. Teq nog diq nibin na nig? haqiy.

<sup>24</sup> Haqan Yesus gibilan, Ta ya nazaqmo nagah araq ago ne tisuusun negnan ham. Ne yaqgo susumun ka amenin emid teq nog ibin yagan ya daq kagan emaiqta na ago ya tigibilendaqmo ham. <sup>25</sup> Ari Jon mataw gihuz negyaqta ago kabiy na edob bol? ham. Kabiy na Heven-ib bolta o haiq in matawmo gigo hib kabiy na wamta? ham.

Haqan mataw aseseqta na in gimo an mugad bilaqiy, I bilaqam, Kabiy na God ago

\* 21:9: Matyu 9.27 nab teq ni gamuk 'Devit atatin' ka alulin ahol waqdaq. † 21:12: Ah na amalib in God ayon tamaz em yaqayta.' gizayad osiyta na gigo ban giqot buliyan woqiymo.

hib bolta haqid in tibilaqdaq, Ta nagaqgo ne Jon ago gamuk huritim anan helmo a hi haqiy? haqdaq haqiy. <sup>26</sup> Ari i bilaqam, Kabi na matawmo gigo hib bolta haqeq i on mataw biyahta ka girabunam haqiy. Na ezaqgo in bunmo Jon anan bilaqay, God ago nantut araqqmo diq haqayta haqiy. <sup>27</sup> Nazaq iyan in Yesus ago susumun na amenin emim buloniy, I a hi hurit haqiy. Haqan Yesus gibilan, Ya nazaqmo ham. Nog ibin yagan ya daq kagan emaiqta na ago ya a hi gibilendaiqqmo ham.

*Onmin giger gigo gamuk awowun*

<sup>28</sup> Haqad Yesus in mataw aseseqta na gibilan, Ne ginad ezaq emay? ham. Mat araqq ago onmin gigermo nenaq os yaqqay ham. Osad teqq gimam in atatin aqenta na bulon, Amun ham muran ni leheqq yaqqo am wain akabiyan em ham. <sup>29</sup> Haqan atatin bilam, Ya ituw hiqqiyaqq ham. Ta teqq abeb in anad buliyim in kabi na emnan tilah ham. <sup>30</sup> Sa gimam in atatin ta araqq na ago hib tilah ham. Lehim in teko bilamta nazaqqmo in ta na tubulonmo ham. Bulonan amun na bilam, Eqq mam ya le kabi na tiqqemdaiq ham. Haqqim teqq in a hi lah ham. <sup>31</sup> Ari onmin giger na gilikmanib amun nog in amam anad muzta? ham. Haqan mataw na bilaqqiy, Amun amebta naqqmo haqiy. Haqan Yesus gibilenim bilam, Ya helmo ne gibilenaiqq ham. Mataw takis waqqayta na teqq on danatabta na in ne giquriyamim ameb diqq God ago maror aduganib tugwahtiqqay ham.

<sup>32</sup> Haqad in bilam, Jon daqq dimunta giqqisihunyaqta ham. Giqqisihunsa teqq ne in ago gamuk anan helmo a hi haqiy ham. Ari mataw takis waqqayta na teqq on danatabta na in Jon ago gamuk anan helmo haqsa ne in gibiyiy ham. Gibiyad teqq ne ginad buliyim Jon ago gamuk na anan helmo a hi haqiy ham.

*Mataw meqinta am wain akabiyan emiyta gigo gamuk awowun*

(Mak 12.1-12; Luk 20.9-19)

<sup>33</sup> Haqad Yesus bilam, Gamuk awowun ta araqq ka ne huritiy ham. Mat araqq in ago oqq araqq am wain anagin kabemmo leyim tigell ton ham. Gel tonim in yay araqq wain anagin em woqid bay ninaqq ayun waqqota na titay ham. Na tihiqqian in mat kabi na wamuzdaqta ayon bit araqq asen sisaqta emim in kabi na mataw asor gibenab tiqqam ham. In anad mataw na in gimo giholyon kabi na emad wain anagin asor waqqad asor in ya yag daqqay haqqad ham. Kabi na anamren anad nazaqq emad gibilenim huload in era uliq araqq pesantab tilah ham. <sup>34</sup> Lehim ossa wain anagin waqqo akaman sinsin tiqqiy ham. Sinsin iysa in ago kabibiy mataw

giqqeman in mataw na gibenab ago wain anagin asor waqqan tilehiy ham. <sup>35</sup> Lehman mataw wain akabiyan emayta na in mataw na giwazim araqq wolad araqq in wol emiy ham. Ad in araqq gigib woliy ham. <sup>36</sup> An kabi na anamren in ago mataw kabemmo giqqeman ta lehiy ham. Mebbemmo in mataw giqqeman lehiyta na in kabem a haiqq ham. Ari in abeb mataw giqqeman lehiyta na in kabemmo diqq ham. In mataw na giqqeman lehsa mataw wain akabiyan emayta na in nazaqqmo tiqqimeqqin toniyimo ham.

<sup>37</sup> An abeb diqq kabi na anamren in atatinmo eman tilah ham. In anad am, Ya itatin em lehid teqq mataw na in aqqez tuhurit daqqay haqqad ham. <sup>38</sup> Teqq haiqq ham. Mataw kabi na wamuzayta na in kabi na anamren atatin bolsa ahol waqqad in gimo an bulonim bilaqqiy, Abeb mat ko amam moqqid in amam ago ahuran nagaqq bunmo tuwaqqdaqta haqiy ham. Bolsa i le mat ko wol emid moqqanmo haqiy ham. Moqsa amam ago kabi na ka i giholyon waqquqq haqiy ham. <sup>39</sup> Haqqad in mat na waqqim kabi na asanib a lehim wol eman tumom ham.

<sup>40</sup> Nazaqq iyan kabi na anamren boleqq in mataw wain akabiyan wamuzayta na ezaqq gitondaqq? ham. <sup>41</sup> Haqqan mataw na buloniy, Kabi na anamren in mataw meqqinta na santitiy ayahmo negad ginol emid tumoqq bug daqqay haqiy. Sa in ago kabi na waqqeq kabibiy mataw ta asor bunta tinqdaq haqiy. Negid in kabi na ananonmo wamuzad wain anagin waqqo akamnib in wain anagin asor waqqeq kabi na anamren tuqquqq daqqay haqiy.

<sup>42</sup> Haqqan Yesus gibilan, Ne God ago mar ahol a hi waqqayta ye? ham. Mar nab gamuk araqq kazaqq bilam ham.

Tituqq mataw anan bilaqqiy 'meqqin' haqqiyta naqqmo in awaz meqqin diqq turad bit anon bunmo soraqq haqqad in bilam ham. Iyahtaqqmo nagaqq na eman gwahtiqqan i ahol waqsa in dimun diqq iyaqq haqqad in bilam ham. *Buk Song 118.22-23*

<sup>43</sup> Nazaqq iyan ya ne gibilenaiqq ham. God in ago maror ne gibenab walemeqq in on mataw lul ta araqq in ago maror akabiyan anononmo em daqqayta naqqmo gibenab tiqqemdaqq ham. [ <sup>44</sup> Sa mat araqq tituqq na amalib woqqeq in aditin bunmo tuwolbiyaydaq ham. Ari tituqq na in mat araqq amalib woqqeq in mat na tuwol ninal bugdaq ham.]

<sup>45</sup> Ari mataw tamaz emayta gigo aseseqta na giyogniz Farisi nenaq in Yesus gamuk awowun bilamta na huritim ginad tiqqemiy, Yesus igmo ginan bilaqaqq haqiy. <sup>46</sup> Haqqad in Yesus wazeqq irqurnan ginad emad teqq in ta on mataw ginan rab yaqqay. Na ezaqqo

on mataw na ginad em yaqay, Yesus in God ago nantut araq haq yaqay.

## 22

*Maror araq atatin aw waqnan tonsa ayon didaq ayahta oyta ago gamuk awowun (Luk 14.16-24)*

<sup>1</sup> Ari Yesus gamuk awowun ta araq gibilan. <sup>2</sup> God ago maror in bilaqne king araq ago amun matta aw waqnan tonsa in ayon didaq ayahta oyta nazaq nog ham. <sup>3</sup> Danneb in mataw humab nab boleq an waq adidaqan neq daqayta na gimen nan eman tilah ham. Lehan abeb didaq neggo akaman na tugwahtiqan in ago kabibiy mataw giqeman in mataw tanabob gimen nan amta na gibilennan a ta lehiy ham. Lehan mataw na bunmo humab nab bolnan gituw tihiqiyiy ham.

<sup>4</sup> An king na in ago kabibiy mataw ta asor giqeman ta lehiy ham. Lehsa in gibilan, Ne le ya iqez tuteq mataw ya gimen nan emta na kazaq gibileniy ham. Ne huritiy haqiy ham. Ya didaq nagah bunmo tigiwastitay haqiy ham. Yaqgo bulmakau matmatta teq yaqgo bulmakau gimidgotniz ginon aseseqta na ya ginol emim tigiqoy haqiy ham. Ya nagah bunmo tigiwastitayan usaq haqiy ham. Ne an waggo adidaqanib boliy haqad ne gibileniy ham. <sup>5</sup> Haqan kabibiy mataw gamuk na huritim in lehim mataw na nazaqmo tigibileniy ham. Gibilennan mataw na in king ago gamuk na a hi huritiyimo ham. Ad in haresmo lehad araq ago kabiyab tilah ham. Sa araq ago mani akabiyannan emnan tilah ham. <sup>6</sup> Sa mataw na asor in king ago kabibiy mataw na giwazim gimeqin diq tonim ginol eman tumoqiy ham.

<sup>7</sup> Moqan king na agem meqniyan in ago bab mataw giqeman lehim in mataw in ago kabibiy mataw ginol emiyta na ginol eman tumoq bugiy ham. Ginol emad in gigo uliqab bit nagah bunmo mideran tuqoy bug ham. <sup>8</sup> Sa king na in ago kabibiy mataw gibilan, Ya an waggo adidaqan tuwastitayan usaq ham. Ta teq ya mataw gibilenta na in yaqgo humabub bolgo dimun a haiq ham. <sup>9</sup> Nazaq iyan ne lehad dante buntab mataw gibliyad ne mataw na bunmo gibilenid in yaqgo an waq adidaqanib kab boliy haqad in bilam ham.

<sup>10</sup> Haqan kabibiy mataw na tilehiy ham. Lehad in dante buntab mataw gibliyad gihumab woliy, mataw meqmeqinta teq mataw dimdimunta inaqmo ham. Gihumab wolan bit humab em daqayta nab ban tihiqiy bug ham.

<sup>11</sup> Ari mataw bo humabub tuqossa teq king na in gibiyannan tugwahtim ham. Gwahtiqim gibiyim gibiyim lehadmo mat

araq ago tubusan anumlan inaqta emim an waq ahumabnib nab ossa in ahol tuwam ham. <sup>12</sup> Ahol waqad in mat na bulonim bilam, Kadoy ham. Ezaqgo ni tubusan araq dimunta emim teq ni bo a hi gwahtim? haqad in bilam ham. Haqan mat na amenin araq emdaqta haiq ham. <sup>13</sup> Nazaq iyan king in ago kabibiy mataw gibilan, Ne mat ka abensen am wazeq hunegid le asanib gwahtiqeq in romriqab osan ham. Osad in anad meqniysa gaqad ate guruwad tuqosdaq haqad in bilam ham. <sup>14</sup> Haqad Yesus bilam, God in mataw kabemmo gililewunaqta ham. Gililewunad in mataw na gilikmanib amulik-mulikmo gilumim giwaqtaqta ham.

*Mataw Sisa takis ugayta na ago in Yesus ulum waqiy*

*(Mak 12.13-17; Luk 20.20-26)*

<sup>15</sup> Ari Farisi asor lehim humab wolim osad teq in ezaq toneq Yesus kat ugid in gavman gigo gunun araq itiyonad nan hi bilaqnanta bilaqid i tuwazam haqad in an bulonad osiy. <sup>16</sup> Osim in ginad tiqemim in gigo matawta asor teq Herot ago matawta asor nenaq giqeman tilehiy. Lehim in Yesus ago hib gwahtiqim tubuloniya, Tisa haqiy, i ningo tuhurit haqiy. Ni a hi katiyaqta haqiy. Ad ni on mataw God ago dan titnonta giqisihunad ni hel diqmo gibilenaqta haqiy. Ni gamuk helta bilaqnan a hi rabaqta haqiy. Na ezaqgo haqiy ni mataw giben inaqta a hi girabunad gigomo a hi lehaqta haqiy. <sup>17</sup> Nazaq iyan ni i gibilen haqiy. Ni ninad ezaq emaq? haqiy. I gibabun Rom gigo king Sisa in i gituw bulsa i takis ugauqta na in daq dimun o daq meqin? haqiy. I Juda gigo maror ezaq bilamta? haqiy.

<sup>18</sup> Haqan Yesus in mataw ginad meqinta na tuhurit. Ad in bilam, Ne mataw gimileq meqin diqta ham. Nagaqgo ne ya ilum waqay? ham. <sup>19</sup> Mani takis zayayta na araq iqisihunad ya ahol waqiy ham. Haqan in mani araq a bolim tuqugiy. <sup>20</sup> Ugan Yesus ahol waqad in mataw na tisusumun nag, Ka nog diq adulan teq ahol anan usaq? ham. <sup>21</sup> Haqan mataw na bilaqiy, Na Sisa agota haqiy. Haqan Yesus gibilan, Nazaq iyan Sisa ago nagah na ne Sisa-mo uguy ham. Ad God ago nagah na ne God-mo uguy ham. <sup>22</sup> Haqan mataw na ginadnad emad Yesus hulosisim tilehiy.

*Sadyusi in mataw hodhodab eraq daqayta na ago Yesus ulum waqiy*

*(Mak 12.18-27; Luk 20.27-40)*

<sup>23-24</sup> Ari mataw aseseqta na tilehsa kam nabmo Sadyusi asor Yesus ago hib tuboliy. Mataw na ginad kazaq emayta. Mataw tumoqiyta hodhodab a hi eraq daqay haqayta. Na in bolim Yesus buloniya, Tisa

haqiy, Moses i gimen gamuk araq mar tonim in kazaq bilam haqiy. Mat araq aw waqeq amun a hi emsamo moqid in amikqan araq abab aqoburan na waqeq alulib abab ayon onmin tigiqemdaq haqad in bilam haqiy.

<sup>25</sup> Ari gamuk araq kazaq lahta haqiy. Mat araq amikqaniz nenaq 7 nazaq diq iyim i gilikmanib osiy haqiy. Osim in gibab na aw araq tuwam haqiy. Waqim inaq osad in ago amun haiqmo osimmo tumom haqiy. Moqan ama araq in abab aqoburan na tuwam haqiy. <sup>26</sup> Waqim in nazaqmo amun haiqmo osim tumommo haqiy. Moqan ama ta araq in aw naqmo waqim in nazaqmo ton haqiy. Mat ezeq-manta na amun haiqmo moqan amagniz bunmo nazaqmo toniy haqiy. In nazaqmo emim emim le gima 7-ta na in nazaqmo tonmo haqiy. In bunmo aw amulik naqmo waqim amun araq a hi emimmo tumoq bugiy haqiy. <sup>27</sup> Mataw na tumoq bugan abeb aw na tumommo haqiy. <sup>28</sup> Nazaq iyan abeb mataw bunmo hodhod huloseq eraq daqayta nab teq maqbab 7 na gilikmanib aw na in nog awe tiqiydaq? haqiy. Mataw na bunmo in aw amulik naqmo waqiyta haqiy.

<sup>29</sup> Haqan Yesus amenin emim gibilan, Ne God ago marib gamuk usaqta na ago ne ginad a hi em hasay ham. Teq ne God ago zaway a hi hurit kemaymo ham. Nazaq iyan ne gamuk menmen bilaqay ham. <sup>30</sup> On mataw hodhodab eraq daqayta nab in an a ta hi waq daqay ham. In bilaqne God ago hib angelo osayta nazaq nogmo in os daqay ham. <sup>31</sup> Teq mataw tumoqiya hodhodab eraq daqayta agamukan God nagta na ne ahol a hi waqiyta daqagya? ham. <sup>32</sup> Gamuk nab God bilam,

Abraham ago God, teq Aisak ago God, teq Jakob ago God na yaqmo haqad in bilam ham. *Kisim Bek 3.6, 15, 16* Nazaq iyan God in mataw moqim kayeqmo osayta na gigo God iyim in gibiy muzaqta ham. Mataw moqim a hi hiqiyayta ham. <sup>33</sup> Haqan mataw biyahta nab turiyta na in Yesus ago gamuk huritim gihol turuh nemiy.

*God ago gunun ameb diqta*  
(Mak 12.28-34; Luk 10.25-28)

<sup>34</sup> Ari Yesus in Sadyusi gigo gamuk na amenin anononmo eman Sadyusi giqez tihiqiyim osiy. Ossa mataw ginan Farisi haqay na in nazaq huritad in bo Yesus agerab humab tuwoliy. <sup>35-36</sup> Mataw na gilikmanib mat araq Moses ago gunun hurit kamta in nab osmo. Osim in Yesus ulum waqad susumun ugim bilam, Tisa

ham God ago maror Moses bilamta na aduganib gunun doqag diqta in gunun bunmo giquriyamim in ayah diqta? ham. <sup>37</sup> Haqan Yesus bulonim bilam, God ago gamuk bilam,

Ne gigem, giquitil, teq ginad bunmo amalib ne gigo Iyahta God anan ginad bilaqan haqad in bilam ham. *Lo 6.5*

<sup>38</sup> Gunun na in ayah diqta teq in ameb diqta ham. <sup>39</sup> Haqad in bilam, Teq gigerta na in gunun amebta na nogmo ham. Na in kazaq bilam ham,

Ni nihol anan ninad bilaqayta nazaqmo ni niyow anan ninad bilaqan haqad in bilam ham. *Wok Pris 19.18*

<sup>40</sup> Gunun giger na in God ago maror Moses mar tonta na teq God ago nantut gamuk mar toniyta na bunmo alulinmo diq ham.

*Krais ahol alulin ezaqta na ago Yesus Farisi susumun nag*

(Mak 12.35-37; Luk 20.41-44)

<sup>41-42</sup> Ari Farisi Yesus agerab humab wolim os tutsa Yesus susumun negim bilam, Ne ginad ezaq emay? ham. Mat anan Krais haqayta na in nog atatin? ham. Haqan Farisi bilaqiy, In Devit atatin\* <sup>43</sup> Haqan Yesus bilam, Nazaq na teq ezaq haqad God ago Bugaw Dimunta in Devit anad ugsa Devit in Krais anan bilam, Yaqgo Iyahta haqad in bilam? ham. <sup>44</sup> Devit gamuk araq mar tonim bilam, Iyahta in yaqgo Iyahta kazaq bulonim bilam ham. Ni ya iben iqabun ban kab ya imen emad ossa ya ningo bab giqemid nisen ahaqenib tiqiy bug daqay haqad in bilam ham. *Buk Song 110.1*

<sup>45</sup> Ari Devit in Krais anan bilam, 'Yaqgo Iyahta' haqad in bilam ham. Nazaq iyan ezaq toneq Krais in Devit ago Iyahta iyeq teq in Devit atatin a ta iydaq? ham.

<sup>46</sup> Haqan mat araq in Yesus ago gamuk na amenin emgo biyab haiq. In bunmo giqez tihiqiyiy. Nazaq iyan mataw bunmo rabad in Yesus ulum waqnan a ta hi susumun ug yaqay.

## 23

*Yesus in mataw Moses ago gunun hurit kemiyta na giyogniz Farisi nenaq gigo daq ginan bilam*

(Mak 12.38-39; Luk 11.43, 46; 20.45-46)

<sup>1-2</sup> Ari abeb Yesus in on mataw biyahta na teq inmo ago disaipel nenaq gamuk gibilenim bilam, Mataw Moses ago gunun hurit kemiyta na giyogniz Farisi nenaq in Moses ago ban waqim Moses mataw suleq negyaqta nazaq in ne suleq negayta ham.

\* **22:41-42:** Matyu 9.27 nab teq ni gamuk 'Devit atatin' ka alulin ahol waqdaq.' haqiy.

<sup>3</sup> Nazaq iyan in gamuk bunmo amalib suleq negayta na ne huritad muzmo muziniy ham. Ari in gigo daqmo teq ne hikidik muziniy ham. Na ezaqgo in suleq negayta na in gimo a hikidik muzinayta ham. <sup>4</sup> In gunun kabemmo diq mataw negayta ham. Bilaqne in nagah afaqanta tuq tonim am wazim mataw gibetarib emayta nazaq nog ham. Eman mataw nagah afaqanta na so-rad in giholtuw bulad luwayta ham. Luwsa ta mataw aseseqta na in gilumsihgo giben amotin asit lo a hikidik wazayta ham.

<sup>5</sup> Mataw aseseqta na in gigo daq bunmo emsa mataw gibiyad gibin iluw daqay haqad in emayta ham. In God inaq gamuk emgo arin aseseqta gibenab teq gimaq-belab emayta ham. Teq in God inaq gamuk emgo abalawun in gigo tubusan adekib emayta na in aburgan sisaqmo wole giqusaqta ham. <sup>6</sup> In humab adidaqan in-aqtab ogib garuruhab osnan hulosoqta diq hulosaqta ham. Ad bit humab wolaytab nazaqmo in ban ulilibta nabmo osnan ginad bilaqtaqta ham. <sup>7</sup> In maket-ib luwsa mataw in ginan 'mat ayah' haqsa in ginad dimniyaqta ham. Teq mataw in gibin iluwad ginan 'tisa' haqgo in ginad diq bilaqtaqta ham.

<sup>8</sup> Ta teq negmo mataw giwasihsa in ne ginan 'tisa' hi bilaqiy ham. Haiqgam ham. Mat amulikmoqmo in ne gigo Tisa-ta ham. Sa ne bunmo maqbabmo osay ham. <sup>9</sup> Ad ogib kab ne mat ara q anan 'kamam' nazaq ne hi bilaqiyamo ham. Ne Gimam amulikmoqmo osaqta ham, Mat Heven-ib osaqta naqmo ham. <sup>10</sup> Ad ne mataw giwasihsa in ne ginan 'maror' hi bilaqiyamo ham. Ne gigo Maror amulikmo osaqta ham, mat anan Kraisa haqayta naqmo ham.

<sup>11</sup> Ne gilikmanib mat ayah diqta na in ne gigo kabibiy matmo iyeq osan ham. <sup>12</sup> Mat aw nog in gimo gihol abin wazan eraqayta na in gibin tuwoqdaq ham. Ad mat aw nog in gihol abin wazan woqayta na in gibin tiqeraqdaq ham.

*Yesus in mataw Moses ago gunun hurit kemiyta na giyogniz Farisi nenaq ginad (Mak 12.40; Luk 11.39-52; 20.47)*

<sup>13</sup> Haqad Yesus bilam, Ne mataw Moses ago gunun hurit kemiyta na giyogniz Farisi nenaq ham ne timeqniyim osayta ham. Ne ginad emay ye? ham. Ne mataw gimileq meqinta ham. On mataw God ago maror aduganib gwahti qnan tonsa ne gidanin qwayayta ham. Negmo a hi gwahti qayta ham. Ad on mataw God ago maror aduganib lo gwahti qnsamo ne giwasihayta ham.

[ <sup>14</sup> Ne mataw Moses ago gunun hurit kemiyta na giyogniz Farisi nenaq ham ne timeqniyim osayta ham. Ne ginad

emay ye? ham. Ne mataw gimileq meqinta ham. Ne on waburta kat negad gigo bit samanmo waqayta ham. Ad ne mataw gimeb God inaq gamuk sisaqmo bilaqim a lehayta ham, mataw gibiyad ginan dimun diqta haq daqay haqad ham. God hazizir ayahta emdaqta nab ne on mataw bunmo giquriyameq faq ayah diqmo tuwaq daqayta ham.]

<sup>15</sup> Ne mataw Moses ago gunun hurit kemiyta na giyogniz Farisi nenaq ham ne timeqniyim osayta ham. Ne ginad emay ye? ham. Ne mataw gimileq meqinta ham. Ne mat amulikmo emid ne gigo maror ahaqenib iyeq muzingo haqad ne giholtuw diq bulayta ham. Ne gihol anadin a hi emad ne kamis urotim lehim teq ne ogib dan pesanmo diq lehayta ham. Lehim ne mat na kat ugan in ne gigo maror ahaqenib iyim ne faqab leh daqayta nazaq nog in tiqiyaqmo ham. Teq ne mat na isihunan in ne giquriyamim daq meqinta kabemmo diq emaqta ham.

<sup>16</sup> Ne timeqniyim osayta ham. Ne ginad emay ye? ham. Ne gime haiqta ham. Ezaq teq ne mataw dan giqusihun daqay? ham. Ne kazaq bilaqayta ham. Mat Tempel abinib an adugan wazaqta na in nagah hel diq a haiq haqayta ham. Ari mat Tempel-ib gol usaqta naqmo abinib an adugan wazaqta na in nagah hel diqta haqayta ham. Mat gol na abinib gamuk awaz meqin bilamta nazaqmo diq in tiqemdaq haqayta ham. <sup>17</sup> Ne mataw agadanta gime haiqta ham. Nagah edo diq in God ameb ayah diqta? ham. Ne ginad emiy ham. Gol na amomo in abin haiqta ham. Gol na Tempel-ibmo usad iyan in abin inaqta ham. Nazaq iyan Tempel-mo in nagah ayah diqta ham.

<sup>18</sup> Ad ne kazaq bilaqaymo ham. Mat Tempel-ib tamaz emgo abanan usaqta na abinib an adugan wazaqta na in nagah hel diq a haiq haqayta ham. Ari mat in nagah tamaz emgo abanab usaqta naqmo abinib an adugan wazaqta na in nagah hel diqta haqayta ham. Mat tamaz na abinib gamuk awaz meqin bilamta nazaqmo diq in tiqemdaq haqayta ham. <sup>19</sup> Ne gime haiqta ham. Nagah edo diq in God ameb ayah diqta? ham. Ne ginad emiy ham. Nagah tamaz emgo abanab usaqta na in abin haiqta ham. Nagah na in God ago tamaz em abanab usad iyan in abin inaqta ham. Nazaq iyan God ago tamaz em abanan naqmo in nagah ayah diqta ham.

<sup>20</sup> Nazaq iyan ne ginad em haseq teq gamuk bilaqiy ham. Mat tamaz em abanan na abinib hel diqtaqmo haqayta na in ban na teq nagah ban amalib usaqta na inaqmo gibinib gamuk bilaqayta ham. <sup>21</sup> Ad mat Tempel abinib an adugan wazim hel diqtaqmo haqayta na in Tempel teq bit na

anamren inaqmo gibinib gamuk bilaqaqta ham. <sup>22</sup> Ad mat Heven abinib hel diqtaqmo haqaqta na in God ago ban tawonta na teq ban na anamren inaqmo gibinib gamuk bilaqaqta ham.

<sup>23</sup> Ne mataw Moses ago gunun hurit kemiya na giyogniz Farisi nenaq ham ne timeqniyim osayta ham. Ne ginad emay ye? ham. Ne gimileq meqinta ham. Kabiyaq kwasin amikmikta ginan mint teq dil teq kumin haqaqta na ne giwaqim gi-huseran humab 10 nazaq iyan ne humab amulikmo God ugayta ham. Ta teq God ago maror aduganib daq aseseqta na ne tuhulos bugiy ham. Daq titnonta amalib mataw gilum kemayta na teq mataw ginad negayta na teq God anan helmo haqaqta na ago ne gidek zizalan ne a ta hi emayta ham. Ne daq aseseqta nawa na gidek a hi zizalsa ne tiqem nagiyta ham. Emad ne daq amikmikta nagan tiqem nagiyimo ham. <sup>24</sup> Ne mataw gime haiqta ne on mataw dan tigiqisihun daqay ye? ham. Ne daq amikmik didiqta ago bilaqad teq ne God ago daq aseseqta emgo ginad a hi emayta ham. Ne didaq neqsa taqorib honam amik diqta woqan ne ahol waqad waqim hunegayta ham. Ta teq karuw ayahta anan kamel haqaqta na ne gigo taqorib woqan ne ahol a hi waqad taqor inaqmo tilonan gimuganib wolehaqta ham.

<sup>25</sup> Ne mataw Moses ago gunun hurit kemiya na giyogniz Farisi nenaq ham ne timeqniyim osayta ham. Ne ginad emay ye? ham. Ne mataw gimileq meqinta ham. Ne gog teq deg asanmo suholayta ham. Teq aduganib nagah rin tongo adan teq negmo gihol anadin emgo adan ame gwalim usaqta ham. <sup>26</sup> Ne Farisi ham, ne gime haiqta ham. Itureqmo ne gog adugan suholiy ham. Adugan suholid teq gog asan anumlan hiqiydaqmo ham.

<sup>27</sup> Ne mataw Moses ago gunun hurit kemiya na giyogniz Farisi nenaq ham ne timeqniyim osayta ham. Ne ginad emay ye? ham. Ne gimileq meqinta ham. Ne bilaqne hodhod asan balaw tonan hus diq iyaqta nazaq nog ham. Balaw tonan hodhod ahol awaqan dimun diqta teq aduganib mataw tumoqiyta giditin teq nahaz lilihta kabemmo usaqta ham. <sup>28</sup> Ne nazaqmo diq osayta ham. Mataw ne gibiyad ginad emay, Mataw ko in God ago mataw dimdimunta haqay ham. Ta teq mataw kat neg ago adan teq God ago maror othas ago adan in ne giduganib ame gwalim usaqta ham.

<sup>29</sup> Ne mataw Moses ago gunun hurit kemiya na giyogniz Farisi nenaq ham ne timeqniyim osayta ham. Ne ginad emay

ye? ham. Ne gimileq meqinta ham. Ne God ago nantut gimen hodhod abitan dimdimunta emayta ham. Ad ne mataw titnonta moqiyta gigo hodhod balaw tonayta ham. <sup>30</sup> Ne bilaqay, I gisesan gigo kamub osta iyeq i gisesan God ago nantut ginolsa i gilumsiheq a hi ginol em nagta haqaqta ham. <sup>31</sup> Gamuk nabmo ne gihol ulal tonim bilaqayta ham. Helmo ne mataw God ago nantut ginol eman moqiyta na ginaynaynizta ham. <sup>32</sup> Nazaq iyan ne gisesan gisen muzineq ne nazaqmo God ago nantut bunmo ginol emiymo ham.

<sup>33</sup> Ne nagah ahulinaqta meqinta ham. Ne ured amidgotniz ham. God teq ne ginan bilaqid ne faqab tileh daqayta ham. Ezaq teq ne tuk daqay? ham. <sup>34</sup> Nazaq iyan ne hurituy ham. Ya teq mataw God ago nantut bilaq daqayta asor teq mataw ginad awaz meqinta asor teq mataw suleq neg daqayta asor giqernid in ne gigo hib tileh daqay ham. Lehsa ne asor ginol emid moqsa asor ne ayib dom wolid moq daqay ham. Ad asor ne bit humab wolyatib gusib ginol titay daqay ham. Teq asor ne gimuzoz in le uliq araqab ossa nab ne gimuzeq lehid in oseq eraqeq uliq ta araqab leh daqay ham. <sup>35</sup> Nazaq iyid teq og kab ne gisesan mataw dimdimunta ginol eman ginedan womta na ago afaqan ne gigo hib tuqusdaq ham. Mebmebmo in mat titnonta anan Abel haqaqta na wol eman moqan in anedan wom ham. An abeb diq in Tempel teq tamaz em abanan asan ban turaqta na gilikmanib in Barekiya atatin Sekaraya na wol eman moqan in anedan wommo ham. Ne gisesan Abel akamnib mataw dimdimunta ginol emim bo bo Sekaraya ago akamnib tiqiyiy ham. <sup>36</sup> An ya helmo ne gibilenaq ham. God in mataw dimdimunta ginedan womta na amenin bunmo on mataw muran og kab osayta na gigo hib tiqemdaq ham.

*Yesus uliq Jerusalem anan anad meqniy (Luk 13.34-35; 19.41-44)*

<sup>37</sup> Haqad Yesus bilam, O Jerusalem, Jerusalem ham. Ningo mataw God ago nantut ginol emayta ham. Ad God in ago gamuk kabibiy mataw negim giqeman ningo hib lehayta na gimalib in gig hunegayta ham. Kam kabemmo ya ningo on mataw gituwal emnan inad bilamta ham. Bilaqne kurek anenqab in amidgotniz aben gayik ahaqenib gituwal emim giqisahaqta nazaq ham. Ta teq ne hulosisiy ham. <sup>38</sup> Nazaq iyan ne hurituy ham. God ne gigo uliq hulosan in ne gibenab useq teq timeqniydaq ham. <sup>39</sup> Ya ne gibilenaq ham. Ne ya a ta hi ibiy daqay ham. Ari ne ginad dimniysa bilaq daqay, Mat ka Iyahta abinib

\* 23:39: Buk Song 118.26



bolan i ginad bilaq gigayinaq haq daqayta kam nab teq ne a ta ibiy daqay ham.\*

## 24

*Yesus bilam, Tempel teq meqniydaq ham (Mak 13.1-2; Luk 21.5-6)*

<sup>1</sup> Ari Yesus Tempel hulosisim lehsa in ago disaipel Tempel abitan aseseqta nagan Yesus isihunnan haqad agerab tuboliy. <sup>2</sup> Bolim isihunsa teq Yesus in gigo gamuk amenin emim gibilan, Ne bit ko bunmo ahol waqay ye? ham. Gig ko bunmo teq wolzizilayeq gihunegid tuwoq bug daqay ham. Ya helmo bilaqaiq ham. Gig an amalib usayta ko teq muruwoqeq tiqmo bug daqayta ham.

*Yesus bilam, Afaqan kabemmo teq gwahtiqaq ham*

*(Mak 13.3-13; Luk 21.7-19)*

<sup>3</sup> Ari Yesus garah anan Oliv haqaytab ossa ago disaipel gimomo in ago hib bolim bilaqiy, Ni i gibilen haqiy. Kam gineh teq nagah ni anan bilamta na tugwahtiqaq? haqiy. Naga daqin diq ameb gwahtiqaqsa i ahol waqad ginad emam, Ni muleqeq tubolnan haqam? haqiy. Ad i ginad emam, Og ka hiqiydaqta akaman tugwahtiqaq haqam haqiy.

<sup>4</sup> Haqan Yesus amenin emim bilam, Ne gihol waziy ham. Luweq mat araq ne kat negdaq ham. <sup>5</sup> Mataw kabemmo teq boleq ya inan biyad bilaq daqay, Yaqmo Kraish haq daqay ham. Haqad in on mataw kabemmo kat neg daqay ham. <sup>6</sup> Sa mataw bab emsa ne gihulan huritad teq ta mataw pesanta bab emsa ne gihin hurit daqaymo ham. Huritad ne ginad haresmo emad hi rabiy ham. Daq nagan nazaq tugwahtiqaqta ham. Ta teq kam abebtanta na teqmo ham. <sup>7</sup> Mataw en araq eraqeq mataw saw araqabta nenaq an wol daqayta ham. Sa king araq ago dauh nenaq eraqeq king ta araq ago dauhta nenaq an wol daqaymo ham. Uliq saw amo amo zarow ayahta gwahtiqaqsa og ahol woldaqta ham. <sup>8</sup> Daq nagan bunmo bilaqne aw agemab amun tubaysa loyinaq nazaq nog iydaq ham.

<sup>9</sup> Kam nab teq mataw ne giwazeq santitiy neggo haqad bab gibenab giqem daqay ham. Ad in ne ginol emid moq daqay ham. Ya ihol abin ne giholib usaqta na ago on mataw en bunmo gigem meqinta neg daqay ham. <sup>10</sup> Kam nab teq on mataw kabemmo in gigo ginad helmota na hulosisim daqay ham. Hulosisim in anan gigem meqniy daqay ham. Ad in gimaqaban giwazeq bab gibenab giqem daqay ham.

<sup>11</sup> Sa nantut katiyta kabemmo eraqeq on mataw kabemmo gikat neg daqay ham. <sup>12</sup> Mataw kabemmo gunun dimdimunta itiyonad daq meqintabmo os daqay ham.

Daq meqinta kuluwmo gwahtiqaq ban waq bugsa mataw kabemmo an anan ginad bilaqta na adan hulosisim daqay ham. <sup>13</sup> Ari mat aw nog in zaway diq iyeq ossa le in gigo kam abebtanta gwahtiqaqta nab God in gilumsiheq ta giwazeq daqay ham. <sup>14</sup> Mataw God ago maror agamukan dimunta ka og saw bunmo a leheq on mataw gibilen daqay ham. Gibilenad in bilaq daqay, God ne gimen gamuk kazaq bilamta haq daqay ham. Haqad in on mataw og saw bunmo God ago gamuk gibilen bugid nab teq kam abebtanta na tugwahtiqaq daqay ham.

*Yesus bilam, Jerusalem teq meqniydaq ham*

*(Mak 13.14-23; Luk 21.20-24)*

<sup>15</sup> Teq nagah meqin diqta uliq saw meqin tonaqta na in Tempel aduganib tursa ne ahol tuwaq daqay ham, kwaziqmo God ago nantut Daniel anan bilamta nazaq ham. (Mat gamuk ka ahol waqad bilaqta na in anad em hasad bilaq sireqan.) <sup>16</sup> Kam nab on mataw saw Judiya-ib os daqayta na in tukeq garah ban gwalehiy ham. <sup>17</sup> Ad mat bit ahugunib ban osnantab osdaqta na in ogib hitiqeq tukeq lehanmo ham. Lehad in ago es nagah bit aduganib usaqta na anadin emad hi giwazeq daqay ham. <sup>18</sup> Teq mat kabiyab luwdaqta na in ago aholsihen waqnan uliqab muleqeq ta hi lehanmo ham. <sup>19</sup> Kam nab on gigem iyayta na teq on amun muturta sus ugayta na in timeqniy daqay ham. <sup>20</sup> Nazaq iyan ne God susumun ugid ne tuk daqayta akaman na in urom akamnib teq ne gigo lotu akamnib hi gwahtiqaq ham.

<sup>21</sup> Kam nab mataw afaqan ayah diqta tisor daqay ham. Kwaziqmo God og saw bunmo giqemim bo muranmo afaqan araq nazaqta a hi gwahtimta ham. Teq abeb afaqan araq nazaqta a ta hi gwahtiqaqmo ham. <sup>22</sup> Ari God kam meqinta na siqim diq a hi emid on mataw bunmo tihiqiy bug nagiy ham. Teq God in ago on mataw in gilumim aholyon giwamta na ginadin emad in kam na emid siqim tiqiydaqta ham.

<sup>23</sup> Kam nab mat araq ne gibileneq bilaqdaq, "Ahol waqiy, Kraish kawa osaq" o "Kraish kowa osaq" haqsa ne in aqez na hikidik huritiy ham. <sup>24</sup> Na ezaggo kraish katiyta teq nantut katiyta kabemmo tugwahtiqaq daqay ham. Gwahtiqaq in daq azawayin inaq aseseqta giqemad in kabiy lul araq diqta amo amo giqem daqay ham. In nazaq emad teq in God ago on mataw in gilumim aholyon giwamta na gihureqnan diq ton daqay ham. <sup>25</sup> Ne ginad em hasiy ham. Daq nagan a hi gwahtiqaqsa kawa ya ne tigibileneq ham.

<sup>26</sup> Nazaq iyan abeb in ne gibileneq bilaq daqay, Ahol waqiy, Kraiss saw amatawun haiqta nab osaq haqsa ne nazaq ban hi lehiy ham. Ad in gibileneq bilaq daqay, Ahol waqiy, Kraiss bit ka aduganib osaq haqsa ne qiwez hi huritiymo ham. <sup>27</sup> Kaitab mewlig hikliyanim anuwan zeq gwalaqta ban oyim le zeq wolehaqta banmo iyaqta ham. Teq Mat Atatin mulegeq ta boldaqta nab in nazaqmo diq tiqiyaqta ham. <sup>28</sup> In boldaqta nab in mataw gime titoneq a hi boldaq ham. Ne gamuk araq mataw bilaqad luwayta ka anadin emiy ham. In bilaqay, Karuw tumomta asan lilihim usaqta nabmo tirgaw bolim humab wolay haqayta ham.

*Mat Atatin teq ta boldaq*  
(Mak 13.24-27; Luk 21.25-28)

<sup>29</sup> Ari kam nab afaqan ayahta na tihiqiyidmo,

Ze q ame romriq iysa kalam a ta hi oydaq ham.

Sa kaitab ulig milheseq ogib tuwoq daqay ham.

Woqsa nagah aseseqta zawayta ulilib usayta nagan in gihol tuwol daqaymo ham.

<sup>30</sup> Kam nab teq Mat Atatin ta boldaqta atowun kaitab tugwahtiqaq ham. Gwahtiqaq teq on mataw en bunmo ahol waqad in gaq wazad bilaq daqay, Mat na i giyon hazizir emnan bolaq haq daqay ham. Haqad in gaq wazad osad Mat Atatin kaitab onqas amalib oseq ago zaway teq ahol anuwun ayahta inaq bolsa in ahol tuwaq daqay ham. <sup>31</sup> Ahol waqsa taur atoranmo gayonsa Mat Atatin in ago angelo giqemid in og saw bunmo lehad inmo ago on mataw in gilumim aholyon giwaqan osayta na giwaqeq giwaqeq a lehad teq in tigiwaq bug daqay ham.

*Ay fik kam ulum kemaqta*  
(Mak 13.28-31; Luk 21.29-33)

<sup>32</sup> Haqad Yesus bilam, Ay fik ago hib teq ne ginad tiqem has daqay ham. Ay na aben hur tonad atitoqin murta gwahtiqaq ne ahol waqad ginad emay, Zeq akaman tiqiy-nan tonaq haqayta ham. <sup>33</sup> Nazaqmo teq abeb nagah ya anan bilayta ka bunmo tugwahtiqaq ne ahol waqad ginad kazaq emiy ham. Nagah Yesus anan bilamta na bolim sinsin tiqiy haqiy ham, bilaqne mat dan ezab turad bit aduganib gwahtiqaqnan tonaq nazaq haqiy ham. <sup>34</sup> Ya helmo ne gibilenaq ham. On mataw muran kam kab osayta ka a hi moq bugsa daq nagan bunmo tugwahtiqaq ham. <sup>35</sup> Kait og inaq teq tihiqiyaqta ham. Ari yaqgo gamuk ka a hi hiqiydaq ham.

*Mat araq diq Yesus ta boldaqta na akaman a hi hurit*

(Mak 13.32-37; Luk 17.26-30, 34-36)

<sup>36</sup> Ari teq Mat Atatin kam gineh diq ta boldaqta na teq in zeq adulan ganimtab bo gwahtiqaqta na mat araq a hi hurit ham. Angelo Heven-ib osayta na teq God Atatin inaqmo in kam na a hi huritiymo ham. God amomo kam na ago tuhuritta ham. <sup>37</sup> Nowa akannib mataw daq em yaqayta nazaqmo Mat Atatin ta boldaqta na akannib in em daqaytamo ham. <sup>38</sup> Uq ayahta na a hi gwahtiqaqmo on mataw didaq neqad yuw uluwad an waqad ossa le Nowa muy aduganib tugwahtim ham. <sup>39</sup> In ginad a hi emad ossamo uq ayahta na hitiqim on mataw na bunmo gisorim giqad lehim tigneq bug ham. An Mat Atatin ta boldaqta na akaman in nazaqmo diq iydag ham. <sup>40</sup> Kam nab mataw giger leheq kabiyab luw daqay ham. Luwsa in araq waqad araq in hulosis nab tiluwdaq ham. <sup>41</sup> Teq on giger mel emayta ago banib wit anagin wolworad os daqay ham. Ossa in araq waqad araq in hulosis nab tuqosdaq ham. <sup>42</sup> Nazaq iyan ne gihol asawan woltayad osiy ham. Ne gigo Iyahta kam gineh boldaqta na ago ne a hi huritayta ham.

<sup>43</sup> Ne gamuk ka huriteq teq ginad em hasiy ham. Bit anamren in mat rin tonaqta naga kannib boldaqta na ago huriteq teq in ago bit wamuzeq saw waqad ossa mat rin tonaqta na bo bit wozilayeq a hi gwahtiqaq ham. <sup>44</sup> Nazaq iyan ne gihol asawan woltayad osiy ham. Ne bilaq daqay, Mat Atatin a hi boldaq haq daqayta nabmo diq in bo tugwahtiqaq ham.

*Kabibiy mat dimunta teq kabibiy mat meqinta gigo gamuk awowun*

(Luk 12.42-46)

<sup>45</sup> Ari naga matin in kabibiy mat dimunta nog? ham. Kabibiy mat dimunta in anad em hasad ago ayahta aqez muzinaqta ham. Aqez muzinad in kabibiy mataw bunmo giwamuzad didaq neq akannib in didaq negaqaqta ham. <sup>46</sup> Abeb ago ayahta na boleq in kwaziqmo bilamta nazaqmo ago kabibiy mat na emsa in ahol waqsa in ago kabibiy mat na tidimniyeq osdaq ham. <sup>47</sup> Ya helmo ne gibilenaq ham. Mat ayahta na in ago kabibiy mat dimunta na emid in ago nagah bunmo tigiwamuzdaq ham.

<sup>48</sup> Ari kabibiy mat meqinta na in ahol buloneq bilaqdaq, Yaqgo ayahta lehim sisaqmo tiluwag haqdaq ham. <sup>49</sup> Haqad in ayogniz nenaq araqibmo kabiy emayta na haresmo tiginoldaq ham. Ad in mataw yuw atoranta uluwayta na nenaq didaq neqad yuw tuquluw daqay ham. <sup>50</sup> In nazaq emad ossamo ago ayahta bolsa in a hi huritdaq

ham. Ad in ahol asawan a hi wastitaydaq ham. <sup>51</sup> Sa mat ayahta na boleq in kabibiy mat na wazeq woltitayeq teq in mataw gimileq meqinta na gigo sawab hunegid wo tilehdaq ham. Saw nab mataw ginad meqniysa gaqad gite guruwad osayta ham.

## 25

### *On barasta gigo gamuk awowun*

<sup>1</sup> Kam abebtanta nab God ago maror in bilaqne mat arağ aw waqnan tonsa on barasta 10 nazaq adanin lehiyta nazaq nog iydaq ham. Mat aw waqdaqta na in ago bitab tubolad luw ham. Bolad luwsa in awe na ayogniz on barasta na gigo lam miderim adanin lehiy ham. In le danib ahol waqad teq inaq ta bolnan haqad ham. <sup>2</sup> On na gilikmanib abaynagin in ginad haiqta ham. Teq abaynagin in ginad inaqta ham. <sup>3</sup> On ginad haiqta na in gigo lam waqim a bolad teq in wel lam-ub teheq mider daqayta na a hi waqiy ham. <sup>4</sup> Ari on ginad inaqta na wel botol-ib tenim teq in lam inaq waqim a boliy ham.

<sup>5</sup> Teq mat aw waqdaqta na hidmo a hi bol ham. Nazaq iyan on na bunmo gime rursa tuqusiy ham. <sup>6</sup> Ussa tarom alihanib mat arağ lileyim bilam, Mat aw waqdaqta na kowa tubolaq haqad in bilam ham. Ne eraqeq leheq ahol waqad waqeq inaq boliy haqad in bilam ham. <sup>7</sup> Haqan on barasta na bunmo eraqim in gigo lam waqim timideriy ham. <sup>8</sup> Sa on ginad haiqta na in on ginad inaqta na gibileniy, Ne wel asor igiy haqiy ham. I gigo lam wel hiqiyim miynan tonaq haqiy ham. <sup>9</sup> Haqan on ginad inaqta na bilaqiy, Wel ka ayah diq a haiq haqiy ham. Luweq i wel ka asor negid i gigo lam timiydaqmo haqiy ham. Nazaq iyan negmo leheq mataw gigo wel inaq na gigo hib asor ne giholyon zayiy haqiy ham.

<sup>10</sup> Haqan on ginad haiqta na wel zaynan tilehsamo mat aw waqdaqta na tubol ham. Bolan on ginad inaqta na in mat na waqim inaq bit aduganib gwahti tilehiy ham. Lehim in gihol adanin otim mat aw waqdaqta na inaq didaq neqad tuqosiy ham. <sup>11</sup> Ossa on ginad haiqta na wel zayim muleqim ta bolim in dan ezab turad teq in dan ez wol hamad bilaq yaqay, Iyahta, Iyahta haq yaqay ham. Ni i giyon dan hasid i gwahtiquq haq yaqay ham. <sup>12</sup> Haqsa mat na in gigo gamuk amenin emim bilam, Ya helmo ne gibilenaiq haqad in bilam ham. Ya ne gigo a hi hurit haqad in bilam ham. <sup>13</sup> Haqad Yesus bilam, Nazaq iyan ne gihol asawan woltayad osiy ham. Kam gineh teq zeq adulan ganimtab ya ta boldaiqta na ne a hi huritiy ham.

### *Kabibiy mataw mani waqiyta gigo gamuk awowun*

*(Luk 19.11-27)*

<sup>14</sup> Ari Yesus gamuk awowun ta arağ gibilenim bilam, Kam abebtanta nab God ago maror in bilaqne mat ayahta arağ saw pesantab lehnna haqad ago kabibiy mataw gibenab kabiy amta nazaq nog iydaq ham. Mat na in ago kabibiy mataw gibilenan bolan in ago nagah bunmo gibenab am ham. <sup>15</sup> Emad in ago kabibiy mataw gilum kemim kabiy negad in kabibiy mat arağ ago zaway teq anad ayah diqta na 5,000 kina nazaq ug ham. Teq arağ ago zaway teq anad ayah nogta na in 2,000 kina nazaq ug ham. Ugad arağ ago zaway teq anad amik nogta na in 1,000 kina nazaq ug ham. In mani na negim gihulosadmo tilah ham. <sup>16</sup> Lehsa mat 5,000 kina wamta na hidmo mani na amalib kabiy emim in 5,000 kina arağmo a ta wam ham. <sup>17</sup> Sa mat 2,000 kina wamta na nazaqmo mani na amalib kabiy emim in 2,000 kina arağmo a ta wam ham. <sup>18</sup> Ta teq mat 1,000 kina wamta na lehim ogib yay tayim in ago ayahta mani ugta na tuqulilam ham.

<sup>19</sup> An mat ayah na lehim sisaqmo osim teq in muleqim ta bol ham. Bolim in ago kabibiy mataw mani nagta na ago agamukan wastitaynan haqad in gimen nan eman in agerab tuboliy ham. <sup>20</sup> Bolim mat 5,000 kina wamta na in ago ayahta na bulonim bilam, Mat ayah ham ni 5,000 kina yagta na kawa ahol waq haqad in bilam ham. Ya amalib kabiy emim amenin 5,000 kina-mo a ta way haqad in bilam ham. <sup>21</sup> Haqan in ago ayahta bulon, Esey ham. Ni ya inad usta na em bugim ni kabibiy mat dimun diq haqad in bilam ham. Ni nagah asitmo anonon diqmo tuwamuzan ya nagah kabemmo nigid ni tuwamuzdaq haqad in bilam ham. Ni bolid ya ninaq ginad dimniysa osuq haqad in bilam ham.

<sup>22</sup> An mat 2,000 kina wamta na in bolmo ham. Bolim in bilam, Mat ayah ham ni 2,000 kina yagta na kawa ahol waq haqad in bilam ham. Ya amalib kabiy emim 2,000 kina-mo a ta way haqad in bilam ham. <sup>23</sup> Haqan in ago ayahta bulon, Esey ham. Ni ya inad usta na em bugim ni kabibiy mat dimun diq haqad in bilam ham. Ni nagah asitmo na anonon diqmo tuwamuzan ya nagah kabemmo nigid ni tuwamuzdaq haqad in bilam ham. Ni bolid ya ninaq ginad dimniysa osuq haqad in bilam ham.

<sup>24</sup> Ari mat 1,000 kina wamta na tubolmo ham. Bolim in bilam, Mat ayah ham ya ningo tuhurit haqad in bilam ham. Ni mat afanta kamolmol a hi emaqta haqad in bilam ham. Didaq ni a hi layta na anon ni niholyon waqdaqta haqad in bilam ham. Ad mat arağ ago kabiyab wit anagin

hunagta nab ni niholyon wit na anon tuwal emaqta haqad in bilam ham. <sup>25</sup> Nazaq iyan ya rabad ningo 1,000 kina ka ulileman us haqad in bilam ham. Ningo mani na kawa haqad in bilam ham. <sup>26</sup> Haqan in ago ayahta amenin emim bulon, Ni kabibiy mat meqin haqad in bilam ham. Ya inad usta na ni a hi am haqad in bilam ham. Ni nabag yaqgo tuhurit haqad in bilam ham. Didaq ya a hi leyta na anon ya iholyon waqaiqta haqad in bilam ham. Ad mat ara q ago kabiyab wit anagin hunagta na ago wit anon ya iholyon tuwal emaiqta haqad in bilam ham. <sup>27</sup> Nagaqgo ni mataw mani abitnib osayta na gibenab yaqgo mani eman in akabiyan a hi emiy haqad in bilam? ham. Emid teq ya mule-qeq boleq yaqgo gimeq na amenin mani ayahmo ina qmo waqnaqta haqad in bilam ham.

<sup>28</sup> Haqad in bilam, Ne mat na abenab 1,000 kina in wazaqta na waqeq mat ago 10,000 kina ina qta na ugiy haqad in bilam ham. <sup>29</sup> Na ezaqgo ya on mataw gigo nagah ina qta na bunmo nagah asor a ta negdaiq haqad in bilam ham. Teq ya mataw ginaghan haiqta na gibenab nagah asitmo in wazayta na walem bugdaiq haqad in bilam ham. <sup>30</sup> Ad ne kabibiy mat meqinta na muzid in asanib saw aromriq ina qtab lehan haqad in bilam ham. Saw nab mataw ginad meqniysa gaqad gite guruwad os daqayta haqad in bilam ham.

*Mat Atatin teq on mataw bunmo giluwiydaq*

<sup>31</sup> Ari Yesus bilam, Abeb teq Mat Atatin king ayahta iyeq ago balaw anuwan oysa in angelo bunmo nenaq tuboldaq ham. Boleq in ago ban tawontab tuqos woqdaq ham. <sup>32</sup> Os woqeq ossa teq on mataw en bunmo boleq in anognib humab tuwol daqay ham. Humab woleq tursa in gihuserid dauh giger tiqiy daqay ham. Bilaqne mat sipsip teq memeq gihuseran sipsip kazaq bolsa memeq kazaq lehayta nazaq nog iy daqay ham. <sup>33</sup> In ago sipsip aben aqabun ban giqemad teq memeq in aben anasaran ban giqemdaq ham.

<sup>34</sup> Teq king na in on mataw aben aqabun ban turayta na gibileneq bilaqdaq, On mataw haqdaq ya imam anad dimun diqta tinegaq haqdaq ham. Ne boleq ya imam ago maror aduganib gwahti qeq ban dimdimunta waqeq ago nagah giwamuzeq osiy haqdaq ham. Kwaziqmo ya imam og eman a hi gwahtiqsamo in ne gimen ban dimdimunta na tigiwastitayan usaqta haqdaq ham. Ya imam nazaq ne tigidimun tonnan haqdaq ham. <sup>35</sup> Na ezaqgo kwaziqmo ya igemnan moqad ossa ne ya didaq yaqiy haqdaq ham. Ya yuwnan moqsa ne

yuw yagan ya uluw haqdaq ham. Ya mat begbegta iyim bolan ne ya iwaqim ilowan toniy haqdaq ham. <sup>36</sup> Ya ibe aholmo luwsa ne tubusan yagiy haqdaq ham. Ya moqad ussa ne ya iwamuzad osiy haqdaq ham. Ya iqirquran ossa ne bolim ya ibiyiy haqdaq ham.

<sup>37</sup> Haqid teq on mataw dimdimunta na in ago gamuk amenin emeq bilaq daqay, Iyahta haq daqay kam gineh ni nigemnan moqad ossa i nibiyad didaq nig? haq daqay ham. Teq kam gineh ni yuwnan moqsa i yuw nigan ni uluw? haq daqay ham. <sup>38</sup> Kam gineh ni mat begbegta iyim bolsa i ni niwaziqim nilowan ton? haq daqay ham. Teq kam gineh ni nibe aholmo luwsa i tubusan nig? haq daqay ham. <sup>39</sup> Kam gineh ni moqad ussa teq ni niqirquran ossa i bolim ni nibiy? haq daqay ham.

<sup>40</sup> Haqid teq king na amenin emeq bilaqdaq, Ya helmo ne gibilenaq haqdaq ham. Nagah bunmo ne ya isenlul ara q abin haiqta ago hib emad na ne yaqgo hib emiymo haqdaq ham.

<sup>41</sup> Haqad in on mataw anasaran ban turayta na kazaq gibilendaq ham. On mataw haqdaq ya imam ne kusluw tinag haqdaq ham. Ne tukeq dan ko muzeq faq oyad a hi miyaqta kob lehiy haqdaq ham. Faq na kwaziqmo Satan ago angelo nenaq gimen tiqeman usaqta haqdaq ham. <sup>42</sup> Na ezaqgo kwaziqmo ya igemnan moqad ossa ne didaq a hi yagiy haqdaq ham. Ya yuwnan moqsa ne yuw a hi yagiy haqdaq ham. <sup>43</sup> Ya mat begbegta iyim bolan ne ya iwaqim ilowan a hi toniy haqdaq ham. Ya ibe aholmo luwsa ne tubusan a hi yagiy haqdaq ham. Ya moqad ussa teq ya iqirquran ossa ne bolim ya a hi ibiyiy haqdaq ham.

<sup>44</sup> Haqid teq mataw na in ago gamuk amenin emeq bilaq daqay, Iyahta haq daqay kam gineh ni nigemnan moqsa teq ni yuwnan moqsa teq ni begbeg iyim bolsa teq ni nibe aholmo luwsa teq ni moqad ossa teq ni niqirquran ossa i ni a hi nilumsih? haq daqay ham.

<sup>45</sup> Haqid teq in on mataw na gigo gamuk amenin emeq bilaqdaq, Ya helmo ne gibilenaq haqdaq ham. Ne ya isenlul ka gigo ara q abin haiqta ago hib nagah na a hi emim na ne yaqgo hib a hi emiymo haqdaq ham.

<sup>46</sup> Nazaq iyid on mataw na leheq santitio waqad tuqos daqay ham. Osad tuteqmo in gisan titiydaq ham. Sa on mataw dimdimunta na in God ago maror aduganib gwahti qeq ginad dimniysa kuluwa-kuluwmo tuqos daqay ham.

**Yesus santitio sorim moqim teq ta eram**

## 26

*Mataw marorta Yesus wol emid moqgo an adugan wazi*

(Mak 14.1-2; Luk 22.1-2; Jon 11.45-53)

<sup>1-2</sup> Yesus gamuk na bilaq bugan tihiqiy in ago disaipel gibilan, Kam giger le tihiqiyid teq i gigo lotu akaman ayahta anan Pasova haqay na tugwahtiqdaq ham. Na ne tuhuritiy ham. Kam na gwahtiqid teq in Mat Atatin bab gibenab emid in ayib dom tuwol daqay ham.

<sup>3</sup> Ari kam nab mataw tamaz emayta gigo aseseqta na giyogniz Juda gigo mataw marorta na nenaq in tamaz mat danmebta anan Kayafas haqayta na ago bitab humab tuwoliy. <sup>4</sup> Humab wolim in on mataw gime titoneq Yesus wazeq wol emid moqdaqta na agamukan tibilaq yaqay. <sup>5</sup> Admo in bilaqiy, I Pasova akamnib Yesus ulalabmo a hi wazam haqiy. Luweq on mataw biyahta na gigem meqniysa bab araq ayahta wazid eraqdaq haqiy.

*Aw araq Yesus afaqrib masil ahuran dimunta wazbalan wom*

(Mak 14.3-9; Jon 12.1-8)

<sup>6</sup> Ari Yesus uliq Betaniy-ib mat araq kwaziqmo aholib moq lepra usim tihiqiyta anan Saimon haqayta na ago bitab os. <sup>7</sup> Ossa aw araq Yesus ago hib tubol. In kagoh araq amikta gig anan alabasta haqay na sisoqim emiyta nab in masil ahuran dimunta anawun ayahmota tenim teq in wazim a bol. A bolim Yesus banab ossa in masil na Yesus afaqrib wazbalan tuwom. <sup>8</sup> Anmo Yesus ago disaipel daq na ahol waqim in gigem meqniysa bilaqiy, Nagaqgo in masil dimunta ko abu ulumaq? haqiy. <sup>9</sup> Masil ko i mat araq inaq zayeq mani ayahmo waq nagta haqiy. Waqeq i mataw ginaghan haiqmo osayta na neg nagta haqiy. <sup>10</sup> Haqan Yesus in gigo gamuk na huritim gibilan, Nagaqgo ne aw ka afaqan ugay? ham. In ya ilowan tonim daq dimunta tiqem yag ham. <sup>11</sup> Tutimmo mataw ginaghan haiqta na ne nenaq osayta ham. Ari ya nenaq tuteqmo a hi osdaiqta ham. <sup>12</sup> Aw ka iholib masil wazbalta ka in ya ihol wastitaye q hodhodab iqemgo haqad in amta ham. <sup>13</sup> Ya helmo ne gibilenaq ham. Mataw edobya leheq ya iwagamun dimunta bilaqad in aw ka daq amta ka awagamun tibilaq daqaymo ham. Bilaqsa mataw huritad teq in aw ka anadin tiqem daqay ham.

*Judas in Yesus waqeq Juda gigo mataw marorta gibenab emgo bilam*

(Mak 14.10-11; Luk 22.3-6)

<sup>14</sup> Ari kam nab disaipel 12 na gigo araq anan Judas uliq Kariyot-ib haqayta na in mataw tamaz emayta gigo aseseqta gigo

hib tilah. <sup>15</sup> Lehim in gibilan, Ya Yesus ne gibenab emid teq ne naga diq yag daqay? ham. Haqan mataw na Yesus ayon banzaw emim in mani silva 30 nazaq Judas tuqugiy. <sup>16</sup> Ugan nab Judas in Yesus waqeq mataw na gibenab emdaqta adanteqin araq dimunta tinagunyaq.

*Yesus ago disaipel nenaq Pasova abeb-tanta neqiy*

(Mak 14.12-21; Luk 22.7-14, 21-23; Jon 13.21-30)

<sup>17</sup> Ari bret yis haiqmo neqayta na akaman tugwahtim. Gwahtiqan disaipel Yesus ago hib bolim tisusumun uguy, Ni ninad i bit edob leheq ninmen nagah wastitayid teq ni Pasova adidaqan neqdaq? haqiy. <sup>18</sup> Haqan in gibilan, Ne le uliq kob gwahtiqeq mat araq ahol waqad teq ne kazaq buloniy ham. Iyahta bilam, Yaqgo kam na bolim sinsin tiqiy haqiy ham. Yaggo disaipel nenaq ningo bitab Pasova adidaqan neqnan haqad ne buloniy ham. <sup>19</sup> Haqan Yesus gibilanta nazaqmo in lehim Pasova adidaqan neggo abanan tuwastitayiy.

<sup>20</sup> Ari imisor diq tiqiy an Yesus in ago disaipel 12 na nenaq didaq neqnan banab tuqos woqiy. <sup>21</sup> Os woqim osad in didaq neqadmo Yesus gibilenim bilam, Ya helmo ne gibilenaq ham. Ne gilikmanib teq mat araq ya iwaqeq bab gibenab iqemdaq ham. <sup>22</sup> Haqan disaipel gihol afaqan diq iysa in amulik-mulikmo Yesus susumun ugad bilaq yaqay, Iyahta yaqmo ye? haq yaqay. <sup>23</sup> Haqsa Yesus amenin emim gibilan, Mat ya inaq degib aben eman womta naqmo teq ya iwaqeq bab gibenab iqemdaqta ham. <sup>24</sup> God ago mar Mat Atatin anan bilamta nazaqmo diq in dan muzeq tilehdaqta ham. Teq mat in Mat Atatin bab gibenab emdaqta na timeqniy hasdaq ham. Mat na anen a hi em nagta in am ham. <sup>25</sup> Haqan Judas mat Yesus waqeq bab gibenab emdaqta na bilam, Iyahta yaqmo ye? ham. Haqan Yesus bulon, Ninmo nawa tibilam ham.

*Yesus in ago disaipel bret teq wain ayun inaq nag*

(Mak 14.22-26; Luk 22.15-20; 1 Korin 11.23-25)

<sup>26</sup> Ari in didaq neqad osad Yesus bret asor waqim God esey ugim in orqayim ago disaipel negad gibilan, Ne bret ka waqeq neqiy ham. Ka ya inon ham. <sup>27</sup> Haqad in wain agogin inaq waqim God esey ugim teq in negad gibilan, Ne bunmo ka waqeq uluwiy ham. <sup>28</sup> Ka ya inedan God ago maror murta na zaway ugdaqta ham. Ya ned ka on mataw kabemmo gigo daq meqinta giwalemgo wazbaldaiqta ham. <sup>29</sup> Ya ne gibilenaq ham. Ya wain ayun ka a ta hi uluwdaiq ham. Abeb ya nenaq ya

imam ago maror muturta aduganib osad teq ya wain ayun ka a ta uluwdaiq ham.

<sup>30</sup> Admo in bunmo lotu ago bar araq wazim huloadmo in uliq hulosisim garah Oliv-ub tilehiy.

*Yesus bilam, Pita teq gileh yagdaq ham*

(Mak 14.27-31; Luk 22.31-34; Jon 13.36-38)

<sup>31</sup> Ari Yesus in ago disaipel nenaq lehad gibilan, Tarom kab ya iholib afaqan araq meqin diq gwahtiqa ne bunmo ya ibiyad ne ginad ya inan helmo haqayta na huload gileh tiyag daqay ham. Na ezaqgo God ago marib gamuk araq kazaq bilam ham.

Ya mat sipsip giwamuzaqta na wol emsa in ago sipsip haresmo tukeq tileh daqay haqad in bilam ham. *Sekaraya 13.7*

<sup>32</sup> Ari ya hodhodab eraqeq teq ya ameb saw Galiliy-ib tilehdaiq ham.

<sup>33</sup> Haqan Pita gamuk na amenin emim bilam, Mataw ka bunmo in ni afaqan waqsa nibiyad in ginad helta huload gileh nigsa ya haiq ham. Ya ni ninan helmo haqaiqta na huload gileh a hi nigdaiq ham. <sup>34</sup> Haqan Yesus bulon, Ya helmo nibilenaq ham. Tarom kab kurek a hi gayon-samo ni nime ezeqmanmo gileh tiyagdaq ham. <sup>35</sup> Haqan Pita bilam, Haiq ham. Mataw ya ninaq ginol emnan bilaqsa ya gileh a hi nigdaiq ham. Hikidik ham. Haqan disaipel bunmo nazaqmo bilaqiy.

*Yesus og Getsemaniy-ib God inaq gamuk am*

(Mak 14.32-42; Luk 22.39-46)

<sup>36</sup> Ari Yesus ago disaipel nenaq og araq awaqan dimunta anan Getsemaniy haqaytab tilehiy. Lehim in ago disaipel gibilan, Ne kab osiysa ya kob leheq God inaq gamuk emnan ham. <sup>37</sup> Haqadmo in Pita teq Sebediy atatniz giger na giwaqim nenaq tilah. Lehad in ahol afaqan iysa ahol meqin diq tiloyinyaq. <sup>38</sup> Ad in gibilan, Ya ihol afaqan diq iysa tumoqnan tonaiq ham. Ya nenaq kab saw waqad osuq ham. <sup>39</sup> Haqad in gihulosim asitmo ta leh nog iyim in anobun ban woqim usad God buloneq bilaqyaq, Ya imam haqyaq ya iholib afaqan ayahita ka aban emdaiqta adanteqin ussun teq ni ya iqisihun haqyaq. Ari ni ninad nazaq a hi usid teq ni ya inad ka hi muz haqyaq. Ninmo ninad muz haqyaq.

<sup>40</sup> Haqad in eraqim ago disaipel ezeqman na gigo hib muleqim ta lehim in ussa gibiy. Gibiyad in Pita bulon, Ezaq? ham. Ne asitmo ya nenaq saw waqad a hi osam e? ham. <sup>41</sup> Ne saw waqad God inaq gamuk emad osiy ham. Gamuk emad daq ne gilum waqdaqta na bo giholib gwahtiqa ne hi woqgo haqad buloniy ham. Helmo ne ya

inad muznan ginad bilaqaqta teq ne gihol awaz meqin haiq ham.

<sup>42</sup> Haqad in ame gigerta lehim God inaq gamuk emim bilam, Ya imam ham. Afaqan ka ya iban a hi emid ari ni ninad usaq naqmo ya iholib gwahtiqa ham. <sup>43</sup> Haqad in muleqim ta lehim disaipel ezeqman na gime rursa ussa in gibiy.

<sup>44</sup> Gibiyad gihulosim ta lehim ame ezeq-manta in God inaq gamuk a ta am. Teko in gamuk bilamta nazaqmo in a ta bilaq ton. <sup>45</sup> Bilaqim tihiqiy in disaipel gigo hib ta lehim gibilan, Ne ginamur emad us tutay ye? ham. Ahol waqiy ham. Muran in Mat Atatin waqeq mataw meqinta gibenab emdaqta na akaman tiqiy ham. <sup>46</sup> Ne eraqiysa i lehuq ham. Ahol waqiy ham. Mat ya iwaqeq bab gibenab iqemdaqta na bo tugwahtim ham.

*Judas Yesus waqim bab gibenab am*

(Mak 14.43-50; Luk 22.47-53; Jon 18.3-12)

<sup>47</sup> Ari Yesus nazaq gamuk bilaqad tur-samo disaipel 12 na gigo araq anan Judas haqay na tubol. Bolsa mataw dauh biyahta baqir sebur wazim ad Judas inaq boliymo. Mataw tamaz emayta gigo aseseqta na teq Juda gigo mataw marorta na in bab mataw na qigeman boliyta. <sup>48</sup> Ari mat Yesus bab gibenab emdaqta na in naga daqin emid in Yesus ahol waqad waz daqayta na ago in teko tigibilanta. In bilam, Ya leheq mat nog ya wazeq ilawundaqta naqmo ne waziy ham. <sup>49</sup> Nazaq iyan in hid naqmo Yesus ago hib loqimmo tibilam, Iyahta ham tarom dimun ham. Haqadmo in tiqlawun. <sup>50</sup> Ilawunan Yesus bulon, Kadoy ham ni nagah emnan bolta na ni hidmo em ham. Haqsamo mataw na eraqim Yesus tuwaziy.

<sup>51</sup> Wazsamo mataw Yesus inaq turiyta na gigo araq ago baqir hureq hasim wam. Waqim in tamaz mat danmebta ago kabibiy mat araq wolim adeksanmo qwatayan ogib tuwom. <sup>52</sup> Anmo Yesus bulon, Ningo baqir asanib ta sihen ham. Mataw baqirib an wolayta na baqiribmo tumoq daqayta ham. <sup>53</sup> Ni a hi hurit daqagya ham. Ya imam susumun ugid in angelo kabemmo diq tiyagdaq ham. Angelo na ginulingan in mataw bab emayta gidauhan 12 nazaq giquriyam daqayta ham. <sup>54</sup> Ta teq ya daq nazaq emeq ya God ago gamuk a hi wol net bugdaiq ham. Daq kagan bunmo ya iholib gwahtiqaqta agamukan God ago marib mar tonan usaqta ham.

<sup>55</sup> Haqadmo in mataw biyahta na gibilan, Ne baqir sebur wazim a boliyta ka ne mat rin tonaqta waznan boliy ye? ham. Kam kabemmo ya on mataw suleq negad Tempel-ib ossa ne ya a hi iwaziy ham.

<sup>56</sup> Teq daq ka bunmo agamukan God ago nantut mar tonan usaqta nazaqmo in ya iholib tugwahtiq bugaq ham. In nazaq haqanmo disaipel bunmo Yesus hulosisim titukiy.

*Mataw aseseqta Yesus amalib nan kabemmo emiy*

(Mak 14.53-65; Luk 22.54-55, 63-71; Jon 18.13-14, 19-24)

<sup>57</sup> Ari mataw Yesus waziya ta in waqim ad tamaz mat danmebta Kayafas ago hib tilehiy. Bit nab mataw Moses ago gunun hurit kemiya na teq Juda gigo mataw marorta na in tekomo bo humab tuwolim osiyta. <sup>58</sup> Teq mataw Yesus wazim a lehsa Pita in Yesus muzim lehad teq in pesan nog lehyaq. In lehim tamaz mat danmebta na ago bit agelin aduganib le gwahtiqim in mataw Tempel-ib hurmey gan turayta na nenaq tuqos, in nagah teq gwahtiqdaqta na ahol waqgo haqad.

<sup>59</sup> Ari mataw tamaz emayta gigo aseseqta na teq Juda gigo kaunsel ayahta na amatawun bunmo in mat araq Yesus ago hib nan katiya bilaqid teq in wol emid moqgo na tinagun yaqay. <sup>60</sup> Sa mataw kabemmo gwahtiqim Yesus amalib nan katiya em yaqay. Ta teq mataw aseseqta na in gamuk araq amalib Yesus wol em daqayta na a hi hurit yaqay. Sa abeb diq mataw giger tugwahtiqiy. <sup>61</sup> Gwahtiqim in bilaqiy, Mat ka bilam, Ya God ago Tempel wol inereq kam ezeqmanmo aduganib ya wazid a ta eraqdaq haqad in bilamta haqiy.

<sup>62</sup> Haqan tamaz mat danmebta na eraqim turad in Yesus bulon, Mataw ni ninan gamuk bilaqayta ka in ezaq diq? ham. Ni gamuk na araq amenin a hi emdaq e? ham. <sup>63</sup> Haqan teq haiq. Yesus aqezmo hiqiyim tur. Sa tamaz mat danmebta na bulon, God kayeqmo osaqta na nibiysa ni hel diqtaqmo bilaq ham. Mat anan Kraiss haqayta na amatin ninmo ye? ham. Ni God atatin e? ham. <sup>64</sup> Haqan Yesus bulon, Ninmo nawa tibilam ham. Ta teq ya ne gibilenaq ham. Muran teq abeb Mat Atatin in God Awaz Meqin Diqta aben aqabun ban ossa ne ahol tuwaq daqay ham. Ahol waqsa in kaitab onqas amalib oseq bolsa ne ahol tuwaq daqaymo ham.

<sup>65</sup> Yesus nazaq bilaqanmo tamaz mat danmebta na era inmo aholib tubusan bulsireqim bilam, Mat ka God tibilawun ham. Mat araq in ayon nan araq ta hi bilaqan ham. In kawaqmo God bilawunim gamuk bilaqsa ne tuhuritiy ham. <sup>66</sup> Ne in ago daq na ulum kemim ginad ezaq emay? ham. Haqan mataw na bilaqiy, Mat daq nazaq amta na in moq nagta haqiy. <sup>67-68</sup> Haqad in Yesus anobun kusluw ugad tuwol yaqay. Wolad asor amanmanan

wolad bulon yaqay, Ni ninan Kraiss haqayta ye? haq yaqay. Ni God ago nantut iyeq teq ni i gibilen haq yaqay. Nog diq kawa ninolaqta ka ni anan biysa i hurituq haq yaqay.

*Pita Yesus gileh ug*

(Mak 14.66-72; Luk 22.56-62; Jon 18.15-18, 25-27)

<sup>69</sup> Ari Pita asanib bit aqezab os. Ossa kabibiy aw araq in agerab loqim bilam, Ni inaqmo Yesus saw Galiliy-ibta na inaq osta ham. <sup>70</sup> Haqan Pita mataw bunmo gimeb bilam, Haiqgam ham. Ya ni gamuk bilaqta na inad a hi emaiq ham.

<sup>71</sup> Haqad in lehim bit na agelin ago dan ezab tur. Tursa aw ta araq Pita ahol waqadmo in on mataw nab osiyta na gibilan, Mat ka in Yesus uliq Nasaret-ibta na inaq osta ham. <sup>72</sup> Haqan Pita ahol ulilemim bilam, God Ulilibta ibiysa ya helmo bilaqiy ham. Ya mat na ago a hi huritta ham.

<sup>73</sup> Abeb mataw nab turiya ta Pita agerab loqim buloniy, Hel diqtaqmo haqiy. Ni mataw ko gigo araq haqiy. I ni niziyan alulin tuhurit kem haqiy. <sup>74</sup> Haqan Pita bilam, God Ulilibta ibiysa ya bilaqiy ham. Ya mat na ago a hi huritta haqiy ham. Ya helmo a hi haqid teq God ya inol eman ham. Haqanmo kurek tigayon. <sup>75</sup> Gayonanmo Pita in Yesus gamuk bilamta na anadin tiqam. Yesus bilam, Kurek a hi gayonsamo ni nime ezeqmanmo gileh tiyagdaq ham. Pita gamuk na anadin emad in asan ban lehim gaq naqmo diq hiqiy.

## 27

*Mataw Yesus wazim ad Pailat ago hib lehiy*

(Mak 15.1; Luk 23.1-2; Jon 18.28-32)

<sup>1</sup> Ari saw tihastitayan mataw tamaz emayta gigo aseseqta na teq Juda gigo mataw marorta na bunmo in Yesus ayon dan emid Rom mataw in wol emid moqdaqta na ago in bilaqim teq in an adugan tuwaziy. <sup>2</sup> An adugan wazim teq in Yesus irqurim wazim ad lehim Rom gigo maror saw Judiya wamuzim osta anan Pailat haqay na tuqugiy.

*Judas mom*

(Aposel 1.18-19)

<sup>3</sup> Ari Judas mat Yesus bab gibenab amta na in mataw Yesus ayon hazizir emim anan bilaqiy, In moqan haqsa in tigibiy. Gibiyim in anad ta buliyim mani silva 30 na waqim ad mataw tamaz emayta gigo aseseqta na giyogniz mataw marorta na nenaq gigo hib a ta lah. <sup>4</sup> A lehim in gibilan, Ya daq meqinta tiqem ham. Ya mat dimunta bab gibenab eman in tumoqdaq ham. Haqan mataw aseseqta na buloniy, Na i gigo nagah

a haiq haqiy. Na ninmo ningo nagah haqiy. <sup>5</sup> Haqan Judas Tempel aqezab mani silva na hunegad in lehim amub yuk tonim inmo ahol anatguman hihiqim tumom.

<sup>6</sup> Ari mataw tamaz emayta gigo aseseqta na in mani silva na waqim bilaqiy, Mani ka mat anedan anawunta haqiy. I Tempel-ib mani usaqta na inaq wastoneq na i gunun tiqitiyonam haqiy. <sup>7</sup> Haqad in an bulonim teq in mani na amalib og araq zaiyiy. Og na kwaziqmo mataw reb emayta na leheq og soskaq waq yaqayta asawun. Mataw aseseqta og na zayid in mataw Jerusalem-ub bolim begbeg osim moqayta gimen hod-hod iyaqta haqad in zaiyiyta. <sup>8</sup> Nazaq iyan mataw og na anan Ned Aqogin bilaqad luwim bo muran in bilaq tutayta. <sup>9</sup> Daq nazaq gwahtiqim kwaziqmo God in ago nantut Jeremaya aqezab gamuk bilamta na in tuwol net bug. Gamuk na bilam,

Isrel on mataw in mat na zaynan haqad in mani silva 30 nazaq anan bilaqiyta ham. Bilaqim in mat na zayim amenin nazaqmo tuwaqiy ham. <sup>10</sup> In mani na waqim a le mataw reb emayta na aqogin tizaiyiy ham. Iyahta ibilanta nazaqmo in emiy ham.

*Jeremaya 32.6-9*

*Pailat Yesus susumun ug*

*(Mak 15.2-5; Luk 23.3-5; Jon 18.33-38)*

<sup>11</sup> Ari mataw Yesus wazim a lehim Pailat ameb eman tursa Pailat tisuusumun ug, Ni Juda on mataw gigo king e? ham. Haqan Yesus bilam, Ninmo nawa tibilam ham. <sup>12</sup> Haqan mataw tamaz emayta gigo aseseqta na teq Juda gigo mataw marorta na in Yesus amalib nan kabemmo em yaqay. Emsa teq Yesus gamuk araq amenin a hi emyaq. <sup>13</sup> Nazaq iyan Pailat bulon, Ni gamuk nimalib emayta ko a hi huritaq e? ham. <sup>14</sup> Haqan teq haiq. Yesus in Pailat ago gamuk amenin a hi emad in mataw nan kabemmo ug yaqayta na gigo gamuk araq diq amenin a hi bilammo. Nazaq iyan Pailat anadnad diq emyaq.

*Pailat bilam, Yesus ayib dom woliy ham*

*(Mak 15.6-15; Luk 23.13-25; Jon 18.38-19.16)*

<sup>15</sup> Ari ulig bunmo Juda gigo lotu akaman ayahta nab Pailat bit giqirquran osayta nab mat araq hasid gwahtiqyaqta. Juda on mataw in mat araq anan bilaqid Pailat naqmo hasid in gigo hib lehyaqta. <sup>16</sup> Ari kam nab mat araq meqin diqta anan Barabas haqayta na irquran os. <sup>17</sup> Ossa on mataw bo humab tuwolim ossa Pailat gibilan, Ya nog diq hasid ne gigo hib lengo ne ginad usaq? ham. Ya Barabas hasidaq o haiq, ya Yesus, mataw anan Krai haqayta na has negdaiq? ham. <sup>18</sup> Na ezaqgo Pailat

anad tiqam, Yesus in Juda gigo mataw aseseqta na gibayan woqiya na ago in gigem meqniysa amalib nan emay ham.

<sup>19</sup> Ari Pailat in ago ban in mataw gigo afaqan huritim gilum kemaqta nab osad gamuk bilaqsa awe inmen nantut araq kazaq eman bolan in hurit. Ni mat titnonta na ago hib daq araq hi em ham. Taromab ya in asenan qwayim ya ihol afaqan diq iyaq ham.

<sup>20</sup> Ari mataw tamaz emayta gigo aseseqta na giyogniz mataw marorta na nenaq in gigo walmataw gamuk awaz meqinta gibilenad in ginad tubuliyiy. Ginad buliyan mataw biyahta na in Barabas hasad Yesus wol emid moqgo haqad Pailat tubulon yaqay. <sup>21</sup> Bulonsa Pailat a ta gibilan, Ya mataw giger ka gilikmanib nog diq hasid gwahtiqeq samanmo tiluwdaq? ham. Haqan in bilaqiy, Barabas haqiy. <sup>22</sup> Haqsa Pailat gibilan, Nazaq na teq ya Yesus mataw anan Krai haqayta ka ezaq ton ugdaiq? ham. Haqan mataw na bunmo bilaqiy, Ayib dom woliy haqiy. <sup>23</sup> Haqan Pailat bilam, Nagaqgo? ham. Mat ka naga daqin meqinta am? ham. Haqsa teq haiq. Mataw na dedibmo lileyim a ta bilaq toniy, Ayib dom wolid moqan haqiy.

<sup>24</sup> Sa Pailat ago gamuk loyinan in amomo iy. On mataw na in anad a hi muzad in bab ayahta wazid tiqeraqan tonya. Nazaq iyan Pailat in on mataw bunmo gimeb yuw waqim aben suholad bilam, Mat ka anedan woqid na yaqgo afaqan a haiq ham. Na negmo gigo afaqan ham. <sup>25</sup> Haqan on mataw na bunmo amenin emim bilaqiy, Afaqan ka i gigo hib teq i gigo onmin gigo hib tuboldaq haqiy. <sup>26</sup> Nazaq iyan Pailat in Barabas hasan mataw gigo hib tilah. Lehsa in ago mataw gibilenan in warig waqim hikaquwim amalib Yesus tuwoltitaiy. Woltitayim hulosan Pailat Yesus ayib dom wolgo haqad ago mataw bab emayta na gibenab tiqam.

*Rom gigo mataw bab emayta na Yesus bilawuniy*

*(Mak 15.16-20; Jon 19.2-3)*

<sup>27</sup> Ari Pailat ago mataw bab emayta na in Yesus waqim ad le Pailat ago bit aduganib tugwahtiqiy. Gwahtiqim in giyogniz bunmo gibilenan bolim in Yesus lilut ugim turuy. <sup>28</sup> Turad in Yesus ago tubusan hasad teq in tubusan araq sisaqta kakaqta amalib ahol tiqisihiy. <sup>29</sup> Isihim teq in am asasuqin inaqta tal tonim king ago balaw noqta afaqniy emiy. Ad in tuqir araq gwahtuq nog haqad aben aqabniy emim teq in anognib gibakbakan ulum laquwim turad in bilawunim bulon yaqay, Mat ayah haq yaqay. Ni Juda gigo king-mo diq haq yaqay. <sup>30</sup> Haqad in kusluw ugad teq in tuqir



abenab waqim afaqin wol yaqay. <sup>31</sup> Mataw na Yesus bilawunim huloadmo in tubusan sisaqta na hasim waqad inmo ago tubusan na aholib ta em ugim teq in ayib dom wolnan haqad waqim ad tilehiy.

*Mataw Yesus ayib dom woliy*

(Mak 15.21-32; Luk 23.26-43; Jon 19.17-27)

<sup>32</sup> Ari in Yesus waqim ad tilehad teq in mat araƣ uliq Sairin-ibta anan Saimon haqayta ahol tuwaqiy. Ahol waqad in mat na Yesus ago ay sorgo haqad abe yahan in ay na sorim ad mataw na nenaq tilehiy. <sup>33</sup> Lehim in garah akululƣan araƣ anan Golgota haqaytab tugwahtiƣiy. Gamuk Golgota na alulin in 'Gifaƣin Agololan' haqayta. <sup>34</sup> In saw nab gwahtiƣimmo bab mataw na wain ayun teq masil araƣ agon meƣinta anan gal haqayta inaq buliyim Yesus uluwgo haqad ugiy. Ugan in uluw waqim teq in huloadmo a ta hi uluw bug.

<sup>35</sup> An bab mataw na Yesus ayib dom tuwolim teq in gig amikmikta hunegad Yesus ago tubusan nagan iberim giholyon tuwaqiy. <sup>36</sup> Waqim teq in saw nabmo os woƣim Yesus wamuzim tuƣosiy. <sup>37</sup> Ad Yesus naga daƣin eman in ayib dom woliyta na ananin mar tonim afaƣnib ulilib tuƣotheniy. Gamuk na in kazaƣ mar toniy.

Ka Juda gigo king Yesus

<sup>38</sup> Ad teq in Yesus agerab mataw rin tonayta gigermo ayib dom giwoliyimo. Dom wolan araƣ Yesus aben aqabun ban tursa araƣ aben anasaran ban turyaq. <sup>39-40</sup> Sa on mataw bo lehad in Yesus ahol waqad bilawun yaqay. Bilawunad gifaƣin lelad teq in bilaƣ yaqay, Mat Tempel wol inereq kam ezeƣmanmo aduganib wazid a ta eraƣdaƣta na amatin ninmo haq yaqay. Nazaƣ iyan ni niwaz meƣniyeq ninmo nihol ulumsih haq yaqay. Ni God atatin iyeq teq ni ay na huloseq gehitiq haq yaqay.

<sup>41-42</sup> Sa mataw tamaz emayta gigo aseseqta na teq mataw Moses ago gunun hurit kemyta na teq Juda gigo mataw marorta nagan in nazaqmo Yesus bilawuneq bilaƣ yaqay, In mataw asor gilumsihan a hi moƣiyta haq yaqay. Ta teq inmo ahol ulumsihgo ago zaway haiqta haq yaqay. In Isrel gigo king daqag haq yaqay. Nazaƣ iyan in ay huloseq gehitiqan haq yaqay. Gehitiqid teq i anan helmo tihaqam haq yaqay. <sup>43</sup> Mat ko bilam, Ya God atatin hamta haq yaqay. God teq tiqilumsihdaƣ hamta haq yaqay. Ari God in mat ko anan anad bilaƣid teq in ulumsihid hi moƣan haq yaqay. <sup>44</sup> Sa mataw giger girin inaqta Yesus agerab ayib dom woliyta na in nazaqmo Yesus bilawun yaqaymo.

*Yesus mom*

(Mak 15.33-41; Luk 23.44-49; Jon 19.28-30)

<sup>45</sup> Ari zeq gabolim liqabmo tiqiyasa saw bunmo romriq iyad le 3 kilok imisor tiqiy. <sup>46</sup> Ad 3 kilok imisor nazaƣ tiqiyanno Yesus dedibmo lileyim bilam, *Eli Eli lama sabaktaniy?* ham. Gamuk na in kazaƣ bilam, Yaƣgo God Yaƣgo God nagaƣgo ni ya ihulosaƣ? ham. <sup>47</sup> Haqanmo mataw asor nab turiyta na in Yesus aqez huritim bilaƣiy, Ko Elaija lilewunaq haqiy. <sup>48</sup> Sa hid naqmo in gigo araƣ sibim lehim tubusandek waqim tuƣir amotrüb am wazim teq in wain ayun agon iyta ulum turim Yesus ateb tiqam, in sisowdaƣ haqad. <sup>49</sup> Samo mataw ta asor bilaƣiy, Hulossa i ahol waqad teq haqiy. Elaija boleq ulumsihdaƣ o haiq? haqiy. <sup>50</sup> Haqanmo Yesus dedibmo a ta lileyimmo tumom.

<sup>51</sup> Moƣanmo tubusan ayahta Tempel-ib othenan usta na ulilib liqabmo tartayim giger iyim bo ogibmo tuwom. Woƣsamo og ahol wolsa gig aseseqta timizilayiyimo. <sup>52</sup> Sa mataw moƣiyta gigo hodhod giqez hasa God in ago on mataw tawonta kwaziqmo tumoƣiyta na kabemmo giwazan tiqeraƣiy. <sup>53</sup> Eraƣim abeb Yesus ta eraƣan teq on mataw na hodhod huloadmo le God ago uliq tawonta Jerusalem-ub gwahtiƣasa mataw kabemmo tigibiyiy. <sup>54</sup> Ari bab mataw Yesus wamuzim osiyta na gigo ayahta inaq in daƣ nagan gwahtiƣasa ahol waqad teq og ahol wolsa in loyinad in gihol rab naqmo diq hiqiy yaqay. Ad in bilaƣiy, Helmo diq haqiy mat ko in God atatin haqiy.

<sup>55</sup> Sa on kabemmo pesanmo nog turad teq in nagah na ahol waqad turiy. On na Galiliy huloadmo Yesus muzim inaq bolad in ulumsih yaqayta. <sup>56</sup> In gilikmanib Mariya uliq Magdala-ibta na teq Jems ayow Josep inaq ginan anan Mariya haqayta na teq Sebediy atatinz giger na ginan in nab turiy.

*Yesus moƣan asan hodhodab a lehiy*

(Mak 15.42-47; Luk 23.50-55; Jon 19.38-42)

<sup>57</sup> Ari imisor tiqiyann uliq Arimatea-ib mat araƣ ago mani kabemmota na tubol. In anan Josep haqayta. Teq in inaqmo Yesus anan helmo hamta amatin araƣ. <sup>58</sup> In bo Pailat ago hib gwahtiƣim in Yesus asan waqeq a le yay tongo tisuusun ug. An Pailat in ago mataw bab emayta gibilenan in Yesus asan waqim Josep tuƣugiy. <sup>59</sup> Ugan in Yesus asan waqim tubusan husta anuman haiqta amalib tiqil ton. <sup>60</sup> Il tonim in sorim a le inmo ago hodhod muturta na aduganib tiqam. Hodhod na in gig qwayim amta. Nab in Yesus asan emad teq in gig araƣ ayahta otbuliyim a le hodhod aqez ituqimmo in tilah. <sup>61</sup> Lehsa Mariya uliq

Magdala-ibta na ayow Mariya araq na inaq in giger hodhod ago dan ezab pesan nog tuqosiy.

*Mataw bab emayta asor Yesus ago hodhod wamuzim osiy*

<sup>62</sup> Ari Juda gigo lotu ayon nagah wastitayayta akaman na tihiqiy. Hiqiyon Juda gigo lotu akaman diq na tugwahtiyan nab mataw tamaz emayta gigo aseseqta na giyogniz Farisi nenaq in le Pailat ago hib humab tuwoliy. <sup>63</sup> Humab wolim in bilaqiy, Mat ayah haqiy mat akatiy-naqta na osad in gamuk araq bilamta na i anadin emauq haqiy. In bilam, Kam ezeqmanmo tihiqiyid ya ta eraqdaiq hamta haqiy. <sup>64</sup> Nazaq iyan ni bab mataw asor giqemid leheq in hodhod na wamuz naqmo diq hiqiysa le kam ezeqmanta nabmo iyan haqiy. Luweq mat na ago disaipel boleq asan rin toneq teq in on mataw gibilen daqay, In hodhodab tiqeram haq daqay haqiy. In on mataw nazaq kat negid luweq on mataw bunmo mat akatiy naq na anan helmo haq daqay haqiy. Ad nan katiy abebta na in nan katiy kwaziqta na uriyamdaq haqiy. <sup>65</sup> Haqan Pailat bilam, Ya bab mataw asor giqemid tileh daqay ham. Lehsa ne nenaqmo leheq gibilenid in mat momta na ago disaipel gitawanan osiy ham. <sup>66</sup> Haqan mataw aseseqta na in bab mataw asor nenaq hodhodab lehim gig ayahta nab Pailat ananib tarin emim teq in bab mataw na giqeman in hodhod wamuzim tuqosiy.

## 28

*Yesus hodhodab eram*

*(Mak 16.1-10; Luk 24.1-10; Jon 20.1-18)*

<sup>1</sup> Ari Juda gigo lotu akaman tihiqiyon Sande tarommo saw tihastitaynan tonsa Mariya uliq Magdala-ibta na ayow Mariya araq na inaq in hodhod ahol waqnan tilehiy. <sup>2-3</sup> Lehsa Iyahta ago angelo araq Heven hulosisim bo ogib hitiqim in gig hodhod aqezab usta na otbuliyan lehan teq in gwalim amalib tuqos. Angelo na ahol awaqan bilaqne mewlig hikliyanaqta nazaq nog iyyaq. Sa ago tubusan in hus didiq bilaqne onqas ahus gan nog. In gehitiqim nazaq emsamo kanawrigrig araq ayahta tisib. <sup>4</sup> Sibsas mataw bab emayta na in angelo na ahol waqad in rabunad gibensen harara nemsas in mataw moqiya nogmo tiqiyiy.

<sup>5</sup> An teq angelo na in on giger na gibilan, Ne hi rabiy ham. Ne Yesus mat ayib dom woliya na nagunim bolyta na ya tuhurit ham. <sup>6</sup> Na in kab haiq ham. In tiqeram ham. Kwaziqmo in bilamta nazaqmo ham. Ne giger boleq in usta asawan ka ahol waqiy ham. <sup>7</sup> Ahol waqad teq ne hidmo

leheq in ago disaipel gibileniy ham. Gibilenad ne kazaq bilaqiy ham. God Yesus hodhodab wazan tiqeram haqiy ham. Eraqim in ameb Galiliy-ib tilehaq haqiy ham. Nab teq ne in ahol tuwaq daqay haqad ne gibileniy ham. Ari yaqgo nan nawaqmo ham. Ya ne tigibilen ham.

<sup>8</sup> Ari on giger na rabad teq in ginad tidimniyaqmo. Ginad dimniysa in hodhod hulosisim Yesus ago disaipel gibilenan sibim tilehiy. <sup>9</sup> Lehsamo danib Yesus on giger na gibiyad in "Tarommo dimun" nag. Negan on giger na agerab loqim asen wazim ayon lotu tiqemiy.

<sup>10</sup> Samo Yesus gibilenim bilam, Ne hi rabiy ham. Ne giger leheq ya imagniz gibilenid in Galiliy-ib lehiy ham. Nab teq in ya tiqibiy daqay ham.

*Maror aseseqta Yesus hodhodab eramta na abin uilemty*

<sup>11</sup> On giger na danib lehad luwsa bab mataw disaipel gitawanan osiya na gigo asor uliq aduganib gwahtiym tilehiy. Lehim nagah bunmo gwahtimta na ago in mataw tamaz emayta gigo aseseqta na tigibileniy. <sup>12</sup> Gibilenan tamaz mataw aseseqta na in Juda gigo mataw marorta na nenaq humab wolim in gamuk emim an adugan tuwaziy. An adugan wazim in bab mataw na mani kabemmo negiy. <sup>13</sup> Negad in gibileniy, Ne kazaq bilaqiy haqiy. Taromab i ussa Yesus ago disaipel bolim asan rin toniy haqad nazaq ne bilaqiy haqiy. <sup>14</sup> Ari Pailat ne gibin meqinta nazaq na huritid i tubulonam haqiy. Bulonsa ne gibin meqinta na ago afaqan a hi waq daqay haqiy. <sup>15</sup> Haqan bab mataw na mani na waqim in mataw aseseqta na giqez tumuziniy. Nazaq iyan Juda on mataw wagam katiya na huritim bilaqad luwim bo muran in bilaq tutayta.

*Yesus in ago disaipel kabiy nag*

*(Mak 16.14-18; Luk 24.36-49; Jon 20.19-23; Apotel 1.6-8)*

<sup>16</sup> Ari disaipel 11 na saw Galiliy-ib lehad luwim le Yesus garah anan gibilenim bilam, Nab ne lehiy hamta nab in tugwahtiym. <sup>17</sup> Gwahtiym in Yesus ahol waqad teq in ayon lotu tiqemiy. Lotu emad in gilikmanib asor ginad giger em yaqay. <sup>18</sup> Sa Yesus in gigerab bolim kazaq gibilan, God zaway bunmo yagan ya Heven-ib teq ogib kab nagah bunmo giwamuzim osaiqta ham. <sup>19</sup> Nazaq iyan ne ya ibin og saw bunmo ad leheq on mataw bunmo gibileniy ham. Gibilenad ne Gimam Iyahta teq in Atatin teq in ago Bugaw Dimunta ginanib ne mataw huz negiy ham. <sup>20</sup> Huz negad ne gamuk bunmo ya tigibilenta na asuleqin negsa in muzin bugiy ham. Ne nazaq on mataw giqemsa in yaqgo disaipel

iyiy ham. Ne huritiy ham. Ya kam bunmo  
ne nenaq ossa le og ka ago kam abebtanta  
na tiqiyaq ham.

**Mak**  
**o**  
**Yesus awagamun Mak mar**  
**tonta**  
**Gamuk ameb lehaqta**

Mak in on mataw Yesus ago nan huritad uliq ayahta Rom-ub osiyta na ginadin emad in Yesus awagamun dimunta ka mar tonta. Mataw na Yesus abin in giholib ussa in afaqan kabemmo sor yaqayta. Sa Mak in on mataw na gigem zaway ugid in giwaz meqniyeq ginadnad a hi em daqay haqad in gimen Yesus awagamun ka mar ton.

Mak in aposelaraq a haiqta teq in Pita inaq luwsa Pita in Yesus awagamun on mataw gibilensa Mak tuhurit kamta. Hurit kemim in gamuk Pita aqezab wamta naqmo in ago wagam kab mar tonan usaqta.

Teq nagah ayah diqta Mak i giqisihunta na in kazaq. God in atatin Yesus-mo atowun emeq ago Bugaw Dimunta amalib balaw tonid in Amam ago on mataw bunmo gigo king iyeq osdaq haqad in eman bolta. Bolim in ago zaway inaqta iyim in on mataw gamuk awaz meqinta gibile-nad teq in gigo bugaw meqinta gimuzad gigo moq kabemmo giwastitayta, mataw in anan helmo haq daqay haqad. Teq on mataw kabemmo Yesus anan ginad a hi em hasim in anan gigem meqniysa bay-muziyta. Na ezaqgo God anad am, Yesus in on mataw kabemmo giyon ahol nog huloseq ta giwaqeq teq in king ago ban ulilibta na waqeq tuqos woqdaq ham.

Wagam ka abitanib (16.9) ni lainaraq kazaq hureqan ussa ahol waqdaq. Mataw asor in Mak 16.9-20 na anan bilaqay, Mataraq in Mak ago wagam ka eman hiqiyta haqayta.

**Yesus in God ago maror**  
**alulin on mataw gibilennan**  
**haqad bolta**

*Jon mataw huz negyaqta na in on mataw gamuk gibilenyayq*  
(Matyu 3.1-12; Luk 3.1-9, 15-17; Jon 1.19-28)

<sup>1</sup>Mar ka in Yesus Kraiss God atatin awagamun dimunta usaqta. <sup>2</sup>Teq wagam ka alulin in kwaziqmo God ago nantut Aisaya gamuk mar tonta nazaqmo tugwahtimta. Gamuk na bilam,

Ahol waqiy ham. Ya teq mataraq emid in yaqgo gamuk ad danmeb lehdaq ham. Leheq in ninmen dan tuwastitaydaq ham. *Malakay*  
3.1

<sup>3</sup>Mat na aqez saw amatawun haiqtab lileyim bilaqay. Ne Iyahta ayon dan balaw toniy haqay ham. Ad ne in ayon dante na wastitayid titnonan haqay ham. *Aisaya 40.3*

<sup>4</sup>An abeb Aisaya mat anan bilamta na amatin gwahtiqim saw amatawun haiqtab osad in on mataw tuhuz negyaq. In anan Jon haqayta. Ad in kazaq mataw gibilenyayq. Ne ginad buliyeq ne gigo daq teq ginad meqinta bunmo gileh ugiy haqayq. Gileh ugad ne bolsa ya huz negiq haqayq. Ne nazaq emsa teq God in ne gigo daq teq ginad meqinta na tigiwalem bugdaq haqayq. <sup>5</sup>Haqsa mataw saw Judiya-ibta teq uliq Jerusalem-ubta kabemmo in Jon ago gamuk huritnan agerab tubol yaqay. Bolad in gigo daq teq ginad meqinta ulum hassa Jon giqad le yuw Jodan-ib tighuz negyaq.

<sup>6</sup>Jon ago tubusan karuw anan kamel haqayta na asan ulim emiyta. Teq in karuw asan asor am gan nog ahulib am wazeq luwyaqta. Luwad in kasum teq garanab kubi q akokin neqad luwyaqta.

<sup>7</sup>Ad in mataw kazaq gibilenyayq. Mataraq teq ya ibeb boldaqta na abin in ya ibin uriyamta haqayq. Ya in ahaqenibta haqayq. In yaqgo Iyahta haqayq. Ya in ago kabibiy mat samanta haqayq. <sup>8</sup>Ya ne yuwibmo huz negaiqta haqayq. Ari mat ayahta na boleq teq in God ago Bugaw Dimunta amalib ne tuhuz negdaq haqayq.

*Jon Yesus huz ug*

(Matyu 3.13-17; Luk 3.21-22)

<sup>9</sup>Kam nab Yesus uliq Nasaret saw Galiliy-ibta hulosis bolan Jon yuw Jodan-ib in tuhuz ug. <sup>10</sup>Huz ugan Yesus hidmo yuw hulosis dubub gwaladmo ame ulilib gwalehim kait misireq nog iyim aqez hasim ussa in ahol wam. Ahol waqsa God ago Bugaw Dimunta ah husta nog iyim in amalib tige-hitim.

<sup>11</sup>Kehitiqan Heven-ib God aqez bilam, Ni ya itatin ham. Ya ni ninan inad bilaqsa ya igem dimun diq iyaqta ham.

*Satan Yesus ulum wam*

(Matyu 4.1-11; Luk 4.1-13)

<sup>12</sup>Ari God ago Bugaw Dimunta in Yesus eman sawaraq amatawun haiqtab tilah. <sup>13</sup>Lehim saw nab in kam 40 nazaqmo didaq haiqmo os. Ossa Satan gwahtiqim Yesus daqaraq meqinta emdaq haqad tuqulum waqayq. Saw nab Yesus amomo karuw kwasikta nenaq osyaq. Ossamo angelo bolim in tuqulumsih yaqay.

*Yesus saw Galiliy-ib ago kabiy alulin am*  
(Matyu 4.12-17; Luk 4.14-15)

<sup>14</sup>Ari mataw in Jon wazim bit giqirquran osaytab eman ossa teq abeb Yesus saw

Galiliy-ib gwahtiğim God ago gamuk dimunta on mataw tigibilenyaq. <sup>15</sup> In bilaqyaq, God kwaziqmo kam anan bilam teq gwahtiğdağ hamta na muran tugwahtim haqyaq. Gwahtiğan God ago maror bolim sinsin tiqiy haqyaq. Ne ginad buliyad gigo dağ meqinta gileh ugiy haqyaq. Ad ne God ago gamuk dimunta ka anan helmo haqiy haqyaq.

*Yesus mataw aweweqmo gililewunan in muzim inaq lehiy*

*(Matyu 4.18-22; Luk 5.1-11)*

<sup>16</sup> Ari Yesus yuw-kurorğan Galiliy aqu-rumnib lehad luwim in Saimon amikğan Andru inaq dob hunegim nabiğ wağad luwsa tigibiy. In giger kabiy naqmo em yaqayta amatawun.

<sup>17</sup> Yesus mataw giger na gibiyad gibilan, Ne ya imuzeq boliy ham. Bolsa ya giğishunid ne nabiğ waqayta nazaqmo teq ne mataw tigiwağ dağay ham. <sup>18</sup> Hağan hidmo giger na dob hulosan ussa in Yesus muzim inaq tilehiy.

<sup>19</sup> Yesus in giger na nenaq asitmo ta leh nog iyimmo in Sebediy atatziz giger Jems ama Jon inaq tigibiy. In nazaqmo muyib osad dob wastitayad osiy. <sup>20</sup> Ossa Yesus giger na gililewunan in gimam Sebediy ago kabibiy mataw nenaq gihulosan muyib ossa in Yesus muzim inaq tilehiymo.

*Yesus mat araq aholib bugaw meqinta muz*

*(Luk 4.31-37)*

<sup>21</sup> Ari Yesus mataw na nenaq le uliğ Kapaneam-ub tugwahtiğiy. Gwahtiğim Juda gigo lotu akamnib Yesus le Juda gigo bit humab wolaytab gwahtiğim mataw suleq negad tuğosyaq. <sup>22</sup> Suleq negsa mataw huritad gihol turuh nem yaqay. Na ezaqgo Yesus ago gamuk in mataw Moses ago gunun hurit kemiyta na gigo gamuk nog a hi iyyaq. In ago gamuk bilaqne God inmo abin ugan in suleq bilaqayta nazaq nog iyyaq.

<sup>23-24</sup> Samo mat araq ago bugaw meqinta inaqta bolim bit na aduganib gwahtiğim in lileyim bilam, Yesus Nasaret-ibta ham, ni i ezağ gitonnan bol? ham. Ni i gimeqin tonnan dağay ni bolya ham. Ya ningo tuhurit ham. Ni God ago mat tawon diğta naqmo ham. <sup>25</sup> Hağsa Yesus wadim bulon, Ni niqez hiqiy ham. Bugaw meqinta ni mat na hulosağ gwahtiğeq leh ham.

<sup>26</sup> Hağan bugaw meqinta na in mat na eman woqim abensen hunegsa bugaw na ek tonim gwahtiğimmo tituk. <sup>27</sup> Tukanmo mataw bunmo dağ na ahol wağad ginadnad emad teq in an bulon yaqay, I kwaziqmo nagah araq kazağta ahol a hi wawta haq yaqay. Ka naga dağin diğ? haq yaqay. Ka suleq muturta ago azawayin

inaqta haq yaqay. Mat ko bugaw meqinta gamukmo gibilensa in aqez huritayta haq yaqay. <sup>28</sup> Nazağ iyan mataw kabemmo in Yesus dağ amta na abin eman saw Galiliy-ib uliğ bunmo tuhuritiy.

*Yesus Pita alen aqawun wastitayan dimniy*

*(Matyu 8.14-15; Luk 4.38-39)*

<sup>29</sup> Ari Yesus bit na hulosağ in Jems ama Jon inaq giwağim nenağ Saimon ama Andru inaq gigo bitab tilehiy. <sup>30</sup> Lehanmo mataw bit nabta Yesus buloniy, Saimon alen moğ ayahta wağim asan afanfan iyad nawa banab usağ haqiy. <sup>31</sup> Hağan Yesus aw na agerab lehim abenab wazim wazan tiğeram. Erağim in asan afan iyim usta na tuhulos ug. Hulos uganmo in era lehim Yesus ago mataw na nenağ gimen didağ anaran usta na wağim a bolim tinag.

*Yesus on mataw gigo moğ inaqta kabemmo giwastitayan dimniyiy*

*(Matyu 8.16-17; Luk 4.40-41)*

<sup>32-33</sup> Ari teq zeq wolehsa imisor diğ tiqiy an on mataw uliğ nabta na bunmo Yesus ago hib bolad teq in giyogniz asor gigo moğ inaqta na teq asor giholib bugaw meqinta usağta na in giwağim nenağ boliy. Bolim in Yesus bit osağta na aqezab humab wolim turiy. <sup>34</sup> Tursa Yesus nazağ gibiyad in mataw giholib moğ amo amo usta na giwastitayad in gigo bugaw meqinta na gimuzan titukiy. Bugaw meqinta na in Yesus ahol alulin in God atatin na ago tuhuritiyta. Nazağ iyan Yesus ginadad gimuzad gibilenyaq. Ne giqezmo hiqiyeq lehiy haqyaq.

*Yesus uliğ asorib le luwad ago kabiy emyay*

*(Luk 4.42-44)*

<sup>35</sup> Ari Yesus usim tarom asor ussamo in bit na hulosağ saw araq amatawun haiğtab tilah. Lehim in amomo God inaq gamuk emad tuğos. <sup>36</sup> Ossa teq Saimon ayogniz nenağ Yesus nagunim tilehiy. <sup>37</sup> Lehim ahol wağad teq in buloniy, Mataw kabemmo ninagunad luway haqiy. <sup>38</sup> Hağan Yesus bilam, Nab iysa i uliğ sinsin sinsin usayta kogabmo lehuğ ham. Leheq ya God ago gamuk in tigi-bilendaqmo ham. God ya iqeman ya kabiy naqmo emnan bolta ham. <sup>39</sup> Hağad in saw Galiliy ago uliğ bunmo tilehyaq. Lehad in mataw gigo bit humab wolaytab gwahtiğeq gamuk dimunta gibilenad teq in mataw gigo bugaw meqinta tigi muzyaq.

*Yesus mat araq ago moğ lepra inaqta wastitayan dimniy*

*(Matyu 8.1-4; Luk 5.12-16)*

<sup>40</sup> Ari Yesus dağ nazağ emad luwsa mat araq aholib moğ lepra inaqta in agerab

tubol. Bolim in Yesus anognib abakbakan ulum laquwim turad kuh tonim in anad meqniysa bulon, Yesus ham ni ninad bilaqsa teq ni ya iwastitayid ya God ameb isan anumlan ka tihiqiydaq ham. <sup>41</sup> Haqan Yesus anad meqniysa in aben itiwunim mat na wazad bulon, Ya inad bilaqsaq ham. Ni nisanib ninumlan usaqta na hiqiyhan ham. <sup>42</sup> Haqan muran diq nawaqmo mat na ago moq lepra tihiqiy. <sup>43</sup> Hiqiyhan Yesus mat na eman lehsa in adek wazim bulon, <sup>44</sup> Ni hurit ham. Daq muran kawa ya niholib emta ka ni mat araq hikidik bulon ham. Ni leheq mat tamaz emaqta naqmo nihol isihun ham. Ad Moses bilamta nazaqmo ni nihol dimniyta na anawun em ham. Emid teq mataw in ningo moq tihiqiyta na ago tuhurit daqay ham. <sup>45</sup> Teq haiq. Mat na lehim nagah bunmo in aholib gwahtimta na in mataw haresmo tigibilan. Nazaq iyan Yesus uliq-uliqgo lehad mataw gimeb a ta hi gwahtiqyaq, luweq ya in gimeb luwsa in bo ya iqisih net daqay haqad. Nazaq haqad in le saw amatawun haiqta nagab luw oсыaqta. Ossa on mataw uliq saw bunmo in saw nabmo leheq Yesus ahol waq yaqayta.

## 2

*Yesus mat araq abensen aditin moq bugta wastitayan dimniy*  
(Matyu 9.1-8; Luk 5.17-26)

<sup>1</sup> Ari kam asor le tihiqiyhan Yesus uliq Kapaneam-ub a ta lah. Lehim ossa mataw Yesus bolim bitab oсыaqta na ago tuhuritiy. <sup>2</sup> Huritim mataw kabemmo bolim bit nab humab wolan ban tihiqiy bug. Bit aqezab nazaqmo ban haiq tiqiyimo. Na matawmo osan lah. Sa Yesus gamuk dimunta tigi-bilenyaq. <sup>3</sup> Gibilenad ossa mataw awewe-qmo in mat araq moqtaqta banab emim sorim a boliy. Mat na abensen aditin moqan in asit a hi luwyaqta. <sup>4</sup> Ari in mat na a bolan bit nab mataw ban tuwaq bugan in ad Yesus agerab loggo dan haiq. Nazaq iyan in bit ahuqunib gwalehim Yesus oсыaq diqta nab in asor tihikneriy. Hiknerim in mat moqtaqta na abanan inaqmo am emim Yesus oсыaqta nabmo eman tuwolah. <sup>5</sup> Wolehan Yesus mataw na ginad helta ahol waqadmo in mat moqtaqta na tubulon, Yaggo amun ham ya ningo daq meqinta tigiwalem bug ham.

<sup>6</sup> Haqan mataw Moses ago gunun hurit kemiyta na asor Yesus agerab osad in ginadibmo susumunim bilaqiy, <sup>7</sup> Nagaqgo mat ka God ago ban waq nog iyim kazaq God bilawunaq? haqiy. Og kab mat araq mataw gigo daq meqinta walemdaqta haiqgam haqiy. Naqmo God amulikmo-qmo ago kabiyta haqiy. <sup>8</sup> Mataw na nazaq

ginadib susumunsa Yesus giloyin kemim gibilan, Doq tonnan ne ginad haresmo nazaq emay? ham. <sup>9</sup> Ya naga gamukin bilaqid teq ne nan a hi yag daqay? ham. “Ya ningo daq meqinta tigiwalem” haqdaiq o “Ni eraqeq ningo ban waqeq a leh” haqdaiq? ham. <sup>10</sup> Teq Mat Atatin in og kab daq meqinta walemgo azawayin aholib usaqta na ago ne hurit daqay haqad ya kazaq diq bilaqdaiq ham. Haqad in mat abensen moqan banab usaqta na tubulon, <sup>11</sup> Ya nibile-naiq ham. Ni eraqeq ningo us ban waqeq ad ningo bitab a leh ham. <sup>12</sup> Haqanmo mat na eraqim mataw na gimeb ago ban sorim ad ago bitab tilah. A lehsa mataw bunmo gihol ritensa in God abin iluwad bilaq yaqay, I nagah kazaqta kwaziqmo ahol a hi wawta haq yaqay.

*Yesus Liway bulonan in muzim inaq lah*  
(Matyu 9.9-13; Luk 5.27-32)

<sup>13</sup> Ari Yesus yuw-kurorqan Galiliy aqurumnib a ta lehan mataw kabemmo in agerab tuboliy. Bolan Yesus in God ago suleq tigi-bilenyaq. <sup>14</sup> Gibilenad osim teq in era lehad luwim in Alfiyus atatin Liway ahol tuwam. Mat na takis abitnib ago kabiy takis waqad ossa Yesus ahol waqad tubulon, Ni ya imuzeq hol ham. Haqanmo Liway eraqim Yesus muzim inaq tilah.

<sup>15</sup> Ari abeb Yesus in Liway ago bitab didaq neqad tuqos. Ossa mataw givin meqinta takis waqayta teq mataw daq meqinta emayta nenaq kabemmo bolim Yesus ago disaipel nenaq bit nab didaq neqad tuqosiymo. Mataw naqanta kabemmo Yesus muzinad inaq luw yaqayta. <sup>16</sup> In bunmo nazaq Yesus inaq didaq neqad ossa Farisi asor gibiyad osim in Yesus ago disaipel tigi-bileniy, Nagaqgo Yesus in mataw daq meqin emayta ko teq mataw takis waqayta ko nenaq didaq neqaq? haqiy. <sup>17</sup> Haqsa Yesus huritim gibilan, Mataw gigo moq haiqta na in le dokta ahol a hi waqayta ham. Mataw gigo moq inaqta naqmo dokta ago hib lehayta ham. Ya on mataw titnonta gililewunnan a hi bol ham. Ya on mataw daq meqinta emad oсыayta naqmo gililewunnan bolta ham.

*Mataw didaq udinayta na ago Yesus bilam*

(Matyu 9.14-17; Luk 5.33-39)

<sup>18</sup> Ari Jon mataw huz negyaqta na ago disaipel teq Farisi nenaq in tuteqmo didaq udin yaqayta. Nazaq iyan mataw asor bolim Yesus buloniy, Ezaqgo Jon ago disaipel na teq Farisi gigo disaipel na in udinsa ta ningo disaipel a hi udinayta? haqiy. <sup>19</sup> Haqan Yesus gamuk awowun araq kazaq gibilan, Mat araq aw waqnan tonsa in ayogniz boleq inaq osad in ginad meqniysa didaq udin daqay ye? ham. Haiqgam ham.

Mataw na giyow inaq osad iyan in didaq a hi udin daqay ham. <sup>20</sup> Ari abeb mataw asor boleq mat aw waqaqta na ayogniz gibenab tuwaq daqay ham. Kam na teq boldaqta ham. Bolid kam nab teq mat na ayogniz didaq tuqudin daqayta ham.

<sup>21</sup> Haqad in bilam, Mataw tubusan murta waqim amalib tubusan kwaziqta misiramta na inaq a hi initayta ham. In nazaq toneq abeb in tubusan kwaziqta na suholsa tubusan murta na irnik toneq le amik iyadmo in tubusan kwaziqta na bulsireqid ayahmo diq a ta tartaydaq ham.

<sup>22</sup> Teq mataw wain ayun murta memeq asan kwaziqtab a hi tenayta ham. In nazaq tonid wain aqurin gwalad huhuw nemsamemeq asan kwaziqta na tartayid wain ayun mutbaleq ogib woqsa memeq asan na timeqniydaqmo ham. Nazaq iyan mataw memeq asan muturtamo waqim wain ayun murta tenayta ham.

*Mataw Juda gigo lotu akamnib kabiy a hi emayta na ago Yesus bilam*

*(Matyu 12.1-8; Luk 6.1-5)*

<sup>23</sup> Ari teq Juda gigo lotu akaman araqab Yesus ago disaipel nenaq kabiy araq wit leiyta aduganib gwahtiqim tileh yaqay. Lehad in ago disaipel gigem moqsa wit anagin asor tuguraq yaqay. <sup>24</sup> Guraqsa Farisi asor gibiyad in Yesus buloniy, Ni ko gibiy haqiy. Nagaqgo in lotu akaman ago gunun itiyonim kabiyab wit tuguraqay? haqiy.

<sup>25</sup> Haqan Yesus gibilan, Nabag ne Devit ago dauh nenaq in nagah osgo siqim iyim gigemnan moqad teq Devit daq amta na awagamun ne ahol a hi waqiy-ya ham. <sup>26</sup> Tamaz mat danmebta Abiyatar akamnib Devit le God ago bit aduganib gwahtiqim God ameb bret eman usta na waqim tinam ham. Bret na gunun emiyta ham. Mataw tamaz emayta naqmo gimomo bret na neqayta ham. Teq haiq ham. Devit agem moq titaysa neqad in bret tawonta na asor in ayogniz negan tineqiyimo ham. Ta teq in daq meqinta a hi emiy ham.

<sup>27</sup> Haqad in gibilan, God mataw gimeqin tonnan lotu akaman eman a hi gwahtim ham. Haiq ham. In mataw gidimun tonnan haqad lotu akaman eman gwahtimta ham. <sup>28</sup> Nazaq iyan Mat Atatin in lotu akaman anamrenmo diq iyim inmo mataw kam nab ezaq luw os daqayta na ago tigibilen-daqta ham.

### 3

*Juda gigo lotu akamnib Yesus mat araq aben meqinta wastitayan dimniy*

*(Matyu 12.9-14; Luk 6.6-11)*

<sup>1</sup> Ari kam araqab Yesus in Juda gigo bit humab wolaytab tilah. Lehan mat

araq aben akogan anedan mayim adit-inmo usaqta in nab os. <sup>2</sup> Ossa Yesus ago bab in Yesus wamuzim nab osiyimo, Yesus i gigo lotu akaman kab mat ka wastitayid dimniyid i amalib nan emam haqad. <sup>3</sup> Haqsa Yesus mat aben meqinta na tubulon, Ni boleq mataw ka gimeb tur ham. <sup>4</sup> Haqad in mataw na tisusumun nag, I Juda gigo maror ezaq usaqta? ham. Lotu akamnib i mataw gidimun tonamta o i gimeqin tonamta? ham. Kam na i mat moqaqta ulumsihamta akaman o i mat na aholib hiqiyid in moqdaqta akaman? ham. Haqan mataw na qiwezmo hiqiyim osiy.

<sup>5</sup> Ossa Yesus in mataw na bunmo ginad ahol waqim le bolsa in ginad soqotim us. Ussa Yesus ahol afaqan diq iyad in mataw na ginan agem timeqniy. Agem meqniysa in mat na bulon, Ni niben itiwun ham. Haqan mat na aben itiwunan aben akogan na tidimniy. <sup>6</sup> Dimniyan Farisi na hidmo lehim in Herot ago dauh nenaq humab wolim osad in ezaq toneq Yesus wol emid moqdaqta na agamukan tibilaq yaqay.

### **Yesus in asenlul ago zaway giqisihunsa teq in anan helmo a hi haqiy**

*On mataw kabemmo yuw-kurorqan Galiliy aqurumnib humab woliy*

*(Luk 6.17-19)*

<sup>7</sup> Ari Yesus ago disaipel nenaq yuw-kurorqan Galiliy-ib tilehiy. Lehsa mataw kabemmo Yesus muzim inaq tilehiyimo. <sup>8</sup> Sa mataw saw Galiliy-ibta teq saw Judiya-ibta teq uliq Jerusalem-ubta teq saw Idumea-ibta teq mataw kabemmo yuw Jordan aqurumnibta teq uliq giger Tair teq Saidon-ibta nagan kameqmo diq in kabiy daq bunmo Yesus emyaqta na abin huritim in agerab tuboliyimo. <sup>9</sup> Bolan Yesus in ago disaipel gibilan, Ne yaqmen muy araq ahol waqid teq usan ham. Luweq mataw ka ya iqisih daqay ham. <sup>10</sup> Na ezaqgo Yesus in mataw kabemmo gigo moq tuwastitayan iyan biyahta na gigo asor gigo moq inaq na bunmo in agerabmo diq loq yaqay, i Yesus wazeq teq gihol tidimniydaq haqad. <sup>11</sup> Sa mataw gigo bugaw meqinta inaq na in Yesus ahol waqadmo in anognib woqeq usad lileyeq bilaq yaqay, Ni God atatin haq yaqay. <sup>12</sup> Haqsa in bugaw meqinta na atoran diqmo gibileneq bilaqyaq, Ne ya ihol abin na ulalab hi bilaqiy haqyaq.

*Yesus Aposel 12 na gitowun am*

*(Matyu 10.1-4; Luk 6.12-16)*

<sup>13</sup> Ari kam araqab Yesus garah araqab tugwalah. Gwalehim in mataw asor in ginan anad bilaqaqta naqmo gibilenan agerab tuboliy. <sup>14-15</sup> Bolan in mataw 12 nazaq gitowun emim ginan Aposel haqad

tibiy. In anad mataw na in inaq ossa teq in giqemid in uliq-uliqgo lehad inmo ahol abinib ago gamuk dimunta na gibilenad teq in bugaw meqinta gimuz daqay haqad in anad am.

<sup>16</sup> Ari in mataw 12 giwamta na ginan kazaq: Saimon, Yesus anan araq Pita haqad biyim ugta. <sup>17</sup> Teq Sebediy atatniz Jems ama Jon inaq. Yesus in maqbab giger na ginan araq Bowanerges haqad biyta. Nan Bowanerges na alulin mat ago daq atoranta kait ahulan iyaq nazaq nogta haqayta. <sup>18-19</sup> Teq Andru teq Filip teq Bartolomyu teq Matyu teq Tomas teq Alfiyus atatin Jems teq Tadiyus teq Saimon, mat Rom nenaq bab emyaqta amatin na teq Judas uliq Kariyot-ibta na. Mat naqmo Yesus waqim bab gibenab amta.

*Mataw asor bilaqiy, Yesus bugaw meqinta Belsebul inaq kabiy emaqta haqiy (Matyu 12.22-32; Luk 11.14-23; 12.10)*

<sup>20</sup> Ari Yesus bitab tilah. Lehan mataw in ahol waqnan haqad lehim bit nab humab a ta woliy. Humab wolim ossa Yesus ago disaipel nenaq in gikabiyan kabemmo emad didaq neqgo akaman haiq iy yaqay.

<sup>21</sup> Sa Yesus asenlul huritit in Yesus waqnan haqad tuboliy, i gigo amun ahol agadan tiqiy daqag haqad.

<sup>22</sup> Sa mataw Moses ago gunun hurit kemiya na asor Jerusalem-ub osim gewoqim osad teq in bilaqiy, Bugaw meqinta gigo amebta Belsebul in Yesus aholib usaq haqiy. Ussa Yesus in Belsebul ago zaway amalib bugaw meqinta gimuzaqta haqiy. <sup>23</sup> Haqan Yesus in mataw aseseqta na gibilenan agerab bolan in gamuk awowun araq kazaq gibilan, Ezaq teq Satan inmo ago dauhta tigmuzdaq? ham. <sup>24</sup> Kantri araq ago on mataw gihol husereq an gihar ugad an wolad osad in zaway iyeq a hi tur daqay ham. <sup>25</sup> Teq bit araqab on mataw gihol husereq an gihar ugad an wolad osad in zaway iyeq a hi tur daqaymo ham. <sup>26</sup> Ad nazaqmo Satan ago dauh nenaq gihol huserad an geg ugad Satan zaway iyeq a hi turdaq ham. In tihiqiydaq ham.

<sup>27</sup> Haqad in bilam, Mat araq in mat awaz meqinta ago bit aduganib samanmo gwah-tiqeq ago nagah a hi ginuwdaq ham. Haiq ham. In mat awaz meqinta na abensen irqureq teq in mat na ago bit aduganib gwah-tiqeq ago nagah tiginuwdaq ham.

<sup>28</sup> Ya helmo ne gibilenaiq ham. God in on mataw gigo daq meqinta teq in bilawunayta na bunmo tigiwalem bugdaq ham. <sup>29</sup> Ari on mataw God ago Bugaw Dimunta bilawunid God in gigo daq meqinta na a hi walemdaq ham. Haiq ham. Daq meqinta

na in giholib tuqos tutdaq ham. <sup>30</sup> Na ezaqgo mataw aseseqta na Yesus anan bilaqiy, In aholib bugaw meqinta usaq haqiyta na ago Yesus nazaq gibilan.

*Yesus anenan teq amagniz na gingan? (Matyu 12.46-50; Luk 8.19-21)*

<sup>31</sup> Ari kam nab Yesus anen teq in amagniz bolim asanib turad in Yesus ayon nan eman tilah, in gigerab boldaq haqad. <sup>32</sup> Teq mataw kabemmo Yesus lilut ugim osiy. Osad in Yesus buloniy, Ni ko gibiy haqiy. Ni ninen teq ni nimagniz bolim asanib kowa turad in ni ninan saw waqay haqiy. <sup>33</sup> Haqan Yesus amenin emim gibilan, Ya inen teq ya imagniz gingan diq? ham. <sup>34</sup> Haqad in on mataw lilut ugim osiyta na gibiyim le bolim bilam, Ne ahol waqiy ham. Ya inen teq ya imagniz kawa osay ham. <sup>35</sup> Mat aw nog in God anad muzad ago kabiy emayta naqmo in ya ima teq in ya ihiy teq in ya inen ham.

## 4

*Mat araq kabiyab wit anagin hunagta ago gamuk awowun (Matyu 13.1-9; Luk 8.4-8)*

<sup>1</sup> Ari kam araqab Yesus yuw-kurorqan Galiliy aqurumnib mataw suleq a ta gibilenyaq. Gibilensa mataw kabemmo bolim Yesus agerabmo diq loqsa iyan in giban emim muy araqab gwalim yuwmeb tuqos. Ossa mataw bunmo yuw aqurumnib osiy. <sup>2</sup> Ossa Yesus suleq kabemmo negad gamuk amo amo tigibilenyaq. Gibilenad in kazaq bilam,

<sup>3</sup> Ne huritiy ham. Mat araq ago kabiyab wit anagin hunegnan tilah ham. <sup>4</sup> In lehim wit anagin hunegad luwsa asor dan adekib woqan ah bolim tineqiy ham. <sup>5</sup> Teq wit anagin asor saw agigin inaqtab og asitmo usaqta nab wom ham. Woqim og ayah diq haiqqam iyan wit hidmo tugwal ham. <sup>6</sup> An zeq gwalim oysa wit na aninin haiqqam iyan in mayim tumom ham. <sup>7</sup> Teq wit anagin asor am asasuqin inaqta aduganib wom ham. Woqan am asasuqin inaqta na gwalad isihan wit na anon a hi am ham. <sup>8</sup> Teq wit anagin asor og dimuntab woqim ahokan gwalim anon tiqam ham. Wit anagin na asor anon 30 nazaq giqam ham. Sa asor anon 60 nazaq giqam ham. Teq asor anon kabemmo diq 100 nazaq giqam ham. <sup>9</sup> Haqad Yesus gibilan, Mat aw nog in gidek nan huritgo usaqta na in gamuk ka hurit kemiy ham.

*Yesus anad ezaq emad gamuk awowunmo on mataw gibilenyaq (Matyu 13.10-17; Luk 8.9-10)*

<sup>10</sup> Abeb mataw biyahta na haresmo tilehsa Yesus ago disaipel 12 na teq mataw



asor nenaq in Yesus lilut ugim osad gamuk awowun in bilaqyaqta nagan ago tisu-  
sumun ugiy. <sup>11</sup> Susumun ugan in gibilan,  
Negmo God ago maror aduganib osayta  
ham. Nazaq iyan ya God ago maror abe  
alulin ulilemim usaqta na bilaqsa ne hu-  
ritayta ham. Teq mataw God ago maror  
asan ban osayta na ya gamuk awowunmo  
amalib gibilenaiqta ham. Ya nazaq gitonsa,  
<sup>12</sup> Mataw na gime saw waqad teq in na-  
gah arağ ahol a hi waqayta ham.  
In gamuk huritad teq in ginad a hi  
em hasayta ham. Luweq in ginad  
em hasad ginad buliyid God in gigo  
daq meqinta na tigiwalem nag ham.  
*Aisaya 6.9-10*

*Mat kabiyab wit anagin hunagta na ago  
alulin*

*(Matyu 13.18-23; Luk 8.11-15)*

<sup>13</sup> Haqad Yesus gibilan, Ne gamuk  
awowun ka ago ginad a hi em hasay ye?  
ham. Ne gamuk awowun ka alulin ginad  
em haseq teq ne yaqgo gamuk awowun  
bunmo ago ginad tiqem has daqaymo ham.

<sup>14</sup> Ari ne huritiy ham. Wit anagin na in  
God ago gamukmo ham. <sup>15</sup> Sa mataw asor  
in wit anagin dan adekib woqayta na nog  
ham. In God ago gamuk huritiyta nabmo  
Satan bolim God gamuk dimunta mataw na  
gigemab layta na ta walemaqta ham.

<sup>16</sup> Teq mataw asor in wit anagin og agigin  
inaqtab woqayta na nog ham. In God  
ago gamuk huritim in ginad bilaqsa hidmo  
waqayta ham. <sup>17</sup> Teq mataw na in bilaqne  
wit aninin haiqta nog ham. In God ago  
gamuk na gigemabmo diq a hi wazad in  
muzinad sisaqmo a hi luwayta ham. Na  
ezaqgo in God muzayta na ago mataw in  
gimeqin tonad afaqan amo amo negsa in  
God hulodayta ham.

<sup>18</sup> Teq mataw asor in wit anagin am  
asasuqin inaqta amuganib woqayta na nog  
ham. Mataw na God ago gamuk huritayta  
ham. <sup>19</sup> Teq in og ka ago nagah kabemmo  
anadin emsa mani-mo kat negad ginad  
hureqsa in nagah kabemmo diq utetayta  
ham. Ginad meqinta na ginadib bolad in  
God ago gamuk isihagta ham. Isihsa iyan  
gamuk na in gigemab anon a hi emaqta  
ham.

<sup>20</sup> Teq mataw asor in wit anagin og  
dimuntab woqayta na nog ham. In God ago  
gamuk huritim in waqim wazayta ham. An  
gamuk na in gigemab anon emaqta ham.  
Mataw na asor gigemab God ago gamuk  
anon 30 nazaq giqemaqta ham. Sa mataw  
asor gigemab God ago gamuk anon 60  
nazaq giqemaqta ham. Teq mataw na asor  
gigemab God ago gamuk anon kabemmo  
diq 100 nazaq giqemaqta ham.

*Mataw lam miderim kuramab a hi si-  
henayta*

*(Luk 8.16-18)*

<sup>21</sup> Ari teq Yesus bilam, Mataw lam  
miderim kuramab a hi sihenayta ham. Ad  
in ban ahaqenib a hi emaytamo ham. In  
lam miderim ulilib othenan oyad usaqta  
ham. <sup>22</sup> Nazaq iyan nagah bunmo ulilemim  
usaqta na in teq ulal tiqiydaq ham. Teq  
nagah bunmo giqisihan usaqta na in teq  
saw anuwaniib tugwahtiqaq ham. <sup>23</sup> Mat  
aw nog in gidek inaq iyeq teq in gamuk ka  
huriteq ginad emiy ham.

<sup>24</sup> Haqad Yesus gibilan, Gamuk ne hu-  
ritayta ka ago ne ginad em hasiy ham.  
Mat God ago gamuk huritad anad a hi em  
hasaqta na, God in mat naqanta anad emid  
a hi hastitaydaq ham. Ari mat God ago  
gamuk huritim anad em hasaqta na, God  
in mat naqanta anad emid ayahmo diq  
tihasitaydaq ham. <sup>25</sup> Na ezaqgo God in  
on mataw gigo nagah inaqta na bunmo  
nagah asor a ta negdaq ham. Ad in mataw  
ginaghan haiqta na gibenab nagah asitmo  
wazayta na tigiwalem bugdaq ham.

*Didaq ahokan gwalaqta ago gamuk  
awowun*

<sup>26</sup> Haqad Yesus gamuk awowun arağ  
kazaq ta bilam, God ago maror in bilaqne  
mat arağ didaq anagin ogib hunegaq nazaq  
nog ham. <sup>27</sup> Mat na taromab usad zeqab in  
luwsa ago didaq gwalim ezaq ayah iyaqta  
na ago in a hi huritaqta ham. <sup>28</sup> Og inmo  
didaq eman kabiyab gwalaqta ham. Dan-  
mab diq ahokan gwalaqta ham. Ahokan  
sisaq iyim in azizorin emaqta ham. Ari  
abeb in anon emaqta ham. <sup>29</sup> Anon na  
gihemeq ussa teq mat na baqir waqeq a  
le tigiqurotdaq ham. Na ezaqgo in didaq  
waqgo akaman tugwahtim ham.

*Ay mastet anagin ago gamuk awowun*

*(Matyu 13.31-32; Luk 13.18-19)*

<sup>30</sup> Haqad Yesus bilam, Ya naga diq  
atowun emeq bilaqid teq ne God ago maror  
anan ginad em daqay? ham. Teq ya naga  
gamukin amalib awowun hulsa ne hurit  
kem daqay? ham. <sup>31</sup> Ari God ago maror  
na in bilaqne ay mastet anagin amulikmo  
nog ham. Mataw ay anagin na kabiyab  
leyan in didaq anagin bunmo giquriyamim  
amik didiq iyim usaqta ham. <sup>32</sup> Teq abeb  
in gwalim ayah iyim in kwasin-kwasan  
kabiyaqta na bunmo giquriyamim turaqta  
ham. In gwalim aben aseseqmo iyan ah  
bolim abenab giririn emim amurnib osayta  
ham.

*Yesus gamuk awowunmo on mataw  
gibilenyaqta*

*(Matyu 13.34-35)*

<sup>33</sup> Ari Yesus in on mataw God ago gamuk gibilenad in gamuk awowun kabemmo amalib nazaqmo gibilenyayta. Gibilenad mataw naga gamukin hurit daqayta na in anad emadmo in gamuk awowun nazaqmo gibilenyayta. <sup>34</sup> Teq in gamuk araƒ diq alulin a hi gibilenyay. Haiqqam. In gamuk awowunmo gibilenyay. Ari in ago disaipelmo nenaq giholbinmo osad teq in gamuk alulin tigibilen kemyayta.

*Yesus bilaƒan tim ayahta kute nam  
(Matyu 8.23-27; Luk 8.22-25)*

<sup>35</sup> Ari kam nabmo imisor Yesus in ago disaipel gibilan, I yuw urumun kozaq ban lehuq ham. <sup>36</sup> Haqan disaipel in mataw biyahta na gihulosadmo in Yesus muy amalib osta nab le gwalim Yesus inaq tilehiy. Lehsa mataw asor gimuyin inaqta na Yesus muzim inaq tilehiymo. <sup>37</sup> Lehsa tim ayahta eraqad yuw eman sortukim muy amuganib woqad ate tugwalnan tonyay. <sup>38</sup> Ari na teko Yesus muy abe ban hartiy qwayim tuqus. Ussamo tim eraqsa ago disaipel bo bulonan in kayeq tiqiy. Kayeq iyan in buloniy, Tisa haqiy, i tumoqnan tonauq haqiy. Ni i ginan ninad a hi meqniyay e? haqiy. <sup>39</sup> Haqan Yesus eraqim tim wadad teq in yuw atoranno bulon, Muleqeq woq ham. Haqanmo tim hiqiysa yuw midemim ahol a ta hi wol. <sup>40</sup> An Yesus in ago disaipel gibilan, Ne nagaqgo kazaq rabay? ham. Ne ezaq tonim God anadin a hi emay? ham. <sup>41</sup> Haqan disaipel rabad in an tubulon yaqay, Mat ka nog diq? haq yaqay. Tim yuw inaq in aqez huritayta haq yaqay.

## 5

*Yesus mat araƒ aholib bugaw meqinta muz*

*(Matyu 8.28-34; Luk 8.26-39)*

<sup>1</sup> Ari Yesus ago disaipel nenaq le yuw urumun kozaq ban tugwahtiƒiy, uliq Gerasa gigo og saw ban. <sup>2</sup> Gwahtiƒim Yesus muy hulosisim itiƒsamo mat araƒ ago bugaw meqinta inaq luwaqta na hodhod hulosisim in agerab tubol. <sup>3-4</sup> Mat na hodhodabmo luw osyaqta. Ossa mataw in wazan yo hiqiy yaqayta. In mat na aben amub am wazan haiq. Ad in sen-ib am wazan haiqmo. Kam kabemmo in abensen sen-ib am waz yaqayta teq in sen na gibultayad hankap asenab usta na wolzilayyaqta. In mat awaz meqin diqta. <sup>5</sup> Sisiririmo zeqab teq taromab in hodhodab teq garahab osad in ek tonad inmo ahol asan gigib qwatayyaqta.

<sup>6</sup> Ari mat na Yesus pesanmo bolsa ahol waqad in sibirim bolim Yesus anognib abakbakan ulum laquwim tur. <sup>7</sup> Turad in

dedibmo lileyim bilam, Yesus ham ni God Ulilibta atatin ham. Ni ya ezaq itonnan bol? ham. Ya God ameb nibilenaƒ ham. Ni santitiy hi yag ham. <sup>8</sup> Na ezaqgo Yesus tekomo tubulon, Bugaw meqin ham ni mat ka hulosaƒ gwahtiƒ ham. <sup>9</sup> Haqad teq in susumun ug, Ni ninan ezaq? ham. Haqan in bilam, Ya inan Kuluwmo ham. Na ezaqgo i mataw kabemmo diq ham. <sup>10</sup> Teq mat na anad awaz meqin amalib ame kabemmo Yesus bulonyay, Ni saw kab bugaw hi gimuz haqyaq.

<sup>11</sup> Haqsa bul gihumaban araƒ ayahta didaq neqad garah amanmanib sinsinmo turiy. <sup>12</sup> Tursa bugaw meqinta nagan ginad meqniysa Yesus buloniy, Ni i giqemid i bul ko gimuganib le woquq haqiy. <sup>13</sup> Haqan Yesus bilam, Lehiy ham. Haqanmo mat aholib bugaw meqinta giqusiya na gwahtiƒim le bul na gimuganib tuwoqiy. Woqanmo bul bunmo sibim wole garah asibsibraniƒ bayhilek tonim yuwmeb woqan yuw gineqanmo tumoq bugiy. Bul na bunmo gigo ginulinƒan 2,000 nazaq.

<sup>14</sup> Ari mataw bul giwamuzim osiya na in daq na ahol waqad titukiy. Tukim lehad uliqab teq saw haresmo in nagah ahol waqiyta na awagamun tibiaƒiy. Bilaqsa on mataw huritim in nagah na ahol waqnan tilehiy. <sup>15</sup> Lehim in Yesus ago hib bolim mat kwaziqmo bugaw meqinta kabemmo amuganib usiya na in ahol tuwaqiy. Mat na anad dimunta waqim tubusan welim ossa in ahol waqad tirabiy. <sup>16</sup> Rabsa mataw gimeb daq ahol waqiyta na in mat kwaziqmo bugaw meqinta aholib usiya na awagamun gibilenad teq in bul ago bilaq toniy. <sup>17</sup> Bilaqan mataw na Yesus abe yahad buloniy, Ni saw ka huloseq leh haqiy.

<sup>18</sup> Haqan Yesus le muyib tugwalsa mat bugaw meqinta aholib usan in gimuzta na in inaqmo lehanan anad bilaqsa in anad awaz meqin amalib Yesus bulonyay, Ya ninaq lehdaƒiy haqyaq. <sup>19</sup> Haqsa Yesus hulosisim. Hulosaƒ in mat na bulon, Ni ningo uliqab nisenlul gigerabmo leh ham. Leheq teq Iyahta daq ayah diqmo em nigta na teq in ni ninan anad meqniya na ni gibilen ham. <sup>20</sup> Haqan mat na saw anan Dekapolis\* haqayta nab lehim uliq bunmo luwad in nagah Yesus inmen amta na tibiaƒiy bugyaq. Sa mataw bunmo huritim gihol turuh nemyaq.

*Yesus aw araƒ ned hunegaqta wastitayim teq in maror araƒ amiƒ tumomta wazan eram*

*(Matyu 9.18-26; Luk 8.40-56)*

\* 5:20: Nan Dekapolis ka alulin in 'Uliq 10' haqayta.

<sup>21</sup> Ari teq Yesus ago disaipel nenaq yuw-kurorqan Galiliy urotim aqurumun kozaq ban ta lehiy. Lehan mataw kabemmo bolim Yesus agerab humab tuwoliy, yuw na aqurumnib. <sup>22</sup> Humab wolim Yesus inaq nab ossa Juda gigo bit humab wolyata ago danmebta araq anan Jairus haqay na bolim Yesus asen agerab ahol hulosan wom. <sup>23</sup> Ahol hulosan woqim usad in anad meqniysa ame kabemmo bulonya, Yaqgo amun aw amikta tumoqnan diq tonaq haqyaq. Ni boleq niben aholib emeq wazid in ahol dimniyeq hi moqan haqyaq. <sup>24</sup> Haqan Yesus in inaq ago bitab tilah.

Lehsa on mataw kabemmo Yesus muzim inaq lehad teq in aholib soqotim diq inaq leh yaqay. <sup>25</sup> Lehsa aw araq moqad sirisiri-moq ned hunegyaqta na in Yesus muzim mataw na nenaq tilehyaqmo. Ulig 12 nazaq moq na aholib usta. <sup>26</sup> Ussa mataw gime inaqta santitiy ayahmo ug yaqayta, in ahol dimniydaq haqad. Teq haiq. Aw na ago mani kabemmo mataw na gigo hib hulosa bugta teq in ago moq na asit a hi hiqiyyaq. Haiqgam. In aholib moq ayahmo diq iyyaq. <sup>27-28</sup> Ari aw na Yesus ahol awagamun huritim in anad tiqam, Ya iben Yesus ago tubusanmo wazeq teq ya ihol tidimniydaq ham. Haqad in bolim mataw biyahta na gilikmanib gwahtiqim nenaq lehad in Yesus abun ban loqimmo aben le in ago tubusan tuwaz. <sup>29</sup> Wazimmo in ago ned muran diq nawaqmo tumay. Mayan aholib moq tihiqiyan in ahol tiloyin. <sup>30</sup> Loyinsa Yesus ago zaway asor tuhulos ugim lahta na ago in ahol tiloyinmo. Nazaq iyan in ahol buliyim bilam, Nog aben yaqgo tubusan waz? ham. <sup>31</sup> Haqan ago disaipel buloniy, Ni mataw kabemmo soqot nigim ninaq lehayta ka a hi gibiyay e? haqiy. Ni nagaqgo susumunim bilam, Nog aben yaqgo tubusan waz ham? haqiy. <sup>32</sup> Haqan teq haiq. Yesus saw waqim le bol, nog diq daq na amta na ago haqad. <sup>33</sup> Sa aw na in nagah aholib gwahtimta na ago anad emad in tirabyaq. Rabad in bolim Yesus anognib abakbakan ulum laquwim turad nagah aholib gwahtimta na in tibilaq bug. <sup>34</sup> Bilaq bugan Yesus bulon, Ya imiy ham ni ya inan helmo hamta naqmo niqeman ni nihol tidimniy ham. Ningo moq tihiqiyan ni le nigem dimniysa os ham.

<sup>35</sup> Ari Yesus gamuk bilaqad nab tursamo Jairus ago bitab mataw asor osim bolim in gigo mat ayahta na danib ahol waqad buloniy, Ningo amun aw tumom haqiy. Nagaqgo i Tisa atuw a ta bulam? haqiy. <sup>36</sup> Haqan Yesus gamuk na ago adek a hi emad in Jairus bulon, Ni hi rab ham. Ni God amomo anan helmo haq ham. <sup>37</sup> Haqad teq in on mataw bunmo giwasihan nab tursa in Pita teq Jems ama Jon inaq naqmo gi-

waqim nenaq tilehiy. <sup>38</sup> Lehim in Jairus ago bitab tugwahtiqiy. Gwahtiqim in mataw ek tonad gaq wazad ossa tigibiy. <sup>39</sup> Gibiyad in lehim gibilan, Ne nagaqgo gaqad saw zunad osay? ham. Amun aw na a hi mom ham. In usaq ham. <sup>40</sup> Haqan on mataw na bunmo in aqez tiyuquwuniy. Yuquwunsa Yesus gimuzan asanib gwahtiqsa in amun anen amam teq inmo ago disaipel ezeqman na giwaqim nenaq bit adugan amun usaqta nab le tugwahtiqiy. <sup>41</sup> Gwahtiqim in amun na aben wazim in Juda gigo nanib bulonim kazaq bilam, *Talita kumi* ham. Na in kazaq bilam, Amun aw amik, ni eraq ham. <sup>42</sup> Haqan hidmo in eraqim tiloq gelyaq. (Amun aw na ayah tiqiy bugim in ago ulig 12 nazaq tiqiyta.) An amun anen amam in nagah na gimeb ahol waqim in gihol turuh nem naqmo diq hiqiy. <sup>43</sup> Sa Yesus atoranmo gibilan, Nagah ka ago ne mat araq hikidik buloniy ham. Haqad in amun didaq ugud neggo gibilan.

## 6

*On mataw uliq Nasaret-ibta Yesus gileh ugiy*

*(Matyu 13.53-58; Luk 4.16-30)*

<sup>1</sup> Ari Yesus uliq na hulosisim inmo ago uliq diq Nasaret-ib lehsa in ago disaipel muzim inaq tilehiy. <sup>2</sup> Lehim Juda gigo lotu akamnib Yesus bit humab wolyatab gwahtiqim in mataw God ago gamuk tigibilenyaq. Gibilensa mataw kabemmo Yesus ago gamuk huritad in gihol turuh nems bilaq yaqay, Mat ko gamuk bilaqta na in edob diq wam? haq yaqay. In anad usaqta ko ezaq diqta in wam? haq yaqay. In ezaq diq tonim anad emsamo nagah gwahtiqaq? haq yaqay. <sup>3</sup> Mat ko in igmo gisenlul araq haq yaqay. In bitmo emaqta amatin araqa haq yaqay. In anen Mariya teq in amagniz Jems teq Josep teq Judas teq Saimon kawa osay haq yaqay. Teq ahiyan kawa i nenaq osauqmo haq yaqay. In nazaq haqad Yesus anan gigem timeqniy yaqay.

<sup>4</sup> Gigem meqniysa Yesus gibilan, Mat God ago nantut bilaqta na abin uliq bunmo usaqta ham. Ari inmo ago uliqab teq in asenlulib teq in ago bitabmo diq in ahol abin haiqta ham.

<sup>5</sup> Nazaq iyan in daq azawayin inaqta araq diq uliq nab a hi emyaq. In mataw gigo moq inaqta naqmo amulik-mulikmo giholib aben emim giwazsa in dimniy yaqay. <sup>6</sup> Teq mataw uliq nabta na in anan helmo a hi haqsa iyan in anadnad emyaq.

**Yesus in ago disaipel ago  
zaway giqisihunsa teq in ago  
a hi hurit kem yaqay**

*Yesus disaipel 12 na kabiy nag  
(Matyu 10.5-15; Luk 9.1-6)*

Ari Yesus saw nab uliq-uliqgo luwad in God ago gamuk on mataw tigibilenyaq. <sup>7</sup> In nazaqmo emad luwim kam nab in ago disaipel 12 na gibilenan boliy. Bolan inmo ahol abinib bugaw meqinta gimuzgo azawayin in negim teq in giqeman giger giger tilehiy. <sup>8</sup> Lehsa in gibilan, Ne lehad es araq waqeq ad hi lehiy ham. Ne katekmo wazeq ulum ugeq a lehiy ham. Teq ne ziy araq es sihengo hi waqiy ham. Ad didaq araq neqgota ad hi lehiymo ham. Teq mani araq ne giholib hi usanmo ham. <sup>9</sup> Ne gigo gisendugan gisenab tiqem daqay ham. Teq ne tubusan gigermo gihol siheneq hi lehiy ham.

<sup>10</sup> Haqad in gibilan, Ne uliq araqab le tugwahtiqeq bitbitmo leheq hi osiy ham. Bit amulikmo ne os daqayta nabmo ne osiy ham. Oseq teq ne era uliq araqab lehiy ham.

<sup>11</sup> Ari ne le uliq araqab gwahtiqid mataw uliq nabta na in ne gibaymuzad gigo gamuk a hi huritsa teq ne uliq na huloseq uliq ta araqab lehiy ham. Lehad ne gisen aqogin uliq nab wolhamid woqan ham. Woqid teq mataw na in gigo daq na anadin tiqem daqay ham.

<sup>12</sup> Haqan disaipel lehim on mataw gibileneq bilaq yaqay, Ne ginad buliyeq gigo daq meqinta gileh ugiy haq yaqay. <sup>13</sup> Haqad in bugaw meqinta kabemmo gimuzad teq in mataw gigo moq inaqtan na giholib masil emad giwastitay yaqay.

*Jon mataw huz negyaqta na wol eman mom*

*(Matyu 14.1-12; Luk 3.19-20; 9.7-9)*

<sup>14</sup> Ari mataw saw nabta gigo king Herot in Yesus abin tuhurit. Na ezaqgo Yesus abin saw bunmo lehim ayah ezh tiqiy bug. An mataw asor in anan bilaq yaqay, Jon mataw huz negyaqta na moqan God hodhodab wazan ta eram haq yaqay. Nazaq iyan in aholib zaway ayahmo usaqta haq yaqay. <sup>15</sup> Sa mataw asor bilaq yaqay, Ko Elaija haq yaqay. God mat emid bo Iyahta ayon dan wastitaydaqta na amatin inmo haq yaqay. Teq mataw asor bilaq yaqay, Ko God ago nantut araq haq yaqay. Mataw kwaziqmo God ago nantut bilaq yaqayta naqanta araq haq yaqay.

<sup>16</sup> Haqsa Herot gamuk na huritim bilam, Kwaziqmo ya bilaqan Jon mataw huz negyaqta na anat urot tayiya ham. Ta teq God in hodhodab wazan ta eram daqagya ham.

<sup>17-18</sup> Na ezaqgo kwaziqmo Herot in ama Filip awe Herodiyas hureqim aholyon wam. In daq nazaq eman Jon tutimmo bulonya, Ni God ago gunun ayahta itiyonim

ni nima awe wamta haqyaq. Haqsa teq Herot in ago mataw asor giqeman lehim in Jon wazim tiqirquy.

<sup>19</sup> Irquran ossa Herot awe Herodiyas agem meqin diq Jon ugad in anad emyaq, In moq nagta haqyaq. Haqad teq in wol emgo dan nagun yo hiqiyyaq. <sup>20</sup> Na ezaqgo aduw Herot in Jon rabunad alowan tonyaqtan na ago. Herot anad emyaq, Jon in mat dimun diqta daq araq meqinta a hi amta haqyaq. Haqad in Jon gamuk bilaqsa huritad anad kabemmo emyaqta teq in huritnan anad bilaqyaqmo.

<sup>21</sup> Ari abeh Herodiyas aduw Herot anen iqamta na akaman tugwahtim. Gwahtiqan kam nab Herot humab araq ayahta tiqam. Emim in mataw aseseqta in nenaq gavman ago kabiy muzayta na teq mataw bab emayta gigo aseseqta na teq saw Galiliy-ib mataw marorta nagan in gibilenan bolan nenaq humab wolim didaq neqad tuqosiy. Ossa Herodiyas gibiyad anad tiqam, Ari muran ya Jon wol emdaqta adanteqin inaqt tiqiy ham. <sup>22</sup> Haqad Herodiyas in amiy eman lehim bit na aduganib gwahtiqim dorsa Herot ago mataw nenaq in amun aw na ahol waqad gime tisiriryaq. An abeh Herot aw barasta na bulonim bilam, Ni naga diq waqan ninad bilaqay? ham. Na ni ya ibilenid ya tinigdaiq ham. <sup>23</sup> God ya ibijya ya bilaqaiq ham. Ni naga diq anan susumun yagid ya tinigdaiq ham. Ari ni ninad yaqgo og ya wamuzaiqta na liqabmo uroteq asor nigdaiq haqid na dimunmo ya tinigdaiq ham.

<sup>24</sup> Haqan amun aw na asanib gwahtiqim lehim in anen tisusumun ug, Ya le naga diq anan bilaqdaiq? ham. Haqan anen bilam, Ni Jon mataw huz negyaqta naqmo afaqin waqgo bilaq ham. <sup>25</sup> Haqan amun aw na hidmo lehim in Herot atoranmo bulon, Muranmo ni Jon mataw huz negyaqta na anat uroteq afaqin degib emeq a bo yag ham.

<sup>26</sup> In nazaq bilaqan Herot afaqan tiqiy. Na ezaqgo in ago mataw na gimeb helmo ulilib hamta na anadin emad in amun aw na aqez othasnan atuw tihiqiy. <sup>27</sup> Ad hidmo in ago mat araq bab emaqta eman in Jon afaqin waqeq a bolnan tilah. Lehim in bit giqirquran osaytab gwahtiqim Jon anat urot tayim afaqin tuwam. <sup>28</sup> Waqim in degib emim a bolim aw barasta na ugan in waqim a le anen tuqug. <sup>29</sup> An abeh Jon ago disaipel in Jon wol emiya na ago huritim in bolim asan waqim a le hodhodab tiyay toniy.

*Yesus on mataw 5,000 nazaq didaq nag  
(Matyu 14.13-21; Luk 9.10-17; Jon 6.1-13)*

<sup>30</sup> Ari Yesus ago mataw in giqeman uliq-uliqgo lehiyta na muleqim ta bolim Yesus agerab humab tuwoliy. Humab wolim in lehim kabiy emiyta na teq gamuk bunmo in mataw gibileniyta na awagamun in Yesus tubuloni.

<sup>31</sup> Bulonsa kam nabmo mataw kabemmo leh bolsa Yesus ago disaipel nenaq gikabiyan emad in didaq neq daqayta akaman haiq iy yaqay. Nazaq iyan Yesus in ago disaipel gibilan, Bolsa i gimomo saw araq amatawun haiqtab leheq asitmo ginamur emuq ham. <sup>32</sup> Haqad in muyib gwalim saw araq amatawun haiqtab in gimo tilehiy.

<sup>33</sup> Lehsa mataw kabemmo gibiyad ginad emiy, Ko in saw nabmo tilehay haqiy. Haqsa mataw uliq kabemmo era gisenab yuw adek muzim ameb lehim saw nab tugwahtiqiy. Gwahtiqim tuqossa teq Yesus ago disaipel nenaq muyib abeb le gwahtiqiy.

<sup>34</sup> Gwahtiqim Yesus muy hulosa le dubub gwalimmo ame le on mataw kabemmo gibiyad in ginan anad timeqniy. Mataw na bilaqne sipsip ginamren haiqta os nog iy yaqay. Nazaq iyan Yesus suleq dindimunta kabemmo tigibilenyaq. <sup>35</sup> Gibilenad ossa zeq tuwolehnan tonsa Yesus ago disaipel bolim tubuloni, Zeq tuwolehaq haqiy. Teq saw ka amatawun haiqta haqiy. <sup>36</sup> Ni on mataw ka giqemid leheq kabiy uliq sinsin usayta kogab giholmen didaq zayeq neqiy haqiy.

<sup>37</sup> Haqan Yesus amenin emim gibilan, Negmo didaq negid neqiy ham. Haqan in bilaqiy, Sey haqiy, i gigo 200 kina\* i a leheq bret kabemmo zayeq mataw biyahta ka negid neq daqayta na edowa? haqiy. <sup>38</sup> Haqan Yesus tisusumun nag, Ta ne gigo bret ganim usaq? ham. Leheq ahol waqiy ham. Haqan in lehim ahol waqim bolim Yesus buloni, I gigo bret abaynagin teq nabiq giger nazaqmo usaq haqiy.

<sup>39</sup> Haqan Yesus gibilan, Ne mataw gibilenid in humab ame ame emeq teq sisihun dimunta kogab osiy ham. <sup>40</sup> Haqan in mataw gibilenan tuqosiy. Mataw humab asor 100 teq mataw humab asor 50 nazaq in osiy. <sup>41</sup> Ossa Yesus bret abaynagin na teq nabiq giger na waqim ame ulilib gwalsa in God esey ugim teq in bret na orqayim ago disaipel tinag. Negan in a le mataw negan tineqiy. Teq nabiq giger na Yesus nazaqmo orqayim mataw bunmo negan tineqiy. <sup>42-43</sup> Neqan tigiyninan teq bret na nabiq inaq abeyan ayahmo ussa disaipel kuram 12 nazaqmo giwaqim gisihenat ate tugwal bug. <sup>44</sup> Ari mataw didaq neqiyta na ginulinqan kabemmo diq 5,000 nazaq.

*Yesus yuw amalib bayim lah  
(Matyu 14.22-33; Jon 6.16-21)*

<sup>45</sup> Ari Yesus in ago disaipel giqeman muyib gwalim in ameb yuw-kurorqan Galiliy urotim agurumun kozoq uliq Betsaida-ib tilehiy. Lehsa inmo osim mataw dauh biyahta na giqeman giquliqab tilehiy. <sup>46</sup> Lehsa Yesus gihulosim garahab God inaq gamuk emnan tugwalah. <sup>47</sup> Gwalehim ossa imisor diq tiqiysa ago disaipel gimuyin inaq yuwmeb liqabmo tiqiyiy. Iysa Yesus wole yuw agurumnib titur. <sup>48-49</sup> Tursa ago disaipel na tim ginobun ban bolsa in giholtuw bulad luwsa in tigibiy. Gibiyad saw tihastitaynan tonsa tarom asor ussamo in disaipel gigerab yuw bayim tilah. Lehim in disaipel gimeb gwahtiqeq bo lehdaiq haqsamo disaipel in Yesus yuw bayim lehsa ahol waqad in rabim ek tonim bilaqiy, Ko witag bo lehaq haqiy.

<sup>50</sup> Haqsamo Yesus hidmo gibilan, Ne gwaz meqniyy ham. Ka yaqmo lehaiq ham. Ne hi rabiyy ham. <sup>51</sup> Haqad in muyib gwalanmo tim timidam. Mideman disaipel gihol riten lamsa ginadnad tiqem yaqay. <sup>52</sup> Na ezaqgo in ginad gigem soqotim ussa in Yesus mataw didaq nagta na abe alulin anan ginad a hi em hasiy.

*Yesus uliq Genesaret-ib mataw moqayta kabemmo giwastitayan dimniyy  
(Matyu 14.34-36)*

<sup>53</sup> Ari Yesus ago disaipel nenaq yuw-kurorqan Galiliy urotim lehim urum kozoq ban uliq Genesaret ago lan ezab tugwaliy. Gwalim saw nab in muy am wazan us. <sup>54</sup> Ussa Yesus muy hulosa hitiqsa mataw hidmo ahol tuwaq hasiy. <sup>55</sup> Ahol waq hasad in saw nab uliq haresmo sibim lehad gibilensa mataw bunmo Yesus edob osaqta na huritad in giyogniz gigo moq inaq na banab giqemim gisorim giqad tubol yaqay.

<sup>56</sup> Sa Yesus saw nabmo uliq aseseqtab teq uliqben amikmiktan in lehsa mataw in giyogniz gigo moq inaqta na giwaqeq maket-ib giqad leheq giqemid us yaqay. Usad in Yesus atoran diqmo bulon yaqay, Ni on mataw gigo moq inaqta ka gihulosid in giben ningo tubusan adekmo waziy haq yaqay. Haqsa on mataw Yesus ago tubusan adek waz yaqayta na bunmo gihol tidimniy yaqay.

## 7

*God ago maror i gisesan gigo gunun giquriyam  
(Matyu 15.1-19)*

<sup>1</sup> Ari Farisi asor teq mataw Moses ago gunun hurit kemiyta na asor in Jerusalem

\* 6:37: 200 kina in bilaqne mat araq kalam 8 nazaq aduganib kam bunmo kabiy emdaqta na amenin nog.

hulosim bolim Yesus ago hib humab tuwoliy. <sup>2</sup> Humab wolim osad in Yesus ago disaipel gisesan Juda gigo gunun a hi muzinim giben a hi suholimmo didaq neqsa in tigibiyi.

<sup>3</sup> Na Farisi teq Juda bunmo in gisesan gigo gunun muzinad in giben a hi suholim didaq a hi neqayta, luweq God ameb i gihol anumlan inaq ydaq haqad. <sup>4</sup> Teq mataw na maket-ib lehim muleqim a hi huzimmo in didaq a hi neqaytamo. Ad in gisesan gigo gunun naqanta kabemmo muzinayta. Muzinad in gigo reb, deg, gog teq ban gisuholaytamo.

<sup>5</sup> Nazaq iyan Farisi giyogniz mataw Moses ago gunun hurit kemiya na nenaq in Yesus tisuusun ugiy, Ezaq tonim ningo disaipel in i gisesan Juda gigo gunun a hi muzinim in giben a hi suholimmo didaq tineqay? haqiy.

<sup>6</sup> Haqan Yesus gibilan, Ne mataw gimileq meqinta ham. Kwaziqmo God ago nantut Aisaya in ne gilum kemim gamuk ara q kazaq mar ton ham.

On mataw ka giqezabmo God abin iluwayta haqad in bilam ham. Teq in ginad gigem pesanmo God ago hib usaqta haqad in bilam ham.

<sup>7</sup> Mataw na God abin samanta iluwayta haqad in bilam ham. In mataw og kabtaqmo gigo gunun anan bilaqay, God ago maror dimunta haqayta haqad in bilam ham. Ad in gunun naqmo mataw giqisihunayta haqad in bilam ham. *Aisaya 29.13*

<sup>8</sup> Ari Aisaya bilamta nazaq diqmo ne emad ne God ago gunun tuhulosim ne gisesan gigo gunun naqmo waz naqmo hiqiyayta ham.

<sup>9</sup> Haqad Yesus bilam, Ne God ago gunun dimunta walemad ne gisesan gigo daq naqmo wazgo ne tuhurit kemiya ham.

<sup>10</sup> Moses bilam, Ni ninen nimam giwazinad gilumsih haqad in bilam ham. Teq in bilam, Mat ara q anen amam a hi giqudinad gamuk meqinta amalib gibilawunid ne wol emid moqan haqad in bilam ham.

<sup>11</sup> Ta teq negmo kazaq bilaqayta ham. Mat ara q in anen amam gilumsihgo ago nagaq giqusdaqta teq in gibileneq bilaqdaq, Yaqqo nagah ka in *Korban* iyim usaqta haqdaq haqayta ham. (Hibru nan *Korban* haqayta na alulin in kazaq. Nagah God abinib eman usaqta haqayta.) <sup>12</sup> Mat na gamuk awaz meqinta nazaq gibileneq teq abeb in anad buliyeq ago nagah na amalib anen amam gilumsihgo haqsa ne wasihayta ham. <sup>13</sup> Nazaq iyan ne gisesan gigo gunun waqiyta naqmo ne muzinad ne God ago gamuk bayan woqim samanta usaq ham. Ad ne daq naqanta kabemmo emayta ham.

*Yesus daq meqmeqinta mataw giqeman God ameb gihol anumlan inaq iyaqta na ginan bilam*

(*Matyu 15.10-20*)

<sup>14</sup> Haqad Yesus on mataw nab turiyta na a ta gibilenan bolan in gibilan, Ne bunmo yaqqo gamuk ka huriteq teq ne ginad em hasiy ham. <sup>15</sup> Nagah asanib usaqta na mat aduganib lehim in mat na ahol eman God ameb anumlan a hi iyaqta ham. Haiq ham. Nagah mat aduganib usaqta naqmo bo asanib gwahtiqim in mat na ahol eman God ameb anumlan inaq iyaqta ham. [ <sup>16</sup> Mat aw nog in gidek nan huritgo usaqta na in gamuk ka hurit kemiya ham.]

<sup>17</sup> Haqad Yesus ago disaipel nenaq mataw gihulosim bitahiy. Lehimmo disaipel in Yesus gamuk awowun bilamta na ago tisuusun ugiy. <sup>18</sup> Susumun ugan Yesus gibilan, Ne mataw aseseqta ginad a hi em hasayta ko nog ne ham. Ne ginad a hi emay daqag ham. Nagah bunmo asanib usaqta na mat aduganib lehim in mat na ahol eman anumlan inaq a hi iyaqta ham. <sup>19</sup> Na ezaqgo nagah nazaqta na in mat agemab lehim aholib a hi usaqta ham. Haiq ham. Na mat abekoqib lehim le yayib wolehaqta ham. (Yesus nazaq haqad, in didaq bunmo anan dimunmo ham.)

<sup>20</sup> Haqad in bilam, Nagah mat aduganib usaqta naqmo bo asanib gwahtiqim in mat na ahol eman God ameb anumlan inaq iyaqta ham. <sup>21</sup> Ari mataw giduganib daq meqinta gigemab gwahtiqad giqeman gihol anumlan inaq iyaqta na kagzaq ham. Ni ninad meqmeqinta nigemab usaqta ham. Teq ni an a hi waqadmo an haresmo hureqim inaq usaqta ham. Teq ni rin tonaqta ham. Teq ni mat wol emaqta ham. <sup>22</sup> Teq ni an alulib hureqagta ham. Teq ni mataw gigo nagah utetaqta ham. Teq ni daq meqinta amo amo emaqta ham. Teq ni nan katiyta bilaqagta ham. Teq ni yaqqo ag haqad daq daq emaqta ham. Teq ni mataw ginan nigem meqniyaqta ham. Teq ni mataw gibilawunaqta ham. Teq ni nihol abin wazan eraqagta ham. Teq ni ninad a hi em hasadmo daq emaqta ham. <sup>23</sup> Daq meqinta nawa nagan bunmo in mat aduganib usim bo asanib gwahtiqim in mat na eman God ameb ahol anumlan inaq iyaqta ham.

*Aw ara q Fonisiya-ibta Yesus anan helmo ham*

(*Matyu 15.21-28*)

<sup>24</sup> Ari Yesus uliq na hulosim in uliq ara q anan Tair haqaytab tilah. Lehim in bit ara q aduganib gwahtiqim ulilemim os, mataw ya edob osaiqta na a hi hurit daqay haqad. <sup>25</sup> Teq haiq. Amun aw ara q aholib bugaw meqinta usaqta na anen in Yesus edob

osaqta na tuhurit. Huritim in hidmo lehim Yesus anognib abakbakan ulum laquwim turad afaqin mulbunim ogib wom.

<sup>26</sup> Aw na in Juda aw a haiqta. In Grik nan bilaqyaqta teq in ago uliq diq Fonisiya saw Siriya-ibta. In lehim Yesus anogib abakbakan ulum laquwim turad tubulonyaqa, Ni ya imiy aholib bugaw meqinta usaqta na muzid lehan haqyaq. <sup>27</sup> Haqsa teq Yesus bulon, Ni hulossa yaqgo onmin didaq negid giyunin bugid teq ham. Luweq ya onmin gimen didaqta na waqeq gaun negid neqsa yaqgo onmin gigemnan moq daqay ham. Daq nawa na in dimun a haiq ham.

<sup>28</sup> Haqan aw na amenin emim bulon, Mat Iyah ham ni helmo bilaqaq ham. Ta teq ningo onmin didaq neqsa aneglan ban ahaqenib woqsa gaun neqaytamo ham.

<sup>29</sup> Haqan Yesus bulon, Ni nazaq haqaaq na ni muleqeq leh ham. Bugaw meqinta na ni nimiy tuhulos ug ham.

<sup>30</sup> Haqan aw na muleqim aquliqab ta lehim bugaw meqinta na amiy tuhulos ugan amiy banab dimunmo ussa in ahol tuwam.

*Yesus mat araq adek haiqta gamuk a hi emaqta wastitayan dimniy*

<sup>31</sup> Ari Yesus uliq Tair hulosisim in uliq Saidon-ib tilah. Lehim uliq na huloadmo in saw araq anan Dekapolis\* haqaytab gwahtiqim yuw-kurorqan Galiliy aqurumnib tilah. <sup>32</sup> Lehan teq mataw in mat araq adek haiqta gamuk a hi emaqta waqim ad Yesus agerab tubolliy, in bulonid aben mat na aholib emeq wastitaydaq haqad. <sup>33</sup> An Yesus mat na waqim mataw na gihulosad lehim in giholbinmo tituriy. Turad Yesus aben balaw-waz gigermo mat na adeksanib tiqam. Emim teq aben ta waqim abenab kusluwim in mat na amileqib tiqammo. <sup>34</sup> Emadmo in ame ulilib gwalsa ahol aqurin ayahmo gwahtiqsa inmo ago nanib bilam, *Efata* ham. Na in kazaq bilam, Ni nidek hastitayan ham.

<sup>35</sup> Haqanmo mat na adeksan hastitaysa amileq abunbunan iyim usta na hulos uganmo in gamuk dimunmo tibilayaq. <sup>36</sup> Sa Yesus mataw na gibilan, Ne nagah kawa ya emta ka ago ne mat araq hikidik buloniy ham. Teq haiq. Mataw na bilaqnan zaway diq iy yaqay. <sup>37</sup> Sa mataw bunmo huritim bilaqiy, Helmo haqiy. Mat na nagah bunmo dimunmo emaqta haqiy. In mataw gidek haiqta na giwastitaysa in gamuk tuhuritayta haqiy. Ad in mataw gizez haiqta na giwastitaysa in gamuk tibilayaqta haqiy.

\* 7:31: Mak 5.20 nab teq ni gamuk 'Dekapolis' ka alulin ahol waqdaq.

## 8

*Yesus on mataw 4,000 nazaq didaq nag (Matyu 15.32-39)*

<sup>1</sup> Ari kam nab mataw kabemmo Yesus agerab humab ta woliy. Humab wolim osad in didaq a boliyta na tineq bugiy. An Yesus in ago disaipel gibilenim bilam, <sup>2</sup> Ya on mataw ka ginan inad timeqniyaq ham. Ya nenaq kam ezeqmanmo osan in gigo didaq tihiqiy ham. <sup>3</sup> Luweq in gigemnan moqad ossa ya gigemid lehad in gime sinsanid danib woq daqay ham. Mataw ka asor pesanmo boliyta ham. <sup>4</sup> Haqan in ago disaipel bilaqiy, Saw ka amatawun haiqta haqiy. I edob didaq waqeq mataw ka negid neq daqay? haqiy. <sup>5</sup> Haqan Yesus tisusumun nag, Ta ne gigo bret ganim usaq? ham. Haqan in bilaqiy, Bret 7 nazaq diq usaq haqiy.

<sup>6</sup> Haqan Yesus on mataw biyahta na gibilenan ogib tuqosiy. Ossa in bret 7 na waqim God esey ugim in orqayim teq in ago disaipel ibergo tinag. Negan in mataw gigo hib iberim a tilehiy. <sup>7</sup> Ad in gigo nabiq amikmikta amulikmulikmo usta na Yesus waqim God esey ugan in ago disaipel waqim tiqiberiy. <sup>8</sup> An mataw neqan tigiyyunin bug. Giyunin bugan didaq abeyan asor osan disaipel kuram 7 giwaqim amalib tigiyyunin. <sup>9</sup> Mataw na ginulinqan kabemmo diq 4,000 nazaq. An Yesus on mataw na gibilenan giquliquliggo tilehiy. <sup>10</sup> Lehssa Yesus ago disaipel nenaq muy araqab gwalim saw anan Dalmanuta haqaytab tilehiy.

*Mataw Yesus daq araq azawayin inaqta emsa ahol waqnan bilaqiy (Matyu 16.1-4)*

<sup>11</sup> Lehan teq Farisi asor Yesus agerab tubolliy. Bolim in Yesus ulum waqad buloniy, Ni God bulonid in daq araq azawayin inaqta em gwahtiqsa i ahol waqad teq i ni ninan helmo tihaqam haqiy. <sup>12</sup> Haqan Yesus in Farisi gimugan meqinta na tiloyinim in ahol afaqan tiqiy. Ahol afaqan iyad ahol aqurin ayahmo gwahtiqsa in bilam, Nagaqgo mataw muran kam kabta ka in daq azawayin inaqta ahol waqnan bilaqay? ham. Ya helmo bilaqiy ham. God daq araq azawayin inaqta mataw muran kam kabta gimen a hi em negdaq ham. Haiqmo diq ham.

*Farisi giyow Herot inaq gigo gamuk awowun (Matyu 16.5-12)*

<sup>13</sup> Haqad Yesus ago disaipel nenaq in mataw na gihulosad muyib ta gwalim in yuw urotim aqurumun kazaq ban tilehiy.

<sup>14</sup> Lehad disaipel gidek zizalan in bret kabemmo a hi waqiy. Bret amulikmo muyib osta naqmo in a lehiy.

<sup>15</sup> Lehad luwimmu Yesus era ago disaipel tigibilan, Ne Farisi teq Herot inaq gigo yis anan gihol waz naqmo hiqiyiy ham.

<sup>16</sup> Haqan disaipel in gimo an bulonim bilaqiy, I bret haiqgam iyan daqag in bilaqaya haqiy.

<sup>17</sup> Haqsa Yesus huritad teq in gibilan, Ne nagaqgo "i bret haiq" haqad osay? ham. Ne gime haiqta iyim ginad a hi em hasay ye? ham. Ne ginad gigem soqotim usaq e? ham. <sup>18</sup> Ne gime inaqta teq ne nagah ahol a hi waqayta ham. Ne gidek inaqta teq ne gamuk huritim ginad a hi em hasayta ham. Ne gidek tizal daqag ham. <sup>19</sup> Ya bret abaynaginmo orqayim mataw 5,000 negta na abeyan ne kuram ganim siheniy? ham. Haqan disaipel bilaqiy, Na i kuram 12 nazaqmo gisihen haqiy.

<sup>20</sup> Haqan Yesus bilam, Teq ya bret 7 na orqayim mataw 4,000 negta na abeyan ne kuram ganim siheniy? ham. An in bilaqiy, Na i kuram 7 nazaqmo gisihen haqiy. <sup>21</sup> Haqan Yesus gibilan, Kam gineh teq ne ginad em has daqay? ham.

### **Yesus in ago disaipel suleq nag**

*Yesus uliq Betsaida-ib mat araq ame haiqta wastitayan dimniy*

<sup>22</sup> Ari Yesus ago disaipel nenaq lehim uliq Betsaida-ib tugwahtiqiy. Gwahtiqa mataw in mat araq ame haiqta Yesus agerab a boliy, in Yesus bulonid in aben mat na aholib emeq wazid dimniydaq haqad. <sup>23</sup> An Yesus mat na abenab wazim ad uliq asan ban le tugwahtim. Gwahtiqim in mat na ameqnagnib kuluwim aben emimmo tisuusun ug, Ni nagah araq ahol tuwaqag e? ham. <sup>24</sup> An mat na saw ahol waqad teq in bilam, Ya mataw loq gelsa gibiyaiqta ham. Teq ya gibiyas in bilaqne ay nog iyim turay ham.

<sup>25</sup> Haqan Yesus aben mat na ameqnagnib a ta am. Eman mat na ameqnagin dimniyan in ame rirqim saw ahol tuwaq kemyaq. <sup>26</sup> Sa Yesus mat na eman ago bitab lehna in bulon, Ni bitab lehad uliq aduganib gwahtiqeq hi leh ham.

*Pita Yesus ahol alulin bilaq siram (Matyu 16.13-20; Luk 9.18-21)*

<sup>27</sup> Ari Yesus ago disaipel nenaq eraqim saw Sisariya Filipay gigo uliq amikmiktat tilehad luwiy. Lehad luwad teq Yesus in ago disaipel tisuusun nag, On mataw ya inan nog diq haqsa ne huritay? ham. <sup>28</sup> Haqan disaipel bilaqiy, Mataw asor ni ninan Jon mataw huz negyaqta na amatin haqay haqiy. Sa asor ni ninan bilaqay, Ni

Elaija haqay haqiy. Sa asor bilaqay, God ago nantut kwaziqta na gigo araq daqag ni haqay haqiy. <sup>29</sup> Haqan Yesus a ta susumun nag, Ta negmo ya inan nog diq haqay? ham. Haqan Pita amenin emim tibilam, Ni Kraiss ham. God mat emid bo i gilumsihdaqta amatin na ninmo ham. <sup>30</sup> Haqan Yesus gunun negim gibilan, Ari ne yaqgo tuhurit kemiy ham. Teq ne ya ihol alulin na ulalab hi bilaqiy ham.

*Yesus bilam, Ya moqeq teq ta eraqdaiq ham*

*(Matyu 16.21-28; Luk 9.22-27)*

<sup>31</sup> Haqad Yesus in ago disaipel suleq negim bilam, Mat Atatin teq santitiy ayahmo tisordaqta ham. Sa juda gigo mataw marorta na teq mataw tamaz emayta gigo aseseqta na teq mataw Moses ago gunun hurit kemiyta na in gileh tuqag daqay ham. Ugad teq in wol emid tumoqdaq ham. Moqeq kam ezeqmanmo useq teq in kayeq iyeq ta eraqdaq ham. <sup>32</sup> Yesus inmo moqdaqta na ahol alulin nazaq bilaq kema Pita waqim ad dan adek ban loqimmo in tuwad. <sup>33</sup> Wadan Yesus ahol buliyim ago disaipel bunmo gibiyad teq in Pita wadim bulon, Satan ni tukeq ya igilehun ban leh ham. Ni God anad a hi muzaq ham. Haiqgam ham. Ni mat og kabtaqmo anad muzaq ham.

<sup>34</sup> Haqad in mataw biyahta na gibilenan agerab boliy, in ago disaipel na nenaq. Bolan in gibilan, Mat araq ya imuzeq bolnan haqad anad emeq in ahol wazid woqan ham. Ad ya afaqan soraiqta nazaqmo in sornan anad bilaqsa in ago kruse sorid abetarib gwalan ham. In nazaq toneq teq in ya imuzeq bolan ham. <sup>35</sup> Na ezaqgo mat nog inmo ahol anadin emad asan alowan tonaqta na in ahol awitan tihik hulesdaq ham. Ari mat nog in yaqmo teq ya iwagmun dimunta na inaq ginadin emad ahol nog hulosaqta na in ahol awitan ulumsiheq kuluwa-kuluwmo tuqosdaq ham.

<sup>36</sup> Nagaqgo mataw og kab osad in giholyon nagah kabemmo diq rom tonayta? ham. Aben in moqid in gigo nagah giholyon rom toniya na ezaq teq gilumsihdaq? ham. Na haiq ham. In gihol awitan tihik hules daqay ham. <sup>37</sup> Teq in nagah ogibta na amalib gihol awitan zayeq le os dimunta nab tugwahtiq daqay ye? ham. Na haiqmo ham.

<sup>38</sup> Mataw muran kam kabta in God gileh ugad daq meqinta em bugayta ham. Sa mat aw nog in mataw meqinta na gimeb ya teq yaqgo gamuk inaq ginan gimebay woqaqta na, abeb Mat Atatin in amam ago ahol anuwanib angelo tawonta kabemmo nenaq ta boleq in nazaqmo mataw na ginan amebay tuwoqdaqmo ham.



## 9

<sup>1</sup> Haqad Yesus gibilan, Ya helmo ne gibilenaiq ham. On mataw muran kam kab osayta ka gigo asor a hi moqadmo in God ago maror azawayin inaq og kab gwahtiqsa ahol tuwaq daqay ham.

*Yesus ahol awaqan lul araq diq iy  
(Matyu 17.1-13; Luk 9.28-36)*

<sup>2</sup> Ari abeb kam 6 nazaq tihiqiyani Yesus in Pita, Jems teq Jon giwaqim nenaq garah araq sisaqta abigmanib tugwalehiy. Gwalehim in gimomo nab giholbin tuqosiy. Ossa mataw na gimeb Yesus ahol buliyim awaqan lul araq diq iy. <sup>3</sup> Sa in ago tubusan hus diq zeq anuwan nog iymo. Mat araq og kabta ago tubusan suhol naqmo hiqiyani in nazaq hus diq a hi iyaqta. <sup>4</sup> Ari disaipel in Yesus nazaq ahol waqad ossa Elaija ayow Moses inaq giwitan tugwahtiqiy. Gwahtiqim in disaipel gimeb Yesus inaq gamuk bilaqad turiy. <sup>5</sup> Tursa Pita in Yesus bulon, Tisa ham i kab osauqta ka in dimun diq ham. I baybay ezeqmanmo emuq ham. Araq ninmen teq araq Moses amen teq araq Elaija amen ham. <sup>6</sup> Disaipel ezeqman na rab naqmo diq hiqiyad Pita anad a hi em hasadmo gamuk nazaq bilamta.

<sup>7</sup> In gamuk nazaq bilaqad tursamo onqas hitiqim tigiqisih nat. Giqisih netan God aqez onqas na aduganib gehitiqim bilam, Ka ya itatin ham. Ya in anan inaad bilaq naqmo hiqiyaqta ham. Ne in aqez huritiy ham. <sup>8</sup> Haqanmo disaipel ezeqman na gihol bubuliyad saw waqim leh boladmo in Moses ayow Elaija inaq a ta hi gibiyiy. In Yesus amomo gigerab tursa ahol waqiy.

<sup>9</sup> Ari in aweweqmo garah na hulosisim gewoqadmo Yesus disaipel ezeqman na gidek nazim gibilan, Ne nagah muran ahol waqiyta ka hikidik bilaqiy ham. Abeb ya hodhod huloseq eraqid teq ne nagah ka ago tibilaq daqay ham.

<sup>10</sup> An in Yesus ago gamuk huritim ginadnad emad in gimo an bulonim bilaqiy, Yesus bilam, Ya hodhodab eraqdaiq hamta ko in gamuk alulin ezaqta? haqiy. <sup>11</sup> Haqad in Yesus tisuusumun ugiy, Ta ezaqta ago mataw Moses ago gunun hurit kemiyta na bilaqay, Elaija danmeb bolid teq Krai<sup>s\*</sup> abeb boldaq haqayta? haqiy.

<sup>12</sup> Haqan Yesus gibilan, Helmo ham. Elaija nagah bunno wastitaynan haqad danmeb boldaqta ham. Teq gamuk araq kazaq usaqmo ham. Mat Atatin boleq santitiy ayahmo sorsa mataw gileh tuqug daqay ham. <sup>13</sup> Ya ne gibilenaiq ham. Elaija tubol ham. Bolan mataw ginadibmo in aholib daqdaq emim timeqin toniy ham.

Kwaziqmo mat na anan gamuk mar toniyta nazaqmo in tiqemiy ham.

*Yesus amun araq aholib bugaw meqinta muz*

*(Matyu 17.14-21; Luk 9.37-43)*

<sup>14</sup> Ari Yesus disaipel ezeqman na nenaq muleqim tigewoqiy. Gewoqim in disaipel ta asor na mataw kabemmo nenaq humab ayahta wolim ossa tigibiyiy. Sa mataw Moses ago gunun hurit kemiyta na asor in disaipel na nenaq an mugad osiy. <sup>15</sup> Ossa mataw biyahta na in Yesus bolsa ahol waqad gihol turuh nemsan in sibim agerab lehim tubuloni, Yesus ni tigewom e? haqiy. <sup>16</sup> Haqsa Yesus disaipel susumun negim bilam, Ne nagaqgo mataw ka nenaq an mugay? ham.

<sup>17</sup> Haqan mat araq biyahta na gilikmanib osim era Yesus tubulon, Mat Iyah ham ya igo amun matta ka a bol ham. In atenmosib bugaw ussa in gamuk a hi emaqta ham. <sup>18</sup> Bugaw na amun aholib bolaqta nab in amun wazim ogib hunegan woqaqta ham. Woqim in ateb asabalbalin husta gwahtiqsa in ate guruwad ahol baytunim usaqta ham. Ya ningo disaipel gibilenan in bugaw na muznan biyab a hi iyiy ham.

<sup>19</sup> Haqan Yesus amenin emim gibilan, On mataw kam kabta ne God anan helmo a hi haqayta ham. Kam ganim teq ya nenaq a ta osdaiq? ham. Kam ganim teq ya ne ginad siqim iyaqta na ago a hi bilaqad ya ne gigo afaqan sordaiq? ham. Ari amun a boliy ham. <sup>20</sup> Haqan in amun na Yesus ago hib a boliy.

A bolsamo bugaw meqinta na in Yesus ahol waqad in amun na othasan ogib woqim ahol bubuliyad usad asabalbalin husta atenmosib gwahtiqyaq. <sup>21</sup> Sa Yesus amun amam tisuusumun ug, Kam ganim amun aholib moq ka tuqusta? ham. Haqan amam bilam, In amun amik osadmo in kazaq emyaqta ham. <sup>22</sup> Tutimmo bugaw meqinta na amun wol emnan tonad in faqab teq yuwmeb hunegan woqaqta ham. Ari ninmo ningo zaway ussun teq ni i ginan ninad meqniysa gilumsih ham.

<sup>23</sup> Haqan Yesus bulon, Ni nagaqgo bilam, Ningo zaway ussun teq i gilumsih haqad ni bilam? ham. Nazaq ni hi bilaq ham. Mat nog in helmo Mat Atatin ago zaway inaqta haqid teq God in mat nazaqta na ayon nagah tiqem ugdaq ham. <sup>24</sup> Haqan hidmo amun amam dedibmo bilam, Ya helmo haqaiqta teq ya inad siqim iyaq ham. Ni ya ilumsih ham.

<sup>25</sup> Yesus in mataw kabemmo agerab bolsa gibiyad in bugaw meqinta na atoranno bulon, Bugaw ni gamuk a hi emaqta nan a

\* 9:11: Gamuk Krai<sup>s</sup> ka alulin "God mat emid bo i gilumsihdaqta na amatin" haqayta.

hi huritaqta ya ni nibilenaigq ham. Ni amun ka huloseq gwahtiigq ham. Gwahtiigq le in amuganib ta hi woq ham. <sup>26</sup> Haqan bugaw meqinta na ek tonim amun wol hasan woqim abensen hunegsamo in amun hulosisim gwahtiigim tituk. Tukim lehsa amun na bilaqne mat tumomta nog iy. Iyan mataw kabemmo bilaqiy, Amun ka tumom haqiy. <sup>27</sup> Teq haiq. Yesus amun na abenab wazim wazan eraqim titur.

<sup>28</sup> Abeb Yesus bitab lehim in ago disaipel nenaq giholbinmo osad disaipel tisusumun ugiy, I ezaq iyim bugaw meqinta ko a hi muz? haqiy. <sup>29</sup> Haqan Yesus bilam, Ne nagah ara q amalib bugaw naqanta a hi muz daqay ham. Haiq ham. Ne God amomo bulonad susumun ugeq teq ne bugaw naqanta tumuz daqay ham.

*Yesus ame gigerta bilam, Ya moqeq teq ta eraqdaigq ham*

(Matyu 17.22-23; Luk 9.43-45)

<sup>30</sup> Ari Yesus ago disaipel nenaq saw na hulosisim le saw Galiliy-ib tugwahtiigiy. Gwahtiigim lehad in le edob osa qta na ago mat ara q huritgo in hulosis. <sup>31</sup> Na ezaqgo in ago disaipel suleq negyaqta na ago iyan. Suleq negad in gibilenyaq, Mat ara q teq Mat Atatin waqeq mataw gibenab tiqemda q haqyaq. Emid teq in wol emid tumoqda q haqyaq. Moqeq kam ezeqmanmo useq teq in kayeq iyeq ta eraqda q haqyaq. <sup>32</sup> In nazaq bilaqsa ago disaipel ginad a hi em has yaqay. Ad teq in Yesus susumun ugnan rab yaqay.

*God ago maror aduganib nog in mat ayah diqta?*

(Matyu 18.1-5; Luk 9.46-48)

<sup>33</sup> Ari in lehim uliq Kapaneam-ub tugwahtiigiy. Gwahtiigim in bitab lehim tuqosad teq Yesus in ago disaipel tisusumun nag, Ne danib naga gamukin an bulonim bulonim boliy? ham.

<sup>34</sup> Haqan disaipel giqezmo hiqiyim osiy. Na ezaqgo in danib bolad in gimo an bulonim bilaq yaqay, I gilikmanib nog diq in ayah diqta? haq yaqay. <sup>35</sup> An Yesus os woqim osad ago disaipel 12 na gibilenan agerab boliy. Bolan in gibilan, Mat aw nog in danmebta iynan haqad in ahol waqeq abeb diq emeq teq in mataw bunmo gigo kabibiy mat samanta iyan ham. <sup>36-37</sup> Haqad in amun amikta ara q waqim eman nob negim tursa in ay netim teq disaipel gibilan, Mat nog in amun kaqanta ya ibinib bolsa ahol waqad wazinaqta na in ya iwazinaqmo ham. Teq in ya imomo a hi iwazinaq ham. Haiq ham. In ya imam iqeman bolta na wazinaqmo ham.

*Mat ara q Yesus ananib bugaw meqinta gimuzsa disaipel wasihiy*  
(Luk 9.49-50)

<sup>38</sup> Ari Jon in Yesus bulon, Tisa ham mat ara q ni nibinib bugaw meqinta gimuzsa i luwim ahol waw ham. Teq mat na i inaq ara qib a hi luwad iyan i wasihad bulon, Ni nazaq ta hi em haw ham. <sup>39</sup> Haqan Yesus bilam, Ne hi wasihiy ham. Mat ara q ya ibinib da q azawayin inaqta emeq in hidmo ya igilehrib nan meqinta a hi bilaqda q ham. <sup>40</sup> Na ezaqgo mat geg a hi igaqta na in i giyowta ham. <sup>41</sup> Ad mat aw nog in ne gibiy kema d bilaqda q, Ka Kra is ago mataw haqad teq in ne gimen yuw soqoreq negid uluw daqayta na, ya helmo ne gibilenaigq ham. Mat na inaqmo God abenab naw dimunta tuwaqda qmo ham.

*Yesus da q hihiq mataw ginad helta meqin tonaqta na ginan bilam*

(Matyu 18.6-9; Luk 17.1-2)

<sup>42</sup> Haqad Yesus bilam, Mat nog in onmin amikmikta ya inan helmo haqayta na gigo ara q<sup>†</sup> baymuzsa in anad helta na hulosisan tonid mat da q naza q emda qta na in yaqgo faq meqin diq tuwaqda q ham. Na in kwaziqmo gig ayahta anatgumnib am wazeq kamismeb huneg nagiyta ham. Hunegid mat na moqeq da q meqinta na a hi emeq in yaqgo faq meqin diqta na a hi waq nagta ham.

<sup>43-44</sup> Ari ni niben ara q kat nigid ni ninad helta hulosisan tonad ni niben na uroteq hunegid lehan ham. Ni niben amulikmo inaq iyeq os dimuntab lehda qta na in dimunmo ham. Ari ni niben giger inaq iyeq os meqintab lehda qta na in meqin diq ham. Saw nab faq oyad a hi miyaqta usaqta ham.

<sup>45-46</sup> Teq ni nisen ara q kat nigid ni ninad helta hulosisan tonad ni nisen na uroteq hunegid lehan ham. Ni nisen amulikmo inaq iyeq os dimuntab lehda qta na in dimunmo ham. Ari ni nisen giger inaq iyeq os meqintab lehda qta na in meqin diq ham.

<sup>47</sup> Teq ni nimeqnagin ara q kat nigid ni ninad helta hulosisan tonad ni nimeqnagin na othaseq hunegid lehan ham. Ni nimeqnagin amulikmo inaq iyeq God ago maror aduganib gwahtiigda qta na in dimunmo ham. Ari ni nimeqnagin giger inaq iyeq os meqintab lehda qta na in meqin diq ham. <sup>48</sup> Saw nab kadum gisan neqayta na a hi hiqiyayta ham. Teq nab faq oyad a hi miyaqta mo ham.

<sup>49</sup> Ne nazaq giholib ginad meqinta gwahti qsa wolad gihol loyinsa in bilaqne faq ginoy nog iyaqta ham. Teq God in faq nazaqta amalib ne bunmo ginoy nog iysa

† 9:42: Mataw asor ginad emay, Yesus onmin amikmikta ginan bilamta na in ago disaipel ta asor gibin haiqta na ginan bilam haqay.

teq ne bilaqne kamis dimunta nog tiqiy daqay ham.

<sup>50</sup> Kamis in nagah araq dimunta ham. Teq kamis agon hiqiyid ni ezaq tonid teq in agon inaq a ta ydaq? ham. Nazaq iyan ne gimugan bilaqne kamis dimunta nog iysa ne an ulumsihad an hi bayiy ham.

## 10

*Yesus on mataw an tuwaqim teq an ta hulosayta na ginan bilam*

*(Matyu 19.1-12; Luk 16.18)*

<sup>1</sup> Ari Yesus saw na hulosis le saw JUDIYA-ib gwahtiqim teq in le yuw Jordan urotim aqurumun kozaq ban le luw. Luwsa mataw dauh kabemmo boleq agerab humab tuwol yaqay. Humab wolosa Yesus in ago daq muzim God ago suleq tigibilenyaq. <sup>2</sup> Gibilensa Farisi asor Yesus ulum waqnan haqad agerab tuboliy. Bolim in Yesus tisusumun ugiy, I Juda gigo maror bilam, Mat in ago aw muznan tumuzdaq hamta na in daq dimun o daq meqin? haqiy.

<sup>3</sup> Haqan ta Yesus in susumun negim gibilan, Moses naga gununin ne nag? ham.

<sup>4</sup> Haqan in bilaqiy, Moses gunun emim bilam,

Mat in aw muz agamukin mar toneq teq in ago aw tumuzdaq haqad in bilam haqiy. *Lo 24.1-4*

<sup>5</sup> Haqan Yesus gibilan, Ne gigem soqotim ussa ne God anad a hi muzinsa iyan Moses ne gimen gunun na mar ton nag ham. <sup>6</sup> Teq mebmemo diq,

God nagah bunno giqamta nab in on mataw matmatta teq onqonta inaqmo giqam ham. *Jenesis 1.27; 5.2*

<sup>7</sup> Daq alulin naqmo ago mat in anen amam gihuloseq in awe aholib tisoqotdaq ham. <sup>8</sup> Soqoteq in giger gihol amulikmo iyeq tuqos daqay ham. *Jenesis 2.24*

Nazaq iyan mat awe inaq in gihol giger a ta hi iyayta ham. Haiqqam ham. In giger gihol amulikmo tiqiyim osayta ham. <sup>9</sup> Nazaq iyan nagah God am tuwazan usaqta na mat araq in ta hi urotan ham.

<sup>10</sup> Ari abeb Yesus ago disaipel nenaq le bit aduganib gwahtiqim teq disaipel in gamuk na ago tisusumun ugiy. <sup>11</sup> Susumun ugan Yesus gibilan, Mat awe muzad aw ta araq muturta waqaqta na in awe amebta na meqin tonad in bilaqne mat ta araq ago aw inaq luw nog iyaqta ham. <sup>12</sup> Ad daq nazaqmo aw aduw hulosis le mat ta araq muturta waqaqta na in aduw amebta na meqin tonad in bilaqne aw ta araq ago mat inaq luw nog iyaqtamo ham.

*Yesus onmin amikmikta gidimun tonad gibar ton*

*(Matyu 19.13-15; Luk 18.15-17)*

<sup>13</sup> Ari on mataw gigo onmin amikmikta Yesus agerab giqad tubol yaqay, Yesus giwazad gidimun tondaq haqad. Teq haiq. In onmin giqad bolsa disaipel ginadad tigimuz yaqay. <sup>14</sup> Sa Yesus in disaipel nazaq tonsa gibiyad agem timeqniy. Agem meqniysa in gibilan, Ne onmin gihulosid yaqgo hib boliy ham. Ne hi giwasihiy ham. On mataw naqantaqmo God ago maror aduganib gwahtiqayta ham. <sup>15</sup> Ya helmo ne gibilenaiq ham. Mat aw nog in onmin gibin haiqta ka nogmo iyad God ago maror ahaqenib a hi oseq in God ago maror na aduganib le a hi gwahtiq daqay ham. <sup>16</sup> Haqadmo in onmin giqay netim aben giholib emim giwazad tigibar ton.

*Mat araq ago nagah kabemmo usaqta na Yesus inaq gamuk bilam*

*(Matyu 19.16-30; Luk 18.18-30)*

<sup>17</sup> Ari Yesus eraqim danib lehad luwsa mat araq sibim bolim in anognib abakbakan ulum laquwim turad tubulon, Tisa dimunta ham, ya ezaq tonid teq God in ago os dimunta kuluwa-kuluwmo osayta na tiyagdaq? ham. <sup>18</sup> Haqan Yesus bulon, Ni ninad ezaq emad ya inan dimun haqay? ham. God amomo in dimunta ham. <sup>19</sup> Haqad in mat na bulon, Gunun bunno Moses bilamta na ago ni tuhurit ham. Ni mat araq wol emid hi moqan ham. Ni an alulib hureqeq inaq hi us ham. Ni hi rin ton ham.

Ni hazizirib mat araq hi kat ug ham. Ni mat araq kat ugeq ago nagah samanmo hi waq ham.

Ni ninenmaman giqez hurit ham. *Kisim Bek 20.12-16*

<sup>20</sup> Haqanmo mat na bulon, Tisa ham ya amunibmo osad gunun nagan bunno muzim bolim muran ya mat ayah tiqiy ham. <sup>21</sup> Haqan Yesus mat na ahol waqad in anan anad bilam. Anad bilaqsa in bulon, Ni daq amulikmo em nagta a hi emaq ham. Ni leheq ningo nagah bunno gizayeq amenin waqeq teq ni mataw ginaghan haiqta neg ham. Ni nazaq toneq teq Heven-ib ningo nagah kabemmo diq inaq ydaq ham. Ad ni daq na emeq teq ni ya imuzeq bol ham. <sup>22</sup> Haqan mat na gamuk nazaq huritum in anobun iyim anad ayahom meqniysa tilah. Na ezaqgo in ago nagah dimdimunta kabemmo usta na ago iyan.

<sup>23</sup> Ari mat na tilehsa teq Yesus ahol buliyim in ago disaipel gibiyad gibilan, Mataw gigo nagah kabemmo inaqta na in God ago maror aduganib gwahtiqgo afaqan diq ham. <sup>24</sup> Haqan disaipel gamuk na huritum gihol turuh nam. Samo Yesus a ta gibilan,

Yaqgo onmin ham mataw God ago maror aduganib gwahtiigo in afaan diq ham. <sup>25</sup> Haqad in gamuk awowun arağ gibilenim bilam, Karuw ayahta anan kamel haqayta na in nidel akwiyaknib le tugwahtiğdaq e? ham. Hikidik ham. Ad nazaqmo mat ago es kabemmo ginadin emaqta na in God ago maror aduganib le a hi gwahtiğdaqmo ham.

<sup>26</sup> Haqan disaipel gihol turuh nemsan in an bulonim bilaqiy, Nazaq iyid teq mat arağ diğ God ago os dimunta nab le a hi gwahtiğdaqya haqiy. <sup>27</sup> Haqsa Yesus gibiyad gibilan, Mataw in gimo gigo za-wayib le a hi gwahtiğ daqayta ham. Ari God in mat nog a haiq ham. Inmo mataw gilumsihsa teq in le tugwahtiğ daqay ham. Na ezaggo in nagah arağ a hi emdaqta a haiq ham.

<sup>28</sup> Haqan Pita tubulon, Ni i gibiy ham. I nagah bunmo gihulosim i ninmo nimuzim ninağ tilehauğ ham. <sup>29-30</sup> Haqan Yesus bilam, Ya helmo ne gibilenağ ham. Mat aw nog in ya iwagamun huritim teq in ya imuzeq bolnan haqad in gigo bit teq gimaqbaban teq gihiyan teq ginenmaman teq in gigo onmin teq in gigo og gihulosiyta, on mataw na bunmo og kab osad in gigo nagah gihulosiyta na amenin 100 nazaq tuwağ daqay ham. Waqad in gigo bit teq gimaqbaban teq gihiyan teq ginenan teq gigo onmin kabemmo diğ inaq iy daqay ham. Ta teq in ya imuzeq bolsa mataw in afaan tineğ daqaymo ham. Ad abeb kam muturta nab teq mataw na in God ago os dimuntab gwahtiğeq kuluwa-kuluwmo tuqos daqay ham. <sup>31</sup> Kam nabmo mataw gibin inaq iyim osayta na kabemmo in gibin hiqiyad bo abeb tiqiy daqay ham. Sa mataw kabemmo og kab gibin haiqta na in gibin inaq iyeq le danneb tiqiy daqay ham.

*Yesus ame ezeqmanta bilam, Ya moqeq teq ta erağdaiğ ham*

*(Matyu 20.17-19; Luk 18.31-34)*

<sup>32</sup> Ari kam nab Yesus danib gwahtiğim uliğ Jerusalem-ub lehad in danneb lehsa ago disaipel in abeb muzim inaq lehad teq in ginad haresmo em yaqay. Samo mataw ta asor in Yesus ago disaipel gibeb gimuzim nenağ lehad in gihol rabsa leh yaqaymo. Lehsa Yesus in ago disaipel 12 na giwaqim giğad le giholbinmo turad teq in aholib dağ gwahtiğdaqta na anan tigibilan. <sup>33</sup> In bilam, Ne huritiy ham. Muran i Jerusalem-ub tugwalehauğ ham. Nab teq mat arağ in Mat Atatin waqeq mataw tamaz emayta gigo aseseqta na giyogniz mataw Moses ago gunun hurit kemiya na nenağ gibenab tiğemdaq ham. Emid in ayon tibiłağ daqay, Wol emid moqan hağ daqay ham. Haqad in mataw en ta arağ Juda a haiqta na gibenab

tiğem daqay ham. <sup>34</sup> Emid teq in Mat Atatin bilawunad kusluw ugad tuwoltitay daqay ham. Woltitayeq teq in wolemid tumoğdaq ham. Moqeq kam ezeqmanmo useq teq in kayeq iyeq ta erağdaq ham.

*Jems ama Jon inaq maror iyeq osnan bilaqiy*

*(Matyu 20.20-28)*

<sup>35</sup> Haqan teq Sebediy atatniz giger Jems ama Jon inaq in Yesus buloniy, Mat Iyah haqiy i giger nagah arağ ago tisuusmun niganan haqiy. Nagah na ni i gimen tiğemdaqta haqiy. <sup>36</sup> Haqan Yesus gibilan, Ya ne giger gimen naga diğ emdaiğ? ham. <sup>37</sup> Haqan in bilaqiy, Abeb ni maror ayah diğta iyeq ni nibin saw bunmo lehsa teq ni i giger ban igid i ninağ tuqosam haqiy. I ni nigerab niqabun ban teq ninasaran ban ossa on mataw bunmo i gihaqenib os daqay haqiy.

<sup>38</sup> Haqan Yesus gibilan, Ne nagah anan susumunayta ka ago ne a hi hurit kemiy ham. Gog ayuwun agon meqin diğta ya uluwdağta na asor ne giger tuquluw daqaymo ye? ham. Teq santitiy ya iqisih bugdaqta na in ne giqisihsa ne tisor daqay ye? ham. <sup>39</sup> Haqanmo giger na bilaqiy, I nazaq tiğemam haqiy. Haqan Yesus gibilan, Helmo ham. Ya gog ayuwun agon meqinta uluwdağta na nogmo ne tuquluw daqaymo ham. Teq ya santitiy sordaiğta nazaq ne tisor daqaymo ham. <sup>40</sup> Ari nog diğ ya iben iqabun ban osdaqta na teq nog ya iben inasaran ban osdaqta na in yaqgo nagah a haiq ham. God in mataw gigan gimen ban tuwastitayan usaqta naqmo in ban na tuwağ daqay ham.

<sup>41</sup> Ari disaipel 10 na gamuk na huritim in Jems ama Jon inaq gigem meqinta tineğ yaqay. <sup>42</sup> Nega Yesus gibilenan agerab bolan in gibilan, On mataw en ta asor Juda a haiqta nagan gigo maror aseseqta in gihol abin iluwad igmo ag haqad osayta ham. Ad in gigo walmataw giqemid in gimo ginad muzad gihaqenib iyeq osgo in giwaz meqniyayta ham. Na ago ne tuhuritiyta ham. <sup>43</sup> Teq ne in gigo dağ na hikidik muziniy ham. Ne gilikmanib mat nog in mat ayahta iyeq osnan haqad in ahol wazid woqsa in ne gilumsiheq gimen kabiy eman ham. <sup>44</sup> Ad mat nog in ne gigo mat amebta iyeq osnan haqad in ne gigo kabibiy mat samanta iyeq osan ham. <sup>45</sup> Na ezaggo Mat Atatin in mataw giqemid inmen kabiy sorgo a hi bol ham. In mataw gigo kabibiy mat nog iyeq in gigo afaan inmo ahol ugad teq in ahol amalib mataw kabemmo gizayeq bab gibenab ta giwaqgo haqad in bolta ham.

*Yesus mat araq ame haiqta wastitayan dimniy*

*(Matyu 20.29-34; Luk 18.35-43)*

<sup>46</sup> Ari Yesus ago disaipel nenaq teq mataw asor dauh biyahta nenaq in uliq ayahta Jerusalem-ub lehad luwim le uliq Jeriko-ib tugwahtiqiy. Gwahtiqim in uliq na hulosis lehsa Timeus atatin anan Bartimeus haqayta na in ame haiqta iyim dan adekib osad nagh anan sunad osyaqta. <sup>47</sup> Osad in Yesus mat Nasaret-ibta bolaq haqsa abin tuhurit. Huritim in dedibmo lileyeq bilaqyaq, Yesus haqyaq. Devit atatin\* <sup>48</sup> Haqsa mataw kabemmo mat na wadad buloniy, Ni niqez hiqiy haqiy. Teq haiq. In dedibmo lileyeq a ta bilaqyaq, Yesus haqyaq. Devit atatin haqyaq. Ni ya inan ninad meqniyan haqyaq.

<sup>49</sup> Haqsa Yesus bolim turad in mat na aqez huritadmo bilam, Bulonid ya igerab bolan ham. Haqan mataw na in mat ame haiqta na bulonim bilaqiy, Kadoy haqiy ni ninad dimniyan haqiy. In tinibilenaq haqiy. Ni eraqez agerab leh haqiy.

<sup>50</sup> Haqan mat ame haiqta na ago tubusan ahol isihim usta na hasim hulosan woqsa in hidmo eraqim Yesus agerab tilah.

<sup>51</sup> Lehan Yesus bulon, Ya ni ezaq niondaiq? ham. Haqan mat ame haiqta na bilam, Mat Yah ham ya saw ahol waqnan inad bilaqaq ham. <sup>52</sup> Haqan Yesus bulon, Ni leh ham. Ni ya inan helmo hamta naqmo niqeman ni nime tidimniy ham. Haqan muran diq nawaqmo mat na ame hastitayan in saw ahol tuwaqyaq. Saw ahol waqad in Yesus muzim inaq Jerusalem-ub tilah.

## **Yesus santitiy sorim moqim teq ta eram**

### **11**

*Yesus king nog iyim le uliq Jerusalem-ub gwahtim*

*(Matyu 21.1-11; Luk 19.28-40; Jon 12.12-19)*

<sup>1</sup> Ari Yesus ago disaipel nenaq le Jerusalem sinsin tuqugad in le uliq giger Betfage teq Betaniy gigerab tugwahtiqiy, garah Oliv asenab. <sup>2</sup> Gwahtiqim Yesus in ago disaipel giger giqeman danbeb lehsa in gibilan, Ne le uliq ginobun ban usaqta kob gwahtiqeqmo donki amidon araq amalib asit a hi luwiya nawa am wazan tursa ne ahol tuwaq daqay ham. Ahol waqeq ne haseq a boliy ham. <sup>3</sup> Sa mat araq gibileneq bilaqdaq, "Ne nagaqgo nazaq emay?" haqid ne kazaq buloniy

ham. Iyahta ago kabiy inaq iyan haqiy ham. Kabiy na hiqiyid teq in hidon emid ta boldaq haqad ne buloniy ham.

<sup>4</sup> Haqan giger na lehim donki araq minminta bit araq aqezab am wazan tursa ahol tuwaqiy. Ahol waqad in donki na aqamun tihasiy. <sup>5</sup> Hassa mataw nab turiyta na tisusumun negiy, Ne giger nagaqgo donki minminta na aqamun hasay? haqiy.

<sup>6</sup> Haqan Yesus gibilanta nazaqmo in mataw na tigibileniy. Gibilenan mataw na 'dimunmo' haqanmo in donki amidon na tuwaqiy. <sup>7</sup> Waqim in Yesus agerab a lehim in gigo tubusan asor hasim donki amalib emanmo Yesus donki amalib tuqos. <sup>8</sup> Osim lehsa mataw kabemmo in gigo tubusan hasim danib gihureniy. Gihurensa asor ay aben amikmikta giwaqim a bolim danib gihunegim giqad lehiy. <sup>9</sup> Dan balaw tonim huload teq mataw asor ameb lehad mataw asor abeb bolad in lileyim bilaq yaqay,

God abin soriy haq yaqay.

Mat ka Iyahta abinib bolan i ginad bilaq gigayinaq haq yaqay.

<sup>10</sup> Teq kwaziqmo i gises Devit maror iyim osta na akaman diq a ta gwahtiqsa i ginad tidimniy hasaq haq yaqay.

I God abin sorid ulilibmo diq gwalan haq yaqay.

<sup>11</sup> Ari Yesus le uliq Jerusalem-ub gwahtiqim Tempel-ib tilah. Lehim Tempel ago gel aduganib gwahtiqim luwad in nagh bunmo ahol waqad luwsa tarom tiqiynan tona in ago disaipel 12 na nenaq usnan haqad uliq Betaniy-ib muleqim ta lehiy.

*Yesus bilaqan ay fik araq may*

*(Matyu 21.18-19)*

<sup>12-13</sup> Lehim usim tarommo in eraqim Betaniy hulosis Jerusalem-ub ta lehad luwimmo Yesus agem moqsa in ay fik araq pesanmo tursa ahol waqad in anon waqnan agerab tilom. Loqim in anon araq ahol a hi wam. Haiqgam. Ananmo us. Na ezaqgo kam na in ay fik anon emgo akaman a haiq. <sup>14</sup> An Yesus ay na bulonim bilam, Ni ninon a ta hi emsa mataw ninon araq waqeq a ta hi neq daqay ham. Haqsa ago disaipel tuhuritiy.

*Mataw Tempel-ib mani akabiyan emsa Yesus gimuzan asan ban gwahtiqiy*

*(Matyu 21.12-17; Luk 19.45-48; Jon 2.13-22)*

<sup>15</sup> Ari Yesus ago disaipel nenaq le Jerusalem-ub tugwahtiqiy. Gwahtiqim Yesus le Tempel agelin aduganib gwahtiqim in mataw nagh gizayad osiyta na gimuzan in tukim asan ban gwahti tileh

\* **10:47:** Isrel on mataw ginad em yaqay, God mat emid bo i gilumsihdaqta amatin na in i gises Devit asenulib tugwahtiqdaq haq yaqay. Haqad luweq Yesus in mat naqmo iydq haqad teq mataw asor in anan Devit atatin haq yaqay.' haqyaq. Ni ya inan ninad meqniyan haqyaq.

yaqay. Lehsa in mataw mani amo waqad amenin bit na ago mani negayta na gigo ban otbuliyan tuwom. Teq in mataw ah hushusta\* God ayon tamaz emgo gizayayta na gigo ban nagan inaqmo giqot buliyan woqiymo. <sup>16</sup> Sa mataw Tempel a hi wazinad in saw na agem siseyim nagah sorim leh bolad luwsa Yesus gibiyad in gunun emim gibilan, Ne Tempel ago saw ka wazinad nagah hareso sorad uliq gem ka siseyad hi luwiyy ham. <sup>17</sup> Haqad in mataw suleq negim kazaq gibilan, God ago marib in gamuk araq kazaq bilam ham.

Mataw yaqgo bit anan bilaq daqay, On mataw en bunmo God inaq gamuk emgo abitan haq daqay haqad in bilam ham. *Aisaya 56.7*

Ta teq ne bit ka eman in mataw rin tonayta gigo bit nog tiqiy ham.

<sup>18</sup> Ari mataw tamaz emayta gigo aseseqta na giyogniz mataw Moses ago gunun hurit kemiya na nenaq in Yesus ago gamuk nazaq huritim in wol emid moggo adan-teqin tinagun yaqay. Teq in Yesus rabun yaqaymo. Na ezaqgo on mataw bunmo Yesus ago suleq huritad gihol turuh nems a in wazin yaqayta na ago iyan.

*Mat helmo diq haqad God bulonsa in nagah ugaqta*

*(Matyu 21.20-22)*

<sup>19</sup> Ari imisor tiqiysa Yesus ago disaipel nenaq Jerusalem hulosisim tilehiy. <sup>20</sup> Lehim usim eraqim tarommo in Jerusalem-ub ta lehad luwimmo in ay fik na a ahol ta waqiy. Ay na aninin, abeqar teq anan inaqmo tumay bugim tur. <sup>21</sup> Sa Pita in irimo Yesus gamuk bilamta na anadin emad in Yesus bulon, Iyahta ham ni ay ka ahol waq ham. Irimo ni ay fik anan bilam 'meqniydaq' hamta ka tumay bug ham. <sup>22</sup> Haqan Yesus bilam, Ni ninad ayahmo God amomo ago hib usan ham. <sup>23</sup> Ya helmo ne gibilenaig ham. Mat anad amulikmo ussa in helmo God nagah yaqmen tiqem yagdaq haqaqta, mat na garah ko bulonid in eraqeq sortukeq le kamismeb tuwoqdaq ham. <sup>24</sup> Na alulin nazaq iyan ya ne gibilenaig ham. Ni nagah araq anan God susumun ugad bilaqeq "Helmo God tiyagdaq" haqid God nagah na tinigdaq ham. <sup>25</sup> Ari ni God inaq gamuk tiqemnan haqad luweq ni mat araq nimeqin tonta na anadin emdaq ham. Nazaq iyid danmeb ni mat na ago daq meqinta na walemad anadin ta hi em ham. Ad teq ni Gimam Iyah Heven-ib osaqta na ningo gamuk bulon ham. Ni nazaq tonid teq God nazaqmo ningo daq meqinta giwalemad in ni niqez tuhuritdaq ham. <sup>26</sup> Ari ni mat na ago daq meqinta a hi

walemid i Gimam Ulilib Osaqta na in ningo daq meqinta a hi giwalemdaqmo ham.]

*Mataw aseseqta in nog Yesus ahol abin ugta na anan susumun ugiy*

*(Matyu 21.23-27; Luk 20.1-8)*

<sup>27</sup> Ari Yesus ago disaipel nenaq Jerusalem-ub a ta lehiy. Lehim Yesus Tempel agelin aduganib loq gelad luwsa mataw tamaz emayta na giyogniz mataw Moses ago gunun hurit kemiya na teq Juda gigo mataw marorta nagan in Yesus agerab tuboliy. <sup>28</sup> Bolim in Yesus tisuusumun ugiy, Ni nibin ezaqta iyim ni daq kagan emaq? haqiy. Teq nog diq nibin na nigan ni kazaq emaq? haqiy.

<sup>29</sup> Haqan Yesus gibilan, Ta ya nazaqmo nagah araq ago susumun negid ne amenin emiy ham. Ne yaqgo susumun ka amenin emid teq nog ibin yagan ya daq kagan emaiqta na ago ya tigibilendaigmo ham.

<sup>30</sup> Ari Jon mataw huz negyaqta na ago kabiy Heven-ib bol o haiq in matawmo gigo hib kabiy na wanta? ham. Ne yaqgo gamuk ka amenin bilaqid ya huritiq ham.

<sup>31</sup> Haqan mataw aseseqta na in gimo an mugad bilaqiy, I bilaqam, Kabiy na God ago hib bolta haqid in tibilagdaq, Ta nagaqgo ne Jon ago gamuk huritim anan helmo a hi haqiy? haqdaq haqiy. <sup>32</sup> Ari i bilaqam, Kabiy na matawmo gigo hib bolta haqid mataw biyahta ka eraqeq i ezaq giton daqayta na i a hi hurit haqiy. Na ezaqgo on mataw na bunmo Jon anan God ago nantut araqqo diq haqsa mataw marorta nagan in ginan tirab yaqay. <sup>33</sup> Nazaq iyan in Yesus ago susumun na amenin emim buloniy, I a hi hurit haqiy. Haqan Yesus gibilan, Ya nazaqmo ham. Nog ibin yagan ya daq kagan emaiqta na ago ya a hi gibilendaigmo ham.

## 12

*Mataw meqinta am wain akabiyan emiyta gigo gamuk awowun*

*(Matyu 21.33-46; Luk 20.9-19)*

<sup>1</sup> Haqad Yesus in mataw aseseqta na gamuk awowun araq gibilenim bilam, Mat araq am wain anagin kabemmo leyim in tigel ton ham. Gel tonim in yay araq wain anon em woqid bay ninaleq ayun waqgota na titay ham. Na tihiqiyan in mat kabiy wamuzdaqta ayon bit araq asen sisaqta emim in kabiy na mataw asor gibenab tiqam ham. In anad mataw na in gimo giholyon kabiy emad wain anagin asor waqad asor in ya yag daqay haqad ham. Kabiy anamren anad nazaq emad gibilenim hulosaq in era uliq araq pesantab tilah ham. <sup>2</sup> Lehim ossa wain anagin waqgo akaman tugwahtiyan in ago kabiy mat araq eman

\* 11:15: Ah na God ayon tamaz emgo gizay yaqayta.

mataw wain akabiyān emayta na gigerab tilah ham. In leheq kabibiy mataw na gibenab wain anagin asor tuwaqdaq haqad ham. <sup>3</sup> Teq haiq ham. Kabibiy mat na lehanmo mataw wain akabiyān emayta na in wazim woltitayim muzan samanmo muleqim tilah ham. <sup>4</sup> Lehan kabiy anamren in kabibiy mat ta araḡ eman tilah ham. Lehan in mat na afaqin wolturim meqin diq toniy ham. <sup>5</sup> Anmo in kabibiy mat araḡ eman a ta lah ham. Lehan in mat na wol eman tumom ham. Moqan kabiy anamren in ago kabibiy mataw kabemmo giqeman leh yaqay ham. Lehsa mataw akabiyān emayta na in asor ginolad asor in ginol eman tumoqiy ham.

<sup>6</sup> Ari kabiy anamren ago mat amulikmo tiqiy ham. Na in atatinmo in anan anad bilaq naqmo hiqiyyaqta ham. In anad am, Ya itatin em lehid teq mataw na in aqez tuhurit daqay haqad in eman abebtanta tilah ham. <sup>7</sup> Teq haiq ham. Mataw kabiy wamuzayta na in gimo an bulonim bilaqiy, Abeb mat ko amam moqid in amam ago ahuran nagah bunmo tuwaqdaqta haqiy ham. Bolsa i mat ko wol emid moqanmo haqiy ham. Moqsa amam ago kabiy ka igmo waquq haqiy ham. <sup>8</sup> Haqadmo in mat na wazim wol eman moqan in asan waqim kabiy asan ban hunegan tilah ham.

<sup>9</sup> Nazaq iyan kabiy anamren na ezaq tondaq? ham. In boleq mataw wain akabiyān wamuzayta na ginol em bugad teq in ago kabiy na mataw ta asor bunta gibenab tiqemdaq ham. <sup>10</sup> Haqad Yesus bilam, Ne God ago mar ahol a hi waqayta ye? ham. Mar nab gamuk araḡ kazaq bilam ham.

Tituq mataw anan bilaqiy 'meqin' haqiyta naqmo in awaz meqin diq turad bit anon bunmo soraq haqad in bilam ham. <sup>11</sup> Iyahtaḡmo nagah na eman gwahtiqan i ahol waqsa in dimun diq iyaq haqad in bilam ham. *Buk Song 118.22-23*

<sup>12</sup> Yesus nazaq haqan mataw aseseqta na ginad tiqemiy. Yesus i gubin wazid woqgo haqad gamuk awowun na bilam haqiy. Haqad in Yesus waznan ginad bilaqsa teq in ta on mataw girabun yaqay. Nazaq iyan in Yesus hulosisim tilehiy.

*Mataw Sisa takis ugayta na ago in Yesus ulum waqiy*

*(Matyu 22.15-22; Luk 20.20-26)*

<sup>13</sup> Ari mataw aseseqta na lehim in Farisi asor teq Herot ago matawta asor nenaq gibilenan tilehiy, in leheq Yesus kat ugid in gavman gigo gunun araḡ itiyonad gamuk araḡ hi bilaqnanta bilaqid i tuwazam haqad. <sup>14-15</sup> In lehim Yesus buloniy, Tisa haqiy, i ningo tuhurit haqiy. Ni a hi katiyaqta haqiy. Ni mataw gubin inaḡta a

hi girabunad gigomo a hi lehaqta haqiy. Ad ni on mataw God ago dan titnonta giqisihunad ni hel diqmo gibilenaqta haqiy. Ni ninaḡ ezaq emaq? haqiy. I gibabun Rom gigo king Sisa in i gituw bulsa i takis ugauqta na in daq dimun o daq meqin? haqiy. I Juda gigo maror ezaq bilamta? haqiy. I tuqugam o haiq? haqiy.

Haqan Yesus in gigo gamuk katiyaḡ na tuhurit. In ya imeqin tongo adanin tiqemay ham. Haqad in gibilan, Nagaqgo ne ya ilum waqay? ham. Ari mani araḡ waq a bolid ya ahol waqiy ham. <sup>16</sup> Haqan in araḡ a bolim tuqugiy. Ugan ahol waqad in tisusumun nag, Ka nog diq adulan teq ahol anan usaq? ham. Haqan in bilaqiy, Na Sisa-mo agota haqiy. <sup>17</sup> Haqan Yesus gibilan, Sisa ago nagah na ne Sisa-mo ugiy ham. Ad God ago nagah na ne God-mo ugiy ham. Haqan mataw na ginadnad emad tuqosiy.

*Sadyusi in mataw hodhodab eraq daqayta na ago Yesus ulum waqiy*  
*(Matyu 22.23-33; Luk 20.27-40)*

<sup>18-19</sup> Sa Sadyusi asor Yesus ago hib tuboliy. Mataw na ginad kazaq emayta. Mataw tumoqiyta hodhodab a hi eraq daqay haqayta. Na in bolim Yesus buloniy, Tisa haqiy Moses i gimen gamuk araḡ mar tonim in kazaq bilam haqiy. Mat araḡ aw waqeq amun a hi emsamo moqid ago aw amomo ossa teq in amikqan araḡ abab aqoburan na waqeq alulib abab ayon onmin tiqiemdaq ham haqiy.

<sup>20</sup> Ari gamuk araḡ kazaq lahta haqiy. Mat araḡ amikqaniz nenaq 7 nazaq diq iyim osiy haqiy. Osim in gibab na aw araḡ tuwam haqiy. Waqim inaḡ osad in ago amun haiqmo osimmo tumom haqiy. <sup>21</sup> Moqan ama ta araḡ aw naqmo tuwam haqiy. Waqim in nazaqmo amun haiqmo osim tumommo haqiy. Ta in gima ezeqmanta na nazaqmo ton haqiy. <sup>22</sup> Na moqan in amagniz bunmo nazaqmo titoniymo haqiy. Mataw maqbab 7 na in aw amulik naqmo waqim amun araḡ eman a hi gwahtiqsamo in tumoq bugiy haqiy. An abeb aw na tumommo haqiy. <sup>23</sup> Nazaq iyan abeb mataw bunmo hodhod huloseq eraq daqayta nab teq aw na in nog diq awe tiqiydaq? haqiy. Maqbab 7 na bunmo in aw amulik naqmo waqiyta haqiy.

<sup>24</sup> In nazaq haqanmo Yesus gibilan, Ne God ago marib gamuk usaqta na ago ginad a hi em hasay ham. Teq ne God ago zaway a hi hurit kemaymo ham. Na ago iyan ne gamuk menmen bilaqay ham. <sup>25</sup> Ari on mataw hodhodab eraqeq in an a ta hi waq daqay ham. In bilaqne God ago hib angelo osayta nazaq nogmo in os daqay ham. <sup>26</sup> Teq God mataw tumoqiyta giwazid hodhodab eraq daqayta na agamukan Moses

ago marib usaqta ham. Mar nab ne ay amikta faq oyad a hi oyworta awagamun na ne ahol a hi waqiyta daqagya ham. Wagam nab God in Moses bulonim bilam, Abraham ago God, teq Aisak ago God, teq Jakob ago God na yaqmo haqad in bilam ham. *Kisim Bek 3.6, 15, 16*

<sup>27</sup> Nazaq iyan God in mataw moqim kayeqmo osayta gigo God iyim in gibiy muzaqta ham. Mataw moqim a hi hiqiyayta ham. Ne gigo gamuk nawa na ne menmen diq bilaqiy ham.

*God ago gunun ameb diqta*  
(*Matyu 22.34-40; Luk 10.25-28*)

<sup>28</sup> Ari mat araq Moses ago gunun hurit kamta na bolim Yesus Sadyusi nenaq gamukib an bayad tursa in tuhurit. Huritsa Yesus in gigo gamuk amenin dimun diqmo bilaqan mat na era Yesus tisusumun ug, God ago gunun doqag diqta in gunun bunmo giquriyamim in danmeb diqta? ham.

<sup>29</sup> Haqan Yesus bilam, Gunun ameb diqta na kazaq bilam ham.

Ne Isrel huritiy haqad in bilam ham. I gigo Iyahta God in amomo Iyahta iyim osaqta haqad in bilam ham. <sup>30</sup> Sa ne gigem, giqutil, ginad, teq ne gigo zaway bunmo amalib ne gigo Iyahta God anan ginad bilaqan haqad in bilam ham. *Lo 6.4-5*

<sup>31</sup> Teq gunun gigerta na in kazaq ham.

Ni nihol anan ninad bilaqagta nazaqmo ni niyow anan ninad bilaqan haqad in bilam ham. *Wok Pris 19.18*

Gunun giger na in God ago daq dimdimunta bunmo giquriyamim in ameb diqta ham.

<sup>32</sup> Haqan mat Moses ago gunun hurit kamta na in Yesus bulon, Mat Iyah ham helmo ni dimunmo bilam ham. God amomo in Iyahta iyim osaqta ham. God araq haiq ham. <sup>33</sup> Ad i giqutilibmo teq i ginadibmo teq i gigo zawayibmo i God anan ginad bilaqdaq ham. Teq igmo gihol anan ginad bilaqagta nazaqmo i on mataw bunmo ginan ginad bilaqdaq ham. Daq giger na in mataw God ayon tamaz emad naw ugayta na bunmo giquriyamim in ameb diqta ham.

<sup>34</sup> In nazaq anad em hasim bilaqan Yesus huritim tubulon, Ni God ago maror sinsin diq ugim osaqta ham.

Ari Yesus in mataw na gigo susumun bunmo amenin anononmo eman mataw bunmo rabad in Yesus ulum waqnan a ta hi susumun ug yaqay.

*Krais ahol alulin ezaqta na ago Yesus Farisi susumun nag*

(*Matyu 22.41-46; Luk 20.41-44*)

<sup>35</sup> Ari Yesus Tempel agelin aduganib mataw suleq negad tuqos. Osad in bilam, Ezaq haqad mataw Moses ago gunun hurit kemiya na bilaqay, Krais in Devit atatin\* haqayta? ham. <sup>36</sup> Kwaziqmo God ago Bugaw Dimunta in Devit anad ugsa Devit in Krais anan bilam,

Iyahta in yaqgo Iyahta kazaq bulonim bilam ham. Ni ya iben iqabun ban kab ya imen emad ossa ya ningo bab giqemid nisen ahaqenib tiqiy bug daqay haqad in bilam ham. *Buk Song 110.1*

<sup>37</sup> Ari Devit-mo in Krais anan bilam, 'Yaqgo Iyahta' haqad in bilam ham. Nazaq iyan ezaq toneq Krais in Devit ago Iyahta iyeq teq in Devit atatin a ta idaq? ham. Haqan on mataw biyahta nab turiya na in Yesus ago gamuk huritim ginad tidimniyyi. Na ezaqgo Yesus in mataw aseseqta na gigo gamuk adanin qway bugta na ago iyan.

*Yesus in mataw Moses ago gunun hurit kemiya na gigo daq anan bilam*

(*Matyu 23.1-36; Luk 11.37-54; 20.45-47*)

<sup>38</sup> Ari Yesus mataw na suleq negad osim gibilan, Ne mataw Moses ago gunun hurit kemiya na gigo ne gihol waz naqmo hiqiyiy ham. In tubusan dimun diqta giholib emim dan muzad luwayta ham. Luwsa mataw gibiyad ginan 'mat ayah' haqsa in ginad diq dimniyaqta ham. <sup>39</sup> Mataw na bit humab wolaytab ban ulilibta nabmo osnan ginad bilaqagta ham. Ad in humab adidaqan inaqtan ogib garuruhab osnan hulosmo diq hulosaqta ham. <sup>40</sup> Teq in on waburta kat negad gigo bit samanmo waqayta ham. Ad in mataw gimeb God inaq gamuk sisaqmo bilaqim a lehayta ham, mataw gibiyad ginan dimun diqta haq daqay haqad ham. God hazir izir ayahta emdaqta nab teq mataw na in on mataw bunmo giquriyameq faq ayah diqmo tuwaq daqayta ham.

*Aw anaghan haiqta araq in God naw ug*  
(*Luk 21.1-4*)

<sup>41</sup> Ari teq Yesus Tempel agelin aduganib osad mataw gigo naw hunegan mani emayta abanab woqsa in gibiyad os. Ossa mataw ginaghan inaqtan na kabemmo boleq mani kabemmo giqem yaqay.

<sup>42</sup> Sa teq aw waburta araq anaghan haiqta bolim mani amikmikta gigermo hunag. <sup>43</sup> Hunegan Yesus ahol waqad in ago disaipel gibilenan agerab boliy. Bolan in gibilan, Ya helmo ne gibilenaiq ham. Aw waburta ahol anaghan haiqta ko in

\* **12:35:** Mak 10.47 nab teq ni gamuk 'Devit atatin' ka alulin ahol waqdaq.



mani amik diqta emim in on mataw mani kabemmo emiyta ko giquiryam bug ham. <sup>44</sup>Na ezaqgo mataw ko bunmo in gigo mani kabemmo usaqta na ago asitmo emiyta ham. Ari aw ko haiq ham. In aholib mani asitmo usta na bunmo em bugim in ago mani araq in didaq zayeq neqdaqta na haiq tiqiy ham.

## 13

*Yesus bilam, Tempel teq meqniydaq ham (Matyu 24.1-2; Luk 21.5-6)*

<sup>1</sup> Ari Yesus ago disaipel nenaq Tempel hulosisim lehadmo disaipel araq in Yesus tubulon, Mat Iyah ham gig aseseqta amalib bit dimdimunta giqemiyta ko ni gibiy ham. <sup>2</sup> Haqan Yesus bilam, Ni bit aseseqta ko gibiyaq e? ham. Gig ko bunmo teq wolzizilayeq gihunegid tuwoq bug daqay ham. Gig an amalib usayta ko teq muruwoqeq tiqmo bug daqayta ham.

*Yesus bilam, Afaqan kabemmo teq gwahtiqaq ham (Matyu 24.3-14; Luk 21.7-19)*

<sup>3</sup> Haqad in tilehiy. Lehim Yesus garah anan Oliv haqayta nab osad teq in ame lehim Tempel na ahol waqad osyaq. Ossa Pita, Jems, Jon teq Andru nazaqmo in agerab tuboliy. Bolim in tisusumun ugiy, <sup>4</sup>Yesus haqiy ni i gibilen haqiy. Kam gineh teq nagah ni anan bilamta na tugwahtiqaq? haqiy. Naga daqin diq gwahtiqaq i ahol waqad ginad emam nagah na tugwahtiqaq tonaq haqam? haqiy.

<sup>5</sup> Haqan Yesus gibilenim bilam, Ne gihol waz naqmo hiqiyiy ham. Luweq mat araq ne kat negdaq ham. <sup>6</sup> Mataw kabemmo teq boleq ya inan biyad bilaq daqay, Mat naqmo ya kawa haq daqay ham. Haqad in mataw kabemmo kat negsa in ginan helmo haq daqay ham.

<sup>7</sup> Ad mataw bab emsa ne gihulan huritad teq ta mataw pesanta bab emsa ne gibin hurit daqaymo ham. Huritad ne ginad haresmo emad hi rabiy ham. Daq nagan nazaq tugwahtiqaqta ham. Ta teq kam abebtanta na teqmo ham. Afaqan na bunmo gwahtiqeq le hiqiyid teq kam na tugwahtiqaq ham. <sup>8</sup> Na ezaqgo mataw en araq in eraqeq mataw saw araqabta nenaq an wol daqayta ham. Sa king araq ago dauh in king ta araq ago dauhta nenaq an wol daqaytamo ham. Saw haresmo og ahol woleq lehsa uliq saw asor zarow ayahta gwahtiqaqta ham. Daq nagan bunmo bilaqne aw agemab amun tubaysa loyinaqta nazaq nog iydaq ham.

<sup>9</sup> Ari negmo gihol waz naqmo hiqiyiy ham. Mataw teq ne giwazeq kaunsel gibenab giqem daqay ham. Ad in bit humab welayta nagab ne ginol titay daqay

ham. Ne ya inan helmo haqad imuzad luwayta na ago in ne giqemid ne king teq gavman aseseqta gimeb tur daqay ham. Turad teq ne nagah gimeb ahol waqiyta na awagamun tigibilen daqay ham. <sup>10</sup> On mataw ya iwagamun dimunta uliq saw bunmo a leheq gibilensa teq nagah ya anan bilayta na tugwahtiqaq ham.

<sup>11</sup> Ari in ne giwazeq giqad gavman gimeb lehid teq ne naga gamukin bilaq daqayta na ago ginadnad hi emiy ham. Gamuk bunmo ne bilaq daqayta na God tineqdaq ham. Kam nab in gamuk negdaqta nazaqmo ne bilaqiy ham. Nazaq iyan negmo diq gamuk na a hi bilaq daqay ham. Haiq ham. God ago Bugaw Dimunta inmo gamuk na ne giqezab tibilaqdaq ham.

<sup>12</sup> Kam nab teq mataw in gimaqaban giwazeq bab gibenab giqemid in ginol emid tumoq daqay ham. Sa gimaman in nazaqmo gigo onmin giwazeq bab gibenab giqem daqaymo ham. Ad onmin in nazaqmo ginenmaman gihar negad bab gibenab giqemid in ginol emid tumoq daqaymo ham. <sup>13</sup> Ya ihol abin ne giholib usaqta na ago on mataw bunmo gigem meqinta neg daqay ham. Ari on mataw zaway diq iyeq ossa le in gigo kam abebtanta iydaqta nab teq God in gilumsiheq ta giwazaqdaq ham.

*Yesus bilam, Jerusalem teq meqniydaq ham*

*(Matyu 24.15-28; Luk 21.20-24)*

<sup>14</sup> Haqad Yesus bilam, Teq nagah meqin diqta uliq saw meqin tonaqta na in ban a hi osnagta nab ossa ne ahol tuwaq daqay ham. (Mat gamuk ka ahol waqad bilaqtaqta na in anad em hasad bilaq sireqan.) Kam nab on mataw saw Judiya-ib os daqayta na in tukeq garah ban gwaheiy ham. <sup>15</sup> Sa mat bit ahuqunib ban osnantab osdaqta na in ogib hitiqeq tukeq lehanmo ham. In ago es nagah giwazgo bit aduganib lo hi gwahtiqaq ham. <sup>16</sup> Teq mat kabiyab luwdaqta na in ago aholsihen waqan uliqab muleqeq ta hi bolanmo ham. <sup>17</sup> Kam nab on gigem iyayta na teq on amun muturta sus ugayta na in timeqniy daqay ham. <sup>18</sup> Nazaq iyan ne God susumun ugid in kam meqinta na emid urom akamnib hi gwahtiqaq ham. <sup>19</sup> Kam nab mataw afaqan ayah diqmo tisor daqay ham. God nagah bunmo giqeman gwahtiqaqta nab iyim bo muran kam kabmo afaqan araq nazaqta a hi gwahtimta ham. Teq abeb afaqan araq nazaqta a ta hi gwahtiqaqmo ham. <sup>20</sup> Ari Iyahta kam meqinta na siqim diq hi emid on mataw bunmo tihiqiy bug nagiy ham. Teq inmo ago on mataw in gilumim aholyon giwamta na ginadin emad in kam na emid siqim tiqiydaqta ham.

<sup>21</sup> Kam nab mat araq ne gibileneq bilaqdaq. Ahol waqiy, Krais kawa osaq o Krais kowa osaq haqsa ne in aqez na hikidik huritiy ham. <sup>22</sup> Na ezaggo kraisi katiyta teq nantut katiyta kabemmo tugwahti q daqay ham. Gwahti qe q in daq zawayin ina qta kabemmo giqemad in kabiy lul araq diqta amo amo giqem daqayta ham. In nazaq emad teq in God ago on mataw in gilumim aholyon giwamta na gihureqnan diq ton daqayta ham. <sup>23</sup> Ne gihol waz naqmo hiqiyiy ham. Daq nagan bunmo a hi gwahti qsa kawa ya ne tigibilen kemai q ham.

*Mat Atatin teq ta boldaq*

(*Matyu 24.29-31; Luk 21.25-28*)

<sup>24</sup> Haqad Yesu s bilam, Kam nab afaqan ayahta na tihiqiyid teq

Ze q ame romri q iysa kalam a ta hi oydaq ham.

<sup>25</sup> Sa kaitab ulig milheseq ogib tuwo q daqay ham.

Woqsa naga h aseseqta zawayta ulilib usayta nagan gihol tuwol daqaymo ham.

<sup>26</sup> Kam nabmo Mat Atatin onqas amalib ose q ago zaway ayahta te q ahol anuwan ina qmo bolsa on mataw ahol tuwa q daqay ham. <sup>27</sup> Sa in angelo asor giqemid in og saw bunmo lehad inmo ago on mataw in gilumim aholyon giwaqan osayta na giwaqeq giwaqeq a lehad te q in tigiwaq bug daqay ham.

*Ay fik kam ulum kemaqta*

(*Matyu 24.32-35; Luk 21.29-33*)

<sup>28</sup> Haqad Yesu s bilam, Ay fik ago hib te q ne ginad tiqem has daqay ham. Ay na aben hur tonad atitoqin muturta gwahti qsa ne ahol waqad ginad emay, Ze q akaman tiqiyann tona q haqayta ham. <sup>29</sup> Nazaqmo te q abeb naga h ya anan bilayta ka bunmo tugwahti qsa ne ahol waqad ginad kaza q emiy ham. Naga h Yesu s anan bilamta na bolim sinsin tiqiy haqiy ham, bilaqne mat dan ezab turad bit aduganib gwahti qnan tona q naza q haqiy ham. <sup>30</sup> Ya helmo ne gibilena i q ham. On mataw muran kam kab osayta ka a hi mo q bugsa da q nagan bunmo tugwahti qda q ham. <sup>31</sup> Kait og ina q te q tihiqiyda qta ham. Ari ya qgo gamuk ka a hi hiqiyda q ham.

*Mat araq diq Yesu s ta boldaqta na aka man a hi hurit*

(*Matyu 24.36-44*)

<sup>32</sup> Ari te q Mat Atatin kam gine h diq ta boldaqta na te q in ze q adulan ganimtab bo gwahti qda qta na mat araq a hi hurit ham. Angelo Heven-ib osayta na te q God Atatin ina qmo in kam na a hi huritiymo ham. God amomo kam na ago tuhuritta ham.

<sup>33</sup> Naza q iyan ne saw waqad gihol waz naqmo hiqiyeq osiy ham. In boldaqta

akaman na ne a hi huritiy ham. <sup>34</sup> Na in bilaqne mat ayahta araq ago uliq hulosisaw saw araq pesantab lehaqta naza q nog i ydaq ham. Mat na a hi lehadmo in kabiy iberim ago kabibiy mataw amulikmulikmo negad gibilenan in ago naga h wamuzayta ham. Sa mat ayahta na in mat dan ez wamuzim tura qta na bulona q, Ni dan ez wamuz naqmo hiqiyeq os haqaqta ham. Haqad in gihulosim tilehaqta ham.

<sup>35</sup> Haqad Yesu s bilam, Naza q iyan ne gihol waz naqmo hiqiyeq osiy ham. Kam gine h bit anamren ta boldaqta na ne a hi huritayta ham. In taromab o tarom alihanib o saw hastitaysa o tarommo in boldaqta na ne a hi huritayta ham. <sup>36</sup> Luwe q in hidmo bole q ne ussa in gibiydaq ham. <sup>37</sup> Gamuk kawa ya ne gibilena i qta ka ya on mataw uliq saw bunmo gibilena i qmo ham. Ne bunmo gihol asawan woltayad osiy ham.

## 14

*Mataw marorta in Yesu s wol emid moqgo an adugan wazi y*

(*Matyu 26.1-5; Luk 22.1-2; Jon 11.45-53*)

<sup>1</sup> Ari abeb kam giger le tihiqiyid te q Juda gigo lotu akaman ayahta anan Pasova haqayta na te q bret yis haiqmo neqayta na akaman tugwahti qda q. Sa mataw tamaz emayta na te q mataw Moses ago gunun hurit kemiyta na in mataw gime titoneq Yesu s waze q wol emid moqda qta ago adante qin tinagun yaqay. <sup>2</sup> Na ezaggo in bilaqiy, I Pasova akamnib Yesu s ulalabmo a hi wazam haqiy. Luwe q mataw biyahta na gigem meqniysa bab araq ayahta wazid eraqda q haqiy.

*Aw araq Yesu s afaqinib masil ahuran dimunta wazbalan wom*

(*Matyu 26.6-13; Jon 12.1-8*)

<sup>3</sup> Ari Yesu s uliq Betaniy-ib mat araq kwaziqmo aholib mo q lepra usim tihiqiyta anan Saimon haqayta ago bitab os. Osad in didaq neqsa aw araq tubol. Aw na kagoh araq amikta gig anan alabasta haqay na sisooqim emiyta nab in masil ahuran dimunta anan nard haqayta anawun ayahmota tenim te q in wazim a bol. A bolim in aqez orqayim Yesu s afaqinib wazbalan tuwom. <sup>4</sup> Wazbalan woqsa mataw asor nab osiyta na gigem timeqniysa in ginadibmo bilaqiy, Nagaqgo aw ko masil dimunta ko abu uluma q? haqiy. <sup>5</sup> I masil ko mat araq ina q zaye q 300 kina naza q wa q nagta haqiy. Waqeq i mataw ginaghan haiqmo osayta na neg nagta haqiy. Haqad in aw na tuwad yaqay.

<sup>6</sup> Wadsa Yesu s bilam, Ne hulosisaw ham. Nagaqgo ne aw na afaqan ugay? ham. In ya ilowan tonad yaqmen da q dimun

diqta tiqem yag ham. <sup>7</sup> Tutimmo mataw ginaghan haiqta na ne nenaq osayta ham. Ossa ne gilumsih daqayta akaman kabemmo ham. Ari ya nenaq tuteqmo a hi osdaiqta ham. <sup>8</sup> Aw ka ya inadin emim in yaqmen emdaqta na kawa tiqem yag ham. In masil ya iholib amta ka in ya isan wastitayeq hodhodab iqemgo in kawa tiqam ham. <sup>9</sup> Ya helmo ne gibilenaiq ham. Mataw edobyaleheq ya iwagamun dimunta bilaqad in aw ka daq amta ka awagamun tibilaq daqaymo ham. Bilaqsa mataw huritad teq in aw ka anadin tiqem daqay ham.

*Judas in Yesus waqeq Juda gigo mataw marorta gibenab emgo bilam*

(Matyu 26.14-16; Luk 22.3-6)

<sup>10</sup> Ari kam nab disaipel 12 na gigo araq anan Judas uliq Kariyot-ib haqayta na in mataw tamaz emayta gigo aseseqta gigerab lehim gibilan, Ya Yesus waqeq ne gibenab tiqemdaiq ham.

<sup>11</sup> In nazaq bilaqan mataw aseseqta na huritim ginad tidimniyyi. Ginad dimniysa in Judas naw uggo tubuloniyy. Bulonan Judas huritim teq in Yesus waqeq mataw na gibenab emdaqta adanteqin araq dimunta tinagunyaq.

*Yesus ago disaipel nenaq Pasova abeb-tanta neqiy*

(Matyu 26.17-25; Luk 22.7-14, 21-23; Jon 13.21-30)

<sup>12</sup> Ari bret yis haiqmo neqayta na akaman tugwahtim. Kam nab in Pasova ayon sipsip amidon wol emayta. Nazaq iyan disaipel in Yesus tisuusumun ugiiy, Ni ninad i bit edob leheq ni Pasova adidaqan neqdaqta abanan wastitayam? haqiy. <sup>13</sup> Haqan Yesus in ago disaipel gigermo gibilan, Ne giger le uliq kob gwahtiqid teq mat araq reb ayuwun inaqa soreq a bo lehad in ne danib tigibiydaq ham. Mat naqmo ne muzeq inaq lehiy ham. <sup>14</sup> Leheq mat na bit edob gwahtiqdaqta nab ne loqegeq bit na anamren kazaq susumun ugiiy ham. Tisa bilam, Yaqgo disaipel nenaq Pasova adidaqan neqamta na ago bit adugan edowa? haqad ne buloniyy ham. <sup>15</sup> Ne nazaq bulonid teq in bit adugan araq ayahta ulilib usaqta na tigiqisihundaq ham. Bit adugan nab didaq neqayta anaghan bunmo usaqta ham. Nab ne leheq i bunmo Pasova adidaqan neqamta abanan wastitayiy ham. Haqad Yesus in giqeman tilehiy.

<sup>16</sup> Lehim uliq nab gwahtiqim in Yesus nahagah bunmo ginan gibilanta nazaqmo ahol tuwaqiy. Ahol waqad in nab Pasova adidaqan neq daqayta abanan tuwastitayiy. <sup>17</sup> An imisor diq tiqiyann Yesus ago disaipel 12 na nenaq didaq neqnan tilehiy. <sup>18</sup> Lehim in banab didaq neqad osad Yesus bilam,

Ya helmo ne gibilenaiq ham. Ne gilikmanib teq mat araq ya iwaqeq bab gibenab iqemdaq ham. Mat ya inaq araqqib didaq neqauqta naqmo ham.

<sup>19</sup> Haqan disaipel gihol afaqan tiqiysamo in amulik-mulikmo Yesus tisuusumun ug yaqay, Yaqmo ye? haq yaqay. <sup>20</sup> Haqsa Yesus gibilan, Ne disaipel 12 gilikmanib mat ya inaq degib aben woqaq naqmo ham. <sup>21</sup> Helmo diq ham. God ago mar Mat Atatin anan bilamta nazaqmo diq in dan muzeq tilehdaqta ham. Teq mat in Mat Atatin bab gibenab emdaqta na timeqniyy hasdaq ham. Mat na anen a hi em nagta in am ham.

*Yesus in ago disaipel bret teq wain ayun inaq nag*

(Matyu 26.26-30; Luk 22.15-20; 1 Korin 11.23-25)

<sup>22</sup> Ari in didaq neqad osad Yesus bret asor waqim God esey ugim in orqayim ago disaipel tinag. Negad in gibilan, Ne bret ka waqeq neqiy ham. Ka ya inon ham. <sup>23</sup> Haqad in wain agogin inaq waqim God esey ugim teq in negan in bunmo tuquluwiy. <sup>24</sup> Uluwan Yesus gibilan, Ka ya inedan God ago maror muturta na zaway ugdaqta ham. Ya ned ka on mataw kabemmo giwastitaynan haqad wazbaldaqta ham. <sup>25</sup> Ya ne helmo gibilenaiq ham. Ya wain ayun ka a ta hi uluwdaiq ham. Abeb ya God ago maror muturta aduganib osad teq ya wain ayun ka a ta uluwdaiq ham.

<sup>26</sup> Admo in lotu ago bar araq wazim huloadmo in uliq huloadim garah Oliv-ub tilehiy.

*Yesus bilam, Pita teq gileh yagdaq ham*

(Matyu 26.31-35; Luk 22.31-34; Jon 13.36-38)

<sup>27</sup> Lehad Yesus in ago disaipel gibilan, Ne bunmo ginad ya inan helmo haqayta na huload gileh tiyag daqay ham. Na ezaqgo God ago marib gamuk araq kazaq bilam ham.

Ya mat sipsip giwamuzaqta na wol emsa in ago sipsip haresmo tukeq tileh daqay haqad in bilam ham. *Sekaraya 13.7*

<sup>28</sup> Ari ya hodhodab eraqeq teq ya ameb saw Galiliy-ib tilehdaq ham.

<sup>29</sup> Haqan Pita bulon, Mataw ka bunmo in ginad helta na huload gileh nigsa ya haiq ham. <sup>30</sup> Haqan Yesus bulon, Ya helmo nibilenaiq ham. Tarom kab kurek ame gigerta a hi gayonsamo ni nime ezeqmanmo gileh tiyagdaq ham.

<sup>31</sup> Haqan Pita atoranmo bilam, Nab iyan ham. Mataw ya ninaq ginol emnan bilaqsa ya gileh a hi nigdaiq ham. Hikidik ham. Haqan disaipel bunmo gamuk nazaqmo bilaqiy.

*Yesus og Getsemaniy-ib God inaq gamuk am*

(*Matyu 26.36-46; Luk 22.39-46*)

<sup>32</sup> Ari Yesus ago disaipel nenaq le og araq awaqan dimunta anan Getsemaniy haqayta nab tugwahtiqiy. Gwahtiqim Yesus in ago disaipel gibilan, Ne kab osiy ham. Sa ya leheq God inaq gamuk emnan ham. <sup>33</sup> Haqad in Pita, Jems teq Jon giwaqim nenaq tilah. Lehad in ahol afaqan diq iysa ahol meqin diq tiloyinyaq. <sup>34</sup> Ad in gibilan, Ya ihol afaqan diq iysa ya tumoqnan tonaiq ham. Ne kab saw waqad osiy ham.

<sup>35</sup> Haqad in asitmo ta leh nog iyim in ogib woqim usad God tubulonyaq, God anad bilaqid in afaqan ka ya iholib walemdaq haqad. <sup>36</sup> In bilaqyaq, O kabay haqyaq ni ya imam haqyaq. Ni nagah araq a hi emdaqta a haiq haqyaq. Ya iholib afaqan ayahta ka ni walem haqyaq. Teq ni ya inad ka hi muz haqyaq. Ninmo ninad muz haqyaq.

<sup>37</sup> Haqad in muleqim ta lehim disaipel ezeqman na ussa in gibiy. Gibiyad in Pita bulon, Saimon ham ni nagaqgo usaq? ham. Ni asitmo saw waqad a hi osdaq e? ham. <sup>38</sup> Ne saw waqad God inaq gamuk emad osiy ham. Gamuk emad daq ne gilum waqdaqta na bo giholib gwahtiqsa ne hi woqgo haqad buloniy ham. Helmo ne ya inad muznan ginad bilaqqaqta ham. Teq ne gihol awaz meqin a haiq ham.

<sup>39</sup> Haqad in lehim a God ta bulon. Teko in God bulonta nazaqmo in a ta bulon ton. <sup>40</sup> Bulonim in muleqim ta lehim disaipel gime rursa ussa in gibiy. Gibiysa in kayeq ta iyim in gamuk araq bilaq daqayta hiqiytan in giqezmo hiqiyim tuqosiy.

<sup>41</sup> Sa Yesus ame ezeqmanta lehim teq ta bol. Bolim in gibilan, Ne ginamur emad us tutay ye? ham. Ne dimunmo tuqusiy ham. Ahol waqiy ham. Muran in Mat Atatin waqeq mataw meqinta gibenab em daqayta akaman tiqiy ham. <sup>42</sup> Ne eraqiysa i lehuq ham. Ahol waqiy ham. Mat ya iwaqeq bab gibenab iqemdaqta na bo tugwahtim ham.

*Judas Yesus waqim bab gibenab am*

(*Matyu 26.47-56; Luk 22.47-53; Jon 18.3-12*)

<sup>43</sup> Yesus nazaq gamuk bilaqad tursa hid naqmo disaipel 12 na gigo araq anan Judas haqayta na tubol. In bolsa mataw dauh biyahta baqir sebur wazim ad in inaq tuboliymo. Mataw tamaz emayta gigo aseseqta na teq Juda gigo mataw marorta na teq mataw Moses ago gunun hurit kemiya na in mataw na giqeman boliyta. <sup>44</sup> Ari mat Yesus waqeq bab gibenab emdaqta na in naga daqin emid in Yesus ahol waqad waz

daqayta na ago in teko tigibilanta. In bilam, Ya leheq mat nog ya wazeq ilawundaiqta naqmo ne wazeq bab mataw na gibenab emid in mat na wamuzeq ad lehiy ham.

<sup>45</sup> Nazaq iyan in hidmo Yesus agerab loqimmo tibilan, Tisa ham. Haqdamo in wazim tiqilawun. <sup>46</sup> Ilawunanmo mataw na eraqim Yesus tuwaziy. <sup>47</sup> Wazsa mat araq Yesus agerab turta na ago baqir hureq hasim wam. Waqim in tamaz mat danmebta ago kabibiy mat araq wolim adeksanmo qwatayan ogib tuwom. <sup>48</sup> An teq Yesus in bab mataw na gibilan, Ne baqir sebur giwaqim a boliyta ka ne mat rin tonaqta waznan boliy ye? ham <sup>49</sup> Kam kabemmo ya ne suleq negad nenaq Tempel-ib ossa ne ya a hi iwaziy ham. Teq daq kagan bunmo gwahtiqad in God ago mar tuwol net bugaq ham.

<sup>50</sup> Haqanmo disaipel bunmo Yesus hullosim titukiy.

*Mat araq minminta tuk*

<sup>51</sup> Disaipel tukim lehsa mat araq minminta ago tubusan dimunta husta amta na in Yesus muzim inaq lehsa mataw na ahol waqad tuwaziy. <sup>52</sup> Wazan haiq in giben lelhasadmo ago tubusan gibenab hullosadmo in abe aholmo tukim tilah.

*Mataw aseseqta Yesus amalib nan kabemmo emiy*

(*Matyu 26.57-68; Luk 22.54-55, 63-71; Jon 18.13-14, 19-24*)

<sup>53</sup> Ari mataw na Yesus wazim ad tamaz mat danmebta ago bitab tilehiy. Lehan mataw tamaz emayta gigo aseseqta na teq Juda gigo mataw marorta na teq mataw Moses ago gunun hurit kemiya na in bolim humab tuwoliy. <sup>54</sup> Sa Pita in Yesus muzim lehad teq in pesan nog lehyaq. Lehim in tamaz mat danmebta na ago bit agelin aduganib le gwahtiqim in mataw Tempel-ib hurmey gan turayta na nenaq faq iterad tuqos. <sup>55</sup> Ossa mataw tamaz emayta gigo aseseqta na teq Juda gigo kausel ayahta na amatawun bunmo in mat araq Yesus ago hib nan bilaqid teq in wol emid moqgo na tinagun yaqay. Ta teq in gamuk araq amalib Yesus wol em daqayta na ahol a hi waq yaqay. <sup>56</sup> Mataw kabemmo bolim Yesus amalib nan katiyta em yaqayta. Teq haiq in gigo gamuk katiyta na araقيبmo a hi iyyaq.

<sup>57-58</sup> Sa mataw asor turad in katiyim kazaq bilaq yaqay, Yesus kazaq bilaqsa i hurit haq yaqay. Yaqmo teq Tempel mataw gibenab emiyta ka wol inereq kam ezeqmanmo aduganib ya Tempel ta araq gibenab a hi em daqayta na wazid tiqer-aqdaq haqad in bilamta haq yaqay. <sup>59</sup> Teq gamuk in bilaq yaqayta na araقيب diq a hi iyyaqmo.

<sup>60</sup> Anmo tamaz mat danmebta na eraqim liqabmo turad in Yesus tisuusumun ug, Mataw ka bolim ni ninan gamuk bilaqayta ka in ezaq diq? ham. Ni gamuk ka araq amenin a hi emdaq e? ham. <sup>61</sup> Haqanmo Yesus aqez hiqiyim in mat na ago gamuk amenin araq a hi bilam. Sa tamaz mat danmebta na a ta susumun ug, Mat Iyah Ulilib Diqta na atatin mataw anan Kraiss haqayta na ninmo ye? ham. <sup>62</sup> Haqan Yesus bilam, Ege ham. Na yaqmo kawa ham. Teq Mat Atatin in God Awaz Meqin Diqta aben aqabun ban ossa ne ahol tuwaq daqay ham. Ahol waqsa in kaitab onqas inaq bolsa ne ahol tuwaq daqaymo ham.

<sup>63</sup> Haqanmo tamaz mat danmebta na era inmo aholib tubusan bulsireqim bilam, Mat araq in ayon nan araq ta hi bilaqan ham. <sup>64</sup> Mat ka God bilawunsa ne tuhuritiy ham. Ne in ayon naga gamukin bilaq daqay? ham. Haqan mataw bunmo bilaqiy, Na in daq meqin diq haqiy. Mat daq nazaq amta na in moq nagta haqiy. <sup>65</sup> Haqad mataw na gigo asor in Yesus tukusluw ug yaqay. Ad in tubusanib ame isihim wolad teq in bulon yaqay, Ni nantut iysun nog ninolaqta ka anan biy haq yaqay. Haqsa mataw tamaz emayta gigo hurmey na in Yesus waqim tuwoltitay yaqaymo.

*Pita Yesus gileh ug*

(Matyu 26.69-75; Luk 22.56-62; Jon 18.15-18, 25-27)

<sup>66</sup> Ari in Yesus nazaq tonsa Pita bit asisuranib ossamo tamaz mat danmebta na ago kabibiy aw araq tubol. <sup>67</sup> Bolim Pita faq iterad ossa in ahol waninunadmo bulon, Ni Yesus Nasaret-ibta na inaq luwta ham. <sup>68</sup> Haqan Pita bilam, Haiq ham. Ya ni gamuk bilaqayta na inad a hi emaiq ham. Ni nog diq anan bilaqay? ham. Haqad in asanib bit aqez ban le tugwahtim. [Gwahtiqsamo kurek araq tigayon.]

<sup>69</sup> An kabibiy aw na in Pita nab tursa ahol waqad in mataw nab turiyta na tigi-bilan, Mat ka in Yesus ago mat araq kawa ham. <sup>70</sup> Haqan Pita a ta bilam, Na ya a haiq ham. Haqan mataw in agerab turiyta na asitmo ta tur nog iyim bilaqiy, Helmo diq haqiy ni mat Galliy-ibta iyim iyan ni Yesus ago mat araq daqay haqiy. <sup>71</sup> Haqan Pita atoranno bilam, God Ulilibta ibiysa ya helmo bilaqiy ham. Ya mat na ago a hi huritta ne anan bilaqay ham.

<sup>72</sup> Haqanmo kurek ame gigerta tigayon. Gayonanmo Pita in Yesus gamuk bilamta na anadin tiqam. Yesus bilam, Kurek ame gigerta a hi gayonsamo ni nime eze-qmanmo gileh tiyagdaq ham. Pita gamuk na anadin emad in anad meqniysa gaqad tuqos.

## 15

*Mataw Yesus waqim ad Pailat ago hib lehiy*

(Matyu 27.1-2, 11-14; Luk 23.1-5; Jon 18.28-38)

<sup>1</sup> Ari tarommo diq mataw tamaz emayta gigo aseseqta na teq Juda gigo mataw marorta na teq mataw Moses ago gunun hurit kemiya na teq Juda gigo kaunsel ayahta na amatawun bunmo in humab wolim an amugan tuwaziy. An amugan wazim in Yesus irqurim wazim ad lehim Rom gigo maror saw Judiya wamuzim os-aqta anan Pailat haqay na tuqugiy. <sup>2</sup> Ugan Pailat Yesus tisuusumun ug, Ni Juda on mataw gigo king e? ham. Haqan Yesus bilam, Nawaqmo ni tibilam ham.

<sup>3</sup> Haqanmo mataw tamaz emayta gigo aseseqta na in Yesus amalib nan kabemmo tiqem yaqay. <sup>4</sup> Emsa Pailat in Yesus a ta susumun ug, Ni gamuk araq amenin a hi emdaq e? ham. Ni hurit ham. Mataw ko nan kabemmo nimalib tiqemay ham. <sup>5</sup> Haqan Yesus gamuk amenin araq diq a ta hi bilam. Nazaq iyan Pailat anad kabemmo emyaq.

*Pailat bilam, Yesus ayib dom woliy ham*

(Matyu 27.15-26; Luk 23.13-25; Jon 18.39-19.16)

<sup>6</sup> Ari ulig bunmo Juda gigo lotu akaman ayahta nab Pailat in mat araq irquran ossa hasid gwahtiqyaqta. Juda on mataw nog anan bilaqid Pailat naqmo hasid in gigo hib lehyaqta. <sup>7</sup> Teq kam nab mat araq anan Barabas haqayta na irquran os. Mat na in Rom gimuznan haqad ago dauh nenaq lehim Rom ginolad in mataw asor ginol amta amatin. Nazaq iyan Rom in mat na wazim a le mataw giqirquran osayta na nenaq eman osta. <sup>8</sup> Ari Juda mataw kabemmo Pailat agerab lehim tisuusumun ug, Pailat ago daq muzeq mat araq bit giqirquran os-aytab hasid gwahtiqdaq haqad. <sup>9</sup> Susumun ugan Pailat in gigo gamuk amenin emim bilam, Ne ginad ya Juda gigo king na hasid ne gigo hib lehdaq e? ham. <sup>10</sup> Na ezaqgo Pailat anad tiqam, Yesus mataw tamaz emayta gigo aseseqta ka gibayan woqiyta na ago in gigem meqniysa amalib nan emay ham.

<sup>11</sup> Teq haiq. Mataw tamaz emayta gigo aseseqta na in mataw biyahta na gigem wazan eraqsa in Pailat buloniy, Ni Barabas hasid i gigerab bolan haqiy. <sup>12</sup> Haqan Pailat gibilan, Nazaq na teq mat ne anan bilaqay, Juda gigo king haqayta ka ya ezaq tondaiq? ham. <sup>13</sup> Haqan in lileyim bilaqiy, Ayib dom wolid moqan haqiy. <sup>14</sup> Haqan Pailat bilam, Nagaqgo? ham. Mat ka naga daqin meqinta am? ham. Haqsa teq haiq. Mataw na dedibmo lileyim a ta bilaq toniy, Ayib

dom woliy haqiy. <sup>15</sup> Haqan Pailat in Juda mataw ginad emid dimniyan haqad in Barabas hasan in gigo hib tilah. Lehsa in ago mataw gibilenan in warig waqim hiklaquwim amalib Yesus tuwoltitayiy. Woltitayim hulosan Pailat in Yesus ayib dom wolgo haqad ago mataw bab emayta na gibenab tiqam.

*Rom gigo mataw bab emayta na Yesus bilawuniy*

(Matyu 27.27-31; Jon 19.2-3)

<sup>16</sup> Ari mataw bab emayta na in Yesus waqim ad Pailat ago bitab lehim in bit na ago gel aduganib ad tugwahtiçiy. Gwahtiçim in giyogniz bunno gibilenan bo humab tuwoliy. <sup>17</sup> Humab wolim in tubusan araç sisaqta kakaqta amalib Yesus ahol isihim teq in am araç اساسuqin inaqta tal tonim king ago balaw nogta afaçinib emiy. <sup>18</sup> Emim teq in eraçim Yesus buloneq bilaq yaqay, Mat ayah haq yaqay, ni Juda gigo king-mo diq haq yaqay.

<sup>19</sup> Haqadmo in tuçir araç waqim afaçin wolad tukusluw ug yaqay. Kusluw ugad in gibakbakan ulum laquwim turad bilaq yaqay, Maror haq yaqay i ni nibin tisorauç haq yaqay. <sup>20</sup> Ari in Yesus bilawunim huloadmo in tubusan kakaqta na hasim waqad inmo ago tubusan na aholib ta em ugiy. Em ugiy teq in ayib dom wolnan haqad waqim ad tilehiy.

*Mataw Yesus ayib dom woliy*

(Matyu 27.32-44; Luk 23.26-43; Jon 19.17-27)

<sup>21</sup> Ari in Yesus waqim a lehsa Aleksanda ayow Rufus inaq gimam Saimon uliq Sairin-ibta na in uliqab bolad luwsa bab mataw in abe yahad bulonan in Yesus ulumsihim ayon ay tisor ug. Yesus ago zaway tihiqiy bugan iyan. <sup>22</sup> Sa bab mataw na in Yesus waqim ad garah akululqan araç anan Golgota haqaytab tilehiy. Gamuk Golgota na alulin 'Gifaçin Agolgolan' haqayta. <sup>23</sup> A lehim in wain ayun teq masil anan mir haqayta na inaq buliyim Yesus ugiy. Ugan teq haiq. Yesus tuhulos. <sup>24</sup> Anmo in Yesus ayib dom tuwoliy. Dom wolim huload teq in nog Yesus ago tubusan waqdaqta na ahol waçnan haqad in gig amikmikta hunegad tubusan nagan iberim giholyon tuwaçiy.

<sup>25</sup> Ari tarommo 9 kilok nazaq in Yesus ayib dom woliy. <sup>26</sup> Teq Yesus naga daçin eman in ayib dom woliyta na agamukan in mar tonim ulilib ay nabmo tuçotherniy. Gamuk na in kazaq mar toniy.

JUDA GIGO KING

<sup>27</sup> Teq Yesus agerab in mataw rin tonayta gigermo ayib dom giwoliymo. Dom wolan araç Yesus aben aqabun ban tursa araç aben anasaran ban turyaq. [ <sup>28</sup> Nazaq iyan daq na in gamuk araç God ago marib

usaqta na tuwol net bug. Gamuk na bilam, In mat na anan mat gunun othasaqta araç haqiy ham.]

<sup>29</sup> Sa on mataw bo lehad in Yesus ahol waqad bilawun yaqay. Bilawunad gifaçin lelad teq in bilaq yaqay, Oyeq! haq yaqay. Mat Tempel wol inereq kam ezeqmanmo aduganib wazid a ta eraçdaqta na amatin ni haq yaqay. <sup>30</sup> Nazaq iyan ni niwaz meqniyeq ninmo nihol ulumsiheq ay na huloseq gehitiq haq yaqay.

<sup>31</sup> Sa mataw tamaz emayta gigo aseçeta na teq mataw Moses ago gunun hurit kemiya na in nazaqmo Yesus bilawunad in an bulonim kazaq bilaq yaqay, In mataw asor gilumsihan a hi moçiyta haq yaqay. Ta teq inmo ahol ulumsihgo ago zaway haiqta haq yaqay. <sup>32</sup> Ari in Isrel gigo king anan Kraiç haqayta na iyeq teq in ay na huloseq gehitiqan haq yaqay. Gehitiqid teq i ahol waqad anan helmo tihagam haq yaqay. Sa mataw giger Yesus inaq ayib dom woliyta na in inaqmo Yesus bilawun yaqaymo.

*Yesus mom*

(Matyu 27.45-56; Luk 23.44-49; Jon 19.28-30)

<sup>33</sup> Ari zeq gabolim liqabmo tiçiyisa saw bunno romriç iyaç le 3 kilok imisor tiçiy. <sup>34</sup> Ad 3 kilok imisor nazaq tiçiyanno Yesus dedibmo lileyim bilam, *Eloy Eloy lama sabaktaniy* ham. Gamuk na in kazaq bilam, Yaqgo God yaqgo God nagaçgo ni ya ihulosaç? ham.

<sup>35</sup> Haqanmo mataw asor nab turiyta na in Yesus aqez huritim bilaçiy, Huriçiy haqiy. Ko in Elaija lilewunaç haqiy. <sup>36</sup> Anmo mat araç sibim lehim tubusandek waçim tuçir amotnib am wazim teq in wain ayun agon iyaç na ulum turim Yesus ateb tiqam, in sisowdaç haqad. Emim teq in bilam, Sa i ahol waqad teq ham. Elaija boleq walemid tiqdaç o haiç ham.

<sup>37</sup> Haqanmo Yesus dedibmo ek tonimmo tumom. <sup>38</sup> Moçanmo tubusan ayahta Tempel-ib othenan usta na ulilib liqabmo tartayim giger iyim bo ogibmo tuwom. <sup>39</sup> Teq bab mataw gigo ayahta saw nab Yesus wamuzim turad in Yesus nazaq moçsa ahol waqad bilam, Helmo diq ham. Mat ko in God atatin ham.

<sup>40</sup> Sa on asor pesanmo turad teq in nagaç na ahol waqad turiy. In gilikmanib Mariya uliq Magdala-ibta na teq Jems ayow Josep inaq ginen anan Mariya haqayta na teq aw araç anan Salome haqayta na in nab turiy. <sup>41</sup> Kwaziçmo Yesus saw Galiliy-ib ossa on na in muzad ulumsihad luw yaqayta. Teq on kabemmo Yesus inaq Jerusalem-ub boliyta na in nab turiymo.

*Yesus moqan asan hodhodab a lehiy*  
(*Matyu 27.57-61; Luk 23.50-55; Jon 19.38-42*)

<sup>42-43</sup> Ari kam Yesus momta na in Juda gigo lotu ayon nagah wastitayayta na akamnib in momta. Babeq na Juda gigo lotu akaman diq na tugwahtiqdaqta. Nazaq iyan Yesus momta kam nab imisor tiqiysa uliq Arimatea-ib mat araƒ anan Josep haqayta na bolim Pailat ago hib tilah. Mat na in Juda gigo mat marorta araƒ teq in abin inaƒta. In inaƒqmo God ago maror og kab gwahtiqsa in ahol waqnan haqad amen emyaƒta. In awaz meqniyim lehim Yesus asan waƒeq a le yay tongo Pailat tisusumun ug. <sup>44</sup> An Pailat in Yesus momta na huritim anadnad am. Anadnad emim in ago mat bab emaqta araƒ bulonan bolan in tisusumun ug, Yesus tumom e? ham. Haqan mat na bilam, Yesus tumom ham. <sup>45</sup> Pailat in mat na gamuk bilaƒan huritad teq in Josep bulon, Ari ni Yesus asan tuwaqdaq ham. <sup>46</sup> Haqan Josep le tubusan araƒ husta tizay. Zayim a lehim in Yesus asan walemim ogib eman ussa teq in tubusan husta na amalib tiqil ton. Il tonim a lehim mataw gig qwayan hodhod iyta na amuganib tiqam. Nab emim teq in gig araƒ otbuliyan bo hodhod aƒez tiqitum. <sup>47</sup> Sa Mariya uliq Magdala-ibta na ayow Josep ta araƒ na anen Mariya inaƒ in giger nab turad mat na Yesus asan hodhodab emsa in ahol tuwaqiy.

## 16

*Yesus hodhodab eram*

(*Matyu 28.1-8; Luk 24.1-12; Jon 20.1-10*)

<sup>1</sup> Ari Juda gigo lotu akaman na tihiqiyan Mariya uliq Magdala-ibta na teq Jems anen Mariya teq aw anan Salome haqayta na in nagah asor ahuran dimun diqta tizaiy, in hodhodab a leheq Yesus asanib emnan haqad. <sup>2</sup> Zayim Sande tarommo in hodhodab tilehiy. <sup>3</sup> Lehada in an bulonim bilaƒiy, Nog teq i gilumsiheq hodhod aƒezab gig otbuliyyaq? haqiy.

<sup>4</sup> Haqadmo in gime lehim hodhodab gig ayahta na tuƒotbuliyan hodhod adek ban lehim ussa in ahol waqiy. <sup>5</sup> Ahol waqad in lehim hodhod amuganib gwahtiqimmo mat araƒ minminta aholib tubusan husta emim ossa in ahol waqiy. Ahol waqad in tirabiy.

<sup>6</sup> Rabsa mat na gibilan, Ne hi rabiy ham. Ya tuhurit ham. Ne Yesus Nasaret-ibta mataw ayib dom wolan momta naqmo ahol waqnan boliy ham. Mat na tiqeram ham. In kab haiq ham. In asan eman usta asawan ka ne ahol waqiy ham. <sup>7</sup> Ad ne leheq disaipel bunmo gibilenad ne Pita inaƒqmo buloniy ham. Yesus ameb Galiliy-ib

tilehaq haqiy ham. Ne nab leheq teq Yesus ahol tuwaq daqay haqiy ham. Kwaziqmo in ne gibilanta nazaq haqad ne gibileniy ham.

<sup>8</sup> Haqan on na gihol ritenim harara nemsas in hodhod hulosisim gwahtiqim tukim tilehiy. Lehada in rab titayad mat araƒ a hi buloniy.

*Mariya uliq Magdala-ibta na Yesus ahol wam*

(*Matyu 28.9-10; Jon 20.11-18*)

<sup>9</sup> Ari kam nab Sande tarommo Yesus hodhod hulosisim in danmab Mariya uliq Magdala-ibta na ago hib tugwahtim. Kwaziqmo Yesus in aw na ago bugaw meqinta 7 gimuzta. <sup>10</sup> An teq Mariya lehim mataw Yesus inaƒ luwiya na gaƒad ginadnad emad ossa in gibilan, <sup>11</sup> Yesus hodhodab eraƒim ossa ya ahol tuway ham. Haqan mataw na Mariya ago gamuk huritim anan helmo a hi haqiy.

*Disaipel gigermo danib Yesus ahol waqiy*

(*Luk 24.13-35*)

<sup>12</sup> Abeb disaipel giger Jerusalem hulosisim lehsa Yesus ahol awaƒan lul araƒ diq iyim in gigerab gwahtim. <sup>13</sup> Gwahtiqan giger na muleqim ta lehim disaipel ta asor na gibilenan in helmo a hi haqiy.

*Yesus in ago disaipel kabiy nag*

(*Matyu 28.16-20; Luk 24.36-49; Jon 20.19-23; Aposel 1.6-8*)

<sup>14</sup> An abeb disaipel 11 na didaq neƒad ossa Yesus in gimeb gwahtim. Gwahtiqim in ginadad gibilan, Ne nagaqgo on mataw ya ibiyiyta na in bo ne gibilansa ne ginad soƒotim ussa ya inan helmo a hi haqiy? ham. <sup>15</sup> Haqad in gibilan, Ne og saw bunmo leheq ya iwagamun dimunta na on mataw bunmo gibileniy ham. <sup>16</sup> Mat ya ihol awagamun anan helmo haqad yuw huzdaqta na God in mat na waqid ingo tiqiydaq ham. Ari mat ya inan helmo a hi haqdaqta na God in mat na emid saw meqintab tilehdaq ham. <sup>17</sup> Sa God in mataw ya inan helmo haq daqayta na gibenab daq kazaq tiqemdaq ham. In ya inanib bugaw meqinta tigimuz daqay ham. Teq uliq amo amo gigo nan ginadib bolsa in gamuk tibilaq daqay ham. <sup>18</sup> In nagah ahulinaqta ahol a hi waƒeqmo wazid gimugid a hi moq daqay ham. Ad in nagah uluwim moqayta na ahol a hi waƒeqmo uluweq a hi moq daqaymo ham. Teq in mat moqayta aholib giben emeq wazsa mat na ago moq tihiqiydaq ham.

*God Yesus waqim ad Heven-ib tugwalah*  
(*Luk 24.50-53; Aposel 1.9-11*)

<sup>19</sup> Ari Iyahta Yesus gamuk na gibilen bugan tihiqiyan teq God in waqim ad Heven-ib tugwalah. Gwalehim eman in God aben aqabun ban tuqos wom. <sup>20</sup> Os woqim ossa in ago disaipel og saw bunmo lehad in Yesus awagamun dimunta na on mataw gibileneq gibileneq tileh yaqay. In nazaq emad luwsa Iyahta in nenaq kabiy tiqemyaqmo. Sa disaipel Yesus awagamun bilaqsa God inmo daq azawayin inaqta emsa on mataw ahol waqad bilaq yaqay, Wagam na in hel diqtaqmo haq yaqay.



## Luk o Yesus awagamun Luk mar tonta Gamuk ameb lehaqta

Luk in mat araq anan Tiyofilus haqay na ago anad helta ulumsihnan haqad Yesus awagamun dimunta ka mar ton ug. Luk ayow Tiyofilus inaq in Juda mataw a haiqta. Teq Luk anad am, Yesus in Juda on mataw teq on mataw en ta asor Juda a haiqta nagan inaqmo gilumsiheq ta giwaqnan haqad bolta ham. Nazaq iyan Tiyofilus in Yesus awagamun bunmo tuhurit kemdaq haqad in ayon wagam ka wastitayimmo mar tonta.

Teq Yesus awagamun asor Matyu ayow Mak inaq a hi mar toniyta na kabemmo Luk ago wagam kab gimar tonan usaqta. Yesus amunib ossa daq asor in aholib gwahtimta awagamun na teq aw danatabta araq Yesus asen suholta awagamun na teq mataw giger uliq Emeus gigo dan ban Yesus ahol waqiyta awagamun na Luk amomo in wagam nag gimar tonta. Ad nazaqmo Yesus ago gamuk awowun asor in bilamta na Luk amomo mar tonmo. Amun minminta amam hulosis lahta ago gamuk awowun na teq Mat araq ago nagh kabemota na ayow Lazarus inaq gigo gamuk awowun na teq Samariya-ib mat araq in ago bab anan anad meqniyta ago gamuk awowun nagan in Luk amomo ago wagam kab giqusaqta.

Yesus ago kabiy alulin tiqemnan haqad in on mataw kazaq gibilan, God ago Bugaw Dimunta ya iholib usad zaway yagsa ya God ago gamuk dimunta on mataw meqin diq osayta na gigo hib tibilaqnan ham (Luk 4.18-19 nab ni ahol waq). An helmo diq Luk ago mar kab on mataw afaqan haresmo sorsa Yesus in ginan anad meqniysa in gilumsihim gidimun tonta na agamukan kabemmo giqusaqta.

Luk in Yesus awagamun dimunta ka mar tonim teq abeb in wagam ta araq Aposel Yesus Ago Kabiy Emiyta Giwagamun na in mar tontamo.

### *Luk wagam ka Tiyofilus ayon mar ton*

<sup>1-2</sup> Mat ayah Tiyofilus, mebmemo God in ago on mataw gimen daq aseseqta eman i gilikmanib gwahtiqsa mataw asor in gimeb ahol waq bugim teq awagamun bilaq yaqayta. Bilaqad in wagam na akabiyan emad luwad le in i on mataw abeb gwahtiwa i gigo hib wagam na tibilaqiyimo. Bilaqsa mataw ta asor kabemmo

in wagam anamreniz na gigez muzinim nagh na awagamun mar ton waqiyta.

<sup>3</sup> Nazaq iyan ya inaqmo wagam na tondaiqmo haqad inad emta. Inad emim ya wagam na agamukan bunmo alulin ulum muzad sisaqmo tiluw. Luwim ya daq bunmo gwahtiqiyta na ago tuhurit kemim teq ya wagam ka wastitayimmo mar tonim ninmen eman nawa lehaq. <sup>4</sup> Wagam ka mataw nibilensa ni tuhuritta. Teq in wagam hel diqta nibileniyta na ago ni hurit kemdaq haqad ya ninmen gamuk ka mar tonim nawa eman leh nigaq.

## On giger Elisabet ayow Mariya inaq gigem iyim amun emiyta giwagamun

*God ago angelo Sekaraya bulonim bilam, God teq amun matta araq tinigdaq ham*

<sup>5</sup> Ari king Herot saw Judiya-ib on mataw giwamuzim ossa kam nab mat araq God ayon tamaz emaqta anan Sekaraya haqayta in os. Mat na in tamaz mataw gidauhan araq anan Abiya haqayta na gigo araq. Sa in awe anan Elisabet haqayta. Aw na in tamaz mat aqen diqta anan Aron haqayta na anaynayin araq. <sup>6</sup> Sekaraya awe inaq in Iyahta ago maror agamukan bunmo teq in ago gunun bunmo muzinad in giholib daq araq ananin waq daqayta haiq iysa in God ameb titnonimmo os yaqayta. <sup>7</sup> Teq Elisabet in aw nignigta iyim iyan in aduw inaq gigo amun haiqmo os yaqayta. Ad in giger adinowan diq tiqiyimo.

<sup>8</sup> Ari kam araqab Sekaraya ago dauhta na gigo kam tugwahtiqan Sekaraya uliq Jerusalem-ub lehim God ameb tamaz emgo akabiyan tiqemyaq. <sup>9</sup> Emad in ago dauh nenaq tamaz em ago adan muzinim in gig amikmikta hunegan Sekaraya anan gwahtiqan in Iyahta ago bit adugan Tawonta nab le tugwahtim, in faq aqasin ahuran dimunta gwalaqta ulamad God ayon tamaz emnan haqad. <sup>10</sup> Sa faq aqasin ahuran dimunta ulamayta akaman nab on mataw kuluwmo asanib humab emim in God bulonad titur yaqay.

<sup>11</sup> Tursa Sekaraya Tempel aduganib ago kabiy emad in Iyahta ago angelo araq faq aqasin ahuran dimunta gwalaqta abanan aqabun ger nab tursa in ahol tuwam. <sup>12</sup> Ahol waqad in anadnad emsa rab tuqulum netyaq. <sup>13</sup> Samo angelo na bulonim bilam, Sekaraya ham ni hi rab ham. Ni amun araq waqnan haqad God susumun ugan in ni niqez tuhurit ham. Ni niwe Elisabet teq amun matta araq tiqemdaq ham. Emid teq ni anan Jon haqad biydaq ham.

<sup>14</sup> Ni amun na ahol waqad ni ninad dimniysa nigem tidimniydaqmo ham. Sa on mataw kabemmo in ningo amun na anan ginad tidimniy daqaymo ham. <sup>15</sup> Na ezaqgo ham amun na in Iyahta ameb abin inaq idaq ham. In wain ayun teq yuw atoranta nagan a hi uluwdaq ham. Teq in anen agemab ussamo God ago Bugaw Dimunta in aholib tuboldaq ham. <sup>16</sup> Bolid teq abeb in ayah iyeq in Isrel on mataw kabemmo ginad buliyid in gigo Iyahta God ago hib muleqeq ta leh daqay ham. <sup>17</sup> Teq in anad Elaija anad nog iyeq in Elaija ago zawayibmo Iyahta ayon dan wastitaynan ameb lehdaq ham. Leahad in onmin ginenmaman gigem buliyid in gigo onmin ginadin a ta em daqay ham. Ad in mataw God ago nan a hi huritayta na gigem buliyid in mataw titnonta gigo ginad dimdimunta tuhurit daqay ham. Ningo amun na in nazaq Iyahta ayon on mataw gidauhan araq gihumab wolid ossamo Iyahta boleq in nenaq ginad dimniysa tuqos daqay ham.

<sup>18</sup> Haqan Sekaraya in angelo bulon, Ezaq teq ya ningo gamuk na anan helmo haq-daiq? ham. Ya mat nenqab tiqiy ham. Sa ya iwe nazaqmo aw nenqab tiqiygo ham. <sup>19</sup> An angelo amenin emim bilam, Ya Gebriyel ham. Ya God anognib turaiqta ham. God-mo ya iqeman ya gamuk dimunta ka a bo ni tinibilenaiq ham. <sup>20</sup> Ni hurit ham. Yaqgo gamuk ka akaman gwahtiqid teq in anon tiqemdaq ham. Ta teq ni yaqgo gamuk ka anan helmo a hi bilam ham. Nazaq iyan muran diq kabmo ni niqez hiqiyeq ni gamuk a ta hi bilaqdaq ham. Ni nazaq niqez hiqiyeq gamuk a hi bilaqad ossa le gamuk ya nibilenta ka tugwahtiqid nab teq ni niqez inaq ta idaq ham.

<sup>21</sup> Ari on mataw asanib God inaq gamuk emad tur yaqayta na in Sekaraya amen eman haiq in ginad kabemmo tiqem yaqay. Sekaraya ezaq diq tonad Tempel aduganib sisaqmo luwaq? haq yaqay. <sup>22</sup> In nazaq ginadnad emad tursamo Sekaraya bo asanib tugwahtim. Gwahtiqim in aqez tihiqiyian in gamuk araq gibilengo haiq. Nazaq iyan on mataw na ginad tiqemiy, Sekaraya naqagag lul araq diqta Tempel aduganib ahol tuwam haqiy. Samo Sekaraya aqez tihiqiyian in kabiyakibmo on mataw na gibilenaq.

<sup>23</sup> Ari Sekaraya ago kabiy akaman na tihiqiyian in ago uliqab muleqim ta lah. <sup>24-25</sup> Lehim in awe Elisabet inaq usan awe agem tiqiy. Agem iyim in kalam abaynaginmo ulilemim bit aduganib tuqos. Osad in bilaqyaq, Iyahta nob yagim tiqidimun ton haqyaq. Idimun tonim in ya imebay on mataw gimeb usta na tuwalam haqyaq.

*Angelo Gebriyel Mariya bulon, Teq ni Yesus emdaq ham*

<sup>26</sup> Ari Elisabet agem iyim ossa kalam 6 nazaq tihiqiyian God in angelo Gebriyel bulonan in saw Galiliy-ib uliq araq anan Nasaret haqaytab tilah. <sup>27</sup> Lehim in aw araq barasta ago hib tugwahtim. Aw na anan Mariya haqayta. In Devit ago asenlulibta araq. Teq in mat anan Josep haqayta na tuwaqdaq haqad anan bilaqan osyaqta.

<sup>28</sup> Ossa kam nab angelo Gebriyel gwahtiqim Mariya bulon, Aw ni nawa osaq e? ham. Iyahta agem dimunta nigad in ni ninaq osaq ham. <sup>29</sup> Haqan Mariya in angelo gamuk bilamta na huritim ahol riten lam. Ritenad in anadibmo bilam, Gamuk ka adugan ezaq diqta ago angelo bilam? ham.

<sup>30</sup> Haqan angelo bilam, Mariya ham ni hi rab ham. God agem dimun diqta ni nigaq ham. <sup>31</sup> Ni hurit ham. Ni nigem iyeq teq ni amun matta araq tiqemdaq ham. Emeq ni anan Yesus haqad biydaq ham. <sup>32</sup> Amun na in mat abin ayah diqta iyeq osdaqta ham. Ossa mataw in anan God Ulilib Diqta atatin haq daqay ham. Iyahta God in amun na emid in ases Devit king iyim osta nazaqmo in king iyeq tuqosdaqmo ham. <sup>33</sup> Osad in Jakob asenluliz Isrel on mataw giwamuzad in king kuluwakuwmo tuqosdaqta ham. Osad in ago kam a hi hiqiydaqta ham.

<sup>34</sup> Haqan Mariya in angelo bulonim bilam, Nagah na ya iholib ezaq diq teq gwahtiqdaq? ham. Ya mat araq a hi wayta ham. Ad ya mat araq asit inaq a hi ustamo ham. <sup>35</sup> An angelo amenin emim kazaq bulon, God ago Bugaw Dimunta ningo hib tuboldaq ham. Sa God Ulilib Diqta ago zaway tiniqisih bugdaq ham. Niqisih bugid teq amun na ni nigemab tugwahtiqdaq ham. Ningo amun tawonta na ahol alulin nazaq iyid teq mataw in anan bilaq daqay, God-mo atatin haq daqay ham. <sup>36</sup> Ni ninad em ham. Ni ninedan araq Elisabet na in adinowan tiqiyta teq muran amun matta araq in agemab usaq ham. Kwaziqmo mataw in anan bilaq yaqay, Aw nignigta amun a hi emdaqta haq yaqayta ham. Teq haiq ham. Muran in agem tiqiy ham. Agem iyim in ago kalam 6 nazaq tihiqiy ham. <sup>37</sup> Nazaq iyan God in nagah araq a hi emdaqta a haiq ham. <sup>38</sup> An Mariya bilam, Ni hurit ham. Iyahta ago kabibiy aw ya kawa osaiq ham. Ni ya ibilanta nazaqmo in ya iholib tiqemdaq ham. Haqan angelo huritadmo in Mariya hulosis tilah.

*Mariya le Elisabet ahol wam*

<sup>39</sup> Ari kam nabmo Mariya hidmo eraqim in Elisabet ahol waqnan haqad tilah. Lehim in saw Judiya-ib Elisabet

ago uliq garah ban usaqta nab tugwah-tim. <sup>40</sup> Gwahtiqim in Sekaraya ago bit aduganib loqim awe Elisabet ahol waqad “Zeq dimun” tuqug. <sup>41</sup> Ugan Elisabet in Mariya aqez huritsamo amun agemab usta na tubaytun. Samo God ago Bugaw Dimunta in Elisabet aholib ayahmo tubol. <sup>42</sup> Bolan in lileyim atoranmo bilam, On bunmo gilikmanib God agem dimun diqta ninmo tinigaq ham. Ad amun nawa nigemab usaqta na God in agem dimunta tuqugaqmo ham. <sup>43</sup> Ya aw dimun a haiq ham. Teq ni yaqgo Iyahta anen ham. Doq tonnan ni yaqgo hib ya ibiynan bol? ham. <sup>44</sup> Ya ni niqez huritsamo ya igemab amun usaqta ka anad dimniysa tubaytun ham. Na ago ya ningo tuhurit kemim kazaq nibilenaig ham. <sup>45</sup> Aw ni ninad am, Helmo Iyahta ibilanta nazaqmo in tiqem yagdaq haqad ni ninad am ham. Nazaq iyan ni tidimniyim osaq ham.

### *Mariya ago bar*

<sup>46-48</sup> Haqan Mariya bilam,

Ya God ago kabibiy awmo ham.

Ya ibin haiqta teq God agem dimunta yag ham.

Nazaq iyan ya inad teq idugan bunmo Iyahta abin tiqiluwaig ham.

God ya ilumsihim iwaqan ya dimunmo osad igemabmo diq ya in anan inad tidimniyaq ham.

Muran teq abeb on mataw dauh bunmo ya inan bilaq daqay,

Aw naqmo Iyahta in agem dimunta ugan in tidimniyim osta haq daqay ham.

<sup>49</sup> God ago zaway ayahmo diq iyan in yaqmen naghah ayahta tiqam ham.

In ago daq bunmo dimunmo iyim titnon-immo lahta ham.

<sup>50</sup> On mataw God wazinad ahaqenib ossa in ginan anad meqniyaqta ham.

Ad in mataw na gigo onminta teq onmin na giduganib onminta na ginan anad meqniysa in ago daq na nazaqmo tileh tutdaqta ham.

<sup>51</sup> In kabiy awaz meqinta kabemmo tiqamta ham.

Emad in mataw igmo ag haqayta na gimuzan haresmo tilehiy ham.

<sup>52</sup> Ad in king giwaz meqinta giwazan woqsa in mataw gibin haiqta na giqeman in mataw gibin inaqta na gigo ban tuwaqiy ham.

<sup>53</sup> In naghah dimunta kabemmo mataw ginaghan haiqta na negan giyuninsa in ta mataw ginaghan kabemmota na gimuzan samanmo tilehiy ham.

<sup>54-55</sup> In i gisesan hel diqmo gibilenim bilam,

Ya Abraham teq in ago dauh abeb bol daqayta na tuteqmo ya inad tinegdaiq haqad in bilamta ham.

Ad muran in gamuk bilamta na anadin a ta emad in ago on mataw Isrel tigilum-sihaq ham.

In gamuk bilamta nazaqmo diq in muzinin tiqemaq ham.

<sup>56</sup> Ari Mariya in Elisabet inaq kalam ezeqman nazaqmo osim teq in ago uliqab muleqim ta lah.

### *Elisabet in ago amun Jon am*

<sup>57</sup> Ari Elisabet amun emgo akaman tug-wahtiqan in amun matta ara q tiqam.

<sup>58</sup> Eman Iyahta in Elisabet anan anad ayahmo meqniysa amun uqta na ago Elisabet asenlul teq in ayogniz tuhuritiy. Huritim in Elisabet inaq ginad tidimniy yaqay.

<sup>59</sup> Sa abeb amun na ago kam 8 nazaq tiqiyar teq mataw in amun ahol abatan asan urotnan tuboliy. Bolim in amun aholnan ugnan haqad in amun amammo anan ugnan bilaqiy. <sup>60</sup> Bilaqan teq amun anen bilam, Haiqqam ham. In anan Jon-mo usdaqta ham. <sup>61</sup> Haqan mataw na buloniy, Ni nisenlul ara q aholnan nazaqta haiq haqiy.

<sup>62</sup> Haqad in ta amun amam kabiyakibmo susumun ugiy, I amun ka anan doqagta biyam? haqiy. <sup>63</sup> Haqan amam kabiyakibmo gibilenan in ay anabun ara q teq zamor asor ugan in gamuk kazaq mar ton. In anan Jon ham. An mataw na gamuk na ahol waqad gihol riten lam. <sup>64</sup> Sa muran diq nawaqmo Sekaraya aqez hiqiyim usta na hulos ugan in aqez inaq iyim gamuk tilbalaqad in God abin tiqiluwaig.

<sup>65</sup> Sa Sekaraya awe Elisabet inaq giyogniz bunmo tirab yaqay. Ad in naghah gwahtimta na abin eman saw Judiya-ib uliq bunmo garah ban usaqta nab tileh bug.

<sup>66</sup> Lehan on mataw bunmo naghah gwahtimta na ago huritim in anadin emad os yaqay. Osad in Iyahta ago zaway Jon aholib ussa ahol waqad bilaq yaqay, Amun ka ayah iyeq teq in mat ezaq diqta iydaq? haq yaqay.

<sup>67</sup> Ari God ago Bugaw Dimunta in amun amam Sekaraya aholib ayahmo bol. Bolan God in Sekaraya anad ugan Sekaraya aqezab gamuk gwahtiqsa in kazaq bilam,

<sup>68</sup> I Iyahta God abin iluwuq ham. In ago on mataw Isrel nob negim in gizayim in gigo bab gibenab tigiwaqay ham.

<sup>69</sup> In mat ara q awaz meqinta eman in ago kabibiy mat Devit asenlulib tugwahtim ham.

Gwahtiqim in teq i gilumsiheq giwaqid i dimunmo tuqosam ham.

*Sekaraya ago bar*

<sup>67</sup> Ari God ago Bugaw Dimunta in amun amam Sekaraya aholib ayahmo bol. Bolan God in Sekaraya anad ugan Sekaraya aqezab gamuk gwahtiqsa in kazaq bilam,

<sup>68</sup> I Iyahta God abin iluwuq ham. In ago on mataw Isrel nob negim in gizayim in gigo bab gibenab tigiwaqay ham.

<sup>69</sup> In mat ara q awaz meqinta eman in ago kabibiy mat Devit asenlulib tugwahtim ham.

Gwahtiqim in teq i gilumsiheq giwaqid i dimunmo tuqosam ham.

<sup>70</sup> Kwaziqmo God in ago nantut tawonta nagan giqezab gamuk eman gwah-timta nazaqmo in tiqam ham.

<sup>71</sup> In mat awaz meqinta na eman gwah-tiqim in i gilumsihsa i gibabun a hi gimeqin ton daqay ham.

Sa in mataw gigem meqinta igayta na gibenab i giwaqid i dimunmo osam ham.

<sup>72</sup> Kwaziqmo God i gisesan hel diqmo gibilenim bilam,

Ya ne ginan inad meqniysa tigi-lumsih-daiq haqad in bilam ham.

Ad muran in ago gamuk na anadin emad in nazaqmo tiqemaq ham.

<sup>73-75</sup> Kwaziqmo in i gises Abraham inaq an adugan wazim in hel diqtaqmo bulonim bilam,

Ni nisesan bab gibenab ossa ya gilumsih-q ta giwaqdaiq haqad in bilam ham.

An muran in i gimen dante nazaq diq tiqem igid i in ago kabibiy mataw tawonta iyeq osad i in ameb daq tit-nonta emad tuqosam ham.

Ossa kam dimunta na a hi hiqiydaq ham.

<sup>76</sup> Ari yaqgo amun ham mataw ni ninan God Ulilib Diqta ago nantut tihaq daqay ham.

Na ezaqgo ni ameb leheq Iyahta ayon dan tuwastitaydaq ham.

<sup>77</sup> Wastitayad ni Iyahta ago on mataw gibilensa in gigo daq meqinta gileh ugsa Iyahta gilumsih-q ta giwaqdaq ham.

<sup>78</sup> I gigo God in i ginan anad meqniysa in i gilowan diq tonaqta ham.

Teq in ulilib osad i gilumsihqta na in bilaqne i gigo sawab zeq ahokan gwalsa saw hastitayaq nazaq nog iyaq ham.

<sup>79</sup> Nazaq iysa teq i romriqab moqgo danteb osauqta na hulosaq i le saw anuwanib tugwahtiqam ham.

Gwahtiqeq ossa Iyahta dan giqisihuneq giqad lehsa i gigo hib bab hiqiysa i gigem kute nemsas tuqosam ham.

<sup>80</sup> Ari amun na ayah tiqiyim in anad teq ahol bunmo zilimim in ago zaway inaq tiqiy. Iyim in lehim saw amatawun haiqtab osad in Isrel gimeb ulalab gwahtiqdaqta na akaman amen tiqemyaq.

## 2

*Mariya in ago amun Yesus am  
(Matyu 1.18-25)*

<sup>1</sup> Ari Elisabet Jon iqamta kam nagab Rom gigo maror ayah diqta anan Sisa Ogastus haqayta na in gamuk araq kazaq bilam, Yaqgo on mataw bunmo ginulinad teq ginan waqiy ham. <sup>2</sup> Na in gime ameb diqta on

mataw ginuliniyta. Mat anan Kwiriniyus haqayta na in on mataw saw Siriya-ibta giwamuzim ossa daq na gwahtimta. <sup>3</sup> Ari Sisa nazaq haqan on mataw bunmo in gigo uliq diqtab ginan emnan tilehiy.

<sup>4</sup> Lehsa mat anan Josep haqayta na in Devit ago ned teq in asenlul araq iyim in uliq Nasaret saw Galiliy-ibta hulosisim in Devit ago uliq Betlehem-ub saw Judiya-ibtab tilah. <sup>5</sup> Lehad in ayow Mariya waqim inaq tilahmo. Ad in Mariya inaq nanmo wastitayim an a hi waqadmo Mariya agem tiqiy. Agem tiqiy an teq in giger ginan emnan haqad uliq Betlehem-ub tilehiy. <sup>6</sup> Lehim in uliq nab osad Mariya amun emgo akaman tiqiy. <sup>7</sup> Iyan in ago amun aqenta matta na tiqam. Emim in tubusanib isihim bulmakau didaq neqayta adegnib eman wo tuqus. Na ezaqgo bit bunmo ban haiq tiqiy an in asanib karuw abitnibmo osiy.

*Angelo asor mataw sipsip giwamuzayta na gigerab gehitiqiy*

<sup>8</sup> Ari saw nab mataw sipsip giwamuzayta na asor in uliq adek ban pesan nog osad teq in taromab gigo sipsip giwamuz yaqay. <sup>9</sup> Sa Iyahta ago angelo araq in gigerab tugwahtim. Gwahtiqanmo Iyahta ahol anuwan hitiqad mataw na tigiqisih nat. Giqisih netsa in tirab yaqay. <sup>10</sup> Rabsa angelo na gibilan, Ne hi rabiham. Ad ne huritiy ham. Ya gamuk araq dimun diqta on mataw bunmo gimen a bol ham. On mataw kabemmo gamuk ka huriteq teq in ginad tidimniy daqay ham. <sup>11</sup> Muran diqmo aw araq in Devit ago uliqab amun tiqam ham. Amun na ayah iyeq teq in ne gilumsih-q ta giwaqdaqta ham. In anan Kraiss\* ham. In ne gigo Iyahta ham. <sup>12</sup> Ne leheq amun na kazaq ahol tuwaq daqayta ham. In tubusanib isihim bulmakau didaq neqayta adegnib eman woqim usaq ham.

<sup>13</sup> Ari angelo na in nazaq haqad tursamo God ago hib angelo kabemmo in agerab tugwahtiqiy. Gwahtiqim in God abin iluwad bilaqiy,

<sup>14</sup> I God anan sorid ulilibmo gwaleh bugan haqiy.

Sa og kab on mataw God agem dimunta negaqta na in ginad dimniysa gigem kute nemsas osiy haqiy.

<sup>15</sup> Angelo nazaq haqadmo in mataw na gihulosad muleqim Heven-ib ta gwalehiy.

*Mataw sipsip giwamuzayta na le Yesus ahol waqiy*

Ari angelo gwalehsamo mataw sipsip giwamuzayta na an bulonim bilaqiy, I Betlehem-ub leheq nagah Iyahta anan bilamta ka i le ahol waquq haqiy. <sup>16</sup> Haqad

\* **2:11:** Gamuk Kraiss ka alulin in "God mat emid bo i gilumsihdaqta na amatin" haqayta.

in hidmo tilehiy. Lehim in Mariya aduw Josep inaq ossa tigibiyiy. Ad amun bulmakau didaq neqayta adegnib ussa in ahol tuwaqiyimo. <sup>17</sup> In amun na ahol waqim teq in angelo amun anan gibilanta na ananin tutim tibilaiqiy. <sup>18</sup> Bilaqsa mataw huritiya na bunmo in mataw sipsip giwamuzayta gigo gamuk na anan ginadnad emad gihol turuh nam. <sup>19</sup> Teq amun anen Mariya in gamuk na huritan gamuk na bunmo in anadib tuqus bugyaq. Ussa in gamuk na anadin emad teq in anadibmo bilaqyaq. Ka yaqgo amunmo anan bilaqiyta ka in gamuk adugan ezaq diqta bilaqiy? haqyaq. <sup>20</sup> Teq mataw sipsip giwamuzayta na muleqim ta lehiy. Lehad angelo gamuk gibileniyta na teq in le nahad ahol waqiyta na bunmo ago in ginad dimniysa in God abin diq tiqiluw yaqay. Na ezaqgo angelo gibileniyta nazaqmo diq in le ahol waqiyta na ago iyan.

*Mataw Yesus aholnan ugiy*

<sup>21</sup> Ari abeb kam 8 nazaq tihiqiyayan teq mataw in amun ahol abatan asan tuqurotim teq in anan Yesus haqad tibiyiy. Amun anen agemab a hi gwahtiqsamo angelo anan bilaqan usta nazaqmo in tibiyiy.

*Josep awe Mariya inaq amun Yesus ad Tempel-ib lehan Simeon teq Ana inaq ahol waqiy*

<sup>22</sup> Ari Mariya amun tiqemim in ahol udinin os. Osim tihiqiyayan aw amun inaq gihol zaygo akaman tugwahtim, Moses ago marib gunun bilamta nazaq. Gwahtiqan Josep awe Mariya inaq in gigo amun ad Jerusalem-ub tilehiy, in amun Iyahta abenab emgo haqad. <sup>23</sup> Na ezaqgo Iyahta ago maror Moses mar tonta na in kazaq bilam,

Ne amun matta aqenta Iyahta ugid in agota iyeq tuqosdaq ham. *Kisim Bek 13.2, 12, 15*

<sup>24</sup> Nazaq iyan in Jerusalem-ub lehim Mariya amun emim ahol busirin iyta na ago tamaz ah amikmikta in tiqemiy. Na ezaqgo Iyahta ago maror in kazaq bilammo,

Ne muluk amidgot giger o ah husta amikmikta giger tiqem daqay ham. *Wok Pris 12.8*

<sup>25</sup> Teq mat araq anan Simeon haqayta uliq Jerusalem-ub os. In mat titnonta teq in God anadin diq emyaqta. In mat Isrel on mataw gilumsihid dimunmo os daqayta na amatin baq tunim osyaqta. Ossa God ago Bugaw Dimunta in aholib usyaqta. <sup>26</sup> Usad tekomo in Simeon tubulon. Ni hidmo a hi moqdaq ham. Iyahta ago mat Isrel gilumsihdaqta na amatin gwahtiqid ni ahol waqeq teq ni moqdaq ham.

<sup>27</sup> Ari kam nab God ago Bugaw Dimunta Simeon abe yahsa in le Tempel agelin aduganib tugwahtim. Gwahtiqim luwsa Yesus anen amam in gigo amun ad Tempel-ib tuboliymo. Giger na God ago gunun Moses bilamta na muzinin in Yesus ayon naw emnan haqad boliy. <sup>28-29</sup> Bolan Simeon gibiyad in gibenab amun waqim wazad in God abin iluwim kazaq bilam,

Iyahta ham ya ningo kabibiy mat ham. Muran ni ya iwaqid ya inad dimniysa tumoqdaiq ham.

Kwaziqmo ni ya ibilanta nazaq ham.

<sup>30</sup> Na ezaqgo ham mat ni emid bo i gilum-siheq ta giwaqdaqta na kawa ya ime anonabmo ahol tuwaqaiq ham.

<sup>31</sup> Daq ka ni on mataw dauh bunmo gimeb eman tugwahtim ham.

<sup>32</sup> Amun ka in on mataw en ta asor Juda a haiqta nagan giqemid in ningo tuhurit daqay ham.

Bilaqne lam anuwan lehsa mataw saw ahol waq kemay nazaq ham.

Amun ka in Isrel on mataw giduganib gwahtiqan iyan on mataw bunmo in Isrel gibin tiqiluw daqay ham.

<sup>33</sup> Haqan amun anen amam in Simeon ago gamuk in amun anan bilamta na huritim in gihol turuh nemyaq.

<sup>34-35</sup> Sa Simeon gibar tonad in amun anen Mariya kazaq bulon, Ni hurit ham. Amun ka in Isrel on mataw kabemmo eraqim turayta na giqothasid tuwoq daqay ham. Ad in on mataw kabemmo woqim usayta na giwazid tiqeraq daqay ham. Amun ka tarin nog osdaqta ham. Ossa mataw kabemmo ahol waqad tubaymuz daqay ham. Bay muzsa ni ahol waqad ni ninad ayahmo meqniydaq ham. Bilaqne baqir niqutil ulum tayaq nazaq nog ham. Amun ka ayah iyeq teq in mataw kabemmo ginad ulilemim usaqta na giqemid in ginad na ulal tiqiydaq ham.

<sup>36</sup> Ari Simeon gamuk emim tihiqiyanno aw araq anan Ana haqayta in gigerab tubol. Aw na in God ago nantut araq. In amam Fanuwel teq in ago gem anan Aser haqayta. Teq in aw adinowan diqta. Kwaziqmo in mat waqim inaq ulig 7 nazaqmo osta.

<sup>37</sup> Osim aduw tumoqan in waqad osad ago ulig 84 nazaq tiqiy. Aw na Tempel a hi hulosaqta. Kam bunmo zeqab taromab inaqmo in God ayon lotu emad sirisirimo in didaq udinad teq in God inaq gamuk emyaqta. <sup>38</sup> Yesus anen amam in amun wazim nab tursamo aw na gigerab bolim amun ahol waqad in God esey tuqugyaq. Esey ugad teq in mataw asor nab turiya na amun anan gibilenim bilam, God mat emid boleq i gilumsihdaqta na amatin i amen emim osauqta na in kawaqmo tugwahtim ham.

*Josep ago aw amun nenaq muleqim Nasaret-ib ta lehiy*

<sup>39</sup> Ari Josep awe Mariya inaq in nagah bunmo Iyahta ago marorib gunun bilamta na tiqem bugiy. Em bugim teq in muleqim gigo uliq Nasaret saw Galiliy-ibtab tilehiy. <sup>40</sup> Lehan amun na ayah iyad in ago zaway inaq tiqiyyaq. Ad in anad awaz timeqniyyaqmo. Sa God agem dimunta ugad tidimun tonyaq.

*Yesus amomo Tempel-ib lah*

<sup>41</sup> Ari ulig bunmo Yesus anen amam uliq Jerusalem-ub leh yaqayta, in Juda gigo lotu akaman ayahta anan Pasova haqay na ahol waqnan haqad. <sup>42</sup> Ad Yesus ago ulig 12 nazaq tiqiyar teq in anen amam gigo daq na muzinim in bunmo Jerusalem-ub tilehiy. <sup>43</sup> Lehim Pasova akaman na tihiqiyar in muleqim giquqib ta bol yaqay. Bolsa amun Yesus uliq Jerusalem-ub tuqos tut. Os tutsa anen amam in Yesus Jerusalem-ub oshaqta na a hi huritiy. <sup>44</sup> In giger ginad emiy, Yesus tabag on mataw ta asor na nenaq tilehaq haqiy. Haqad kam amulikmo in muleqim danmo ta lehad teq imisor tiqiysa in gisenlul teq gikadoyniz gilikmanib amun tinagun yaqay. <sup>45</sup> In amun nagunim le ahol a hi waqadmo in muleqim Jerusalem-ub amun nagim a ta lehiy.

<sup>46</sup> Lehim in bit ban bunmo amun nagunad luwad le kam ezeqmanta nab in Tempel ago gel aduganib amun ahol tuwaqiy. In gigo amun na in mataw Moses ago gunun asuleqin bilaqayta na gilikmanib osad in gigo gamuk huritad teq in gisusumun negyaq. <sup>47</sup> Sa mataw aseseqta na nazaqmo Yesus susumun ug yaqaymo. Susumun ugsa Yesus amenin emsa mataw nab osiyta na bunmo in Yesus anad awaz meqinta na teq in ago gamuk na huritad in ginadnad emad gihol turuh nemyaq. <sup>48</sup> Samo Yesus anen amam nazaq in gigo amun ahol waqad in gihol ritan. Sa anen bulon, Ya itatin ham doq tonnan ni i giger kazaq giton? ham. Ya nimam inaq ginad meqniysa i ninagunad luwta ham. <sup>49</sup> Haqan Yesus gibilan, Nagaqgo ne bit bitmo ya inagunad luwiy? ham. Ya imammo ago bitab osdaiqta na ago ne a hi huritim teq ne ya inagunad luwiy ye? ham. <sup>50</sup> Haqan anen amam in Yesus ago gamuk na huritim in alulin ginad a hi emiy.

<sup>51</sup> Samo Yesus eraqim anen amam nenaq uliq Nasaret-ib tilehiy. Lehim nab in anen amam gigez huritad ginad muzad tiluwyaq. Sa daq nagan bunmo anen anadib us bugsa in anadin emad osyaq.

<sup>52</sup> Ari Yesus uliq nab osad ayah tiqiy bugim in anad teq ahol bunmo tizilim bug. Sa God teq on mataw bunmo in Yesus ahol waqad in gigem dimunta ug yaqay.

## Jon Yesus ayon dante wastitayta na awagamun

### 3

*Jon mataw huz negyaqta na in on mataw gamuk gibilyaq*

*(Matyu 3.1-12; Mak 1.2-8; Jon 1.19-28)*

<sup>1</sup> Ari mat anan Sisa Taiberiyas haqayta na in Rom gigo king iyim ossa ago ulig 15 nazaqmo tiqiy. Iyan kam nab Pontiyus Pailat saw Judiya wamuzyaq. Sa Herot saw Galiliy wamuzsa in amikqan Filip saw gigermo Ituriya teq Trakonitis giwamuzim osyaq. Ossa mat anan Lisaniyas haqayta na saw Abilin wamuzad osyaqmo. <sup>2</sup> Sa Isrel gimuganib mat anan Anaz haqayta na amam Kayafas inaq in tamaz mataw danmebta iyim os yaqay. Ossa kam nabmo Sekaraya atatin Jon gwahtiqim saw ara q amatawun haiqtat ossa God ago gamuk in anadib tugwahtim. <sup>3</sup> Gwahtiqan in yuw Jordan aqurumnib uliq saw bunmo luwad in on mataw God ago gamuk tigibilyaq. Gibilenad in bilaqayaq, Ne ginad buliyeq ne gigo daq teq ginad meqinta bunmo gileh ugiy haqayaq. Gileh ugad ne bolsa ya huz negiq haqayaq. Ne nazaq emsa teq God ne gigo daq teq ginad meqinta na tigiwalem bugdaq haqayaq.

<sup>4</sup> Ari Jon gwahtiqim nazaq emad luwad in kwaziqmo God ago nantut Aisaya gamuk mar tonta na tuwol net bug. Aisaya bilam, Mat na aqez saw amatawun haiqtat lileyim bilaqayaq, Ne Iyahta ayon dan balaw toniy haqayaq ham. Ad ne in ayon dante na wastitayid titnonan haqayaq ham.

<sup>5</sup> Iyahta boldaqta kam nab garah bunmo aseseqta teq amikmikta inaqmo giqurotid woqid saw agemqanmo tiqiyaq haqayaq ham. Ad akalhonan usaqta na bunmo ituq bugid in nazaqmo agemqan tiqiyaqmo haqayaq ham. Dan kok tonim usaqta na bunmo titnonon bug daqay haqayaq ham. Ad dan bunmo gig ate usaqta na wolid in ate tihiqiy bugdaq haqayaq ham.

<sup>6</sup> Kam nab God in ago on mataw gilumsihad giwastitaysa og kab on mataw bunmo tigibiy daqay haqayaq ham. *Aisaya 40.3-5*

<sup>7</sup> Ari on mataw kabemmo Jon i huz igdaq haqad agerab tubol yaqay. Bolsa Jon gibilan, Ne ured amidgotniz ham. God teq ne ginan agem meqniysa gimeqin tondaqta na nog gibilenan ne tukim gigebe leh nog iyay? ham. <sup>8</sup> Ne ginad meqniysa gigem buliyid teq ne gigo daq nazaqmo tubuliydaq ham. Luweq ne ginad kazaq em daqay ham. I Abraham asenlulibta haq daqay

ham. Nazaq iyan God anad dimunta igad a hi gimeqin tondaq haq daqay ham. Nazaq ne ginad hi emiy ham. Ya ne gibilenaiq ham. God gig kag gibilenid buliyeq Abraham asenluniz iygo azawayin in aholib usaqta ham. <sup>9</sup> Talgis ay abeqarib tuqusaq ham. Ay bunmo anon dimunta a hi emaqta na in qwayeq faqab hunegid le tuqoydaq ham.

<sup>10</sup> In nazaq haqanmo on mataw dauh biyahta na Jon tisusumun ugiy, I ezaq toneq teq i gigem tubulyta na mataw tigiqisihunam? haqiy. <sup>11</sup> Haqan Jon gibilan, Ne daq kazaq emiy ham. Mat ago tubusan giger usaqta na in araç mat ago tubusan haiqta na ugan ham. Sa mat ago didaq inaçta na in nazaqmo eman ham.

<sup>12</sup> Haqsa mataw takis waqayta na asor in Jon huz igdaq haqad ago hib tuboliymo. Bolim in Jon susumun ugiy, Ta igmo teq ezaq tonam? haqiy. <sup>13</sup> Haqan Jon gibilan, Gavman gibilanta nazaqmo ne takis waqiy ham. Ad ne katiyeq mani asor samanmo ta hi waqiy ham. <sup>14</sup> Haqan ta mataw bab emayta asor nab turiyta na in susumunim bilaqiy, Ta i teq ezaq tonam? haqiy. Haqan Jon gibilan, Ne mataw tor negad giqutil ulumad gigo mani hi rin toniy ham. Ad ne hazizirib katiyad mataw gimalib nan emad gigo mani samanmo hi waqiy ham. Teq ne kabiy emayta na anawun waqad nan kabemmo hi bilaqiy ham.

<sup>15</sup> Haqsa on mataw bunmo Jon ahol waqad giqutil eraç yaqay. Ad in ginadnad emad in gimo gihol buloneq bilaq yaqay, Luweq mat ko in Kraisi ydaq haq yaqay. <sup>16</sup> Haqsa Jon in bunmo gibilenim bilam, Ya ne yuwibmo huz negaiçta ham. Ari mat araç teq ya ibeb boldaqta na abin in ya ibin uriyamta ham. Ya in ahagenibta ham. In yaqgo Iyahta ham. Ya in ago kabibiy mat samanta ham. In boleq nagah giger God ago Bugaw Dimunta teq faq inaç gimalib ne tuhuz negdaq ham. <sup>17</sup> In abenab sabol wazim in ago wit wodayta asawnib wit tigiluwiynan ham. Giluwiyaç in wit anagin dimunta na ginuweq ago wit abitnib humab tuwoldaç ham. Humab wolad in wit asan meqinta na ginuweq faq a hi miyaqtab hunegid le tuqoydaq ham.

<sup>18</sup> Haqad Jon gamuk naçanta kabemmo amalib on mataw ginad wazan eraçsa teq in God ago gamuk dimunta gibilenyaq.

#### *Herot Jon irqur*

<sup>19-20</sup> Teq king Herot in ama awe Herodiyas hureqim waçan Jon tuwadyaq. Wadaç in Herot daq meqinta kabemmo amta na ago tuwadyaqmo. Wadsa Herot ago daq meqinta kabemmo aholib usta na amalib in daq ta araç meqin diçta emim in Jon wazim tiqirçur.

#### *Jon Yesus huz ug*

*(Matyu 3.13-17; Mak 1.9-11)*

<sup>21-22</sup> Ari Herot in Jon a hi irqursamo Jon on mataw bunmo huz negad teq in Yesus tuhuz ugmo. Huz ugan Yesus God inaç gamuk emad tursa kait misireq nog iyim aqez hasan God ago Bugaw Dimunta ahol buliyim ah husta nog iyim Yesus amalib tigeçitim. Geçitigan Heven-ib God aqez bilam, Ni ya itatin ham. Ya ni ninan inad bilaçsa ya igem dimun diç iyaçta ham.

#### *Yesus asesan ginan*

*(Matyu 1.1-17)*

<sup>23</sup> Ari Yesus ago ulig 30 nazaq tiçiyen teq in ago kabiy alulin tiçam. Teq on mataw in ahol alulin diç a hi huritim iyan in anan bilaç yaqay, Josep-mo atatin haq yaqay.

Teq Josep in Heli atatin.

<sup>24</sup> Sa Heli in Matat atatin.

Sa Matat in Liway atatin.

Sa Liway in Melki atatin.

Sa Melki in Janay atatin.

Sa Janay in Josep atatin.

<sup>25</sup> Sa Josep in Matatiyas atatin.

Sa Matatiyas in Amos atatin.

Sa Amos in Nahum atatin.

Sa Nahum in Esli atatin.

Sa Esli in Nagay atatin.

<sup>26</sup> Sa Nagay in Maqat atatin.

Sa Maqat in Matatiyas atatin.

Sa Matatiyas in Semen atatin.

Sa Semen in Josek atatin.

Sa Josek in Joda atatin.

<sup>27</sup> Sa Joda in Jowanen atatin.

Sa Jowanen in Resa atatin.

Sa Resa in Zerubabel atatin.

Sa Zerubabel in Sealtiyel atatin.

Sa Sealtiyel in Neri atatin.

<sup>28</sup> Sa Neri in Melki atatin.

Sa Melki in Adi atatin.

Sa Adi in Kosam atatin.

Sa Kosam in Elmadam atatin.

Sa Elmadam in Er atatin.

<sup>29</sup> Sa Er in Josuwa atatin.

Sa Josuwa in Eliyezer atatin.

Sa Eliyezer in Jorim atatin.

Sa Jorim in Matat atatin.

Sa Matat in Liway atatin.

<sup>30</sup> Sa Liway in Simeon atatin.

Sa Simeon in Juda atatin.

Sa Juda in Josep atatin.

Sa Josep in Jonam atatin.

Sa Jonam in Eliyakim atatin.

<sup>31</sup> Sa Eliyakim in Melea atatin.

Sa Melea in Mena atatin.

Sa Mena in Matata atatin.

Sa Matata in Natan atatin.

Sa Natan in Devit atatin.

<sup>32</sup> Sa Devit in Jesi atatin.

Sa Jesi in Obet atatin.

Sa Obet in Bowaz atatin.

Sa Bowaz in Salmon atatin.  
 Sa Salmon in Nason atatin.  
<sup>33</sup> Sa Nason in Aminadab atatin.  
 Sa Aminadab in Atmin atatin.  
 Sa Atmin in Arni atatin.  
 Sa Arni in Hesron atatin.  
 Sa Hesron in Peres atatin.  
 Sa Peres in Juda atatin.  
<sup>34</sup> Sa Juda in Jakob atatin.  
 Sa Jakob in Aisak atatin.  
 Sa Aisak in Abraham atatin.  
 Sa Abraham in Tera atatin.  
 Sa Tera in Nahor atatin.  
<sup>35</sup> Sa Nahor in Serug atatin.  
 Sa Serug in Rew atatin.  
 Sa Rew in Pelek atatin.  
 Sa Pelek in Eber atatin.  
 Sa Eber in Sela atatin.  
<sup>36</sup> Sa Sela in Kainan atatin.  
 Sa Kainan in Arpaksat atatin.  
 Sa Arpaksat in Siyem atatin.  
 Sa Siyem in Nowa atatin.  
 Sa Nowa in Lamek atatin.  
<sup>37</sup> Sa Lamek in Metusela atatin.  
 Sa Metusela in Enok atatin.  
 Sa Enok in Jaret atatin.  
 Sa Jaret in Mahalalel atatin.  
 Sa Mahalalel in Kainan atatin.  
<sup>38</sup> Sa Kainan in Enos atatin.  
 Sa Enos in Set atatin.  
 Sa Set in Adam atatin.  
 Sa Adam in God atatin.

#### 4

*Satan Yesus ulum wam  
 (Matyu 4.1-11; Mak 1.12-13)*

<sup>1</sup> Ari God ago Bugaw Dimunta Yesus aholib ayahmo diq tuqusyaq. Ussa Yesus yuw Jordan hulosisim muleqim ta lehsa God ago Bugaw Dimunta in waqim ad saw araq amatawun haiqtab tilah.

<sup>2</sup> A lehan Satan kam 40 nazaqmo Yesus ulum waqad luwyaq. Luwsa kam nab Yesus didaq haiqmo osyaq. Ossa kam 40 na le tihiqiyan in agem tumoqyaq. <sup>3</sup> In agemnan moqad ossa Satan bolim tubulon, Ni God atatin iyeq teq ni gig ka bulonid in buliyeq bret iyid ni neq ham. <sup>4</sup> Haqan Yesus amenin emim bulon, God ago marib gamuk araq kazaq bilam ham.

Bret amomo in mat eman kayeqmo a hi osaqta haqad in bilam ham. *Lo 8.3*

<sup>5</sup> Haqan Satan in Yesus waqim garah araq abigmanib a gwalehim muran diq nawaqmo in kantri bunmo tiqisihun bug.

<sup>6</sup> Isihun bugad in Yesus bulon, Ya kantri aseseqta kogan bunmo giqemid ni nihaqenib iysa ni nibin ayahmo diq iyaqta ham. Nagah kogan bunmo ya ibenab ussa ya giwamuzaiqta iyan ya mat araq ugnan inad bilaqid ya tuqugdaiq ham. <sup>7</sup> Nazaq iyan ni mulbuneq ya ibin iluwid teq nagah ko

bunmo in ningo tiqiydaq ham. <sup>8</sup> Haqan Yesus amenin emim bulon, God ago marib gamuk araq kazaq bilam ham.

Iyahta in ningo God haqad in bilam ham. Ni in amomo abin iluwad ago kabiy emdaq haqad in bilam ham. *Lo 6.13*

<sup>9-11</sup> Anmo mat meqinta na in waqim ad uliq Jerusalem-ub tilah. A lehim in Tempel abigmanib Yesus eman tursa in bulon, God ago marib gamuk araq kazaq bilam ham.

God in ago angelo gibilenid in ni nitawanan emad tinibiy muz daqay haqad in bilam ham. Nibiy muzad in boleq gibenab tinisor daqay haqad in bilam ham. Luweq ni nisen gigib woltaydaq haqad in bilam ham. *Buk Song 91.11-12*

Nazaq iyan ni God atatin iyeq teq ni kab sortukeq woq ham. Woqsa ni nimam nilumsihsa ya nibiyiq ham. <sup>12</sup> Haqan Yesus amenin emim bulon, Teq God ago marib gamuk araq kazaq bilamomo ham.

Iyahta in ningo God haqad in bilam ham. Nazaq iyan ni girerey emad in hi ulum waq haqad in bilam ham. *Lo 6.16*

<sup>13</sup> Ari Satan daq nag bunmo amalib Yesus tuqulum waqim in hulosisadmo tilah. Lehad in anad emyaq, Kam ta araqab teq ya a ta ulum waqdaiq haqyaq.

### **Yesus saw Galiliy-ib lehim in God ago Bugaw Dimunta ago zaway amalib kabiy tiqemyaq**

*Yesus saw Galiliy-ib ago kabiy alulin am  
 (Matyu 4.12-17; Mak 1.14-15)*

<sup>14</sup> Ari God ago Bugaw Dimunta Yesus aholib zaway diq iyim ussa in muleqim saw Galiliy-ib a ta lah. Lehim ossa in abin saw nab uliq bunmo tilehyaq. <sup>15</sup> Sa Yesus saw nab uliq-uliqgo luwad in ago daq muzineq tuteqmo in mataw gigo bit humab wolaytab gwahtiqeq suleq tinegyaq. Negsa on mataw bunmo in ago gamuk huritad abin tiqiluw yaqay.

*On mataw uliq Nasaret-ibta Yesus gileh ugyi*

*(Matyu 13.53-58; Mak 6.1-6)*

<sup>16</sup> Ari Yesus saw nagab luwimmo in ago uliq diq Nasaret-ib tilah. Uliq nab in osad ayah iy bugta. In nab le osad Juda gigo lotu akamnib in ago daq muzinim bit humab wolaytab le tugwahtim. Gwahtiqim osad teq in God ago gamuk bilaqnan haqad eraqim titur. <sup>17</sup> Tursa mat araq God ago gamuk nantut Aisaya mar tonta na waqim a bo Yesus tuquq. Ugan in hasim mar nagunim le ahol tuwaqim teq in kazaq bilam,



<sup>18</sup> Iyahta ya itowun emim ibilan, Ni mataw ginaghan haiqta yaqgo gamuk dimunta tigibilendaq haqad in bilam ham. In ya inan nazaq haqad teq in ago Bugaw Dimunta yagan ya iholib tuqusaqta ham. Ussa Iyahta iqeman ya gamuk kazaq on mataw gibilennan tubol ham.

Mataw giqirquran osayta na ya ne giqamun hasid ne samanmo tiluw daqay haqaiq ham. Teq mataw gime haiqta na ya ne gime wastitayid ne saw ahol tuwaq daqay haqaiq ham. Ne mataw afaqan kabemmo gisorayta na ya ne gigo afaqan giholib walemid ne gihol tisinamoldaq haqaiq ham.

<sup>19</sup> Teq ya bilaqaiq, Iyahta in ago on mataw gidimun tondaqta na akaman tugwahtiqaq haqaiq ham. *Aisaya 61.1-2*

<sup>20</sup> Yesus gamuk na bilaq bugim tihiqiyan in sansandek na tal tonim mat wamuzaqta na ugad in le tuqos wom. Os woqim ossa on mataw bit nab osiyta na bunmo in Yesus ahol tuwaninun yaqay. <sup>21</sup> Ahol waninunsa Yesus in gamuk bilamta na alulin emim gibilan, Muran mat araq God ago mar ne nawa tuhuritiyta na wol net bugsa ne ahol tuwaqiy ham.

<sup>22</sup> Ari on mataw uliq nabta na bunmo Yesus abin tiqiluw yaqay. Ad in Yesus aqezab gamuk dimunta gwahtiqaqta na huritad gihol turuh nems a teq in bilaq yaqay, Ka Josep-mo atatin a haiq e? haq yaqay.

<sup>23</sup> Haqsa Yesus gibilan, Helmo ham. Ne teq kazaq ibilen daqay ham. Ni i gimen daq araq a hi emaq haq daqay ham. Kapaneam-ub ni daq azawayin inaqta eman i abin huritta naqanta araq ninmo ningo uliq kabmo emsa i ahol a hi waqauq haq daqay ham. <sup>24</sup> Teq ya helmo ne gibilenaig ham. God ago nantut ago uliqabmo diq in ahol abin haiqta ham.

<sup>25</sup> Ya ne gibilen kemaig ham. Kwaziqmo Elaija ago kamub zarow araq ayah diqta saw bunmo gwahtim ham. Gwahtiqaq ulig ezeqman teq aweweqta na asormo urom a hi wom ham. Kam nab Isrel-ib on waburta kabemmo osiyta ham. <sup>26</sup> Ta teq God in Elaija eman ago on mataw Isrel gigo aw waburta araq ulumsihnan a hi lah ham. Haiq ham. In Elaija eman on mataw en ta araq Juda a haiqta naqmo gigo saw anan Saidon haqayta nab in lah ham. Lehim uliq anan Sarefat haqayta nabmo in aw waburta araq ulumsih ham.

<sup>27</sup> Ad nazaqmo ham. God ago nantut anan Elisa haqayta na ago kamub mataw gigo moq lepra inaqta kabemmo Isrel-ib osiyta ham. Teq God in ago mataw Isrel na gilikmanib araq ago moq lepra wastitayan

a hi dimniy ham. Haiq ham. In mat anan Naman haqayta naqmo amomo ulumsihan ahol dimniy ham. Mat na in on mataw en ta araq Juda a haiqta ginan Siriya haqayta naqmo gigo araq ham.

<sup>28</sup> Yesus nazaq Isrel on mataw gibin wazan woqan bit nab mataw bunmo huritim gigem meqin diq iy. <sup>29-30</sup> Gigem meqniysa in eraqim Yesus muzan uliq asan ban gwahtim. Gwahtiqaq in waqim ad in gigo uliqab garah araq abigmanib saw ban meqintab usaqta nab in hunegid woqdaq haqad adek ban a lehiy. Teq haiq. Yesus mataw na gilikmanib gwahtiqaqim gihulosad tilah.

*Yesus mat araq aholib bugaw meqinta muz*

*(Mak 1.21-28)*

<sup>31</sup> Ari Yesus uliq Kapaneam saw Galiliy-ibtab tilah. Lehim Juda gigo lotu akamnib in on mataw suleq tinegyaq. <sup>32</sup> Suleq negsa on mataw in ago gamuk huritad gihol turuh nem yaqay. Na ezaqgo Yesus bilaqne God inmo abin ugan in suleq bilaq nog iyyaq. <sup>33-34</sup> Samo mat araq aholib bugaw meqinta usaqta na in Juda gigo bit humab wolayta nab osmo. Osim in dedibmo lileyim bilam, Sey! ham. Yesus Nasaret-ibta ham ni i ezaq gitonnan bol? ham. Ni i gimeqin tonnan daqag ni bolya ham. Ya ningo tuhurit ham. Ni God ago mat tawon diqta naqmo ham. <sup>35</sup> Haqsa Yesus wadim bulon, Ni niqez hiqiy ham. Ad bugaw meqinta ni mat na hulosaq gwahtiqeq leh ham. Haqan bugaw meqinta na in mat na othasan le mataw gilikmanib woqsa in hulosaq gwahtiqaqim tilah. Lehad in mat na santitiy araq a hi ug. <sup>36</sup> Anno mataw bunmo gihol riten lamsa in an tubulon yaqay, Mat ka ago gamuk azawayin inaqta ka in naga gamukin diq? haq yaqay. In bugaw meqinta gamukmo gibilensa in gwahtiqaqim lehayta haq yaqay. Bilaqne in God ago zawayibmo bugaw gibilen nog iyaq haq yaqay. <sup>37</sup> Mataw nazaq haqad bilaqsa Yesus abin saw nab uliq bunmo tileh bugyaq.

*Yesus Pita alen aqawun wastitayan dimniy*

*(Matyu 8.14-15; Mak 1.29-31)*

<sup>38</sup> Ari Yesus eraqim bit humab wolayta na hulosaq in Saimon ago bitab tilah. Lehan Saimon alen aqawun moq waqim asan afan meqin diq iyim banab ussa in Yesus tubuloni. <sup>39</sup> Bulonan in loqim ban aw usaqta na agerab turad gamuk atoranmo bilaqanmo aw asan afan iyim usta na hulosaqim nabag tilah. Lehanmo in eraqim gimen didaq anaran usta na a bolim tinag.

*Yesus on mataw gigo moq inaқта kabemmo giwastitayan dimniyyi*

<sup>40</sup> Ari zeq tuwolehsa mataw in giyogniz gigo moq amo amo usaqta na giwaqim gıqad Yesus ago hib tuboliy. A bolan Yesus mataw na amulik-mulikmo giholib aben emim giwazsa in tidimniy yaqay. <sup>41</sup> Sa bugaw meqinta on mataw kabemmo giholib usiyta na in gihuloseq lehad lileyeq bilaq yaqay, Ni God atatin haq yaqay. Haqsa Yesus ginadad gibilensa in giqezmo hiqiyeq leh yaqay. Na ezaqgo bugaw na in Yesus ahol alulin in Krai<sup>s</sup> na ago tuhuri-tiyta iyan.

*Yesus uliq asorib le luwad ago kabiy emyaaq*

*(Mak 1.35-39)*

<sup>42</sup> Ari tarom iyim saw tihastitayim bolsa Yesus uliq na hulosisim saw araқ amatawun haiqtab tilah. Lehan teq on mataw in tinagun yaqay. Nagunim lehim ahol tuwaqim teq in tuwasih yaqay, luweq in i gihuloseq lehdaq haqad. <sup>43</sup> Sa Yesus gibilan, Ne ya hi iwasihiy ham. Ya mataw kabta gibilenta nazaqmo ya uliq bunmo leheq God ago maror agamukan dimunta na in tigi-bilendaigmo ham. Ya kabiy naqmo emgo haqad God ya iqeman bolta ham. <sup>44</sup> Haqad teq in saw Judiya-ib uliq bunmo luwad in Juda gigo bit humab wolaytab gwahtiqeq God ago gamuk tigibilenyaq.

## 5

*Yesus bilaqan Pita nabiq kabemmo giwam*

*(Matyu 4.18-22; Mak 1.16-20)*

<sup>1</sup> Ari kam araқab Yesus yuw Genesaret\* aqurumnib tursa on mataw kabemmo God ago gamuk huritnan haqad in agerabmo diq loqim os yaqay. <sup>2</sup> Ossa muy amikmikta giger Kamis aqezab ussa Yesus tigibiy. Muy na ginamreniz muy hulosisim in gigo dob nabiq waqayta na tisuhol yaqay. <sup>3</sup> Samo Yesus le muy na araқab gwalim tuqos. Na in Saimon ago muyibmo gwal. Gwalim in Saimon bulon, Ni muy ulum hasid in lan ez asit hulosis ugeq usan ham. Haqan Saimon nazaq eman Yesus muy nab osad on mataw gamuk tigibilenyaq.

<sup>4</sup> Ari in gamuk gibilenim tihiqiyan in Saimon bulon, Muy hureqid kamismeb mayawabmo diq lehan ham. Lehid teq ne dob huneg woqid nabiq waqiy ham. <sup>5</sup> Haqan Saimon amenin emim bilam, Mat Iyah ham i tarom kab nabiq nagunad luwsamo saw tihastitay ham. Sa i nabiq araқ diq a hi waw ham. Ta teq ya na ago a hi bilaqad ya ni niqez muzineq le dob a ta

hunegeq teq saw ta waqdaiq ham. <sup>6</sup> Haqad in le dob a ta huneganmo nabiq kuluw diqmo dobub tuwoqiy. Woqan dob titartaynan tonyaq. <sup>7</sup> Nazaq iysa Pita ayogniz nenaq in gigo kadoyniz asor muy araқab osiyta na gililewunan bo tiglumsihiy. In bolim muy giger nab nabiq ginuwan woqsa muy ame tugwal. Ame gwalan muy giger na munannan toniy. <sup>8-10</sup> Samo Saimon Pita ayogniz nenaq muyib osad nabiq kabemmo diq waqiyta na gibiyad in gihol riten lamsa tirab yaqay. Rabsa Sebediy atatiniz giger Jems ama Jon inaq in Pita inaq araқibmo kabiy em yaqayta na in muy ta araқ nab osad tirab yaqaymo. Sa Pita in Yesus anognib kuh tonim asen ulum laquwim turad bilam, Iyahta ham ni ya ihuloseq leh ham. Ya mat dimun a haiq ham. Haqan Yesus bulon, Ni hi rab ham. Ni nabiq giwaqad luwaqta kazaqmo muran teq abeh ni on mataw nazaqmo tigiwaqdaq ham. <sup>11</sup> Ari mataw na muy hureqid a le lan ezab emad teq in gigo nagah bunmo hulosisad in Yesus muzim inaq tilehiy.

*Yesus mat araқ ago moq lepra inaқта wastitayan dimniy*

*(Matyu 8.1-4; Mak 1.40-45)*

<sup>12</sup> Ari kam araқab Yesus le uliq araқab tuqos. Ossa mat araқ ago moq lepra inaқта bolim Yesus ahol waqadmo in abakbakan ulum laquwim turad afaqin mulbunim ogib emim teq in tisusumun ug. Iyahta ham ni ninad bilaqsa teq ni ya iwastitayid ya God ameb isan anumlan ka tihiqiydaq ham. <sup>13</sup> Haqan Yesus aben itiwunim mat na wazad bulon, Ya inad bilaqad ham. Ni nisanib ninumlan usaqta na hiqiyam ham. Haqan muran diq nawaqmo mat na ago moq lepra tihiqiy. <sup>14</sup> Hiqiyam Yesus atoranmo bulon, Ni leheq daq kawa ya niholib emta ka ago ni mat araқ hikidik bulon ham. Ni leheq mat tamaz emaqta naqmo nihol isihun ham. Ad Moses bilamta nazaqmo ni nihol dimniyta na anawun em ham. Emid teq mataw in ningo moq tihiqiyta na ago tuhurit daqay ham. <sup>15</sup> Teq haiq. Daq na amalib Yesus abin ayah diqmo iyim saw bunmo tilehyaq. Lehsa on mataw dauh kabemmo in Yesus ago gamuk huritnan teq in giholib moq usaqta na wastitaygo haqad tubol yaqay. <sup>16</sup> Bolsa Yesus sirisirimo on mataw na gihulosisad saw amatawun haiqtab leheq God inaq gamuk tiqemyaq.

*Yesus mat araқ abensen aditin moq bugta wastitayan dimniy*

*(Matyu 9.1-8; Mak 2.1-12)*

\* 4:41: Ni Luk 2.11 nab teq gamuk 'Krais' ka alulin ahol waqdaq.

\* 5:1: Yuw-kurorqan Galiliy anan araқ

'Genesaret' haq yaqayta.

<sup>17</sup> Ari kam araqab Yesus on mataw suleq negad tuqos. Ossa Farisi asor giyogniz mataw Moses ago gunun asuleqin bilaqayta na nenaq in nab osiyimo. Mataw aseseqta na in uliq bunmo saw Galiliy-ibta teq saw Judiya-ibta teq uliq Jerusalem-ub osim boliyta. Bolim nab ossa Iyahta ago zaway mataw giqemid dimniygo Yesus aholib ayahmo usyaq. <sup>18</sup> Sa mataw asor in mat araq abensen aditin tumoq bugta abanan inaq sorim a boliy. A bolim in mat na soreq ad bit aduganib leheq Yesus agerab loggo em yo hiqiy yaqay. <sup>19</sup> Na ezaqgo on mataw kabemmo diq bolim ban tuwaq bugan in mat na ad Yesus agerab loggo adanin haiq. Nazaq iyan in bit ahuqunib gwalehim asor tihikneriy. Hiknerim in mat na abanan inaqmo eman on mataw gilikmanib wolehim Yesus anognib tuqos.

<sup>20</sup> Ussa Yesus in mataw na ginad helta ahol waqadmo in mat moqaqta na tubulon, Kadoy ham ya ningo daq meqinta tigiwalem bug ham. <sup>21</sup> Haqan mataw Moses ago gunun hurit kemiyta na giyogniz Farisi nenaq in Yesus ago gamuk na huritim in gimo an bulonad tisuusumun yaqay, Ko nog in nazaq God ago ban waq nog iyim God bilawunaq? haq yaqay. Og kab mat araq mataw gigo daq meqinta walemdaqta haiqqam haq yaqay. Naqmo God amomo ago kabiyta haq yaqay. <sup>22</sup> Haqsa Yesus in gigo susumun na huritim gibilan, Doq tonnan ne ginad haresmo nazaq emay? ham. <sup>23</sup> Ya naga gamukin bilaqid teq ne nan a hi yaq daqay? ham. “Ya ningo daq meqinta tigiwalem” haqdaiq o “Ni eraqeq loq gel” haqdaiq? ham. <sup>24</sup> Teq Mat Atatin in og kab daq meqinta walemgo azawayin aholib usaqta na ago ne hurit daqay haqad ya kazaq diq bilaqdaiq ham. Haqad in mat abensen moqan banab usaqta na tubulon, Ya nibilenaiq ham. Ni eraqeq ningo us ban waqeq ad ningo bitab a leh ham. <sup>25</sup> Haqanmo mat na on mataw gimeb eraqim ago ban in amalib usta na sorim ad ago bitab tilah. Lehad in God abin tiqiluwyaq. <sup>26</sup> Samo on mataw nab osiyta na bunmo ritenim in ginadnad tiqem yaqay. Ad in God abin iluwad bilaq yaqay, Muran i daq lul araq diqta ahol tuwaw haq yaqay.

*Yesus Liway bulonan in muzim inaq lah (Matyu 9.9-13; Mak 2.13-17)*

<sup>27</sup> Ari abeb Yesus lehim in mat takis waqaqta araq anan Liway haqayta takis abitnib ossa ahol tuwam. Ahol waqad in tubulon, Ni ya imuzeq bol ham. <sup>28</sup> Haqan Liway eraqim ago nagah bunmo hulosan ussamo in Yesus muzim inaq tilah.

<sup>29</sup> Abeb Liway in ago bitab Yesus amen didaq oyad humab araq ayahta tiqam. Emim in Yesus inaq banab didaq neqad

ossa mataw gibin meqinta takis waqayta na teq mataw ta asor kabemmo nenaq in Yesus inaq didaq neqad tuqosiyimo. <sup>30</sup> Ossa Farisi asor teq in gigo mataw Moses ago gunun hurit kemiyta na asor nenaq gimot meqniysa in Yesus ago disaipel tigibileniy, Doq tonnan ne mataw takis waqayta na teq mataw daq meqinta emayta na nenaq garabmo didaq neqad yuw uluwad osay? haqiy. <sup>31</sup> Haqan Yesus in gigo gamuk amenin emim bilam, Mataw gigo moq haiqta na in le dokta ahol a hi waqayta ham. Mataw gigo moq inaqta naqmo dokta ago hib lehayta ham. <sup>32</sup> Ya on mataw titnonta gililewunnan a hi bol ham. Ya on mataw daq meqinta emad osayta naqmo gililewunnan bolta ham. Gililewunid in ginad buliyeq gigo daq meqinta na gileh ug daqay haqad ham.

*Mataw didaq udinayta na ago Yesus bilam*

*(Matyu 9.14-17; Mak 2.18-22)*

<sup>33</sup> Haqan mataw aseseqta na in Yesus buloniy, Jon ago disaipel sirisirimo didaq udinad God inaq gamuk emayta haqiy. Ad Farisi gigo disaipel nazaqmo emayta haqiy. Ta teq ningo disaipel didaq a hi udinayta haqiy. In didaq neqad wain ayun uluwayta haqiy. <sup>34</sup> Haqan Yesus gibilan, Mat araq aw waqnan tonsa in ayogniz boleq inaq ossa ne in giqemid didaq udin daqay ye? ham. Haiqqam ham. <sup>35</sup> Ari abeb mataw asor boleq mat aw waqaqta na ayogniz gibenab tuwaq daqay ham. Kam na teq boldaqta ham. Bolid kam nab teq mat na ayogniz didaq tuqudin daqayta ham.

<sup>36</sup> Haqad Yesus gamuk awowun ta araq kazaq gibilan, Mataw in gigo tubusan kwaziqta tartayan in gigo tubusan muturta asor hiksireqim tubusan kwaziqta na inaq a hi inityta ham. In nazaq tonid tubusan muturta na timeqniydaq ham. Ad tubusan asor muturta na in kwaziqta na inaq a hi iydaqmo ham. Muturta na a hi ulilemsa kwaziqta na awaq timeqniydaqmo ham.

<sup>37</sup> Teq mataw wain ayun muturta memeq asan kwaziqtab a hi tenayta ham. In nazaq tonid wain aqurin gwalad huhuw nems memeq asan kwaziqta na tartayid wain ayun na tumutbaldaq ham. Ad memeq asan na timeqniydaqmo ham. <sup>38</sup> Mataw memeq asan muturtamo waqim wain ayun muturta tenayta ham.

<sup>39</sup> Haqad Yesus bilam, Mataw wain ayun kwaziqta tuquluwyta na bunmo in wain ayun muturta hulosaqta ham. Huload in bilaqay, Wain kwaziqta naqmo aquluw dimunta haqayta ham.

## 6

*Mataw Juda gigo lotu akamnib kabiy a hi emayta na ago Yesus bilam*

*(Matyu 12.1-8; Mak 2.23-28)*

<sup>1</sup> Ari Juda gigo lotu akaman araqab Yesus ago disaipel nenaq kabiy araq wit leiyta aduganib gwahtiqim tileh yaqay. Leahad Yesus ago disaipel wit anagin asor guraqim gibenab iworad tineq yaqay. <sup>2</sup> Neqsa Farisi asor gibiyad bilaqiy, Nagaqgo ne lotu akaman ago gunun itiyonim kabiyab wit tuguraqay? haqiy. <sup>3</sup> Haqan Yesus in gigo gamuk amenin emim gibilan, Nabag ne Devit ago dauh nenaq gigem moqsa Devit daq amta na awagamun ne ahol a hi waqiy-ya ham. <sup>4</sup> Devit le God ago bit aduganib gwahtiqim God ameb bret eman osta na in waqim tinam ham. Bret na gunun emiyta ham. Mataw tamaz emayta naqmo gimomo bret na neqayta ham. Teq haiq ham. Devit agem moq titaysa neqad in bret tawonta na asor in ayogniz negan tineqiyimo ham. Ta teq in daq meqinta a hi emiy ham. <sup>5</sup> Haqad in gibilan, Mat Atatin in lotu akaman anamrenmo diq iyim inmo mataw kam nab ezaq luw os daqayta na ago tigibilendaqta ham.

*Juda gigo lotu akamnib Yesus mat araq aben meqinta wastitayan dimniy*

*(Matyu 12.9-14; Mak 3.1-6)*

<sup>6</sup> Ari Juda gigo lotu akaman ta araqab Yesus le Juda gigo bit humab wolayta araq aduganib gwahtiqim in on mataw suleq tinegyaq. Negsa mat araq aben akogan aqabun ger anedan mayim aditinmo usaqta in nab os. <sup>7</sup> Ossa mataw Moses ago gunun hurit kemiyta na giyogniz Farisi nenaq in Yesus ahol waq kemad nab osiymo, Yesus lotu akamnib mat aben meqinta na wastitayid dimniyid i amalib nan emam haqad. <sup>8</sup> Haqsa Yesus in ginad na tuhuritim in na ago a hi bilaqadmo in mat aben meqinta na tubulon, Ni eraqeq bo kab tur ham. Haqan mat na eraqim le nab titur. <sup>9</sup> Tursa Yesus mataw aseseqta na gibilan, Ya ne susumun negaiq ham. I Juda gigo maror ezaq usaq? ham. Lotu akamnib i mataw gidimun tonamta o i gimeqin tonamta? ham. Kam na i mat moqaqta ulumsihamta akaman o i mat na aholib hiqiyid in moqdaqta akaman? ham. <sup>10</sup> Haqad in ame le mataw na gibiy bugim teq in mat na bulon, Niben itiwun ham. Haqan mat na aben itiwunimmo in aben akogan na tidimniy. <sup>11</sup> Dimniyan mataw Moses ago gunun hurit kemiyta na giyogniz Farisi nenaq in Yesus anan gigem meqin diq iysa in gimo an bulonad in Yesus ezaq ton daqayta na ago tibilaq yaqay.

*Yesus Aposel 12 na gitowun am*  
*(Matyu 10.1-4; Mak 3.13-19)*

<sup>12</sup> Ari kam nagab Yesus God inaq gamuk emnan haqad garah araq abigmanib tugwalah. Gwalehim tarom nab in God inaq gamuk emad ossa le saw tihastitay. <sup>13</sup> Saw hastitayan tarommo zeq tugwalsamo Yesus in ago disaipel gililewunan agerab tuboliy. Bolan in gilikmanib mataw 12 nazaq in aholyon gitowun emim in ginan Aposel haqad tibiy. <sup>14-15</sup> Na in ginan kazaq: Saimon, Yesus anan araq Pita haqad biyta. Teq Saimon amikqan Andru teq Jems ama Jon inaq teq Filip teq Bartolomyu teq Matyu teq Tomas teq Alfiiys atatin Jems teq Saimon ta araq mat Rom nenaq bab emyaqta amatin na <sup>16</sup> teq Jems atatin Judas teq Judas ta araq uliq Kariyot-ibta na. Mat naqmo anad buliyim Yesus waqim bab gibenab amta.

*Yesus on mataw suleq negad teq in kabemmo giwastitayan dimniy yaqay*

*(Matyu 4.23-25; Mak 3.7-12)*

<sup>17</sup> Ari Yesus ago mataw na nenaq garahab gewoqim in le saw agemqantab ago disaipel dauh biyahta na nenaq tituriy. Tursa on mataw kabemmo saw Judiya-ibta teq uliq Jerusalem-ubta teq uliq giger Tair teq Saidon gigo lan ezabta na in bolim Yesus ago hib humab tuwoliy. <sup>18</sup> Mataw na Yesus ago suleq huritnan teq in gigo moq emid dimniynan haqad in boliyta. Bolan Yesus in gigo bugaw meqinta giholib usad gimeqin ton yaqayta na gimuzan lehsa in tidimniy yaqay. <sup>19</sup> Sa on mataw biyahta na bunmo Yesus asan waz waqnan ton yaqay. Na ezaqgo in aholib zaway gwahtiqeq le mataw gigo moq inaqta na bunmo giqemid dimniy yaqayta na ago iyan.

*Yesus on mataw tidimniyim osayta na ginan bilam*

*(Matyu 5.1-12)*

<sup>20</sup> Ari Yesus ame gwalim ago disaipel gibiyad gibilan,

Ne mataw ginaghan haiqta ham ne teq God ago maror aduganib gwahtiqeq anononmo tuqos daqay ham.

Nazaq iyan ne tidimniyim osayta ham.

<sup>21</sup> Teq ne mataw gigemnan moqayta ham God teq nagah negid ne tigiyunindaq ham.

Nazaq iyan ne tidimniyim osayta ham.

Teq ne mataw gaqad osayta ham ne teq tiyuquw daqay ham.

Nazaq iyan ne tidimniyim osayta ham.

<sup>22</sup> Ne Mat Atatin muzinad inaq luwsa mataw ne ginan gigem meqniysa tigibaymuz daqay ham. Ad in ne gibilawunad gigitilehunan tibilaq daqaymo ham. In nazaq ne gitonsa ne ginad dimniyan ham. Ne tidimniyim osayta ham. <sup>23</sup> Mataw nazaq ne gitonsa ne gigem dimniysa ginad dimun dikan iyan ham. Na ezaqgo ne gigo naw ayahmo Heven-ib ne gibaq tunim usaqta

ham. Mataw ne gimeqin tonayta na gisesan in nazaqmo God ago nantut gimeqin ton yaqaymo ham.

<sup>24</sup> Ari ne mataw ginaghan kabemmo usaqta ham ne timeqniyim osayta ham.

Nagah ne gigem emid dimniydaqta na ne muranmo tuwaqay ham.

Abeb teq ne God abenab naw araq dimunta a ta hi waq daqay ham.

<sup>25</sup> Teq ne mataw muran didaq neqad gigem aseseqmo iyayta ham ne timeqniyim osayta ham.

Abeb teq ne gigemnan tumoq daqay ham.

Teq ne mataw muran yuquwayta ham ne timeqniyim osayta ham.

Abeb ne gaq wazad atoranmo tigaq daqay ham.

<sup>26</sup> Teq mataw og kabta bunmo in ne ginan dimunta haqsa ne gihol waziy ham. In nazaq ne gibin iluwsa ne timeqniyim osayta ham.

Kwaziqmo mataw na gisesan gibaqbaqniz in nantut katiyta na nazaqmo ginan dimunta haq yaqaytamo ham.

*Ne gibabun ginan ginad bilaq ago adan (Matyu 5.38-48)*

<sup>27</sup> Haqad Yesus bilam, Ne mataw ya iqez huritayta na ya ne kazaq gibilenaiq ham. Ne gibabun ginan ginad bilaqan ham. Ad mataw gigem meqinta negsa ne gilowan toniy ham. <sup>28</sup> Mataw ne kusluw negsa ne gidimun toniy ham. Ad mataw ne gibilawunsa ne in gimen God susumun ugud gilumsihan ham. <sup>29</sup> Mat araq nimanmanan asor ger wolid ni nimanmanan ta asor ger buliyid in wol tonanmo ham. Ad mat araq ningo saket waqsa ni ningo niholsihen ugud in waq tonanmo ham.

<sup>30</sup> Mat aw nog in ningo nagah anan sunid na ni neg ham. Ad mat araq ningo nagah araq waqid ni anan ta hi bilaq ham. <sup>31</sup> On mataw in ne ezaq gitonid ne ginad dimniydaqta nazaqmo ne in gigo hib daq emiymo ham.

<sup>32</sup> Ari mataw ni ninan ginad bilaqsa ta ni in ginan ninad bilaqta na in nagah diq a haiq ham. Daq nazaqta na anawun araq ne God abenab a hi waq daqay ham. Mataw God gileh ugim daq meqintab osayta na in nazaqmo an anan ginad bilaqta ham.

<sup>33</sup> Ad mataw ni nidimun tonsa ta ni in gidimun tonaqta na in nagah diq a haiqmo ham. Daq nazaqta na anawun araq ne God abenab a hi waq daqaymo ham. Mataw daq meqintab osayta na in nazaqmo an dimun tonad osayta ham. <sup>34</sup> Ad ne mataw ginaghan inaqta naqmo gibiyad nagah negayta na in nagah diq a haiqmo ham. Ne mataw naqanta nagah negad ginad

emay, In teq amenin tiqem daqay haqayta ham. Daq nazaqta na anawun araq ne God abenab a hi waq daqay ham. Mataw daq meqinta emayta na in nazaqmo amenin waqo haqad nagah an ugayta ham.

<sup>35</sup> Ta teq negmo kazaq emiy ham. Ne gigo bab ginan ginad bilaqsa ne gidimun toniy ham. Ad ne gibabun nagah negad in amenin neg daqayta na ago ne ginad hi usan ham. God in mataw meqinta teq mataw igmo ag haqad osayta na gilowan tonaqta ham. Nazaq iyan ne daq nazaqmo emeq teq abeb ne God abenab naw ayahmo tuwaq daqay ham. Ad ne God Ulilib Diqta atatnizmo diq iyeq tuqos daqay ham. <sup>36</sup> Ne Gimam in mataw ginan anad meqniyaqta nazaqmo ne mataw ginan ginad meqniyanmo ham.

*Ne on mataw gigo daq hi ulum kemiy (Matyu 7.1-5)*

<sup>37</sup> Ari ne mataw gigo daq ulum kemad ginan meqin a hi bilaqid God ne gigo daq ulum kemad ne ginan meqin a hi bilaqdaqmo ham. Mataw ne gigo hib daq meqinta emsa ne daq meqinta na walemad anadin ta hi emiy ham. Ne nazaq emid teq God in ne gigo daq meqinta na giwalemad anadin a ta hi emdaqmo ham. <sup>38</sup> Ne nagah asitmo mataw negid God amenin asitmo ne negdaq ham. Ari ne mataw nagah ayahmo negsa God amenin ayahmo tinegdaq ham. Nazaq iyan ne mataw nagah negiy ham. Negid teq God ne nagah tinegdaqmo ham. Helmo ham. In nagah ayahmo diq negid ne wazlilin ton daqay ham.

<sup>39</sup> Haqad Yesus gamuk awowun araq gibilenim bilam, Mat ame haiqta in mat ta araq ame haiqtamo dan isihuneq a lehdaq e? ham. Haiq ham. In nazaq toneq in giger garabmo le yayib tuwoq daqay ham. <sup>40</sup> Ad nazaqmo disaipel araq in ago tisa uriyameq danmeb a hi lehdaqmo ham. Haiq ham. Ari disaipel na in suleq tuwaq bugeq teq in ago tisa nogmo tiqiydaq ham.

<sup>41</sup> Haqad Yesus bilam, Nagaqgo ni niyow ameb rohroh amik diqta ussa ni ahol waqad ta ninmo nimeb ay anabun ayahta usaqta na ni ahol a hi waqaq? ham. <sup>42</sup> Ni ninad ezaq emad ni niyow bulonaq, Ya iyow haqaq rohroh nimeb usaqta na ya walemnan haqaq ham. Haqad ta ninmo nimeb ay anabun na ni ahol a hi waqaq ham. Ni nimileq meqin ham. Itureqmo ninmo nimeb ay anabun usaqta na ni walemeq nime saw anononmo ahol waqad teq ni le niyow ameb rohroh usaqta na walem ham.

*Ay meqinta anon meqinta emaqta (Matyu 7.16-20; 12.33-35)*

<sup>43</sup> Ay dimunta anon meqinta a hi emaqta ham. Ad nazaqmo ay meqinta anon

dimunta a hi emaqtamō ham. <sup>44</sup> Mataw ay amulik-mulikmo ginon ahol waq kemim teq in ay ezaqta na ago ginad tiqem hasayta ham. Mataw ay fik anon waqnan haqad in am asasuqin inaqtāb le a hi waqayta ham. Ad nazaqmo in wain anagin waqnan haqad le am asasuqin inaqtāb a hi waqaytamō ham. <sup>45</sup> Mat dimunta agemab anad dimunta kabemmo usaqta na in daq dimuntaqmo emaqta ham. Sa mat meqinta agemab anad meqinta kabemmo usaqta na in daq meqintaqmo emaqta ham. Nagah mat agemab ayahmo usaqta naqmo in aqezab gwahtiqaqta ham.

*Bit emgo adan gigermo  
(Matyu 7.24-27)*

<sup>46</sup> Doq tonnan ne ya inan Iyahta, Iyahta haqad teq ne yaqgo gamuk a hi muzinayta? ham. <sup>47-48</sup> Ari mat yaqgo hib bolim yaqgo gamuk huritim muzinayta na ago ya ne tigibilennan ham. Mat naqanta in bilaqne mat bit awaz meqinta amta nazaq nog ham. Mat na bit waznan haqad iturimmo in og tayan sisaqmo wolehan gig tugwah-tiqan teq in tituq hunegan wom ham. Abeb uq araḡ ayahta hitiqim bit na dedibmo ulum has ham. Teq haiḡ ham. Bit na ahol asit a hikidik wol ham. Na ezaqgo mat na bit alulin dimunmo amta ham.

<sup>49</sup> Ari mat yaqgo gamuk huritim teq a hi muzinayta na in bilaqne mat bit atifuqin haiḡta ogibmo wazan eramta nazaq nog ham. Abeb uq hitiqim bo bit na wol haman bit na hidmo tuwom ham. Woqim timeqniy hasan in waz ta eraḡo haiḡ tiqiy ham.

## 7

*Yesus bab mataw gigo ayahta araḡ ago kabibiy mat wastitayan ahol tidimniy  
(Matyu 8.5-13)*

<sup>1</sup> Ari Yesus on mataw gibilenim hulosadmo in le uliq Kapaneam-ub tugwah-tim. <sup>2</sup> Gwahtiqan uliq nab mataw bab emayta gigo ayahta araḡ in os. Ossa in ago kabibiy mat araḡ in anan anad diḡ bilaqta na ago moḡ inaq iyim moqnan tonad usyaḡ. <sup>3</sup> Ussa bab mataw gigo ayahta na in Yesus bolim uliq nab osaḡta na ago abin huritim in Juda gigo mataw marorta asor giqeman tilehiy, in Yesus bulonid boleḡ ago kabibiy mat na wastitayid dimniydaḡ haqad. <sup>4</sup> Mataw na le Yesus ago hib gwahtiqim in ginad awaz meqin amalib buloniy, Mat ko in mat dimunta haqiy. Ni leheḡ tuḡqulumsihdaḡ haqiy. <sup>5</sup> In i Juda ginan anad bilaqta haqiy. Inmo i giyon bit humab wolayta araḡ waz igta haqiy.

<sup>6</sup> Haḡan Yesus era nenaḡ tilah. In le bit sinsin tuḡḡsamo bab mataw gigo ayahta na in ago kadoyniz asor giqeman bolim Yesus danib ahol waḡad bulonim bilaqiy,

I gigo amebta na in ninmen gamuk kazaḡ bilam haqiy. Mat ayah ni niholtuw hi bul haḡad in bilam haqiy. Ni yaqgo bit aduganib bo gwahtiqdaḡta na ago ya mat dimun a haiḡ haqad in bilam haqiy. <sup>7</sup> Ya nazaḡ haḡad ya ningo hib lehim a hi nibilen haḡad in bilam haqiy. Ya inad emaiḡ ni gamukmo bilaḡid yaqgo kabibiy mat ka ahol tidimniydaḡ haḡaiḡ haḡad in bilam haqiy. <sup>8</sup> Na ezaḡgo ya inaḡmo yaqgo amebta ahaḡenib osaḡta haḡad in bilam haqiy. Ad yaqgo mataw bab emayta na in ya ihaḡenib osaytamō haḡad in bilam haqiy. Ossa ya araḡ bulonaiḡ, “Ni leh” haḡsa in lehaḡta haḡad in bilam haqiy. Teq ya araḡ bulonaiḡ, “Ni bol” haḡsa in bolaḡtamō haḡad in bilam haqiy. Ad yaqgo kabibiy mat bulonaiḡ, “Ni kabiy ka em” haḡsa in kabiy na emaqta haḡad in bilam haqiy. Nazaḡ iyan ya inad emaiḡ ni gamukmo bilaḡid yaqgo kabibiy mat na ahol tidimniydaḡ haḡaiḡ haḡad in bilam haqiy.

<sup>9</sup> Haḡan Yesus gamuk na huritim ahol turuh nam. Ahol turuh nemsā in ahol buliyim on mataw dauh biyahta in muzim inaq bolyta na kazaḡ gibilan, Ya ne gibilenaiḡ ham. Mataw bab emayta gigo ayahta na in Juda mat a haiḡ ham. Teq in Juda mataw bunmo giquriyamim in ya inan helmo diḡ haḡaqta ham. <sup>10</sup> An mataw marorta Yesus ago hib giqeman bolyta na in muleḡim bitab ta lehim kabibiy mat na ahol tidimniyim ossa in ahol waḡiy.

*Yesus uliq Nain-ib mat minminta araḡ wazan eram*

<sup>11</sup> Ari Yesus usim ta tiqim in uliq araḡ anan Nain haḡaytab tilah. Lehsa in ago disaiḡel teq on mataw dauh biyahta in inaq tilehiymo. <sup>12</sup> Lehan uliq nab aw waburta araḡ os. Sa in atatin amulikmo osta na tumom. Moḡan mataw in asan banab emim sorim hodhodab ad tilehsa uliqab on mataw biyahmo aw na inaq hodhodab tileh yaḡaymo. <sup>13</sup> Lehsa Iyahta in aw waburta na ahol waḡad in anan anad meḡniysa bulon, Ni hi ḡaḡ ham. <sup>14</sup> Haḡad in mat momta asan banab usaḡta na aḡerab loḡim in aben banab emim wazsa mataw mat aban inaq sorim a lehiya na wasihim tituriy. Tursa Yesus bilam, Mat minminta ham ya tinibilenaiḡ ham. Ni eraḡ ham. <sup>15</sup> Haḡanmo mat tumomta na kayeḡ iyim eraḡim osad gamuk tibilaḡayḡ. Sa Yesus amun na waḡim anen tuḡḡ.

<sup>16</sup> An on mataw na bunmo daḡ na ahol waḡim tirab yaḡay. Ad in God abin iluwad teq in bilaḡ yaḡay, God ago nantut araḡ awaz meḡin diḡta i ḡilikmanib tugwah-tim haḡ yaḡay. Haḡad in bilaḡ yaḡay, God in ago on mataw tiḡilumsihnan haḡad nob

tinegaq haq yaqay. <sup>17</sup> Ad in le Juda gigo og saw bunmo luwad Yesus daq amta na awagamun tibilaq yaqay.

*Jon mataw huz negyaqta na in ago disaipel giger giqeman Yesus ago hib lehiy (Matyu 11.2-19)*

<sup>18-19</sup> Ari Jon irquran ossa in ago disaipel bolim nagh bunmo Yesus giqamta na ago in Jon tubuloni. Bulonan Jon in ago disaipel giger gibilenim giqeman Iyahta ago hib susumun ugnan tilehiy. Lehsa in gibilan, Ne leheq Yesus kazaq susumun ugiy ham. Ni i nibaq tunim osta naqmo amatin ni bol o haiq mat ta araq teq abeb boldaqta i baq tunam? haqad ne buloni ham. <sup>20</sup> An mataw giger na le Yesus ago hib gwahtiqim tubuloni, Jon mataw huz negyaqta na i giqeman i kawa tubol haqiy. Ad in i gibilenim bilam, Ne leheq mat na susumun ugiy haqad in bilam haqiy. Ni i nibaq tunim osta naqmo amatin ni bol o haiq mat ta araq teq abeb boldaqta i baq tunam? haqad nazaq in bilam haqiy.

<sup>21</sup> Ari kam nabmo Yesus in mataw gigo moq amo amo inaqta na giwastitaysa tidimniy yaqay. Ad in bugaw meqinta mataw giholib usaqta na gimuzsa tileh yaqay. Teq in mataw gime haiqta na giwastitaysa in gime rireqim nagh ahol tuwaq yaqay. In kabiy nagan emsamo Jon ago disaipel giger na susumun ugnan boliy.

<sup>22</sup> Nazaq iyan Yesus in giger na gigo gamuk amenin emim gibilan, Ko gibiyiy ham. Mataw gime haiqta saw ahol tuwaqay ham. Mataw gisen meqinta tiloq gelay ham. Mataw gigo moq lepra inaqta gisanib ginumlan usta na tihiqiyaq ham. Teq mataw gidek haiqta gamuk tuhuritay ham. Mataw tumoqiyta kayeq iyim ta eraqay ham. Ad mataw ginaghan haiqta God ago gamuk dimunta tuwaqay ham. Ne muleqeq leheq nagh ne gimeb kawa ahol tuwaqiyta ka teq gamuk kawa ne tuhuritiya ka bunmo ne Jon buloni ham. <sup>23</sup> Mat ya ibiyad anadnad a hi emad teq in ya inan helmo diq haqayta, mat na tidimniyim osaq ham.

<sup>24</sup> Ari Jon ago mataw giger na tilehsa teq Yesus in on mataw biyahta nab turiyta na Jon anan gibilenim bilam, Kwaziqmo ne nog diq ahol waqnan saw amatawun haiqtab lehiy? ham. Ne mat araq bilaqne tuqir tim retsa ahol wolad ahulan iysa ne ahol waqnan lehiy ye? ham. <sup>25</sup> Teq ne nog diq ahol waqnan saw nab lehiy? ham. Ne mat araq tubusan dimunta welim ossa ahol waqnan lehiy ye? ham. Haiqgam ham. Mataw ginaghan kabem-mota tubusan dimdimunta giholib emim didaq dimdimunta neqayta na in king gigo bit aseseqtabmo osayta ham. <sup>26</sup> Ne ya

ibileniy ham. Ne nog diq ahol waqnan lehiy? ham. Ne God ago nantut araq ahol waqnan lehiy ye? ham. Helmo ham. Mat na in God ago nantut araq ham. Teq mat nawa na in God ago nantut bunmo giquriyamta ham. <sup>27</sup> Mat naqmo God ago marib ananin mar tonan usaqta ham. Gamuk na bilam ham,

Ahol waqiy ham, ya teq mat araq emid in yaqgo gamuk ad danmeb lehaq haqad in bilam ham. Leheq in ninmen dante tuwastitaydaq haqad in bilam ham. Wastitayid teq ni lehaq haqad in bilam ham. *Malakay 3.1*

<sup>28</sup> Ya ne gibilenaig ham. Jon in mataw og kabta na bunmo giquriyamim in abin ayah diqta ham. Ta teq mat aw nog God ago maror aduganib gihin amik diq usaqta na in Jon tuquriyamiya ham.

<sup>29</sup> Ari on mataw nab turiyta na bunmo kwaziqmo in Jon ago hib lehan Jon tuhuz nagta, mataw takis waqayta na inaquo. Nazaq iyan in Yesus ago gamuk na huritim bilaqiy, Helmo haqiy God daq titnonta emaqta haqiy. <sup>30</sup> Ta teq Farisi giyogniz mataw Moses ago gunun hurit kemiya na nenaq in ginad a hi bilaqan in Jon huz neggo hulosiya. Huload in God anad in gigo hib usta na othasim God in giyon dante dimunta amta na in gileh tuquyiy.

<sup>31</sup> Ari Yesus gamuk bilaq tutim a lehad in gibilan, Ya on mataw kam kabta gigo daq anan bilaqnan teq ya gamuk awowun ezaq diqta amalib bilaqdaig? ham. Teq in on mataw ezaq diqta? ham. <sup>32</sup> In bilaqne onmin maket-ib an bulonad osayta nazaq nog ham. In bilaqay,

I ne gimen kadug ulamsa ne ginad dimniysa a hi doray haqayta ham.

Teq i gaq wazsa ne ginad meqniysa a hi gaqay haqayta ham.

<sup>33</sup> Ari Jon mataw huz negyaqta na bolim didaq amo amo a hi neqad wain ayun a hi uluwyaqta ham. Sa ne in anan bilaq yaqay, Bugaw meqinta aholib usaqta haq yaqay ham. <sup>34</sup> Ta teq Mat Atatin bolim didaq neqad wain uluwsa ne bilaqay, Mat ko meqin haqayta ham. In didaq kabemmo neqad wain ayun ayahmo uluwaqta amatin haqayta ham. In mataw gihin meqinta takis waqayta na teq mataw daq meqinta emayta na giyowmo diq haqayta ham. <sup>35</sup> O tob iyan ham. Mataw ginad em hasim daq emayta na bunmo in God ago anad awaz meqinta eman ulal iyaqta ham.

*Aw araq danatabta Yesus asen suhol*

<sup>36</sup> Ari Farisi araq Yesus bulonim ina q ago bitab didaq neqnan tilah. Lehan Yesus in Farisi na ago bitab didaq neqad tuqos. <sup>37</sup> Ossa uliq nab aw araq danatabta in Yesus bo Farisi na ago bitab didaq

neqaqta na abin tuhurit. Huritim in kagoh amikta gig anan alabasta haqay na sisogim emiyta araq waqim aduganib masil ahuran dimunta tenim teq in wazim a bol. <sup>38</sup> A bolim Yesus ahol wol emim banab us nog iyad didaq neqsa aw na lehim abun ban asen agerab turad teq in tigagyaq. In gaqad ameqil woqsa ameqil ayunib Yesus asen suholad teq in aqensanib bayan tumay. Mayan in Yesus asen ilawunad teq in masil ahuran dimunta na wazbalan Yesus asenab tuwom.

<sup>39</sup> Samo Farisi Yesus bulonan ago bitab bolta na in daq nazaq ahol waqadmo anad kazaq am. Mat ka in God ago nantut diq iyeq teq aw ka in naga awun diqta na ago in tuhurit nagta ham. Ad in aw ka baymuzid in asan a hi waz nagta ham. Aw ka daq meqinta emad luwaqta ham. <sup>40</sup> Mat na anad nazaq emsa Yesus anan biyim bulon, Saimon ham ya gamuk araq tinibilennan ham. Haqan Saimon bilam, Tisa ham ningo gamuk bilaqsa ya huritiq ham.

<sup>41</sup> Haqan Yesus bilam, Ari ni nidek em ham. Mataw giger mat araq ago hib mani waqiyta ham. Mat na araq 500 kina nazaq wam ham. Sa araq na 50 kina nazaqmo wam ham. <sup>42</sup> Waqim abeb in mani waqiyta na amenin emgo in giholib gimeq araq diq a hi us ham. Nazaq iyan mani anamren na in mataw giger na ginan anad meqniysa in ago mani amenin giholib usta na tuwalam ham. Ari ya susumun nignan ham. Mataw giger na gilikmanib nog in mani anamren na anan anad ayahmo diq bilaqdaq? ham. <sup>43</sup> Haqan Saimon bilam, Ya inad emaiq mat ago mani amenin ayahmo usan in walamta naqmo in mani anamren na anan anad ayahmo diq bilaqdaqta haqaiq ham. Haqan Yesus bulon, Na ni ulum kemim dimunmo tibilam ham.

<sup>44</sup> Haqad in ahol buliyim aw na ahol waqadmo in Saimon bulon, Ni aw ka ahol waqaq e? ham. Ya ningo bitab bolan ni yuw yagan ya isen a hi suhol ham. Teq aw ka ameqil ayunib isen suholim in aqensanib bayan tumay ham. <sup>45</sup> Ya ningo bitab bolan ni ya a hi ilawun ham. Teq ya ningo bit aduganib gwahtiqim ossa bo muran kawa aw ka ya isen tiqilawunaq ham. <sup>46</sup> Ni ya ifaqinib masil ahuran dimunta wazbalan a hi wom ham. Teq aw ka ya isen amalib masil ahuran dimunta wazbalan tuwom ham. <sup>47</sup> Nazaq iyan ya ni nibilenaq ham. Aw ka in daq meqinta kabemmo amta ham. Teq in ya inan anad ayahmo bilaqdaqta ham. Na ezaqgo ya in ago daq meqinta na tigiwalem bugta na ago iyan ham. Ari mat bilaqaq, Ya iholib daq meqinta kabemmo haiq haqaqta na in ya inan anad asitmoqmo bilaqdaqta ham.

<sup>48</sup> Haqad in aw na bulon, Ya ningo daq meqinta na tigiwalem bug ham. <sup>49</sup> Haqan mataw Yesus inaq garab banab didaq neqad osiyta na in gimo an bulonim bilaqiy, Ka naga matin diq? haqiy. In mataw giholib daq meqinta usaqta na inaqmo giwalemaqta haqiy. <sup>50</sup> Haqsa Yesus aw na bulon, Ni ya inan helmo hamta naqmo in nawa nilumsihan ni niholib daq meqinta usta na tihiqiy ham. Ni leheq nigem dimniysa os ham.

## 8

### *On asor Yesus muzeq inaq leh yaqay*

<sup>1</sup> Abeb Yesus uliq aseseqta amikmikta inaqmo kabemmo gigo hib leheq luwad in God ago maror agamukan dimunta tigibilenyaq. Sa disaipel 12 na in Yesus inaq tiluw yaqay. <sup>2</sup> Teq kwaziqmo on asor Yesus in giholib bugaw meqinta gimuzad gigo moq eman hiqiyta na in Yesus inaq tileh yaqaymo. On na gilikmanib araq anan Mariya uliq Magdala-ibta haqayta. Kwaziqmo Yesus in aholib bugaw meqinta 7 nazaq gimuzta. <sup>3</sup> Teq araq anan Jowana haqayta. Aw na aduw anan Kusa. Mat na King Herot ago bit wamuzim osyaqta. Teq aw araq anan Susana haqayta. Sa on asor kabemmo in Yesus muzeq inaq leh yaqaymo. On nagan in gimo gigo nagahta amalib Yesus ago disaipel nenaq gilumsih yaqayta.

*Mat araq kabiyab wit anagin hunagta ago gamuk awowun*

*(Matyu 13.1-9; Mak 4.1-9)*

<sup>45</sup> Ari uliq saw bunmo on mataw kabemmo in Yesus ago hib bolim humab tuwoliy. Humab wolim ossa Yesus gamuk awowun araq gibilenim bilam, Mat araq ago kabiyab wit anagin hunegnan tilah ham. In lehim wit anagin hunegad luwsa asor danib wom ham. Woqan mataw loq gelad gisenab bay ninalsa ah boleq tineq yaqay ham. <sup>6</sup> Sa didaq anagin asor saw agigin inaqtab wom ham. Woqim wit anagin na gwalad og na ayuwun haiqgam iyan in tumay ham. <sup>7</sup> Sa wit anagin asor am asasuqin inaqta gilikmanib wom ham. Woqan am asasuqin inaqta na inaq araqibmo gwalad in wit na isih bugan abesbesan iy ham. <sup>8</sup> Sa wit anagin asor og dimuntab wom ham. Woqim in gwalim alulin amulik-mulikmo anon kabemmo diq 100 nazaq am ham. Ad Yesus bilam, Mat aw nog in gidek nan huritgo usaqta na in gamuk ka hurit kemiy ham.

*Yesus anad ezaq emad gamuk awowunmo on mataw gibilenyaq*  
*(Matyu 13.10-17; Mak 4.10-12)*



<sup>9</sup> Ari Yesus ago disaipel gamuk awowun na alulin hurit kemnan haqad in Yesus tisusumun ugiy. <sup>10</sup> Susumun ugan Yesus gibilan, Negmo God ago maror aduganib osayta ham. Nazaq iyan in ago maror abe alulin ulilemim usaqta na in negmo tigiqisi-hunaq ham. Ari on mataw asan banta na ya gamuk awowun hulim gibilenaq ham. Ya nazaq gitonsa teq, Mataw na gime saw waqad teq in nagah ara q ahol a hi waq daqay ham. Ad in gamuk huritad teq in ginad a hi em has daqay ham. *Aisaya 6.9*

*Mat kabiyab wit anagin hunagta na ago alulin*

*(Matyu 13.18-23; Mak 4.13-20)*

<sup>11</sup> Ari gamuk awowun na alulin in kazaq ham. Wit anagin na in God ago gamuk ham. <sup>12</sup> Teq mataw asor in wit anagin danib womta na nog ham. Mataw na God ago gamuk huritan teq abeb Satan bolim gigemab gamuk na ta walemaqta ham. Satan anad emaq, Luweq mataw na God anan helmo haqsa God in aholyon tigiwaqdaq haqad in mataw na gigemab God ago gamuk walemaqta ham.

<sup>13</sup> Teq mataw asor in wit anagin saw agigin inaqtab womta na nog ham. Mataw na God ago gamuk huritim in ginad bilaqsa wazayta ham. Teq mataw na in wit aninin haiqta nog ham. In God ago gamuk gigemabmo diq a hi wazayta ham. Kam asitmoqmo in helmo haqsa teq gilumwaq akaman bolsa in ginad helta na hulosaqta ham.

<sup>14</sup> Teq mataw asor in wit anagin am asasuqin inaqtab womta na nog ham. Mataw na God ago gamuk huritim teq in og kab luw ossa og ka ago afaqan amo amo gamuk na isihaqta ham. Mataw na in mani akabiyann emad daq gihol bilaqsaqta nagan emad in God ago gamuk anadin a hi emsa gamuk na gigemab a hi zilimaqta ham.

<sup>15</sup> Ari mataw asor in wit anagin og dimuntab womta na nog ham. Mataw na God ago gamuk huritim in waz naqmo hiqiyayta ham. Ad in gigem titnonimmo ussa in daq helta emayta ham. In afaqan sorad gituw a hi hiqiyayta ham. In giwaz meqniyim ossa God ago gamuk na in gigemab anon giqemaqta ham.

*Mataw lam miderim kuramab a hi sihenayta*

*(Mak 4.21-25)*

<sup>16</sup> Ari mataw lam miderim kuramab a hi sihenayta ham. Ad in ban ahaqenib a hi emaytamo ham. Haiqqam ham. In lam miderim ulilib othenan oyad usaqta ham. Ussa mataw lam anuwan ahol waqad in bolim bit aduganib gwahtiqaqta ham.

<sup>17</sup> Nazaq iyan nagah bunmo ulilemim usaqta na in teq ulal tiqiydaq ham. Ad nagah bunmo giqisihan usaqta na in teq saw anuwanib gwahtiqid mataw ahol tuwaq daqay ham. <sup>18</sup> Nazaq iyan ne ginad em hasad yaggo gamuk huritay ham. Na ezaqgo God in on mataw gigo nagah inaqta na bunmo nagah asor a ta negdaq ham. Ari mataw ginaghan haiqta gihol kat ugad bilaqay, I gigo nagah inaq haqayta na God in gibenab nagah asitmo in wazayta na tigiwalem bugdaq ham.

*Yesus anenan teq amagniz na gingan?*

*(Matyu 12.46-50; Mak 3.31-35)*

<sup>19</sup> Ari kam nabmo Yesus anen teq in amagniz in ago hib tuboliy. Bolim teq haiq on mataw kabemmo humab wolim ossa in Yesus agerab loggo dan haiqqam. <sup>20</sup> Samo mataw asor Yesus tubuloni, Ni ninen teq ni nimagniz bolim in nibiynan haqad kowa asanib turay haqiy. <sup>21</sup> Haqan Yesus amenin emim gibilan, On mataw God ago gamuk huritad muzinayta naqmo in ya inen teq in ya imagniz ham.

*Yesus bilaqan tim ayahta kute nam*

*(Matyu 8.23-27; Mak 4.35-41)*

<sup>22</sup> Ari kam ara qab Yesus ago disaipel nenaq muyib gwalim osad Yesus gibilan, I yuw urumun kozoq ban lehuq ham. Haqad in tilehiy. <sup>23</sup> Lehadmo Yesus ame rursa tuqus lah. Ussa tim ayahta eraqim bolad yuw eman muyib gwalsa muy ame tugwalnan tonya q. Sa disaipel timeqniyan ton yaqaymo. <sup>24</sup> Ad in le Yesus wazan eraqanmo tubuloni, Iyahta, Iyahta haqiy i tumoqnan tonauq haqiy. In nazaq haqan Yesus eraqim tim yuw inaqmo ginadan tim moqim hiqiya yuw kute nemim ahol a ta hi wolyaq. <sup>25</sup> Sa Yesus disaipel gibilan, Ne ginad God anan helmo haqayta na edowa? ham. Haqan disaipel rabad gihol turuh nems a bilaq yaqay, Ka naga matin diq? haq yaqay. In tim yuw inaqmo gibilensa aqez huritayta haq yaqay.

*Yesus mat araq aholib bugaw meqinta muz*

*(Matyu 8.28-34; Mak 5.1-20)*

<sup>26</sup> Ari Yesus ago disaipel nenaq muyib yuw urotim le uliq Gerasa gigo og saw ban tugwahti qiy. Uliq na yuw urumun kozoq ban ussa saw Galiliy yuw urumun kazaq ban usaqta. <sup>27</sup> Yesus muy hulosis lan ezab hitiqanmo uliq nab mat araq aholib bugaw meqinta giqusaqta in agerab tubol. Mat na kam sisaqmo abe aholmo tubusan haiqmo luwyaqta. In bitab asit a hi osad in hodhodabmo luw osyaqta. <sup>28</sup> In Yesus ahol waqad ek tonim anognib asen agerab woqim usad bilam, Yesus ham ni God Ulilibta atatin ham. Ni ya ezaq itonnan bol?

ham. Ya inad meqniysa nibilenaiq ham. Ni santitiy hi yag ham. <sup>29</sup> Na ezaqgo Yesus tekomo bugaw meqinta na mat huloseq lehgo gibilanta na ago iyan in nazaq Yesus bulon. Tuteqmo bugaw meqinta na in mat na anad wamuzyaqta. Wamuza mataw sen teq hankap amalib in irqureq waz waq yaqayta. Teq haiq. Mat na sen nagan bul titaysa bugaw meqinta abe yahsa in saw amatawun haiqtab le luwyaqta.

<sup>30</sup> Ari Yesus mat na tisuusum ug, Ni ninan ezaq? ham. Haqan in bilam, Ya inan Kuluwmo ham. Na ezaqgo bugaw meqinta kabemmo diq mat na aholib ussa in ahol anan nazaq biyim bilam. <sup>31</sup> Teq bugaw meqinta nagan ginad meqniysa gime kabemmo Yesus bulon yaqay, Ni i gimuzid i yay abe milhasta aromriq inaqtta nab hi lehuq haq yaqay.

<sup>32</sup> Sa bul gihumaban araq ayahta garah nab didaq neqad turiiy. Tursa bugaw meqinta nagan ginad meqniysa Yesus buloniy, Ni i giqemid i bul ko giduganib lehuq haqiy. Haqan Yesus bilam, Lehiy ham. <sup>33</sup> Haqan bugaw meqinta nagan in mat na hulosaq gwahtiqtim le bul na giduganib tuwoqiy. Woqanmo bul bunmo sibim wole garah asibsibraniy bayhilek tonim yuwmeb woqan yuw gineqanmo tumoq bugiy.

<sup>34</sup> Sa mataw bul giwamuzim osiyta na in daq na ahol waqad in tukim uliqab teq saw haresmo lehad in nagah ahol waqiyta na awagamun tibilaqiy. <sup>35</sup> Bilaqsa on mataw nagah na ahol waqan tilehiy. Lehim in Yesus ago hib tubolun in mat aholib bugaw meqinta gwahtiqtim lehiyta na ahol waqiy. Mat na anad dimunata waqim tubusan welim Yesus asen agerab ossa in ahol waqad tirab yaqay. <sup>36</sup> Sa mataw gimeb daq ahol waqiyta na in mat aholib bugaw meqinta usan Yesus gimuzan lehiyta na awagamun on mataw biyahta na tigibilen yaqay. <sup>37</sup> Gibilensa uliq Gerasa ago saw ban on mataw bunmo rabad bo Yesus buloniy, Ni i gihuloseq leh haqiy. Haqan Yesus muyib ta gwalim in muleqim ta lah.

<sup>38-39</sup> Lehsa mat aholib bugaw meqinta gwahtiqtim lehiyta na in Yesus inaq lehnan haqad anad awaz meqin amalib bulonyaq, Ya ninaq lehdaiq haqyaq. Haqsa Yesus hulosa. Ad in mat na eman ago uliqab muleqim ta lehsa in bulon, Ni ningo uliqab muleqeq ta leh ham. Leheq God daq ayahta em nigta na awagamun ni on mataw gibilen ham. Haqan mat na muleqim lehim in uliq nab bitbitmo luwad Yesus ayahmo ulumsihtta na ago in on mataw tigibilenyaq.

*Yesus aw araq ned hunegaqta wastitayim teq in maror araq amiy tumomta*

*wazan eram*

*(Matyu 9.18-26; Mak 5.21-43)*

<sup>40</sup> Ari Yesus muleqim ta bolanmo on mataw biyahta saw nab in amen emim osiyta na in Yesus ahol waqad ginad tidimniyyi. <sup>41</sup> Samo mat araq anan Jairus haqayta tubol. Mat na in Juda gigo bit humab wolayta ago danmebta araq. In bolim Yesus asen agerab ahol bulosan ogib woqim usad Yesus in ago bitab bolgo haqad in anad meqniysa ame kabemmo tubulonyaq. <sup>42</sup> Mat na amiy amulikmoqmo osta na tumoqnan tonsa iyan in bolim Yesus nazaq bulonyaq. Amun aw na ago ulig 12 nazaqta. Ari mat na nazaq Yesus bulonan in inaq tilehsa on mataw dauh biyahmo Yesus aholib soqotim diq inaq tileh yaqaymo.

<sup>43</sup> Lehsa aw araq ulig 12 nazaq moqad ned hunegad luwyaqta na in mataw na gilikmanib tilehyaqmo. Mataw kabemmo in aw na ago moq wastitay waqiyta. Teq haiq. In ago moq asit a hi hiqiyaaq. <sup>44</sup> Ari aw na Yesus abun ban muzim inaq lehadmo in agerab diq loqim ago tubusan adek tuwaz. Wazim muran diq nawaqmo in aholib ned usta na tihiqiy.

<sup>45</sup> Anmo Yesus tisuusumun, Nog ya iwaz? ham. Haqan on mataw bunmo bilaqiy, I asit a hi niwaz haqiy. Haqsa Pita bilam, Iyahta ham on mataw dauh biyahta ka bunmo nililut nigad soqot nigim ninaq lehayta ham. <sup>46</sup> Haqan Yesus bilam, Haiq ham. Ne gilikmanib guyaqag diq ya iwaz ham. Iwazan yaqgo zaway asor ihulos yagim lehsa ya ihol loyin ham.

<sup>47</sup> Yesus nazaq bilaqsa aw na anad tiqam, Ya daq emta ka ulal tiqiyaaq ham. Haqad in ahol harara nemsamo bolim Yesus anognib ahol hulosa ogib tuwom. Woqim usad on mataw na bunmo gimeb in anad ezaq emad Yesus wazta na teq in wazanmo ahol tidimniyta na ago in tibilaq bug. <sup>48</sup> Bilaq bugan Yesus bulon, Ya imiy ham ni ya inan helmo hamta naqmo niqeman ni nihol tidimniy ham. Ni nigem dimniysa leh ham.

<sup>49</sup> Ari Yesus gamuk bilaqad nab tursa Jairus ago bitab mat araq osim bolim in ago mat ayahta na danib ahol waqad tubolon, Ningo amun aw tumom ham. Nazaq iyan ni Tisa atuw ta hi bul ham. <sup>50</sup> Haqan Yesus gamuk na huritim in Jairus bulon, Ni hi rab ham. Ni God amomo anan helmo haqid teq ni nimiy tidimniydaq ham.

<sup>51-53</sup> Haqad in Jairus ago bitab tubol. Bolim on mataw kabemmo amun aw na anan gaq wazad ossa Yesus gibilan, Ne hi gaqiy ham. Amun aw na a hi mom ham. In usaq ham. Haqan on mataw na bunmo in aqez tiyuquwuniy. Na ezaqgo amun tumoq hasta na ago in tuhuriyta iyan. Yuquwunsa Yesus in on mataw biyahta in

inaq boliyta na bunmo giwasihan asanib tursa in Pita teq Jems ama Jon inaq teq amun na anen amam naqmo giwaqim ne-naq bit aduganib tugwahtiqiy.

<sup>54</sup> Gwahtiqim Yesus lehim amun aw na aben wazim in lilewunim bulon, Yaggo amun ham ni eraq ham. <sup>55</sup> Haqanmo amun aw na awitan muleqim asanib ta woqanmo in hidmo tiqeram. Eraqan Yesus amun didaq ugid neggo tigibilan. <sup>56</sup> Sa amun aw momta na kayeq ta iyan anen amam in ahol waqad in gihol riten lamyaq. Sa Yesus in gidek wazim gibilan, Kawa ya daq emta ka ago ne mat araq hikidik buloniy ham.

## 9

*Yesus disaipel 12 na kabiy nag  
(Matyu 10.5-15; Mak 6.7-13)*

<sup>1</sup> Ari Yesus in ago disaipel 12 na gibilenan agerab bolan inmo ahol abinib bugaw meqinta bunmo gimuzgo azawayin teq moq amo amo wastitaygo azawayin tinag.

<sup>2</sup> Negad teq in disaipel giqeman in God ago maror agamukan mataw gibilenad gigo moq giwastitaynan tilehiy. <sup>3</sup> Lehsa Yesus gibilan, Ne lehad es araq waqeq ad hi lehiy ham. Teq katek ulum ugayta na ne hi waqiyimo ham. Ne ziy araq es sihengo hi waqad didaq danib neq daqayta na ne ad hi lehiyimo ham. Ad mani araq ne giholib hi usanmo ham. Ne gigo tubusan amulik giholib usaqta naqmo ne a lehad araqmo ta hi waqiy ham.

<sup>4</sup> Ari ne le bit aqez araqab gwahtiqid in ne gihol bulonid teq ne loqeq bit nabmo osiy ham. Osad kabiy hiqiyid teq ne eraqeq bit na huloseq lehiy ham. <sup>5</sup> Ari uliq edob ne lehid mataw ne gibaymuzsa ne uliq na huloseq lehiy ham. Lehad ne gisen aqogin wolhamid uliq nab woqan ham. Woqid teq mataw na in gigo daq na anadin tiqem daqay ham. <sup>6</sup> Yesus nazaq haqan disaipel tilehiy. Lehad in uliq bunmo God ago gamuk dimunta gibilenad teq in on mataw gigo moq inaqta na giwastitaysa gihol tidimniy yaqay.

*King Herot Yesus abin hurit  
(Matyu 14.1-12; Mak 6.14-16)*

<sup>7</sup> Ari saw Galiliy-ib king Herot in kabiy daq bunmo Yesus emyaqta na abin tuhurit. Huritum in anadnad diq emyaq. Na ezaqgo mataw asor bilaq yaqay, Jon mataw huz negyaqta na moqan God hodhodab wazan ta eram haq yaqay. <sup>8</sup> Sa asor bilaq yaqay, Elaija a ta gwahtim haq yaqay. Sa asor bilaq yaqay, God ago nantut kwaziqta araq kayeq ta iyim luwaq haq yaqay. <sup>9</sup> Mataw nazaq haqsa Herot bilam, Ya bilaqan Jon anat tuqurot tayiyta ham. Ta teq na naga matin ya abin kazaq diq huritaiq? ham.

Haqad in Yesus ahol waqnan dan tinagunyaq.

*Yesus on mataw 5,000 nazaq didaq nag  
(Matyu 14.13-21; Mak 6.30-44; Jon 6.1-13)*

<sup>10</sup> Ari Yesus ago disaipel kabiy emad luwiya na muleqim Yesus ago hib tuboliy. Bolim in kabiy bunmo emiyta na awagamun tubuloniy. Bulonim tihiqiyman Yesus in giwaqim nenaq in gimomo uliq anan Betsaida haqayta nab tilehiy.

<sup>11</sup> Lehim ossa on mataw in Yesus ago disaipel nenaq uliq Betsaida-ib lehiya na ago huritum in ginagunim tilehiy. In le Yesus ago hib tugwahtiqan Yesus in gibiyad anad tidimniy. Anad dimniysa in God ago maror asuleqin tigibilenyaq. Ad in mataw gigo moq inaqta na giwastitaysa tidimniy yaqay.

<sup>12</sup> In nazaq emad ossa imisor diq tiqiy. Iysa disaipel 12 na bolim tubuloniy, Ni on mataw ko giqemid in uliq saw kogab hareshmo lehad in usgo ban nagunad teq in gigemyon naguniyimo haqiy. Saw i ossa uqta ka amatawun haiqta haqiy. <sup>13</sup> Haqan Yesus gibilan, Negmo didaq negid neqiy ham. Haqan disaipel bilaqiy, I gigo didaq kabem a haiq haqiy. Bret abaynagin teq nabiq gigermo kawa usaq haqiy. Ni ninad i leheq humab ka gimen didaq zayeq teq negam haqaq e? haqiy. <sup>14</sup> Na mataw 5,000 nazaq ossa iyan disaipel nazaq bilaqiyta. An Yesus in ago disaipel gibilan, Ne mataw gibilenid in humab 50 nazaq giholbin giholbin emeq osiy ham. <sup>15</sup> Haqan disaipel in aqez muzinim in on mataw bunmo gibilenan in nazaqmo tiqemiy. <sup>16</sup> In nazaq emim ossa Yesus bret abaynagin na teq nabiq giger na waqim ame ulilib gwalsa in God esey ugim teq in orqayim ago disaipel negan in on mataw tinegiy. <sup>17</sup> Negan in neqan tiqiyunin. Giyuninan abeb disaipel le didaq abeyan ginuwim kuram 12 nazaqmo ta gisheniy.

*Pita Yesus ahol alulin bilaq siram  
(Matyu 16.13-19; Mak 8.27-29)*

<sup>18</sup> Ari kam araqab Yesus amomo God inaq gamuk emad ossa ago disaipel agerab tuboliy. Bolan in tisuusum nag, On mataw ya inan nog diq haqsa ne huritay? ham. <sup>19</sup> Haqan disaipel amenin emim bilaqiy, Mataw asor ni ninan Jon mataw huz negyaqta na haqay haqiy. Sa asor ni ninan bilaqay, Ni Elaija haqay haqiy. Sa asor bilaqay, Ni God ago nantut kwaziqmo moqiyta na gigo araq tugwahtimya haqay haqiy. <sup>20</sup> Haqan Yesus a ta susumun nag, Ta negmo ya inan nog diq haqay? ham. Haqan Pita amenin emim tibilam, Ni Kraisham. God mat emid bo i gilumsihdaqta amatin na ninmo ham.

*Yesus bilam, Ya moqeq teq ta eraqdaiq ham*

(Matyu 16.20-28; Mak 8.30-9.1)

<sup>21</sup> Pita nazaq haqan Yesus in ago disaipel bunmo gunun negim gamuk awaz meqinta kazaq gibilan, Ne ya ihol alulin na mat araq hikidik buloniy ham. <sup>22</sup> Haqad in gibilan, Mataw marorta na teq mataw tamaz emayta gigo aseseqta na teq mataw Moses ago gunun hurit kemiya na in Mat Atatin gileh ugad santitiy ayahmo tuqug daqay ham. Ugad teq in wol emid tumoqdaq ham. Moqeq kam ezeqmanmo usid teq God in wazid ta eraqdaq ham.

<sup>23</sup> Haqad in on mataw bunmo gibilenim bilam, Mat araq ya imuzeq bolnan haqad anad emeq in ahol wazid woqan ham. Ad ya afaqan soraiqta nazaqmo in sornan anad bilaqsa kam bunmo in ago kruse sorid abetarib gwalan ham. In nazaq toneq teq in ya imuzeq bolan ham. <sup>24</sup> Na ezaqgo mat nog inmo ahol anadin emad asan aloan tonaqta na in ahol awitan tihik hulesdaq ham. Ari mat nog in ya inadin emad ahol nog hulodsdaqta na in ahol awitan ulumsihid kuluwa-kuluwmo tuqosdaq ham. <sup>25</sup> Nagaqgo mataw og kab osad in giholyon nagah kabemmo diq rom tonayta? ham. Mataw na gihol awitan hik hulesid nagah in giholyon rom toniyta na ezaq teq gilumsihdaq? ham. Na haiq ham. <sup>26</sup> Abeb Mat Atatin maror ayahta iyeq inmo ago ahol anuwan inaq ta bolad in amam teq amam ago angelo tawonta na nenaq gihol anuwanib tuboldaqta ham. Bolad mat aw nog in og kab osad ya teq yaqgo gamuk inaq ginan gimebay womta na kam nab Mat Atatin in mataw na ginan amebay tuwoqdaqmo ham. <sup>27</sup> Ya helmo ne gibilenaiq ham. On mataw muran kam kab osayta ka gigo asor a hi moqadmo in God ago maror og kab gwahtiqa ahol tuwaq daqay ham.

*Yesus ahol awaqaan lul araq diq iy*  
(Matyu 17.1-13; Mak 9.2-13)

<sup>28</sup> Ari Yesus gamuk na tiqemim abeb kam 8 nazaq tihiqiyan in Pita teq Jems ama Jon inaq giwaqim nenaq garah araq abigmanib God inaq gamuk emnan tugwalehiy. <sup>29</sup> Gwalehim Yesus God inaq gamuk emad ossa in anobun buliyim lul araq diq iy. Iysa ago tubusan inaqmo buliyim hus diq jymo. <sup>30</sup> Sa mataw giger Moses ayow Elaija inaq giwitan gwahtiqim Yesus inaq gamuk bilaqad tituriy. <sup>31</sup> In giger God ago anuwan inaq Yesus agerab gwahtiqim in Yesus Jerusalem-ub leheq ago kabiy emid hiqiyid in og ka huloseq gwa tilehdaqta na ago ananin in Yesus inaq bilaqad tur yaqay. <sup>32</sup> Tursa Pita ayogniz giger na nenaq gime sahuq iysa tuqusiyy. Usim kayeq ta iyim in

Yesus ahol anuwan inaq mataw giger na giwitan nenaq tursa tigibiyiy. <sup>33</sup> Gibiysa mataw giger na Yesus huloseq tilehnan tonsamo Pita era Yesus tubulon, Mat ayah ham i kab osauqta ka in dimun diq ham. I baybay ezeqmanmo emuq ham. Ariq ninmen teq araq Moses amen teq araq Elaija amen ham. Pita anad a hi em hasadmo gamuk nazaq bilamta. <sup>34</sup> In gamuk nazaq emad tursamo onqas tihitim. Hitiqim in Yesus ayogniz giger Moses ayow Elaija inaq giqisih netim ussa disaipel ezeqman na gibiyad tirab yaqay. <sup>35</sup> Rabsa God aqez onqas na aduganib gehitiqim bilam, Ka ya itatin ham. Ya inmo atowun eman in osaqta ham. Ne in aqez huritiy ham.

<sup>36</sup> God aqez na tihiqiyan disaipel Yesus amomo tursa ahol waqiy. Ad abeb in gewoqim luwad giqezmo hiqiyim tiluwiy. In nagah ahol waqiya na mat araq diq a hi buloniy.

*Yesus amun araq aholib bugaw meqinta muz*

(Matyu 17.14-21; Mak 9.14-29)

<sup>37</sup> Ari Yesus ago disaipel ezeqman na nenaq usim tarommo in eraqim garah na hulosisim tigewoqiy. Gewoqanmo mataw dauh biyahta Yesus amen emim osiyta na in ahol tuwaqiy. <sup>38</sup> Ahol waqadmo mat araq gilikmanib era turad in lileyim bilam, Tisa ham ya inad meqniysa nibilenaiq ham. Ni ya itatin ka nob ugad ulumsih ham. Ka yaqgo amun amuliknota ham. <sup>39</sup> Kam buntab bugaw meqinta araq in yaqgo amun ahol waqsa in ritenad ek tonaqta ham. Sa bugaw na amun wazim ulelsa anosnosin ateb gwahtiqaqta ham. Ad in amun woltitayad in hulos ugnan atuw diq hiqiyaqta ham. <sup>40</sup> Ya ningo disaipel bugaw meqinta na muzgo haqad susumun negan in muznan biyab a hi iyiy ham. <sup>41</sup> Haqan Yesus bilam, On mataw kam kabta ne God anan helmo a hi haqayta ham. Ad ne ginad titnonim diq a hi usaqta ham. Kam ganim teq ya nenaq og kab osad ya ne ginad siqim iyaqta na ago a hi bilaqad ya ne gigo afaqan sordaiq? ham. Ningo amun a bol ham. <sup>42</sup> Haqan amun na Yesus agerab lehsamo bugaw meqinta na amun wazim hunegan woqan in tuquleyaq. Ulelsa Yesus bugaw meqinta na wadim teq in amun ahol wastitayan tidimniy. Dimniyan in amun na waqim amam tuqug. <sup>43</sup> An on mataw bunmo God ago zaway na ahol waqim gihol riten lamiy.

*Yesus ame giger ta bilam, Ya moqeq teq ta eraqdaiq ham*

(Matyu 17.22-23; Mak 9.30-32)

Mataw biyahta na in Yesus daq amta na anan ginadnad emad an bulonsa Yesus in ago disaipel gibilan, <sup>44</sup> Ne gidek tih nemeq

gamuk ka huritad gidek hi zizalan ham. Mat araq teq Mat Atatin waqeq mataw gibenab tiqemdaq ham. <sup>45</sup> Haqan teq haiq. Yesus ago disaipel gamuk na alulin ago ginad a hi em hasiy. Gamuk alulin na ulilemim ussa in ahol a hi waqiy. Ad teq in Yesus susumun ugnan rab yaqay.

*God ago maror aduganib nog in mat ayah diqta?*

*(Matyu 18.1-5; Mak 9.33-37)*

<sup>46</sup> Ari disaipel in gimo an mugad in gilikmanib nog diq in ayah diqta na ago tibilaq yaqay. <sup>47</sup> Sa Yesus in disaipel ginad nazaq emsa huritim in amun amikta araq waqim inmo agerab eman titur. <sup>48</sup> Tursa Yesus gibilan, Mat nog in amun kaqanta ya ibinib bolsa ahol waqad wazinaqta na in ya iwazinaqmo ham. Ad nog ya iwazinaqta na in mat ya iqeman bolta na wazinaqmo ham. Nazaq iyan ne gilikmanib mat ahol abin haiqta na in ne bunmo giquriyamim in mat ayahta iyim luw osaqta ham.

*Mat araq Yesus ananib bugaw meqinta gimuzsa disaipel wasihiy*

*(Mak 9.38-40)*

<sup>49</sup> Haqan Jon bilam, Iyahta ham mat araq ni nibinib bugaw meqinta gimuzsa i luwim ahol waw ham. Teq mat na i inaq araqib a hi luwad iyan i wasihad bulon, Ni nazaq ta hi em haqad i bulon ham. <sup>50</sup> Haqan Yesus bilam, Ne hi wasihiy ham. Na ezaggo mat geg a hi negaqa na in ne giyowta ham.

## **Yesus ago disaipel nenaq uliq Jerusalem-ub lehiy**

*Samariya-ib on mataw Yesus baymuziy*

<sup>51</sup> Ari God Yesus waqeq ad Heven-ib gwalehgo akaman bolim sinsin tiqiy. Sinsin iysa Yesus uliq Jerusalem-ub lehnan anad awaz diq timeqniy. <sup>52</sup> Samo in mataw asor ameb leheq ago dan wastitay daqayta na giqeman tilehiy. Lehad luwim in Yesus ayon bit in usdaqta na wastitaynan haqad saw Samariya gigo uliqben araqaq le tug-wahtiqliy. <sup>53</sup> Teq haiq. Mataw uliq nabta in Yesus Jerusalem-ub lehaqta na ago huritim in Yesus waqeq inaq gigo bitab osnan tuhulosiy. <sup>54</sup> Hulosan Yesus ago disaipel giger Jems ama Jon inaq in daq na ahol waqad Yesus tubuloni, Iyahta haqiy ni ninad bilaqid teq i God bulonid in kaitab faq emid hitiqeq mataw ka ginoy em bugan haqiy. <sup>55</sup> Haqan Yesus ahol buliyim giger na ginadim gibilan, Ne nazaq hi bilaqiy ham. <sup>56</sup> Haqad in ago disaipel nenaq uliq ta araqaq tilehiy.

*Yesus muzeq inaq lehgo adan*

*(Matyu 8.19-22)*

<sup>57</sup> In danib lehad luwsa mat araq Yesus bulon, Uliq saw edob ni lehadta nab ya

nimuzeq ninaq tilehdaiqmo ham. <sup>58</sup> Haqan Yesus bulon, Ni ninad em haseq teq ya imuzeq bol ham. Gaun kwasikta kuduqib osayta ham. Ah in gigo rir inaqta ham. Ari Mat Atatin in ago usad anamur emdaqta abanan araq diq haigqam ham.

<sup>59</sup> Haqad Yesus mat ta araq bulonim bilam, Ni ya imuzeq bol ham. Haqan mat na bilam, Iyahta ham ni ya ihulossa ya leheq imam tumomta na yay tonad teq ya boleq nimuzeq ninaq tilehdaiq ham. <sup>60</sup> Haqan Yesus bulon, Nab iyan ham. Mataw giwitan moqim usad God anadin a hi emayta na in gimo an wamuzad an yay toniy ham. Ari ninmo leheq God ago maror agamukan on mataw gibilenad luw ham.

<sup>61</sup> Sa mat ta araq in Yesus bulon, Iyahta ham ya nimuzeq ninaq tilehdaiqta ham. Teq ni ya ihulosid ya leheq isenlul giben wazeq teq ya ta boleq nimuzeq ninaq tilehdaiq ham. <sup>62</sup> Haqan Yesus bilam, Mat dante dimunta tuwaqim teq sirisirimo in ame agilehun ban ta lehaqta, mat na God ago maror aduganib le a hi gwahtiqaqta ham.

## **10**

*Yesus mataw 72 nazaq giqeman ago kabiy emnan lehiy*

<sup>1</sup> Ari abeb Iyahta in mataw 72 nazaq gitowun emim giqeman in giger giger uliq saw bunmo Yesus abeb teq lehadta nabmo in danneb tilehiy. <sup>2</sup> Lehsa Yesus gibilan, Kabiyab didaq kabemmo tizilimim giqusaq ham. Teq kabibiy mataw kabem diq a haiq ham. Nazaq iyan ne kabiy anamren inaq gamuk emad bulonsa in kabibiy mataw kabemmo giqemid boleq in ago didaq na giwaq ugiy ham.

<sup>3</sup> Teq ne ginad em haseq lehiy ham. Ya ne giqeman ne sipsip amidgotniz gaun kwasikta gilikmanib leh nog iyay ham. <sup>4</sup> Ne lehad mani araq giholib hi usan ham. Ad ne ziy araq hi bideqiy ham. Teq ne gisendugan hi emiyo ham. Ne lehad on mataw danib gibiyad nenaq gamuk sisaqmo emad hi turiy ham.

<sup>5</sup> Ne leheq bit araqaq gwahtiqliq osnan haqad itureqmo ne kazaq gibileniy ham. On mataw bit kabta ne gigem dimniysa osiy haqiy ham. <sup>6</sup> Haqid mat araq dimunta bit nab osid teq ne gigem dimunta ugiy na le mat na ago hib tuqusdaq ham. Ari mat araq dimunta nazaqta bit nab a hi osid teq ne gigem dimunta na ne gigo hib muleqeq bo ta usdaq ham.

<sup>7</sup> Bit amulikmo ne os daqayta nabmo ne osiy ham. Ossa in didaq teq yuw negsa ne gihol afaqan hi iyiy ham. Ne neqmo neqiy ham. Na ezaggo kabibiy mat mataw gimen kabiy emsa in amenin tuqug daqay ham. Teq ne haresmo bitbitmo hi luwiy ham.

<sup>8</sup> Ne leheq uliq araq aduganib gwahtiqid in ne giwazinat nenaq osad didaq negsa ne neqad nan kabemmo hi bilaqiy ham. <sup>9</sup> Ad ne uliq nab on mataw gigo moq inaqtta giwastitayid dimniysa ne gibileneq bilaqiy, God ago maror ne gigo hib sinsinmo tubol haqiy ham.

<sup>10</sup> Ari ne le uliq araqaq gwahtiqid in ne gibaymuzsa ne uliq na agemab turad kazaq gibileniy ham. <sup>11</sup> Ne gigo uliq ka aqogin i gisenab soqotim usaqta ka i wolilaman ne gigo hib ta lehaq haqiy ham. Na ago teq ne afaqan tisor daqay haqiy ham. Teq ne ginad em hasiy haqiy ham. God ago maror ne gigo hib sinsinmo bolan ne gileh ugiy haqiy ham. <sup>12</sup> Ya ne gibilenaq ham. Kam abebtanta nab uliq Sodom afaqan waq daqayta nazaq nog in afaqan a hi waq daqay ham. Uliq ne gibaymuz daqayta na in Sodom giquriyameq afaqan ayah diqta tuwaq daqay ham.

*On mataw ginad gigem a hi buliyayta na oseq timeqniy daqay*  
(Matyu 11.20-24)

<sup>13</sup> Haqad Yesus bilam, Uliq Korasin teq uliq Betsaida ham ne teq timeqniy daqay ham. Kwaziqmo mat araq leheq daq azawayin inaq ya ne gigo hib emta nazaq in uliq giger Tair-ib teq Saidon-ib emid on mataw na ginad tubuliy nagiy ham. Ginad buliyeq in gigo daq teq ginad meqinta gileh ugad in tubusan asorqan abiyornaqta weleq butbutmeb tuqos woq nagiy ham. Teq ne yaqgo daq azawayin inaqtta na ahol waqim ne ginad buliyim gigo daq meqinta gileh a hi ugiy ham. <sup>14</sup> Nazaq iyan abeb God hazizir ayahta emdaqta nab Tair teq Saidon afaqan waq daqayta nazaq nog ne a hi waq daqay ham. Ne in giquriyameq afaqan ayah diqta tuwaq daqay ham.

<sup>15</sup> Teq uliq Kapaneam ham ne gibin iluwid Heven-ib gwalehdaq e? ham. Haiqqam ham. In ne gihunegid ne mataw tumoqiyta gigo sawab tuwoleh daqay ham.

<sup>16</sup> Haqad in ago disaipel gibilenim bilam, Mat ne giqez huritaqta na in ya iqez huritaqmo ham. Ad mat ne gibaymuzaqta na in ya ibaymuzaqmo ham. Ad mat ya ibaymuzaqta na in mat ya iqeman bolta na tubaymuzaqmo ham.

*Yesus mataw 72 giqeman kabiy emnan lehiyta na muleqim ta boliy*

<sup>17</sup> Ari abeb mataw 72 Yesus giqeman lehiyta na in ginad dimniysa muleqim ta boliy. Bolim in Yesus buloniy, Iyahta haqiy i ni ninan biysa bugaw meqinta inaqtta i gihaqenib iyim in i gigo gamuk huritad muziniy haqiy. <sup>18</sup> Haqan Yesus gibilan, Ne le yaqgo kabiy emad luwsa Satan ulilibmo diq osim in mewlig hikliyan nog iyim ogib woqsa ya ahol way ham. <sup>19</sup> Ne huritiy

ham. Ya nagh meqmeqinta gibayid woqgo azawayin tineg ham. Negan ne nagh ahulinaqta teq kahkah nagan tigibay daqay ham. Teq ne ya ibinin luwad ne gigo bab na ago zaway bunmo ne wazid tuwoq bugdaq ham. Sa nagh araq diq a hi meqin tondaq ham. <sup>20</sup> Ta teq bugaw meqinta ne giqez muzinayta na ago ne ginad hi dimniyan ham. Haiqqam ham. Ne giholnan God ago uliq Heven-ib tumar tonan usaqta naqmo ago ne ginad dimniyan ham.

*Yesus anad dimniysa God esey ug*  
(Matyu 11.25-27; 13.16-17)

<sup>21</sup> Ari kam nabmo diq God ago Bugaw Dimunta Yesus aholib ayahmo bolan in anad diq dimniysa bilam, O ya imam ham, Heven-ib teq og kab inaqtta ni Iyahta iyim oseqta ham. Ni mataw ginad awaz meqinta na teq mataw gimaqbel inaq iyim igmo ag haqad osayta na ni yaqgo kabiy alulin a hi giqisihunta ham. Haiq ham. On mataw gihol wazan woqsa in onmin gibin haiqta os nog iyayta naqmo ni yaqgo kabiy alulin tigiqisihunta ham. Ya imam ham ni ninad nazaqmo usan ni tiqam ham. Nazaq iyan ya esey nigaiq ham.

<sup>22</sup> Haqad Yesus ta bilam, Ya imam in ago kabiy bunmo ya ibenab tiqam ham. Mat araq diq in yaqgo a hi hurit ham. Ya imam amomo in yaqgo huritta ham. Teq mat araq ya imam ago a hi huritmo ham. Ya in atatin iyim ya imomo in ago huritta ham. Ad on mataw ya inad bilaqsa imam giqisihunaqta naqmo in ya imam ago huritaytamo ham.

<sup>23</sup> Haqad in ahol buliyim ago disaipel gibiyad in gidekib kiskismo gibilenim bilam, Nagan ne ahol waqayta ka ago ne ginad dimniyan ham. <sup>24</sup> Ya ne gibilenaq ham. Kwaziqmo God ago nantut kabemmo teq Isrel gigo king kabemmo in nagh ne muran ahol waqayta ka in ahol waqnan ginad diq bilaq yaqayta ham. Teq in moqim ahol a hi waqiyta ham. Ad gamuk kawa ne huritayta ka in huritnan ginad bilaq yaqaytamo ham. Teq in moqim a hi huritiyta ham.

*Samariya-ib mat araq in ababun Juda mat anan anad meqniy*

<sup>25</sup> Yesus nazaq gamuk bilaqsamo mataw na gilikmanib mat araq Moses ago gunun hurit kamta na in eraqim Yesus ulum waqad tisuusun ug, Tisa ham ya ezaq toneq teq kayeqmo kuluwa-kuluwmo tuqosdaiq? ham. <sup>26</sup> Haqan Yesus bulon, God ago maror Moses bilamta na aduganib gamuk ezaq diqta mar tonan usaq? ham. Ni gamuk na ahol waqim ninad ezaq emaq? ham. <sup>27</sup> Haqan mat na bilam, Gamuk na kazaq bilam ham.

Ne gigem, ginad, giwitan, teq ne gigo zaway bunmo amalib ne gigo Iyahta God anan ginad bilaqan ham.

Ad ni nihol anan ninad bilaqagta nazaqmo ni niyow anan ninad bilaqan ham. *Lo 6.5; Wok Pris 19.18*

<sup>28</sup> Mat na nazaq bilaqan Yesus bulon, Ni gamuk amenin dimunmo tibilam ham. Ni nazaq toneq teq ni kayeqmo kuluwakuwawmo tuqosdaq ham.

<sup>29</sup> Teq mat na inmo ahol abin iluwnan haqad in Yesus bulonim bilam, Ta ya iyowta na nog? ham. Haqan Yesus bilam, Gamuk ara qazaq lahta ham. Ni hurit ham. <sup>30</sup> Juda mat ara q uliq Jerusalem hulosisim in uliq Jeriko-ib tuwolehad luw ham. Wolehad luwsamo mataw meqmeqinta danib ahol waqim wazim wolim ago nagah bunmo giwaqim in tukim tilehiy ham. Lehsa mat na moqnan tonad danib tuqus ham.

<sup>31</sup> Ussa kam nab Juda gigo mat tamaz emagta ara q in dan naqmo muzim wolehad luwimmo mat na ussa in ahol tuwam ham. Ahol waqad in aban emim dan adek ban loqim uriyamad lehmo tilah ham.

<sup>32</sup> An nazaqmo Juda gigo gem Liway anayin ara q Tempel-ib kabiy emagta na in dan nab bolim mat na ahol waqad in aban emim uriyamad tilahmo ham.

<sup>33</sup> Lehsa mat na ababun ara q Samariya-ibta in dan nabmo bolim bo mat na agerab tugwahtim ham. Gwahti qim mat na ahol waqad in anan anad timeqniy ham.

<sup>34</sup> Anad meqniysa agerab loqim in oliv amasilan teq wain ayun mat na asulanib emim teq in tinat ham. Ad in mat na sorim inmo ago donki amalib emim in ad tilah ham. A lehim in bit ara q mataw zayim usayta abitan nab eman ussa in wamuzim tuqus ham. <sup>35</sup> Usim eraqim tilehnan haqad in mani ameta gigermo bit na anamren ugad bulon, Ni mat ka wamuz ham. Ya muleqeq ta boleq teq mani ganim ni mat ka ayon hulosta na ya amenin tinigdaiq haqad in bilam ham.

<sup>36</sup> Haqad Yesus in mat Moses ago gunun hurit kamta na tisuusmun ug, Ni ninad ezaq emaq? ham. Mataw ezeqman na gilikmanib nog diq in mat woliyta na ayowmat nog iyim ulumsih? ham. <sup>37</sup> An mat na bilam, I gibabun Samariya-ibta bolim mat na anan anad meqniysa ulumsihna naqmo ham. Haqan Yesus bulon, Ari ni leheq Samariya mat daq amta nazaq ni asen muzeq em ham.

*Yesus le Marta amikqan Mariya inaq gibiyad os*

<sup>38</sup> Ari Yesus ago disaipel nenaq lehad luwim le uliq ara qab tugwahti qiy. Gwahti qan aw ara q anan Marta haqayta na

in Yesus wazinad bulonim inaq ago bitab tilah. <sup>39</sup> Lehan teq Marta ama anan Mariya haqayta na in eraqim le Iyahta anognib os woqim osad in ago suleq huritad osyaq. <sup>40</sup> Ossa Marta amomo in Yesus ago disaipel nenaq gimen didaq oyad kabiy kabemmo anadin emad anad timeqniyaq. Anad meqniysa in bolim Yesus tubulon, Iyahta ham ya ima ihulosim bo ni ninaq ossa ya imomo didaq oy akabiy an emai q ham. Ni ya inan ninad a hi meqniyaq e? ham. Ni ya ima bulonid in boleq ya ilumsihan ham.

<sup>41</sup> Haqan Iyahta bulon, Marta, Marta ham ni kabiy kabemmo na ginadin emad nihol afaqan iyaq ham. Teq kabiy amulikmo emnanta usaq ham. <sup>42</sup> Kabiy dimunta na ni nima kawa ahol tuqug ham. Ugan i in aholib kabiy dimun diqta na a hi walemam ham.

## 11

*I God inaq gamuk emamta ago adan (Matyu 6.9-15; 7.7-11)*

<sup>1</sup> Ari kam ara q Yesus le saw ara qab God inaq gamuk emad tuqos. In God inaq gamuk bilaqim tihiqiyanmo ago disaipel ara q bolim tubulon, Iyahta ham i ezaq God inaq gamuk emamta na ni i giqisihun ham, Jon in ago disaipel giqisihunta nazaq ham. <sup>2</sup> Haqan Yesus disaipel bunmo gibilan, Ne God inaq gamuk bilaqnan haqad ne kazaq bilaqiy ham.

I Gimam Iyah,

Ni on mataw bunmo giqemid in ni ninan waziniy.

Ad ni ningo maror emid og kab gwahti qan.

<sup>3</sup> Kam amulik-mulikmo ago didaqta ni ig.

<sup>4</sup> Teq mataw i gigo hib daq meqinta emsa i walemad anadin a ta hi emauqta nazaqmo ni i gigo daq meqinta walemad anadin ta hi emmo.

Ad nagah i gilum waqdaqta na ni wasihid i giholib hi gwahti qan.

<sup>5</sup> Yesus nazaq gibilenim teq in bilam, Gamuk ara q kazaq lahta ham. Ne huritiy ham. Tarom alihanib mat ara q in ago kadoy ago bitab bolim bulon ham. Kadoy ni bret ezeqmanmo yag haqad in bulon ham. <sup>6</sup> Ya iyow ara q dan pesanmo bolad luwim bo yaqgo bitab tugwahti qan ya didaq ara q ugdaiqta na haiqqam haqad in bulon ham. <sup>7</sup> Haqan mat bit aduganib osta na bilam, Ni ya ituw hi bul haqad in bilam ham. Ya dan otim yaqgo onmin nenaq tuqosad iyan ya eraqeq nagah na a hi nigdaiq haqad in bilam ham. <sup>8</sup> Ari ya ne gibilenai q ham. Mat bit aduganib osaqta na in ayow anadin a hi emagta ham. Ta teq luweq inmo ahol abin timeqniydaq haqad in eraqeq nagah ayow ago siqim iyaqta na tuqug bugdaq ham.

<sup>9</sup> Ad i God inaq gamuk bilaqgo adan nazaqmo usaqta ham. Teq God atuw a hi hiqiytaqta ham. Ne nagh araq anan susumun ugid teq in tinegdaq ham. Ne nagh araq naguneq teq ne ahol tuwaq daqay ham. Ne dan ez wolhamsa teq God ne giyon dan tihās negdaq ham. <sup>10</sup> On mataw nagh anan God susumun uqayta naqmo in nagh na waqayta ham. Teq on mataw nagh nagunayta naqmo in nagh na ahol waqayta ham. Ad on mataw dan ez wolhamsa teq God in giyon dan tihās negdaq ham.

<sup>11</sup> Teq ne gilikmanib amun araq nabiq neqnan haqad amam bulonsa amam in nagh ahulinaqta gimugaqta araq waqeq ugdaq e? ham. Haiq ham. <sup>12</sup> Teq amun na kurek akokin anan bilaqsa amam in kahkah araq waqeq ugdaq e? ham. Na haiqmo ham. <sup>13</sup> Ne mataw ginad meqinta usaqta ham. Teq ne gigo onmin nagh dimdimunta neggo ne tuhurit kemiya ham. Ari i Gimam Heven-ib osaqta na in nazaq ago on mataw a hi gitondaqmo ye? ham. Haiq ham. On mataw Gimam Iyah inaq gamuk bilaqad bulonsa in ago Bugaw Dimunta tinegdaq ham.

*Mataw asor bilaqiy, Yesus bugaw meqinta Belsebul inaq kabiy emaqta haqiy (Matyu 12.22-30; Mak 3.20-27)*

<sup>14</sup> Ari Yesus in mat araq aholib bugaw meqinta ussa gamuk a hi emyaqta na tumuz. Muzan lehsa mat aqez hiqiyim luwta na gamuk tibilaqyaq. Bilaqsa on mataw ahol waqad in gihol riten lamyaq. <sup>15</sup> Sa mataw asor bilaq yaqay, Yesus in bugaw meqinta gigo danmebta Belsebul ago zaway amalib bugaw meqinta gimuzaqta haq yaqay. <sup>16</sup> Sa mataw ta asor Yesus ulum waqad susumun ug yaqay, Ni God bulonid in Heven-ib daq araq azawayin inaqta emid gehitiqsa i ahol waqad teq i ni ninan helmo tihaqam haq yaqay.

<sup>17</sup> Teq Yesus mataw na ginad hurit kemim gibilan, Kantri araq ago on mataw gihol husereq an gihar ugad an wolad oseq in tihiqiy bug daqay ham. Ad bit araqab on mataw gihol husereq an gihar ugad teq in an tirabun daqay ham. <sup>18</sup> Ad nazaqmo Satan ago dauh nenaq gihol husereq an gihar ugad an wolad Satan ago zaway hiqiysa in ago kabiy tuwoqdaq ham.

Ne ya inan bilaqay, In Belsebul ago zaway amalib bugaw meqinta gimuzaqta haqay ham. <sup>19</sup> Ta teq ya Belsebul ago zaway amalib bugaw meqinta gimuzid ari ne gigo gisenlul asor na in nog diq ago zaway amalib bugaw meqinta gimuzayta? ham. Nazaq iyan ne ya ibilawunayta na negmo gigo gisenlul naqmo in tuqulum kem daqay ham. Ulum kemeq in bilaq daqay, Gamuk

nawa ne bilaqayta na ne katiyay haq daqay ham. <sup>20</sup> Ari God-mo ago zaway ilumsihsa ya bugaw meqinta gimuzsa teq ne ginad emiy ham. God ago maror ne gilikmanib tubol haqiy ham.

<sup>21</sup> Ne ginad em hasiy ham. Mat araq awaz meqinta em sebur inaq wazim ago bit wamuzim ossa in ago nagh bunmo bitab dimunmo usaqta ham. <sup>22</sup> Ta teq mat araq zaway diqta boleq bit anamren na inaq an woleq tuquriyamdaqta ham. Uriyameq in bit anamren abenab em sebur in wazim ago zaway inaq iyim osta na waqad in bit anamren ago nagh bunmo giwaq bugeq a le ago walmataw gigo hib tiqiberdaq ham.

<sup>23</sup> Ne ginad emiy ham. On mataw ya inaq kabiy a hi emayta na in ya ibabun ham. Teq on mataw ya inaq yaqgo dauh a hi girom tonayta na in yaqgo mataw gimuzan hareshmo lehayta ham.

*Bugaw meqinta muleqim ta bol (Matyu 12.43-45)*

<sup>24</sup> Haqad Yesus bilam, Bugaw meqinta araq mat hulos ugim gwahtiqim hareshmo saw ayuwun haiqtab lehim luwaqta ham. Luwad in ban araq anamur emad osdaqta na nagunaqta ham. Teq haiq ham. In ban araq nazaqta ahol a hi waqayta ham. In ban araq ahol a hi waqim teq in ahol bulonim bilaqay, Bit kwaziqmo ya osta nab ya muleqeq ta lehdaiq haqayta ham. <sup>25</sup> Haqad in bit nab muleqim ta lehim bit na asawun wolrironim anaghan bunmo wastitayim abanab eman ussa in ahol waqayta ham. <sup>26</sup> Ahol waqim teq in lehim bugaw meqin diqta 7 nazaq in daq meqinta emgo uriyamiya na gililewunim giwaqim nenaq ta bolim in bit nab gwahtiqim osayta ham. Mebmebmo bugaw amulikmo mat na aholib ussa in ahol meqin dimun nog osyaqta ham. Ari muran teq bugaw 8 nazaq bolim mat na aholib ussa in ahol timeqniy hasim osaqta ham.

*Mataw tidimniyeq os daqayta adan*

<sup>27</sup> Yesus gamuk na bilaqsamo mataw dauh biyahta na gilikmanib aw araq lileyim bulon, Aw niqemim sus nigta naqmo tidimniyim osaqta ham. <sup>28</sup> Haqan Yesus bilam, Haiqqam ham. Mataw God ago gamuk huritad muzinayta naqmo tidimniyim osayta ham.

*Mataw asor daq azawayin inaqta ahol waqnan bilaqiy*

*(Matyu 12.38-42; Mak 8.12)*

<sup>29</sup> Ari on mataw teko bolim osiyta na os tutsamo mataw bunta in gigerab tubol yaqay. Bolsa Yesus gibilan, On mataw muran kam kab osayta ka in meqin diq ham. In daq azawayin inaqta naqmo ahol waqnan bilaqayta ham. Teq God daq araq



azawayin inaқта a hi em negdaq ham. Daq Jona aholib gwahtimta naqmo in ahol tuwaq daqay ham. <sup>30</sup> Kwaziqmo Jona uliq ayahta anan Niniwe haqayta nab gwahtiqim on mataw gibilanta ham. Gibilenad in bilaqne God Niniwe on mataw hazizirib giqemeq gigo daq meqinta amenin negdaqta atowun in gigo hib os nog iyaq ham. Ad nazaqmo Mat Atatin in bilaqne God on mataw kam kabta hazizirib giqemeq gigo daq meqinta amenin negdaqta atowun in gigo hib os nog iyaqmo ham.

<sup>31</sup> Abeb God hazizir ayahta emdaqta nab teq aw marorta kwaziqmo saw araқ pesantab osta na in eraqeq on mataw muran kam kabta nenaq God ameb turad in mataw kam kabta gigo daq meqinta emid ulal tiqiydaq ham. Na ezaqgo aw marorta na uliq pesan diqtab osim Solomon abin huritim ago gamuk dimunta huritnan haqad ago hib tubol ham. Teq ne ahol waqiy ham. Mat araқ Solomon uriyamta na in kawa ne gilikmanib osaқ ham. Ta teq ne in ago gamuk dimunta huritnan gituw hiqiyayta ham.

<sup>32</sup> Teq God hazizir ayahta emdaqta nab uliq Niniwe on mataw na eraqeq mataw muran kam kabta nenaq God ameb turad in mataw kam kabta gigo daq meqinta emid ulal tiqiydaqmo ham. Na ezaqgo on mataw Niniwe-ibta na in Jona ago gamuk huritim in ginad buliyim gigo daq meqinta gileh ugiyta ham. Teq ne ahol waqiy ham. Mat araқ Jona uriyamta na in kawa ne gilikmanib osaқ ham. Ta teq ne in ago gamuk huritim ginad a hi buliyayta ham.

*I gihol anuwan aqamukan*  
(Matyu 5.15; 6.22-23)

<sup>33</sup> Ari mataw lam miderim bit aqirad-nib eman a hi usaqta ham. Ad in lam miderim kuramab a hi sihenaytamo ham. Haiqqam ham. In lam miderim ulilib othenan oyad usaqta ham. Oyad ussa mataw lam anuwan na ahol waqad bolim bit na aqezab lo tugwahtiqayta ham. <sup>34</sup> Ad nazaqmo ni nimeqnagin nihol bunmo anuwan ugaqta ham. Ni nime dimun iyid ni nihol bunmo anuwan inaq tiqiydaq ham. Ari ni nime meqin iyid ni nihol bunmo aromriq inaq tiqiydaq ham. <sup>35</sup> Nazaq iyan ni nihol waz naqmo hiqiy ham. Luweq ni ninad emdaq, Ya idugan anuwan inaқта haqdaq ham. Teq haiq, ni nidugan aromriqnaq usdaq ham. <sup>36</sup> Ari ni nihol bunmo anuwan inaq iyad ni nihol anghan araқ romriqab a hi ussa teq ni nihol bunmo anuwan inaq tiqiy hasdaq ham. Bilaqne lam taromab oysa ni anuwanib osad nihol bunmo anuwan inaq iyaqta nazaq nog ham.

*Yesus in Farisi giyogniz mataw Moses ago gunun hurit kemiyta na nenaq gigo daq ginan bilam*

(Matyu 23.1-36; Mak 12.38-40; Luk 20.45-47)

<sup>37</sup> Ari Yesus gamuk bilaqim tihiqiyin Farisi araқ Yesus waqeq ad ago bitab leheq inaq didaq neqnan haqad tubulon. Bulonan Yesus mat na inaq lehim ago bit aduganib gwahtiqim banab tuqos. <sup>38</sup> Osad in aben a hi suholimmo didaq neqsa Farisi na ahol waqad anadnad tiqemyaq. <sup>39</sup> Sa Iyahta bulon, Ne Farisi ham ne gog teq deg gisanmo suholayta ham. Teq ne giduganib rin tongo adan teq daq meqinta amo amo ate gwalim usaqta ham. <sup>40</sup> Ne mataw agadanta ham. Mat ne gisan amta na in ne gimugan amtamo. <sup>41</sup> Nazaq iyan nagah ne gimuganib usaqta na ne wastitayid dimniyyid teq ne daq dimdimunta God anan anad bilaqtaqta naqmo emiy ham. Ne nazaq emsa teq nagah bunmo ne giwazayta na anumlan tihiqiydaq ham.

<sup>42</sup> Ne Farisi ham ne timeqniyyim osayta ham. Ne gigo kabiyab kwasin amik diqta anan mint haqayta na teq gunay teq kwasin-kwasan amikmikta amo amo ne giwaqim gihuseran humab 10 nazaq iyan humab amulikmo ne God ugayta ham. Ta teq daq titnonta amalib mataw gilum kemayta na teq God anan ginad bilaqayta na ago ne gidek zizalan ne a hi emayta ham. Ne daq aseseqta nawa na gidek a hi zizalsa ne tiqem nagiyta ham. Emad ne daq amikmikta na tiqem nagiyimo ham.

<sup>43</sup> Ne Farisi ham ne timeqniyyim osayta ham. Ne bit humab wolaytab ban ulilibta nabmo osnan ginad bilaqtaqta ham. Ad ne maket-ib luwsa mataw ne gibiyad ginan 'mat ayah' haqsa ne ginad diq dimniyaqta ham. <sup>44</sup> Ne timeqniyyim osayta ham. Ne bilaqne hodhod agelin haiqta nog ham. Gel haiqqam iyan mataw hodhod usaqta na ahol a hi waqadmo gwahtiqim loq gelad luwayta ham.

<sup>45</sup> Haqan mataw Moses ago gunun hurit kemiyta na gigo araқ in Yesus ago gamuk amenin emim bilam, Tisa ham ni nazaq Farisi ginan bilaqad ni igmo gibin inaqmo meqin tonaqmo ham. <sup>46</sup> Haqan Yesus bilam, Ne mataw Moses ago gunun hurit kemiyta na ham ne timeqniyyim osaytamo ham. Ne gunun kabemmo diq on mataw negayta ham. Bilaqne ne nagah afaqanta on mataw gibetarib eman in sorgo giholtuw diq bulayta nazaq ham. Teq ne giben akurgan araқ diq loqim gilumsihad asit a hi sor negayta ham.

<sup>47</sup> Ne timeqniyyim osayta ham. Ne gisesan God ago nantut kabemmo ginol emiyta ham. Ginol eman abeb ne nantut na gimen hodhod abitan dimdimunta giqemiyyta

ham. <sup>48</sup> Ne gisesan God ago nantut ginol eman moqiya na ago ne ginad dimniyyi daqagya ham. Ginad dimniysa ne in gilum-sihad mataw ginol emiya na gimen hod-hod abitan na giqemiyta ham.

<sup>49</sup> God anad awaz meqin diqta iyim iyan in ne gilum kemimmo ginan kazaq bilam ham. Ya Aposel asor teq yaqgo nantut asor giqemid in yaqgo on mataw gigo hib leh daqay haqad in bilam ham. Lehid teq yaqgo on mataw na in gibaymuzad asor in ginol em daqay haqad in bilam ham. <sup>50</sup> God og ka mutur amta nab iyim bo muranmo mataw in ago nantut kabemmo ginol eman moqiya ham. Teq nantut na bunmo ginedan womta na in mataw kam kab osayta ka gigo afaqan ham. Nazaq iyan in ginedan womta na aqenin God in on mataw muran kam kabta gigo hib tuwaqdaq ham. <sup>51</sup> Mebmemo mataw Abel wol eman moqan in anedan wom ham. An abeb diq in Tempel teq tamaz em abanan Tempel asan ban turaqta na gilikmanib in Sekaraya wol eman moqan in anedan wommo ham. Ne gisesan Abel akam-nib mataw dimdimunta ginol emim bo bo Sekaraya ago akam-nib tiqiyiy ham. An ya helmo ne gibilenaq ham. God in mataw dimdimunta ginedan womta na giqenin on mataw muran kam kab osayta na gigo hib tuwaqdaq ham.

<sup>52</sup> Haqad Yesus bilam, Mataw Moses ago gunun hurit kemiya na ham ne time-qniyim osayta ham. On mataw God ago hurit kemnan haqad susumun negsa ne in gidanin qwayayta ham. Negmo diq God ago a hi hurit kemayta ham. Ad mataw ta asor na in God ago hurit kemnan tonsa ne giwasihayta ham.

<sup>53</sup> Admo Yesus bit na hulosis le asanib tugwahtim. Gwahtiqaq teq mataw Moses ago gunun hurit kemiya na giyogniz Farisi nenaq in Yesus anan gigem meqin diq iysa in ulum waqad nagah haresmo anan susumun tuqug yaqay. <sup>54</sup> Susumun ugid in gamuk ara q hi bilaqnanta bilaqid teq i tuwazam haqad in baynetim tur yaqay.

## 12

*Yesus bilam, Ne Farisi gigo yis anan gihol waziy ham*  
(Matyu 10.26-27)

<sup>1</sup> Ari Yesus gamuk na bilaqad tursamo on mataw kuluw diqmo in agerab humab emim an ger ger diq turad in an asen tubay yaqay. Sa Yesus iturimmo inmo ago disaipel gibilenim bilam, Ne Farisi gigo yis anan gihol waz naqmo hiqiyiy ham. Ari ya Farisi gigo yis haqad bilayta na ya in gigo daq in gimileq iyayta naqmo anan bilayta

ham. <sup>2</sup> Nagah bunmo mataw giqisihan usaqta na abeb teq God hasid mataw bunmo ahol tuwaq daqay ham. Ad nagah bunmo mataw gikasnaknib usaqta na abeb God emid ulalab tugwahtiqdaq ham. <sup>3</sup> Nazaq iyan gamuk bunmo ne mataw gime titonim romriqab bilaqiyta na abeb mataw gamuk na saw anuwaniimo bilaqsa on mataw bunmo tuhurit daqay ham. Ad ne ulilemim bit aduganib gamuk kiskismo an adekib bilaqiyta na bunmo abeb mataw bit ahuqunib gwale turad teq in dedibmo lileyeq tibilaq daqay ham.

*On mataw nog diq rabun daqayta?*  
(Matyu 10.28-31)

<sup>4</sup> Ya ikadoyniz ham ya ne gibilenaq ham. Mataw ne gisanmo wol em daqayta ham. Gisan wol emeq in ne gigo hib daq ara q emgo in gigo zaway haiqta ham. Nazaq iyan ne mataw hi girabuniy ham. <sup>5</sup> Ari ne mat rabun daqayta na ago ya tigibilendaq ham. In ago zaway kazaq usaqta ham. In ne ginol emeq teq in ne gihunegid saw faq oyad a hi miyaqtab tuwoleh daqayta ham. Helmo ya ne gibilenaq ham. Ne mat naqmo rabuniy haqaiq ham.

<sup>6</sup> Mataw mani asit diqmo hulosis ah amikmikta abaynaginmo gizayayta ham. Teq God in ah amikmikta na gigo ara q diq anan adek a hi zizalaqta ham. <sup>7</sup> Ad in ne gibiy kemad ne gifaqinib giqensan na in ginulinim ganim diq usaqta na in tuhurit bugta ham. Nazaq iyan ne hi rabiy ham. Ne ah amikmikta nog a haiq ham. Ne ah amikmikta na ayahmo giquriyamiyta ham.

*I Yesus abin bilaqgo gimebay hi woqan*  
(Matyu 10.32-33; 12.32; 10.19-20)

<sup>8</sup> Ya ne gibilenaq ham. Mat aw nog in mataw gimeb bilaqdaq. Ya Yesus-mo ago matta iyim osaiqta haqdaqta na abeb Mat Atatin nazaqmo God ago angelo gimeb turad in mat na anan bilaqdaq. In yaqgota tihaqdaqmo ham. <sup>9</sup> Ari mat nog in on mataw girabunad gimeb gileh yagid ya nazaqmo God ago angelo gimeb mat na gileh tuqugdaiqmo ham.

<sup>10</sup> On mataw Mat Atatin bilawunayta na bunmo God in gigo daq meqinta na tuwalemdaq ham. Ari mat ara q God ago Bugaw Dimunta bilawunid God in ago daq meqinta na a hi walemdaq ham.

<sup>11</sup> Abeb mataw ne giqad Juda gigo bit humab wolaytab leheq mataw marorta gimeb teq gavman gimeb giqemid tursa ne hi rabiy ham. Ad ne mataw ase- qta na gigo gamuk amenin emeq ne naga gamukin bilaq daqayta na ago ne ginadnad hi emiymo ham. <sup>12</sup> Kam nabmo diq teq God ago Bugaw Dimunta in gamuk ne bilaq daqayta na tigiqisihundaq ham.

*Mat ago es kabemmo ussa anad a hi em hasta ago gamuk awowun*

<sup>13</sup> Ari mat araq on mataw dauh biyahta na gilikmanib eraqim turad in Yesus bulon, Iyahta ham ni ya ibab bulonid in i gimam tumomta na ago ahuran nagah husereq asor ya yagan ham. <sup>14</sup> Haqan Yesus bulon, Kadoy ham. Nog diq ya iqeman ya ne gigo jas o megistret iyim ya ne gimen midiyasin wazdaiq? ham. <sup>15</sup> Haqad in on mataw bunmo gibilenim bilam, Ne gihol asawan woltayad osiy ham. Luweq ne amota gigo nagah utet daqay ham. Ne giholyon nagah kabemmo tuwal emgo og kab a hi osayta ham.

<sup>16</sup> Haqad in gamuk awowun araq kazaq gibilan, Mat ago es kabemmo inaqtar araq ago kabiyab didaq gwalim anon kabemmo diq giqam ham. <sup>17</sup> Sa mat na ahol bulonim bilam, Ya teq ezaq tondaq? haqad in bilam ham. Yaggo bit araq ayahta yaqgo didaq tuwal emid osdaqta na haiq haqad in bilam ham. <sup>18</sup> Haqad in anad tiqemim bilam, Ya kazaq tiqemdaiq haqad in bilam ham. Yaggo didaq abitan amikmikta na giqiner tiqsa teq ya gisawnib bit muturta aseseqta tigiwazdaiq haqad in bilam ham. Giwazeq yaqgo wit anagin teq yaqgo es bunmo bit na giduganib tuwal em bugdaiq haqad in bilam ham. <sup>19</sup> Tuwal emid ussa teq ya ihol buloneq bilaqdaiq, Ya matmo diq haqdaiq haqad in bilam ham. Yaggo nagah dimdimunta ulig kabemmo agota usaq haqdaiq haqad in bilam ham. Ya kabiy araq a ta hi emdaiq haqdaiq haqad in bilam ham. Ya inamur emad didaq neqad yuw uluwad inad dimniysa tuqosdaiq haqdaiq haqad in bilam ham. <sup>20</sup> Haqan teq haiq ham. In ahol nazaq bulonad ossamo God tubulon, Ni mat agadanta haqad in bilam ham. Muran tarom kabmo ni tumoqdaq haqad in bilam ham. Moqid ni nagah niholyon tuwal emad osta na nog teq waqdaq? haqad in bilam ham. <sup>21</sup> Haqad Yesus bilam, Mataw asor in giholyon es nagah kabemmo tuwal emayta ham. Teq God ago hib in gigo nagah araq dimunta a hi usaqta ham. Mataw naqanta gigo hib teq daq nawa ya anan bilayta na tugwahtiqaq ham.

*Yesus mataw ginad meqniysa ginad kabemmo emayta na ginan bilam*  
(Matyu 6.25-34)

<sup>22</sup> Haqad Yesus in ago disaipel gibilan, Nazaq iyan ya ne gibilenaq ham. Ne gigo luw os anan ginad haresmo hi emiy ham. Ad "I teq naga neqam?" o "I teq naga amalib i gihol sihenam?" haqad nazaq ne ginad hi emiymo ham. <sup>23</sup> Ne didaq neqgomo og kab a hi osayta ham. Ad ne gihol in tubusanib sihengomo a hi usaqta

ham. <sup>24</sup> Ne ah ginadin emiy ham. In didaq a hi leyahta ham. Ad in didaq a hi tayaytamo ham. In gigo didaq abitan in giholyon didaq tuwal em daqayta na haiqmo ham. God-mo didaq negsa neqayta ham. Teq ne ah nog a haiq ham. Ne ah ayahmo giquriyamiyta ham.

<sup>25</sup> Ne gilikmanib nog diq inmo ahol anan anad meqniysa in ahol moqdaqta akaman na ulum riyawuneq asitmo a ta osdaq? ham. Na haiqgam ham. <sup>26</sup> Ne nagah amik diqta na a hi em daqayta iyan nagaggo ne nagah aseseqta na ginan ginad meqniyaq? ham. <sup>27</sup> Ne mazrewrew kabiyabta na anadin emiy ham. In aholyon kabiy araq a hi emaqta ham. Ad in aholyon tubusan a hi initaqtamo ham. Teq ya ne gibilenaq ham. Kwaziqmo Isrel gigo king Solomon in ago balaw dimdimunta aholib emyaqta ham. Ta teq in ago balaw araq dimun diqta mazrewrew nogta haiqgam ham.

<sup>28</sup> Mazrewrew na muran usid babeq mataw uroteq faqab ginuwid gwaldaq ham. Teq God nagah samanta na dimun diqmo balaw tonaqta ham. Nazaq iyan in ne tubusan tinegdaqmo ham. On mataw ham ne ginad God anan helmo haqayta na in amik diq ham. Ne ginad em hasiy ham. <sup>29</sup> Ginad em haseq ne nagah neq daqayta na teq ne nagah uluw daqayta na ago ne gituw bulad hi luwiy ham. Ad negmo gihol anan ginad hi meqniyan ham. <sup>30</sup> Og kab on mataw en bunmo in nagah osgota na waqgo giholtuw bulad luwayta ham. Teq ne nagah osgota na a hi waqeq ne meqin os daqayta na ago ne Gimam Iyahta na tuhuritta ham. <sup>31</sup> Nazaq iyan ne og ka ago nagah na waqgo gituw hi buliy ham. Haiq ham. Ne God ago maror aduganib gwahtiigo giholtuw bulad luwiy ham. Ne nazaq emsa teq God nagah osgota na bunmo inaqtamo tinegdaq ham.

*Mataw Heven ago nagah dimunta giholyon humab emgo Yesus bilam*  
(Matyu 6.19-21)

<sup>32</sup> Haqad Yesus bilam, Ne mataw zaway haiqta ne hi rabiy ham. Ne Gimam anad bilaqan in ne giqeman ne in ago maror aduganib tugwahtiqaqta ham. <sup>33</sup> Nazaq iyan ne gigo nagah bunmo gizayeq amenin waqad teq ne mataw gina haiqta nagan negiy ham. Negeq teq ne mani aziyan a hi tartaydaqta araq ne giholyon nayiy ham. Nayeq teq ziy nab ne giholyon nagah dimdimunta Heven-ib tuteqmo usdaqta na tuwal emid usan ham. Uliq nab mataw nagah rin tonayta a hi luwayta ham. Sa bidbid nagah a hi meqin tonaytamo ham. <sup>34</sup> Ne ginad emiy ham. Uliq edob ne gigo nagah dimdimunta usdaqta nabmo teq ne ginad ayahmo tuqusdaqmo ham.

*Kabibiy mataw dimunta gigo gamuk awowun*

(Matyu 24.42-44)

<sup>35</sup> Ne gihol wastitayeq lam miderid oysa ne saw waqad osiy ham. <sup>36</sup> Bilaqne kabibiy mataw gigo ayahta an waq ahumabun araqab oseq bolsa in amen emayta nazaq nogmo ne osiy ham. Kabibiy mataw na saw woltayad ossa in gigo ayahta na bo dan ez wolhamsamo in hidmo era ayon dan tihas daqayta ham. <sup>37</sup> Kabibiy mataw na gime a hi rursa in saw waqad ossa in gigo ayahta na boleq nazaq gibiyid kabibiy mataw na tidimniyeq os daqay ham. Ya ne helmo gibilenaiq ham. Mat ayahta na ahol wazid woqsa in ago kabibiy mataw na gigo kabibiy mat nog tiqiyaq ham. Iyeq in ago kabibiy mataw na giqemid banab ossa teq in gimen didaq a bo negid in tineq daqay ham. <sup>38</sup> Mat ayahta na tarom ali-hanib o tarommo saw tihastitaynan tonsa in boleq ago kabibiy mataw na a hi usad saw waqad ossa in gibiyid, kabibiy mataw na tidimniyeq os daqay ham.

<sup>39</sup> Ari ne gamuk ka huriteq teq ne ginad em hasiy ham. Bit anamren in mat rin tonaqta naga kamnib boldaqta na ago huritid teq mat rin tonaqta na bo ago bit wolzilayeq a hi gwahtiqdaq ham. <sup>40</sup> Ad nazaqmo ne saw waqad osiy ham. Ne bilaq daqay, Mat Atatin a hi boldaq haq daqayta nabmo diq in bo tugwahtiqdaq ham.

*Kabibiy mat dimunta teq kabibiy mat meqinta gigo gamuk awowun*

(Matyu 24.45-51)

<sup>41</sup> Haqan Pita bilam, Iyahta ham gamuk awowun na ni i disaipel gimomo gibile-naq o haiq ni mataw bunmo gibile-naq? ham. <sup>42</sup> Haqan Iyahta bilam, Naga matin in kabibiy mat dimunta nog? ham. Kabibiy mat dimunta in anad em hasad ago ayahta aqez muzinaqta ham. Aqez muzinad in kabibiy mataw bunmo giwamuzad didaq neq akamnib in didaq negaqta ham. <sup>43</sup> Abeb ago ayahta boleq in kwaziqmo bilamta nazaqmo ago kabibiy mat na emsa in ahol waqsa in ago kabibiy mat na tidimniyeq osdaq ham. <sup>44</sup> Ya helmo ne gibilenaiq ham. Mat ayahta na in ago kabibiy mat dimunta na emid in ago nagah bunmo tigiwamuzdaq ham.

<sup>45</sup> Ari luweq kabibiy mat na ahol buloneq bilaqdaq, Yaqgo ayahta lehim sisaqmo luwad in hidmo a hi boldaq haqdaq ham. Haqad in kabibiy on mataw ta asor giwamuzaqta na haresmo tiginoldaq ham. Ad in didaq neqad yuw uluwad ahol agadan iysa osdaq ham. <sup>46</sup> In nazaq emad ossamo ago ayahta bolsa in a hi huritdaq ham. Ad in ahol asawan a hi wastitaydaq ham. Sa mat ayahta na boleq in kabibiy mat na wazeq

woltitayeq teq in mataw nan a hi huritayta na gigo sawab hunegid wo tilehdaq ham.

<sup>47</sup> Haqad Yesus bilam, Kabibiy mat araq in ago ayahta anad huritdaqta ham. Huritad teq in ahol a hi wastitayad ago ayahta anad na a hi muzdaq ham. Abeb ago ayahta na in ago mataw gibilenid in kabibiy mat meqinta na woltitay naqmo diq hiqiy daqay ham. <sup>48</sup> Ari kabibiy mat ta araq in ago ayahta anad a hi huritdaqta ham. Ad teq in daq a hi em nagta tiqemdaq ham. Abeb mataw in kabibiy mat na asitmoqmo wol daqay ham. Ari mataw God ago hib nagah kabemmo tuwaqiya na God in gigo hib amenin ayahmo waqdaqta ham. Ad God in mataw gibenab kabiy ayahmo amta na gibilenid in amenin emad in nagah asor bunta amalib emeq tuqug daqaymo ham.

*Yesus on mataw gihusernan bol*

(Matyu 10.34-36)

<sup>49</sup> Ari Yesus bilam, Ya og kab faq araq ayahta ulamnan haqad bol ham. Ad ya inad emaiq faq na tekomo tiqeraq nagta haqaiq ham. <sup>50</sup> Teq haiq ham. Santitiy araq ayahta ya tiqiqisih bugid teq faq na tiqeraqdaq ham. Sa muran ya santitiy na a hi loyinadmo ihol afaqan diq tiqiyaq ham. <sup>51</sup> Ne ginad emay ya og kab on mataw bunmo giqemid zib alowab osgo haqad ya bolta haqay ye? ham. Haiqqam ham. Ya ne gibilenaiq ham. Ya on mataw gihusernan bol ham. <sup>52</sup> Abeb on mataw abaynagin in bit araqab osad teq in gihol husereq dauh gigermo iy daqay ham. Iyeq mataw ezeqman na ya inan helmo haqsa mataw giger na in haiq ham. Nazaq iyid teq in an gihar tuqug daqay ham. <sup>53</sup> In nazaq emad, Onmin matmatta in gimaman gihar negsa gimaman in gitatniz gihar neg daqaymo ham.

Ad nazaqmo onmin onqonta in ginenan gihar negsa ginenan in gimigniz gihar neg daqaymo ham.

Sa on in gidugniz ginenan gihar negsa gidugniz ginenan in gilenan na gihar neg daqaymo ham.

*Nagah teq gwahtiqdaqta na ago hurit kemo adan*

(Matyu 16.2-3)

<sup>54</sup> Ad Yesus in on mataw dauh biyahta na gibilenim bilam, Zeq wolehaqta ban kait dub iyeq bolsa ne ahol waqad bilaqay, Ka urom tuwoqdaq haqayta ham. An helmo urom woqdaqta ham. <sup>55</sup> Ad tim ayahta sibim bolsa ne ahol waqad bilaqay, Ka zeq afan meqin diq iyaqdaq haqayta ham. An helmo in nazaqmo iyaqta ham. <sup>56</sup> Ne mataw gimileq meqinta ham. Ne og kait inaq giwaqan ahol waqad nagah teq gwahtiqdaqta na ago ne ginad em hasayta ham. Ari nagaggo

muran kam kab nagah ne gimeb gwahtiqa sa ne ahol waqad ginad a hi em hasay? ham.

*Yesus an anobun wastitay ago bilam (Matyu 5.25-26)*

<sup>57</sup> Nagaqgo ne ginad a hi em hasad daq dimunta teq daq meqinta na a hi gilum kemay? ham. <sup>58</sup> Mat araq ni niqad hazizirib leheq nan nignan tona ni inaq danib lehad hidmo gamuk na wastitayiy ham. Luweq in nihuregeq niqad le megistret ameb gwahtiqaq ham. Gwahtiqaq megistret niwaqeq hurmey gibenab niqemid hurmey niwazeq bit giqirquran osaytab nihuneg daqay ham. <sup>59</sup> Ya ni nibilenaig ham. Ni bit na hidmo a hi hulodsaq ham. Ni bit nab osad ningo daq meqinta amenin zay bugeq teq ni asanib gwahtiqaq ham.

### 13

*Yesus bilam, Ne gigo daq meqinta gileh a hi ugeq ne tumoq has daqay ham*

<sup>1</sup> Ari kam nabmo mataw asor osim Yesus buloniy, Mataw Galiliy-ibta asor God amen tamaz emad ossa Pailat ago mataw giqeman lehim in mataw na ginol em bugiy haqiy. Ginol em bugan mataw na ginedan woqim karuw tamaz emnan haqad anat urotiyta na anedan inaq wastonim tamaz em abanab giquq haqiy. <sup>2</sup> In nazaq haqan Yesus amenin emim gibilan, Luweq ne ginad em daqay, Mataw ginol emiyta na gigo daq meqinta in Galiliy-ib on mataw bunmo gigo daq meqinta giquriyaman iyan in moqiy haq daqay ham. <sup>3</sup> Haiqmo diq ham. Ari ya helmo gibilenaig ham. Ne gigo daq meqinta giholib usaqta na ne gileh a hi ugeq ne bunmo nazaqmo tumoq daqaymo ham.

<sup>4</sup> Haqad in bilam, Kwaziqmo uliq Jerusalem-ub yuw akurorqanta anan Silowam haqayta nab bit araq ayahta sisaqmo gwalahta na woqim mataw 18 nazaq giqisihan moqiy ham. Ne luweq ginad em daqay, Mataw moqiyta na gigo daq meqinta in Jerusalem-ub on mataw bunmo gigo daq meqinta giquriyaman iyan in moqiy haq daqay ham. <sup>5</sup> Haiqgam ham. Ya helmo gibilenaig ham. Ne gigo daq meqinta giholib usaqta na ne gileh a hi ugeq ne bunmo nazaqmo tumoq daqaymo ham.

*Ay anon a hi emaqta ago gamuk awowun*

<sup>6</sup> Haqad Yesus gamuk awowun araq kazaq gibilan, Mat araq ay fik amagin araq ago wain akabiynib tilay ham. Leyim abeb in bolim ay fik na anon araq a hi ussa ahol wam ham. <sup>7</sup> Ad in ago mat kabiy wamuzaqta na bulon, Ni hurit haqad in bilam ham. Ya ay fik ka leyan in ulig ezeqmanmo titur

haqad in bilam ham. Tursa ya bo anon anan saw waqaiqta teq in anon araq diq a hi emaq haqad in bilam ham. In turad og amoyan samanta waqaaq haqad in bilam ham. Ni qwayid woqan haqad in bilam ham. <sup>8</sup> Haqan kabibiy mat na bilam, Iyahta ham i ay ka hulodsid in ulig kab a ta turan haqad in bilam ham. Tursa ya abeqarib og tayeq bulmakau abekoq tiqemdaig haqad in bilam ham. <sup>9</sup> Luweq ulig araq kob teq in anon emdaqta hi waqan us haqad in bilam ham. Ari ulig nab in anon a hi emsa teq ya tuqwaydaig haqad in bilam ham.

*Juda gigo lotu akamnib Yesus aw araq wastitayan dimniy*

<sup>10</sup> Ari Juda gigo lotu akaman araqab Yesus Juda gigo bit humab wolaytab on mataw suleq tinegyaq. <sup>11</sup> Suleq negsamo aw araq bit nab bo tugwahtim. Aw na aholib bugaw meqinta usad ulig 18 nazaq in moq ugad usyaqta. Ussa aw na kor toneq luwad in akorkoran itiwuneq titnoneq turgo hiqiyyaqta. <sup>12</sup> Sa Yesus aw na ahol waqad bulonan agerab bolan in bulon, Neng ham ya niholib moq usta na waleman tihiqiy ham. Muran ni samanmo titnoneqmo tiuwdaq ham. <sup>13</sup> Haqad in aben aw na aholib emim wazan hid naqmo in titnonimmo titur. Turad in God abin tiqiluwyaq.

<sup>14</sup> Yesus aw na eman dimniyta na in lotu akamnib daq na amta. Nazaq iyan bit humab wolayta ago danmebta na in Yesus anan agem timeqniy. Agem meqniysa in on mataw gibilan, I kabiy emgo kam 6 nazaq usaqta ham. Kam nab teq ne gigo moq wastitaynan boliy ham. Ari lotu akamnib ne gigo moq walemnan hi boliy ham. <sup>15</sup> Haqan Iyahta amenin emim bulon, Ne mataw gimileq meqinta ham. Lotu akamnib ne bunmo lehim ne gigo bulmakau teq donki giqirquran gibitnib turayta na giqaman hasim giqad lehan in yuw uluwayta ham. <sup>16</sup> Aw ka in Abraham asenlulibta ham. Teq Satan sisaq diqmo ulig 18 nazaq in irquran osta ham. Ta nagaqgo ya lotu akamnib in aqamun na a hi hasdaigmo? ham. <sup>17</sup> Yesus nazaq ago bab gibin wazan woqan in gimebay tuwom. Gimebay woqsa on mataw dauh biyahta na bunmo in daq dindimunta Yesus emyaqta na ahol waqad in ginad tidimniy yaqay.

*Ay mastet anagin ago gamuk awowun (Matyu 13.31-32; Mak 4.30-32)*

<sup>18</sup> Haqad Yesus ta gibilan, God ago maror in naga diq nog? ham. Ya naga diq atowun emeq bilaqid teq ne ginad em has daqay? ham. <sup>19</sup> God ago maror in bilaqne ay mastet anagin amik diqta amulikmo mat araq ago kabiyab layta na nog ham. Leyan in gwalam ay nog iyim ayah tiqiy bug ham.

An teq ah bolim giholyon rir emim tuqos yaqay ham.

*Yis ago gamuk awowun  
(Matyu 13.33)*

<sup>20</sup> Haqad Yesus ta bilam, Ya God ago maror atowun emnan haqad ya naga diq atowun emeq bilaqid teq ne ginad tiqem has daqay? ham. <sup>21</sup> God ago maror in bilaqne yis nogta ham. Aw arağ yis na waqim mel deg ezeqman nazaq inaq buliyan yis ulilemim ussa mel na bunmo huhuw tinam ham.

*Ne dan ez amikta nab le gwahtiqiy  
(Matyu 7.13-14; 7.21-23)*

<sup>22</sup> Ari Yesus uliq Jerusalem-ub wolehadmo in uliq aseseqta teq uliqben amikmikta nagab on mataw suleq negim negim tilehyaq. <sup>23-24</sup> Lehad luwsa mat arağ Yesus tisuusumun ug, Iyahta ham ni ya ibilen kem ham. God teq mataw amulik-mulikmo giqemid ago maror aduganib gwahtiq daqay o haiq in mataw kabemmo giqemid gwahtiq daqay? ham. Haqan Yesus mataw nab turiyta na bunmo gibilan, Ne zaway diq iyeq dan ez amikta nabmo le gwahtiqiy ham. Mataw kabemmo dan ez amikta nab le gwahtiqan yo hiqiyayta ham.

<sup>25</sup> Abeb bit anamren eraqeq bit ago dan ez amikta na tuqotdaq ham. Otid teq ne boleq dan ezab turad dan ez wol hamad ne kazaq bilaq daqay ham. Iyahta haq daqay ni i giyon dan has haqad ne bilaq daqay ham. Haqid in ne gigo gamuk amenin emeq kazaq gibilendaq ham. Ne mataw edob boliyta na ya a hi hurit haqdaq ham. <sup>26</sup> Haqid ne tubulon daqay ham. Haiq haq daqay ham. I ni ninaq didaq neqad yuw uluwad osta haq daqay ham. Teq ni i gigo uliqab bolim suleq igta haq daqay ham. <sup>27</sup> Haqid in ne a ta gibilendaq ham. Haiq haqdaq ham. Ne edob diq boliyta na ya a hi hurit haqdaq ham. Ne mataw daq meqin emayta ne bunmo kazaq lehiy haqdaq ham. <sup>28</sup> Ad in ne gimuzid ne le in ago maror asan ban gwahtiqeq tuqos daqay ham. Osad ne Abraham teq Aisak teq Jakob teq God ago nantut bunmo in God ago maror aduganib ossa ne tigibiy daqay ham. Gibiyad ne ginad meqniysa gaqad gite guruwad tuqos daqay ham. <sup>29</sup> Teq og saw bunmo gigo on mataw amo amo kabemmo boleq God ago maror aduganib didaq neqad tuqos daqay ham. <sup>30</sup> Nazaq iyan ne ginad em hasiy ham. Mataw kabemmo og kab gibin haiqmo osayta na in le danmeh tiqiy daqay ham. Sa mataw og kab gibin inaqtan nagan gibin hiqiysa in abeb tiqiy daqay ham.

*Yesus uliq Jerusalem anan anad meqniy  
(Matyu 23.37-39)*

<sup>31</sup> Ari kam nabmo diq Farisi asor bolim Yesus buloniy, Ni uliq ka huloseq saw arağab leh haqiy. Herot ninol emnan bilaqaq haqiy. <sup>32</sup> Haqan Yesus gibilan, Ne leheq gaun kwasikta na buloniy ham. Ni hurit haqad buloniy ham. Muran teq babeq ya bugaw meqinta gimuzad mataw gigo moq inaqtan giwastitaysa dimniy daqay haqad ne buloniy ham. Ad misireq ya i go kabiy tuwol hasdaiq haqad ne buloniy ham. <sup>33</sup> Ari ya kam ezeqman na aduganib dan ahulib Jerusalem-ub wolehad ya dimunmo tiluwdaiq ham. Na ezaq God ago nantut saw haresmo a hi ginol emayta ham. In Jerusalem-ubmo ginol eman moqayta ham.

<sup>34</sup> Haqad Yesus bilam, O Jerusalem, Jerusalem ham. Ningo mataw God ago nantut ginol emayta ham. Ad ne God ago kabibiy mataw in giqeman ne gigo hib lehayta na gimalib gig hunegayta ham. Kam kabemmo ya ningo on mataw gituwal emnan inad bilamta ham. Bilaqne kurek anenqab aben gayik ahaqenib amidgotniz gituwal emim giqisihaqta nazaq ham. Ta teq ne hulosity ham. <sup>35</sup> Nazaq iyan ne huritiy ham. God ne gigo uliq hulosity tilah ham. Ya ne gibilenaq ham. Ne ya a ta hi ibiy daqay ham. Ari ne ginad dimniysa bilaq daqay, Mat ka Iyahta abinib bolan i ginad bilaq gigayinaq haq daqayta kam nab teq ne ya a ta ibiy daqay ham.

## 14

*Yesus mat arağ ahol umta wastitayan dimniy*

<sup>1</sup> Ari Juda gigo lotu akaman arağab Yesus in Farisi gigo danmehba arağ ago bitab didaq neqnan tilah. Lehim ossa mataw gibin inaqtan nagan in Yesus anononmo diq wirinad os yaqay. <sup>2</sup> Sa mat arağ ahol umta Yesus anognib os. <sup>3</sup> Ossa Yesus mat na ahol waqad in mataw Moses ago gunun hurit kemiyta na giyogniz Farisi nenaq tisuusumun nag, I gigo lotu akamnib i mat ago moq inaqtan na wastitayor dimniydaq o haiq? ham. I Juda gigo maror ezaq usaqta? ham. <sup>4</sup> Haqan mataw aseseqta na giqezmo hiqiyim osiy. Nazaq iyan Yesus mat na wazim wastitayan ago moq dimniyan in eman tilah. <sup>5</sup> Mat na tilehsa teq Yesus mataw aseseqta na gibilan, Ne gilikmanib mat arağ ago amun o ago bulmakau arağ lotu akamnib yuw yayibtab woqid tobag mat na hidmo hureqid a hi gwaldaqay ham. <sup>6</sup> Haqan mataw aseseqta na in Yesus ago gamuk na amenin arağ a hi emiy.

*Mat ahol wazid woqo adan*

<sup>7</sup> Ari Yesus humab nab osad in mataw didaq neqnan boliyta na gibiyas in ban ulilibta nabmo osnan ginad bilaqayq.

Nazaq iyan in gamuk awowun araq kazaq gibilan,<sup>8</sup> Mat araq aw waqnan tonad in ni nibilenid ni ago humabub leheq itureqmo ni le ban ulilibtab hi os ham. Luweq humab na anamren mat ta araq in abin ni nibin uriyamta na lilewundaqmo ham.<sup>9</sup> Nazaq iyid teq humab anamren ne giger gililewunan boliyta na in ni nigerab boleq nibileneq bilaqdaq, Ningo ban dimunta na ni mat ayahta ka ug haqdaq ham. Id teq ni nimebay woqsa leheq ogib garuruhab tuqosdaq ham.<sup>10</sup> Nazaq iyan mat araq nililewunid ni didaq neqnan leheq ni le ogib garuruhabmo os ham. Ni nazaq emid teq humab na anamren boleq nibilendaq, Kadoy haqdaq ni bo leheq ban ulilibta kob os haqdaq ham. In nazaq nibilenid on mataw ninaq didaq neqad osayta na bunmo in ni nibin tiqiluw daqay ham.<sup>11</sup> On mataw in gimo gihol abin iluwayta na bunmo gibin tuwoqdaq ham. Sa on mataw gihol abin wazan woqaqta na gibin tiqeraqdaq ham.

<sup>12</sup> Haqad Yesus humab na anamren bulon, Ni humab araq a ta emnan haqad ni niyogniz teq nimaqbaban teq nisenlul teq ningo uliq araqaqta gigo es kabemmo inaqa na ni hi gililewun ham. Luweq abeb in ni nililewunid ni le in gigo bitab didaq neqsa in ningo didaq neqiyta na amenin nig daqay ham. Nigid teq ni God ago hib amenin araq dimunta a ta hi waqdaq ham.<sup>13</sup> Ni nazaq hi em ham. Ni humab araq tiqemnan haqad ni mataw ginaghan haiqta teq mataw gibensen ayayta teq mataw gisen meqinta teq mataw gime haiqta naqmo gililewun ham.<sup>14</sup> Ni nazaq tonid teq God tinidimun tondaq ham. Na ezaqgo ham mataw nazaqta na in ningo didaq amenin a hi em daqayta ham. Abeb God-mo teq ningo daq dimunta na amenin tinigdaq ham, kam mataw dindimunta hodhodab eraq daqayta nab ham.

*Maror araq atatin aw waqnan tonsa ayon didaq ayahta oyta ago gamuk awowun (Matyu 22.1-10)*

<sup>15</sup> Ari mataw didaq neqad osiyta na gilikmanib mat araq gamuk na huritim in Yesus tubulon, On mataw God ago maror aduganib teq didaq neqad os daqayta na in muran tidimniyim osayta ham.<sup>16</sup> Haqan Yesus bulon, Wagam araq kazaq lahta ham. Mat araq didaq ayahta oynan haqad mataw kabemmo gimen nan am ham.<sup>17</sup> Nan eman teq abeb humab na ago kam diq tugwahtim ham. Gwahtiqaq mat na in ago kabibiy mat bulonan in le mataw tanabmo gibilanta na a ta gibilan ham. Ne boliy haqad in bilam ham. Nagah bunmo neqgomo tiqiyim usaq haqad in bilam ham.<sup>18</sup> Haqan mataw na bunmo gituw tihiqiyiy

ham. Gituw hiqiyisa araq bilam, Ya le og araq muturta zayta na ahol tuwaqnan ham. Nazaq iyan ya humab nab a hi lehdaiq haqad in bilam ham.<sup>19</sup> Sa mat araq bilam, Ya bafalo 10 nazaqmo tiguez ham. Gizayim ya giqad leheq kabiyab og tuwol waqnan ham. Nazaq iyan ya humab nab a hi lehdaiq haqad in bilam ham.<sup>20</sup> Sa mat araq bilam, Muran diq kawa ya aw tuway ham. Nazaq iyan ya humab nab a hi lehdaiq haqad in bilam ham.

<sup>21</sup> Haqan kabibiy mat na muleqim lehim in ago ayahta nagah na bunmo ago tubulon bug ham. Bulon bugan bit anamren na agem meqniysa in ago kabibiy mat na bulon, Ni hidmo uliq aduganib kob ta leheq mataw ginaghan haiqta teq mataw gibensen kok tonta teq mataw gime haiqta teq mataw gisen meqinta edob edob osayta na ni giwaq bugeq yaqgo bit aduganib giqad bol haqad in bilam ham.<sup>22</sup> An abeb kabibiy mat na bolim bilam, Iyahta ham ya ni niqez na tumuz bug ham. Teq ban asor samanmo usaq haqad in bilam ham.<sup>23</sup> Haqan mat ayahta na in kabibiy mat na bulon, Ni uliq asan ban leheq dante haresmo saw waq ham. Saw waqeq ni mataw gibiyad gibe yaheq gihureqeq giqad bo gwahtiq haqad in bilam ham. Gwahtiqid yaqgo bitab mataw ban waqmo bugiy haqad in bilam ham.<sup>24</sup> Ya nibilenaq ham. Ya mataw mebmemo gililewunan a hi boliyta na gigo araq diq in yaqgo didaq aneglan asit a hi neq waq daqay haqad in bilam ham.

*Mat anad em haseq teq in bo Yesus asen muzan*

*(Matyu 10.37-38)*

<sup>25-26</sup> Ari on mataw dauh biyahmo Yesus muzim inaq tileh yaqay. Lehssa Yesus ahol buliyim gibilan, Mat nog ya imuzeq bolnan haqad in yaqmo imomo inan anad ayahmo bilaqan ham. Ari mat in anenmaman teq ago aw amun teq amaqbaban teq ahiyan ginadin emad teq inmo ahol anadin diq emaqta, mat naqanta in yaqgo disaipel a hi iydaq ham. Na ezaggo in ya iqeman ya abeb iyaiq na ago ham.<sup>27</sup> Teq mat in ago kruse sorim ya imuzim a hi bolaqta na in yaqgo disaipel a hi iydaqmo ham.

<sup>28</sup> Ne ginad emiy ham. Ne gilikmanib mat araq bit tuwaznan haqad itureqmo in osad ago mani tinulindaq ham. Luweq ago mani siqim iyid in bit a hi waz bugdaq haqad ham.<sup>29</sup> Ari mat na anad a hi em haseq in bit ago tituq teq kalik emeqmo tuhulosdaq ham. Huloseq in bit na a ta hi waz bugdaq ham. Sa mataw bunmo ahol waqad in mat na tibilawun daqay ham.<sup>30</sup> Ad in bilaq daqay, Mat kaqmo atuw haiqta haq daqay

ham. In bit wazan eramta teq in a ta hi em bug haq daqay ham.

<sup>31</sup> Teq king araq in le king ta araq inaq bab tiqemnan haqad itureqmo in osad anad ulumad tuqosdaq ham. Osad in anad emeq bilaqdaq, Yaqgo mataw bab emayta na in 10 tausen nazaq haqdaq ham. Ta yaqgo bab ko in ya iquriyamim in ago bab mataw 20 tausen nazaq haqdaq ham. Ya maror ko ago dauh nenaq bab emeq tiginol bugdaiq o haiq? haqdaq ham. <sup>32</sup> Haqad in ago zaway loyinsa biyab a hi iyid in ago bab na danib pesanmo bolsa in amen gamuk emid ameb lehid in bulondaq, Bab o tob iyan haqdaq ham. Ya ezaq tonid teq bab ka hiqiysa i zib alowab osam? haqdaq ham.

<sup>33</sup> Ad Yesus bilam, Na nazaqmo ham. Ne gigo nagah bunmo gileh a hi ugeq ne yaqgo disaipel a hi iy daqay ham.

*Kamis agon hiqiyta ago gamuk awowun (Matyu 5.13; Mak 9.50)*

<sup>34</sup> Kamis in nagah araq dimunta ham. Teq in agon tihiqiyid i ezaq tonid teq kamis na agon inaq ta iydaq? ham. <sup>35</sup> Kamis agon hiqiyta na akabiyan haiqta ham. I kabiyab hunegid in didaq emid anonon a hi gwaldaq ham. Ad i bulmakaw abekoq inaq buliyeq ay abeqarib emid in ay na emid anon a hi emdaqmo ham. Kamis nazaqta akabiyan haiqta na i hunegan lehaqta ham. Mat aw nog in gidek nan huritgo usaqta na in gamuk ka hurit kemiy ham.

## 15

*Sipsip araq nabag lahta ago gamuk awowun*

*(Matyu 18.12-14)*

<sup>1</sup> Ari kam ta araqab mataw takis waqayta na teq mataw daq meqinta emayta na kabemmo in Yesus ago gamuk huritnan haqad agerab tubol yaqay. <sup>2</sup> Bolsa Farisi giyogniz mataw Moses ago gunun hurit kemiyta na nenaq in nazaq gibiyad in Yesus wadad anan bilaq yaqay, Mat ko in mataw daq meqinta emayta kogan agem dimunta negad nenaq didaq neqaqta haq yaqay.

<sup>3</sup> In nazaq haqsa Yesus gamuk awowun araq kazaq gibilan, <sup>4</sup> Ne gilikmanib mat araq in ago sipsip 100 nazaq giwamuzad luwsa ta araq nabag lehid teq mat na le a hi nagundaq e? ham. Haiq ham. In ago sipsip 99 na gihulosid nab tursa in sipsip amulikmo nabag lahta na naguneq tilehdaq ham. Nagunad luweq le in ahol tuwaqdaq ham. <sup>5</sup> Ahol waqad in waqeq abetarib emeq in anad dimniysa soreq ad tuboldaq ham. <sup>6</sup> A boleq in ayogniz bunmo gibilenid bo humab woleq ossa teq in gibilendaq, Yaqgo sipsip araq nabag lehan ya nagunim le tuway haqdaq ham. Ne bolid ya nenaq ginad dimniysa osuq haqdaq ham.

<sup>7</sup> Teq ya ne gibilenaiq ham. Daq nazaq Heven-ib usaqtamo haqaiq ham. Mat daq meqinta emad luwaqta amulikmoqmo in anad buliyeq ago daq meqinta na gileh ugsa Heven-ib God ago dauh nenaq in mat na anan ginad ayahmo dimniyayta ham. Ari on mataw kabemmo ginad emay, I giholib daq araq meqinta i gileh ugamta haiggam haqayta na God ago dauh nenaq in mataw kabemmota na ginan ginad a hi dimniyayta ham.

*Mani nabag lahta ago gamuk awowun*

<sup>8</sup> Ari ne gilikmanib aw araq ago mani silva 10 nazaq usid in araq nabag hunegiq teq in a hi nagundaq e? ham. Haiq ham. Aw na lam midereq in ago bitab saw wolrironad mani na nagunad luweq le in ahol tuwaqdaq ham. <sup>9</sup> Ahol waqeq in ayogniz teq in ago uliq araqibta bunmo gibilenid bo humab woleq ossa teq in gibilendaq, Yaqgo mani araq nabag tuhuneg hayta na ya nagunim le ahol tuway haqdaq ham. Ne bolid ya nenaq ginad dimniysa osuq haqdaq ham.

<sup>10</sup> Teq ya ne gibilenaiq ham. Daq nazaq Heven-ib usaqtamo haqaiq ham. Mat daq meqinta emad luwaqta amulikmoqmo in anad buliyeq ago daq meqinta na gileh ugsa Heven-ib God ago angelo in mat na anan ginad ayahmo dimniyayta ham.

*Amun minminta amam hulosis lahta na ago gamuk awowun*

<sup>11</sup> Haqad Yesus bilam, Mat araq atatinz giger nenaq tuqosiy ham. <sup>12</sup> Osad atatin araq amikta na in amam bulon, Kabay ham abeb ni tumoqid ya ningo nagah asor ya ibab inaq waqamta na muranmo ni yaqmenta na yag ham. Haqan amam in ago nagah bunmo huserim atatinz giger na tinag ham. <sup>13</sup> Negan sisaq haiq atatin amikta na in ago nagah bunmo giwaqim a lehim saw araq pesantab tuqos ham. Osad in daq haresmo emad ago mani haresmo tuhunegyaq ham.

<sup>14</sup> In nazaq emad luwsa ago nagah bunmo tihiqiy bug ham. Hiqiy bugan teq zarow ayahta saw nab tugwahtim ham. Gwahtiqan in aholib nagah araq diq haiggam iyan in agemnan tumoqyaq ham. <sup>15</sup> Nazaq iyan in lehim mat araq saw nabta ago hib kabiy wam ham. Waqan kabiy anamren mat na eman lehim in ago bul gelibta giwamuzad osyaq ham. <sup>16</sup> Osad in agem moqsa anad tiqemyaq, Bul itez neqayta ko asor ya neq nagta haqyaq ham. Haqsa teq haiq ham. Mat araq in ulumsiheq didaq araq a hi ugyaq ham.

<sup>17</sup> In nazaq meqin diq osad anad emwirad osim teq in tibilam, Ya imango kabibiy mataw gigo didaq kabemmo iysa in a hi neq bugayta haqad in bilam ham. Sa



ya kab osad igemnan tumoqaiq haqad in bilam ham. <sup>18</sup> Nab iysa ya eraqeq muleqeq imam ago hib ta lehdaiq haqad in bilam ham. Leheq ya imam bulondaq, Kabay haqdaiq ya daq meqinta ningo hib emim ya God ago hib em tonmo haqdaiq haqad in bilam ham. <sup>19</sup> Ya ningo amun dimunta a haiq haqdaiq haqad in bilam ham. Muran ni ya inan 'yaqgo amun' haqad ta hi bilaq haqdaiq haqad in bilam ham. Ni ya iqemid ya ningo kabibiy matmo araq iyiq haqdaiq haqad in bilam ham.

<sup>20</sup> Haqad in eraqim amam ago hib muleqim ta lah ham. Lehssa amam osim atatin pesanmo danib bolsa in ame le ahol tuwam ham. Ahol waqad in ago amun anan anad ayahmo diq meqniysa in sibim lehim atatin wazim ay netim tiqilawun ham. <sup>21</sup> Ilawunan ago amun na bilam, Kabay ham ya daq meqinta ningo hib emim ya God ago hib em tonmo haqad in bilam ham. Ya ningo amun dimunta a haiq haqad in bilam ham. Muran ni ya inan 'yaqgo amun' haqad ta hi bilaq haqad in bilam ham.

<sup>22</sup> Haqan haiqqam ham. Amam era ago kabibiy mataw gibilenim bilam, Ne yaqgo tubusan dimun diqta naqmo waq a boleq ya itatin ka ayon wel ugiy haqad in bilam ham. Ad ring araq aben akurganib em ugad teq gisendugan asenab em ugiymo haqad in bilam ham. <sup>23</sup> Em ugeq teq ne le bulmakau amidon anon ayahta naqmo waq a boleq wol emeq oyiy haqad in bilam ham. Oyid i inaqq neqad ginad dimniysa osuq haqad in bilam ham. <sup>24</sup> Na ezaqgo ham yaqgo amun ka tumomta teq muran in kayeq ta iy haqad in bilam ham. In nabag tilahta teq muran i ahol a ta waqauq haqad in bilam ham. Haqad in atatin na ayon humab ayahta tiqemiy ham.

<sup>25</sup> In humab emim ossa mat na atatin ayahta na kabiyab luwim tubol ham. Bolim bit agerab tugwahtiqadmo in mataw itiy wolad dorsa gihulan tuhurit ham. <sup>26</sup> Huritad in kabibiy mat araq bulonan bolan tisuusun ug ham. Ko ezaq tonay? haqad in bilam ham. <sup>27</sup> Haqan kabibiy mat na bulon, Ni nimikqan muleqim tubol haqad in bulon ham. Bolan ni nimam bulmakau amidon anon ayahta na wol emim oy haqad in bilam ham. Na ezaqgo ham in ago amun nabag lahta na in a ta wam haqad in bilam ham. Waqan in ago amun na afaqan araq a hi waqim in dimunmo osaq haqad in bilam ham.

<sup>28</sup> Kabibiy mat nazaq haqan atatin aqenta na agem timeqniy ham. Agem meqniysa in bit aduganib lo gwahtiqnan atuw tihiqiy ham. Atuw hiquysa in bit asan ban tursa amam asanib gwahtiqim anad waqad gamuk dimunta tubulonyaq ham. <sup>29</sup> Bulonsa in amam ago gamuk amenin

emim bilam, Ulig kabemmo ya iholtuw bulad ningo kabiy emad teq ya amenin araq ahol a hi way haqad in bilam ham. Ya kam araq diq niqez a hi othasta haqad in bilam ham. Ta teq ni memeq amidon araq diq yagan yaqmo igo kadoyiniz neaq oyim humab wolim i ginad dimniysa a hi os haqad in bilam ham. <sup>30</sup> Ari ningo amun na in ningo nagah bunmo on danatabta gigo hib huneg bugim tihiqiy in muleqim ta bolan ni ninad ugad bulmakau amidon anon ayahta na tuwol em ug haqad in bilam ham.

<sup>31</sup> Haqan amam bulon, Ya itatin ham tutimmo i giger araqibmo osauqta haqad in bilam ham. Ad yaqgo nagah bunmo in ningota haqad in bilam ham. <sup>32</sup> Teq muran i humab woleq ginad dimniysa tuqosamta haqad in bilam ham. Na ezaqgo ham ni nima ka tumomta teq in kayeq ta iy haqad in bilam ham. I bilaw in nabag tilah hawta teq in muleqim ta bolan i ahol a ta waqauq haqad in bilam ham.

## 16

*Kabibiy mat kabiy meqin amta na ago gamuk awowun*

<sup>1</sup> Ari Yesus in ago disaipel gibilan, Mat araq ago es nagah kabemmota in os ham. Ossa in ago kabibiy mat gibunibta araq ago kabibiy mataw giwamuzyaqta na in osmo ham. Ossa mataw asor bolim mat ayahta na tubulonyam ham. Ningo kabibiy mat gibunibta na in ningo nagah abu ulumaq haqiy ham. <sup>2</sup> Haqan mat ayahta na in ago kabibiy mat gibunibta na lilewunan agerab bolan in bulon, Ya nibin huritna na alulin in ezaq diq? haqad in bulon ham. Ni leheq yaqgo nagah bunmo nibenab usaqta na mar ton bug haqad in bilam ham. Mat ni yaqgo kabiy a ta hi wamuzdaq haqad in bilam ham. Ya ningo kabiy na nibenab tuwalemai q haqad in bilam ham.

<sup>3</sup> In nazaq haqan kabibiy mat gibunibta na anadibmo bilam, Yaqgo ayahta kabiyab ya tiqimuzaq haqad in bilam ham. Ya teq ezaq tondaq? haqad in bilam ham. Ya kabiy afaqanta emgo igo zaway haiqqam haqad in bilam ham. Ad ya didaqqan sunnan imebay woqaq haqad in bilam ham. <sup>4</sup> In anad nazaq emwiraq osim teq in bilam, Ari ya inad tiqem haqad in bilam ham. Ya iholyon dante wastitayid teq yaqgo ayahta imuzid mataw asor gigem dimunta yagad in gigo bitab iqad tileh daqay haqad in bilam ham.

<sup>5-6</sup> Nazaq haqad in mataw in ago ayahta ago hib nagah waqan amenin in gigo hib usaqta na amulik-mulikmo gililewunan tubol yaqay ham. Bolsa mat araq ameb bolan in tisuusun ug, Ni yaqgo ayahta ago

nagah wamta na amenin ganim diq ningo hib usaq? haqad in bilam ham. Haqan mat na bilam, Masil arebnaq aseseq diqta na 100 nazaq usaqta haqad in bilam ham. Haqan kabibiy mat gibunibta na bulon, Ni nagah wamta ago sansandek waqeq hidmo 100 na suholeq abanab ni 50 nazaqmo mar ton haqad in bilam ham.

<sup>7</sup> An abeb mat ta araq bolan in susumun ug, Ni nagah wamta na amenin ganim ningo hib usaq? haqad in bilam ham. Haqan mat na bilam, Wit aziyinaq 100 nazaq usaqta haqad in bilam ham. An kabibiy mat gibunibta na bulon, Ni nagah wamta ago sansandek waqeq 100 na suholeq 80 nazaqmo ni mar ton haqad in bilam ham.

<sup>8</sup> Ari abeb mat ayahta na in daq na ago tuhuritim in ago kabibiy mat amileq meqinta na abin tiqiluw ham. Na ezaqgo kabibiy mat na anad emim aholyon dante dimunta wastitayta na ago ham.

Haqad Yesus bilam, Mataw og ka ago daq muzinayta na in on mataw God ago saw anuwanib osayta na giquriyamad in giyogniz nenaq gihol adanteqin anononmo wastitayta ham. <sup>9</sup> Nazaq iyan ya ne gibilenaq ham. Ne og ka ago mani-ta amalib on mataw asor giqemsa in ne giyognizmo diq iyiy ham. Iyid teq abeb mani wazgo akaman hiqiyid ne giyogniz na in gigem dimunta negsa ne nenaq dimunmo kuluwa-kuluwmo tuqos daqay ham.

<sup>10</sup> Mat nagah amikmikta anononmo wamuzaqta na in nagah aseseqta anononmo tuwamuzdaqmo ham. Ari mat nagah amikta akabiy ananonmo a hi emaqta na in nagah ayahta akabiy ananonmo a hi emdaqmo ham. <sup>11</sup> Ne og ka ago mani anonon a hi wamuzid ta nog in nagah helta negid ne wamuz daqay? ham. <sup>12</sup> Ad ne mat araq ago nagah anonon a hi wamuzid ta nog in nagah araq negid ne gigo diq iydaq? ham.

<sup>13</sup> Kabibiy mat araq in mataw aseseqta giger gizez a hi muzdaqta ham. In nazaq tonad luweq in araq agem meqinta ugad araq in agem dimunta ugdaq ham. Teq in araq anadin diq emad araq in gileh ugdaq ham. Nazaq iyan ne mani anadin diq emad ne God aqez a hi muzin daqaymo ham.

<sup>14</sup> Ari mataw ginan Farisi haqayta na in mani anan ginad diq bilaq yaqayta. Nazaq iyan in gamuk bunmo Yesus bilamta na huritim in Yesus tibilawun yaqay.

<sup>15</sup> Bilawunsa Yesus gibilan, Ne mataw kat negad gimeb daq titnonta emsa in ne ginan mataw dimunta haqayta ham. Teq God ne gimugan tuhurit kamta ham. Og ka ago nagah on mataw anan diq moqayta na in God ameb bilaqne nagah lilihad ahuran meqin diq iyad usaqta nazaq nog ham.

*God ago maror Moses bilamta na le saman a hi iydaq*  
(Matyu 11.12-13)

<sup>16</sup> Haqad Yesus ta bilam, God ago maror Moses mar tonta na teq God ago nantut gamuk bilaqiyta na in kwaziqmo usim bo Jon mataw huz negyaqta na ago kamubmo iy ham. Teq Jon ago kamub iyim bo muran kawa ya God ago maror agamukan dimunta bilaqsa on mataw tuhuritam ham. Huritad in God ago gamuk kwaziqta na anadin a ta hi emad in bunmo God ago maror aduganib ginadibmo gwahtiigo giwaz diq timeqniyay ham. <sup>17</sup> Teq ya kazaq ne gibilenaq ham. Kait og inaq anadibmo tihiqiydaq e? ham. Haiqgam ham. Ad nazaqmo God ago maror Moses mar tonta na ago asit diq araq samanta iyeq a hikidik usdaqmo ham.

*Yesus on mataw an tuwaqim teq an ta hulosaqta na ginan bilam*

(Matyu 5.31-32; 19.9; Mak 10.11-12)

<sup>18</sup> Haqad Yesus bilam, Mat ago aw muzim aw ta araq muturta waqayta na in bilaqne mat ta araq ago aw inaq luw nog iyaqta ham. Ad mat in aw araq kwaziqmo aduw muzan osta na waqeq na nazaqmo in bilaqne mat araq ago aw inaq luw nog iyaqtamo ham.

*Mat araq ago nagah kabemmota na ayow Lazarus inaq giwagamun*

<sup>19</sup> Haqad Yesus bilam, Kwaziqmo mat araq ago nagah kabemmota in osyaq ham. Osad kam bunmo in tubusan dimdimunta kakaqta aholib emad in didaq dimdimunta neqyaqta ham. <sup>20</sup> Sa in ago bit aqezab mat araq anaghan haiqta in osyaqmo ham. Mat na anan Lazarus ham. In ahol bunmo na asulanmo usyaqta ham. <sup>21</sup> Ad in agemnan moqad in mat anaghan inaqta na didaq neqsa didaq aneglan ban ahaqenib woqsa ahol waqad anad emyaq, Ya didaq aneglan na asor neq nagta haqyaq ham. In nazaq anad emad ossa teq gaun boleq asulan mideq yaqayta ham.

<sup>22</sup> Ari mat anaghan haiqta na nazaq emad osimmo tumom ham. Moqan God ago angelo waqim a le Abraham agerab eman tuqos ham. Ossa mat ago nagah kabemmota na inaqmo moqan tiyay toniy ham. <sup>23</sup> Yay tonan in le mataw tumoqiya gigo ban meqintab ahol titiysa osad in ame gwalehim Lazarus Abraham inaq pesanmo ossa tigibiy ham.

<sup>24</sup> Gibiyad in lileyim bilam, Ya imam Abraham ham ni ya inan ninad meqniyan haqad in bilam ham. Ninad meqniysa ni Lazarus emid boleq aben akurgan yuw ulum tureq in yuw asitmo ya imileqib emid muditinan haqad in bilam ham. Ya faq kab

santitiy ayahmo waqaiq haqad in bilam ham.

<sup>25</sup> Haqan Abraham bilam, Amun ham ni ogib kayeqmo osad ni nagah dimdimunta niholyon giwaq bugyaqta haqad in bilam ham. Giwaqsa Lazarus nagah meqmeqinta waqyaqta haqad in bilam ham. Ari muran saw kab Lazarus anad dimniysa ossa ta ni nab osad ni nihol titiysa osaqta haqad in bilam ham. <sup>26</sup> Teq nagah araqmo ham. Saw ni osaqta na teq saw kawa i osauqta ka gilikmanib akalhonan araq sisaqta abe milhasta usaq haqad in bilam ham. Nazaq iyan mataw kab osayta ka in nab lehgo dan haigam haqad in bilam ham. Ad mataw nabta na in kab bolgo dan haiqmo haqad in bilam ham.

<sup>27</sup> Haqan mat na bilam, Ari ya imam ham nazaq iyan ni Lazarus emid muleqeq in ya imam ago uliqab ta lehan haqad in bilam ham. <sup>28</sup> Leheq in ya imaqbaban abaynaginmo osayta na gidek wazad gamuk awaz meqinta gibilenan haqad in bilam ham. Luweq in ginad a hi buliyeq in inaqmo saw santitiy ayahmo usaqta kab tubol daqaymo haqad in bilam ham.

<sup>29</sup> Haqan Abraham bilam, Ni nimaqbaban na in God ago maror Moses bilamta na teq God ago nantut gamuk mar toniyta na in wazayta haqad in bilam ham. In gamuk naqmo huriteq teq in ginad buliyiy haqad in bilam ham.

<sup>30</sup> Haqan mat na bilam, Ya imam Abraham ham na haigam idyaq ham. Ya imaqbaban gamuk na huritad anan helmo a hi haqayta haqad in bilam ham. Ari mat momta araq hodhodab eraqeq le gibilenid teq in ginad buliyeq gigo daq meqinta gileh tuqug daqay haqad in bilam ham.

<sup>31</sup> Haqan Abraham bulon, Ni nimaqbaban Moses ago gamuk teq God ago nantut gigo gamuk na huritad anan helmo a hi haqeq in mat araq hodhodab eraqdaqta na ago gamuk anan helmo a hi haq daqaymo haqad in bilam ham.

## 17

*Yesus daq hihiq mataw ginad helta meqin tonaqta na ginan bilam*

(Matyu 18.6-9, 21-22; Mak 9.42)

<sup>1</sup> Ari Yesus ago disaipel gibilan, Daq hihiq on mataw ginad hureqsa in ginad helta hulosaqta na teq gwahtiqaqta ham. Teq on mataw daq hihiq nazaq em daqayta na timeqniy has daqay ham. <sup>2</sup> Ya ne gibilenaiq ham. Mat naqanta in yaqgo onmin amikmikta no gigo araq\* emid in anad ya inan helmo haqayta na hulosaq tonid mat na in yaqgo faq meqin diq tuwaqdaq ham. Na

in kwaziqmo gig araq ayahta anatgumnib am wazeq kamismeb huneg nagiyta ham. Hunegid mat na moqeq daq meqinta na a hi emeq in yaqgo faq meqin diqta na a hi waq nagta ham.

<sup>3</sup> Haqad Yesus bilam, Ni nimaqbab araq daq meqinta emid ni wad ham. Wadsa in anad buliyeq ago daq meqinta na gileh ugid ni ago daq meqinta na walemad anadin ta hi em ham. <sup>4</sup> Ari ni nimaqbab na kam amulikmo aduganib ame 7 nazaq nimeqin tonad teq in ame 7 nazaq ningo hib boleq ninaq an aben wazgo nibilensa ni hi hulosaq ham. Ni ago daq meqinta na bunmo walemad anadin ta hi em ham.

*Ni God anan helmo haqgo adan*

<sup>5</sup> Ari disaipel in Iyahta bulonim bilaqiy, Ni i ginad God anan helmo haqayta na emid ayahmo iyan haqiy. <sup>6</sup> Haqan Iyahta gibilan, Ne ginad helmo haqayta na in amik diq ay mastet anagin nog ussa teq ne ay araq buloneq bilaq daqay, Ni nibeqar teq nininin bunmo titeqeq ad leheq kamismeb woq haqad in nazaqmo ne gizez na tumuzindaq ham.

*Yesus kabibiy mat anad ezaq emad kabiy emdaqta na ago bilam*

<sup>7-8</sup> Haqad Yesus bilam, Ne gilikmanib mat araq ago kabibiy mat in kabiyab og wolad luweq o in sipsip giwamuzad luweq in muleqeq bitab ta bolid ago ayahta na buloneq bilaqdaq, Ni sibeqmo bo osad didaq neq nazaq in a hi bulondaq ham. Hikidik ham. Mat ayahta na in ago kabibiy mat na kazaq bulondaq ham. Ni yaqmen didaq oy haqdaq ham. Ad ni nihol wastitayeq ya ibaq tunsu ya didaq neqeq yuw uluwid teq ningo abeb neq haqdaq ham. <sup>9</sup> Ne ginad ezaq emay? ham. Kabibiy mat na in anamren agez muz bugid anamren in abin tiqiluwdaq haqad ne ginad emay ye? ham. Haiqmo diq ham. <sup>10</sup> Ad ne nazaqmo God ne gibenab kabiy amta na ne em bugeq teq ne ginad kazaq emiy ham. I kabibiy mataw giban haiqta haqiy ham. I gigo kabiy i emamta naqmo kawa i tiqem haqiy ham.

*Yesus mataw 10 nazaq gigo moq lepra inaqta giwastitayan dimniyyi*

<sup>11</sup> Ari Yesus uliq Jerusalem-ub wolehad luwim in saw giger Samariya teq Galiliy gilikmanib tugwahtim. <sup>12-13</sup> Gwahtiqim in danib lehad luwim le uliq araqab tugwahtiqanmo mataw 10 nazaq gigo moq lepra inaqta bolad luwim in Yesus danib bolsa ahol tuwaqiy. Ahol waqad in pesanmo turad lileyim bilaqiy, Yesus haqiy ni mat ayah diqta haqiy ni i ginan ninad meqniyan haqiy. <sup>14</sup> Haqan Yesus gibiyad gibilan, Ne

\* 17:2: Mataw asor ginad emay, Yesus onmin amikmikta ginan bilamta na in ago disaipel ta asor giban haiqta na ginan bilam haqay.

gihol ad leheq mataw tamaz emayta na giqishuni ham. Haqan in Yesus aqez muzim danib teqmo lehadmo in bunmo gihol tidimniyiy.

<sup>15</sup> Gihol dimniyan in gilikmanib mat amulikmo ahol loyinim in muleqim Yesus agerab ta bol. Bolad in dedibmo God abin tiqiluwyaq. <sup>16</sup> In bolim Yesus asen agerab ahol hulosan ogib woqim usad teq in Yesus esey tuqugyaq. Ari mat muleqim bolta na in saw Samariya-ib matta araq. <sup>17</sup> Sa Yesus mat amulik naqmo ahol waqad bilam, Ya bilay mataw 10 nazaqmo gihol tidimniyiy hayta ham. Mataw ta asor na edowa? ham. <sup>18</sup> Nagaqgo yaqmo isenlul araq diq muleqim bolim God esey a hi ugaq? ham. Sa mat saw araqabta kaqmo bolim God esey ugaq ham. <sup>19</sup> Haqad in mat na bulon, Ni eraqeq leh ham. Ni ya inan helmo hamta naqmo niwastitayan ni tidimniy ham.

*Mat Atatin teq ulal iydaq  
(Matyu 24.23-28, 37-41)*

<sup>20</sup> Ari kam araqab Farisi asor Yesus susumun ugim bilaqiy, Kam gineh teq God ago maror boldaq? haqiy. Haqan Yesus amenin emim bilam, Muran God ago maror ayawalan inaq bolsa on mataw gimeb ahol a hi waqayta ham. <sup>21</sup> Teq in bolsa mataw ahol waqad bilaq daqay, “God ago maror kab usaq” o “God ago maror kob usaq” haq daqay nazaq a haiqmo ham. Na ezaggo ham God ago maror ne gilikmanib tubolim usaq ham.

<sup>22</sup> Haqad in ago disaipel gibilan, Abeb ne sirisirimo gihol buloneq bilaq daqay, Mat Atatin hidmo ta bolid i inaq ta osuq haq daqay ham. Teq haiq ham. Ne kam na hidmo ahol a hi waq daqay ham. <sup>23</sup> Mataw ne gibileneq bilaq daqay, Kazaq bo saw waqiy haq daqay ham. Kozaq le saw waqiy haq daqay ham. Haqsa ne gimuzeq nenaq hi lehiy ham. <sup>24</sup> Na ezaggo Mat Atatin in mataw gime titoneq a hi boldaq ham. In ta boldaqta na in bilaqne mewlig kaitab hikliyanim anuwan saw bunmo waqayta nazaq nog in boldaqta ham.

<sup>25</sup> Ari nagah na hidmo a hi gwahtiqaqta ham. Haiq ham. Nagah na a hi gwahtiqaqta Mat Atatin santitiy waqsa mataw muran kam kab osayta ka gileh tuqug daqay ham. Gileh ugid kam abebag teq nagah na tugwahtiqaq ham. <sup>26</sup> Nowa akamnib mataw daq em yaqayta nazaqmo Mat Atatin ta boldaqta na akamnib daq nazaq usdaqmo ham. <sup>27</sup> Nowa akamnib mataw didaq neqad yuw uluwad an waqad ossa le Nowa muy aduganib tugwahtim ham. Gwahtiqaq uq ayahta na hitiqim on mataw na bunmo gimeqin ton ham. <sup>28</sup> Ari Lot ago kamub mataw nazaqmo em yaqayta ham. In didaq neqad yuw uluwad nagah gizayad

kabiyab didaq leyad uliqab bit giqemad os yaqayta ham. <sup>29</sup> Ossa Lot uliq Sodom hulosisim lehsa kam nabmo faq gig afanfanta inaq kaitab urom nog woqim on mataw na ginowan tumoq bugiy ham.

<sup>30</sup> Ari Mat Atatin ulalab ta boldaqta nab daq nazaqmo diq tugwahtiqaqta ham. <sup>31</sup> Kam nab mat bit ahuqunib ban osnanta nab oseq in ogib hitiqeq tukeq lehad in ago es bit aduganib usaqta na le hi waqan ham. Ad nazaqmo mat kabiyab luwdaqta na in muleqeq ago bitab ta hi lehanmo ham. Luweq ne uliqabmo ossa afaqan ayahta na gwahtiqaq mataw gadgadmo osayta na gimeqin tonad in ne inaqmo gimeqin tondaqmo ham.

<sup>32</sup> Ne Lot awe awagamun anadin emiy ham. <sup>33</sup> On mataw og ka ago es nagah waz naqmo hiqiyayta na in nazaqmo timeqniy daqay ham. Ari on mataw og ka ago nagah na huload anadin diq a hi emayta na in dimunmo tuqos daqay ham. <sup>34</sup> Ya ne helmo gibilenaq ham. Taromab mataw giger ban amulikmo garabmo us daqay ham. Ussa in araq waqad araq in hulosis nab usdaq ham. <sup>35</sup> Ad on giger wit anagin wolworad mel emad os daqay ham. Ossa in araq waqad araq in hulosis nab osdaq ham. [ <sup>36</sup> Ad mataw giger leheq kabiyab luw daqay ham. Luwsa in araq waqad araq in hulosis nab luwdaq ham.]

<sup>37</sup> Haqan disaipel Yesus tisuusumun ugiy, Iyahta haqiy daq na uliq edob diq gwahtiqaq? haqiy. Haqan Yesus gibilan, Kam nab daq na gwahtiqaqsa ne a hi nagun daqay ham. Ne gamuk araq mataw bilaqad luwayta ka anadin emiy ham. In bilaqay, Karuw tumomta asan lilihim usaqta nabmo tirgaw bolim humab wolay haqayta ham.

## 18

*Aw araq megistret bulonan ulumsihita ago gamuk awowun*

<sup>1</sup> Ari Yesus in ago disaipel gibilenid in kam bunmo God inaq gamuk emad gituw a hi hiqiy daqay haqad in gamuk awowun araq kazaq gibilan, <sup>2</sup> Uliq araqab megistret araq os ham. Osad in God anan a hi rabad teq in on mataw ginadin diq a hi emyaqta mo ham. <sup>3</sup> Sa uliq nab aw araq waburta in osad teq tuteqmo in megistret na ago hib boleq bulonya, Yaqgo bab samanta imeqin tonaq haqyaq ham. Ni hazizirib teq yaqgo afaqan sorad yaqmen daq titnonta em yag haqyaq ham. <sup>4</sup> Haqsa megistret hulosaq ham. Hulossa aw na sirisirimo bulonsa iyan abeb megistret na inmo ahol bulonim bilam, Ya God anan a hi rabaiqta haqad in bilam ham. Ad ya on mataw ginadin diq a hi emaiqta mo haqad in bilam ham. <sup>5</sup> Ta teq aw waburta ka kam

bunmo ya ituw bulsa ya inamur asit a hi emaiq haqad in bilam ham. Nazaq iyan ya hazizirib ulumsiheq daq titnonta tiqem ugdaiq haqad in bilam ham. Luweq kam bunmo tuteqmo in bolad ya ituw bulsa ya ihol a hi bilaqdaq haqad in bilam ham.

<sup>6</sup> Haqad Iyahta bilam, Ne megistret meqinta na ago gamuk hurit kemiy ham. <sup>7</sup> God ago on mataw in gilumim aholyon giwamta na in zeqab teq taromab inaqmo God bulonsa in giqez huritad gimen daq titnonta a hi em negdaq e? ham. Haiqgam ham. Teq God in ago on mataw tigilumsinhan haqad agudan emdaq e? ham. Na haiqmo ham. <sup>8</sup> Ya ne gibilenaiq ham. God hidmo ago on mataw gimen daq titnonta tiqem negdaqta ham. Ari teq abeb Mat Atatin og kab ta boldaqta kam nab in on mataw asor God anan helmo haqad ossa gibiydaq o haiq, on mataw naqanta nabag tihiqiy bug daqay? ham.

*Farisi araq ayow mat takis waqaqta na inaq gigo gamuk awowun*

<sup>9-10</sup> Ari kam nab mataw asor ginad em yaqay, Igmo gimomo God ameb titnonim luw osauqta haq yaqay. Haqad in bilaq yaqay, Mataw ta asor ko in i nog a haiq haq yaqay. In nazaq ginad emsa Yesus gamuk awowun ka gibilenim bilam, Mataw giger God inaq gamuk emnan haqad Tempel-ib tugwalehiy ham. Mat araq na in Farisi ham. Teq araq na in mat abin meqinta takis waqaqta amatin ham.

<sup>11</sup> Farisi na aholbin turad in God bulonim bilam, O God ham ya mataw asor ko nog a haiq haqad in bilam ham. Ya a hi rin tonaiqta teq ya daq meqinta a hi emaiqta haqad in bilam ham. Ad ya aw tuwaqim teq ya aw araq inaq a hi luwaiqta haqad in bilam ham. Ya mat takis waqaqta ko nog a haiqmo haqad in bilam ham. Nazaq iyan ya esey diq tinigaiq haqad in bilam ham. <sup>12</sup> Wik amulik-mulikmo ya ime gigermo ninadin emad didaq udinaiqta haqad in bilam ham. Ad ya nagah bunmo waqaiqta na huseran le humab 10 nazaq iyan ya humab amulikmo ni nigaiqta haqad in bilam ham.

<sup>13</sup> Ari mat takis waqaqta na le pesanmo turad in ame Heven-ib a hi gwalehyaq ham. In afaqin kuh tonim turad anad meqniysa in aban wolim bilam, O God ham ya mat daq meqinta emaiqta haqad in bilam ham. Ni ya inan ninad meqniysa ilumsih haqad in bilam ham.

<sup>14</sup> Haqad Yesus bilam, Ya helmo ne gibilenaiq ham. Mataw giger na Tempel-ib osim gwahtiqim in gigo bitab tilehad in gilikmanib mat takis waqaqta naqmo in God ameb mat titnonta iy ham. Ari Farisi na teq haiq ham. Na ezaqgo on mataw in gimo

gihol abin iluwayta na bunmo God in gibin wazid tuwoqdaq ham. Sa on mataw gihol abin wazan woqaqta na God in gibin wazid tiqeraqdaq ham.

*Yesus onmin amikmikta gidimun tonad gibar ton*

*(Matyu 19.13-15; Mak 10.13-16)*

<sup>15</sup> Ari on mataw gigo onmin amikmikta teq susibta inaqmo giqad Yesus ago hib tubol yaqay, Yesus giwazad gidimun tondaq haqad. Teq haiq. In onmin giqad bolsa disaipel gibiyad ginadad tigimuz yaqay. <sup>16</sup> Sa Yesus onmin na gibilenan agerab bolsa teq in ago disaipel gibilan, Ne onmin gihulosid yaqgo hib boliiy ham. Ne hi giwasihiy ham. On mataw naqantaqmo God ago maror aduganib gwahtiqayta ham. <sup>17</sup> Ya helmo ne gibilenaiq ham. Mat aw nog in onmin gibin haiqta ka nogmo iyad God ago maror ahaqenib a hi osej in God ago maror na aduganib le a hi gwahtiq daqay ham.

*Mat araq ago nagah kabemmo usaqta na Yesus inaq gamuk bilam*

*(Matyu 19.16-30; Mak 10.17-31)*

<sup>18</sup> Ari mat marorta araq bo Yesus susumun ugim bilam, Tisa dimunta ham ya ezaq tonid teq God in ago os dimunta kuluwa-kuluwmo osayta na tiyagdaq? ham. <sup>19</sup> Haqan Yesus bulon, Ni ninad ezaq emad ya inan dimun haqaq? ham. God amomo in dimunta ham. <sup>20</sup> Haqad in mat na bulon, Gunun bunmo Moses bilamta na ni tuhurit ham. Ni an alulib hureqeq inaq hi us ham. Ni mat araq wol emid hi moqan ham. Ni hi rin ton ham. Ni hazizirib mat araq hi kat ug ham. Ni ninenmaman giqez hurit ham. *Kisim Bek 20.12-16*

<sup>21</sup> Yesus nazaq haqan mat marorta na bilam, Ya amunibmo osad gunun nagan bunmo muzim bolim muran ya mat ayah tiqiy ham. <sup>22</sup> Haqan Yesus gamuk na huritim in mat na bulon, Ni daq amulikmo emnanta a hi emaq ham. Ningo nagah bunmo gizayeq amenin waqeq teq ni mataw ginaghan haiqta gigo hib ibereq neg ham. Ni nazaq toneq teq Heven-ib ningo nagah kabemmo inaq iydaq ham. Ni daq na emeq teq ni ya imuzeq bol ham. <sup>23</sup> Haqan mat marorta na ago nagah kabemmo diq giqusta iyan in Yesus ago gamuk na huritim ahol afaqan tiqiy.

<sup>24</sup> Anmo Yesus mat na ahol waqad bilam, Mataw gigo nagah kabemmo inaqta na in God ago maror aduganib gwahtiqgo afaqan diq ham. <sup>25</sup> Haqad in bilam, Karuw ayahta anan kamel haqayta na in nidel akwiyaknib le tugwahtiqdaq e? ham. Hikidik ham. An nazaqmo mat ago es

kabemmo ginadin emaqta na in God ago maror aduganib le a hi gwahtiqaqmo ham. <sup>26</sup> Yesus nazaq haqan on mataw nab turiyta na huritim bilaqiy, Nazaq iyid teq mat araq diq le God ago os dimunta nab a hi gwahtiqaqya haqiy. <sup>27</sup> Haqan Yesus gibilan, Mataw gigo zawayibmo le a hi gwahtiq daqayta ham. Teq nagah mataw emgo biyab a hi iyayta na God inmo emid tugwahtiqaq ham.

<sup>28</sup> Haqan Pita bulon, Ni i gibiy ham. I gigo og nagah bunmo gihulosim i ninmo nimuzim ninaq tilehauq ham. <sup>29-30</sup> Haqan Yesus in ago disaipel bunmo gibilan, Ya helmo ne gibilenaiq ham. Mat God ago maror aduganib gwahtiqaqna haqad in ago aw teq amaqbaban teq anenmaman teq ago onmin gihulosta, mat naqanta og kab osad amenin ayah diqmo tuwaqdaq ham. Ad abeb kam muturta nab teq in God ago os dimuntab gwahtiqeq kayeqmo kuluwawuluwmo tuqosdaqmo ham.

*Yesus ame ezeqmanta bilam, Ya moqeq teq ta eraqdaq ham*

(Matyu 20.17-19; Mak 10.32-34)

<sup>31</sup> Ari Yesus in ago disaipel 12 na giwaqim giqad giholbinmo lehim teq in gibilan, Ne huritiy ham. Muran i Jerusalem-ub tugwalehauq ham. Gwalehid teq kwaziqmo God ago nantut Mat Atatin anan bilaqad gamuk mar toniyta na adan bunmo in aholib tugwahtiqaq ham. <sup>32</sup> Mataw in Mat Atatin wazeq mataw em ta araq Juda a haiqta na gibenab tiqem daqay ham. Emid teq in Mat Atatin bilawunad kamolmol ugad tukusluw ug daqay ham. <sup>33</sup> Kusluw ugad in wazeq woltitayad teq in wol emid tumoqdaq ham. Moqeq kam ezeqmanmo useq teq in kayeq iyeq ta eraqdaq ham. <sup>34</sup> Yesus nazaq bilaqan in ago gamuk na disaipel ginadib ulal a hi iyyaq. Gamuk na alulin ulilemim usta iyan disaipel ginad a hi em has yaqay.

*Yesus mat araq ame haiqta wastitayan dimniy*

(Matyu 20.29-34; Mak 10.46-52)

<sup>35</sup> Ari Yesus danib lehad in uliq ayahta anan Jeriko haqayta na sinsin tuqugim lehsa mat araq ame haiqta dan adekib nagah anan sunad osyaq. <sup>36</sup> Ossa on mataw dauh biyahta bo lehsa in gihulan huritad tisusumun nag, Ne gingan lehay? ham. <sup>37</sup> Haqan in buloniy, Yesus uliq Nasaret-ibta na bo tilehaq haqiy. <sup>38</sup> Haqan in dedibmo bilam, Yesus ham Devit atatin\* ham. Ni ya inan ninad meqniyan ham. <sup>39</sup> Haqan mataw danmeb leh yaqayta na in

mat ame haiqta na wadad buloniy, Ni niqez hiqiy haqiy. Haqsa haiq mat ame haiqta na dedibmo lileyeq a ta bilaqyaq, Devit atatin haqyaq. Ni ya inan ninad meqniyan haqyaq.

<sup>40-41</sup> Haqsa Yesus ahol wasihim nab titur. Turad in gibilan, Mat na waqeq ya igerab a boliy ham. Haqan in mat na Yesus agerab a bolan Yesus tisusumun ug, Ya ni ezaq nitondaiq? ham. Haqan in bilam, Iyahta ham ya saw ahol waqnan inad bilaqyaq ham. <sup>42</sup> Haqan Yesus bulon, Ni nime hastitayan ham. Ni ya inan helmo hamta naqmo niqeman ni nime tidimniy ham. <sup>43</sup> Haqan muran diq nawaqmo mat na ame hastitayan in saw ahol tuwaqyaq. Saw ahol waqad in Yesus muzim inaq lehad in God abin tiqiluwyayq. Sa on mataw bunmo daq na ahol waqim in God abin tiqiluw yaqaymo.

## 19

### *Sakiyus awagamun*

<sup>1</sup> Ari Yesus le uliq Jeriko-ib tugwahtim. <sup>2</sup> Uliq nab mat araq anan Sakiyus haqayta in os. Mat na in mataw takis waqayta gigo amebta teq in ago mani kabemmo diq usta. <sup>3</sup> Ari Yesus uliq nab gwahtiqim lehsa Sakiyus in ahol waq kemnan haqad turan haiq. On mataw kabemmo nab tursa in mat siqim diq iyim in Yesus ahol a hi waqyaq. <sup>4</sup> Nazaq iyan in sibim ameb lehim ay fik araq regim teq ame woqsa tuqos. In anad am, Yesus dan kaqmo muzeq boldaqta ham. <sup>5</sup> Haqad in ay alonib ossa Yesus bolad luwimmo in ame gwalim ahol waqadmo tubulon, Sakiyus ham ni hidmo gehitiq ham. Muran ya le ningo bitab ninaq tuqosdaq ham. <sup>6</sup> Haqan Sakiyus hidmo gehitiqim in Yesus waqim inaq anad dimniysa ago bitab tilah.

<sup>7</sup> Lehsa mataw gibiyad in bunmo gigem meqniysa bilaqiy, Mat ko abin dimun a haiqta haqiy. Nagaggo Yesus inaq osnan haqad ago bitab tilehaq? haqiy.

<sup>8</sup> Ari Sakiyus Yesus inaq bitab lehim osad teq in eraqim turad Iyahta tubulon, Iyahta ni hurit ham. Muran yaqgo nagah bunmo ya liqabmo uroteq asor na ya mataw ginaghan haiqta tineгдаiq ham. Ad ya mataw kat negim gigo nagah samanmo wayta na bunmo amenin nazaqmo ime aweweqmo tineгдаiq ham. <sup>9</sup> Haqan Yesus bulon, Ni Abraham asen muzim ni inaqmo God anan helmo haqan iyan muran God tiniwam ham. <sup>10</sup> Haqad in bilam, Mat Atatin in mataw God gileh ugim ginadibmo

\* **18:38:** Isrel on mataw ginad em yaqay, God mat emid bo i gilumsihdaqta amatin na in i gises Devit asenlulib tugwahtiqaq haq yaqay. Haqad luweq Yesus in mat naqmo iddaq haqad teq mataw asor in anan Devit atatin haq yaqay.

hareso nabag luwayta naqmo ginaguneq ta giwaqnan haqad bolta ham.

*Kabibiy mataw mani waqiyta gigo gamuk awowun*

(Matyu 25.14-30)

<sup>11</sup> Ari Yesus le uliq Jerusalem sinsin diq tuqgusa iyan mataw biyahta na ginad tiqem yaqay, Muran diq kam kabmo God ago maror ulal tiqiy bugdaq haq yaqay. Nazaq iyan mataw na Yesus ago gamuk huritad ossamo in gamuk awowun ta ara q kazaq gibilan, <sup>12</sup> Mat ayahta ara q saw ara q pesantab king ayah diqta ago hib lehnan anad tiqam ham. In leheq maror na abenab zaway waqeq teq in muleqeq ta boleq king na aqumnib in ago wal-mataw tigiwamuzdaq haqadmo in tilah ham. <sup>13</sup> Lehad in ago kabibiy mataw 10 nazaq gibilenan bolan in mat amulik-mulikmo 20 kina nazaq tinag ham. Negim in gibilan, Ya le luwsa igilehni b ne mani ka amalib kabiy emsa le ya muleqeq ta boldaiq haqad in bilam ham. Haqadmo in tilah ham.

<sup>14</sup> Lehsa mat ayahta na ago on mataw uliqabta na in mat na anan ginad a hi bilaqan in mataw asor giqeman uliq pesanta nab sibim ameb lehim in king na tubuloni y, Mat na i giwamuzgo i hulosa uq haqiy ham.

<sup>15</sup> Ari mat ayahta na abeb lehim king abenab zaway tuwaqim teq in muleqim ta bol ham. Bolim in ago kabibiy mataw na gimen nan eman tilah, in mani nagta na akabiyan emim amenin ganim amal-ibmo a ta waqiyta na in huritnan haqad ham. <sup>16</sup> Haqan kabibiy mat ara q ameb bolim bilam, Iyahta ham ni mani yaqta na amalib ya kabiy emim 200 kina nazaq a ta way haqad in bilam ham. <sup>17</sup> Haqan in ago ayahta bulon, Esey ham. Ni kabibiy mat dimun diqta haqad in bilam ham. Ni ya inad muzim kabiy anononmo emim ni nagah amikta na alowan diq tonta haqad in bilam ham. Nazaq iyan ya uliq 10 nazaq nigid ni in gigo maror iyeq tigiwamuzdaq haqad in bilam ham.

<sup>18</sup> An kabibiy mat ta ara q bolim bilam, Iyahta ham ni mani yaqta na amalib ya kabiy emim 100 kina nazaq a ta way haqad in bilam ham. <sup>19</sup> Haqan ago ayahta bulon, Ari ya uliq abaynagin nazaq nigid ni in gigo maror iyeq tigibiy muzdaq haqad in bilam ham.

<sup>20-21</sup> An kabibiy mat ta ara q bolim bilam, Iyahta ham ni mani yaqta na kawa haqad in bilam ham. Ya ningo tuhuritta haqad in bilam ham. Ni mat afanfanta kamolmol a hi ema qta haqad in bilam ham. Nagah ni akabiyan a hi amta naqmo ni niholyon waqaqta haqad in bilam ham. Ad didaq ni a hi layta naqmo ni niholyon tayim

anon waqaqta haqad in bilam ham. Nazaq iyan ya nirabunim ningo mani tubusanib il tonim eman us haqad in bilam ham.

<sup>22</sup> Haqan in ago ayahta bulon, Ni kabibiy mat meqin diq haqad in bilam ham. Ni ya inan bilam, Ni mat afanfanta haqad ni bilam ham. Ad ni ya inan bilam, Nagah ni akabiyan a hi amta na ni niholyon waqaqta haqad ni bilam ham. Ni bilam, Didaq ni a hi layta na ni niholyon tayaqta haqad ni nazaq ya inan bilam ham. Ni gamuk nawa bilamta naqmo amalib ya ningo daq tuqulum kemdaiq haqad in bilam ham. <sup>23</sup> Doq tonnan ni yaqgo nazaq huritim teq ni yaqgo gimeq na mani abitnib eman a hi us? haqad in bilam ham. Usid teq ya muleqeq boleq yaqgo gimeq na amenin mani ayahmo inaqmo waq nagta haqad in bilam ham.

<sup>24</sup> Haqad mat ayahta na in mataw nab turiyta na gibilan, Ne mat atuw haiqta na abenab 20 kina in wazaqta na waqeq mat ago 200 kina inaqta na ugiy haqad in bilam ham. <sup>25</sup> Haqan mataw na bilaqiy, Iyahta haqiy mat na ago 200 kina inaq tiqiy haqad in bilaqiy ham. I mani ara q na a ta ug tonam e? haqad in bilaqiy ham. <sup>26</sup> Haqan mat ayahta na bilam, Ya ne gibilena iq haqad in bilam ham. Ya on mataw gigo nagah inaqta na bunno nagah asor a ta negda iq haqad in bilam ham. Teq ya mataw ginaghan haiqta na gibenab nagah asitmo in wazayta na walem bugda iq haqad in bilam ham.

<sup>27</sup> Teq ya ibabun mebmemo ya inan bilaqiy, Mat ka i giwamuzgo hulosa uq haqiyta na ne giwaqeq giqad kab boleq ya imeb ginol emid moq bugiy haqad in bilam ham.

## **Yesus le uliq ayahta Jerusalem-ub gwahtiqim teq in Tempel-ib on mataw suleq neggiaq**

*Yesus king nog iyim le uliq Jerusalem-ub gwahtim*

(Matyu 21.1-11; Mak 11.1-11; Jon 12.12-19)

<sup>28</sup> Ari Yesus gamuk na bilaqim tihiqiyan in saw na hulosis ago disaipel nenaq uliq Jerusalem-ub tugwalehiy. <sup>29-30</sup> Gwalehad in uliq giger Betfage teq Betaniy gigerab garah Oliv asenab tugwahtiqiy. Gwahtiqim Yesus in disaipel giger giqeman danmeb lehsa in gibilan, Ne le uliq kob gwahtiqeqmo donki amidon ara q am wazan tursa ne ahol tuwaq daqay ham. Donki na mat ara q in amalib asit a hi luwta ham. Na ne haseq kab a boliy ham. <sup>31</sup> Sa mat ara q na ago susumun negeq bilaqdaq, "Nagaqgo ne donki na aqamun hasay?" haqid ne kazaq

buloniy ham. Iyahta ago kabiy inaq iyan haqad ne buloniy ham.

<sup>32</sup> Haqan in giger lehim nagah bunmo Yesus anan bilamta nazaqmo in ahol tuwaqiy. <sup>33</sup> Ahol waqad in donki na aqamun hassa donki anamreniz tisuusumun negiy, Ne giger nazaqmo donki na aqamun hasay? haqiy. <sup>34</sup> Haqan in bilaqiy, Iyahta ago kabiy inaq iyan haqiy. <sup>35</sup> Haqad in donki waqim ad Yesus ago hib muleqim tuboliy. Bolim in gigo tubusan asor donki amalib emim teq in Yesus bulonan donki amalib tuqos. <sup>36</sup> Ossa on mataw gigo tubusan danib gihurensa teq Yesus donki amalib osim tubusan na bayim bayim tilah.

<sup>37</sup> In le Jerusalem sinsin tuqugad dante garah Oliv ban gewoqayta nab in tugwahtiqliy. Gwahtiqlanmo on mataw dauh biyahta Yesus muzim inaq leh yaqayta na in Yesus daq azawayin inaq emyaqta nagan ginadin emad in ginad dimniysa dedibmo God abin tiqluw yaqay. <sup>38</sup> Iluwad in bilaq yaqay,

I gigo king ka Iyahta abinib bolan i ginad bilaq gigayinaq haq yaqay.

Muran God nob igsa i dimunmo afaqan haiqmo tuqosam haq yaqay.

I God abin sorid ulilibmo diq gwalehan haq yaqay.

<sup>39</sup> Haqsa Farisi asor on mataw biyahta na gilikmanib turim in Yesus buloniy, Tisa haqiy ningo disaipel gibilenid gigez hiqiyiy haqiy. <sup>40</sup> Haqan Yesus amenin emim gibilan, Ya ne gibilenaig ham. I nagah ka ulilemamta abanan haiq ham. Mataw ka gigez hiqiyid gig haresmo kagab usayta ka in gigez inaq iyeq tililey daqay ham.

<sup>41</sup> Haqad Yesus bo Jerusalem-ub tugwahtiqlan tonad in uliq na ahol waqad tigaqay. <sup>42</sup> Gaqad in uliq na anan bilam, On mataw Jerusalem-ubta ham ne gime haiqta ham. God ne nenaq an anobun wastitaynan tonsa ne ahol a hi waqay ham. Na ne ahol waqeq teq ne dimunmo os nagiy ham. Teq muran nagah na ulilemim ussa ne ahol a hi waqay ham. <sup>43</sup> Helmo diq ham. Abeb teq kam ta ara q tugwahtiqladaq ham. Gwahtiqlid ne gigo bab boleq gel ne gigo uliq lilut ugim turaqta nab in og taye q humab emeq in og na bayeq bayeq gwaleheq ne gigo uliqab tugwahtiqlid daqay ham. Gwahtiqladmo in gigo asor gililut negad saw bunmo ne gitawanan tur daqay ham. <sup>44</sup> Turad in ne teq ne gigo onmin nenaqmo tiginol em bug daqay ham. Ad in ne gigo uliqab gig an amalib usayta na wolzizilayid tiq bug daqaymo ham. Na ezaqgo God ne gigo hib bolim nenaq osta na ne ginad a hi em hasiyta na ago ham.

*Mataw Tempel-ib mani akabiy an emsa*

*Yesus gimuzan asan ban gwahtiqliy*

*(Matyu 21.12-17; Mak 11.15-19; Jon 2.13-22)*

<sup>45</sup> Ari Yesus lehim Tempel agelin aduganib gwahtiqlim in mataw nagah gizayad osiy na gimuzan in tukim asan ban tileh yaqay. <sup>46</sup> Lehsa in gibilan, God ago marib in gamuk ara q kaza q bilam ham.

Yaqgo bit in ya inaq gamuk emgo abitan iyaq haqad in bilam ham. *Aisaya 56.7*

Ta teq ne bit ka eman in mataw rin tonayta gigo bit nog tiqiy ham.

<sup>47</sup> Ari kam bunmo Yesus Tempel agelin aduganib mataw suleq tinegyaq. Sa mataw tamaz emayta gigo aseseqta na giyogniz mataw Moses ago gunun hurit kemiyta na nenaq teq Juda gigo mataw marorta na in bunmo Yesus wol emid moggo adanteqlin tinagun yaqay. <sup>48</sup> Teq haiq. On mataw bunmo Yesus ago gamuk huritnan zaway diq iysa mataw aseseqta na dante ara q ahol a hi waq yaqay.

## 20

*Mataw aseseqta in nog Yesus ahol abin uqta na anan susumun ugiy*

*(Matyu 21.23-27; Mak 11.27-33)*

<sup>1</sup> Kam ara qab Yesus le Tempel agelin aduganib osad in on mataw God ago gamuk tigibilenaq. Gibilensa mataw tamaz emayta gigo aseseqta na teq mataw Moses ago gunun hurit kemiyta na teq mataw marorta asor in Yesus ago hib tuboliy. <sup>2</sup> Bolim in Yesus susumun ugiy, Ni i gibilen haqiy. Ni nibin ezaqta iyim ni daq kagan emaq? haqiy. Teq nog diq nibin na nig? haqiy.

<sup>3</sup> Haqan Yesus amenin emim gibilan, Ta ya nazaqmo nagah ara q ago ne tisuusumun negnan ham. Ne ya ibileniy ham. <sup>4</sup> Jon mataw huz negyaqta na ago kabiy Heven-ib bol o haiq in matawmo gigo hib kabiy na wanta? ham.

<sup>5</sup> Haqan mataw aseseqta na in gimo an bulonim bilaqiy, I bilaqam, Kabiy na Heven-ib bolta haqid in bilaqdaq, Ta nazaqgo ne Jon ago gamuk huritim anan helmo a hi haqiy? haqda q haqiy. <sup>6</sup> Ari i bilaqam, Kabiy na matawmo gigo hib bolta haqid on mataw bunmo i gimalib gig tuhuneg daqay haqiy. Na ezaqgo in bunmo ginad awaz timeqniyim Jon anan bilaqay, Hel diqtaqmo in God ago nantut ara q haqayta haqiy. <sup>7</sup> Nazaq iyan in Yesus ago susumun na amenin emim bilaqiy, I a hi hurit haqiy. <sup>8</sup> Haqan Yesus gibilan, Ya nazaqmo ham. Nog ibin yagan ya daq kagan emaiqta na ago ya a hi gibilenda iqmo ham.



*Mataw meqinta am wain akabiyan emiyta gigo gamuk awowun*

(Matyu 21.33-46; Mak 12.1-12)

<sup>9</sup> Ari Yesus on mataw gamuk awowun ka gibilenim bilam, Mat araq am wain anagin kabemmo og araqab tilay ham. Leyim in wain na akabiyan mataw asor gibenab tiqam ham, in gimo giholyon kabiy emad teq in wain anagin asormo ya yag daqay haqad ham. In kabibiy mataw gibilenim hulosad era uliq araq pesantab lehim kam sisaqmo in nab tuqos ham. <sup>10</sup> Osad wain anagin waqgo akaman tugwahtiyan in ago kabibiy mat araq eman mataw wain akabiyan emayta na gigo hib tilah ham. In lehid mataw na yaqmen wain anaginta na tuqug daqay haqad ham. Teq haiq ham. Kabibiy mat na lehan mataw wain akabiyan emayta na in wazim woltitayim muzan samanmo muleqim tilah ham.

<sup>11</sup> Lehan kabiy anamren in kabibiy mat ta araq eman tilah ham. Lehan na nazaqmo in wazim woltitayad nan meqinta ugad teq in muzan samanmo tilahmo ham. <sup>12</sup> An in kabibiy mat ezeqmanta eman lehan na in wazim wolan anedan woqsa in kabiy asan ban hunegan tilahmo ham.

<sup>13</sup> In nazaq eman kabiy anamren bilam, Teq ya ezaq tondaiq? haqad in bilam ham. Ya itatin amulikmoqmo ya anan inad diq bilaqqaqta naqmo ya emid tilehdaq haqad in bilam ham. Nabag in lehid teq kabibiy mataw na in aqez tukurit daqay haqad in bilam ham. <sup>14</sup> Haqad in eman lehan mataw kabiy wamuzayta na in bolsa ahol tuwaqiy ham. Ahol waqad in gimo an bulonim bilaqiy, Abeb mat ko amam moqid in amam ago ahuran nagah bunmo tuwaqdaqta haqiy ham. In bolid i wol emuq haqiy ham. Wol emid teq amam ago kabiy ka igmo gigota tiqiydaq haqiy ham. <sup>15</sup> Haqad in mat na wazim kabiy asan ban hunegan lehan in wol eman tumom ham.

Nazaq iyan kabiy anamren in mataw wain akabiyan wamuzayta na ezaq gitondaq? ham. <sup>16</sup> In boleq mataw kabiy wamuzim osayta na ginol em bugad teq in ago kabiy na mataw ta asor gibenab tiqemdaq ham. Haqan mataw nab turiyta na ginad emim bilaqiy, Haiq kidik! haqiy. Kabiy anamren nazaq hi eman haqiy. <sup>17</sup> Haqan Yesus gibiyad gibilan, Ne ginad nazaq emay ye? ham. Ta gamuk araq God ago marib usaqta ka alulin ezaqta? ham. Gamuk na bilam,

Tituq mataw anan bilaqiy 'meqin' haqiyta naqmo in awaz meqin diq turad bit anon bunmo soraq haqad in bilam ham.

*Buk Song 118.22*

<sup>18</sup> An ya ne gibilenaiq ham. Mat aw nog tituq na amalib woqeq in giditin bunmo tuwolbiyay daqay ham. Ari tituq naqmo

in mat araq amalib woqeq in mat na tuwol ninal bugdaq ham.

<sup>19</sup> Haqan mataw Moses ago gunun hurit kemiyta na teq mataw tamaz emayta gigo aseseqta na in ginad tiqem hasiy. Yesus i gibin wazid woqgo haqad gamuk awowun ka bilam haqiy. Haqad muran diq nabmo in Yesus wazeq irqurgo ginad emad teq in ta on mataw girabun yaqay.

*Mataw Sisa takis ugayta na ago in Yesus ulum waqiy*

(Matyu 22.15-22; Mak 12.13-17)

<sup>20</sup> Nazaq iyan mataw aseseqta na in Yesus wamuz naqmo diq hiqiy yaqay. Ad in mataw asor giqeman lehim in katiyad Yesus ago gamuk huritnan haqad teq in wirinad luw yaqay. I Yesus kat ugid in gavman gigo gunun araq itiyonad nan araq hi bilaqnanta bilaqid teq i gavman abenab emid in hazizirib titurdaq haqad. <sup>21</sup> In nazaq haqad Yesus tubuloni, Tisa haqiy i ningo tuhurit haqiy. Ni gamuk hel diqta amalib on mataw suleq negaqta haqiy. Ni mataw gibin inaqta a hi girabunaqta haqiy. Ad ni on mataw God ago dan titnonta qiqisihunad ni gamuk hel diqmo gibilenaqta haqiy. <sup>22</sup> Ni ninad ezaq emaq? haqiy. I gibabun Rom gigo king Sisa in i gituw bulsa i takis ugauqta na in daq dimun o daq meqin? haqiy. I Juda gigo maror ezaq bilamta? haqiy.

<sup>23-24</sup> Haqan Yesus anad tiqam. Mataw ka tikat yaqay ham. Haqad in gibilan, Mani araq iqisihunid ya ahol waqiy ham. Haqan in mani araq ugan ahol waqad bilam, Ka nog diq adulan teq ahol anan mani kab usaq? ham. Haqan in bilaqiy, Na Sisa-mo agota haqiy. <sup>25</sup> Haqan Yesus gibilan, Nazaq iyan Sisa ago nagah na ne Sisa-mo ugiy ham. Ad God ago nagah na ne God-mo ugiy ham.

<sup>26</sup> Ari Yesus ago gamuk bunmo dimunmo iyan mataw aseseqta na in on mataw gimeb Yesus waz daqayta ago adanteqin haiqqam tiqiyiy. Ad in Yesus ago gamuk huritim ginadnad emad giqezmo hiqiyim tuqosiy.

*Sadyusi in mataw hodhodab eraq daqayta na ago Yesus ulum waqiy*

(Matyu 22.23-33; Mak 12.18-27)

<sup>27</sup> Ari Sadyusi asor Yesus ago hib tuboliy. Mataw na ginad kazaq emayta. Mataw tumoqiya hodhodab a hi eraq daqay haqayta. <sup>28</sup> Na in bolim Yesus buloni, Tisa haqiy, Moses i gimen gamuk araq mar tonim in kazaq bilam haqiy. Mat araq aw waqeq amun a hi emsamo moqid ago aw amomo ossa teq in amikqan araq abab aqoburan na waqeq alulib abab ayon onmin tigiqemdaq ham haqiy.

<sup>29</sup> Ari gamuk araq kazaq lahta haqiy. Mat araq amikqaniz nenaq 7 nazaq diq iyim osiy haqiy. Osim in gibab na aw araq tuwam haqiy. Waqim inaq amun araq a hi emimmo in tumom haqiy. <sup>30</sup> Moqan ama ta araq in abaq aqoburan na wam haqiy. Waqim in amun haiqimo osim tumommo haqiy. <sup>31</sup> An gima ezeqmanta na in aw naqmo wammo haqiy. Nazaqmo mataw maqbab 7 na in aw naqmo waqim amun araq eman a hi gwahtiqsamo in tumoq bugiy haqiy. <sup>32</sup> An abeb aw na tumommo haqiy. <sup>33</sup> Nazaq iyan abeb mataw bunmo hodhod huloseq eraq daqayta nab teq aw na in nog diq awe tiqiydaq? haqiy. Maqbab 7 na bunmo in aw amulik naqmo waqiyta haqiy.

<sup>34</sup> Haqan Yesus gibilan, Muran on mataw og kab osayta na in an waq agamukan wastitayim teq in an waqayta ham. <sup>35</sup> Ari on mataw God in gibiyani titnonta iyiyta na God in giwazid hodhodab eraqeq in ago maror aduganib gwahtiyeq tuqos daqay ham. Osad nab in an a ta hi waq daqay ham. <sup>36</sup> Na ezaqgo in a ta hi moq daqayta na ago ham. In angelo nogmo iyeg tuqos daqay ham. God in hodhodab giwazan eraqan iyan in God atatin tiqiyiy ham.

<sup>37</sup> Teq God mataw tumoqiya giwazid hodhodab eraq daqayta na ago Moses ne tigiqisihunmo ham. In ago marib ay amikta araq faq oyad a hi oyworta awagamun nab in gamuk kazaq mar tonim bilam ham.

Iyahta in Abraham ago God, teq Aisak ago God, teq Jakob ago God haqad in bilam ham. *Kisim Bek 3.6, 15, 16*

<sup>38</sup> Nazaq iyan God in mataw moqim kayeqmo osayta gigo God iyim in gibiy muzaqta ham. Na ezaqgo mataw tumoqiya teq mataw a hi moqayta inaqmo in God ameb kayeqmo osayta ham.

<sup>39-40</sup> Yesus nazaq bilaqan mataw bunmo rabad in Yesus ulum waqnan a ta hi susumun ug yaqay. Nazaq iyan mataw Moses ago gunun hurit kemiyta na asor in Yesus buloniy, Tisa haqiy ni gamuk amenin bunmo dimunmo bilam haqiy.

*Krais ahol alulin ezaqta na ago Yesus Farisi susumun nag*

(*Matyu 22.41-46; Mak 12.35-37*)

<sup>41</sup> Ari Yesus on mataw nab turiyta na gibilan, Ezaq haqad mataw bilaqay, Krais in Devit atatin\* haqayta? ham. <sup>42-43</sup> Devit Buk Song-ib gamuk araq mar tonim bilam, Iyahta in yaqgo Iyahta kazaq bulonim bilam ham. Ni ya iben iqaban ban kab ya imen emad ossa ya ningo bab giqemid nisen ahaqenib tiqiy bug

daqay haqad in bilam ham. *Buk Song 110.1*

<sup>44</sup> Ari Devit in Krais anan bilam, 'Yaqgo Iyahta' haqad in bilam ham. Nazaq iyan ezaq toneq Krais in Devit ago Iyahta iyeg teq in Devit atatin a ta iydaq? ham.

*Yesus in mataw Moses ago gunun hurit kemiyta na gigo daq ginan bilam*

(*Matyu 23.1-36; Mak 12.38-40; Luk 11.37-54*)

<sup>45-46</sup> Haqad Yesus in on mataw bunmo gimeb ago disaipel gibilenim bilam, Ne mataw Moses ago gunun hurit kemiyta na ginan gihol waz naqmo hiqiyiy ham. In tubusan sisaqta giholib emeq mataw gimeb luwnan ginad bilaqayta ham. Ad in maket-ib luwsa mataw gibiyad ginan 'mat ayah' haqsa in ginad diq dimniyaqta ham. Mataw na bit humab wolaytab ban ulilibta nabmo osnan ginad bilaqayta ham. Ad in humab adidaqan inaqtab ogib garuruhab osnan hulosome diq hulosaqta ham. <sup>47</sup> Teq in on waburta kat negad gigo bit samanmo waqayta ham. Ad in mataw gimeb God inaq gamuk sisaqmo bilaqim a lehayta ham, mataw gibiyad ginan dimun diqta haq daqay haqad ham. God hazizir ayahta emdaqta nab teq mataw na in on mataw bunmo giquriyameq faq ayah diqmo tuwaq daqayta ham.

## 21

*Aw anaghan haiqta araq in God naw ug*  
(*Mak 12.41-44*)

<sup>1</sup> Ari on mataw gigo nagah kabemmo inaqta asor Tempel agelin aduganib bo gwahtiyeq gigo naw hunegan mani emayta abanab woqsa Yesus in gibiyad os. <sup>2</sup> Ossa aw waburta araq anaghan haiqta bolim mani amikmikta giger hunegsa in ahol tuwam. <sup>3</sup> Ahol waqad in ago disaipel gibilan, Ya helmo ne gibilenaiq ham. Aw waburta ahol anaghan haiqta ko in mani amik diqta emim in on mataw bunmo gigo nawta na giquriyam bug ham. <sup>4</sup> Na ezaqgo mataw bunmo in gigo mani kabemmo usaqta na ago asitmo emiyta ham. Ari aw ko haiq ham. In ago mani in didaq zayeq neqdaqta na tiqem bug ham.

*Yesus bilam, Tempel teq meqniydaq ham*  
(*Matyu 24.1-2; Mak 13.1-2*)

<sup>5-6</sup> Ari mataw asor Tempel anan bilaqiy, Bit ko haqiy mataw gig dimdimunta amalib emim teq in mataw God naw ugiyta na anawun waqim amalib balaw tonan in awaqan dimun diq iyaq haqiy. Haqan Yesus bilam, Ne nagah dimdimunta ahol waqayta ko ago akaman gwahtiyeq teq gig ko bunmo wolzilayeq gihunegid tuwoq

\* **20:41:** Luk 18.38 nab teq ni gamuk 'Devit atatin' ka alulin ahol waqdaq.

bug daqay ham. Gig an amalib usayta ko teq muruwoqeq tiqmo bug daqay ham.

*Yesus bilam, Afaqan kabemmo teq gwahtiqaq ham*

*(Matyu 24.3-14; Mak 13.3-13)*

<sup>7</sup> Haqan disaipel Yesus tisuusumun ugiy, Iyahta haqiy kam gineh teq nagah ni anan bilamta na tugwahtiqaq? haqiy. Naga daqin ameb gwahtiqa i ahol waqad ginad emam, Nagah na gwahtiqaqo akaman sinsin tiqiy haqam? haqiy.

<sup>8</sup> Haqan Yesus gibilan, Ne gihol waz naqmo hiqiyeq osiy ham. Luweq mataw asor boleq kat neg daqay ham. Mataw kabemmo teq boleq ya inan biyad bilaq daqay, Mat naqmo ya kawa haq daqay ham. Ad in bilaq daqay, Kam abebtanta na sinsin tiqiy haq daqay ham. In nazaq haqsa ne helmo haqad gimuzeq nenaq hi lehiy ham.

<sup>9</sup> Abeb mataw bab emsa ne gihulan huritad teq ta saw haresmo mataw eraqeq gavman gigo maror othassa ne in gibin hurit daqaymo ham. Huritad ne hi ninoriy ham. Daq nagan danmeb tugwahtiqaqta ham. Teq kam abebtanta na in bab na muzeq hidmo a hi gwahtiqaq ham. <sup>10</sup> Haqad in gibilan, Mataw en araq eraqeq leheq mataw saw araqaqta nenaq an wol daqayta ham. Sa king araq ago dauh nenaq eraqeq king ta araq ago dauh nenaq an wol daqaymo ham. <sup>11</sup> Kanawrigrig aseseqta siband og ahol wolsa saw asor moq aseseqta teq zarow meqin diqta tugwahtiqaq ham. Teq nagah arab inaqta amo amo teq daq hares lul araq diqta kaitab gwahtiqaq daqay ham.

<sup>12</sup> Ari daq nagan a hi gwahtiqaqamo mataw asor ne giwazeq gimeqin ton daqay ham. Ad in ne giqad bit humab wolaytab leheq ne gimen hazizir emad teq in ne tigiqirgur daqay ham. Ya ihol abin ne giholib usaqta na ago in ne giqad gavman gigo aseseqta na gimeb leh daqay ham. <sup>13</sup> Kam nab ne nagah gimeb ahol waqiyta na awagamun bilaqgo adanteqin inaq tiqiy daqay ham. <sup>14</sup> Teq muranmo ne naga gamukin amalib gihol adanin qway daqayta na ago ne ginadnad hi emiy ham. <sup>15</sup> Yaqmo teq inad dimunta negad gamuk ne bilaq daqayta na yaqmo ne giqezab emid tugwahtiqaq ham. Gwahtiqaq mataw ne gimeqin ton daqayta na in ne gigo gamuk amenin em yo hiqiyad in ne gigo gamuk bayid a hikidik woqdaq ham.

<sup>16</sup> Kam nab ne ginenmaman teq ne gimaqbaban teq ne gisenlulniz teq ne giyogniz in ne giwazeq bab gibenab tigiqem daqay ham. Ad in ne gilikmanib asor ginol emid ne tumoq daqay ham. <sup>17</sup> Ya ihol abin ne giholib usaqta na ago on mataw bunmo

gigem meqinta neg daqay ham. <sup>18-19</sup> Teq God ne giwamuza ne gifaqinib giqensan araq diq a hi milhesdaq ham. Ne giwaz diq meqniyeq oseq teq abeb ne le os dimunta kuluwa-kuluwmo osayta nab gwahtiqaq ne anononmo tuqos daqay ham.

*Yesus bilam, Jerusalem teq meqniydaq ham*

*(Matyu 24.15-21; Mak 13.14-19)*

<sup>20</sup> Ari abeb bab bo Jerusalem lilut ugeq tursa ne gibiyad teq ne ginad em daqay, Uliq meqniydaqta akaman na tugwahtim haq daqay ham. <sup>21</sup> Kam nab mataw saw Judiya-ib os daqayta na in tukeq garah ban gwalehiy ham. Ad on mataw uliq Jerusalem-ub os daqayta na in uliq na hulosa saw asor ban lehiymo ham. Teq mataw garanab luw daqayta na in muleqeq le uliqab ta hi gwahtiqaq ham. <sup>22</sup> Kam nab God in on mataw daq meqinta emad luwiyta na amenin tinegdaqta ham. In nazaq emeq in ago gamuk mar tonan usaqta na bunmo tuwol net bugdaq ham. <sup>23</sup> Kam nab on gigem iyayta na teq on amun muturta sus ugayta na in timeqniy daqay ham. Na ezaggo afaqan na ayah diqmo og kab gwahtiqaqta ham. Gwahtiqaqmo God ago agem meqniy in on mataw na tigimeqin diq tondaq ham. <sup>24</sup> Sa mataw en Juda a haiqta nagan boleq Juda on mataw nenaq bab emeq in Juda kabemmo baqirib tiginol em daqay ham. Ginol emad asor in giwazeq giqad in gigo ogib ta leheq giqemid tuqos daqay ham. Mataw en Juda a haiqta nagan bo Jerusalem meqin tonad luwsa le God kam nagta na tihiqiyid teq in muleqeq in gigo uliqab ta leh daqay ham.

*Mat Atatin teq ta boldaq*

*(Matyu 24.29-31; Mak 13.24-27)*

<sup>25</sup> Ari Yesus bilam, Kaitab zeq teq kalam teq ulig in gihol buliyeq giwaqan lul araq diq iy daqay ham. Sa ogib kab on mataw dauh bunmo nagah na gwahtiqaqta ahol waqad in ginadnad emad rabad tuqos daqay ham. Kamis eraqeq woleq bolsa ahulan ayahmo iysa on mataw huritad in tirab naqmo diq hiqiy daqay ham. <sup>26</sup> Teq in nagah aseseqta zawayta ulilib usayta nagan gihol wolsa gibiyad in ginad em daqay, Og ka timeqniyan tonaq haq daqay ham. Haqsa rab meqin diqta gilum neta in gime sinsanid ogib woqeq moq nog iyeq tuqos daqay ham. <sup>27</sup> Ussamo Mat Atatin kaitab onqas amalib oseq ago zaway teq ahol anuwan ayahta inaq bolsa in ahol tuwaq daqay ham. <sup>28</sup> Nazaq iyan abeb daq nagan tugwahtiqaqamo ne eraqeq gime ulilib gwalehsa usan ham. Ussa mat ne gizayeq bab gibenab giwaqdaqta na gehitiqsa ne ahol tuwaq daqay ham.

*Ay fik kam ulum kemaqta  
(Matyu 24.32-35; Mak 13.28-31)*

<sup>29</sup> Ad Yesus in ago disaipel gamuk awowun araq gibilenim bilam. Ne ay fik teq ay bunmo inaqmo gibiyiy ham. <sup>30</sup> Ay nagan gihokan muturta gwahtiqa ne ahol waqad ginad emay, Zeq akaman tiqiyinan tonaq haqayta ham. <sup>31</sup> Nazaqmo teq abeb daq ya anan bilayta nagan bunmo tugwahtiqa ne ahol waqad ginad kazaq emiy, God ago maror bolim sinsin tiqiy haqiy ham. <sup>32</sup> Ya helmo ne gibilenaq ham. On mataw muran kam kab osayta ka a hi moq bugsa daq nagan bunmo tugwahtiqaq ham. <sup>33</sup> Kait og inaq teq tihiqiydaqta ham. Ari yaggo gamuk ka a hi hiqiydaq ham.

*Yesus in ago disaipel gibilan, Ne gihol wazy ham*

<sup>34</sup> Ari ne gihol waz naqmo hiqiyiy ham. Luweq ne daq haresmo emad yuw atoranta uluwad ginad agadan iyad os daqay ham. Ad ne og ka ago afaqan amo amo loyinad ne ginad meqniydaqmo ham. Daq nazaqta na ne gime ishid Iyahta ago kam na gwahtiqa ne riten daqay ham. Bilaqne karuw dobub woqim ritenaq nazaq ham. <sup>35</sup> Mat Atatin ta boldaqta na akaman in on mataw og saw bunmo gigo hib tugwahtiqaqta ham. <sup>36</sup> Nazaq iyan ne tuteqmo gihol asawan woltayad osiy ham. Ad sirisirimo ne God inaq gamuk bilaqsa in ne zaway negan ham. Zaway negid ne giwaz meqniyeq osad daq nawa ya anan bilayta na in ne gigo hib gwahtiqa ne dimunmo tuqos daqay ham. Oseq abeb ne Mat Atatin anognib turad ne gimebay a hi woqdaq ham.

<sup>37</sup> Ari Yesus kam bunmo Tempel ago gel aduganib le gwahtiqe in on mataw suleq negayta. Ad taromab in le garah anan Oliv haqayta nab usyaq. <sup>38</sup> Sa on mataw bunmo tarom naqmo saw a hi hastitaysamo in eraqeq Yesus ago gamuk huritnan haqad Tempel-ib tileh yaqay.

## 22

*Judas in Yesus waqeq Juda gigo mataw marorta gibenab emgo bilam*

*(Matyu 26.1-5, 14-16; Mak 14.1-2, 10-11; Jon 11.45-53)*

<sup>1</sup> Ari Bret yis haiqmo neqayta akaman anan Pasova haqayta na bo sinsin tiqiy. <sup>2</sup> An mataw tamaz emayta gigo aseseqta na teq mataw Moses ago gunun hurit kemiya na in on mataw ginan rabad iyan in gime titoneq Yesus wol emid moqdaqta na ago adanteqin tinagun yaqay.

<sup>3</sup> In Yesus wol emgo adanteqin nagunad luwsa Satan in Yesus ago disaipel gigo araq Judas uliq Kariyot-ibta na aholib tugwal. <sup>4</sup> Gwalan in lehim mataw tamaz emayta

gigo aseseqta na teq mataw Tempel-ib hurmey osayta gigo aseseqta na nenaq gamuk tiqemiy. Gamuk emad Judas ezaq toneq Yesus waqeq mataw na gibenab emdaqta na ago agamukan tuwastitayiy. <sup>5</sup> Mataw aseseqta na ginad diq dimniysa in Judas inaq an adugan wazim buloniy, I ni nizayeq mani tinigam haqiy. <sup>6</sup> Haqan Judas gamuk na huritim bilam, Na dimunmo ham. Haqadmo in kam araq dimunta on mataw dauh biyahmo a hi ossa in gime titoneq Yesus waqeq mataw na gibenab emdaqta na akaman tinagunyaq.

*Disaipel giger le Pasova adidaqan neqgo abanan wastitayiy*

*(Matyu 26.17-25; Mak 14.12-21; Jon 13.21-30)*

<sup>7</sup> Ari bret yis haiqmo neqayta na akaman tugwahtim. Kam nab Juda on mataw God ayon tamaz emad in Pasova ayon sipsip amidgot wol emayta. <sup>8</sup> Nazaq iyan Yesus in Pita ayow Jon inaq giceman lehsa in gibilan. Ne leheq i Pasova adidaqan neqamta na abanan wastitayid teq i leheq nequq ham. <sup>9</sup> Haqan giger na Yesus buloniy, I bit edob diq leheq Pasova adidaqan neqamta na abanan wastitayim? haqiy. <sup>10-11</sup> Haqan Yesus gibilan, Huritiy ham. Ne uliq ayahta nab le gwahtiqa mat araq reb ayuwun inaqta soreq a bo lehad in ne danib ti-gibiyaq ham. Ne mat naqmo muzeq inaq leheq bit edob in gwahtiqaqta nab ne bit na anamren kazaq susumun uguy ham. Tisa bilam, Yaggo disaipel nenaq didaq neqamta na ago bit adugan edowa? ham haqad ne buloniy ham. <sup>12</sup> Bulonid teq mat na bit adugan araq ayahta ulilib usaqta na tigiqisihundaq ham. Bit adugan nab didaq neqayta anaghan bunmo usaqta ham. Nab ne leheq i Pasova adidaqan neqamta na abanan wastitayiy ham. <sup>13</sup> Haqan giger na tilehiy. Lehim Yesus nagah bunmo ginan gibilanta nazaqmo in ahol tuwaqiy. Ahol waqad in Pasova adidaqan neq daqayta na abanan tuwastitayiy.

*Yesus in ago disaipel bret teq wain ayun inaq nag*

*(Matyu 26.26-30; Mak 14.22-26; 1 Korin 11.23-25)*

<sup>14</sup> Ari imisor didaq neqgo akaman tiqiy Yesus ago disaipel nenaq humab wolim banab osad didaq tineq yaqay. <sup>15</sup> Neqad teq Yesus in ago disaipel gibilan, Ya nenaq Pasova adidaqan ka neqeq teq ya santitiy sordaiq haqad ya inad awaz meqin usta ham. <sup>16</sup> Teq ya kazaq ne gibilenaq ham. Abeb ya nenaq Pasova adidaqan ka a ta hi neqdaq ham. Ari i gigo Pasova ka anon diq tugwahtiqid kam nab teq ya nenaq God ago maror aduganib osad Pasova adidaqan ka a ta neqdaq ham.

<sup>17</sup> Haqad in wain agogin inaq waqim God esey ugim gibilan, Ka ne waqeq an ugeq uluwiy ham. <sup>18</sup> Ad in bilam, Ya ne gibilenaig ham. Ya wain ayun ka a ta hi uluwdaig ham. Abeb God ago maror og kab tugwahtiqid nab teq ya wain ayun ka a ta uluwdaig ham.

<sup>19</sup> Haqad in bret asor waqim God esey ugim in orqayim tinag. Negad in gibilan, Ka ya inon ne giyon hulosaigta ham. Abeb ne ya inadin emad kazaq em daqay ham. <sup>20</sup> Ari in didaq tineqim hulosaq Yesus wain agogin inaq waqim in emim bilam, Gog kab ya inedan God ago maror murtura na zaway ugdaqta usaq ham. Ya ned ka ne giwastitaynan wazbaldaiqta ham.

<sup>21</sup> Ari ne ahol waqiy ham. Mat ya iwaqeq bab gibenab iqemdaqta na in ya inaq humab kab osaq ham. <sup>22</sup> God kwaziqmo Mat Atatin ayon bilaqan usaqta nazaqmo in dan muzeq tilehdaq ham. Ta teq mat bab gibenab Mat Atatin emdaqta na timeqniy hasdaq ham. <sup>23</sup> Yesus nazaq bilaqan disaipel bunmo in gimo an tisusumun ug yaqay, Nog diq teq daq na emdaq? haq yaqay.

## **Yesus santitiy sorim moqim teq ta eram**

*Disaipel gilikmanib nog diq in ayah diqta na ago in an mugiy*

<sup>24</sup> Ari disaipel eraqim nog diq in gilikmanib mat ayah diqta idyaqta na ago in an tumug yaqay. <sup>25</sup> An muga Yesus gibilan, On mataw en ta asor Juda a haiqta nagan gigo maror aseseqta na in igmo ag haqad gihol wazan eraqayta ham. Sa in gigo walmataw in gihaqenib osayta na in maror na gibin iluwad bilaqay, I gigo maror ka i gilumsihan i dimunmo osauqta haqayta ham. <sup>26</sup> Ari ne nazaq hi emiy ham. Ne gilikmanib mat ayahta na in ahol wazid wogsa in mat minminta abin haiqta nog iyan ham. Ad ne gigo mat danmebta na in ne gigo kabibiy mat samanta nog iyan ham. <sup>27</sup> Ne ginad emiy ham. Mat banab ossa inmen didaq a bolim anognib emayta na in abin inaq o haiq kabibiy mat didaq iberim a lehaqta naqmo in abin inaqta? ham. Mat banab ossa didaq a bolim ugayta naqmo in mat ayah diqta ham. Teq ya nazaq a hi emaiqta ham. Ya ne gilikmanib osad ya ne gigo kabibiy mat nog iyim ne gilumsihad osaiqta ham.

<sup>28</sup> Kwaziqmo mataw afaqan yagad ibaymuza negmo a hi ihulos yaqay ham. <sup>29</sup> Nazaq iyan ya imam ibenab maror amta nazaqmo ya ne gibenab maror tiqemaiqmo ham. <sup>30</sup> Abeb yaqgo maror aduganib teq ne maror iyeq osad ne yaqgo banab didaq neqad yuw tuquluw daqay haqad ya ne

gibenab maror ka emaiq ham. Kam nab teq ne yaqgo maror aduganib marorgo banab osad ne Isrel gigo gem 12 na tigibiy muz daqay ham.

*Yesus bilam, Pita teq gileh yagdaq ham (Matyu 26.31-35; Mak 14.27-31; Jon 13.36-38)*

<sup>31</sup> Haqad Yesus in Pita bulon, Saimon, Saimon ham ni hurit ham. Satan ne bunmo giwaqeq wit nog giqiwornan haqad atoranmo tibilamta ham. <sup>32</sup> Teq ya God inaq gamuk emim ninmen tubulon ham. In nilumsihid ni ninad helmo haqayta na a hi woq hasdaq haqad ya tubulonta ham. Abeb ni ninad buliyeq yaqgo hib ta bolad teq ni nimaqbaban zaway negad in gigo ginad helta na ni wazid ta eraqan ham. <sup>33</sup> Haqan Pita bulon, Iyahta ham, ya ninaq bit giqirquran osayta nab tilehgo ham. Ningo bab in ya ninaq garabmo ginol emgo bilaqsa ya a hi rabdaig ham. <sup>34</sup> Haqan Yesus bulon, Pita ham ya nibilenaig ham. Tarom kab kurek a hi gayonsamo ni nime ezeqmanmo gileh tiyagdaq ham.

*Yesus in ago disaipel gidek waz*

<sup>35</sup> Ari Yesus in ago disaipel gibilenim bilam, Kwaziqmo ya giqeman ne yaqgo kabiy emnan lehad ne mani azinyaq teq kuram teq baqir a hi soriy ham. Ad ne gisendugan gisenab a hi emiyimo ham. Kam nab ne nagah araq ago siqim iyiy ye? ham. Haqan disaipel bilaqiy, Haiq haqiy. <sup>36</sup> Haqan Yesus gibilan, Ari muran ya kazaq ne tigibilenaig ham. Ne gigo mani aziynaq ussun ne waqiy ham. Ad ziy araq ne gigo es siheneq a luw daqayta na ne waqiyimo ham. Ne baqir haiqta iyeq ne gigo giholsihen mat araq ago hib zayeq amenin waqeq ne giholyon baqir zayiy ham. <sup>37</sup> Ya helmo gibilenaig ham. Daq araq teq ya iholib gwahtiqdaqta na in God ago marib gamuk araq ya inan bilamta na tuwol net bugdaq ham. Gamuk na bilam,

In mat na anan mat gunun othasaqta araq haqiy ham. *Aisaya 53.12*

Daq na teq ya iholib tugwahtiqdaq ham. <sup>38</sup> Haqan disaipel bilaqiy, Iyahta haqiy i gigo baqir giger kawa haqiy. Haqan Yesus bilam, Na dimunmo tiqiy ham.

*Yesus garah Oliv-ub God inaq gamuk am (Matyu 26.36-46; Mak 14.32-42)*

<sup>39</sup> Ari Yesus eraqim uliq hulosis lehad in ago daq muzinim garah Oliv-ub tilah. Lehsa ago disaipel muzim inaq tilehiyimo. <sup>40</sup> Lehim saw nab tugwahtiqim teq Yesus tigibilan, Ne God inaq gamuk emad osiy ham. Osad ne God bulonid in ne gilumsihid daq ne gilum waqdaqta na ne giholib gwahtiqsa ne hi woggo haqad buloniy ham. <sup>41</sup> Haqadmo in disaipel gihulosim

asitmo ta leh nog iyim in abakbakan ulum laquwim turad God inaq gamuk tiqemyaq. <sup>42</sup> In bilaqyaq, Ya imam haqyaq ni ninad bilaqsun iyid teq ni ya iholib afaqan ka walem haqyaq. Teq ni ya inad ka hi muz haqyaq. Ninmo ninad muz haqyaq. [ <sup>43</sup> Sa Heven-ib angelo araq gehitiqim Yesus ulumsihad zaway tuqugyaq. <sup>44</sup> Zaway ugsa Yesus aholib afaqan ayah diqta loyinad in anad awaz meqin amalib God inaq a gamuk ta emyaq. Emsa ahol qwal wolad ned nog ogib tiqyaq.]

<sup>45</sup> Ari in God inaq gamuk tiqemim hulosed in eraqim ago disaipel gigerab muleqim ta lah. Lehim disaipel gihol afaqan diq iyad ussa in gibiy. <sup>46</sup> Gibiyad in gibilan, Ne ezaq haqad usay? ham. Ne eraqeq God inaq gamuk emad osiy ham. Gamuk emad daq ne gilum waqdaqta na bo giholib gwahtiqa na hi woqgo buloniy ham.

*Judas Yesus waqim bab gibenab am*

(*Matyu 26.47-56; Mak 14.43-50; Jon 18.3-11*)

<sup>47</sup> Yesus nazaq gamuk bilaqad tursamo mataw dauh biyahmo tuboliy. Bolad Yesus ago disaipel 12 na gigo araq anan Judas haqay na in mataw na dan giqisihunim ameb bol. Bolim in Yesus agerab loqimmo tiqilawun. <sup>48</sup> Ilawunan Yesus bulon, Judas ham ni daq kaqmo amalib Mat Atatin bab gibenab emaq e? ham. <sup>49</sup> An disaipel Yesus inaq turiyta na in daq na ahol waqad ginad emim bilaqiy, Iyahta haqiy i baqirib tiginolam e? haqiy. <sup>50</sup> Haqadmo in gigo araq eraqim tamaz mat danmebta ago kabibiy mat araq baqirib wolim adeksan aqabun ger qwatayanmo ogib tuwom. <sup>51</sup> Anmo Yesus bilam, Daq na hulosity ham. Haqad in mat na adeksan usta asawnib aben emim wazanmo in tidimniy.

<sup>52</sup> Ari mataw tamaz emayta gigo aseseqta na teq mataw Tempel-ib hurmey osayta na teq Juda gigo mataw marorta asor in Yesus wazan bolan Yesus gibiyad gibilan, Ne baqir sebur wazim a boliyta ka ne mat rin tonaqta wazan boliy ye? ham. <sup>53</sup> Kam kabemmo ya nenaq Tempel-ib ossa ne a hi iwaziy ham. Teq muran kam ka in ne gigo kamta ham. Muran romriq awaz meqniyim in saw anuwan tiqisih bugaq ham.

*Pita Yesus gileh ug*

(*Matyu 26.57-58, 69-75; Mak 14.53-54, 66-72; Jon 18.13-14, 19-24*)

<sup>54</sup> Ari mataw na Yesus wazim ad tamaz mat danmebta ago bitab tilehiy. Lehsa Pita gimuzim lehad in gibeb pesan nogmo lehyaq. <sup>55</sup> Mataw na bit nab lehim gel aduganib gwahtiqaqim bit aqezab faq ulamim iterad tuqosiy. Ossa Pita gigerab lehim nenaq faq iterad tuqosmo. <sup>56</sup> In

faq iterad anuwanib ossa kabibiy aw araq Pita ahol waninunadmo tibilam, Mat ka in Yesus inaq luwtamo ham. <sup>57</sup> Haqan Pita bilam, Neng ham ya mat na ago a hi huritta ham. <sup>58</sup> Haqad in asitmo ta osanmo mat ta araq Pita ahol waqad tubulon, Ni inaqmo mataw na gigo gisenlul araq ham. Haqan Pita bilam, Mang ham na ya a haiq ham. <sup>59</sup> Haqad in asitmo ta ossamo mat ta araq awaz meqniyim tibilaqyaq, Helmo diq haqyaq mat ka in mat Galiliy-ibta iyim iyan in Yesus inaq luwta daqag haqyaq. <sup>60</sup> Sa Pita bilam, Mang ham ni gamuk bilaqta na ago ya inad a hi emaiq ham. In nazaq bilaqanmo kurek tigayon. <sup>61</sup> Gayonan Iyahta ahol buliyim Pita ahol tuwam. Ahol waqsa Pita in Iyahta gamuk bulonta na anadin tiqam. Kurek a hi gayonsamo ni nime ezeqmanmo gileh tiyagdaq ham. <sup>62</sup> Pita gamuk na anadin emadmo in gel asan ban gwahtiqaqim lehim gaq naqmo diq hiqiy.

*Mataw Yesus wolad yuquwun yaqay*

(*Matyu 26.67-68; Mak 14.65*)

<sup>63</sup> Ari mataw Yesus waz yaqayta na in Yesus woltitayad teq in tibilawun yaqay. <sup>64</sup> Ad in tubusan waqim Yesus ame isihim teq in wolad bulon yaqay, Ni God ago nantut iyeq teq nog kawa ninolaqta ka anan biysa i hurituq haq yaqay. <sup>65</sup> Ad in gamuk meqmeqinta kabemmo amalib Yesus bilawun yaqay.

*Mataw aseseqta Yesus ayon hazizir emiy*

(*Matyu 26.59-66; Mak 14.55-64; Jon 18.19-24*)

<sup>66-67</sup> Ari abeb zeq tigabolon Juda gigo mataw marorta nagan humab tuwoliy. Mataw tamaz emayta gigo aseseqta na teq mataw Moses ago gunun hurit kemiya na bo humab wolim ossa teq mataw Yesus waqim a bolim ginognib eman titur. Tursa mataw aseseqta na Yesus tubuloniy, Ni mat anan Kraiss haqayta na iyeq teq ni i gibilen kem haqiy. Haqan Yesus gibilan, Ya ne gibilenid ne helmo a hi haq daqay ham. <sup>68</sup> Ad ta ya ihol alulin anan ne susumun negid ne amenin a hi ibilen daqaymo ham. <sup>69</sup> Teq ya kazaq bilaqdaiq ham. Muran teq abeb Mat Atatin in God Awaz Meqin Diqta na aben aqabun ban tuqosdaq ham. <sup>70</sup> Haqan mataw na bunmo bilaqiy, Nazaq iyan ni God atatin e? haqiy. An Yesus gibilan, Nawaqmo ne tibilaq sireqiy ham. <sup>71</sup> Haqan mataw na bilaqiy, I naga gamukin a ta huritam? haqiy. Inmo aqezab aholyon bilaqan i tuhurit haqiy.

## 23

*Mataw Yesus waqim ad Pailat ago hib lehy*

(Matyu 27.1-2, 11-14; Mak 15.1-5; Jon 18.28-38)

<sup>1</sup> Ari Juda mataw aseseqta na bunmo eraqim in Yesus waqim ad Pailat ago hib tilehiy. <sup>2</sup> A lehim in Yesus amalib nan emad bilaqiy, Mat ka i gigo on mataw bunmo kat negad ginad buliysa in i gigo maror a ta hi muzinayta haqiy. Ad i Sisa takis ugnan bilaqsa in i gidanin qwayaqta haqiy. Teq in bilaqaq, Mat anan Kraisa haqayta na yaqmo kawa haqaqta haqiy. Ad inmo aholnan bilaqaq, Yaqmo king haqaqta haqiy.

<sup>3</sup> Haqan Pailat Yesus tisuusumun ug, Ni Juda gigo king e? ham. Haqan Yesus amenin emim bilam, Ni nawaqmo tibilam ham. <sup>4</sup> Haqan Pailat in mataw tamaz emayta gigo aseseqta na teq on mataw biyahta na bunmo gibilan. Ya mat ka ago afaqan araq nagunim ahol a hi way ham. <sup>5</sup> Haqan mataw na atoranmo bilaq yaqay, Mat ka saw Galiliy-ib ago kabiy alulin emim in mataw suleq negad luwim bo saw Judiya-ibmo iyim bo uliq kabmo tiqiy haq yaqay. In mataw gamuk gibilenad giqukil wazan eraqsa in ginad hareso tiqemay haq yaqay.

<sup>6</sup> Ari Pailat gamuk na huritim in mataw nab turiyta na tisuusumun nag, Ka Galiliy-ib mat araq e? ham. <sup>7</sup> Haqan mataw na Pailat bulonan in anad tiqam, Yesus in og saw Herot wamuzaqta na amatinta ham. Nazaq iyan in Yesus eman Herot ago hib tilah. Kam nab Herot in saw Galiliy hulosis bolim in uliq Jerusalem-ub tuqosyaq.

<sup>8</sup> Ari Pailat Yesus eman Herot ago hib lehan Herot ahol waqad anad tidimniy. Kam sisaqmo in Yesus abin huritad in ahol waqnan anad usta, Yesus daq araq azawayin inaqta emsa ya ahol waqdaiq haqad. <sup>9</sup> Teq in nagh kabemmo ago Yesus tisuusumun ugyaq. Susumun ugsa Yesus gamuk araq amenin a hi emyaq. <sup>10</sup> Sa mataw tamaz emayta gigo aseseqta na teq mataw Moses ago gunun hurit kemiyta na in bo sinsin diq turad Yesus amalib nan kabemmo emad gamuk atoran diqmo bilaq yaqay. <sup>11</sup> Bilaqsa Herot ago mataw bab emayta na nenaq in inaqmo Yesus kamolmol ugad bilawun yaqaymo. Bilawunad in tubusan araq sisaqta awaq dimunta waqim Yesus aholib emim teq in eman Pailat ago hib muleqim ta lah. <sup>12</sup> Ari kam nab Herot Pailat inaq yow tiqemiy. Kwaziqmo in giger an gihar ugad os yaqayta.

*Pailat bilam, Yesus ayib dom woliy ham*  
(Matyu 27.15-26; Mak 15.6-15; Jon 18.38-19.16)

<sup>13</sup> Ari Pailat in mataw tamaz emayta gigo aseseqta na teq Juda gigo mataw marorta na gigo on mataw asor nenaq gibilenan boliy. <sup>14</sup> Bolan in gibilan, Ne mat ka waqim yaqgo hib a bolim bilaqiy, Mat ka on mataw gihureqsa ginad agadan iysa in gisesan gigo gunun a ta hi muzinayta haqiy ham. Haqan ya ne gimeb gamuk na ulum muzad ya mat ka tisuusumun ug ham. Susumun ugim ya in ago hib daq araq meqinta ahol a hi way ham. Ne gigo hazizir ka alulin haiqta ham. <sup>15</sup> Ad ya Herot ago hib eman lehan Herot nazaqmo alulin araq ahol a hi waqad in mat ka eman yaqgo hib muleqim ta bol ham. Helmo ham. Mat ka daq araq meqinta i wol emid moqdaqta na a hi amta ham. <sup>16</sup> Nazaq iyan ya mataw gibilenid in gusib woltitayid teq ya hasid tilehdaq ham.

[<sup>17</sup> Ari ulig bunmo Pasova akamnib Pailat ago daq in mataw giqirquran osayta na gigo araq hasid gwahtiqyaqta.] <sup>18</sup> Nazaq iyan in Yesus woltitayid hulosid lehgo bilaqan on mataw bunmo araqqimmo dedibmo bilaqiy, Mat na wol emiy haqiy. Ad ni Barabas-mo hasid i gigo hib bolan haqiy. <sup>19</sup> Mat anan Barabas haqayta na in Rom gimuznan haqad nenaq bab emim gigo mataw asor ginol amta na ago in irquran osta. <sup>20</sup> Ari mataw nazaq bilaqan Pailat in Yesus hasid gwahtiqnan haqad a ta gibilan. <sup>21</sup> Gibilenan haiq. On mataw na dedibmo a ta bilaq yaqay, Ayib dom wolid moqan haq yaqay. Ayib dom wolid moqan haq yaqay. <sup>22</sup> Haqsa Pailat ame ezeqmanta a ta gibilan, Nagaqgo? ham. Mat ka naga daqin meqinta am? ham. Ya in ago hib daq araq meqinta ya wol emid moqdaqta na ahol a hi way ham. Nazaq iyan ya woltitayeqmo hasid tilehdaq ham. <sup>23</sup> Teq haiq. Mataw na zaway diq iyim lileyad in ayib dom wolgo atoran diqmo bilaq yaqay. Ad in gigez na Pailat ago gamuk bayan tuwom. <sup>24</sup> Nazaq iyan Pailat bilam, On mataw dauh biyahta ka ginad usaqta nazaqmo tiqiydaq ham. <sup>25</sup> Haqad in gigez muzinim in mat Rom nenaq bab emim mataw ginol eman bit giqirquran osaytab eman osta na hasan lehsa in Yesus ayib dom wolgo tibilam.

*Mataw Yesus ayib dom woliy*  
(Matyu 27.32-44; Mak 15.21-32; Jon 19.17-27)

<sup>26</sup> Ari in Yesus waqim ad tilehad teq in mat araq anan Saimon haqayta uliq Sairinibta ahol waqadmo tuwaziyy. Mat na uliq Jerusalem ban bolad luwsa in wazim Yesus ay soryaqta na ugan in ay na sorim Yesus muzim inaq tilah. <sup>27</sup> Lehsa on mataw dauh biyahmo Yesus muzim inaq lehad in gilikmanib on asor giban wolad gaq wazim leh yaqay. <sup>28</sup> Sa Yesus ahol buliyim on na gibilan, Ne Jerusalem on ham ne ya

inan hi gaqiy ham. Negmo giholnan teq ne gigo onmin ginan ne gaqiy ham. <sup>29</sup> Ne huritiy ham. Abeb kam araq meqin diqta tugwahtiqaq ham. Gwahtiqaq kam nab ne bilaq daqay, On nignigta onmin giqemim sus a hi negiyta na in tidimniyim osayta haq daqay ham. Na ezaqgo in gigo amun araq moqsa in ahol a hi waqayta haq daqay ham. <sup>30</sup> Kam meqinta nab mataw garah gibileneq bilaq daqay, Ne i gimalib woqeq giqisihiy haq daqay ham. Giqisihid bab bo i a hi ginol em daqay haq daqay ham. <sup>31</sup> Ne ginad emiy ham. Kam dimunta kab mataw ya iholib daq meqinta kazaq emid kam meqinta nab daq timeqniy hasdaq ham.

<sup>32</sup> Ari in mataw daq meqin emiyta gigermo Yesus inaq ginol emnan giqad lehiyimo. <sup>33</sup> Giqad lehim in le garah akululqan araq anan Gifaqin Agololan haqayta nab tugwahtiqiy. Gwahtiqim saw nab in Yesus ayib dom tuwoliy. Ad mataw meqinta giger in inaqmo ayib dom giwoliyimo. Dom wolan mat araq Yesus aqabun ban tursa araq anasaran ban turyaq. [ <sup>34</sup> Sa Yesus bilam, Ya imam ham mataw ya imeqin tonayta gigo daq meqinta ka ni walemad anadin ta hi em ham. In ginad a hi em hasadmo daq ka emay ham.] Ari mataw Yesus ayib dom wolim huload teq in ago tubusan nagan ibereq giholyon waqgo haqad gig amikmikta tuhuneg yaqay.

<sup>35</sup> Sa on mataw Yesus aholmo waqad turyi. Tursa Juda gigo mataw marorta na in Yesus bilawuneq bilaq yaqay, In mataw asor gilumsihan a hi moqiya haq yaqay. In mat God atowun emim kabiy ugta anan Kraish haqayta na iyeq teq in awaz meqniyeq inmo ahol ulumsiheq hi moqan haq yaqay. <sup>36</sup> Haqsa mataw bab emayta na nazaqmo Yesus bilawun yaqaymo. Bilawunad in agerab loqim wain ayun agon iyta ugnan ton yaqay. <sup>37</sup> Ad teq in bulon yaqay, Ni Juda gigo king iyeq teq ni ninmo nihol ulumsiheq hi moq haq yaqay. <sup>38</sup> Teq in Yesus ayib dom woliya na ago ananin mar tonim afaqinib othenan us. Gamuk na in kazaq mar toniy.

#### KA JUDA GIGO KING

<sup>39</sup> Ari mataw daq meqinta emiyta giger Yesus agerab giqotheniyta na gigo araq in Yesus bilawunim bilam, Ni mat anan Kraish haqayta ye? ham. Ni mat na iyeq teq ninmo nihol ulumsihad ni i giger gilumsihmo ham. <sup>40</sup> Haqan ta araq na in gamuk na huritim in araq na wadim bulon, Ni in afaqan waq nogmo ni waqay ham. Ni God anan a hi rabaq e? ham. <sup>41</sup> I giger ginol emid moqamta na dimunmo ham. I daq meqinta emad luwta na ago afaqan i kawa tisorauq ham. Ari mat ka daq araq meqinta a hi amta ham. <sup>42</sup> Haqad in Yesus

bulon, Yesus ham abeb ni king iyeq teq ni ya inadin em ham. <sup>43</sup> Haqan Yesus bulon, Ya helmo nibilenaq ham. Muran ya ninaq i giger Paradais-ibmo tuqosam ham.

#### Yesus mom

(Matyu 27.45-56; Mak 15.33-41; Jon 19.28-30)

<sup>44</sup> Ari zeq gabolim liqab tiqiysa saw bunmo romriq iyad le 3 kilok imisor tiqiy. <sup>45</sup> Kam nab zeq anuwan hiqiysamo tubusan ayahta Tempel-ib othenan usta na aliqabmo tartayim gigermo iy. <sup>46</sup> Samo Yesus dedibmo lileyim bilam, Ya imam kam ya iwitan eman ni nibenab tilehaq ham. Haqadmo in tumom. <sup>47</sup> Moqanmo bab mataw gigo amebta na in daq nazaq ahol waqad in God abin iluwad bilam, Helmo diq ham. Mat ko aholib daq araq meqinta a hi usta ham. <sup>48</sup> An on mataw biyahta mareren boliyta na in daq nagan bunmo ahol waqim in muleqim ta lehad giqutil tartaysa in giban wazim gigo uliqab tilehiy. <sup>49</sup> Lehsa Yesus ayogniz bunmo teq Galiliy-ib on Yesus muzim inaq boliyta na inaqmo in pesan nogmo turad nagah na bunmo gwahtiqa in ahol tuwaqiy.

#### Yesus moqan asan hodhodab a lehiy

(Matyu 27.57-61; Mak 15.42-47; Jon 19.38-42)

<sup>50-51</sup> Ari Juda gigo uliq anan Arimatea haqayta na amatin araq anan Josep haqayta in Jerusaleum-ub tubolim os. Mat na in Juda gigo mat marorta araq teq in mat dimunta ago daq titnonimmo usta. Juda gigo maror bunmo in Yesus wol emid moggo an adugan wazsa Josep asor a hi bilamta. Teq in God ago maror og kab gwahtiqa ahol waqan haqad amen emyaqta. <sup>52</sup> Mat naqmo Pailat ago hib lehim Yesus asan waqeq a le yay tongo tisuusmun ug. <sup>53</sup> Susumun ugim in lehim Yesus asan ayib walemim ogib eman ussa in tubusan husta araq amalib le tonim hodhod aduganib tiqam. Hodhod na gig araq ayahta adugan qwayim emiyta. Teq kwaziqmo in mat araq momta asan hodhod nab eman a hi usta.

<sup>54</sup> Ari kam Yesus momta na in Juda gigo lotu ayon nagah wastitayta akaman. Kam nab imisor zeq tuwolehsa Juda gigo lotu akaman diq na tugwahtiqnan tonyaq. <sup>55</sup> Samo Galiliy-ib on Yesus muzim inaq boliyta na in Josep muzim inaq hodhodab tilehiy. Lehim in hodhod na ahol tuwaqiy. Ahol waqad Josep Yesus asan wastitayim hodhodab emsa in ahol waqiyimo. <sup>56</sup> Ahol tuwaqim teq in muleqim in gigo bitab tilehiy. Lehim in masil nagah amo amo ahuran dimunta Yesus asanib em daqayta na tuwastitayiy. Wastitayim eman ussa lotu



akaman na tugwahtiġan in ginamur emad tuqosiy, God ago gunun bilamta nazaq.

## 24

*Yesus hodhodab eram*

*(Matyu 28.1-10; Mak 16.1-8; Jon 20.1-10)*

<sup>1</sup> Ari Sande tarommo saw hastitay inaq on na in masil nagah ahuran dimdimunta tanabmo wastitayan usta na giwaġim ad hodhodab tilehiy. <sup>2</sup> Lehim giġ hodhod aqez ituqim usta na otbuliyan le ussa in ahol tuwaqiy. <sup>3</sup> Ahol waqad in le hodhod aduganib gwahtiġim Yesus asawanmo ahol waqiy. <sup>4</sup> Ahol waqad in ginadnad emad nab tursamo mataw giger gigo tubusan oy gigayinsa in gigerab tugwahtiġiy. <sup>5</sup> Gwahtiġanmo on na rabad ginobun mulbunim ogib woqim usiy. Ussa mataw giger na gibileniy, Ne ezaq haqad mataw tumoqiyta gigo sawab mat kayeqmo osaqta na nagunay? haqiy. <sup>6</sup> Mat na kab haiq haqiy. In tiġeram haqiy. In a hi moqadmo saw Galiliy-ib osad gamuk gibilanta na ne anadin emiy haqiy. <sup>7</sup> In ne gibilan, Mat araġ in Mat Atatin mataw meqinta gibenab tiqemdaq haqad in bilam haqiy. Gibenab emid in ayib dom tuwol daqay haqad in bilam haqiy. Dom wolid kam ezeqmanta nab in ta eraqdaq haqad in bilam haqiy.

<sup>8</sup> In nazaq haqanmo on na in kwaziqmo Yesus gamuk bilamta na anadin a ta emiy. <sup>9</sup> Ad in hodhod hulosisim muleqim tilehiy. Lehim in disaipel 11 na teq mataw asor disaipel nenaq osiyta na bunmo in giholib daq gwahtimta na awagamun tigibilen bugiy. <sup>10</sup> Mariya uliq Magdala-ibta na teq Jowana teq Jems anen Mariya teq on asor in nenaq luwiyta naqmo in Aposel gibileniy. <sup>11</sup> Gibilenan mataw na in gigo gamuk huritim in ginadibmo bilaqiy, Gamuk na samanta alulin haiqta haqiy. Haqad in on na giqez anan helmo a hi haqiy. [ <sup>12</sup> Ta teq Pita eraqim hodhodab sibim tilah. Lehim in kuh tonim wiliyanim ame loqim tubusan husta na amomo ussa in ahol tuwam. Ahol waqim in muleqim bitab ta lehad teq in daq gwahtimta na ago anadnad diq tiqemyaq.]

*Mataw giger uliq Emeus gigo dan ban Yesus ahol waqiy*

*(Mak 16.12-13)*

<sup>13</sup> Ari kam nabmo disaipel gilikmanib mataw giger eraqim uliq araġ amikta anan Emeus haqaytab tilehiy. Dan Jerusalem hulosisim le Emeus-ib gwahtimta na in 11 kilomita nazaq. <sup>14</sup> In giger danib lehad daq bunmo Jerusalem-ub gwahtimta na anan in an bulonim leh yaqay. <sup>15</sup> In gamuk emad an bulonim lehsa Yesus-mo in gigerab gwahtiġim nenaq tilehyaq. <sup>16</sup> Lehsa

giger na nagah araġ gime ituq nog iyan in Yesus ahol a hi waq has yaqay.

<sup>17</sup> Sa Yesus gibilan, Ne giger naga diq ago bilaqim lehay? ham. In nazaq bilaqan giger na wasihim ginad meqniysa tituriy. <sup>18</sup> Turad araġ anan Kliyopas haqayta na in Yesus ago gamuk amenin emim bilam, Mataw kabemmo uliq saw bunmo uliq Jerusalem-ub bolim osad in daq gwahtimta na ago tuhuritiyta ham. Ta teq ni edob luwim ni nimomo nagah na ago a hi hurritta? ham. <sup>19</sup> Haqan Yesus tisusumun nag, Na naga? ham. An in buloniy, Yesus uliq Nasaret-ibta na ago hib daq gwahtimta naqmo haqiy. Mat na in God ago nantut araġ haqiy. In God teq on mataw bunmo gimeb kabiy awaz meqin diqta emad in gamuk dimdimunta bilaqyaqta haqiy. <sup>20</sup> Sa mataw tamaz emayta gigo aseseqta na teq i gigo mataw marorta na in mat na wazim gavman gibenab emiy haqiy. Eman gavman gamuk emim anan bilaqiy, In moqan haqad bilaqiy haqiy. Haqad in ayib dom wolim othenan tumom haqiy. <sup>21</sup> Teq kwaziqmo i ginad emyauq, Mat naqmo Isrel on mataw bunmo gizayeq gibabun gibenab giwaqeq ban dimuntab giqemid in dimunmo tuqos daqay haqyauqta haqiy.

Teq ta nagah araġmo haqiy. Daq na gwahtimta ago akaman ezeqmanta muran tiqiy haqiy. <sup>22</sup> An muran i gisenlulib on asor in i giqeman i gihol turuh nam haqiy. Tarom naqmo in hodhodab lehiy haqiy. <sup>23</sup> Lehim in Yesus asan asawanmo ahol waqiy haqiy. Ad in muleqim ta bolim kazaq bilaqiy haqiy. I God ago angelo asor gibiy haqad in bilaqiy haqiy. Gibiysa angelo bilaqiy, Yesus hodhodab eraqim kayeqmo osaq haqiy haqad in i gibileniy haqiy. <sup>24</sup> Haqan i gilikmanib mataw asor hodhodab tilehiymo haqiy. Lehim on bilaqiyta nazaqmo in gimeb nagah ahol tuwaqiy haqiy. Teq in Yesus-mo ahol a hi waqiy haqiy.

<sup>25</sup> Haqan Yesus gibilan, Ne giger ginad siqim diq ham. Ne God ago nantut gamuk bilaqan usta na anan helmo haqgo ne gigem soqotim usaq ham. <sup>26</sup> Gamuk na ezaq bilam? ham. In bilam, Kraiss boleq afaqan nagan bunmo sorad santitiy waqeq teq in abin ayahta inaq iyeq ago ban ulilibta nab tuqos woqdaq haqad in bilam ham. Nazaq a haiq e? ham. <sup>27</sup> Haqad in Moses teq God ago nantut inmo ananin mar toniyta na bunmo gibilenad in gamuk na alulin bilaq hasyaq.

<sup>28</sup> Ari in lehim mataw giger na gigo uliqab tugwahtiġim Yesus in gihuloseqmo lehnan ton. <sup>29</sup> Sa mataw giger na Yesus wasihim buloniy, I ninaq osam haqiy. Zeq tuwolehsa tarom tiqiynan tonaq haqiy. In

nazaq haqan Yesus le nenaq bitab gwahtiqim tuqosiy. <sup>30</sup> Osim abeb in didaq tineqgo haqad banab tuqosiy. Osad Yesus bret waqim God esey ugim in orqayim mataw giger na tinag. <sup>31</sup> In nazaq tonanmo giger na gime tihastitaysa in ginad tiqem hasiy. Ka Yesus-mo haqiy. Haqsamo haiq muran diq nawaqmo Yesus in gime titonim nabag lehan in ahol a ta hi waqiy. <sup>32</sup> Ad in an bulonim bilaqiy, I mat na inaq danib bolsa in suleq igad God ago gamuk alulin gibilensa i giquetil bilaqne faq oy nog iyyaqta haqiy. Naqmo Yesus-mo i gamuk gibilenyaq haqiy.

<sup>33</sup> In nazaq bilaqad kam nabmo in eraqim Jerusalem-ub a muleqim ta lehiy. Lehim in disaipel 11 na giyogniz asor nenaq humab wolim ossa gibiyiy. <sup>34</sup> Gibiysa in bilaq yaqay, Helmo diq haq yaqay. Iyahta tiqeram haq yaqay. Saimon ahol tuwam haq yaqay. <sup>35</sup> Haqsa teq ta giger na danib luwsa daq bunmo giholib gwahtimta na ago agamukan bunmo in tigibileniymo. Ad in bilaqiy, In bret orqayim igta nab i ahol tuwaq has haqiy.

*Disaipel Yesus ahol waqiy*

*(Matyu 28.16-20; Mak 16.14-18; Jon 20.19-23; Aposel 1.6-8)*

<sup>36</sup> Ari in gamuk na bilaqad ossamo Yesus gilikmanib gwahtiqim titur. <sup>37</sup> Tursa in ahol waqad gihol riten lamsa rabad ginad emiy, Ka i mat momta awitan daqag ahol waqauq haqiy. <sup>38</sup> Haqsa Yesus gibilan, Doq tonnan ne gihol riten lamsa ginadnad tiqemay? ham. <sup>39</sup> Ne ya ibensen ahol waqiy ham. Ka yaqmo ham. Ne giben ya isanib emeq iwaz waqiy ham. Mat momta awitan in asan teq aditin kazaq haiqta ham. [ <sup>40</sup> In nazaq gibilenim teq in aben asen tigiqisihun.] <sup>41</sup> Giqisihunan disaipel ginad dimniysa teq in helmo haqgo ginad siqim iysa in ginadnad em yaqay. Sa Yesus gibilan, Ne gigo didaqag usaq e? ham. <sup>42</sup> Haqan in nabiq oyiya asor tuqugiy. <sup>43</sup> Ugan in waqim neqsa in ahol tuwaqiy.

<sup>44</sup> Ahol waqsa Yesus gibilan, Kwaziqmo ya nenaq osad gibilenyaiq ham. God ago maror Moses mar tonta nab ya inanin usaqta haqyaiq ham. Teq God ago nantut kwaziqta na gigo marib in yaqmo inan bilaqiyta haqyaiq ham. Sa Buk Song-ib bar usaqta nab ya ibin usaqtamo haqyaiq ham. Gamuk na bunmo adidaqan teq gwahtiqdaq haqyaiqta ham. <sup>45</sup> Haqad in disaipel na ginad eman hastitayan in God ago mar na ginad tiqem hasiy.

<sup>46</sup> Sa Yesus ta gibilan, God ago marib gamuk kazaq bilam ham. Krai santi-tiy tisorda q haqad in bilam ham. Soreq

kam ezeqmanta nab in hodhodab tiqeraqdaq haqad in bilam ham. <sup>47</sup> Eraqid teq mataw in abin ad leheq on mataw en bunmo tigibilen daqay haqad in bilam ham. Gibileneq in bilaq daqay, Ne Krai anan helmo haqad ginad buliyeq ne gigo daq teq ginad meqinta gileh ugid teq God ne gigo daq meqinta bunmo tigiwalem bugdaq haq daqay haqad in bilam ham. Daq na uliq Jerusalem-ub danmeb gwahtiqeq in og saw bunmo tuwaqdaq haqad in bilam ham. <sup>48</sup> Negmo gime anonabmo daq nagan bunmo ahol

tuwaqim iyan ne awagamun tibilaaq daqay ham. <sup>49</sup> Ne huritiy ham. Ya imam in ago Bugaw Dimunta negnan hel diqmo bilamta na muran ya emid tubol negdaq ham. Ne uliq ayahta kabmo osiy ham. Ossa ulilib zaway na bo ne gimalib tuwoqid teq ne yaqgo kabiy na tiqem daqay ham.

*God Yesus waqim ad Heven-ib tugwalah (Mak 16.19-20; Aposel 1.9-11)*

<sup>50</sup> Ari Yesus in ago disaipel giwaqim nenaq uliq Betaniy-ibmo tilehiy. Lehim in aben giger wazan eraqan in ago disaipel gidimun tonad tigibar ton. <sup>51</sup> Gibar tonsamo God Yesus waqim ad Heven-ib tugwalah. <sup>52</sup> Gwalehsamo disaipel gibakbakan ulum laquwim turad in Yesus abin tiqiluwiy. Abin iluwim huloadmo in muleqim ginad ayahmo dimniysa Jerusalem-ub tilehiy. <sup>53</sup> Lehim osad kam bunmo in Tempel-ib leheq God abin tiqiluw yaqay.

## Jon o Yesus awagamun Jon mar tonta Gamuk ameb lehaqta

Jon in Yesus awagamun dimunta ka mar tonim in kazaq bilam, Yesus in God ago gamuk nog ham. In mat diq iyim i gilikmanib osad in Amam God ago gibilan kamta ham. Jon nazaq haqad in Yesus abin kazaq i giqisihun. Yesus in God atatin diqta. Teq God in mat atowun emim eman on mataw gilumsihnan bolta amatin na Yesusmo. Jon anad on mataw Yesus awagamun ka hurit kemad teq in abin nazaq diqta anan helmo haq daqay haqad in wagam ka mar tonta. In anad am, On mataw Yesus anan helmo haqeq teq in kayeqmo kuluwa-kuluwmo tuqos daqay ham (Jon 20.31 nab ni ahol waq). Na ezaqgo Yesus inmo ahol anan bilam, Ya bilaqne bret dimunta Heven-ib usim hitimta na nog ham. On mataw ya iwaqeq inon neq daqayta na in gitemnan a ta hi moq daqay ham (Jon 6.32-35).

Mataw ezeqman Matyu, Mak teq Luk in gigo wagam mar tonan abeb ulig asor le tihiqyan teq Jon in wagam ka mar ton. Teq Yesus ago gamuk kabemmo mataw ezeqman na a hi mar toniyta na Jon amomo wagam kab mar tonta.

Teq Jon 7.53 nab ni lain araq kazaq hureqan ussa ahol waqdaq. Mataw asor in 7.53-8.11 na anan bilaqay, Jon gamuk na a hi mar ton daqagya haqayta. Naqmo mat araq mar tonta haqayta.

### God ago gamuk in mat diq iyim bo on mataw gilikmanib gwahtiqim os

*God ago Gamuk on mataw giqeman kuluwa-kuluwmo osayta na in mat diqmo iyim og kab gwahtim*

<sup>1</sup> Kwaziq diqmo God ago Gamuk in tuqosta. Gamuk na God ina q osad teq Gamuk na in God-mo. <sup>2</sup> Nagah bunmo og kab a hi gwahtiqsamo mebmemo diq Gamuk na God ina q osta. <sup>3</sup> Gamuk naqmo in nagah bunmo giqamta. Nagah araq diq dante araqab a hi gwahtimta. Haiqqam. <sup>4</sup> Teq on mataw kayeqmo kuluwa-kuluwmo osayta na alulin Gamuk nabmo usaqta. Gamuk na in saw anuwan nog iyad on mataw bunmo gimalib worireqaqta. <sup>5</sup> Teq saw anuwan na romriqab oysa romriq in saw anuwan na a hi wolmiyaqta.

<sup>6</sup> Ari God in mat araq eman bol. In anan Jon haqayta. <sup>7</sup> Jon saw anuwan na anan

bilaq kemnan bolta. In on mataw gibilenid in bunmo saw anuwan na anan helmo haq daqay haqad in bolta. <sup>8</sup> Inmo saw anuwan na a haiqta. Haiqqam. In saw anuwan na anan on mataw gibilenan haqad bolta.

<sup>9</sup> Saw anuwan hel diqta on mataw bunmo gimalib worireqaqta na in og kab tugwahtiqyaq. <sup>10</sup> Gwahtiqadmo in on mataw og kabta gilikmanib tuqos. Inmo nagah bunmo og kab giqeman gwahtiqiyta. Teq on mataw og kabta in mat na ahol waqad in ahol a hi waq hasiy. <sup>11</sup> Mat na asenlulmo diq gigo hib bolta teq in asenlul na baymuzim a hi waziniy. <sup>12</sup> Ari on mataw mat na ahol waq hasim waziniyta na bunmo, mat na in giqeman in God ago onminmo diq tiqiyiy. Na ezaqgo on mataw na in anan helmo haqiyta na ago iyan. <sup>13</sup> Teq on mataw God ago onmin iyiyta na in mataw og kabta gilulib a hi gwahtiqiyta. Teq in og ka ago daqib a hi gwahtiqiyimo. Mataw ginad bilaqsa giqonan amun emayta nazaq in a hi gwahtiqiy. Haiqqam. God-mo in on mataw na giqeman in ago onmin tiqiyiyta.

<sup>14</sup> Ari God ago gamuk na in mat diq iyim i gilikmanib osta. Ossa i in ahol anuwan ahol tuwawta. I in ahol anuwan ahol waqad i bilaqne God atatin amulikmo osa qta naqmo ahol anuwanta ahol waq nog iy. Teq i ahol waqsa in agem dimunta igaqta na teq in gamuk heltaqmo bilaqsaqta na in aholib ate gwalim ussa i ahol tuwaw.

<sup>15</sup> Teq Jon in mat naqmo anan on mataw gibilenad in lileyim kazaq gibilan, Ya mat naqmo anan gibilenad kazaq bilayta ham. Mat ya ibeb boldaqta na in yaqgo danmebta hay ham. Na ezaqgo hay ya a hi gwahtiqsamo in tuqosta na ago iyan haqad ya bilayta ham.

<sup>16</sup> Teq mat nawa Jon anan bilamta na in agem dimunta igad gamuk helta gibilenaqta na aholib ame gwalad usim wazbalim i gimalib woqaqta. Woqsa in aholib daq dimdimunta usaqta na amalib in i bunmo tigidimun tonaq. Gidimun tona i daq dimdimunta na loiyinsa in nagah mebmemo God igta na uriyam bugaq. <sup>17</sup> Na ezaqgo God ago maror in mebmemo igta na Moses abenab bolan i wawta. Ari God agem dimunta igaqta na teq in ago daq helta nagan bunmo Yesus Kraismemo abenab bolta. <sup>18</sup> Mat araq ame anonab God asit ahol a hi wamta. Haiq diqmo. God atatin amulikmo osa qta naqmo in God giqisihunta. Inmo God diqta teq in Amam abuknibmo osa qta. In amomo God eman i gimeb ulal iysa i ahol waqauqta.

*Jon mataw huz negyaqta na in on  
mataw gamuk gibilenaq  
(Matyu 3.1-12; Mak 1.2-8; Luk 3.15-17)*

<sup>19</sup> Ari Juda mataw aseseqta na in mataw tamaz emayta gigo asor teq Liway mataw Tempel-ib kabiy emayta gigo asor giqeman in Jerusalem hulosisim Jon ago hib bolim tisusumun ugiy, Ni nog diq? haqiy. <sup>20</sup> Haqan Jon gibilen kam. Gibilen kemad in ahol alulin na a hi isihyaq. Haiq. In gamuk bilaq sireqimmo kazaq bilam, Ya Krai a haiq ham. <sup>21</sup> Haqan mataw na a ta susumun ugiy, Ta ezaq? haqiy. Luweq ni Elaija idyaq haqiy. An Jon bilam, Haiq ham. Haqan in bilaqiy, Luweq i God ago nantut amen emad osauqta na ninmo idyaq haqiy. Haqan Jon bilam, Na haiqmo ham. <sup>22</sup> Haqan in buloniy, Ni nog? haqiy. I muleqeq ta leheq mataw i giqeman bolta na naga gamukin gibilenam? haqiy. Ta ninmo nihol anan ezaq haqaaq? haqiy. <sup>23</sup> Haqan Jon bilam, Mat aqez saw amatawun haiqtab lileyim bilaqaaq, Ne Iyahta ayon dan wastitayiy haqaaqta na yaqmo kawa ham. *Aisaya 40.3*

Kwaziqmo God ago nantut Aisaya bilamta nazaq ham.

<sup>24</sup> Ari mataw ginan Farisi haqayta naqmo in mataw na giqeman Jon agerab boliyta. <sup>25</sup> An Jon in gigo susumun amenin nazaq eman mataw na buloniy, Ni bilaqaaq, Ya Krai a haiq haqaaq haqiy. Ad ya Elaija a haiqmo haqaaq haqiy. Teq ya God ago nantut na a haiqmo haqaaq haqiy. Nazaq iyan teq ni nagaqmo mataw huz negaaq? haqiy. <sup>26</sup> Haqan Jon amenin emim bilam, Ya mataw yuwibmo huz negaiqta ham. Ari ne gilikmanib mat ara q nawa turaq ham. Teq ne in ago a hi huritayta ham. <sup>27</sup> Mat na ya ibeb nawa bolaqta ham. In abin ya ibin uriyamta ham. Ya in ahaqenibta ham. In yaqgo Iyahta ham. Ya in ago kabibiy mat samanta ham.

<sup>28</sup> Jon yuw Jodan aqurumun kozaq ban uliq anan Betaniy haqayta na agerab luwad mataw huz negsa daq na gwahtimta.

*Yesus in God ago Sipsip Amidon*

<sup>29</sup> Ari tarom iyim saw tihastitayan Yesus Jon ago hib bolsa in ahol tuwam. Ahol waqadmo in on mataw nab turiyta na gibilenim bilam, Ne ahol waqiy ham. God ago Sipsip Amidon\* kawaqmo tubol ham. In teq on mataw og saw bunmo gigo daq meqinta tigiwalemdaq ham. <sup>30</sup> Ya kwaziqmo mat kaqmo anan bilayta ham. Ya bilay, Mat ara q ya ibeb boldaqta na in yaqgo danmebta hay ham. Na ezaqgo hay ya a hi gwahtiqsamo in tuqosta na ago iyan hay ham. <sup>31</sup> Yaqmo in ago a hi huritta ham. Teq ya bolim on mataw huz negaiqta ka alulin in kazaq ham. Ya on

mataw huz negsa mat ko Isrel gimeb ulal idyaq haqad ya kazaq emaiqta ham. <sup>32</sup> Jon nazaq haqad teq in kazaq gibilan, God ago Bugaw Dimunta ah husta nog iyim Heven hulosisim gehitiqim mat ko aholib soqotim ossa ya ahol way ham. <sup>33</sup> Yaqmo in ago a hi huritta ham. Teq mat ya iqeman ya bolim mataw yuwub huz negaiqta na in ya ibilenim bilam, Yaqgo Bugaw Dimunta gehitiqeq mat ara q aholib soqoteq ossa ni ahol waqad teq ni ninad emdaq, Mat God ago Bugaw Dimunta amalib on mataw huz negdaqta na amatin nawaqmo haqdaq haqad in ya ibilan ham. <sup>34</sup> An ya daq na ahol tuway ham. Ahol waqim ya bilaqaaq, Mat ko in God atatin haqaaq ham.

*Yesus disaipel gigermo giwam*

<sup>35</sup> Ari tarom iyim saw tihastitayan Jon ago disaipel giger nenaq saw nab a ta turiy. <sup>36</sup> Tursa Yesus bo lehsa Jon ahol waqad tibilam, Ne ahol waqiy ham. God ago Sipsip Amidon kowaqmo tilehaq ham. <sup>37</sup> Haqan disaipel giger na nazaq huritadmo in Yesus muzim inaq tilehiy. <sup>38</sup> Lehsa Yesus ahol buliyim giger na muzim bolsa gibiyad in gibilan, Ne naga nagunay? ham. An in buloniy, *Rabbi* haqiy ni edob osaaqta? haqiy. (Hibru nanib gamuk 'rabbi' na alulin in 'tisa' haqayta.) <sup>39</sup> An Yesus gibilan, Ne boleq ahol waqiy ham. Haqan giger na lehim Yesus ago bit in osaaqta na ahol tuwaaqiy. Ahol waqad luwsa in 4 kilok imisor nazaq iysa iyan in Yesus inaq tuqosiy.

<sup>40</sup> Mataw giger Jon ago nan huritim Yesus muzim inaq lehiyta na gigo ara q na anan Andru haqayta. In abab anan Saimon Pita. <sup>41</sup> Abab Andru muleqim ta bolim iturimmo in le abab Saimon nagunim ahol waqadmo tubulon, I Mesaya ahol tuwaw ham. (Hibru nanib gamuk 'Mesaya' na alulin in 'Krais'† haqayta.) <sup>42</sup> Andru nazaq bilaqim teq in Saimon waqim ad Yesus ago hib tilah. A lehan Yesus in Saimon ahol waqad bulon, Ni Jon atatin Saimon ham. Abab ni ninan Sifas haqad biy daqay ham. (Hibru nanib gamuk Sifas haqayta na alulin in 'Pita' haqayta.)

*Yesus Filip ayow Nataniyel inaq gillewun*

<sup>43</sup> Ari tarom iyim saw tihastitayan Yesus saw Galiliy-ib lehgo anad tiqam. Anad emim in lehadmo mat ara q anan Filip haqayta na ahol waqim tubulon, Ni ya imuzeq bol ham. <sup>44</sup> Filip in uliq Betsaida-ibta. Uliq na in Andru abab Pita inaq gigo uliqta. <sup>45</sup> Ari Yesus nazaq Filip bulonan in eraqim le mat ara q anan Nataniyel haqayta nagunim ahol waqad tubulon, Moses in God ago maror agamukan aduganib mat

\* **1:29:** † **1:41:** Gamuk 'Krais' ka alulin in kazaq: "God mat emid bo i gilumsihdaqta na amatin" haqayta.

ananin mar tonta na amatin gwahtiƙan i ahol tuwaw ham. I ginad emauƙ, God ago nantut kwaziqmo mat ananin mar toniyta amatin nawaqmo tubol haƙauƙ ham. Na in Josep atatin Yesu uliƙ Nasaret-ibta ham. <sup>46</sup> Haƙan Nataniyel bilam, Uliƙ Nasaret abin meƙinta ham. Daƙ araƙ dimunta nazaƙ uliƙ nab a hi gwahtiƙdaƙ daƙag ham. Haƙan Filip bilam, Nab iysa ni bo ahol waƙ ham.

<sup>47</sup> Ari Yesu in Nataniyel bolsa ahol waƙadmo in anan bilam, Mat ko ahol waƙiy ham. Ko Isrel gigo mat diƙmo araƙ ham. In aholib nan katiya araƙ a hi usaƙta ham. <sup>48</sup> Haƙan Nataniyel tisusumun ug, Ni ezaƙ tonim yaƙgo tuhurit? ham. Haƙan Yesu amenin emim bilam, Filip a hi nililewunsa ni ay fik ahaƙenib ossa ya nibiyta ham. <sup>49</sup> Haƙanmo Nataniyel bilam, Tisa ham ni God atatin ham. Ni Isrel gigo king ham. <sup>50</sup> Haƙan Yesu bilam, Ya bilay, Ni ay fik ahaƙenib ossa ya nibiy hayta na ago ni ya inan helmo haƙaq e? ham. Na in nagaƙ amik ham. Teƙ ni yaƙgo daƙ aseseqta tigibiydaƙ ham. <sup>51</sup> Haƙad in bulon, Ya helmo nibilenaik ham. Abeb kait misireƙ nog iyeƙ aƙez hasa angelo asor Mat Atatin ago hib gewoƙad Heven-ib gwalehsa ni tigibiydaƙ ham.

## **Yesu in ahol abin teƙ in ago zaway emid ulal iygo haƙad in daƙ azawayin inaƙta giƙemyaƙ**

### **2**

*Yesu yuw diƙ buliyan wain ayun iy*

<sup>1</sup> Ari kam gigermo tihikiyan ezeƙmanta nab saw Galiliy-ib uliƙ araƙ anan Kana haƙayta nab mat araƙ awe inaƙ an waƙsa ahumabun tuwoliy. Sa Yesu anen humab nab os. <sup>2</sup> Ossa mataw nabta na in Yesu ago disaipel nenaƙ gimem nan eman in humab nab bolim osiymo. <sup>3</sup> Ossa mataw wain ayun uluw bugan tihikiy. Hiƙiyan Yesu anen lehim atatin tubulon, Mataw gigo wain ayun tihikiy bug ham. <sup>4</sup> Haƙan Yesu amenin emim bulon, Kanen ham ya inad usaƙ nazaƙ nogmo ni ninad a hi usaƙ ham. Ya ihol ulal tondaikta akaman teƙmo ham. <sup>5</sup> Haƙan anen in kabibiy mataw nab turiya na gibilan, Ya itatin ezaƙ gibilenid ne emmo emiy ham.

<sup>6</sup> Ari bit nab reb giƙib sisoƙiyta aseseqta 6 nazaƙ girturta. Reb na mataw yuw soƙoreƙ a bo gitenid ussa teƙ in Juda gigo gunun muzinad huz yaƙayta arebun. Reb na amulik-mulikmo aduganib yuw ayahmo 100 lita nazaƙ tenid osyaƙta.

<sup>7</sup> Ari Yesu in kabibiy mataw asor gibilenim bilam, Reb ko bunmo yuw soƙoreƙ a boleƙ gitenid ame gwal bugan ham. Haƙan mataw na le yuw soƙorim a bolim reb na gitenan amemo gwal bug. <sup>8</sup> An in gibilan, Ari ne yuw teniya na asor reb amiktab soƙoreƙ a leheƙ mat didaƙ wamuzaƙta na ugiy ham. Haƙan kabibiy mataw yuw na asor soƙorim a lehim mat didaƙ wamuzaƙta na tuƙugiy. <sup>9</sup> Ugan in uluw waƙan yuw diƙ na in wain ayunmo tiƙiy. Teƙ in wain ayun na edob waƙiyta na ago in a hi hurit. Kabibiy mataw yuw soƙoriya naƙmo huritiya. Nazaƙ iyan mat didaƙ wamuzaƙta na in mat aw waƙaƙta na bulonan agerab tubol. <sup>10</sup> Bolan in bulon, Mataw bunmo iturimmo gigo mareren wain ayun dimunta negan uluwayta ham. Uluwim in ginad dimunta hulosa nog iysa teƙ in wain agon inaƙta negan uluwayta ham. Ta ni nazaƙ a hi amta ham. Wain meƙinta tuƙuluw bugan teƙ ni wain ayun dimun diƙta ka abeb a bol ham.

<sup>11</sup> Na kam ameb diƙta Yesu daƙ azawayin inaƙta am. In uliƙ Kana-ib saw Galiliy-ibta nab daƙ na amta. Emim in ahol abin ulileman usta na tuƙulal ton. Ulal tonan in ago disaipel ahol waƙad anan helmo tihikiy.

<sup>12</sup> Ari daƙ na tihikiyan Yesu in anen teƙ in amagniz teƙ in ago disaipel nenaƙ uliƙ Kapaneam-ub tuwolehiy. Wolehim in uliƙ nab kam asor tuƙosiy.

*Mataw Tempel-ib mani akabiyan emsa Yesu gimuzan asan ban gwahtiƙiy (Matyu 21.12-13; Mak 11.15-17; Luk 19.45-46)*

<sup>13</sup> Ari Juda gigo lotu akaman ayahta anan Pasova haƙay na bolim sinsin tiƙiysamo Yesu uliƙ Kapaneam hulosa Jerusalem-ub tugwalah. <sup>14</sup> Gwalehim in Tempel ago gel aduganib mataw bulmakau teƙ sipsip teƙ ah\* gizayad amenin waƙad ossa in tigibiy. Ad mataw saw haresmo gigo mani waƙad amenin Tempel ago mani negayta na in gigo kabiy emad ossa Yesu tigibiyto. <sup>15</sup> Gibiyad in yuk abatan asor giwaƙim tuƙ tonim in mataw na gigo bulmakau teƙ sipsip bunmo ginolad gimuzan le Tempel hulosa gel asan ban tugwahtiƙ yaƙay. Gwahtiƙsa in mataw mani akabiyan emad osiyta na gigo mani wazbalan woƙsa gigo ban inaƙmo wazim tuwazbilbalmo. <sup>16</sup> Ad in mataw ah gizayad osiyta na gibilan, Ne nagaƙ na bunmo giwaƙeƙ asanib a lehiy ham. Ne ya imam ago bit emid in maket abitan nog hi iyan ham. <sup>17</sup> Haƙsa in ago disaipel gamuk araƙ God ago marib usaƙta na anadin tiƙemiy. Gamuk na bilam,

\* 2:14: Karuw nagan in God ayon tamaz emgo gizay yaƙayta.

Ya ningo bit ka inad diq ugsa ananin bilaqaiq ham. *Buk Song 9,9*

<sup>18</sup> Ta teq Juda mataw aseseqta asor daq na ahol waqad in Yesus buloniy, Ni naga daqin azawayin inaqta giqisihunid i ahol waqad ginad emam, Ni daq kazaq emgo ni nibin inaq haqam? haqiy. <sup>19</sup> Haqan Yesus gibilan, Ne Tempel ka wol inerid kam ezeqmanmo aduganib ya wazid a ta eraqdaq ham. <sup>20</sup> Haqanmo Juda mataw aseseqta na bilaqiy, Ulig 46 nazaq aduganib mataw Tempel ka wazan eraqsa teq kabiya a hi hiqiyaq haqiy. Ta ni kam ezeqmanmo aduganib wazid a ta eraqdaq e? haqiy. <sup>21</sup> Naqmo Yesus inmo ahol anan bilaqad in bilam, Tempel ham. <sup>22</sup> Nazaq iyan abeb Yesus hodhod hulosis ta eramta nab in ago disaipel gamuk nawa in bilamta na anadin tiqemiy. Anadin emad in God ago gamuk anan helmo haqad teq in Yesus ago gamuk na anan helmo tihaqiyimo.

*Yesus mataw bunmo gigo huritta*

<sup>23</sup> Ari Yesus uliq Jerusalem-ub Pasova ago ahumabun ayahta nab osad in daq azawayin inaqta emsa on mataw kabemmo ahol waq yaqay. Ahol waqad in Yesus anan helmo tihaq yaqay. <sup>24</sup> Ta teq Yesus in mataw na ginan helmo a hi haqyaq. Ad inmo ahol mataw na giholib a hi emyaqmo. Na ezaqgo in mataw bunmo gigo tuhurit bugta. <sup>25</sup> Teq mat ara q Yesus bulonan teq in mataw na gigo huritta nazaq a haiq. Haiqgam. Inmo anadibmo mataw bunmo gimugan ezaq usaqta na ago in tuhurit bugta.

### 3

*Yesus Nikodemus inaq gamuk bilam*

<sup>1</sup> Ari Farisi ara q anan Nikodemus haqayta in osyaq. Mat na in Juda gigo mat marorta ara q. <sup>2</sup> In taromab bolim Yesus tubulon, Tisa ham i ningo tuhurit ham. God ni ninaq osa qta ham. In ninaq a hi osid teq ni daq azawayin inaq emaqta nagan a hi em nag ham. Nazaq iyan i ginad emauq, God-mo niqeman ni bolim i suleq igaqta haqauq ham. <sup>3</sup> Haqan Yesus amenin emim bilam, Ya helmo nibilena iq ham. Mat aw nog in zaway ulilibta na amalib gime gigerta mutur a ta hi gwahtiqeq in God ago maror aduganib le a hi gwahtiq daqay ham.

<sup>4</sup> Haqan Nikodemus bilam, Mat nenqab tiqiyta ezaq toneq ame gigerta mutur a ta gwahtiqdaq? ham. In anen agemab a ta lehid anen a ta emdaq e? ham. <sup>5</sup> Haqan Yesus bilam, Ya helmo nibilena iq ham. On mataw yuw teq God ago Bugaw ago zaway gimalib mutur a hi iyeq in God ago maror aduganib le a hi gwahtiq daqay

ham. <sup>6</sup> On mataw og kabta in onmin in gimo gihol nogta giqemayta ham. Sa God ago Bugaw in onmin inmo nogta giqemaqta ham. <sup>7</sup> Ya nibilenim bilay, Ni zaway ulilibta na amalib nime gigerta mutur a ta hi gwahtiqeq ni God ago maror aduganib le a hi gwahtiqdaq hayta na ago ni ninadnad hi em ham. <sup>8</sup> Tim anadibmo saw bunmo lehaqta ham. Lehsa ni ahulanmo huritaqta ham. Huritad in ezaq bolta na teq in ezaq lehaqta na ago ni a hi huritaqta ham. Ari God ago Bugaw bolim mataw giqeman gimugan mutur iyayta na in nazaqmo ham.

<sup>9</sup> Haqan Nikodemus bilam, Daq nazaqta na ezaq teq i giholib gwahtiqdaq? ham. <sup>10</sup> An Yesus bulon, Na ta ezaq? ham. Ni Isrel gigo tisa ara q ham. Ezaq tonim ni nagah ka ago ninad a hi em hasaq? ham. <sup>11</sup> Ya helmo nibilena iq ham. I nagah ginad tiqem hasta naqmo agamukan bilaqauq ham. Bilaqad i nagah gimeb ahol tuwawta naqmo ago i ne gibilena uq ham. Teq ne i gigo gamuk na gileh ugayta ham. <sup>12</sup> Ya nagah og kabta ago gibilensa ne anan helmo a hi haqayta ham. Ta ezaq teq ya nagah Heven-ibta na ago gibilenid ne anan helmo haq daqay? ham. <sup>13</sup> Mat ara q Heven-ib a hi gwalahta ham. Haiq ham. Mat Atatin Heven hulosis hitimta naqmo amomo Heven ahol wamta ham.

<sup>14</sup> Teq Moses kwaziqmo saw samantab nagah ahulinaqta adulan wazan eramta nazaqmo mataw in Mat Atatin wazid eraqeq titurdaqmo ham. <sup>15</sup> Eraqeq tursa teq on mataw in ahol waqad anan helmo haq daqayta na bunmo in kayeqmo kuluwakuwuwo tuqos daqay ham.

<sup>16</sup> Ari God in on mataw og saw bunmo ginan anad bilaqsa iyan in atatin amulikmo osta na tinag. In atatin negid mat aw nog atatin na anan helmo haq daqayta na bunmo a hi moq hasad in kayeqmo tuteqmo tuqos daqay haqad in nazaq amta. <sup>17</sup> Na ezaqgo in atatin on mataw gilum kemeq giyon bilaqid moq daqay haqad in eman og kab a hi bol. Haiqgam. In anad am, Ya itatin leheq on mataw gimen dante wastitayid ya gilumsiheq giwaqid a hi moq daqay haqad in atatin eman bolta. <sup>18</sup> Nazaq iyan on mataw God atatin anan helmo haqayta na bunmo in God ameb dimunmo osayta. God in giyon bilaqan in moq hasgo a hi osayta. Ari on mataw God atatin anan helmo a hi haqayta na God in giyon tibilaqan in moq hasgo tiqiyim osayta. Na ezaqgo in God atatin amulik na anan helmo a hi haqayta na ago iyan. <sup>19</sup> Teq God on mataw gilum kemim gigo daq amenin negaqta na alulin in kazaq. Saw anuwan og kab tugwahtim. Gwahtiqan teq on mataw saw anuwan na anan ginad a hi bilam. Haiqgam. On mataw na gigo daq

bunmo meqin iyim iyan in romriqmo anan ginad bilam. <sup>20</sup> Na ezaqgo on mataw daq meqinta emayta na in saw anuwan anan ginad a hi bilaqsa in saw anuwanib a hi gwahtiqayta, luweq in gigo daq meqinta nagan ulal iydaq haqad. <sup>21</sup> Ari on mataw daq helta emayta na in saw anuwan ahol waqad bolayta. In God anad muzinim daq emayta nagan ulal iydaq haqad in saw anuwanib nab bo tugwahtiqayta.\*

*Jon mataw huz negyaqta na in Yesus anan bilaq siram*

<sup>22</sup> Ari daq na tihiqiyani Yesus ago disaipel nenaq saw Judiya gigo og araqaq tilehiy. Lehim in saw nab luw osad teq in on mataw tuhuz negyaq. <sup>23-24</sup> Sa Jon saw nagab on mataw tuhuz negyaqmo. Saw anan Ainon haqayta saw Selim agerab usaqta nab yuw ame ayahta usaqta iyan Jon nab luwyaqta. Kam nab Jon a hi irqursamo on mataw kabemmo bolsa in tuhuz negyaq.

<sup>25</sup> Teq Jon ago disaipel asor in Juda mat araq inaq an tumug yaqay. Na in Juda gigo daq araq in gihol huz ugim God ameb gihol abusirinan hiqiyayta na ago ananin bilaqad an mug yaqay. <sup>26</sup> Ad teq in bunmo Jon ago hib bolim tubuloni, Tisa haqiy, Mat ni ninaq yuw Jodan aqurumun kozoq ban ossa ni anan bilamta na in on mataw tuhuz negyaqmo haqiy. Sa on mataw bunmo inmo ago hib tilehay haqiy. <sup>27</sup> Haqan Jon gibilan, God mat abenab kabiy amta naqmo amomo in tiqemdaqta ham. <sup>28</sup> Ya kwaziqmo ne gibilenim bilay, Ya Kraisa a haiq hay ham. God ya iqeman ya Kraisa ago danneb bolta haqad ya bilay ham. Ya nazaq bilaqsa ne tuhuritiy ham. <sup>29</sup> Mat aw wamta naqmo in aw na aduw diq ham. Teq mat na ayow in adek emim turad in ayow aw wamta na aqez huritad in anad ayahmo dimniyaq ham. Nazaq iyan muran ya inad tidimniy hasaq ham. <sup>30</sup> Mat ko abin ayah tiqiydaq ham. Sa ya ibin amik iydaq ham.

<sup>31</sup> Ari Mat ulilib osim bolta naqmo in nagah bunmo gigo Iyahta iyim osaqta. Teq mat abe alulin og kab usaqta na in og kabta iyim iyan in og kaqmo ago nagahta anan bilaqsa. Ari mat Heven-ib osim bolta na in nagah bunmo gigo Iyahta iyim osaqta. <sup>32</sup> Osad in nagah ameb ahol wamta na teq in gamuk huritta naqmo in i gibilenaqta. Ta teq mataw in ago gamuk na anan helmo a hi haqayta. <sup>33</sup> Ari on mataw in ago gamuk huritim anan helmo haqayta na in kazaq i gibilenay. God gamuk heltaqmo bilaqsa haqay. <sup>34</sup> Na ezaqgo God in ago

Bugaw Dimunta ayahmo mat na ugim teq in eman bolim in God ago gamukmo diq bilaqsa. <sup>35</sup> Amam in atatin na anan anad diq bilaqsa in zaway bunmo atatin abenab tiqam. <sup>36</sup> Nazaq iyan on mataw God atatin anan helmo haqayta na in kayeqmo kuluwa-kuluwmo tuqos daqay. Ari mat God atatin ago gamuk othasaqta na in kayeqmo kuluwa-kuluwmo a hi osdaq. Haiqgam. God in mat naqanta agem meqinta ugsa in osaqta.†

## 4

*Yesus saw Samariya-ib aw araq inaq gamuk bilam*

<sup>1-3</sup> Ari Farisi gamuk kazaq huritiy. Yesus mataw kabemmo yuwub gihuz negsa in ago disaipel tiqiyay haqiy. Sa Jon haiqgam haqiy. (Teq Yesus-mo mataw a hi gihuz negyaqta. Haiqgam. In ago disaipel naqmo mataw gihuz neg yaqayta.) Ari Yesus anad am, Mataw kabemmo yaqgo disaipel tiqiyiyta na ago Farisi tuhuritiy ham. Haqad in saw Judiya na huloadmo in muleqim saw Galiliy-ib ta lah. <sup>4</sup> Lehad dan in lehyaqta na saw Samariya-ib gwahtiqim lahta. <sup>5</sup> Nazaq iyan in dan na muzim lehim in Samariya gigo uliq araq anan Sikar haqayta na agerab tugwahtim. Uliq na in Jakob atatin Josep og ugta na agerab usaqta. <sup>6</sup> Teq saw nab yay araq kwaziqmo Jakob yuw waqgo haqad yay tayta in nab usaqta. Sa Yesus bolad luwim zeq ayahtab 12 kilok nazaq tiqiyani in yuw yayibta nab gwahtiqim ahol husisiqsa anamur emad tuqos.

<sup>7</sup> Ossa Samariya aw araq yuw soqornan tubol. Bolan Yesus bulonim bilam, Yuw soqoreq asitmo yagid uluwig ham. <sup>8</sup> (Na Yesus ago disaipel bunmo uliq Sikar-ib didaq zaynan tilehiy.) <sup>9</sup> Ari in bilam, Yuw yag uluwig haqan Samariya aw na bulon, Ni Juda mat araq ham. Sa ya Samariya-ib awta ham. Ta ezaqgo ni bilaqsa, Yuw asit yagid ya uluwig haqay? ham. (Na ezaqgo Juda in Samariya nenaq an gihar ugad in garab a hi luw osayta iyan aw na nazaq bilam.) <sup>10</sup> In nazaq haqan Yesus amenim emim bilam, Ni God ago naw na ago a hi hurit kemaq ham. Teq mat kawa yuw uluwgo susumun nigaqta ka ago ni ninad a hi em hasaqmo ham. Ni nagah giger na ago huritta iyeq teq ni susumun ugid in yuw dimunta tutimmo gwahtiqad usaqta na nigid ni tuquluw nag ham.

<sup>11</sup> In nazaq haqan aw na bulon, Mat Iyah ham, ni nagah araq amalib yuw soqoreq yagdaqta na haiqgam ham. Ta yay ka sisaq

\* **3:21:** Mataw kabemmo ginad emay, Gamuk ka in Yesus aqez a haiq haqayta. Ka Jon-mo gamuk amta haqayta.

† **3:36:** Mataw kabemmo ginad emay, Gamuk ka in Jon wagam mar tonta naqmo aqez usaqta haqayta. Ka Jon mataw huz negyaqta gamuk bilamta a haiq haqayta.

diqmo ham. Ni yuw dimunta tutimmo gwahtiqađ usaqta na edob wađdađ? ham. <sup>12</sup> I gises Jakob-mo yuw yayibta ka tay igta ham. Ad inmo ago onmin teq ago sipsip, bulmakau nenaqmo in yuw ka uluw yaqayta ham. Ta teq ni in uriyamađ e? ham.

<sup>13</sup> Haqan Yesus amenin emim bulon, Mataw yuw yayibta ka uluwim teq in yuwnan a ta moqayta ham. <sup>14</sup> Ari mat aw nog in yaqgo yuw ya negdaiqta na uluweq in yuwnan a ta hi moq daqay ham. Haiqgam ham. Ya yuw negdaiqta na in bilaqne yuw og aduganib tutimmo gwahtiqađta nazađ nog in giholib usdađ ham. Yuw na mataw giduganib useq gwahtiqađ giqemsa in kuluwa-kuluwmo tuqos daqay ham. <sup>15</sup> Haqan aw na bulon, Mat Iyah ham, ni yuw na yagid uluwiq ham. Uluweq teq abeb ya yuwnan a ta hi moqad ya yuw soqornan kab a ta hi boldaiq ham.

<sup>16</sup> Haqan Yesus bulon, Ni le niduw buloneq inaq kab muleqeq ta boliy ham. <sup>17</sup> Haqan aw na amenin emim bilam, Ya iduw haiqta ham. An Yesus bulon, Ni bilam, Ya iduw haiq hamta na ni dimunmo bilam ham. <sup>18</sup> Kwaziqmo ni mataw abaynagin nazađ giwamta ham. Giwaqim teq ta mat muran ni inaq osaqta na in ni niduw diqta haq ham. Ningo gamuk na in hel diqtaqmo ham.

<sup>19</sup> Haqan aw na bilam, Mat Iyah ham, muran ya ningo tuhurit ham. Ni God ago nantut arađ ham. <sup>20</sup> I gisesan kwaziqmo garah kabmo humab woleq lotu em yaqayta ham. Ta teq ne Juda bilaqay, Uliq mataw lotu em daqayta na Jerusalemo haqayta ham. <sup>21</sup> An Yesus bulon, Neng ham ya heltaqmo nibilenaq ham. Abeb ne garah kab Gimam Iyahta ayon lotu a ta hi em daqay ham. Ad ne Jerusalemo leheq lotu a hi em daqaymo ham. Kam na tugwahtiqađn tonađ ham. <sup>22</sup> Ne on mataw Samariya-ibta, ne nog diq ayon lotu emayta na ago ne ginad a hi em hasayta ham. Ari i Juda on mataw God ayon lotu emgo i ginad em hasauqta ham. Na ezaqgo ham God in on mataw gilumsiheq ta giwaqnan haqad in kabiy na alulin i Juda gigo hib eman gwahtimta ham.

<sup>23</sup> Abeb on mataw Gimam Iyah ayon lotu hel diqta tiqemnan haqad teq in God ago Bugaw Dimunta ago hib zaway waqeq dađ helta amalib lotu tiqem daqay ham. In nazaqmo Gimam Iyah ayon lotu emsa in ginan anad tibiladaqta ham. Kam na gwahtiqađn tonad teq in tugwahtimta nog tiqiyaq ham. <sup>24</sup> God in bugawta ham. Nazađ iyan mataw in ayon lotu emnan

haqad in ago Bugaw Dimunta ago hib zaway waqeq teq in dađ helta amalib lotu tiqem daqay ham. <sup>25</sup> Haqan aw na bulon, Mesaya\* teq boldaqta na ago ya tuhurit ham. Mataw in anan Krai haqayta na ham. In boleq negah bunmo ago i tigibilendađ ham. <sup>26</sup> Haqan Yesus bilam, Mat naqmo kawa ni ninađ gamuk tibiladađ ham. Na yaqmo ham.

<sup>27</sup> In nazađ bilaqsa ago disaipel didaq zanynan lehiyta na muleqim ta boliy. Bolimmo Yesus aw na inaq gamuk bilaqsa in gibiyad ginadnad tiqem yaqay. Ta teq in Yesus susumun ugim bilaqiy, "Aw ka naga waqnan?" teq "Nagaqgo ni aw ka inaq gamuk emaq?" nazađ in a hi susumun ugiy.

<sup>28-29</sup> Ari aw na in ago yuqsan nab hulosan ussamo in muleqim aquliqab tilah. Lehim in mataw tigibilan, Ne bo leheq mat ko ahol waqiy ham. Ya kwaziqmo dađ giqemta nagan bunmo ago in ya tiqibilen bug ham. Luweq mat na in Krai-mo iydađ ham. <sup>30</sup> Haqan mataw bunmo era uliq na hulosađmo in Yesus ahol waqnan ago hib tilehiy.

<sup>31</sup> Ari aw na le ago walmataw gibilenad luwsa disaipel Yesus buloniy, Tisa haqiy ni didaq ka arađ neq haqiy. <sup>32</sup> Haqan Yesus gibilan, Yaqgo didaq inaq ham. Teq ne yaqgo didaq na ago ginad a hi em hasay ham. <sup>33</sup> In nazađ haqan disaipel an bulonim bilaqiy, Nabag mat arađ in ayon didaq a bolim tuqog daqagya haqiy. <sup>34</sup> Haqan Yesus gibilan, Yaqgo didaq na in kazađ ham. Ya mat iqeman bolta na anad muzad ago kabiy emid hiqiy bugdaqta naqmo in yaqgo didaqta ham.

<sup>35</sup> Ne bilaqay, Didađ kabiyab teqmo zil-imađ haqay ham. Kalam aweweqmo hiqiyid teq i tayam haqay ham. Ta teq yaqmo kazađ gibilendaq ham. Ne gime rireqeq saw ahol wađ kemiy haqiy ham. Didađ kabiyab tizilim bugim usađ ham. <sup>36</sup> Mat didaq anon tayaqta na in kabiy emad anawun waqayta ham. Teq in didaq anon ginuwan osayta na dimunmo kuluwa-kuluwmo tuqos daqay ham. Ossa mat didaq layta na teq mat didaq tayta na in giger gigo kabiy anon na gibiyad in arađimmo ginad dimniysa osayta ham. <sup>37</sup> Nazađ iyan gamuk arađ mataw bilaqad luwayta na in heltaqmo ham. In bilaqay, Mat arađ didaq leyaqta haqay ham. Leyan ta mat arađ bolim didaq na tayaqta haqay ham. <sup>38</sup> Ya ne giqeman ne didaq anon gitaynan lehiyta ham. Didađ na ne akabiyan a hi emiyta ham. Haiqgam ham. Mataw ta asor kwaziqmo didaq na akabiyan tiqemiyta ham. Eman ne mataw na

\* 4:25: Ni Jon 1.41 nab teq gamuk 'Mesaya' ka alulin ahol wađdađ.



gigo kabiy ahaqenib lehim ne in gigo kabiy asor tiqemaymo ham.

<sup>39</sup> Ari aw na bilam, Mat na yaqgo daq bunmo ya emad luwta na ago tiqibilen bug ham. Haqsa Samariya on mataw uliq nab osiyta na kabemmo in aw na ago gamuk huritim Yesus anan helmo tihaqiy. <sup>40</sup> Haqad in Yesus ago hib lehim in ne-naq osgo haqad buloniy. Bulonan Yesus uliq nab kam gigermo a ta os. <sup>41</sup> Ossa mataw kabemmo Yesus ago gamuk huritad in helmo diq tihaq yaqay. <sup>42</sup> Haqad in aw na bulon yaqay, Mebmebmo ninmo mat ka ago gamuk huritim a bolim gibilenan i huritim anan helmo hawta haq yaqay. Ari muran igmo diq in ago gamuk huritim i in ago tuhurit kemauq haq yaqay. Hurit kemad i ginad emauq, Mat on mataw bunmo gilumsiheq gimen dante emdaqta na amatin diq kawaqmo tubol haqauq haq yaqay.

*Yesus maror araq ago amun aholib moq usta na wastitayan dimniy*

<sup>43</sup> Ari Yesus Samariya on mataw na ne-naq kam gigermo osim tihiqiyan in uliq na huloadmo saw Galiliy-ib tilah. <sup>44</sup> (Na ezaqgo Yesus inmo tekomo tibilam, God ago nantut ago uliqabmo diq in ahol abin haiqta hamta na ago.) <sup>45</sup> Ari in le saw Galiliy-ib tugwahtiyan Galiliy-ib mataw na Yesus ahol waqad in gigem dimunta ugad tuwaziniy. Mataw na Jerusalem-ub Pasova ahumabun ayahta nab lehim in Yesus kabiy daq bunmo emsa ahol waqiyta. Nazaq iyan Yesus in gigo hib bolan in ginad tidimniyyiy.

<sup>46</sup> Sa teq Yesus eraqim le uliq Kana saw Galiliy-ibta nab a ta gwahtim. Uliq nabmo in yuw diq buliyan wain ayun iyta. Ari kam nab king ago gavman mat araq uliq Kapaneam-ub os. Ossa in ago amun malla araq moqad us. <sup>47</sup> Ussa mat na Yesus saw Judiya hulosisim saw Galiliy-ib bolta na ago huritim in Yesus ago hib tilah. Lehim in Yesus waqeq inaq Kapaneam-ub leheq ago amun wastitaygo haqad tubulunyaq. Na ezaqgo in ago amun tumoqnan diq tonyaqta na ago iyan. <sup>48</sup> Sa Yesus bulon, Ne daq azawayin inaqta amo amo ahol a hi waqeq ne ya inan helmo a hi haq daqay ham. <sup>49</sup> Haqan mat marorta na bilam, Iyahta ham ni hidmo gewoq ham. Luweq yaqgo amun moqdaq ham. <sup>50</sup> Haqan Yesus bulon, Ni muleqeq ta leh ham. Ningo amun kayeqmo dimunmo osaq ham. Haqan maror na Yesus ago gamuk anan helmo haqadmo in muleqim tilah. <sup>51</sup> Leahad in ago uliqab le a hi gwahtiqsamo ago kabibiy mataw bolim danib ahol waqadmo buloniy, Ningo amun kayeqmo dimunmo osaq haqiy. <sup>52</sup> Haqan mat marorta na

tisusumun nag, Zeq adulan ganim diqtab amun ahol hastitay nog iy? ham. Haqan in bilaqiy, Irimo zeq ayahtab wan kilok nazaq asan afanfan iyyaqta na ahol tiyuh haqiy. <sup>53</sup> Haqan amun na amam anad tiqam, Irimo zeq adulan nabmo diq Yesus bilam, Ningo amun kayeqmo dimunmo osaq haqad in bilamta ham. Haqad in Yesus anan helmo tiham. Haqsamo ago on mataw in inaq osiyta na bunmo Yesus anan helmo tihaqiyimo.

<sup>54</sup> Na Yesus in saw Judiya hulosisim bo saw Galiliy-ib osad in daq azawayin inaq ame gigerta amta.

## **Yesus in ago kabiy emad teq in Juda gigo lotu akaman aseseqta nagab on mataw suleq negyaq**

### **5**

*Yesus mat araq yuw akurorqanta anan Betesda haqayta aqurumnib wastitayan dimniy*

<sup>1</sup> Daq na abeb Juda gigo lotu akaman araq ayahta tugwahtim. Gwahtiyan Yesus uliq Jerusalem-ub tugwalah.

<sup>2</sup> Teq uliq Jerusalem agelin ago dan ez araq anan Sipsip Gigo Dan Ez haqayta na agerab yuw akurorqanta araq usaqta. Hibru nanib in yuw na anan Betesda haqayta. Teq yuw na aqurumnib baybay abaynagin nazaqmo turyaqta. <sup>3</sup> Baybay nagab mataw gigo moq inaqta kabemmo gime haiqta teq gisen meqinta teq gibensen tumomta nagan in nab os yaqayta. [ <sup>4</sup> Ossa Iyahta ago angelo boleq yuw na amalib hitiqeq yuw baysa ahol wolyaqta. Ahol wolsa mat nog danneb yuw nab hitiqeq huzad teq inmo amomo ago moq hiqiysa in ahol tidimniyyaqta.]

<sup>5</sup> Teq mat araq ago moq ulig 38 nazaqmo aholib usta in nab tuqos. <sup>6</sup> Ossa Yesus bolim mat na ahol waqad anad tiqam, Mat ka kam sisaqmo diq moqad osta ham. Haqad in bulon, Ni nihol dimniyan ninad bilaqay e? ham. <sup>7</sup> Haqan mat moqtaqta na bilam, Mat ayah ham yuw ahol wolsa mat araq hidmo ya iwaqeq iqad yuwub hitiqdaqta na haiqgam ham. Nazaq iyan ya kiskismo tiqad luwsamo mat araq iquriyamim hidmo le danneb yuwub hitiqtaqta ham. <sup>8</sup> Haqan Yesus bulon, Ni eraqeq ningo us ban soreq a leh ham. <sup>9</sup> Haqan muran diq nawaqmo mat na ahol tidimniyan in era ago us ban sorim ad tilah.

Ari kam na in Juda gigo lotu akaman. <sup>10</sup> Nazaq iyan mat ahol dimniyta na ago us ban sorim ad tilehsa Juda mataw aseseqta asor tubuloniy, Muran i gigo lotu akaman haqiy. Nagaqgo ni ningo us ban na sorim

a lehaq? haqiy. Ni kam ka ago gunun tiqitiyonaq haqiy.

<sup>11</sup> Haqan mat na amenin emim bilam, Mat ya ihol wastitayan dimniyta naqmo ibilenim bilam, Ningo us ban soreq a leh haqad in bilam ham. <sup>12</sup> Haqan Juda mataw na tisuusun uguy, Mat ni nibilenim bilam, Ningo us ban soreq a leh hamta na nog diq? haqiy. <sup>13</sup> Haqan mat ahol dimniyta na in nog diq dimun tonta na a hi hurit. Na ezaqgo mataw kabemmo nab tursa Yesus daq na tiqemimmo in gilikmanib gwahtiqad tilahta na ago iyan.

<sup>14</sup> Abeb Yesus mat na Tempel-ib ossa ahol waqad bulon, Ahol waq ham. Ni nihol tidimniy ham. Muran ni daq meqinta araq ta hi em ham. Luweq daq ta araq meqin diqta niholib gwahtiqdaq ham. <sup>15</sup> An mat na lehim in Juda mataw aseseqta na gibilenim bilam, Mat ya iwastitayta na in Yesus-mo ham.

<sup>16</sup> In nazaq haqan Juda mataw aseseqta na Yesus muzad luwad in wadad nan tuqug yaqay. Na ezaqgo Yesus in Juda gigo lotu akamnib daq nazaqta emyaqta na ago iyan. <sup>17</sup> Sa Yesus gibilan, Ya imam kam bunmo kabiy emim emim bo muran kawa in tiqem tutaq ham. Emsa ya inaqmo kabiy tiqemaiqmo ham. <sup>18</sup> In nazaq haqan Juda mataw aseseqta na ginad emiy, Mat ka in God anan ya imam haqay haqiy. Bilaqne in God-mo nog haqiy. Haqad in Yesus lotu akaman ago gunun itiyonsa ahol waqad teq in Yesus ago gamuk na huritad in Yesus wol emid moqgo adanteqin tinagun naqmo hiqiy yaqay.

*God atatin ago zaway ayahmo amalib kabiy emaqta*

<sup>19</sup> Ari Yesus in Juda mataw na gibilan, Ya helmo ne gibilenaq ham. Mat Atatin anadibmo daq araq a hi emaqta ham. In amam daq emsa ahol waqad in daq naqmo emaqta ham. Na ezaqgo amam daq emsa in Atatin daq nazaqmo emaqtamo ham. <sup>20</sup> Amam in Atatin anan anad bilaqsa in kabiy daq bunmo emaqta na in atatin isihunaqta ham. Nazaq iyan in daq aseseqta atatin tiqisihundaqmo ham. Isihunid Atatin in daq aseseqta na emsa ne ahol waqad gihol riten lamdaq ham. <sup>21</sup> Amam in mataw tumoqiya giwazan eraqsa in giqeman kayeqmo osayta ham. Ad nazaqmo diq Atatin in anadibmo on mataw in ginan anad bilaqta na giqeman kayeqmo osaymo ham. <sup>22</sup> Amam in mat araq ago daq a hi ulum kemaqta ham. Haiqgam ham. In kabiy na Atatin abenab eman Atatinmo on mataw gilum kemaqta ham. <sup>23</sup> Nazaq iyan mataw Amam wazinayta nazaqmo in Atatin tuwazin daqaymo ham. Amam in Atatin eman bolta ham. Nazaq iyan on

mataw Atatin a hi wazinayta na in Amam a hi wazinaymo ham. <sup>24</sup> Ya helmo ne gibilenaq ham. Mat yaqgo gamuk huritim teq in mat ya iqeman bolta na anan helmo haqaqta, mat naqanta in os kayeqmo tumimmo osayta na tuwaqim osaq ham. Osad in teq God ago hazizirib turad nan araq a hi waqdaq ham. Haiqgam ham. In moqdaqta atowun tuhulosim in kayeqmo dimunmo osaqta ham.

<sup>25</sup> Ya helmo ne gibilenaq ham. On mataw tumoqiya na in teq God Atatin aqez tuhurit daqay ham. Huritad in gilikmanib mataw in aqez waz daqayta na bunmo eraqeq kayeqmo tuqos daqay ham. Kam na tugwahtiqnan tonaqta teq in tugwahtimta nog tiqiy ham. <sup>26</sup> Amam in mataw giqemid kayeqmo osgo azawayin inaqta ham. Teq in zaway na atatin ugan in nazaqmo mataw giqemid kayeqmo os daqaymo ham. <sup>27</sup> Teq atatin na in Mat Atatin iyim iyan Amam in zaway ugan in Amam abinib mataw gilum kemeq gigo daq amenin tinegdaq ham. <sup>28-29</sup> Ya kazaq bilaqsa ne ginadnad hi emiy ham. Abeb mataw hodhodab usayta na bunmo God Atatin aqez tuhurit daqay ham. Huritadmo in hodhod huloseq tugwahtiq daqay ham. Mataw daq dimdimunta emad osiyta na eraqeq kayeqmo kuluwa-kuluwmo tuqos daqay ham. Sa mataw daq meqmeqinta emad osiyta na eraqeq hazizirib turad in gigo daq na amenin tuwaq daqay ham.

<sup>30</sup> Ya daq araq inadibmo emgo haiq ham. Ya imam ibilensa ya mataw gigo daq gilum kemaqta ham. Gilum kemad ya a hi katiyad mataw ginan titnonimmo bilaqaiqta ham. Na ezaqgo yaqmo inad muzinin kabiy na a hi emaiqta ham. Ya mat iqeman bolta naqmo anad muzinad mataw gilum kemaqta ham.

*Nagah asor Yesus ahol alulin bilaq sire-qayta giqusaymo*

<sup>31</sup> Ya imomo ihol anan gibilendaiqta na in daq helta a haiq ham. <sup>32</sup> Teq mat ta araq ya ibin gibilenaqta na in nawa osaq ham. Ya inad emaiq, Mat na ya inan helmo diq bilaqtaqta haqaiq ham. <sup>33</sup> Kwaziqmo ne mataw giqeman in Jon ago hib lehiy ham. Lehan Jon in ya inan gamuk helta gibilanta ham. <sup>34</sup> Helmo, ya matmo ago hib ibin waqgo hulosaqta ham. Teq ne Jon ago gamuk na anadin emad ne ginad buliyeq a hi moq daqay haqad in ya inan bilamta na ago ya ne gibilenaq ham. <sup>35</sup> Jon in bilaqne lam araq oyad anuwan ayahmo leh nog iyyaqta ham. Sa ne Jon ahol anuwanib kam asor ginad dimniysa osnan ginad bilamta ham.

<sup>36</sup> Ari teq nagah araq Jon ago gamuk uriyamta na in ya inan ne gibilen sireqamqo ham. Na in kabiy God ya ibenab amta naqmo ham. Ya kabiy na emid hiqiy bugdaq haqad ya imam ibenab amta ham. Eman ya kabiy na emsa kabiy naqmo ya ihol alulin eman ulal iyaq ham. Kabiy na ya inan bilaqaq, Gimam Iyah ya iqeman bolta haqaq ham.

<sup>37</sup> Teq ya imam iqeman bolta na in inaqmo ya inan tibilammo ham. Ne in aqez asit a hi huritim ne in anobun asit ahol a hi waqiyamo ham. <sup>38</sup> Teq in ago gamuk ne gigemab a hi usaq ham. Na ezaqgo in mat ne gigo hib eman bolta na ne anan helmo a hi haqiyta na ago ham. <sup>39</sup> Ne ginad emay, God ago marib gamuk usaqta na in i giqemid i dimunmo kuluwa-kuluwmo tuqosam haqayta ham. Haqad ne gamuk na ahol waqad alulin nagunayta ham. Ta teq mar naqmo in ya inan ne gibilen sireqamqo ham. <sup>40</sup> Gibilen sireqsa teq haiq ham. Ne yaqgo hib boleq God ago os dimunta waqnan hulosmo diq hulosaqta ham.

<sup>41</sup> Mataw ya ibin iluwsa ya hulosaqta ham. <sup>42</sup> Teq ya ne gigo tuhurit ham. Ne God anan ginad a hi bilaqaqta ham. <sup>43</sup> Ya imam abinib bolan ne ya ibaymuzayta ham. Ari mat ta araq inmo ahol abinib bolid ne waqeq inaq tuqos daqay ham. <sup>44</sup> Ne an abin iluwad ginad dimniysa osayta ham. Osad ne givin dimunta God amulikmo osaqta na ago hib waqnan ginad a hi emayta ham. Nazaq iyan ezaq teq ne yaqgo gamuk anan helmo haq daqay? ham. <sup>45</sup> Ya teq imam anognib turad ne gimalib nan emdaiqta nazaq ne ginad hi emiy ham. Mat ne gimalib nan emdaqta na in Moses-mo ham. Ne Moses anan bilaqay, In God ago hazizirib i gisen baysiheq tigelumsihdaq haqayta ham. Teq haiq ham. Mat naqmo teq ne gimalib nan tiqemdaq ham. <sup>46</sup> Ne Moses ago gamuk anan helmo haqeq ne yaqgo gamuk anan helmo tahaq nagiyamo ham. Na ezaqgo in gamuk mar tonta na in ya inan bilamta ham. <sup>47</sup> Ne gamuk Moses ya inan mar tonta na anan helmo a hi haqeq, ezaq teq ne yaqgo gamuk anan helmo haq daqay? ham.

## 6

*Yesus on mataw 5,000 nazaq didaq nag (Matyu 14.13-21; Mak 6.30-44; Luk 9.10-17)*

<sup>1</sup> Ari gamuk na tihiqiyman abeb Yesus yuw-kurorqan Galiliy aqurumun kazaq ban tilah. Yuw akurorqan na anan araq

Taiberiyas\* haqayta. <sup>2</sup> Lehsa on mataw dauh biyahtamo in muzim inaq tilehiy. Na ezaqgo Yesus mataw moqayta gigo hib daq aseseqta emsa in ahol waq yaqayta na ago iyan. <sup>3</sup> Teq Yesus le garah araqab gwalehim in ago disaipel nenaq nab tuqosiy. <sup>4</sup> Kam nab Juda gigo lotu akaman ayah diqta anan Pasova haqayta na bolim sinsin tiqiy.

<sup>5</sup> Ari Yesus osim ame wole mataw dauh biyahta na agerab gabolsa in tigibiy. Gibiyad in Filip bulon, I teq edob didaq gizayeq on mataw ko negid neq daqay? ham. <sup>6</sup> Na in Filip ulum waqad nazaq bulon. Inmo daq ezaqta emdaqta na in tekomo anad tiqam. <sup>7</sup> An Filip amenin emim bilam, I bret 200 kina ago zayid in on mataw dauh biyahta ko inaq diq a hi iydaq ham.†

<sup>8-9</sup> Haqsa Yesus ago disaipel ta araq Saimon Pita amikqan Andru in era Yesus tubulon, Amun araq ago bali bret abaynaginmo teq nabiq gigermo inaq kawa osaq ham. Teq didaq asitmo na in on mataw kuluwmo kazaq ko inaq a hi iydaq ham. <sup>10</sup> In nazaq haqan Yesus bilam, On mataw gibilenid in os woqeq osiy ham. Saw nab sishun dimunta amalib osgo asawan dimunta usta. Nazaq iyan mataw na bunmo nab tuqos woqiy. Teq mataw biyahta na in kabemmo diq 5,000 nazaq.

<sup>11</sup> On mataw na os woqim ossa teq Yesus in bret waqim God esey ugim in mataw na tinag. Negad in nabiq giger na waqim nazaqmo ton. An on mataw bunmo ginadibmo didaq na neqan tigiyunin bug. <sup>12</sup> Mataw na didaq dimunmo tineqan teq Yesus in ago disaipel gibilan, Bret asugin abeyanta na bunmo ginuweq tuwal emiy ham. I abu hi ulumuq ham. <sup>13</sup> Haqan disaipel lehim bali bret abaynagin on mataw neqim abeyan hulosiya na in tuwal emim kuram 12 nazaqmo tigisiheniy.

<sup>14</sup> Kam nab on mataw daq azawayin inaqta na ahol waqim bilaqiy, Helmo haqiy, God ago nantut og kab boldaqta na amatin kawaqmo tubol haqiy.

<sup>15</sup> Haqsamo Yesus in ginad na huritim in anad tiqam, On mataw ka giwaz meqniyeq boleq in ya iwazeq in gigo king iqem daqay haqad in amomo garah abigmanib tugwalah.

*Yesus yuw amalib bayim lah*

<sup>16-17</sup> Ari imisor diq ni nog ya nog tiqiyman Yesus ago disaipel yuw-kurorqan Galiliyib wole tihitiqiy. Hitiqim saw romriq tiqiyman Yesus in gigerab a hi gwah-tiqsamo in muyib gwalam yuw urotim uliq

\* **6:1**: Yuw Galiliy aqurumun zeq wolehaqta ban nab uliq araq anan Taiberiyas haqayta usta (Jon 6.23 nab teq ni ahol waq). Nazaq iyan mataw asor uliq na ananib yuw na anan Taiberiyas-mo haq yaqayta. † **6:7**: 200 kina in bilaqem mat araq kalam 8 nazaq aduganib kam bunmo kabiy emdaqta na amenin nog.

Kapaneam-ub tilehiy. <sup>18</sup> Lehad luwsa tim ayahnta eraqad kamis wolasa ayahmo tiqeraqay. <sup>19</sup> Eraqsa disaipel giholtuw bulad muy hureqim le 5 o 6 kilomita nazaq tiqiyannu Yesu yuw amalib bayim bayim muy agerab bolsa in ahol tuwaqiy. Ahol waqadmo in tirab yaqay. <sup>20</sup> Rabsa Yesu gibilan, Ne hi rabiyy ham. Ka yaqmo lehaiq ham. <sup>21</sup> Haqan disaipel ginad dimniysa Yesu waqim muyib emad hid naqmo in uliq leh yaqayta nab tugwahtiqiy.

*On mataw Yesu naguniy*

<sup>22</sup> Ari tarom iyim saw thastitayan on mataw Yesu gihulosan yuw aqurumun kozaq ban osiyta na in Yesu asawan waqad teq in ginad tiqemiy, Irimo muy amulikmoqmo kab usta haqiy. Teq Yesu ago disaipel muy nabmo gwalsa Yesu a hi gwal haqiy. Disaipel gimomo muyib gwalim tilehiy haqiy. <sup>23</sup> In nazaq haqad ossamo mataw ta asor uliq Taiberiyas-ibta na gimuyin inaq bolim Iyahta bret waqim God esey ugan mataw neqiyta na asawnib tugwahtiqiy, mataw biyahta na gigerab. <sup>24</sup> Gwahtiqan on mataw nab osiyta na in Yesu ago disaipel nenaq saw nab a hi gibiyad in Taiberiyas gigo muy nagab gwalim Yesu nagunim uliq Kapaneam ban tilehiy.

*Bret diq Heven-ib gehitimta na in Yesu-mo*

<sup>25</sup> Lehim in yuw urum kozaq ban Yesu ahol tuwaqiy. Ahol waqad in tubuloniyy, Tisa haqiy ni gineh diq kab bol? haqiy. <sup>26</sup> Haqan Yesu gibilan, Ya helmo gibilenaiq ham. Ya irimo daq emta na alulin diq ne ahol waq kemim teq inagunayta nazaq a hi haiq ham. Ne bret neqim gigem aseseq iyyta naqmo ago ne ya inagunay ham. <sup>27</sup> Ne didaq lilihaqta na akabiyan hi emiy ham. Ne didaq mataw neqim kuluwa-kuluwmo osayta naqmo akabiyan ne emiy ham. Didaq na Mat Atatin inmo teq tinegdaq ham. Na ezaqgo amam God in Mat Atatin na anan bilam, Mataw bunmo gilikmanib ya ni nibiysa ni nimomo yaqgo kabiy na tiqem bugdaq haqad in bilam ham. Nazaq iyan Mat Atatin inmo teq didaq a hi lilihaqta na tinegdaq ham. <sup>28</sup> Haqan on mataw na tisusumun ugiy, Ta i ezaq toneq teq God ago kabiy na emam? haqiy. <sup>29</sup> Haqan Yesu gibilan, Ne mat God eman bolta naqmo anan helmo haqiy ham. God ago kabiy nawaqmo ham. <sup>30-31</sup> Haqan mataw na buloniyy, Kwaziqmo i gisesan saw samantab osad in manna bret neq yaqayta haqiy. God ago marib gamuk nazaq bilam haqiy. In bilam,

God Heven-ib bret eman woq negan in neqiy ham haqiy. *Buk Song 78.24*

Ta teq ni i gimen naga kabiyannu diq tiqem igdaq? haqiy. Ni naga daqin azawayin inaqta emid i ahol waqeq teq i ni ninan helmo haqam? haqiy. <sup>32</sup> Haqan Yesu bilam, Ya heltaqmo ne gibilenaiq ham. Moses-mo bret diq Heven-ib hitimta na a hi nag ham. Ya imammo in Heven-ib bret diqta na eman woq negaqta ham. <sup>33</sup> Bret diq God ago hib boltaqta na in Heven hullosim gewoqan on mataw neqad in gihol kayeq iyad kuluwa-kuluwmo osayta ham. <sup>34</sup> Haqan mataw na buloniyy, Mat Iyah haqiy bret naqmo tuteqmo ig haqiy.

<sup>35</sup> Haqan Yesu gibilan, Bret diq on mataw neqad gihol kayeq iyim kuluwa-kuluwmo osayta na in yaqmo ham. Mat aw nog in yaqgo hib bolayta na in gigemnan a ta hi moq daqay ham. Ad mat aw nog ya inan helmo haqayta na in yuwnan a ta hi moq daqaymo ham. <sup>36</sup> Ya ne gibilenim bilay, Ne ya tiqibiyta teq ne ya inan helmo a hi haqay haqad ya bilay ham. <sup>37</sup> On mataw ya imam giyagta na in yaqgo hib tubol bug daqay ham. Bolsa ya a hikidik gimuzdaiq ham. <sup>38</sup> Na ezaqgo yaqmo inad muznan haqad ya Heven hullosim a hi gewoy ham. Ya imam iqeman bolta naqmo anad muznan haqad ya gewoyta ham. <sup>39</sup> Teq mat ya iqeman bolta na ago anad in kazaq ham. Ya on mataw in giyagta na gigo ara q diq a hi hullosad kam abebtanta nab ya on mataw na bunmo giwazid tiqeraq daqay haqad in anad usaq ham. <sup>40</sup> Ya imam anadmo diq on mataw in atatin ahol waqad anan helmo haqayta na bunmo in os dimunta kuluwa-kuluwmo osayta na giholyon tuwaq daqay haqay ham. Teq kam abebtanta nab ya in giwazid tiqeraq daqay ham.

<sup>41</sup> Ari Yesu bilam, Bret diq Heven-ib gewomta na in yaqmo haqan Juda mataw aseseqta na in anan gigem meqniysa nan kabemmo kazaq bilaq yaqay, <sup>42</sup> Mat ka in Josep-mo atatin Yesu a haiq e? haq yaqay. I in anan amam gigo tuhuritta haq yaqay. Ta ezaqgo in bilaqay, Ya Heven hullosim ogib gewoyta haqay? haq yaqay.

<sup>43</sup> Haqsa Yesu gibilan, Ne an bulonad nan kabemmo hi bilaqiy ham. <sup>44</sup> Mat ara q anadibmo yaqgo hib a hi boldaq ham. Ya imam iqeman bolta naqmo in on mataw gihureqsa teq in yaqgo hib tubol daqay ham. Bolid teq kam abebtanta nab ya in giwazid tiqeraq daqay ham. <sup>45</sup> God ago nantut gamuk ara q kazaq mar toniy ham. Gamuk na bilam,

God-mo teq on mataw bunmo suleq tinegdaq haqad in bilam ham. *Aisaya 54.13*

Nazaq iyan on mataw ya imam ago hib suleq waqad ago nan huritayta na bunmo in yaqgo hib bolayta ham.

<sup>46</sup> Mat araq diq Gimam Iyah ahol a hi wam ham. Mat God ago hib osim bolta naqmo in ahol tuwamta ham. <sup>47</sup> Ya helmo gibilenaiq ham. Mat aw nog ya inan helmo haqayta na in os kayeqmo kuluwa-kuluwmo osayta na tuwaqim osayta ham. <sup>48</sup> Bret mataw neqim kayeqmo kuluwa-kuluwmo osayta na yaqmo ham. <sup>49</sup> Kwaziqmo ne gisesan saw samantab luw osad in manna bret neq yaqayta ham. Neqad teq in oseqmo tumoq yaqayta ham. <sup>50</sup> Ari bret Heven hulosisim ogib gewomta na in lul araq diqta ham. Mataw bret na neqeq in a hi moq daqay ham. <sup>51</sup> Bret mataw neqim kuluwa-kuluwmo osayta na yaqmo ham. Ya Heven-ib osim og kab gewoyta ham. Gewoqan mat aw nog bret na neqeq in kayeqmo kuluwa-kuluwmo tuqos tut daqay ham. Ari bret ya on mataw og kabta negid in neqeq kuluwa-kuluwmo os daqayta na in ya inon ham.

<sup>52</sup> Yesus nazaq haqan Juda mataw aseseqta na in gimo an mugad in gamuk na alulin nagunad kazaq an bulon yaqay, Mat ko ezaq toneq teq in anon igid i neqam? haq yaqay. <sup>53</sup> Haqsa Yesus gibilan, Ya helmo ne gibilenaiq ham. Ne Mat Atatin anon a hi neqeq teq ne in anedan a hi uluweq ne kayeqmo kuluwa-kuluwmo a hi os daqay ham. <sup>54</sup> On mataw ya inon neqad teq in ya inedan uluwayta na in os kayeqmo kuluwa-kuluwmo osayta na tuwaqim osayta ham. Ossa kam abebtanta nab ya in giwaziq tiqeraq daqay ham. <sup>55</sup> Na ezaqgo ya inon in didaqmo diq ham. Teq ya inedan in nagah uluwgo diqtamo ham. <sup>56</sup> On mataw ya inon neqad teq in ya inedan uluwayta na in yaqgo hib ossa ya in gigo hib osaiqmo ham. <sup>57</sup> Ya imam kayeqmo osaqta na iqeman bolta ham. Bolim ya imam ago zawayib kayeqmo osaiqta ham. An nazaqmo mat ya inon neqeq in yaqgo zaway amalib kayeqmo tuqosdaqmo ham. <sup>58</sup> Ya bret negdaiqta na in Heven hulosisim gehitimta ham. Kwaziqmo i gisesan bret kaitab womta na neqiy ham. Neqim teq in osimmo tumoqiya ham. Ari ya bret negdaiqta na in bret kwaziqta na nog a haiq ham. Mat yaqgo bret na neqeq in kayeqmo kuluwa-kuluwmo tuqosdaqmo ham.

<sup>59</sup> Ari Yesus uliq Kapaneam-ub Juda gigo bit humab wolayta nab osad in on mataw suleq negim gamuk kawa ka gibilan.

*Kayeqmo kuluwa-kuluwmo osayta agamukan Yesus amomo ago hib usaqta*

<sup>60</sup> Ari Yesus ago disaipel kabemmo gamuk na huritim bilaq yaqay, Gamuk na in afaqan diq haq yaqay. Nog teq gamuk na huritdaq? haq yaqay. <sup>61</sup> Haqsa Yesus anad tiqam, Yaqgo disaipel gamuk na huritim nan kabemmo bilaqay ham.

Haqad in tisuusumun nag, Ne yaqgo gamuk na huritim ne ginad helta hulosisan tonay ye? ham. <sup>62</sup> Nazaq iyid teq abeb Mat Atatin in kwaziqmo ulilib otab nab muleqeq ta gwalehsa ne ahol waqad teq ne ginad ezaq em daqay? ham. <sup>63</sup> I giwitan in i gisan zaway ugsa i kayeqmo osauqta ham. I gisan in i giwitan ulumsihgo zaway haiqgam ham. Gamuk kawa ya negaiqta ka in ne giwitan ulumsihsa ne kayeqmo osayta ham. <sup>64</sup> Teq ne gilikmanib mataw asor ya inan helmo a hi haqayta ham.

Yesus mebmemo ago kabiy alulin tiqemad in mataw helmo a hi haqayta na gigo tuhurit. Teq mat in waqeq bab gibenab emdaqta na ago in tuhuritmo. Na ago in bilam, Ne gilikmanib mataw asor ya inan helmo a hi haqayta ham. <sup>65</sup> Haqad in bilam, Ne gilikmanib mataw asor ya inan helmo a hi haqayta naqmo ago ya gibilenim bilay, Ya imam mat araq anad emid a hi hastitayid mat na yaqgo hib a hi boldaq hayta ham.

<sup>66</sup> In nazaq bilaqan mataw kabemmo Yesus muzeq inaq leh yaqayta na gihol buliyim in muleqim gigo uliqab tilehiy. Lehim in Yesus inaq a ta hi luw yaqay. <sup>67</sup> Nazaq iyan Yesus in ago disaipel 12 na gibilan, Ne inaqmo ya ihuloseq leh daqaymo ye? ham. <sup>68</sup> Haqan Saimon Pita amenin emim bulon, Iyahta ham i ni nihuloseq nog ago hib leham? ham. Ninmo ningo gamuk amomo in mataw giqeman kayeqmo kuluwa-kuluwmo osayta ham. <sup>69</sup> I ningo tuhuritim i ginad emauq, Helmo ni God ago mat tawon diqta naqmo haqauq ham. <sup>70</sup> Haqan Yesus nan na amenin emim gibilan, Yaqmo ne mataw 12 na iholyon gilumim giwayta ham. Ta teq ne gilikmanib araq in bilaqne Satan nog osaq ham. <sup>71</sup> Na in Saimon uliq Kariyot-ibta atatin Judas ayon gamuk na bilam. Mat na in disaipel 12 na gigo araqta. Teq abeb in Yesus waqeq bab gibenab emdaqta na ago Yesus in anan nazaq bilamta.

## 7

*Yesus amikqaniz in anan helmo a hi haqiy*

<sup>1</sup> Abeb Yesus saw Galiliy-ibmo tiluwyaq. Na ezaqgo Juda mataw aseseqta na in Yesus wol emid moqnan ginad emad adanteqin nagunsa iyan Yesus saw Judiya gigo saw ban luwnan atuw hiqiyyaq.

<sup>2</sup> Ari Juda gigo lotu akaman araq ayahta anan Gisesan Baybay Emim Osiya haqayta na akamun bolim sinsin tiqiy. <sup>3</sup> Nazaq iyan Yesus amikqaniz in Yesus bulonim bilaqiy, Ni uliq ka huloseq saw Judiya-ib leh haqiy. Leheq ni kabiy emsa ningo disaipel ahol waq kemiy haqiy. <sup>4</sup> Mat ahol abin emid

ayah iynan anad bilaqaq na in ulilemim ago kabiy a hi emaqta haqiy. Ni kazaq daq amo amo emnan ninad bilaqsun ni leheq on mataw bunmo gimeb emsa in ahol waqiy haqiy. <sup>5</sup> (Na Yesus amikqaniz inaqmo in Yesus anan helmo a hi haqad iyan in nazaqmo bilawuniy.)

<sup>6</sup> In nazaq haqan Yesus gibilan, Ya inadibmo a hi luwaiqta ham. Ya ibin ayahta waqdaiqta akaman teqmo bolaq ham. Ari ne ginadibmo luw daqayta akaman tutimmo usaqta ham. <sup>7</sup> On mataw God gileh ugayta na in gigem meqinta ne a hi negayta ham. Ari ya mataw na gigo daq anan meqin haqsa in gigem meqinta ya yagayta ham. <sup>8</sup> Negmo leheq humab ayahta na ahol waqiy ham. Yaqgo kam a hi gwahtiqa iyan ya humab nab a hi lehdaiq ham. <sup>9</sup> In nazaq haqad saw Galiliy-ibmo tuqos.

<sup>10</sup> Ossa in amikqaniz lotu akaman ayahta na ahumabnib tilehiy. Lehisa Yesus osim abeq teq tilahmo. Lehim in ulalab mataw gimeb a hi gwahtim. Haiqqam. In le ulilemadmo luwyaq. <sup>11</sup> Luwsa Juda mataw aseseqta na in humab nab Yesus nagunad bilaq yaqay, Mat na edowa? haq yaqay. <sup>12</sup> Sa on mataw biyahta na in gimo an bulonad gamuk kabemmo bilaq yaqay. Asor bilaq yaqay, Mat na in dimunta haq yaqay. Sa asor bilaq yaqay, Haiq haq yaqay. In on mataw kat neqaqta haq yaqay. <sup>13</sup> Haqad teq mat araq diq Yesus anan ulalab a hi bilaqyaq, in Juda mataw aseseqta na girabunad iyan.

<sup>14</sup> Ari humab ayahta na le liqabmo tiqiy teq Yesus Tempel-ib lehim on mataw suleq tinegyaq. <sup>15</sup> Samo Juda gigo mataw aseseqta na Yesus ago gamuk huritim in gihol turuh nems bilaqiy, Mat ka i gigo hib suleq a hi wanta haqiy. In ezaq tonim gamuk awaz meqin kazaq ka in anadib usaq? haqiy. <sup>16</sup> In nazaq haqsa Yesus in gigo gamuk amenin emim gibilan, Ya gamuk gibilenaqta ka in yaqgo gamuk a haiq ham. Mat ya iqeman bolta naqmo ago gamukta ya ne gibilenaq ham. <sup>17</sup> On mataw God anad muznan giwaz meqniyayta na in yaqgo gamuk ka huritad in ginad tiqem has daqay ham. Ginad em haseq in ya inan bilaq daqay, Mat na anadibmo gamuk a hi bilaqta haq daqay ham. In God-mo ago hib gamuk waqim teq bilaqta haq daqay ham. <sup>18</sup> Mataw in gimo gihol abinib gamuk bilaqayta na in gihol abin emid ayah iygo haqad in bilaqayta ham. Ari mat in mat ta araq in eman bolta naqmo abin emid ayah iygo haqad gamuk bilaqta, mat naqmo in gamuk helta bilaqta ham. Mat naqanta aholib daq katiyta araq a hi usaqta ham.

<sup>19</sup> Kwaziqmo Moses in God ago maror waqim ne nagta ham. Teq ne gilikmanib mat araq diq maror na ago gunun a hi muzin bugaqta ham. Nagaqgo ne ya inol emnan ginad emay? ham. <sup>20</sup> Haqan on mataw biyahta na bilaqiy, Nog ninol emnan bilaqaq? haqiy. Bugaw meqinta niholib ussa ni nazaq bilaqayta haqiy. <sup>21</sup> Haqan Yesus gibilan, Ya daq azawayin inaqta amulikmoqmo eman ne bunmo ginad kabemmo emay ham. <sup>22</sup> Moses ne gihol abatan asan urotgo adan giqisihunta ham. Helmo daq na in Moses ago hib a hi gwahtim ham. Na in i gitormagniz gigo hib gwahtimta ham. Teq Moses ago marorib daq na agamukan ussa ne muzinad lotu akamnibmo ne amun matta asan urotayta ham. <sup>23</sup> Moses ago gunun aduganib gamuk bilam, Amun matta gwahtiqid ago kam 8 nazaq tihiqiyid teq ne ahol abatan asan tuqurot daqay haqad in bilamta ham. An muran ne gigo amun matta araq gwahtiqim ossa ago kam 8-ta na lotu akamnib tugwahtiqan ne lotu akaman ago gunun na anadin a hi emad ne amun asan urotmo urotayta ham. Luweq ne Moses maror nagta na itiyon daqay haqad ne nazaq emayta ham. Ari ne lotu akamnib amun asan urotayta ham. Ta teq doh haqad ya lotu akamnib mat moqad osta na ahol bunmo wastitayan ne gigem meqinta yagay? ham. <sup>24</sup> Ne gimebmo daq ahol waqad hid naqmo ne ulum kemim anan meqin haqayta ham. Ne nazaq hi emiy ham. Ne ginad em haseq teq yaqgo daq anononmo ulum kemiy ham.

#### *Yesus in naga matin diq?*

<sup>25</sup> On mataw Jerusalem-ubta asor osim in Yesus gamuk bilaqsa huritad bilaqiy, Mataw aseseqta in mat wol emnan bilaqayta na amatin kawaqmo daqayta haqiy. <sup>26</sup> Ahol waqiy haqiy. In mataw aseseqta ko gimeb gamuk bilaqsa in nan araq a hi bulonay haqiy. Nabag mataw aseseqta ko in ago tuhuritim ginad emay, In Kraisa haqay daqayta haqiy. <sup>27</sup> Ta teq mat ko uliq edob bolta na ago i tuhurit haqiy. Ari Kraisa helmo boldaqta nab mat araq diq in uliq edob osim bolta na ago a hi huritdaq haqiy.

<sup>28</sup> In nazaq haqsa iyan Yesus Tempel ago gel aduganib mataw suleq negad osimmo in lileyim bilam, Ne yaqgo tuhuritiy ye? ham. Ad ya edob bolta na ago ne ginad emay ye? ham. Ya inadibmo a hi bol ham. Mat araq ya iqeman bolta ham. In gamuk helta bilaqayta ham. Teq ne in ago a hi huritayta ham. <sup>29</sup> Ya mat na inaqq osta ham. Ossa inmo ya iqeman ya bolta ham. Nazaq iyan ya in ago tuhurit ham. <sup>30</sup> Yesus nazaq haqanmo mataw na asor in

irqurnan haqad tuwaznan ton yaqay. Teq haiq. Yesus bab gibenab osdaqta na aka-man teqmo bolsa iyan mataw na a hi waziq. <sup>31</sup> Sa mataw biyahta na gigo asor kabemmo in Yesus anan helmo tihag yaqay. Ad in bilaq yaqay, Mat ko daq azawayin inaqta kabemmo tiqamta haq yaqay. Mat araq boleq mat ko a hi uriyam nagta haq yaqay. Nazaq iyan inmo Kraiss daqagya haq yaqay.

*Juda mataw aseseqta asor hurmey giqeman Yesus waznan lehiy*

<sup>32</sup> Ari mataw biyahta na Yesus anan gamuk kabemmo bilaqsa Farisi tuhuritiy. Huritsa mataw tamaz emayta gigo aseseqta na giyogniz Farisi nenaq in hurmey asor giqeman Yesus wazeq irqurnan tilehiy. <sup>33</sup> Lehan teq Yesus tibilam, Ya nenaq kam asitmo a ta osdaiq ham. Oseq teq ya muleqeq mat ya iqeman bolta na agerab ta lehdaiq ham. <sup>34</sup> Lehid teq ne ya tiqinagun daqay ham. Ta teq ne ya a hi ibiy daqay ham. Uliq ya le osdaiqta nab ne a hi leh daqay ham. <sup>35</sup> Haqan Juda mataw aseseqta na in gimo an bulonim bilaqiy, Na in edob lehid i naguneq ahol a hi waqam? haqiy. Luweq in Grik mataw gigo sawab leheq i gisenlul asor nab osayta na nenaq osdaq haqiy. Osad in Grik mataw na suleq negdaq haqiy. <sup>36</sup> Haqad in bilaqiy, Mat na bilam, Ne ya inagunad teq ne ya a hi ibiy daqay ham haqiy. Teq in bilam, Uliq ya le osdaiqta nab ne a hi leh daqay ham haqiy. Gamuk na alulin ezaq diq? haqiy.

*Yesus yuw dimunta anan bilam*

<sup>37</sup> Ari humab ayahta na ago kam abebtanta na in kam ayah diqta. Kam nab Yesus eraqim turad in lileyim bilam, On mataw yuwnan moqayta na in yaqgo hib boleq yuw uluwiy ham. <sup>38</sup> On mataw ya inan helmo haqsa teq God ago mar bilamta nazaq in giholib gwahtiqaq ham. In gigemab yuw dimunta gwahtiqad in tuteqmo nazaq sibad tuqusdaq ham. <sup>39</sup> Yesus in God ago Bugaw Dimunta anan gamuk na bilam. Abeb on mataw Yesus anan helmo haqeq teq in Bugaw na tuwaq daqay. Ari Yesus gamuk bilamta kam nab in ahol abin ayahta waqim amam agerab a hi gwalehsa God ago Bugaw Dimunta og kab a hi gewoqyaq.

*On mataw gihol huserim dauh giger iyiy*

<sup>40</sup> Ari mataw na Yesus ago gamuk na huritim asor bilaq yaqay, God ago nantut boldaqta na amatin diq kawaqmo tubol haq yaqay. <sup>41</sup> Sa asor bilaq yaqay, Ka Kraiss-mo haq yaqay. Haqsa ta asor bilaq yaqay, Haiq haq yaqay. Kraiss saw Galiliy-ib a hi gwahtiqaqta haq yaqay. <sup>42</sup> God ago gamuk bilam, Kraiss in Devit ago uliq Betlehem-ub Devit asenlul gimuganib

gwahtiqaqta haqad in bilam haq yaqay. <sup>43</sup> Nazaq iyan mataw na ginad giger iyan in gimo gihol huserim dauh gigermo tiqiyiy. <sup>44</sup> Sa mataw na gigo asor Yesus wazeq irqurnan ginad bilaqsa teq haiq. In nazaq a hi toniy.

*Mataw aseseqta Yesus anan helmo a hi haqiy*

<sup>45</sup> Nazaq iyan hurmey na muleqim mataw tamaz emayta gigo aseseqta na giyogniz Farisi nenaq gigo hib ta lehiy. Lehan mataw aseseqta na tisuusumun negiy, Ne nagaqgo mat na wazim ad a hi boliy? haqiy. <sup>46</sup> Haqan hurmey na bilaqiy, Mat ko ago gamuk in lul araq diq haqiy. Kwaziqmo i mat araq gamuk nazaq bilaqsa a hi huritta haqiy. <sup>47</sup> Haqan Farisi bilaqiy, Mat na ne inaqmo kat negan ne in anan helmo haqaymo daqagya haqiy. <sup>48</sup> Mataw marorta bunmo mat na anan helmo a hi haqayta haqiy. Sa Farisi bunmo in nazaqmo mat na anan helmo a hi haqayta haqiy. <sup>49</sup> Mataw biyahta na ginad haiq haqiy. In God ago maror Moses igta na ago a hi hurit kemayta haqiy. Nazaq iyan God kusluw negan in oseq teq timeqniy daqay haqiy.

<sup>50-51</sup> Haqan Farisi gigo araq anan Nikodemus, mat kwaziqmo Yesus ago hib lahta na, in osim gibilan, I mat araq samanta nan ugam nazaq i gigo maror a hi bilam ham. Mat na i gimeb turad in naga daqin diq emaqta na ago bilaqsa i huriteq teq i in ago daq ulum kemam ham. Nazaq a haiq e? ham. <sup>52</sup> Haqan mataw na amenin emim buloniy, Ni inaqmo saw Galiliy-ibta daqagya haqiy. Ni leheq God ago marib gamuk usaqta na ahol ta waq kem haqiy. Ahol waq kemeq teq ni ninad em hasdaq haqiy. God ago nantut araq saw Galiliy-ib gwahtiqaq nazaq in a hi usaq haqiy. Hikidik haqiy.

[ <sup>53</sup> Ari gamuk na tihiqiyian mataw bunmo gibit gibit tilehiy.

## 8

*Aw aduw hulosis mat ta araq hureqsa in ad Yesus agerab boliy*

<sup>1</sup> Mataw bunmo gibit gibit tilehsamo Yesus garah anan Oliv haqayta nab tilah. <sup>2</sup> Lehim usim tarommo diq in eraqim Tempel-ib a ta lah. Lehan nab on mataw bunmo in ago hib bolan in os woqim osad suleq tineqyaq. <sup>3</sup> Suleq negsa mataw Moses ago gunun hurit kemiya ta asor giyogniz Farisi asor nenaq in aw araq wazim a boliy. Aw na aduw ame titonim le mat araq inaq ussa in ahol waqad waziya. Wazim a bolim in liqabmo on mataw bunmo gimeb eman titur. <sup>4</sup> Tursa mataw aseseqta na

Yesus buloniy, Tisa haqiy, aw ka aduw ame titonim le mat araq inaq ussa i ahol waqadmo i wazim ningo hib a bol haqiy. <sup>5</sup> God ago maror Moses igta na bilam, Aw kazaqta ka amalib gig hunegid in moqan haqad in bilam haqiy. Ari teq ninmo ezaq haqdaq? haqiy.

<sup>6</sup> Mataw na Yesus ulum waqnan haqad nazaq buloniy, Yesus daq na agamukan bilaq kireh tonid teq in nan na ginuwid amalib gwaldaq haqad. Teq haiq. Yesus ahol holosan woqan abakbakan ulum laquwim in abenab mar ogib tiqemyaq. <sup>7</sup> Emsawo mataw aseseqta na Yesus a ta susumun ug yaqay. Susumun ugsa Yesus eraqim turad tigibilan, Ne gilikmanib nog diq in aholib daq meqinta haiqta naqmo in ameb diq aw ka amen gig hunegan ham. <sup>8</sup> Haqad in ahol hulosan ta woqan in ogib mar a ta emyaq.

<sup>9</sup> Emsa mataw na in ago gamuk na huritim in amulik-mulikmo huloadmo tileh yaqay. Mataw marorta na ameb lehsa ta biyahta na abeb lehiy. In tileh bugan teq aw na amomo Yesus anognib tur. <sup>10</sup> Tursa Yesus eraqim turad tubulon, Neng ham mataw nimalib nan emiyya na edowa? ham. Mat araq nimalib nan emdaqta kabag turaq e? ham. <sup>11</sup> Haqan aw na bilam, Mat Iyah ham araq diq kab a hi turaq ham. An Yesus bilam, Ya inaqmo nan a hi nigdaqmo ham. Ni leh ham. Ad abeb ni daq meqinta na ta hi em ham.]

*Og ka ago saw anuwan Yesus-mo*

<sup>12</sup> Ari Yesus in on mataw ta gibilenim in kazaq bilam, Yaqmo og ka ago saw anuwan ham. Mat ya imuzeq boldaqta na in romriqab a hi luwdaq ham. Haiq ham. In ya inuwanib luwad in kayeqmo tuqosdaq ham. <sup>13</sup> Haqan Farisi gamuk na huritim in Yesus buloniy, Ni nimomo nihol anan bilaqay haqiy. Mat araq nisen baysihim gamuk a hi emaq haqiy. Nazaq iyan ningo gamuk na in helta a hi haiq haqiy.

<sup>14</sup> Haqan Yesus amenin emim gibilan, Helmo ham ya imomo ihol anan bilaqaiqta ham. Ta teq yaqgo gamuk ka in heltaqmo ham. Na ezaqgo ham, ya uliq edob bolta na ago ya tuhurit kem ham. Teq uliq edob ya lehdaqta na ya tuhuritmo ham. Ari ne yaqgo uliq diqmo ago a hi huritayta ham. Ad ya edob lehdaqta na ne a hi huritaymo ham. <sup>15</sup> Ne mataw og kabta gigo ginadta amalib mataw gilum kemayta ham. Yaqmo mat araq a hi ulum kemaiqta ham. <sup>16</sup> Ari teq ya mat araq ulum kemnan haqad na ya imomo mat na anan a hi bilaqaiq ham. Haiq ham. Ya imam iqeman bolta na inaq i araqibmo nan na bilaqamta ham. Nazaq iyid i gigo nan in heltaqmo iydaq ham.

<sup>17</sup> Negmo gigo maror bilam, Mataw giger an ulumsiheq nan amulikmo bilaqid teq nan na in heltaqmo tiqiydaq haqad in bilam ham. <sup>18</sup> An nazaqmo ya iholygon gamuk bilaqsa ya imam iqeman bolta na in ya iyan gamuk bilaqaqtammo ham.

<sup>19</sup> Haqanmo Farisi buloniy, Ta ni nimam edob osaq? haqiy. Haqan Yesus bilam, Ne yaqgo a hi huritim iyan ne ya imam ago a hi huritaymo ham. Ari ne yaqgo huriteq teq ne ya imam ago tuhurit daqaymo ham. <sup>20</sup> Yesus Tempel-ib bit adugan mani eman usta nab osad in on mataw suleq negim gamuk na gibilanta. Gibilensa mat araq diq bolim Yesus wazim a hi irqur. Na ezaqgo Yesus ago kam a hi gwahtiqa iyan na ago in a hi waziy.

*Yesus bilam, Ya lehdaqta nab ne a hi leh daqay ham*

<sup>21</sup> Ari Yesus a ta gibilenim bilam, Ya ne gihuloseq tilehdaq ham. Lehid teq ne ya inagunad tiluw daqay ham. Luwad ne gigo daq meqinta ne giholib soqoteq ussamo ne inaq tumoq daqay ham. Moqeq ya lehdaqta nab ne a hi leh daqay ham.

<sup>22</sup> Ari Juda mataw aseseqta na in gamuk na huritim in gimo an bulonim bilaqiy, Ezaqgo in i ginan bilam, Ya uliq lehdaqta nab ne a hi leh daqay ham? haqiy. Luweq inmo ahol wol emid moqdaqta na ago in bilaqdaq haqiy. <sup>23</sup> Haqsa Yesus gibilan, Ne mataw og kabta ham. Teq ya ulilibmo osim gehityta ham. Ne gibe alulin og kab usaqta ham. Teq ya ihol alulin og kab a hi usaq ham. <sup>24</sup> Ya ne gibilenim bilay, Ne gigo daq meqinta ne giholib soqoteq ussamo ne inaq tumoq daqay hayta ham. Na ezaqgo ne ya inan helmo a hi haqeq teq ne gigo daq meqinta ne giholib ussa ne inaq tumoq daqayta na ago ya nazaq gibilenta ham. <sup>25</sup> Haqan mataw na susumun ugim buloniy, Ni nog? haqiy. Haqan Yesus gibilan, Ya kabiy alulin emim gibilenim gibilenim bolta naqmo ham. <sup>26</sup> Yaqgo gamuk kabemmo ya ne ginan bilaqdaqta usaq ham. Ad ya ne gigo daq meqinta kabemmo gilum kemeq ginan bilaqdaqta usaqmo ham. Ta teq mat ya iqeman bolta na in gamuk helta bilaqaiqta ham. Nazaq iyan ya in ago hib nan huritta naqmo amalib ya on mataw og kabta gibilenaq ham.

<sup>27</sup> Ari Yesus in amam anan gibilensa mataw na ginad a hi em has yaqay. <sup>28</sup> Nazaq iyan Yesus gibilan, Ne Mat Atatin wazid eraqeq tursa teq ne yaqgo tuhurit kem daqay ham. Ya daq araq inadib a hi emaiqta ham. Ya gamuk kagan bilaqaiqta ka ya imammo isihunan ya bilaqaiqta ham. <sup>29</sup> Mat ya iqeman bolta na in ya inaq osauqta ham. Osad ya tutimmo in anad muzim daq emaiqta ham. Nazaq iyan in ya



ihulosan ya imomo a hi osaiq ham. <sup>30</sup> Yesus gamuk na bilaqan on mataw kabemmo huritim anan helmo tihaqiy.

*Gamuk helta naqmo in on mataw giqamun hasid in samanmo tiluw os daqay*

<sup>31</sup> Ari Yesus in Juda on mataw in anan helmo haqiyta na gibilenim bilam, Ne gi-tuw a hi hiqiya yaqgo gamuk muzinad teq ne yaqgo disaipele-mo diq tiqiy daqay ham. <sup>32</sup> Ad ne yaqgo nan helta na ago ginad tiqem has daqaymo ham. Ginad em hasa nan helta naqmo ne giqamun hasid ne samanmo tiluw os daqay ham. <sup>33</sup> Haqan mataw na amenin emim bilaqiy, I Abraham ago anaynayniz asor kawa haqiy, I mat araq ago kabibiy mataw samanta a hi osauq haqiy. Ni ezaq haqad i ginan bilam, Ne giqamun hasid samanmo tiluw os daqay ham? haqiy. Ni nazaq bilaqsa i ginad a hi em hasauq haqiy.

<sup>34</sup> Haqan Yesus in gigo gamuk amenin emim gibilan, Ya helmo ne gibilenaig ham. Mat daq meqinta emaqta na in daq meqinta naqmo ago kabibiy mat samanta iyim osaqta ham. <sup>35</sup> Kabibiy mat in ago ayahta ago bitab tuteqmo a hi osdaqta ham. Ari mat ayahta na atatin teq in amam ago bitab tuteqmo tuqosdaqta ham. <sup>36</sup> Nazaq iyan Mat Atatinmo ne giqamun hasid teq ne saman diqmo tiluw os daqay ham. <sup>37</sup> Ne Abraham ago anaynayniz osayta na ya inad emaiq ham. Ta teq yaqgo gamuk ne gigemab usdaqta na abanan haiq ham. Nazaq iyan ne ya inol emid moqgo adanteqin nagunay ham. <sup>38</sup> Ya imam ago hib osad nagah ahol wayta naqmo ago ya bilaqaiqta ham. Sa nazaqmo negmo gimam gibilanta nazaq ne daq emaytamo ham.

<sup>39</sup> Haqan Juda mataw na amenin emim bilaqiy, I gimam Abraham-mo haqiy. Haqan ta Yesus gibilan, Ne Abraham atatniz diq iyeq teq Abraham daq emyaqta nazaq ne em nagiyimo ham. <sup>40</sup> Ya God ago hib gamuk helta huritta naqmo gibilensa ta ne ya inol emid moqgo adanteqin tinagunay ham. Daq nawa na in Abraham ago daqta nog a haiq ham. <sup>41</sup> Ne gimam diq ago daq ne muzayta ham. Haqan mataw na buloniy, I ginenan in danatab mataw ginaq daq meqinta emad luwim i a hi giqemiy haqiy. I gimam amulikmo na God-mo haqiy.

<sup>42</sup> Haqan ta Yesus gibilan, God in ne gimam diq iyid teq ne ya inan ginad bilaq nagiy ham. Na ezaqgo ya God ina q osim teq ya bolim kawa osaiq ham. Inmo ya iqeman bolta ham. Ya inadibmo a hi bol ham. <sup>43</sup> Ne ginad soqotim ussa ne yaqgo gamuk anan helmo a hi haqayta ham. Nazaq iyan ne yaqgo gamuk ka huritim ginad a hi em hasay ham. <sup>44</sup> Ne gimam Satan alulibmo

ne gwahti qiyta ham. Nazaq iyan ne gimam na daq emaqta nazaqmo ne emnan ginad emayta ham. Kwaziq diqmo Satan mutur gwahtimta nab in mataw ginol emim emim bo muran kawa tiqiyayq ham. In daq helta a hi muzinaqta ham. Na ezaqgo in aholib daq araq helta haiqgam ham. In nan katiya naqmo anamren ham. In aholib nan katiytamo ussa iyan in nan katiya naqmo bilaqad luwaqta ham. <sup>45</sup> Nazaq iya iyan ya nan helta gibilensa ne anan helmo a hi haqayta ham. <sup>46</sup> Yaqgo daq meqinta edowa? ham. Ne gilikmanib nog bilaqdaq? ham. Ari ya nan helta bilaqsa teq ta nagaqgo ne yaqgo nan na anan helmo a hi haqay? ham. <sup>47</sup> On mataw God alulib gwahti qiyta na in God ago gamuk huritayta ham. Ta ne God alulib a hi gwahti qiyta na ago ne God aqez a hi huritayta ham.

*Yesus bilam, Abraham a hi gwahti qiytaqmo ya tuqosta ham*

<sup>48</sup> Ari Juda mataw aseseqta na in Yesus ago gamuk amenin emim bilaqiy, I bilaqauq, Ni i gibabun Samariya-ibta gigo araq niholib bugaw meqinta usaq haqauqta na in helmo diq haqiy. <sup>49</sup> Haqan ta Yesus amenin emim bilam, Ya bugaw meqinta haiqgam ham. Ya imammo abin wazinad iluwaiqta ham. Ta teq ne ya ihol abin bilawunaiqta ham. <sup>50</sup> Yaqmo ihol abin ayah iydaq haqad ya kabiy a hi emaiqta ham. Mat araq ya ibin emid ayah iynan anad bilaqsa nawa osaqta ham. Mat naqmo teq i tigilum kemaq ham. <sup>51</sup> Ya helmo ne gibilenaig ham. On mataw yaqgo gamuk muzin daqayta na in a hikidik moq daqay ham.

<sup>52</sup> Haqan Juda mataw na buloniy, Muran i ningo tuhurit kemaq haqiy. Hel diqtaqmo ni niholib bugaw meqinta usaq haqiy. Abraham tumomta haqiy. Teq God ago nantut bunmo tumoq bugiyimo haqiy. Ta teq ni bilam, On mataw yaqgo gamuk muzin daqayta na a hikidik moq daqay ham haqiy. <sup>53</sup> Ezaq? haqiy. I gimam Abraham tumomta haqiy. Teq ni Abraham uriyamaq e? haqiy. God ago nantut bunmo tumoq bugiyimo haqiy. Ni nihol anan ezaq diq haqad nazaq bilaqaq? haqiy.

<sup>54</sup> Haqan Yesus bilam, Yaqmo ihol abin iluwid teq ya ibin na ayah a hi iydaq ham. Ta teq ya imam inmo ya ibin iluwaqta ham. Mat ne anan bilaqay, I gigo God haqayta naqmo in ya ibin iluwaqta ham. <sup>55</sup> Ta teq ne ya imam ago a hi huritayta ham. Ari yaqmo in ago tuhurit kema ham. Ya in ago a hi huritta nazaq ya a hi bilaqdaig ham. Ya nazaq bilaqeq ya mat katiya ne ginogmo tiqiynag ham. Teq ya God ago huritim ya in ago gamuk muz bugaiqta ham.

<sup>56</sup> Ne gises Abraham in yaqgo kam ka ahol waqnan anad ayahmo bilamta ham. Ad in yaqgo kam ka ahol tuwaqim in agem dimun diq iyaq ham. <sup>57</sup> Yesus nazaq bilaqanmo Juda mataw aseseqta na tubuloni, Ningo ulig 50 nazaq a hi iyaq haqiy. Ni ezaq tonim Abraham ahol wam? haqiy. <sup>58</sup> Haqan Yesus gibilenim bilam, Ya helmo ne gibilenaiq ham. Abraham a hi gwahtiqsa yaqmo tuqosta ham. <sup>59</sup> In nazaq haqan mataw na gig waqim Yesus amen hunegeq wolnan tonsamo in gimeb ulilemim Tempel ago gel asan ban gwah-tiqim tilah.

## 9

### *Mat ame haiqta na awagamun*

<sup>1</sup> Ari Yesus lehad luwimmo in mat araq ame haiqta ahol tuwam. Mat na anen agemab nazaqmo gwahtimta. <sup>2</sup> Ahol waqsa in ago disaipel era tisuusumun ugiy, Tisa haqiy nog diq daq meqinta eman mat ka anen agemab usadmo ame hiqiy? haqiy. Mat kaqmo daq meqinta am o haiq in anen amam daq meqinta emiy? haqiy. <sup>3</sup> Haqan Yesus amenin emim gibilan, Mat ka daq meqinta a hi am ham. Ta in anen amam daq meqinta a hi emiymo ham. Haiqqam ham. Mat ka aholib God ago kabiy emid ulal iysa on mataw ahol waq kem daqay haqad in ame hiqiyta ham. <sup>4</sup> Muran saw tihastitayim usaq ham. Sa i mat ya iqeman bolta na ago kabiy saw anuwanibmo emuq ham. Tarom teq tiqiydaq ham. Iyid teq mataw kabiy araq a ta hi em daqay ham. <sup>5</sup> Ya og kab osad ago saw anuwan iyim osaiqta ham.

<sup>6</sup> Haqadmo in ogib kusluwim og inaq buliyim in waqim mat ame haiqta na ameqnagnib tiqam. <sup>7</sup> Emadmo in bulon, Ni leheq yuw akurorqanta anan Silowam haqayta nab ni nime suhol ham. (Gamuk Silowam na alulin in kazaq, 'Eman lah' haqayta.) In nazaq bulonan mat ame haiqta na lehim ame tisuhol. Suholim ame tihastitayan in saw ahol waq kemadmo muleqim ta bol.

<sup>8</sup> Bolan ago uliqab walmataw teq mataw kwaziqmo in mani anan sun negsa ahol waqiyta na tibilaqiy, Ezaq? haqiy. Mat danib mani anan sunad osyaqta na amatin kawaqmo daqag haqiy. <sup>9</sup> Haqsa asor 'Ege' haq yaqay. Ka mat naqmo daqag haq yaqay. Sa asor 'Haiqqam' haq yaqay. Ka in mat naqmo nogta teq ka in mat ta araq haq yaqay. Haqsa mat na bilaqyaq, Ka yaqmo haqyaq. <sup>10</sup> Haqsa teq mataw na tisuusumun ugiy, Ta ni ezaq tonim nime na dimniy? haqiy. <sup>11</sup> Haqan in gibilan, Mat anan Yesus haqayta na ogib kusluwim og inaq buliyim in waqim ya imeqagnib am ham.

Emim in ya ibilan, Ni leheq yuw Silowam-ub nime suhol haqad in bilam ham. In nazaq ibilenan ya le ime suholan tidimniy ham. An muran ya saw ahol tuwaqaiq ham. <sup>12</sup> Haqan mataw na buloni, Ta mat na odowa? haqiy. Haqan in bilam, Yowo ham. Ya a hi hurit ham.

<sup>13</sup> Haqanmo mataw na in mat ame hiqiyim osta na waqim ad Farisi gigo hib tilehiy. <sup>14</sup> (Na Yesus ogib kusluwim og inaq buliyim in waqim mat na ameb eman ame hastitayta na in Juda gigo lotu akamnib kabiy na amta.) <sup>15</sup> Nazaq iyan Farisi in mat na tisuusumun ugiy, Ni nime ezaq diq tonim dimniy? haqiy. Haqan in gibilan, Mat na ogib kusluwim og inaq buliyim in waqim ya imeb am ham. Eman ya le ime suholim ya saw ahol tuwaqaiq ham. <sup>16</sup> Haqanmo Farisi asor bilaqiy, God mat na eman a hi bolta haqiy. In i gigo lotu akaman ago gunun a hi muzinaqta haqiy. Haqsa ta asor bilaqiy, Ezaq teq mat aholib daq meqinta usaqta na in anad emsamo daq azawayin inaq kazaq gwahtiqdaq? haqiy. Farisi nazaq haqad in gimo gihol huserim dauh giger tiqiyiy. <sup>17</sup> Nazaq iyan Farisi in mat ame hiqiyim osta na a ta susumun ugiy, Ni mat nime eman hastitayta na anan ninad ezaq emaq? haqiy. Haqan in bilam, Mat na in God ago nantut araq ham.

<sup>18</sup> Ari Juda mataw na in mat na ame haiqmo osim teq ame dimniyta na anan helmo a hi haq yaqay. Nazaq iyan in mat ame dimniyta na anen amam gimen nan eman in tuboliy. <sup>19</sup> Bolan in susumun negim gibileniy, Ka ne giger gitatin e? haqiy. Ka ne ame haiqmo emiyta ye? haqiy. Ezaq tonim in saw ahol tuwaqag? haqiy. <sup>20</sup> Haqan in anen amam gamuk amenin emim bilaqiy, Ka i giger gigo amunta haqiy. Teq in ame haiqmo i emta haqiy. <sup>21</sup> Ta teq muran in ezaq tonim ame saw ahol tuwaqagta na ago i a hi hurit haqiy. Ad nog diq in ame eman hastitayta na i a hi huritmo haqiy. Ne inmo susumun ugiy haqiy. In mat ayah tiqiyta haqiy. Inmo aholmen gamuk tibilaqdaq haqiy. <sup>22</sup> Mat na anen amam in Juda mataw aseseqta na ginan rabad iyan in nazaq bilaqiy. Na ezaqgo Juda mataw na tekomo an adugan wazim bilaqiy, Mat araq Yesus anan Krai haqid teq na i bit humab wolyatb muzid in i ginaq lotu a ta hi emdaq haqad in bilaqiy. <sup>23</sup> Nan asen naqmo ago mat na anen amam bilaqiy, In mat ayah tiqiyta haqiy. Ne inmo susumun ugiy haqiy.

<sup>24</sup> Nazaq iyan Farisi in mat ame hiqiyim osta na gime gigerta bulonan bolan in buloni, Ni God amomo abin wazid eraqsa teq ni gamuk heltaqmo i gibilen haqiy. I mat na ago tuhurit haqiy. In daq meqinta emaqta haqiy. <sup>25</sup> Haqan mat ame dimniyta

na in gigo gamuk amenin emim gibilan, Mat na daq meqinta emaqta o haiqta na ya a hi hurit ham. Ya nagah amulikmo ago huritta na in kazaq ham. Kwaziqmo ya ime haiqmo osta teq muran ya saw ahol tuwaqaiq ham. <sup>26</sup> Haqan mataw na buloniy, Mat na ezaq diq nitonan teq ni nime hastitay? haqiy. <sup>27</sup> Haqan in gibilan, Ya tigibilenta teq ne huritnan gituw hiqiyayq ham. Ne ginad ezaq diq emad ne a ta huritnan bilaqay? ham. Ne inaqmo ingo disaipel iyan haqad ne susumun yayag ye? ham. <sup>28</sup> Haqan Farisi in mat na bilawunim buloniy, Ninmo in ago disaipel-ta haqiy. Ari igmo Moses ago disaipel-ta haqiy. <sup>29</sup> God in Moses-mo gamuk bulonta naqmo ago i tuhuritta haqiy. Ta teq mat nawa na in edob bolta na i a hi hurit haqiy.

<sup>30</sup> Haqan mat na in Farisi gigo gamuk amenin emim gibilan, Ne gigo gamuk nawa ne bilaqayta na in lul ara q diq ham. Mat na edob bolta na ago ne a hi huritayta teq in ya ime eman tihastitay ham. <sup>31</sup> God in mataw daq meqinta emayta giqez a hi huritaqta ham. Na ago i bunmo tuhuritta ham. Ari mat God abin wazinad anad muzinsa teq God in aqez tuhuritdaq ham. <sup>32</sup> Kwaziq diqmo og mutur gwahtimta nab iyim bolim bo muran kam kab aw ara q amun ame haiqta eman teq abeb mat ara q in ame eman hastitayta na awagamun ara q diq i a hi huritta ham. <sup>33</sup> Ari God in mat na emid a hi bolta iyid in daq ara q a hi em nagta ham. <sup>34</sup> Haqan mataw aseseqta na amenin emim buloniy, Ni ninen niqamta nab ni daq meqinta emad luwim bo muranmo haqiy. Ni mat nazaqta iyim osadmo ni i suleq igaq e? haqiy. Haqadmo in mat na baymuzan tilah.

*Mataw Yesus anan helmo a hi haqayta na in bilaqne mataw gime haiqta nog*

<sup>35</sup> Ari Farisi mat na baymuzan lahta na ago Yesus huritim in mat na nagunim le ahol waqad tubulon, Ni Mat Atatin anan helmo haqaq e? ham. <sup>36</sup> Haqan mat na bilam, Mat ayah ham. Mat Atatin na nog? ham. Ni ya ibilenid teq ya in anan helmo tihaqdaiq ham. <sup>37</sup> Haqan Yesus bulon, Ni mat na ahol tuwam ham. Mat na muran ni ninaq gamuk emaq kaqmo ham.

<sup>38</sup> Haqan mat na bilam, Iyahta ham ya ninan helmo tihaqaiq ham. Haqad in abak-bakan ulum laquwim turad Yesus abin tiqiluw. <sup>39</sup> An Yesus bilam, Ya mataw gilum kemnan haqad og kab bolta ham. Gilum kema mataw gime haiqta na saw ahol tuwaq daqay ham. Sa mataw bilaqay, I saw ahol tuwaqauq haqayta na in gime tihiqiydaq ham.

<sup>40</sup> Haqsa Farisi asor Yesus agerab turad gamuk na tuhuritiy. Huritim in Yesus buloniy, Ezaq? haqiy. I inaqmo gime hiqiyim osauqta ye? haqiy. <sup>41</sup> Haqan Yesus gibilan, Ne mataw gime haiqta iyeq teq ne gigo daq meqinta na amenin a hi waq nagiy ham. Ta teq ne bilaqay, I gime saw waqauqta haqayta ham. Nazaq iyan ne gigo daq meqinta na giholib us tutsa ne teq amenin tuwaq daqay ham.

## 10

*Sipsip ginamren dimunta na Yesus-mo*

<sup>1</sup> Ari Yesus bilam, Hel diqtaqmo ya ne gibilenaq ham. Mat sipsip gigo gel ago dan ezab le a hi gwahtiqta na in mat arin inaqta ham. Mat naqanta in gel asan ban luwad gel itiyonim adugan ban gwahtiqta ham. Nazaq iyan in bilaqne mat mataw gigo bit wolim gigo nagah rin tonaqta na nog iyaqta ham. <sup>2</sup> Ari mat dan ezabmo lo gwahtiqta naqmo in sipsip ginamrenmo diq ham. <sup>3</sup> Kabibiy mat gel ago dan ez wamuzim osaqta na in sipsip ginamren diq bolsa ahol waqad in ayon dan tihas ugagta ham. Teq sipsip in ginamren na aqez huritayta ham. Sipsip ginamren na in sipsip amulik-mulikmo ginan biyim gililewunad giqad asanib lehaqta ham. <sup>4</sup> In ago sipsip bunmo giqad asanib lehad inmo danmeb lehaqta ham. Lehsa sipsip in mat na aqez hurit kemim in muzim inaq lehayta ham. <sup>5</sup> Sipsip na in mat amota a hi muz daqayta ham. Haiqgam ham. In mat amota na rabunad tuk daqayta ham. Na ezaqgo in ginamren amomo aqez huritayta na ago ham. <sup>6</sup> Yesus gamuk awowun ka amalib Farisi nagan gibilanta teq in gamuk awowun na alulin diq ginad a hi em hasiy.

<sup>7</sup> Nazaq iyan Yesus ta gibilan, Ya helmo ne gibilenaq ham. Sipsip gigo gel ago dan ez na yaqmo ham. <sup>8</sup> Mataw bunmo ya a hi bolsa in ameb bolyta na in mataw girin inaqta teq in mataw danib giwazim ginolim gigo nagah samanmo waqiyta amatawun ham. Teq sipsip in mataw na giqez a hi huritiy ham. <sup>9</sup> Yaqmo gel ago dan ezmo diq ham. Mat aw nog yaqgo hib boleq yaqgo gel aduganib gwahtiqid God in gilumsiheq tigiwaqdaq ham. Giwaqid teq on mataw na lo gwahtiqid ge gwahtiqad loq gwagelad didaq waqad tiluw daqay ham. <sup>10</sup> Mat arin inaqta na in sipsip girin toneq gimeqin tonad ginol emid moggo haqad in bolaqta ham. Mat naqanta in kabiy ara q ago a hi bolaqta ham. Ta teq ya sipsip giqemid in kayeqmo dimunmo osgo haqad bolta ham. Ya giqemid kayeqmo ossa yaqgo os dimunta na in giholib ame gwaleq tuqusdaq ham.

<sup>11</sup> Yaqmo sipsip ginamrenmo diq ham. Nazaq iyan yaqgo sipsip anonon diqmo giwamuzaiqta ham. Mat sipsip anononmo giwamuzaqta na in ago sipsip ginadin emad in gimen ahol nog hulosaqta ham. <sup>12</sup> Ari kabibiy matmo teq in sipsip giwamuzaqta ago anawun waqaqta naqmo in anadin emaqta ham. In sipsip ginadin diq a hi emaqta ham. Na ezaqgo in sipsip ginamren a haiqta ham. In mani-mo anadin emad luwsa gaun kwasikta bolsa in ahol waqadmo in ago sipsip gihulosad tukaqta ham. Tuksa gaun kwasikta na sipsip gimug ninalad gimuzan haresmo lehayta ham. <sup>13</sup> Mat nazaq emaqta na in ago sipsip ginadin a hi emad in mani-mo anadin emaqta ham.

<sup>14-15</sup> Ari yaqmo sipsip ginamrenmo diq ham. Ya anonon diqmo giwamuzaiqta ham. Ya imam in yaqgo huritsa ta yaqmo ya imam ago huritaiqtamo ham. Ad nazaqmo ya igo sipsip gigo huritsa ta yaqgo sipsip in yaqgo huritaytamo ham. Ad teq ya igo sipsip ginadin emad ya in gimen ahol nog hulosaqta ham.

<sup>16</sup> Yaqgo sipsip ta asor saw araqab luway ham. In yaqgo sipsip gihumaban kab luwayta ka gigo asor a haiqta ham. Ya sipsip en ta araq na gililewunid in ya iqez huriteq yaqgo hib bolsa ya giwaqeq giqad yaqgo gel aduganib le tugwahtiqaqta ham. Gwahtiqaq teq yaqgo sipsip bunmo in en amulikmo iysa sipsip ginamren na amulikmo tiqiydaqmo ham.

<sup>17</sup> Yaqgo sipsip ginadin emad ya in gimen ahol nog hulosaqta ham. Nazaq iyan ya imam in ya inan anad diq bilaqtaqta ham. Ya sipsip gimen ahol nog huloseq teq ya kayeq ta iydaqta ham. <sup>18</sup> Mat araq anadibmo a hi inol emdaq ham. Haiqgam ham. Yaqmo inadibmo ahol nog tuhulosaqta ham. Ya inadibmo ahol nog hulosaqta na ago zaway ya iholib usaqta ham. Teq ya inadibmo kayeq ta iydaqta na azawayin yaqgo hib usaqtamo ham. Ya daq nazaq emgo haqad ya imam ibilanta ham.

<sup>19</sup> Ari Juda mataw aseseqta na Yesus ago gamuk na huritim in ginad giger iyan in gimo gihol huserim humab giger tiqiyiy, teko in emiyta nazaq. <sup>20</sup> Iyim mataw na asor kabemmo Yesus anan bilaq yaqay, Bugaw meqinta aholib ossa in anad agadan iyaq haq yaqay. Nagaqgo i ago gamuk huritam? haq yaqay. <sup>21</sup> Sa asor bilaq yaqay, In gamuk bilaqtaqta na in mat ago bugaw meqinta aholib ussa gamuk bilaqtaqta na nog a hi iyaq haq yaqay. Mat ago bugaw meqinta aholib usaqta na in ezaq mat ame haiqta wastitayid ame hastitaydaq? haq yaqay.

*Juda mataw Yesus gihar ug yaqay*

<sup>22</sup> Ari kam nagab uliq Jerusalem-ub humab araq ayahta ago akaman tugwahtim. Kam na kwaziqmo Tempel meqniyan Juda gisesan wastitayim asirin tonim adanin hasiyta na anadin emgo akaman. Ulig bunmo saw amuditqan diq iyyaqta na akamnib kam na gwahtiqaqta. <sup>23</sup> Kam nab Yesus Tempel ago gel aduganib gwahtiqaq le veranda sisaqta anan Solomon ago veranda haqayta nab gwalim in leh bolad tiluwyaq. <sup>24</sup> Luwsa Juda mataw aseseqta na Yesus agerab bolim lilut ugim turadmo in bulonim bilaqiy, Kam ginah teq ni i gibilen kemmaq? haqiy. Ni Kraiss iyeq teq ni bilaq sireqeqmo i gibilen haqiy.

<sup>25</sup> Haqan Yesus in gigo gamuk amenin emim bilam, Ya ne tigibilenta ham. Teq ne helmo a hi haqiy ham. Kabiy ya imam abinib emaiqta na in ya ihol alulin ago ne gibilen kemaqta ham. <sup>26</sup> Teq ne ya inan helmo a hi haqayta ham. Ne yaqgo sipsip a haiqta ham. Nazaq iyan ne ya inan helmo a hi haqayta ham. <sup>27</sup> Yaqgo sipsip ya iqez huritayta ham. Teq ya in gigo huritsa in ya imuzim inaq bolayta ham. <sup>28</sup> Ya igo sipsip giqemid in kuluwa-kuluwmo osad a hikidik moq daqay ham. Sa mat araq yaqgo sipsip ya ibenab a hi giwaqdaqta ham. <sup>29</sup> Ya imam inmo yaqgo sipsip na giyaqta ham. Teq in og ka ago zaway bunmo giquriyamim osaqta ham. Nazaq iyan mat araq ya imam abenab yaqgo sipsip na a hi giwalemdaq ham. <sup>30</sup> Ya imam inaq i mat amulikmoqmo iyim osauqta ham.

<sup>31</sup> Yesus nazaq haqanmo Juda mataw aseseqta na gig waqim Yesus amen a ta hunegnan toniy. <sup>32</sup> Sa Yesus bilam, Ya Gimam Iyahta ago kabiy dimdimunta kabemmo tigiqisihun ham. Kabiy dimdimunta na gilikmanib edo diq ago ne yaqmen gig tuhunegnan tonay? ham. <sup>33</sup> Haqan mataw na bilaqiy, I kabiy araq dimunta ago ninmen gig a hi hunegauq haqiy. Haiq haqiy. Ni God bilawunaqta naqmo ago i ni ninolan ginad emauq haqiy. Ni mat diqmo araqta teq ni bilaqay, Yaqmo God haqay haqiy. Na ago i ninmen gig tuhunegnan haqiy. <sup>34</sup> Haqan Yesus gibilan, God ago maror Moses mar tonta nab gamuk araq kazaq usaq ham. Gamuk nab God kazaq bilam ham.

Yaqmo ne ginan bilay, Ne god-mo hay ham.

*Buk Song 82.6*

<sup>35</sup> God ago marib in on mataw God ago gamuk waqiyta na ginan 'god' haqan usaqta ham. Ussa mat araq diq in God ago mar na emid samanta iygo biyab a haiq ham. <sup>36</sup> Ari ya imam in ya itowun emim aholyon tiqiwamta ham. Iwaqim iqeman ya og kab bolta ham. Nazaq iyan ya ihol anan bilaqdaq, Ya God Atatin nazaq ya

a hi bilaqdaiq e? ham. Nagaqgo ne ya imalib nan emim bilaqay, Ni God bilawunaq haqay? ham.

<sup>37</sup> Ya imam ago kabiy diq a hi emsa teq ne ya inan helmo hi haqiy ham. <sup>38</sup> Ari ne yaqgo gamuk anan helmo haqnan ginadnad emad teq ne ya imam ago kabiy ya emaiqta naqmo ne ahol waq kemad teq ne ya inan helmo haqiy ham. Ne yaqgo kabiy ahol waqad ya inan helmo haqeq teq ne ginad tiqem has daqay ham. Ginad em haseq ya imam yaqgo hib ossa ya in ago hib ossaiqta na ago ne tuhurit daqay ham. <sup>39</sup> Haqanmo mataw na Yesus wazeq irqurnan tonsa in giquriyamim tilah.

<sup>40</sup> In muleqim ta lehad in yuw Jordan urotim saw kwaziqmo Jon in mataw huz negyaqta nab in gwahtiqim tuqos. <sup>41</sup> Ossa mataw kabemmo in ago hib tubol yaqay. Bolad in bilaq yaqay, Jon in ago gamuk ulumsihad daq ara q azawayin inaqta emsa i ahol a hi waw haq yaqay. Ta teq gamuk bunmo in mat ka anan bilamta na in helmo diq haq yaqay. <sup>42</sup> Ad saw nab mataw kabemmo Yesus anan helmo tihaqiy.

## **Yesus uliq Jerusalem saw Judiya-ibta nab lehan Juda gigo mataw marorta na in wol emnan ginad emiy**

### **11**

*Lazarus moqan Yesus lilewunan ta eram*

<sup>1</sup> Ari mat ara q anan Lazarus uliq Betaniy-ibta na moqad us. Uliq na in Mariya abab Marta inaq gigo uliqta. <sup>2</sup> Teq aw masil ahuran dimunta wazbalan Iyahta asenab woqan in aqensanib bayta na Mariya-mo.\* Sa mat moqad usta na in Mariya ahuy. <sup>3</sup> Ari mat na moqad ussa in ahiyan giger na nan eman Yesus

ago hib lehan in bilaqiy, Iyahta haqiy mat ni anan ninad bilaqayta na tumoqay haqiy. <sup>4</sup> Haqan Yesus nan na huritim bilam, Moq na in mat moq hasdaqta a haiq ham. Moq na on mataw giqemid in God abin iluw daqayta ham. Iluwsa daq na amalib God Atatin abin ayah tiqiydaqmo ham.

<sup>5</sup> Yesus in Marta ama inaq teq in gihiy Lazarus inaq ginan anad diq bilaqayta. <sup>6</sup> Nazaq iyan in Lazarus moqad usaqta na huritim in kam gigermo a ta os, uliq in osta nab. <sup>7</sup> Osim teq in ago disaipel gibilan, I muleqeq saw Judiya-ib ta lehuq ham. <sup>8</sup> Haqan disaipel buloniy, Tisa haqiy muran kawa Juda mataw aseseqta na in ni nimalib gig hunegeq ninol emnan haqad ginad usaq haqiy. Teq ni nab a ta lehnan bilaqay e? haqiy. <sup>9</sup> Haqan Yesus gibilan,

Saw hastitayim le imisor iyaqta nab zeq huramad usaqta ham. Ussa mat zeqab luwad a hi woqayta ham. In og ka anuwan ahol waqad dimunmo luwaqta ham. <sup>10</sup> Ari mat taromab luwaqta na in woqnan woqnan tonad luwaqta ham. Na ezaqgo in ame romriq iysa in saw ahol a hi waqayta ham.

<sup>11</sup> In nazaq bilaqim teq in gibilan, I gigo kadoy Lazarus tuqusaq ham. Sa ya leheq disaipel buloniy, Iyahta haqiy in usmo usaqta iyeq in teq tidimniydaq haqiy. <sup>13</sup> Na Yesus in Lazarus tumom haqad bilamta teq disaipel ginad a hi emiy. In ginad emiy, In us diq usaq haqiy. <sup>14</sup> Nazaq iyan Yesus gibilen hasim bilam, Lazarus tumom ham. <sup>15</sup> Ad in moqsa ya inaq a hi osta na in dimun diq ham. Ya ne ginadin emad ya inad tidimniyaq ham. Muran ne ya inan helmo tihaq daqay ham. Ari i mat na ago hib lehuq ham. <sup>16</sup> Haqan Tomas, anan ara q Didimus haqayta na, in disaipel ta asor na gibilan, O tob iysa i inaq leheq inaq moquq ham.

*On mataw moqiya teq eraq daqayta na alulin Yesus-mo*

<sup>17</sup> Ari Yesus le uliq Betaniy-ib gwahtiqim Lazarus kam awewe qmo hodhodab tuqusta na ago in tuhurit. <sup>18</sup> Uliq Betaniy in Jerusalem agerabmo usaqta. In pesan diq a haiq, 3 kilomita nazaq in usaqta. <sup>19</sup> Nazaq iyan Juda on mataw kabemmo uliq ayahta nab osim in Marta ayow Mariya inaq gigerab boliy, on giger na gihiy amatqanta moqan in ginad waqnan haqad. <sup>20</sup> Ari Marta in Yesus bolaqta na abin hirita in eraqim adanin tilah. Sa Mariya bitabmo os. <sup>21</sup> Ossa Marta lehim Yesus tubulon, Iyahta ham ni kab osta iyid ya ihuy a hi moq nag ham. <sup>22</sup> Teq ya inad emaiq ham. Ni God inaq gamuk emad nagah ara q ago susumun ugid in tiqem nigdaq haqaiq ham. <sup>23</sup> Haqan Yesus bilam, Ni nihiy teq tigeraqdaq ham. <sup>24</sup> Haqan Marta bilam, Kam abebtanta nab teq in eraqdaqta na ago ya tuhurit ham, kam on mataw bunmo hodhod huloseq eraq daqayta nab ham. <sup>25</sup> Haqan Yesus bulon, Mataw hodhodab eraq daqayta na alulin yaqmo ham. Teq mataw kayeqmo kuluwa-kuluwmo osayta alulin na yaqmo ham. Mat ya inan helmo haqad osim moqayta na in teq kayeq ta iydaq ham. <sup>26</sup> Teq on mataw og kab kayeqmo osad ya inan helmo haqayta na in moqeq a hi moq has daqay ham. In kayeqmo kuluwa-kuluwmo tuqos daqay ham. Ni yaqgo gamuk ka anan helmo haqay e? ham. <sup>27</sup> Haqan Marta bulon, Ege ham, Iyahta ham. Ya inad emaiq, Ni Kraiss haqaiq ham. Ni God

\* 11:2: Jon 12.1-8 nab teq ni Mariya Yesus asenab masil wazbalta na awagamun ahol waqdaq.

atatinno haqaiq ham. God mat emid og kab bolnan anad usta na amatin ninmo ham.

*Yesus Lazarus anan anad meqniysa gam*

<sup>28</sup> Marta gamuk na tibilaaqim in muleqim ta lehim in amikqan Mariya waqim ad adek ban loqim kiskismo bulon, Tisa tubolim osad in ni ninan susumunaq ham. <sup>29</sup> Haqan Mariya gamuk na huritim in hidmo eraqim Yesus ago hib tilah. <sup>30</sup> Yesus uliqab a hi gwahtiqad in saw Marta lehim ahol wamta nab luwsa Mariya in agerab lah. <sup>31</sup> Lehsa on mataw Mariya anad waqad inaq bitab osiyta na in Mariya hidmo eraqim asanib lehsa ahol waqad in muzim inaq tilehiy. In ginad emiy, Aw ka hodhodab gaq wazan lehaq haqiy. <sup>32</sup> Haqsa Mariya Yesus agerab bolim ahol waqad anognib abak-bakan ulum laquwim turad teq in bilam, Iyahta ham ni kab osta iyid ya ihiy a hi moq nag ham.

<sup>33</sup> Haqan Yesus in Mariya gaqsa ahol waqad teq Juda on mataw Mariya inaq boliyta na inaqmo gaqsa in gibiyad in ahol afaqan iyad anad timeqniyyaqmo. <sup>34</sup> Anad meqniysa in bilam, Mat na asan edob emiy? ham. Haqan in buloniy, Iyahta haqiy, bo leheq ahol waq haqiy. <sup>35</sup> Haqan Yesus lehim ahol waqad in tigram. <sup>36</sup> Gaqsa Juda mataw nab turiyta na bilaqiy, Ahol waqiy haqiy. Mat ko in mat momta na anan anad diq bilaqyaqta haqiy. <sup>37</sup> Haqan teq ta asor bilaqiy, Mat ko in mat ame haiqta na wastitayan in ame hastitayta haqiy. Ta nagaqo in mebmemo bolim mat momta ka moqad kayeqmo banab ussa a hi ulumsih? haqiy.

*Yesus Lazarus bulonan hodhodab eram*

<sup>38</sup> Ari Yesus ahol afaqan iysa in hodhod agerab tilom. Hodhod na in gibig yay emim aduganib mat asan emim teq in gig ayahta ulum buliyan loqim yay aqez ituqim usta. <sup>39</sup> Teq Yesus hodhod agerab loqimmo tibilam, Ne yay aqezab gig usaqta na walemiy ham. Haqan mat momta na ahiy Marta bilam, Iyahta ham in asan kam aweweqmo hodhodab tuqsim ahuran tiqiy ham. <sup>40</sup> Haqan Yesus bulon, Ya tinibilen ham. Ni ya inan helmo haqeq teq ni God ago zaway ahol tuwaqdaq hay ham. Na ni anadin a hi emaq e? ham. <sup>41</sup> In nazaq haqanmo mataw yay aqezab gig usta na tuwalemiy. Waleman Yesus ame ulilib gwalsa in bilam, Ya imam ham ni ya iqez tuwazta na ago ya esey nigaiq ham. <sup>42</sup> Ni tutimmo ya iqez wazaqta na ya tuhurit ham. Teq ya on mataw kawa turayta ka ginadin emad ya in gimeb ni ninaq gamuk kawa tibilaaqaiq ham. Bilaqsa teq ni ya iqeman bolta na ago in anan helmo haq daqay haqad ham. <sup>43</sup> In gamuk

na tibilaaqim teq in lileyim bilam, Lazarus ham ni bo gwahtiq ham. <sup>44</sup> Haqanmo mat momta na abensenab tubusan hiksireqim amalib net muziyta nagan teq tubusan araq anobun isihan usta na inaqmo in bo asanib tugwahtim. Gwahtiqan Yesus in mataw nab turiyta na gibilan, Hasid in luwan ham.

*Mataw marorta Yesus wol emid moqgo an adugan waziy*

*(Matyu 26.1-5; Mak 14.1-2; Luk 22.1-2)*

<sup>45</sup> Ari Juda on mataw Mariya inaq bolim hodhod agerab turiyta na in Yesus daq amta na ahol tuwaqiy. Ahol waqad kabemmo in anan helmo tihaiqiy. <sup>46</sup> Ta teq in gigo asor Farisi gigo hib lehim Yesus daq amta na ago tigibileniy. <sup>47</sup> Gibilenan mataw tamaz emayta gigo aseseqta na giyogniz Farisi nenaq in Juda gigo kaunsel ayahta na amatawun bunmo gibilenan bolim humab tuwoliy. Humab wolim in bilaqiy, Teq i ezaq tonam? haqiy. Mat na daq azawayin inaqta kabemmo emaqta haqiy. <sup>48</sup> I mat na adanin a hi qwayid in nazaq em tutsa mataw bunmo in anan helmo tihaiq daqay haqiy. Sa teq Rom huriteq in boleq i gigo Tempel wol inerad in i gimuzid i og ka hulosaad haresmo leheq mataw ta asor gigo ogib begbega iyeq osam haqiy.

<sup>49</sup> Haqsa in gigo araq anan Kayafas haqayta in ulig nab tamaz mat danmebta iyim osta na in eraqim tigibilan, Ne ginad haiq ham. <sup>50</sup> I bunmo hiqiy bugamta na in meqin ham. Ari mat amulikmo i gimen moqid i bunmo dimunmo osamta na in dimun ham. Na ne ginad a hi emay ye? ham. <sup>51</sup> Na in anadibmo gamuk na a hi bilamta. Haiqqam. In ulig nab tamaz mat danmebta iyan God-mo anad ugan in Yesus Juda on mataw gimen moqdaqta na ago bilamta. <sup>52</sup> Teq Yesus in Juda on mataw gimomo gimen moqdaqta nazaq a haiq. In God ago onmin og saw bunmo osayta na girom tonid in mataw en amulikmo iy daqay haqad in bunmo gimen moqdaqta. <sup>53</sup> Ari Kayafas nazaq haqan nab mataw aseseqta na in Yesus wol emid moqgo adan-teqin tinagun yaqay.

<sup>54</sup> Nazaq iyan Yesus in Juda gimeb ulalab a ta hi luwyaq. In saw na hulosaad le uliq abebtanta anan Efrayim haqayta nab in ago disaipel nenaq tuqosiy. Uliq na abun ban saw saman diqta aquliqin haiqta usaqta.

<sup>55</sup> Ari Juda gigo kam ayah diqta anan Pasova haqayta na akaman bolim sinsin tiqiy. Iyan kam na a hi gwahtiqsamo Juda mataw kabemmo in gihol udineq gihol wastitayid teq kam ayahta na gwahtiqan haqad in uliq Jerusalem-ub tugwalehiy. <sup>56</sup> Gwalehim in Yesus anan saw waqad

teq in Tempel ago gel aduganib gwahtiçim turad in an tisusumun ug yaqay, Ne ginad ezaq emay? haq yaqay. Yesus humab kab a hi boldaq daqagya haq yaqay. <sup>57</sup> Na mataw tamaz emayta gigo aseseqta na giyogniz Farisi nenaq in tekomo mataw gibilenim bilaqiy, Ne Yesus edob osaqta na ago huriteq teq ne bo i gibilenid i tuwazam haqiy.

## 12

*Mariya masil ahuran dimunta Yesus asenab wazbal*

*(Matyu 26.6-13; Mak 14.3-9)*

<sup>1</sup> Ari abeb kam 6 nazaq le tihiqiyid teq Juda gigo lotu akaman ayahta anan Pasova haqay na tugwahtiçdaqta. Kam nab Yesus muleçim Lazarus ago uliq Betaniy-ib ta lah. Mat naqmo moçan Yesus hodhodab wazan eramta. <sup>2</sup> Lehan uliq nab in amen didaq tuçoyiy. Oyim Marta didaq soqoreq a bolsa Lazarus in mataw nenaq didaq neqad os yaqay. <sup>3</sup> Ossa Mariya in masil anan nard haqayta anawun ayahmota na asor wazim a bo Yesus asenab wazbalan woç bugan teq in açensanib tubayyaq. In nazaq emsa masil na ahuran dimun diçta bit adugan tuwaleq ton bug.

<sup>4-5</sup> Sa ta Yesus ago disaipel araç Judas uliq Kariyot-ibta na bilam, Nagaçço i mataw ginaghan haiçta gihulosauç? ham. I masil ahuran dimunta na mat araç inaç zayeç 300 kina nazaq waçeq mataw ginaghan haiçta na neg nagta ham.\* Mat naqmo teq Yesus bab gibenab emdaçta na amatin. <sup>6</sup> Teq in mataw gina haiçta na ginadin emad nazaq a hi bilam. Haiçgam. In mat rin tonaçta iyim in nazaq bilamta. Na ezaço in Yesus ago disaipel nenaç gigo hululut mani emayta na wamuzyaçta amatin. Ad hululutiç mani usta na asor in hikrinad aholyon waçyaçta. <sup>7</sup> Ari Yesus nan na huritim bilam, Ne aw ka hulosity ham. Ya moçid mataw iyay ton daçayta nab aw ka masil ahuran dimunta na ya iholib emgo haçad in zayan usta ham. <sup>8</sup> Tutimmo mataw ginaghan haiçta na ne nenaç osayta ham. Ari yaçmo ne nenaç tuçeqmo a hi osdaiç ham.

*Juda gigo mataw aseseqta Lazarus wol emgo bilaqiy*

<sup>9</sup> Juda mataw biyahmo Yesus uliq Betaniy-ib osaçta na huritim in ahol waçnan tuboliy. Teq mataw na Yesus amomo ahol waçnan a hi boliy. Haiçgam. In Lazarus mat Yesus hodhodab wazan eramta na inaçmo ahol waçnan haçad boliy. <sup>10-11</sup> Juda mataw kabemmo in Lazarus moçim ta eramta na ago huritim in mataw tamaz emayta gigo aseseqta na

gihulosad in Yesus ago hib bolad anan helmo tihaq yaqay. Nazaç iyan mataw tamaz emayta gigo aseseqta na in Lazarus inaçmo wol emid moçço ginad emiy.

*Yesus king nog iyim le uliq Jerusalem-ub gwahtim*

*(Matyu 21.1-11; Mak 11.1-11; Luk 19.28-40)*

<sup>12</sup> An tarom iyim saw tihastitayan Yesus eraçim Jerusalem-ub tilah. Lehsa on mataw dauh kabemmo Pasova ahumabun ahol waçnan haçad Jerusalem-ub bolim osiyta na in Yesus bolsa abin tuhuritiy. <sup>13</sup> Huritim in ay anan det haçayta na aben giwaçim teq in Yesus ahol waçnan adanin tilehiy. Lehad in bilaç yaqay,

God abin soriy haq yaqay.

Mat ka Iyahta abinib bolan iyan i ginad bilaç gigayinaç haq yaqay.

Mat kaçmo in Isrel gigo king haq yaqay.

<sup>14</sup> Haçsa Yesus donki minminta araç ahol waçim in amalib osim tilehyaç. God ago marib gamuk usaçta nazaçmo in am.

<sup>15</sup> Gamuk na bilam,

Ne on mataw uliq Sayon-ibta ham ne hi rabiç ham. Ahol waçiy ham. Ne gigo king nawa donki amidon amalib osim bolaç ham. *Sekaraya 9.9*

<sup>16</sup> Kam nabmo Yesus ago disaipel gamuk na alulin ago ginad a hi em hasiy. Abeb God Yesus abin ayahta tuçagan teq in daç na anadin a ta emiy. Anadin emad in ginad emiy, God ago marib gamuk Yesus anan bilamta nazaçmo diç on mataw in ayon em ugiy haqiy.

<sup>17</sup> Teq Yesus Lazarus lilewunan hodhodab ge gwahtiçsa on mataw kabemmo nab turad ahol waçiyta. Ahol waçim in nagaç gimeç ahol waçiyta na tekomo uliq-uliçço tibilaiçiy. <sup>18</sup> Bilaçsa on mataw biyahta na in Yesus daç azawayin inaç amta na ago huritim in ahol waçnan adanin lehiyta. <sup>19</sup> Lehsa Farisi gibiyad in gimo an bulonim bilaçiy, I ginad emuç haqiy. I mat ko adanin qwayço akamun tihiqiy haqiy. I ko gibiyuç haqiy. On mataw bunmo in anan helmo haçad muzim inaç tilehay haqiy.

*Grik mataw asor Yesus ahol waçnan boliy*

<sup>20</sup> Ari on mataw biyahmo Juda gigo lotu akaman ayahta na ahol waçnan bolsa in gilikmanib Grik mataw asor nenaç tuboliymo. <sup>21</sup> Bolim in Filip ago hib lehiy. Filip in uliq Betsaida saw Galiliy-ibta amatin. Nazaç iyan mataw na Filip ago hib lehim tisusumun ugiy, Mat ayah haçiy i Yesus ahol waçnan bol haqiy. <sup>22</sup> Haçan Filip le Andru bulonim teq in giger le Yesus

\* 12:4-5: 300 kina na in bilaçne mat araç uliq amulikmo aduganib kam bunmo kabiy emdaçta amenin nog.

tubuloni. <sup>23</sup> Bulonan Yesus in gigo gamuk amenin emim gibilan, Mat Atatin ahol abin ayahta waqdaqta na akaman muran tugwahtim ham. <sup>24</sup> Ya helmo ne gibilenaig ham. Wit anagin ogib woqeq a hi moqeq na in anon a hi emdaq ham. In amulikmoqmo usdaq ham. Ari wit anagin na ogib woqeq moqeq teq in ahokan gwaleq anon kabemmo tiqemdaq ham. <sup>25</sup> On mataw in gimo gihol anadin diq emayta na in gihol awitan tihik hules daqay ham. Ari on mataw og kab osad in gihol anadin a hi emayta na in kuluwa-kuluwmo tuqos daqay ham. <sup>26</sup> Mat aw nog yaqgo kabiy emnan ginad bilaqta na in ya imuzeq tubol daqay ham. Ad uliq ya osaiqta nab in tuqos daqaymo ham. Osad in yaqmen kabiy emsa Gimam Iyah in gibin tiqiluwdaq ham.

*Mat Atatin aqayin inaq wazid eraqeq tirturdaq*

<sup>27</sup> Haqad Yesus bilam, Muran ya ihol afaqan diq iyaq ham. Ta teq ya ezaq haqdaig? ham. Ya imam ni ya iholib daq gwahtiqaq tonaqta ka walem haqdaig e? ham. Haiqqam ham. Ya nazaq a hi bilaqdaig ham. Daq naqmo ya iholib gwahtiqaq ya og kab bolta ham. <sup>28</sup> Haqad in bilam, Ya imam ham ni nibin emid ayah iyan ham. Haqsamo God aqez Heven-ib gehitiqim bilam, Ya ihol abin eman ayah tiqiy ham. Teq ya emid in ayahmo diq ta idyaq ham. <sup>29</sup> Haqan on mataw nab turiyta na huritim bilaqiy, Kait ahulan iyaq haqiy. Sa asor bilaqiy, Angelo araq bulonsa i aqez hurit haqiy.

<sup>30</sup> Haqsa Yesus gibilan, Gamuk na ya ilumsihgo a hi gwahtim ham. Haiqqam ham. Gamuk na negmo gilumsihgo gwahtimta ham. <sup>31</sup> Muran God in on mataw og kabta hazizirib giqemim gigo daq tigiilum kemaq ham. Muran in mat meqinta og ka wamuzim osaqta na muzid tilehdaq ham. <sup>32</sup> Ari yaqmo teq mataw ya iwazid eraqeq og huloseq gwale turad teq ya on mataw bunmo gihureqid yaqgo hib tubol daqay ham. <sup>33</sup> Na Yesus in dante ezaqtab moqdaqta na ago in nazaq bilam. <sup>34</sup> In nazaq haqan on mataw na amenin emim bilaqiy, God ago marib gamuk araq kazaq bilaqsa i huritta haqiy. Gamuk na bilam, Mat anan Kraisa haqayta na og kab gwahtiqaq osad in ago os a hi hiqiyaqta haqad in bilam haqiy. Nagaqgo ni bilam, Mataw in Mat Atatin wazid eraqeq gwale turdaq ham? haqiy. Teq ni Mat Atatin anan bilamta na in nog diq? haqiy. <sup>35</sup> Haqan Yesus gibilan, Saw anuwan asitmo ne nenaq a ta usdaq ham. Saw anuwan na oysa ne saw waqad lehiy ham. Luweq ne le God ago maror aduganib a hi gwahtiqsamo romriq tiqiqisihdaq ham. Mat romriqab luwad

in ezaq lehaqta na ago in anad a hi em hasaqta ham. <sup>36</sup> Muran saw anuwan na oysa ne anan helmo haqiy ham. Ne helmo haqeq teq ne saw anuwan na ago onmin tiqiy daqay ham.

Ari Yesus gamuk na bilaqim tihiqiy an on mataw na gihulosad lehim gimeb tuqililam.

*Juda mataw kabemmo Yesus anan helmo a hi haqiy*

<sup>37</sup> Yesus kabiy azawayin inaqta kabemmo on mataw gimeb amta teq in anan helmo a hi haqiy. <sup>38</sup> On mataw na daq nazaq emim in God ago nantut Aisaya gamuk bilamta na tuwol net bugiy. Aisaya bilam,

Iyahta ham nog i gigo gamuk anan helmo haqayta? ham. Teq ni kabiy awaz meqin diqta emsa nog ahol waqad anad em hasaqta? ham. *Aisaya 53.1*

<sup>39</sup> On mataw na Yesus anan helmo haqgo ginad soqotim diq usyaqta. Teq Aisaya daq na alulin bilaqad in gamuk araq kazaq bilammo. <sup>40</sup> In bilam,

God in mataw na gimeqnaqin eman in saw a hi waqayta ham. Ad in ginad eman soqotim diq usaqta ham.

Luweq in gime nagah ahol waqad in ginad em haseq teq in ginad buliyeq God ago hib ta bol daqay haqad ham. Bolid teq God in giwastitayid dimniy daqay haqad ham. *Aisaya 6.10*

<sup>41</sup> Aisaya in Yesus ago zaway teq in ahol anuwan ahol waqim teq in Yesus-mo ananib gamuk na bilaqan usta. <sup>42</sup> Helmo Juda gigo mataw marorta kabemmo in Yesus anan helmo haqiyta. Teq in Farisi ginan rabad in ulalabmo Yesus anan helmo a hi bilaq yaqay. Luweq Farisi gimuzid in Juda gigo bit humab wolaytab mataw nenaq lotu a ta hi em daqay haqad. <sup>43</sup> Na ezaqgo mataw na in gigo walmataw gigo hib gibin dimunta waqnan ginad bilaqad teq in God ago hib gibin dimunta waqnan giquqtil a hi eraqyaq.

*Yesus ago gamuk helta naqmo teq on mataw gilum kemaqta*

<sup>44</sup> Ari Yesus lileyim bilam, On mataw ya inan helmo haqayta na in ya imomo inan helmo a hi haqayta ham. Na in mat ya iqeman bolta na anan helmo haqaymo ham. <sup>45</sup> Ad on mataw ya ibiyayta na in mat ya iqeman bolta na ahol waqaymo ham. <sup>46</sup> Ya og ka ago saw anuwan ham. On mataw ya inan helmo haqayta na romriqab a ta hi os daqay haqad ya bolta ham.

<sup>47</sup> Ari on mataw yaqgo gamuk huritad teq in a hi muzinayta na yaqmo diq in gigo daq na a hi ulum kemaq ham. Ya og kab on mataw giyon hazizir emeq gigo daq ulum kemnan a hi bol ham.



Ya on mataw gilumsiheq ta giwaqeq boln dimuntab giqemid osnan haqad ya bolta ham. <sup>48</sup> Ari on mataw gileh yagad yaqgo nan a hi huritsa nagah araç teq in giyon hazizir emdaqta nawa usaq ham. Na yaqgo gamuk ya bilayta naqmo ham. Yaqgo gamuk naqmo in kam abebtanta nab on mataw na gigo daq tuqulum kemdaqta ham. <sup>49</sup> Na ezaqgo ya inadibmo gamuk na a hi bilayta ham. Gimam Iyah ya iqeman bolta naqmo in gamuk awaz meqinta na yag ham. Yagad ya ezaq haqad gamuk bilaqdaqta na inmo iqisihunan ya nazaqmo bilayta ham. <sup>50</sup> Ad ya inad emaiç, God ago gamuk awaz meqinta na in mataw giqemid kayeqmo kuluwa-kuluwmo tuqos daqay haqaiç ham. Nazaç iyan gamuk nawa ya bilaqaiçta na ya imammo ibilanta nazaqmo diç ya ne gibilenaiç ham.

### **Yesus in disaipel gihuloseq Amam ago hib ta lehdaqta na ago in gibilan**

## **13**

*Yesus in ago disaipel gisen suhol*

<sup>1</sup> Ari Pasova ago kam ayahta na bolim sinsin diç tiçiya Yesus anad tiçam, Ya og ka huloseq imam ago hib lehdaqta na akaman sinsin tiçiyaç ham. Yesus in ago on mataw og kabta na ginan anad bilaçsa osta. Osad in ginan anad

bilaçsa osim le in gimen ahol nog tuhulos. <sup>2</sup> Ari imisor Yesus ago disaipel nenaç didaq neqad tuqosiy. Ossa Satan tekomo anad meqinta Judas ugan in Yesus waqeq bab gibenab emgo anad tiçemyaq. Mat na in Saimon uliq Kariyot-ibta atatin. <sup>3</sup> Samo Yesus anad emyaç, Ya imam zaway bunmo ya ibenab tiçam haçyaç. Haqad in God ago hib osim bolim ta God ago hib in muleqim ta lehaqta na in tuhuritmo. <sup>4</sup> Huritim in didaq neqim hulosaç in eraçim turad ago aholsihen sisaqta hasim emad teq in giholbay araç waçim ahulib tuhuram. <sup>5</sup> Hureqim in yuw waçim deg araçab wazbalan woçan in deg na waçim disaipel gisen tisuholyaç. In araç asen yuwub suholeq teq in giholbay ahulib hureqan usta na amalib asen tubayyaç.

<sup>6</sup> In nazaç emim emim a lehim le Saimon Pita ago hib tubol. Bolan Pita tubolon, Iyahta ham ni ya isen tisuholnan e? ham. <sup>7</sup> Haçan Yesus bilam, Muran daç kawa ya emaiçta ka ago ni ninad a hi em hasaq ham. Abeb teq ni ninad tiçem hasdaq ham. <sup>8</sup> Haçan Pita bulon, Ni ya isen a hikidik suholdaq ham. Haiç diçmo ham. Haçanmo Yesus bilam, Ya nisen a hi suholid ni yaqgo disaipel a hi iydaq ham. <sup>9</sup> Haçan Saimon Pita bilam, Iyahta

ham, nazaç na ni ya isen amomo hi suhol ham. Ni ya isen suholad ya iben teq ifaqin inaqmo ni suhol ton ham. <sup>10</sup> Haçan Yesus bilam, Mat tuhuzta na asen suholeqmo in ahol bunmo anumlan haiçmo tiçiydaq ham. In ahol bunmo a ta hi suholdaq ham. Ari ne bunmo gihol anumlan haiçta ham. Teq ne gilikmanib mat amulikmoçmo ahol anumlan inaqta osaç ham. <sup>11</sup> Na ezaqgo mat nog Yesus waqeq bab gibenab emdaqta na ago in tuhurit. Nazaç iyan in bilam, Ne gilikmanib mat amulikmoçmo ahol anumlan inaqta osaç ham.

<sup>12</sup> Ari Yesus in gisen tisuholim in ago aholsihen ta emim teq in le abanab a ta os. Osad in disaipel gibilan, Ya ne gigo hib daç tiçemta ka ago ne ginad tiçem hasiy ye? ham. <sup>13</sup> Ne ya inan giger Tisa teq Iyahta haqad biyayta ham. Na ne dimunmo bilaçayta ham. Ya mat nazaçtaçmo ham. <sup>14</sup> Ya ne gigo Iyahta teq ya ne gigo Tisa-mo ham. Teq ya ne gisen tisuhol ham. Nazaç iyan ne nazaçmo an asen tisuhol daçaymo ham. <sup>15</sup> Ya daç na tigiçisihun ham. Giçisihunan ne ya isen muzeq ya ne gimen daç emta nazaç ne tiçem daçaymo ham. <sup>16</sup> Ya helmo gibilenaiç ham. Kabibiy mat in ago ayahta a hi itiyondaç ham. Ad mat nantut waçim a lehaqta na in nan na anamren a hi uriyamdaçmo ham. <sup>17</sup> Ne daç ka ago ginad em hasay ye? ham. Ne ginad em hasad daç kawa ya emta kazaçmo ne emsa teq God ne ginan anad tidimniydaq ham.

<sup>18</sup> Ya mataw iholyon gilumim giwayta na gigo tuhurit kemta ham. Teq gamuk kawa ya gibilenaiçta ka ya ne bunmo ginan a hi bilaçaiç ham. Haiç ham. Ne gilikmanib mat araç yaqgo a haiçta osaç ham. Mat na teq God ago marib gamuk araç usaçta na tuwol net bugdaq ham. Gamuk na bilam,

Mat ya inaq garab didaq newta na in asenab tiçibay has haqad in bilam ham. *Buk Song 41.9*

<sup>19</sup> Teq daç na a hi gwahtiqsamo ya kawa ne tigibilenaiç ham. Abeb daç na gwahtiqsa ne ahol waqad ya inan bilaç daçay, Helmo gamuk God ago marib usaçta na in yaqmo inan bilamta haç daçay haqad muran ya ne ginadib tiçemaiç ham. <sup>20</sup> Ya helmo gibilenaiç ham. Mat araç in yaqgo kabibiy mat ya eman in ago hib bolta na ahol waç hasad wazinaçta na in yaqgo kabibiy mat na amomo a hi wazinaç ham. In ya iwaçim iwazinaçmo ham. Teq in ya imomo a hi iwazinaç ham. In mat ya iqeman bolta na inaqmo tuwazinaçmo ham.

*Judas teq Yesus waqeq bab gibenab emdaq*

(*Matyu 26.20-25; Mak 14.17-21; Luk 22.21-23*)

<sup>21</sup> Yesus nazaq bilaqim teq in ahol afaqan iyad anad timeqniyyaq. Anad meqniysa in bilam, Ya helmo gibilenaiq ham. Ne gilik-manib mat araq teq ya iwaqeq bab gibenab iqemdaq ham. <sup>22</sup> Haqanmo disaipel an anobun ahol tuwaq yaqay, Yesus nog diq anan bilamta haqad. <sup>23</sup> Sa Yesus ago disaipel araq in anan anad diq bilaqaqta na in

banab ahol wol emim Yesus anognib us. <sup>24</sup> Ussa Saimon Pita afaqin ugad kabiyak-ibmo bulon, Ni susumun ug ham. In nog diq anan bilaqaq? ham. <sup>25</sup> An disaipel na Yesus anogib usadmo in afaqin Yesus abanibmo emim tisusumun ug, Iyahta ham ni nog diq anan bilaqaq? ham. <sup>26</sup> Haqan Yesus bilam, Ya bret anabun asor waqeq degib taqor ulum tureq mat doqag ya ug-daiqta na nawaqmo ham. Haqadmo in bret waqim taqor ulum turim Saimon uliq Kariyot-ibta atatin Judas-mo tuqug. <sup>27</sup> Ugan Judas waqsamo Satan aholib tubol. Anmo Yesus in Judas bulon, Ni daq emnan ninad emaqta na hidmo le em ham. <sup>28</sup> Haqsa disaipel bunmo gamuk na huritim in ginad a hi em hasiy. <sup>29</sup> Asor ginad emiy, Judas mani wamuzaqta iyan Yesus Pasova ahumabun emgo anaghan zaygo bulonaq haqiy. Haqsa ta asor ginad emiy, Yesus in mataw gina haiqta nagah neggo Judas bulonaq haqiy. <sup>30</sup> Anmo Judas bret na tuwaqim hidmo in eraqim bit na hulosaq asanib gwahtiqim tilah. Sa tarom tiqiy.

*Yesus gunun araq muturta disaipel giqisihun*

<sup>31</sup> Judas tilehsa teq Yesus bilam, Muran Mat Atatin abin ayah tiqiy ham. Ayah iysa in God abin eman ayah tiqiyimo ham. <sup>32</sup> Ari Mat Atatin God abin emid ayah iysa God inmo ahol abin Mat Atatin ugid in abin ayah tiqiydaqmo ham. Teq in muran diqmo Mat Atatin abin emid ayah iydaq ham. <sup>33</sup> Onmin ham ya nenaq asitmo a ta oseq teq ya tilehdaiq ham. Lehid teq ne ya tiqinagun daqay ham. Ya Juda mataw gibilenta nazaqmo ya ne tigibilenaiq ham. Ya uliq lehdaiqta nab ne a hi leh daqay haqaiq ham. <sup>34</sup> Ya gunun araq muturta tinegaiq ham. Ne an anan ginad diq bilaqsa osiy ham. Ya ne ginan inad bilaqaiqta nazaqmo ne an anan ginad bilaqsa osiy ham. <sup>35</sup> Ne an anan ginad bilaqsa ossa teq on mataw bunmo ne gibiyad ginad tiqem daqay, Yesus ago disaipel kowaqmo haq daqay ham.

*Yesus bilam, Pita teq gileh yagdaq ham (Matyu 26.31-35; Mak 14.27-31; Luk 22.31-34)*

<sup>36</sup> Haqan Saimon Pita in Yesus bulon, Iyahta ham ni edob lehnan? ham. Haqan Yesus bilam, Muran ya uliq lehdaiqta nab

ni ya imuzeq a hi lehdaq ham. Abeb teq ni ya imuzeq boldaq ham. <sup>37</sup> Haqan Pita bulon, Iyahta ham ezaqgo ya muran ni nimuzeq ninaq a hi lehdaiq? ham. Ya nilumsihad ihol nog huloseq ninmen tumoqdaiqta ham. <sup>38</sup> Haqan Yesus gamuk na amenin emim bilam, Ni ya ilumsiheq moqgo bilaqaq e? ham. Ya helmo nibilenaiq ham. Kurek a hi gayonsamo ni nime ezeqmanmo gileh tiyagdaq ham.

## 14

*Yesus bilam, On mataw God ago hib leh daqayta na adanteqin yaqmo ham*

<sup>1</sup> Ari Yesus in ago disaipel bunmo gibilenim bilam, Ne gihol afaqan iysa ginadnad hi emiy ham. Ne God anan helmo haqad ne ya inan helmo haqiyimo ham. <sup>2</sup> Ya imam ago bit adugan kabemmo usaqta ham. Nazaq iyan ya leheq ne gimen ban wastitaynan ham. Ya nazaq emnan inad a hi usta iyid ya ne gimen ban wastitaynan haqad nazaq a hi gibilen nagta ham. <sup>3</sup> Ya leheq ne gimen ban wastitayeq teq ya muleqeq ta boldaiq ham. Boleq ya ne giwaqeq giqad yaqgo sawab tilehdaiq ham. Giqad lehid uliq ya osdaiqta nab ne tuqos daqaymo ham. <sup>4</sup> Teq ya uliq lehdaiqta na ago dante ne tuhuritiy ham.

<sup>5</sup> Haqan Tomas bilam, Iyahta ham ni edob lehdaqta na i a hi hurit ham. I ezaq toneq teq dante na ago hurit kemam? ham. <sup>6</sup> Haqan Yesus bulon, Dante ya imamgo hib lahta na yaqmo ham. Ya gamuk helta alulinmo diq ham. Teq yaqmo on mataw giqeman kayeqmo kuluwa-kuluwmo os-ayta ham. On mataw dante amulikmo ya gimen emdaiqta naqmo muzineq teq in le ya imam ago hib tugwahtiq daqay ham. Dante amo amo haiqqam ham. <sup>7</sup> Ne yaqgo huriteq teq ne ya imam ago tuhurit daqaymo ham. Ari muran ne in ago tuhuritaq teq ne in ahol tuwaqaymo ham.

<sup>8</sup> Haqan Filip bulon, Iyahta ham ni nimam i giqisihun ham. Giqisihunid i ahol waqad teq i ginadnad a ta hi emad i nagah araq ago a hi susumunam ham. <sup>9</sup> Haqan Yesus bulon, Filip ham ya nenaq kam sisaqmo tuqos ham. Ta teq ni yaqgo a hi huritaq e? ham. Mat ya ibiyaqta na in ya imam ahol waqaqmo ham. Ezaq haqad ni bilaqag, "Ni nimam i giqisihun" haqag? ham. <sup>10</sup> Ya imam ago hib ossa in yaqgo hib osaqqo ham. Na ne anan helmo a hi haqay e? ham. Ya gamuk gibilenaiqta ka ya inadibmo a hi bilaqaiq ham. Ya imam ya iholib osad ago kabiy emaqta ham. <sup>11</sup> Ya bilay, Ya imam ago hib ossa in yaqgo hib osaq hayta na ne anan helmo haqiy ham. Ari ne yaqgo gamuk na anan helmo a hi

haqeq teq ne yaqgo kabiy naqmo anadin emad ya inan helmo haqiy ham.

<sup>12</sup> Ya helmo gibilenaiq ham. Mat ya inan helmo haqaqta na in ya kabiy emaiqta nazaqmo in kabiy tiqemdaqmo ham. Teq in kabiy ayahmo diq emad in ya kabiy emta na tuquriyamdaq ham. Na ezaqgo ya imam ago hib lehdaiqta na ago ham. <sup>13</sup> Lehid teq ne ya ibinib nagah anan susumunsa ya tiqem negdaiq ham. Nazaq iyid teq Gimam Iyah in Atatin ago hib abin yahta tuwaqdaq ham. <sup>14</sup> Ne ya ibinib nagah araq ago susumun yagsa ne ginad usaqta nazaq ya tiqem negdaiq ham.

*Yesus God ago Bugaw Dimunta emid bolgo bilam*

<sup>15</sup> Ari Yesus bilam, Ne ya inan ginad bilaqsa teq ne yaqgo gunun ya qiçisihunta na bunmo anonon diqmo tumuzin daqay ham. <sup>16</sup> Teq ya imam susumun ugid in ne giteqsor araq awaz meqinta tinedaq ham. Negid in ne nenaq tuteqmo tuqosdaq ham. <sup>17</sup> Mat ne gilumsihdaqta na in God ago Bugaw gamuk helmo bilaqta naqmo ham. Og kab on mataw God gileh ugayta na in God ago Bugaw ahol a hi waqad teq in ago a hi huritayta ham. Nazaq iyan in Bugaw na a hi waq daqay ham. Ari negmo teq Bugaw na ne gilikmanib osaqta ham. Osad in teq ne giduganib tuqosdaqmo ham. Nazaq iyan ne in ago tuhuritayta ham.

<sup>18</sup> Ya ne gihulosid ne onmin ginenmaman haiqta nog a hi os daqay ham. Haiq ham. Ya teq ne gigo hib ta boldaiq ham. <sup>19</sup> Sisaq haiq og kab on mataw God gileh ugayta na a ta hi ibiy daqay ham. Ari negmo teq ya tiqibiy daqay ham. Ya kayeqmo osaiqta ham. Nazaq iyan ne kayeqmo tuqos daqaymo ham. <sup>20</sup> Kam nab teq ya imam ago hib osaiqta na ago ne tuhurit daqay ham. Teq ne yaqgo hib ossa ya ne gigo hib osaiqta na ago ne tuhurit daqaymo ham. <sup>21</sup> On mataw yaqgo gunun giwaqim muzinayta na in ya inan ginad bilaqayta ham. Teq in ya inan ginad bilaqsa ya imam in ginan anad bilaqdaqmo ham. Sa ya nazaqmo mataw na ginan inad bilaqsa ihol tigiçisihundaiq ham. <sup>22</sup> Yesus nazaq haqsamo Judas ta araq, in mat uliq Kariyot-ibta na a haiqta, in Yesus kazaq bulon, Iyahta ham ezaqta ago ni nihol i gimomo qiçisihundaq? ham. Ad ni og kab on mataw ta asor na bunmo nihol a hi qiçisihundaq? ham.

<sup>23</sup> Haqan Yesus bilam, Mat ya inan anad ayahmo bilaqta na in yaqgo gamuk tumuzdaq ham. Sa ya imam in mat na anan anad ayahmo tibilaqdaq ham. Ad ya imam inaq boleq i mat na inaq kuluwa-kuluwmo tuqosam ham. <sup>24</sup> Ari mat ya inan anad a hi bilaqta na in yaqgo gamuk a hi muzinaqta ham. Teq ya gamuk negaiqta

ka in yaqgota a haiq ham. Gamuk na in ya imam iqeman bolta naqmo ago gamukta ham.

<sup>25</sup> Ya nenaq osad gamuk nawa na bunmo tigibilenta ham. <sup>26</sup> Ari ya imam teq ya ibinib inmo ago Bugaw Dimunta na emid tuboldaq ham. Ne giteqsor na boleq teq in ne gilumsihad nagah bunmo ago asuleqin tinedaq ham. Ad in ne ginad enqenunid eraqsa ne yaqgo gamuk bunmo ya negta na anadin a ta em daqay ham. <sup>27</sup> Ya ne qiçemid ne gigem kute nemsas os daqay ham. Yaqmo igem kute nemim usaqta nazaq nogmo ya negid ne gigem kute tinemdaqmo ham. Teq on mataw og kabta gigem kute nemsas osayta nazaq nog ya a hi negdaiq ham. Ne gihol afaqan iysa ginadnad hi emiy ham. Ad ne hi rabiy ham.

<sup>28</sup> Ari ya gibilenim bilay, Ya ne gihuloseq leheq teq ya ne gigo hib a ta boldaiq haqsa ne tuhuritiy ham. Ne ya inan ginad bilaqid teq ya bilay, Ya imam ago hib lehaiq haqsa ne huritad ginad tidimniy nagiy ham. Na ezaqgo ya imam ago zaway in yaqgo zawayta uriyamim usaqta ham. <sup>29</sup> Daq nawa ya teko anan bilayta na a hi gwahtiçisa ya anan kawa ne tigibilenta ham. Abeb daq na gwahtiçisa ne ahol waqad teq ne ya inan helmo haq daqay haqad ya muran kawa ne tigibilenaq ham. <sup>30</sup> Ya nenaq nan sisaqmo bilaqad osgo akamun haiq tiqiyayq ham. Na ezaqgo mat meqinta og ka wamuzim osaqta na tubolaq ham. Teq in anadibmo ya imeqin tongo in ago zaway haiqta ham. <sup>31</sup> Ya imam ibilanta nazaqmo ya emaiqta ham. Ya nazaq emad teq ya imam anan inad bilaqta na ulal iysa on mataw og kabta bunmo tuhurit daqay ham. Ari ne eraqiysa i lehuq ham.

## 15

*Yesus bilam, Ya am wain-mo diq ham*

<sup>1</sup> Yaqmo am wain-mo diq ham. Sa ya imam in am wain na anamren ham. <sup>2</sup> Teq ya imam in ya iben anon a hi emayta na bunmo giqurotim hunegaqta ham. Ad in ya iben anon emayta na bunmo gisawan emad in ya iben samanta dimunta giçisih ugim usayta na giqurotim hunegsa iben dimunta na anon kabemmo emayta ham.

<sup>3</sup> Ari ya gamuk tigibilenta naqan in ne gisuholan ne giholib ginumlan haiq tiqiyiyta ham. <sup>4</sup> Ne ya iholib soqoteq inaq ossa teq ya ne gigo hib tuqosdaiqmo ham. Am wain aben ahulib a hi soqoteq anon a hi emdaqta ham. Ad nazaqmo ne yaqgo hib a hi soqoteq ne ginon a hi em daqaymo ham. <sup>5</sup> Am wain na yaqmo ham. Sa ne ya iben ham. On mataw yaqgo hib ossa ta ya in gigo hib osaiqta na in ginon kabemmo emayta ham. Na ezaqgo ne ya ihulosa yageq

ne ginon araq a hikidikmo em daqay ham. <sup>6</sup> Ya imam in on mataw yaqgo hib soqotim a hi osayta na giqurot tayan in miliyawim may bugayta ham. Bilaqne mataw ay aben samanta urot tayim hunegan lehim mayaqta nazaq ham. Mataw am aben naqanta ginuwim faqab eman oyaqta ham. <sup>7</sup> Nazaq iyan ya ne gigo hib ossa yaqgo gamuk ne gigemab ussa ne nagah ginad usaqta na ago susumun yagsa ya ne gimen tiqem negdaiq ham. <sup>8</sup> Ya ne gibilenaiq ham. Ne yaqgo disaipel iyeq ginon kabemmo emiy haqaiq ham. Na ezaqgo ya imam daq naqmo ago hib abin ayahta waqaaqta ham.

<sup>9</sup> Ya imam ya inan anad bilaqaqta nazaqmo ya ne ginan inad bilaqaqmo ham. Nazaq iyan ya ne ginan inad bilaqsa ne hi ihulosiy ham. <sup>10</sup> Ne yaqgo gunun ya tinegta na muz bugsa teq ya ne ginan inad bilaqsa ne a hi ihulos daqay ham. Ya imam ago gunun muz bugsa in ya inan anad bilaqsa ya in a hi hulosaqta nazaqmo ham.

<sup>11</sup> Yaqgo inad dimniy in ne gigemab ayahmo usdaq haqad ya gamuk ka gibilenaiq ham. <sup>12</sup> Teq yaqgo gunun na in kazaq ham. Ya ne ginan inad bilaqaqta nazaqmo ne an anan ginad bilaqanmo ham. <sup>13</sup> Mat araq ayogniz ginadin emad gilumsihad gimen ahol nog hulosdaqta na, daq na in an anan ginad bilaqgo adan bunmo giquriyamim in ameb diqta ham. <sup>14</sup> Ne yaqgo gunun ya nawa tigibilenta na muz bugad teq ne ya iyognizmo diq tiqiy daqay ham.

<sup>15</sup> Kabibiy mat ago ayahta daq emsa in daq na alulin a hi hurit kemaqta ham. Teq ne nazaq a haiq ham. Ya imam ago hib gamuk bunmo huritta na ya ne tigibilen bug ham. Nazaq iyan ya ne ginan yaqgo kabibiy mataw nazaq a ta hi bilaqdaiq ham. Muran ya ne ginan ya iyognizmo diq tibilaqaiq ham. <sup>16</sup> Ne ya inan ni i gigo haqan ya a hi osaiqta ham. Haiq ham. Yaqmo ne ginan yaqgo haqan ne osayta ham. Ne yaqgo kabiy emgo haqad ya ne gitowun tiqem ham. Emad ya bilay, Ne leheq yaqgo kabiy emsa ne gigo kabiy na anon eman hay ham. Anon emid teq anon na tuqus tutdaq haqad ya bilay ham. Nazaq iyan ne ya ibinib nagah araq anan Gimam Iyah bulonid in tinegdaq ham. <sup>17</sup> Ya gunun kazaqmo ne negaiq ham. Ne an anan ginad bilaqsa osiy ham.

*Yesus bilam, On mataw og kabta teq gigem meqinta yaqgo disaipel neg daqay ham*

<sup>18</sup> Og kab on mataw God gileh ugayta na gigem meqinta negsa teq ne ginad emiy ham. Mebmemo in gigem meqinta ya yagiymo haqiy ham. <sup>19</sup> Helmo ne og kabta iyid teq on mataw og kabta ne ginan ginad

bilaq nagiy ham, in gimo an anan ginad bilaqsa osayta nazaqmo ham. Teq haiq ham. Ya on mataw og kabta bunmo gilikmanib ne gilluwiyim giwaqan ne og kabta a ta hi iyay ham. Nazaq iyan on mataw og kabta gigem meqinta ne negayta ham. <sup>20</sup> Teq on mataw God gileh ugayta na in ya ibaymuzad imeqin toneq in ne gibaymuzad gimeqin ton daqaymo ham. Ari on mataw yaqgo gamuk huriteq in ne gigo gamuk tuhurit daqaymo ham. Nazaq iyan ya mebmemo ne gibilenim bilay, Kabibiy mat in ago ayahta a hi itiyondaq hayta na ne anadin emiy ham.

<sup>21</sup> Mataw og kabta na in mat ya iqeman bolta na ago a hi huritayta ham. Nazaq iyan ya ibin ne gigo hib ussa in ne gibaymuzad gimeqin ton daqay ham. <sup>22</sup> Helmo ya mataw na gigo hib boleq a hi gibilenta iyid in daq meqinta emayta na ananin a hi waq nagiy ham. Teq ya bolim tigibilen ham. Nazaq iyan in daq meqinta emayta na ananin tuwaq daqay ham. Ananin waqad in gamuk araq bilaq daqayta haiq tiqiy daqay ham. <sup>23</sup> Mat agem meqinta ya yagad in agem meqinta God ugaqtamo ham. <sup>24</sup> Mat araq boleq ya kabiy emta nazaq in a hi em nag ham. Nazaq iyan ya og kab boleq kabiy a hi emta iyid mataw og kabta in daq meqinta emayta na ananin a hi waq nagiy ham. Teq haiq ham. Ya og kab bolim kabiy emsa in ahol tuwaq kemiy ham. Ahol waqad in gigem meqinta ya yagad in ya imam tuqaymo ham. <sup>25</sup> In gigo daq nawa na in gamuk araq in gigo marorib mar tonan usaqta na tuwol net bug ham. Gamuk na bilam, Mataw na gigem meqinta samanta yagiy haqad in bilam ham. *Buk Song 35.19; 69.4*

<sup>26</sup> Ari ya imam ago hib leheq teq ya ne giteqsor na emid ne gigo hib tuboldaq ham. Na in God ago Bugaw Dimunta gamuk helta bilaqaqta ham. In Gimam Iyah inaq osaqta ham. In boleq ya mat ezaq diqta na ago ne tigibilendaq ham. <sup>27</sup> Teq kwaziqmo ya og kab kabiy alulin emsa ne ya ibiyad osim bo muran kawa tiqiy ham. Nazaq iyan ne nagah gimeb ahol waqiyta na ago ne on mataw gibileniyimo ham.

## 16

<sup>1</sup> Ne ginad ya inan helmo haqayta na hi hulosisy haqad ya gamuk ka gibilenaiq ham. <sup>2</sup> Abeb mataw ne gibaymuzsa ne in ginaq bit humab wolaytab humab a ta hi wol daqay ham. Helmo kam nab mataw na ginad em daqay, I Yesus ago mataw ka ginol emad i bilaqne God ayon tamaz em nog iyauq haq daqay ham. <sup>3</sup> Mataw na ya imam ago a hi huritayta ham. Ad in yaqgo a hi huritaymo ham.

Nazaq iyan in ne nazaq tigiton daqay ham. <sup>4</sup> Abeb mataw nazaq ne gimeqin tonsa ne yaqgo gamuk ka anadin a ta em daqay haqad ya muran kawa ne tigibilenaiq ham.

*God ago Bugaw Dimunta boleq kabiy emdaqta na ago Yesus bilam*

Kwaziqmo ya nenaq luw osad nagah kagan ago ya ne a hi gibilenta ham. Na ezaqgo ya nenaq osad iyan ham. <sup>5</sup> Ari muran ya muleqim ya imam iqeman bolta na ago hib ta lehaid ham. Ta teq ne gigo araq diq ibilenim bilaqag, Ni edob lehaq? nazaq in a hi susumun yaqag ham. <sup>6</sup> Ad muran ya gamuk ka gibilensa ne huritad ginad a hi em hasad ne gigem afaqan diq iyaq ham. <sup>7</sup> Ya helmo ne gibilenaiq ham. Ya ne gilumsihnan haqad ya gihulosim imam ago hib tilehaiq ham. Ya nab a hi lehid teq ne giteqsor na ne gigo hib a hi bolnag ham. Nazaq iyan yaqmo leheq teq mat na emid ne gigo hib tuboldaq ham. <sup>8</sup> In og kab boleq on mataw God gileh ugayta na bunmo giqisihunsa in daq meqinta emay na ago gihol tiloyin daqay ham. Ad in giqisihunsa in ezaq toneq God ameb titnonta iy daqayta na ago tuhurit daqay ham. Ad in giqisihunsa in teq hazizirib tursa God in gigo daq gilum kemmaqta na ago in ginad tiqem has daqay ham. <sup>9</sup> On mataw God gileh ugayta bunmo in ya inan helmo a hi haqayta ham. Nazaq iyan ne giteqsor na boleq in on mataw na giqisihunsa in daq meqinta emay na ago gihol tiloyin daqay ham. <sup>10</sup> Teq ya imam ago hib lehid ne a ta hi ibiy daqay ham. Nazaq iyan ne giteqsor na in on mataw og kabta na giqisihunsa in ezaq toneq God ameb titnonta iy daqayta na ago tuhurit daqay ham. <sup>11</sup> Teq God in mat meqinta og ka wamuzim osaqta na hazizirib emim ayon tibilamta ham. Nazaq iyan ne giteqsor na in on mataw God gileh ugayta bunmo giqisihunsa in teq nazaqmo hazizirib tursa God in gigo daq gilum kemmaqta na ago in ginad tiqem has daqay ham.

<sup>12</sup> Yaqgo gamuk kabemmo ne gibilendaqta usaq ham. Teq ne muran huritgo ginad siqim iyaq ham. <sup>13</sup> Ari abeb God ago Bugaw gamuk helta bilaqagta na boleq in ne ginad wamuzsa ne gamuk helta bunmo alulin tuhurit daqay ham. Teq in anadibmo gamuk a hi gibilendaqta ham. In yaqgo hib gamuk huritaqta naqmo tigibilendaq ham. Ad in nagah abeb teq gwahtiqaqta na ago tigibilendaqmo ham. <sup>14</sup> God ago Bugaw na in ya ibin emid ayah iydaq ham. Na ezaqgo in yaqmo igo gamuk waqeq ne gibilendaq ham. <sup>15</sup> Ya imam ago nagah bunmo in yaqgota ham. Nazaq iyan ya bilay, God ago Bugaw in yaqmo igo gamuk waqeq gibilendaq hay ham.

*Yesus bilam, Ne gigem afaqan iyaqta na hiqiysa teq ne ginad tidimniydaq ham*

<sup>16</sup> Kam asitmo tihiqiyid teq ne a ta hi ibiy daqay ham. Ad kam asitmo loq nog iyeqmo ne a ta ibiy daqay ham. <sup>17</sup> Haqan in ago disaipel asor an bulonim bilaqiy, In bilaqag, Kam asitmo tihiqiyid teq ne a ta hi ibiy daqay haqag haqiy. Ad kam asitmo loq nog iyeqmo ne a ta ibiy daqay haqag haqiy. Teq in bilaqag, Na ezaqgo ya imam ago hib lehaidta na ago haqad in bilaqag haqiy. Gamuk ko alulin ezaq diqta in i gibilenaq? haqiy. <sup>18</sup> Haqadmo in bilaqiy, Kam asitmota nawa in anan bilamta na in naga diq anan bilaqag? haqiy. Nan kowa in bilaqagta ko alulin ago i ginad a hi em hasauq haqiy.

<sup>19</sup> Haqsa Yesus anad tiqam, Yaqgo disaipel in nan na ago susumun yagnan ginad emay ham. Haqad in gibilan, Ya bilay, Kam asitmo tihiqiyid teq ne a ta hi ibiy daqay hay ham. Ad kam asitmo loq nog iyeqmo ne a ta ibiy daqay hay ham. Nan nawa ya bilayta na ago ne an bulonad osay ye? ham. <sup>20</sup> Ya helmo ne gibilenaiq ham. Ne gaqad gaq ayahmo tuwaz daqay ham. Sa on mataw God gileh ugayta na in ginad diq tidimniy daqay ham. Ne ginad ayahmo meqniydaq ham. Ta teq ne ginad meqniydaqta na hiqiysa ne ginad tidimniy daqay ham. <sup>21</sup> Aw amun baysa anad meqniyaqta ham. Na ezaqgo in amun emdaqta akaman tugwahtim ham. Ari in amun tiqemimmo in santitiy na anadin a ta hi emaqta ham. Na ezaqgo in ago amun muturta og kab tugwahtimta na ago in anad tidimniyaq ham. <sup>22</sup> Ad nazaqmo muran ne ginad ayahmo meqniyaq ham. Teq abeb ya bo ne ta gibiydaqta nabmo ne ginad a ta dimniydaq ham. Ginad dimniysa mataw ne gigo ginad dimniy na walemgo biyab a hi iy daqay ham. <sup>23</sup> Kam nab ne nagah araq ago a ta hi susumun yaq daqay ham. Ya helmo gibilenaiq ham. Ne nagah araq ago ginad emad ya ibinib imam bulonsa in tinegdaq ham. <sup>24</sup> Kwaziqmo ne nagah araq waqgo haqad ya ibinib a hi susumuniyaqta ham. Ari muran ya ne gibilenaiq ham. Ne susumuneq teq ne tuwaq daqay haqaiq ham. Waqeq ne ginad dimniy hasa osad ne nagah araq ago ginad a hi meqniydaq ham.

*Yesus bilam, Ya og ka ago zaway tuquriyam bug ham*

<sup>25</sup> Gamuk kawa ya bilaqaiqta ka ya gamuk awowunmo bilaqaiqta ham. Ari abeb teq ya gamuk awowun amalib a ta hi gibilendaq ham. Kam na tugwahtiqnan tonaq ham. Gwahtiqid teq ya imam abin anononmo bilaq sireqeqmo tigibilendaq ham. <sup>26</sup> Kam nab ne ya ibinibmo Gimam

Iyah tisusumun ug daqay ham. Ya ne gimem Gimam Iyah susumun ugid in ne gilumsihdaq nazaq ya a hi bilaqdaiq ham. Na ezaqgo negmo teq Gimam Iyah tubulon daqay ham.

<sup>27</sup> Ne ya iman ginad bilaqsa osiyta ham. Ad ya imam ago hib osim bolta na ne anan helmo tihaqiymo ham. Nazaq iyan Gimam Iyah ne ginan anad bilaqagta ham. <sup>28</sup> Kwaziqmo ya imam inaq osim teq ya hulosisim og kab bolta ham. Ta muran ya og ka hulosad ya imam ago hib ta lehaiq ham.

<sup>29</sup> Haqan in ago disaipel bilaqiy, Muran ni nan tibilaq sireqaq haqiy. Bilaq sireqaq ni gamuk awowun a ta hi bilaqag haqiy. <sup>30</sup> Muran i ginad tiqem hasauq haqiy. Ni nagah bunmo ago tuhurit kamta haqiy. Mataw gigo susumun ginadib ussa in a hi bilaqsamo ni amenin emaqta haqiy. Nazaq iyan i ginad emauq, Ni God-mo agerab osim bolta haqauq haqiy. <sup>31</sup> Haqan Yesus amenin emim bilam, Muran ne helmo tihaqay ye? ham. <sup>32</sup> Ne huritiy ham. Mataw ne gimuzsa ne hares iyad giquliqab tukeq tileh daqay ham. Lehad ne ya ihulosid ya imomo tuqosdaiq ham. Kam na tugwahtiqtan tonad teq in tugwahtimta nog tiqiy ham. Ta teq ya imomo diq a hi osdaiq ham. Na ezaqgo ya imam in ya inaq osaqta ham. <sup>33</sup> Ne ya iholib soqoteq inaq osad ne gigem kute nemdaq haqad ya gamuk ka gibilenaiq ham. Ne og kab ossa afaqan teq ne gigo hib tugwahtiqaq ham. Teq ne giwaz meqniyyi ham. Ya og ka ago zaway tuquriyam bugta ham.

## 17

### *Yesus in ago disaipel gimem God bulon*

<sup>1</sup> Yesus gamuk nawa na tibilaqim teq in ame ulilib Heven-ib gwalsa bilam, Ya imam ham, ya ibin ayah iydaqta na akaman tugwahtim ham. Nazaq iyan ni nitatin abin emid ayah iyan ham. Ayah iyid teq in ni nibin emid ayah tiqiyaqmo ham. <sup>2</sup> Ni og kab on mataw bunmo giqeman in ni nitatin ahaqenib tiqiyiy ham. Ad ni nitatin zaway ayahmo tuqugmo ham. Zaway ugan in mataw ni ugta na giqemid in tuteqmo kuluwa-kuluwmo tuqos daqay ham. <sup>3</sup> Teq os dimunta ahiqiy haiqta na alulin in kazaq ham. On mataw God diqmo ago tuhurit daqay ham. Huritad in Yesus Kraiss mat ni eman bolta na ago tuhurit daqaymo ham. Mataw na i gigo nazaq diq huriteq teq in os dimunta kuluwa-kuluwmo osayta na tuwaq daqay ham. <sup>4</sup> Ni kabiy yagta na ya eman tihiqiy bug ham. Ya nazaq emim nibin eman og kab ayahmo diq tiqiy ham. <sup>5</sup> Kwaziqmo og ka a hi gwahtiqsamo ya ibin ayahta inaq ni nimeb osyaiqta ham. Ari muran ni ya ibin ayahta na a ta yagid

kwaziqmo ya nimeb osyaiqta nazaqmo ya ta osiq ham.

<sup>6</sup> Ni on mataw og kabta asor giyagan ya in gigo hib ni nibin eman ulal tiqiy ham. Mataw na in ningota ham. Teq ni mataw na tigiyyag ham. Yagan ya ningo gamuk gibilenan in tumuz bugay ham. <sup>7</sup> Muran in ginad emay, Ni nagah bunmo yagta na in ninmo ningo hib bolta haqay ham. <sup>8</sup> Na ezaqgo ya gamuk bunmo ni yagta na tigibilen bug ham. Teq ya ninaq osan ni ya iqeman bolta na ago in huritim anan helmo tihaqiymo ham.

<sup>9</sup> Ni yaqgo on matawmo diq gilumsihdaq haqad ya kawa ni tinibilenaiq ham. Ya og kab on mataw gileh nigayta na gimem a hi nibilenaiq ham. Haiq ham. Ni on mataw giyagta naqmo ni gilumsihdaq haqad ya nibilenaiq ham. Na ezaqgo mataw naqmo in ningota ham. <sup>10</sup> Yaqgo on mataw in ningota ham. Ad ningo on mataw in yaqgota ham. Nazaq iyan yaqgo on mataw na gigo hib ya ibin ayahta tuway ham. <sup>11</sup> Muran ya og kab a ta hi osdaiq ham. Ta teq yaqgo on mataw ka og kab tuqos tut daqayta ham. Os tutsa ya giuloseq ningo hib tilehdaiq ham. Ya imam dimun diqta ham, ni nibin ayah diqta na tiyag ham. Nazaq iyan ni yaqgo mataw ya ibinib osayta ka giwamuz ham. Giwamuzsa in ginad gigem amulikmo iyeq osiy ham. Ya ninaq ginad gigem amulikmo iyim osauqta nazaq ham. <sup>12</sup> Ni nibin ayahta na tiyag ham. Yagan ya mataw ya ibinib osayta ka giwamuzsa in dimunmo osayta ham. Ya in giwamuzsa in gigo araq diq nabag a hi iy ham. Ari mat amulikmo ni anan bilam, In teq meqniydaq hamta naqmo amomo in nabag iyta ham. Iyan daq na in ningo marib mat na ananin usaqta na tuwol net bug ham.

<sup>13</sup> Muran ya ningo hib tilehaiq ham. Teq yaqgo inad dimniy in yaqgo on mataw gigemab ayahmo usdaq haqad ya og kab nenaq osad gamuk kagan bunmo tigibilen bug ham. <sup>14</sup> Ya og kabta a haiq ham. Ad nazaqmo ya ningo gamuk yaqgo on mataw tinegan in ya isen muzim in og kabta a haiqmo ham. Nazaq iyan on mataw og kabta in yaqgo on mataw gigem meqinta negayta ham. <sup>15</sup> Ni yaqgo on mataw giwaqid in og kab a ta hi os daqay haqad nazaq ya a hi nibilenaiq ham. Yaqgo on mataw og kab ossa ni giwamuzsa mat meqinta na hi gimeqin tonan haqad ya nibilenaiq ham. <sup>16</sup> Ya og kabta a haiq ham. Ad nazaqmo yaqgo on mataw in og kabta a haiqmo ham. <sup>17</sup> Ningo gamuk in helmo diq ham. Nazaq iyan ningo gamuk helta na in yaqgo on mataw gigemab kabiy emsa ni giqemid in ningo on matawmo diq iyiy ham. <sup>18</sup> Ni ya iqeman ya on mataw og

kabta gigo hib bolta nazaqmo ya igo on mataw ka giqeman in on mataw na gigo hib tilehaymo ham. <sup>19</sup> Yaqqo on mataw ka in ningo gamuk helta huriteq teq in gihol bunmo nigad in ningo kabiy amomo emgo os daqay haqad ya nazaqmo ihol bunmo tinigim ya ningo kabiy amomo emgo tuqosaiq ham.

<sup>20</sup> Ari ya mataw kawa nenaq osaiqta ka gimomo ginan a hi nibilenaiq ham. Haiq ham. Mataw ka leheq on mataw ta asor gibilenid helmo haq daqayta na inaqmo ya ginadin emad gamuk ka nibilenaiq ham. <sup>21</sup> Nibilenid ni yaqqo on mataw na bunmo giqemid in ginad gigem amulikmo iyeq os daqay haqad. Ya imam ham ni yaqqo hib ossa ya ningo hib osaiqta nazaqmo yaqqo on mataw in i gigo hib osiy haqad ya inad emaiq ham. Ossa on mataw ni gileh nigayta na in nazaq gibiyad in ya inan bilaq daqay, Helmo God in mat na eman bolta haq daqay ham. <sup>22</sup> Ni ya ibin eman ayahmo tiqiy ham. An yaqqo mataw ya ibinib gigem ginad amulikmo iyeq os daqay haqad ya ihol abin ayahta na in tineq ham. Negid ya ni ninaq gigem amulikmo iyim osauqta nazaqmo in tuqos daqaymo haqad ham. <sup>23</sup> Ya in gigo hib ossa ni yaqqo hib tuqosdaq ham. Nazaq iyid teq yaqqo on mataw ka gigem amulikmo tiqiy haseq os daqay ham. Ossa og kab on mataw ni gileh nigayta na in gibiyad ginad em daqay, Helmo haq daqay, God-mo Yesus eman bolta haq daqay ham. Haqad ni ya inan ninad bilaqta nazaqmo ni yaqqo on mataw ginan ninad bilaqta na ago in tuhurit daqaymo ham.

<sup>24</sup> Ya imam ham, uliq ya osdaiqta nab ya on mataw ni giyagta na nenaq osnan inad bilaqat ham. Ya nenaq ossa in ya ibin ayahta teq ya ihol anuwun ni giyagta na ahol tuwaq daqay ham. Kwaziq diqmo og ka a hi gwahtiqsamo ni ya inan ninad bilaqsa osta ham. Na ago ni nagah aseseqta na tiyag ham. <sup>25</sup> Ya imam ham, ni daq titnonta emaqta ham. Og kab on mataw gileh nigayta na in ningo a hi huritayta ham. Teq ya ningo tuhuritta ham. Sa ni ya iqeman bolta na ago yaqqo on mataw ka tuhuritiymo ham. <sup>26</sup> Ya nibin eman yaqqo on mataw gigo hib ulal tiqiyta ham. Teq ya nibin emid in gigo hib ulal tiqiy hasdaq ham. Ulal iy hassa teq ni ya inan ninad bilaqta na ago adan in gigo hib ussa ya in gigo hib tuqosdaiqmo ham.

## **Yesus santitiy sorim moqim teq ta eram**

### **18**

*Judas Yesus waqim bab gibenab am (Matyu 26.47-56; Mak 14.43-50; Luk 22.47-53)*

<sup>1</sup> Yesus gamuk na bilaqim tihiqyan in ago disaipel nenaq lehim yuw anan Kidron haqay na asarqan tuqurotiy. Yuw na aqurumun kozaq ban uzaq ara q gel tonan usta. In yuw asarqan na urotim lehim in uzaq na agelin aduganib le tugwahti qiy. <sup>2</sup> Teq Judas mat Yesus bab gibenab emdaqta na in saw na ago hurittamo. Na ezaqgo kam kabemmo Yesus ago disaipel nenaq uzaq nabmo leheq humab wol yaqayta na ago. <sup>3</sup> Nazaq iyan Judas in mataw tamaz emayta gigo aseseqta na giyogniz Farisi nenaq gigo hurmey asor teq Rom gigo bab mataw asor giwaqim in dan giqisihunim giqad saw nab tuboliy. Bolad mataw na em sebur giwaqim teq in lam sul mideran oysa in giwazim giqad boliy.

<sup>4</sup> Bolan Yesus daq bunmo aholib gwahti qda qta na ago tuhuritim in mataw biyahta na gigerab loqim tisuusumun nag, Ne nog diq nagunay? ham. <sup>5</sup> Haqan mataw na bilaqiy, I Yesus uliq Nasaret-ibta nagunim bol haqiy. Haqan Yesus bilam, Na yaqmo kawa ham. Haqsa Judas mat Yesus bab gibenab emdaqta na in nab turmo. <sup>6</sup> Ari Yesus bilam, Na yaqmo kawa haqanmo mataw na hureq hasim ta lehim ogib woqim tuqusiy. <sup>7</sup> Sa Yesus a ta gibilan, Ne nog diq nagunay? ham. Haqan mataw na bilaqiy, Yesus Nasaret-ibta haqiy. <sup>8</sup> Haqan Yesus bilam, Ya ne tigibilenta ham. Yaqmo kawa haqaiq ham. Ari ne yaqmo inagunsun teq ne yaqqo mataw ka gihulosid lehiy ham. <sup>9</sup> In nazaq bilaqadmo in teko God bulonim bilam, Ya mataw ni giyagta na giwamuzsa in gigo ara q diq nabag a hi iy hamta na in tuwol net bug.

<sup>10</sup> Yesus nazaq haqanmo Saimon Pita baqir ara q asanib sihenim a bolta na tuhureq has. Hureq hasimmo in mat ara q adeksan aqabun ger qwatayanmo ogib tuwom. Mat na anan Malkus haqayta. In tamaz mat danmebta ago kabibiy mat ara q. <sup>11</sup> Anmo Yesus in Pita bulon, Ni baqir asanib ta sihen ham. Ni ninad ezaq emaq? ham. Ya imam gog yagan ya ayuwun a hi uluw bugdaiq e? ham.

### *Mataw Yesus waqim Anaz ago hib a lehiy*

<sup>12</sup> Ari bab mataw gigo amebta inaq teq Juda gigo hurmey na in Yesus wazim warigib am tuwaziy. <sup>13</sup> Am wazim danmeb in waqim ad Anaz ago hib tilehiy. Anaz in mat anan Kayafas haqayta na alen. Teq ulig nab Kayafas in tamaz mat danmebta iyim osta. <sup>14</sup> Mat naqmo kwaziqmo Juda mataw gibilenim bilam, Mat amulikmo on mataw bunmo gimen moqdaqta na in dimunmo hamta amatin.

*Pita Yesus gileh ug*

(*Matyu 26.69-70; Mak 14.66-68; Luk 22.55-57*)

<sup>15</sup> Sa Saimon Pita ayow disaipel araq inaq inaq in Yesus muzim inaq tamaz mat danmebta na ago bitab tilehiy. Lehan mat ayahta na in disaipel araq na ago tuhuritta iyan disaipel naqmo Yesus muzim inaq bit na ago gel aduganib le tugwahtim. <sup>16</sup> Sa Pita dan ezab asanibmo titur. Tursa tamaz mat danmebta na in disaipel araq na ago huritta iyan disaipel na bolim aw dan ez wamuzim turaqta na bulonad teq in Pita waqim inaq aduganib le ta gwahtim. <sup>17</sup> Gwahtiqsa aw na Pita susumun ugim kazaq bulon. Luweq ni inaqmo mat ko ago disaipel iydaq ham. Haqan Pita bilam, Ya in ago disaipel a haiq ham. <sup>18</sup> Teq saw amuditqan iyim tim ginolsa kabibiy mataw asor hurmey nenaq faq ulaman tuqoyta azamorin kiskismo oysa in iterad nab turiy. Tursa Pita le mataw na nenaq faq iterad nab turmo.

*Tamaz mat danmebta na Yesus ayon hazizir am*

(*Matyu 26.59-66; Mak 14.55-64; Luk 22.66-71*)

<sup>19</sup> Ari Yesus tamaz mat danmebta na ameb tursa mat na in Yesus ago disaipel ginan susumun ugim teq in Yesus ago suleq in bilaqyaqta na anan tisuusun ugmo. <sup>20</sup> Susumun ugan Yesus amenin emim bilam, Ya on mataw bunmo ulalabmo gibilenyaiq ham. Sirisirimo Juda on mataw bo bit humab wolaytab teq Tempel ago gel aduganib humab woleq ossa ya suleq negyaiq ham. Ya gamuk araq ulilemimmo a hi bilaqyaiq ham. <sup>21</sup> Nagaqgo ni susumun yagaq? ham. Ya mataw suleq negta naqmo ni susumun neg ham. In yaggo gamuk hurit kemiya ham. <sup>22</sup> In gamuk nazaq bilaqanmo hurmey araq nab turta na era Yesus amanmanan wolimmo bulon, Nagaqgo ni nazaq gamuk atoranmo bilaqad ni tamaz mat danmebta ka ago gamuk amenin emaq? ham. <sup>23</sup> Haqan Yesus bilam, Edowa ya nan meqinta bilay? ham. Ni muran kawa mataw ka gimeb bilaqsa ya huritiq ham. Haiq iyid ta nagaqgo ya gamuk helta bilaqsa ni ya inolag? ham. <sup>24</sup> Anno Anaz in Yesus aben aqamun inaqmo eman tamaz mat danmebta Kayafas ago hib tilah.

*Pita a ta bilam, Ya Yesus ago a hi hurit ham*

(*Matyu 26.71-75; Mak 14.69-72; Luk 22.58-62*)

<sup>25</sup> Sa Saimon Pita mataw na nenaq faq iterad tursa in susumun ugim buloniy, Luweq ni mat na ago disaipel araq iydaqmo haqiy. Haqan in bilam, Ya in ago

disaipel a haiq ham. <sup>26</sup> An tamaz mat danmebta ago kabibiy mat araq in uzaq nab Pita in ago asenlul araq adeksan urotan in ahol wamta iyan in bilam, Ninmo daqag uzaq aduganib in inaq ossa ya nibiy ham. <sup>27</sup> Haqan Pita a ta bilam, Na ya a haiq ham. Haqanmo kurek tigayon.

*Mataw Yesus wazim ad Pailat ago hib lehiy*

(*Matyu 27.1-2, 11-14; Mak 15.1-5; Luk 23.1-5*)

<sup>28</sup> Ari tarommo diq Juda mataw aseseqta na in Yesus wazim Kayafas ago bit hulosisim in waqim ad Pailat ago hib tilehiy. Lehim in gavman amebta na ago bit aduganib le a hi gwahtiqiy. In ginad emiy, Luweq i God ameh gihol anumlan inaq iyid i Pasova akaruwun a hi neqam haqiy. <sup>29</sup> Haqad in asanib Pailat amen emim tursa Pailat gigerab bolim tisuusun nag, Mat na ezaq tonan ne amalib nan emman a boliy? ham. <sup>30</sup> Haqan mataw na amenin emim bilaqiy, Mat ka daq meqinta a hi emid i ningo hib ad a hi bol nag haqiy. <sup>31</sup> Haqan Pailat gibilan, Ne mat na waqeq a leheq negmo gigo maror amalib ago daq ulum kemeq wastitayiy ham. Haqan Juda mataw na bilaqiy, Ne Rom gunun ayahta eman igmo ginadib mat araq wol emid moqgo aza-wayin haiqgam haqiy. <sup>32</sup> In nazaq bilaqad kwaziqmo Yesus in naga daqin amalib moqdaqta anan bilamta na in tuwol net bugiy.

<sup>33</sup> Ari mataw na nazaq bilaqan Pailat ahol buliyim le ago bit ayahta na aduganib ta gwahtim. Gwahtiqim in Yesus lilewunan bolan tisuusun ug, Ni Juda on mataw gigo king e? ham. <sup>34</sup> Haqan Yesus bilam, Ninmo ninad emad gamuk na bilaqag o haiq mat araq nibilenan ni nazaq ya inan bilaqag? ham. <sup>35</sup> Haqan Pailat amenin emim bilam, Ya Juda mat a haiq ham. Ninmo ningo walmataw teq ninmo ningo mataw tamaz emayta gigo aseseqta naqmo in ni niwazim yaggo hib a boliy ham. Ni daq ezaq diqta am? ham.

<sup>36</sup> Haqan Yesus bilam, Yaggo maror in og kabta a haiq ham. Ari yaggo maror og kabta iyid teq yaggo kabibiy mataw eraqeq ya ibabun nenaq an wolsa mat araq ya iwaqeq bab gibenab a hi iqem nag ham. Ta teq yaggo maror in og kabta a haiq iyan yaggo mataw nazaq a hi emay ham.

<sup>37</sup> Haqan Pailat bulon, Ni bilaqag, Yaggo maror in og kabta a haiq haqsa ya inad emaiq, Ni king araqagya haqaiq ham. Haqan Yesus bilam, Ni ya inan bilaqag, Ni king araq haqag ham. Teq ya kawa ni tinibilen kemaiq ham. Ya gamuk helta bilaqaiqta naqmo in yaggo kabiy ham. Ya inen iqeman ya kabiy naqmo emgo og kab gwahtiyta ham. Gwahtiqim ya gamuk helta



bilaqsa mataw gamuk helta muzinayta na bunmo in ya iqez huritayta ham. <sup>38</sup> An Pailat susumun ugim bilam, Naga gamukin in gamuk helta? ham.

*Pailat Yesus hulosis lehgo bilaqan Juda mataw hulosis*

(*Matyu 27.15-31; Mak 15.6-20; Luk 23.13-25*)

Pailat nazaq bilaqim teq in asanib Juda gigerab le a ta gwahtim. Gwahtiğim in kazaq gibilan, Ya mat ko ago afaan araq nagunim ahol a hi way ham. <sup>39</sup> Teq ne gigo daq ne ulig bunmo Pasova akamnib mat araq irquran osaqta atowun emim ibilenan ya hasan gwahtiqaqta ham. Nazaq iyan ne ginad ya Juda gigo king ko aqamun hasid ne gigo hib lehdaq e? ham. <sup>40</sup> Haqan mataw na dedibmo bilaqiy, Nawa na haiq haqiy. Ni Barabas-mo hulosis bol igan haqiy. Mat anan Barabas haqayta na in gunun othasad mataw haresmo ginol titayad gigo es nagh giwaqyaqta amatin.

## 19

*Pailat bilam, Yesus ayib dom woliy ham*

<sup>1</sup> Ari teq Pailat in Yesus waqim ago bab mataw gibenab eman in tuwoltitayiy. <sup>2</sup> Woltitayim teq in am asasuqin inaqt waqim tal tonim king ago balaw nogta afaqinib tiqemiy. Emim teq in tubusan araq kakaqta waqim aholib emiy. <sup>3</sup> Emim in agerab loqeq bulon yaqay, Ni Juda gigo king-mo diqta haq yaqay. I nibin wazan ulilibmo gwalehaq haq yaqay. Haqadmo in amanmanib tuwol yaqay.

<sup>4</sup> Sa teq Pailat bit asanib gwahtiğim Juda mataw na a ta gibilan, Ne huritiy ham. Ya mat na ago daq meqinta araq ahol a hi way ham. Nazaq iyan ya waqeq ad asanib tubolnan ham. <sup>5</sup> Haqanmo Yesus afaqinib am asasuqin inaqt na teq tubusan kakaqta na aholib ussa in asanib mataw biyahta na gimeb bo tugwahtim. Gwahtiğim Pailat gibilan, Mat ka ahol waqiy ham. <sup>6</sup> Haqan mataw tamaz emayta gigo aseseqta na giyogniz hurmey na nenaq in Yesus ahol waqad dedibmo bilaqiy, Mat na ayib dom woliy haqiy. Ayib dom woliy haqiy. Haqan Pailat gibilan, Negmo waqeq a le ayib dom woliy ham. Ya in ago daq meqinta araq ahol a hi way ham. <sup>7</sup> Haqan Juda mataw aseseqta na amenin emim bilaqiy, I gigo maror aduganib gunun araq ayahta usaq haqiy. Sa mat na i gigo gunun na itiyonim bilam, Ya God atatin ham haqiy. In nazaq haqan i gigo gunun na bilam, In moqan ham haqiy.

<sup>8</sup> Haqan Pailat gamuk na huritim in rab naqmo hiqiyyaq. <sup>9</sup> Ad in Yesus waqim inaqt ago bit aduganib a ta gwahtiğim in susumun ugim bilam, Ni edob bolta? ham.

Teq haiq. Yesus gamuk amenin araq a hi bilam. <sup>10</sup> Anmo Pailat bulonim bilam, Ni yaqgo gamuk amenin a hi emdaq e? ham. Ya niqamun hasid ni samanmo gwahtiğgo azawayin ya iholib usaq ham. Teq ya ni ayib dom wolgo azawayin ya iholib usaqmo ham. Na ni ninad a hi emdaq e? ham. <sup>11</sup> Haqan Yesus bilam, Mat ulilib osaqta naqmo in zaway na nigta ham. In zaway na a hi nigid ni daq araq ya iholib emgo nibin hiqiy nag ham. Nazaq iyan mat ya iwaqim ni nibenab amta na in ni niquriyamim in daq meqin diqta am ham.

<sup>12</sup> Yesus nazaq bilaqan nab Pailat in Yesus hulosis lehgo adanteqin tinagunyaq. Ta teq Juda mataw na lileyim bilaqiy, Mat na bilaqaq, Daqmo king araq haqad in Sisa ago babmo diq iyim luwaq haqiy. Ni hisid lehid teq ni Sisa ayow a hi iydaq haqiy.

<sup>13</sup> Haqan Pailat gamuk na huritim in Yesus waqim ad asanib a ta gwahtim. Gwahtiğim in ago ban in mataw gigo daq gilum kemad osaqta nab in tuqos wom. Ban na in bit ago veranda araq anan Gig Rireniy haqaytab usta. Hibru nanib in veranda na anan Gabata haqayta. <sup>14</sup> Teq kam na in Pasova ayon nagh wastitayayta akaman. Ari kam nab zeq ayahtab 12 kilok nazaq Pailat ago ban nab tuqos woqim osad in Juda mataw na gibilan, Ahol waqiy ham. Ne gigo king kawa turaq ham. <sup>15</sup> Haqan Juda mataw na lileyim bilaqiy, Wol emid moqan haqiy. Wol emid moqan. Ayib dom wolid in moqan haqiy. Haqsa Pailat tisusumun nag, Ya ne gigo king ka ayib dom woldaiq e? ham. Haqan mataw tamaz emayta gigo aseseqta na bilaqiy, Sisa amomo in i gigo king haqiy. I gigo king araq haiq haqiy. <sup>16</sup> In nazaq haqan teq Pailat in giqez muzinim in Yesus waqim ayib dom wolgo bab mataw gibenab tiqam. Eman in Yesus waqim ad tilehiy.

*Mataw Yesus ayib dom woliy*

(*Matyu 27.32-44; Mak 15.21-32; Luk 23.26-43*)

Ari in Yesus waqim ad tilehiy. <sup>17</sup> Lehsa Yesus inmo ago ay na sorim ad tilehyaq. Lehad in uliq ayahta na hulosis garah akululqan araq anan Gifaqin Agololan haqayta nabmo in tugwalehiy. Hibru nanib garah akululqan na anan Golgota haqayta. <sup>18</sup> In garah nab tugwalehim saw nab teq in Yesus ayib dom tuwoliy. Wolad in mataw gigermo Yesus inaqt ayib dom giwoliymo. Araq Yesus aqabun ban tursa araq anasaran ban turyaq. Sa Yesus in gilikmanib liqabmo turyaq. <sup>19</sup> Dom tuwolnan teq Pailat mataw gibilenan in Yesus ayib dom woliyta na ananin mar tonim afaqinib tuqotheniy. Gamuk na in kazaq mar toniy.

JUDA GIGO KING YESUS ULIQ  
NASARET-IBTA

<sup>20</sup> Teq saw Yesus ayib dom woliyta na in Jerusalem agerab usaqta. Teq in gamuk mar tonim ay afaqinib emiyta na in Hibru gigo nanib teq Rom gigo nanib teq Grik gigo nanib mar toniyta. Nazaq iyan Juda on mataw kabemmo leh bolad luwad in gamuk na ahol tuwaq yaqay. <sup>21</sup> Sa teq Juda gigo mataw tamaz emayta gigo aseseqta na lehim Pailat bulonim bilaqiy, Ni gamuk “Juda gigo king” nazaq ni a hi mar ton nagta haqiy. “Mat ka bilam, ‘Ya Juda gigo king hamta’” nazaq ni mar ton nagta haqiy. <sup>22</sup> Haqan Pailat bilam, Nab iyan ham. Ya gamuk tumar tonta na in dimunmo ham. Nazaq usan ham.

<sup>23</sup> Ari mataw bab emayta na in Yesus ayib dom tuwolim teq in ago tubusan giwaqim huseran humab aweweç nazaqmo iy. Iyan in amulik-mulikmo giholyon humab amulikmo waq yaqay. Ad in Yesus ago aholsihen araç waqiyimo. Tubusan na in laplap urotim a hi iniyta. Na in ahol amulikmoqmo atutan haiqta. <sup>24</sup> Nazaq iyan bab mataw na an bulonim bilaqiy, I tubusan ka hi hiksirequq haqiy. I gig amikmikta hunegad mat nog ameb iyeq in tuwaqdaq haqiy. In nazaq bilaqim in gamuk araç God ago marib usaqta na tuwol net bugiy. Gamuk na bilam,

In yaqgo tubusan giwaqim an huserim giholyon waqiy ham. Ad in gig amikmikta hunegim yaqgo iholsihen waqiyimo ham. *Buk Song 22.18*  
Gamuk nazaq usta iyan in daq nazaqmo tiqemiy.

<sup>25</sup> Ari Yesus anen diq teq in anen amikta teq mat anan Klopas haqay na awe anan Mariya haqayta na teq Mariya araç uliq Magdala-ibta na in bunmo ay Yesus dom wolán turaqta na asenab turiy. <sup>26</sup> Tursa Yesus anen teq in ago disaipel in anan anad bilaqta na in giger ay agerab diq tursa Yesus ame wo tigibiy. Gibiyadmo in anen bulonim bilam, Kanen ham ni nitatin nawa turaq ham. <sup>27</sup> Haqad in ago disaipel na bulonim bilam, Ni ninen nawa ham. Haqan kam nab disaipel na in Yesus anen waqim inmo anen nog iyan in wamuzad inaq tuqosyaq.

*Yesus mom*

(*Matyu 27.45-56; Mak 15.33-41; Luk 23.44-49*)

<sup>28</sup> Daq na tihiqiyan Yesus anad tiqam, Yaqgo kabiy bunmo tihiqiy ham. Haqad in gamuk araç God ago marib usaqta na tuwol net bugnan haqad in bilam, Ya yuwnan moqaiq ham. <sup>29</sup> Teq deg araç wain ayun agon iyta ate gwalim usta nab os. Ossa Yesus bilam, “Ya yuwnan moqaiq”

haqanmo mataw nab turiyta na in ay anan hisop haqayta aben araç waqim amotnib tubusandek am wazim wain ayun na ulum turim Yesus ateb tiqemiy. <sup>30</sup> Eman Yesus sisowim huloadmo in bilam, Kabiy tihiqiy ham. Haqadmo in afaçin runan woqanmo in ahol awitan huloadmo tilah.

*Bab mat araç Yesus azawarnib ulum*

<sup>31</sup> Ari kam mataw Yesus ayib dom woliyta na in Juda gigo lotu ayon nagah wastitaygo akaman. Kam na hiqiyid babeq Juda gigo lotu akaman ayahta na tugwahtiqdaqta. Nazaq iyan Juda mataw aseseqta na in mataw moqiyta gisan huload lotu akaman ayahta nab ayib usgo gituw hiqiyiy. Nazaq iyan in le Pailat tubuloni, Ningo mataw giqemid leheq mataw ayib usayta na gisen wolbiyayid in hidmo moqiy haqiy. Moqid teq in gisan ayib walemiy haqiy. <sup>32</sup> Haqan mataw bab emayta na lehim in Yesus agerab mataw giger dom wolán turiyta na gisen tuwolbiyayiy. <sup>33</sup> Gisen wolbiyayiyim teq in Yesus ago hib loqiy. Loqim Yesus tekomo tumoqim ussa in ahol waqiy. Nazaq iyan in asen a hi wolbiyayiy. <sup>34</sup> Ta teq bab mataw na gigo araç in ago em waqim Yesus azawarnib tuqulum. Ulomanmo anedan yuw inaqmo gwahtiqad woqyaq. <sup>35</sup> Ari mat wagam ka mar tonta na in ame anonab daq na ahol wanta. Ahol waqim ne huriteq Yesus anan helmo haq daqay haqad in gamuk ka mar ton. Mat na ago gamuk ka in hel diqtaqmo. Ad inmo anad emaq, Ya gamuk mar tonta ka in helmo diq haqay. <sup>36</sup> Ari bab mat na daq nazaq emim in God ago marib gamuk araç usaqta na tuwol net bug. Gamuk na bilam,

In aditin araç a hi wolbiyay daqay ham.

*Buk Song 34.20*

<sup>37</sup> Ad gamuk ta araç God ago marib usaqta na in kazaq bilam,

In mat ulumiyta na ahol tuwaq daqay ham.

*Sekaraya 12.10*

*Yesus moqan asan hodhodab a lehiy*

(*Matyu 27.57-61; Mak 15.42-47; Luk 23.50-56*)

<sup>38</sup> Ari daq na bunmo tihiqiyan teq Josep uliq Arimatea-ibta na lehim Pailat bulonim bilam, Ya Yesus asan waqeq a le yay tonnan ham. Mat na in Yesus ago disaipel araqtamo. Teq in Juda gigo rabad in ahol ulilemyaqta. In Pailat nazaq bulonan Pailat bilam, Dimunmo ham. Haqan Josep le Yesus asan ayib tuwalam. <sup>39</sup> Samo Nikodemus mat kwaziqmo taromab Yesus ago hib lahta na in bolmo. Bolad in masil ahuran dimunta giger mir teq alow inaq buliyiyta na in waqim ad bol. Masil na ago afaçan in 30 kilo nazaqta. <sup>40</sup> Ari giger na Juda gigo daq mat moqan yay tonayta na

adan muzinim in Yesus asan waqim masil ahuran dimunta na asanib hunegim teq in tubusanib net muzim a lehiy.

<sup>41</sup> In kabiy in eman tihiqiyan ari saw Yesus ayib dom woliyta nab uzaq arađ muturta aduganib mat arađ momta asan eman a hi usta in uzaq nab usmo. <sup>42</sup> Nazaq iyan Pasova ahumabun ayon nagah wastitayayta akaman na tihiqiyan tona in lotu akaman ago gunun awaz meqinta na anadin emad in hodhod sinsin usta nabmo Yesus asan eman tuqus.

## 20

*Yesus hodhodab eram*

*(Matyu 28.1-8; Mak 16.1-8; Luk 24.1-12)*

<sup>1</sup> Ari Sande tarom naqmo saw a hi hastitay bugsa Mariya uliq Magdala-ibta hodhodab tilah. Lehim gig ayahta hodhod aqez ituqim usta na ulum buliyan lehan hodhod aqez hasim ussa in ahol tuwam. <sup>2</sup> Ahol waqad in sibim le Saimon Pita teq disaipel arađ Yesus in anan anad diq bilaqagta na gibilenim bilam, Iyahta nabag hodhodab tuwaqiy ham. Waqim in a le edob emiyta na i a hi hurit ham.

<sup>3</sup> Haqan Pita ayow disaipel arađ na inađ eraqim uliq hulosad in hodhodab tilehiy. <sup>4</sup> In sibim lehad teq disaipel arađ na in Pita uriyanim sibtitayimmo lehim in ameb hodhodab tugwahtim. <sup>5</sup> Gwahtiqim asanib turad in kuh tonim wiliyanim ame hodhod aduganib loqim tubusanmo ussa in ahol wam. Teq in hodhod aduganib lo a hi gwahtim. <sup>6</sup> Samo Saimon Pita abeb bolimmo in hodhod aduganib le tugwahtim. Gwahtiqim in tubusan samanmo ussa ahol tuwam. <sup>7</sup> Ahol waqad tubusan amalib Yesus afaqin irquriyta na anononmo ayim aholbin eman ossa in ahol waq ton. <sup>8</sup> Sa disaipel hodhodab iturim le gwahtimta na inađmo hodhod aduganib le gwahtiqim in nagah nagan ahol tuwammo. Ahol waqad nabmo in helmo Yesus hodhodab tiqeram ham. <sup>9</sup> Disaipel giger na in Yesus moqeq teq ta erađdaqta na ago agamukan God ago marib ahol waq yaqayta teq in gamuk na alulin diq ginad a hi em has yaqay.

<sup>10</sup> Admo in muleqim in gigo uliqab ta lehiy.

*Mariya uliq Magdala-ibta na Yesus ahol wam*

*(Matyu 28.9-10; Mak 16.9-11)*

<sup>11</sup> Ari Mariya hodhod aqezab asan ban turad in tigaqyaq. Gaqadmo in wiliyanim hodhod aduganib ame tilom. <sup>12</sup> Loqimmo Yesus moqan asan eman usta nab angelo giger gigo tubusan husta inađta nab ossa in tigibiy. Arađ Yesus afaqin usta asawnib ossa arađ Yesus asen usta asawnib os.

<sup>13</sup> Osad in giger Mariya kazaq buloniy, Aw, ni nagaqgo gaqaq? haqiy. Haqan in bilam, Yaqgo Iyahta nabag tuwaqiy ham. Waqim in a le edob emiyta na ya a hi hurit ham.

<sup>14</sup> Mariya nazaq bilaqim in ahol buliymmo Yesus nab tursa ahol tuwam. Ta teq Yesus-mo turaq nazaq in anad a hi am. <sup>15</sup> Samo Yesus susumun ugim bilam, Neng, ni nagaqgo gaqaq? ham. Ni nog nagunaq? ham. Haqan Mariya anad am. Uzaq ka anamren daqag ham. Haqad in bulon, Mat ayah ham ni mat momta na asan waqeq a lehsun iyid teq ni edob amta na ibilenid ya le waqan ham. <sup>16</sup> An Yesus in Mariya anan biyim bulon, Mariya ham. Haqanmo Mariya ahol buliyim in Hibru nanib bilam, *Rabonay* ham. Gamuk 'rabonay' na alulin 'tisa' haqayta. <sup>17</sup> Haqanmo Yesus bulon, Ni ya hi iwaz ham. Ya ulilib imam ago hib a hi lehaiq ham. Teq ni ya imaqbaban gigo hib leheq kazaq gibilen ham. Yesus inmo amam teq ne gimam inađmo ago hib tilehaq haqad ni gibilen ham. In ago God teq ne gigo God inađmo ago hib lehaq haqad ni gibilen ham. <sup>18</sup> An Mariya uliq Magdala-ibta na lehim disaipel gibilenim bilam, Ya Iyahta ahol tuway ham. Haqad Yesus gamuk bulonta na in tigibilen bug.

*Disaipel Yesus ahol waqiy*

*(Matyu 28.16-20; Mak 16.14-18; Luk 24.36-49)*

<sup>19</sup> Ari Sande imisor diq disaipel in Juda mataw ginan rabad bit aduganib gihol adanin otim tuqosiy. Ossa Yesus bo in gilikmanib turad gibilan, Ne gigem kute neman ham. <sup>20</sup> In nazaq bilaqim teq in ahol aben teq azawaran tigiqisihun. Giqisihunsa in Iyahta ahol waqad ginad ayahmo dimniy yaqay. <sup>21</sup> Ginad dimniysa Yesus a ta gibilan, Ne gigem kute neman ham. Ya imam iqeman bolta nazaqmo ya ne gigemid ne tileh daqaymo ham. <sup>22</sup> In nazaq bilaqim teq in ahol aqurin ulam hasan in gigo hib lehsa in gibilan, Ne God ago Bugaw Dimunta waqiy ham. <sup>23</sup> Ne mataw gibileneq bilaq daqay, God ne gigo daq meqinta tigiwalam haqsa in gigo daq meqinta giholib hiqiyssa tuqos daqay ham. Ari ne gibileneq bilaq daqay, God ne gigo daq meqinta a hi walemađ haqid in gigo daq meqinta na giholib soqoteq ussa in tuqos daqay ham.

*Tomas Yesus ahol wam*

<sup>24</sup> Ari Yesus disaipel gigerab gwahtimta nab disaipel arađ anan Tomas haqayta na in nenaq a hi os. Tomas anan arađ Didimus haqayta. <sup>25</sup> Abeb Tomas bolan disaipel buloniy, I Iyahta ahol tuwaw haqiy. Haqan Tomas bilam, Ya in abenab dom woliyta na asawan ahol waqad ya iben le dom woliyta na abatlan teq emub ulumiyta na abatlan waz waqeq teq ya helmo tihaqdaiq

ham. Muran ya helmo a hi haqdaiq ham. Haiqmo diq ham.

<sup>26</sup> Ari Sande ta araq nab Yesus ago disaipel bit nab a humab ta woliy. Humab wolim ossa Tomas in nenaq tuqos. Mataw na gihol adanin bunmo otim bit aduganib ossa Yesus in gilikmanib bo a ta gwahtim. Gwahtiqim turad in gibilan, Ne gigem kute neman ham. <sup>27</sup> Haqadmo in Tomas tubulon, Ni niben akurgan araq ya ibenab dom woliyta asawnib kab emeq teq ni ya iben ahol waq kem ham. Ahol waqad ni niben emid bo ya izawaran ka waz waqanmo ham. Ad ni ninad haresmo emaqta na o tob iysa ni ya inan helmo haq ham. <sup>28</sup> Haqan Tomas amenin emim bulon, Ni yaqgo Iyahta ham. Ni yaqgo God ham. <sup>29</sup> Haqan Yesus bulon, Ni nime anonab ya ibiyim teq ni ya inan helmo tiham ham. Ari mataw ya a hi ibiyadmo inan helmo haqayta na in tidimniyim osay ham.

#### *Jon gamuk ka mar tonta alulin*

<sup>30</sup> Ari Yesus daq azawayin inaqa kabemmo disaipel gimeb giqamta. Teq ya bunmo wagam kab a hi mar ton. <sup>31</sup> Ya Yesus awagamun asormo kawa ya tumar tonta ka ne ahol waqad ne Yesus anan Kraish haqad teq ne in anan God atatin tihaq daqaymo haqad ya gamuk ka mar tonta. Ne Yesus abin nazaq diqta anan helmo haqeq teq ne kayeqmo kuluwa-kuluwmo tuqos daqay.

### **Yesus hodhodab eraqim ame gigerta disaipel gimeb a ta gwahtim**

## **21**

#### *Disaipel 7 nazaq Yesus ahol waqiy*

<sup>1</sup> Ari abeb Yesus disaipel gimeb a ta gwahtim, yuw akurorqanta anan Taiberiyas\* haqayta na ago lan aqezab. Teq in ago mataw gimeb gwahtimta na awagamun kazaq. <sup>2</sup> Kam araqab Yesus ago disaipel asor humab wolim osiy. Mataw na ginan kazaq: Saimon Pita teq Tomas anan araq Didimus haqayta na teq Nataniyel uliq Kana saw Galiliy-ibta na teq Sebediy atatinz giger na teq disaipel ta asor gigermo in bunmo araqibmo osiy. <sup>3</sup> Ossa Saimon Pita gibilan, Ya le dob hunegeq nabiq waqnan ham. Haqan in ayogniz na buloniy, I ninaqmo leham haqiy. Haqad in le muy araqab gwalim tilehiy. Lehim tarom nab in nabiq araq diq a hi waqiy.

<sup>4</sup> An tarommo saw tihastitaysa Yesus bolim lan ezab titur. Tursa disaipel ahol a hi waq hasiy. <sup>5</sup> Sa Yesus gibilan, Onmin ham ne nabiq araqag waqiy ye? ham. Haqan in bilaqiy, Haiq diq haqiy. <sup>6</sup> Haqan

Yesus gibilan, Ne dob hunegid muy aqaban ban woqid teq ne nabiq asor tigiwaq daqay ham. Haqan in dob hunegan woqan nabiq kabemmo diq dobub tuwoqiy. Woqan in dob hureq yo hiqiy yaqay, nabiq kuluw diqmo iyan. <sup>7</sup> Sa disaipel araq Yesus in anan anad bilaqaqta na in Pita bulon, Ko Iyahtaqmo ham. Haqan Saimon Pita in “Ko Iyahta” haqan huritim in kabiy emnan haqad ago aholsihen hasim eman usta na waqim aholib ta emim in yuwmeb sortukim woqim Yesus ago hib amim tilah. <sup>8</sup> Lehsa disaipel ta asor na muyib osad dob anabiqnaq wazim hureqim ad lan ezab tuboliy. Na ezaqgo in lan ezab sinsinmo 90 mita nazaq osiy.

<sup>9</sup> Disaipel na bolim lan ezab tuwoqimmo faq araq ulaman tuqoyta azamorin kiskismo oysa in ahol waqiy. Teq faq azamornib nabiq oyad ussa bret faq agerab ossa in ahol waqimmo. <sup>10</sup> Samo Yesus gibilan, Ne nabiq muran waqiyta na asor a boliy ham. <sup>11</sup> Haqan Saimon Pita le muyib gwalim dob anabiqnaq na kamisib ussa in wazim hureqan yuw adekib tigel. Nabiq aseseqta kabemmo diq 153 nazaqmo dobub woqim usta. Teq dob a hi tartay. <sup>12</sup> An Yesus gibilan, Ne boleq didaq neqiy ham. Haqsa disaipel araq diq in “Ni nog?” nazaq a hi susumun ug yaqay. Na ezaqgo in bunmo ginad tiqemiy, Ka Iyahtaqmo haqiy. <sup>13</sup> An Yesus eraqim bolim bret waqim tinag. Negad teq in nabiq waqim nazaqmo ton.

<sup>14</sup> Ari ka Yesus ame ezeqmanta in disaipel gimeb gwahtimta, in hodhodab ta eraqim teq.

#### *Yesus ayow Pita inaqa an anobun wastitayiy*

<sup>15</sup> Ari disaipel didaq tineqan abeb Yesus in Saimon Pita tubulon, Jon atatin Saimon ham nabag ni mataw kagan giquriyamim ni ya inan ninad diq bilaqaq e? ham. Haqan Pita bilam, Ege Iyahta ham. Ya ninan inad diq bilaqaqta na ni tuhurit ham. Haqan Yesus bulon, Ni yaqgo sipsip amidgotniz didaq neg ham.

<sup>16</sup> Haqad Yesus ame gigerta a ta bulon, Jon atatin Saimon ham ni ya inan ninad diq bilaqaq e? ham. Haqan Pita bulon, Ege Iyahta ham. Ya ninan inad bilaqaqta na ni tuhurit ham. Haqan Yesus bulon, Ni yaqgo sipsip gibiyimuz ham.

<sup>17</sup> Teq Yesus ame ezeqmanta a Pita ta bulonim bilam, Jon atatin Saimon ham ni ya inan ninad bilaqaq e? ham. Haqan Pita nab afaqan tiqiy. Na ezaqgo Yesus ame ezeqmanmo susumun uqim bilam, Ni ya inan ninad bilaqaq e? hamta na ago iyan. Haqan Pita bulon, Iyahta ham ni nagah

\* **21:1:** Yuw akurorqanta na anan araq Galiliy haqayta. Ni Jon 6.1 nab teq ahol waq.

bunmo ago tuhuritta ham. Ya ninan inad bilaqta na ni tuhuritmo ham. Haqan Yesus bulon, Ni yaqgo sipsip didaq neg ham. <sup>18</sup> Ya helmo nibilenaq ham. Ni minmin osad ni nihol wastitayim nihulib am hurorim ni edob lehnan ninad usta nab ni lehmo tilehyaqta ham. Ari abeb ni adinowan tiqiyeq teq ni niben wazid eraqsa mat araq nihulib am huroreq in niwageq saw ninad a hi usaqtab niqad tilehdaq ham. <sup>19</sup> Na Pita daq ezaqta amalib moqad in God abin emid ayah iydaqta na ago in Pita nazaq bulonta. Haqad in bulon, Ni ya imuzeq bol ham.

*Yesus in ago disaipel anan anad bilaqyaqta na anan bilam*

<sup>20</sup> Ari Pita ahol buliyim disaipel Yesus in anan anad bilaqta na gimuzim nenaq lehsa in ahol tuwam. Mat naqmo kwaziqmo Yesus ago disaipel nenaq didaq neqad in banab ahol wol emim Yesus anognib us nog iyad in afaqin Yesus abanib emim bulon, Iyahta ham nog niwageq bab gibenab niqemdaq? hamta na amatin. <sup>21</sup> Pita in disaipel na ahol waqad teq in Yesus bulon, Iyahta ham mat ko teq ezaq iydaq? ham. <sup>22</sup> Haqan Yesus bulonim bilam, Ya inad mat na ossa ya muleqeq ta boldaiq haqid na in ningo nagah a haiq ham. Ni ya imuzeq bol ham. <sup>23</sup> Teq Yesus nazaq haqan abeb gamuk na Yesus ago on mataw gigo hib le ayahmo diq iyta. Iyan mataw na ginad em yaqay, Disaipel na a hi moqdaqta haq yaqay. Ta teq Yesus bilam, Mat na a hi moqdaq nazaq in a hi bilam. Haiqgam. In bilam, Ya inad mat na ossa ya muleqeq ta boldaiq haqid na in ningo nagah a haiq haqad in Pita bulonta.

<sup>24</sup> Ari disaipel naqmo in daq nagan bunmo amebmo ahol waqim in awagamun mar tonta. An i mat na ago tuhurit. In a hi katiyad gamuk heltaqmo mar tonta.

<sup>25</sup> Ta teq Yesus kabiy daq kabemmo diq gigeman mat na asormo mar ton. In Yesus daq amta na bunmo awagamun mar ton bugta iyid ya inad emaiq, Amarin gwah-tiqeq osdaqta na abanan og kab hiqiy nagta haqaiq.

## Aposel

### Aposel Yesus ago kabiy emiyta giwagamun Gamuk ameb lehaqta

Wagam ka in Yesus ago Aposel kabiy emiyta giwagamun Luk-mo mar tonta usaq. Teq wagam ka in Yesus awagamun dimunta Luk mar tonta na tutim lehaqta. Yesus in Amambo hib muleqeq tilehnan haqad in ago disaipel kazaq gibilan, God ago Bugaw Dimunta ne giholib bolid teq ne zaway diq iyeq ya ihol awagamun uliq Jerusalem-ub tibilaq daqay ham. Bilaqad teq ne saw giger Judiya-ib teq Samariya-ib wagam na bilaqad teq ne og saw bunmo leheq luwad ya iwagamun na tibilaq daqaymo ham. Haqan Luk ago wagam ka in nazaq diq lahta. God ago Bugaw Dimunta Aposel giholib bolan danneb in uliq Jerusalem-ub Yesus abin tibilaqiy (Aposel 1.1-8.3). Bilaqad teq in saw giger Judiya teq Samariya gigo saw ban lehad in Yesus awagamun bilaqim bilaqim a lehiy (Aposel 8.4-12.25). An abeb Pol gwahtiqim in Yesus ago gamuk a lehim og saw kabemmo bilamta (Aposel 13.1-28.31).

Teq wagam ka in daq araqaq ayahta giqisi-hunaqta na kazaq. Aposel in gigo zawayib Yesus ago kabiy a hi em yaqay. Haiqqam. Yesus bilamta nazaq diq Bugaw Dimunta in giholib bolim zaway negsa in Yesus ago kabiy emad luw yaqayta.

Luk ago kamub mataw kabemmo in Yesus ago on mataw gimalib nan emeq bilaq yaqay, Uliq saw edob Kraiss ago on mataw osayta nab bab eraqaqta haq yaqay. On mataw na in gigo suleqq amalib mataw ginad walebolad gigem wizsa in an wolad saw garak ayahmo emayta haq yaqay. Teq Aposel giwagamun kab i daq na alulin ahol waq kemauqta. Na in kazaq. Mataw kabemmo Yesus anan helmo haqsa Juda mataw in gibiyad gigem timeqniyyaq. Gigem meqniysa in gimo bab na eman eraqayta, Yesus ago on mataw gidanin qwaygo haqad.

Teq kam nagab mataw asor era Pol anan bilaq yaqay, In Aposel diq a haiq haq yaqay. Haqsa Luk in Pol adanin qwaynan haqad Pol ezaq tonim Aposel iyta na awagamun in ame ezeqmanmo wagam kab mar tonta. Ameb diq Pol in Yesus muzinad a hi luwta. Haiqqam. In zaway diq iyeq Yesus ago on mataw giwazid woq yaqayta. Teq abeb Yesus in Pol lilewunim waqim eman in ago kabibiy mat dimunta iyim ago kabiy tiqemyaqta.

## Aposel Yesus ago gamuk uliq Jerusalem-ub bilaqiy

*Yesus teq God ago Bugaw Dimunta emid boldaqa na abin in bilam*

<sup>1-2</sup> Mat ayah Tiyofilus, ya wagam danneb mar tonta nab Yesus in ago kabiy alulin tiqemim ago kabiy daq emad teq in ago suleq on mataw gibilenad luwsa le God in waqim ad Heven-ib gwalahta na awagamun bunmo ya mar ton nigta. Teq in a hi gwalehadmo in ago Aposel inmo gilumim giwamta na gigo hib gwahtiqim in God ago Bugaw Dimunta ago zaway amalib mataw na kabiy negad gamuk awaz meqinta gibilan. <sup>3</sup> Yesus santitiy sorim moqim kayeq ta iyim teq in Aposel gigo hib gwahtimta. Gwahtiqim in gimen daq azawayin inaqa kabemmo giqeman gwahtiqsa Aposel ginad tiqemiy, Helmo Yesus hodhodab tiqer-ama haqiy. Sa kam 40 nazaq aduganib Yesus tuteqmo mataw na gimeb gwahtiqad in God ago maror agamukan gibilenyaq. <sup>4</sup> Ad in nenaq osad in atoranmo kazaq gibilan, Ne uliq Jerusalem huloseq hi lehiy ham. Ne uliq kab osad nagah ya imam negnan hel diqmo bilamta na ne amen emad osiy ham. Kwaziqmo ya nagah na anan ne tigibilenta ham. <sup>5</sup> Ya bilay, Jon yuwibmo on mataw huz negyaqta hay ham. Ari babeq misireqaq teq God in ago Bugaw Dimunta ne tineqdaq hay ham.

<sup>6</sup> An abeb Aposel bo Yesus ago hib humab wolim tisuusun uguy, Iyahta haqiy, Luweq muran kam kab ni Isrel gigo maror woqim usaqta na waz ta eraqid in gigo king inaqa a ta iy daqay-ya? haqiy. <sup>7</sup> Haqan Yesus gibilan, Ya imam inmo ago zawayib daq bunmo gwahtiqdaqta na akamun tibilaqan usaqta ham. Nagah na ne gigo a haiqta iyan ne kam na ago a hi hurit daqay ham. <sup>8</sup> Ta teq God ago Bugaw Dimunta ne giholib ayahmo tuboldaq ham. Bolid teq ne zaway waqeq nagah ne gimeb ahol waqiyta na teq ya iwagamun bunmo ne uliq Jerusalem-ub tibilaq daqay ham. Bilaqad teq ne leheq saw Judiya-ib teq saw Samariya-ib uliq bunmo luwad nab ne yaqgo gamuk na on mataw tigibilen daqaymo ham. Gibilenad teq ne saw giger na gihuloseq og saw bunmo lehad on mataw gibilensa in tuhurit daqaymo ham.

*God Yesus waqim ad Heven-ib tugwalah (Mak 16.19-20; Luk 24.50-53)*

<sup>9</sup> Yesus gamuk na bilaqim tihiqiy an Aposel ahol waqad tursamo God Yesus waqim ad kaitab tugwalah. Gwalehsa onqas tiqim Yesus il tonan Aposel ahol a ta hi waqiy. <sup>10</sup> Ad in gime kaitab gwalehad tursamo mataw giger tubusan husta emiyta in gigerab gwahtiqim tituriy. <sup>11</sup> Turad in

bilaqiy, Galiliy-ib mataw haqiy nagaqgo ne turad kaitab gime gwalehaq? haqiy. Mura God in mat anan Yesus haqayta ka ne gibenab walemim in waqim ad Heven-ib tugwalah haqiy. Teq in Heven-ib gwalehsa ne ahol waqiyta nazaqmo in muleqeq ta gewoqdaqta haqiy.

*Mat araq Judas ago ban waqgo Aposel anan bilaqiy*

<sup>12</sup> Ari Aposel garah anan Oliv haqayta na hulosisim in muleqim Jerusalem-ub wo tilehiy. Garah Oliv na in Jerusalem agerab sinsinmo usaqta, kilomita amulikmo nazaq. <sup>13</sup> In garah na hulosisim le uliq Jerusalem-ub gwahtiqim bit in os yaqayta nab tilehiy. Lehim in bit na adugan ulilib osayta nab gwalehim tuqosiy. Mataw na ginan kazaq: Pita, Jon, Jems, Andru, Filip, Tomas, Bartolomyu, Matyu, teq Alfiyus atatin Jems teq Saimon mat Rom nenaq bab emyaqta amatin na teq Jems ta araq atatin Judas. <sup>14</sup> Mataw na bunno teq on asor Yesus muzeq inaq leh yaqayta na teq Yesus anen Mariya teq Yesus amagniz inaqmo bunno in gigem amulikmo iyad tuteqmo in bit adugan nab humab woleq God inaq gamuk emad os yaqayta.

<sup>15</sup> Ari kam araqab on mataw Yesus anan helmo haqad maqbab iyim osiyta 120 nazaq humab wolim ossa Pita in gilikmanib eraqim turad kazaq gibilan, <sup>16</sup> Ya iyogniz ham kwaziqmo God ago Bugaw Dimunta Devit aqezab gamuk araq eman gwahtiqsa in Judas-mo anan bilamta ham. An God ago gamuk bilamta nazaqmo Judas ago hib tugwahtim ham. Mat na a hi gwahtiqsa Bugaw Dimunta in anan tibilaqan usta ham. Ussa teq mat na gwahtiqim gamuk na muzinim in mataw dan giqisihunim giqad lehan in Yesus waziyta ham. <sup>17</sup> Na ezaggo in i giyow mat araq iyim in i inaq garabmo kabiy ka wanta ham.

<sup>18</sup> (Teq Judas ago daq meqinta na anawun mani silva waqim a lehim in og araq tizay. Zayim in lehim og nab ban araq meqintab woqim agem muturan in agembekoq bunno mutbalim gwahtim. <sup>19</sup> An abeb mataw Jerusalem-ub osiyta na bunno in daq na ago huritim in gigo nanib in saw na anan Akeldama tihaqiy. Na in 'og anednaqta' haqad in og na anan nazaq biyiy.)

<sup>20</sup> Ari Pita bilam, Gamuk araq Buk Song-ib mar tonan usaqta na kazaq bilam ham. In ago bit samanmo usan haqad in bilam ham. Ussa mat araq diq bit nab hi osan haqad in bilam ham. *Buk Song 69.25*

Teq buk nab gamuk araq kazaq bilammo ham.

Mat ta araq in ago ban waqeq kabiy eman haqad in bilam ham. *Buk Song 109.8*

<sup>21</sup> Nazaq iyan muran i mat araq Judas ago ban waqdaqta na tinagunam ham. Nagunad i mat araq kazaqta waqam ham. Iyahta Yesus i gililewunim giwaqim ginaq leh bolad luwyaqta kam nab mat na in luw osta ham. <sup>22</sup> Teq Yesus Jon ago hib lehan Jon huz ugsa mat na in ahol wanta ham. Ad Yesus ago kabiy alulin emsa in ahol wantamo ham. Teq God i gibenab Yesus waqim ad gwalehsa in nab turtamo ham. Mat araq naqanta in daq nagan bunno ahol wanta naqmo i ulum kemeq waquq ham. Id teq Yesus hodhodab eraqan in ameb ahol wanta na agamukan in i inaq garabmo tibilaqam ham.

<sup>23</sup> Pita nazaq bilaqan mataw nab osiyta na in mataw gigermo ginan tiqemiy. Araq na anan Josep haqayta. In anan giger Barsabas teq Jastus haqaytamo. Teq ta araq na anan Matiyas haqayta. <sup>24</sup> In mataw giger na ginan emim teq in kazaq God buloniy. Iyahta haqiy, ni mataw bunno gigo gigem tuhuritta haqiy. Ni mataw giger ka gilikmanib mat doqag diq ni wanta na ni i giqisihun haqiy. <sup>25</sup> Giqisihunid teq mat na Judas ago ban waqeq in Aposel araq iyeq kabiy ka asor in tisordaqmo haqiy. Judas kabiy ka tuhulosim in moqim saw in osdaqta nab tilah haqiy. <sup>26</sup> Haqad in God inaq gamuk nazaq bilaqim tihiqiy in gig amikmikta giwaqim mataw giger na ginan mar tonim teq hunegiy. Huneger Matiyas-mo anan tugwahtim. Gwahtiqan in Matiyas waqim Aposel 11 na nenaq tigiwastoni.

## 2

*God ago Bugaw Dimunta gehitimta awagamun*

<sup>1</sup> Ari Juda gigo lotu akaman ayahta anan Pentikos haqayta na tugwahtim. Gwahtiqan mataw Yesus anan helmo haqayta na bit araqab humab wolim tuqosiy. <sup>2</sup> Ossa nan saw haiqmo nagah araq ahulan bilaqne tim atoranmo sibaqta ahulan nog Heven-ib hitiqad bit in osiyta na tuwaleq ton bug. <sup>3</sup> Samo nagah araq faq amileq nog in gimeb gwahtiqim in tartayad le on mataw amulik-mulikmo gigo hib us. <sup>4</sup> Ussa God ago Bugaw Dimunta mataw na giholib ayahmo bolan uliq amo amo gigo nan ginadib bolsa in tibilaq yaqay.

<sup>5</sup> Ari kam nab Juda on mataw God ayon lotu em yaqayta kuluwmo uliq saw bunno hulosisim bolim lotu akaman ayahta na ahol waqnan haqad uliq Jerusalem-ub tuqos yaqay. <sup>6</sup> Osad in nagah na ahulan iysa huritad in kabemmo bolim bit nab humab tuwoliy. Humab wolim tursa Yesus ago on

mataw na in God ago gamuk bilaqsa mataw biyahta na in gimi gimo gano nanibmo tuhuritaqay. Huritad in ginadnad diq tiqem yaqay. <sup>7</sup> Ad in gihol turuh nemsaginadnad emad turad bilaqiy, Ka ezaq diq? haqiy. Mataw kawa gamuk emayta ka in bunmo saw Galiliya-ibtaqmo haqiy. <sup>8</sup> Ta ezaq iyan in God ago gamuk bilaqsa i gimi gimo gimo uliq diq ago nanibmo gamuk tuhuritaqay? haqiy.

<sup>9-11</sup> I mataw uliq amulikmo a hi bolta haqiy. I asor kantri Partiya-ibta teq kantri Midiya-ibta teq kantri Elam-ubta haqiy. Teq i asor saw Mesopotemiya-ibta teq saw Judiya-ibta haqiy. Teq i asor saw Kapadosiya-ibta teq saw Pontus-ibta teq saw Esiya-ibta haqiy. Teq i asor saw Frigiya-ibta teq saw Pamfiliya-ibta teq kantri Isip-ubta teq i asor saw Libiya-ib uliq Sairin agerab osauqta haqiy. Teq i asor uliq Rom-ubta haqiy. I asor Juda matawmo diqta teq asor in mataw en amo amo i Juda gimo maror ahaqenib iyim muzinayta haqiy. Teq i asor nud Krit-ibta teq kantri Arebiya-ibta haqiy. Mataw gamuk emayta ko in God kabiy awaz meqinta amta na anan bilaqsa i amulik-mulikmo gimo nanibmo tuhuritaqay haqiy.

<sup>12</sup> Haqad in bunmo gihol riten lamsa ginad kabemmo emad teq in an tubulon yaqay, Nagah ka alulin ezaq diq haq? yaqay. <sup>13</sup> Haqsa ta mataw na asor in hilhil emad bilaq yaqay, Mataw ko wain ayun muturta ayahmo uluwim in gihol agadan iyay daqag haq yaqay.

*Pita in Bugaw Dimunta bolta na ago alulin anan bilam*

<sup>14</sup> Ari Pita in Aposel 11 na nenaq eraqim turad in dedibmo lileyim on mataw na kazaq gibilan, Ne Juda mataw teq ne mataw Jerusalembol bolim osayta na bunmo ham ne gidek emeq yaqgo gamuk huriteq teq ne daq kawa gwahtimta ka ago alulin ne ginad em hasiy ham. <sup>15</sup> Ne ginad emay, "Mataw ka yuw atoranta uluwim gifaqin hulosiya daqagya" haqay ham. Haiqqam ham. Mataw in 9 kilok tarommo kam kazaqtab yuw atoranta ayahmo uluwim gihol agadan a hi iyayta ham. <sup>16</sup> Teq daq kawa gwahtimta ka kwaziqmo God ago nantut Joel kam anan bilamta naqmo ham. In kazaq bilam ham.

<sup>17</sup> God bilam, Kam abebtanta na bo sinsin tiqiya teq ya igo Bugaw Dimunta wazbalid on mataw bunmo gimalib tuwoqdaq haqad in bilam ham. Woqsa ne gigo onmin matmatta teq onqonta in yaqgo nantut tibi-laq daqay haqad in bilam ham. Teq ya daq lul araq diqta ne gigo mataw minminta na tiqisihundaiq

haqad in bilam ham. Sa ne gigo mataw aseseqta sen qwayeq nagah amo amo ahol tuwaq daqay haqad in bilam ham. <sup>18</sup> Kam nab ya igo Bugaw Dimunta wazbalid yaqgo kabibiy mataw bunmo onqonta teq matmatta inaqmo gimalib tuwoqdaq haqad in bilam ham. Woqsa yaqgo kabibiy on mataw na yaqgo nantut tibi-laq daqay haqad in bilam ham.

<sup>19</sup> Daq nawa teq gwahtiqdaqta nagan gitowun kazaq gwahtiqsa ne ahol tuwaq daqay haqad in bilam ham. Ya daq asor lul araq diqta kaitab ulilib kob emad teq og kab ya inad emsamo nagah amo amo tugwahtiqdaq haqad in bilam ham. Ned teq faq teq faq aqasin ayahmo gwahtiqdaqta haqad in bilam ham. <sup>20</sup> Teq ya zeq emid in ahol buliyeq aromriqnaq iysa ya kalam buliyid in kakaqta iyeq ned nog tiqiyaq haqad in bilam ham. Iyahta ago kam ayahta abin inaqta na bo tugwahtiqnan tonsamo daq nagan bunmo tugwahtiqdaq haqad in bilam ham.

<sup>21</sup> Kam nab God in on mataw Iyahta ahaqenib iyim lilewunayta na bunmo gilumsiheq tigiwaqdaq haqad in bilam ham. *Joel 2.28-32*

<sup>22</sup> Haqad Pita bilam, Isrel-ib on mataw ham ne gamuk ka huritiya ham. Ya Yesus uliq Nasaret-ibta anan tigibilennan ham. God inmo Yesus eman bolta na ago in ne giqisihunnan haqad in Yesus zaway ugsa in ne gilikmanib daq azawayin inaqta amo amo giqeman gwahtiqsa in kabiy awaz meqinta kabemmo giqemyaq ham. Na ago ne tuhuritiya ham. <sup>23</sup> God in mat naqmo ne gibenab eman ne mataw God ago maror asan ban osayta na gibe yahan in mat na ayib dom wolan tumom ham. Ne nazaq emim ne bilaqne negmo gibenab wol eman momta nog tiqiyiy ham. Kwaziqmo daq na bunmo a hi gwahtiqsa God anad emim adan tuwastitayan usta ham. <sup>24</sup> Teq in Yesus aholib moqgo santitiya meqinta wanta na walemad in Yesus wazan ta eram ham. Na ezaqgo moq in tuteqmo Yesus wazgo ago zaway biyab haiqta na ago iyan ham. <sup>25</sup> Teq kwaziqmo Devit in Yesus anan nazaq bilamtamo ham. In bilam,

Iyahta tutimmo ya imeb ossa ya ahol waqaiqta haqad in bilam ham. In ya iben iqabun ban osad zaway yagsa ya iwaz meqniyad a hi tuk-daiq haqad in bilam ham. <sup>26</sup> Nazaq iyan ya igem dimniysa Iyahta abin iluwaiqta haqad in bilam ham.

In teq tiqidimun tondaq haqad ya og kab kayeqmo osad ya isan moqdaqta na ago ya inad a hi meqniyaqta



haqad in bilam ham. <sup>27</sup> Na ezaqgo ham ya moqid teq ni ya ihulosid ya mataw tumoqiya gigo sawab kuluwa-kuluwmo a hi osdaiq haqad in bilam ham. Teq ni ningo mat tawon diqta na hulosis in asan hodhodab a hi lilihdaq haqad in bilam ham.

<sup>28</sup> Ni dante dimunta mataw muzim le os dimunta kuluwa-kuluwmo osaytab gwahtiqayta na ni ya tiqiqisihun haqad in bilam ham. Ad ni teq ya iwaqid ya ningo hib inad dimniya ninaq tuqosdaiq haqad in bilam ham.

*Buk Song 16.8-11*

<sup>29</sup> Haqad Pita bilam, Ya imaqbaban ham, ya i gises Devit anan kazaq ne gibilendaq ham. In kwaziqmo tumomta ham. Moqan in tiyay toniyta ham. In ago hodhod na i gilikmanib usim bo muran kawa in us tutsa i ahol waqauqta ham. <sup>30</sup> Teq God gamuk awaz meqinta Devit bulonan in Devit anaynayin ara q emid in ago ban waqeq king ara q inno nogta iyeq tuqosdaq haqad in bulonta ham. Haqan Devit in God ago nantut ara q iyim iyan in gamuk na alulin anad tiqem has ham. <sup>31</sup> Nazaq iyan in God ago gamuk na anadin emad in nagh abeb teq gwahtiqdaqta na ahol kemad in Kraiss teq moqeq ta eraqdaqta na ago in bilamta ham. In bilam, Kraiss moqid teq God hulosis mataw tumoqiya gigo sawab a hi us tutdaq haqad in bilam ham. Teq in bilam, God in asan hodhodab hulosis a hi lilihdaq haqad in bilamtamo ham.

<sup>32</sup> An muran kawa ya ne tigibilen kemaq ham. God in mat anan Yesus haqayta na wazan tiqueram haqaiq ham. I bunmo ahol tuwawta iyim i anan bilaqauqta ham. <sup>33</sup> Yesus hodhodab eraqan teq God in abin emid ayah iy bugnan haqad in Yesus eman inmo aben aqabun ban tuqos wom ham. Os woqim in Amam ago hib Bugaw Dimunta tuwam ham. Amam kwaziqmo ugnan hel diqmo bulonta nazaq ham. Waqim muran in God ago Bugaw Dimunta wazbalan on mataw kawa i osauqta ka gimalib woqan ne daq kaway ka ahol waqad teq ne gidekib gamuk ka tuhuritay ham. <sup>34-35</sup> Ne ginad em hasiy ham. Devit ulilib kaitab a hi gwalahtha ham. Teq inmo bilam,

Iyahta in yaqgo Iyahta kazaq bulon haqad in bilam ham. Ni ya iben iqabun ban kab ya imen emad ossa ya ningo bab giqemid nisen ahaqanib tiqiy bug daqay haqad in bilam ham. *Buk Song 110.1*

<sup>36</sup> Nazaq iyan ne Isrel on mataw bun diqmo gamuk ka hurit kemeq ginad em hasiy ham. God in Yesus, mat ne ayib dom

woliyta na eman in i bunmo gigo Iyahta teq i gigo Kraiss\* tiqiy ham.

*On mataw kabemmo gigem buliyim yuw huziy*

<sup>37</sup> Ari Pita nazaq gibilenan gamuk na mataw giqutil tuqulum. Uluman in Pita ayogniz nenaq kazaq susumun negiy, I gimaqbaban haqiy, teq i ezaq tonam? haqiy. <sup>38</sup> Haqan Pita gibilan, Ne bunmo ginad buliyeq ne gigo daq teq ginad meqinta na gileh ugeq teq ne Yesus Kraiss ananib yuw huziy ham. Id teq God in ne gigo daq meqinta na bunmo giwalemad anadin a ta hi emdaq ham. Ne nazaq tonsa teq God in ago Bugaw Dimunta samanmo naw nog tinegdaq ham. <sup>39</sup> Na ezaqgo ham God in ago Bugaw Dimunta mataw negnan hel diqmo bilamta na in ne teq ne gigo onmin teq on mataw God ago hib pesanmo osayta na bunmo inaqmo gimen gamuk na bilamta ham. I gigo Iyahta God in on mataw gililewunid agerab bol daqayta na bunmo in ago Bugaw Dimunta tinegdaq ham. <sup>40</sup> Haqad Pita gamuk naqanta kabemmo amalib atoranmo gibilenyaq. Ad in bilaqyaq, Ne God lilewunid in ne gilum-siheq ta giwagan haqyaq. Giwagid teq ne mataw meqmeqinta muran kam kab osayta na nenaq ara qibmo a hi meqniy daqay haqyaq. <sup>41</sup> In nazaq bilaqan teq on mataw kabemmo diq 3,000 nazaq in Pita ago gamuk huritim anan helmo tihaqadmo yuw tuhuziy. Yuw huzim in le Yesus ago on mataw na nenaq an tuwastoni.

*On mataw helmo haqiyta na gigem amulikmo iyim osiy*

<sup>42</sup> Ari on mataw helmo haqiyta na in Yesus ago on mataw na nenaq an wastonim tuteqmo in Aposel gigo suleq huritad teq in an ulumsihad teq in humab woleq garab didaq negad teq in God inaq gamuk tiqem yaqay. <sup>43</sup> Sa God in Aposel gibenab daq azawayin inaqta amo amo kabemmo emsa on mataw bunmo ahol waqad teq in God rabunad abin tuwazin yaqay. <sup>44</sup> Sa on mataw helmo haqiyta na bunmo gigem amulikmo iyim os yaqay. Osad in ginad em yaqay, I gimi gimo gigo es nagh bunmo i wazaqta ka in i bunmo gigota haq yaqay. <sup>45</sup> Haqad in gigo eq teq in gigo es nagh nagan mataw ta asor gigo hib zayeq amenin waqeq in gigo mataw nagh osgo siqim iyayta nagan gilumsihad tineq yaqay. <sup>46</sup> In bunmo gigem amulikmo iyad kam bunmo in le Tempel-ib humab tuwol yaqay. Teq in gigo bit ara q aqab humab woleq Yesus abinib bret orqayeq tineq yaqay. Neqad in an alowan tonad ginad dimniya zib alowabmo tuqos yaqay.

\* 2:36: Gamuk Kraiss ka alulin "God mat emid bo i gilumsihdaqta na amatin" haqyaq.

47 Osad kam bunmo in God abin tiqiluw yaqay. Sa uliqab on mataw bunmo in Yesus ago on mataw na ginan gigem tidimniy yaqay. Teq kam bunmo Iyahta in on mataw ta asor muturta gililewunad tigiwaqay. Giwaqsa on mataw helmo haqayta na gigo dauh kabemmo diq tiqiy yaqay.

### 3

*Pita ayow Jon inaq in mat araq asen meqinta wastitayan dimniy*

<sup>1</sup> Ari kam ta araqab 3 kilok imisor Juda mataw God inaq gamuk emayta akamnib nab Pita ayow Jon inaq Tempel-ib tilehiy. <sup>2</sup> Lehim in mataw mat araq asen meqinta sorim a bolsa tigibiyiy. Mat na anen agemab nazaqmo hitimta. Kam bunmo mataw mat na soreq a le Tempel agelin ago dan ez anan Awaq Dimun haqayta nab emid osyaqta. Ossa on mataw boleq gel na aduganib loqsa in mani nagah anan sunyaqta.

<sup>3</sup> Ari Pita ayow Jon inaq le Tempel agelin aduganib lo gwahtiqnan haqsamo mat na mani anan tisun nag. <sup>4</sup> Sun negan Pita ayow Jon inaq gihol wasihim turad in mat na ahol waninunadmo Pita in tubulon, Ni nime kazaq boleq i giger gibiy ham. <sup>5-6</sup> Haqan mat asen meqinta na anad am, Mataw ka nagah tiyagnan haqad in ahol buliyim giger na tigibiysa Pita bulon, Ya mani haiq ham. Teq nagah ya inaq naqmo ya tinignan ham. Yesus Kraiss Nasaret-ibta na abinib ya ni nibilenaq ham. Ni eraqeq loq gel ham. <sup>7</sup> Haqad in mat na aben aqabnib wazim wazan tiqeram. Eraqim hid naqmo in asen aditin bunmo awaz timeqniy. <sup>8</sup> Awaz meqniyan in ahol loyinadmo in dedibmo eraqim turad tiloq gelyaq. Samo Pita ayow Jon inaq Tempel agelin aduganib lo gwahtiqsa mat na in nenaq lehad in sor tiktukad teq in God abin wazan tiqeraqay.

<sup>9-10</sup> Sa on mataw bunmo in mat na loq gelad God abin wazan eraqsa ahol waqad ginad tiqemiy, Mat ko tutimmo Tempel agelin ago dan ez anan Awaq Dimun haqayta nab osad mani nagah anan sunyaqta naqmo amatin haqiy. Haqad in mat asen meqinta na tidimniyan ahol waqad in gihol riten lamsa ginadnad diq tiqem yaqay.

*Pita Tempel agelin aduganib turad mataw gamuk gibilan*

<sup>11</sup> Ari mat na Tempel ago veranda anan Solomon ago veranda haqayta nab in Pita ayow Jon inaq giwazim giqay netsa on mataw bunmo gihol turuh nemsu in gigerab sibim bolim humab tuwoliy. <sup>12</sup> Humab wolim tursa Pita gibiyad kazaq gibilan, Ne Isrel-ib mataw ham, nagaqgo

ne nagah ka ago ginadnad emad ne i giger gibiy ninunay? ham. Ne towa ginad emay, I gigo zaway inaqta iyim i mat ka wastitay haqay-ya ham. Teq ne ginad emay, I giger God ago mataw dimun diqta iyim i mat ka wastitayan in tiloq gelaq haqay-ya ham. Na haiggam ham. Ne ginad nazaq hi emiy ham. <sup>13</sup> I gisesan Abraham, Aisak teq Jakob gigo God inmo daq kawa ne ahol tuwaqay ka amalib in ago kabibiy mat Yesus abin wazan tiqeraqay ham. Mat ne waqim bab gibenab emiyta naqmo ham. Pailat in mat na hulosis lehgo bilamta teq haiq ham. Ne mat na gileh ugad bilaqiy. In i gigo a haiq haqad ne bilaqiy ham. <sup>14</sup> Mat nawa na in God ago mat tawon diqta iyim in God anad muz bugta teq in ago daq bunmo titnon diqtamo ham. Ta teq ne in gileh ugad ne mat ta araq mataw ginol emaqta naqmo waqnan haqad Pailat bulonan in hulosis ne gigo hib lah ham. <sup>15</sup> Lehsa ne mat i giyon os kayeqmo kuluwa-kuluwmo osayta adan-teqin wastitay igta na wol eman tumomta ham. Moqan God hodhodab wazan ta eram ham. Eraqim kayeqmo ossa i giger gimeb in ahol tuwawta iyim iyan i agamukan bilaqauqta ham. <sup>16</sup> I Yesus anan helmo diq haqauqta ham. Nazaq iyan Yesus aholnan naqmo in mat ka asen eman awaz timeqniy ham. Ne mat ka ahol waqad ne in ago tuhurit kemayta ham. Teq i Yesus anan helmo haqsa Yesus-mo ne bunmo gimeb mat ka ahol wastitayan tidimniy bug ham.

<sup>17</sup> Ya imaqbaban ham. Ya inad emaiq, Ne ginad a hi em hasadmo Yesus ago hib daq meqinta na emiyta haqaiq ham. Sa ne gigo mataw aseseqta nazaqmo in ginad a hi em hasiyamo ham. <sup>18</sup> Kwaziqmo God in ago nantut giqezab bilam, Yaqgo Kraiss teq santitiy sorda q haqad in bilam ham. Haqad teq in ne gigo daq meqinta na amalib in ago gamuk bilaqan usta na tuwol net bug ham.

<sup>19</sup> Nazaq iyan ne gigo daq teq ginad meqinta na ne gileh ugad ginad buliyiy ham. Ad ne muleqeq God ago hib ta boliy ham. Id teq God ne gigo daq meqinta na giwalemad anadin a ta hi emdaq ham. <sup>20</sup> Ad in kam dimunta negid ne Iyahta ago hib osad ne gigem hastitaysa gihol tisanamolda ham. Sa abeb in Yesus emid ne gigo hib tuboldaq ham. God in mat naqmo ne gilumsihgo haqad atowun eman osaqta ham. <sup>21</sup> Mat na muran Heven-ib tuqosaq ham. Kwaziqmo God ago nantut tawonta na bilaq yaqay, Kam abebtanta nab teq God in nagah bunmo gigemid mutur tiqiydaq haq yaqay ham. An muran Yesus kam na amen emim osaqta ham. Kam na bo gwahtiqsa teq in muleqeq ta boldaq ham.

<sup>22</sup> Kwaziqmo Moses bilam, Iyahta God teq ne gilikmanib ne gimaqbab ara q emid gwahtiqeq in ago nantut

ya nogmo iyeq osdaq haqad in bilam ham. Osad in ne gamuk gibilensa ne in aqez huritiy haqad in bilam ham.  
*Lo 18.15-16*

<sup>23</sup> Ad in bilam,

On mataw in aqez a hi hurit daqayta na bunmo God in gimuzid gibin tihiqiydaq haqad in bilam ham. Gibin hiqiysa in God ago on mataw nenaq a ta hi os daqay haqad in bilam ham.  
*Lo 18.19*

<sup>24</sup> Teq God ago nantut bunmo in gamuk naqanta bilaq toniymo ham. Samuel teq God ago nantut Samuel muzim gwahtiqiyta na bunmo in kam muturta ka anan bilaqiyta ham.

<sup>25</sup> Ari God ago nantut nagan gisesan negmo osayta ham. Ossa God kwaziqmo ne gisesan nenaq an amugan wazim nagan negnan gibilanta na muran negmo tuwaqayta ham. God Abraham inaq an adugan wazim bulon,

Ni nises abeb teq gwahtiqdaqta na amalib ya on mataw en bunmo tigidimun tondaig haqad in bilam ham. *Jenesis 22.18; 26.4*

<sup>26</sup> Nazaq iyan muran God ne gilikmanib ago kabibiy mat na eman gwahtiqim in danneb ne gigo hib tubol ham. In anad mat na ne gidimun tonad ginad buliysa ne bunmo ginad buliyeq gigo daq meqinta gileh ug daqay haqad in mat na eman ne gigo hib bolta ham.

## 4

### *Pita ayow Jon inaq giqirquriy*

<sup>1</sup> Ari Pita ayow Jon inaq in on mataw gamuk gibilenad tursamo mataw tamaz emayta na asor teq mataw Tempel-ib hurmey osayta gigo mat dannebta na teq Sadyusi asor in bo tugwahtiqiy. <sup>2</sup> Gwahtiqim tursa Pita ayow Jon inaq mataw suleq negad gibilen yaqay, Yesus moqim ta eram haq yaqay. Nazaq iyan on mataw Yesus anan helmo haqayta na moqeq in hodhodab tiqeraq daqaymo haq yaqay. Haqsa mataw aseseqta na in giger gigo gamuk na huritad in ginan gigem timeqniy yaqay. <sup>3</sup> Gigem meqniysa in giger na giwazim giqad lehim bit giqirquran osayta nab giqeman tuqosiy. Na ezaqgo zeq tuwolehsa imisor diq tiqiyan in babeq teq in giyon haziriz emgo haqad. <sup>4</sup> Ta teq on mataw kabemmo God ago gamuk na huritim in helmo tihaqiy. Nazaq iyan mataw helmo haqiyta na gigo dauh kabemmo diq iyim in ginulinqan gwalim 5,000 nazaqmo iy.

*Mataw aseseqta Pita ayow Jon inaq haziriz giqemiy*

<sup>5</sup> Ari usim ta eraqim Juda gigo mataw marorta na teq mataw aseseqta na teq mataw Moses ago gunun hurit kemiyta nagan bo uliq Jerusalem-ub humab tuwoliy.

<sup>6</sup> Humab wolim ossa tamaz mat dannebta anan Anaz haqayta na teq Kayafas teq Jon teq Aleksanda teq tamaz mat dannebta na asenlul matmatta bunmo in humab nab osiymo. <sup>7</sup> Osad in Pita ayow Jon inaq giqeman ginognib tursa teq in kazaq tisuusumun negiy, Ne zaway ezaqta waqiy? haqiy. Ne nog anan biyad daq na emiy? haqiy.

<sup>8-9</sup> Haqan God ago Bugaw Dimunta Pita aholib ayahmo bolan Pita era tigibilan, Ne Isrel-ib mataw aseseqta teq ne mataw marorta ham i giger mat araq asen meqinta ulumsihita na ago ne susumunay ye? ham. Ad ne mat na ahol ezaq dimniyta na ago ne hurit kemnan e? ham. <sup>10</sup> Ari ne bunmo gidek emeq hurit kemiy ham. Sa Isrel on mataw bunmo hurit kemiyimo ham. Yesus Krai Nasaret-ibta na abinibmo mat ka ahol dimniyan in kawa ne gimeb tituraq ham. Ne Yesus ayib dom woliya ham. Teq God hodhodab wazan ta eramta ham. <sup>11</sup> Ne bilaqne mataw bit emayta nog iysa ta mat na in bilaqne tituq nog osaqta ham. Sa ne tituq na ahol waqim hunegad anan 'meqin' haqiyta ham. Ta teq muran tituq na zaway diq iyim in bit anon bunmo tisor bugaqta ham.

<sup>12</sup> Mat araq i gilumsihdaqta na haiqqam ham. Og kab on mataw bunmo gilikmanib God in mat amulikmoqmo eman gwahtiqim in amomo i gilumsiheq ta giwaqdaqta ham. Na Yesus-mo ham.

<sup>13</sup> Haqsa mataw aseseqta na in Pita ayow Jon inaq gibiyen in uliqabmo matawta suleq a hi emiyta nog iyiy. Ta teq in giger a hi rabad nan atoranmo bilaqsa in gibiyad gihol turuh nemsas ginad em yaqay, Mataw giger ko Yesus inaq luw osiyta haq yaqay. <sup>14</sup> Haqad in mat ahol tidimniyta na Pita ayow Jon inaq gigerab tursa ahol waqad in Pita aqez amenin emgo gamuk haiqqam tiqiyiy.

<sup>15</sup> Nazaq iyan in Pita ayogniz nenaq gimuzan le kaunsel bit asan ban gwahtiqsa teq in gimo osad kazaq an tubuloniy. <sup>16</sup> I mataw giger ko ezaq gitonam? haqiy. In daq azawayin inaq lul araq diqta tiqemiy haqiy. Eman Jerusalem-ub on mataw bunmo daq na ago tuhuritiy haqiy. I haiq haqamta adanteqin tihiqiy haqiy. <sup>17</sup> Luweq daq ka agamukin haresmo on mataw og saw bunmo gigo hib tileh tutdaq haqiy. Nazaq iyan i giger ko gidek wazad gamuk awaz meqinta gibilenid in Yesus ananib mataw gamuk ta hi gibileniy haqiy.

<sup>18</sup> Haqad in Pita ayow Jon inaq gililewunan ta bolan in gamuk araq o suleq araq Yesus ananib ta hi emgo atoranmo

gibileniy. <sup>19</sup> Gibilenan Pita ayow Jon inaq amenin emim gibileniy, Ne ginad ezaq emay? haqiy. I God anad othasad i negmo gigo gamuk muzinamta na in God ameb daq dimun o daq meqin? haqiy. Daq na negmo ulum kemeq teq ginad emiy haqiy. <sup>20</sup> Teq i giqez mugnetgo haiq haqiy. I nagah ahol tuwawta teq i gamuk tuhuritta na ago i tibilaq sireqam haqiy.

<sup>21-22</sup> Haqan mataw marorta na in Pita ayow Jon inaq gigo hib daq meqinta alulin ara q ahol a hi waqim in gamuk atoranmo a ta gibilenim teq in gihulosan tilehiy.

Ari mat aholib daq azawayin inaq gwah-tigan in asen tidimniyta na ago ulig in 40 nazaq uriyamta. Nazaq iyan mataw aseseqta na in on mataw ginadin emad in Pita ayow Jon inaq santiituy ara q negnan rabiy. Na ezaqgo on mataw bunmo in daq na ago God abin tiqiluw yaqay.

*Yesus ago on mataw in Yesus awaga-mun bilaqgo azawayin waqnan haqad God buloniy*

<sup>23</sup> Ari mataw aseseqta na in Pita ayow Jon inaq gihulosan giger na in giyogniz gigo hib muleqim ta lehim in mataw tamaz emayta gigo aseseqta na teq mataw marorta na giqez titutiy. <sup>24</sup> Giqez tutan giyogniz na bunmo huritim in ginad amulikmo iyad God inaq gamuk kazaq emiy. Iyahta haqiy ni kait teq og teq kamis teq saw nagab nagh bunmo giquasayta na inaqmo ni giqam bugta haqiy. Giqem bugim ni nagah nagan bunmo gigo anamren iyim ni giwamuzad osa qta haqiy. <sup>25</sup> Kwaziqmo ningo Bugaw Dimunta in i gises Devit aqezab gamuk ara q eman gwahtimta haqiy. Gwahtiqsa ningo kabibiy mat na bilam,

Nagaqgo mataw en ta asor Juda a haiqta nagan gigem meqniyaq? haqad in bilam haqiy. Nagaqgo in daq samanta anon a hi emdaqta haresmo emnan ginad emay? haqad in bilam haqiy.

<sup>26</sup> Og kab king bunmo in Iyahta inaq bab emnan gihol tuwastitayiy haqad in bilam haqiy. Gihol wastitayim in Iyahta teq in ago Kraiss inaq gibaymuzad giwazid woqnan haqad humab woliyta haqad in bilam haqiy. *Buk Song 2.1-2*

<sup>27</sup> Helmo haqiy. Ningo kabibiy mat tawon diqta ni ninad muz bugta na Yesusmo haqiy. Na in ningo on mataw gilumsi-heq ta giwaqgo haqad ni ulumim wanta haqiy. Teq Herot ayow Pontiyus Pailat inaq teq mataw en ta asor Juda a haiqta nagan teq Isrel on mataw na in Yesus baymuznan haqad uliq kab humab woliy haqiy. <sup>28</sup> Teq in ginadibmo daq na a hi emiy haqiy. Kwaziqmo ni ningo zawayibmo in

gimen dante tuwastitayta haqiy. Wasti-tayan mataw aseseqta na in ni ninad kwazi-qmo ni eman usta naqmo muzinim daq na emiy haqiy. <sup>29</sup> Iyahta haqiy muran mataw aseseqta i gimeqin tonnan bilaqsa ni gibiy haqiy. I ningo kabibiy matawta haqiy. Ni i gilumsihsa i zaway diq iyeq ningo gamuk atoranmo bilaq q haqiy. <sup>30</sup> Bilaqad i ningo kabibiy mat tawonta Yesus anan biysa ni niben itiwuneq mataw moqayta na giwastitayad ni daq azawayin inaqta amo amo giqemid gwahtiqan haqiy.

<sup>31</sup> Ari in gamuk na bilaqim tihiqiyan bit in humab wolim osiyta na dedibmo ahol wolsa God ago Bugaw Dimunta in giholib ayahmo tubol. Bolan mataw na zaway iyim God ago gamuk atoranmo tibilaq yaqay.

*On mataw Yesus anan helmo haqayta na an ulumsih yaqay*

<sup>32</sup> Ari mataw helmo haqayta na bunmo gigem ginad amulikmo tiqiy yaqay. Sa in gigo ara q ago nagah ahol waqad "Ka yaqgo diqmo" haqad in nazaq a hi bilaqyaq. Haiqqam. In bunmo gigo nagah ara qibmo tuwaz yaqay. <sup>33</sup> Sa Aposel in Iyahta Yesus hodhodab eraqan in ahol waqiyta na agamukan mataw tigibilen yaqay. Gibilensa in gigo gamuk na azawayin ayahta inaq iyyaq. Sa God agem dimunta ago on mataw na negsa in bunmo ginad dimniysa dimun diqmo tuqos yaqay. <sup>34-35</sup> In gilikmanib mat ara q diq in nagah osgo siqim a hi iyyaq. Na ezaqgo mat nog in ago og o in ago bit inaq na in mataw ta asor gigo hib zayad amenin waqeq in mani na a boleq Aposel tinegyaq. Negsa in gilikmanib nog nog in nagah ara q ago woqsa Aposel ahol waqad in mani na asor uroteq tuquq yaqay.

<sup>36</sup> Sa in gigo mat ara q anan Josep haqayta os. Aposel in anan ara q Barnabas haqad ugiyta. Teq nan Barnabas na alulin mat mataw gigem zaway negaqta haqayta. Mat na in Juda gises Liway anaynayin ara q teq in nud Sairprus-ibta. <sup>37</sup> In ago og ara q mat ara q ago hib zayim in mani na waqim a bolim Aposel tinag.

## 5

*Ananayas awe Safaira inaq giwaqgamun*

<sup>1</sup> Ari mat ara q anan Ananayas haqayta na in awe Safaira inaq in gigo og ara q mat ara q ugad amenin waqiy. <sup>2</sup> Amenin waqim aduw mani na asor ulilemsa awe huritim anad bilam. Sa aduw mani na asormo waqim a bolim Aposel negad in bilam, Ya og zayim mani wayta na bunmo kawaqmo ham. Sa in awe nagah na ago tuhuritta.

<sup>3</sup> In nazaq haqan Pita tubulon, Ananayas ham ezaq tonim ni Satan hulosan in ni ninad wamuzad nibe yahsa ni ningo og na zayim amenin asor ulilam? ham. Ulilemad

ni God ago Bugaw Dimunta tikat ugaq? ham. <sup>4</sup>Og na ni a hi zaysamo in ni nibinib tuqusta ham. Ad ni og na zayim amenin wanta na in ninmo ninad muzgo usta ham. Nagaqgo ni daq meqin kazaq emnan ninad am? ham. Ni matmo diq a hi kat ug ham. Haiqgam ham. Ni God-mo tikat ug ham. <sup>5</sup>Haqanmo Ananayas gamuk na huritim in ogib woqimmo tumom. Moqan mataw daq na abin huritiya na bunmo tirab naqmo diq hiqiy yaqay. <sup>6</sup>Sa mataw minminta asor bolim Ananayas momta na asan tubusanib il tonim sorim a le tiyay toniy.

<sup>7</sup>Ari mataw na os tusa zeq adulan ezeq-man nazaq le tihigiyana ta Ananayas awe bo tugwahtim. In aduw momta na ago abin a hi huritimmo in gadgadmo bol. <sup>8</sup>Bolan Pita bulon, Ezaq? ham. Ne giger og na zayim mani kazaqmo waqiy ye? ham. An aw na bilam, Ege ham i giger mani nazaqmo wawta ham. <sup>9</sup>Haqan Pita bulon, Nagaqgo ne giger Iyahta ago Bugaw Dimunta ulum waqnan an adugan waziy? ham. Ni hurit ham. Mataw niduw yay toniya na bo dan ezab tituray ham. Teq in ni nisoreq niqad tileh daqaymo ham. <sup>10</sup>Haqan nawaqmo aw na Pita anognib woqimmo tumom. Moqan mataw minminta na bo gwahtiqim in aw na moqan ahol tuwaqiy. Ahol waqad in sorim a lehim aduw agerab tiyay toniy. <sup>11</sup>Nazaq iyan Yesus ago on matawta na bunmo tirab titay yaqay. Sa on mataw God ago maror asan ban osiya na nazaqmo in daq na abin huritad tirab yaqaymo.

*Aposel daq azawayin inaq amo amo giqeman gwahtiq yaqay*

<sup>12</sup>Ari Aposel in on mataw gilikmanib daq azawayin inaqta amo amo kabemmo giqeman gwahtiq yaqay. Sa Yesus ago on mataw na bunmo gigem amulikmo iyim in Tempel ago veranda anan Solomon ago veranda haqayta nab sirisirimo humab tuwol yaqay. <sup>13</sup>Sa on mataw asan banta na in Yesus ago dauh na gibin tiqiluw yaqay. Ta teq in girabunad in bo nenaq humab a hi em yaqay. <sup>14</sup>Sa God in on mataw kabem diqmo giqeman in Iyahta anan helmo haqad ago dauh na giduganib tubol yaqay.

<sup>15</sup>Nazaq iysa iyan mataw in giyogniz gigo moq inaqta gisoreq giqad leheq dan adek ban garuruh hureneq teq in harishesmo giqemid us yaqay. In ginad em yaqay, Pita loq gelad luwsa zeq bo aholib worireqsa adulan le mataw moqayta ka giwazid dimniy daqay haq yaqay. <sup>16</sup>Sa on mataw kabemmo uliqben amikmikta Jerusalem agerab osiya nagan inaqmo Aposel gigo hib tubol yaqaymo. Bolad in mataw gigo moq inaqta na teq mataw gigo

bugaw meqinta inaqta nagan giqad bolsa on mataw na bunmo gihol tidimniy yaqay.

*Aposel giqirquran bitab ossa angelo araq bolim gidanin has nag*

<sup>17</sup>Daq nazaq gwahtiqsa tamaz mat danmebta na ayogniz Sadyusi nenaq in Aposel gigem meqinta tineq yaqay. <sup>18</sup>Gigem meqinta negad in eraqim Aposel giwazim giqad le gavman gigo bit giqirquran osayta nab tigiqemiy. <sup>19-20</sup>Giqeman ossa taromab Iyahta ago angelo araq bolim bit na adanin hasim in Aposel giqad asanib gwahtiqim teq in gibilan, Ne leheq Tempel ago gel aduganib gwahti turad ne os muturta ka ago adan agamukan bunmo on mataw gibileniy ham. <sup>21</sup>Haqan Aposel gamuk na huritim tarommo saw hastitaysa in Tempel-ib lehim on mataw gamuk tigi-bilen yaqay.

Ari tamaz mat danmebta na ayogniz Sadyusi nenaq bolim nan eman Juda gigo kaunsel ayahta na gigo hib lehan Isrel-ib mataw marorta na bunmo bo humab tuwoliy. Humab wolim osad teq in kabibiy mataw asor giqeman in Aposel giqirquran osayta na giwageq giqad mataw aseseqta na gimeb ta bolnan haqad tilehiy. <sup>22</sup>Lehim bit giqirquran osayta nab in Aposel gisawan tuwaqiy. Gisawan waqim in muleqim ta lehim mataw aseseqta na tigibileniy. <sup>23</sup>In bilaqiy, I bit nab lehim dan ez bunmo giqot bugan giwaz meqniyim ussa i ahol waw haqiy. Sa mataw dan ez wamuzayta nagan in dan ez buntab tituray haqiy. Ta teq i dan hasim mat araq aduganib ossa i ahol a hi waw haqiy.

<sup>24</sup>Haqan mataw Tempel-ib hurmey osayta gigo mat danmebta na teq mataw tamaz emayta gigo aseseqta na in gamuk na huritim in ginadnad emad bilaqiy, Mataw na ezaq tonim nabag lehiy? haqiy. <sup>25</sup>Sa mat ta araq bo gwahtiqim gibilan, Huritiy ham. Mataw ne giqirquriyta na in muran Tempel agelin aduganib turad on mataw gamuk tigibilenay ham. <sup>26</sup>Haqan hurmey gigo mat danmebta na ago mataw asor nenaq lehim in Aposel na amidemqanmo giwazim giqad ta boliy. Na ezaqgo in rabad ginad em yaqay, Luweq i mataw ka ginolid on mataw biyahta ko i gimen gig hunegad tiginol em daqay haq yaqay.

*Aposel kaunsel ginognib gamuk bilaqnan a hi rabi*

<sup>27-28</sup>Mataw na Aposel giqad bolim Juda gigo kaunsel ayahta na ginognib giqeman tituriy. Tursa tamaz mat danmebta na gibilan, Ne mat na abinib on mataw ta hi gibilengo haqad i atoran diqmo gibilenta ham. Ta teq ne gigo suleq na ayah iyim in uliq Jerusalem tuwaleq ton bugaq ham. Sa

mat na wol eman momta agamukan ne i gimalib emnan tonay ham.

<sup>29</sup> Haqan Pita ayogniz Aposel bunmo nenaq in amenin emim bilaqiy, I Godmo aqez muzinamta haqiy. I mataw giqez a hi muzinam haqiy. <sup>30</sup> Ne Yesus atoranmo wazim ayib dom wolad ne wol eman tumomta haqiy. Ta teq i gisesan gigo God in wazan ta eram haqiy. <sup>31</sup> Eraqan God in abin ayahta ugim teq in waqim eman ulilibmo inmo aben aqabun ban tuqos woqim osaq haqiy. Osad in Maror Iyah diqta on mataw gilumsihq ta giwaqdaqta amatin tiqiy haqiy. Iyim in Isrel on mataw ginad wazid eraqsa in ginad buliyad gigo daq meqinta gileh ugsa in gigo daq meqinta na tigiwalemdaq haqad in osaqta haqiy. <sup>32</sup> God daq nagan bunmo emsa i gimebmo ahol tuwaqim on mataw gibilenaqta haqiy. Sa God in on mataw inmo aqez huritayta na in ago Bugaw Dimunta tinegan Bugaw na in daq nagan ago bilaqaqtamo haqiy.

*Mat anan Gamaliyel haqay na bilam, I Aposel gigo hib kiskis iyuq ham*

<sup>33</sup> Ari mataw aseseqta na in Aposel gigo gamuk na huritim gigem diq meqniya in Aposel ginol emnan ginad tiqem yaqay. <sup>34</sup> Sa Farisi gigo araq Juda gigo kaunsel ayahta nab osim in eraqim titur. Mat na anan Gamaliyel\* haqayta. In God ago maror Moses bilamta na asuleqin bilaqaqta amatin araq. Sa on mataw bunmo in mat na wazinad ago gamuk hurit yaqayta. Ari mat na eraqim turad in Aposel gimuzid asanib lehgo tibilam. <sup>35</sup> Bilaqan Aposel asanib tilehsa teq in mataw aseseqta na kazaq gibilan, Ne Isrel mataw ham ne ginad em haseq teq mataw ko giholib daq emiy ham. <sup>36</sup> Na ezaqgo kwaziq nogmo mat anan Teudas haqayta na eraqim bilam, Ya mat ayahta ibin inaqta haqad in bilam ham. In nazaq haqan mataw 400 nazaq muzinad inaq luw yaqayta ham. Luwsa gavman mataw asor bolim mat na wol eman in ago mataw in anan helmo haqiyta na haresmo tuksa ago kabiy na tuwom ham. <sup>37</sup> Teq daq na abeb gavman in on mataw ginan waqad ginuliniya nab mat ta araq anan Judas saw Galiliy-ibta na eraqim on mataw asor giquetil wazan eraqsa in gihuram ham. Teq mat na tumommo ham. Moqan ago mataw in anan helmo haqiyta na bunmo tukim hares tiqiy bugiy ham. <sup>38</sup> Nazaq iyan ya ne gibilenaiq ham. Ne mataw ko ginan asit rabad giholib daq araq hi emiy ham. Ne gihulosidmo luwiy ham. Nagah ka alulin matawmo gigo hib ussa teq in anadibmo thihiqydaqta ham. <sup>39</sup> Ari

nagah ka alulin God-mo ago hib usid teq ne mataw ko a hi giwasih daqay ham. Luweq ne nazaq emad ne God inaq an tuwol daqay ham.

Ari Gamaliyel nazaq haqan mataw aseseqta na aqez tumuziniy. <sup>40</sup> Muzinin in Aposel gililewunan bolan in gusib tigittuw ninaliy. Ad in Yesus ananib gamuk araq ta hi emgo atoranmo gibileniy. Gibilenim gihulosan asanib tugwahtiqiy. <sup>41</sup> Gwahtiqim in Juda gigo kaunsel ayahta na huload ginad dimniya tilehiy. Na ezaqgo God agem dimunta negad in Yesus abin eman in gigo hib ayahmo iyan in Yesus abinib mebay soriyta na ago in God ago hib ginad ayahmo dimniyy. <sup>42</sup> Ginad dimniya kam bunmo in Tempel-ib teq on mataw gigo bit amo amo-ib leheq suleq negad bilaq yaqay, God mat emid bo i gilumsihdaqta amatin anan Kraiss haqayta na in Yesus-mo haq yaqay. Haqad in giwaz meqniyim gamuk na bilaqad in gigo daq na a hi huload yaqay.

## 6

*Yesus ago on matawta na in mataw 7 nazaq Aposel gilumsihgo gitowun emiy*

<sup>1</sup> Kam nab on mataw kabemmo diq disaipel tiqiy yaqay. Sa in gigo asor Grik nan bilaqayta na eraqim in disaipel Hibru nan bilaqayta na tiginad yaqay. Ginadad in bilaq yaqay, Kam bunmo ne on mataw didaq nagah ago siqim iyayta na gilumsihad ne i gigo on waburta gihulosad ginadin a hi emayta haq yaqay. <sup>2</sup> Afaqan nazaq gwahtiqan Aposel 12 na in disaipel biyahta na bunmo gililewunan bolan in gibileniy, I God ago gamuk akabiyhan huload didaq iberamta na in dimun a haiq haqiy. <sup>3</sup> Nazaq iyan i gimaqbaban haqiy ne gilikmanib mataw 7 nazaq ginaguniy haqiy. Mataw na in on mataw gigo hib gibin dimunta usaqta teq God ago Bugaw Dimunta in giholib ayahmo usaqta teq in ginad awaz meqinta, mataw naqanta ne ginaguniy haqiy. Id teq i mataw 7 na gigemid in kabiy na tuwamuz daqay haqiy. <sup>4</sup> Wamuzsa igmo kam buntab God inaq gamuk emad teq i on mataw God ago gamuk gibilenad i gihol bunmo emid kabiy nab lehdaqta haqiy.

<sup>5</sup> Haqan on mataw bunmo gamuk na huritim in ginad tibilam. Ginad bilaqsa in mat araq anan Stiven haqayta na anan bilaqim waqiy. Stiven in mat anad helta ayahmo usyaqta. Ussa God ago Bugaw Dimunta in aholib ayahmo usyaqtamo. Teq in Filip teq Prokorus teq Nikanor teq Timon teq Parmenas teq Nikolas ginan bilaqim

\* 5:34: Pol Yesus anan helmo a hi haqadmo in mat anan Gamaliyel haqayta naqmo ago hib Farisi asuleqin wanta. Aposel 22.3 nab teq ni ahol waq.

giwaqıymo. Nikolas in mat ulıq Antiyoq-ıbta. In Juda mat a haiqta teq kwazıqmo in Juda gıgo maror ahaqenıb iyim muzınyaqta. <sup>6</sup> In mataw 7 na giwaqım Aposel gınoğnıb gıqeman tursa Aposel God inaq gamuk tiqemın teq in gıben mataw na gıholıb emim giwazad kabıy tıneğiy.

<sup>7</sup> Ari God ago gamuk le ayah iysa ulıq Jerusalem-ub on mataw kabemmo gamuk na anan helmo haqsa disaipel gınuğınqan kuluwmo diq tiqiy yaqay. Sa Juda gıgo mataw tamaz emayta na kabemmo in nan hurıta helmo tıhaq yaqaymo.

#### *Juda mataw asor Stıven hazızirıb emiy*

<sup>8</sup> Ari God aqem dımunta teq zaway ayahmo Stıven uqsa in daq azawayın inaqta aseseqta amo amo on mataw gılikmanıb gıqemyaq. <sup>9</sup> Emsa mataw asor eraqım Stıven inaq an tumugiy. Mataw na in Juda gıgo dauh arağ anan Frıman\* haqayta na gıgo asor. Na in ulıq Sairin-ıbta teq ulıq Aleksandriya-ıbta teq saw gıger Silisiya-ıbta teq Esiya-ıbta. <sup>10</sup> In Stıven inaq an mugsı God ago Bugaw Dımunta Stıven anad dımunta uqsa mataw na Stıven ago gamuk bayan yo hiqiy yaqay.

<sup>11</sup> Nazağ iyan in ulilemim le mataw ta asor mani negan in katiyad bılaqiy, Stıven in Moses teq God inaq gıbilawunsa i hurit haqiy. <sup>12</sup> In nazağ haqad in Juda gıgo mataw marorta na teq mataw Moses ago gunun hurit kemiya na teq Juda on mataw kabemmo inaqmo gıgem wazan eraqsa in Stıven anan gıgem timeqniyyaq. Gıgem meqniysa in le Stıven wazım ad Juda gıgo kaunsel ayahta na gıgo hib tilehiy. <sup>13</sup> Lehim in mataw asor Stıven amalib nan katiyta em daqayta humab nab gıqem toniymo. An mataw gımileq iyayta nagan in Stıven anan bılaqiy, Tutımmo mat ka God ago bit tawonta ka teq God ago maror Moses bılamta na inaqmo gıbeyan woqayta haqiy. <sup>14</sup> Haqad in bılaqiy, Mat ka bılam, Mat anan Yesus ulıq Nasaret-ıbta haqay na in teq Tempel wolınerad in i gıgo maror Moses ıgta na tubulıydaqmo haqsa i hurıta haqiy. <sup>15</sup> Haqan mataw kaunsel ayahta nab osiyta na bunmo in gıme le Stıven atoranmo ahol waqsa Stıven anobun angelo anobun oy nog iysa in ahol waqiy.

## 7

*Kaunsel mataw aseseqta Stıven gamuk uqsa in ahol adanın qway*

<sup>1</sup> Ari tamaz mat danmebta na in Stıven susumun ugım bılam, Gamuk nawa ni nımalib emayta na in helmo ye? ham.

\* 6:9: Mataw gınan 'Frıman' haqayta na in kabıbiy mataw samanta iyim osiyta teq abeb in gıhol yazım samanmo luw os yaqayta.

<sup>2</sup> Haqan Stıven bılam, Ya imaman teq ya imaqbaban ham ne hurıtiy ham. Kwazıqmo i gıses Abraham ulıq Haran-ıb a hi lehadmo in saw Mesopotemiya-ıb osyağ ham. Ossa God ulıq Heven-ıb abın teq ahol anuwın ayahta inaq osaqta na in Abraham ameb tugwahtım ham. <sup>3</sup> Gwahtıqım in Abraham bulon, Ni nıngo og teq nısenlul bunmo gıhulosad og arağ ya tıniğisıhundaıqta nab ni leh haqad in bulon ham.

<sup>4</sup> Haqan Abraham eraqım Kaldiya gıgo og in osta na hulosađ ulıq Haran-ıb tilah ham. Lehim ossa amam nab tumom ham. Moqan God in Abraham eman bolım in og muran i Juda osaqta kab in tuqos ham. <sup>5</sup> Ossa kam nab God in og ka ago asit diğ arağ Abraham aholyon waqgo a hi ug ham. Teq in hel diğmo haqad Abraham kazağ bulon, Abeb teq ya og ka nıgıd ni teq ni nitatnız nenağ gıholyon tuwağ dağay haqad in bılam ham. Abraham amun haiqmo ossa God in nazağ bulonta ham. <sup>6</sup> Teq God kazağ bulonmo ham.

Ni nısesan abeb teq gwahtıq dağayta na in le mataw asor gıgo ogıb begbeg iyeğ tuqos dağay haqad in bılam ham. Ossa og anamrenız na in ni nısesan gıqemıd in gıgo kabıbiy mataw samanta iysa in gımeqın tonad kabıy afaqanta tıneğ dağay haqad in bılam ham. Negsa ni nısesan nazağ meqın diğ ossa le ulıg 400 nazağ tiqıydaq haqad in bılam ham.

<sup>7</sup> Sa ni nısesan in mataw na gımen kabıy emsa ya mataw na gılum kemad gıgo dağ amenın negsa in ni nısesan gımuzıd og na huloseğ tugwahtıq dağay haqad in bılam ham. Gwahtıqeq in boleğ og kabmo yaqmen lotu tiqem dağay haqad in bılam ham. *Jenesıs 15.13-14*

<sup>8</sup> God nazağ bulonım teq in Abraham inaq an aduğan wazım bulon, Abraham ham ni nıhol abatan asan tuqurotdaq haqad in bılam ham. Na in Abraham inaq an aduğan wazta na atowun Isrel mataw bunmo gısanıb usdaq haqad in maror na ugta ham. Nazağ iyan abeb Abraham ago amun Aısak gwahtıqım in ago kam 8 nazağ tiqıyan Abraham in asan tuqurot ham. An abeb Aısak in Jakob amam iyim in nazağmo ton ham. An Jakob in i gısesan 12 na gımam iyim in atatnız na gıgo hib dağ nazağ amtamo ham.

<sup>9</sup> Teq i gısesan Jakob atatnız na in gımiqın Josep anan gıgem meqniysa in waqım mataw ta asor gıgo hib tıziyiy ham. Zayan mataw na Josep waqım ad Isip-ub tuwolehiy ham. Ta teq God in Josep a hi

hulosad in inaq luw os tutyaq ham. <sup>10</sup> Ad in Josep ulumsihim in ago afaqan bunmo giwalam ham. Walemim teq in Josep zaway ugsa Josep in Isip gigo king Fero ameb mat dimun diqta anad awaz meqinta amatin tiqiy ham. Nazaq iyan king na in Josep ban ugan in gavman gigo mat danmebta iyim in Isip bunmo giwamuzad teq in king Fero ago kabiy nagah bunmo inaqmo tigiwamuzaqmo ham.

<sup>11</sup> Abeb zarowaraq ayahta Isip teq Kenan gigo og saw bunmo tugwahtim ham. Gwahtiqa on mataw saw nagab bunmo afaqan ayahmo tisor yaqay ham. Sa i gises Jakob atatniz nenaq in didaq ago siqim tiqiyimo ham. <sup>12</sup> Sa Jakob in Isip-ub didaq usaqta na agamukan huritim in i gisesan giqeman in gime danmebta tuwolehuy ham. <sup>13</sup> Teq in gime gigerta a ta lehan Josep in ababan gimeb ahol tuqulal ton ham. Ulal tonan teq Fero in Josep asenul na gigo tuhurit kam ham. <sup>14</sup> An teq Josep in amam Jakob amen nan emim lilewunan in amam teq in amaqbaban giqonan gigo onmin nenaqmo bunmo in ago hib tuwolehuy ham. Wolehim Josep asenul na bunmo in on mataw 75 nazaq iyim tuqosiy ham.

<sup>15</sup> Ari Jakob Isip-ub tuwolah ham. Wolehim osad abeb in tumom ham. Sa i gisesan na bunmo osim tumoqiymo ham. <sup>16</sup> Moqsa mataw in gisan gisoreq giqad Sekem-ub leheq giyay ton yaqay ham. Kwaziqmo Abraham uliq Sekem-ub Hamor atatniz gigo hib mani silva negad gigo og asor zayta nab in hodhodab giyay toniyta ham.

<sup>17</sup> Giyay tonan ulig kabemmo le tihiqiyan teq abeb God in Abraham asesan og negnan hel diqmo bilamta na akaman tugwahtiqa tonyaqaq ham. Gwahtiqaq tona Jakob abaqaqzniz na Isip-ub osad in qwabiyayad on mataw kabemmo diq tiqiy yaqay ham. <sup>18</sup> Sa kam nab mat araq gwahtiqaq Isip gigo king iyim os ham. Mat na in Josep ago a hi huritad in abin a hi wazinyaqta ham. <sup>19</sup> In i gisesan gikat negad gimeqin tonyaqaqta ham. Gimeqin tonad in gibe yahsa in gigo onmin ginen mur giqemsamo in giwaeq asanib giqemid useq tumoq yaqayta ham.

<sup>20</sup> Sa kam nab Moses anen in ago amun Moses tiqam ham. Eman God amun na ahol waqad ame bilaq naqmo hiqiyaq ham. Sa Moses anen amam in bitabmo amun alowan tonad ossa le kalam ezeqmanmo tihiqiy ham. <sup>21</sup> Hiqiyin in amun waqim asanib eman ussa Fero amiy in amun na warinim inmo ago amun nog alowan titonyaqaq ham. <sup>22</sup> Sa Moses ayah iyim in Isip gigo ginad dimunta na bunmo asuleqin waqim in ago gamuk teq in ago kabiy bunmo azawayin inaq tiqiy ham.

<sup>23</sup> Ad abeb in ago ulig 40 nazaq tiqiyin leheq amaqbaban Isrel gibiygo haqad anad tiqam ham. <sup>24</sup> Anad emim in lehim luwsa Isip mat araq eraqim anadibmo Isrel mat araq meqin tona in tigibiy ham. Isip mat na in mat ago zaway haiqta na meqin tona Moses gibiyadmo in lehim ayow ago zaway haiqta na ulumsihad in aqenin waqim Isip mat na wol eman tumom ham. <sup>25</sup> Moqan Moses anad am, Muran ya imaqbaban ya inan ginad em daqay, God in Moses abenab i tigilumsihad haq daqay haqad in anad am ham. Teq haiq ham. In ginad a hi emiy ham.

<sup>26</sup> Ari Moses usim ta tiqim in lehim Isrel mataw giger an wolsa gibiyad in gigerab tilom ham. Loqim in giger na ginobun wastitayid in an a ta hi wolgo haqad gibilenim bilam, Mataw ham ne maqbab haqad in bilam ham. Nagaqgo ne kazaq an meqin tonay? haqad in bilam ham. <sup>27</sup> Haqan giger na gigo araq in daq na anamren iyta na in Moses ulum hasan lehan bulon, Nog bilaqan ni i gigo maror iyim ni i gigo daq ulum kemaq? haqad in bilam ham. <sup>28</sup> Irimo ni Isip mat na wol eman momta nazaqmo ni ya inol emdaqmo ye? haqad in bilam ham. <sup>29</sup> In nazaq bilaqanmo Moses tituk ham. In tukim lehim Midiya gigo ogib begbeg iyim osyaq ham. Osad teq in aw waqim in ago onmin matmatta giger inaq tiqiy ham.

<sup>30</sup> An ulig 40 nazaq le tihiqiyan teq Moses le og araq amatawun haiqta garah Sainay agerab usaqta nab luwsa angelo araq in ameb tugwahtim ham. Angelo na faq ay amikta oysa in faq na ameb gwahtiqaq tur ham. <sup>31</sup> Sa Moses faq na ahol waqad anadnad diq emyaq ham. Ad in anononmo ahol waqgo haqad ay agerab loqanmo Iyahta kazaq tubulon ham. <sup>32</sup> Ya ni nisesan Abraham teq Aisak teq Jakob gigo God haqad in bilam ham. Haqan Moses abensen harara nensa in ahol waqnan rabyaq ham. <sup>33</sup> Sa Iyahta bulon, Og kawa ni turaqta ka in tawon diqta haqad in bilam ham. Nazaq iyan ni nisenab nisendugan na haseq tur haqad in bilam ham. <sup>34</sup> Ad teq in bilam, Isip-ub og anamreniz in yaqgo on mataw afaqan kabemmo negsa ya daq na bunmo tigibiy bug haqad in bilam ham. Yaqgo on mataw gaqsa ya huritim muran ya in gilumsihad giholib afaqan na walemgo haqad tigewoy haqad in bilam ham. Nazaq iyan ni eraqeq bo leh haqad in bilam ham. Ya ni Isip-ub niqemid lehan haqad in bilam ham.

<sup>35</sup> Ari kwaziqmo Isrel mataw giger na in Moses baymuzim buloniy, Nog bilaqan ni i gigo maror iyim ni i gigo daq ulum kemaq? haqad in buloniy ham. Ta teq mat baymuziyta naqmo in ay amikta agerab



tursa angelo gwahtiqim bulonan in God ago on mataw gigo maror iyeq gilumsi-heq gigo bab gibenab giwaqnan haqad lahta ham. <sup>36</sup> Lehim in Isrel on mataw giwaqim giqad le Isip hulosisim tugwah-tiqiy ham. Mat na in Isip-ub daq azawayin inaqt kabemmo giqamta ham. Teq in lehim yuw akurorqanta anan Kamis Kakaqta haqayta na agerab daq azawayin inaqt asor giqammo ham. Teq Isrel in og amatawun haiqtab ulig 40 nazaq luw ossa nab Moses daq azawayin inaqt kabemmo tigiqemyaqmo ham. <sup>37</sup> Mat naqmo Isrel gibilenim bilam,

God teq ne gilikmanib ne gimaqbab ara-q emid gwahtiqeq in ago nantut ya nogmo iyeq osdaq haqad in bilam ham. *Lo 18.15*

<sup>38</sup> Mat Isrel on mataw nenaq og amatawun haiqtab osta na Moses-mo ham. Mat naqmo in i gisesan nenaq osta ham. Garah anan Sainay haqayta nab angelo in Moses-mo gamuk bulonta ham. Mat God ago gamuk dimunta mataw giqeman kayeqmo kuluwa-kuluwmo osayta na waqim i igta na Moses-mo ham.

<sup>39</sup> Ta teq i gisesan na in Moses aqez huritnan gituw hiqiyiy ham. Gituw hiqiysa in Moses aqez othasad in Isip-ub muleqeq ta lehnan ginad emiy ham. <sup>40</sup> Ginad emad in Aron buloniy, Ni i giyon god asor giqem ig haqiy ham. Id teq god nagan danmeh lehad in i giwamuzeq giqad leh daqay haqiy ham. Na ezaggo mat i giwaqim giqad Isip hulosisim bolta na in nabagag lehim ezaqag titon haqiy ham. <sup>41</sup> Haqad kam nab in bulmakau amidon ara-q adulan emim teq in anognib karuw ara-q anat urotim faqab wizim in ayon tamaz em ugiy ham. Ad in god katiyta in gibenab emiyta na ahol waqad in ginad tidimniy yaqay ham.

<sup>42</sup> Nazaq iyan God in gileh negad gihulosan in nagah amo amo kaitab usayta na giyon lotu tiqem yaqay ham. God ago nantut gamuk mar toniyta nazaqmo diq in em yaqay ham. Gamuk na bilam,

Ne Isrel-ib mataw ham kwaziqmo ne og amatawun haiqtab ulig 40 nazaq osiyta haqad in bilam ham. Osad ne bulmakau teq sipsip ginat urotim faqab giwiz yaqayta haqad in bilam ham. Na ne yaqmen tamaz em yagnan haqad ne nazaq em yaqay ye? haqad in bilam ham. Haiqgam haqad in bilam ham.

<sup>43</sup> Ne ya gileh yagad ne god katiyta Molek ago lotu abitan emim teq ne ulig anan Refan haqayta na adulan emiy ham. Emim ne nagah giger na wazim saw haresmo ne luw yaqayta nab ne sorad a luw yaqay haqad in bilam ham. Ne god katiyta naqmo

giyon tamaz em negnan haqad ne in gidulan emiyta haqad in bilam ham. Nazaq iyan ya ne gigo ogib gimuzid ne pesanmo saw Babiloniya-ib le tuqos daqay haqad in bilam ham. *Amos 5.25-27*

<sup>44</sup> Kwaziqmo God in Moses bit ara-q adulan isihunim bulon, Ni yaqmen bit ara-q kazaqta waz yag haqad in bulon ham. Haqan i gisesan og amatawun haiqtab luw osad kam nab in Tempel karuwsanibta na tiqemiy ham, God Moses bulonta nazaq ham. In bit na emim ahol waqad ginad em yaqay, Muran God i ina-q tuqosauq haq yaqay ham.

<sup>45</sup> Ari abeb i gisesan in Josuwa inaq og kawa i osauqta ka anamreniz gimuzeq gigo og waqnan haqad tuboliy ham. Bolan God i gisesan gimeb mataw nagan gimuzan lehsa gigo og ka in waqim i gisesan tinag ham. Kam nab i gisesan lotu abitan karuwsanibta na og kab a bolim in duq tonan tursa le Devit ago kamubmo tiqiy ham. <sup>46</sup> An God agem dimunta Devit ugsa Devit loyinad in God bulonim bilam, Ni ya ises Jakob ago God haqad in bilam ham. Ni ya inan ninad dimniysa teq ya ninyon bit diq ara-q em nigiq haqad in bilam ham. <sup>47</sup> Teq haiq ham. Devit in mat bab emad mataw kabemmo ginol amta iyim in bit na a hi am ham. Devit atatin Solomon teq in God ayon bit diq na tiqamta ham.

<sup>48</sup> Ta teq God Ulilib Diqta na in bit mataw gibenab emayta nab a hi osaqta ham, God ago nantut bilamta nazaq ham. In bilam,

<sup>49</sup> Yaqmo Iyahta ya kazaq bilaqaiq haqad in bilam ham. Ya Heven-ib yaqgo ban tawontab osad nagah bunmo giwamuzaiqta haqad in bilam ham. Teq og ka in ya isen abanan iysa ya isen emim osaiqta haqad in bilam ham. Nazaq iyan bit ezaqta ne yaqmen em daqay? haqad in bilam ham. Teq ogib saw ara-q ayahta ya woqeq usad inamur emdaiqta na edowa? haqad in bilam ham. <sup>50</sup> Yaqmo ibenab nagah kagan bunmo a hi giqemta ye? haqad in bilam ham. *Aisaya 66.1-2*

<sup>51</sup> Ne mataw gifaqin atoran diqta ham. Ne gigem soqotim ussa gideksan nan a hi huritaqta ham. Tutimmo ne God ago Bugaw Dimunta baymuzayta ham. Ne gisesan gisen muzinad in daq emiyta nazaq ne emaymo ham. <sup>52</sup> Kwaziqmo ne gisesan God ago nantut bunmo afaqan negad gimeqin ton yaqayta ham. Sa nantut na asor in mat titnonta teq boldaqta na agamukan bilaqsa ne gisesan na in ginol em yaqayta ham. An muran mat titnonta na gwahtiqan ne waqim bab gibenab eman in tuwol emiy ham. Na in bilaqne negmo gibenab wol emiyta nog tiqiy ham. <sup>53</sup> Ne God ago maror

Moses bilamta na angelo gibenab waqiyta teq ne maror na wazinad a hi muzinayta ham.

*Mataw gigib Stiven wol eman mom*

<sup>54</sup> Ari mataw aseseqta na in Stiven ago gamuk huritsa gamuk na giquutil tuqulum. Uluman in gite guruwad Stiven anan gigem diq timeqniy yaqay. <sup>55</sup> Sa God ago Bugaw Dimunta Stiven aholib ayahmo bolan in ame Heven-ib gwalehim turad in God ahol anuwan oysa ahol waqad teq in Yesus God aben aqabun ban eraqim tursa ahol tuwammo. <sup>56</sup> Ahol waqad in bilam, Ne ahol waqiy ham. Kait misireq nog iyim aqez hassa ya Mat Atatin God aben aqabun ban kowa tursa ahol tuwacaqiq ham.

<sup>57</sup> Haqanmo haiq mataw na dedibmo ek tonad gideksan ituqad in garabmo eraqim sibim le Stiven tuwaziy. <sup>58</sup> Wazim in othishasim ad uliq asan ban lehim in amalib gig tuhuneg yaqay. Sa mataw iturimmo Stiven amalib nan emiyta nagan in daq na anamreniz iyim iyan in gigo giholsihen hasim mat minminta araq anan Sol haqayta anognib humab tuwoliy. <sup>59</sup> Humab wolim teq in gigibmo Stiven tuwolsa Stiven bilam, Iyahta Yesus ham ni ya iwitan waq ham. <sup>60</sup> Haqad in abak-bakan ulum laqawim turad in dedibmo lilay, Iyahta ham ni mataw ka gigo daq meqinta ka walemad anadin ta hi em ham. Haqadmo in tumom.

## 8

<sup>1</sup> An mataw Stiven wol eman momta na in mat araq anan Sol haqayta na anadib dimun diqmo iy.

*Sol in Yesus ago on matawta na gimeqin tonya*

Ari Stiven momta kam nab Yesus ago on mataw uliq Jerusalem-ub osiyta na gigo hib bab meqin diqta tugwahtim. Gwahtiqa in bunmo haresmo tukim saw giger Judiya teq Samariya gigo saw ban le tuqosiy. Ari Aposel teq in uliq Jerusalem-ub os tutad a hi tukiy.

<sup>2</sup> Teq Stiven moqan mataw asor God anadin diq emayta na in Stiven asan waqim a le tiyay toniy. Yay tonim in ginad meqniysa gaq ayah waziy.

<sup>3</sup> Sa Sol in Yesus ago on matawta na atoranno tigimeqin tonya. Ad in bit bitmo luwad aduganib gwahtiqa in mataw on inaqmo giwazeq gihureqeq giqad le bit giqirquran osayta nab tigiqemyaq.

**Aposel Yesus ago gamuk saw  
Judiya-ib teq saw  
Samariya-ib a lehiy**

*Aposel asor saw Samariya-ib Yesus awagamun dimunta bilaqiy*

<sup>4</sup> Ari afaqan nazaq gwahtiqa Yesus ago on mataw saw haresmo tukim le osad in Yesus awagamun dimunta on mataw tigibilen yaqay. <sup>5</sup> Sa Filip eraqim saw Samariya gigo uliq araqab wolehim in mataw na gibileneq bilaqyaq, Yesus in Kraiss haqyaq. <sup>6</sup> Haqsa on mataw uliq nabta na in ago gamuk huritad teq in daq azawayin inaqta emsa ahol waqad in bunmo araqibmo gidek tih nemeq ago gamuk tuhurit naqmo hiqiy yaqay. <sup>7</sup> Na ezaqgo in gigo on mataw kabemmo giholib bugaw meqinta usiyta na in on mataw na gihuloseq gwahtiqa in ek toneq tileh yaqay. Sa mataw kabemmo gibensen tumomta teq gisen meqinta nagan in gihol tidimniy yaqay. <sup>8</sup> Nazaq iyan uliq nab on mataw ginad ayahmo diq dimniy yaqay.

<sup>9</sup> Ari uliq nab mat araq anan Saimon haqayta in os. Kwaziqmo in liqiy emad bar hares meqinta giwazyaqta. In nazaq emsa saw Samariya-ib on mataw bunmo gihol riten lamsa in ginadnad diq em yaqay. Sa mat na inmo ahol abin iluwad bilaqyaq, Ya asittaqmo haqyaq. <sup>10</sup> Haqsa on mataw bunmo gihin inaqta teq gihin haiqta inaqmo in Saimon ago gamuk tuhurit naqmo hiqiy yaqayta. Ad in mat na anan bilaq yaqay, God ago zaway ayahta na in aholib usaqta haq yaqay. <sup>11</sup> Saimon ame kabemmo daq lul araq diqta giqemsa iyan mataw ahol waqad gihol riten lamsa in ago gamuk bunmo hurit yaqayta.

<sup>12</sup> Ari Filip bolim God ago maror agamukan dimunta bilaqad teq in Yesus Kraiss abin gibilensa kam nab on mataw na kabemmo gamuk na anan helmo haqsa Filip giqad le yuwub tighuz nag. <sup>13</sup> Sa Saimon inaqmo helmo tihammo. Haqan Filip in huz ugan in Filip inaq soqoteq diq inaq tiluwyaq. Luwsa Filip daq azawayin inaqta amo amo giqemsa Saimon ahol waqad ahol turuh nemyaq.

<sup>14</sup> Ari Aposel Jerusalem-ub osiyta na in Samariya-ib on mataw God ago gamuk anan helmo haqiyta na gihin tuhurity. Huritim in Pita ayow Jon inaq giqeman Samariya gigo hib tuwolehiy. <sup>15</sup> Wolehim osad in Samariya-ib on mataw helmo haqiyta na gimen God tubulon yaqay, God in ago Bugaw Dimunta negdaq haqad. <sup>16</sup> Na ezaqgo on mataw na Iyahta Yesus abinib yuw huziyta teq God ago Bugaw Dimunta in gigo hib a hi bolyaqta na ago iyan. <sup>17</sup> Ari in giger God bulonim teq in on mataw na gifaqinib giben emsa in God ago Bugaw Dimunta tuwaq yaqay.

<sup>18-19</sup> Teq Aposel giger na giben on mataw gifaqinib emsa in God ago Bugaw Dimunta waqsa Saimon tigibiy. Gibiyad teq in mani

waqim giger na gigo hib a bolim gibilan, Ne giger zaway na ya yag toniy ham. Yagid ya nazaqmo iben mat ara q afaqinib emsa in God ago Bugaw Dimunta tuwaqdaqmo ham. <sup>20</sup> Haqan Pita bulon, Ni ninad emaq, God ago naw in samanmo igaqta na ya mani-mo amalib tizaydaiq haqqa e? ham. Ni ninad nazaq emad ni ningo mani inaq garabmo tihiqiydaq ham. <sup>21</sup> I God ago kabiy emauqta ka aduganib ni a hi loqdaq ham. Haiq diqmo ham. Ni nigem God ameb dimun a haiq ham. <sup>22</sup> Nazaq iyan ni nigem buliyeq ninad meqinta na gileh ug bug ham. Ad ni Iyahta bulon waq ham. Yowo ham. In ni nigemab ninad meqinta na walemdaq o haiq? ham. <sup>23</sup> Ya nibiysa ni nigem meqniysa ninad meqinta na nihol bunmo wamuzsa ni daq ara q dimunta a hi emaq ham. <sup>24</sup> Haqan Saimon amenin emim bilam, Ne giger yaqmen Iyahta bulonsa in ya ilumsihan ham. Id teq daq nawa ne anan bilaqayta na in ya iholib hi gwahtiqaq ham.

<sup>25</sup> Ari Aposel giger na in Iyahta awagamun teq nagah bunmo Iyahta emsa in gimeb ahol waqiyta na atoranno gibilenim huload in muleqim Jerusalem-ub tugwalehiy. Gwalehad in Samariya gigo uliq amikmikta nagab lehad in Yesus awagamun dimunta na gibilenim gibilenim tilehiy.

*Filip in Itiyopiya-ib mat ara q Yesus awagamun dimunta bulon*

<sup>26</sup> Ari Iyahta ago angelo ara q Filip bulon, Ni eraqeq saw Saut bantab leh ham. Dan Jerusalem huload uliq Gaza ban wolehaqta naqmo ni muzeq leh ham. (Dan na saw amatawun haiqtab usaqta.) <sup>27</sup> Angelo nazaq bilaqan Filip eraqim tilah. Lehad danibmo in Itiyopiya mat ara q akayogin ayiyta\* ahol tuwam. Mat na in Itiyopiya gigo aw marorta anan Kandasi haqayta na ago mat ayahta ara q iyim in maror awta na ago mani bunmo wamuzyaqta. Mat na uliq Jerusalem-ub God ayon lotu emnan bolta. <sup>28</sup> Bolim in ago wilka-ib muleqim ta lehad teq in God ago nantut Aisaya gamuk mar tonta na ahol tuwaqyaq. <sup>29</sup> Samo God ago Bugaw Dimunta in Filip bulonim bilam, Ni wilka agerab loqeq inaq leh ham. <sup>30</sup> Haqan Filip sibim agerab lehim in mat na Aisaya ago nan asor ahol waqad bilaqsa tuhurit. Huritadmo in bulon, Ni marib nawa gamuk ahol waqad bilaqsa na alulin asit ni towa hurit e? ham. <sup>31</sup> An mat na wilka wazim teq in Filip bulon, Mat ara q gamuk ka alulin a hi ibilenid ya ezaq teq inad em hasdaiq? ham. Haqad in Filip bulon, Ni gwalid ya ninaq osuq ham.

<sup>32</sup> Ari mat na God ago marib gamuk ahol waqad bilamta na in kazaq.

Mataw sipsip wol emnan haqad wazim a bolayta nazaqmo in mat na wazim a boliy ham. Teq mataw sipsip amidon wazim ahulgen urotsa in a hi gayonaqta nazaqmo mat na ate akim a hi ek ton ham.

<sup>33</sup> Mataw daq titnontab mat na ago hazir a hi emiyta ham. In mat na mebay ugad bayan diq wom ham. Ezaq teq mataw in mat na asesan ginulin daqay? ham. In amun a hi emsamo wol eman moqim in og kab ahol amagin titartay ham. *Aisaya 53.7-8*

<sup>34</sup> Ari mat na in Filip bulon, Ya susumun nigaiq ham. God ago nantut nog anan bilaqad gamuk ka am? ham. Inmo ahol anan bilam o haiq in mat ta ara q anan bilamta? ham. <sup>35</sup> Haqan Filip in God ago mar asitmo ahol wamta naqmo amalib gamuk alulin emim in Yesus awagamun tubulon bug.

<sup>36</sup> Ad teq giger na lehad luwimmo in yuw ara qab tugwahtiqaq. Gwahtiqaqimmo mat na in Filip bulon, Ahol waq ham. Yuw kowa usaq ham. Naga diq ya idanin qwaya ni ya a hi huz yagdaq? ham. [ <sup>37</sup> An Filip bilam, Ni nigemabmo diq helmo haqeq teq ni tuhuzdaq ham. Haqan mat na amenin emim bilam, Ya helmo diq haqaiq ham. Yesus Krai in God atatin ham.]

<sup>38</sup> Haqadmo in bilaqan wilka tuwasih. An Filip in mat na inaq yuwub hitiqim in mat na tuhuz ug. <sup>39</sup> Huz ugim teq in giger yuw huload dubub tugwaliy. Gwalim tursa nan saw haiq Iyahta ago Bugaw in Filip waqim ad saw ara qab tilah. Lehad mat ayahta na in Filip ahol a ta hi waqyaq. Admo in anad dimniysa tilah.

<sup>40</sup> Ari Filip ame rireqim in anad tiqam, Ka ya uliq Asdot-ibmo tubol ham. Haqadmo in eraqim lehad saw nab uliq bunmo in on mataw Yesus awagamun dimunta gibilenim gibilenim tilehyaq. Lehad luwim abeb in le uliq Sisariya-ib tugwahtim.

## 9

*Sol anad buliyim Yesus anan helmo ham*

<sup>1</sup> Ari kam nab Sol agem meqniysa tibi-laqyaq, On mataw Yesus anan Iyahta haqayta na giwazeq ginol emid moq bugiy haqyaq. Haqad in tamaz mat danmebta na ago hib tilah. <sup>2</sup> Lehim bulonan mat ayahta na in sansandek asor mar tonim tuquq. Sol sansandek na giwazeq a leheq uliq Damaskus-ib mataw aseseqta Juda gigo bit humab wolayta giwamuzim osayta na amulik-mulikmo tinegdaq haqad. Teq

\* 8:27: Mat ka in maror awta na ago bitabmo osad kabiy emdaqta iyan in akayogin ayiyta.

sansandek nab in bilaqiy, Sol i gibinib luwaq haqiy. Mat aw nog dante murta na muzinsa Sol in gibiyeq giwazeq giqirquireq giqad Jerusalem-ub tuboldaq haqiy. Mataw on inaqmo in tigiwazdaqta haqiy.

<sup>3</sup> An Sol sansandek na wazim uliq Damaskus-ib tilah. In lehad luwim sinsin tiqiysamo Heven-ib faq anuwan hikliyanim tiqim Sol amalib tuwol huram. <sup>4</sup> Samo Sol ogib woqim usad in mat araq aqez kazaq bulonsa tuhurit. Sol, Sol ham. Nagaqgo ni ya imeqin tonaq? ham. <sup>5</sup> Haqan Sol bilam, Iyahta ham ni nog? ham. Haqan in bilam, Mat ni meqin tonaqta naqmo ham. Ya Yesus-mo ham. <sup>6</sup> Ari ni eraqeq uliq kob le gwahtiq ham. Gwahtiqid mat araq teq ni ezaq tondaqta na ago tinibilendaq ham. <sup>7</sup> Haqsa mataw Sol inaq boliyta na giqez hiqiyimmo nab turiy. Turad in mat aqez huritiyta teq in mat na anon ahol a hi waqiy.

<sup>8</sup> Sa Sol ogib usim eraqim turad in ame rireqim saw ahol waqad teq ame aromriq inaq iyyaq. Nazaq iyan mataw in abenab wazim ad le uliq Damaskus-ib tugwahtiqiy. <sup>9</sup> Gwahtiqan Sol kam ezeqmanmo ame hiqiyim os. Osad in yuw didaq haiqmo osyaq.

<sup>10</sup> Ari Juda mat araq disaipel iyta anan Ananayas haqayta na in uliq Damaskus-ib os. Osad in nagah araq sen qwayim ahol waqayta nazaq nogta ahol waqsa Iyahta in ameb gwahtiqim anan biyim bilam, Ananayas ham. Haqan Ananayas bilam, Iyahta ham ya kawa osaiq ham. <sup>11</sup> An Iyahta bulon, Ni eraqeq dan anan Titnonta haqayta nab ni leh ham. Leheq Judas ago bitab ni mat araq uliq Tarsus-ibta anan Sol haqayta na anan susumun ham. In nawa God inaq gamuk emad osaq ham. <sup>12</sup> Mat na sen qwayim in mat araq anan Ananayas haqayta bo gwahtiqim aben giger aholib emim wazsa in ame hastitayta na ahol tuwam ham.

<sup>13</sup> Haqan ta Ananayas amenin emim bilam, Iyahta ham mat na in ningo on mataw tawonta uliq Jerusalem-ub osayta na gigo hib daq hihiq emad ayahmo gimeqin tonta ham. Mataw kabemmo nazaq bilaqsa ya huritta ham. <sup>14</sup> Ad in mataw tamaz emayta gigo aseseqta na gigo hib zaway ayahmo waqim in uliq kab on mataw ni nihaqenib iyim ninan biyayta na giqirquran haqad bolta ham. <sup>15</sup> Haqan haiq. Iyahta kazaq bulon, Ni leh ham. Ya mat na ulumim waqan in yaqgo kabibiy mat tiqiy ham. In leheq on mataw en ta asor Juda a haiqta nagan teq maror aseseqta teq Isrel on mataw inaqmo gigo hib in ya inan tigibilendaq ham. <sup>16</sup> Teq in ya ibinib yaqgo kabiy emsa mataw santitiy

teq afaqan kabemmo ug daqayta na ago ya tiqisihundaiq ham.

<sup>17</sup> Ari Ananayas eraqim tilah. Lehim bit aduganib gwahtiqim in Sol aholib aben emim wazad bulon, Imaqbab Sol ham, ni danib bolsa Iyahta Yesus ningo hib gwahtimta naqmo in ya iqeman bol ham. Ni nime hastitayid saw ahol waqsa teq God ago Bugaw Dimunta ni niholib ayahmo boldaq haqad in ya iqeman ya kawa tubol ham. <sup>18</sup> Haqanmo naqagag nabiq atiblalan nogta Sol ame isihim usta na muruwoqim tihitim. Hitiqanmo in ame anuwad tiqiy in saw ahol tuwaqyaq. Ad in eraqim yuwub lehan Ananayas tuhuz ug. <sup>19</sup> Huz ugan abeb Sol didaq waqim neqad in ahol awaz ta meqniy.

### *Sol uliq Damaskus-ib Yesus awagamun mataw gibilan*

Ari Sol kam asor disaipel nenaq uliq Damaskus-ib tuqos. <sup>20</sup> Osad in Juda gigo bit humab wolaytab leheq Yesus awagamun tigibilenyayq. In bilaqyaq, Yesus in God atatin haqyaq. <sup>21</sup> Haqsa mataw Sol ago gamuk huritiyta na bunmo gihol turuh nemsu bilaq yaqay, Mat ko uliq Jerusalem-ub on mataw Yesus anan helmo haqayta na gimeqin diq tonad luwyaqta haq yaqay. Ad in nazaqmo tonim in i gigo on mataw Yesus anan helmo haqayta na giqirquireq giqad mataw tamaz emayta gigo aseseqta na gimeb gwahtiqigo haqad in uliq kab boltamo haq yaqay. <sup>22</sup> Teq haiq. Sol ago zaway ayah diqmo iysa in bilaqyaq, Mat i gilumsiheq ta giwaqdaqta amatin i anan Kraisa haqauqta na in Yesus-mo haqyaq. Haqsa uliq Damaskus-ib Juda mataw na in Sol ago gamuk amenin eman yo hiqiy yaqay. Sa Sol anad em hasad gamuk bilaqsa Juda mataw na in ago gamuk bayid woqgo ginadnad diq em yaqay.

### *Juda mataw Sol wol emgo bilaqsa in tuk*

<sup>23</sup> Ari kam kabemmo le tihiqiyen Juda mataw asor humab wolim osad in Sol wol emid moggo an amugan tuwaziy. <sup>24</sup> An amugan wazan teq in gigo gamuk na Sol adekib tuwom. Sa Juda mataw na zeqab taromab inaqmo uliq adekib gel ayah nenanta turaqta na ago dan ez bunmo baynetim tur yaqay, Sol bo asanib gwahtiqsa i wazeq wol emid tumoqdaq haqad. <sup>25</sup> Sa tarom araqab Sol ago disaipel in Sol waqim ad gel abigmanib gwalehim teq in bulonan in kuram araq ayahta aduganib wo ossa in ago disaipel am emim siney tonim sorim hulosan kiskismo wolehanmo Sol uliq asan ban ogib hitiqim tituk.

### *Sol uliq Jerusalem-ub os*

<sup>26</sup> Abeb Sol le Jerusalem-ub tugwahtiqim osad in disaipel uliq nabta na nenaq wastoneq osgo emsa teq haiq. Disaipel bunmo in Sol disaipel iyta na anan helmo a hi haqad in Sol tirabun yaqay. <sup>27</sup> Rabunsa mat anan Barnabas haqayta na in Sol waqim ad Aposel gigo hib tilah. A lehim in Sol danib Iyahta ahol waqan Iyahta gamuk ugta na awagamun bunmo tigibilan bug. Teq Sol uliq Damaskus-ib Yesus ananib gamuk atoranmo bilaqyaqta na ago in gibilanmo. <sup>28</sup> Nazaq iyan Sol in Yesus ago on mataw na nenaq osad in anadibmo uliq Jerusalem aduganib leh bolad tiluwaya. Luwad in a hi rabad in Iyahta abin bilaqgo awaz diq timeqniyyaq. <sup>29</sup> Teq in Juda mataw Grik nan bilaqayta nagan nenaq nan bilaqad in nenaq an mugyaq. An muga mataw na in Sol wol emid moggo adanteqin tinagun yaqay. <sup>30</sup> Nagunsa Sol ayogniz in nagah na ago tuhuritim in Sol waqim ad uliq Sisariya-ib tuwolehiy. Wolehim in Sol eman uliq Tarsus-ib tilah.

<sup>31</sup> Kam nab saw Judiya-ib teq saw Galiliy-ib teq saw Samariya-ib on mataw Yesus ago nan huritayta na in kam dimunta waqim anononmo tuqos yaqay. Ossa bab araq in gigo hib a hi gwahtiqsa in giwaz timeqniy yaqay. Giwaz meqniysa in Iyahta abin wazinad anad muz bugsa God ago Bugaw Dimunta in gigem zaway tinegyaq. Sa on mataw kabemmo bo in giduganib tugwahtiq yaqay.

#### *Pita in Ainiyas dimun ton*

<sup>32</sup> Ari Pita uliq saw bunmo gigo hib lehad luwim in le uliq araq anan Lida haqaytab tugwahtim. Gwahtiqim in God ago on mataw tawonta na nenaq tuqosyaq. <sup>33</sup> Osad uliq nab in mat araq anan Ainiyas haqayta ahol tuwam. Mat na abensen aditin bunmo moqan in ulig 8 nazaqmo banab usta. <sup>34</sup> Ari Pita in mat na ahol waqad tubulon, Ainiyas ham muran Yesus Krai niqeman nihol tidimniyaq ham. Ni eraqeq ningo us ban wastitay ham. Haqanmo mat na hidmo tiqeram. <sup>35</sup> An on mataw uliq Lida-ibta na teq uliq Saron-ibta na bunmo in Ainiyas ahol waqad in ginad buliyad Iyahta anan helmo tihaq yaqay.

#### *Pita in Tabita wazan ta eram*

<sup>36</sup> Ari uliq Jopa-ib aw araq anan Tabita haqayta in osyaq. Aw na in Yesus ago disaipel araq. Teq Grik nanib in anan Dorkas haqayta. In daq dimdimunta kabemmo emad teq in sirisirimo on mataw ginaghan haiqta nagan gilumsihyaqta. <sup>37</sup> Kam nab in moq waqimmo tumom. Moqan mataw in asan suholim a le bit adugan araq ulilibtab tiqemiy. <sup>38</sup> Teq uliq Lida na in Jopa agerab sinsin usaqta. Nazaq iyan disaipel Jopa-ibta na in Pita uliq Lida-ib osaqta na abin

huritim in mataw giger giqeman Pita ago hib lehim in kazaq buloniy, Ni hidmo i gigo hib bol haqiy. <sup>39</sup> Haqan Pita eraqim mataw giger na nenaq tilah. In le uliq Jopa-ib tugwahtiqanmo mataw in waqim inaq bit adugan ulilibtab aw asan usaqta nab tugwalehiy. Gwalehan on waburta nagan in Pita agerab gaq wazad tur yaqay. Turad in tubusan amo amo Dorkas in nenaq osad gimen giqamta na in waq a bo Pita tiqisihun yaqay. <sup>40</sup> Sa teq Pita on mataw bunmo gimuzan asanib tilehsa in abakbakan ulum laquwim turad God inaq gamuk tiqam. Gamuk emim huload in eraqim aw na asan nob ugim turad tubulon, Tabita ham ni eraq ham. Haqanmo aw na ame rireqim Pita ahol waqad in eraqim tuqos. <sup>41</sup> Ossa Pita aw na abenab wazim wazan in eraqim titur. Tursa Pita in God ago on mataw tawonta na gigo on waburta nenaq gililewunan bolan in gibilan, Ne giyow kayeq tiqiyim kawa turaqta ka ne ahol waqiy ham.

<sup>42</sup> An uliq Jopa-ib on mataw bunmo daq na awagamun tuhuritiy. Huritim kabemmo in Iyahta anan helmo tihaqiy. <sup>43</sup> Sa Pita kam asor uliq Jopa-ib mat araq inaq tuqos. Mat na in bulmakau asan waqim wastitayaqta anan Saimon haqayta na ago bitab in inaq osyaqta.

## 10

### *Angelo araq gwahtiqim Korniliyus gamuk bulon*

<sup>1</sup> Ari mat araq anan Korniliyus haqayta in uliq Sisariya-ib osyaq. In mataw bab emayta gidauhan araq 100 nazaq gigo danmebta. Mat na ago bab mataw dauh biyahta na nenaq in gigo kantri Italiy hulosis bolim uliq Sisariya-ib os yaqayta. <sup>2</sup> Teq mat na God diq anadin emad ahaqenib osyaqta. Ad in asenlul nenaq bunmo God abin wazinad ahaqenib os yaqaytamo. Mat na Isrel on mataw ginaghan haiqta na gilumsihad nagah kabemmo negyaqta. Ad tuteqmo in God inaq gamuk emyaqta.

<sup>3</sup> Ari kam araqab 3 kilok imisor nazaq tiqiyin Korniliyus in nagah araq sen qwayim ahol waqayta nazaq nogta ahol wam. Ahol waqsa God ago angelo araq ulalabmo agerab boladmo in Korniliyus anan biyim bulon, Korniliyus ham. <sup>4</sup> Haqan Korniliyus atoranmo angelo na ahol waqad in ahol rab naqmo diq hiciqysa bilam, Mat ayah ham, ezaq? ham.

Haqan angelo bulon, Ni tutimmo God bulonaqta na teq ni on mataw ginaghan haiqta gilumsihad nagah negaqta na in bilaqne faqasin ahuran dimunta nog iyim gwalehim God amotgub tuwom ham.

Woqsa God ni ninadin emad nob tinigaq ham. <sup>5-6</sup> Muran ni mataw asor giqemid uliq Jopa-ib leheq mat araq anan Saimon haqayta naguniy ham. Mat na anan araq Pita haqayta ham. In mat ta araq anan Saimon haqayta mat bulmakau asan wastitayaqta na ago bitab osaq ham. Teq in ago bit na kamis agerab lan ezab turaqta ham. Ningo mataw le mat na ahol waqad teq in buloneq inaq ta boliy ham.

<sup>7</sup> Ari angelo nazaq bilaqadmo tilah. Lehsa Korniliyus ago kabibiy mataw giger gililewunan boliy. Bolsa in ago bab mataw asor in ago bitab kabiy emayta na gilikmanib araq God diq anadin emaqta na inaqmo bulonan in kabibiy mataw giger na nenaq tuboliymo. <sup>8</sup> Bolan Korniliyus aholib daq gwahtimta na awagamun bunmo anononmo gibilenim giqeman in uliq Jopa-ib tilehiy.

*Pita nagah araq sen qwayim ahol waqayta nazaq nogta ahol wam*

<sup>9</sup> Mataw ezeqman na lehad luwim in tarom amulikmo danib usim teq in lehim uliq Jopa sininmo tuqugiy. Sinsin ugsamo Pita bitab osim zeq ayahtab 12 kilok nazaq in God inaq gamuk emnan haqad bit ahuqunib ban osnanta nab tugwalah. <sup>10</sup> Gwalehim osad agem moqsa in didaq neqnan anad tiqemyaq. Sa mataw teqmo didaq oysa Pita nab osad in nagah araq sen qwayim ahol waqayta nazaq nogta in ahol tuwam. <sup>11</sup> Ahol waqsa kait misireq nog iyim aqez hasanmo naqagag tubusan ayahta nog ulilib usim gewoqyaq. Tubusan na ago abeqil aweweqmo am emim teq hulossa hulossa ogib gewoqsa in ahol waqyaq. <sup>12</sup> Sa tubusan na aduganib karuw aneq haiqta nag teq nagah ahulinaqtag gibanibmo luwayta na teq ah amo amo kaitab melayta na inaqmo giqusiy. <sup>13</sup> Sa liley araq mat aqez nogta in Pita bulonim bilam, Pita ham ni eraqeq karuw na gihunogeq neq ham. <sup>14</sup> Haqan Pita bilam, Iyahta ham hikidik ham! Ya karuw gineq haiqta gihol abusirinan inaqtag nag a hikidik neqaiqta ham. <sup>15</sup> Haqan mat aqez na ame gigerta kazaq bilam, Nagah God suholan abusirinan hiqiyta na ni anan abusirinan inaq nazaq ni hi bilaq ham. <sup>16</sup> Mat aqez na ame ezeqmanmo nazaq Pita bulonsa Pita ame ezeqmanmo amenin nazaqmo bilam. Bilaqim tihiqiyan tubusan na akaruwun inaq hidmo kaitab ta gwalah.

<sup>17</sup> Gwalehan Pita anadnad emad bilam, Ya nagah sen qway nog iyim ahol wayta na alulin ezaq diq? ham. In nazaq anadnad emad ossamo Korniliyus mataw giqeman boliyta na in bo uliq nab tugwahtiqiy. Gwahtiqim in Saimon ago bit anan susumunim susumunim bolim in bit na ago

dan ezab tituriy. <sup>18</sup> Turad in lileyim bilaqiy, Saimon nabag osaq e? haqiy. In anan araq Pita haqad biyayta na haqiy.

<sup>19</sup> Haqan Pita sen qway nog iyim nagah ahol wamta na anadin emad os tutsa God ago Bugaw Dimunta bulon, Ni ko gibiy ham. Mataw ezeqman ni ninagunim tuboliy ham. <sup>20</sup> Ni eraqeq ogib hitiqeq nenaq leh ham. Ni ninadnad hi em ham. Na yaqmo giqeman boliyta ham.

<sup>21</sup> An Pita mataw na gigerab hitiqim gibilan, Mat ne nagunayta na yaqmo kawa ham. Ne ezaq haqad boliy? ham. <sup>22</sup> Haqan in bilaqiy, Mat araq anan Korniliyus haqayta i giqeman bol haqiy. Mat na in bab mataw gidauhan 100 nazaq gigo danmebta haqiy. In mat dimunta teq in God abin wazindn ahaqenib osaqta haqiy. Sa Juda on mataw bunmo in anan mat dimunta haqayta haqiy. God ago angelo tawonta araq Korniliyus bulonim bilam, Ni Pita bulon boleq in gamuk asor nibilenan haqan i ni nibilenid ni lehoq haqad i bol haqiy. <sup>23</sup> In nazaq haqan Pita gibilenan in bit aduganib tugwahtiqiy. Gwahtiqim Pita ban negan tarom nab in tuqusi. Usim saw tihastitayan in eraqim Pita waqim inaq tilehiy. Lehsa Yesus ago mataw uliq Jopa-ib osiyta na asor in nenaq tilehiymo.

*Pita Korniliyus ago bitab lah*

<sup>24</sup> In lehim tarom amulikmo danib usim teq in le uliq Sisariya-ib tugwahtiqiy. Sa Korniliyus tekomo asenul teq ayogin dimdimunta gililewunan in bo humab tuwolim teq in Pita-nen gimen emim osiy. <sup>25</sup> Ossa Pita bolim bit aduganib tugwahtiqisamo Korniliyus era le dan ezabmo Pita anognib ahol hulosan woqim usad in Pita abin soran tugwalyaq. <sup>26</sup> Sa Pita hidmo Korniliyus wazan eraqan in bulon, Ni eraq ham. Ya mat ni nogtamo ham. <sup>27</sup> Haqan in eraqim Pita inaq gamuk emim emim lo bit aduganib tugwahtiqiy. Gwahtiqim Pita on mataw kabemmo humab wolim ossa tigibiy. <sup>28</sup> Gibiyad in gibilan, Ne i Juda gigo maror tuhurit kemiyta ham. I gigo gunun awaz meqinta usaq ham. Juda mat in mataw en ta asor Juda a haiqta nagan nenaq yow a hikidik emdaqta ham. Teq in mataw na gigo bitab le a hi gwahtiqdaqtammo ham. Ta teq God kazaq ya tiqiqisihun ham. Ya mat araq anan meqin ago busirin inaqta nazaq ya a hi bilaqdaq ham. <sup>29</sup> Nazaq iyan ni yaqmen nan eman ya a hi othas ham. Ya ne gizeq huritimmo tubol ham. Ari muran ya ne tisuusun negaiq ham. Nagaggo ne ya ililewuniy? ham.

<sup>30</sup> Haqan Korniliyus bilam, Daq araq ya iholib gwahtimta na muran ago kam aweweqta tiqiy ham. Na in kazaq ham. Ya

igo bitab osim 3 kilok imisor nazaq ya God bulonad os ham. Kam kazaq diqtab ham. Ya God bulonad ossa mat araq ago tubusan hikliyanagta ya inognib gwahtiqim tur ham. <sup>31</sup> Turad in bilam, Korniliyus ham, God ningo gamuk tuhurit haqad in bilam ham. Ad ni mataw ginaghan haiqta gilumsihad nagah negaqta na in anadin emaqmo haqad in bilam ham. <sup>32</sup> Nazaq iyan ni mataw giqemid uliq Jopa-ib leheq Saimon bulonid in ningo hib bolan haqad in bilam ham. Mat na anan araq Pita haqayta haqad in bilam ham. In Saimon ta araq bulmakau asan wastitayaqta na ago bitab osaq haqad in bilam ham. Bit na kamis agerab lan ezab turaqta haqad in bilam ham. <sup>33</sup> Nazaq iyan hid naqmo ya mataw asor giqeman ningo hib tilehiy ham. Lehan dimun diq ni kawa tubol ham. Ari muran Iyahta gamuk nigta na ni bilaqsa i bunmo huritnan haqad bolim kawa God ameb tuqosauq ham.

<sup>34</sup> Haqan Pita gamuk alulin emim bilam, Hel diqtaqmo ham. Kwaziqmo ya inad emyaiq, God in Juda mataw gimomo ginadin emaqta haqyaiq ham. Ari muran ya inad tiqem ham. God in mataw en amulikmo gigo a hi lehaqta ham. <sup>35</sup> Mataw en bunmo gigo hib mat aw nog in God abin wazinad daq titnonta emsa God in ginan anad bilaqtaqta ham. <sup>36</sup> God in ago gamuk eman Isrel gigo hib bolta na ne tuhuritiy ham. Gamuk na bilam, Yesus Krai in on mataw bunmo gigo Iyahta haqad in bilam ham. Inmo i gimen dante wastitayan muran i God inaq gigem amulikmo iyeq tuqosam haqad in bilam ham. <sup>37</sup> Teq Jon saw Galiliy-ib mataw gihuz neggo gibilenyaqta nab daq ayah diqta gwahtiqim le saw Judiya-ib uliq bunmo waq bugta na ago ne tuhuritiyimo ham. <sup>38</sup> Na in kazaq ham. God in ago Bugaw Dimunta teq in ago zaway ayahmo Yesus uliq Nasaret-ibta na ugta ham. Ugan Yesus uliq-uliqgo luwad in on mataw gidimun tonad teq in mataw Satan giqeman meqin os yaqayta nagan gilumsihad giwastitayyaq ham. Na ezaqgo God in inaq osyaqta ham. <sup>39</sup> In Juda gigo og saw bunmo teq uliq ayahta Jerusalem-ub daq giqamta nagan bunmo i gimeb ahol waq bugim i awagamun bilaqauqta ham. Mataw in mat na ayib dom wolim wol eman momta ham. <sup>40</sup> Ta teq kam ezeqmanta nab God wazan ta eraqan in ahol alulin tuqulal ton ham. <sup>41</sup> Teq in Juda mataw bunmo gigo hib Yesus a hi ulal ton ham. Haiqqam ham. God kwaziqmo i mataw asormo gitowun emim giwaqan i in ago gamuk bilaqgo osta naqmo gigo hib in Yesus ulal ton ham. An Yesus hodhod hulosis eraqan teq igmo in inaq garab didaq neqad yuw uluwta ham. <sup>42</sup> Teq inmo gamuk awaz meqinta amalib kabiy igad

gibilenan i on mataw bunmo gidek wazad kazaq atoranmo gibilenaqta ham. God in Yesus-mo atowun eman in teq boleq on mataw tumoqiya teq a hi moqayta inaqmo gigo hazizir tiqemdaq haqauqta ham. <sup>43</sup> God ago nantut bunmo Yesus-mo anan bilaqiyta ham. In bilaqiy, Mat aw nog in anan helmo haqayta na bunmo God in gigo daq meqinta mat na abinib tigiwalem bugdaq haqad in bilaqiy ham.

*Korniliyus ago mataw nenaq God ago Bugaw Dimunta waqy*

<sup>44</sup> Ari Pita gamuk nazaq bilaqad tursamo God ago Bugaw Dimunta in mataw gamuk huritad osiyta na gimalib tigehtim. <sup>45-46</sup> Gehitiqan uliq amo amo gigo nan ginadib bolsa in amalib God abin tiqiluw yaqay. Sa Juda mataw gihol abatan asan tuqurotim teq Yesus anan helmo haqiyta na asor in Pita inaq bolim nab turiyta. Turad in daq na ahol waqad gihol riten lamsa bilaqiy, God in ago Bugaw Dimunta on mataw en ta asor Juda a haiqta nagan inaqmo tinegaqmo haqiy. <sup>47</sup> An Pita bilam, Nog bilaqid teq i mataw ka giqad yuwub leheq a hi gihuz neg nag? ham. In God ago Bugaw Dimunta i waq nogmo in tuwaqiyimo ham. <sup>48</sup> Haqad in Korniliyus ago mataw nenaq gibilan, Ne Yesus Krai abinib yuw tuhuz daqay ham. Haqan abeb mataw na Pita bulonim bilaqiy, I ginad i kam asor ni ninaq a ta osam haqiy.

## 11

*Pita uliq Jerusalem-ub lehim Korniliyus ago walmataw nenaq gigo hib daq gwahtimta na awagamun bilam*

<sup>1</sup> Ari Aposel teq Yesus ago on mataw saw Judiya-ib osiyta na bunmo in on mataw en ta asor Juda a haiqta nagan gigo asor God ago gamuk huritim anan helmo haqiyta na gibin tuhuritiy. <sup>2</sup> An abeb Pita Jerusalem-ub gabolan God ago mataw asor gihol abatan asan urotgo giwaz meqniyayta na in Pita tuwadiy. <sup>3</sup> Wadad in buloniy, Nagaggo ni mataw gisan a hi urotayta na gigo bitab lehim nenaq didaq nam? haqiy.

<sup>4-5</sup> Haqan Pita eraqim in aholib daq gwahtimta na awagamun wastitayimmo kazaq gibilan, Ya uliq Jopa-ib God bulonad os ham. Osad ya nagah araq sen qwayim ahol waqayta nazaq nogta ahol way ham. Naqagag na in bilaqne tubusan araq ayahta kaitab usim tiqsa ya ahol way ham. Sa tubusan na ago abeqil aweweqmo giwazim teq hulossa hulossa yaqgo hib gewoqyaq ham. <sup>6</sup> Ya nagah nagan ahol waq kemgo haqad ya ime tubusan na aduganib woqyaq ham. Ime woqsa ya og kab karuw gihurorayta amo amo teq karuw kwasikta amo amo teq nagah

ahulinaqta amo amo teq ah hares kaitab melayta amo amo nagan ya tigibiy ham. <sup>7</sup> Ya nagah nagan gibiyisa mat araq aqez ibilensa ya hurit ham. In bilam, Pita ham ni eraqez karuw ko gihunogeq neq haqad in bilam ham. <sup>8</sup> Haqan ya bilay, Iyahta hay ya nazaq a hi emdaq hay ham. Ya karuw gineq haiqta gihol abusirinan inaqtag na ya a hikidik neqaiqta hay ham. <sup>9</sup> Anmo mat aqez Heven-ib bolta na in ame gigerta ya ibilan, Nagah God suholan abusirinan hiqiyta na ni anan meqin nazaq ni hi bilaq haqad in bilam ham. <sup>10</sup> Ari mat aqez na nazaq diq ame ezeqmanmo ibilenaamo nagah tubusan nogta na akaruwun inaqmo muleqim kaitab ta gwalah ham.

<sup>11</sup> Gwalehsa mataw ezeqman bolim i bit osta nab tugwahtiqiy ham. Na uliq Sisariya-ib mat ayahta araq in mataw na giqeman yaqgo hib boliyta ham. <sup>12</sup> Bolan God ago Bugaw Dimunta ya ibilenim bilam, Ni mataw amota na gileh hi negad nenaq leh haqad in bilam ham. Haqan ya imaqbab 6 ka nenaq i mat ayahta na ago bitab lehim aduganib tugwahtiw ham. <sup>13</sup> Gwahtiqan mat na i gibilenim bilam, Ya angelo araq yaqgo bit aduganib tursa ahol way haqad in bilam ham. Ahol waqsa angelo na bilam ham, Ni mataw giqemid Jopab leheq Saimon anan araq Pita haqayta na bulonid bolan ham haqad in bilam ham. <sup>14</sup> In teq gamuk asor tinibilendaqta ham haqad in bilam ham. Sa God in gamuk na amalib ni teq ningo mataw ni nenaq bitab osayta na gilumsiheq tigiwaqdaq ham haqad in bilam ham.

<sup>15</sup> In nazaq bilaqan ya era gamuk alulin tiqemim bilaqsamo God ago Bugaw Dimunta in mat na ayogniz nenaq gimalib tigewom ham. Bilaqne iturimmo in i giholib gewomta nazaq nogmo diq ham. <sup>16</sup> Anmo ta ya Iyahta ago gamuk na anadin tiqem ham. In bilam, Jon yuw diqmo amalib on mataw gihuz nagta haqad in bilam ham. Ari ne teq God in ago Bugaw Dimunta amalib tuhuz negdaq haqad in bilam ham. <sup>17</sup> Nazaq iyan mataw na in Iyahta Yesus Krai anan helmo haqan God ago Bugaw Dimunta i igta nazaqmo in mataw na tinagmo ham. Negan ta ya ibin ezaqta iyim ya God adanin qwaydaq? ham.

<sup>18</sup> Pita nazaq bilaqan mataw in wadiyta na amenin emgo gamuk haiq tiqiyiy. Ad in ginad buliyim God abin iluwad bilaqiy, Nazaq iyan God in on mataw en ta asor Juda a haiqta nagan ginad eman buliyan in gigo daq meqinta gileh ugim in os kayeqmo kuluwa-kuluwmo osayta na gholyon tuwaqiyimo haqiy.

*On mataw asor uliq Antiyok-ibta na in*

*Krais anan helmo haqan mataw in ginan Kristen haqiy*

<sup>19</sup> Ari Stiven wol eman momta nab afaqan ayahta Yesus ago on mataw gigo hib tugwahtim. Gwahtiqsa on mataw Yesus anan helmo haqayta na in tukim on mataw en ta asor gigo saw haresmo lehad in saw Fonisiya-ib teq nud Saiprus-ib teq uliq Antiyok-ib tilehiy. Lehim in God ago gamuk dimunta Grik mataw saw nagab osiyta na a hi gibilen yaqay. Haiqqam. In Juda on mataw gimomo gamuk na gibilen yaqay. <sup>20</sup> Ta teq mataw na gilikmanib asor nud Saiprus-ibta na teq uliq Sairin-ibta na in le uliq Antiyok-ib gamuk tibilay yaqay. Bilaqad in Grik on mataw nenaqmo Iyahta Yesus awagamun dimunta na tigi-bilen yaqay. <sup>21</sup> Sa Iyahta ago zaway in gigo hib ussa iyan Grik on mataw na kabemmo helmo haqad in ginad gigem buliyim Iyahta ago hib tisoqoty.

<sup>22</sup> Ari Yesus ago on mataw Jerusalem-ub osiyta na in nagah na ago agamukan huritim in Barnabas eman Antiyok-ib tilah. <sup>23</sup> Lehim in God agem dimunta mataw na negsa gibiyad in anad diq dimniy. Anad dimniysa in on mataw na bunmo giwaz meqniyeq tuteqmo Iyahta tumuzin daqay haqad in ginad wazan tiquerayaq. <sup>24</sup> Barnabas in mat dimunta. Teq God ago Bugaw Dimunta in aholib ayahmo ussa in anad helmo haqayta na awaz meqniyeq usyaqmo. Teq kam nab on mataw dauh biyahmo in Iyahta ago hib tubol yaqay.

<sup>25</sup> Sa Barnabas in Sol nagunim uliq Tarsus-ib tilah. <sup>26</sup> Lehim in Sol ahol tuwaqim in waqim inaq Antiyok-ib ta boliy. Bolim ulig amulikmo in giger uliq nab Yesus ago on mataw na nenaq tuqosiy. Osad in on mataw kabemmo God ago gamuk gibilenad teq in gamuk na asuleqin tineq yaqay. Sa uliq Antiyok-ib nab mataw in gime ameb diqta Yesus ago disaipel ginan Kristen haqad biyiy.

<sup>27</sup> Ari kam nab God ago nantut asor Jerusalem hulosisim Antiyok-ib tigewoqiy. <sup>28</sup> Gewoqim in gigo araq anan Agabas haqayta na eraqim gilikmanib turad God ago Bugaw Dimunta anad ugsa in zarow araq ayahta abeb teq og saw bunmo gwahtiqdaqta na ago tibilam. Bilaqan abeb Rom gigo king anan Klodiyus haqayta na gwahtiqan ago kamub zarow ayahta na gwahtimta. <sup>29</sup> Nazaq iyan disaipel Antiyok-ibta na ginad tiqemiy, I bunmo gigo mani asor tuqurotam haqiy. Nog in anaghan kabemmota na in mani ayah nog eman haqiy. Sa nog in anaghan asitmota na in mani asitmo eman haqiy. Emeq teq i mani na emid i gimaqbaban saw Judiya-ib osayta nagan gigo hib leheq gilumsihan haqiy. <sup>30</sup> Haqad in nazaq tiqemim teq in



Barnabas ayow Sol inaq giqeman in mani na waqim ad saw Judiya-ib Yesus ago on mataw gigo aseseqta na gigo hib tilehiy.

## 12

*Herot in Jems wol eman moqan teq in Pita irqur*

<sup>1</sup> Kam nab King Herot in Yesus ago on matawta na gigo asor gimeqin tonnan haqad in giwazim tigiqrquryaq. <sup>2</sup> Ad in Jon abab Jems wazim baqirib wol eman tumom. <sup>3</sup> In Jems wol eman moqan Juda mataw ginad diq bilaqsa iyan in Pita wazim tiqirqurmo, Juda on mataw ya inan ginad ayahmo dimniydaq haqad. Teq in Juda gigo lotu akaman ayahta bret yis haiqmo neqayta na akamnib daq na amta. <sup>4</sup> In Pita wazim eman mataw bab emayta aweweqmo gibenab lehan in bit giqirquran osaytab tuwamuz yaqay. Bab mataw aweweq na gigo kam hiqiyid mataw muturta aweweqmo boleq gigo ban waq yaqay. Teq bab mataw gidauhan aweweqmo in nazaq an ulumsiheq zeqab taromab inaqmo in Pita wamuz yaqayta. Herot anad emyaq, Bret yis haiqmo neqayta akaman ka tihiqiyid teq ya Pita wazeq on mataw gimeb a leheq wol emid tumoqdaq haqayaq. <sup>5</sup> Nazaq iyan Pita bit giqirquran osayta nab ossa bab mataw na tuwamuz yaqay. Sa tuteqmo Yesus ago on mataw in ginad awaz meqin amalib Pita amen God tubulon yaqay, God teq Pita ulumsihdaq haqad.

*Angelo araq bolim Pita aqamun hasan in asanib le gwahtim*

<sup>6</sup> Ari Herot in Pita ad hazizirib gwahtiqgo akaman tugwahtiqnan tonsa tarom nabmo Pita sen giger amalib irquran bab mataw giger gilikmanib tuqus. Ussa bab mataw ta asor na in dan ez baynetim wamuzim turiymo. <sup>7</sup> Ari Pita ussa Iyahta ago angelo araq bo gwahtiqanmo bit adugan in usta na anuwan tiqiy. Sa angelo na in Pita azawarnib wolim enqenunan eraqan in bulon, Ni hidmo eraq ham. Haqanmo sen abenab am wazan usta na milhesim ogib tuwom. <sup>8</sup> Woqanmo angelo na Pita bulon, Nihol wastitayeq nisenugan waqeq em ham. Haqan Pita nazaq tonan angelo bulon, Ningo niholsihen emeq ya imuzeq bol ham. <sup>9</sup> Haqan Pita bit adugan na hulosis angelo na muzim inaq tilah. Lehad in anad emyaq, Kaqmo ya sen qwayim nagah ahol waqayta nazaq nogmo ya angelo ka ahol waqaiq haqayaq. In angelo daq hel diqta emaqta nazaq in anad a hi emyaq. <sup>10</sup> Ad in angelo muzim inaq lehad in bab mataw Pita wamuzim osiyta na giquriyamim le bab mataw bit aqez wamuzim turayta na tiquriyamimo. Giquriyamim asanib

gwahtiqim in le bit na agelin ago dan ez ain-ibta uliq ban usaqta nab tugwahtiqiy. Gwahtiqanmo dan ez na anadibmo tihias. Hasan giger na asan ban gwahtiqim dan araq muzim tilehiy. Lehad hid naqmo angelo na Pita hulosisadmo tilah.

<sup>11</sup> Lehsa teq Pita anad tihastitayan in bilam, Muran ya inad tiqem hasaiq ham. Iyahtaqmo in ago angelo araq eman yaqgo hib bol ham. Bolim in Herot abenab ya tiqiwalam ham. Ad in nagah bunmo Juda mataw ya iholib emnan haqad ginad emiyta na in adanin tuqway bug ham. <sup>12</sup> Pita nagah na anadin tiqemim teq in Jon anen Mariya ago bitab tilah. Jon na anan araq Mak haqayta. Teq kam nab mataw kabemmo bit nab humab wolim God bulonad osiy. <sup>13</sup> Ossa Pita bit nab lehim asanib dan ez wol hamad tursa kabibiy aw araq anan Roda haqayta in dan hasgo haqad tubol. <sup>14</sup> Bolim Pita aziyan tukurit hasim in anad diq dimniysa dan a ta hi has ug. In bit adugan ban sibim ta lehim mataw na gibilan, Pita kowa dan ezab turaq ham. <sup>15</sup> Haqan mataw na buloniy, Ni agadan iyaq haqiy. Teq aw na awaz diq meqniyad bilaqyaq, Haiqqam haqayaq. Hel diqtaqmo in asanib turaq haqayaq. Haqsa mataw na bilaqiy, Na in ago angelo bo turaq daqagya haqiy.

<sup>16</sup> Samo Pita dan ez wolhamad tur tutyaq. Tursa mataw na le dan hasim Pita ahol waqad in gihol turuh nam. <sup>17</sup> Sa Pita kabiyakibmo gibilan, Ne giqez hiqiyiy ham. An in giqez hiqiyian Iyahta in Pita waqim a bo asanib gwahtimta na awagamun in tigibilan. Ad in bilam, Ne Jems teq i gi-maqbaban bunmo nagah ka ago gibileniy ham. Haqad in gihulosad bit ta araqab tilah.

<sup>18</sup> Ari tarommo saw tihastitayan bab mataw na le Pita asawan tuwaqad in gihol riten lamsa bilaq yaqay, Pita ezaq tilah? haq yaqay. <sup>19</sup> Haqsa Herot huritim in mataw gibilenan Pita tinagun yaqay. Teq haiq in ahol a hi waqiy. Nazaq iyan Herot in bab mataw Pita wamuzim turiyta na hazizirib giqemim susumun kabemmo negsa in amenin araq dimunta a hi emsa Herot in ginol emid moggo tibilam. Ad abeb in saw Judiya hulosis uliq Sisariya-ib wolehim tuqos.

*Herot mom*

<sup>20</sup> Ari abeb Herot in uliq giger Tair teq Saidon gigo on mataw ginan agem timeqniyyaq. Agem meqniysa uliq giger na in garabmo an wastonim in Herot anobun wastitaynan haqad ago hib tuboliy. Na ezaqgo mataw na in Herot ago ogib didaq zay waqayta na ago iyan. Teq mataw na Herot ago hib a hi bolad iturimmo in le Balastus

mat king ago bit wamuzaqta amatin na inaq nan na tuwastitayiy.

<sup>21</sup> Wastitayan abeb Herot in mataw kam nagta nab in ago es balaw dimdimun diqta na giqemim teq in ago ban in mataw gigo gamuk huritad ulum kemaqta nab in os woqim osad in mataw na gamuk tigibilenyaq. <sup>22</sup> Gibilensa on mataw na Herot soysoy ugad in lileyeq bilaq yaqay, Ka mat aqez nog i a hi huritauq haq yaqay. Ka god araq aqez i hurit nog iyauq haq yaqay. <sup>23</sup> Haqsa Herot in on mataw giqez na huritad in ta God abin iluwgo anad a hi am. Nazaq iyan hid naqmo Iyahta ago angelo lehim Herot wolani moq meqinta aholib gwalan kadum amikmiktag agembekoq mugtitaysa in tumom.

<sup>24</sup> Teq Iyahta ago gamuk na ayah iysa on mataw og saw kabemmo huritad anan helmo tihaq yaqay.

<sup>25</sup> Ari Barnabas ayow Sol inaq gigo kabiy uliq Jerusalem-ub tihiqiyan in giger muleqim Antiyok-ib ta boliy. Bolad teq in Jon, anan araq Mak haqayta na, waqim inaq boliyimo.

## Pol in Yesus ago gamuk a le og saw kabemmo bilam

### 13

*Yesus ago on mataw Barnabas ayow Sol inaq giqeman in Yesus ago kabiy emnan lehiy*

<sup>1</sup> Ari uliq Antiyok-ib Yesus ago on matawta na gilikmanib nantut teq tisa asor osiy. Mataw na ginan kazaq: Barnabas teq Saimon anan araq Niger\* haqayta na teq Lusiyus uliq Sairin-ibta na teq Manayan in King Herot ayowta iyim luwta na teq Sol-mo. <sup>2</sup> Sa kam araqab Yesus ago on matawta na in didaq udinin osad Iyahta abin iluwsa God ago Bugaw Dimunta gibilenim bilam, Ne Barnabas ayow Sol inaq ya yagiy ham. Yagid teq in yaqgo kabiy em daqay haqad ya gililewunta nab in lehiy ham. <sup>3</sup> Haqan on mataw na didaq uadinad God inaq gamuk tiqemim teq in giger na giholib giben emim giwazad teq in giqeman tilehiy.

*Barnabas ayow Sol inaq nud Saiprus-ib Yesus awagamun dimunta bilaqiy*

<sup>4</sup> Ari God ago Bugaw Dimunta in giger na giqeman lehad teq in uliq Selusiya-ib tuwolehiy. Wolehim in muyib gwalan muy giqad nud Saiprus-ib tilah. <sup>5</sup> Lehan in nud na ago lan ez uliq Salamis-ib zeq gwalaqta ban usaqta nab tugwahtiqiy. Gwahtiqim in le Juda gigo bit humab wolayta nab mataw

God ago gamuk tigibilen yaqay. Sa Jon Mak in giger na nenaq gilumsihgo turyaq.

<sup>6</sup> In ezeqman nud Saiprus ago saw bunmo luw bugiy. Luwad in le uliq Pafos-ib zeq wolehaqta ban tugwahtiqiy. Gwahtiqim uliq nab in mat araq liqiy emad bar amo amo emaqta amatin anan Barjisas haqayta ahol tuwaqiy. Mat na in Juda mat araq God abinib nantut katiyta bilaqyaqta. <sup>7</sup> Teq in gavman amebta anan Sergiyus Polus haqayta na inaq osyaqta. Sergiyus Polus in mat anad inaqta. Teq in God ago gamuk huritnan haqad in Barnabas ayow Sol inaq gibilenan agerab boliy. <sup>8</sup> Ari mat liqiy emad bar haresmo emaqta na anan araq Grik nanib in Elimas haqayta. Teq Barnabas ayow Sol inaq bolim Sergiyus Polus gamuk bulonsa Elimas in gigo gamuk na bayan woqyaq, luweq gavman amebta na in gigo gamuk anan helmo haqdaq haqad. <sup>9-10</sup> In nazaq emsa Sol, in anan araq Pol haqayta na, in God ago Bugaw Dimunta ago zaway aholib ayah diqmo loyinad in Elimas ahol waninunadmo tubulon, Satan atatin ham ni daq dimunta ababun ham. Daq katiyta bunmo teq daq meqinta bunmo ni niholib oy soqotim giqusaqta ham. Tutimmo ni Iyahta ago dan titnonta na eman kok tonaq ham. Teq ni daq na a hi hulosdaq e? ham. <sup>11</sup> Ari ni hurit ham. Muran Iyahta aben ninolid ni nime tihiqiy-daq ham. Nime hiqiyid kam sisaqmo ni zeq ahol a hi waqadam tuqosdaq ham.

Pol nazaq haqanmo hidmo nagah araq bilaqne onqas aromriqnaq nogta hitiqim Elimas aze tiqil ton. Il tonan in mat araq aben wazeq bulonid dan isihungo haqad saw tihiknagunyaq. <sup>12</sup> Sa gavman amebta na in Iyahta ago gamuk huritim ahol turuh nensa teq in nagah Elimas aholib gwahtimta na ahol waqad in Iyahta ago gamuk anan helmo tiham.

*Pol ayow Barnabas inaq le uliq Antiyok saw Pisiidiya-ibtab kabiy emiy*

<sup>13</sup> Ari Pol ayogniz nenaq uliq Pafos hulosisim muyib gwalan muy giqad uliq Perga saw Pamfiliya-ib tilah. Lehan teq Jon uliq nab gihulosad in muleqim Jerusalem-ub ta lah. <sup>14</sup> Lehsa Pol ayow Barnabas inaq in uliq Perga hulosisim le uliq Antiyok saw Pisiidiya-ibtab tugwahtiqiy. Gwahtiqim osad Juda gigo lotu akamnib in le Juda gigo bit humab wolaytab gwahtiqim banab tuqos woqiy. <sup>15</sup> Os woqim ossa mataw God ago maror Moses mar tonta na agamukan asor bilaqim teq in God ago nantut gigo mar agamukan asor tibilaiqiymo. Bilaqim tihiqiyan teq bit humab wolayta na ago mataw danmebta nagan in Pol-nen ban tinegiy. Negad in bilaqiy, I gimaqaban

\* **13:1:** Rom gigo nanib gamuk Niger ka alulin in 'Dubta' haqayta.

haqiy ne gigo gamukag on mataw ka gigem zaway uggō ussun teq ne boleq gibileniy haqiy.

<sup>16</sup> Haqan Pol eraqim turad in abenabmo giqez hiquygo gibilenim teq in bilam, Ne Isrel mataw ham teq ne mataw dauh ta asor God abin wazinat ahaqenib osayta ham ne gidek emiy ham. <sup>17</sup> Isrel gigo God in kwaziqmo i gisesan gilumim aholyon giwamta ham. Giwaqim giqeman in Isip-ub begbeg iyim ossa God giqeman in dauh biyahta tiqiyiy ham. Iyan teq God inmo ago zawayib i gisesan giqeman in Isip hulosim tugwahtiqiy ham. <sup>18</sup> Gwahtiqim in og amatawun haiqta nab ulig 40 nazaq luwad daq hihiq emsa God in gigo afaqan sorad atuwa a hi hiquydaq ham. <sup>19</sup> Ad abeb in saw Kenan-ib on mataw dauh 7 nazaq gimeqin tonim teq in mataw na gigo og waqim i gisesan negan og na in gimo gigo tiqiyta ham. <sup>20</sup> I gisesan Isip-ub wolehim osad teq in Isip hulosim bolim God abenab og waqiyta nab ulig 450 nazaq tiqiyiy ham. An abeb God in mataw marorta i gisesan giwamuzeq os daqayta na tinag ham. Negan mataw marorta na in i gisesan giwamuzad tiqad bolim bo God ago nantut Samuel ago kamubmo tiqiyiy ham.

<sup>21</sup> Kam nab i gisesan in king waqgo haqad God tubulony ham. Bulonan God in i gises Bensamin anaynayin araq Kis atatin Sol na waqim tinag ham. Negan Sol ulig 40 nazaq king iyim osta ham. <sup>22</sup> Ossa teq God Sol muzad Devit ban ugan in i gisesan gigo king iyim tuqos ham. Sa God in anan kazaq bilam ham. Ya Jesi atatin Devit ahol waqsa ya inad usaqta nazaq nogmo in anad usaq haqad in bilam ham. Nazaq iyan in ya inad bunmo tumuzin bugdaq haqad in bilam ham. <sup>23</sup> Ari God in mat naqmo asenlulib mat araq i gilumsiheq ta giwaqdaqta na eman Isrel gilikmanib tugwahtim, kwaziqmo in i gisesan hel diqmo gibilanta nazaq ham. Mat na anan Yesus-mo ham.

<sup>24</sup> Teq in a hi bolsamo Jon gwahtiqim Isrel on mataw ginad buliyeq gigo daq meqinta gileh ugeq yuwub huzgo haqad tigibilenyaq ham. <sup>25</sup> Ad in ago kabiy emid hiquyqan tona in kazaq bilaqyaq ham. Nabag ne ginad emay, Mat boldaqta na yaqmo haqay haqyaq ham. Ya mat ne amen emayta na a haiq haqyaq ham. Teq ne huritiy haqyaq ham. Mat araq nawa ya ibeb bolaqta na abin ya ibin uriyamta haqyaq ham. Ya in ahaqenibta haqyaq ham. In yaqgo Iyahta haqyaq ham. Ya in ago kabibiy mat samanta haqyaq ham.

<sup>26</sup> Ari ne mataw Abraham asenlulibta ham, teq ne mataw dauh ta asor God abin wazinat ahaqenib osayta ham, ne bunmo ya imaqbaban iyim ne yaqgo gamuk ka

hurit kemiy ham. God in mataw gilumsiheq ban dimuntab giqemgo adanteqin tuwastitay ham. Wastitayan nagah na agamukan in i bunmo gimen kawa tubol ham. <sup>27</sup> Mataw Jerusalem-ub osayta na gigo aseseqta nenaq in Yesus ago a hi hurit kemiy ham. Ad in God ago nantut gigo gamuk mataw tutimmo lotu akamnib bilaqayta na huritim ginad a hi em hasiyimo ham. Nazaq iyan in Yesus hazizirib emim wol emgo bilaqiy ham. Ta teq in gigo daq naqmo in nantut gigo gamuk na wol net bugta ham. <sup>28</sup> Mataw aseseqta na in Yesus ago daq araq meqinta ahol a hi waqad in samanta wol emid moqgo haqad Pailat buloniy ham. <sup>29</sup> In nazaq emad in nantut gigo gamuk mar tonan usta na bunmo muzinim tiqem bugiy ham. Em bugim tihiqiy in Yesus asan ayib walemim a le hodhodab tiyay toniy ham. <sup>30</sup> Yay tonan teq God in hodhodab wazan ta eram ham. <sup>31</sup> Eraqim in le mataw in nenaq Galiliy hulosim Jerusalem-ub boliyta na gigo hib tugwahtim ham. Gwahtiqim in kam kabemmo nenaq tuqos ham. An muran mataw naqmo in Yesus awagamun on mataw tigibilenay ham.

<sup>32</sup> Kwaziqmo God i gisesan gidimun tonan hel diqmo gibilanta ham. An muran i gamuk araq dimun diqta kazaq ne gimen a bol ham. <sup>33</sup> God i gisesan gibilanta na tuwol net bugim in mataw na gigo onmin kawa i osauqta kaqmo in ago amun tiqig ham. In nazaq emnan haqad Yesus wazan hodhodab eram ham. Buk Song-ib bar gigerta nab gamuk nazaqmo mar tonan usaqta ham. Gamuk nab God bilam, Ni ya atatin haqad in bilam ham. Muran ya ni tiniqulal tonaiq haqad in bilam ham. *Buk Song 2.7*

<sup>34</sup> God in Yesus waz eraqim in asan hodhodab usad a hi lilihdagta na ago in kwaziqmo bilamta ham. In bilam, Teq yaqgo nagah tawon diqta ya tinegdaiq haqad in bilam ham. Hel diqtaqmo ham. Kwaziqmo ya Devit asesan gidimun tongo bilayta nazaqmo diq ya tiqem negdaiq haqad in bilam ham. *Aisaya 55.3*

<sup>35</sup> Nazaq iyan Buk Song-ib gamuk ta araqab in kazaq bilammo ham. Ni ningo mat tawonta na hulosid in asan hodhodab usad a hi lilihdag haqad in bilam ham. *Buk Song 16.10*

<sup>36</sup> Ari Devit in ago on mataw gilikmanib gwahtiqim osad in God anad muz bugad osim tumom ham. Moqan mataw sorim a le asesan gigerab tiyay toniy ham. Yay tonan in asan tililih ham. <sup>37</sup> Teq God mat wazan hodhodab eramta amatin na a hi lilih ham. <sup>38-39</sup> Nazaq iyan ya imaqbaban ham, ya Iyahta ago gamuk kazaq diq tigi-bilennan ham. Ne mat moqim ta eramta

na anan helmo haqid teq God ne gigo daq meqinta walemad anadin a ta hi emdaq ham. God ago maror Moses bilamta na in ne gigo daq meqinta a hi walemad in ne giqeman ne God ameb mataw titnonta a hi iyayta ham. Ari muran on mataw Yesus anan helmo haqsa God in gigo daq meqinta na bunmo giwalemad in ginan mataw titnonta haqaqta ham. <sup>40</sup> Nazaq iyan ne gihol waz naqmo hiqiyiy ham. Luweq God ago nantut kwaziqmo bilamta nazaq ne gigo hib tugwahtiqdaq ham. Nantut na bilam,

<sup>41</sup> Ne mataw ya ibilawunayta ham ya daq emsa ne ahol waqiy haqad in bilam ham. Ahol waqad ne ginadnad emad gihol riten lamsa ne moqiy haqad in bilam ham. Ya ne gigo kamub daq ara q diq tiqemaig haqad in bilam ham. Emsa mat ara q in daq na ago ne gibilenid ne anan helmo a hi haq daqay haqad in bilam ham. *Habakuk 1.5*

<sup>42</sup> Ari Pol ago gamuk tihiqiyian in ayow Barnabas inaq asanib le gwahtiqsa on mataw dedibmo kazaq gibilen yaqay, Lotu akaman ara q kob teq ne giger gamuk na a i ta gibilen ton daqay haq yaqay. <sup>43</sup> Sa humab na tihiqiyian mataw hares tiqiysa Juda mataw kabemmo teq mataw en ta asor Juda a haiqta nagan gigo asor God diq anadin emad Juda gigo lotu adan muzin yaqayta na in Pol ayow Barnabas inaq gimuzim nenaq tilehiy. Lehsa Pol ayow Barnabas inaq in mataw na ginad wazan eraqsa gibilen yaqay, God agem dimunta tinegaq haq yaqay. Negsa ne hulosa dante ta ara q hi muziniy haq yaqay.

<sup>44</sup> Ari lotu akaman ara q na tubolan on mataw uliq nabta na kuluw diqmo Iyahta ago gamuk huritnan haqad tuboliy. <sup>45</sup> Sa Juda mataw ta asor in mataw kabemmo Pol ayow Barnabas inaq gigo gamuk huritnan bolsa gibiyad in giger na ginan gigem timeqniyyiy. Gigem meqniysa in Pol ago gamuk walebolaq teq in Pol tibilawun yaqay. <sup>46</sup> Nazaq iyan Pol ayow Barnabas inaq in gamuk awaz meqinta kazaq gibileniy, Helmo haqiy, i God anad muzinin iturimmo i in ago gamuk ne Juda gigo hib bilawta haqiy. Teq ne gamuk na gileh tuqugay haqiy. Ne bilaqne negmo gihol tuqulum kemim bilaqay, I os kayeqmo kuluwa-kuluwmo osayta na waqgo i mataw dimun a haiq haq nog iyay haqiy. Nazaq iyan ne huritniy haqiy. Muran i ne gihuloseq mataw en ta asor Juda a haiqta nagan gigo hib tilehnan haqiy. <sup>47</sup> Na ezaqgo Iyahta in i kazaq gibilanta haqiy.

Ni lam anuwan nog iyeq mataw en ta asor Juda a haiqta nagan yaqgo daq dimunta tiqiqisihundaq haqad in bilam haqiy. Ni og saw bunmo

leheq ya mataw gilumsihim gimen dante tuwastitayta na agamukan ni tigibilendaq haqad in bilam haqiy. Kabiyy naqmo ni emdaq haqad ya ni niqeman ni osaqta haqad in bilam haqiy. *Aisaya 49.6*

<sup>48</sup> Ari on mataw en ta asor Juda a haiqta nagan in gamuk na huritnim ginad tidimniy naqmo hiqiy yaqay. Ad in Iyahta ago gamuk abin tiqiluw yaqaymo. Sa on mataw God in ago os kayeqmo kuluwa-kuluwmo osayta na negnan anad mebmemo tiqamta na bunmo in God ago gamuk anan helmo tihaqiy.

<sup>49</sup> Sa Iyahta ago gamuk saw na tuwaleq ton bug. <sup>50</sup> Ta teq uliq nab Juda mataw asor eraqim in on aseseqta God diq anadin emad Juda gigo lotu adan muzin yaqayta nagan teq mataw marorta asor nenaq gigem wazan eraqsa on mataw aseseqta na in Pol ayow Barnabas inaq ginan gigem meqniysa tigimeqin ton yaqay. Gimeqin tonad in gigo uliqab tigimuziy. <sup>51</sup> Nazaq iyan Pol ayow Barnabas inaq in gisenab og usta na wol lilaman ogib tuwom, mataw na gigo daq meqinta ago mebay na in gimo giholib tuqusdaq haqad. Ad in mataw na gihulosim uliq Aikoniyam-ub tilehiy. <sup>52</sup> Lehsa uliq Antiyok-ib on mataw disaipel iyiyta na ginad dimniysa gigem dimuntab ossa God ago Bugaw Dimunta in giholib ayahmo diq usyaq.

## 14

*Pol ayow Barnabas inaq uliq Aikoniyam-ub kabiyy emiy*

<sup>1</sup> Ari in giger uliq Aikoniyam-ub lehim daq Antiyok-ib emiyta nazaqmo in emim in Juda gigo bit humab wolaytab le gwahtiqim God ago gamuk on mataw tigibileniy. Gibilenad in gamuk wizwazimmo bilaqan on mataw dauh biyahmo Juda teq Grik inaqmo helmo tihaqiy. <sup>2</sup> Teq Juda asor helmo a hi haqiyta na in eraqim on mataw en ta asor Juda a haiqta nagan gigem wazan eraqsa in on mataw Yesus anan helmo haqad maqbab iyim osiyta na ginan gigem timeqniyy yaqay. <sup>3</sup> Nazaq iysa iyan Pol ayow Barnabas inaq kam sisaqmo Aikoniyam-ub tuqosiy. Ossa mataw gimeqin tonsa in a hi rab yaqay. In ginad em yaqay, Iyahta teq i tigilumsihdaq haq yaqay. Haqad in on mataw gibilenad in Iyahta agem dimunta on mataw negim gilumsihna na agamukan bilaqmo tibilaq yaqay. Sa Iyahta inmo ago gamuk na ulumsihad in Pol ayow Barnabas inaq gibenab daq azawayin inaqta amo amo giqemyaq. <sup>4</sup> Sa teq on mataw uliq nabta na gihol huserim dauh giger tiqiyiy. Iyim asor Juda nenaq iysa asor Aposel giger na nenaq tiqiyiy.

<sup>5</sup> Abeb Juda mataw na giyogniz mataw en ta asor Juda a haiqta na nenaq teq in gigo mataw aseseqta na nenaq wastonim in Pol ayow Barnabas inaq gimeqin tonad gimen gig hunegnan haqad an amugan tuwazyi. <sup>6</sup> Sa Pol ayow Barnabas inaq in mataw na ginad huritim in tukim saw Likoniya-ib tilehiy. Lehim in saw na ago uliq giger Lистра teq Derbe haqayta na teq uliqben amikmikta nagab in tiluw os yaqay. <sup>7</sup> Luw osad in uliq nagab Yesus awagamun dimunta on mataw tigibilen yaqay.

*Pol ayow Barnabas inaq uliq Lистра-ib God ago gamuk bilaqiy*

<sup>8</sup> Ari uliq Lистра-ib mat araç asen meqinta osyaq. Mat na anen agemab nazaqmo asen meqniyan hitiqim in asit a hi luwta. <sup>9</sup> Sa Pol gamuk bilaqsa mat na huritad os. Ossa Pol in ahol waninunad loyinan mat na anad in ahol teq dimniydaqta na ago in helmo tihamta. <sup>10</sup> Nazaq iyan Pol atoranmo bulon, Ni eraqeq tur ham. Haqan mat na hidmo eraqim turad in tiloq gelyaq.

<sup>11</sup> Pol daq na eman on mataw kabemmo ahol tuwaqiy. Ahol waqim in Likoniya gigo nanib lileyeq bilaq yaqay, I gigo god giger mataw diq gisan waqim i gigerab tigehtiqiy haq yaqay. <sup>12</sup> Haqad in Barnabas anan Zeus haqiy. Ad Pol in mat gamukta iyan in anan Hermes haqiy. <sup>13</sup> Ari mataw na gigo god Zeus ago lotu abitan uliq na agerab turta. Sa bit na ago mat tamaz emaqta na in bulmakau matmatta teq balaw dimdimunta giwaqim uliq na ago dan ezab tubol, in ago on mataw nenaq giger na gimen tamaz emnan haqad.

<sup>14-15</sup> Sa Aposel giger Barnabas ayow Pol inaq daq na ago huritim in ginad meqniysa gigo tubusan wazim tubulsireqiy. Bulsireqim in sibim on mataw na giduganib lehim in lileyim bilaqiy, Mataw haqiy doq tonnan ne kazaq emay? haqiy. I giger mataw diq ne nogmo haqiy. I God ago gamuk dimunta ne gibilenaqta haqiy. Ne daq samanta ka gileh ugad gihol buliyeq God kayeqmo osaqta na agerab leh daqay haqad i gibilennan bolta haqiy. God naqmo in kait teq og teq kamis teq saw nagab nagah bunmo usayta inaqmo in giqamta haqiy. <sup>16</sup> Helmo haqiy, kwaziqmo in on mataw en bunmo gihulosan in ginadibmo luw os yaqayta haqiy. <sup>17</sup> Ta teq in ne gimeb a hi ulilem hasta haqiy. Haiq haqiy. In ne gidimun tonad kaitab urom eman woq negaqta haqiy. Ad in ne gigo kabiyab didaq dimunta eman gwalaqta haqiy. In nazaq ne gitonsa didaq dimunta teq ginad dimniy ne giyuninsa ne ginad gigem dimniysa osayta haqiy. <sup>18</sup> In giger gamuk nazaq gibileniyta teq on mataw biyahta na

in tamaz emnan ginad usta na hidmo a hi hulosity. Sa Pol ayow Barnabas inaq gime kabemmo gibilenan teq in tuhulosity.

*Mataw Pol ayon gig hunegiy*

<sup>19</sup> Teq abeb Juda mataw asor uliq Antiyok-ibta teq uliq Aikoniyam-ubta na tuboliy. Bolim in on mataw Lистра-ibta na ginad ta buliyyi. Ginad buliyan mataw na gigem meqniysa Pol gigibmo tuwoliy. Wolim bilaqiy, In tumom haqiy. Haqad in hureqim ad gel asan ban a le tuhunegiy. <sup>20</sup> An disaipel uliq nabta na lehim Pol agerab bolim lilut ugim turiy. Tursa Pol eraqim uliq aduganib le a ta gwahtim. Gwahtiqim in le usim ta tiqim in Barnabas inaq uliq Derbe-ib tilehiy.

*Pol ayow Barnabas inaq luwad in on mataw Yesus anan helmo haqayta na gigem zaway neg yaqay*

<sup>21</sup> In giger uliq Derbe-ib lehim Yesus awagamun dimunta on mataw tigibilen yaqay. Gibilenad in on mataw kabemmo giqeman Yesus ago disaipel tiqiyiy. An abeb in giger muleqim uliq Lистра-ib teq uliq Aikoniyam-ub teq uliq Antiyok-ib a ta lehiy. <sup>22</sup> Lehad uliq nagab in disaipel gigem zaway tineq yaqay. Zaway negad in gamuk atoranmo kazaq gibilen yaqay, Ne helmo haqad giwaz meqniyeq osiy haq yaqay. I afaqan kabemmo soreq teq i le God ago maror aduganib tugwahtiqamta haq yaqay. <sup>23</sup> Haqad uliq bunmo in lehiyta nab in Yesus ago on mataw gilikmanib mataw danmebta asor gitowun tiqem yaqay. Gitowun emim teq in didaq udinad God inaq gamuk bilaqim teq in disaipel na bunmo Iyahta abenab tigiqem yaqay, in Iyahta anan helmo haqan in tigiwamuzdaq haqad. Ad in nazaq emim emim tilehiy.

*Pol ayow Barnabas inaq muleqim uliq Antiyok saw Siriya-ibtab ta lehiy*

<sup>24</sup> Abeb in giger saw Pisidiya-ib gwahtiqim tilehiy. Lehim in saw na hulosity le saw Pamfiliya-ib tugwahtiqiy. <sup>25</sup> Gwahtiqim in uliq Perga-ib lehim on mataw God ago gamuk dimunta tigibileniy. Gibilenim hulosity in uliq Ataliya-ib tuwolehiy. <sup>26</sup> Wolehim uliq nab in muyib gwalan muy giqad Antiyok-ib tilah. Kwaziqmo uliq nabmo Yesus ago on mataw in Pol ayow Barnabas inaq God abenab giqemiyta, God agem dimunta negsa in leheq ago kabiy tiqem bug daqay haqad. Nazaq iyan in giger kabiy na tiqem bugim in muleqim uliq nab ta lehiy.

<sup>27</sup> In le uliq nab tugwahtiqim in Yesus ago on mataw na bunmo gihumab tuwoliy. Gihumab wolim in kabiy bunmo God inaq emiyta na awagamun tigibileniy. Gibilenad in bilaqiy, God in on mataw en ta asor

Juda a haiqta nagan giyon dan has negan in inaqmo Yesus anan helmo tihaqay haqiy. <sup>28</sup> Ad in giger kam sisaqmo disaipel uliq nabta na nenaq tuqosiy.

## 15

*Yesus ago on mataw humab araq ayahta Jerusalem-ub emiy*

<sup>1</sup> Ari mataw asor saw Judiya-ibta na in uliq Antiyok-ib gewoqim Yesus ago on mataw gibilenim bilaqiy, Ne God ago maror Moses bilamta na muzinad gihol abatan asan a hi urotid God ne giwageq ago os dimuntab a hi giqemdaq haqiy. <sup>2</sup> Mataw na nazaq bilaqan Pol ayow Barnabas inaq huritim in ginad a hikidik dimniyyi. Ginad a hi dimniyya in mataw na nenaq an ayahmo tumugiy. Nazaq iyan Antiyok-ib mataw na bilaqiy, Pol ayow Barnabas inaq muleqeq uliq Jerusalem-ub ta lehsa ne asor eraqeq in ginaq lehiy haqiy. Leheq uliq nab in Aposel teq Yesus ago on mataw gigo danmehta nagan nenaq gamuk ka wastitayiy haqiy.

<sup>3</sup> Nazaq iyan Yesus ago on mataw uliq Antiyok-ib osiyta na in mataw na giqeman Pol-nen nenaq tilehiy. Lehim in saw Fonisiya-ib gwahtiqlim lehad in saw na hulosim saw Samariya-ib gwahtiqlim tileh yaqay. Lehad in Yesus ago on mataw saw giger nab osiyta na gibilenad God in on mataw en ta asor Juda a haiqta nagan gigem eman buliyyta na ago awagamun in wastitayeqmo gibilen yaqay. Gibilensa Yesus ago dauhta nagan bunmo huritim in ginad dimniy naqmo diq hiqiy yaqay.

<sup>4</sup> Ari in le uliq Jerusalem-ub tugwahtiqliy. Gwahtiqlan Yesus ago on mataw teq Aposel teq mataw danmehta na bunmo gibiyad in giwazinim giqad gigo bitab tilehiy. Lehan God in Pol ayow Barnabas inaq gimalib kabiy emiyta na awagamun in mataw na tigibilen bugiy. <sup>5</sup> Bilaq bugim tihiqiyari Farisi gigo dauhibta asor Yesus anan helmo haqiyta na in eraqim bilaqiy, Mataw en ta asor Juda a haiqta helmo haqiyta na in gihol abatan asan tuqurot daqay haqiy. Sa ne gibilenid in God ago maror Moses bilamta na aduganib gunun bunmo tumuz bug daqaymo haqiy.

<sup>6</sup> In nazaq haqan Aposel teq Yesus ago on mataw gigo aseseqta nagan in gamuk na wastitaygo haqad humab tuwoliy. <sup>7</sup> Humab wolim in gamuk kabemmo tibilaqan teq Pita eraqim gibilan. Ya imaqbaban ham, kwaziqmo God i gilikmanib yaqmo itowun emim bilam, Ni leheq on mataw en ta asor Juda a haiqta nagan Yesus awagamun dimunta gibilen haqad in bilam ham. Gibilenid in huritad anan helmo tihaq daqay haqad in ya ibilanta

ham. Na ago ne tuhuritiyta ham. <sup>8</sup> An ya le on mataw na gibilenan in helmo tihaqiy ham. Ne ginad emiy ham. God in on mataw bunmo gimugan ahol waq kemaqta ham. Nazaq iyan in mataw na gimugan ahol waqan in ginad helta usan iyan in ago Bugaw Dimunta tinag ham. In ago Bugaw Dimunta i igta nazaqmo in mataw na nag ham. Negid mataw bunmo daq na ahol waqad ginad em daqay, Helmo God in mataw en ta asor na inaqmo tigiwam haq daqay haqad in ago Bugaw nagta ham. <sup>9</sup> God i Juda giyon daq araq emad in ta on mataw en ta asor na giyon daq araq a hi emaqta ham. Haiq ham. In i bunmo giyon daq araqlim emaqta ham. In i gigo daq meqinta walamta nazaqmo in mataw na gigo daq meqinta suholan in gigem anumlan haiq tiqiyimo ham. <sup>10</sup> Nazaq iyan ta nagaqgo ne Yesus ago disaipel murta na gibetarib God ago maror Moses bilamta na a ta emnan tonay? ham. Ne nazaq emad ne God ulum waq nog iyay ham. Moses maror igta na in afaqan diq ham. I gisesan afaqan na soran yo hiqiy yaqayta ham. An i nazaqmo afaqan na sorgo biyab a hi iyaqmo ham. <sup>11</sup> I nazaq hi emuq ham. I ginad emauq, Iyahta Yesus agem dimunta igad gilumsihsa God i ta giwagaqta haqay ham. Giwagaq in daq amulik naqmo amalib on mataw en ta asor Juda a haiqta nagan ta giwagaqmo haqay ham.

<sup>12</sup> Pita nazaq bilaqan mataw biyahta na bunmo giqez hiqiyim tuqosiy. Ossa Barnabas ayow Pol inaq eraqim God in gibenab daq azawayin inaqta kabemmo on mataw en ta asor Juda a haiqta nagan gilikmanib eman gwahtimta na awagamun in tibilaqiy. Bilaqsa mataw na tok nemim huritadmo tuqosiy. <sup>13</sup> Sa giger na gamuk bilaqim tihiqiyari ta Jems eraqim bilam, Ya imaqbaban ham, ne gidek emeq yaggo gamuk ka huritiy ham. <sup>14</sup> God ame ameb diqta on mataw en ta asor Juda a haiqta nagan gilikmanib asor inmo aholyon giwamta na awagamun Saimon i gibilenan i tuhurit ham. <sup>15</sup> An Saimon ago gamuk na in nantut gigo nan kwaziqmo mar toniyta na nogmo ham. Gamuk na kazaq bilam ham.

<sup>16</sup> Iyahta bilam, Abeb teq ya tuboldaiq haqad in bilam ham. Boleq ya Devit ago maror woqim usaqta na wazid a ta eraqdaq haqad in bilam ham. Nagah timeqniyim usaqta na ya wastitayid a ta dimniydaq haqad in bilam ham. Dimniyyid ya maror na wazid ta eraqdaq haqad in bilam ham. <sup>17-18</sup> Eraqeq ussa on mataw ta asor na bunmo in Iyahta tinagan daqay haqad in bilam ham.

Helmo ham on mataw en ta asor Juda a haiqta nagan yaqmo ihol ananib in gitowun tiqemta nagan bunmo in ya tiqinagun daqay haqad in bilam ham. Yaqmo Iyahta kwaziqmo ya nagh abeb teq gwahtiqaqta kagan eman ulal iysa bo muranmo haqad in bilam ham. Yaqmo kazaq tibilay haqad in bilam ham. *Amos 9.11-12*

<sup>19</sup> Haqad Jems bilam, God ago gamuk nazaq bilaqan ya inad kazaq tiqem ham. On mataw en ta asor Juda a haiqta nagan gigo asor ginad buliyim God ago hib bo-layta na in God ago maror Moses bilamta na ago gunun bunmo muz daqayta nazaq i a hi gibilenam ham. <sup>20</sup> Haiq ham. I gilumsihad in gimen gamuk ara q mar toneq emid lehan ham. Lehsa i kazaq gibilenuq ham. Tamaz akaruwan mataw god katiyta naw nog negayta na ne hi waziy haquq ham. Ad ne an waq meqin tonad an haresmo hi hureqiy haquq ham. Ne karuw anat-guman huroran momta na hi neqiy haquq ham. Ad ne ned hi neqiy mo haquq ham. <sup>21</sup> I ginad emuq ham. Kwaziqmo bolim bo muran kam kab uliq bunmo aduganib mataw aseseqta in God ago maror Moses bilamta na asuleqin bilaqsa in gigo wal-mataw bunmo huritayta ham. Ad lotu akaman buntab in Moses ago gamuk na bilaqaytamo ham.

*Aposel in on mataw en ta asor Yesus anan helmo haqiya na giyon sansandek eman lah*

<sup>22</sup> Ari Aposel teq on mataw Yesus ago nan huritayta na gigo aseseqta nenaq bunmo eraqim an amugan tuwaziy. An amugan wazim in bilaqiy, I mataw asor giqemid in Pol ayow Barnabas ginaq leheq i gimaqbaban Antiyok-ibta na gibileniy haqiy. Haqad in mataw giger Judas in anan ara q Barsabas haqayta na teq Sailas inaq ginan bilaqan in Pol ayow Barnabas ginaq tilehiy. Yesus ago mataw Jerusalem-ub osayta na gilikmanib Judas ayow Sailas inaq in gibin inaqta. <sup>23</sup> Ari in mataw na giqeman lehsa in sansandek ara q negiy. Sansandek na kazaq bilam,

I Aposel giyogniz mataw danmebta na nenaq i sansandek ka mar tonim eman i gimaqbaban on mataw en ta asor Juda a haiqta nagan uliq Antiyok-ibta teq saw Siriya-ibta teq saw Silisiya-ibta na gigo hib tileh negaq haqiy. Zeq dimun i gimaqbaban haqiy.

<sup>24</sup> I gamuk kazaq tuhurit haqiy. I gigo mataw asor ne gigo hib lehim gamuk bilaqan ne ritenim ginadnad tiqemay haqiy. Teq in ne gibileniyta nazaq i a hi bilawta haqiy. <sup>25-26</sup> Mataw na in ne gigo hib lehim nazaq tonan i huritim i an

adugan wazim gigem amulikmo tiqiyim i bilaw, I mataw asor ginan bilaqeq giqemid in i giyogniz dimun diqta Pol ayow Barnabas inaq ne gigo hib tileh daqay has haqiy. Giger na in i gigo Iyahta Yesus Kraiss abin on mataw gibilenad in gihol nog hulosaqta haqiy.

<sup>27</sup> Nazaq iyan i Judas ayow Sailas inaq giqeman in giger na nenaq nawa ne gigo hib tilehiy haqiy. In gimo teq gamuk kawa i mar tonta ka ne tigibilen daqay haqiy. <sup>28</sup> I ginad emauq, I gunun kabemmo negid ne gihol afaqan hi iyan haqauq haqiy. Sa God ago Bugaw Dimunta in anad nazaq emaqmo haqiy. Gunun awewe q kaqmo ne muzinad a hi hulos daqayta haqiy. Na in kazaq haqiy.

<sup>29</sup> Mataw god katiyta ayon tamaz emayta na akaruwan ne hi waziy haqiy. Ad ne ned hi neqad ne karuw ginatguman huroran moqiyta na hi neqiy mo haqiy. Teq ne an waq meqin tonad an haresmo hi hureqiy haqiy. Ne gihol asawan woltayad nagh awewe q na aban diq emiy haqiy. Ne nazaq toneq teq ne dimunmo tuqos daqay haqiy. Ari zeq dimun i gimaqbaban bunmo haqiy.

<sup>30</sup> In sansandek nazaq mar tonim mataw awewe q na negim giqeman in Antiyok-ib tuwolehiy. Wolehim in Yesus ago on mataw uliq nabta na gihumab wolim sansandek na tinegiy. <sup>31</sup> Negan in gamuk na ahol waqim tihiqiy an gamuk na gilumsihadta haqad in ginad tidimniy yaqay. <sup>32</sup> Sa Judas ayow Sailas inaq in God ago nantutta iyim in Yesus ago on mataw uliq nabta na gamuk dimdimunta kabemmo gibilenad gigem zaway tineg yaqay. <sup>33</sup> In giger kam kabemmo uliq Antiyok-ib tuqosan teq mataw nabta na gigem dimunta negad in giqeman ginad dimniy uliq Jerusalem-ub ta lehiy, mataw in giqeman uliq Antiyok-ib boliyta na gigerab. [ <sup>34</sup> Teq Sailas anad emyaq, Ya Antiyok-ib asitmo ta ose q teq lehdaiq haqyaq ] <sup>35</sup> Sa Pol ayow Barnabas inaq in Antiyok-ib tuqos tutiy. Osad in mataw asor kabemmo nenaq Iyahta ago gamuk on mataw gibilenad teq in gamuk na alulin giqisihun yaqay.

*Pol ayow Barnabas inaq an gihar ugiy*

<sup>36</sup> Abeb kam asor le tihiqiy an Pol in Barnabas tubulon, Bolsa i uliq bunmo Iyahta ago gamuk gibilenta nagab muleqeq ta lehad i gimaqbaban helmo haqayta na a ta gibiyuq ham. I nazaq toneq teq in dimunmo osay o haiq na i tuhurit kemam ham. <sup>37</sup> Haqan Barnabas in Jon anan ara q Mak haqayta na waqeq inaq lehnan bilam. <sup>38</sup> An Pol bilam, Kwaziqmo mat na uliq Pamfiliya-ib i gihulosta ham. Gihulosan i inaq kabiy a ta hi emta ham. Nazaq

iyani i waqeq inaq hi lehuq ham. <sup>39</sup> Haqad in Barnabas inaq nagah na ago an ayah tumugiy. An mugim in giger garab kabiy a ta hi emiy. Barnabas in Mak waqim inaq muyib gwalim nud Saiprus-ib tilehiy. <sup>40</sup> Sa Pol in Sailas wam. Waqan Yesus ago on mataw na in gibilenim bilaqiy, Iyahta agem dimunta negsa ne lehiy haqiy. <sup>41</sup> Haqan in giger saw Siriya-ib teq saw Silisiya-ib luwad in Yesus ago on mataw gidauhan bunmo gigem zaway tineg yaqay.

## 16

### *Timoti Pol inaq kabiy emnan lah*

<sup>1</sup> Ari Pol ayow Sailas inaq uliq Derbe-ib lehim teq in le uliq Litra-ib tugwahtiqiy. Uliq nab disaipel araq anan Timoti haqayta in os. In anen Juda aw araq Yesus anan helmo hamta. Sa amam in Grik mat araq.

<sup>2</sup> Ari Yesus ago on mataw uliq Litra-ibta teq uliq Aikoniyam-ubta na in Timoti anan bilaq yaqay. In mat dimun diqta haq yaqay.

<sup>3</sup> Haqsa Pol in Timoti inaq lehgo anad tibilayyaq. Nazaq iyan in Timoti waqim ahol abatan asan tuqurot. Na ezaqgo in anad emyaq, Juda mataw kabemmo saw kab osayta haqyaq. Sa Timoti amam in Grik mat na ago in bunmo tuhuriyita haqyaq. Luweq mataw na nan kabemmo bilaq daqay haqad in daq na amta.

<sup>4</sup> Ari mataw ezeqman na Pol teq Sailas teq Timoti in uliq-uliqgo luwad gunun aweweqmo Aposel giyogniz mataw aseseqta Jerusalem-ub osayta na nenaq an amugan wazim emiyta na in Yesus ago on mataw tigibilen yaqay. Gibilenad in bilaq yaqay, Ne gamuk ka muziniy haq yaqay. <sup>5</sup> Nazaq iyan on mataw Yesus ago nan huritayta gidauhan uliq nagab osiyta na giwaz meqniyim God ago gamuk anan helmo diq tihag yaqay. Sa kam bunmo on mataw muturta bo giduganib gwahtiqad nenaq an tuwaston yaqay.

*Pol sen qwayim saw Masedoniya-ib mat araq ahol wam*

<sup>6</sup> Ari God ago Bugaw Dimunta in saw Esiya-ib gamuk hi emiy haqad Pol-nen ginadib eman in saw Esiya aban emim saw giger Frigiya teq Galesiya agem siseyim tilehiy. <sup>7</sup> Lehim saw Misiya-ibmo tiqiyim in saw Bitiniya-ib le tugwahtiqan tonsa teq haiq. Yesus ago Bugaw tigiwasihyaq. <sup>8</sup> Nazaq iyan in saw Misiya hulosis uliq Trowas-ibmo tuwolehij. <sup>9</sup> Wolehim taromab Pol uliq nab osad in nagah araq sen qwayim ahol waqayta nazaq noqta ahol wam. Ahol waqsa mat araq saw Masedoniya-ibta gwahtiqim turad in Pol lilewunim bulonyaq. Ni kamis uroteq saw Masedoniya-ib kab boleq i gilumsih haqyaq. <sup>10</sup> Pol nagah na ahol waqan hidmo

i Masedoniya-ib lehgo dan tinagunyaq. Na ezaqgo i ginad tiqem. I Yesus awagamun dimunta saw nab a leheq on mataw gibilengo haqad God i tigililewunaq haw.

### *Aw Lidiya in Kraisa anan helmo ham*

<sup>11</sup> Nazaq iyan uliq Trowas-ib i muy araqab gwalan muy na eraqim nud Samotres-ib wolsireqimmo tilah. Lehim usim kam ta araq nab i uliq Neapolis-ib tileh. <sup>12</sup> Lehim i uliq na hulosis le uliq Filipay-ib tugwahtiw. Uliq na Rom gigo maror ahaqenib ussa Rom mataw in giwamuz yaqayta. Teq uliq na in saw Masedoniya ago uliq ameb diqta. I uliq nab gwahtiqim kam asor tuqos. <sup>13</sup> Osad Juda gigo lotu akamnib i God inaq gamuk emnan haqad uliq na ago gel asan ban le gwahtiqim yuwub tuwoleh. Wolehad i ginad tiqemyaqaq, Yuw na aqurumnib mataw God inaq gamuk emayta asawan usaq daqagya haqyaq. Haqad i yuw na aqurumnib wolehim on asor humab wolim ossa i tigibiy. Gibiyad i gigerab lehim os woqim osad i nenaq gamuk emad tuqos. <sup>14</sup> Ossa aw araq uliq Tayataira-ibta anan Lidiya haqayta in nab os. Aw na God anadmo diq muzad luwyaqta. Teq in tubusan kakaqta emim zayad mani akabiyani emyaqta. In Pol ago gamuk huritad ossa Iyahta in anad eman hastitayan in gamuk na anan helmo tiham. <sup>15</sup> In helmo haqim teq in yuwub huza in asenlul teq ago kabibiy on mataw ago bitab os yaqayta na bunmo yuwub tuhuziyimo. Ad abeb aw na i gibilan, Ne ya ibiysa ya Iyahta anan helmo diq haqaiq e? ham. Ne nazaq ginad emsun teq ne boleq yaqgo bitab osiy ham. Ad in i giwageq giqad ago bitab lehgo awaz diq meqniysa i in aqez muzinim inaq tileh.

*Pol ayow Sailas inaq uliq Filipay-ib giqirquriy*

<sup>16</sup> Kam araqab i God inaq gamuk emayta asawan nab a ta woleh. Wolehsa kabibiy aw araq danib i tigibiy. Aw na aholib bugaw araq meqinta usyaqta. Usad in aw na aqezab nagah abeb teq gwahtiqdaqta agamukan emid gwahtiqsa in bilaqyaqta. Nazaq iyan on mataw haresmo boleq aw na anamreniz mani negsa aw na in nagah ulilemim usaqta na anan bilaq sireqyaqta. Sa in anamreniz na mani ayahmo waq yaqayta. <sup>17</sup> Aw na i gibiyadmo in Pol teq i bunmo inaqmo gimuzad tiluwyaq. Gimuzad luwad teq in kazaq lileyeq bilaqyaq, Mataw ka in God Ulilib Diqta ago kabibiy matawta haqyaq. God ne gilumsihet ta giwagdaqta na ago dante agamukan in ne gibilen kemayta haqyaq. <sup>18</sup> Kam kabemmo aw na nazaq emsa Pol atuw tihiqiy. Atuw hiquysa in ahol buliyim



bugaw meqinta na kazaq bulon, Yesus Kraiss abinib ya ni tiniblenaiq ham. Ni aw ka huloseq gwahtiqeq leh ham. In nazaq bilaqanmo bugaw na aw hulosisim gwahtiqim tilah.

<sup>19</sup> Lehssa kabibiy aw anamreniz na in mani waqayta alulin titukan ahol waqad in Pol ayow Sailas inaq giwazim gihureqim giqad uliq gemab lehim in mataw aseseqta ginognib tigiqemiy. <sup>20</sup> In giqad lehim maror midiyessin wazayta na ginognib giqemim teq in bilaqiy, Mataw giger ka in Juda matawta haqiy. In i gigo uliqab on mataw giqeman ginad agadan iyay haqiy. <sup>21</sup> Mataw ka in i gigo on mataw daq asor muturta giqisihunayta haqiy. Teq i Rom matawta iyim iyan i daq nagan emeq i Rom gigo gunun tiqitiyonam haqiy. <sup>22</sup> Haqsa on mataw dauh biyahta nab turiyta na inaqmo in giger na gamuk tineg yaqaymo. Sa mataw aseseqta na eraqim Pol ayow Sailas inaq gigo tubusan tihasiy. Hasim teq in yukib ginolgo bilaqiy. <sup>23</sup> Bilaqan mataw yukib tiginol titaiy. Ginol titayim huload in giwaqim giqad le bit giqirquran osaytab tigiqemiy. Giqeman in mat bit na ago dan ez wamuzim turaqta na gamuk awaz meqin kazaq buloniy, Ni giger ka gisawan diq woltayad tur haqiy. <sup>24</sup> Haqan mat dan ezab turaqta na in gamuk awaz meqin nazaqta huritim in Pol ayow Sailas inaq giwaqim giqad le bit amuganibmo diq giqam. Giqemim in giger na gisen ayib kah tonan in nab tuqosiy.

<sup>25</sup> Osad tarom alihanib Pol ayow Sailas inaq in God bulonad bar wazad God abin iluwad tuqos yaqay. Ossa mataw giqirquran osiyta na bunmo in giger na gigez tuhurit yaqay. <sup>26</sup> Huritsamo kanawrigrig araq ayahita tiqueram. Eraqsa bit na ahol dedibmo wolyaq. Wolsa bit ago dan ez bunmo has bugsa mataw nab osiyta na bunmo gibensenab sen usta na milhesim tihitim. <sup>27</sup> Sa mat bit wamuzaqta na usim kayeq iyim in eraqim dan ez bunmo tihas bugim ussa ahol waqad in anad tiqam, Mataw giqirquran osiyta na tituk bugiy ham. In anad nazaq emad aben le ago baqir tuwam, inmo ahol tuwol emgo haqad. <sup>28</sup> In nazaq emsa Pol ahol waqadmo in atoranmo bulonim bilam, Sey! ham. Ni nihol hi meqin ton ham. I bunmo kawa osauq ham. <sup>29</sup> Haqan mat bit wamuzaqta na in lam waq a bolgo tililay. Lileyim in lam araq tuwaqim in sibim bit aduganib le tugwahtim. Gwahtiqim in rabad ahol harara nemsan in Pol ayow Sailas inaq gisen agerab ahol hulosan tuwom. <sup>30</sup> Woqim usim teq in eraqim giger na giwaqim giqad asanib le tugwahtim. Gwahtiqim in gibilan, Mataw aseseqta ham ya naga diq

emid teq God ya ilumsiheq ta iwaqdaq? ham.

<sup>31</sup> Haqan in giger mat na bulonim bilaqiy, Ni Iyahta Yesus anan helmo haq haqiy. Haqid teq God in ni teq ningo aw amun inaqmo gilumsiheq tigiwaqdaq haqiy. <sup>32</sup> Haqad in mat na asenlul bunmo nenaq Iyahta ago gamuk tigi-bileniy. <sup>33</sup> Gibilenan tarom nabmo mat na in Pol ayow Sailas inaq giwaqim giqad le gisulan tisuhol. Suholim hidmo in asenlul bunmo nenaq yuwub lehan Pol ayow Sailas inaq tuhuz negiy. <sup>34</sup> Huz negan mat na in Pol ayow Sailas inaq giwaqim giqad ago bitab lehim in didaq negan tineqiy. Neqsa mat na anad diq dimniyaq. Na ezaqgo in teq asenlul bunmo nenaqmo God anan helmo tihaqiyta na ago iyan.

<sup>35</sup> Ari saw tihasitayan mataw marorta nagan in hurmey asor giqeman tuboliy. Bolim in bilaqiy, Ni mataw giger na gihasad in lehiy haqiy. <sup>36</sup> Haqan mat bit giqirqurayta wamuzaqta na in le Pol ago hib gamuk na tutim bilam, Mataw marorta na in ne giger gihasad leho tibilaqiy ham. Nazaq iyan ne bo gwahtiqeq gigem dimniysa lehiy ham. <sup>37</sup> Haqan Pol in mataw aseseqta na gigo gamuk amenin emim bilam, I giger gibin Rom-ub usaqta ham. Teq in wastitayimmo i hazizirib giqemim naga daqin i emta na in a hi hurit kemiy ham. Haiq ham. In on mataw gimeb i samanta ginol titaiy ham. Ginolim in i giwaqim giqad le tigiqirquriy ham. Ad muran in ulilemeqmo i giger giqemid leho bilaqay ye? ham. Hikidik ham. In gimo boleq i giwaqeq giqad le gwahtiqiy ham.

<sup>38</sup> Haqan hurmey na mataw marorta gigo hib muleqim ta lehim in Pol aqez titutiy. Tutan mataw aseseqta na in Pol ayow Sailas inaq gibin Rom-ub usaqta na ago huritim in tirab yaqay. <sup>39</sup> Ad in bolim midemqanmo diq susumun negad in kiskismo gibilen yaqay, Ne uliq ka huloseq saw araqab lehiy haq yaqay. <sup>40</sup> Haqsa Pol ayow Sailas inaq in bit giqirqurayta na hulosisim tugwahtiqiy. Gwahtiqim in aw anan Lidiya haqayta na ago bitab tilehiy. Lehim in gimaqaban Yesus ago on matawta na gibiyad in gamuk dimunta gibilenad gigem zaway negad teq in gihulosad tilehiy.

## 17

*Tesalonaika mataw Pol ayow Sailas inaq ginolnan toniy*

<sup>1</sup> Ari Pol ayow Sailas inaq le uliq Amfipolis-ib gwahtiqim in uliq na hulosisim le uliq Apoloniya-ib tugwahtiqiy. Gwahtiqim uliq na hulosisim in le uliq Tesalonaika-ib tugwahtiqiy. Uliq nab Juda gigo bit humab wolyayta araq turta. <sup>2</sup> Sa

Pol ago daq muzinim in bit humab wolayta nab leheq nenaq tuqosyaq. Juda gigo lotu akaman ezeqmanmo in nenaq osad in God ago marib gamuk amo amo gicisihunad teq in mataw na ginad buliyo tigibilenyaq.<sup>3</sup> In God ago gamuk alulin bilaq sireqad mat anan Kraiss haqayta na in God-mo anad muzeq boleq santitiy soreq teq in moqeq ta eraqdaqta na ago in gicisihunyaq. Ad in gibilenyaq, Mat anan Yesus kawa ya anan ne gibilenaigta naqmo in Kraiss haqyaq.<sup>4</sup> In nazaq bilaqsa Juda on mataw nab osiyta na gilikmanib asor in ginad buliyim helmo haqad Pol ayow Sailas inaq gigo hib tuboliy. Sa Grik on mataw God diq anadin emad Juda gigo lotu adan muzin yaqayta na kabemmo teq on givin inaqta kabemmo in gigo hib tuboliyimo.

<sup>5</sup> Sa Juda mataw asor in on mataw kabemmo Pol ayow Sailas inaq gigo gamuk anan helmo haqsa gibiyad in gigem timeqniyyaq. Gigem meqniysa in le mataw asor maket-ib luw maleyanta luwayta na tigiwaqiy. Giwaqim gibilenan in lehim mataw kabemmo girom tonim gigem wazan eraqsa in gigem meqniysa hares haresmo ek toneq lehad teq in bab tiqemnan ton yaqay. Bab emnan tonad in mat araqaq anan Jeson haqayta ago bitab lehim in Pol ayow Sailas inaq giwaqeq asanib on mataw gimeb giqad gwahtiigo tibilaq yaqay.<sup>6</sup> Teq haiq. In bit nab lehim Pol ayow Sailas inaq a hi gibiyiy. Nazaq iyan in Jeson-mo teq Yesus ago on mataw asor nab osiyta na inaqmo giwazim uliq na ago mataw givin inaqta gigerab giqad lehiy. Lehim giqeman tursa in lileyim bilaqiy, Mataw ka daq meqinta og saw bunmo eman gwahtiqaqta haqiy. An muran in uliq kab bolim tuqosay haqiy.<sup>7</sup> Sa Jeson in gilowan tonad giwaqim giqad ago bitab lehim nenaq osaqta haqiy. Mataw ka gidauhan nenaq bunmo in Sisa ago maror gihar ugayta haqiy. Ad in bilaqay, King araqaq anan Yesus haqayta osaq haqayta haqiy.<sup>8</sup> Mataw na nazaq haqsa on mataw biyahta nab turiyta na teq mataw aseseqta na in gamuk na huritim gigem meqniysa gamuk kabemmo tibilaq yaqay.<sup>9</sup> Ad teq mataw aseseqta na in Jeson ago dauh nenaq gibilenan in mani emiy, in Pol ayow Sailas inaq anononmo giwamuzsa in daq araqaq hi emgo haqad. In mani eman teq mataw aseseqta na gihulosan tilehiy.

*Pol ayow Sailas inaq uliq Beriya-ib kabiy emiy*

<sup>10</sup> Ari tarom nabmo Yesus ago on mataw uliq Tesalonaika-ibta na in Pol ayow Sailas inaq giqeman uliq Beriya-ib tilehiy. Lehim uliq nab gwahtiqim in le Juda gigo bit humab wolayta nab tugwahtiyoq.<sup>11</sup> Teq Juda mataw Beriya-ib osiyta na in mataw

dimdimunta. In Juda mataw Tesalonaika-ibta na giquriyamim in Yesus awagamun huritnan diq ginad bilaqyaqta. Ginad bilaqsa kam bunmo in God ago mar ahol waq kemad giger na gigo gamuk tuqulum kem yaqay, Pol ayow Sailas inaq gamuk helta i gibilenay o haiq? haqad.<sup>12</sup> Nazaq iyan uliq nab Juda on mataw kabemmo helmo tihaqiy. Sa Grik on mataw givin inaqta kabemmo helmo tihaqiyimo.

<sup>13</sup> An abeb Juda mataw uliq Tesalonaika-ibta na in Pol uliq Beriya-ib God ago gamuk bilaqyaqta na ago tuhuritiy. Huritim in uliq nab bolim in gimo gigo uliqab daq emiyta nazaqmo in uliq Beriya-ib tiqemiymo. In on mataw kabemmo ginad walebolad giqutil wazan eraqsa in bab araqaq ayahta tiqemnan toniy.<sup>14</sup> Nazaq iyan Yesus ago on mataw uliq nabta na in hidmo Pol waqim eman lan ez ban tilah. Lehsa Sailas ayow Timoti inaq in Beriya-ib os tutiy.<sup>15</sup> Sa Beriya-ib mataw asor Pol waqim ad danib lehad in uliq Atens-ib tiqiyim teq in Pol hulosan ossa in muleqim giquliqab ta lehiy. Lehsa Pol in Sailas ayow Timoti inaq gimen nan emim mataw na gibilan, Ne muleqeq leheq giger na gibilenid in yaqgo hib hidmo boliy ham.

*Pol uliq Atens-ib God ago gamuk on mataw gibilan*

<sup>16</sup> Ari Pol uliq Atens-ib mataw giger na gimen emad tuqos. Osad in uliq nab god katiyta gidulan kabemmo gibiyad anad ayahmo meqniyyaq.<sup>17</sup> Nazaq iyan in Juda gigo bit humab wolaytab le gwahtiyeq in Juda mataw teq Grik mataw God diq anadin emad Juda gigo lotu adan muzin yaqayta na nenaq gamuk tiqemyaq. Ad kam bunmo in maket-ib leheq on mataw nab osiyta na nenaq gamuk tiqemyaqmo.<sup>18</sup> Teq mataw suleq amo amo bilaqyaqta asor ginan Epikuriyan haqayta na teq asor ginan Stowik haqayta na in Pol inaq gamukib an tubay yaqay. An baysa asor bilaq yaqay, Mat gamuk haresmo bilaqyaqta ka in naga gamukin diq bilaqyaq? haq yaqay. Haqsa ta asor bilaq yaqay, In uliq asor gigo god ginan bilaqyaq daqagya haq yaqay. Na ezaqgo Pol in Yesus awagamun teq mataw moqeq hodhodab eraq daqayta na ago gibilensa iyan in nazaq ginadnad em yaqay.

<sup>19</sup> Ari mataw na Pol waqim inaq in gigo saw araqaq gamuk emayta anan Areopagus haqaytab tugwalehiy. Gwalehim in buloniy, Ni gamukag muturta on mataw gibilenaqta na i huritnan haqiy.<sup>20</sup> I ningo gamuk na huritan in lul araqaq diq iyaq haqiy. Nazaq iyan i gamuk na alulin hurit kemnan haqiy.<sup>21</sup> Na mataw uliq Atens-ibta na teq mataw uliq pesanmo osim Atens-ib bolim osayta na nenaq in bunmo gamuk

muturta bilaqad huritad osnan ginad bilaq naqmo hiqiy yaqayta. In kabiy daq araƣ emgo ginad a hi emad in daq naqmo emad os yaqayta.

<sup>22</sup> Ari Pol saw Areopagus-ib eraqim kaunsel gimeb turad in bilam, Ne mataw Atens-ibta ham ya ne gibiyasa ne lotu ago daq bunmo emgo giwaz diq meqniyayta ham.

<sup>23</sup> Ya ne gigo uliq ka aduganib luwad ne lotu emayta anaghan kabemmo gibiy ham. Gibiyad ya ban araƣ tamaz emgota ahol waymo ham. Ban nab gamuk kazaq mar tonan ussa ya ahol way ham. Gamuk na bilam, Ka in god i ago a hi huritauqta na ayon tamaz emgo abanan usaqta haqad in bilam ham. Ari ham God nawa ne ago a hi huritad ayon lotu samanta emayta na ham muran ya God na abin ne tigibilennan ham.

<sup>24</sup> God na in kait og inaq teq nagah bunmo saw nagab giqusayta na qiqamta ham. Heven-ib teq og kab inaqmo in iyahta iyim osaqta ham. Nazaq iyan in lotu abitan mataw gibenab emayta na aduganib a hi osaqta ham.

<sup>25</sup> Sa mataw gibenab in ulumsihad nagah osgo ug daqayta in nazaq a haiqta ham. Na ezaqgo in nagah araƣ ago siqim a hi iyaqta ham. Inmo mataw giqeman kayeqmo osayta teq in on mataw bunmo nagah osgo bunmo negaqta ham.

<sup>26</sup> In mat amulikmo alulib on mataw en bunmo giqeman gwahtiƣiyta ham. Teq in on mataw en bunmo gigo kam in os daqayta na teq in gigo og ayawalan usdaqta na in tuwastitay bugta ham. Wastitay bugan on mataw en amulik-mulikmo gwahtiƣisa in giqeman in le og saw bunmo waqim tuqosay ham.

<sup>27</sup> In anad mataw bunmo saw hikmizmuzeq inagunad teq tiqibiy daqay haqad in nazaqmo giqeman osayta ham. Teq in i gihulosim le pesanmo a hi osaqta ham.

<sup>28</sup> In og saw bunmo osaqta ham. Inmo i giqeman i kayeqmo osauqta ham. Teq inmo i gilumsihsa i luwauqta ham. Ne gigo mataw bar emayta in na nazaqmo bilaqiyta ham. In bilaqiy, I bunmo inmo alulik gwahtiƣiwa haqiy ham.

<sup>29</sup> Ari ham i God ago onmin iyeq teq i ginad em hasuq ham. Mataw ginad emad gibenab nagah gidulan gol-ib teq silva-ib teq gigib giqemayta ham. Teq nagah na in God a haiq ham. I God ago onmin iyim i kayeqmo osauqta ham. Nazaq iyan i gimam God in kayeqmo osaqmo ham. In gig nog a haiq ham.

<sup>30</sup> Kwaziqmo mataw God ago a hi hurit kemad in daq haresmo em yaqayta ham. Emsa God in gigo daq meqinta na amenin hidmo a hi emyaq ham. Ari muran teq God in on mataw uliq saw bunmo gamuk awaz meqinta tigibilenaq ham. In bilaqaq, Ne ginad buliyeq gigo daq teq ginad meqinta na gileh ugiy haqaq ham. <sup>31</sup> Na ezaqgo

in teq hazizir ayahta emdaqta na akaman tibilagan usaqta ham. Hazizir nab teq in daq titnonta amalib on mataw bunmo gigo daq tuqulum kemdaq ham. Teq in mat araƣ anan bilaqan osaqta naqmo hazizir akabiyana na tiqemdaq ham. Mat na moqan God hodhodab wazan ta eramta ham. Eraqan daq na amalib mat na in God ago hazizir wamuzdaqta amatin dimun diq tiqiy hasta na ago God in i bunmo tiqiqisihunaqta ham.

<sup>32</sup> Ari mataw nab osiyta na in mat moqim hodhodab ta eramta na ago huritim asor yuquwad Pol tibilawun yaqay. Sa asor bilaq yaqay, Kam araƣab teq ni nagah ka ago bilaqsa i a ta huritamta haq yaqay.

<sup>33</sup> Haqsa Pol gihulosim tilah. <sup>34</sup> Lehsa on mataw asor Pol inaq iyim ago gamuk anan helmo tihaqiy. Mataw na gigo araƣ anan Diyonisiyus haqayta. In kaunsel Areopagus-ibta na gigo araƣ. Teq aw araƣ anan Damaris haqayta in helmo hamtamo. Teq on mataw asor nenaqmo.

## 18

### *Pol uliq Korin-ib kabiy am*

<sup>1</sup> Ari daq na abun ban Pol uliq Atens hulosisim uliq Korin-ib tilah. <sup>2</sup> Lehim uliq nab in Juda mat araƣ saw Pontus-ibta anan Akwila haqayta ahol tuwam. Mat na kwaziqmo ago saw Pontus hulosisim le uliq Rom kantri Italiy-ibtab osyaqta. Osim ilatow nogmo in awe Prisila inaq kantri Italiy hulosisim uliq Korin-ib boliyta. Na ezaqgo Rom gigo king anan Klodiyus haqayta na in Juda on mataw gimuzad ginan bilam, Juda on mataw bun diqmo i gigo uliq ayahta Rom huloseq saw araƣab tileh bug daqay ham. Haqan Akwila awe Prisila inaq eraqim uliq Korin-ib bolim tuqosiy.

Ossa teq Pol in giger na gigo hib tubol. <sup>3</sup> Bolan Akwila awe inaq bit karuwsanibta akabiyana emad os yaqayta. Sa Pol kabiy naqmo emaqta amatin iyim in giger na nenaq tuqos. <sup>4</sup> Osad lotu akamniƣ in Juda gigo bit humab wolaytab leheq Juda mataw teq Grik mataw nenaqmo Yesus anan tigibilenaq, mataw na ginad buliyeq Yesus anan helmo haq daqay haqad.

<sup>5</sup> Teq abeb Sailas ayow Timoti inaq saw Masedoniya hulosisim Pol ago hib tigewoqiy. Gewoqan Pol bit akabiyana hulosisad kam bunmo in God ago gamukmo mataw gibilenad tuqosyaq. In Juda mataw gamuk atoranmo gibileneq bilaqyaq, Yesus in Kraisa haqyaq. <sup>6</sup> Haqsa Juda mataw na in Pol geg ugad tibilawun yaqay. In nazaq emsa Pol ago tubusan ulelan bit na arohrohun ogib woqsa gibilan, Ne moqeq hiqiy daqayta na in negmo gigo afaqan ham. Afaqan na ya iholib a hi usdaq ham. Muran

ya on mataw en ta asor Juda a haiqta nagan gigo hib tilehnan ham. <sup>7</sup> Haqad in humab wolayta abitan na hulosisim le mat araq anan Titiyus Jastus haqayta na ago bitab tilah. Mat na God diq anadin emad abin iluwyaqta. Teq in ago bit Juda gigo bit humab wolayta na agerab turyaqta.

<sup>8</sup> Ari Juda gigo mat ayahta bit humab wolayta wamuzaqta anan Krispus haqayta na in ago aw amun nenaq bunmo Iyahta anan helmo tihaqiy. Sa Korin on mataw kabemmo in nazaqmo Pol ago gamuk huritim helmo haqad yuw tuhuziymo.

<sup>9</sup> Sa tarom araqab Pol osad nagah araq sen qwayim ahol waqayta nazaq nogta aholib gwahtiqa in Iyahta ahol tuwam. Ahol waqsa Iyahta tubulon, Ni hi rab ham. Ni nigez hi mug netad yaqgo gamuk gibilenmo gibilen ham. <sup>10</sup> Ya ninaq ossa mat araq eraqeq a hi nimeqin tondaq ham. Yago on mataw kabemmo uliq kab osayta ham. <sup>11</sup> Iyahta nazaq Pol bulonan in uliq Korin-ib ulig amulikmo teq kalam 6 nazaqmo tuqos. Osad in on mataw God ago gamuk asuleqin tigibilenyaq.

<sup>12-13</sup> Ari abeb Rom in mat anan Galiyo haqayta na eman in saw nab gavman amebta iyim tuqos. Ossa kam nab Juda bunmo eraqim Pol gihar tuqug yaqay. Gihar erad in Pol wazim ad hazizirib lehim tibilaqiy, Mat ka ago soysoy amalib on mataw gihureqsa in i gisesan gigo maror hulosaq dante lul ta araq diqta amalib God ayon lotu emayta haqiy. <sup>14</sup> Haqan Pol ate akim gamuk amenin emdaiq haqsamo haiq. Galiyo era tigibilan, Ne Juda matawta ham ne huritiy ham. Mat ka in Rom gigo gunun araq itiyonid o in daq araq meqinta emid ari ya ne gigo gamuk na tuhurit nag ham. <sup>15</sup> Teq ne bolim gamuk amikmikta teq mataw giholnan teq negmo gigo gunun agamukan naqmo ago ne susumun yagay ham. O tob iyan ham. Negmo leheq gamuk na wastitayiy ham. Ya nagah naqanta agamukan huritna ya hulosisim ham. <sup>16</sup> Haqad in mataw na hazizirib gimuzan tilehiy. <sup>17</sup> Lehsa mataw biyahta nab turyta na bunmo eraqim Juda gigo mat ayahta bit humab wolayta wamuzaqta anan Sostenes haqay na wazim Galiyo anognib tuwoltitay yaqay. Woltitaysa teq haiq Galiyo daq na ago asit a hi bilam.

*Pol muleqim uliq Antiyok saw Siriya-ibtab ta lah*

<sup>18</sup> Ari Pol uliq Korin-ib kam kabemmo a ta os. Osim abeb in Yesus ago dauh uliq nabta na gihulosim uliq Senkriya-ib tilah. Lehsa Prisila aduw Akwila inaq in Pol inaq tilehiymo. Lehim uliq Senkriya-ib Pol aqensan tuqurot. Na ezaqgo kwaziqmo in daq araq emgo haqad God inaq an adugan

wazta iyan. An adugan wazim in aqensan a hi urotad luwsa le nagah na akaman tihiqiy an teq in aqensan tuqurot. Aqensan urotan teq in bunmo muy araqab gwalim saw Siriya-ib tilehiy. <sup>19</sup> Lehim uliq Efesus-ib tugwahtiqim Pol in Akwila awe Prisila inaq gihulosan nab ossa in amomo le Juda gigo bit humab wolaytab gwahtiqim nenaq gamuk tiqam. <sup>20</sup> Gamuk eman Juda mataw na Pol buloniy, I ni ninaq asit sisaq nog a ta osamta haqiy. Haqan Pol bilam, Haiq ham. Ya nenaq sisaqmo a hi osdaiq ham. <sup>21</sup> Haqad in gihulosadmo gibilan, Ne bo kab ta osiy ham. God anad bilaqid teq ya muleqeq ne gigo hib ta boldaiq ham. Haqad in muyib gwalim Efesus tuhulos. <sup>22</sup> Muy na le uliq Sisariya-ib woqan Pol muy hulosisim le uliq Jerusalem-ub Yesus ago on matawta na tigibiy. Gibiyad in gihulosim uliq Antiyok-ib tuwoloh. <sup>23</sup> Wolehim in Antiyok-ib sisaq nogmo tuqos. Osim teq in eraqim le disaipel saw giger Galesiya-ib teq Frigiya-ib osayta na gibiyim gibiyim tilehyaq. Lehad in gigem zaway tinegyaq.

*Apolos uliq Efesus-ib mataw gamuk gibilenyaq*

<sup>24</sup> Ari Juda mat araq uliq Aleksandriya-ibta anan Apolos haqayta bolim uliq Efesus-ib osyaq. In mat araq gamuk anononmo bilaqaqta amatin iysa mataw in ago gamuk huritad gidek diq sirir yaqayta. Teq in God ago marib gamuk bunmo alulin anad tiqem hasta. <sup>25</sup> Anad em hasad in Iyahta ago dante muturta na ago hurit kemad in Iyahta muzgo agem awaz meqin diqta. Ad in on mataw Yesus awagamun gibilenad in Yesus daq amta na ago wastitayeqmo gibilenyaqta. Ta teq in Yesus abinib yuw huzgo a hi huritta. In Jon ago suleq naqmo huritim yuw huzta. <sup>26</sup> Mat na Juda gigo bit humab wolaytab leheq on mataw gamuk atoranmo gibilenad in a hi girabunyaqta. Sa Prisila aduw Akwila inaq in Apolos gamuk bilaqsa tuhuritiy. Huritim in giger Apolos waqim a le giholbin osad teq in God ago dante muturta na anan wastitayimmo tubulon sireqiy.

<sup>27</sup> An abeb Apolos saw Akaya-ib lehgo anad tiqam. Anad emsa Yesus ago on mataw uliq Efesus-ibta na ginad tibillammo. Ginad bilaqsa in disaipel saw Akaya-ibta na gimen sansandek mar tonim kazaq bilaqiy, Ne Apolos wazinaq waqeq inaq osiy haqiy. An Apolos le saw Akaya-ib gwahtiqim in on mataw God agem dimunta negan in Yesus anan helmo tihaqiyta na ayahmo tigilumsihyaq. <sup>28</sup> Gilumsihad in ulalabmo Juda mataw nenaq gamuk emad gigo gamuk bayan woqsa in amenin em yo hiqiy yaqay. Sa Apolos in God ago marib gamuk gicisihun naqmo hiqiyad

gibilenyaq, Mat anan Kraish haqayta na amatin Yesus-mo haqyaq.

## 19

*Pol uliq Efesus-ib God ago gamuk bilam*

<sup>1</sup> Ari Apolos uliq Korin-ib ossa kam nab Pol garan adugan saw agarahin inaqta na urotim bolim uliq Efesus-ib tugwahtim. Gwahtiqim nab in disaipel asor tigibiy. <sup>2</sup> Gibiyad in tisuusumun nag, Kwaziqmo ne Yesus anan helmo haqiya kam nab ne God ago Bugaw Dimunta waqiy ye? ham. Haqan in bilaqiy, Haiq haqiy. I God ago Bugaw osaqta na akaziran asit i a hi huritta haqiy. <sup>3</sup> Haqan Pol gibilan, Nazaq iyan ne naga suleqin muzinin yuw huziyta? ham. Haqan in bilaqiy, I Jon-mo ago suleq muzinin yuw huzta haqiy.

<sup>4</sup> Haqan Pol bilam, Kwaziqmo Jon on mataw huz negad gibilenyaq, Ne ginad buliyeq gigo daq meqinta gileh ugsa teq ya ne yuwib huz negiq haqyaq ham. Ad ne mat ya igilehni boldaqa na anan helmo haqiy haqyaq ham. Ari mat Jon agilehni bolta na in Yesus-mo ham. <sup>5</sup> Haqan mataw na gamuk na huritim in Iyahta Yesus ago suleq muzinin abinib yuw tuhuziy. <sup>6</sup> Huzan Pol aben in giholib emim giwazsa God ago Bugaw Dimunta giholib tubol. Bolan uliq amo amo gigo nan mataw na ginadib bolsa in God ago nantut tibilaq yaqay. <sup>7</sup> Teq mataw na bunmo ginulinqan in 12 nazaq.

<sup>8</sup> Ari Pol uliq nab osad kalam ezeqmanmo aduganib in le Juda gigo bit humab wolayta nab gwahtiqe in a hi rabad Yesus awagamun dimunta tigibilenyaq. Mataw na ginad buliyeq helmo haq daqay haqad in God ago maror asuleqin negad in nenaq gamuk atoranmo bilaqyaq. <sup>9</sup> Teq mataw na gilikmanib asor in helmo haqnan gituw hiquysa giquitil a hi ritenyaq. Ad in on mataw gimeb Iyahta ago dante muturta na anan meqin haq yaqay. Nazaq iyan Pol eraqim gihulosad in mataw disaipel tiqiyiyta naqmo giwaqim nenaq lehim mat ara q anan Tiranus haqayta na ago suleq abitnib tilehiy. Lehim kam bunmo Pol in God ago gamuk atoranmo tigibilenyaq. <sup>10</sup> Ad in ulig gigermo nazaq emad tuqos. Nazaq iyan saw Esiya-ib on mataw bunmo Juda teq Grik ina qmo in Iyahta ago gamuk tuhuritiy.

*Sikewa atatniz giwagamun*

<sup>11</sup> Ari Pol uliq nab ossa God in abenab daq azawayin ina qta lul ara q digta kazaq giqemyaq. <sup>12</sup> Mataw Pol ago tubusan adek amikmikta teq in ago tubusan bunta nagan in aholib emeq a luwyaqta na in giwaqeq a leheq mataw moqayta giholib tiqem yaqay. Emsa in gigo moq hiquysa bugaw meqinta giholib usiyta na tituk yaqaymo.

<sup>13</sup> Ari kam nab Juda asor saw hareshmo luwad in on mataw gigo bugaw meqinta gimuzad anawun waq yaqayta. Teq mataw na gigo asor in bugaw meqinta muznan haqad in Iyahta Yesus anan biyad bilaq yaqay, I Yesus mat Pol abin bilaqayta na abinib i atoranmo ne gibilenauc haq yaqay.

<sup>14</sup> Sa Juda gigo mataw tamaz emayta gigo ayahta ara q anan Sikewa haqayta na in atatniz 7 nazaqmo osiy. Osad in bugaw meqinta gimuzad daq nazaqmo em yaqayta. <sup>15</sup> Emad teq kam ara qab in bugaw meqinta ara q nazaq bulonan bugaw na amenin emim gibilan, Ya Yesus ago tuhurit ham. Teq ya Pol ago tuhuritmo ham. Ta teq negmo gingan didiq? ham. <sup>16</sup> Haqad mat aholib bugaw meqinta usaqta na eraqim sortukim mataw na gibunib gwalim ginol titayad gisan hikoqorad gigo tubusan bul titayan hitiqmo bug. Hitiq bugan mataw 7 na in bit na huload ginedan woqsa gibe aholmo tukim tilehiy. <sup>17</sup> An uliq Efesus-ib on mataw bunmo daq na ago tuhuritiy, Juda teq Grik ina qmo. Huritim in rabad teq in Iyahta Yesus abin wazid tiqera qyaq. <sup>18</sup> Sa on mataw Yesus anan helmo haqiya na gilikmanib kabemmo bolim in gigo daq kwaziqmo in ulilemeq em yaqayta na ulum hasan gwahtiqsa in tibilaq bugiy. <sup>19</sup> Ad on mataw asor liqiy em yaqayta na in mataw bunmo gimeb in gigo liqiy agamukan mar toniyta na bulsireqim ginuwan faqab gwalim tuqoyyaq. Liqiy agamukan kabemmo faqab oiyta na anawun in nulinan le 50,000 mani silva nazaqmo iy. <sup>20</sup> Sa Iyahta daq azawayin ina qta nazaq emsa in ago gamuk saw bunmo ayah iyad awaz meqin diq tiqiyyaq.

*Efesus on mataw Pol nan ugiy*

<sup>21</sup> Daq nagan tihiqiy an abeb God ago Bugaw Dimunta in Pol anad wamuzsa Pol anad tiqam, Ya saw giger Masedoniya-ib teq Akaya-ib leheq teq ya Jerusalem-ub tilehdaiq ham. Ad in bilam, Ya Jerusalem-ub leheq teq ya le Rom ahol tuwaqdaiqmo ham. <sup>22</sup> Haqad in mataw in ulumsih yaqayta na gilikmanib mataw giger Timoti ayow Erastus ina q giwaqim giqeman saw Masedoniya-ib ameb tilehiy. Lehsa Pol amomo saw Esiya-ib asitmo a ta os.

<sup>23</sup> Ossa kam nab uliq Efesus-ib mataw asor eraqim Iyahta ago dante muturta na geg ugad bab ara q ayahta wazan tiqeram. <sup>24</sup> Teq daq na alulin in kazaq. Mat ara q silva akabiy an emaqta anan Demitriyus haqayta uliq nab os. Osad in god katiya ara q awta anan Artemis haqayta na adulan amikmikta silva-ib giqemsa mataw gholyon zay yaqayta. Mat na silva akabiy an emad in ago kabibiy mataw

Artemis adulan giqem yaqayta na gimen mani ayahmo waqyaqta.

<sup>25</sup> Ari kam araqab Demitriyus in ago kabibiy mataw na teq mataw ta asor kabiy naqanta emayta na girom tonim gibilan, Ya iyognizta ham ne tuhuritiy ham. I gigo naw dimunza kabiy kaqmo amalib gwahtiqaqta ham. <sup>26</sup> Teq mat anan Pol haqayta na in on mataw kabemmo gihureqan in ginad buliyim i gigo kabiy ka anan ginad a ta hi bilaqaq ham. Na ne ahol waqim ne tuhuritiyta ham. Teq mat na in uliq Efesusmo gimen a hi amta ham. Haiq ham. In saw Esiya asor ayahmo nazaqmo gimen amtamo ham. In bilaqaq, God katiyta amo amo mataw gibenab emayta na in god diq a haiq haqayta ham. <sup>27</sup> Ne ginad emiy ham. On mataw saw Esiya-ib teq og saw bunmo in Artemis abin wazinayta ham. Teq luweq in Pol ago gamuk na huriteq in i gigo mani akabiy an anan meqin haq daqay ham. Ad in ginad em daqay, I gigo god Artemis ago lotu abitan in nagah amikta haq daqay ham. Nazaq iyid luweq Artemis abin ayahta uliq saw bunmo usaqta na tihiqiydaq ham.

<sup>28</sup> Haqan mataw na gamuk na huritim in gigem timeqniyaq. Gigem meqniysa in atoranmo lileyeq bilaq yaqay, Efesus gigo god Artemis in danneb diq haq yaqay. <sup>29</sup> Haqsa on mataw bunmo huritad ginadnad emad in samanmo hares haresmo tiqek ton yaqay. Ek tonad in araqibmo eraqim sibim saw humab wolaytab tilehiy. Lehad in saw Masedoniya-ib mataw giger Gayus ayow Aristarkus inaq gihureqim nenaq leh toniymo. Mataw giger na Pol inaq luw yaqayta. <sup>30</sup> Sa Pol le on mataw biyahta na gibilengo bilaqan disaipel tuwasihiy. <sup>31</sup> Sa saw Esiya-ib mataw marorta asor uliq nab osiyta na in Pol ayognizta iyim in amen nan emim in ginad awaz meqin amalib bulonim bilaqiy, Pol haqiy ni le saw humab wolayta nab hi gwahtiqaq ham.

<sup>32</sup> Sa on mataw biyahta na ginad agadan tiqiy bug. Mataw asor gamuk araq lileyeq bilaqsa ta asor in gamuk ta araq lileyeq bilaq yaqay. Na ezaggo on mataw bolim humab woliyta na kabemmo in bab na alulin a hi huritiyta na ago iyan. <sup>33</sup> Teq Juda mataw in gigo mat araq anan Aleksanda haqayta na ulum hasim ad gwahtiqaqsa biyahta na ahol waqad ginad emiy, Mat kaqmo haqiy. Haqsa Aleksanda aben wazan tiqeram, in humab na alulin gibilen kengo haqad. <sup>34</sup> Teq haiq. Mataw biyahta na Aleksanda ahol tuwaq hasan in Juda matmo iyan in giqez amulikmo iyim dedibmo a ta liley yaqay. I Efesus gigo god Artemis haq yaqay in danneb diq haq yaqay. In nazaqmo lileyad ossa zeq adulan gigermo tihiqiy

<sup>35</sup> Hiqiy an gavman gigo mar em araq Efesus-ib osta na in eraqim on mataw giqez wasihim teq gibilan, Ne mataw Efesus-ibta ham ne ginad emiy ham. Ayahta Artemis ago lotu abitan uliq Efesus-ib kab tursa ne wamuzayta na abin og saw bunmo ussa on mataw bunmo in ne gigo tuhuritiyta ham. Ad ne Artemis ago gig kaitab womta wamuzayta na ago in tuhuritiytamo ham. <sup>36</sup> Mat araq ne gibin na othasdaqta ago zaway haiq ham. Nazaq iyan ne giqez hiqiyiy ham. Ad ne hidmo daq araq emgo ne ginad hi emiy ham. <sup>37</sup> Mataw giger ne giqad boliyta ka in i gigo lotu abitnib nagah araq a hi rin toniy ham. Ad in i gigo god awta na a hi bilawuniymo ham. <sup>38</sup> Nazaq iyan Demitriyus ago kabibiy mataw nenaq in gigo gamuk inaq iyid ari i hazizir emauqta akamun inaq ham. Ad i gigo megistret osaymo ham. In daq dimunza muzinad in gigo afaqan haziziribmo teq wastitayiy ham. <sup>39</sup> Teq ne gigo gamuk ta asor ussun ari kaunsel humab wolayta akaman nab teq ne bilaqiy ham. <sup>40</sup> I afaqan araq ayahta tuwaqan diq tonaug ham. Daq ka alulin haiqgam iyan luweq Rom huriteq bilaq daqay, Mataw ko ginadibmo bab wazan eranta haq daqay ham. Haqad in an wol ka ago susumun igid i gamuk araq bilaqamta haiq ham. <sup>41</sup> Mat na nazaq gibilenim huloadmo in on mataw na gibilenan gibitab tilehiy.

## 20

*Pol saw Masedoniya-ib teq saw Grik-ib luw*

<sup>1</sup> Ari nan ayah eramta na le muleqim tuwoqan Pol disaipel gililewunan in bo humab tuwoliy. Humab wolan Pol gamuk dimunza gigem zaway neggo gibilenim giben wazad teq in tighulos. Gihulosim in saw Masedoniya-ib tilah. <sup>2</sup> In saw nab lehim luwad in Yesus ago on mataw gamuk dimdimunza kabemmo gigem zaway neggo gibilenim teq abeh in saw Grik-ib le tugwahtim. <sup>3</sup> Gwahtiqim in saw nab kalam ezeqman nazaqmo tuqos. Osim in muleqeq uliq Jerusalem-ub ta lehnan haqad in muy waqeq saw Siriya-ib lehgo anad tiqam. Anad emsa Juda mataw asor in wol emgo an amugan wazsa Pol tuhurit. Huritim in anad buliyim in muleqeq saw Masedoniya agem siseyeq leheq teq in muy waqeq uliq Jerusalem-ub lehgo anad am. <sup>4</sup> Teq mataw asor Pol inaq lehiyta na ginan kazaq: Pirus atatin Soperat mat uliq Beriya-ibta na, teq mataw giger uliq Tesalonaika-ibta Aristarkus ayow Sekundus inaq, teq Gayus uliq Derbe-ibta na, teq Timoti teq mataw giger saw Esiya-ibta Tikikus ayow Trofimus inaq in bunmo Pol inaq lehiyta. <sup>5</sup> Mataw na

ameb lehim uliq Trowas-ib i gimen emiy.  
 6 Sa igmo osim Juda gigo lotu akaman bret  
 yis haiqmo neqayta na le tihiqiyan teq i  
 muyib gwalim uliq Filipay hulosisim tileh.  
 Leahad kam aweweqmo hiqiy anabnag-  
 anta nab i le Trowas-ib tugwahtiw. Gwahtiqim  
 uliq nab i kam 7 nazaqmo tuqos.

7 Osim Sande taromab i Kraiss ago  
 on matawta nenaq bret orqayeq Iyahta  
 anadin emad neqamta haqad humab  
 tuwol. Humab wolim osad Pol in on mataw  
 gamuk tigibilyaq. Gamuk gibilenad in  
 babeq lehdaqta iyan in gamuk hureqim  
 a le tarom alihanibmo tiqiy. 8 Sa i bit  
 adugan ulilibtab humab wolta nab lam  
 kabemmo oyyaq. 9 Teq mat araq minminta  
 anan Yutikus haqayta in tim bolaqta ago  
 dan aqezab os. Ossa Pol gamuk ayahmo  
 bilaqeq a lehyaq. Sa Yutikus ame rursa  
 in usnan tonad osimmo tuqus lah. Us  
 lehim in bit ago ategtegan ezeqmanta  
 ulilibta nab us hilesim woqim le ogibmo  
 tuwom. Woqan mataw hitiqim le tuwazyi.  
 Wazan haiq in tumom. 10 Sa Pol ulilib osta  
 tihitimmo. Hitiqim le amun na agerab ahol  
 hulosan woqan in ayntim teq bilam, Ne  
 ginadnad hi emiy ham. In awitan asanib  
 kawa usaq ham. 11 Haqad in bit adugan  
 ulilibta nab gwa ta lah. Gwalehim in bret  
 orqayim mataw na nenaq Iyahta anadin  
 emad tineqiy. Neqim hulosan in mataw  
 nenaq gamuk sisaqmo bilaqad ossa le  
 saw tihastitay. Saw hastitayan Pol eraqim  
 tilah. 12 Lehsa mataw in mat minminta na  
 kayeqmo ossa in waqim ad gigem ayahmo  
 dimniysa ago bitab tilehiy.

*Pol uliq Trowas hulosisim uliq Miletus-ib  
 lah*

13 Ari Pol era i tigibilan, Ne muyib lehsa  
 ya isenabmo Asos-ib tilehdaiq ham. Haqan  
 in bilamta nazaqmo i tiqem. I ameb lehim  
 muyib gwalim uliq Asos-ib tileh, i leheq  
 Asos-ib Pol ahol waqeq teq i waqeq ad  
 muyib leham haqad. 14 Lehim Asos-ib  
 gwahtiqim ossa teq Pol bo i tigibiy. Sa i  
 in waqim muyib inaq tileh, uliq Mitilin-  
 ib. 15 Lehim i uliq na hulosisim muyib lehad  
 luwsa kam na tihiqiyan kam ta araq nab i  
 le nud Kiyos agerab tugwahtiw. Gwahtiqim  
 lehsa kam na tihiqiyan kam ta araq nab i  
 le nud Samos agerab tiqiy. Iyim teq i nud  
 Samos hulosisim kam ta araq nab i le uliq  
 Miletus-ib tuwow. 16 Ari Pol uliq Efesus  
 uriyameq lehgo haqad in tanabmo anad  
 tiqamta. Nazaq iyan in muyib lehad in  
 uliq Efesus hulosisim wolsireqimmo le uliq  
 Miletus-ibmo womta. Na ezaqgo in hidmo  
 leheq Jerusalem-ub lotu akaman ayahta  
 anan Pentikos haqayta na ahol waqnan  
 haqad in saw Esiya-ib kam asor hulosisim  
 atuw hiqiy.

*Pol uliq Efesus-ib Yesus ago on mataw  
 gigo aseseqta na giben wazadmo in gihu-  
 losim lah*

17 Ari i uliq Miletus-ib tugwahtiqim Pol  
 nan eman uliq Efesus-ib tilah, Yesus ago  
 on mataw gigo danmebta nagan bo in ahol  
 waqgo haqad. 18 An mataw danmebta  
 nagan bo Pol agerab tugwahtiqan teq in  
 gibilenim kazaq bilam,

Iturimmo ya saw Esiya-ib gwahtiqim  
 ne nenaq osad ezaq ya os luwyaqta na  
 negmo tuhurity ham. 19 Ya ihol abin  
 wazid woqsa Iyahta ago kabiy emyayqta  
 ham. Emsa Juda mataw ya ilum waqad  
 ibayid woqgo bilaqsa ya ihol afaqan diq  
 iysa imeqil woqyaqta ham. 20 Teq ya ne  
 gilumsihad Iyahta ago gamuk dimdimunta  
 bunmo gibilennan a hi rabyayqta ham. Ya  
 ne gigo humabub osad teq ya ne gigo  
 bit bitmo luwad ya suleq negyayqta ham.  
 21 Ya Juda on mataw teq Grik on mataw  
 nenaqmo gamuk atoranno gibilenad bi-  
 laqyayq, Ne gigo daq teq ginad meqinta  
 gileh ugad ne gihol buliyeq God ago hib  
 boliy haqyayqta ham. Ad ne i gigo Iyahta  
 Yesus anan helmo haqiy haqyayqta ham.  
 22 Ari muran ne gidek emiy ham. God ago  
 Bugaw Dimunta ya ibe yahsa ya Jerusalem-  
 ub tilehaiq ham. Lehid teq nab naga daqin  
 diq ya iholib gwahtiqdaqta na ya a hi hurit  
 ham. 23 Teq uliq edob edob ya lehaiqta  
 nab God ago Bugaw Dimunta in gamuk  
 atoranno kazaq ya ibilenaq ham. Mataw  
 niqirurad afaqan nig daqayta nawa ni  
 nibaq tunim osay haqayta ham.

24 Teq ya ihol eman danmeb a hi iyaq  
 ham. Ya moqnan a hi rabaiqta ham. Haiq  
 ham. Ya dan muzayqta naqmo ya tumuz-  
 daiq ham. Ya inad amulikmo usaqta na ya  
 Iyahta Yesus kabiy yagta na tiqem bugnan  
 haqaiq ham. Teq yaqgo kabiy na ya God  
 agem dimunta on mataw negim in gimen  
 dante amta naqmo ago ya bilaqad luwaiqta  
 ham.

25 Ne huritiy ham. Kwaziqmo ya ne  
 gilikmanib osad ya God ago maror aga-  
 mukun gibilyenayqta ham. An muran ya  
 inad emaiq, Abeb ne ya inobun ahol a ta  
 hi waq daqay haqaiq ham. 26 Nazaq iyan  
 ya kawa ulalabmo ne tigibilen sireqaiq  
 ham. Ne gilikmanib araq moqeq meqniy  
 hasid na in yaqgo afaqan a hi iydaiq ham.  
 27 Na ezaqgo ya God ago anad bunmo ne  
 gibilenad ya rabim ihol a hi hureq has ham.  
 28 Negmo gihol asawan woltayad osiy ham.  
 Ad ne gigo sipsip na ne giwamuz naqmo  
 hiqiyiy ham. God ago Bugaw Dimunta ne  
 giqeman ne mataw danmebta iyim ne gigo  
 on mataw na giwamuzayta ham. Teq on  
 mataw na God inmo atatin anedan amalib  
 in gizayta ham. Nazaq iyan ne giwaz  
 meqniyeq God ago on mataw Yesus ago nan

huritayta na anononmo giwamuziy ham.  
<sup>29</sup> Ya inad kazaq emaiq ham. Ya ne gihuloseq lehsa abeb gaun kwasik meqin diqta ne giduganib tubol daqay ham. Boleq in ne gigo sipsip kabemmo gimeqin ton daqay ham. <sup>30</sup> Sa negmo giduganib mataw asor eraqeq gamuk katiyta tibilaq daqaymo ham. Ad in ne gilikmanib disaipel asor gihureqid in gimuzgo haqad gikat neg daqay ham. <sup>31</sup> Nazaq iyan kam bunmo ne gihol asawan woltayad osiy ham. Ulig ezeqman taromab zeqab inaqmo ya ne amulikmulikmo gidek wazad osta ham. Ya imeqil woqsa suleq negyaiqta na ne anadin emiy ham.

<sup>32</sup> Muran ya ne giqeman Iyahta abenab tuqosay ham. Teq God agem dimunta negaqa ago agamukan na in ne tigilumsidaqmo ham. Gilumsihsa ne gamuk na muz bugad teq ne giwaz meqniyeq tuqos daqay ham. Ossa abeb God in ago on mataw tawonta na bunmo ago os dimunta negsa ne os dimunta na tuwaq daqaymo ham.

<sup>33</sup> Ya ne gigo mat araqaq ago silva teq gol teq tubusan araqaq diq a hi utet ham. <sup>34</sup> Yaqmo ibenab kabiy awaz meqinta emad ya nagah ago siqim iyaiqta na yaqmo iholyon zaayyaiqta ham. Teq mataw ya nenaq bolta na yaqmo giwamuzyaiqtamo ham. Na ne tuhuritiy ham. <sup>35</sup> Ya kabiy bunmo tigiqisihunta ham. Nazaq iyan ne ya isen muzinad ne giholtuw bulad mataw gigo zaway haiqta na gilumsihiy ham. Ad ne Iyahta Yesus gamuk bilamta na anadin emiy ham. In bilam, Ni mat araqaq ulumsihad nagah ugeq teq ni ninad ayahmo dimniydaqta haqad in bilam ham. Ad ni ninad dimniydaqta na in mat ningo nagah waqim anad dimniyta na tuquriyandaq haqad in bilam ham.

<sup>36</sup> Ari Pol gamuk na emim tihiqiyan in abakbakan ulum laquwim turad teq in mataw aseseqta na nenaq God inaq gamuk tiqemiy. <sup>37</sup> Sa mataw na bunmo ayahmo tigaq yaqay. Ad in Pol wazim ay netad tiqilawun yaqay. <sup>38</sup> Teq Pol bilam, Ne ya inobun ahol a ta hi waq daqay hamta naqmo ago in gihol afaqan diq tiqiy yaqay. Gihol afaqan iysa in Pol ad muyib tilehiy.

## 21

### *Pol muyib gwalim Jerusalem-ub lah*

<sup>1</sup> Ari i mataw na gihulosad muyib gwalan muy aben tuhulos ug. Hulos ugan i eraqad nud Kos-ib tileh. Lehim nab i usim eraqim nud ta araqaq anan Rodes haqaytab tileh. Lehim Rodes hulosaad i uliq araqaq lanib usaqta anan Patara haqaytab tuwow. <sup>2</sup> Woqim uliq nab i muy araqaq saw Fonisiya-ib lehgo emsa ahol waqad i muy nab gwalim tileh. <sup>3</sup> Leahad nud Saiprus

agerab iyim ahol waqad i ginasaran ban tuquriyam. Uriyamad le saw Siriya-ib gwahtiqaad i uliq Tair-ibmo tuwow. Na ezaqgo in muyib es asor emid uliq nab tiggo haqad. <sup>4</sup> Sa i inaqmo hitiqim le disaipel ginagunim tigibiy. Gibiyad i kam <sup>7</sup> nazaqmo uliq nab tuqos. Ossa God ago Bugaw Dimunta disaipel na ginadib gamuk emsa in Pol kazaq bulon yaqay, Ni Jerusalem-ub hi leh haq yaqay. <sup>5</sup> Sa i uliq nab osan kam lehgota na tugwahtiqaan i uliq hulosaad gisen dan tuqug. Ugim lehsa mataw na gigo aw amun nenaqmo in i giwaqim giqad uliq asan ban tilehiy. Lehim kamis agurumnib i bunmo gibakbakan ulum laquwim turad God inaq gamuk tiqem. <sup>6</sup> Emim hulosaad i eraqim tursa in bo i giben wazad bilaqiy, Bo ta lehiyyo haqiy. Sa i nazaqmo in giben wazad bilaw, Bo kab ta osiyyo haw. Haqad i muyib gwalsa in giquliqab muleqim ta lehiy.

### *Uliq Sisariya-ib nantut araqaq anan Agabas haqayta na in Pol anan bilam*

<sup>7</sup> Ari i muyib gwalim uliq Tair hulosaad le uliq Tolemes-ib tuwow. Woqim nab i le Kraisa ago on mataw asor gibiyad giben tuwaz. Giben wazim i nenaq kam amulikmo tuqos. <sup>8</sup> Osim i Tolemes hulosaad uliq Sisariya-ib tileh. Lehim i mat anan Filip haqayta na ago bitab tugwahtiw. Filip in mat araqaq Yesus awagamun dimunta on mataw gibilen kemyaqta amatin araqaq. Teq kwaziqmo in mataw <sup>7</sup> uliq Jerusalem-ub Aposel gilumsih yaqayta na gigo araqaq iyim osta. Ari i mat na ago bitab gwahtiqim inaq tuqos. <sup>9</sup> Sa in amigniz aweweqmo mat a hi waqiyta na in gimam inaq bit nab os yaqayta. Osad teq in God ago nantut iyim ago gamuk bilaq yaqayta.

<sup>10</sup> I uliq Sisariya-ib kam asor tuqosan teq God ago nantut anan Agabas haqayta na saw Judiya hulosaad tigewom. <sup>11</sup> Gewoqim i gigerab bolim in Pol ahulib am huroran usta na waqim inmo ahol abensin irqurim bilam, God ago Bugaw kazaq bilaqay ham. Juda mataw Jerusalem-ubta na in am ka anamren kazaq irqureq mataw en ta araqaq Juda a haiqta na tineq daqay haqay ham.

<sup>12</sup> Haqanmo i gamuk na huritim i teq on mataw uliq nabta na nenaq i bunmo ginad awaz meqin amalib Pol kazaq bulonyauq, Ni Jerusalem-ub hi gwaleh haqayauq. <sup>13</sup> Haqsa Pol amenin emim bilam, Naqaggo ne gaqad ya iquutil eman tartaynan tonaq? ham. Juda mataw ya iqirqur daqayta na ago ya a hi rabaiq ham. Ya Jerusalem-ub lehid in ya inol emid moqdaiqta na ago ya a hi rabaiqmo ham. In nazaq ya itonsa Iyahta Yesus abin ayah iyaq ham. Nazaq iyan ya uliq Jerusalem-ub tilehgomo iyim osaiq ham. <sup>14</sup> In nazaq haqsa i anad



buliyan yo hiqiyauq. Nazaq iyan i gamuk na hulasad bilaw, Naqmo Iyahta ago anad haw. In anad emaqta nazaqmo in emid tugwahtiqaq haw.

## **Pol uliq Jerusalem-ub irquran ossa mataw amen hazizir emiy**

*Pol le uliq Jerusalem-ub gwahtim*

<sup>15</sup> Ari kam asor le tihiqiyani i gihol wastitayim uliq Sisariya hulosisim Jerusalem-ub tugwalehad luw. <sup>16</sup> Luwsa Sisariya-ib di-saipel asor i nenaq lehad in i giwaqim giqad nud Saiprus-ib mat araqaq anan Nason haqayta ago bitab tilehiy, i mat na inaq osgo haqad. Mat na kwaziqmo Yesus anan helmo tihamta. <sup>17</sup> Ari i mat na inaq osim teq i eraqim le uliq Jerusalem-ub tugwahtiw. Gwahtiqaq i gimaqbaban Kraisa ago on matawta na in gigem dimunta igad in i giwazinim giqad in gigo bitab tilehiy.

<sup>18</sup> Lehim usim era tarommo i Pol inaq Jems ahol waqnan tileh. Lehim i Yesus ago on mataw gigo aseseqta na in Jems inaq ossa i tigibiy. <sup>19</sup> Gibiyad Pol ago zeqq dimun negad giben tuwaz. Giben wazim teq God in amalib on mataw en ta asor Juda a haiqta nagan gigo hib kabiy daq emyaqta na awagamun in tigibilyaqaq.

*Mataw aseseqta Pol Tempel-ib lehgo buloniy*

<sup>20</sup> Gibilenan mataw aseseqta na huritim God abin tiqiluw yaqay. Ad in Pol buloniy, I gimaqbab haqiy ni hurit haqiy. Juda gilikmanib on mataw kuluwmo diq Yesus anan helmo tihaqiyta haqiy. Ad in bunmo God ago maror Moses bilamta na adan muznan giwaz diq meqniyayta haqiy. <sup>21</sup> Teq mataw na ni nibin kazaq huritiyta haqiy. Ni bilaqaq, Juda mataw Yesus anan helmo haqad og saw haresmo mataw en ta asor Juda a haiqta nagan gilikmanib osad in God ago maror Moses bilamta na gileh ugad anadin a ta hi em daqay haqay haqay. Ad ni bilaqaq, Juda mataw na in gisesan gigo daq bunmo a ta hi muzinad in gigo onmin gihol abatan asan a ta hi urot daqay haqay haqay. Mataw nazaq ni niwagamun huritiyta haqiy.

<sup>22</sup> Teq i ezaq tonam? haqiy. Ni tubolta ka in nabag tuhurit bugiy haqiy. <sup>23</sup> Nazaq iyan i ni nibilenid ni kazaq em haqiy. I gigo hib mataw aweweqmo God inaq an amugan wazim in gihol udinin osayta haqiy. <sup>24</sup> Ni mataw na giwaqeqq nenaq leheq in gihol wastitaygo adan bunmo ni nenaq em bug haqiy. Ad in giqensan urot daqayta na ago anawun ninmo zay neg haqiy. Nazaq ni emid teq mataw bunmo ginad tiqem daqay, Gamuk ni nibinib emiyta na alulin haiqta haq daqay haqiy. Ni God ago maror

Moses bilamta na ago gunun muzinad ni maror na wazan a hi woqaqta haq daqay haqiy. <sup>25</sup> Ari on mataw en ta asor Juda a haiqta nagan gigo asor Yesus anan helmo haqiyta na i kwaziqmo an amugan wazim in gimen nan eman lehan i kazaq bilawta haqiy. Mataw god katiyta ayon tamaz emad karuw wol emiyta na in hi neqiy haw haqiy. Ad in ned hi neqad teq in karuw ginatguman huroran moqiyta na hi neqiyimo haw haqiy. Teq in an haresmo hureqeq inaq hi usiy haw haqiy.

<sup>26</sup> Mataw aseseqta na nazaq Pol bulonan Pol usim era mataw aweweq na giwaqim nenaq lehim in God ameb gihol abusirinan hiqiygo akabiyani tiqemim teq in Tempel-ib tilehiy. Lehim in gihol God ameb dimniy has daqayta na akaman kam gineh teq gwahtiqaqta na ago in mataw tamaz emayta tigibileniy, kam 7 nazaq le tihiqiyid teq in bunmo ta boleq giholyon tamaz tiqem daqay haqad.

*Juda mataw Pol Tempel-ib waziy*

<sup>27</sup> Ari gihol abusirinan hiqiy hasdaqta akaman 7 na le tihiqiyinan tonsa Pol Tempel-ib tilah. Lehim luwsa Juda gisenlul ta asor saw Esiya-ib osim boliyta na in nab luwad Pol ahol tuwaqiy. Ahol waqad in on mataw nab luwiyta na bunmo gigem wazan eraqsa in Pol tuwaziy. <sup>28</sup> Wazad in atoranno lileyim bilaqiy, Isrel matawta haqiy ne boleq i gilumsihiy haqiy. Mat kaway ka in i gigo dauh teq i gigo maror teq i gigo lotu abitan ka gibayid woqgo haqad in mataw uliq bunta gibilen bugaqta haqiy. Teq in daq naqmo amomo a hi emaqta haqiy. In Grik mataw asor giwaqim giqad Tempel-ib bolim in saw gununta ka eman anumlan inaq tiqiy haqiy. <sup>29</sup> Juda mataw na in tekomo Pol ayow mat araqaq anan Trofimus uliq Efesus-ibta na inaq uliq aduganib luwsa in gibiyiyta. Nazaq iyan abeb Pol le Tempel agelin aduganib luwsa in ahol waqad ginad emiy, Pol Efesus mat na waqim ad Tempel aduganib gwahtimta daqagya haqiy.

<sup>30</sup> Mataw nazaq lileyeq bilaqsa Jerusalem-ub on mataw bunmo tiriteniy. Ad in bunmo sibim bo humab wolim in Pol wazim hureqim ad asan ban a lehim teq hidmo in Tempel agelin ago dan ez bunmo tuqot bugiy.

*Rom gigo mataw bab emayta asor Pol waziy*

<sup>31</sup> Ari kam nab bab mataw gigo danmebta araqaq ago bab mataw 1,000 nenaq uliq Jerusalem-ub osiy. Ossa mataw biyahta na Pol wol emnan tonsa bab mat danmebta na gamuk kazaq hurit. Jerusalem mataw bunmo humab wolim gamuk haresmo bilaqad bab ayahta wazan

tiqeraqaaq haqiy. <sup>32</sup> Nazaq iyan hidmo in bab mataw gigo aseseqta in ahaqenibta na asor gigo bab mataw nenaqmo giwaqim in bunmo sibim mataw wagayta na gigerab tuwolehiy. Wolehan Juda in bab mat danmebta na ago mataw kabemmo nenaq bolsa gibiyad in Pol wol yaqayta na tuhulosiy. <sup>33</sup> Hulosan bab mat danmebta na bolim Pol tuwaz. Wazim in ago bab mataw gibilan, Sen giger waq a boleq amalib mat ka am waziy ham. Haqad in mataw nab turiyta na tisusumun nag, Ka nog? ham. In ezaq ton? ham. <sup>34</sup> Haqsa on mataw biyahta na gigo asor gamuk araq bilaqsa asor gamuk ta araq bilaq yaqay. In saw garak ayahmo emsa bab mat danmebta na in gamuk alulin huritgo eman haiq. Nazaq iyan in ago bab mataw gibilenan in Pol waqim ad in gigo bitab tilehiy. <sup>35-36</sup> A lehsa on mataw dauh biyahta na gimuzim lehad in atoranno lileyim bilaq yaqay, Wol emid moqan haq yaqay. Haqsa bab mataw na Pol wazim ad lehim bit na ago kaban asenab gwahtiqaqsa Juda mataw na Pol wol emgo giwaz meqin diq iysa iyan bab mataw na Pol sorim ad tugwalehiy.

*Pol anad ezaq emad ago kabiy emyaqta na ago in Juda mataw gibilan*

<sup>37</sup> Bab mataw na Pol waqeq ad in gigo bit aduganib a lehgo haqsaqmo Pol in gigo mat danmebta na tubulon, Ya gamuk araq nibilennan ham. Haqan mat na bilam, Ni Grik nan bilaqaqta ye? ham. <sup>38</sup> Ya bilay ni Isip-ub mat ilatow gavman giqez othasad mataw tagumta 4,000 nazaq giqad saw amatawun haiqtab lahta naqmo hay ham. <sup>39</sup> Haqan Pol bilam, Ya Juda mat araq ham. Ya uliq Tarsus saw Silisiya-ibta ham. Yaqgo uliq na abin ayahta usaqta ham. Ni ya ihulosid ya on mataw ko gibilennan ham. <sup>40</sup> An bab mat danmebta na dimunmo haqan Pol nab kaban afaqinib turad in aben wazan eraqan on mataw giqez tihiqiyiy. Giqez hiiqyan in Hibru nanib gibilenim kazaq bilam,

## 22

<sup>1</sup> Ya imaqbaban teq ya imaman ham ne gidek emiy ham. Ya ne gigo gamuk amenin emeq ihol adanin tuqwaynan ham. <sup>2</sup> Pol Hibru nanib gamuk emsa iyan mataw nab turiyta na gidek sirirsa in giqez hikidik iyim tok nemim turiy. Tursa Pol kazaq bilam,

<sup>3</sup> Ya Juda mat araq ham. Ya inen uliq Tarsus saw Silisiya-ibtab iqamta ham. Teq ya uliq ayahta kabmo osim ayah iyta ham. Ad ya mat anan Gamaliyel haqayta na ago hib suleq emta ham. Mat naqmo i gisesan gigo maror asuleqin yagta ham. Nazaq iyan ya God aqez muzgo iwaz diq meqniyyaiq ham,

muran ne emayta nazaq ham. <sup>4</sup> Kwaziqmo mataw dante muturta kawa ya muzaiqta ka in muzinsa ya gimeqin tonad afaqan negsa in moq yaqayta ham. Mataw on in-aqmo ya giqirpureq giqad le bit giqirquran osaytab giqemyaiqta ham. <sup>5</sup> Tamaz mat danmebta na teq i gigo mataw marorta na bunmo in yaqgo tuhuritayta ham. Ne susumun negid in ya iwagamun nazaq diq ne tigibilen daqay ham. Mataw aseseqta naqmo in i gimaqbaban uliq Damaskus-ib osayta na gimen nan mar tonim yagan ya waqim ad Damaskus-ib tileh ham. Ya leheq on mataw dante muturta muzinayta na giwazeq giqirpureq giqad Jerusalem-ub ta bolid in gigo daq na amenin faq neg daqay haqad ya lehta ham.

*Pol in Yesus anan helmo hamta na ananin tut*

<sup>6</sup> Ari ya Damaskus-ib lehad luwim zeq ayahtab 12 kilok nazaq ya uliq sinsin tiqiysamo saw anuwan araq ayahta kaitab hikliyanim hitiqim tiqililut yag ham. <sup>7</sup> Sa ya ogib woqim usad mat araq aqez kazaq ibilensa ya hurit ham. Sol, Sol ham na-gaqgo ni ya imeqin tonaq? haqad in bilam ham. <sup>8</sup> Haqan ya amenin emim bilay, Iyahta hay ni nog? hay ham. An in ya ibilan, Ya Yesus Nasaret-ibta haqad in bilam ham. Mat ni meqin tonaqta naqmo haqad in bilam ham. <sup>9</sup> Sa mataw ya nenaq lehta na in saw anuwan na ahol waqiy ham. Teq in mat aqez ya ibilanta na a hi huritiy ham.

<sup>10</sup> An ya bilay, Iyahta hay, teq ya ezaq tondaq? hay ham. An Iyahta ibilan, Ni eraqeq Damaskus-ib leh haqad in bilam ham. Uliq nab mat araq teq kabiy ya ninmen tuwastitayan usaqta na ago tibi-bilen bugdaq haqad in bilam ham. <sup>11</sup> Teq saw anuwan ayah diqta na ya ime ulum-woran ya nagah araq ahol waqgo haiq ham. Nazaq iyan mataw ya nenaq lehta na in ya iben wazim iqad Damaskus-ib tilehiy ham.

<sup>12</sup> Lehan Damaskus-ib Juda mat araq anan Ananayas haqayta nab os ham. In God anadin diq emad ago maror Moses bilamta na adan muz naqmo hiiqiyaqta amatin araq ham. Teq uliq nab Juda on mataw bunmo in anan bilaqay, In mat dimunta haqayta ham. <sup>13</sup> Mat na ya igerab bolim turad ibilan, Ya imaqbab Sol ham ni nimeqnagin hastitayan haqad in bilam ham. Haqan muran diq nawaqmo ya ime tihastitayan ya mat na ahol tuway ham. <sup>14</sup> An in bilam, I gisesan gigo God in ni nilumim tiniwam haqad in bilam ham. Ni God-mo anad huritgo teq ni Mat Titnonta na ahol waqgo teq ni Mat na aqezab gamuk gwahtimta na huritgo haqad in tiniwam

ham. <sup>15</sup> Mat Titnonta na in ni niqemid ni leheq nagah ni ahol tuwamta na teq gamuk ni tuhuritta na ni on mataw bunmo tigibilendaq haqad in bilam ham. <sup>16</sup> Ari ta nagaqgo ni nab osmo osa? haqad in bilam ham. Ni eraqeq mat na nilumsi-hgo lilewunad anan biy haqad in bilam ham. Anan biyad yuw huzsa in ningo daq meqinta nagan gisuholid hiqiy bugan haqad in bilam ham.

*God Pol eman in on mataw en ta asor Juda a haiqta nagan gigo hib lahta awagamun*

<sup>17</sup> Abeb ya Jerusalem-ub ta bolim Tempel-ib lehim God inaq gamuk emad tuqos ham. Nab osad ya nagah ara? sen qwayim ahol waqayta nazaq nog ya ahol way ham. <sup>18</sup> Ahol waqsa Iyahta ya imeb turad in kazaq ibilan ham. Hidmo ni Jerusalem huloseq leh haqad in bilam ham. Ni ya iwagamun uliq ayahta kab bilaqsa mataw a hi hurit daqay haqad in bilam ham. <sup>19</sup> Haqan ya bilay, Iyahta hay haiqgam hay. Mataw kabta in yaqgo tuhurit kemiya hay ham. Kwaziqmo ya Juda gigo bit humab wolyatib leheq ya on mataw ni ninan helmo haqayta na giqirquad ginol titayyaiqta haqad ya bilay ham. <sup>20</sup> Teq ningo kabibiy mat Stiven ni nihol awagamun bilaqsa mataw wol eman moqsa kam nab yaqmo in gigerab turad ya inad diq dimniya hay ham. Mataw Stiven wol emsa ya in gigo tubusan wamuzim turta haqad ya bilay ham. <sup>21</sup> Haqan in kazaq ya ibilan ham. Ni leh haqad in bilam ham. Ya niqemid ni on mataw en ta asor Juda a haiqta nagan uliq pesantab osayta na gigo hib tilehdaq haqad in bilam ham.

*Pol abin uliq Rom-ub usaqta na ago in bab mataw gibilan*

<sup>22</sup> Ari Juda mataw na Pol ago gamuk huritad ossa le in bilam, Iyahta ya iqeman ya on mataw en ta asor Juda a haiqta nagan gigo hib lehta haqan nabmo in gigem timeqniysa in atoranmo lileyim bilaqiy, Wol emid moqan haqiy. Mat nazaqta na in og kab kayeqmo ta hi osan haqiy. <sup>23</sup> In haresmo ek tonad in gigo tubusan asor hasim haresmo hunegad in honhon hiksogorim hunegan gwalyaq. <sup>24</sup> Mataw biyahta na nazaq emsa bab mat danmebta na bilaqan in ago mataw Pol waqim ad in gigo bitab tilehiy. A lehan teq in ago mataw na gibilenim bilam, Ne Pol wolad susumun ugeq on mataw nagaqgo amalib ek tonayta na ago ne hurit kemiya ham. <sup>25</sup> Haqan bab mataw na Pol a lehim aben am wazim sorqenan tursa teq Pol in gigo mat ayahta ara? nab turta na bulon, Mat abin uliq Rom-ub usaqta na ne kazaq hazizirib a hi

emadmo tuwoltitay daqay ye? ham. Ne gigo maror nazaq bilamta ye? ham.

<sup>26</sup> Haqan mat na Pol ago gamuk huritum in lehim bab mat danmebta na bulon, Ni nazaq hi em ham. Mat ko abin Rom-ub usaqta ham. <sup>27</sup> An bab mataw gigo danmebta na lehim Pol tisusumun ug, Ni ya ibilen kem ham. Helmo ni nibin Rom-ub usaqta ye? ham. An Pol bilam, Ege ham. <sup>28</sup> An bab mat danmebta na bilam, Ya naw ayahmo hulosisim ya ibin Rom-ub emta ham. An ta Pol bilam, Ya haiq ham. Ya inen iqeman ya ibin Rom-ub usaqta ham. <sup>29</sup> Pol nazaq haqanmo bab mataw in wolad susumun ug daqayta na rabunim le pesanmo turiy. Sa in gigo mat danmebta na tirabmo. Na ezaqgo in mat abin Rom-ub usaqta na samanta sen-ib irqurta na ago iyan.

*Pol Juda gigo kaunsel ginognib turad gamuk bilam*

<sup>30</sup> Ari usim eraqim tarommo bab mat danmebta na in Pol naga daqin diq eman Juda mataw nan ugiya na hurit kemnan haqad in Pol hulosan asanib gwahtim. Gwahtiqa teq in mataw tamaz emayta gigo aseseqta na teq Juda gigo kaunsel ayahta na amatawun bunmo gimen nan eman in bo humab tuwoliy. Humab wolim ossa bab mat danmebta na in Pol waqim ad hitiqim eman kaunsel ginognib titur.

## 23

<sup>1</sup> Ari Pol Juda gigo kaunsel ayahta na gimeb turad in atoranmo gibiyad kazaq gibilan, Ya imaqbaban ham ya og kab osad ya God anad muz bugad osim bo muran kawa ya in anad tumuz tutaiq ham. Ya igem dimunmo diq ussa ya iholib daq ara? meqinta a hi loyinaiq ham. <sup>2</sup> In nazaq bilaqan tamaz mat danmebta anan Ananayas haqayta na in mataw Pol aqerab turiyta na gibilan, Ne atenmos woliy ham. <sup>3</sup> Haqanmo Pol bulon, God teq ninmo tininoldaq ham. Ni bilaqne bitgo kadug hiran adahuran tiqiyta na nog ham. Bit anamren kadug na balaw tonan hus diq iyan mataw ahol waqad anan bilaqay, Dimunta haqayta nazaq nog ni ham. Ni i gigo gunun itiyonim ya inolgo tibilaqay ham. Ezaq teq ni hazizir ka ago gunun titnoneqmo muzinad yaqgo daq tuqulum kendaq? ham.

<sup>4</sup> An mataw Pol aqerab turiyta na buloniy, Ni God ago tamaz mat danmebta na nazaq bilawunaq e? haqiy. <sup>5</sup> An Pol bilam, Ya imaqbaban ham mat ko in tamaz mat danmebta na ya a hi hurit ham. Ya huritta iyeq ya nazaq a hi bulon nag ham. Na ezaqgo God ago mar bilam,

Ningo mat marorta anan meqin hi bilaq haqad in bilam ham. *Kisim Bek 22.28*

<sup>6</sup> Ari mataw dauh gigermo humab nab osiy. Dauh araq in Sadyusi teq araq na in Farisi. Na ago Pol tuhurit. Nazaq iyan in Juda gigo kaunsel ayahta nab turad in lileyim bilam, Ya imaqbaban ham ya Farisi araq ham. Teq ya imaman in Farisi-mo ham. Ya inad emaiq, Hel diqtaqmo mataw moqeq teq in hodhodab tiqeraq daqayta haqaiq ham. Ya gamuk amulik naqmo waz naqmo hiqiysa iyan muran in hazizir kab ya tiqiqemay ham.

<sup>7</sup> Pol nazaq bilaqanmo an mug araq ayahta Farisi teq Sadyusi gilikmanib tigeram. Eraqan mataw na gihol huseran dauh gigermo tiqiyiy. <sup>8</sup> Na ezaqgo Sadyusi ginad kazaq emayta. Mataw tumoqiya na hodhodab a ta hi eraq daqay haqayta. Teq angelo haiqgam haqayta. Teq bugaw haiqmo haqayta. Ari Farisi in nagaq nagan bunno ginan helmo haqayta. <sup>9</sup> Nazaq iyan kaunsel bunmo era haesmo tiqek ton yaqay. Sa Farisi gigo asor ginan mataw Moses ago gunun hurit kemiya haqay na in eraqim gamuk atoranno kazaq bilaqiy, I mat ko ahol waqan in gunun araq a hi itiyon haqiy. Luweq angelo araq o bugaw araq in mat ko bulonta daqag iydaq haqiy. <sup>10</sup> Haqsa bab ayah diqmo in gilikmanib tugwahtiqaq tona bab mat danmebta na tirab, luweq dauh giger na Pol kazaq kazaq wazeq hureq ugad aliqabmo bultayid in tumoqdaq haqad. Nazaq iyan in ago bab mataw gibilenim bilam, Ne woleheq mataw na ginolad gibenab Pol waqeq ne gigo bitab a lehiy ham.

<sup>11</sup> Ari kam nab taromab Iyahta bo Pol agerab gwahtiqaq turad bulon, Ni niwaz meqniyeq tur ham. Ni yaqgo gamuk kab uliq Jerusalem-ub atoranno bilamta kazaqmo ni Rom-ub leheq yaqgo gamuk tibilaqdaqmo ham.

*Juda mataw asor Pol wol emgo an amugan wazi*

<sup>12</sup> Ari saw tihastitayan Juda mataw asor ulilemim osad an adugan wazim bilaqiy, I didaq hi neqad yuw hi uluwuq haqiy. I nazaq gihol ucinad le i Pol wol emuq haqiy. Hel diqtaqmo haqiy. Pol kayeqmo ossa i didaq a hi neqad yuw a hi uluwam haqiy. Ari i gigo araq gamuk ka itiyonid Mat Iyah in wol eman haqiy. <sup>13</sup> Mataw ulilemim an adugan waziya na in kabemmo diq ginulingan 40 uriyamiya. <sup>14</sup> In an adugan tuwazim teq in tamaz mataw aseseqta giyogniz Juda gigo mataw marorta nenaq gigo hib lehim bilaqiy, I Mat Iyah ameb an adugan atoran diqmo wazim bilaw, Hel diqtaqmo i Pol tuwol emam hawta haqiy.

I Pol a hi wol emad i nagaq araq diq giteb emeq a hi neqam haw haqiy. I gamuk ka itiyonid Mat Iyah i ginol eman haw haqiy. <sup>15</sup> Nazaq iyan ne teq Juda gigo kaunsel ayahta na amatawun bunno nenaq gamuk emid bab mat danmebta na amen lehan haqiy. Lehid ne buloniy, I Pol ago gamuk alulin tuhuritan haqad ne buloniy haqiy. Ne nazaq bulonid in Pol emid ne gigo hib hitiqan haqiy. I gihol asawan tuwastitay haqiy. Pol bo ne gigo hib a hi gwahtiqaqmo i tuwol emam haqiy.

<sup>16</sup> Ari mataw na nazaq danib ulilemeq tureq Pol bolsa in wol emgo an adugan waziya na ago Pol awaw matta araq tuhurit. Huritim in le bab mataw gigo bitab gwahtiqaq Pol tubulon. <sup>17</sup> Bulonan Pol in bab mataw gigo mat ayahta araq bulonan bolan in bulon, Amun minminta ka waqeq inaq ne gigo mat danmebta na ago hib hidmo a leh ham. In gamuk ulilemabta araq bulondaqta a bol ham. <sup>18</sup> Haqan mat na amun waqim ad ago danmebta ago hib tilah. A lehim in bulon, Mat irquran osaqa anan Pol haqay na in ya ibilenan ya amun minminta ka waqim ningo hib a bol ham. In ago gamuk ulilemabta araq nibilengoyan ham.

<sup>19</sup> An bab mat danmebta na amun aben wazim ad adek ban a lehim in gimo giger osad teq in tisusumun ug, Ni ya naga gamukin diq ibilennan bol? ham. <sup>20</sup> Haqan amun minminta na bilam, Juda mataw an amugan tuwazim in ni susumun nigid ni babeq Pol emid Juda gigo kaunsel ayahta na gigo hib gehitiqdaq haqad in bilaqiy ham. In katiyeq nibilen daqay, I Pol ago gamuk alulin hurit kemnan haq daqay ham. <sup>21</sup> Teq ni in gigo gamuk na hi muzin ham. Na ezaqgo in gigo hib mataw asor gidauhan 40 nazaq bilaqiy, Hel diqtaqmo i yuw didaq ucinuq luweq i Pol tuwol emam haqad in bilaqiy ham. I gigo araq gamuk ka itiyonid Mat Iyah in wol eman haqad in bilaqiy ham. In gihol asawan tuwastitayim ni eqe nemdaq naqmo in amen emad osay ham. <sup>22</sup> Amun na ago gamuk tihiqiyan bab mat danmebta na eman lehsa adek wazim bulon, Gamuk kawa ni ya ibilanta ka ni mat araq hikidik bulon ham.

*Bab mat danmebta na Pol eman gamvan amebta Feliks ago hib lah*

<sup>23</sup> Ari bab mat danmebta na in mataw bab emayta gigo aseseqta giger gililewunan bolan in gibilan, Ne leheq bab mataw 200 nazaq giwaqad ne mataw hos-ib luwayta 70 nazaq giwaqiymmo ham. Teq mataw em wazayta 200 nazaq ne giwaq toniymo ham. Giwaqeq ne uliq Sisariya-ib leho gihol wastitayeq osiy ham. Oseq teq taromab 9 kilok nazaq ne tileh daqay ham. <sup>24</sup> Teq ne

Pol ayon hos araç in amalib oseç lehdaqta na ne waçeç inaq lehiy ham. Ad ne mat na anononmo wamuzeç gavman amebta Feliks ago hib a lehiy ham. <sup>25</sup> Haçad in mataw na gibilenim hulosa in sansandek araç kazaç mar ton.

<sup>26</sup> Yaçmo Klodiyus Lisiyas ham. Ya gamuk ka mar tonan gavman amebta mat ayah Feliks ningo hib lehaç ham. Zeç dimun ham. <sup>27</sup> Juda mataw mat ka wazim tuwol emnan tonsa yaçço mataw nenaç lehim gibenab waw ham. Mat ka abin Rom-ub usaçta na ago ya huritta iyim ya ulumsih ham.

<sup>28</sup> Teç ya gamuk alulin in ugiyta na hurit kemnan haçad ya waçim ad Juda gigo kaunsel ayahta na gigo hib hitiy ham. <sup>29</sup> Hitiçim ya in gigo gamuk huritim teç inad tiçem ham. In gimo gigo maror agamukan naçmo amalib in mat ka nan ugayta ham. Mat ka daç araç meçinta i wol emamta o i irçuramta na haiç ham.

<sup>30</sup> Teç Juda mataw asor ulilemim an adugan wazim in mat ka wol emgo bilaçiyta na ago ya huritim hidmo ya mat ka ningo hib eman lehaç ham. Ad ya mataw nan ugayta na tigibilen ham. Mat ka ezaç tonan in nan ugayta na in gimo leheç ni ninognib bilaçsa ni huritdaç haçad ya gibilen ham. Nawaçmo ham.

<sup>31</sup> An teç mataw bab emayta na in gigo danmebta na açeç muzinin taromab in Pol waçim ad uliç Antipatris-ib tilehiy.

<sup>32</sup> A lehim saw tihastitayan teç bab mataw gisenab boliyta na bunmo muleçim in gigo bitab ta lehiy. Lehsa mataw hos-ib luwayta naçmo in Pol waçim ad uliç Sisariya-ib tilehiy. <sup>33</sup> In le Sisariya-ib tugwahtiqim in sansandek na gavman gigo amebta na ugaç teç in Pol a bolim anognib eman titur.

<sup>34</sup> Tursa gavman amebta na sansandekib gamuk bunmo ahol tuwaç bugim teç in Pol tisusumun ug, Ni saw edobta? ham. An Pol bilam, Ya saw Silisiya-ibta ham. <sup>35</sup> Haçan gavman amebta na bilam, Ari ham mataw ni nimalib nan emayta na in bo gwahtiqid nab teç ya ningo hazizir tuhuritdaç ham. Haçad in bilam, Gavman gigo bit Herot wazan eramta nab ne Pol emid osan ham.

## 24

*Juda gigo mataw aseseçta na Pol hazizirib nan ugiy*

<sup>1</sup> Abeb kam abaynagin le tihiqiyan tamaz mat danmebta Ananayas in Juda gigo mataw marorta asor teç Juda mat araç Rom gigo maror hurit kamta anan Tertulus

haçayta na giwaçim nenaç uliç Sisariya-ib tihitiçiy. Hitiçim in gamuk Pol hazizirib uggo boliyta na gavman amebta

na bulonsa in tuhurit. <sup>2</sup> Huritim in Pol lilewunan bolan Tertulus eraçim Pol amalib nan tiçemyaç. Ad in bilam, Mat ayah Feliks ham, ni i Juda on mataw gilum-sihsa i wastitayimmo afaçan haiçmo osauçta ham. An wol nagaç na haiç ham. Ningo ninad dimunta na amalib ni nagaç kwaziçmo i gimeçin tonyaçta na wastitayan i gigo os tidimniy ham. <sup>3</sup> Og saw bunmo ningo kabiy daç bunmo dimun diç iysa i ahol waçad i gigem dimdikan iysa esey diç nigauç ham.

<sup>4</sup> Luweç ya gamuk sisaçmo hureçsa ni nituw tihiqiydaç ham. Nazaç iyan ya tisusumun nigaiç ham. Ni nigem dimunta igad i gigo gamuk asimçanta ka i bilaçsa ni hurit ham. <sup>5</sup> I mat ka ahol waçan in daç meçinta kabemmo emaçta ham. Uliç bunmo Juda osayta nab in an mug teç an wol ayahmo eman Juda gilikmanib gwahtiaçta ham. Teç in mataw lotu katiyta emayta ginan Nazarin\* haçayta na gigo mat amebta araç ham. <sup>6-8</sup> Teç naçmo amomo a haiç ham. Mat ka Tempel ago gunun araç ayahta bay tuwaçnan diç ton ham. In nazaç emnan tonsa i tuwaz ham. An muran ninmo nagaç ka bunmo ago ni mat ka susumun ugeç teç i hazizirib emauçta ka alulin ni inmo açeçab tuhuritdaç ham. <sup>9</sup> Haçan Juda mataw nab osiyta na in Tertulus ulumsihnan haçad era Pol amalib nan emad bilaç yaçay, Gamuk Tertulus bilamta na bunmo in heltaçmo haç yaçay.

### *Pol in Feliks gamuk bulon*

<sup>10</sup> Ari gavman amebta na Pol ahol waçad afaçin ugan in eraçim Juda mataw na gigo gamuk amenin emim tibilam, Mat ayah ham ulig kabemmo ni Juda on mataw gigo megistret iyim tuços ham. Nazaç iyan ya inad dimniysa mataw ko gigo gamuk amenin emad ihol adanin tuçwaynan ham. <sup>11-12</sup> İlatow kam 12 nagaç ya Jerusalem-ub lotu emnan tileh ham. Lehim Tempel-ib teç bit humab wolayta nagab teç uliç aduganib ya mat araç inaq an mugaç in a hikidik ibiyiy ham. Ad ya on mataw gigem wazan eraçsa in bab emiyta na haiçmo ham. Ni mataw ko susumun negid teç gamuk kawa ya bilaçaiçta ka in gimo teç tinibilen daçay ham. <sup>13</sup> Gamuk nawa in amalib ya iwaçim hazizirib iqemayta na in alulin haiç ham. Mataw ko gamuk araç alulin helta ni ninad em hasdaçta na emid a hi gwahtiqdaç ham.

\* **24:5:** Gamuk Nazarin ka alulin in kazaç. On mataw na in Yesus muzad inaq luw yaçayta iyan in Yesus ago uliç Nasaret abinib ginan nazaç biy yaçayta.

<sup>14</sup> Ari in gamuk helta amulikmo ya inan bilaqiyta na in kazaq ham. Helmo ya dante muturta in anan lotu katiyta haqayta na ya muzaiqta ham. Ya dante na muzad ya i gisesan gigo God ayon kabiy emaiqta ham. Ad God ago maror Moses bilamta na teq God ago nantut gamuk mar toniyta na agamakan bunmo ya anan helmo haqaiqta ham. <sup>15</sup> Ad God in mataw dimdimunta teq meqmeqinta nenaqmo giwazid hodhodab eraq daqayta na ya anan helmo diq haqad amen emaiqta ham. Mataw nan yagayta ko in nazaqmo gamuk nawa ya bilayta na bunmo anan helmo haqad in waz naqmo hiqiyaytamo ham. <sup>16</sup> Nazaq iyan God ameb teq on mataw gimeb ya igem dimunmo iysa iholib daq araq ananin waqdaiqta na ya a hi loyinaiq ham.

<sup>17</sup> Ari ya uliq-uliqgo luwsa ulig asor le tihiqiy ham. Hiqiyian abeb ya muleqim Jerusalem-ub ta leh ham. Yaqgo dauh asor ginaghan haiqta nagan gimen mani a bolta na ya negad teq ya God ayon tamaz emnan haqad ya lehta ham. <sup>18</sup> Ya nazaq emad luwim teq ya Tempel-ib lehnan haqad God ameb ya ihol abusirinan hiqiygo akabiyian tiqem ham. Emim ya ihol God ameb tidimniyan teq ya Tempel agelin aduganib gwahtiqim luwsa in ya ibiyiy ham. Kam nab ya mataw biyahta nenaq a hi luwad ya saw garak araq a hi em ham. <sup>19</sup> Teq Juda mataw asor saw Esiya-ibta in osiy ham. Mataw na gigo gamukag ussun in boleq kab ni ninognibmo nan yag nagiy ham. <sup>20</sup> Haiq iyan ari mataw kowa turayta ko in gimo teq bilaqiy ham. Ya Juda gigo kaunsel ayahta na gimeb tursa in naga daqin meqinta ya iholib ahol waqiyta na in gimo bilaqsa ni hurit ham. <sup>21</sup> Nabag ya in gigo kaunsel gimeb turad lileyim bilay, Mataw moqeq teq in hodhodab tiqeraq daqay hayta naqmo ago muran in hazizir kab ya imalib nan tiqemay-ya ham.

<sup>22</sup> Ari Feliks in Kraiss ago dante muturta na ago tuhurit kamta. Nazaq iyan in Juda mataw na gibilan, Ne ya imen asitmo ta emiysa ham. Abeb bab mat danmebta Lisiyas hitiqid teq ya nenaq afaqan ka tuwastitayam ham. <sup>23</sup> Ad in mataw bab emayta gigo mat ayahta araq nab turta na bulon, Ni Pol a leheq bit giqirquran osaytab emid osan ham. Teq ni hi irqur ham. In samanmo ossa ayogniz nagah a bo ugsa ni hi gimuz ham.

*Feliks Pol hulosan in ulig giger irquran os*

<sup>24</sup> Ari kam asor le tihiqiyian Feliks awe Drusila inaq tuboliy. Aw na in Juda awta araq. Teq in giger bolim Feliks in Pol lilewunan bolan in ago gamuk asor huritad osiy. Ossa Pol in Kraiss Yesus anan helmo

haq ago adan tigibilenyaq. <sup>25</sup> Ad in God ameb daq titnonta em ago adan teq gihol wamuz ago adan teq abeb God on mataw bunmo hazizirib giqemdaqta na ago agamakan gibilensa in tuhuritiymo. Huritad Feliks tirabyaq. Rabad in bilam, Dimunmo tiqiy ham. Ni leh ham. Abeb ya kam inaq iyeq teq ya a ta nililewundaq ham. <sup>26</sup> Teq Feliks anad araq ustamo. In anad emyaq, Pol mani araq yagid teq ya hulosis lehdaq haqyaq. Nazaq iyan sirisirimo in Pol bulonid bolid in inaq gamuk emyaqta.

<sup>27</sup> Teq haiq. Ulig giger le tihiqiyian Porsiyus Festus bolim Feliks ago ban tuwam. Waqan Feliks uliq na hulosis lehad in Juda mataw ginad dimniyan haqad Pol hulosan bit giqirquran osaytab nab tuqos tut.

## 25

*Pol bilam, Sisa-mo yaqgo hazizir huritdaq ham*

<sup>1</sup> Ari Festus bolim saw Judiya-ib Rom gigo gavman amebta tiqiyim in kam ezeqman nazaq osim teq in uliq Sisariya hulosis Jerusalem-ub tugwalah. <sup>2-3</sup> Gwalehan mataw tamaz emayta gigo aseseqta na teq Juda gigo mataw marorta asor bolim Pol agilehunan Festus tubulon yaqay. Bulonad in Festus kat ugim abe yahad bilaq yaqay, Ni i gilumsiheq mat na ayon nantut em lehid in kab Jerusalem-ub boleq hazizirib turan haq yaqay. Na in danib ulilemeq oseq Pol tuwol emnan haqad in Festus nazaq buloniya. <sup>4</sup> In nazaq haqan Festus amenin emim bilam, Pol Sisariya-ib irquran osaq ham. Teq ya Sisariya-ib lehdaqta akamun sinsin tiqiyaq ham. <sup>5</sup> Nazaq iyan ne gigo mataw aseseqta na bolid ya nenaq tuwoleham ham. Woleheq mat na aholib daq meqinta usid teq in hazizirib tiqem daqay ham.

<sup>6</sup> Haqad Festus in nenaq kam 8 o 10 nazaq nab a ta osim teq in Sisariya-ib tuwolah. Wolehim kam ta araq nab tarommo in ago ban in mataw gigo gamuk huritad ulum kemaqta nab in tuqos wom. Os woqim osad in Pol waq a bolgo bilam. <sup>7</sup> An Pol tubolan ari Juda mataw Jerusalem hulosis gewoqiyta na in Pol agerab diq turad gamuk afaqan meqin diqta amalib tiqem yaqay. Ta teq in gigo gamuk na alulin haiq iyyaq. <sup>8</sup> Sa Pol inmo ahol adanin qwayim tibilam, Ya daq araq meqinta a hi em ham. Ya Juda gigo maror aduganib gunun araq a hi itiyonta teq ya Tempel a hi meqin tonmo ham. Ad ya Sisa aqez a hi othasmo ham.

<sup>9</sup> Haqan Festus in Juda mataw aseseqta na gilumsihid in ginad dimniy daqay haqad in Pol tubulon, Ni Jerusalem-ub gwalehid ya ningo hazizir huritgo ni ninad bilaqay

e? ham. <sup>10</sup> Haqan Pol bilam, Ya ningo hazizir em abanab kab turad ya Sisa-mo ago maror ahaqenib turaiqta ham. Na in dimunmo ham. Gavman teq yaqgo hazizir huritad ulum kemdaqta ham. Ya Juda gigo hib daq araq meqinta a hi em ham. Na ni tuhurit kam ham. <sup>11</sup> Ari gavman anadib ya daq araq meqinta moqdaiqta emsun na dimunmo ham. Ya tumoqdaiq ham. Teq Juda mataw ko gigo gamuk ya imalib emayta ko in alulin haiqgam iyan ni ya iwaqeq in gibenab a hikidik iqemdaq ham. Ya Sisa-mo ago hib lehnan ham. Sisa-mo yaqgo hazizir ka huritdaq haqaiq ham. <sup>12</sup> Pol nazaq haqan Festus in ago mataw ginad awaz meqinta ugayta na nenaq an bulonim an amugan tuwazim teq in Pol bulon, Ari ham ni Sisa ko gigo hib lehnan bilaqan ya niqemid ni Sisa-mo ago hib tilehdaq ham.

*King Agripa Pol ago gamuk asor huritnan bilam*

<sup>13</sup> Ari kam asor le tihiqiyani king Agripa ahiy Bernaisi inaq in Festus wazineq aben waznan haqad Sisariya-ib tuboliy. <sup>14</sup> Bolim in giger Sisariya-ib kam kabemmo tuqosiy. Ossa kam araqab Festus in king Agripa Pol anan tubulon. Bulonim in bilam, Kwaziqmo Feliks mat araq wazim bit giqirquran osayta kab eman osta ham. Ossa Feliks tilehad in mat na hulosan in nab tuqos tutaq ham. <sup>15</sup> Sa ya Jerusalem-ub ossa Juda gigo mataw marorta na teq mataw tamaz emayta gigo aseseqta na nenaq in yaqgo hib bolim mat na awagamun ibileniyta ham. Ad ya mat na ayon bilaqid in moqan haqad in susumun yagiy ham. <sup>16</sup> Teq ya in gigo gamuk amenin emim kazaq gibilen ham. I Rom gigo daq nazaq a hi usaqta hay ham. I mat araq afaqan samanta a hi ugauqta hay ham. Mat nan ugayta na in ago bab nenaq hazizirib turad an anobun ahol waqad teq mat na in ago bab gigo gamuk amenin emayta hay ham. Eman teq i in ago daq ulum kemim amenin ugauqta hay ham. Nazaq iyan ya ne ginad muzad mat na ayon bilaqid in a hi wol em daqay hay ham.

<sup>17</sup> Ya nazaq gibilenan Juda mataw na kabmo tigewoqiy ham. Gewoqim humab tuwolim ossa ya agudan a hi em ham. Usim era tarommo ya le hazizir emayta abanab os woqim osad teq ya mat na waq a bolgo bilay ham. <sup>18</sup> An mat na bolan in ababun eraqim turad nan kabemmo amalib emiy ham. Ya inad emyaiq, Mat na daq araq meqin diq amta daqag hacgyaiq ham. Teq haiq ham. Juda mataw na in mat na aholib daq araq meqinta anan a hi bilaqiy ham. <sup>19</sup> Naqmo in gigo lotu ago in bilaqiy teq in mat araq tumomta anan Yesus haqayta

na anan an mug yaqay ham. Pol mat na anan bilaqag. In kayeqmo osaq haqaqta ham. <sup>20</sup> Sa ya in gigo gamuk wastitaygo inadnad eman haiq ya Pol susumun ugim bilay, Ni Jerusalem-ub gwaleheq hazizirib turnan ninad bilaqag e? hay ham. <sup>21</sup> An Pol bilam, Ya bit giqirquran osayta kab osad ya Sisa-mo amen emdaiq haqad in bilam ham. Sisa teq ya iholib afaqan ka tuwastitaydaq haqad in bilam ham. Nazaq iyan ya bilay, In bit giqirquran osayta nab ossa le ya emid Sisa ago hib lehgo akaman gwahtiqaq hay ham. <sup>22</sup> An Agripa in Festus bulon, Ya inaqmo mat na ago gamuk asor hurit nagta ham. Haqan Festus bilam, Babeq teq ni tuhuritdaq ham.

<sup>23</sup> Nazaq iyan in usim eraqim tarommo Agripa ahiy Bernaisi inaq in gigo balaw dimdimunna wazim teq in bo bit adugan hazizir emayta nab tugwahtiqaq. Teq bab mataw gigo gifaqin danmebta na asor teq uliq na ago mataw marorta na inaqmo in humab nab tuboliymo. Bolan Festus bilaqan in Pol waqim a boliy. <sup>24</sup> A bolan Festus in king Agripa bulon, King Agripa ham teq ne mataw aseseqta bunmo ham ne mat ka ahol waqiy ham. Uliq Jerusalem-ub teq uliq kabmo Juda mataw bunmo in yaqgo hib bolim mat ka anan ibilenim bilaqiy, Ni wol emid moqan haqiy ham. In kayeqmo ta hi osan haqiy ham. <sup>25</sup> Teq in moqdaqta ago daq araq alulin meqinta ya ahol a hi way ham. An inmo Sisa ago hib lehnan bilaqan ya inad emaiq, Ya Sisa ago hib emid tilehdaq haqaiq ham. <sup>26</sup> Teq nagah amulikmo ago hib ya ulum hamaiq ham. Ya naga gamukin mar toneq mat ka inaq emid Ayahta Sisa ago hib lehdaqta na ya inad a hi em hasaiq ham. Nazaq iyan King Agripa ham ya mat ka ninmo ningo hib teq ne bunmo gigo hib a bol ham. I ingo gamuk ulum muzeq alulib emeq teq ya naga gamukin mar tondaiqta na inad em hasdaiq haqad ham. <sup>27</sup> Na ezaqgo ham ya mat irquriyta araq em lehsa ago naga daqin in eman hazizirib emiyta na agamukan araq ya mar toneq emid inaq a hi lehdaqta na ya loyinan in dimun a haiq ham.

## 26

*Pol king Agripa anognib turad gamuk bilam*

<sup>1</sup> An Agripa in Pol bulon, Ari ham. I ban tinigauq ham. Ni ningo nan bilaq ham. Haqan Pol aben wazan eraqan in ago bab gigo gamuk amenin emim bilam, <sup>2</sup> King Agripa ham muran yaqgo dante dimun diqta inaq tiqiyim ya Juda mataw gamuk yagiyta na amenin ni ninognib bilaqnan inad tidimniyaq ham. <sup>3</sup> Na ezaqgo i Juda gigo maror teq i gigo gunun mo amo i

anan an mugauqta nagan ni tuhurit kamta ham. Nazaq iyan ya tisuusmun nigaiq ham. Ni yaqgo gamuk huritad ni hidmo nituw hi hiqiy an haqaiq ham.

<sup>4</sup> Kwaziqmo yaqmo igo uliqab teq Jerusalem-ub ya amun luw osad ayah tiqiy bugta ham. Kam nab ya ezaq luw osyaiqta na Juda mataw bunmo in yaqgo tuhurit kemiya ham. <sup>5</sup> Teq ya kam sisaqmo Farisi gigo daq awaz meqin diqta nagan muz bugta na ago in tuhuritiymo ham. In ya iwagamun kawa ya ni nibilenaqta ka in ni nibilennan haqeq in ya in an kazaq diq ni tiniblen nagiyta ham.

<sup>6</sup> Teq muran kawa in ya hazirib tiqiqemay ham. Kwaziqmo God i gisesan gilumsiq ta giwaqnan haqad hel diqmo gibilanta ham. An ya God aqez na anan helmo haqad amen emaiqta naqmo ago in ya hazirib iqemay ham. <sup>7</sup> Ta teq Juda on mataw bun diqmo God aqez nawa na anan helmo haqad in amen emad osaytamo ham. Nazaq iyan zeqab taromab inaqmo in ginad awaz meqin amalib God ayon kabiy emayta ham. King Agripa ham God teq i gilumsiq ta giwaqdaqta na ya anan helmo haqad amen emaiqta naqmo ago Juda mataw ko ya igilehunan bilaqad imalib nan tiqemay ham. <sup>8</sup> Nagaqgo ne bunmo ginad emay, God mataw tumoqiyta giwazid hodhodab eraq daqayta na in gamuk helta a haiq haqay? ham.

<sup>9</sup> Ari ya Farisi gigo daq muz bugad ya Yesus Nasaret-ibta na abin huritim inad kazaq em ham. Ya mat na abin bayid woq hasdaq hay ham. Haqad ya in ago on mataw na geg negad daq kabemmo giholib emyaiqta ham. <sup>10</sup> Ad ya uliq Jerusalem-ub nazaqmo emad ya mataw tamaz emayta gigo aseseqta na gigo hib zaway tuwaqim teq ya God ago on mataw tawonta na kuluwmo giwazeq bit giqirquran osaytab tiqiqemayiq ham. Sa mataw God ago on mataw na ginol emnan bilaqsa ya asor bilaqyaiqtamo ham. <sup>11</sup> Ya mataw na santitiy negnan haqad ime kabemmo bit humab wolayta bunmo luwad ginagunyaiqta ham. Ginagunim gibiyad ya in gibe yahsa in gigo Iyahta na abin bilawun yaqayta ham. Ad ya in ginan igem ayahmo meqniysa ya gimuzad gimeqin tonad luwad uliq pesantab inaqmo tilehyaiqta ham.

*Pol Kraiss anan helmo hamta awagamun*

<sup>12</sup> Ya nazaq emad luwsa kam araqab mataw tamaz emayta gigo aseseqta na in zaway yagan ya in gibinib uliq Damaskus-ib kabiy in yagiya na emnan tileh ham. <sup>13</sup> Lehsa zeq gabolim liqabmo tiqiysa ya danib lehad luw ham. King Agripa ham hel diqmo ya nibilenaq ham. Ya lehad luwsamo Heven-ib saw anuwan araq

gehitiqim ya iyogniz nenaq gilul igim atoranmo oysa ya ahol way ham. Anuwan na in zeq uriyamim oy naqmo hiqiyayq ham. <sup>14</sup> Oysa i bunmo ogib woqim tuqus ham. Sa mat araq aqez Hibru nanib kazaq ibilensa ya hurit ham. Sol, Sol ham nagaqgo ni ya imeqin tonaq? haqad in bilam ham. Ni ay ame inaqta na nisenab bay ronad ni ninmo nihol santitiy ugaqta haqad in bilam ham. <sup>15</sup> An ya bilay, Iyahta hay ni nog? hay ham. An Iyahta bilam, Ya Yesus haqad in bilam ham. Mat ni meqin tonaqta na yaqmo haqad in bilam ham. <sup>16</sup> Teq ni eraqeq tur haqad in bilam ham. Ya ni nitowun eman ni yaqgo kabibiy mat tiqiy haqad in bilam ham. Nazaq iyan nagah ni yaqgo hib ahol tuwamta ka teq nagah ya abeb teq niqisihundaiqta na agamukan ni tibilaqdaq haqad in bilam ham. Ya niqemid ni kabiy nazaq emdaq haqad ya ni nigerab kawa tugwahtiyy haqad in bilam ham. <sup>17</sup> Teq ya nilumsihsa Juda mataw a hi nimeqin ton daqay ham. Ad nazaqmo ya niqemid ni on mataw en ta asor Juda a haiqta nagan gigo hib lehid ya nilumsihsa in a hi nimeqin ton daqaymo haqad in bilam ham. <sup>18</sup> Ni mataw na gigo hib leheq gime emid tihastitaydaq haqad in bilam ham. Gime hastitaysa in romriq gileh ugad saw anuwanib gwahtiqeq tuqos daqay haqad in bilam ham. Ad in Satan ago maror huload in God ago maror aduganib bo tugwahtiyy daqay haqad in bilam ham. Sa ya in gigo daq meqinta tigiwalemdaiqmo haqad in bilam ham. Giwalemad ya in giqemid in yaqgo on mataw ya in an helmo haqan ya iholyon tigiwayta na gimuganib tugwahtiyy daqaymo haqad in bilam ham.

*Pol in God ago kabiy amta na awagamun king Agripa bulon*

<sup>19</sup> Nazaq iyan King Agripa ham ya nagah sen qwayim ahol waqayta nazaq nogta ya ahol tuwaqim ya mat Heven-ib osim ibilanta na aqez a hi othas ham. <sup>20</sup> Haiq ham. Iturimmo ya uliq Damaskus-ib lehim mataw nabta na gamuk gibilen ham. Gibilenim abeb teq ya on mataw Jerusalem-ubta na gibilenmo ham. Na abeb ya saw Judiya ago uliq saw bunmo on mataw gibilenad teq ya lehim on mataw en ta asor Juda a haiqta nagan tigiwalemdaiqmo ham. Gibilenad ya gamuk kazaq bilaqyaiq ham. Ne ginad buliyeq gigo daq meqinta gileh ugad God ago hib boliy haqyaiq ham. Bolad ne gigem tubuliyiyta nazaqmo ne gigo daq buliyid dimniyanmo haqyaiq ham. <sup>21</sup> Ya kabiy nazaq emyaiqta naqmo ago Juda mataw Tempel-ib ya iwazim inol emnan toniy ham. <sup>22</sup> Teq haiq ham. Kwaziq iyim bo



muran kawa God ilumsihsa ya tuqos tutaig ham. Osad ya mataw gibin inaqtā teq mataw gibin haiqta inaqmo gamuk amulikmo gibilenaiqta ham. Kwaziqmo God ago nantut teq Moses in nagah abeb teq gwahtiqdaqta agamukan bilaqiyta naqmo amomo ya gibilenad ya gamuk araq diq a hi negaiqta ham. <sup>23</sup> Nantut nagan kazaq bilaqiy ham. Kraiṣ boleq santitiy tisordaq haqiy ham. Santitiy soreq moqeq teq in mat ameb diqta hodhodab ta eraqdaq haqiy ham. Eraqeq in God ago gamuk dimunta Juda an mataw teq on mataw en ta asor Juda a haiqta nagan inaqmo gibilensa gamuk na in ginadib bilaqne saw anuwan oy nog iysa in huriteq ginad em has daqay haqad in bilaqiy ham.

*Pol in king Agripa bulon, Ni Kraiṣ anan helmo haq ham*

<sup>24</sup> Pol nazaq ahol adanin qwayim bilaqsa Festus huritad osimmo in dedibmo bilam, Pol ham ni ninad agadan tiqiy ham. Ni suleq ayahmo amta naqmo niqeman ni nimaqbel agadan tiqiyahq ham. <sup>25</sup> An Pol bilam, Mat ayah Festus ham. Ya agadan a hi iyaig ham. Haiq ham. Ya inad em hasad gamuk heltaqmo bilaqaiq ham. <sup>26</sup> King Agripa nawa huritad osaqta na in nagah kawa ya anan bilaqaiqta ka ago in tuhurit bugta ham. Nazaq iyan ya bilaqnan a hi rabaiq ham. Ya inad emaiq ham, King Agripa in nagah ka bunmo ahol tuwamta haqaiq ham. Na ezagqo ham nagah ka ulilemim a hi gwahtimta ham. <sup>27</sup> King Agripa ham ni God ago nantut gigo gamuk anan helmo haqaq e? ham. Ya inad emaiq, Ni helmo haqaqta haqaiq ham.

<sup>28</sup> Haqan Agripa in Pol bulon, Ni ezagq? ham. Kam asimqan diq kabmo ni ya iqemid ya Kraiṣ ago mat araq gwahtiqdaiq e? ham. <sup>29</sup> Haqan Pol bilam, Kam siqim o kam sisaq na ago ya a hi bilaqdaiq ham. Nagah amulikmo ago ya God bulonaiqta na in kazaq ham. Ni teq on mataw muran ya iqez huritad osayta na nenaq ne bunmo ya nogmo iyeq osiy haqaiq ham. Teq in senib ya iqirquriyta kazaq in ne hi giqirquriy haqaiq ham.

<sup>30</sup> Pol nazaq bilaqan King Agripa tiqeram. Eraqsa gavman amebta Festus teq Bernaisi teq mataw king inaq osiyta na bunmo eraqiyimo. <sup>31</sup> Eraqim le asanib tugwahtiqim teq in gimo an bulonim bilaqiy, Mat ko daq araq meqinta irqur daqayta o wol emid moqdaqta a hi amta haq yaqay. <sup>32</sup> Haqsa Agripa in Festus bulon, Mat ko Sisa ago hib lehnā a hi bilaqid i hulosisd samanmo leh nagta ham.

## **Pol uliq Rom-ub lah**

## **27**

*Mataw in Pol Rom-ub lehgo haqad muyib emiy*

<sup>1</sup> Ari gavman aseseqta na in i qiqemid i muy araq waqeq uliq Rom kantri Italiy-ibtab lehgo tibilaqiy. Bilaqim teq in Pol teq mataw giqirquriyta ta asor giwaqim mataw bab emayta gidauhan 100 nazaq gigo ayahta anan Juliyus haqayta na abenab tigiqemiy. Juliyus ago bab mataw nenaq gigo dauh anan Sebastes\* haqayta. <sup>2</sup> Ari i uliq Adramitium gigo muy araq saw Esiya ago lan ez ban uliq asorib lehnā haqad usta nab i tugwal. Gwalim i saw na hulosis muyib tileh. Lehad Aristarkus uliq Tesalonaika saw Masedoniya-ibta na i inaq lehmo. <sup>3</sup> Lehad luwim tarommo i uliq Saidon-ib tugwahtiw. Gwahtiqim Juliyus agem dimunta Pol ugad hulosis lehim ayogniz gibiyad gigo hib didaq nagah asor tuwam. <sup>4</sup> An abeb i muyib ta gwalim uliq Saidon hulosis tileh. Lehsa tim i gisor hasyaq. Nazaq iyan i nud Saiprus agilehun ban lan agerab lehyaug. <sup>5</sup> Lehad i saw giger Silisiya teq Pamfiliya gigo saw ban kamis urotim lehad luwim i uliq Maira saw Lisiya-ibtab tuwow.

<sup>6</sup> Woqan uliq nab bab mataw gigo ayahta na in uliq Aleksandriya gigo muy araq Italiy-ib lehnā tonsa ahol tuwam. Ahol waqad in i giwaqim giqad muy nab tilah. <sup>7</sup> Lehim gwalim lehsa muy kiskismo kam asor kamismeb sibat tuqusyaq. Na ezagqo tim eraqad i ginobun ban bolyaqta na ago iyan. Sa muy ago kabibiy mataw in muyib giholtuw bulad gihol bibiyowunsa i le uliq Nidus agerab tugwahtiw. Gwahtiqan nab tim i tigiwasih. Giwasihan i nazaq ta lehgo hiqiyim i nud Krit agilehun ban tileh, uliq Salmone ager ban. <sup>8</sup> I gihol bibiyowunim lehim Krit ago lan ez muzim lehad luwim uliq anan Lan Ez Dimunta haqayta nab i tugwahtiw. Uliq na in uliq Lasea agerab usaqta.

<sup>9</sup> Ari i uliq nab bolad luwsa kam kabemmo tihiqiy. Teq Juda gigo lotu akaman ayahta in didaq udayta na akamun i teko tuhulosmo. Nazaq iyan kamisib tim akamun gwahtiqsa kamis meqin diq iysa iyan Pol eraqim tibilam, <sup>10</sup> Mataw ham muran i leheq teq i afaqan araq ayahta anobun tuqwayam ham. Ya inad emaiq ham nagah kagan kabemmo timeqniy hasdaq haqaiq ham. I gigo es teq muy ka inaqmo timeqniydaq ham. Meqniysa muy ka amatawun kabemmo tumoq daqaymo ham. <sup>11</sup> Haqan teq haiq. Bab mataw gigo ayahta na in Pol ago nan a hi huritad in mat muy wamuzaqta na ayow muy anamren

\* 27:1: Nan Sebastes ka alulin in 'Sisa-mo ago bab matawta' haqayta.

inaq giqez tumuz. <sup>12</sup> Teq muy tim akamnib lan ez nab usdaqta in saw dimun a haiqmo. Nazaq iyan muyib mataw kabemmo bilaqiy, I uliq ka huloseq uliq Finiks-ib leh waquq haqiy. I leheq uliq nab ossa teq tim akamun hiqiydaq haqiy. Na ezaqgo uliq Finiks na in nud Krit ago lan ezab kamis abeqil amta nud abe ban zeq wolehaqta ban usaqta na ago iyan in nazaq bilaqiy.

*Tim eraqad kamis eman ayahmo eram*

<sup>13</sup> Abeb tim araQ Ray nogta na midemqanmo eraqsa in ahol waqad ginad emiy, I dimunmo tisibam haqiy. Haqad in anka hureqan gwalan in Krit ago kamis adek diq muzim tilehiy. <sup>14</sup> Teq haiq. In asitmo leh nog iyanmo tim atoranta tiqeram. Tim araQ Taleo nogta naqmo in nud Krit ban eraqim bolyaq. <sup>15</sup> Bolad in muy othassa muy leh yo hiqiyyaq. Nazaq iyan i muy ahol buliyan tim i giqothassa i tim anad muzim leheq tilehyauq. <sup>16</sup> Lehad i nud araQ amikta anan Kauda haqayta agilehun ban lehyauq. Lehsa tim asit tihiqiy nog iysa i giholtuw bulim muy ago dingi hureqan muy aqerab bol. <sup>17</sup> Bolan in dingi hureqan muyib tugwalan teq in warig awaz meqinta waqim muy ahulib hurorim am waz naqmo hiqiyiy. In tirab yaqay. Luweq in leheq kantri Afrika gigo kamisib sarte anan Sirtis haqayta nab ror daqay haqad. Nazaq iyan in muy abe ban anka araQ hunegan woqan in kamis amalib tim giqothassa tileh yaqay. <sup>18</sup> Lehsa tim ayow kamis inaq atoranno i gilum hishassa tarom tiqiy. Tarom iyim saw tihastitayan tim a hi hiqiysa iyan mataw es nagah muyib giqusta na kamismeb tuhuneg yaqay. <sup>19</sup> Ad kam ezeqmanta nab in gimo gibenab muy ago rigen asor hunegan kamismeb tuwommo. <sup>20</sup> Kam kabemmo i zeq teq ulig ahol a hi waqyauq. Sa tim ayahta na kam bunmo i giqothassa i ginamur asit a hi emyauq. Haiqgam. Kam bunmo tim i gilum hishasyaq. Nazaq iysa iyan kiskismo i ginad araQ gimaqbelab tugwahtiqyauq. Kamis i gineqid i wastitayeq saw araQ dimuntab le a hi gwahtiqamta haqyauq.

<sup>21</sup> Teq muyib matawta na kam kabemmo didaq a hi neqimmo osan Pol in gilikmanib eraqim tibilam, Mataw ham teko ne yaqgo gamuk huritta iyid i nud Krit a hi huload nab useq i afaqan kazaq ahol a hi waq nag ham. Ad i gigo es nagah bunmo a hi huneg nagmo ham. <sup>22</sup> Ari muran ya ne kazaq diq tigibilendaq ham. Ne giwaz meqniyyiy ham. I gilikmanib mat araQ diq a hi moqdaq ham. Muymo teq timeqniydaq ham. <sup>23-24</sup> Ya God ago matta iyim ya in ago kabiy emaiqta ham. Inmo ago angelo araQ irimo taromab ya igerab gwahtiqim

turad kazaq ibilan ham. Pol ham ni hi rab haqad in bilam ham. Ni leheq Sisa anognib titurdaq haqad in bilam ham. Ad ni hurit ham. Mataw bunmo ni nenaq muyib osayta na ham God tinagan kamis gineqid a hi moq daqay haqad in ya ibilan ham. <sup>25</sup> Nazaq iyan mataw ham ne zaway iyeq osiy ham. Ya God anan helmo haqaiq ham. In ya ibilanta nazaqmo in tiqemdaq ham. <sup>26</sup> Teq muy ka leheq nud araQab sarte tirordaq ham.

<sup>27</sup> Ari i sibad luwsa kam 14 nazaq tihiqiy. Hiqiyian i kamis anan Meditereniyah haqayta nab sibim lehad tarom alihanib muy ago kabibiy mataw ginad emiy, Muy lan ez araQ sinsin tuqugaqya haqiy. <sup>28</sup> Haqad in kamismeb tow waqan am hunegan tuwom. Woqan in ahol waqan 40 mita nazaq iy. An i asitmo ta leh nog iyim in tow a ta waqan tow bilam 30 mita ham. <sup>29</sup> An in tirab yaqay, luweq i leh tuteq sarte tuqulum woram haqad. Nazaq iyan in muy abe ban anka aweweqmo hunegan kamismeb wom. Woqan mataw na zeq amen emad in God bulonim bilaq yaqay, Saw emid hidmo hastitayan haq yaqay. <sup>30</sup> Sa muy ago kabibiy mataw na in muy huloseq tukgo dan tinagan yaqay. Nazaq iyan in dingi aqamun hasan dingi kamismeb tihitim. Hitiqan in katiyim bilaqiy, I dingi-ib leheq muy anobun ban anka asor hunegan haqiy. <sup>31</sup> Haqsa Pol in bab mataw gigo ayahta na ago bab mataw nenaq gibilan, Mataw ko muy kab a hi osid ne bunmo kamis gineqid tumoq daqay ham. <sup>32</sup> Haqanmo bab mataw hidmo le dingi aqamun urotan kamis sorim ad tilah.

<sup>33</sup> Ari zeq abolgo sinsin tiqiysa Pol in mataw na bunmo didaq neq daqay haqad gibe yahad gibilan, Kam 14 nazaq ne rabad samanmo tuqosiy ham. Osad ne didaq araQ diq a hi neqiy ham. <sup>34</sup> Nazaq iyan ya ne atoranno gibilenaq ham. Ne didaq neqiy haqaiq ham. Didaq neqeq ne zaway iyeq a hi moq daqay haqaiq ham. Ne huritiy ham. Ne giqensan araQ diq milheseq a hi woqdaq ham. Haiq ham. Ne bunmo dimunmo tuqos daqay ham. <sup>35</sup> Haqad in bret waqim ginognib God esey ugim teq in orqayim tinam. <sup>36</sup> Neqsa mataw bunmo ahol waqad ginad tidimniysa in nazaqmo didaq waqim tineqiyimo. <sup>37</sup> I mataw kabemmo muyib osta, 276 nazaq diq. <sup>38</sup> Teq mataw na bunmo didaq dimunmo tineqim in muy afaqan hiqiydaq haqad wit anagin muy aduganib osta na hunegan kamismeb tuwom.

*Muy meqniy*

<sup>39</sup> Ari saw tihastitayan in lan ez araQ ahol tuwaq yaqay. Teq in saw ezaqta ago lan ez na a hi huritiy. In saw

na ahol waqad kamis abeqil araq loleh titayta aqiburan dimun diqta usaqta na ahol tuwaqiy. Ad in ginad emiy, I muy ad leheq lan ez dimun diqta kob gwalam haqiy. <sup>40</sup> Haqad in anka aqamun urotan kamismeb woq bugsa in kwaziqmo stia am waziyta na tihasiymo. Hasim in tim waqgo haqad muy ago sel wazan eraqanmo muy amidemqanmo sibim lan ez nab tiloqyaq. <sup>41</sup> Loqadmo haiq muy sardeb tugwal. Gwaladmo muy anobun ror naqmo hiqiyim nab tuqus. Ussa kamis muy abe woad othassa muy timizilay. <sup>42</sup> Tabiyaysa bab mataw na in mataw giqirquran osiyta na ginol emgo ginad tiqem yaqay, luweq in ameq leheq tituk daqay haqad. <sup>43-44</sup> Teq in gigo ayahta na Pol ulumsihnan haqad in ago mataw na giwasihan in nazaq a hi emiy. Ad in mataw amayta na gibilan, Ne sortukeq woqeq ameq lehiysa ham. Lehsa mataw a hi amayta na in ay anabun teq muy asor milhasta nagan wazeq ameq lehiymo ham. Haqan mataw nazaq emim in bunmo wastitayimmo le lan ezab tugwal bugiy.

## 28

### *Pol nud Malta-ib os*

<sup>1</sup> Mataw bunmo wastitayimmo lan ezab tuwoqiy. Woqim teq i nud na anan Malta haqayta na tuhurit. <sup>2</sup> Teq mataw uliq nabta na gigem dimunta igad in i tigidimun toniy. Kam nab urom bolsa saw amuditqan diq iyyaq. Sa mataw na gigem dimunta igad in i giwaqim giqad lehim i gimen faq ayahta ulaman i faq iterad tuqos. <sup>3</sup> Ossa Pol ay aben amikmikta ruqotim faqmeb emsamo nagah ahulinaqta meqinta araq ayil ulilemim usta na in faq afan loyinadmo bo tugwahtim. Gwahtiqim in Pol abenab tumug. <sup>4</sup> Mugan on mataw nabta na in nagah ahulinaqta Pol aben mugim yuk tonim ussa ahol waqad bilaqiy, Mat ka in mat araq wol eman momta daqagya haqiy. An kamis neqan a hi moqan bugaw daq meqinta amenin emaqta na in Pol tuwol am haqiy. <sup>5</sup> Teq haiq. Pol nagah ahulinaqta na hures laman le faqmeb woqan in asan asit a hi titiyyaq. <sup>6</sup> Sa mataw na ginad tiqem yaqay, In teq ahol umdaqta haq yaqay. Umeq hidmo in woqeq tumoqdaqta haq yaqay. Haqad in sisaqmo amen emad osan teq haiq. Pol ezaqag a hi ton. Nazaq iyan in ginad buliyim tibilaq yaqay, In god araq haq yaqay.

<sup>7</sup> Ari og i osta na in mat araq anan Publiyus haqayta na ago og araq. Mat na in nudib on mataw na gigo maror ayah diqta. Nazaq iyan in i giwaqim giqad ago bitab tilah. Lehim kam ezeqmanmo in i giwamuzad os. <sup>8</sup> Ossa Publiyus amam moq naqmo diq hiqiyad asan afan iyad

urad usyaq. Ussa Pol in ago hib lehim ayon God bulonim teq in aben aholib emim wazanmo in ago moq tihiqiy. <sup>9</sup> In daq nazaq eman abeb nud nab mataw ta asor gigo moq inaqta na bunmo in Pol ago hib bolsa Pol giwastitaysa in tidimniy yaqay. <sup>10</sup> Nazaq iyan mataw na in i bunmo giwazinad tigidimun diq ton yaqay. Ad abeb i lehgo tiqiysa in nagah ago i siqim iyta na bunmo a bolim muyib tiqem igiy.

### *Pol le uliq Rom-ub gwahtim*

<sup>11</sup> Teq i nud Malta-ib kalam ezeqmanmo tuqos. Osim teq abeb muy araq nab usim lehnan tonsa i muy nab tugwal. Muy na in uliq Aleksandriya-ibta teq tim meqinta akamnib iyan in nud nab usta. Teq muy na anobun ban Rom gigo god giger ginen araqqimmo giqamta na gidulan turta. Ari i muy nab gwalan muy aben hulos ugani tileh. <sup>12</sup> Lehad luwim i le uliq Sirakyus-ib tugwahtiw. Gwahtiqim nab i kam ezeqmanmo tuqos. <sup>13</sup> Osim i uliq na hulosis le uliq Regiyum-ub tugwahtiw. Gwahtiqim kam ta araq nab tim Ray nogta na eraqan i uliq na hulosis lehad kam gigertab nab i uliq Puteoli-ib tugwahtiw. <sup>14</sup> Gwahtiqim uliq nab i gimaqbaban Yesus ago on mataw asor tigibiy. Gibiysa in bilaqan i nenaq kam 7 nazaqmo os. Osim gihulosad i uliq Rom-ub tileh. <sup>15</sup> Lehsa Kraiss ago on mataw Rom-ub osiyta na in i gigo huritim gidanin tuboliy. Bolim in gigo asor maket saw Apiyus-ib usaqta nab danib i gibiyad nenaq muleqim ta lehsa asor uliq anan Ginamur Em Abitan Ezeqman haqayta nab i gibaq tunim ossa i tigibiymo. Gibiyad Pol agem zaway muturta waqad in God esey tuqog.

<sup>16</sup> Ari i le uliq Rom-ub tugwahtiqan gavman in Pol hulosis in aholbin bit araqab bab mat amulikmo inaq tuqos. Ossa bab mat na bitab Pol asawan woltayad tuqosyaq.

### *Pol Yesus awagamun dimunta Rom-ub bilam*

<sup>17</sup> Ari kam ezeqman le tihiqiyian Pol in Juda gigo mataw aseseqta uliq Rom-ub osiyta na gililewunan bo humab tuwoliy. Humab wolim ossa Pol kazaq gibilan, Ya imaqbaban ham ya daq araq meqinta Isrel on mataw gigo hib a hi emta ham. Teq ya i gisesan gigo gunun-araq a hi othasmo ham. Ta teq in Jerusalem-ub ya iwazim Rom gibenab tiqiemiy ham. <sup>18</sup> Iqeman Rom in yaqgo hazizir emim in yaqgo daq araq meqinta inol em daqayta ahol a hi waqim in ya ihulosnan bilaqiy ham. <sup>19</sup> Bilaqan Juda gamuk kabemmo bilaqsa ya dante araq haigam iyan ya Sisa-mo ago hib lehnan bilay ham. Teq yaqmo isenlul na ya nan neggo haqad ya Sisa a hi lilewun ham. <sup>20</sup> Ya gamuk kaqmo ago ne gililewunan

ne bolan ya nenaq kawa gamuk tiqemaiq ham. Isrel bunmo in God teq gilumsihdaqta na anan helmo haqad amen emayta ham. Sa ya bilaqaiq, Mat i amen emad osta na tubol haqsa iyan in ya sen-ib iqirquriy ham.

<sup>21</sup> An mataw na Pol buloniy, Saw Judiya-ibta mat araq ni nihol awagamun mar tonim eman kab a hi bol haqiy. Ad mataw saw Judiya-ib osim kab bol yaqayta na in ni ninan i a hi gibilenad in ni ninan gamuk meqinta araq a hi bilaqiymo haqiy.

<sup>22</sup> Juda on mataw uliq saw bunmo in suleq muturta i Juda gilikmanib gwahtimta na anan meqin haqayta naqmo i tuhurit haqiy. Nazaq iyan i ninmo niqezab ni suleq ezaqta bilaqayta na i huritnan haqiy.

<sup>23</sup> Haqad abeb Juda mataw aseseqta na giyogniz kabemmo nenaq in Pol kam ugiyta nab a ta bolim bit Pol osaqta nab in humab ta woliy. In tarommo diq humab alulin emim ossa le imisor diq ni nog ya nog tiqiy. Sa Pol in Moses ago gunun agamukan na teq God ago nantut gamuk mar toniyta na giqisihunad in gamuk na alulin tibilaq sireqyaq. Ad in mataw na ginad buliyid in Yesus anan helmo haq daqay haqad in God ago maror og kab gwahtimta na agamukan gibilenyaq. <sup>24</sup> Gibilensa asor in ago gamuk anan helmo haqsa ta asor in anan helmo a hi haq yaqay. <sup>25</sup> In nazaq an geg ugadmo in Pol hulosim tilehiy. Lehsa Pol gamuk abebtanta kazaq gibilan, God ago Bugaw Dimunta in ne gisesan gibilenad in gamuk heltaqmo Aisaya aqezab bilam ham. In bilam,

<sup>26</sup> Ni on mataw na gigo hib leheq kazaq gibilen haqad in bilam ham. Ne gamuk huritad teq ne ginad a hi em has daqay haqad in bilam ham. Ne gime saw waqad teq ne nagah araq ahol a hi waq daqay haqad in bilam ham. <sup>27</sup> Na ezaqgo on mataw ka gigem soqotim usaqta haqad in bilam ham. Sa in gideksan ituqim usaqtamo haqad in bilam ham. Mataw ka gime miyim osayta haqad in bilam ham.

God nazaq giqeman luweq in gime nagah ahol waqad teq in gidek nan huritad in ginad em has nagiyta haqad in bilam ham. Ginad em hasad gigem buliyeq God ago hib ta bolid God giwastitayid tidimniy nagiyta haqad in bilam ham. *Aisaya 6.9-10*

<sup>28</sup> Nazaq iyan ne gamuk ka huritad ginad em hasiy ham. God on mataw gimen dante emim in gilumsihim ta giwaqayta agamukan na in eman on mataw en ta asor Juda a haiqta nagan gigo hib tilehaq ham. Mataw naqmo teq gamuk na tuhurit daqayta ham. [ <sup>29</sup> Pol gamuk na eman

tihiqiyan Juda mataw na Pol hulosim lehad in an ayahmo mug yaqay.]

<sup>30</sup> Ari ulig giger Pol in mat araq ago bit waqim osad in zayad osyaq. Ossa mataw Pol ahol waqnan bolsa in agem dimunta negad nenaq tuqosyaq. <sup>31</sup> Osad in God ago maror asuleqin gibilenad in Iyahta Yesus Kraisa anan tigibilenyaqmo. Gibilenad in ulalabmo bilaqsa mat araq in aqez a hi wasihyaq. Nawaqmo.

## on mataw titnonta iyim osauq

### Rom

#### Sansandek Pol mar tonan uliq Rom-ub lahta Gamuk ameb lehaqta

Uliq Rom in kantri Italiy ago uliq danmeh diqta. Teq Pol le Yesus ago on mataw uliq nabta na nenaq osad Yesus awagamun dimunta gibilen kemnan haqad in gimen sansandek ka mar ton nag (Rom 1.15). In anad am, Ya le Rom nenaq oseq teq ya eraqeq kantri Spen-ib Yesus awagamun dimunta bilaqnan lehsa Rom matawta na ilumsiheq iqemid ya tilehdaiq ham (Rom 15.24). Nazaq iyan in aholyon dante wastayad in naga gamukin diq bilaqad luwaqta na in Rom mataw gibilen kemnan haqad in gimen sansandek ka mar tonta.

Pol kazaq bilam, Juda on mataw teq on mataw en ta asor Juda a haiqta na bunmo inaqmo in daq meqinta ahaqenib giqirquran ossa God in ginan agem meqniyaqta ham. Teq mataw in gigo zawayib og ka ago gunun araq muzineq God ameb gihol dimniy daqayta na haigqam ham. Nazaq iyan God in ginan anad meqniysa in gihureqid in ago hib ta bolnan haqad in gimen dante araq dimunta samanmo tiqem nag ham. Eman on mataw Yesus Kraiss anan helmo haqsa God in ginan mat titnonta haqad in giwaqim nenaq osaqta ham. Ad Pol bilam, I Kraiss aholib soqotim inaq ossa God ago Bugaw Dimunta zaway igad dan giqisihunsa i lehaug ham. Lehsa nagah araq diq i gidanin qwaydaqta haiq iysa i le God ago os dimunta ahiqiy haiqta na tuwaqam ham.

Teq nagah araq ayahta in anan bilamta na kazaq. Juda on mataw muran Kraiss gileh ugim osayta ham. Ossa God in on mataw en ta asor Juda a haiqta nagan giqeman in ago maror aduganib tubolay ham. Teq abeb God in Juda on mataw na giqemid in ginad buliyeq Kraiss anan helmo haqad in God ago dauh giduganib le tugwahti q daqaymo ham.

Gamuk na tihiqiyan Pol ago gamuk abebtanta nab in on mataw Kraiss anan helmo haqayta na gigo luw os anan bilamta. In bilam, On mataw Yesus ago nan huritayta na in ago gamuk bunmo muzinad in an anan ginad bilaqsa an alowan tonad os daqay ham. Haqad gamuk na abeb in kabiy emnan anad usta na ago bilaqim teq in Rom on mataw na ago zeq dimun nag.

#### I God anan helmo haqayta naqmo i giqeman i God ameb

*Pol in Aposel akabiyan emaqta na ago ananin tut*

<sup>1</sup> Yaqmo Pol, ya Kraiss Yesus ago kabibiy mat araq. Inmo ililewunan ya Aposel gwahtiya. Teq in on mataw gimen dante amta agamukan dimunta na ya bilaqdaiq haqad in ya itowun eman ya God ago gamuk naqmo bilaqmo iyim osaiqta.

<sup>2</sup> Kwaziqmo God gamuk dimunta na eman ago nantut ginadib bolsa in God ago mar tawonta nab mar toniya. Mar tonan God hel diqmo bilamta nazaqmo tugwah-tim. <sup>3</sup> Gamuk dimunta na in God atatinmo anan bilamta. Teq God atatin na King Devit asenlul giduganib gwahti qim in mat diq iyta. <sup>4</sup> Iyim in moqim hodhodab ta eraqan daq azawayin inaqta na amalib in ahol alulin in God-mo Atatin Diqta na ulal tiqiy. Na i gigo Iyahta Yesus Kraiss-mo. <sup>5</sup> Teq ya Yesus Kraiss anan helmo haqan God agem dimunta yagad Aposel akabiyan ya ibenab amta. In anad ya kabiy na emsa on mataw en bunmo gilikmanib kabemmo God anad muzinad Yesus anan helmo haqsa Yesus abin ayahmo diq iyaq haqad in ya iwaqim kabiy nab iqamta. <sup>6</sup> An teq on mataw na gilikmanib God in ne inaqmo gililewunan ne Yesus Kraiss ago on mataw tiqiyimo.

<sup>7</sup> Ne God ago on mataw uliq Rom-ub osayta na ya ne gimen sansandek ka mar tonim eman leh negaq. God ne ginan anad bilaqsa gililewunan ne in ago tawonta iyim osayta.

I Gimam God teq Iyahta Yesus Kraiss inaq in gigem dimunta negad ne gigem emid midemeqmo usan.

*Pol le Rom gibiyo haqad anad am*

<sup>8</sup> Danmeh diq ya kazaq gibilenda iq, Ne ginad God anan helmo haqayta na awaz meqin diq iysa og saw bunmo mataw in ne ginan nazaq bilaqayta haqdaiq. Nazaq iysa iyan ya igo God inaq gamuk emad ya Yesus Kraiss abinib ne bunmo gimen in esey ugaiqta. <sup>9-10</sup> Ya God ago kabibiy mat iyim ya in atatin Yesus awagamun dimunta akabiyan emad ya kabiy na ihol bunmo ugaiqta. God ya ibiysa ya helmo bilaqaiq. Tutimmo ya ne ginadin emad ne gimen God bulonaiqta. Bulonad sirisirimo ya susumun ugaiq, Ni ninad bilaqid teq ni yaqyon dan wastitayid ya Rom gigo hib lehiq haqaiq. <sup>11</sup> Na ezaqgo ya iholib naw usaqta ka amalib ya ne giwitan gilumsihid ne zaway iyeq tur daqay haqad ya ne gigo hib lehnan inad diq bilaqayta. <sup>12</sup> Teq ya inad kazaq usaqmo. Ya ne gigo hib lehid ne ginad helta na ya ilumsihsa ta ya inad helta na ne tigilumsihdaqmo haqaiq. I nazaq

an ulumsihad teq i bunmo ginad God anan helmo haqauqta na awaz meqniysa i gigem zaway tiqiydaq haqaiq.

<sup>13</sup> Ya imaqbaban, ya gamuk ka gibilensa ne huritiy. Yaqgo kabiy in on mataw en ta asor Juda a haiqta nagan bunmo gigo hib anon tiqamta. Ad ya inad yaqgo kabiy anon asor ne gigo hib usdaqmo haqad ya ime kabemmo ne gigo hib lehnan inad emyaiqta. Teq haiq, daq hares gwahtiqad ya idanin qwayyaq. <sup>14</sup> Teq God ayahmo ilumsihta na amenin ya emad ya nazaqmo on mataw bunmo God ago gamuk dimunta amalib gilumsihaiqtamo. Gilumsihad ya on mataw en ta asor Juda a haiqta nagan bunmo, Grik mataw teq mataw yabyabta inaqmo God ago gamuk gibilenaqta. Mataw na asor ginad inaqta teq asor ginad a hi emayta. Teq ya na ago a hi bilaqad ya mataw na bunmo God ago gamuk negaiqta. <sup>15</sup> Nazaq iyan ya uliq Rom-ub nab leheq ne inaqmo Yesus awagamun dimunta gibilennan ya iqutil diq eraqtaqta.

*Yesus awagamun dimunta na in God ago zawayta*

<sup>16</sup> Yesus awagamun dimunta naqmo in God ago zaway awaz meqinta in amalib on mataw gilumsihim giwaqim ban dimuntab giqemaqta. Nazaq iyan ya Yesus awagamun dimunta na bilaqad imebay a hi woqtaqta. Wagan na Juda on mataw gimen danneb gwahtiqim teq in ta on mataw en ta asor Juda a haiqta nagan inaqmo gimen gwahtimtamo. <sup>17</sup> God on mataw giqeman titnonta iyayta na adan Yesus awagamun nabmo ulal iyim usaqta. Na in kazaq. I God anan helmo haqauqta naqmo amomo i giqeman i God ameb on mataw titnonta iyaqta. God ago marib gamuk nazaqmo bilaqan usaqta. Gamuk na bilam,

On mataw God aqez anan helmo haqan in ginan titnonta hamta naqmo in God inaq dimunmo tuqos daqayta ham.  
*Habakuk 2.4*

*On mataw bunmo God gileh ugayta*

<sup>18</sup> On mataw og kabta bunmo God gileh ugad in gigo daq meqinta amalib gamuk helta bayan woqtaqta. Woqsa God Hevenib osad mataw na ginan agem meqniysa in gigo daq meqinta nagan amenin ulalabmo neqaqta. <sup>19</sup> Na ezaqgo God in mat ezaq diqta na ago in on mataw bunmo giqisihunsa ahol waqayta. <sup>20</sup> Ad kwaziqmo in og kab nagh bunmo giqamta nabmo iyim bo muran kam kabmo on mataw in nagh God giqamta nagan ahol waqayta. Ahol waqsa nagh naqmo in God ulilemim osaqta na eman gimeb ulal tiqiyaq. Ulal iysa in God ago zaway tutimmo usaqta na ahol waqad

in God ulilib osad nagh bunmo giwamuzaqta na ago ginad em hasayta. Nazaq iyan mat ara q bilaqdaq, Ya God ago a hi hurit haqdaqta na haiqmo diq.

<sup>21</sup> On mataw God ago tuhuritayta teq in abin wazinat esey a hi ugayta. In daq samanta kabemmo diq anadin emad ginad agadan iysa in romriqab os nog iyad daq helta a hi loyin kemayta. <sup>22</sup> In bilaqay, I gimaqbel inaq haqayta. Teq haiq. In ginad ayemymqan iyim osayta. <sup>23</sup> God abin ayah diqta inaq iyim in kuluwa-kuluwmo osaqta. Ta teq on mataw God gileh ugad abanab in nagh osim moqayta gidulan giqemayta. Giqemad in mat adulan teq ah adulan teq karuw amo amo gidulan teq nagh ahulinaqta nagan gidulan naqmo giyon lotu emayta.

*On mataw daq amo amo meqinta emayta*

<sup>24</sup> On mataw daq meqinta nazaq emsa God in giholib hiqiyin in ginad meqinta gigemab usaqta na muzinat daq anumlan inaqta emayta. Emad in an mebay ugad an meqin tonayta. <sup>25</sup> God nagh bunmo giqeman gwahtiqiyta. Hel diqtaqmo in abin ayahta na nazaqmo kuluwa-kuluwmo tuqusdaqta. Ta teq on mataw gamuk helta nawa God anan bilamta na hulosan ussa abanab in gamuk katiyta waqim muzinayta. Muzinat in mat nagh bunmo giqamta na gileh ugad in ago nagh in giqamta naqmo giwazinat gibin iluwayta.

<sup>26</sup> In nazaq emsa iyan God gileh negan in gihol eraqsa daq amebay inaqta naqmo emad osayta. In gigo on an waq adan dimunta na huload in daq hi emnanta emayta. <sup>27</sup> Ad mataw nazaqmo in aw waqeq inaq wastitayeqmo osqo adan na huload in gimo an ahol waqad gihol eraqtaqta. Gihol eraqsa mat in matmo inaq daq amebay inaqta emayta. Emsa daq meqinta na in gimo giholib anon emsa in amenin meqinta waqayta.

<sup>28</sup> On mataw God gileh ugad abin a hi iluwsa God gihuload in gimo ginad samanta naqmo muzinat daq hi emnanta emad luwayta. <sup>29</sup> Luwad in giholib daq meqinta naqmo ame gwalim ussa in an meqin tonayta teq in nagh utetayta teq in an bab ugayta teq in mat ago nagh kabemmo anan gigem meqniyayta teq in mataw ginol emayta teq in an mugayta teq in katiyayta teq in mataw gimeqin tonayta teq in an agilehunani bilaqayta. <sup>30</sup> Teq in mataw gibilawunayta teq in gigem meqinta God ugayta teq in mataw haresmo ginolayta teq in igmo ag haqayta teq in gimo gihol abin wazan eraqtaqta teq in ginadibmo daq meqinta haresmo

muturta eman gwahtiqaqta teq in ginen-maman giqez othasayta. <sup>31</sup> Teq in ginad hi emta adan emayta teq in nan bilaqad adan a hi emayta teq in an anan ginad a hi bilaqaqta teq in mataw ginan ginad a hi meqniyayta. <sup>32</sup> On mataw God gunun amta na ago tuhuritayta. Gunun na bilam, Mataw nawa daq meqinta nazaq emayta na tumoq bug daqay ham. Ta teq in gunun na a hi rabunad daq meqinta nagan emmo emayta. Emad in mataw ta asor daq meqmeqinta na emsa gibiyad in esey haqad gisen baysihayta.

## 2

### *God hazizir titnonimmo emaqta*

<sup>1</sup> Nazaq iyan ni nog ni mat araq ago daq ulum kemad anan meqin haqaqta na ni ninmo nihol adanin qwayaq. Na ezaqgo, in daq am nogmo ni emaqtam. Nazaq iyan ni mat na ago daq ulum kemim amalib nan emad ni niholyon bilaqaqtamo. <sup>2</sup> God in on mataw daq meqinta emayta na bunmo anononmo gilum kemad in gigo daq ahunibmo amenin negaqta. Na i bunmo tuhuritta. <sup>3</sup> Ta teq ni mataw daq meqinta emay na gilum kemad ginan meqin haqad teq ni daq meqinta nagan emaqtam. Ni ninad ezaq emaq? God ningo daq meqinta na ulum kemeq amenin nignan tonsa ni aban emeq tukdaq haqad ni ninad emaq e? Na haiqqam. <sup>4</sup> Ni ninad em. God nilowan diq tonad in sisaqmo nibaq tunim osaqta. Osad in ningo daq meqinta amenin hidmo a hi emaqta. Ni God ago daq dimun diqta na ahol waqsa in nagah amikta iyaq e? God anad ni ninad buliyeq ningo daq meqinta gileh ugdaq haqad in nazaq nilowan tonaqta. Na ago ni ninad a hi emaq e? <sup>5</sup> Ni nigem soqotim ussa ninad a hi buliysa God ago agem meqniy asor ayahmo ni nibinib eman in ni nibaq tunim nawa usaqta. Abeb God agem meqniysa daq meqinta bunmo amenin emdaqta akaman nab teq in ningo daq anononmo ulum kemim ninyon tibilaqan usta na ulal iysa ni in ago faq tuwaqdaq.

<sup>6</sup> Kam nab God in on mataw bunmo gigo daq ahunibmo amenin tinegdaq. <sup>7</sup> On mataw asor gibin dimunta waqeq God inaq kayeqmo tuteqmo osnan haqad in daq dimunta emad gituw a hi hiqiyayta. God teq on mataw naqanta giwazinan ago os ahiiqy haiqta na tinegdaq. <sup>8</sup> Ari on mataw asor in gimo gihol anadin emad in gamuk helta na gileh ugdaq daq meqintaqmo muzinayta. God teq on mataw naqanta ginan agem meqniysa atoranmo tigimeqin tondaq. <sup>9</sup> Gimeqin tonad in on mataw daq meqinta emayta na bunmo afaqan aseseqta teq santitiy ayah diqmo

tinegdaq. Nega Juda mataw in giyonta na danmeb waqsa ta on mataw en ta asor Juda a haiqta nagan bunmo in giyonta na tuwaq daqaymo. <sup>10</sup> Ad nazaqmo God in on mataw daq dimunta emayta na bunmo agem dimunta negad in giwazinan gibin dimunta tinegdaq. Nega Juda mataw in giyonta na danmeb waqsa ta on mataw en ta asor Juda a haiqta nagan in giyonta na tuwaq daqaymo. <sup>11</sup> Na ezaqgo God in on mataw en araqmo gigo a hi lehaqta.

<sup>12</sup> Mataw God ago maror Moses bilamta na asan ban osad daq meqinta emayta na in maror na haiqmo oseq tihiiqiy daqayta. Sa mataw God ago maror na ahaqenib osad daq meqinta emiyya na, maror naqmo in gigo daq meqinta ulum kemid in amenin tuwaq daqay. <sup>13</sup> Na ezaqgo on mataw God ago maror gidekmo huritayta na in God ameb titnonta a hi iy daqay. Haiqqam. On mataw maror na huritim ago gunun muzin bugayta naqmo teq God in ginan titnonta tihaqdaq. <sup>14</sup> Mataw en ta asor Juda a haiqta nagan bunmo in God ago maror Moses bilamta na a hi waqiyta. Teq in gihol loyinat ginadibmo maror na ago gunun muzinayta. In God ago maror na a hi waqiyta teq in gimo gisesan gigo maror aduganib God ago gunun ussa in gigo maror na bilaqne God ago maror Juda gigo hib usaqta na nogmo. <sup>15</sup> Mataw na daq emad gihol loyin kemayta. Loyin kemad kam asor in gigem afaqan iysa kam asor in gigem dimunmo iyaqta. In nazaq emsa God ago maror agamukan mataw na gigemab mar tonan usaqta na ulal tiqiyay. <sup>16</sup> Nazaq iyan abeb God mataw bunmo gigo daq gigemab ulilemim usaqta na gilum kema mataw na gigo gunun naqmo in giyon bilaqid in gigo daq amenin tuwaq daqay. Kam nab God in Yesus Krai abenab mataw gilum kemo akabiyan na emid inmo tiqemdaqta. Ya Yesus awagamun bilaqaiqta na nazaq lehaqta.

### *Juda mataw ginad emay, God ago maror Moses bilamta naqmo teq i gilumsihdaq haqayta*

<sup>17</sup> Ari mat ni bilaqaaq, Ya Juda matta haqaaq. God hazizir ayahta emdaqta akannib nab teq in ago maror Moses bilamta naqmo tiqilumsihdaq haqaaq. Teq ni nihol abin iluwad bilaqaaq, Yaqmo God ago dauhibta haqaaq. <sup>18</sup> Ad ya God ago anad tuhurit kemta haqaaq. Ya God ago maror na asuleqin tuwaq bugim ya God ago daq helta na ago inad tiqem hasta haqaaq. <sup>19</sup> Haqad ni ninad emaq, Ya mataw gime haiqta dan giqisihunaiqta haqaaq. Giqisihunad ya bilaqne mataw romriqab osayta na gigo saw anuwan nog osaiqta haqaaq. <sup>20</sup> Ya mataw ginad haiqta giwastitayan in ginad tiqem

hasay haqaq. Teq ya onmin amikmikta suleq negaiqta haqaq. Haqad ni ninad emaq, I Juda on mataw God ago maror waqan maror na amuganib ginad dimunta alulin teq gamuk helta alulin giquş bugaqta haqaq.

<sup>21</sup> Ari ya kazaq diq nibilendaiq. Ni on mataw asor suleq negad ta ninmo nihol suleq a hi uqaq e? Ni bilaqag, On mataw hi rin toniy haqad teq ninmo towa a hi rin tonaqta ye? <sup>22</sup> Ad ni bilaqag, On mataw an tuwaqiyta na in an alulib hureqeq inaq hi usiy haqad teq ninmo towa nazaq a hi emaqta ye? Ni god katiyta ginan ninad a hi bilaqad teq ni towa mataw en ta asor God abin a hi huritiyta na gigo lotu abitnib nagh rin tonim a hi wazayta ye? <sup>23</sup> Ni nihol abin iluwad bilaqag, Ya God ago maror Moses bilamta na tuhurit haqaqta. Teq ninmo towa maror na ago gunun itiyonad ningo daq meqinta na amalib God abin wazan a hi woqaqta ye? <sup>24</sup> God ago marib gamuk araş bilamta kazaq ni a hi emaqta ye? Gamuk na bilam,

Negmo daq meqinta emsa iyan on mataw en ta asor na ne gibiyad in God bilawunad abin bayan woqaqta ham. *Aisaya 52.5*

*Gihol abatan asan urotayta na ago alulin diq*

<sup>25</sup> Ni nihol abatan asan uroteq God ago maror Moses bilamta na muzin bugsa teq ni nisan urotta na tinilumsihdaq. Ari ni nisan urotim teq ni maror na ago gunun itiyonad luwad na ni bilaqne mat asan a hi urotta nog iyaq. <sup>26</sup> Ad nazaqmo mat asan a hi urotad teq in God ago maror aduganib daq titnonta usaqta na muzinad, mat na bilaqne mat asan urotta nog iyaq. <sup>27</sup> Ne Juda mataw nagh giger God ago maror Moses mar tonta na teq gisan urot ago adanta na ne wazayta. Teq ne maror na ago gunun itiyonayta. Nazaq iyan mataw gisan a hi urotad God ago maror muzinayta na in eraqeq ne Juda gigo daq meqinta nagan ginan ulalabmo tibilaq daqay. <sup>28</sup> Na ezaqgo, Juda matmo diqta abin na in gisango nagh a haiqta. Ad gisan urot adan diq na in giholmo ago a hi bilaqaqtamo. Haiqgam. <sup>29</sup> Juda matmo diqta abin na in mat agemab teq anadib usaqta. Ad gisan urotmo diq adan na in mat agemab gwahtiqaqta. Nazaq iyan mataw gisanmo wastitayim in Juda gisenlul a hi iyayta. Haiqgam. God ago Bugaw Dimunta inmo mat eman in abin Juda matmo diqta na inaq iyim oşaqta. Mat nazaqta in mataw gigo hib ahol abin a hi waqaqta. Haiqgam. In God-mo ago hib abin dimunta na waqaqta.

### 3

*Daq meqinta in daq dimunta bayid a hi woqdaq*

<sup>1</sup> Ari nazaq iysa iyan Juda on mataw ezaq tonim in mataw en bunmo giquriyamim danmeb iyim oşayta? Teq gisan urot adan na in Juda mataw giqueman gibin ezaq diq usaqta? <sup>2</sup> Mataw! Juda on mataw in nagh bunmo gigo hib on mataw en bunmo giquriyam bugim oşayta. Ameb diqta na in kazaq. God in ago gamuk negan in gimo wamuzayta. <sup>3</sup> Helmo Juda asor gamuk na anan helmo a hi haqayta. Teq i ezaq haqam? Juda mataw na God ago gamuk a hi muzinsa God in ago gamuk na a hi muzindaqmo haqam e? <sup>4</sup> Haiq kidik! Mataw bunmo katiysa God teq nazaq a hi emdaq. In daq helta tumuzin tutdaq. God ago marib gamuk araş bilamta nazaq. Gamuk na bilam,

God ham ni on mataw gilum kemim ginan hel diqtaqmo bilaqagta ham. Sa mataw ni nilum kemad nimalib nan emsa ni in gizez na nazid woşa ningo gamuk helta naqmo tuşus tutdaq ham. *Buk Song 51.4*

<sup>5-6</sup> Ari teq ezaq? I gigo daq meqinta in God ago daq titnonta emid ulal iysa ta i ezaq haqam? I bilaqam, God i ginan agem meqniysa faş igaqta na in daq titnonta a haiq haqam e? Haiq kidik! Gamuk nawa na in mataw og kabta gigo ginadta. God daq meqinta a hi emaqta. In daq meqinta emad ezaq teq in on mataw bunmo gigo daq tuşulum kem nag? <sup>7</sup> Teq luweq mat araş bilaqdaq, Mataw gigo daq katiyta naqmo in God ago gamuk helta eman ulal iysa God abin ayahmo diq iyaqta haqdaq. Nazaq iyan ta doq ton in mataw na ginan meqinta haqad in giyon bilaqan in ameb timeqniyim oşayta haqdaq? <sup>8</sup> Gamuk nawa na bilaqne gamuk ta araş meqinta mataw bilaqayta kazaq nog. In bilaqay, I daq meqinta emuq haqayta. I daq meqinta emsa God ago daq dimunta ulal iy hasaq haqayta. Mataw asor gamuk nawa na igmo gizezab emad in i gibin meqin diq tonayta. Teq in nazaq i gibin meqin tonim in giholyon dante eman God in giyon bilaqan in timeqniyim oşayta.

*Mat araş daq dimunta emad oşaqta haiqgam*

<sup>9</sup> Ari teq ezaq? I Juda on matawta, i on mataw en bunmo giquriyamim God ameb dimunmo oşauş e? Hikidik. Ya teko tibilay. Daq meqinta in Juda mataw teq mataw en ta asor Juda a haiqta nagan bunmo nenaqmo tigiwaleq ton bug hay. <sup>10</sup> Teq God ago marib gamuk araş nazaq bilammo. Gamuk na bilam,



Mat araq daq dimunta emaqta haiq ham. <sup>11</sup> Teq mat araq anad em hasaqta haiqmo ham. Mat araq diq anadibmo God a hi nagunaq ham. <sup>12</sup> Bunmo dan titnonta tuhulosiyta ham. Bunmo araqibmo mataw meqin diqta iyim osayta ham. In gigo araq diq daq dimunta emad osaqta na haiqqam ham. Haiqmo diq ham. *Buk Song 14.1-3*

<sup>13</sup> In gitenmos bilaqne hodhod aqez hasan ussa alilihan ahuran gwahtiqaqta nazaq nog ham. *Buk Song 5.9*

Teq in gigezab gamuk katiyta kabemmo gwahtiqaqta ham. In giteb nan meqin diqta gwahtiqaqta ham, bilaqne nagah ahulinaqta ago ate afan nog ham. *Buk Song 140.3*

<sup>14</sup> Teq in gitenmosib an kusluw ug agamukan teq nan meqinta ate gwalim usaqta ham. *Buk Song 10.7*

<sup>15</sup> In mat araq wol emid moqgo ginadnad a hi emayta ham. <sup>16</sup> Teq in leh bolad luwad in on mataw afaqan negad gimeqin diq tonayta ham. <sup>17</sup> In mataw nenaq zib alowab osgo a hi huritayta ham. *Aisaya 59.7-8*

<sup>18</sup> Ad in God anan asit a hi rabayta ham. *Buk Song 36.1*

<sup>19</sup> God ago maror Moses bilamta na in on mataw maror na ahaqenib osayta naqmo gibilenaqta. Na i bunmo tuhuritta. Nazaq iyan i Juda on mataw teq on mataw og saw bunmo inaqmo i bunmo God ameb i gigo afaqan inaq iyim i gihol adanin qwayamta dan haiqqam. <sup>20</sup> Mat araq diq God ago maror agununin muzin buqeq in ameb mat titnonta iyaqta na haiqqam. Na ezaqgo on mataw bunmo maror na ago gunun itiyonsa in gigo daq meqinta ulal tiqiy bugaqta.

*Mat Yesus Kraiss anan helmo haqaqta naqmo abin God ameb titnonim usaqta*

<sup>21</sup> Teq muran God i ginan on mataw titnonta haqdaqta adanteqin araq ulalabmo tugwahtim. Dante na God ago maror Moses bilamta nab a hi lahta. Ta teq God ago maror kwaziqta na teq God ago nantut gamuk bilaqiyta na inaq giduganib dante muturta na agamukan usaqta. <sup>22</sup> Dante na in kazaq. God in on mataw Yesus Kraiss anan helmo haqayta na bun diqmo ginan on mataw titnonta tihaqaqta. Ad in on mataw asormo gigo a hi lehaqta. <sup>23</sup> Na ezaqgo on mataw bunmo daq meqinta emim in God ago uliqab inaq osgo gibin timeqniyim usaqta. <sup>24</sup> Ta teq Kraiss Yesus in on mataw gigo daq meqinta na amenin tizay bug. Zay bugan muran mat aw nog in Yesus anan helmo haqsa God agem dimunta samanmo naw nog negad in ginan

on mataw titnonta haqaqta. <sup>25</sup> Teq in on mataw bunmo gimen daq amulikmo emaqta na in emid ulal iyaq daq haqad in Yesus eman holim in on mataw gimeb moqim anedan tamaz nog wazbalan wom. Woqan mat aw nog in anedan na anan helmo haqsa God in ginan agem a ta hi meqniyaqta. Daq alulin naqmo ago kwaziqmo Yesus a hi moqsa on mataw daq meqinta emsa God ahol wasihad amenin a hi negyaq. <sup>26</sup> Teq muran kam kab Yesus tumoqan God daq amulik naqmo emad in on mataw Yesus anan helmo haqayta na ginan titnonta haqad in gigo daq meqinta na amenin a hi negaqtammo. In nazaq emad in on mataw bunmo gimen daq amulikmo emaqta na ulal tiqiy hassa in inaqmo mat titnonta iyaqtammo.

<sup>27</sup> Nazaq iyan nog teq inmo ahol abin iluwad bilaqdaq. Yaqmo igo zawayibmo God ameb mat titnonta iyim osaiqta haqdaq? Na haiqqam. Teq naga daqin diq i gidanin qwaysa i gihol abin nazaq a hi iluwamta? I God ago maror Moses bilamta muzinauqta ago adan naqmo i gidanin qwaysa i gibin a hi iluwam e? Haiqqam. I Yesus anan helmo haqgo adan naqmo i gihol abin iluwgo adanteqin qwayim usaqta. <sup>28</sup> Na ezaqgo mat God ago maror Moses bilamta na ago akabiyana a hi emad in Yesus anan helmo haqsamo God in anan mat titnonta haqaqta. Ya nazaqmo diq bilaqdaiq.

<sup>29</sup> Teq ezaq? God in Juda gimomo gigo God daqag? Ad in towa mataw en ta asor Juda a haiqta nagan gigo God a haiq daqag? Haiqqam. In on mataw en bunmo gigo God-mo. <sup>30</sup> God amulikmoqmo osaqta. Sa mataw gihol abatan asan urotayta na in Yesus anan helmo haqsa God in ginan mataw titnonta haqaqta. Teq mataw gisan urotgo adan a hi muzinayta na in Yesus anan helmo haqsa God in ginan mataw titnonta haqaqtammo. <sup>31</sup> Teq luweq i ginad emam, Yesus anan helmo haqgo adan na in God ago maror Moses bilamta na eman samanta iyim usaqta haqam. Haiq kidik! I gigo ginad helta naqmo in maror kwaziqta na asen baysihsa in awaz meqniyim usaqta.

## 4

*God Abraham anan mat titnonta ham*

<sup>1</sup> Teq i Juda gises Abraham anan ezaq bilaqam? Abraham in God ago hib daq ezaqta ahol wam? <sup>2</sup> Abraham kabiy daq dimdimunta emad abin titnonta waqeq in matawmo gigo hib abin iluw nagta. Teq in God ago hib abin a hi iluw nag. <sup>3</sup> Na ezaqgo God ago gamuk kazaq usaqta.

Abraham God aqez anan helmo haqan God in anan mat titnonta ham. *Jenesis 15.6*

<sup>4</sup> I ginad emuq. Mat kabiy emaqta na in ago kabiy amenin samanmo naw nog a hi waqta. Haiqqam. In naw na akabiyen emim teq waqta. <sup>5</sup> Teq God in mataw daq meqinta emayta na ginad helta naqmo ahol waqim in gibin titnonta samanmo naw nog netaqta. Nazaq iyan mat kabiy araq a hi emad in God aqezmo anan helmo haqta, God in mat naqantaqmo anan titnonta haqta. <sup>6</sup> Teq Devit gamuk nazaqta bilammo. Devit anadib mat kabiy a hi emsamo God in anan mat titnonta samanmo haqta naqmo in tidimniyim osaqta. <sup>7</sup> Na ago Devit kazaq bilam,

On mataw God in gigo daq meqinta walemad anadin a ta hi emaqta naqmo in tidimniyim osayta ham. God in mataw na gigo daq meqinta gisuhol bugim ahol a ta hi waqta ham.

<sup>8</sup> Helmo ham, Iyahta in mat araq ago daq meqinta nulinad amenin a hi emsa mat naqmo tidimniyim hasim osaqta ham. *Buk Song 32.1-2*

<sup>9</sup> Teq Devit in mataw gihol abatan asan urotayta naqmo ginan gamuk dimunta na bilam e? Ad in mataw gisan a hi urotayta na ginan a hi bilam e? Haiqqam. Teko ya tibilay, Abraham God aqez anan helmo haqanmo God in anan mat titnonta ham hay.

<sup>10</sup> Teq Abraham ezaq iyim ossa God in anan mat titnonta ham? In asan tuqurotan teq God in anan mat titnonta ham o haiq, in asan a hi urotsamo God in anan mat titnonta ham? In asan a hi urotsamo God in anan mat titnonta haqad tibilamta.

<sup>11</sup> Bilaqim abeb teq in Abraham daq gisan urotayta na ugan in wam. Daq na in Abraham helmo haqim mat titnonta iyta na atowun nog in asanib usdaq haqad God in daq na ugta. Abraham asan a hi urotadmo in God anan helmo haqan God in anan mat titnonta ham. Daq na amalib Abraham in mataw gisan a hi urotadmo God anan helmo haqayta na gigo gises gibaqbaq tiqiy. Mataw naqanta God aqezmo anan helmo haqsa in ginan mataw titnonta haqta.

<sup>12</sup> Teq Abraham in mataw gisan a hi urotayta na gimomo gigo gises gibaqbaq a haiq. Haiqqam. Mataw gisan urotayta na in Abraham asen muzad Abraham asan a hi urotadmo God anan helmo hamta nazaqmo in God anan helmo haqsa Abraham in mataw naqanta gigo gises gibaqbaq tiqiytaqta.

*God on mataw gidimun tonnan bilamta agamukan na in on mataw God anan helmo haqayta naqmo gigota*

<sup>13</sup> Kwaziqmo God in Abraham og bunmo ugan gamuk hel diqmo bulonta. Bulonan gamuk na Abraham asesan bunmo gigo hib lahtamo. Teq Abraham in God ago maror Moses bilamta na ahaqenib lehim tuqossa teq God in og agamukan ugta nazaq a haiq. Haiqqam. Abraham God anan helmo haqan God in anan mat titnonta tihaqim teq in gamuk na ugta. <sup>14</sup> Ari mataw God ago maror Moses bilamta muzinayta naqmo in God ago os dimunta waq daqayta iyid mataw God aqezmo anan helmo haqayta na in le daq samanta tiqiy nag. Ad God gamuk hel diqmo bilamta na anon araq a hi gwahtiq nagmo. <sup>15</sup> Na ezaqgo on mataw God ago maror Moses bilamta na ahaqenib osad gunun itiyonsa God in ginan agem meqniyaqta. Ari mataw samanmo maror haiqmo osad in gunun itiyonayta na ago afaqan a hi waqta.

<sup>16</sup> I God ago maror Moses bilamta na ahaqenib iyim itiyonad afaqan waqauqta. Nazaq iyan i God aqezmo anan helmo haqayta naqmo amomo i gigeman i in ameb titnonim osauqta. God anadibmo agem dimunta samanmo igad gidimun tonaqta. Daq alulin nazaq iysa iyan God in Abraham asesan gidimun tonnan gamuk hel diqmo bilamta na in Abraham anaynayniz bun diqmo gigo hib anon tiqemdaq. Gamuk na in mataw God ago maror Moses bilamta ahaqenib osayta na gimomo giyonta a haiq. Haiqqam. Gamuk na in on mataw ginad helta Abraham anad nogta na bunmo giyonta. Na ezaqgo Abraham in on mataw helmo haqayta na bunmo gigo gises gibaqbaqta. <sup>17</sup> God ago marib gamuk araq nazaq bilaqan usaqta. Gamuk nab God in Abraham bulonim bilam,

Ya niqemid ni on mataw en kabemmo gises tiqiydaq ham. *Jenesis 17.5*

God in mataw tumoqiya giqeman kayeq ta iyayta teq in nagah a hi usaqta anan bilaqsa in tugwahtiqta. Nazaq iyan Abraham God aqez na anan helmo haqan God in anan bilaqan in i bunmo gigo gises gibaqbaqta tiqiy.

<sup>18-19</sup> Kam nab Abraham ago ulig 100 nazaq tiqiyen in ahol azawayin tihiqiy bugta. Teq in awe nignig amun a hi emyaqtamo. Abraham nagah na ahol waqyaqta teq in anad God anan helmo hamta na a hi woqad awaz meqniyim us. God tanabmo Abraham bulonim bilam, Teq nisesan gidauhan kuluwmo diq tugwahtiq daqay ham. *Jenesis 15.5*

Haqan Abraham in on mataw en kabemmo gigo gises gibaqbaq tiqiydaq haqad in God anan helmo diq haqad amen emad anadnad a hi emyaq. <sup>20</sup> In anad emyaq. God ya idimun tonnan hel diqmo bilamta haqad in

anad giger a hi emad in anad helta na a hi hulosyaq. Ad in anad helta naqmo ahol zaway ugsa in God abin tiqiluwyaq. <sup>21</sup> Nazaq iyan in anad emyaq, God hel diqmo bilamta nazaqmo in tiqemdaq haqyaq. <sup>22</sup> In nazaq God aqez anan helmo haqan God in anan mat titnonta ham.

<sup>23</sup> Teq Abraham amomo helmo haqan God anan mat titnonta hamta nazaq God ago marib a hi usaqta. Haiqgam. <sup>24</sup> Gamuk na i on mataw God anan helmo haqauqta na bunmo gimen usaqtamo. God in i gigo Iyahta Yesus hodhodab wazan ta eramta na ago i anan helmo haqsa in i ginan mataw titnonta haqauqta. <sup>25</sup> God i gigo daq meqinta walemnan haqad in Yesus waqim mataw gibenab eman in wol eman momta. Teq God i ginan on mataw titnonta haqnan haqad in Yesus hodhodab wazan ta eram.

## **I Yesus inaq moqim teq i inaq kayeqmo osauqta**

### **5**

*God i ginan mataw titnonta haqauqta na alulin*

<sup>1</sup> Nazaq iyan i gigo Iyahta Yesus Krai i gilumsihan i in anan helmo haqan God i ginan titnonta tiham. Nazaq iyan i God inaq gigem amulikmo tiqiyim i inaq an gihar ugyauqta na tihiqiy. <sup>2</sup> Yesus Krai-mo i gimen dante wastitayan muran God agem dimunta igsa i giwaz meqniyim turauq. Ad i ginad emauq, God teq i giwaqid i in ago os dimunta nab le gwahtiqeq inaq dimunmo osamta haqauq. Haqad i in amen emad ginad dimniysa osauq. <sup>3</sup> Teq i naqmo amomo ago ginad a hi dimniyaq. Haiqgam. I afaqan sorad gihol titiyaqta na ago i ginad tidimniyaqmo. Na ezaqgo afaqan nazaqta na i giqeman i gigem awaz meqniysa gituw a hi hiqiyaqta. <sup>4</sup> Ad i gigem awaz timeqniysa i Yesus ago on matawmo diq tiqiyim i a ta hi woqauqta. I Yesus ago on mataw nazaq diqta tiqiyim osad in teq boleq i gilumsiheq ta giwaqdaqta na i anan helmo diq haqad i amen emad osauqta. <sup>5</sup> Teq i Yesus amen emim osad i samanmo a hi osauqta. Haiqgam. God in ago Bugaw Dimunta igan in i giholib bolim ussa i God agem dimunta igaqta na i gigemabmo diq tiloyinauq.

<sup>6</sup> Na in kazaq. Igmo gihol ulumsihgo zaway hiqiyim ossa, kam God anad usta nabmo Krai in i on mataw daq meqinta emauqta na gimen tumom. <sup>7</sup> Ne ginad emiy. Nagaqgo mat ara q in ta mat ara q God ameb titnonim osa qta na ago ban waqeq amen moqdaqta? Na haiqgam. Ari mat ara q in ago walmataw tuteqmo gidimun tonsa teq nabag mat ta ara q in awaz meqniyeq mat dimunta na ago ban

waqeq amen tumoqdaq daqag. <sup>8</sup> Ta teq God nazaq a hi amta. I bunmo daq meqinta emad ossa in Krai eman bolim i gimen tumomta. Moqan daq na amalib God i ginan anad bilaqauqta na ulal iysa i ahol waq kemaqta. <sup>9</sup> Krai moqan anedan woqim i gigo daq meqinta tisuholan muran God i ginan on mataw titnonta tihaqaq. Nazaq iyan abeb God in on mataw gileh ugayta na ginan agem meqniysa Krai i giwaqeq ban dimuntab giqemid i tidimniy haseq osamta. <sup>10</sup> Na ezaqgo, i God ababunmo diq iyim ossa kam nabmo in atatin moqim i gimen dante eman i God inaq an anobun tuwastitay. Teq in atatin na kayeq ta iyim osa qta. Nazaq iyan i muran God inaq an anobun tuwastitayim ossa abeb in atatin i gilumsiheq ta giwaqid i tidimniy haseqmo tuqosam. <sup>11</sup> Teq i abeb dimunmo osamta naqmo amomo anan i ginad a hi dimniyaq. Haiqgam. I gigo Iyahta Yesus Krai i gimen dante eman muran i God inaq an anobun tuwastitayim osad i God anan ginad tidimniyaqmo.

*Adam moq eman gwahtiqan Yesus in os kayeqmota eman gwahtim*

<sup>12</sup> Mat amulikmo God aqez othasan daq meqinta emgo adan og kab gwahtimta. Gwahtiqan daq meqin emgo adan na in ta moq eman gwahtimtam. Gwahtiqim moq in on mataw bunmo giwam. Na ezaqgo on mataw bunmo daq meqinta emiysa na ago iyan. <sup>13</sup> God ago maror Moses bilamta na a hi gwahtiqsamo daq meqin emgo adan og kab tuqusta. Teq God ago maror na haiq iysa God in mataw gigo daq meqinta nulinad amenin a hi emaqta. <sup>14</sup> Ta teq Adam ago kamub iyim bo Moses ago kamub nab moq in on mataw bunmo giwazan woq yaqayta. Mataw na Adam gunun itiyonta nazaq na i hi emiysa teq in bunmo moq bug yaqayta.

Ari Adam in mat abeb teq gwahtiqdaqta na nog. <sup>15</sup> Ta teq Adam ago daq meqin in amta na in God ago naw in samanmo igaqta na nog a haiq. Hikidik. Mat amulik naqmo God aqez othasan on mataw kuluwmo moqiyta. Ari God agem dimunta on mataw negad in mat ta ara q amulikmo Yesus Krai-mo eman tubol. Bolim in inaqmo agem dimunta negad in samanmo naw nog on mataw kabemmo ayahmo diq tigilumsihta. <sup>16</sup> Teq Adam ago daq meqin anon amta na in God samanmo naw nog i gilumsihta na nog a haiqmo. Mat aqenta na in God aqez othasad daq meqinta amulikmo eman on mataw bunmo timeqniyan God in gilum kemim giyon bilaqan in moq daqayta tiqiyim osayta. Ari God ago naw dimunta na in kazaq. Daq meqinta kuluwmo diq tugwahtiqan teq God on mataw

giqemid titnonta iygo adanteqin na in samanmo naw nog eman gwahtimtamo.

<sup>17</sup> I ginad emuq. Mat amulikmo God aqez othasan moq in daq meqinta naqmo amalib gwahtiqim in on mataw bunmo gigo danmebta iyim giwazan woq bugiyta. Ari Yesus Kraiss on mataw gilumsihim gimen dante amta na in moq ago zaway ayahmo uriyamta. Dante naqmo amalib God agem dimunta ayahmo on mataw negad gibin titnonta samanmo naw nog tinag. Negan on mataw na kayeqmo osad in nagan zawayta bunmo giquriyamim gigo danmebta tiqiyim osayta.

<sup>18</sup> Nazaq iysa iyan mat amulikmo God anad othasad daq meqin amta na amalib on mataw bunmo gibin meqniyan God in giyon bilaqan in God ago faq waqeq moq daqayta tiqiyim osayta. Ad nazaqmo mat amulikmo God anad muzinim daq dimunta eman on mataw in anan helmo haqayta na bunmo gibin titnonta tuwaqim in kayeqmo kuluwa-kuluwmo os daqayta tiqiyim osaytamo. <sup>19</sup> Mat amulikmo God aqez othasan daq na amalib on mataw kuluwmo timeqniyim in daq meqinta emayta tiqiyiyta. Ad nazaqmo mat amulikmo God aqez muzinan on mataw kuluwmo tidimniyeq titnonta tiqiy daqaytamo.

<sup>20</sup> Ari God ago maror Moses bilamta na abeb gwahtiqan mataw gigo daq meqin kuluwmota na ulal tiqiy bug. Ta teq daq meqin kuluwmo diq iysa God agem dimunta igaqta na in daq meqinta nagan giquriyamim ayahmo diq iyta. <sup>21</sup> Na in kazaq. God agem dimunta on mataw negad in i gigo Iyahta Yesus Kraiss eman bolim in gimen dante tuwastitay. Wastitayan on mataw dante na muzinad in God ameb titnonim osayta. Nazaq iysa iyan daq meqinta in on mataw gigo mat danmebta iyim giwamuzsa in moqayta. Ad nazaqmo muran God ago agem dimunta in on mataw gigo mat danmebta iyim giwamuzsa in kayeqmo kuluwa-kuluwmo osayta.

## 6

### *I Kraiss inaq garibmo tumowta*

<sup>1</sup> Daq alulin nazaq ussa iyan muran teq i naga gamukin bilaqam? I bilaqam, I daq meqinta emtusa God agem dimunta na ayahmo i gigo hib bol tutanmo haqad luwam e? <sup>2</sup> Haiq kidik! I tumoq nog iyim daq meqinta ahaqenib a ta hi osauqta. Nazaq iyan ezaq teq i daq meqinta emad a ta luwam? <sup>3</sup> I Kraiss Yesus aholib soqotim yuw tuhuzta. Daq na amalib i Kraiss inaq tumowta nog tiqiy. Na ne ginad a hi emay ye? <sup>4</sup> I yuw huzta nab i Kraiss inaq moq nog iyim i inaq hodhodab tuqusta nog iy. Sa God ago zaway ayahta mataw ahol waqad

abin iluwayta na amalib in Kraiss hodhodab wazan eramta nazaqmo in i giwazan i tiqerawmo. Eraqim i os muturta lul araq diqta na tuwaqim osauqta.

### *I teq Kraiss inaq kayeqmo osamta*

<sup>5</sup> I Kraiss aholib soqotim in momta nazaq nog i tumowmo. Nazaq iyan i in aholib tisoqotim osad in moqim eramta nazaq nog i tiqeraqamtamo. <sup>6</sup> Ka ago ne ginad em hasiy. I gigem kwaziqta na Kraiss inaq ayib dom wolan tumomta. Moqan daq meqinta i ginad hureqgo ago zaway alulin i gigemab usta na tihiqiy. Hiqiyen muran i daq meqinta ago kabibiy on mataw a ta hi osauqta. <sup>7</sup> Na ezaqgo daq meqinta in mat tumomta na anad hureqgo ago zaway tihiqiyta.

<sup>8-9</sup> I Kraiss inaq tumowta. Teq God Kraiss hodhodab wazan eraqim in a ta hi moqdaqta tiqiy. Moqan in Kraiss wazid a ta woqdaqta ago zaway tihiqiy. Na i bunmo tuhuritta. Nazaq iyan i ginad emauq. Kraiss hodhodab eraqim kayeqmo ossa i in inaq kayeqmo tuqosammo haqauq. <sup>10</sup> Na ezaqgo, Kraiss ame amulikmo moqim in daq meqinta ago zaway meqin tonan daq meqinta in Kraiss anad hureqgo biyab haiqta. Ari Kraiss kayeq ta iyim osad in God anad muzingo osauqta. <sup>11</sup> Nazaq iyan ne ginad kazaq emiy. I Kraiss Yesus inaq moqan daq meqinta i ginad hureqgo azawayin tihiqiy haqiy. Ad i Kraiss Yesus inaq kayeq ta iyim i God anad muzingo osauqta haqiy.

<sup>12</sup> Daq meqinta in ne gigo mat danmebta iyeq in ne gisan moqdaqta na hi wamuzan. Luweq daq meqinta ne ginad wamuzsa ne gihol bilaqgo adan naqmo ne tumuzin daqay. <sup>13</sup> Ad ne gibensen gitenmos nagan gihulosid in daq meqinta ago kabibiy mataw iyeq daqdaq hi emiyimo. Ne bilaqne on mataw hodhodab tiqeraqim kayeqmo osayta nog. Nazaq iyan ne gihol anaghan na bunmo giqemid in God ago kabibiy mataw iyeq in ago daq titnonta naqmo giqemiy. <sup>14</sup> Muran ne God ago maror Moses bilamta na ahaqenib a ta hi osayta. Ne God ago agem dimunta naqmo ahaqenib osayta. Nazaq iyan daq meqinta in ne gigo ayahta iyeq a hi giwamuzdaqta.

### *I daq titnonta ago kabibiy on matawta iyeq osuq*

<sup>15</sup> Ari i God ago maror Moses bilamta na ahaqenib a ta hi osad teq i ezaq tonam? Muran i God ago agem dimunta ahaqenib osad daq meqinta hareso tiqemam daqag? Haiq kidik! <sup>16</sup> Ne gihol mat araq ahaqenib emeq aqez muzinad teq ne mat naqmo ago kabibiy matawta iyeq os daqay. Na ne ginad a hi emay ye? Nazaq iyan ne daq meqinta ago kabibiy matawta iyid in ne giwamuzsa ne tumoq

daqay. Ari ne God aqez muzinad teq ne in ameb on mataw titnonta tiqiy daqay. <sup>17</sup> Hel diqtaqmo kwaziqmo ne daq meqinta ago kabibiy mataw iyim osiya. Teq muran God ne giqeman ne in ago gamuk ahaqenib lehim ne gihol bunmo amalib in aqez na tumuzinayta. Daq naqmo ago i God esey diq uguq. <sup>18</sup> Kwaziqmo daq meqinta ne giqirquran os yaqayta. Teq God ne giqamun na hasim in ne giqeman ne daq titnonta ago kabibiy mataw tiqiyim osayta. <sup>19</sup> Yaqgo gamuk ka ya mataw gigo daq muzinim gamuk awowunmo hulaiqta. Na ezaqgo ne yaqgo gamuk adugan diqta na huritgo ginad siqim iydaq haqad. Kwaziqmo ne gibensen eman daq anumlan inaqta ago kabibiy mataw iysa ne daq meqinta haresmo ayahmo diq em yaqayta. Ad nazaqmo muran ne gibensen na emid in daq titnonta ago kabibiy mataw iysa ne God ago on mataw tawon diqta iyeq osiy.

<sup>20</sup> Kwaziqmo ne daq meqinta ago kabibiy mataw iyim ossa daq titnonta in ne ginad wamuzgo azawayim haiqta. <sup>21</sup> Teq ne daq meqinta ago kabiy em yaqayta na anon araç dimunta edowa ne waqiy? Na haiqqam. Muran ne gigo daq kwaziqta na anadin emad ne gimebay horwazimmo woqaqta. Na ezaqgo daq meqinta ago kabiy amenin na moqmo. <sup>22</sup> Ari muran God ne giqamun na tihasan ne daq meqinta ahaqenib a ta hi osay. God ne giqeman ne inmo ago kabibiy on mataw tiqiyim ne in ago kabiy emad anon dimunta tuwaqay. Teq God ago kabiy amenin na in kazaq. Muran ne God ago on mataw tawon diqta iyim osayta. Teq abeb ne os kayeqmo kuluwa-kuluwmo osayta na tuwaq daqay. <sup>23</sup> Na ezaqgo daq meqinta anawun na moqmo. Ari God ago naw in samanmo igaqta na in kazaq. In i giqeman i gigo Iyahta Kraiss Yesus aholib soqotim inaq osad i inaq kayeqmo kuluwa-kuluwmo tuqosamta.

## 7

*Muran i gigem muturta amalib kabiy emuq*

<sup>1</sup> Ya imaqbaban, ne bunmo God ago maror Moses bilamta na tuhurit kemiya. Nazaq iyan ya kazaq gibilendaiq. Mat maror na ahaqenib osad a hi moqsamo maror na in mat na wamuzaqta. Ari mat na moqid teq maror na in a ta hi wamuzdaq. Na ago ne ginad a hi emay ye? <sup>2</sup> Ad nazaqmo aw in mat tuwaqeq in an waq ago gunun ahaqenib osad in mat ta araç inaq a hi luwdaq. Ari aw na aduw tumoqid teq gunun na in aw na a ta hi irqurdaq. <sup>3</sup> Nazaq iyan aw aduw kayeqmo ossa awe in aduw huload mat ta araç waqid in anan bilaç daqay, Aw haresmo luwaqta tihaç daqay.

Ari aduw tumoqid teq aw na in an waq ago gunun na ahaqenib a ta hi osdaq. In mat ta araç waqid mataw in anan aw haresmo luwaqta nazaq a hi bilaç daqay.

<sup>4</sup> Ad nazaqmo ya imaqbaban, ne Kraiss aholib soqotan in moqsa ne inaq tumoqiymo. Moqim ne God ago maror Moses bilamta na ahaqenib a ta hi osad ne bilaqne aw aduw moqan in mat ta araç muturta wanta na nog tiqiyiy. Iyim muran ne mat hodhodab ta eramta na tuwaqim inaq osayta. God anad i in ago kabiy emsa kabiy na anon kabemmo tisorqendaq haqad in mat na igan i inaq tuqosaqta. <sup>5</sup> I gigem kwaziqta muzinad osta nab i God ago maror Moses bilamta na huritad i othasnan gihol atoranno eraqsa i daq meqinta emyauqta. Emsa daq meqinta i giholib anon emsa i moqgomo iyim osyauqta. <sup>6</sup> Ari muran i Kraiss inaq tumoqim i God ago maror kwaziqta na ahaqenib a ta hi ossa maror na in i a ta hi giqiruraq. Kwaziqmo Moses in God ago maror na mar tonan mar naqmo i gibe yahsa i God anad muzinyauqta. Ari muran God ago Bugaw Dimunta in i gimugan eman mutur iyan i ginad bilaqsa God anad muzinad tiluwaqta.

*Daq meqinta naqmo i gimeqin tonaqta*

<sup>7</sup> Ari God ago maror Moses bilamta aduganib gunun giqusaqta na in i ginad meqinta emid eraqsa teq i ezaç haqam? God ago gunun na in meqin haqam e? Haiq kidik! Gunun na a hi usta iyid ya daq meqinta ago a hi hurit nagta. Kwaziqmo ya mat araç ago nagah utetad ya daq meqinta emaiç nazaq ya ihol a hi loyinyaiqta. Teq God ago maror aduganib gunun usaqta na bilam, Ni mat araç ago nagah hi utet ham. Haqanmo ya huritim nagah utetyaiqta na loyinan in daq meqinta tiqiy. <sup>8</sup> Ya gunun na ago inad em hasta nab daq meqinta in dante inaq tiqiyim in nagah utet adan eman ya igemab gwahtiqsa ya nagah haresmo tuqutetyaiqta. Helmo, God ago maror haiqqam iysa daq meqinta moq nog iyim ago zaway hiqiyim usaqta. <sup>9</sup> Nazaq iyan God ago marorib gunun giqusaqta na in ya inadib a hi bolsa ya kayeqmo osyaiqta. Ossa teq gunun na ya inadib tubolanmo daq meqinta kayeq iyim tiqeram. <sup>10</sup> Eraqanmo ya tumoy. Moqim nab ya daq kazaq ahol way. God ago gunun Moses bilamta na in ya ilumsihid ya kayeqmo kuluwa-kuluwmo os nagta. Teq haiq. In ya iqeman ya moq hasgo tiqiyim osyaiqta. <sup>11</sup> Na ezaqgo gunun na bilaqan daq meqinta in dante inaq tiqiyim in ya ikat yagad inol eman ya tumoy. <sup>12</sup> Nazaq iyan God ago maror Moses bilamta na in meqin a haiq. Na in God-mo ago hib bolim in tawon diqta. Ad maror na aduganib

gunun giquasayta na inaqmo in tawonta teq in titnonta teq in dimun diqta.

<sup>13</sup> Teq ezaq? Towa God ago gunun ya ilumsih nagta na in ya inol eman moyta daqagya? Haiq kidikmo! Daq meqin naqmo in gunun dimunta na amalib ya inol eman moyta. Nazaq iyan daq meqinta in God ago gunun dimdimunta na giwazbuliyad gimalib i ginolsa i ginad emauq, Daq meqinta naqmo in nagah meqin diqtaqmo haqauq.

*Daq meqinta i ginad wamuzsa i daq hi emnanta emauqta*

<sup>14</sup> God ago maror Moses bilamta na Godmo ago hib bolim in i ginadmo bulonaqta. Na i bunmo tuhuritta. Teq ya isan ka in og kabta iyim iyan daq meqinta iquirquran ya in ago kabibiy mat samanta iyim osaiqta. <sup>15</sup> Nazaq iyan yaqgo daq ya emaiqta na in ya inad a hikidik muzaqta. Ya daq dimunta emnan inad bilaqta na ya a hi emaiqta. Teq ya daq emnan inad a hi bilaqta naqmo ya tutimmo emaiqta. <sup>16</sup> Ari ya daq inad a hi bilaqta naqmo emad ya inadmo in God ago maror Moses bilamta na inaq rirensa ya igemabmo diq maror na anan dimunta haqaiqta. <sup>17</sup> Nazaq iyan yaqmo diq daq hi emnanta na a hi emaiqta. Haiqqam. Daq meqinta adan ya isanib kawa usaqta naqmo in daq na emaqta. <sup>18</sup> Ya inad emaiq, Ya iholib nagah ara q dimunta a hi usaqta haqaiq. Na ya isan kaqmo anan bilaqaiq. Heltaqmo ya daq dimunta emgo inad emaiqta teq ya adanta emgo yaqgo zaway haiqta. <sup>19</sup> Ya daq dimunta emnan inad bilaqta na ya a hi emaiqta. Ad ya daq meqinta inad a hi bilaqta naqmo ya tutimmo emaiqta. <sup>20</sup> Ari ya daq inad a hi bilaqta tutimmo emad ya inad kazaq emaiq. Yaqmo diq daq na a hi emaiqta haqaiq. Haiqqam. Daq meqinta adan ya isanib usaqta naqmo in daq na emaqta haqaiq.

<sup>21</sup> Nazaq iyan daq kazaqta ya iholib ussa ya ahol waqaiqta. Ya daq dimunta emnan inad emsamo daq meqinta adan ya isanib usim eraqad in ya inad dimunta na walebolaqta. <sup>22</sup> Ya igemabmo diq God ago maror Moses bilamta na anan inad bilaqta. <sup>23</sup> Teq daq ara q diq ya iholib ussa ya ahol waqaiqta. Daq na in ya inad God ago maror muzgota na inaq an wolaqta. An wolad daq meqinta adan ya isanib usaqta na in ya iquirquran in ya ihol bunmo wamuzsaqta.

<sup>24</sup> Mataw! Ya timeqniy! Nog teq ya ilumsihad in ya isanib daq meqinta adan ka walemid in ya ihulos yagad a hi inol emdaq? <sup>25</sup> Ya God esey ugaig. I gigo Iyahta Yesus Kraiss inmo teq tiqilumsihadqta.

Ari daq alulin nazaq ussa iyan ya inadmo in God ago maror na ahaqenib ussa ta ya isan ka in daq meqinta ahaqenib usaqta.

## 8

*Krais daq meqinta walemim God ago Bugaw Dimunta igan i God anad muzingo tiqiy*

<sup>1</sup> Ari muran teq on mataw Kraiss Yesus aholib soqotim inaq osayta na in God ago maror Moses bilamta na ahaqenib a ta hi ossa maror na ago gunun in giyon bilaqsa in a ta hi meqniy daqay. <sup>2</sup> Na ezaqgo muran ya Kraiss Yesus inaq soqotim ossa Bugaw Dimunta ya inad wamuzsa ya kayeqmo osaiqta. Osad ya daq meqinta adan isanib usaqta na a ta hi muzinad ya moq hasgo adanteqin na tuhulosim luwaiqta. <sup>3</sup> Na in kazaq. I gisan ka in God ago maror Moses bilamta na ago gunun muzgo ago zaway haiqta. Nazaq iyan gunun na i gigo daq meqinta walemgo azawayin haiqta. Ari maror kwaziqta na i gilumsihadqta ago zaway hiqiyann Godmo i tigiwastitay. In atatin eman bolim in i mataw daq meqinta emauqta gisan waqim tugwahtim. Gwahtiqan God in i daq meqinta emauqta ago mebay na inmo atatin aholib em bugim teq in atatin ayon bilaqan in daq meqinta na amenin bunmo sorimmo tumom. <sup>4</sup> God atatin i gigo ban waqim moqan muran i gigemabmo diq God ago maror wazad i muz bugnan ginad tibilaqay. Ginad bilaqsa i gigem kwaziqta na anad a ta hi muzinauq. Haiqqam. Muran God ago Bugaw Dimunta anad igsa i daq emauqta.

<sup>5</sup> Mataw gigem kwaziqta anad muzinad in ginad bunmo gigem kwaziqta ago daq meqmeqinta emgo usaqta. Ari mataw Bugaw Dimunta anad muzinad luwayta na in ginad bunmo Bugaw Dimunta ago daq emgo usaqta. <sup>6</sup> Mat agem kwaziqta anad muzinaqta na in oseq teq tumoqdaqta. Ari mat Bugaw Dimunta anad muzinaqta na in os dimunta kuluwa-kuluwmo osayta na waqeq agem kute nemsu tuqosdaqta. <sup>7</sup> Na ezaqgo mat agem kwaziqta anad muzinad in God ago maror ahaqenib a hi osad in God geg ugaqta. Mat nazaqta na in God ago maror muzgo ago zaway haiqqam iyan in maror na muzan yo hiqiyayta. <sup>8</sup> Nazaq iyan mataw gigem kwaziqta anad muzinayta na in daq God anan anad bilaqta na emgo biyab a hi iyayta.

<sup>9</sup> Ari God ago Bugaw Dimunta in helmo ne giholib tuqussa teq ne gigem kwaziqta anad a ta hi muzin daqay. Haiqqam. Ne Bugaw Dimunta anad naqmo tumuzin daqay. Mat aholib Kraiss ago Bugaw a hi usaqta na in Kraiss ago mat a haiqta. <sup>10</sup> Ne ginad emiy. Daq meqinta adan ne gisanib

usaqta na ago ne tumoq daqay. Ta teq Kraiss ne giholib ossa ne giwitan kayeqmo tuqos tut daqay. Na ezaqgo Kraiss ne giholib ossa God ne gibiyssa ne mataw titnonta iyim osayta. <sup>11</sup> Na in kazaq. God in Kraiss Yesus hodhodab wazan tiqeram. Nazaq iyan in ago Bugaw Dimunta ne gimuganib ussa teq God Yesus wazan hodhodab eramta nazaqmo in ago Bugaw ne giholib usaqta na ago zaway amalib ne gisan moqdaqta na giqemid kayeq ta iy daqaymo.

*God ago Bugaw Dimunta i giqeman i God ago onmin iyauqta*

<sup>12</sup> Nazaq iyan ya imaqbaban, God i gilumsihagta na amenin ayahmo i gigo hib usaqta. Ussa i gigem kwaziqta na anad eraqsa i daq meqinta adan gisanib usaqta na a ta hi muzinam. Haiqmo diq. <sup>13</sup> Na ezaqgo ne gigem kwaziqta na anad muzinad oseq ne tumoq has daqay. Ari ne gigem kwaziqta anad ginadib bolsa ne Bugaw Dimunta ago zawayib wol emad oseq teq ne kayeqmo tuqos tut daqay.

<sup>14</sup> Mataw God ago Bugaw anad muzinayta naqmo in God ago onmint. <sup>15-16</sup> Na in kazaq. God in ago Bugaw Dimunta negan Bugaw na ne giqemid ne God rabunad ago kabibiy mataw samanta iyeq osgo haqad in ne giholib a hi usaqta. Haiqgam. Ne Bugaw Dimunta na waqan in ne giholib ussa ne God ago onminmo tiqiyim osayta. Ossa Bugaw Dimunta naqmo in i giwitan bulonsa i God ago onmin iyim osauqta na tiloyin kemad i God lilewunim bilaqauq, O kabay haqauq ni i gimam haqauqta. <sup>17</sup> Teq i God ago onmin tiqiyim iyan abeb i Gimam ago os dimunta na tuwaqamta. I gibab ayahta Kraiss in Amam ago os dimunta na tuwaqim osaqta. An abeb in waq nogmo i tuwaqamtammo. Ta teq muran i kayeqmo osad Kraiss afaqan sor nogmo i tisorammo. I Kraiss inaq ara qibmo afaqan soreq teq abeb i inaq ara qibmo God ago os dimunta nab osad in abin ayah iysa i gibin ayah tiqydaqmo.

*Abeb teq i os dimunta Heven-ib waqam*

<sup>18</sup> Muran i afaqan sorauqta. Teq ya inad emaiq, Abeb i os dimunta nab le tugwahi teq i gibin God ago onminmo diqta na ulal tiqiy hasdaq haqaiq. Haqad ya daq ayah diqta na anadin emsa i gigo afaqan i muran kam kab sorauqta ka in ya inadib nagah amik diq iyaq. <sup>19</sup> Nagah bunmo God giqeman ogib kab teq Heven-ib giqusayta nagan in God ago onmin ulal iy has daqayta na akaman amen emad in gihol husisqsa usayta. <sup>20-21</sup> Na ezaqgo nagah bunmo God giqeman gwahtiqim dimunmo usiyta na in muran timeqniyim giqusayta. Teq nagah nagan in ginadibmo a hi meqniyiya.

Haiqgam. God inmo anad am, Yaqgo onmin gibin ayahta waq daqayta nab teq nagah ya giqemta kagan bunmo inaqmo tidimniy daqaymo haqad in nagah negan giqeman in muran timeqniyim usayta. Usad God ago onmin tidimniy daqayta nab teq nagah bunmo muran meqniyim usayta na in inaqmo tidimniy has daqaymo.

<sup>22</sup> Nagah bunmo God giqamta na gihol titiysa in giholnan emad usayta. Bilaqne aw amun emnan aholnan ek tonaqta nazaq. Na i bunmo tuhuritta. <sup>23</sup> Teq nagah nagan gimomo in giholnan emad a hi usayta. Haiqgam. I inaqmo giholnan emad gaqauqtamo. Na ezaqgo God ago Bugaw Dimunta i gimuganib ussa i ginad emauq. Abeb Gimam Iyah i giwagid i in ago diq tiqiy hasamta na atowun kawa i gimuganib tuqusaq haqauqta. Haqad Gimam Iyah i giwarinid i in ago tiqiy hasamta na akaman i amen emad i giholnan emad osauqta. I in ago onmin tiqiy hasamta nab teq in i gisan moqdaqta ka wastitayid i tidimniyam.

<sup>24</sup> God i gilumsihim giwagid i ginad emad osauq. Abeb teq in i giwarinid i in ago onminmo diq tiqiy hasamta haqauq. Haqad daq nawa na a hi gwahtiqsamo i amen emauqta. Ari daq na tugwahi tiqid i ahol waqeq teq i amen a ta hi em nag. Na ezaqgo nagaggo mat nagah tuwaqim ahol waqta na in nagah na a amen ta emdaq? <sup>25</sup> Ari i teq nagah ahol a hi waqauqta na tuwaqam haqad i baq tunim gigem kute nems osauqta.

<sup>26</sup> Osad i God inaq gamuk emgo ginadnad emad gigo zaway hiqiysa God ago Bugaw Dimunta i gilumsihagta. I God anad muzeq naga diq anan bulonamta na i ginad siqim iyaqta. Teq Bugaw Dimunta na in gamuk a hi bilaqadmo ago gaq naqmo amalib in i gimen God bulonaqta. <sup>27</sup> Bulonsa God in mataw bunmo gigem ahol waq kemad in Bugaw Dimunta anad hurit kemaqmo. Na ezaqgo Bugaw Dimunta in God anadmo diq huritad in anad usaq nazaqmo in God ago on mataw tawonta na gilumsihgo bulonaqta.

<sup>28</sup> Teq i ginad kazaq emauq. God in on mataw gidimun tonnan haqad gililewunaqta haqauq. Gililewunim in ago on mataw in anan ginad bilaqayta na giwamuzsa in giholib daq bunmo gwahtiqtaqta na in gidimun tongo gwahtiqtaqta. <sup>29</sup> Na in kazaq. On mataw na a hi gwahtiqsamo God in gigo tuhuritim aholyon gitowun tiqamta. Gitowun emim on mataw na bunmo gimugan buliyeq inmo atatin nog gwahtiq daqay haqad in ginan tibilaqan usaqta. On mataw na God atatin Yesus nog gwahtiqid teq Yesus amagniz kabemmo iysa Yesus in gibab ayahta iyaq haqad in nazaq ginan

bilamta. <sup>30</sup> Ad God on mataw ginan tibilan usaqta na bunmo in gililewunaqta. Teq in on mataw gililewunaqta na bunmo giqeman in on mataw titnonta iyayta. Teq in on mataw giqeman titnonta iyayta na bunmo gibin ayahta negaqta.

*Nagah araƒ God anad iƒaqta na a hi qwaydaq*

<sup>31</sup> Nazaq iyan i God ago daq na bunmo anadin emad teq i ezaq haqam? I kazaq tibilaaqam, God i gilumsihsa mat araƒ diq geg igad gidanin a hi qwaydaq haqam. <sup>32</sup> God in atatin na a hi wasihim in i gilumsihnan haqad eman bolta. Nazaq iyan God in atatin igad in ago nagah bunmo inaqmo tiqigdaqmo.

<sup>33</sup> Nog diq God ago on mataw in gilumim aholyon giwamta na gimalib nan emdaq? God-mo i ginan mataw titnonta haqaqta. <sup>34</sup> Ad nog diq i gilum kemeq ginan meqin haqad God ago hib i gibaymuzdaq? Na haiqmo. KraiŒ YesuŒ moƒan God wazan eraqim in God aben aqabun ban osad in i gilumsihgo haqad God susumun ugad oŒaqta. <sup>35</sup> KraiŒ i ginan anad bilaqsa nog diq in anad na adanin qwaydaq? Nagah araƒ KraiŒ agem dimunta iƒaqta na adanin a hi qwaydaqta. Afaqan i giholib gwahtiƒdaqta na, teq i santitiy soramta na, teq mataw i gimuzad gimeqin ton daqayta na, teq i gigemnan moqamta na, teq i nagah osgo siqim iyamta na, teq i dan ahulib daq meqinta anobun ayamta na, teq mataw bab ig daqayta na, daq nagan bunmo in KraiŒ agem dimunta iƒaqta na adanin a hikidik qway daqayta. <sup>36</sup> Helmo, God ago marib gamuk bilamta nazaqmo daq meqinta nagan i giholib gwahtiƒdaqta. Gamuk na bilam,

Ni nibin i giholib usaqta na ago mataw gigem meqinta igad ginol emgo bilaqayta ham. In i gibiyŒa i bilaqne sipsip ginol emid moqgo tiqiyim oŒaqta ham. *Buk Song 44.22*

<sup>37</sup> Ta teq KraiŒ i ginan anad bilaqsa in i gilumsihŒa i afaqan nagan bunmo giquriyamim ameb diq tiqiyaaqta.

<sup>38-39</sup> I gigo Iyahta KraiŒ YesuŒ aholib soqotim inaq oŒsa God i ginan anad bilaq naqmo hiqiyaaqta. Nazaq iyan ya inad emaiq, Nagah araƒ diq God agem dimunta iƒaqta na adanin a hi qwaydaq haqaiq. I moqauqta na, teq i kayeqmo oŒauqta na, teq angelo dimdimunta na, teq bugaw aseŒeqta zaway amo amo wazayta na, teq daq muran gwahtiƒdaqta na, teq daq abeb gwahtiƒdaqta na, teq nagah zawayta amo amo nagan, teq nagah ulilibmo diq useq gewoƒdaqta na, teq nagah og aduganibmo diq useq gaboldaqta na, teq nagah bunmo

God giqamta nagan gigo araƒ diq in God agem dimunta iƒaqta na adanin a hikidik qway daqay.

## **God in Isrel on mataw giyon daq amta na ago Pol bilam**

### **9**

*Pol Isrel on mataw ginan anad diq meqniy*

<sup>1-3</sup> Teq tutimmo ya isenlul Juda on matawta na ginadin emad ya inad ayahmo meqniyŒa ihol afaqan diq iyaqta. Ya inad ayahta emaiqta na in kazaq. Ya KraiŒ susumun ugid in ya gileh yageq imuzid ya le saw meqintab oŒsa in ya isenlul na giwaqid in yaqgo ban waqeq dimunmo oŒ daqay haqad ya inad emaiqta. Heltaqmo ya bilaqaiq. Ya KraiŒ ago mat iyim ya a hi katiyaiq. Teq God ago Bugaw Dimunta ya inad wamuŒza ya igemab inad araƒ a hi loyinaiqmo. <sup>4</sup> Yaqgo mataw na in Isrel on matawta teq mebmemo God in gililewunim giwaaqan in ago onmin tiqiyiyta. Ad in God ahol anuwan teq ago zaway in gime anonabmo ahol waqiyta. Teq God in Isrel on mataw na gidimun tonnan haqad tuteqmo in gisesan nenaq an adugan wazyaaqta. Ad teq in ago maror MoŒes bilamta na tinagmo. Negan Isrel mataw gimomo in God ayon tamaz emgo adan na waqiyta. Teq God in mataw naqmo gidimun tonnan haqad gamuk hel diqmo gibilanta. <sup>5</sup> Isrel mataw gisesan aqen diqta na gibin ayah diqmo usaqta. Teq KraiŒ in mat diq iyim Isrel-mo gisenlul giduganib gwahtiƒqim in ginedan araƒ iyim oŒta. KraiŒ in nagah bun diqmo gigo danmebta iyim in giwamuzim oŒaqta. OŒsa God agem dimunta ugŒa in nazaqmo kuluwa-kuluwmo tuqoŒdaqta. Hel diqtaqmo.

*God Isrel gimen daq amta na ago Pol bilam*

<sup>6</sup> Tutimmo ya isenlul na KraiŒ gileh ugŒa ya in ginan inad diq meqniyaaqta. Teq ya inad emaiq, God Isrel on mataw gidimun tonnan bilamta agamukan na le saman diq a hi iyaqta haqaiq. Na ezaggo Isrel bunmo in God ago on matawta iyim a hi oŒayta. <sup>7</sup> Ad on mataw Abraham alulib gwahtiƒqiyta na bunmo in Abraham ago anaynayniz diq iyim a hi oŒaytamo. Kwaziqmo God in Abraham bulonim bilam,

Ni nitatin AiŒak-mo ago onminta naqmo ginan Abraham asenlulibta haq daqay ham. *Jenesis 21.12*

<sup>8</sup> Gamuk na alulin in kazaq. God ago onmin in matmo araƒ alulib a hi gwahtiƒqayta. Haiqgam. On mataw God gamuk hel



diqmo bilamta agamukan na alulib gwahtiqaqta na ginan Abraham asen-lulibta haqaqta. <sup>9</sup> Na ezaqgo God in Abraham hel diqmo bulonim kazaq bilam, Ulig araq kob kam kazaqtab ni niwe Sara amun tiqemid teq ya muleqeq ta boldaiq ham. *Jenesis 18.10*

<sup>10</sup> Teq gamuk ta araq usaqmo. Rebeka ago onmin giger araqibmo giqamta na in mat amulikmo alulib gwahtiqaqta. Teq mat na in i gises Aisak-mo. <sup>11-12</sup> Ta teq onmin giger na ginen agemab usad daq araq dimunta meqinta a hi emsa God anad emad amun amikta na ulum kemim aholyon waqan usta. Ad in anad amta nazaqmo diq tugwahtiqaqta haqad in Rebeka bulonim onmin giger na ginan kazaq bilam, Amun danneb hitiqdaqta na in amikqan ago kabibiy mat tiqiydaq ham. *Jenesis 25.23*

Onmin na kabiy daq emsa teq God gibiyad ginan nazaq a hi bilamta. Haiqgam. God anadibmo mataw giluwiyim gililewunaqta. <sup>13</sup> Na ago iyan God ago marib in gamuk kazaq bilam,

Ya Jakob anan inad bilaqsa ya Iso anan inad a hi bilamta ham. *Malakay 1.2-3*

<sup>14</sup> God daq nazaq emsa teq i ezaq haqam? God mataw giluwiyim giwaqaqta na in daq meqinta emaq haqam e? Haiq kidik! <sup>15</sup> God in Moses kazaq bulon,

Ya on mataw ginan inad meqniyan inad usaqta naqmo ya ginan inad meqniyaqta ham. Ad ya on mataw gilowan tonnan inad usaqta naqmo ya gilowan tonaiqta ham. *Kisim Bek 33.19*

<sup>16</sup> Nazaq iyan God in on matawmo ginad muzinim a hi gilowan tonaqta. Teq on mataw gigo zawayibmo God anad hureqsa in ginan anad a hi meqniyaqtamo. Haiqgam. In anadibmo on mataw ginan anad meqniya gidimun tonaqta. <sup>17</sup> Ne ginad emiy. God ago marib in Isip gigo king Fero bulonim bilam,

Yaqgo zaway ningo hib ulal iy hasdaq haqad yaqmo niqeman ni king iyim ban ulilibta nab osaqta ham. Yaqgo zaway ningo hib ulal iya teq on mataw og saw bunmo ya ibin tuhurit daqay ham. *Kisim Bek 9.16*

<sup>18</sup> Nazaq iyan God in mat araq anan anad meqniyan anad bilaqsa in mat na anan anad timeqniyaqta. Ad in mat araq agem emid soqotnan anad bilaqsa in anadibmo nazaq tiqemaqtamo.

<sup>19</sup> Teq luweq ne gigo araq kazaq ya ibilendaq, God nazaq emsun ta nagaqgo mataw daq meqinta emsa in nan negaqta haqdaq? In on mataw ginan bilamta nazaq in gigo hib gwahtiqaqta araq diq God anad na othasgo ago zaway haiqta haqdaq. <sup>20</sup> Mat

ni nazaq God wadaqta na ni naga matin diq? Kagoh araq in mat kagoh emaqta na susumun ugeq bilaqdaq, Nagaqgo ni kazaq ya iqam haqad in nazaq bilaqdaq e? <sup>21</sup> Mat kagoh emaqta na in og soskaq waqeq amalib kagoh giger tiqemdaq. In araq kabiy dimunta emgo emad teq in araq kabiy meqinta emgo tiqemdaq. Emid teq nog in mat kagoh giqamta na bulondaq, Ni daq meqin emaq haqdaq? Na haiqgam. Mat na anadibmo nazaq emgo inmo aholib usaqta.

<sup>22</sup> Ad nazaqmo God kagoh asor gimeqin tongo tigiwastitayan osaymo. Abeb in kagoh na ginan agem meqiniya gibay zilayad in ago zaway teq in ago agem meqniy na on mataw bunmo tigiqisihundaq. In nazaq haqad kagoh meqinta na giqeman osayta. Teq in kagoh meqinta na hidmo a hi gimeqin tonad in gihulosan sisaqmo tuqosiy. <sup>23</sup> Na ezaqgo in kagoh asor dimdimunta inmo abin dimunta teq in ago os dimunta negnan haqad tigiwastitayan osaymo. In anad emaq, Ya kagoh dimdimunta na ginan inad meqniya yaqgo nagh dimdimunta nagan ayahmo diq negsa on mataw en bunmo tigibiy daqay haqaq. <sup>24</sup> Ari kagoh dimdimunta na in i on mataw God tigililewunan osauqta naqmo. Teq in on mataw gililewunad in Juda on mataw gimomo a hi giwamta. Haiqgam. In on mataw en ta asor Juda a haiqta nagan gigo asor inaqmo tigiwammo. <sup>25</sup> Nantut Hosea bilamta nazaqmo in tiqam. Hosea God aqez tutim bilam,

Ya on mataw yaqgo dauhib a haiqta na ginan yaqgo dauh tihaqdaiq ham. Ad ya on mataw ginan inad a hi bilamta na ginan ya iquqtilmo diq tihaqdaiq ham. *Hosea 2.23*

Haqad in kazaq ta bilammo.

<sup>26</sup> Teq uliq saw ginan bilaq yaqay, Ne God ago dauh a haiq haq yaqayta nab in gibin God kayeqmo osaqta na ago onminta tuqusdaq ham. *Hosea 1.10*

<sup>27</sup> Ari teq Aisaya in Isrel on matawta na ginan atoranmo kazaq bilam, Isrel gigo on mataw in kabemmo diq bilaqne kamisib ibur nog iyim osayta ham. Ta teq Iyahta in mataw na gilikmanib amulik-mulikmo gilumsiheq tigiwaqdaq ham.

<sup>28</sup> Na ezaqgo in og kab on mataw meqinta giyon bilamta na adan emad in agudan a hi emdaq ham. Ad in on mataw na bunmo gigo daq amenin negad in araq diq a hi hullosdaq ham. *Aisaya 10.22-23*

<sup>29</sup> Haqad Aisaya ta bilam,

Bab mataw Heven-ib osayta gigo Iyahta na in Isrel gigo asor gihulosid a

hi oseq in gihol amagin tartay nagta ham. Uliq giger Sodom ayow Gomora inaq gigo on mataw bunmo tihiqiy bugiyta nazaq in tihiqiy bug nagiyimo ham. *Aisaya 1.9*  
An Aisaya bilamta nazaqmo diq tugwah-tim.

*Isrel on mataw helmo a hi haqim iyan in God ameb titnonta a hi iyiy*

<sup>30</sup> Ari teq i ezaq haqam? I kazaq diq bilaqam. On mataw en ta asor Juda a haiqta nagan in giholtuw bulad God ameb titnonta a hi iyiy haqam. In God aqez anan helmo haqsamo God in ginan titnonta tiham haqam. <sup>31</sup> Ari Isrel on mataw na in God ago maror Moses bilamta na muzinad in giholtuw diq bulad luwayta. Ta teq in maror na ago gunun a hi wol net bugad in God ameb titnonta a hi iyayta. <sup>32</sup> Nagaqgo in God ameb titnonta a hi iyayta? In God aqezmo anan helmo haqid God in ginan titnonta haqdaq nazaq in ginad a hi emayta na ago iyan. In ginad emay, I God ago maror Moses igta na ahaqenib iyeq ago gunun muz bugeq teq i God ameb titnonta iyam haqayta. Ta teq in dante na muzad luwsa gig gisen woltaydaqta na gisen woltaysa in tuwoqayta. <sup>33</sup> God ago mar bilamta nazaqmo in emayta. Gamuk na bilam,

Ahol waqiy ham. Ya uliq Sayon-ib gig araq mataw gisen woltayid woq daqayta na eman tuqusaq ham. On mataw gig na ahol a hi waqadmo lehsa gig na gisen woltayid in tuwoq daqay ham. Ari on mataw gig na anan helmo haqayta na bunmo in ya imeb turad gimebay a hi woqdaq ham. *Aisaya 8.14; 28.16*

## 10

*Isrel on mataw God ago daq a hi hurit kemiy*

<sup>1</sup> Ari ya imaqbaban, ya inad ayah diqta ussa ya tutimmo God bulonaiqta na in kazaq. God ni Isrel gilumsiheq ta gi-waq haqad ya bulonaiqta. <sup>2</sup> Teq ya Isrel on mataw ginan kazaq diq bilaqdaiq. In God anad muznan ginad bilaq naqmo hiqiyayta haqdaiq. Ta teq in ginad a hi em hasadmo God ago gamuk muzinayta haqdaiq. <sup>3</sup> Mataw na in God ameb gibin titnonta waqgo adan diq a hi huritayta. Ad in dante ta araq in gimo ginadibmo giholyon emiyta naqmo muzinad in ginad emay, I God ameb titnonimmo osauqta haqay. Ta teq in nazaq emad in God ago nan othasad in ameb gibin titnonta waqgo adanteqin diq na a hi muzinay. <sup>4</sup> Na ezaqgo Kraiss amomo God ago maror Moses bilamta na tuwolnet bugta. Wolnet

bugan muran on mataw Kraiss anan helmo haqayta na bunmo in Kraiss-mo aqummb God ameb titnonim osayta. <sup>5</sup> I ginad emuq. Moses ago marib in mat God ameb abin titnonta waqnan haqad maror agamukan muzaqta na anan kazaq bilaqaq. In God ago maror aduganib gunun giqusaqta na muzin bugeq teq in God inaq dimunmo tuqosdaq haqaq. *Wok Pris 18.5*

<sup>6</sup> Ari mat God aqezmo anan helmo haqad abin titnonta waqaqta na amen gamukta in kazaq bilaqaq,

Luweq ni nihol buloneq bilaqdaq, Nog diq Heven-ib gwaleheq dante dimunta na waqeq i gimen a gewoqdaq? haqdaq haqaq. Ni nazaq hi bilaq haqaq. *Lo 30.12*

(Mat nazaq bilaqdaqta na in bilaqne in aholtuw bulad gwaleheq Kraiss waqeq ad ogib hitiq nog iydqta.)

<sup>7</sup> Ad gamuk na bilaqaq,

Teq luweq ni kazaq bilaqdaq haqaq. Nog diq mataw tumoqiya gigo uliqab woleheq dante dimunta na waqeq i gimen a gaboldaq? haqdaq haqaq. Ni nazaq hi bilaqmo haqaq. *Lo 30.13*

(Mat nazaq bilaqdaqta na in bilaqne in aholtuw bulad mataw tumoqiya gigo uliqab woleheq Kraiss waz ta eraqid in waqeq ad gabol nog iydqta.)

<sup>8</sup> Teq gamuk nawa na in i naga daqin diq emgo haqad gibilenaq? Gamuk na bilaqaq, Dante dimunta agamukan na in ne gigerabmo diq usaqta haqaq. In ne gitenmosib teq ne gigemab usaqta haqaq. *Lo 30.14*

(Teq i on mataw gibilenim bilaqauq, Ne Kraiss anan helmo haqiy haqauqta naqmo anan dante dimunta agamukan haqayta.)

<sup>9</sup> Nazaq iyan ni niqezabmo Yesus anan 'Iyahta' haqad teq ni nigemabmo diq bilaqeq, "Helmo God in Yesus Kraiss hodhodab wazan ta eramta" haqid teq God in ni nilumsiheq tiniwaqdaq. <sup>10</sup> Na ezaqgo i gigemabmo diq God anan helmo haqsa God i ginan on mataw ginan titnonta haqaqta. Ad i ginad helta gigemab usaqta na ulum hasan gizezab gwahtiqa God i ta giwaqdaqta. <sup>11</sup> God ago gamuk nazaqmo bilamta. In bilam,

On mataw in anan helmo haqayta na bunmo in ameb turad gimebay a hi woqdaqta ham. *Aisaya 28.16*

<sup>12</sup> Nazaq iyan Juda on mataw teq on mataw en ta asor Juda a haiqta nagan nenaqmo in God ameb araqibmo osayta. Na ezaqgo Iyahta amulikmo naqmo in on mataw bunmo gigo Iyahta iyim osaqta. Ossa on mataw Iyahta lilewunad gilumsiho bulonsa in aholib nagh dimdimunta usaqta

na tineq bugaqta. <sup>13</sup> God ago gamuk nazaqmo bilamta. In bilam,

Mat aw nog in Iyahta gilumsihgo haqad anan biyeq lilewunsa in gilumsihq tigiwaq bugdaq ham. *Joel 2.32*

<sup>14</sup> Ta teq on mataw in mat na anan helmo a hi haqeq ezaq teq in lilewunid in gilumsihq ta giwaqdaq? Ad mataw na in Iyahta abin a hi huriteq ta ezaq teq in anan helmo haq daqay? Ad mat ara q leheq on mataw na Iyahta abin a hi gibilenid ta ezaq teq in abin hurit daqay? <sup>15</sup> Ad mataw ta asor in mat ara q Iyahta abin bilaqdaqta na emid a hi leheq ta ezaq teq mat na leheq on mataw na Iyahta abin gibilendaq? Na haiq iyid ezaq teq daq ara q God ago gamuk anan bilamta na in on mataw Iyahta abin a hi huritiyta, na gigo hib gwahti qdaq? Gamuk na bilam,

Mataw gamuk dimunta a luwayta na bolsa mataw in gibiyad ginad tidimniyaq ham. *Aisaya 52.7*

*Isrel on mataw Yesus awagamun dimunta na huritim asor kabemmo a hi muzinayta*

<sup>16</sup> Ta teq Isrel on mataw in Yesus awagamun dimunta na tuhuritiyta teq in gigo asor kabemmo wagam na a hi muzinayta. In gamuk Aisaya bilamta nazaq diq emayta. Gamuk na bilam,

Iyahta ham, i ningo gamuk bilaqsa mat ara q diq anan helmo a hi haqaqta ham. *Aisaya 53.1*

<sup>17</sup> God ago gamuk naway na nazaq bilaqan i ginad emauq. Mataw God ago gamuk huritim teq in anan helmo haqayta haqauq. Ad gamuk in huritim anan helmo haqayta na in Kraiss awagamun mataw bilaqad luwayta naqmo.

<sup>18</sup> Teq ya kazaq susumunaiq. Isrel towa gamuk dimunta na a hi huritiy daqagya? haqaiq. Haiqgam. In tuhuritiyta. God ago gamuk bilam,

Yaqqo nantut giqez og saw bunmo tilah ham. Lehan uliq bunno in yaqqo gamuk tuwaqiy ham. *Buk Song 19.4*

<sup>19</sup> Ad ya a ta susumunaiq. Isrel towa gamuk na alulin ago ginad a hi emiy daqagya haqaiq? Haiqgam. In ginad emiyta. Iturimmo Moses in God aqez tutim in Isrel kazaq gibilan,

Teq ya og saw bunmo dauh haresmo gidimun tonsa ne gigem timeqniy daqay ham. Ad ya on mataw en ta asor ginad haiqta na giwaqsa nab ne gigem meqin diq iy daqay ham. *Lo 32.21*

<sup>20</sup> An teq Aisaya a hi rabad in God aqez tutim gamuk kazaq atoranno bilam,

Mataw ya a hi inaguniyta na in ya tiqibiyiy ham. Ad mataw ya inan a hi susumuniyta na gimeb ya ihol tuqulal ton ham. *Aisaya 65.1*

<sup>21</sup> Teq in ta Isrel ginan kazaq bilam, Kam bunta ya on mataw na nenaq an ben wazgo haqad iben negsa in ya gileh yagad yaqqo nan othasayta ham. *Aisaya 65.2*

## 11

*God in Isrel on mataw asor gilowan ton*

<sup>1</sup> Ari teq ya kazaq ne susumun negdaiq. God in ago on mataw Isrel na gileh tineq bug e? Haiq kidik! Ya inaqmo Isrel-ib mat ara qta. Ya Abraham anaynayin ara q iyim ya Bensamin ago dauhibta ara q. Teq God gileh a hi yagta. <sup>2</sup> Ad in ago on mataw Isrel gileh a hi nagmo. Haiqgam. On mataw na a hi gwahti qsammo God in gigo tuhuritim in aholyon gitowun tiqamta. Towa ne Elaija awagamun God ago marib usaqta na ne a hi huritiy-ya. Elaija in Isrel on mataw bunno gimalib nan emad in God bulonim bilam,

<sup>3</sup> Iyahta ham, Isrel on mataw ningo nantut bunmo tiginol em bugiy ham. Teq in ningo tamaz em abanan bunmo tigiwolworiyimo ham. Ad muran ya imomo ossa in ya inol emgo tiqinagunay ham. *1 King 19.10, 14*

<sup>4</sup> Haqan God amenin emim in ezaq bulon? In bilam,

Ya on mataw 7,000 nazaq iholyon gitowun eman osayta ham. Mataw na in god katiyta Baqal anognib gibakbakan ulum laquwim abin a hi iluwiyta ham. *1 King 19.18*

<sup>5</sup> Ad nazaqmo muran kam kab God in Isrel on mataw asor agem dimunta negad aholyon gitowun eman in nawa osaymo. <sup>6</sup> God in mataw na agem dimunta samanmo naw nog negsa in ago diqta iyim osayta. Teq mataw na in God ago maror kwaziqta na ago gunun muzin bugan teq God giwamta nazaq a haiq. In nazaq iyid teq ya God agem dimunta samanmo naw nog nagta nazaq ya a hi bilaq nag.

<sup>7</sup> Nazaq iyan teq i ezaq haqam? I kazaq bilaqam, Isrel on mataw God ago dauhib gwahti qgo adanteqin nagunad luwim teq in dante na ahol a hi waqim in le a hi gwahti qiy haqam. Ari God in Isrel mataw asormo gilumim aholyon giwamta naqmo tugwahti qiyta. Teq in gigo asor kabemmo na God in gigem eman soqotsa in le a hi gwahti qayta. <sup>8</sup> Nazaq iyan God ago marib gamuk ara q kazaq bilam,

God in mataw na giqeman in gihol sahuq diq iyayta ham. In gimeq nagin eman

in saw ahol a hi waq hasayta ham. Ad in gidek eman in nan a hi huritayta ham. Mataw na nazaqmo osim bo muran kawa in nazaq tuqos tutayta ham.

*Lo 29.4*

<sup>9</sup> Sa ta Devit in mataw na ginan kazaq bilam,

In gigo neqwaq ahumabun nab in ginad dimniysa ossa in gibabun bo tawan emeq osiy ham. Tawan emid teq bul dobub woqaq nazaq nog in gibabun gibenab woqiyimo ham. Teq in gigo kam dimunta na buliyeq in gigo daq meqinta amenin waqad woq daqayta akaman iyan ham. <sup>10</sup> Sa in gime aromriq inaq iyid in saw ahol hi waq hasiy ham. Ad in gikorkoran mulbunid in nazaqmo kuluwakuwmo kok tonad turiy ham. *Buk Song 69.22-23*

*God on mataw en ta asor Juda a haiqta nagan giwam*

<sup>11</sup> Nazaq iyan ya tisusumun negnan. Isrel woqim in towa tuwoq hasim osay-ya? Haiq kidikmo! Ta teq Isrel on mataw God gileh ugsa iyan in ahol buliyim on mataw en ta asor Juda a haiqta nagan nob negim tigiwam. In mataw na giwaqsa Isrel gibiyad in gigem meqniysa ginad tubuliy daqay haqad in nazaq amta. <sup>12</sup> Isrel on mataw God ago nan othasan God ahol buliyim on mataw og kabta bunmo ginadin emad in aholib nagah dimdimunta usaqta na tineg bugaq. Teq Isrel gibin God ameb tihiqiy nog iyan God in on mataw en ta asor Juda a haiqta nagan nob negad in ayah diqmo tigidimun tonaq. Nazaq iyan abeb Isrel gigo asor kabemmo God gileh ugim osayta na in muleqeq ta bol bugid nab teq God ago on mataw bunmo tidimniy haseq tuqos daqay.

<sup>13</sup> Ari muran ya ne on mataw Juda a haiqta na tigibilennan. God ya iqeman ya on mataw en ta asor Juda a haiqta nagan gigo Aposel iyta. Iyim in kabiy ya ibenab amta na abin ya tutimmo iluwaiqta. <sup>14</sup> Ya ne gilikmanib kabiy emaiqta na abin iluwsa yaqmo igo matawta na huritad utetsa ya in gigo asor inaqmo giwaqdaiq haqad ya nazaq emaiqta. <sup>15</sup> Na ezaqgo God in Isrel gibaymuzim in ahol buliyim og kab on mataw en ta asor na bunmo nenaq an anobun tuwastitayta. Nazaq iyan ya inad emaiq, abeb God in Isrel ta giwaq bugdaqta kam nab teq daq tubuliy hasdaq haqaiq. Buliy hasid on mataw tumoqiya na bunmo hodhodab tiqeraq daqay haqaiq. <sup>16</sup> Ne ginad emiy. Mataw kabiyab didaq ameta na God ugan tawon iysa, kabiyab didaq bunmo tawonta iyim usaqmo. Teq

ay abeqar tawon iysa ay na aben bunmo tawon iyaytamo.

<sup>17</sup> Ari Isrel on mataw in bilaqne ay oliv dimun diqta na nog. An ne on mataw Juda a haiqta na ne bilaqne ay oliv kwasikta nog. God ay oliv dimunta na aben asor orqayim hunegan lehsa in ne giwaqim ay dimunta na aholib aben orqayta na asawnib tigitut. An muran ne ay oliv ago didaq dimunta ay aben diq waqayta nazaq nog ne waqad ne dimunmo osayta. <sup>18</sup> Nazaq iyan ne luweq ginad em daqay, I dimun dikan iyim i ay dimunta aben diq na giquriyamim osauqta haq daqay. Ne ginad nazaq ussun ne ginad diq em hasiy. Ay aben in abeqar yuw a hi ugaqta. Haiqgam. Ay abeqar naqmo in aben yuw ugaqta.

<sup>19</sup> Ari teq ne luweq kazaq bilaq daqay, God in ay dimunta na aholib i gitutnan haqad in ay dimunta aben diq na asor giqorqay haq daqay. <sup>20</sup> Helmo God in nazaqmo amta. Isrel on mataw God anan helmo a hi haqan iyan God in giqorqayta. Teq ne God anan helmo haqayta naqmo amomo in ne giqeman ne ay dimunta na aholib soqotim osayta. Nazaq iyan ne gihol abin hi iluwad ne God-mo rabuniy. <sup>21</sup> Ne ginad emiy. God ay aben diqta na giqorqayta. Ad nazaqmo ne nan a hi huritid in ne giqorqay tondaqmo.

<sup>22</sup> God in mataw asor gilowan tonad ta asor in daq afanfanta negaqta na ne ahol waqiy. Isrel mataw osim woqiyta na in God ago daq afanfanta na ahol tuwaqayta. Ari negmo teq God ne tigiowan tonaqta. Ad ne in ago gamuk muz tutsa teq in ne gilowan titon tutdaq. Ari ne in aqez othasid in ne tigiurot taydaq. <sup>23</sup> Teq ay aben giqorqayta na in ginad buliyeq God ago gamuk anan helmo haqid teq God in giwaqeq ay dimunta na aholib a ta gitutdaq. Na ezaqgo God in ta gitutdaqta na aza-wayin inmo aholib usaqta. <sup>24</sup> Kwaziqmo ne ay oliv kwasikta aben nog osiyta. Teq God ne giqurotim in ay oliv dimunta negmo diq gigo a haiqta na aholib gitutan ne osayta. Nazaq iyan abeb God ay dimunta aben diq giqorqayta na giwastitayeq ay dimunta na aholib a ta gitutnan haqad in ahol a hi bibiyowundaqta.

*God in ago daq dimunta on mataw giqisihungo anad emaqta*

<sup>25</sup> Ari ya imaqbaban, ne gamuk ulilemabta ka huritgo ya inad emaiq. Luweq ne ginad a hi em haseq igmo ag haq daqay haqad. Na in kazaq. God in Isrel on mataw asor giqeman in gigem soqotim usaqta. Ussa on mataw en ta asor Juda a haiqta nagan gigo asor ganim God in giwaqdaqta na in teqmo God ago maror aduganib tugwahtiq bugay. On mataw na

le tugwahtiq bugid nab teq Isrel in ginad tubuliy daqay. <sup>26</sup> Ginad buliysa God in bunmo ta giwaqdaq, God ago marib gamuk bilamta nazaq. Gamuk na bilam,

Mat Isrel gilumsiheq ta giwaqdaqta na amatin in uliq Sayon-ib oseq boldaqta ham. Boleq in daq amo amo God anan anad a hi bilaqdaqta na muz bugid lehsa teq daq nagan in Jakob asenlul Isrel gigo hib tihiqiy bugdaq ham. <sup>27</sup> Kam nab ya in gigo daq meqinta tigiwalemnan haqad ya in nenaq an adugan wazeq nazaq diqmo tigibilendaiq ham. *Aisaya 59.20-21*

<sup>28</sup> Muran Isrel on mataw in Yesus awagamun dimunta na anan helmo a hi haqad in God ago bab nog iyim osayta. Ossa God in ne on mataw juda a haiqta na ginadin emad gilumsihaqta. Ta teq kwaziqmo God in Isrel gisesan gilumim aholyon giwamta. Nazaq iyan in Isrel gisesan na ginadin emad in Isrel on mataw bunmo ginan anad bilaqdaqta. <sup>29</sup> Na ezaqgo God in on mataw gidimun tonnan haqad gitowun emeq teq in anad na in gigo hib nazaqmo tuqus tutdaq. Us tutsa in anad buliyad anad ta ara q muturta a hi em negdaq.

<sup>30</sup> Daq alulin nazaq ussa iyan ne ginad emiy. Kwaziqmo ne God ago gamuk othas yaqayta. Teq muran Isrel on mataw God aqez othassa God ne ginan anad meqniysa tigilumsihaq. <sup>31</sup> Ad nazaqmo Isrel on mataw muran God ago gamuk othassa God ne nob negim ne ginan anad meqniyaqta nazaqmo teq in Isrel ginan anad a ta meqniydaqmo. <sup>32</sup> Na ezaqgo God in on mataw bun diqmo araqibmo ginan anad meqniyan haqad in on mataw dauh bunmo giqeman in nan othas adan muzinayta.

### *I God abin iluwuq*

<sup>33</sup> Mataw! God ago daq dimdimunta teq in anad awaz meqinta na in ayahmo diq, bilaqne kamis ame ayahta sisaqmo wolahta nazaq nog! In mataw gilum kemim gimen daq em negaqt na alulin ulilemim ussa i ahol a hi waq kemaugta. Ad i in ago daq lul ara q diqta nagan ulum muzeq alulib emgo i ginad siqim diq iyaqta.

<sup>34</sup> God ago gamuk bilam,

Nog in Iyahta anad bunmo huritta? ham.

Ad nog diq in Iyahta bulonsa in anad muzta? ham *Aisaya 40.13*

<sup>35</sup> Nog diq in ago nagah ara q samanmo God ugan God ahol afaqan iyim amenin am? ham. Mat ara q diq daq nazaq a hi amta ham. *Job 41.11*

<sup>36</sup> Na ezaqgo nagah bunmo alulin God-mo. Inmo nagah bunmo giqeman gwahtiqiyta. Ad inmo nagah bunmo anamrenta. Nazaq

iyani i tuteqmo in abin iluwuq. Hel diqtaqmo.

## **Pol in on mataw Kraisa anan helmo haqayta na gigo luw os anan bilam**

### **12**

#### *I gihol tamaz nog God uguq*

<sup>1</sup> Ya imaqbaban, God ne ginan anad meqniyaqta. Nazaq iyan ya inad awaz meqin amalib ne gibilenaiq. Ne kayeqmo osad gihol tamaz nog God uguy haqaiq. Ne God-mo ago on mataw tawonta iyeq osad gihol tamaz nog God ugsa in ne gigo naw na anan anad diq bilaqdaq. Ne nazaq toneq teq ne gigo luw os bunmo bilaqne God ayon lotu emayta nazaq nog iyaq. <sup>2</sup> Teq og kab on mataw God gileh ugayta na ne tuqulum kem daqay. Ulum kemad naga daqin diq in dimunta teq in God anad muzaqta teq in God ameb titnonim usaqta na ago ne ginad tiqem has daqay.

#### *I God naw igta na akabiyani emuq*

<sup>3</sup> Nazaq iyan God anad dimunta yagad itowun eman ya ingo kabiy emaiqta na ya anadin emad ya ne bunmo kazaq gibilenaiq. Ne gihol kat ugad givin samanta hi iluwiy haqaiq. Ne ginad em haseq God naga kabiyani nagta naqmo ago towubmo ne gihol abin iluwiy. <sup>4</sup> I ginad emuq. I gihol anaghan kabemmo diq usaqta teq in gikabiyani araqibmo a haiqta. <sup>5</sup> Ad nazaqmo i on mataw kabemmota teq i bilaqne Kraisa ahol amulikmo nog i osauqta. Osad i bilaqne mat ahol amulikmo anaghan amo amo us nog iyad i bunmo an ulumsihgo osauqta.

<sup>6</sup> Teq God agem dimunta igad naw amo amo samanmo igsa i amulik-mulikmo gigo naw inaq iyauqta. Nazaq iyan mat in naga nawun wamta nazaqmo in akabiyani eman. Mat ara q God ago nantut bilaqgo anawun waqeq in God anan helmo diq haqad nantut agamukan na bilaqan. <sup>7</sup> Teq mat ara q in on mataw giholyon kabibiy emgo anawun waqeq in kabiy na em naqmo hiqiyani. Ad mat ara q in God ago gamuk asuleqin bilaqgo anawun waqeq in anad em haseq suleq anononmo bilaqan. <sup>8</sup> Teq mat ara q in mataw gigem zaway neggo anawun waqeq in mataw gigem teq ginad ulumsih naqmo hiqiyani. Ad mat ara q in on mataw ginaghan haiqta gilumsihgo anawun waqeq in ago nagah na anad hi wazsa in ayahmo negan. Teq mat ara q in on mataw giwamuzgo anawun waqeq in ahol anad bunmo

bilaqsa kabiy na eman. Ad mat araq in mataw ginan anad meqniygo anawun waqeq in anad dimniysa gilumsihan.

*I gimaqbaban gigem dimunta neguq*

<sup>9</sup> Ari ne an hi kat ugad an anan ginad bilaqsa osiy. Osad ne daq meqinta bunmo gileh ugad ne daq dimdimunta naqmo waz naqmo hiqiyiy. <sup>10</sup> Teq ne an anan ginad bilaqsa an alowan tonad osiy. Osad ne gihol abin wazid woqsa ne an abin iluwgo giwaz meqniyiy. <sup>11</sup> Teq ne God anad muznan ginad diq bilaqsa ne gituw hi hiqiyian. Sa God ago Bugaw Dimunta zaway negsa ne giwaz meqniyeq turiy. Ad Iyahta kabiy negsa ne emiy. <sup>12</sup> In teq ne gidimun tondaqta na ne amen emad ginad dimniysa osiy. Ginad dimniysa osad afaqan ne giholib gwahtiqa ne tok nemeq nan kabemmo hi bilaqiy. Ad kam bunmo ne God inaq gamuk emiy. <sup>13</sup> Teq God ago on mataw tawonta na in nagah ago siqim iysa ne gilumsihiy. Ad in ne gigo bitab bolsa ne giwaweq gilowan toniy.

<sup>14</sup> Teq mataw ne gimeqin tona God in gilumsihgo haqad ne buloniy. Bulonad in mataw na gimeqin tongo ne hi buloniy. <sup>15</sup> Ne gigo asor ginad dimniysa ne nenaq ginad dimniysa osiy. Ad ne gigo asor gaqsa ne nenaq gaqad osiy. <sup>16</sup> Ne zib alowab osad an ahaqenib iyeq osiy. Osad ne gihol abin wazid hi eraqsa ne mataw gibin haiqta na nenaq araqibmo osiy. Osad ne yaqmo ag hi haqiy.

<sup>17</sup> Mataw daq meqinta negsa ne amenin nazaqmo hi emiy. Ne on mataw bunmo gimeb daq dimdimuntaqmo emgo ginad emiy. <sup>18</sup> Ad ne an wad teq an wol aban diq emiy. Tuteqmo negmo gihol wamuzad ne on mataw bunmo nenaq midemqanmo osiy. <sup>19</sup> Ya iyognizmo diq, mataw daq meqinta negsa ne amenin hi emiy. Godmo teq in ginan agem meqniysa amenin tinegdaqta. God ago marib gamuk araq kazaq bilam,

Iyahta bilam, Daq meqinta aqenin waqgo na yaqgo kabyta ham. Yaqmo teq daq meqinta amenin tiqemdaiq ham. *Lo 32.35*

<sup>20</sup> Nazaq iyan negmo kazaq emiy.

Ni nibabun agemnan moqsa ni didaq ugid neqan. Ad in yuwnan moqsa ni yuw ugid uluwan. Ni nibabun nazaq dimun tona teq in amebay tuwoqdaq. Bilaqne ni faq azamora ginuweq in afaqinib emid oywordaqta nazaq nog in ahol loyinad in amebay ayahmo tuwoqdaq. *Gutpela Sindaun 25.21-22*

<sup>21</sup> Daq meqinta nilum waqad nimeqin tonnan tona ni hi woq. Haiqqam. Daq

naqanta nilum waqsa ni daq dimuntaqmo amalib bayid woqan.

## 13

*I gavman gihaqenib osuq*

<sup>1</sup> Ari ne bunmo gavman gihaqenib osiy. Na ezaqgo God inmo bilaqan gavman bunmo gwahtiqim giqosayta. Osad gavman araq diq in gimo gigo zawayib a hi osayta. Haiqqam. Gavman bunmo gigo zaway Godmo ago hib bolaqta. <sup>2</sup> Nazaq iyan mat nog gavman gigo nan othasad na in God anad othasaqmo. Mat naqanta teq hazizirib turad ago daq na amenin tuwaqdaqta. <sup>3</sup> Na ezaqgo on mataw daq dimunta emayta na in gavman a hi girabunayta. Ari mat daq meqinta emaqta naqmo in gavman girabundaqta. Nazaq iyan ni gavman ginan hi rabnan haqad ni daq dimuntaqmo emad luw. Luwsa gavman nibin tiqiluw daqay. <sup>4</sup> Na ezaqgo gavman in God ago kabibiy matawta. In ni niwamuzsa ni wastitayeqmo osgo haqad God in gigeaman osayta. Ari ni daq meqinta emad teq ni rab. Gavman in baqir samanta a hi wazayta. In God ago kabibiy matawta. Mataw daq meqinta emsa gavman in God abinib gigem meqniysa amenin emayta. <sup>5</sup> Nazaq iyan i gavman giwazinat gihaqenib osuq. Teq i daq meqinta emid in i ginan gigem meqniysa amenin ig daqayta naqmo amomo ago i rabad gihaqenib hi osuq. Haiqqam. Luweq i gavman giquez othaseq i Godmo ameb gihol meqin loyinam haqad i gavman gihaqenib osuq.

<sup>6</sup> Ad daq alulin naqmo ago ne takis zayaytam. Na ezaqgo gavman in God ago kabibiy mataw iyim in kabiy naqmo gihol bunmo ugayta. Ugad in kabiy ta araq gihol ulumsihgo anadin diq a hi emayta. <sup>7</sup> Nazaq iyan ne nagah gavman neg daqayta na ne negiy. Ad mataw takis amo amo waqad luwsa ne takis zay daqayta na bunmo in negiy. Ad ne mataw girabunnanta na girabunad teq ne mataw gibin inaqta na giwaziniy.

*I on mataw ginan ginad bilaqan*

<sup>8</sup> Ari ne gigo nagah araq amenin mat araq ago hib hi usan. Haiqqam. Ne an ago hib amenin usdaqta amulikmo na in kazaq. Ne an anan ginad bilaqsa os daqayta naqmo. Na ezaqgo mat in ayow anan anad bilaqad in God ago maror Moses bilamta na ago gunun tuwolnet bugaq. <sup>9</sup> Maror na aduganib gunun kazaq giqusaqta,

Ni an alulib hureqeq inaq hi us.

Ni mat araq hi wol em.

Ni hi rin ton.

Ni mat araq ago nagah hi utet. *Kisim Bek 20.13-15, 17*

Ta teq gamuk ta araq amulikmo usaqta na in gunun naway na teq gunun ta asor usayta na bunmo inaqmo giquriyamim wol net bugaqta. Gamuk na bilam, Ni nihol anan ninad bilaqagta nazaqmo ni niyow anan ninad bilaqan ham.  
*Wok Pris 19.18*

<sup>10</sup> Mat in ayow anan anad bilaqsa in a hi meqin tondaqta. Nazaq iyan on mataw an anan ginad bilaqsa osad in God ago maror Moses bilamta na tuwolnet bugayta.

*I wastitayeqmo luw osuq*

<sup>11</sup> Teq ne kam ezaqta ago ne osayta na ago ne ginad em hasad daq nawa nagan bunmo muzinad osiy. Na ezaqgo ne mebmemo Yesus anan helmo haqiyta nab God ne gilumsiheq ta giwaqdaqta na akaman in pesan nog usyaqta. Ari muran teq kam na bolim sinsin nog tiqiy. Nazaq iyan kam kawa ne osayta kab ne us hulosad eraqeq gihol asawan woltayad osiy. <sup>12</sup> Ne ginad emiy. Tarom asor ayahmo i gibun ban lehan saw thastitaytan tonaq. Nazaq iyan i romriq ago daq bunmo hulosuq. Hulosad saw anuwan ago daq dimdimunta nagan in bilaqne bab emgo giholsihen awaz meqinta nazaq nog i giholib usan. <sup>13</sup> I mataw zeqabta iyim iyan i wastitayeqmo luw osuq. Osad i yuw atoranta uluwad haresmo ek tonad saw garak hi uguq. Teq i on haresmo nenaq luwad sawzun meqmeqinta nenaq hi emad i haresmo an mugad an anan gigem hi meqniyanmo. <sup>14</sup> Ne Iyahta Yesus Kraiss ago daq giwaqeq giholsihen nog giholib emiy. Ad ne gigem kwaziqta eraqad nagah haresmo utetsa ne hi muziniy.

## 14

*I gimaqbaban gigo daq hi ulum kemuq*

<sup>1</sup> Ari ne gigo mat araq in Iyahta anan helmo haqad teq in anad helta na a hi zilimsa na ne alowan toniy. Alowan tonad daq amikmikta ago ne mat na inaq an hi mugiy. <sup>2</sup> Mat araq anad helta usaqta na in didaq haresmo neqaqta. Sa mat anad helta a hi zilimaqta na in didaq samanmo akaruwan haiqmo neqaqta. <sup>3</sup> Ari mat didaq bunmo neqaqta na in ta mat karuw a hi neqaqta na abin wazid hi woqan. Sa mat karuw a hi neqaqta na in ta mat didaq bunmo neqaqta na ago daq ulum kemad anan meqin hi bilaqanmo. Na ezaqgo God in mat didaq bunmo neqaqta na agem dimunta ugad inaq osaqtamo. <sup>4</sup> Nagaqgo ni mat araq ago kabibiy mat ulum kemad nan meqinta ugaq? Mat na inmo ago Iyahta ameb tursa in anan dimun o meqin haqagta. Haqsa mat na in ago Iyahta ameb turaq o haiq in woqag na in ago Iyahta amomo ago nagahta. Teq mat na

a hi woqdaq. Haiqgam. Iyahta in mat na wamuzad ulumsihsa in awaz meqniyeq titurdaq.

<sup>5</sup> Mat araq kam ulum kemim in kam asor anadin emad udinaqta. Sa mat araq bilaqag, Kam bunmo in araqibmo haqagta. Nazaq iyan ne amulik-mulikmo ginad emad ne naga daqin diq em daqayta na ago ne ginad amulikmo gigemab ussamo ne daq nazaq emiy. <sup>6</sup> Mat kam asor anadin emad udinaqta na in Iyahta anadin emad kam na udinaqta. Teq mat didaq bunmo neqaqta na in Iyahta anadin emad didaq na neqaqtamo. Na ezaqgo in God esey ugim teq didaq na neqaqta. Sa mat didaq bunmo a hi neqaqta na in nazaqmo Iyahta anadin emad didaq asor udinaqta. Udinad in ago didaqta na neqad in God esey ugaqtamo.

<sup>7</sup> Igmo gihol anad muzinim gwahtiqlim a hi osauqta. Ad igmo gihol anad muzinim i a hi moqauqtamo. <sup>8</sup> Haiqgam. I kayeqmo osad i Iyahta anad muzgo osauqta. Ad i moqad i Iyahta anad muzim moqauqtamo. Nazaq iyan i kayeqmo osauqta na teq i moqauqta na i Iyahta agota iyim i in anad muzauqta. <sup>9</sup> Na ezaqgo Kraiss in mataw tumoqiya teq mataw kayeqmo osayta na inaqmo gigo Iyahta iyeq osdaq haqad in moqim ta eraqim kayeqmo osaqta.

<sup>10</sup> Teq nagaqgo ni nimaqbab ago daq ulum kemad anan meqin haqagta? Ad nagaqgo ni nimaqbab ninad meqinta ugaqta? I bunmo teq God ago hazizirib tituramta. <sup>11</sup> God ago marib gamuk araq nazaq bilamta. In bilam,

Yaqmo Iyahta ham ya tutimmo osaiqta ham. Ya heltaqmo bilaqaiq ham. On mataw bunmo teq ya inognib gibakbakan ulum laquweq titur daqay ham. Turad teq in bunmo ya ibin iluwad bilaq daqay, Ni nimomo Godmo diq iyim osaqta haq daqay ham.  
*Aisaya 45.23*

<sup>12</sup> Nazaq iyan hazizir na gwahtiqlid i bunmo God ameb turad i ginad ezaq diq emad i daq emyauqta na ago alulin bunmo i tubulonamta.

*I gimaqbaban kat negsa in daq meqintab hi woqiy*

<sup>13</sup> Nazaq iyan i gimaqbaban gigo daq ulum kemad ginan meqin haqagta na i hulosuq. Ad i gihol wasihad i gimaqbaban ginognib gig araq gisen woltayid woq daqayta na emad gidanin hi qwayuqmo. <sup>14</sup> Iyahta Yesus ya inad eman hastitayan ya inad emaiq, Nagah bunmo God ameb anumlan haiqta haqaiq. Ta teq nagah araq in mat araq anadib anumlan inaqta iyeq, nagah na in mat na aholib anumlan inaq tiqiyaq. <sup>15</sup> Nazaq iyan luweq

ni didaq araƒ nimaqbab a hi neƒaqta na neƒsa in nibiyad in a hi neƒdaqta luweƒ in tineƒdaqmo. Neƒeƒ in God ameb ahol afaƒan tiƒiydaƒ. Ni daƒ nazaƒ emad ni nimaqbab anan ninad bilaƒqo adan tuhulosisim lehaƒ. Teƒ Kraiſ in nimaqbab na inaƒqmo amen momta. Nazaƒ iyan ningo didaq neƒ amalib ni nimaqbab ago anad helta na hi meƒin ton. <sup>16</sup>Ni ninad em haseƒ teƒ daƒ em. Luweƒ mataw in nagaƒ ni ninadib dimunta usaƒta na anan meƒin diƒ haƒ daƒay. <sup>17</sup>God ago maror aduganib didaq neƒ teƒ yuw uluw in nagaƒ diƒ a haiƒta. Haiƒgam. God ago maror aduganib daƒ titnonta teƒ gigeƒ kiskista teƒ ginad dimniy God ago Bugaw Dimunta eman gwahtiqaqta naƒqmo in nagaƒ hel diƒta. <sup>18</sup>Mat anad nazaƒ ussa in Kraiſ amen kabiy emsa God in anan anad dimniyaƒta. Sa mataw bunmo in mat na anan dimunta haƒaytamo.

<sup>19</sup>Nazaƒ iyan i garab zib alowab osgo adan muzinuƒ. Ad i an ulumsihsa i ginad helta usaƒta na ayah iyad in zilim bugan. <sup>20</sup>Ni didaq amomo anadin emad God ago kabiy hi meƒin ton. Helmo, didaq bunmo in neƒgo dimunmota. Ta teƒ ni didaq haresoƒ neƒsa mat araƒ nibiyad in anadib didaq hi neƒnanta na in neƒgo anad eraƒsa in tuwoƒdaƒ. Woƒsa ningo daƒ dimunta na in mat na ago hib daƒ meƒinta tiƒiydaƒ. <sup>21</sup>Nazaƒ iyan ni nimaqbab araƒ karuw a hi neƒaqta o in wain ayun a hi uluwaƒta o in daƒ araƒ a hi emaqta na ni anadin emad ni nihol wasiheƒ daƒ nagan hi emmo. Luweƒ ni nimaqbab na nibiyad in ningo daƒ na amalib tuwoƒdaƒ. <sup>22</sup>Ni ninad helta ninadib usaƒta na in ni God inaƒ gigo nagaƒ iyeƒ usan. Mat didaq bunmo anan dimun haƒad teƒ in neƒad ahol afaƒan a hi iyaƒta, mat na tidimniyim osaƒta. <sup>23</sup>Ari mat anad giger iysa didaq neƒaqta na in God ameb ahol loyinsa in daƒ meƒinta em nog iyaƒta. Na ezaƒgo daƒ na in anad helta inaƒ rirensa in a hi emaqta. Nazaƒ iyan daƒ bunmo ni ninad helta inaƒ diƒ a hi riranta na in ni niholib daƒ meƒinta iyaƒta.

## 15

*I Kraiſ ago daƒ teƒ in anad dimunta na inaƒqmo muzinuƒ*

<sup>1</sup>Ari i mataw ginad helta tizilimta na i mataw ginad helta teƒqmo zilimaƒta na gigo gunun ahaƒenib iyeƒ gilumsihad i ginadibmo hi luwuƒ. <sup>2</sup>Haiƒgam. I bunmo i giyogniz gigo gunun ahaƒenib iysa in i ginan ginad dimniysa in ginad helta na zilim bugan. <sup>3</sup>Na ezaƒgo Kraiſ anadibmo a hi luwta. Haiƒgam. God ago marib gamuk araƒ bilamta nazaƒqmo in amta. Gamuk na bilam,

Mataw ni ninadad gamuk meƒinta nigiyta na aƒamukan yaƒqmo waƒim ihol ug bug ham. *Buk Song 69.9*

<sup>4</sup>God ago gamuk kwaziƒqmo mar toniyta na bunmo in i suleƒ iggo mar toniyta. Mar tonan i gamuk na anadin emad gigeƒ zaway iysa afaƒan sorad i gituw a hi hiƒiyaƒta. Gituw a hi hiƒiyisa God teƒ i gidimun tondaƒ haƒad i amen emim osauƒta. <sup>5</sup>Teƒ ya inad ayahta ne gigo hib kazaƒ usaƒ. God zaway iƒsa i gituw a hi hiƒiyaƒta na inmo ne gigeƒmid ne bunmo ginad amulikmo Kraiſ Yesus anad nog iyeƒ ne araƒibmo osiy haƒaiƒ. <sup>6</sup>Osad ne bunmo giƒez araƒibmo rom toneƒ ne i gigo Iyahta Yesus Kraiſ amam God-mo abin iluwad osiy haƒaiƒ.

*Kraiſ in Juda mataw teƒ mataw en ta asor Juda a haiƒta nagan nenaƒqmo gilumsihata*

<sup>7</sup>Nazaƒ iyan ne Kraiſ asen muzeƒ in aƒem dimunta negad nenaƒ osaƒta nazaƒqmo ne bunmo an alowan tonad osiyimo. Ad ne daƒ nazaƒ emad ne God abin emid ayah iyan. <sup>8</sup>Ne yaƒgo gamuk ka hurit kemiy. Kwaziƒqmo God in Juda gisesan gidimun tonnan haƒad hel diƒtaƒqmo gibilanta. Gibilenan teƒ Kraiſ in God ago gamuk helta na emid anon inaƒ iyaƒdaƒ haƒad in Juda gigo kabibiy mat nog gwahtimta. <sup>9</sup>Teƒ in on mataw en ta asor Juda a haiƒta nagan God ago anad meƒniy giƒisihunid in God abin tiƒiluw daƒay haƒad in gwahtimtamo. God ago marib gamuk bilamta nazaƒ. Gamuk na bilam,

Ya on mataw en ta asor Juda a haiƒta nagan gilikmanib osad ya nibin tiƒiluwdaƒiƒ ham. Ad ya bar wazad niholnan wazid tiƒeraƒdaƒqmo ham. *Buk Song 18.49*

<sup>10</sup>Ad God ago mar ta bilam,

Ne on mataw en ta asor Juda a haiƒta na ham ne God ago on mataw nenaƒ ginad dimniysa osiy ham. *Lo 32.43*

<sup>11</sup>Teƒ in a ta bilam,

Ne on mataw en ta asor Juda a haiƒta nagan bunmo Iyahta abin iluwiy ham. Ad on mataw en bun diƒqmo God abin sorid ulilibmo gwalehan ham. *Buk Song 117.1*

<sup>12</sup>Teƒ ta Aisaya bilam,

Jesi asenlulib king araƒ tugwahtiqdaƒ ham. Gwahtiqeƒ in on mataw en bunmo tiƒiwamuzdaƒ ham. Giwamuzsa on mataw en ta asor Juda a haiƒta nagan in king naƒqmo ago hib ƒihol bunmo emad in ginad em daƒay, God teƒ mat kaƒqmo amalib i gidimun tondaƒ haƒ daƒay ham. *Aisaya 11.10*

<sup>13</sup>God nazaƒ ne gidimun tonnan bilaƒan ya in inaƒ gamuk emad ya ne gimen kazaƒ



bulonaiq. God haqaiq, Rom mataw na in ni ninan helmo haqad nibaq tunim ossa ni in giwamuz haqaiq. Giwamuzsa in gigem kute nema ginad dimniysa osayta na in giholib ate gwaleq usan haqaiq. Ussa in ningo Bugaw Dimunta ago zaway amalib nibaq tunad in giwaz meqniyeq osiy haqaiq.

## **Pol inmo ago kabiy agamukan emim teq in Kraais ago on mataw Rom-ub osayta na ago zeq dimun nag**

*Pol Aposek akabiyen emaqta na ago in anad dimniy*

<sup>14</sup> Ya imaqbaban, ya igemabmo diq ne ginan inad kazaq emaiq. Ne daq dimdimunta emad osayta teq ne nagah bunmo ago ginad em hasayta teq ne an suleq uggo azawayin ne giholib ayahmo usaqta haqaiq. <sup>15</sup> Teq ya a hi rabad ya ne giyon gamuk mar tonta kab ya ne ginad enqenungo haqad gamuk asor awaz meqinta kawa tumar ton. Na ezaqgo God agem dimunta yagad in ya itowun eman ya in ago kabiy nazaq atoranmo emgo iyim osaiqta. <sup>16</sup> In ya itowun eman ya Kraais Yesus ago kabibiy mat iyim ya on mataw en ta asor Juda a haiqta nagan gilikmanib in ago kabiy emaiqta. Kabiy emad ya on mataw en amo amo na gigo mat tamaz emaqta nog iyim ya in gigo hib God i gimen dante amta agamukan dimunta na gibilenaiqta. Gibilensa Bugaw Dimunta in on mataw na asor giqemid in God ago on mataw tawon diqta iyid teq ya in giwaeq tamaz nog God ugid in gibiyad anad tidimniydaq haqad ya kabiy emaiqta.

<sup>17</sup> Ya Kraais Yesus-mo aholib soqotim inaqq osad ya God ayon kabiy na emaiqta. Nazaq iyan ya ihol abin iluwad bilaqaiq, Yesus-mo yaqgo kabiy ka balaw tona anon emaqta haqaiq. <sup>18</sup> Ya kabiy araqq yaqgo zawayib emta na agamukan araqq a hi bilaqdaiq. Haiqqam. Kraais ya imalib kabiy emsa on mataw en ta asor Juda a haiqta nagan in yaqgo gamuk huritad teq in yaqgo daq ahol waqad in God anad muzinim Kraais anan helmo haqayta naqmo amomo ya bilaqdaiqta. <sup>19</sup> Teq Bugaw Dimunta daq azawayin inaqqta amo amo ya ibenab emad in yaqgo kabiy zaway ugaqtamo. In nazaq emsa ya uliq Jerusalem-ub Kraais awagamun dimunta na bilaqqim teq ya le og saw bunmo luwad gamuk naqmo ya on mataw bunmo gibilenim gibilenim le saw llirikum-ubmo tiqiy. <sup>20</sup> Yaqgo inad ayahta usaqta na ya leheq uliq edob Kraais abin a hi usaqta nabmo ya Yesus awagamun

gibilendaiq haqaiqta. Na ezaqgo ya mat araqq tituq tilayta na amalib bit waznan ituw hiqiyayq. <sup>21</sup> Ya God ago marib gamuk araqq bilamta nazaqmo ya emnan inad bilaqdaiq. Gamuk na bilam,

On mataw mat na awagamun asit a hi huritiyta na in mat na ahol tuwaqq daqay ham. Ad on mataw in abin asit a hi huritiyta na in ago tuhurit kem daqay ham. *Aisaya 52.15*

*Pol le Rom mataw gibiyad teq in kantri Spen-ib lehnan bilam*

<sup>22</sup> Nazaq iyan yaqgo kabiy kabemmo na tuteqmo iwasihsa ya le ne a hi gibiyaiqta. <sup>23</sup> Teq muran ya kabiy emdaiqta abanan saw kab tihiqiy. Hiqiyen ya uliq kabemmo ne gibiygo inad emyaiqta nazaqmo ya inad a ta emaiq. <sup>24</sup> Inad emad ya kantri Spen-ib lehad ya le ne gibiyad teq Spen-ib tilehdaiq haqaiq. Ya le ne gibiyad osid teq ne ya ilumsihad iqemid ya inad dimniysa Spen-ib tilehdaiq haqaiq.

<sup>25</sup> Ta teq muran ya uliq Jerusalem-ub leheq God ago on mataw tawonta asor kam meqinta waqim osayta na tigilumsihnan. <sup>26</sup> Na ezaqgo Yesus ago on mataw saw Masedoniya-ibta na teq saw Akaya-ibta na in an amugan wazim mani asor humab tuwoliy. Humab wolim in God ago on mataw tawonta uliq Jerusalem-ub osay na gilikmanib asor nagah ago siqim iyayta na gilumsihgo haqad. <sup>27</sup> Mataw na ginad diq bilaqsa mani na emiyta. Na ezaqgo Juda on mataw gigo amenin ayahmo in gigo hib usaqta. On mataw en ta asor Juda a haiqta nagan in Juda gigo hib giwitango nagah dimunta samanmo waqiyta.\* Nazaq iyan on mataw na in gimo gigo nagah giholgota na amalib in Juda mataw gina haiqta na tigilumsih daqay.

<sup>28</sup> Ari ya mani na ad Jerusalem-ub leheq mataw na gibenab emeq kabiy na tihiqiyid teq ya ihol buliyeq Spen-ib tilehad nab teq ya le ne tigibiydaiq. <sup>29</sup> Ad ya inad emaiq, Ya ne gigo hib gwahtiqdaiqta nab Kraais anad dimunta i gimalib tuwoqq bugdaq haqaiq.

<sup>30</sup> Ari ya imaqbaban, i araqqimmo i gigo Iyahta Yesus Kraais anan helmo haqayta. Sa Bugaw Dimunta i ginad wamuzsa i an anan ginad bilaqsa osauqta. Nazaq iyan ya inad awaz meqin amalib kazaq ne gibilenaiq. Ne ya ilumsihad yaqmen God buloniy haqaiq. <sup>31</sup> Bulonsa in Juda mataw in ago gamuk othasayta na gibenab ya iwaqid mataw na hi imeqin toniy haqaiq. Ad ne bulonsa ya uliq Jerusalem-ub God ago on mataw tawonta gina haiqta na gilumsihad mani na ibersa in yaqgo kabiy na anan ginad bilaqqanmo haqaiq. <sup>32</sup> Nazaq iyid teq

\* 15:27: Pol in Juda mataw gigo hib giwitango nagah dimunta anan bilamta na in Yesus-mo anan bilam.

ya God anad muzinad luwad le ne gigo hib tugwahtiqeq ya nenaq ginad dimniysa osad ya igem hastitaysa zaway muturta ta waqdaqiq haqaiq.

<sup>33</sup> Ari God i gigem eman midemimmo usaqta na in tuteqmo ne nenaq osan. Hel diqtaqmo.

## 16

*Pol in on mataw kabemmo ago zeq dimun naq*

<sup>1</sup> Ari i gihiy Fibi le ne gigo hib tugwahtiqid teq ne alowan toniy. Muran in uliq Senkriya-ib Yesus ago on matawta na gilumsihad osaqta. <sup>2</sup> In inaqmo Iyahta ago hib soqotan ne God ago on mataw tawonta bunmo giwazinayta nazaqmo ne in wazinimo. Ad in nagh ara q ago siqim iysa ne ulumsihimo. Na ezaqgo in on mataw kabemmo gilumsihad in ya ilumsih-tamo.

<sup>3</sup> Ad ne Prisila aduw Akwila inaq yaqgo zeq dimun negiy. Ya giger na nenaq i ara qibmo Krai Yesus ago kabi emauqta. <sup>4</sup> In ya ilumsihad gihol nog hulosnan toniyta. Nazaq iyan yaqgo esey diq in gigo hib lehaq. Teq ya imomo haiq. On mataw en ta asor Juda a haiqta nagan gilikmanib Yesus ago on mataw gidauhan bunmo in mat na awe inaq esey diq negaytamo. <sup>5</sup> Teq Yesus ago on mataw bo giger na gigo bitab humab wolayta na ne yaqgo zeq dimun in negiyimo.

Ad ne ya iyowmo diq Epainetus yaqgo zeq dimun ugiy. Saw Esiya-ib on mataw bunmo gilikmanib in danneb diq Krai anan helmo hamta.

<sup>6</sup> Teq ne Mariya yaqgo zeq dimun ugiy. In ne giyon kabi ayahmo amta.

<sup>7</sup> Teq ne Andronikus ayow Juniya inaq yaqgo zeq dimun negiy. In giger yaqgo isenlulta teq ya nenaq ara qibmo bit giqirquran osaytab osta. Aposel gilikmanib in giger gihin inaqtam. Teq ya Krai anan helmo a hi haqsamo in giger danneb Krai ago hib soqotiya.

<sup>8</sup> Teq ne Ampliyatus yaqgo zeq dimun ugiy. In Iyahta inaq soqotim osad in ya iyowmo diq.

<sup>9</sup> Teq ne Urbanus yaqgo zeq dimun ugiy. Mat na i inaq Krai ago kabi ara qib emauqta.

Ad ya iyow dimunta Stakis yaqgo zeq dimun ugiyimo.

<sup>10</sup> Teq ne Apeles yaqgo zeq dimun ugiy. In Krai aholib soqotim ossa God in anan anad dimniyaqta.

Ad Aristobulus asenlul nenaq yaqgo zeq dimun negiyimo.

<sup>11</sup> Teq ne Herodiyon yaqgo zeq dimun ugiy. In yaqgo isenlulta ara q.

Ad Narsisus asenlul gilikmanib on mataw Iyahta ago hib soqotim osayta na ne yaqgo zeq dimun ka in negiyimo.

<sup>12</sup> Teq ne on giger Trifina ayow Trifosa inaq yaqgo zeq dimun negiy. In Iyahta ago kabi emayta.

Ad ne ya ihiy dimunta Persis yaqgo zeq dimun ugiyimo. Aw na in Iyahta ago kabi emad aholtuw diq bulad luwaqta.

<sup>13</sup> Teq ne Rufus yaqgo zeq dimun ugiy. In Iyahta ago mat ara q dimun diqta. Ad ne Rufus anen yaqgo zeq dimun ugiyimo. In ya inen nogmo iyim osta.

<sup>14</sup> Teq ne Asinkritus teq Flegon teq Hermes teq Patrobas teq Hermas teq i gi-maqbaban in nenaq osayta na yaqgo zeq dimun negiy.

<sup>15</sup> Teq ne Filologus ayow Juliya inaq teq Nereus ahij inaq teq Olimp as teq God ago on mataw tawonta in nenaq osayta na bunmo yaqgo zeq dimun negiy.

<sup>16</sup> Ari God ago on mataw gigo daq titnonta na amalib ne an zeq dimun ugiy. Teq Krai ago on mataw gidauhan bunmo in gigo zeq dimun ne negaymo.

*Mataw asor in Yesus ago on mataw gihuserayta*

<sup>17</sup> Ari ya ima qbaban, ya inad awaz meqin diq amalib ne gibilenaiq. Ne God ago suleq tuwaqiyta na waz naqmo hiqiyad osiy haqaiq. Osad mataw suleq na geg ugad in ne gilikmanib an mug eman gwahtiqsa in ne gihuserad gigo ginad helta na wazan woqnan tonsa ne gibiy kemiy haqaiq. Gibiy kemad ne mataw naqanta giholib hiqiyeq pesanmo luwiy haqaiq. <sup>18</sup> Mataw nazaq emayta na in i gigo Iyahta Krai ago kabibiy mataw a haiqta. Haiqqam. Mataw na in giholmo anad ago kabibiy matawta iyim osayta. Osad in gamuk ahurit dimunta haresmo bilaqad in gigo soysoy amalib on mataw ginad sosilta na kat negad gihure-qayta.

<sup>19</sup> Ne God ago gamuk muzinayta na gihin uliq saw bunmo tilahta. Nazaq iyan ya ne ginan inad diq dimniyaq. Ta teq ya inad ne gigo hib usaqta na in kazaq. Ne daq dimunta emgo ginad em hasad ne daq meqinta emgo gidek zizalsa osiy haqaiq. <sup>20</sup> Ossa kam sisaq haiq God i gigem eman midemim usaqta na in ne giqemid ne gisenab Satan tubay ninal daqay.

Ari i gigo Iyahta Yesus agem dimunta negsa ne osiy.

*Mataw asor gigo zeq dimun eman Rom-ub lah*

<sup>21</sup> Ari yaqgo mangteqsor Timoti ya inaq garab kabi emauqta na in ago zeq dimun eman ne gigo hib nawa lehaq.

Ad yaqmo isenlulniz Lusiyus teq Jeson teq Sosipater in inaqmo gigo zeq dimun eman nawa lehaqmo.

<sup>22</sup> Teq yaqmo Tertiyus ya Pol aqezab gamuk waqim ne giyon kawa sansandekib kab mar tonta. Iyahta abinib ya ne zeq dimun negaiqmo.

<sup>23-24</sup> Teq yaqmo Pol bilaqaiq. Ya iyow Gayus in ago zeq dimun eman ne gigo hib lehaq haqaiq. Mat na ya iwaqim inaq ago bitab osauqta. Teq in Yesus ago on mataw kab osayta ka gibilenan in ago bitab humab wolaytamo.

Teq uliq ka ago mat gavman gigo mani wamuzaqta anan Erastus haqayta na teq i gimaqbab Kwartus inaq in giger gigo zeq dimun eman nawa lehaqmo.

*I tuteqmo God abin iluwam*

<sup>25</sup> Ari i God abin iluwuq. Ne yaqgo gamuk dimunta Yesus Krai awagamun ya bilaqaiqta na anan helmo haqsa teq God ne giqemid ne gamuk na amalib zaway iyeq titur daqay. Gamuk na in God ago anad ulilemabta agamukan naqmo. Teq gamuk na ulilemim kam sisaq diqmo usta.

<sup>26</sup> Gamuk na sisaqmo ulilemim usta teq muran God kuluwa-kuluwmo osaqta na bilaqan in ago nantut gigo marib gamuk ulilemabta na ulal tiqiy bug. Ulal iy bugan mataw en bunmo gamuk na tuhuritayta. Huritad in gilikmanib on mataw kabemmo God anad muzinim in gamuk na anan helmo tihaqay.

<sup>27</sup> Ari God amomo anad awaz meqin diqta. In Yesus Krai ago kabiy amalib i gimen dante amta na i anadin emad i in abin tuteqmo kuluwa-kuluwmo iluwuq. Hel diqtaqmo.

## 1 Korin

### Sansandek amebta Pol mar tonan uliq Korin-ib lahta Gamuk ameb lehaqta

Pol ago kamub uliq Korin in saw Akaya gigo uliq danmeb usta. Teq on mataw na god katiyta haresmo gibin iluwad in daq meqinta amo amo em yaqayta. Sa Pol in mat danmeb diqta Korin-ib Yesus awagamun dimunta bilamta. Bilaqad in uliq nab on mataw Yesus ago nan huritayta na gidauhan araq alulin amta. Ta teq Pol gihulosim saw araqab kabiy emnan lehsa Korin-ib on mataw na gilikmanib ginad katiyta haresmo gwahtim. Nazaq iyan Pol in ginad meqinta na wastitaynan haqad in anad dimdimunta kabemmo sansandek kab mar ton nagta.

Pol in Kraiis ago on mataw Korin-ibta na ginan anad meqniy, luweq in ginad helta na sosil iysa in dante titnonta na tuhulos daqay haqad. Nazaq iyan mataw na gihol huserim an bakikiyan ugsa Pol gamuk awaz meqinta nag. Teq in gigo daq asor meqinta an haresmo hureqim inaq usayta na teq an haziririb emayta na ago in ginadim in ginad meqinta na wastitay nag. Ad in an waq ago adan dimunta na ago gibilenim teq in mataw god katiyta gimen tamaz akaruwan neqayta na ago asor in bilammo. Bilaqim tihiqiyan teq in God ayon lotu em daqayta ago adan dimunta na ago bilaqim teq in Bugaw Dimunta ago naw amo amo na asuleqin nag. Negim huload in mataw tumoqiya teq hodhodab eraq daqayta na ago agamukan gibilan kammo. Korin on mataw nagah kagan bunmo anan ginad a hi em hasad in daq haresmo em yaqayta. Teq Pol in gamuk dimun diqta God anad ezaq usaqta na gibilen siram.

Teq nagah araq ayahta Pol anan bilamta na in kazaq. Ni on mataw bunmo ginan ninad bilaqdaqta na in naw ameb diqta God in ago on mataw neqaqta. Gamuk na ni 1 Korin 13 nab naguneq teq ahol waqdaq.

### Kraiss ago on mataw an a hi mugad gihol abin wazid a hi eraqdaqta

*Pol in Korin on mataw Yesus anan helmo haqayta na gimen gamuk ka mar tonta*

<sup>1-2</sup> Ari yaqmo Pol, God-mo anad bilaqan in ya ililewunan ya Kraiis Yesus ago Aposel iyta. Ya imaqbab Sostenes inaq i giger sansandek ka mar tonim ne God ago on mataw uliq Korin-ib Yesus ago nan huritad

osayta na gimen eman leh neqaq. God ne giwaqid ne in ago on mataw tawonta iyeq os daqay haqad in ne gililewunta. Gililewunan ne Kraiis Yesus ago hib soqotim osad God ameb ne tawon diq iyim osayta. Teq ne gimomo a haiq. Og saw bunmo on mataw i gigo Iyahta Yesus Kraiis in gilumsihgo lilewunayta na bunmo in ne nenaqmo God amomo ago diqta iyim osayta. Na ezaqgo Yesus in on mataw en ta asor na gigo Iyahta iyim osad in i gigo Iyahta iyim osaqtam.

<sup>3</sup> I Gimam God teq i gigo Iyahta Yesus Kraiis inaq in gigem dimunta negad in ne gigem emid kiskismo usan.

#### *Pol anad dimniysa God esey diq ug*

<sup>4</sup> Kam bunmo ya ne ginadin emad God esey diq ugaiqta. Na ezaqgo ne Kraiis Yesus aholib soqotim inaq ossa God agem dimunta negad in ne gilowan diq tonaqta. <sup>5</sup> Na in kazaq. Ne Kraiis aholib soqotim ossa in ago nagah dimdimunta kabemmo na ne gigo tiqiyan gamuk dimunta teq ginad dimunta bunmo ne gigo hib ate gwalim giqusaqta. <sup>6</sup> Teq nagah dimunta nawa na ne giholib ayahmo ussa ne Kraiis awagamun i ne gibilenta na adan tiqemay. <sup>7</sup> Nazaq iyan ne Bugaw Dimunta ago naw araq diq ago siqim a hi iyad ne i gigo Iyahta Yesus Kraiis teq ulalab muleqeq ta boldaq haqad amen emad ne gihol husisiqsa osayta. <sup>8</sup> Sa inmo zaway negsa ne giwaz meqniyeq ossa le ne gigo kam abebtanta tiqiyaq. Nazaq iyid teq i gigo Iyahta Yesus Kraiis ago kam ayahta nab ne giholib daq araq ananin waq daqayta na haiq iyaq. <sup>9</sup> God bilamta nazaqmo diq in emaqta. Nazaq iyan in ne gililewunim gigeman ne in atatin i gigo Iyahta Yesus Kraiis inaq gigem araqibmo iyim osayta.

#### *Uliq Korin-ib Kraiis ago on mataw gihol huserim humab amo amo iyiy*

<sup>10</sup> Ya imaqbaban, i gigo Iyahta Yesus Kraiis abinib ya atoranim kazaq ne gibilenaiq. Ne bunmo araqibmo osad gamuk araqibmo bilaqad gihol uroteq amo amo hi iyiy haqaiq. Ad ne ned amulikmo os nog iyad gigem ginad amulikmo iyeq osiy haqaiq. <sup>11</sup> Ya imaqbaban, aw anan Klowe haqayta na ago walmataw asor bolim kazaq ibilenim bilaqiy, Ne gilikmanib an mug ayahmo usaq haqiy. <sup>12</sup> Ne gigo mataw asor bilaqay, I Pol ago dauhibta haqay. Sa asor bilaqay, I Apolos ago dauhibta haqay. Sa asor bilaqay, I Pita ago dauhibta haqsa asor bilaqay, I Kraiis ago dauhibta haqay. Nazaq iysa ya bilaqaiq.

<sup>13</sup> Kraiis in mataw dauh amo amo gilulin eman ne gamuk nazaq bilaqay ye? Teq yaqmo Pol ne gimen ayib ihol nog hulosisim moqan ne nazaq bilaqay ye? Ad ne yaqmo

Pol inanib yuw huziy ye? <sup>14</sup> Ne gilik-manib mataw giger Krispus ayow Gayus inaq naqmo ya yuwub huz negta. Teq mataw asor na ya a hi huz negta. Ya ne kabemmo a hi gihuz negta na ago ya inad tidimniyaq. <sup>15</sup> Na ezaqgo mataw in ne ginan bilaq daqay, Korin on mataw Polmo abinib yuw huziyta nazaq in a hi bilaq daqay. <sup>16</sup> Helmo ya on mataw Stefanas ago bitab osayta na yuwub huz negta. Teq ya ne gigo mataw ta asor gihuz negmo o haiq na ya inad a hi em hasaiq. <sup>17</sup> Kraisy a iqeman ya on mataw gihuz neggo a hi luwaiqta. Haiqgam. Ya Yesus awagamun dimunta naqmo on mataw gibileng haqad in ya iqeman bolta. Teq ya mat inad awaz meqinta iyim gamuk wizwazimmo gibilengta nazaq ya ihol anan a hi bilaq-daiq. Na ezaqgo luweq ya nazaq gamuk wizwazeq bilaqsa mataw gidek sirirsa in ya iqezmo anan helmo haqad teq in Kraisy ago kruse anadin a hi emad ago zaway asit a hi loyin daqay na ago iyan.

*God ago zaway na Kraisy-mo*

<sup>18</sup> On mataw God ago maror asan ban osayta na in timeqniyim moqgo danteb osayta. Nazaq iyan ya Yesus awagamun dimunta gibilensa in Kraisy ayib momta na agamukan huritsa in gamuk agadanta nog iyaq. Sa i on mataw God i gilumsihim giwaqagta na i gamuk na huritsa in God ago zaway awaz meqin diqta in amalib i giwaqagta na nog iyaq. <sup>19</sup> God ago marib in gamuk ara q kazaq bilam,

Ya mataw gigo ginad awaz meqinta na bayid woqsa ya mataw gimaqbel inaqta na ginad tuwaleboldaiq ham. *Aisaya 29.14*

<sup>20</sup> Nazaq iyan mat anad awaz meqinta na in ezaq haqdaq? Ad mat suleq kabemmo amta na in naga gamukin bilaqdaq? Ad mataw gamukib an wolgo hurit kemiya na in gamuk ezaqta i gibilen daqay? God in og ka ago mataw ginad awaz meqinta nagan bunmo giqeman in mataw ginad haiqta nog tiqiyay.

<sup>21</sup> God-mo anad awaz meqin diqta. In anad em hasimmo mataw gidanin qwayan in ginad awaz meqinta amalib God nagun yo hiqiyayta. Na ezaqgo God in on mataw gimen dante kazaqta emnan anad bilam. In i kabibiy mataw giqeman i in ago gamuk ahuritan ara q diqta na amalib on mataw gibilensa in huritad anan helmo haqsa God in gilumsihim giwaqagta. <sup>22</sup> Ne ginad emiy. Juda on mataw daq azawayin inaqta ahol waqnan atorano bilaqayta. Sa ta Grik on mataw in og ka ago nagah bunmo alulin nagunayta. <sup>23</sup> Ta teq i gamuk kazaq on mataw na bunmo gibileng. Kraisy ayib dom wolani momta haqauq. I nazaq

gibilensa daq nawa na in daq zawayta nog a hi iysa Juda on mataw i gigo gamuk na anan helmo haqnan ginadnad diq emayta. Sa Grik on mataw gamuk na huritsa in bilaqne gamuk agadanta nog iyaq. <sup>24</sup> Ari God on mataw gililewunta na bunmo, Juda on mataw asor teq Grik on mataw asor inaqmo, in i gigo gamuk na huritiim ginad emay, God ago zaway teq in anad awaz meqinta na Kraisy-mo ago hib ulal tiqiy bugaqta haqay. <sup>25</sup> Na ezaqgo God ago gamuk ahuritan agadan nogta na in mataw gigo ginad awaz meqinta uriyamaqta. Sa God ago daq azawayin haiqta nog na in mataw gigo zaway uriyamaqta.

<sup>26</sup> Ya imaqbaban, kwaziqmo God ne gililewunan ne in ago maror aduganib gwahti qiyta na ne anadin ta emiy. Kam nab og ka ago mataw marorta na teq mataw ginad awaz meqinta na teq mataw gibin inaqta na kabemmo ne nenaq a hi gwahti qiy. <sup>27</sup> Na ezaqgo God in og ka ago mataw ginad awaz meqinta mebay negnan haqad in mataw ginad awaz meqin haiqta nagan gilumim giwam. Ad in og ka ago mataw zawayta na mebay negnan haqad in mataw giwaz meqin haiqta na gilumim giwammo. <sup>28</sup> God in on mataw og kab gibin haiqta teq mataw ginan Meqinta haqayta teq ginan Samanta haqayta naqmo gilumim aholyon giwamta. Daq na amalib in mataw gibin inaqta na giqeman in bilaqne mataw samanta gibin haiqta nog tiqiyay. <sup>29</sup> Nazaq iyan mat ara q in yaqmo ag haqad God ameb ahol abin a hi iluwdaq.

<sup>30</sup> Haiqgam. God-mo ne giqeman ne Kraisy Yesus ago hib soqotim osayta. Ossa Yesus-mo in anad awaz meqinta igsa i ginad inaq iyim osauqta. Teq Yesus-mo abin titnonta i giholib ussa i God ago on mataw tawonta iyim osauqta. Teq Yesus-mo i gizayan i God agota iyim osauqta. <sup>31</sup> Nazaq iyan God ago marib gamuk ara q bilamta nazaq i emuq. In bilam,

Mat inmo ahol abin tiqiluwunan haqad teq Iyahta in ulumsihita naqmo ago in ahol abin iluwan ham. *Jeremaya 9.24*

## 2

*Pol in Korin gigo ginad helta na anan bilam*

<sup>1</sup> Ari ya imaqbaban, ya ne gigo hib lehim God ago gamuk alulin ullemim usta na gibilenad kam nab ya inad awaz meqinta amalib gamuk akamoy moyin inaqta a hi neg. <sup>2</sup> Kam nab ya inad awaz meqinta kabemmo gibilennan ituw hiqiyta. Ya Yesus Kraisy ayib dom wolani momta naqmo amomo gibileng haqad ya inad emta. <sup>3</sup> Inad emim ya gamuk na ne gibileng haqad ne gigo hib lehim ya ago zaway

haiqmo osad ya rabad ihol harara nem naqmo hiqiyayta. <sup>4</sup> Ad ya Yesus Krai awagamun dimunta na gibilenad yaqmo igo zaway teq ya inad awaz meqinta amalib ya ne ginad eman a hi buliy. Haiqqam. Ya God ago Bugaw Dimunta ago zaway naqmo amalib gibilenta. <sup>5</sup> Nazaq iyan ne matmo ara q ago anad awaz meqinta huritim ginad buliyim Yesus anan helmo a hi haqiy. Haiqqam. God anad ne inmo ago zaway naqmo ahol waqad Yesus anan helmo haq daqay haqad in ago zaway nazaq ne giqisi-hunta.

*God ago Bugaw Dimunta naqmo i ginad eman hastitayaqta*

<sup>6</sup> Helmo, God ago on mataw gihol awaz meqniysa ginad tizilimta na in i gigo gamuk huritsa i bilaqne mataw ginad awaz meqinta gamuk bilaq nog iyauqta. Ta teq i gigo gamuk na in og ka agota a haiq. Ad in og ka ago mataw marorta gamuk bilaqayta nazaq nog a haiqmo. Mataw marorta bunmo in osim tihiqiyayta. <sup>7</sup> I God ago anad awaz meqinta naqmo i bilaqauqta. Na in kazaq. Kwaziqmo God og ka a hi emadmo in i gimen dante emid i inaq dimunmo osamta haqad in anad amta. Anad emim in anad awaz meqinta na ulileman mataw a hi hurit yaqay. <sup>8</sup> Nazaq iyan og ka ago mataw aseseqta bunmo in God ago anad awaz meqinta na ago ginad a hi em hasiy. Haiqqam. Mataw aseseqta nagan in God anad ulilemabta na alulin hurit kemeq teq in Mat Iyahta abin teq ahol anuwan ayahta inaq uliq Heven-ib osim bolta na waqeq ayib dom a hi wol nagiy.

<sup>9</sup> God ago marib gamuk ara q kazaq bilam,

On mataw God anan ginad bilaqayta na God in gimen os ara q dimun diqta tuwastitayan usaq ham. Teq mat ara q diq in ameb os dimunta na asit ahol a hi wanta ham. Ad mat ara q diq os dimunta na ago anad a hi em hastamo ham. *Aisaya 64.4*

<sup>10</sup> Ta teq God in ago Bugaw Dimunta eman bolim nagah mataw gimeb ulilemim usaqta nagan in i tigiqisihunaqta. Na ezaqgo Bugaw Dimunta in nagah bunmo ulilemim usaqta na ahol waqayta. Ahol waqad in God ago anad awaz meqinta akasnaknib ulilem naqmo hiqiyim usaqta na inaqmo in ahol waqaytamo. <sup>11</sup> Na in kazaq. Mat ara q anad emsamo mat ta ara q in anad na huritdaq e? Na haiqqam. Mat na awitan amuganib usaqta naqmo in anad na huritaqta. Ad nazaqmo God anad emsa mat ara q diq in anad na a hi huritaqta. God ago Bugaw Dimunta naqmo in God anad huritaqta. <sup>12</sup> Ne ginad emiy. I bugaw ara q og kab osim bolaqta na a hi wawta.

Haiqqam. I Bugaw Dimunta God ago hib osim bolaqta naqmo i tuwawta. Waqan in i ginad eman hastitayan i God ago os dimunta in samanmo igaqta na ago tuhurit kemaqta. <sup>13</sup> Hurit kemim i God ago os dimunta naqmo agamukan on mataw gibilenaqta. Teq gamuk dimunta nawa i bilaqauqta na i og kab mataw ginad awaz meqinta gigo hib a hi wawta. Haiqqam. Bugaw Dimunta inmo anad dimunta na igsa i God ago os dimunta na agamukan bilaqauqta. Bilaqsa mataw giduganib Bugaw Dimunta usaqta naqmo in huritim ginad em hasayta.

<sup>14</sup> Mataw giholib Bugaw Dimunta a hi usaqta na in ginad soqotim usaqta. In ginad a hi hastitaysa in God ago nagah dimdimunta na anan helmo a hi haqayta. In nagah nagan agamukan huritsa in bilaqne gamuk agadanta alulin haiqta nog iyaq. Mataw na in Bugaw Dimunta giholib haiqqam iyim in gamuk na a hi ulum kemim ginad a hi em hasayta. <sup>15</sup> Ari mataw giholib Bugaw Dimunta usaqta na in nagah bunmo ulum kemim ginad em hasayta. Sa mataw God ago Bugaw Dimunta inaq a hi luwayta na in mataw ginad em hasayta na a hi gilum kem daqay. <sup>16</sup> Na ezaqgo God ago marib gamuk ara q kazaq bilam,

Nog diq Iyahta ago anad bunmo tuhurit kemim teq in suleq ta ara q muturta uqta? ham. *Aisaya 40.13*

Teq Bugaw Dimunta in i Krai anad gibilensa i hurit kemaqta.

### 3

*Mat Yesus ago on mataw gimen kabiy ema qta na in God-mo ago kabibiy mat*

<sup>1</sup> Ari ya imaqbaban, kwaziqmo ne Krai aholib soqotim inaq ossa ya ne gibiyssa ne God ago Bugaw Dimunta anad muzinayta nazaq nog ya a hi gibiyaiq. Nazaq iyan ya ne gamuk gibilenta na bilaqne mataw gigem kwaziqta anad muzinayta ya gibilen nog iy. Kam nab ne gigem kwaziqtab os tutad ne Krai ago daq dimunta emgo ne bilaqne onmintana nog iyim ginadnad emad os yaqay. <sup>2</sup> Ossa ya ne didaq atoranta negsa ne a hi neq yaqay. Haiqqam. Ne didaq atoranta neqgo hiqiyssa ya sus negsa ne neq yaqay. Ad muran kam kab ne didaq atoranta neqgo gigem awaz a hi meqniyaqmo. <sup>3</sup> Na ezaqgo ne gigem kwaziqta ago daq na ne muz tutsa iyan. Ne gilikmanib mataw an anan gigem meqniysa an wadayta. Daq nawa ne emayta na in gigem kwaziqta naqmo agota. Teq ne gigem kwaziqta ago anadta naqmo ne muzinad ne mataw ogibta daq em nog tiqiyay. Nazaq a haiq e? <sup>4</sup> Ad mat ara q bilaqay, Ya Pol ago dauhibta haqay. Sa mat ara q

bilaqaaq, Ya Apolos ago dauhibta haqaaq. Daq nazaq ne emad ne bilaqne og ka ago matawta nog a hi iyay ye?

<sup>5</sup> Ne ginad em hasiy. Apolos in naga matin? Ad yaqmo Pol ya naga matinmo? Yaqyow Apolos inaq i giger God ago kabibiy mataw samanta. Iyahta kabiy i gibenab amta naqmo i emsa ne Kraisa anan helmo haqiyta. <sup>6</sup> Ya God ago didaaq amagin kabiyab leyan teq Apolos bolim yuw uqta. Teq God-mo didaaq na eman in kabiyab gwalim anon amta. <sup>7</sup> Nazaq iyan mat didaaq amagin kabiyab leyaqta na abin haiqta. Sa mat didaaq ahokan gwalisa yuw uqaqta na abin haiqtamo. God inmo didaaq kabiyab eman gwalim anon emaqta. Nazaq iyan inmo amomo abin inaqta. <sup>8</sup> Mat didaaq amagin kabiyab leyaqta na teq mat didaaq amagin yuw uqaqta na in giger ginad amulikmo iysa in garabmo God ago kabiy emayta. Teq abeb in gigo kabiy na amenin waqad in bunmo gigo kabiy ahunibmo naw na tuwaaq daqay. <sup>9</sup> Na ezaqgo i God ago kabibiy mataw kabiy garabmo emauqta. Sa ne bilaqne God ago kabiyab didaaq leyan gwalaaqta nazaq nog. Ad ne bilaqne God aholyon bit wazan eramat nazaq nogmo.

*Mat Yesus ago on mataw gimen kabiy emaqta na in bilaqne mat bit emaqta nazaq nog*

<sup>10</sup> God agem dimunta yaqad in ya iqeman ya ne gigo hib lehim Yesus awagamun anononmo gibilen, bilaqne mat bit emaqta wizwazimmo bit alulin emaq nazaqmo. Ya bit alulin na tiqeman teq mat araƒ lehim yaqgo kabiy na amalib bit anon wazan tiqeraqaaq. Teq mataw bit akabiyan emayta na bunmo ginad em haseq teq in yaqgo kabiy na amalib bit anon emiy. <sup>11</sup> Na ezaqgo mataw bit alulin amo amo a hi em daqayta. Haiqqam. Bit alulin amulikmo usaqta na Yesus Kraisa-mo. <sup>12</sup> Teq bit alulin amulikmo nab mataw asor gol amalib bit anon wazayta. Sa asor silva amalib bit anon emsa asor gig dimdimunta anawun ayahmota gimalib bit anon wazayta. Teq asor ay amalib bit anon emsa asor rey amalib bit anon wazayta. Sa asor tuqir amikmikta amalib bit anon emayta.

<sup>13</sup> Ari abeb Iyahta ta boldaaqta akamnib nab mataw bunmo gigo kabiy ulal tiqiydaq. Kam nab faq in mataw gigo kabiy bunmo oysa in naga kabiyab diq emiyta na ulalab tugwahtiqaq. Faq naqmo kabiy bunmo oyworsa noggo kabiy tuteqmo usdaqta na teq nog kabiy samanta amta na ulal iysa i ahol tuwaaq kemam. <sup>14</sup> Mat araƒ bit alulin na amalib bit anon awaz meqinta emid teq faq na a hi oydaqta. Ad in kabiy dimunmo amta na ago amenin dimunta tuwaaqdaq. <sup>15</sup> Ari kabibiy mat araƒ bit alulin na amalib

bit anon awaz meqin haiqta emid teq faq na bo oy bugid mat na ago kabiy bunmo tihiqiy bugdaq. Teq mat na a hi moqdaq. Bilaqne mat ago bit faq oysa in eraqim ago nagah bunmo hulosisim asan ban tukim lehim a hi moqaaqta nazaq nog.

*God ago bit diq na negmo*

<sup>16</sup> Ne bunmo bilaqne God ago bit nog ne osayta. Sa God ago Bugaw Dimunta bolim ne giduganib osaqta. Na ago ne ginad a hi em hasay ye? <sup>17</sup> God ago bit na tawon diqta. Nazaq iyan mat araƒ God ago bit na meqin tonid God in mat na timeqin tondaqmo. Teq God ago bit na negmo.

*I mataw og kabta gihin hi iluwuu*

<sup>18</sup> Ne gihol hi kat ugiy. Ne gilikmanib mat aw nog bilaqaaq. Ya og ka ago daq bunmo ago tuhurit kemta haqaaqta na in anad em hasan. In anad awaz meqinta na asit a hi ulumsihdaq. Ari in anad buliyeq Yesus awagamun anan helmo haqsa ta mataw og kabta in anan agadan haqsa nab teq in mat anad awaz meqinta tiqiydaq. <sup>19</sup> Na ezaqgo og kab mataw ginad awaz meqinta na bunmo in God ameb mataw agadanta nog iyayta. God ago marib gamuk araƒ kazaq bilam,

Mataw ginad awaz meqinta na gimileq iyad God aban emeq tuknan tonsa teq haiq ham. God in mataw na gigo daq katiyta naqmo amalib gidanin qwayim giwazaqta ham. *Job 5.13*

<sup>20</sup> Teq God ago gamuk kazaq bilammo.

Og ka ago mataw ginad awaz meqinta na in giholyon dante wastitaynan haqad ginad emsamo Iyahta in ginad na huritaqta ham. Huritad in anad emaq, Mataw aseseqta ginad na in saman diqta haqaaq ham. In ginad na anon araƒ a hi emdaq haqaaq ham. *Buk Song 94.11*

<sup>21</sup> Nazaq iyan ne og kab mataw aseseqta gihin hi iluwiy. Na ezaqgo God ago nagah dimdimunta bunmo in ne bunmo gigo tiqiyim usaqta. <sup>22</sup> Yaqmo Pol ya ne bunmo gigota. Sa mataw giger Apolos ayow Pita inaq in nazaqmo ne bunmo gigotamo. Teq og ka bunmo teq ne kayeqmo os daqayta na teq ne moq daqayta na teq daq muran kam kab gwahtiqaqta na teq daq abeb teq gwahtiqaqta nagan bunmo in ne bunmo gigo tiqiyim usaqta. <sup>23</sup> Sa ne bunmo Kraisa agota iysa Kraisa in God ago iyaqtaqmo.

## 4

*Iyahta inmo ago kabibiy mataw gilum kemaqta*

<sup>1</sup> Ne i ginan ginad kazaq emiy. I Kraisa ago kabibiy matawta haqiy. Teq i gigo kabiy na i God ago gamuk alulin ulilemim

usta na wamuzad i wastitayimmo mataw gibilenaugta haqiy. <sup>2</sup> Teq kabibiy mat dimunta daq kazaq emaqta. In ago ayahta anad usaqta na tiqem bugaqta. <sup>3</sup> Ya Kraiss ago kabibiy mat araq nazaqta teq yaqmo ihol a hi ulum kemaiqta. Nazaq iyan ne yaqgo daq ulum kemayta na ya inadib nagah amikta iyaq. Ad mataw og kabta in hazirib yaqgo kabiy ulum kema ya daq na loyinsa in nagah amiktamo. <sup>4</sup> Ya ihol loyinsa ya daq araq ananin waqdaiqta haiqqam. Teq yaqmo ihol anan mat titnonta haqad nazaq ya a hi bilaqdaiq. Iyah-taqmo teq ilum kemeq inan bilaqdaqta. <sup>5</sup> Teq in on mataw hazirib gilum kemaqta na akamun teqmo. Nazaq iyan Iyahta a hi bolsamo ne yaqgo kabiy hi ulum kemiy. Iyahta boleq teq in nagah bunmo ulilemim romriqab usaqta na waqeq saw anuwanib emid ulal tiqiy bugdaq. Ad in mataw bunmo ginad ulilemim usaqta na emid ulalab tugwahtiqdaqmo. Kam nab God in on mataw kabiy dimunmo emiyta na gibin tiqiluwdaq.

*On mataw uliq Korin-ibta na in gimo gihol abin iluw yaqay*

<sup>6</sup> Ya imaqbaban, ya ne gilumsihnan haqad ya Apolos anan teq yaqmo ihol anan nawa ne tigibilenta. Ne i gigo hib suleq waqad ne God ago gamuk mar tonan usaqta na itiyoneq daq ta asor muturta inaqmo a hi em daqay haqad ya nazaq bilayta. Ne nazaq emad teq ne mat araq abin iluwad mat ta araq abin wazid a hi woqdaq. <sup>7</sup> Ya iyogniz, ne ezaq diq? Ne i mataw bunmo nog a haiqta ye? Ne gigo nagah bun diqmo God abenab a hi waqiy ye? Helmo, nagah bunmo ne wazayta na ne God abenab waqiyta. Nazaq iyan nagaqgo ne gihol abin iluway? Ne gigo nagah dimunta nagan negmo gigo zawayib waqiyta ye? Haiqqam. God nagah nagan samanmo ne nagta.

<sup>8</sup> Ne God ago nagah dimdimunta na teko waqan in tigiynin bug daqagya. Ad nagah bunmo ne amalib dimunmo os daqayta na ne gigo inaq tiqiyiy daqagya. I ne a hi gilumsihsa ne gimomo gigo zawayibmo king nog tiqiyim osay-ya. Sa i haiqqam daqag. Helmo, ya inad ne king diq iyeq os nagiya haqaiq. Osad teq ne i giqemid i inaqmo king iyeq ne nenaq os nagtamo haqaiq. <sup>9</sup> Teq haiqqam. On mataw og kabta teq angelo inaqmo in i Aposel gibiyad i afaqan amo amo meqin diq sorsa in i gibiy ninunad gifaqin hunegayta. Nazaq iyan ya inad emaiq, God in i Aposel giqeman i abeb diq iyim osauqta haqaiq. I bilaqne mataw gigo hazirib meqniyan in ginol emgomo iyim osayta nazaq nog i osauqta haqaiq. <sup>10</sup> I Aposel Kraiss abin

sorad a luwsa mataw i ginan agadanta haqay. Teq negmo Kraiss aholib soqotim osad ne bilaqne mataw ginad awaz meqinta daqagya. I Aposel gigo zaway haiqta. Teq negmo gigo zaway ayahmo daqagya. Mataw i Aposel gibilawunad gibin wazan woqsa in negmo giwazinat gibin iluwayta daqagya. <sup>11</sup> I Aposel mebmebmo kabiy waqim bo muranmo i gigeman moqad giziyan maysa i osauqta. I gigo tubusan misiramta naqmo amalib i gihol sihenim luwauqta. Sa mataw i haesmo ginolsa i begbeg nog iyim uliq saw bunmo luwauqta. <sup>12</sup> I giholtuw bulad kabiy ayahmo emsa i gihol husisigaqta. Sa on mataw i gibilawunsa i amenin emim nan dimdimunta amalib gidimun tonauqta. In i gimuzad gimeqin tonsa i giqezmo hiqiyim afaqan nagan bunmo sorad a luwauqta. <sup>13</sup> Mataw i gigilehunan bilaqsa i amenin emim kiskismo gibilenaugta. On mataw i gibiyisa i saman diqta bilaqne didaq asan a le ban meqintab hunegayta nazaq nog iyaugta. I mebmebmo kabiy wawta nab iyim bo muranmo mataw bunmo gimeb i bilaqne nagah meqinta anuwan inaqta nog iyim osauqta.

*Korin on mataw Pol asen muzad daq emgo in gibilan*

<sup>14</sup> Teq ya mebay negad gamuk nawa na a hi mar ton. Ne yaqgo onminmo diq haqad ya ne ginan inad bilaq gigayinsa ya ne ginad wastitaynan gamuk na mar ton. <sup>15</sup> Ne ginad emiy. Ne gigo hib Kraiss ago mataw 10,000 nazaq ne giwamuz daqayta iyid teq in gilikmanib ne gimam araq ya nogta haiq iyaq. Helmo, Kraiss Yesus aduganib ya ne gimam nog iyim osaiqta. Ya Yesus awagamun dimunta gibilenan ne helmo haqim yaqgo onmin tiqiyiyta. <sup>16</sup> Nazaq iyan ya atoranno kazaq ne gibilenaq. Ne ya isen muzad ya daq em nogmo ne emiy haqaiq. <sup>17</sup> Daq alulin naqmo ago ya Timoti eman ne gigo hib lahta. Ya in inaq Iyahta aholib soqotim osad in yaqgo amun nog iysa ya in anan inad diq bilaqdaqta. Teq in Iyahta anad muzin bugad ago kabiy anononmo emaqta. Timoti leheq ne ginad waz eraqsa ya Kraiss Yesus aholib soqotim in anad muzinad daq dimdimunta emaiqta na ago ne anadin a ta em daqay haqad ya in eman ne gigo hib lahta. Yaqgo daq na ya on mataw Yesus ago nan huritayta na gidauhan bunmo giqisihunad asuleqin gibilenaqta.

<sup>18</sup> Ne gigo asor ya inan ginad emay, Pol bo a ta hi gibiydaq haqay. Haqad in igmo ag haqad ya iqez tuqothasay. <sup>19</sup> Teq haiqqam. Iyahta anad bilaqid ya ne gigo hib hidmo tilehdaiqta. Teq ya mataw gihol abin iluwayta na gigo nan huritnan a hi



lehdaiq. Haiqqam. Ya bole mataw na gigo zaway aholi waq kemgo haqad ya nawa lehdaiqta. <sup>20</sup> Na ezaqgo God ago maror in gamukmo amalib og kab gwahtiqim a hi usaqta. Haiqqam. In God ago zawaymo amalib gwahtiqim usaqta. <sup>21</sup> Ari ya ne gigo hib leheq ya ezaq ne gitondaiq haqad ne ginad emay? Ya yuk wazeq a lehdaiq e? O haiq, ya ne ginan inad bilaqsa ne giyon daq kiskista emdaiq?

## **Krais ago on matawta gilikmanib daq meqinta gwahtiqsa in tuwastitay daqay**

### **5**

*Daq arağ abin meqin diqta Krais ago on mataw uliq Korin-ibta na gilikmanib gwahtim*

<sup>1</sup> Ari ya ne gigo wagam arağ mataw bo ibilenan ya kazaq hurit. Daq an haresmo hureqim inaq usayta na ne gilikmanib usaq haqsa ya hurit. Huritim ya ihol dedibmo ritan. Teq ne gigo hib daq usaqta na abin meqin diq iysa on mataw en ta asor Juda a haiqta nagan in daq nawa ne gilikmanib usaqta na emnan gituw hiqiyayta. Na in kazaq. Mat arağ in amam awe waqim inaq usaqta haqiy. <sup>2</sup> Ta teq ne igmo ag haqad daq na anamren alowan tonayta. Ne giquitil tartaysa gaq wazad os nagiyta. Sa ne daq anamren na muzid in ne gilikmanib a ta hi os nagta.

<sup>3-4</sup> Helmo, ya inon kab pesanmo osaqta teq ya iwitan in bilaqne ne ginaq osaqta nog iyaq. Ya ne ginaq os nog iyad mat na ago daq meqinta tuqulum kemim ya Iyahta Yesus abinib mat na ayon tibilay. Nazaq iyan ne on mataw Yesus ago nan huritayta na bunmo humab arağ emiy haqaiq. Humab emeq ossa ya iwitan ne ginaq ossa i gigo Iyahta Yesus ago zaway i gilikmanib tuqusdaqmo. <sup>5</sup> Sa ne daq anamren na waqeq Satan abenab emiy. Emid in santitiy waqad osad teq anad tubuliydaq. Anad buliyid abeb Iyahta ta boldaqta akamnib nab mat na awitan dimunmo tuqusdaq.

*Korin on mataw mat daq meqinta amta na baymuzid nenaq ta hi osan*

<sup>6</sup> Ne igmo ag haqad gihol abin iluwayta na in dimun a haiq. Yis asitmo mel deg ayahta inaq buliyan mel na bunmo huhuw nemaqta. Na ago ne ginad a hi emay ye? <sup>7</sup> Pasova akamnib mataw sipsip amidon wol emayta nazaq nog Krais i gimen ahol tamaz nog emim tumomta. Moqan ne bilaqne bret ago yis haiqta mataw Pasova akaruwan inaq neqayta nazaq nog ne tiqiyim osayta. Nazaq iyan ne gilikmanib yis kwaziqta usaqta na suholid

lehan. Lehid teq ne bret yis haiqta mutur buliyiyta nazaq nog iyeq osiy. <sup>8</sup> Pasova akamnib Isrel on mataw in gigo humab na emnan haqad gigo bitab yis kwaziqta usaqta na ginuwim tuhuneq bugayta. Nazaq iyan in daq emayta nazaq nog i emuqmo. God i gidimun tonta na ago i anadin emad i giholib yis kwaziqta na muzad i gigo daq meqinta nagan gileh negad ginad meqinta na i muzid lehanmo. Lehid teq i bret ago yis haiqta nog osad i gimileq a hi iyad gamuk helta adan emad osuq.

<sup>9</sup> Ya ne gimen sansandek arağ mar tonta nab ya kazaq tibilay. Ne on mataw an haresmo hureqim inaq usayta na giholib hiqiyeq nenaq hi osiy haqad ya bilayta. <sup>10</sup> Teq ne og kab mataw an haresmo hureqayta na teq mataw nagah haresmo utayta na teq mataw nagah rin tonayta na teq mataw god katiyta gimen lotu emayta nagan bunmo giholib hiqiyiy nazaq ya a hi bilay. Haiqqam. Ne og kab mataw daq meqinta emayta bunmo giholib hiqiyeq osnan haqad teq ne og ka huloseq ulilib gwaleheq os nagiy.

<sup>11</sup> Ari ya ne gimen kawa ne gimen mar tonaiqta kab ya kazaq ne tigibilen sireqaiq. Mat bilaqag. Ya ne gimaqbab Krais aduganibta haqad teq in an alulib hureqim inaq usaqta o in mat arağ ago nagah ahol waqad utetaqta o in god katiyta gimen lotu emaqta o in mataw gigilehunan bilaqagta o in tutimmo yuw atoranta uluwaqta o in mataw gigo nagah rin tonaqta, mat nazaq amileq iyaqta na ne aholib hiqiyeq inaq arağib hi osiy haqaiq. Osad ne mat na inaq arağib didaq hi neqiyimo haqaiq. Haiqmo diq. <sup>12</sup> Nagaqgo ya mataw God ago maror asan ban osayta na gigo daq ulum kemdaiq? Na yaggo kabiy a haiq. Ari on mataw God ago maror aduganib osayta naqmo gigo daq ne ulum kemeq giwastitay daqayta. <sup>13</sup> On mataw God ago maror asan ban osayta na God-mo teq in gigo daq tuqulum kemdaq. Ari negmo teq God ago gamuk bilamta kazaq ne emiy. Gamuk na bilam,

Mat meqinta ne gilikmanib osaqta na ne muzid asan ban lehan ham. *Lo 17.7*

### **6**

*Krais ago on matawta na maqbab iyeq an hazizirib hi emiy*

<sup>1</sup> Ne gilikmanib mat arağ in ayow nan tuqgad in ta nagaqgo mataw God ago maror asan ban osayta nagan gimeb gamuk na wastitayay? Doq ton in God ago on mataw tawonta na gimeb afaqan na a hi wastitayay? Mat daq nazaq emaqta na amebay haiqta daqag iyim in daq na emaq. <sup>2</sup> Abeb teq God ago on mataw tawonta na in on mataw God gileh ugayta na bunmo

hazirib giqemad gigo daq tuqulum kem daqay. Na ne ginad a hi emay ye? Ne teq on mataw God gileh ugayta na bunmo gigo daq meqinta bunmo tuqulum kem daqayta. Ta ezaq haqad negmo gigo afaqan amikmikta nagan gwahtiqa ne ulum kemim a hi wastitayay? <sup>3</sup> Abeb teq i angelo hazirib giqemad gilum kemamta. Na ago ne ginad a hi emay ye? Nazaq iyan i kayeqmo og kab osad i gigo afaqan amikmikta na gwahtiqa igmo ulum kemeq wastitayuq.

<sup>4</sup> Nazaq iyan ne gilikmanib afaqan an mug nazaqta gwahtiqa ta ezaq haqad ne mataw Kraiss ago dauhib gihin haiqta na gitowun eman in ne gigo afaqan na ulum kemayta? <sup>5</sup> Ne daq nazaq emnan gimebay a hi woqaq e? Teq ezaq? Ne mataw Kraiss anan helmo haqayta na gilikmanib gimaqbab giger an mugs ne gigo mat araq anad awaz meqinta afaqan na ulum kemeq wastitaydaqta haiq e? <sup>6</sup> Ta teq ne nazaq a hi emayta. Mat araq in amaqqab araq hazirib emad nan tuqugaqta. Teq daq na amomo a haiq. Mat na in amaqqab na waqim ad le mataw Kraiss anan helmo a hi haqayta na gimeb hazirib emaqta!

<sup>7</sup> Ne gilikmanib mataw asor in giyogniz nan negad hazirib giqemsa ya ne ginan inad emaiq, Ne Kraiss ago daq dimunta na hulosis tuwoq hasiy haqaiq. Ne kazaq em nagiy. Mataw ne giholib daq meqinta emsa ne afaqan na hi sor nagiy. Ad in ne gigo nagah rin tona ne ananin hi bilaq nagiy. <sup>8</sup> Teq haiq. Ne an meqin tonad an ago nagah rin tonad luwayta. Teq ne mataw asan ban osayta na gigo hib daq meqinta nazaq a hi emayta. Haiqqam. Negmo maqqabam nazaq an meqin tonayta.

<sup>9</sup> Mataw daq meqinta emad luwayta bunmo le God ago maror aduganib a hi gwahtiq daqay. Na ago ne ginad a hi emay ye? Ne gihol hi kat ugiy. On mataw an haresmo hureqim inaq usayta na teq mataw god katiyta ayon lotu emayta na teq mataw an alulib hureqim inaq usayta na teq mataw in gimo gihol zayim mataw ta asor gihol negayta na teq mataw in matawmo an ahol waqad gihol eraqta na <sup>10</sup> teq mataw rin tonayta na teq mataw nagah haresmo utetayta na teq mataw yuw atoranta uluwim gifaqin hulosaqta na teq mataw an agilehunan bilaqayta na teq mataw gimileq iyad nagah samanmo waqayta na, on mataw naqanta bunmo le God ago maror aduganib a hikidikmo gwahtiq daqayta. <sup>11</sup> Kwaziqmo ne asor nazaq diq luw yaqayta. Teq God ne gigem tisuhol. Suholim in ne giqeman ne in ago on mataw tawonta tiqiyiy. I gigo God in ne giwaqim Iyahta Yesus Kraiss ago kabiy aduganib giqemim in ago Bugaw Dimunta

negan ne gibin on mataw titnonta tiqiyim usaqta.

*I gihol in God ago Bugaw Dimunta ago bit*

<sup>12</sup> Gamuk araq mataw bilaqad luwayta na in kazaq. "I daq bunmo giqemamta na aguninin haiqqam" haqayta. Gamuk na in helta teq daq na asor a hi nilumsihdaqta. Helmo ya daq bunmo giqemdaiqta na aguninin haiqta teq ya daq araq diq hulosis in yaqgo ayahta nog iyeq inad a hi hureqdaq. <sup>13</sup> Teq gamuk araq mataw bilaqayta na in kazaq. "Didaq bunmo i gigemab wogomo usaqta" haqayta. "Teq i gigem in didaq bunmo ago abanan iyim usaqtamo" haqayta. Gamuk nawa na in helmota teq God in didaq bunmo emid hiqiysa in i gigem emid tihiqiydaqmo. I gihol in an haresmo hureqeq inaq usgo a haiqta. Haiqqam. I gihol in Iyahta anad muzingo usaqta. Sa Iyahta in i gihol wamuzgo osaqtam. <sup>14</sup> God inmo ago zaway amalib Iyahta hodhodab wazan eramta. Nazaqmo teq in i giwazid i tiqeraqamtamo.

<sup>15</sup> I gihol in bilaqne Kraiss abensen nog iyim usaqta. Na ne ginad a hi emay ye? Nazaq iyan i Kraiss abensen na waqeq a leheq aw danatabta na inaq tuwastonam e? Haiq kidik! <sup>16</sup> Ne ginad emiy. Mat aw danatabta inaq usaqta na in aw na inaq gihol amulikmo tiqiyayta. God ago marib gamuk usaqta nazaq. Gamuk na bilam, In giger gihol amulikmo iyeq tuqos daqay ham. *Jenesis 2.24*

<sup>17</sup> Ad nazaqmo mat in Iyahta inaq soqotaqta na in giger ginad gigem amulikmo tiqiyaytamo.

<sup>18</sup> An haresmo hureqim inaq usayta na ne aban diq emeq tukiy. Na ezaqo daq meqinta bunmo mat ahol asan ban gwahtiqim in mat ta araq meqin tonaqta. Ari mat an haresmo hureqim inaq usaqta na inmo ahol meqin tonaqta. <sup>19</sup> I gihol in bilaqne God ago Bugaw Dimunta ago bit nog iyim usaqta. Na ne ginad a hi emay ye? God in ago Bugaw Dimunta negan in ne giduganib tuqosaqta. Nazaq iyan ne gihol in negmo gigo a haiq. <sup>20</sup> Haiqqam. God naw ayahmo amalib ne gizayan ne in agota tiqiyiy. Nazaq iyan ne gihol bunmo God ugad ne gigo daq amalib in abin iluwid ulilibmo gwalan.

### **Kraiss ago on mataw an waqayta ago adan anan Pol bilam**

#### **7**

<sup>1</sup> Ari ne yaqmen sansandek mar tonim nagah anan susumuniyta na ya muran kawa amenin tiqemnan. Ne gigo asor bilaqay, Mat aw inaq a hi usdaqta na in

daq dimun haqayta. <sup>2</sup> Ta teq an haresmo hureqim inaq usayta na ayahmo diq iysa iyan yaqmo inad kazaq emaiq. Mataw samanmo osayta na bunmo in gigo aw inaq iyiy haqaiq. Sa on samanmo osayta na in gigo mat inaq iyiyimo haqaiq. <sup>3</sup> Teq aw aduw in awe inaq usnan bulonsa awe ahol hi wasihan. Sa aw na in aduw inaq usnan bulonsa aduw ahol hi wasihanmo. <sup>4</sup> Aw na ahol inmo agota a haiq. In ahol na aduw agota. Ad nazaqmo mat na ahol inmo agota a haiqmo. In ahol na awe agota.

<sup>5</sup> Mat awe inaq usnan haqsa awe hi hulosan. Sa aw aduw inaq usnan haqsa aduw hi hulosanmo. Ari in giger God amomo anadin emad inaq gamuk emnan haqad an adugan wazeq teq in gihol tuwasih daqay. Wasihq eraqsa in kam ugiyta na le tihiqiyid in araqib a ta us daqay. Luweq in gihol sisaqmo wasihq luwsa Satan bo tigilum waqdaq. Gilum waqsa in gihol atoranmo eraqsa in Satan aqez othaso biyab a hi iy daqay. <sup>6</sup> Teq ya ne gibe yahad ne mataw bun diqmo on giwaqiy nazaq ya a hi bilaqaiq. Naqmo ne asor gihol wasihq samanmo osgo biyab a haiqta haqad ya an waqgo ne gibilenaiq. <sup>7</sup> Ya inad ya samanmo osaiqta kazaq ne bunmo os nagiyta haqaiq. Teq God in mataw naw amo amo negsa mataw bunmo giholib God ago naw araq araq usaqta. Mat araq naw araq waqsa ta araq in naw araq waqayta.

<sup>8</sup> Ari on mataw an a hi waqayta na teq on waburta na ya kazaq gibilenaiq. In an a hi waqad samanmo ya nogmo os daqayta na in dimun diq haqaiq. <sup>9</sup> Ta teq in gihol eraqsa in wasihgo gigo zaway hiqiyayta na in an tuwaq daqay. Mat aw inaq an waqayta na in daq dimunta. Ari in samanmo osad gihol atoranmo eraqdaqta na meqin.

<sup>10</sup> Teq on mataw an tuwaqiyta na ya kazaq ne gibilenaiq. Ad yaqgo gamuk ka ya inadibmo a hi gibilenaiq. Iyahtaqmo gunun bilamta na ya ne gibilenaiq. Aw mat tuwamta na in aduw hi hulosan haqaiq. <sup>11</sup> Ari in aduw huloseq le samanmo osad in mat ta araq muturta hi waqan. Teq in samanmo os haiq in muleqeq le aduw inaq an anobun wastitayeq araqibmo a ta osiy. Ad nazaqmo mat in awe a hi muzdaqmo.

<sup>12</sup> Ari on mataw ta asor na bunmo ya kazaq diq ne gibilenaiq. Teq gamuk kawa ya bilaqdaqta ka in Iyahta aqez a haiq. Ka yaqmo inadta ya bilaqnan. Krais ago mat araq awe in Iyahta anan helmo a hi haqayta teq in aduw inaq osnan anad bilaqsa, mat na in aw na hi muzan. <sup>13</sup> Ad nazaqmo aw araq aduw in Krais anan helmo a hi haqayta teq in awe inaq osnan anad bilaqsa, aw na in aduw hi hulosan. <sup>14</sup> Ne ginad emiy. Mat helmo a hi haqayta na in awe helmo haqayta na inaq ossa

God ago gunun in giger giqitiyonim usaq. Ad nazaqmo aw helmo a hi haqayta na in aduw helmo haqayta na inaq ossa God ago gunun in giger giqitiyonim usaqmo. Na haiqgam iyid ne gigo onmin God ameb gibusirinan inaq iy nagiyta. Teq haiq. In God ago gunun ahaqenib iyim tuqosaymo.

<sup>15</sup> Ari mat helmo a hi haqayta na in awe hulosan in tuhulosdaq. Sa aw helmo a hi haqayta na in aduw huloseq lehnan in tilehdaqmo. Afaqan na on mataw helmo haqayta na gigo afaqan a haiqta. In gunun a hi itiyonayta. Teq God anad mat awe inaq zib alobaw os daqay haqad in ne gililewunan ne in ago maror aduganib gwahtiqiyta. <sup>16</sup> Aw ni ninad a hi emaq. Ni ningo mat daq kiskista isihunsa in Yesus anan helmo haqid God ulumsiheq ta waqdaq o haiqta na ago ni a hi hurit. Sa mat ni nazaqmo. Ni ningo aw daq kiskista isihunsa in Yesus anan helmo haqid God ulumsiheq ta waqdaq o haiqta na ago ni a hi huritmo.

*God i giqeman osauqta nazaqmo i os tutuq*

<sup>17</sup> God i bunmo giyon bilaqan i os araq araq waqim osauqta. Nazaq iyan i ezaq iyim ossa Iyahta i gililewunta nazaqmo i osuq. Gunun ka ya Yesus ago on mataw gidauhan bunmo gigo hib emaiqta. <sup>18</sup> Mat araq ahol abatan asan tuqurotan teq God lilewunta ye? In asan urotta na hi ulileman. Teq mat araq asan a hi urotsamo God lilewunta ye? Mat na asan urotgo anad ta hi eman. <sup>19</sup> Mataw gisan urotayta ago adan na in nagah diq a haiq. Teq mataw gisan a hi urotayta na in nagah diq a haiqmo. Ari mataw bunmo God ago gunun muzin bug daqayta naqmo in heltaqmo. <sup>20</sup> On mataw bunmo ezaq iyim ossa God gililewunta nazaqmo in tuqos tut daqay.

<sup>21</sup> Ni kabibiy mat samanta iyim ossa God nililewunta ye? Ni na ago afaqan hi iy. Ari ni ninmo nihol anawun emeq ni samanmo dimunmo osdaqta ago adan-teqin araq ahol waqeq teq na ni muz.

<sup>22</sup> Teq mat nog in kabibiy mat samanta iyim ossa God lilewunta, mat nazaqta na in Iyahta ago mat tiqiyim in ameb samanmo tiluw osaqta. Ad nazaqmo mat dimunmo samanmo luwsa God in lilewunta, mat nazaqta na in Krais ago kabibiy mat tiqiyim osaqta. <sup>23</sup> God naw ayahmo diq amalib ne gizayta. Nazaq iyan ne ginadibmo mataw ta asor gihaqenib gihol emeq in gigo kabibiy mataw samanta nog iyeq hi osiy. <sup>24</sup> Ya imaqbaban, ne ezaq diq iyim ossa God gililewunta nazaqmo ne in ameb os tutiy.

*Pol in on mataw an a hi waqayta na gimen gamuk bilam*

<sup>25</sup> Ari on mataw an a hi waqayta na, ya iholib Iyahta ago gunun araq gibilendaqta

haiqqam. Teq Iyahta ya inan anad meqniysa ban yagan ya in ago mat gamuk helta bilaqaiqta iyim iyan ya inadta ka tigibilennan. <sup>26</sup> Muran kam kab afaqan aseseqta gwahtiqa iyan ne an a hi waqad samanmo osayta na in dimunmo. Ne nazaqmo os tutiy. <sup>27</sup> Ari ni aw tuwaqsun ni muzgo ninad hi em. Teq ni aw a hi wanta na ni aw nagungo ninad hi emmo. <sup>28</sup> Mat ni aw tuwamta na ni daq meqinta a hi emaq. Ad aw ni mat tuwamta na ni daq meqinta a hi emaqmo. Teq on mataw an tuwaqiyta na in afaqan aseseqta giholib tiloyin daqay. Nazaq iyan ya inad afaqan na ne giholib hi gwahtiqa haqad ya kazaq ne giblenaiq.

<sup>29</sup> Ya imaqbaban, yaqgo gamuk naway na alulin in kazaq. Kam in siqim tiqiy. Nazaq iyan ne kam muturta teq gwahtiqaqta na anadin emsa og ka ago daq amo amo na ne ginad hi wamuzan. Haiqqam. Muran teq abeb on mataw an tuwaqiyta na in bilaqne an a hi waqiyta nog iyeq osiy. <sup>30</sup> Teq mataw gaq wazayta na in bilaqne a hi gaqayta nog iyeq osiy. Sa mataw ginad dimniyayta na in bilaqne mataw ginad meqniysa osayta nog iyeq osiy. Sa mataw nagah kabemmo gizayayta na in bilaqne mataw ginaghan haiqta nog iyeq osiy. <sup>31</sup> Sa mataw og ka ago kabiy amo amo emayta na in bilaqne mataw og ka ago nagah anadin a hi emayta nog iyeq osiy. Na ezaqgo og ka awaqan i gimeb ahol waqauqta ka hiqiyim lehaqta.

<sup>32</sup> Og ka ago daq amo amo ne ginad hureqsa ne ginad meqniydaqta na ya ituw hiqiyayq. Mat aw a hi waqayta na in Iyahta ago kabiy naqmo emgo anad bunmo usaqta. Ad in Iyahtaqmo anad emid dimniygo emaqta. <sup>33</sup> Ari mat aw tuwamta na in og ka ago daq amo amo ginadin emaqta. Ad in ago aw anad emid dimniygo anad usaqta. <sup>34</sup> In nazaq emad in anad giger iyaqta. Teq on gidugniz haiqta teq on baras-barasta nagan in Iyahta ago kabiy naqmo emgo ginad bunmo usaqta. Usad in gisan gimugan inaqmo bunmo Iyahta ugeq in amomo agota iyeq osnan ginad bilaqsa osayta. Ari aw aduw inaqta na in og ka ago daq amo amo ginadin emaqta. Ad in aduw anad emid dimniygo anad usaqta. <sup>35</sup> Ya ne gilumsihgo haqad gamuk ka bilaqaiq. Ya ne gidanin a hi qwayaiq. Haiqqam. Ne wastitayeqmo osad gihol bunmo Iyahta ago kabiy ugiy haqad ya giblenaiq.

<sup>36</sup> Ari mat araq in aw inaq yow tiqemim teq a hi waqayta na luweq in anad emdaq. Ya aw ka hidmo a hi waqaiqta ka in daq dimun a haiq haqdaq. Ari mat na in aw waqgo anad ayahmo eraqsa in dante araq ahol a hi waqad teq in anad na tumuzindaq. Muzineq in giger an tuwaq daqay. Na daq meqinta a haiq. <sup>37</sup> Teq mat araq in aw inaq yow tiqemim teq in hi waqgo haqad

anad amulikmo ussa mat na ahol in anad a hi wamuzdaqta. Ad in ahol eraqayta na wasihad in anad emdaq. Ya aw ka inaq yow tiqemta teq ya hidmo a hi waqdaiq haqdaq. Aw ka in ya iyaw nogmo iyeq tuqos tutdaq haqdaq. Haqad in anad na a ta hi buliydaq. Mat nazaqta na in daq dimunta emaqtam. <sup>38</sup> Nazaq iyan mat in ayow na waqad in daq dimunta emaqta. Teq mat in ayow na a hi waqad in daq dimun diqta emaqta.

<sup>39</sup> Ari aw aduw a hi moqsamo aw na in bilaqne aduw inaq am giwazan os nog iyayta. In aduw na huloseq le mat araq a hi waqdaq. Ari in aduw na tumoqid teq aw na anadibmo samanmo tiluwdaq. In mat araq waqnan anad bilaqeq in mat tuwaqdaq. Teq in mat helmo a hi haqayta araq hi waqan. Haiqqam. In mat araq Iyahta anan helmo haqayta naqmo waqan. <sup>40</sup> Teq yaqmo inad kazaq emaiqta. Aw aduw tumomta na in mat ta araq a hi waqeq in anad ayahmo dimniysa tuqosdaq haqaiq. Ad ya inad emaiq, God ago Bugaw Dimunta anad yagsa ya gamuk ka bilaqaiq haqaiq.

### **Krais ago on mataw god katiya gimen tamaz akaruwan na tineq daqay o haiq?**

## 8

*Pol god katiya giyon karuw tamaz emim teq neqayta na anan bilam*

<sup>1</sup> Ari mataw god katiya giyon tamaz wazim teq akaruwan neqayta na ago ya tibilaqnan. I bunmo ginad inaqta na ago i tuhurit. Ta teq mataw asor in God ameb daq dimunta emgo ginad tiqem hasim in igmo ag haqad gigo walmataw ginad a hi em hasayta na giwazan woqayta. Ari mataw an anan ginad bilaqgo ginad tiqem hasayta na in an ulumsihad an agem zaway ugsa in giwaz meqniyim osayta. <sup>2</sup> Mat nog bilaqay. Ya nagah bunmo ago inad tiqem hasta haqayta, mat na ahol kat ugad in anad a hi diq em hasaqta. <sup>3</sup> Ari mat nog God anan anad bilaqayta na God in mat na ago tuhurit kemaqta.

<sup>4</sup> Nazaq iyan mataw asor god katiya giyon tamaz akaruwan neqayta na ago ya kazaq ne giblenaiq. Mataw god katiya gidulan emayta na in nagah hel diqta gidulan a hi emayta. Na i bunmo tuhuritta. Ad God amulikmoqmo osaqta na ago i bunmo ginad tiqem hasauqtamo. <sup>5</sup> Helmo, mataw in nagah amo amo kaitab usayta na teq nagah amo amo ogib luwayta na ginan 'I gigo god' haqayta. Haqsa og kab mataw gigo god kabemmo diq iysa on mataw kabemmo in gihagenib iyim ginan 'I gigo aseseqta'

haqayta. <sup>6</sup> Ari igmo teq i gigo God amulikmoqmo osaqtá. God naqmo in i Gimam iyim in nagah bunmo osayta na gilulin. Sa i in amomo anad muzgomo iyim osauqta. Teq i gigo Iyahta amulikmo osaqtamo. Na Yesus Kraiss mat nagah bunmo gíqamta amatin. Inmo i gíqeman i kayeqmo osauqta.

<sup>7</sup> Ta teq Yesus ago on mataw asor in gamuk nawa ya bilayta na ago ginad a hi em hasayta. On mataw na in kwaziqmo god katiyta nagan ginan helmo haqad os yaqayta. Nazaq iyan muran in tamaz akaruwan na neqad ginad emay, Ka god katiyta gigo tamazmo diq i tineqauq haqayta. Haqad in ginad a hi zilimsamo neqad iyan in ginad meqniysa God ameb gihol afaqan iyaqta. <sup>8</sup> Teq nagah i neqauqta na in i gíqemid i God agerab a hi loqam. Haiqqam. I karuw na uadin gihol a hi meqin tonauqta. Ad i neqauqta na in i a hi gilumsihagta.

<sup>9</sup> Teq ne asor ginad em hasim osayta na ne gihol waziy. Didaq karuw bunmo neqgomo haqad ne ginad tiqem hasim gunun haiqmo luwayta. Teq luweq ne nagah haresmo neqsa mataw gíqutil hidmo tartayaqta na ne gibiyad in ne gisen muzinad teq in God ameb gihol meqin loyin daqay. <sup>10</sup> Ni nog ninad tiqem hasta na ni god katiyta ago lotu abitinb leheq didaq neqad ossa luweq mat araq aqutil hidmo tartayaqta na tinibiydaq. Nibiysa ni god katiyta ago tamaz adidaqin neqsa in neq nagtamo anad a hi emdaq e? <sup>11</sup> Nazaq iyid teq ni ninad awaz meqinta na in bilaqne gig nog nimaqbab asen tuwoltaydaq. Woltayid ni nimaqbab aqutil hidmo tartayaqta na le tuwoqdaq. Teq Kraiss in mat na inaqmo amen momtamo. <sup>12</sup> Ni nazaq nimaqbab aqutil hidmo tartayaqta na ago anad helta meqin tonad ni nimaqbab na ago hib daq meqinta tiqemaq. Ad ni nimaqbab ago hib daq meqinta emim ni Kraiss ago hib daq meqinta emaqmo. <sup>13</sup> Nazaq iyan yaqgo didaq neq ya imaqbab emid anad helta hulonsan tonsa ya karuw naqanta a ta hikidik neqdaiqta. Luweq ya imaqbab na ameb didaq na neqsa in ya isen muzinad teq in anad helta usaq na tuhulonsan tondaq.

## 9

*Pol Aposel akabiyan emad anawun a hi waaqta na ago in anad dimniyaq*

<sup>1</sup> Ne ya inan ginad ezaq emay? Ya samanmo inadib a hi luwaiqta ye? Ya Aposel a haiqta ye? Ya i gigo Iyahta Yesus ahol a hi wayta ye? Iyahta ago kabiy ya emaiqta na ne giholib anon a hi amta ye? <sup>2</sup> Mataw asor ya inan i gigo Aposel nazaq in a hi bilaqayta. Teq negmo yaqgo

tuhurit kemim ne ya inan i gigo Aposel nazaq ne a hi bilaq daqay ye? Ya ne gigo hib Aposel akabiyan emsa ne Iyahta ago dauhib gwahtiqaqta. Nazaq iyan ya Aposel iyim osaiqta atowun na negmo.

<sup>3</sup> Ari mataw asor yaqgo kabiy ulum kemad inan helmo diq a hi haqsa ya ihol adanin qwayad kazaq diq gibilendaq. <sup>4</sup> Ya iyow Barnabas inaq i Aposel akabiyan emad mataw gigo didaq yuw samanmo waqamta nazaq i gibin a hi usaq e? <sup>5</sup> Ad i gíqonan helmo haqayta na giwaaqeq nenaq uliq-uliggo luwamta nazaq i gibin a hi usaqmo ye? Aposel asor teq Iyahta Yesus amagniz na teq Pita in gíqonan nenaq luwayta nazaq i a hi emam e? <sup>6</sup> God ago kabibiy mataw bunmo kabiy emsa mataw didaq nagah negayta. Ta teq ya iyow Barnabas inaq i gimomo teq God ago kabiy emad i ta gihol ulumsihgo akabiyan inaqmo emammo ye? <sup>7</sup> Ne ginad emiy. Gavman gigo bab mataw in gigo kabiy amulik naqmo emsa gavman didaq nagah negsa in osayta. Osad in giholyon kabiy araq a hi emayta. Teq mat am wain akabiyan emaqta na inmo ago kabiy na anon waqim neqaqta. Teq mat sipsip giwamuzaqta na inmo sipsip gísus waqim uluwaqta.

<sup>8</sup> Teq ya matawmo gigo daq anadin emad bilaqaiq e? Haiqqam. God ago maror Moses bilamta na in gamuk nazaq bilaqam. <sup>9</sup> Maror na aduganib gamuk araq kazaq mar tonan usaq.

Bulmakau wit akabiyan emad wit bay ninalsa ne atenmos am hi waziy ham.  
*Lo 25.4*

God in bulmakau-mo ginadin emad gamuk na bilamta daqayta. <sup>10</sup> Haiqqam. In i matawmo ginadin emad gamuk na bilamta. Nazaq a haiq e? Helmo, gamuk na i matawmo gimenta usaq. Daq alulin nazaq iysa iyan mat og wolaqta na teq mat wit anon giluwiaqta na in ginad emay, Kabiy kawa i emad giholtuw bulauqta ka i teq anon waqeq tineqam haqad in kabiy na emayta. <sup>11</sup> Ari i ne gígemab God ago gamuk didaq anagin nog leyan in gwalim ne giwitan tigilumsihag. Ta teq nagaggo i ne gigo hib kabiy emta na anon waqgo ne huload ne i gihol ulumsihgo adidaqan diq ignan nan kabemmo bilaqay? <sup>12</sup> Mataw ta asor ne gilumsihsa ne in giwazinad gilumsihayta. Ari igmo gibin mataw na gibin uriyaman iyan ne i ayahmo tigilumsih nagiytamo.

Teq i le ne nenaq osad i gibin nazaq a hi iluwad i ne gigo nagah araq a hi wawta. Haiqqam. I nazaq emeq i Kraiss ahol awagamun dimunta na adanin qwayam haqad i gihol ulumsihgo akabiyan na bunmo igmo emyauqta. <sup>13</sup> Mataw Tempel-ib lotu akabiyan emayta na in bit nabmo didaq waqim neqayta. Teq mataw tamaz

em abanab tamaz akabiyān emayta na in tamaz akaruwan asor waqim neqaytamo. Na ne ginad a hi emay ye? <sup>14</sup> Teq Iyahta gunun emim nazaq tibilammo. In bilam, Mataw yaqmo ihol awagamun dimunta na akabiyān emsa in gigo walmataw nagah gihol ulumsihgo naw nog negiy haqad in bilam.

<sup>15</sup> Helmo ya ibin nazaq usaqta. Teq ya adan diq a hi emaiqta. Ad ne ya ilum-sih daqay haqad ya gamuk ka a hi mar tonaiqmo. Haiqgam. Ya God ago gamuk dimunta mataw samanmo negnan inad bilaqta. Nazaq iyan ya God ago kabiy na emad ya ne gigo nagah araq diq a hi waq-daiq. Ad ya moqsun o tob ya moqmo tumo-qdaiq. Luweq ya ne gigo nagah waqad teq abeq ya God ago gamuk samanmo negta nazaq ya ibin a ta hi iluwdaiq haqad. <sup>16</sup> Teq ya Yesus awagamun dimunta mataw gibilenaiqta na ago ya mat asittaqmo haqad ihol abin a hi iluwdaiq. God-mo kabiy na yagan ya in aqez othasgo biyab a haiqta. Ya kabiy na a hi emeq ya timeqniydaiq. <sup>17</sup> Na ezaqgo ya inad bilaqsa kabiy emeq ya naw dimunta tuwaqdaiq. Ari ya ituw hiqiysa teq ya kabiy na hulosdaiq e? Haiqgam. God-mo kabiy na yagan ya ihol anadin a hi emad ya inmo anad muzinad kabiy na emmo tiqemdaiq. <sup>18</sup> Nazaq iyan ya kabiy na emad naw kazaqmo waqaiqta. Ya Yesus awagamun dimunta on mataw samanmo negaiqta naqmo ya anan yaqgo naw dimunta haqaiqta. Ya nazaq emad ya ihol abin a hi iluwad ya mataw gigo nagah araq samanmo a hi waqaiqta.

*Pol in on mataw bunno gigo kabibiy mat nog iyim osaqta*

<sup>19</sup> Mat araq ya izaysa ya in ago kabiy emad a hi osaiqta. Yaqmo inadibmo luwad kabiy emaiqta. Ta teq ya on mataw bunno gilumsihnan haqad ya in gigo maror ezaqya in muzayta na ahaqenib lehad ya in gigo kabibiy mat samanta nog iyim osaiqta. Ya on mataw kabemmo gihureqid in Yesus anan helmo haq daqay haqad ya daq nazaq emaiqta. <sup>20</sup> Nazaq iyan ya Juda nenaq osad ya in ginogmo iyim osaiqta, ya in gigo asor gihureqid in Yesus anan helmo haq daqay haqad. Ad ya mataw God ago maror Moses bilamta na ahaqenib osayta na nenaq osad ya inaqmo maror na ahaqenib os nog iyaiqtamo. Helmo ya maror kwaziqta na ahaqenib a ta hi osaiqta. Teq ya mataw maror na ahaqenib osayta na gihureqgo haqad ya nenaq osad in daq em nogmo ya emaiqta. <sup>21</sup> Ad ya mataw God ago maror Moses bilamta a hi waqiyta na nenaq osad in maror na anadin a hi emayta nazaq nogmo ya osaiqta. Teq ya God ago maror araq haiqmo diq a hi

osaiqta. Krais ago maror in bilamta na ya anadin emad ya maror naqmo ahaqenib osaiqta. Osad ya mataw nawa God ago maror haiqmo osayta na nenaq osad ya in inaqmo giwaqgo haqad in os nogmo ya osaiqta. <sup>22</sup> Ad ya mataw ginad helta a hi zilimsa giquitil hidmo tartayaqta na nenaq osad ya nazaqmo iquitil hidmo tartayaqta nog iyim osaiqta. Ya mataw na ginad helta emid awaz timeqniydaq haqad ya daq nazaq emaiqta. Ya on mataw en bunno gigo asor kabemmo giwaqdaiq haqad ya in gigo gunun ahaqenib iyim osad ya in gigo maror ezaqta na ya muzmo muzinaiqta. <sup>23</sup> Yesus awagamun og saw bunmo awaz meqniyeq usdaq haqad ya iholtuw bulad mataw bunno gigo kabibiy mat nog iyim osaiqta. Abeb on mataw Yesus awagamun dimunta anan helmo haqad osim moqiyta na in God ago os dimunta waqsa ya naw dimunta na iholyon tuwaqdaiqmo haqad ya nazaq emaiqta.

*I atoranmo sibeq le towub iyeq God ago naw dimunta na i gholyon waqqu*

<sup>24</sup> Ne ginad emiy. Mataw sibim le towub gwahtiqayta na gilikmanib amulikmoqmo in le naw dimunta na waqayta. Nazaq iyan ne bunno nazaqmo God ago naw dimunta waqgo haqad atoranmo sibiy. <sup>25</sup> Mataw og kab sibayta na bunno naw araq meqniydaqta naqmo waqgo haqad in gihol udinayta. Ari igmo teq i naw a hi meqniydaqta na ago i gihol udinauqta. <sup>26</sup> Nazaq iyan ya atoranmo siband ime haresmo a hi lehaqta. Ad ya ibabun inaq an wolad ya iben hunegad a hi wol kireh nemaiqta. <sup>27</sup> Haiqgam. Ya ihol in ya inadmo muzdaq haqad ya ihol wazan woqsa in yaqgo kabibiy mat samanta nog iyaqta. Luweq ya Yesus awagamun on mataw kabemmo gibilenid in le naw na waqsa ta ya le liqabmo woqeq naw dimunta na ya a hi waqdaiq haqad.

## 10

*Daq meqinta gilum waqsa i hi woquq*

<sup>1</sup> Ya imaqbaban, ne Moses ago kamub daq gwahtimta na anadin ta emiy haqad ya gibilenaiq. God in i Juda gisesan bunno giwaqim teq in onqas eman gehitiqim dan qigisihunsa in lehiyta. Teq in bunno kamis ayahta na urotsa God in gimen dan emsa in lehiytamo. <sup>2</sup> Mataw na Moses ago hib soqotim aqez huritad in onqas na muzim lehim le kamis ayahta na tuqurotiy. In nazaq emim in bilaqne Moses-mo abinib yuw huzim ago dauhibta nog tiqiyiy. <sup>3</sup> On mataw na bunno didaq God ago Bugaw Dimunta eman Heven-ib gehitimta na neqiyta. <sup>4</sup> Teq in bunno yuw Bugaw Dimunta nagta na in uluwiytamo. Saw edob in leh yaqayta nab Bugaw

Dimunta yuw emid gigib gwahtiqa in uluw yaqayta. Nazaq iyan gig naqmo in Krai is giqeman i kayeqmo os tutauqta na atowun in gigo hib usta. <sup>5</sup> Ta teq God in mataw na gigo asor kabemmo ginan anad a ta hi bilaqsa in ginol eman gisan hares hares saw amatawun haiqtab nagab giqusi.

<sup>6</sup> Daq nagan bunmo i ahol waqeq ginad em hasgo in gwahtimta. I ahol waqad ginad em haseq teq mataw na nagah meqmeqinta utetiyya nazaq i a hi emam haqad.

<sup>7</sup> Mataw na gigo asor god katiyya giyon lotu emiyya nazaq ne hi emiy. God ago marib gamuk araq kazaq bilam,

Mataw na humab wolim didaq neqad yuw uluwim teq in eraqim on nenaq saw zunad osiyya ham. *Kisim Bek 32.6*

<sup>8</sup> Teq mataw na asor an haresmo hureqim nenaq usiyya nazaq ne hi emiyyo. Mataw na nazaq eman God in kam amulikmo on mataw kuluwmo diq 23,000 nazaq ginol eman moqiyta. <sup>9</sup> Teq mataw na asor Iyahta ulum waqiyta nazaq i hi emuq. Mataw na Iyahta ulum waqan nagah ahulinaqta gigo liqiy inaqta kabemmo gwahtiqim gimugan in tumoqiy. <sup>10</sup> Teq mataw na asor gimot meqniyya nan kabemmo bilaqiyta nazaq ne hi emiyyo. In nazaq emsa angelo mataw ginolaqta na lehim mataw na tiginol em bug.

<sup>11</sup> Daq meqinta nagan mataw kwaziqta na giholib gwahtiqaq muran i in ginadin emad i ginad tiqem hasauqta. Teq i on mataw kam kab osauqta i gihol asawan woltayeq osam haqad in mataw kwaziqta na giwagamun mar ton igiyta. Na ezaqgo nagah bunmo God ago gamuk anan bilamta na in muran kam kab anon tiqemim usaqta. <sup>12</sup> Nazaq iyan mat aw nog bilaqaq. Ya iwaz meqniyyim turaiq haqaqta na in ahol waz naqmo hiqiy. Luweq in woqdaq. <sup>13</sup> Daq gilum waqgo ne giholib gwahtiqaqta nagan in i on mataw bunmo giholib gwahtiqaqta. Teq God bilamta nazaq in tiqemdaq. In ne gisen baysihsa daq gilum waqaqta na ne giwazid a hi woq daqay. Haiqqam. Daq nazaqta ne giholib gwahtiqaqta God ne gimem dante araq giqisihunid ne muzad giwaz meqniyyeq dimunmo tuqos daqay.

*I God diq ayon lotu emad teq i god katiyya giyon lotu hi emuq*

<sup>14</sup> Nazaq iyan ya iyognizmo diq, ne god katiyya girabunad tuqeq le pesanmo luwiy. <sup>15</sup> Ne on mataw ginad inaqta iyan ya ne gibilenaq. Yaqgo gamuk ka negmo huriteq ulum kemiy. <sup>16</sup> I gog wazim God esey ugim uluwauqta na i Krai anedan i giwastitayaqta na ahaqenib lehauqta. Teq i bret orqayim an ugim neqauqta na i Krai anon

i gilumsihaqta na ahaqenib loqauqta. <sup>17</sup> I on mataw kabemmo bret amulikmo araqib neqad i bunmo gihol amulikmo nog iyim osauqta. Na ezaqgo i bret anabun amulikmo naqmo i bunmo neqauqta. <sup>18</sup> Ne Isrel on mataw gigo daq anadin emiy. In God ayon tamaz emayta na akaruwan neqad in daq naqmo ahaqenib lehayta.

<sup>19</sup> Teq luweq ne ginad em daqay, Pol anadib god katiyya giyon tamaz emayta na in daq helta daqag haq daqay. Ad god katiyya na in nagah hel diqtaqmo haq daqay. <sup>20</sup> Haiqqam. Ya kazaq bilaqaiq, Mataw God abin a hi huritayta na in god katiyya giyon tamaz emad in naw na God helta a hi ugayta haqaiq. In bugaw meqmeqinta tamaz na negayta haqaiq. Nazaq iyan ne bugaw meqinta na adidaqan ne neqad teq ne bugaw meqinta gigo gunun ahaqenib hi loqiy. <sup>21</sup> Ne Iyahta ago gogib yuw uluwad teq ne bugaw meqinta gigo gogib yuw hi uluwiy. Teq Iyahta ne giwastitayta na adidaqan ne neqad teq ne bugaw meqinta gigo gunun ahaqenib hi loqiy. <sup>22</sup> Ne Iyahta emid agem meqniyya daq haqad ne nazaq kamolmol ug daqay? Teq ne gigo zaway in ago zaway uriyaman ne in ago hib daq nazaq em daqay?

*Tuteqmo i God abin iluwuq*

<sup>23</sup> Mataw asor bilaqay, "I daq bunmo giqemamta na agununin haiqqam" haqayta. Gamuk na in helta teq daq na asor a hi nilumsihdaqta. Helmo ya daq bunmo giqemdaqta na agununin haiqta teq ya daq na asor emsa mataw ibiyad in gigo ginad helta na awaz a hi meqniyya daqta. <sup>24</sup> Nazaq iyan negmo gihol amomo anadin hi emiy. Haiqqam, ne gigo mataw ta asor na gilumsihgo haqad ne in ginadin emiyyo.

<sup>25</sup> Karuw bunmo maket-ib emayta na ne zayeq tineq daqay. Teq ne karuw na tizaynan ne hi susumuniy. Luweq karuw edob bolta na ago ne susumuneq teq ne ginad meqniyya daq haqad ne gizezmo hiqiyeq zayeq neqiy. <sup>26</sup> Na ezaqgo, Og ka teq nagah bunmo ogib giqusayta na inaqqam in Iyahta agota. *Buk Song 24.1*

<sup>27</sup> Mat Yesus anan helmo a hi haqaqta araq in ni didaq neggo nililewunid ni ninad bilaqsun ni lehmo leh. Leheq in naga didaqin nigdaqta na ni neqad hi susumun. Luweq ni susumuneq ninad meqniyya daq. <sup>28</sup> Ari mat araq nab oseq era nibileneq bilaqdaq, Ka tamaz katiyya akaruwan haqid teq ni mat na anadin emad karuw na ni hi neq. Ni mat na anadin a hi emadmo karuw na tineqid mat na nibiyya ni daq meqinta em nog iysa in tinibiyya daq. <sup>29</sup> Ta teq ne tamaz katiyya akaruwan neqeq negmo gigem God ameb meqniyya ne loyin daqay

nazaq ya a hi bilaqaiq. Haiqqam. Luweq ne karuw na neqsa mat ananin bilamta naqmo in ne ginan meqin haqdaq haqad ne hi neqiy haqaiq.

Teq mat karuw ananin nazaq bilaqdaqta araç ya inaç humabub a hi osid ari ya inadibmo karuw na tineqdaiq. Doh haqad mat na a hi ossamo ya in anad muzinad karuw aguninin haiqta na a hi neqdaiq? Haiqqam. Ya tineqdaiqta. <sup>30</sup> Ya God esey ugeq teq karuw na neqsa ta nagaqgo mat araç ya inan meqin bilaqdaq? Didaq na ya God esey a hi ugrimmo neqaiqta ye? <sup>31</sup> Nazaq iyan ne yuw uluw daqayta na teq ne didaq neq daqayta na teq kabiy daq bunmo ne em daqayta na ne God abin wazid eraqgo haqad ne emiy. <sup>32</sup> Ne Juda on mataw teq Grik on mataw teq God ago on mataw Kraiç ago nan huritayta na bunmo ginadin emad ne gigo daq amalib ne in gigo araç diq wazid hi woqan. <sup>33</sup> Daq ya emaiçta nazaqmo ne emiy. On mataw bunmo ya inan ginad dimniy daqay haqad ya emaiçta. Yaqmo ihol dimun tongo adan-teqin ya a hi muzinaiçta. Haiqqam. Ya on mataw kabemmo gilumsihsa in kayeqmo kuluwa-kuluwmo os daqay haqad ya inad em hasimmo pc daq bunmo emaiçta.

## 11

<sup>1</sup> Nazaq iyan ya Kraiç asen muzinim daq emaiçta nazaqmo ne ya isen muzineq daq dimdimunta na ne emiymo.

### **Pol in God ayon lotu emgo adan agamukan bilaqad teq in God ago Bugaw Dimunta ago naw amo amo ginan bilammo**

*On gifaqin isihim teq God inaç gamuk emayta na ago Pol bilam*

<sup>2</sup> Tutimmo ne ya inad in emad suleq bunmo ya negta na ne waz naqmo hiqiyim osayta. Nazaq iyan ya inad dimniysa ne gibin diq iluwaiç. <sup>3</sup> Teq suleq araç ne ginad em has daqayta na in kazaq. Mataw bunmo gifaqin na Kraiç-mo. Sa aw afaqin na in aduwmo. Ad Kraiç afaqin na Godmo. <sup>4</sup> Mat afaqin isihim God bulonaqta na in ago afaqin Kraiç mebay ugaqta. Ad nazaqmo in afaqin isihim God ago nantut bilaqad na in ago afaqin na mebay ugaqtamo. <sup>5</sup> Teq aw afaqin a hi isihim samanmo turad God bulonad in aduw mebay ugaqta. Ad in afaqin a hi isihim God ago nantut bilaqad na nazaqmo in ago afaqin na mebay ugaqtamo. Daq nawa na bilaqne in aqensan urot bugim afaqin ureqan mataw ahol waqad gime a hi bilaqaqta nazaq nog iyaq. <sup>6</sup> Nazaq iyan aw araç afaqin isihnan atuw hiqiyisa teq in aqensan urot bugeq

mat nog iyan. Teq aw na aqensan urotid siqim diq iyid in amebay a hi woqdaq e? Ad in afaqin ureqid abigman ulal iyeq ussa mataw ahol waqad gituw a hi hiqiy daqay ye? Nazaq iyan aw na afaqin isiheq teq God inaç gamuk emsa mataw gime bilaqan.

<sup>7</sup> God mat eman inmo nog gwahtiqim in God ago zaway teq abin dimunta na atowun nog iyim osaqta. Nazaq iyan mat in afaqin a hi isihdaç. Ari aw in matmo abin dimunta atowun nog iyim osaqta. <sup>8</sup> Na ezaqgo aw in mat alulin a haiqta. Haiqqam. Matmo in aw alulinta. <sup>9</sup> Ad God in aw anadin emad mat a hi amta. Haiqqam. In mat anadin emad aw amta. <sup>10</sup> Daq alulin nazaq iysa iyan on in mataw gihaqenib osayta na atowun in gifaqin isih daqayta. Teq in angelo ginadin emad in nazaq em daqaytamo.

<sup>11</sup> Ta teq Iyahta ago dauh giduganib aw mat inaç giholbin giholbin iyim a hi osayta. <sup>12</sup> Na ezaqgo mebmemo diq aw in mat ahol asor amalib gwahtimta. An muran mat in nazaqmo aw agemab gwahtiqaq-tamo. Teq God in on mataw bunmo gigo gilulin. <sup>13</sup> Negmo daq na lum kemiy. Aw afaqin a hi isihim samanmo God bulonaqta na in daq dimunta ye? <sup>14</sup> I on mataw og kabta gigo daq kazaqmo usaqta. Mat aqensan sisaqmo on giqensan nog iysa mataw ahol waqad gime a hikidik bilaqayta. <sup>15</sup> Ad i ginad emauç, Aw aqensan sisaqta na bilaqne in ago balaw dimunta afaqinib usaqta haqauç. Na ezaqgo God inmo on gifaqin isihgo haqad giqensan sisaqmota na nagta. <sup>16</sup> Ari ne gigo araç gamuk kawa ya bilayta ka geg ugnan haqad in ya iqez ka hurit keman. Ya iyogniz nenaç i on gibilensa in gifaqin isihim teq God inaç gamuk emayta. Sa Kraiç ago on mataw gidauhan bunmo nazaqmo in dante amulik kaqmo muzinaytamo.

*Korin on mataw in Yesus anon anedan inaç neqayta adan diq a hi muzin yaqay*

<sup>17</sup> Ari muran ya gunun asor ne muz daqayta ka ago gibilenad ya ne gibin a hikidik iluwdaiq. Na ezaqgo tutimmo ne bo humab tuwolim osad ne an alowan a hi tonayta. Haiqqam. Ne an meqin tonayta. <sup>18</sup> Ne gigo daq meqinta ya dan-meb bilaqdaiqta na in kazaq. Ne Yesus ago dauhibta na ne bo in abinib humab tuwolim osad nab ne gihol huserim dauh amikmikta iyim giholbin giholbin osayta. Ya ne gibin meqinta nazaq huritim ya inad emaiç, Nabag helmo daqag haqaiç. <sup>19</sup> Nabag ne ginad emay, I kazaq gihol huseriq giholbin iyeq ossa teq dauh doqag diçta God in ginan anad dimniyaqta na ulal tiqiydaç haqad ne nazaq emayta. <sup>20</sup> Ne daq nazaq emsa iyan ne Iyahta anadin



emad adidaqin neqnan humab wolayta na le saman iyaqta. <sup>21</sup> Na ezaqgo ne gigo humabub mataw asor hid naqmo didaq waqim neqsa ta asor gigem moqsa osayta. Sa asor yuw atoranta ayahmo uluwad gifaqin hulosaqta. <sup>22</sup> Ne gigo bit haiqgam daqag iyan ne God ago dauh ahumabnib bolim nazaq didaq neqad yuw uluwayta. Ne nazaq God ago dauh givin emid samanta iyaq e? Ne nazaq Yesus ago on mataw gina haiqta na mebay neg daqay ye? Ya naga gamukin gibilendaiq? Ne nazaq emsa ya ne givin iluwadaiq e? Hikidik.

<sup>23-24</sup> Na ezaqgo mebmemo ya daq Iyahta ago hib wayta naqmo ya ne gibilenta. Mat Yesus waqeq bab gibenab emdaqta kam nab taromab Iyahta Yesus bret waqim God esey ugim teq in orqayim bilam, Ka ya inon ne giyon hulosaqta ham. Abeb ne kazaq emad ya inadin emiy ham. <sup>25</sup> Ad nazaqmo in didaq neqim hulosaq in gog waqim emim bilam, Gog kab ya inedan God ago maror muturta na zaway ugdaqta usaq ham. Abeb ne yuw ka uluw daqayta akamnib ne kazaq emad ya inadin emiy ham. <sup>26</sup> Iyahta nazaq bilaqan muran ne bret na neqad yuw na ne uluwad ne Iyahta i gimen momta na abin eman ulal tiqiyay. Ne nazaq tuteqmo emad ossa teq in abin na mataw gimeb ulal iyeq ussa le in muleqeq ta boldaq.

*I bunmo ginad em haseq teq Yesus anon anedan inaq nequq*

<sup>27</sup> Daq alulin nazaq iysa iyan mat aw nog in Iyahta ago bret na teq in ago gog ayuwun inaq na a hi giwazinatad neqeqmo in bilaqne Iyahta wol eman momta nog iyid daq na ago mebay in giholib tuqusdaq. <sup>28</sup> Nazaq iyan ne gigo daq ne emayta na ulum kemeq teq ne bret na neqad gog na ne uluwiy. <sup>29</sup> Mat nagah na a hi giwazinatad neqad uluwaqta na in Iyahta anon na ahol a hi waq kemaqta. In nazaq emad in aholyon God ago faq hureqan aholib tubolaq. <sup>30</sup> Afaqan alulin naqmo ago ne gigo asor kabemmo moqad gigo zaway hiqiyisa ta asor tumoqiyta. <sup>31</sup> Ari i gihol ulum kemad daq wastitayeqmo emsa teq God i gilum kemeq ago faq a hi ig nagta. <sup>32</sup> Teq Iyahta i gigo daq ulum kemad in i giwastitaynan haqad faq igaqta. In nazaq i giwastitayeq abeb in on mataw gileh ugiyta na giyon bilaqad gigo daq meqinta amenin negsa i nenaq a hi meqniyam haqad.

<sup>33</sup> Nazaq iyan ya imaqbaban, ne zip tonnan haqad bo humab tuwoleq osad mataw asor teqmo bolsa ne gibaq tuniy. <sup>34</sup> Ad mat agem moqagta na abitabmo didaq neqeq teq in humab nab bolan. Ne nazaq emid teq ne gigo humab na God ameb dimunmo

iysa abeb ne ago afaqan ara q a hi sor daqay.

Ari ya ne gigo hib leheq teq gamuk ka ago asor usaqta na tigibilen bugdaiq.

## 12

*Pol Bugaw Dimunta ago naw amo amo ginan bilam*

<sup>1</sup> Ari ya imaqbaban, muran ya Bugaw Dimunta ago naw amo amo ginan tibilaqnan. Luweq ne nagah na ago ginad a hi em has daqay haqad. <sup>2</sup> Kwaziqmo ne God abin a hi huritad osiyta kam nab mataw god katiyta giqez haiqta nagan ginan gibilensa ne gimuzinatad nenaq lehmo leh yaqayta. Na ago ne tuhuritiy. <sup>3</sup> Nazaq iyan ya gamuk ka gibilensa ne ginad em hasiy. God ago Bugaw Dimunta mat ara q aholib usad anad dimunta ugsa mat na bilaqdaq, "Yesus meqniyeq abin og kab hiqiyay" haqad in nazaq a hikidik bilaqdaq. Ad mataw ginadibmo Yesus anan 'Iyahta' nazaq in a hi bilaq daqaymo. Haiqgam. Mat aholib Bugaw Dimunta usad anad dimunta ugaqta naqmo in nazaq bilaqdaq.

<sup>4</sup> Bugaw Dimunta ago naw amo amo giqusaqta. Teq naw na bunmo anamren amulikmo Bugaw Dimunta osaqta. <sup>5</sup> Sa Iyahta ago kabiy amo amo mataw negsa in emayta. Teq kabiy na bunmo anamren amulikmo Iyahta qmo osaqta. <sup>6</sup> Mataw gigo zaway amo amo amalib God ago kabiy emayta. Sa God amulikmo naqmo in kabiy na emgo azawayin mataw bunmo giholib emsa in amalib kabiy amo amo na giqemayta.

<sup>7</sup> Bugaw Dimunta Yesus ago on mataw bunmo giholib zaway emsa in an ulumsihad an dimun tongo osayta. <sup>8</sup> Bugaw Dimunta in mat ara q zaway ugsa in ago anad dimdimunta ago walmataw gibilenaqta. Teq Bugaw Dimunta amulik naqmo in mat ta ara q zaway ugsa in God ago nagah amo amo alulin bilaqdaqta. <sup>9</sup> Teq Bugaw naqmo mat ta ara q zaway ugsa in God anan helmo diq haqdaqta. Ad Bugaw amulik naqmo mat ta ara q zaway ugsa in mataw gigo moq inaqta na giwastitaysa dimniyayta. <sup>10</sup> Teq mat ta ara q zaway waqad in daq azawayin inaqta emaqta. Teq mat ta ara q zaway na amalib God ago nantut bilaqdaqta. Teq mat ta ara q bugaw amo amo gilum kemoq azawayin waqdaqta. Teq mat ta ara q uliq amo amo gigo nan anadib bolsa in gamuk bilaqgo azawayin waqdaqta. Sa mat ta ara q nan amo amo na huriteq buliygo azawayin waqdaqta. <sup>11</sup> Naw na bunmo Bugaw amulik naqmo eman gwahtiqagta. In ago on mataw bunmo gilum kemad in naga nawun diq waq daqayta nazaqmo in negaqta.

*I bunmo mat amulikmo ahol anaghan amo amo nog iyim osauqta*

<sup>12</sup> Mat ahol in amulikmota. Teq in ahol na anaghan kabemmota. Ad in ahol anaghan amo amo kabemmo giquasayta na wastonim in mat ahol amulikmo iyayta. Sa Krai ago hib daq nazaq usaqta. <sup>13</sup> I Yesu abinib yuw huzauqta nab God ago Bugaw Dimunta amulikmo osaqta na in i bunmo giqeman i mat amulikmo ahol nog iyim osauqta. Juda mataw teq Grik mataw teq kabibiy mataw samanta teq og anamreniz ginadibmo samanmo luwayta na nenaq i bunmo God abenab Bugaw Dimunta amulikmo naqmo waqim i mat amulikmo tiqiya.

<sup>14</sup> Na ezaqgo mat ahol anaghan in amulikmo a haiqta. In ahol anaghan kabemmo giquasayta. <sup>15</sup> Ari mat na asen bilaqdaq, Ya mat ka aben a haiq haqdaq. Nazaq iyan ya mat ka ahol asor a haiqta haqdaq. In nazaq bilaqdaqta teq in ago gamuk na helta a haiq. In mat na ahol asor iyeq tuqus tutdaq. <sup>16</sup> Teq mat na adeksan bilaqdaq, Ya mat ka ameqnagin a haiq haqdaq. Nazaq iyan ya mat ka ahol asor a haiqta haqdaq. In nazaq bilaqdaqta teq haiq. In mat na ahol asor iyeq tuqus tutdaq. <sup>17</sup> Mat na ahol bunmo ameqnagin amomo iyeq ezaq teq in gamuk huritdaq? Ad in ahol bunmo adeksan amomo iyeq ezaq teq nagah ahuran wolsa in huritdaq? <sup>18</sup> Teq mat ahol anaghan nazaq amulikmo iyim a hi giquasayta. Haiqgam. God inmo anad muzinim in mat ahol anaghan ezaq diq giquasayta daqayta nazaqmo in giqeman usayta. <sup>19</sup> Mat ahol anaghan bunmo in araqibmo iyeq kabiy amulikmo naqmo emad useq in mat ahol bunta nog a hi iy daqay. Haiqgam. In bilaqne mat ahol anaghan amulikmo nog iyeq giquasayta. <sup>20</sup> Teq mat ahol nazaq a hi usaqta. Haiqgam. Mat ahol anaghan amo amo kabemmo na an wastonim in bilaqne mat ahol bunta nog iyim giquasayta.

<sup>21</sup> Teq mat ameqnagin in aben buloneq bilaqdaq, Ya ninan inad a hi bilaqsa ya imomo tuqusdaiq nazaq in a hi bilaqdaq. Ad mat na afaqin in asen buloneq bilaqdaq, Ya ninan inad a hi bilaqsa ya imomo tuqusdaiq nazaq in a hi bilaqdaq. <sup>22</sup> Haiqgam. I gihol anaghan asor giwaz meqin haiqta teq in i giholib hiqiyid i gihol bunmo dimunmo a hikidik usdaq. <sup>23</sup> Ad i gihol anaghan asor gime a hi bilaqdaqta na i giwazinad gibalaw tona in gibin inaq nog iyayta. Teq i gihol anaghan amebay inaqta na i anononmo giqisihan in giwaqan dimun diq iyaqta. <sup>24</sup> Sa i gihol anaghan asor amebay haiqta na i hulosan ulalab usayta. God anad emad in i gihol anaghan bunmo nazaq giqeman ussa asor gibin

haiqta na i ayahmo giwazinauqta. <sup>25</sup> In daq nazaq eman i gihol anaghan haresmo milhesim lehim a hi giquasayta. Haiqgam. I gihol anaghan araqib an soqotim usad in an ulumsihad giquasayta. <sup>26</sup> Nazaq iyan i gihol anaghan araq titiya i gihol bunmo titiyaqta. Sa i gihol anaghan araq abin dimunta waqsa i gihol anaghan bunmo inaqmo ginad dimniyayta.

<sup>27</sup> Ne bunmo Krai anon nog iyim osad ne in ahol anaghan amo amo nog iyim osayta. <sup>28</sup> Sa Yesu ago on mataw na gilikmanib God in mataw kazaqta gitowun eman osay. Danneb in Aposel giqam. Gigerta na in mataw God ago nantut bilaq daqayta na giqam. Ad ezeqmanta na in mataw suleq bilaq daqayta na giqam. Ad teq ta araqmo in mataw daq azawayin inaq giqem daqayta na giqam. Ad teq in mataw gigo naw in mataw moqayta giwastitayayta na giqam. Teq mataw in ta mataw asor gilumsih daqayta na in giqam. Teq in mataw marorta amo amo giqam. Teq mataw uliq amo amo gigo nan ginadib bolsa gamuk bilaqayta na in giqam. <sup>29</sup> Mataw bunmo Aposel iyim osayta ye? Mataw bunmo God ago nantut iyim osayta ye? Mataw bunmo on mataw suleq negad osayta ye? Mataw bunmo daq azawayin inaqta emayta ye? <sup>30</sup> Mataw bunmo in mataw gigo moq wastitayayta ye? Mataw bunmo uliq amo amo gigo nan ginadib bolsa gamuk bilaqayta ye? Mataw bunmo nan amo amo na huritim buliyayta ye? Na haiqgam. <sup>31</sup> Ari ne God ago naw na waqnan haqad teq ne naw aseseqta dimdimunta naqmo ne waqgo giwaz diq meqniyiy. Teq ya Yesu ago on mataw gilumsihgo adanteqin danneb diqta na ne tigiqisihunnan.

## 13

*I on mataw bunmo ginan ginad bilaqsa gilowan tonuq*

<sup>1</sup> Ari uliq amo amo gigo nan inadib bolsa gamuk bilaqdaiqta ago anawun na ya iholib usdaqta. Teq ya angelo gigo nanib gamuk tibilaldaq. Naw nagan ya iholib usdaqta teq ya ta mataw ginan inad a hi bilaqsa ya gamuk amo amo na bilaqad ya bilaqne belo samanta wolayta ahulan teq zoq samanta iyayta ahulan nazaq nog ya tiqiydaiq. <sup>2</sup> Teq ya God ago nantut bilaqgo anawun ya iholib ussa ya nagah God ago hib ulilemim usaqta na teq nagah bun diqmo ago ya tukurit kendaqta. Ad ya God anan helmo diq haqad garah araq bulonid in ago ban huloseq saw ta araqab le tuqosdaq. Ya mat nazaqta iyeq teq ya ta mataw ginan inad a hi bilaqsa ya God ameb mat saman diqta tiqiydaiq. <sup>3</sup> Teq ya

mataw gina haiqta na yaqgo naghah bunmo tinegdaiq. Ad ya ibin iluweq bilaqdaiq, Ya God ago kabiy emad ihol nog hulosta haqdaiq. Ya mat nazaq diqta iyeq teq ya ta mataw ginan inad a hi bilaqsa yaqgo daq dimdimunta na a hi ilumsihdaq.

<sup>4</sup> Mat in mataw bunmo ginan anad bilaqta na in kiskismo osad ago walmataw a hi ginadaqta. In on mataw bunmo gilowan tonaqta. Teq in mataw gigo naghah kabemmo inaqa na ginan agem a hi meqniyaqta. Ad in ahol abin a hi iluwad in yaqmo ag a hi haqtaqta. <sup>5</sup> Mat nazaqta girerey haresmo emad a hi luwaqta. Ad inmo ahol anadin diq a hi emad in agem hidmo a hi meqniyaqta. Mataw in aholib daq meqinta emsa in na ago anadin a hi emad adek zizalaqta. <sup>6</sup> Teq mat nazaqta in mataw daq meqinta emsa gibiyad ame a hi bilaqtaqta. Ari mataw gamuk helta an bulonsa gibiyad in ginan anad diq dimniyaqta. <sup>7</sup> Mat mataw ginan anad bilaqta na in afaqan sorad atuw a hi hiqiydaqta. Teq in God ago gamuk bunmo anan helmo haqtaqta. Tutimmo in ahol bunmo God ago hib emad God teq dimun tondaqta na ago in baq tunim osaqta. Teq kam bunmo in awaz diq meqniyim afaqan sorad nan kabemmo a hi bilaqtaqta.

<sup>8</sup> Mataw ginan ginad bilaqgo akaman na a hi hiqiydaq. Ari God ago nantut bilaqgo akaman tihiqiydaq. Sa mataw uliq amo amo gigo nan ginadib bolsa gamuk bilaqayta na giqez in tihiqiydaqmo. Teq mataw naghah bunmo ago ginad em hasayta na in ginad na akabiyah tihiqiydaqmo. <sup>9</sup> Na ezaqgo muran i God ago naghah asor asormo ago i huritauqta. Ad i God ago nantut bilaqauqta na i asor asormo bilaqauqta. <sup>10</sup> Ari abeb naghah bunmo tidimniy has daqayta kam nab i daq bunmo asor asormo a ta hi emam. Haiqqam. I daq bunmo anononmo tiqem bugamta.

<sup>11</sup> Ya amunibmo osad ya amun gamuk em nog iyad yaqgo daq teq inad bunmo amun nogmo iyim usyaqta. Teq muran ya mat ayah tiqiyim ya onmin gigo daq na bunmo tuhulos bug. <sup>12</sup> Muran i God ago naghah asor asormo ago tuhuritaqta. Bilaqne i galas-ib gihol asormo ahol waqauqta nazaq. Abeb naghah bunmo tidimniy has daqayta nab teq i God inaq an anobun ahol tuwaq kemamta. An anobun ahol waqad teq God i gigo tuhurit kemim osaqta nazaqmo i God ago tuhurit kemamtamo.

<sup>13</sup> Ari muran daq aseseqta ezeqman ka tuqus tutdaqta. I God anan helmo haqauqta na teq God i gidimun tondaq haqad i amen emim osauqta na teq i mataw bunmo ginan ginad bilaqtaqta na, daq ezeqman ka in tuqus tutdaqta. Teq daq ezeqman na in gilikmanib i mataw bunmo ginan

ginad bilaqtaqta naqmo in danneb diq iyim usaqta.

## 14

*Ne God ago nantut bilaqgo ginad diq bilaqan*

<sup>1</sup> Ne mataw bunmo ginan ginad bilaqgo adan nawa ya tibilayta na muzinad teq ne Bugaw Dimunta ago naw na giwaqgo giwaz meqniyiy. Ad naw amo amo na gilikmanib ne God ago nantut bilaqgo anawun naqmo ne waqgo ginad diq bilaqan. <sup>2</sup> Na ezaqgo mat uliq amota gigo nan anadib bolsa bilaqtaqta na in gamuk na amalib inmo ago walmataw a hi gibilenaqta. Haiqqam. In gamuk na amalib God amomo bulonaqta. Na ezaqgo mat nazaqta na in Bugaw Dimunta ago zawayib nan lul araq diqta na amalib God ago naghah ulilemabta anan bilaqsa in ago walmataw na huritad ginad a hi em hasayta.

<sup>3</sup> Ari mat God ago nantut bilaqtaqta na, in ago gamuk na amalib mataw gigem zaway negsa in gigo ginad helta na awaz meqniyaqta. Ad in mataw ginad meqniysa osayta na ginad waqsa in ginad dimniyaqta. <sup>4</sup> Mat uliq ta asor gigo nan anadib bolsa bilaqtaqta na inmo agem zaway ugaqta. Ari mat God ago nantut bilaqtaqta na in Yesus ago on mataw bunmo gigem zaway negaqa. <sup>5</sup> Ne bunmo uliq ta asor gigo nanib gamuk bilaqgo ya inad bilaqtaq. Teq ya inad ayah diqta ne God ago nantut bilaq nagiy haqaiq. Mat God ago nantut bilaqtaqta na in on mataw ayahmo gilumsihaqta. Sa mat uliq ta asor gigo nan anadib bolsa bilaqtaqta na in amomo ahol ulumsihaqta. Ari mat araq oseq nan lul araqta na buliyeq Yesus ago on mataw bunmo gibilensa nab teq mat nan lul araq bilaqtaqta na in ago walmataw ayahmo tigilumsihdaqmo.

<sup>6</sup> Ya imaqbaban, ne ginad em hasiy. Ya ne gigo hib leheq uliq amota gigo nan inadib bolsa ya gibilenaq ezaq teq yaqgo gamuk na ne gilumsihdaq? Haiqqam. Ya ne gilumsihnan haqad teq ya God ago gamuk alulin araq God iquisihunta naqmo ya gibilendaq. Teq ya God ago naghah asor ago inad em hasta agamukan araq o God ago nantut agamukan araq o God ago suleq agamukan araq ya ne gibilendaq. <sup>7</sup> Ne kadug ayow gita inaq ginadin emiy. Naghah giger na kayeq a hi usayta. Teq mat kadug anonon a hi ulamsa on mataw ezaq teq bar ago ginad em has daqay? Ad mat gita ago akabananan diq a hi muzinad wolsa on mataw bar anatan ezaq teq hurit daqay? <sup>8</sup> Ad mat zoq iyaqta na in babzoq anonon a hi iyid nog teq bab emgo ahol wastitaydaq? Na haiqqam.

<sup>9</sup> Daq nazaqta ne gigo hib usaqmo. Ne uliq ta asor gigo nanib ne gigo walmataw gibilensa ezaq teq in ne gigo gamuk na alulin hurit kem daqay? Ne gigo gamuk na ne saman diqta bilaq daqay. <sup>10</sup> Helmo og kab mataw gigo nan amo amo gigusayta. Ad nan amo amo na ginamreniz in gimi gimo gigo gamuk huritim ginad em hasayta. <sup>11</sup> Ta teq mat araq inmo ago nanib gamuk ibilensa ya huritad inad a hi em haseq teq ya in anan bilaqdaiq, Mat ko asen tob bolta haqdaiq. Sa in ya iloyinsa ya in ago hib nazaqmo isen tob bolta nog iydaiqmo. <sup>12</sup> Ad luweq ne gilikmanib daq nazaqmo gwahtiqaq. Nazaq iyan ne Bugaw Dimunta ago naw giwaqnan ginad diq bilaqsa iyan ne naw Yesus ago on mataw giqemid in ginad em hasad zaway iyeq tur daqayta anawun naqmo giwaqgo ne God susumun ugiy.

*Yesus ago on mataw uliq amo amo gigo nan ginadib bolsa bilaqayta na ago adan agamukan*

<sup>13</sup> Daq alulin naqmo ago mat uliq ta asor gigo nan anadib bolsa bilaqayta na in ago gamuk na buliyeq ago walmataw gibilengo anawun inaqmo waqgo haqad in God susumun ugan. <sup>14</sup> Ne ginad emiy. Ya uliq amota gigo nanib God bulonad ya naga gamukin diq bilaqayta na ago ya inad a hi em hasaiqta. Na ezaggo ya iwitanmo God inaq gamuk emaq. <sup>15</sup> Nazaq iyid teq ya ezaq tondaiq? Ya iwitan God inaq gamuk emsa ya inad em hasnan inad bilaqay. Ad nazaqmo ya iwitan God abin iluwad amen bar wazsa ya inad em hasnan inad bilaqaymo.

<sup>16</sup> Ari ni niwitanmo God esey ugsa ta ni nisan a hi huritsa mat araq ningo daq a hi loyinta na in ni niqezab gamuk gwahtiqaqta na huritad in anad a hi em hasdaqmo. Anad a hi em haseq ezaq teq in ningo gamuk na ulumsihad 'hel diqtaqmo' tihaqdaq? In ningo gamuk na huriteq anad a hi em hasad in 'hel diqtaqmo' a hi nemdaq. <sup>17</sup> Nazaq iyan ni gamuk dimunta amalib God esey ugsa ta mat araq na anad a hi em hasad oseq in ago anad helta na samanmo usad awaz a hi meqniyaq. <sup>18</sup> Ya ne giquiriyamim uliq ta asor gigo nan ya inadib bolsa sirisirimo ya God bulonaiqta. God naw na ya yagan ya esey diq ugaqta. <sup>19</sup> Ta teq ya Yesus ago on mataw nenaq humab woleq ya in gimeb eraqeq uliq ta asor gigo nanib God inaq gamuk sisaqmo bilaqnan ituw hiqiyay. Na ezaggo ya naga gamukin bilaqayta na in ginad a hi em daqay. Ari ya humab nab eraqeq suleq agamukan asitmoqmo bilaqnan ya inad diq bilaqay. Na ezaggo ya inad emad gamuk

na bilaqsa mataw na huriteq ginad em has daqayta na ago iyan.

<sup>20</sup> Ya imaqbaban, ne onmin ginad em nog hi iyiy. Haiqgam. Ne kazaq ginad emad osiy. Mataw aseseqta ginad em hasim daq emayta nazaq ne ginad emiy. Ad amun sosilta daq meqinta emgo anad a hi emaqta nazaq nog ne ginad usanmo. <sup>21</sup> God ago maror Moses mar tonta na aduganib Iyahta in kazaq bilam,

Ya mataw gisen tob bolta na giqemid in giqezab nan amo amo gwahtiqa in yaqgo on mataw ka yaqgo gamuk tinegdaiq ham. Teq yaqgo on mataw na gihol a hi ritensa in ya iqez na huritnan gituw hiqiy daqay ham. *Aisaya 28.11-12*

<sup>22</sup> Nazaq iyan uliq ta asor gigo nanib gamuk bilaqgo anawun na in on mataw Yesus anan helmo a hi haqayta naqmo gilumsihgo usaqta. Nan lul araq diqta na ne giqezab gwahtiqa God in mataw asan banta na ago zaway giqisihunaqta. Naw naway na in Yesus ago on mataw gilumsihgo a hi usaqta. Ari God ago nantut bilaqgo anawun na in Yesus ago on matawta gimen usaqta. Na in mataw Yesus anan helmo a hi haqayta na giyon a haiqta.

<sup>23</sup> Nazaq iyan ne Yesus ago on matawta na, ne bo humab woleq tuqosad teq luweq ne bunmo eraqeq uliq amo amo gigo nan ginadib bolsa tibilaq daqay. Bilaqsa mataw ne gigo daq a hi loyiniya na teq mataw Yesus anan helmo a hi haqayta na in ne gibiyad bilaq daqay, Ne gifaqin hulosisim agadan tiqiyiy daqag haq daqay. <sup>24</sup> Ari ne gigo humab nab ne bunmo God ago nantut bilaqsa mat Yesus anan helmo a hi haqayta na teq mat ne gigo daq a hi loyinta na in ne nenaq osad ne gigo gamuk na bunmo tuhurrit daqay. Huritsa ne gigo gamuk bunmo in mataw na gilum kema in gigo daq meqinta na ago gihol tiloyin kem daqay. <sup>25</sup> Ad in ginad bunmo ulilemim gigemab usaqta na ulal tiqiy bugsa in gihol hulosisim ogib woqeq usad in God abin iluwad bilaq daqay, Helmo God ne gilikmanib nenaq oseqta haq daqay.

*Lotu aduganib daq bunmo titnoneqmo lehan*

<sup>26</sup> Nazaq iyan ya imaqbaban, ne teq ezaq ton daqay? Ne lotu tiqemnan haqad bo humab woleq osad ne daq kazaq emiy. Mat araq lotu ago bar ginadin emsa gwahtiqaq. Sa araq suleq agamukan anadin emeq bilaqan. Sa araq gamuk alulin God isihunta araq bilaqan. Sa araq uliq amota gigo nan anadib bolsa bilaqan. Sa araq gamuk na buliyeq walmataw gibilenan. Teq ne lotu akabiyannagan bunmo emad ne Yesus ago on mataw gigem zaway neggo haqad

ne emiy. <sup>27</sup> Nazaq emad ne gigo mataw kabemmo uliq ta asor gigo nan ginadib bolsa in hi bilaqiy. In giger ezeqman nazaq amulik-mulikmo eraqeq bilaqsa ta bunmo gigez hiqiyeq osiy. Sa mat araq in gigez na buliyeq walmataw gibilenanmo. <sup>28</sup> Ari mat gamuk buliydaqta araq a hi osid teq mat uliq amota gigo nanib gamuk bilaqdaqta na in Yesus ago on mataw gilikmanib tok nemeq osad inmo ahol kiskismo bulonad God inaq gamuk eman.

<sup>29</sup> Teq mataw God ago nantut bilaqayta giger ezeqman nazaq eraqeq gamuk bilaqsa walmataw bunmo in gigo gamuk na ulum kemiy. <sup>30</sup> Teq mat araq eraqeq God ago nantut tibilalqsa ta God in ago gamuk alulin araq mat araq isihunid mat bilaqaqta na aqez wasihad in araq na ban ugsa bilaqan. <sup>31</sup> Ne dante dimunta na muzinad teq ne bunmo ban inaq iyeq God ago nantut ginadib bolaqta na tibilalq daqay. Bilaqsa on mataw bunmo suleq dimunta na huritad in gigem zaway tiqiydaq. <sup>32</sup> Mataw God ago nantut bilaggo anawun giholib usaqta na in gigo naw na anononmo tuwamuz daqay. Naw na in mataw na ginad a hi wamuzdaq. <sup>33-34</sup> Na ezaqgo God in mataw giqeman ginad agadan iysa garak ayahmo a hi emayta. In mataw giqeman gigem kute nensa in wastitayimmo osayta.

Ari uliq bunmo God ago on mataw tawonta na gidauhan bunmo in lotu tiqeman haqad bo humab tuwolim ossa in gigo on gigezmo hiqiyim osayta. Nazaq iyan ne gunun na tumuzin daqaymo. Ne on giwasihid in eraqeq ne gigo humab aduganib gamuk hi bilaqiy. In mataw gihaqenibmo iyeq osiy, God ago maror Moses mar tonta bilamta nazaq. <sup>35</sup> Teq in gamuk araq alulin huritnan haqad in gibitab leheq teq gidugnizmo susumun neqeq hurit kemiy. Na ezaqgo Yesus ago on mataw in abinib humab wolsa aw eraqeq mataw bunmo gimeb gamuk bilaqdaqta na in daq amebay inaqta.

<sup>36</sup> God ago gamuk in ne Korin gimomo gigo a haiqta. In ne gigo hib danmeh a hi gwahtimta. Teq in og kab gwahtiqim ne gimomo gigo hib a hi lahtamo. Nazaq iyan ya gunun kagan gibilensa ne geg hi yagiy. <sup>37</sup> Mat aw nog in God ago nantut bilaqaqta amatin diqta iyeq teq in yaggo gamuk ka huriteq ginad emeq bilaq daqay, Gamuk nawa na Pol anadibmo a hi bilamta haq daqay. Iyahtaqqo bulonan in i gunun na gibilenaq haq daqay. Teq mataw bunmo giholib God ago naw usaqta na in ginad nazaq tiqem daqaymo. <sup>38</sup> Ari mat araq gamuk ka gileh ugsa ne mat na gileh ugiyimo.

<sup>39</sup> Nazaq iyan ya imaqbaban, ne God ago nantut bilaqgo anawun waqgo giwaz diq

meqniyyi. Sa ne gigo asor uliq amo amo gigo nan ginadib bolsa ne hi giwasihiyimo. <sup>40</sup> Teq daq ayah diqta ne em daqayta na in kazaq. Ne gigo lotu aduganib kabiy daq bunmo wizwazeqqmo emsa in titnoneqqmo lehan.

## On mataw tumoqiya ta teq tiqeraq daqay

### 15

#### *Krais moqim teq ta eram*

<sup>1</sup> Ya imaqbaban, ne Yesus awagamun dimunta na anadin a ta em daqay haqad ya kazaq ne tigibilennan. Wagam dimunta na ya mebmehmo lehim ne gibilenan ne waqim amalib giwaz diq meqniyyim tituray. <sup>2</sup> Ad ne Yesus awagamun dimunta ya gibilenta na waz naqqmo hiqiyid teq God ne gilumsiheq tigiwaqdaq. Ari ne wagam na bunmo a hi waz bugid teq ne Yesus anan helmo haqayta na le saman tiqiydaq.

<sup>3</sup> Teq ya Krais ago hib gamuk ayah diqta waqim gibilenta na in kazaq. Krais i gigo daq meqinta na bunmo giwalemnan haqad in momta, God ago mar bilamta nazaq. <sup>4</sup> Moqan in hodhodab tiyay toniy. Yay tonan kam ezeqmanta nab God hodhodab wazan ta eram, God ago mar bilamta nazaq. <sup>5</sup> Hodhodab eraqim danmeh in Pita ameh gwahtim. Gwahtiqim teq in ago disaipel ta asor na bunmo gimeb gwahtim. <sup>6</sup> Ad abeb in i gimaqbaban kabemmo diq 500 uriyamiya nazaq gimeb gwahtiqan in araqibmo ahol waqiy. Mataw na gigo asor kabemmo muran os tutsa asormo tumoqiyy. <sup>7</sup> An teq in Jems ameb gwahtiqim teq in Aposel bunmo gimeb gwahtimmo.

<sup>8</sup> An abeb diq in yaqqmo imeb gwahtimtamo. Bilaqne aw amun emnan haqad ago kam ulum riyawunim in kam asor a ta osim teq amun emnaqta nazaq. <sup>9</sup> Nazaq iyan Aposel bunmo gilikmanib ya ihol abin amik diqta. Ya ibin Aposel a hi us nagta usaq. Na ezaqgo kwaziqqmo ya God ago on mataw Yesus ago nan huritayta na gimuzad gimeqin diq tonyaiqta na ago. <sup>10</sup> Ta teq God agem dimunta yagan ya kawa ibin tidimniyyim osaiqta kazaq ya tuqos tutaiq. Ad God agem dimunta yagta na le saman a hi iy. Haiqqam. Ya Aposel bunmo giquiryameq kabiy atoran diqmo emyaiqta. Teq yaqqmo igo zawayib kabiy na a hi emyaiq. God agem dimunta yagad ago zaway yagsa ya kabiy emyaiqta. <sup>11</sup> Ari teq yaqqmo Yesus awagamun dimunta ne gibilenta o haiq Aposel ta asor na gibileniyta na ago i ananin kabemmo hi bilaqeq. I bunmo wagam amulikmo Yesus moqim teq hodhodab ta eramta na ago i bilaqauqta. Bilaqsa ne wagam amulik naqqmo huritim anan helmo haqiyta.

*Abeb on mataw tumoqiya na bunmo hodhodab ta eraq daqayta*

<sup>12</sup> Ari mataw Yesus hodhodab eramta na awagamun bilaqsa ta nagaqgo ne gilikmanib mataw asor bilaqay, I moqeç a ta hi eraqam haqayta? <sup>13</sup> On mataw tumoqiya hodhodab a hi eraq daqayta iyid, God in Krajs hodhodab wazid a hi eraq nagtamo. <sup>14</sup> Teq God Krajs hodhodab wazan a hi eramta iyid i Yesus awagamun gibilenta na alulin haiq iy nagmo. Sa ne wagam na huritim anan helmo haqiyta na in samanta alulin haiqta tiqiy nagmo.

<sup>15</sup> Teq ta nagah araçmo. I Aposel bilaqauç, God Krajs wazan eraçan i gimeb ahol tuwawta haqauç. Ari God mataw tumoqiya giwazid a hi eraq daqayta iyid in Krajs wazid a hi eraq nagmo. Sa i bilaqauç, I Krajs ahol tuwaw haqauçta na i katiyad God daq a hi amta na i anan in tiqam haq nag. <sup>16</sup> Na ezaqgo God mataw tumoqiya na giwazid a hi eraq daqayta iyid, in Krajs wazid a hi eraq nagmo.

<sup>17</sup> Teq God Krajs wazan a hi eramta iyid ne ginad helmo haqayta na in ne a hi gilumsih nag. Ad ne gigo daq meçinta amebay na ne giholib tuqus tut nag. <sup>18</sup> Us tutsa ne gigo asor Yesus anan helmo haqad osim moqiya na in nabagag timeçniyad os nagiy. <sup>19</sup> I og kab kayeqmo osad ginad emauç, God Krajs amalib i tigidimun tondaq haqad i baq tunim osauçta. Ari God Krajs wazan a hi eramta iyid i moqeç tihiqiy nag. Ad i a hi moqad i gihol kat ugad saman diçmo God amen emeq os nag. Ossa mataw i gibiyad bilaq nagiy, On mataw bunmo gilikmanib mataw koçmo gihol kat ugad ossa i ginad diq negaç haq nagiy.

<sup>20</sup> Teq in nazaq a haiq. Helmo diq Krajs moçan God wazan ta eramta. Mataw tumoqiya na gilikmanib Krajs danmebmo diq eraçim kayeqmo osaqta. Bilaqne mat ago kabiy ame waqçta nazaq noç God Krajs wazan in danmeb eramta. <sup>21</sup> Na ezaqgo matmo araç on mataw gimen dan eman in bunmo moçayta. Nazaq iyan mat ta araçmo on mataw gimen dante wastitayan in hodhodab eraqeq kayeqmo kuluwakuwmo tuqos daqayta. <sup>22</sup> Na in kazaq. Adam asenlul bunmo moçayta. Sa Krajs asenlul bunmo hodhodab eraqeq kayeqmo kuluwakuwmo os daqayta. <sup>23</sup> Teq on mataw bunmo garabmo diq a hi eraq daqay. Krajs danmeb tiçeramta. An in ta boldaqta nab teq in asenlul bunmo tiçeraç daqaymo.

<sup>24</sup> Eraqid nab teq og kab nagah bunmo giquçayta na gikaman tihiqiydaç. Kam nab Krajs in mataw marorta gibin inaç iyim nagah bunmo giwamuzad osayta na bunmo giwazid woçsa in gigo zaway tihiqiy bugdaç. Hiqiy bugid teq Krajs ago maror

in wazaqta na in Amam God tuquçdaç. <sup>25</sup> Muran Krajs maror iyim osad in ago bab bunmo giwazan tuwoçay. Ad in ago bab bunmo giwazid woç bugid nab teq in og ka wamuzgo agwatuçin in wazim osaqta na eronid Amam abenab tilehdaç. <sup>26</sup> Lehid teq Krajs ago bab abebtanta in meçin tonid hiqiydaçta na moçmo. <sup>27</sup> God ago marib gamuk araç kazaq bilam,

God nagah bunmo giçeman in ahaqenib giçusayta ham. *Buk Song 8.6*

Teq gamuk na bilam “nagah bunmo in ahaqenib giçusayta” hamta na i huritim ginad emauç, God nagah nagan bunmo giçeman in Atatin Krajs ahaqenib iysa inmo ahol eman Atatin ahaqenib a hi iyaqta haqauç. <sup>28</sup> God teq nagah bunmo giçemid Atatin ahaqenib tiqiy daqayta. In nagah bunmo giçemid Atatin ahaqenib tiqiy bugid nab teq in Atatin na inmo ahol emid God ahaqenib tiqiydaçmo. Iyid teq kam nab God in nagah bun diçmo gigo Iyahta iyeç tuqosdaç.

<sup>29</sup> Ne ginad emiy. Mataw asor in giyogniz yuw a hi huzimmo moqiya na gigo ban waçim in gibinib yuw huzayta. Ari mataw tumoqiya na a hi eraq daqayta iyid nagaqgo in giyogniz daq na emayta? In daq na samanta em nagiy. <sup>30</sup> Teq i moqeç a hi eraçamta iyid ta ezaq haqad tutimmo i bab giteb God ago kabiy emad luwauçta? <sup>31</sup> Ya imaçqaban, ya negmo gigo hib ibin nazaq waçim bilaqaiçta. Ne yaqgo tuhuritiy. Ya le ne gigo hib kabiy emad ya bab gitebmo diq kabiy na emyaiçta. Teq yaqmo igo zawayib ya kabiy na a hi emta. Haiçgam. I gigo Iyahta Krajs Yesusmo zaway yagsa ya nazaq emyaiç. Nazaq iyan ya bilaqaiç, Kam bunmo ya moçgo tow waçim luwaiçta haqaiç. <sup>32</sup> Teq ya og kab yaqmo ihol ulumsiheç dimunmo osnan haqad kabiy emaiçta iyid nagaqgo ya uliq Efesus-ib karuw kwasikta na ginaç an wolta? On mataw tumoqiya na a hi eraq daqayta iyid nagaqgo i afaçan nazaqta sorauçta? I gamuk araç mataw asor bilaqad luwayta nazaçmo i em nagta. Gamuk na bilam,

Babeç i moqeç i ginad dimniysa osamta akaman tihiqiydaç ham. Nazaq iyan muran i ginad dimniysa didaç neçad yuw uluwad osuç ham. *Aisaya 22.13*

<sup>33</sup> Teq ne mataw ginad katiyta nawa bilaqayta na hi muziniy. Ad ne gamuk araç mataw bilaqad luwayta kaçmo ne anadin emiy. Gamuk na bilam, Mat dimunta mataw meçmeçinta nenaç luwad in gigo daq meçinta na in tiçemdaçmo ham.

<sup>34</sup> Ne ginad agadanta na hulosaç ne ginad dimunta a ta waçad ne gihol anononmo wamuzad osiy. Osad ne gamuk katiyta na hulosaç daq meçinta na a ta hi emiy.

Nagaqgo ya kazaq bilaqaiq? Ne gigo mataw asor God ago a hi hurit kemim in gamuk katiyta mataw hodhodab a hi eraq daqayta na ago bilaqsa iyan ya kazaq ne gibilenaq. Gibilensa ne na ago gimebay a hi woqaq e?

*I hodhodab eraqeq gisan lul araq diqta waqam*

<sup>35</sup> Ari ne gigo mat araq kazaq susumuneq bilaqdaq, God ezaq teq on mataw tumoqiyta na giwazid hodhodab eraq daqay? haqdaq. Teq in eraqeq gisan muturta ezaq diqta waq daqay? haqdaq. <sup>36</sup> Ni agadan hi iy. Ni didaq amagin kabiyab leyaqta na in og aduganib moq nog iyim usim teq a in kayeq ta iyaqta. <sup>37</sup> Ni wit anagin teq didaq asor amagin kabiyab tileyad ni anon waqeq neqdaqta nazaq nog ni a hi leyaqta. Haiqgam. Ni didaq na amaginmo leyaqta. <sup>38</sup> Leyan teq God inmo didaq amagin na anon neqaqta. Didaq amagin bunmo anon ezaq giqemeq us daqayta na God-mo in gitowun tiqamta. <sup>39</sup> Nazaq iyan nagah bunmo kayeqmo og kab luwayta na gisan awaqan araqib a haiqta. Mataw gisan awaqan lul araqta. Sa karuw gisan awaqan lul araqta. Sa ah gisan awaqan lul araq iysa nabiq gisan awaqan lul araqtammo. <sup>40</sup> Nagah bunmo kaitab ulilib oyad turayta na gihol lul araq inaqta. Sa nagah bunmo og kab giqusayta nagan gihol lul araq inaqtammo. Teq nagah kaitab ulilib turayta na gihol awaqan in araq. Sa nagah ogibta na gihol awaqan in araqmo. <sup>41</sup> Zeq ahol awaqan araq iysa ta kalam ahol awaqan araq iyaq. Sa ulig gihol awaqan araq iyaqmo. Teq ulig bunmo gihol awaqan araqib a haiqmo. In giholbin amulik-mulikmo turad in gihol awaqan nazaqmo araq araq iyaqtamo.

<sup>42</sup> Teq mataw hodhodab eraq daqayta na gigo hib daq nazaq tugwahtiqdaqmo. I gisan a le yay tonayta na lilihim meqniyaqta. Teq i gisan eraqdaqta na a hi lilihdaqta. <sup>43</sup> I gisan a le yay tonayta na abin meqinta. Teq i gisan eraqdaqta na abin dimun diqta. I gisan yay tonayta na ago zaway haiqta. Teq i gisan eraqdaqta na ago zaway inaqta. <sup>44</sup> I gisan yay tonayta na in og ka agota. Teq i gisan eraqdaqta na in Heven agota.

Og ka ago gisanta inaqta. Sa Heven ago gisanta inaqtammo. <sup>45</sup> God ago marib gamuk araq kazaq bilam,

God in mat aqenta Adam eman in kayeq iyim osta ham. *Jenesis 2.7*

Ari God in Adam ta araq abeb gwahtimta na eman in ago Bugaw Dimunta amalib on mataw giqeman kayeq iyim osayta. <sup>46</sup> Teq os dimunta i giwitan kuluwa-kuluwmo Heven-ib osamta na i danneb a hi waqauqta. I gisan diq waqim og kab osauqta naqmo i danneb waqauqta. Waqim

osim abeb teq i os lul araq diqta na waqeq i giwitan kayeqmo kuluwa-kuluwmo osamta. <sup>47</sup> God og waqim amalib Adam dannebta na eman gwahtimta. Ari Adam gigerta na in Heven-ib osim gehitimta. <sup>48</sup> On mataw og kabta bunmo in mat aqenta og amalib amta naqmo nogta. Ad nazaqmo mataw Heven-ib osayta nagan in mat Heven-ib osim gewomta na nogmo iyayta. <sup>49</sup> Nazaq iyan i gihol awaqan mat aqenta og amalib amta na awaqan nog iyim osauqta nazaqmo teq i gihol mat Heven-ib osim gewomta na ahol awaqan nog iyeq tuqosamtamo.

<sup>50</sup> Ya kazaq gibilensa ne ginad emay ye? Mat asan ogibta na Heven-ib leheq in God ago maror aduganib a hi gwahtiqdaqta. Ad in asan osim moqaqta na le os dimunta tuteqmo os daqayta nab gwahtiqeq kuluwa-kuluwmo a hi osdaqtammo. <sup>51</sup> Ne gidek emeq gamuk araq ulilemim usta ka ya bilaqsa ne huritiy. I bunmo a hi moqamta. Ta teq i bunmo gisan buliyeq lul araq diq iyaqta. <sup>52</sup> Nagah na nan saw haiq hid naqmo taur abebtanta gayonsamo tugwahtiqdaq. Taur na gayonid on mataw tumoqiyta na eraqeq gisan a hi lilihdaqta na waqsa i bunmo gisan tubuliydaqmo. <sup>53</sup> I gisan lilihaqta ka buliyeq a hi lilihdaqta tiqiydaq. Ad i gisan moqaqta ka buliyeq a hi moqdaqta tiqiydaqmo. <sup>54</sup> I gisan buliyeq nazaq diq iysa kam nab daq na God ago marib gamuk araq usaqta ka tuwol net bugdaq. Gamuk na bilam, God bab bunmo giquriyamim in moq inaqmo eman tihiqiy ham. *Aisaya 25.8*

<sup>55</sup> Moq ni mataw ginol emid moqgo azawayin edowa? ham. Ad ningo em ni amalib mataw gilum eman moqayta na ni edob eman usaq? ham. *Hosea 13.14*

<sup>56</sup> Moq ago em na in daq meqinta naqmo. Sa daq meqinta ago zaway alulin God ago maror Moses bilamta nab usaqta. <sup>57</sup> Teq i God esey diq uguq. In i gigo Iyahta Yesus Krai ago zaway amalib i giqeman i bab bunmo giquriyamaqta. <sup>58</sup> Nazaq iyan ya imaqbaban dimunta, ne giwaz meqniyeq tursa mataw katiyta bo ne gilum waqad hi giqothasiy. Ad ne ginad kazaq emiy. I Iyahta ago kabiy emauqta ka in le samanta a hi iyaq haqiy. Haqad ne gihol bunmo Iyahta ago kabiy ugad ne giholtuw diq bulad kabiy na emiy.

**Pol kabiy asor emnan anad emyaqta na ago in bilam**

## 16

*Pol in Krai ago on mataw Jerusalem-ub osayta na gimen mani emid lehgo bilam*

<sup>1</sup> Ari ne God ago on mataw tawonta uliq Jerusalem-ub osayta na gimen mani humab wol daqayta na ago ya ne tibilennan. Ya saw Galesiya-ib Yesus ago on mataw gidauhan bunmo gibilenta nazaq ne em daqaymo haqad ya ne gibile-naiq. <sup>2</sup> Sande bunmo ne kazaq emiy. Mataw amulik-mulikmo in kabiy emim mani waqiyta na ago asor uroteq in gimi gimo gigo bitab mataw gina haiqta na giyon emid usan. Ne Sande bunmo daq nazaq emsa teq mani na kabemmo iyeq usan. Ussa ya ne gigo hib lehdaiqta nab ne mani a ta hi nagun daqay. <sup>3</sup> Teq ya le ne gigo hib tugwahtiqdaiqta nab ne mataw asor gibin dimunta gitowun tiqem daqay. Emid teq in mani a leh daqayta na ananin ya sansandekib mar toneq negad giqemid in naw na ad Jerusalem-ub tileh daqay. <sup>4</sup> Ari ya nenaq lehnan inad bilaqid teq ya in nenaq araqib i tileham.

*Pol uliq Korin on mataw na gibiyann bilam*

<sup>5</sup> Teq danmeb ya le Yesus ago on mataw saw Masedoniya-ib osayta na gibiyeq gibiyeq lehad luweq teq ya le uliq Korin-ib ne tigibiydaiqmo. <sup>6</sup> Ya le ne nenaq asit sisaq nog osdaiq daqag. Ossa urom akaman tihiqiyid teq ya ne gihuloseq lehdaiqya haqad inad emaiq. Na ezaqgo ya nenaq oseq uliq araqaq lehnan tonsa ne ya ilumsiheq nagah asor yagid teq ya lehdaiqta na ago iyan. <sup>7</sup> Daq alulin nazaq iysa iyan muran ya saw Masedoniya-ib lehad ya le ne nenaq asitmoqmo osnan inad a hi bilaqaq. Iyahta anad bilaqsun ya Masedoniya-ib leheq ihol buliyeq ta bolad teq ya le ne nenaq sisaqmo tuqosdaiq haqad ya inad emaiqta. <sup>8</sup> Teq ya saw Masedoniya-ib hidmo a hi lehdaiq. Ya uliq Efesus-ib kab osad Pentikos ago kam ayahta na ahol waqeq teq lehdaiq haqad ya inad emaiq. <sup>9</sup> Na ezaqgo God uliq kab yaqmen dante em yagan ya in ago kabiy emsa anon kabemmo diq tugwahtiqta na ago. Teq mataw kabemmo yaqgo kabiy na geg ugaytamo.

<sup>10</sup> Ari Timoti le ne gigo hib gwahtiqid ne alowan tonsa in nagah araqaq anan hi rabad agem kute nemsan osan. Ya Iyahta ago kabiy emaiqta nazaqmo in kabiy emaqta. <sup>11</sup> Nazaq iyan ne gigo araqaq mat na hikidik baymuzan. Ad in muleqeq yaqgo hib ta bolsa ne ulumsihid in agem kiskistab yaqgo hib bolan. In i gigo maqbab asor nenaq boldaq haqad ya kawa in gibaq tunim osaiqta. <sup>12</sup> Ari i gimaqbab Apolos anan ya kazaq ne gibilendaq. In i gigo maqbab asor nenaq ne gigo hib lehgo ya ime kabemmo bulonta. Bulonan in muran ne gigo hib lehnan anad a hi bilaqaq. Teq

abeb in dante dimunta inaq iyeq in ne gigo hib nawa tilehdaq.

*Pol ago gamuk ta asor bilamta*

<sup>13</sup> Ne gihol asawan woltayad ginad helta na waz naqmo hiqiyeq osiy. Ad ne giwaz meqniyeq turad nagah araqaq hi rabuniy. <sup>14</sup> Teq ne gigo kabiy daq bunmo ne emayta na ne God teq on mataw bunmo ginan ginad bilaqsa ne emiy.

<sup>15-16</sup> Ya imaqbaban, Stefanas asenlul ne-naq saw Akaya-ib on mataw bunmo gilikmanib in danmeb Kraisan anan helmo haqiyta. Na ago ne tuhuritiy. In God ago on mataw tawonta na gilumsihsnan haqad gimen kabiy emad in gihol bunmo kabiy nab eman lehaqta. Nazaq iyan ya imaqbaban, ya ne atoranmo kazaq gibilendaq. Ne mataw na gihaqenib iyeq gilumsihiy. Ad mataw na giyogniz giholtuw bulad nenaq kabiy araqibmo emayta na bunmo inaqmo ne giwazinat gihaqenib iyeq in bunmo gilumsihiymo. <sup>17</sup> Teq ne gigo mataw ezeqman Stefanas, Fortunatus, teq Akaiqus in yaqgo hib bolan ya gibiyad inad diq dimniy. Ya ne bunmo gibiy nagta na amenin ya in gibiyim igem tidimniyaq. <sup>18</sup> Na ezaqgo mataw na ne gigem eman hastitayan ne zaway muturta waqiyta nazaq in bolim ya igem eman ti-hastitaymo. Nazaq iyan ne mataw nazaqta giwazinat gibin iluwiy.

<sup>19</sup> Saw Esiya-ib Yesus ago on mataw gidauhan bunmo in gigo zeq dimun eman ne gigo hib nawa lehaq. Ad Akwila awe Prisila inaq teq Yesus ago on mataw in giger gigo bitab humab wolayta na bunmo nenaq in ne ginan ginad diq dimniya Iyahta abinib in gigo zeq dimun nawa ne gimen eman lehaqmo. <sup>20</sup> Sa i gigo gimaqbaban kab osayta na bunmo in gigo zeq dimun eman ne gigo hib nawa lehaqmo. Ari God ago on mataw gigo daq titnonta na amalib ne an zeq dimun ugiy.

<sup>21</sup> Yaqmo Pol, ya ibenab yaqgo zeq dimun kawa tumar tonaiq.

<sup>22</sup> Ari mat aw nog Iyahta anan ginad a hi bilaqta na God kusluw negid in meqniy haseq osiy.

Iyahta ni bolmo bol.

<sup>23</sup> Ari i gigo Iyahta Yesus agem dimunta negsa ne osiy.

<sup>24</sup> Teq i bunmo Kraisan Yesus aholib soqotim inaq osad iyan ya ne ginan inad bilaqta na ayahmo ne gigo hib eman nawa tilehaq. Nawaqmo.



## 2 Korin

### Sansandek gigerta Pol mar tonan uliq Korin-ib lahta Gamuk ameb lehaqta

Yesus ago on mataw uliq Korin-ib osiyta na gilikmanib mataw asor eraqim Pol aghilehunan kazaq bilaqiy, Pol amileq iyad in aposel diq a haiqta haqiy. Haqsa Korin on mataw girerey emad Pol hulosan ton yaqay. Sa Pol afaqan na ahol waqad in mataw na gigez amenin emim gamuk araq awaz meqin diqta sansandekib mar tonim uliq Korin-ib eman tilah. Teq sansandek na nabag iyan muran i a hi wazauqta. Ari Korin sansandek na waqim ahol waqan Pol ago gamuk giqukil uluman in ginad ayahmo meqniy. Ginad meqniysa in ginad buliyim Pol ago hib ta boliy. An Pol nazaq huritim in anad dimniysa in gimen sansandek kaqmo mar tonim in aposel akabiyan alulin diq gibilen has (2 Korin 1.1-7.16).

Teq kam nab Yesus ago on mataw saw Judiya-ibta na meqin diq iyim ossa Yesus ago on mataw gidauhan asor saw Masedoniya-ibta na teq saw Akaya-ibta na in gimen mani humab tuwol yaqay. Sa tekomo Korin on mataw mani asor emnan tibilaqiyimo. Nazaq iyan sansandek kab Pol in Korin gigem wazid eraqsa in mebmemo mani emnan bilaqiyta nazaq in tiqem daqay haqad in atoran nogmo gibilan (2 Korin 8.1-9.15).

Ari abeb Pol ago bab na a ta eraqim in Pol abin wazan diq wom. In bilaqiy, Pol ago zaway haiqqam haqiy. In gamuk anonon a hi bilaqayta haqiy. In Kraiss ago a hi hurit kemad in Kraiss ago gamuk bilaqgo abin haiqta haqiy. Haqan Pol gamuk na huritim aqutil tartay. Sa in ahol adanin qwayad inmo ahol abin iluwad in aposel akabiyan diq emaqta na awagamun tigibilen siram (2 Korin 10.1-13.10).

### God Aposel gibenab kabiy amta na ago Pol bilam

<sup>1</sup> Ari yaqmo Pol. God-mo anad bilaqan ya Kraiss Yesus ago Aposel iyta. Ya imaqqbab Timoti inaq i sansandek ka ne God ago on mataw Yesus ago nan huritad uliq Korin-ib osayta na teq saw Akaya-ib God ago on mataw tawonta na bunmo gimen sansandek ka i mar tonim eman leh negaq.

<sup>2</sup> I Gimam God teq Iyahta Yesus Kraiss inaq in gigem dimunta negad in ne gigem emid kiskismo usan.

*God Pol ulumsihda na ago Pol esey ug*

<sup>3</sup> Ari i God abin iluwuq. In i gigo Iyahta Yesus Kraiss ago God teq in Yesus Amamtamo. Teq i afaqan amo amo waqad ginad meqniysa ossa i Gimam God in i ginan anad meqniysa ginad waqayta. <sup>4-5</sup> Afaqan nagan i giholib gwahtiqsa in i ginad waqsa i gigem kiskismo usaqta. Na ezaqgo Kraiss santitiy ayahmo sorta na asor i giholib bolsa i santitiy kabemmo sorauqtamo. Ad nazaqmo i Kraiss aholib soqotim inaq ossa in agem kiskismo usaqta na ayahmo diq iyim in wazbalim i gigemab tubolaqtamo. Nazaq iyan God i gigem eman kiskismo usaqta nazaqmo i on mataw gigo afaqan amo amo usaqta na ginad waqsa in gigem kiskismo usaqmo. <sup>6</sup> I ne gilumsiheq gigemid ne ban dimuntab osad gigem kiskismo usdaq haqad i ne gimen afaqan sorad gihol afaqan diq iyaqta. Teq i afaqan sorsa God i ginad waqsa i gigem kiskismo usaqta. Sa ne nazaq i gibiyad i santitiy sor nogmo ne sorad nan kabemmo a hi bilaqsa God ne ginad waqad teq in ne gigem eman kiskismo usaqtamo. <sup>7</sup> I ginad emauq, I santitiy sor nogmo ne sorsa God i gilumsihad gigem eman kiskismo usaqta nazaqmo in ne gilumsihad ne gigem eman kute nemaqtamo. Nazaq iyan i ne ginan ginadnad a hi emad bilaqauq, Ne zaway diq iyeq turad a hi woq daqay haqauq.

<sup>8</sup> Ya imaqqbaban, ya saw Esiya-ib osad afaqan sorta na ago gibilensa ne huritiy. Afaqan ayah diqta na ya iholib gwahtiqan ya sorgo biyah a hi iysa in yaqgo zaway bayan diq wom. Sa ya bilaqyaiq, Ya tumoqdaiq daqagya haqyaiq. <sup>9</sup> Helmo diq, Ya ihol loyinad ya bilaqne mat wol emid moqgo ayon bilaqiyta nazaq nog ya ihol loyinyaiq. Kam nab yaqmo ihol ulumsihgo yaqgo zaway tihiqiy. Nazaq iyan ya ihol bunmo eman God mataw tumoqiya giwazan ta eraqayta na ago hib usaq. <sup>10-11</sup> Sa afaqan meqin diqta na ya inol eman moqnan tonsa God ya ilumsihim ta iwam. Ad nazaqmo in tiqilumsih tutdaqta. Ya inad bunmo God amomo ago hib eman usaqta. Nazaq iyan ya inad emaiq, Abeb afaqan araq meqinta imeqin tonnan tonsa ne ya ilumsihad imen God bulonsa in a ta ilumsihdaq haqyaiq. Ne kabemmo nazaq emsa teq God ne gigez huritad tiqidimun tondaq. Sa on mataw kabemmo God ya ilumsihda na anadin emad in God esey tuqug daqay.

*Pol gamuk helta Korin on mataw gibilan*

<sup>12</sup> Ari ya kazaq ihol abin iluwaiqta. God ya inad wamuzsa ya imileq a hi iyad on mataw bunmo gigo hib ya daq titnonta emad ya inad giger a hi iyaqta. Helmo, ya igem nazaq diq loyinad bilaqyaiq. Teq yaqgo luw os na ya mataw og kabta ginad

muzinim a hi luwaiqta. Haiqqam. Godmo agem dimunta yagad dante dimunta na iqisihunta. Iqisihunan ya dante na muzad ya ne gigo hib mat nazaq diqta iyim yaqgo daq na ya ne ayahmo giqisihunaiqta.<sup>13-14</sup> Giqisihunad ya ne gimen gamuk araq ne ginad a hi em has daqayta a hi mar tonaiq. Haiqqam. Gamuk ne ahol waqad alulin ginad em has daqayta naqmo ya ne gimen mar tonaiq. Teq ya inad emaiq. Ya mat ezaqta na ago asormo ne tuhuritiyta haqaiq. Ad ya inad ayahta na ne yaqgo hurit kemeq ne ya inan ginad em hasiy haqaiq. Ne yaqgo ginad em hasid teq Iyahta Yesus ta boldaqta nab ya in ameb turad ne gibin iluwdaiqta nazaqmo ne ya ibin tiqiluw daqaymo haqaiq.

<sup>15-16</sup> In nazaq diq tiqiydaq haqad ya ime gigermo ne gigo hib le gibiydaiq haqad inad emta. Ya saw Masedoniya-ib lehad danneb ya le ne tigibiydaiq hay. Gibiyad teq ya gihulosad Masedoniya-ib le oseq teq ya muleqeq ta bolad a ta gibiy tondaiq hay. Gibiysa teq ne ya ilumsiheq iqemid ya saw Judiya-ib ta boldaiq hay. Ya nazaq ime gigermo ne nenaq ossa God ame gigermo ne gidimun tondaq hay. <sup>17</sup> Teq ya inad buliyim nazaq a hi em. Nazaq iyan ne ya inan ginad ezaq emay? Ya ne gibiy-nan bilayta na ya inad a hi em hasimmo nazaq bilayta ye? Mataw og kabta giqez giger iyaqta nazaq ya emta ye? Mataw na bilaqay, Eqe ya tiqemdaiq haqayta teq in ginad hi emgo ulilemim usaqta. Ya mat nazaqta iyim gamuk haresmo gibilenta ye? Haiq diqmo. <sup>18</sup> God in ago gamuk muzin bugaqta nazaqmo ya emaiqtamo. Ya iqez giger iyim ya eqe nemim teq a ya haiqqam ta nemaqmo nazaq ya a hi gibilenaqta.

<sup>19</sup> Kwaziqmo i le God atatin Yesus Kraiss anan gibilenta nab yaqmo Pol teq ya iyo-gniz Sailas ayow Timoti inaq i giqez giger iysa i eqe nemad haiqqam a hi bilawmo. Haiqqam. Kraiss aqez giger a hi iyaqta. In aqez amulikmo eqemo nemaqta. <sup>20</sup> Na ezaqgo God i gidimun tonnan hel diqmo bilamta agamukan kabemmo giqusaqta na bunmo Kraiss ago hib anon tiqemim usaq. Nazaq iyan i Kraiss inaq soqotim osad God i gidimun tonnan bilamta na i anadin emad i gamuk na anan hel diqtaqmo haqauqta. Haqsa God i gigo hib abin ayahta waqaqta. <sup>21</sup> Teq God inmo i nenaq araqibmo giqeman i bunmo Kraiss aholib soqotim inaq osad i giwaz diq meqniyim osauqta. Ossa God i gitowun eman i in amomo agota tiqiyim osauqta. <sup>22</sup> I inmo ago iyeq osamta haqad in ago gunun i giholib emim teq in ago Bugaw Dimunta igan i giduganib usaqta. Ussa i ginad emauq, God ago os dimunta in ignan bilamta na ago atowun kawaqmo i tuwazauq haqauq.

### *Pol uliq Korin-ib hidmo a hi lah*

<sup>23</sup> Ari ya ne gigo hib a hi lehta na alulin in kazaq. Ya afaqan araq ayahta a ta negid ne ginad ayahmo meqniydaq haqad ya ne gigo uliq Korin-ib hidmo a hi leh. God ya ibiysa ya hel diqmo bilaqaiq. <sup>24</sup> Teq i ne ginad helta na wamuzad kazaq ne ginad emiy haqad nazaq i a hi emauqta. Haiqqam. Ne ginad helmota na awaz meqniyim ussa ne zaway iyim turayta. Nazaq iyan yaqmo Pol teq ya iyogniz nenaq i ne gigo kabiy araqibta iyim i ne ginad emid dimniydaq haqad i ne nenaq garab kabiy emauqta.

## 2

<sup>1</sup> Nazaq iyan ya inad tiqem, Ya ne gigo hib muleqeq ta lehid ne gihol afaqan diq a ta iyaq haqad ya ne gigo hib hidmo a hi leh. <sup>2</sup> Ya ne gigem emid afaqan iyid teq nog ya igem emid dimniydaq? Na haiqqam. Ne gimomo ya igem eman dimniyaqta. <sup>3</sup> Na ago ya ne gigo hib a hi lehad ya inadta na bunmo sansandekib ne gimen mar tonan lahta. Ne gimomo ya igem eman dimniyaqta. Nazaq iyan ya ne gigo hib leheq ihol afaqan iyeq osnan hulosaq. Ad ya inad emyaiq, Ne yaqgo sansandek na waqeq ahol waqad ne gigo afaqan na wastitayid dimniyid teq ya le tigibiydaiq haqyaiq. Gibiyad ya ne ginan inad dimniysa ne ginad dimniy daqaymo haqyaiq. <sup>4</sup> Helmo ya ne gimen sansandek araq na mar tonad ya inad meqniysa igem afaqan diq iysa ya ime kabemmo gaqyaiq. Teq ya ne giqutil emid tartaydaq haqad gamuk na a hi mar ton. Haiqqam. Ya ne ginan inad ayahmo bilaqsa ya igem ne gigo hibmo diq usaqta na ago ya gibilen kemnan haqad ya sansandek na ne gimen mar tonta.

*Kraiss ago on mataw Korin-ib osayta na in giyow ago daq meqinta na walemad anadin a ta hi em daqay*

<sup>5</sup> Ari ne gigo hib mat afaqan eman gwah-timta na in ya imomo igem eman afaqan a hi iy. Teq ya daq na agamukan kabemmo atoranmo bilaqnan ituw hiqiysa ya kazaq siqim bilaqdaiq. In ne asor kabemmo inaqmo gigem eman afaqan tiqiymo haqdaiq. <sup>6</sup> Teq ne gigo mataw kabemmo mat na wastitayad faq ugan in mat daq nazaq amta na ahunmo tiqiy. <sup>7</sup> Nazaq iyan ne amenin araq a ta hi ugad ne in ago daq meqinta na walemad anadin ta hi emiy. Ad ne in anad waqsa agem kiskismo usan. Luweq in anad ayahmo diq meqniysa in afaqan na sorgo biyab a hi iyaq. <sup>8</sup> Nazaq iyan ya ne gibilenaq. Ne mat na a ta waqad ne in anan ginad bilaqtaqta na ago bulonid in hurit kemaq haqaiq.

<sup>9</sup> Ne mat na ago daq wastitay daqay haqad ya sansandek araq na ne gimen mar tonta. Mar tonim ya ne gilum waqid ne yaqgo nan bunmo hurit daqay o haiq haqad ya mat na wastitaygo gibilenta. <sup>10</sup> Ari ne mat na ago daq meqinta walemad anadin a ta hi emsa ya nazaqmo daq meqinta na tuwalemdaiqmo. Helmo, mat na ya a hi imeqin tonta. Teq ya ne gilumsihnan haqad Kraiss ameb ya mat na ago daq inadib tuwalemai. <sup>11</sup> I nazaq an asen baysihsa teq Satan kat igad i gidanin a hi qwaydaq. Haiqqam. I Satan ago daq bunmo tuhurit kemim i nazaq an tuqulum-sihamta.

*Pol uliq Trowas-ib Taitus ahol a hi waqim anadnad am*

<sup>12</sup> Ari ya Kraiss awagamun dimunta bilaqnan haqad uliq Trowas-ib le tugwahtiqaan Iyahta yaqmen dan hasan ya gamuk bilaqgo adanteqin inaq tiqiyta. <sup>13</sup> Ta teq ya imaqqbab Taitus uliq nab ahol a hi waqim ya igem kiskismo a hi usyaq. Ya inad emyaiq. Ya Taitus ahol waqsa in ne ginan ibilenid teq ya igem kute nemdaq haqyaiq. Nazaq haqad ya Trowas on mataw gihulosim saw Masedoniya-ibmo tileh.

*Aposel God ago zaway amalib bab giquiryamayta*

<sup>14</sup> Teq ya God esey diq ugaiq. In Kraiss eman bolim in ago bab bunmo ginolim tigiquriyam bugta. Giquiryam bugim in i bab gibenab giwaqaan i Kraiss aholib ti-soqot. Soqotan teq God i giwaqim giqad on mataw bunmo gimeb lehad in danmeb lehsa i muzim inaq lehaugta. In uliq saw bunmo i giqad lehsa i on mataw Kraiss anan gibilensa in huritayta, bilaqne faq aqasin ahuran dimunta gwahtiqaam saw bunmo waleq tonaqta nazaq nog. <sup>15</sup> Helmo Kraiss ago tamaz in God ugta na ahuran nog igmo. Ad i gihuran na gwalad on mataw God gilumsihim giwaqagta na gimotgub woqad in mataw timeqniy hasayta na gimotgub tuwoqaqmo. <sup>16</sup> Mataw timeqniy hasayta na i gihuran huritsa in bilaqne nagh tumomta ahuran nog iyaqta. Iysa in moqeq meqniy has daqayta na ago in ginad emayta. Sa on mataw God gilumsihim giwaqagta na i gihuran huritsa in dimun diq bilaqne nagh tutimmo kayeqmo osaqta ahuran nazaq nog iyaqta. Iysa mataw na tuteqmo kuluwa-kuluwmo os daqayta na ago in ginad emayta. Nazaq iyan nog diq inmo ago zawayib Aposel akabiyann ka tiqemdaq? <sup>17</sup> Mataw kabemmo God ago gamuk on mataw negad amenin mani waqayta nazaq i a hi emauqta. Haiqqam. God-mo i giqeman lehsa in i gibiy kems a in ago kabiy emauqta. Teq i Kraiss inaq

soqotim osad i God ago gamuk bilaqad gimileq a hi iyaugta.

### 3

*Aposel in God ago maror muturta na ago kabibiy matawta*

<sup>1</sup> Ari ya gamuk teko bilaqim bolta nab ya iyogniz nenaq i gubin a ta iluwnan haqad ya bilayta ye? Helmo mataw pesanta ne gigo hib le God ago kabiy emnan bilaqsa in gigo walmataw asor in mataw na gubin dimunta sansandekib mar tonim negan in wazim a le ne giqisihunayta. Teq ne ginad i gigo walmataw nazaqmo i gubin sansandekib mar toneq emid ne gigo hib lehid ne i gigo hurit kem daqaymo haqay e? Teq i le uliq araqqab kabiy tiqemnan haqsa ne i gilumsiheq i gubin dimunta sansandekib mar tonid i wazeq uliq nab a leheq mataw giqisihunam haqad ne ginad emay ye? <sup>2</sup> Haiqqam. Negmo bilaqne sansandek i gubin bilaqagta na nog iyim osayta. Sa gamuk na i gigemab mar tonan ussa on mataw bunmo gamuk na ahol waqad in i gigo tuhurit kemayta. <sup>3</sup> I gigo kabiy ne gigo hib anon eman ne bilaqne sansandek araq Kraiss i gubin mar tonim igan i a le on mataw giqisihunauqta nazaq nog ne ulalabmo osayta. Teq Kraiss i gubin agamukan na zamor diq amalib a hi mar ton. In God kayeqmo osaqta ago Bugaw amalib gamuk na mar tonta. Ad i in ago kabibiy matawmo diqta agamukan na in gig alaplantab a hi mar ton. Haiqqam. In on mataw gigemabmo gamuk na mar tonan usaqta.

<sup>4</sup> Gamuk kawa ya bilayta ka alulin in kazaq. Kraiss-mo i Aposel giqeman i inmo abinib ago kabiy emauqta. Nazaq iyan inmo teq i gigo kabiy na emid dimniydaq. <sup>5</sup> Helmo igmo gigo zawayib Aposel akabiyann ka a hi em nagta. Nazaq iyan i bilaqam, Igmo diq kabiy emauqta nazaq i a hi bilaqam. God-mo zaway igsa i kabiy emauqta haqam. <sup>6</sup> Inmo zaway igsa i in ago maror muturta naqmo akabiyann emauqta. Teq maror muturta na in God ago maror Moses mar tonta nab a hi usaqta. Haiqqam. Bugaw Dimunta naqmo mataw giqeman in God ago maror muturta aduganib gwahtiqaqta. Na ezaqgo God ago maror kwaziqta aduganib gunun amo amo mar toniyta na in mataw giyon bilaqsa in moqayta. Ari God ago Bugaw Dimunta mataw giqeman in kayeqmo osayta.

<sup>7</sup> Ne ginad emiy. God gunun kwaziqta na agamukan gigib qwayta. Qwayim inmo abin ayahta na ulal tonad ahol anuwan atoranmo oysa in gunun na Isrel gibilengo haqad Moses abenab tiqam. Eman Moses gig na waqim Isrel gimen ad gewoqim tinegad in anobun anuwan diq iysa Isrel on

mataw gime tih nemeq ahol waqgo biyab a hi iy yaqay. Sa abeb Moses ossa anobun anuwan na tihiqiyyaq. Ari gunun kwaziqta na God anuwan ayahta inaq bolim iyan in abin inaqta. Ta teq gunun na in on mataw giwamuzsa in gigo daq meqinta ulal iysa in moqayta. <sup>8</sup> Ari God ago Bugaw Dimunta mataw giwamuzsa in God ago maror muturta aduganib gwahtiqim kayeqmo osayta. Nazaq iyan Bugaw Dimunta akabiyan na abin in gunun kwaziqta akabiyan na abin ayahmo diq uriyamaqta. <sup>9</sup> Gunun kwaziqta na in on mataw giyon bilaqsa in gibin timeqniyaqta. Gibin meqniysa in gigo daq meqinta amebay na sorim tihiqiyayta. Ta teq gunun na God ahol anuwan ayahta inaq bolim in abin ayahta. Ari God in on mataw giwastitayim ginan on mataw titnonta haqaqta na in nagah ayah diqmo iyim in abin ulilibmo diq gwale usaqta. <sup>10</sup> Gunun kwaziqta na abin inaq usta teq abin na tihiqiy. Na ezaqgo Bugaw Dimunta akabiyan muturta na in gunun kwaziqta na abin wazan woqsa in uriyamim abin ayah diqmo iyaqta. <sup>11</sup> Gunun kwaziqta na God ahol anuwan inaq bolta teq in akaman tihiqiy. Ari Bugaw Dimunta akabiyan muturta na tuteqmo tuqusdaqta. Nazaq iyan kabiy muturta na abin ayah nenan diq iyim usaqta.

<sup>12</sup> Ari God ago Bugaw Dimunta on mataw giqemid in God ago maror muturta aduganib gwahtiqeq kuluwa-kuluwmo tuqos daqay haqad, i a hi rabad gamuk na ulalabmo gibilenad luwauqta. <sup>13</sup> Teq Moses daq amta nazaq i a hi emauqta. In anobun anuwan na oyad a hi hiqiysamo in tubusan amikta waqeq anobun tiqisihyaq, isihid teq anobun anuwan na miyeq hiqiysa Isrel ahol a hi waq daqay haqad. <sup>14</sup> Kam nab Isrel ginad soqotim usyaqta. Ad muran kam kab in God ago maror kwaziqta na agamukan huritad in alulin ginad a hi em hasad os tutayta, bilaqne tubusan amikta na ginad isih netim usaqta nazaq. Na ezaqgo mataw na Kraiss amomo aholib soqotid teq God tubusan amikta na tuwalemdaqta. <sup>15</sup> Teq Yesus ago kamub iyim bo muran kam kabmo Isrel on mataw in God ago maror Moses bilamta na agamukan huritsa tubusan amikta na ginad isih netsa in ginad a hi emayta. <sup>16</sup> Ari teq mat aw nog ginad buliyim Iyahta ago hib muleqim ta lehsa Iyahtaqmo tubusan ginad isih netim usaqta na walemaqta. <sup>17</sup> Ya Iyahta anan bilaqad ya Bugaw Dimunta naqmo anan bilaqaiq. Inmo mataw ginad eman hastitayaqta. Nazaq iyan Iyahta ago Bugaw mat araq aholib kabiy na emsa mat na samanmo gunun haiqmo tiluw osaqta. <sup>18</sup> Bugaw Dimunta nazaq emsa i bunmo ginobun

samanmo tubusan haiqmo usad Iyahta ahol anuwanib oyaqta, bilaqne mataw i gibiyad in Iyahta anobun galas-ib ahol waq nog iyayta. Iyahta inmo Bugaw. Teq in nazaq i gihol buliysa i giwaqan bilaqne in awaqan nog iysa i gihol abin na inaqmo buliyad dimun diq tiqiyaqmo.

#### 4

*Aposel gisan moqaqta na in bilaqne kagoh nog*

<sup>1</sup> God-mo i ginan anad meqniyan in Aposel akabiyan ka igta. Nazaq iyan i kabiy na emad gidan sosil a hi iyaqta. Haiqqam. <sup>2</sup> Daq amebay inaqta mataw ulilemim emayta na i gileh tuqug bug. I mataw kat negad ginad a hi hureqauqta. Teq i God ago gamuk buliyan le araq a hi iyaqta. Haiqqam. God ameb i gamuk heltaqmo ulalab bilaqauqta. I nazaq emsa mataw bunmo in gigemabmo diq i giloyinsa i mataw daq helta emad gamuk helta bilaqauqta.

<sup>3</sup> Ari i on mataw asor Yesus awagamun gibilensa in ginad a hi em hasayta. On mataw naqanta saw meqinta na ago danteb osad in hiqiynan tonayta. Nazaq iyan i gigo gamuk na alulin in gimeb ulilemim ussa in ahol a hi waqayta. <sup>4</sup> Og ka ago god na in on mataw helmo a hi haqayta bunmo ginad eman romriq iyaqta. Romriq iysa in Kraiss ahol a hi waq kemayta. Kraiss in God adulanmo diq osaqta. Ta teq wagam dimunta Kraiss abin eman ulal iyaqta na in saw anuwan oy nog iysa mataw romriqab osayta na ahol a hi waqayta.

<sup>5</sup> Mataw i gibin iluwad gimuzingo aqad i a hi gibilenauqta. Haiqqam. I bilaqauq, Yesus Kraiss-mo in i bunmo gigo Iyahta haqauq. Ad Yesus-mo i giqeman i ne gigo kabibiy mataw iyim osauqta haqauq. <sup>6</sup> Kwaziqmo God bilam, Romriq saw isihim usaqta nab saw anuwan gwahtiqeq oyan ham. Ad God naqmo in ago anuwan eman i gigemab tuqoyaqmo. Oysa i gime hastitayan i Yesus Kraiss anobun ahol tuwauqauq. Ahol waqsa in anobun God ahol anuwanib oysa i God abin teq in ago zaway na ago tuhurit kemaqta.

<sup>7</sup> I Aposel giwaz meqin haiqta teq God ago kabiy dimun diqta na i giholib usaqta. I bilaqne kagoh araq aduganib nagah dimunta tenan usaqta nazaq nog. On mataw i gibiyisa i mataw gihol awaz meqin haiqta nog iyaqta. Nazaq iyan i mataw zaway haiqta God ago kabiy atorani diqmo emsa God-mo ago zaway i giduganib usaqta na ulal tiqiy hasaq. <sup>8</sup> Og ka ago afaqan amo amo tutimmo i giholib gwahtiqaqta teq in i gidanin a hi qwayaqta. Kam kabemmo i kabiy emgo ginadnad emauqta teq i ginad

meqniysa kabiy a hi hulosaugta. <sup>9</sup> Bab kabemmo i gimuzad gimeqin tonayta teq God i a hi gihulosaugta. Bab na i gibayan diq woqauqta teq i a hi meqniy hasauqta. <sup>10</sup> I giholib santitiy ayahmo sorad a luwsa on mataw i gibiyad in Yesus momta adulan ahol waq nog iyayta. Teq i Yesus ago kabiy daq emsa Yesus hodhodab eraqim azawayin inaq osaqtta na i giholib ulal iysa in ahol waqaytamo. <sup>11</sup> I kayeqmo osad Yesus abinib kabiy emsa mataw tutimmo i ginol emnan tonayta. Ginol emnan tonsa i moq ago dantebmo diq osad teq i a hi moqauqta. Nazaq iyan Yesus ago zaway i giqeman kayeqmo osauqta na in i gisan moqauqta kab ulal tiqiy hasaq. <sup>12</sup> Daq naqmo ago i bilaqauq, Moqmo i Aposel giholib kabiy emaqta haqauq. Ta teq i Aposel gigo kabiy ne giholib anon emsa ne kayeqmo kuluwa-kuluwmo tuqos daqay haqauq.

<sup>13</sup> Teq God ago marib gamuk araq bilamta nazaq i ginad usaqmo. Gamuk na bilam, Ya God anan helmo haqad iyan ya bilaqaiq ham.

*Buk Song 116.10*

An nazaqmo i God anan helmo haqad iyan i bilaqauqtamo. <sup>14</sup> I ginad emauq, God in Iyahta Yesus hodhodab wazan eramta nazaqmo in i inaqmo giwazid i tiqeraqam-tamo haqauq. Eraqid teq in i ne nenaq araqibmo giqad lehid i bunmo in agerab tuqosam haqauq. I ginad nazaq emad gamuk bilaqauqta. <sup>15</sup> Helmo afaqan nagan bunmo i soraugta na i negmo gilumsihnan haqad soraugta. Teq i afaqan nagan sorsa daq na amalib God ago agem dimunta le on mataw kabemmo gigo hib gwahtiqa in God esey ugad abin wazan eraqauqta.

*Aposel God anan helmo haqad zaway waqayayta*

<sup>16</sup> Nazaq iyan i God ago kabiy emad i gituw a hi hiqiyad gidan sosil a hi iyaqta. Helmo i afaqan sorsa i ginon ka tihiqiyaq. Teq kam bunmo i gigem zaway muturta waqsa i ginad dimniysa osauqta. <sup>17</sup> Na ezaqgo i afaqan ka sorad oseq teq amenin kazaq i waqamta. Abeb God abin ayahta teq in ago os dimunta tiqigdaq. Igid i nagah aseseqta na loyinsa in nagah ahol afaqan meqin diqta kuluwa-kuluwmo usdaqta iydq. Nazaq iyan i afaqan muran soraugta ka loyinsa in nagah sinamolta kam asitmo usdaqta nazaq nog iyaq. <sup>18</sup> Na ago iyan i nagah gimeb ulal iyaqta na ahol waqad anan helmo diq a hi haqauqta. Haiqgam. Nagah i gimeb ulilemim usaqta naqmo i gime le ahol waq nog iyad i anan helmo haqauqta. Na ezaqgo nagah i gimeb ahol waqauqta na in kam asitmo usimmo tihiqiyaqta. Ari nagah dimunta i gimeb ulal a hi iyaqta na in tuteqmo kuluwa-kuluwmo tuqosdaqta.

## 5

<sup>1</sup> I gisan ka bilaqne baybay nog iysa i og kab osauqta. Ad baybay ka meqniyid teq God i gimen bit araq wastitayta na in tiqigdaq. Bit na mataw gibenab a hi emiyta. Haiqgam. In tuteqmo kuluwa-kuluwmo Heven-ib tuqosdaqta. Na i bunmo tuhurritta. <sup>2</sup> Nazaq iyan i bit dimunta Heven-ib usaqta na waqeq tubusan gihol i gihol sihennan ginad diq bilaqsa i giholnan ek tonad baybay kab osauqta. <sup>3</sup> Na ezaqgo i baybay ka huloseq leheq i ginon muturta na waqeq gihol siheneq i giwitan samanmo gibe aholmo a hi luwam. <sup>4</sup> I baybay kab osad gihol afaqan iysa i giholnan ek tonauqta. Teq i moqeq gisan ka huload gibe aholmo osnan ginad bilaqauq nazaq i ginad a hi emauqta. Haiqgam. I gisan kwaziqta ka amalib gisan ta araq muturta na waqeq tubusan nog i giholib emnan ginad bilaqauq. Nazaq iyid teq i gisan moqdaqta ka ulilemsa i gisan kayeqmo us tutdaqta naqmo ulalab tuqosdaq. <sup>5</sup> Na God-mo anad i teq gisan muturta waqeq tuteqmo osamta haqad in i giwastitayim giqeman i osauqta. Ad daq nazaq diqmo i giholib tugwahtiqaq haqad in ago Bugaw Dimunta tiqig. Igan i ginon mutur iydqta na atowun nog in i giholib usaqta.

<sup>6</sup> Nazaq iyan i nagah na anadin emad i giwaz meqniyad a hi rabauqta. Teq i ginad emauq. I gisan ka i gigo baybay nog iyan i osauqta haqauq. Ad i baybay kab osad i Iyahta inaq in ago uliqab a hi osauqta haqauq. <sup>7</sup> Nazaq iyan nagah i gimeb ulal iyaqta na i anadin emad kabiy daq emauqta nazaq a haiq. Haiqgam. Nagah God anan gibilenan i anan helmo haqauqta naqmo i ginad wazsa i og kab luw osauqta. <sup>8</sup> Ad i giwaz meqniyim a hi rabad og kab osauqta. Osad i gisan ka huload leheq Iyahta inaq in ago uliqab osnan i ginad ayahmo bilaqauqta. <sup>9</sup> Teq i le i gigo uliq diqta nab osad o haiq i og kab Iyahta ago hib pesan nog osad i ginad amulikmo kazaq usaqta. I tuteqmo daq dimunta Iyahta anan anad bilaqauqta naqmo i emad osuq haqauqta. <sup>10</sup> Na ezaqgo i bunmo Kraiss anognib gwahtiqeq ago hazirib tituramta. Turad i og kab osad daq emyauqta na ago ahunibmo naw tuwaqam. I daq dimunta o daq meqinta emeq i amenin nazaqmo tuwaqamta.

*I on mataw gilumsihid in God inaq an anobun wastitay daqay haqad i kabiy emauqta*

<sup>11</sup> I teq hazirib turamta haqad i Iyahta anan rabad ahaqenib osauqta. Osad on mataw bunmo ginad i ginad nog iyeq in Iyahta anan helmo haq daqay haqad i atoranmo gibilenauqta. God i gigem ginad

tuhurit bugta. Sa ya ne ginan inad emaiq, Nabag ne gigemabmo diq i ginan helmo haqaytamo haqaiq. <sup>12</sup> Gamuk ka amalib igmo givin dimunta gibilenid ne i ginan mataw dimunta haq daqay haqad i a hi gibilenaug. Haiqgam. Ne i gigo hurit kemeq teq ne mataw i gihar igayta na giqez amenin emeq i givin iluw daqay haqad i kawa i gihol anan ne gibilen sireqauq. I gigo bab na gigo daq ulalabta naqmo amalib in gimo givin iluwad teq in ginad gigemab usaqta na in isihayta. <sup>13</sup> Ad in i ginan bilaqay, Mataw ginad agadanta haqay. Teq i ginad agadan iyid na i God inaq gigo nagah. In mataw na gigo nagah a haiq. Ari i ginad dimunta iyid na i ne nenaq gigo nagah. Na mataw na gigo nagah a haiqtamo. <sup>14</sup> Na ezaqgo Kraism agem dimunta igaqta na i anadin emad i giqutil eraqsa i in ahol awagamun bilaqad i giqez wasihgo biyab a hi iyauqta. I ginad emauq. Mat amulikmo on mataw bunmo gigo ban waqim in gimen momta haqauq. Nazaq iyan on mataw bunmo tumoqiymo haqauq. <sup>15</sup> Teq mat na anad kazaq emad in on mataw bunmo giyon momta. Ya on mataw ya ibinib kayeqmo os daqayta na gimen moqeq ta eraqid teq on mataw na in gimo gihol anadin a ta hi em daqay ham. In yaqmo inadin emad inad muzinad os daqay ham.

<sup>16</sup> Nazaq iyan muran teq abeb i Kraism-anad muzinad i mataw og kabta ginad a ta hi muzinaug. Ad mataw og kabta mat asanmo ahol waqad ulum kemayta nazaq i a ta hi emauqmo. Helmo, kwaziqmo i og ka ago daq na amalib Kraism ulum kemim anan mat diqmo araq haqyauqta. Ari muran i daq na hulosis i Kraism ulum kemim in ago tuhurit kemaugta. <sup>17</sup> Hurit kemim i ginad emauq. Mat aw nog Kraism aholib soqotim inaq osayta na God in giqeman in mataw muturta tiqiyiy haqauq. In ginad gigem kwaziqta na tihiqiy bugan abanab in ginad gigem muturta tugwahtim haqauq.

<sup>18</sup> Teq mat mutur iyaqta na alulin Godmo. Kwaziqmo i in ago bab iyim ossa in Kraism eman bolim i gimen dante wastitayan i God inaq an anobun tuwastitay. An anobun wastitayim in daq na agamukan i gibenab eman i on mataw bunmo tigi-bilenaug. <sup>19</sup> Gamuk na i kazaq bilaqauqta. God in on mataw in gileh ugayta na gigo daq meqmeqinta nagan ago a hi bilaqad in Kraism eman bolim on mataw na gigo ban waqim in givinib God inaq an anobun tuwastitay haqauq. Wastitayan God in daq nawa Yesus amta na agamukan i bilaqgo haqad i gibenab tiqamta haqauq. <sup>20</sup> Eman i God aqez na waqim tutad Kraism on mataw gilumsihna ta ago bilaqad i God abinib on mataw gililewunad luwauqta. Nazaq

iyani Kraism aqez tutad atoranmo kazaq ne tigi-bilenaugmo, Ne God inaq an anobun wastitayeq inaq dimunmo osiy haqauq. <sup>21</sup> Kraism daq araq meqinta a hi amta. Teq God i gigo daq meqinta bunmo ginuwim Kraism aholib eman in daq meqinta nagan bunmo anamren tiqiy. Ad nazaqmo muran i Kraism inaq soqotim osad in God anad muzinim titnonimmo luwta nazaqmo i givin tuqusaqta.

## 6

*Aposel kabiy emad afaqan kabemmo soriy*

<sup>1</sup> I God inaq kabiy emauqta iyan i gamuk awaz meqin diq kazaq ne gibilenaug. God agem dimunta negsa ne abu hi ulumiy haqauq. Luweq ne in ago zaway na samanta waqeq akabiyani a hi em daqay. <sup>2</sup> Na ezaqgo God ago marib in kazaq i gibilenaug.

Ya igem dimunta negdaiqta akaman ya inad bilamta nab ya idek emim ne giqez huritta haqay. Ad ya ne gilumsihq giwaqdaiqta akaman nabmo ya ne gilumsihim giwayta haqay. *Aisaya 49.8*

Ne ginad em hasiy. God agem dimunta negdaqta akaman na muranmo gwahtiqim usaqta. In muranmo ne gilumsihq tigi-waqdaqta.

<sup>3</sup> Mataw i gigo kabiy ka abin meqin bilaqgo i hulosis diq hulosaugta. Nazaq iyan i daq araq mataw ananin bilaq daqayta i a hi emauq. <sup>4</sup> Haiqgam. I God ago kabibiy matawmo iyim osauqta. Nazaq iyan tutimmo i daq dimuntaqmo on mataw bunmo giqisihunaugta. Ad i God ago kabiy emad i gituw a hi hiqiyisa afaqan amo amo sorauqta. Sa daq hares i gimeqin tonnan tona i ginad meqniysa gihol bibiyowunad teq i a hi hureq hasauqta. <sup>5</sup> Mataw i ginolad in i giwazim giqirqurayta. Ad in humab emim ek ton meqin i gimalib ek tonad in gigem eraqsa i ginol eman tonayta. Sa i giholtuw diq bulad kabiy afaqanta emauqta. Tarom kabemmo i anononmo a hi usaqta. Ad kam asor i gigemnan moqad samanmo osauqta. <sup>6</sup> Ad teq i daq anumlan inaqta aban diq emad i ginad dimuntaqmo on mataw gibilenaugta. Mataw afaqan igsa i nan kabemmo a hi bilaqad i mataw na gilowan tonauqta. Sa God ago Bugaw Dimunta i ginad wamuzsa i on mataw bunmo ginan ginad bilaqsa i gigemab ginad araq meqinta a hi usaqta. <sup>7</sup> I gamuk helta amalib on mataw gibilenaugta. Ad i God ago zawayib kabiy emad i gigo daq titnonta na bilaqne baqir nog i giben giqabun ban ussa amalib i gigo bab ginolauqta. Sa bab na in i ginolnan tona

i gigo daq titnonta na bilaqne dareq nog i giben ginasaran ban ussa amalib i gihol adanin qwayauqtamo. <sup>8</sup> Mataw asor i gibin wazan eraqsa asor i gibin bayan woqagta. Sa mataw asor i gigilehunan bilaqsa asor i ginan dimunta haqayta. Mataw asor i ginan ginad emay, Mataw gikatii meqin haqad in i gibaymuzayta. Teq haiq i gamuk heltaqmo bilaqauqta. <sup>9</sup> Mataw i gibiysa i bilaqne mataw gibin haiqta nog iyauq. Teq haiq, i gibin uliq saw bunmo tilahta. I bilaqne mataw moqnan tonayta nog iyim teq haiq i kayeqmo osauqta. I santitii ayahmo waqauqta. Teq santitii na i ginol eman a hi moqauqta. <sup>10</sup> I gihol gigem afaqan iyaqta teq kam bunmo i ginad dimniysa osauqta. I mataw ginaghan haiqta os nog iyauqta teq i mataw kabemmo gilumsihan in ginaghan kabemmo inaq iyaqta. Sa i bilaqne i gigo nagah haiqmo os nog iyauqta teq i nagah dimdimunta bunmo waz bugauqta.

<sup>11</sup> Ne Korin on matawta, i ulalabmo kawa ne gibilenad i gigemab ginad araq a hi usaqta. I gigem bunmo ne negauqta. <sup>12</sup> I gigem a hi wasihad i ne ginan ginad diq dimniyaqta. Ta teq ne gigem wasihad ne i ginan ginad a hi bilaqauqta. <sup>13</sup> Muran ya bilaqne onmin gimam gibilen nog ne tigibilenaiq. I ne gimen daq emauqta nazaqmo ne i gimen emad ne gigem dimunta bunmo i igiymo haqaiq.

### *I God ago bit iyim osauqta*

<sup>14</sup> Mataw God anan helmo a hi haqayta na in gihol lul araqta. Nazaq iyan ne in nenaq soqoteq kabiy daq araqibmo hi emiy. Ezaq teq mat daq titnonta emaqta na in mat gunun othasaqta na inaq ginad amulikmo iyeq araqibmo os daqay? Ta ezaq teq saw anuwan romriq inaq araqibmo gwahtiqeq usdaq? <sup>15</sup> Krai Satan inaq gigem araqibmo iyim osayta ye? Teq mat Krai anan helmo haqauqta na in mat Krai gileh ugaqta na inaq ginad araqibmo usdaq e? <sup>16</sup> God ago bit in lul araqta. Sa god katiyta ago bit in lul araqtam. Ne ginadib bit giger na araqibmo ye? Ne ginad emiy. God kayeqmo osaqta na ago bit igmo. God nazaqmo diq bilamta. In bilam,

Ya igo on mataw nenaq osad teq ya in gilikmanib nenaq tiluwdaiq ham. Teq ya in gigo God iyeq ossa in yaqgo on mataw iyeq tuqos daqay ham. *Wok Pris 26.12; Jeremaya 32.38; Esekiel 37.27*

<sup>17</sup> Nazaq iyan yaqmo Iyahta ya ne kazaq gibilenaiq ham. Ne mataw meqinta na gihulosad gwahtiqeq le giholbin iyeq luwiy haqaiq ham. Luwad ne nagah anuflan inaqta na hi waziy haqaiq ham. Ne nazaq wastitayeq

osid teq ya igem dimunta negad nenaq tuqosdaiq ham. *Aisaya 52.11*

<sup>18</sup> Ad ya ne gimam iyeq ossa ne ya itatniz teq ya imigniz iyeq tuqos daqay ham. Yaqmo Iyahta ya zaway bunmo wazaiqta ham. Ya nazaqmo tibilay ham. *2 Samuel 7,8, 14*

## **7**

<sup>1</sup> Ya iyognizmo diq, Gamuk nawa nab God i ginaq osnan haqad hel diqmo tigibilanta. Nazaq iyan i giholib daq meqinta bunmo muzid lehsa teq i gigemab ginad meqinta nagan bunmo hulosa buguq. Hulosa bugad i God ameb ginumlan hiqiysa i in ago on mataw tawon diqta iyeq osad i in abin wazinad ahaqenib osuq.

*Korin on mataw ginad buliyan Pol in ginan anad dimniy*

<sup>2</sup> Ne gigem dimunta igiy. I ne gigo mat araq a hi meqin ton. Ad i ne gigo mat araq hureqan dan titnonta a hi hulosa. Teq i ne gigo mat araq kat ugim ago nagah asit diq a hi hurew. <sup>3</sup> Gamuk ka ya ne giwazid woqgo a hi gibilenaiq. Haiqqam. Ya teko ne ginan tibilayta. Ne i giquitil anabun asormo diq hay. Nazaq iyan ne moqsa i ne nenaq araqibmo tumoqam. Ari ne kayeqmo ossa i ne nenaq kayeqmo tuqosammo. <sup>4</sup> Ya ne ginan inad emaiq, Ne dante titnonta na a hikidik hulosa daqay haqaiq. Haqad ya ne ginan inad diq dimniyaqta. Helmo diq, ya ne ginadin emad igem zaway iysa osaiqta. Zaway iysa i giholib afaqan kabemmo gwahtiqsa teq haiq i ne ginadin emad i gigem dimun dikan iyaqta.

<sup>5</sup> Teq ya Taitus adanin lehta na ne anadin ta emiy. Kam nab i le saw Masedoniyaib gwahtiqim kabiy emad i ginamur asit a hi emyauqta. Saw nab afaqan amo amo i giholib gwahtiqyay. Sa mataw i gisan ka meqin tonnan tonsa i giduganib rab gilum netyaqmo. <sup>6</sup> Ta teq i gigo God on mataw ginad meqniysa ginad waqauqta na inmo Taitus eman i gigo hib bolan i ahol waqad ginad dimniysa gigem kute tinam. <sup>7</sup> Teq Taitus i gigo hib gwahtimta naqmo amomo ago i ginad a hi dimniy. Haiqqam. In le ne gibiysa ne ginad buliym dimunmo osayta nazaq in ne gibiyad in agem kiskismo iy. Agem kiskis iyim ussa in bolim ne giwagamun na bilaqan God i gigem eman kiskis tiqiymo. Ne ya ibiynan ginad ayahmo bilaqauqta na ago Taitus bilam. Ad daq meqin ne gigo hib gwahtimta na ago ne ginad meqniysa ne ya iqez muzinnan giwaz diq meqniyayta na ago in bilammo. Bilaqan ya huritim inad ayahmo dimniy.

<sup>8</sup> Nabag ne yaqgo sansandek araq na waqim ahol waqad ne ginad timeqniy. Teq

ya sansandek na mar tonim eman ne gigo hib lahta na ago ya inad a hi meqniyaq. Helmo. Ne yaqgo sansandek na ahol waqim kam asitmo giquitil tartaysa osiyta na ago ya inad meqniya. <sup>9</sup> Ari muran ya inad tidimniyaq. Teq ya ne giqeman ne ginad meqniya na ago ya inad a hi dimniyaq. Haiqgam. Ne ginad meqniya osim le ne ginad buliyyita na ago ya inad dimniyaq. Ya inad emaiq, God-mo ne giwastitaynan haqad in afaqan na eman ne giyon gwahtimta haqaiq. Nazaq iyan i gigo sansandek na le ne a hi gimeqin ton.

<sup>10</sup> God i giwastitaynan haqad in i ginad eman meqniyaqta. Teq i gigo ginad meqniyaqta na in i giholib anon emsa i ginad buliyim gigo daq meqinta gileh ugaqta. Dante nabmo God i gilumsihim giwagaqta. Giwagan abeb i ginad meqniya osta na i anadin emad i gihol afaqan a ta hi iyauqta. Ari mataw God ago maror asan ban osayta na nazaq a hi emayta. Mataw na ginad meqniya osad in gigo ginad meqniy naqmo ayah iyim ginol eman moqayta. <sup>11</sup> Ne ginad em hasiy. God ne giqeman ne ginad meqniya osad gihol abin meqniyim usta na ne hidmo wastitaynan giquitil eramta. Eraqsa ne mat daq amta na anan gihol riten lamsa ne in anan gigem timeqniyyaq. Gigem meqniyad giquitil inaqmo tartaynan tonsa ne afaqan na wastitaynan giwaz diq meqniyyi. Giwaz meqniyim ne mat na alowan a hi toniy. Sa ne afaqan na wastitayad daq bunmo ne emiyta na ago ya huritim inad em, Afaqan na ne bunmo gigota a haiq hay.

<sup>12</sup> Nazaq iyan ya ne gimen sansandek mar tonta na ya mat daq meqin amta na anadin emad ya a hi mar ton. Teq in mat ta araƒ meqin tonta na ya anadin emad sansandek mar tonta nazaq a haiqmo. Haiqgam. Ne i ginadin diq emad i ginad bunmo muzinayta na ulal iyid ne ahol waq kema God ahol tuwaq kemaqmo haqad ya ne gimen sansandek na mar tonta. <sup>13</sup> Daq alulin naqmo ago i ne ginan ginad dimniya i gigem kute nemim usaqta.

Teq i gimomo ne ginan ginad a hi dimniyaq. Ne Taitus ago anad meqniy na walemim ne in anad eman ayahmo dimniymo. An in muleqim ta bolan i in ago anad dimniy na ahol waqad i inaƒmo ginad diq tidimniyaqmo. <sup>14</sup> Ne nazaq eman ya kwaziqmo Taitus ameb ne gihin wazan eraqyaqta na ago ya imebay a hi woqaq. Haiqgam. Gamuk bunmo i ne gibilenta na i gamuk helta bilawta. Ad nazaqmo i Taitus ameb ne gihin iluwta na i gamuk helta in bulonmo. <sup>15</sup> Taitus ne gigo hib lehan ne bunmo waqim inaƒ kiskismo osad ne in wazinad ago nan huritiya. In ne gigo daq na anadin emad in agem ayahmo ne

negaqta. <sup>16</sup> Muran ya ne ginan inadnad a ta hi emaiq. Na ezaqgo ne dante titnonta na muzinad a hikidik hulosa daqay haqad ya ne ginan inad tidimniyaq.

## **Krais ago on mataw uliq Korin-ib osayta na in gimaqbaban saw Judiya-ib osayta na gilumsihnan haqad gihol wastitayeƒ os daqay**

### 8

*Krais ago on mataw in gimaqbaban nagaƒ ago siqim iyim osayta na gilumsih daqay*

<sup>1</sup> Ya imaƒqaban, ya Krais ago on mataw gidauhan saw Masedoniya-ib osayta na ginan bilaqsa ne huritiy. God agem dimunta mataw na negad in gilikmanib daq araƒ ayahta tiqam. <sup>2</sup> Na in kazaq. Mataw na gigo hib afaqan araƒ ayahta gwahtigan in kam meqin diq waqiy. Teq haiq. In ginad ayahmo dimniya osad in samanmo gina haiqmo os yaqayta na ago a hi bilaqiy. Haiqgam. Kam nab in Krais ago on mataw saw Judiya-ib gina haiqmo osayta na gilumsihnan haqad in gimen mani kabemmo humab tuwoliy. <sup>3</sup> Ya in gihin kazaq diq bilaqdaiq. Mataw na ginad bilaqsa in ginadibmo mani na emiyta haqdaiq. Teq in nagah em daqayta na tiqemim in na amalib in gimo giholyon nagahta na asor inaƒmo a ta em toniy. <sup>4</sup> Em tonad in ginad awaz meqin amalib gime kabemmo i gibilen yaqay, Ne hi giwasihsa i inaƒmo God ago on mataw taownta gina haiqta ko tigiulumsihnanmo haq yaqay. <sup>5</sup> Haqad in daq emnan bilaqiyta na uriyamim in daq dimun diqta emiy. Na in kazaq. Danneb in gihol Iyahta ugim teq in God anad muzinin in gihol i igiymo.

<sup>6</sup> In daq nazaq emsa i gibiyad teq i Taitus abe yahad bulon, Tekomo ni Korin gigo hib lehim gibilenan in mataw gina haiqta na gigem dimunta negad in gimen nagah emnan tibilaqiyta haw. Nazaq iyan ni muleqeq ta leheq kabiy ni alulin tiqamta na wamuzad ni Korin on mataw na gilumsihsa in nagah emnan bilaqiyta na emmo emiy haw.

<sup>7</sup> Ari muran God ago daq dimdimunta kabemmo ne gigo hib ate gwalim usaqta. Ne God anan helmo haqayta na teq ne gamuk anononmo bilaqayta na teq ne ginad amulikmo iysa ne gihol bunmo God ago kabiy ugayta na teq ne gigem dimunta ayahmo i igayta na, daq nagan bunmo ne gigo hib kabemmo diq iyim usaqta. Nazaq iyan i ginad daq dimunta nagan kabemmo ne giholib usaqta nazaqmo ne mataw gina haiqta ko ayahmo gilumsihniymo haqauq.



<sup>8</sup> Ya ne gibe yahsa ne daq emiy haqad ya a hi gibilenaiq. Haiqqam. Ne helmo on mataw ginan ginad bilaqaaq o haiq haqad ya ne gilummo waqaiq. On mataw asor kabiy ka emnan giwaz meqniyayta nazaq ne ginad usaq o haiq haqad ya gamuk ka gibilenaiq. <sup>9</sup> I gigo Iyahta Yesus Kraisi agem dimunta on mataw negad gilumsihta na ago ne tuhuritiy. In ago nagah kuluwmo diq giqusta teq in nagah nagan anadin a hi emad in hulosisim ne gilumsihtan bol. In mat ana haiqta os nog iysa ne God ago sawab nagah dimdimunta inaq tiqiy daqay haqad in nazaq amta.

<sup>10</sup> Ari ya inadta ka bilaqsa ne kazaqmo emiy. Ulig le tihiqiyta nab ne danmeb diq mataw gina haiqta na gilumsihtan ginad eraqsa ne gigo nagah asor humab tiqemiya. <sup>11</sup> Ari muran ne kabiy na emid hiqiytan. Kwaziqmo ne kabiy na hidmo emnan gigem eramta. Nazaq iyan muran ne ginad bilamta nazaqmo ne emiy. Emad ne gigo nagah usaqta naqmo amalib ne kabiy na emid hidmo hiqiy bugan. <sup>12</sup> Luweq ne ginad em daqay, I nagah emamta kabem a haiq haq daqay. Ne ginad nazaq hi emiy. Mat in mataw gilumsihtan agem eraqta na in ago nagah asitmo in inaq diqta naqmo emsa God ahol waqad anad bilaqaaq. Anad bilaqsa mat na nagah kabemmo a hi amta na ago in a hi bilaqdaq.

<sup>13</sup> Teq ne gihol ruguseq samanmo ossa ta ne mataw gilumsihtan daqayta ko in nagah kabemmo inaq iyeq afaqan haiqmo osiy nazaq ya a hi bilaqaiq. Haiqqam. Naqmo ne mataw ko gilumsihtan in ne nenaq araqqibmo os daqay haqad ya mataw na gilumsihtan ne gibilenaiq. <sup>14</sup> Kam kab ne gigo nagah kabemmo inaqta. Sa mataw ko siqim diq iyim osayta. Muran ne gigo nagah asor mataw na negid abeb ne nagah ago siqim iysa teq in ne gilumsihtan in gigo nagah asor ne tineg daqaymo. Nazaq iyid ne bunmo daq amulik naqmo emad ne araqqibmo dimunmo tuqos daqay. <sup>15</sup> I an ulumsihtan araqqibmo osamta na agamukan araqq God ago marib usaqmo. Gamuk na bilam,

Mataw gigo didaq kabemmo tayiyta na in gigo didaq na bitab a hi lilih ham. Sa mataw gigo didaq asitmo usta na in gigemnan a hi moqiy ham. *Kisim Bek 16.18*

*Pol mataw asor giqeman uliq Korin-ib lehiy*

<sup>16</sup> Ya God esey diq ugaiq. In Taitus agem wazan eraqan ya ne gilumsihtan igem eraqta nazaqmo in agem loyinaqmo. <sup>17</sup> In ne gigo hib muleqeq ta lehdaq haqad i susumun ugan in dimunmo ham. Teq in

kabiy ka emnan agem eraqsa iyan inmo anadibmo ne gigo hib nawa lah.

<sup>18</sup> Lehsa i gimaqqabab araqq eman in Taitus inaq lahmo. Mat na Yesus awagamun dimunta anonon diqmo bilaqaaqta iyan on mataw Yesus ago nan huritayta na gidauhan bunmo gigo hib in abin usaqta. <sup>19</sup> Teq naqmo amomo a haiq. Yesus ago on mataw gidauhan na bunmo in mat naqmo atowun eman in i inaq araqqib naw na waqeq a leheq on mataw gina haiqta na gibenab tiqemam. I nazaq emeq teq i mataw na gilumsihtan ginad ayahmo bilaqaaqta na ulal iysa mataw na Iyahta abin wazid ulilibmo tugwalehdaq. <sup>20</sup> Teq i le naw ayahmo na akabiyan emad on mataw ko gilumsihta mat araqq i gimalib nan emnan i gituw hiqiyaiq. <sup>21</sup> I Iyahta ameb daq dimunta emsa i gigo daq na on mataw bunmo gimeb dimunta tiqiydaqmo haqad i ginad emauqta.

<sup>22</sup> Teq i gimaqqabab ta araqq eman in giger na nenaq lehiymo. I mat na ulum waqad kabiy amo amo ugsa in zaway diq iyeq kabiy na emsa i ahol waqyauqta. In ne ginan anad emaq. Ne nagah kabemmo diq mataw gilumsihtan tiqem daqay haqad in le ne nenaq kabiy na emnan agem diq eraqaaq.

<sup>23</sup> Ari ne Taitus ago tuhuritiyta. In ya iteqsor dimunta teq in ya inaq i araqqibmo ne gilumsihtan gimen kabiy emauqta. Teq i gimaqqababan giger teko ya ginan bilayta na in Yesus ago on mataw gidauhan bunmo gibinib kabiy emad in Kraisi abin eman ayah iyaqta. <sup>24</sup> Nazaq iyan ne mataw ezeqman na gilowan tonsa on mataw Yesus ago nan huritayta na gidauhan bunmo in ne gibiyiy. Gibiyad ne mataw na ginan ginad bilaqaaqta na ago in ahol waq kemad in ginad em daqay, Ne Korin gigo daq nazaq iysa iyan Pol ne gibin iluwaqta haq daqay.

## 9

*Kraisi ago on mataw Korin-ib osayta na in gimaqqababan saw Judiya-ib osayta na gilumsihtan haqad naw em daqay*

<sup>1</sup> Ne God ago on mataw tawonta gina haiqta na gilumsihtan anawun ne em daqayta na ago ne tuhuritiy. Nazaq iyan ya na ago agamukan sisaqmo a hi mar tondaq. <sup>2</sup> Ne kabiy na emnan gigem eraqaaqta na ya tuhurit. Na ago ya on mataw saw Masedoniya-ib osayta na gimeb ne gibin tuteqmo iluwyaiqta. Ad ya kazaq gibilenyaiq, Ulig tihiqiyta nabmo Korin on mataw saw Akaya-ibta na in on mataw gina haiqta na gimen naw emnan gihol tuwastitayiy haqyaiq. Haqsa ne kabiy na emnan gigem diq eraqaaqta na ago in tuhuritim in kabiy na emgo giqutil tiqeraqaaqmo. <sup>3</sup> Teq

i ne gibin iluwyaugta na ago agamukan luweq samanta idyaq haqad i gimaqbaban ezeqman na giqeman ne gigo hib tilehiy. In leheq ne ginad enqenunid ya ne ginan bilayta nazaqmo ne naw na emgo gihol wastitayeq os daqay haqad. <sup>4</sup> Luweq ya Masedoniya mataw asor nenaq ne gigo hib lehid ne gihol a hi wastitayeq oseq ne gimebay tuwoqdaq haqad. Sa i ne ginan helmo hawta na ago i gimebay horwazeq tuwoqdaqmo. <sup>5</sup> Nazaq iyan ya i gimaqbaban ezeqman na gibilenad gibe yah nog iyan in nawan ne gigo hib tilehiy. In ne gigo hib danneb leheq nenaq gamuk na wastitayid ne naw ayahmo emnan hel diqmo bilaqiyta na in gimo ginuweq emid tuqusdaq haqad. Nazaq iyid teq naw ayah na ne ginadibmo emiyta nazaq nog tiqiydaq. Sa mataw ginad em daqay, Pol-nen lehim Korin gituw bulad gigo nagah hureqsa in naw na emiy nazaq in ginad a hi em daqay.

<sup>6</sup> Gamuk ka ne huritiy. Mat ago kabiyab didaq amagin amulikmo leyaqta na in didaq anon kabemmo a hi waqaqta. Teq mat didaq amagin kabemmo leyaqta na in didaq anon kabemmo waqaqta. <sup>7</sup> Ne amulik-mulikmo ginad tiqemiya nazaqmo ne gigo nagah asor emiy. Luweq mat ara q atuw hiqiysa ago nagah asor emad bilaqdaq, Mataw ko ituw bulsa ya nagah emai q haqdaq. Haiqqam. Mat agem dimniysa ago nagah mataw negsa God in anan anad bilaqdaqta. <sup>8</sup> Ne huritiy. God teq nagah kabemmo negid tigiyunindaq. Giyuninsa ne nagah osgo bunmo inaq iyeq ne gigo nagah kabemmo na amalib kabiy dimdimunta bunmo tiqem daqay. <sup>9</sup> God ago marib gamuk ara q nazaqmo bilamta. In bilam,

God in on mataw gina haiqta saw haresmo osayta na gilumsihad in ago nagah kabemmo hunegan in gigo hib lehaqta ham. Teq in ago daq titnonta na tutimmo usaqta ham. *Buk Song 112.9*

<sup>10</sup> God-mo didaq amagin kabiy anamren ugan in ago kabiyab leyaqta. Teq inmo didaq na eman gwalim anon eman mat na neqaqta. Ad God naqmo didaq amagin kabemmo diq negid ne gigo nagah kabemmotata na amalib on mataw kabemmo tigi-lumsih daqay. Sa ne gigo daq titnonta na ne gimen anon kabemmo diq tisorqendaqmo. <sup>11</sup> Ad God ne gigo kabiy daq bunmo emid dimunmo lehsa ne on mataw gina haiqta na ayahmo tigi-lumsih daqay. Sa i ne gigo nagah kabemmo na waqeq a le mataw gina haiqta na negid in ne ginadin emad God esey tuqug daqay. <sup>12</sup> Nazaq iyan ne God ago on mataw tawonta gina haiqta na ginadin emad gilumsihsa in nagah ago siqim iyim osayta na tuwaq daqay. Teq na

amomo a haiq. Ne on mataw na nagah kabemmo negid in wazillin tonad gime kabemmo God abin iluwad esey diq tuqug daqaymo. <sup>13</sup> Teq daq nawa ne in gilumsihgo em daqayta na in ne gihol alulin emid tugwahtiq hasdaq. Gwahtiq hasid mataw na ne gibiyad bilaq daqay, Ne Kraiss awagamun dimunta bilaqayta na adanmo diq emayta haq daqay. Haqad ne naw ayahmo negsa in ahol waqad teq ne on mataw ta asor inaqmo gilumsihsa in gibiyad in God anan sorid ulilibmo tugwalehdaq. <sup>14</sup> Ad in ne ginan ginad em daqay, God agem dimunta ayahmo negad ginad enqenunsa ne daq na emay haq daqay. Haqad in ne ginan ginad bilaqsa God in ne gidimun tongo haqad in tubulon daqay. <sup>15</sup> Helmo. God i gilumsihim naw dimunta igta na in nagah ayah diqmo iyan i abin bilaq hasgo biyab a haiqta. Nazaq iyan i naw na anadin emad God esey diq uguq.

### **Mataw asor Pol abin wazan woqsa in Korin giqeman gigem meqinta Pol ugsa Pol inmo ahol adanin qway**

## **10**

*Mataw asor Pol ago kabiy bayan woqnan ton*

<sup>1</sup> Ari mataw asor nan yagad kazaq bilaqay, Pol bolim i inaq osad in ahol wazan woqsa osa qta haqay. Teq in i gihulosim le pesanmo osad in i giyon gamuk atoran diqmo bilaqdaqta haqay. Ta teq yaqmo Pol kazaq ne gibilenaiq. Kraiss inmo ahol wazan woqsa daq kiskista on mataw giyon emaqta nazaq ya ne kiskismo gibilenaiqmo. <sup>2</sup> Gibilenad yaqgo gamuk kazaq ne gigo hib lehaq. Ne ginad buliyad midememo osiy. Luweq ya le gwahtiqeq mataw gihar igayta na gamuk awaz meqin diqmo gibilendaiq. Mataw na ginad emay, Pol ayogniz nenaq og kab gibin ayahta waqnan haqad kabiy emayta haqay. Ari in ginad na a hi hulosis yaqmo leheq in gigez na emid tihiqiydaq. <sup>3</sup> Helmo, i mataw og kabtammo. Teq mataw og kabta an wolaqta nazaq i an a hi wolaqta. <sup>4</sup> An wolgo anaghan i wazaqta ka in og ka ago nagahta a haiq. Haiqqam. Nagah nagan God ago zaway inaq iyim in i gibabun nan igayta ko gigo zaway bunmo tuwolbiyaydaqta. <sup>5</sup> Mataw igmo ag haqad gamuk katiya amalib God abin wazan woqsa i in ginad meqinta na bayan woq buga qta. Woq bugsa i in ginad na eman Kraiss ahaqenib iysa in Kraiss ago nan huritayta. <sup>6</sup> I gihol tuwastitayim osaqta. Ossa ne Kraiss ahaqenib iyeq nan bunmo huritad muzinsa teq ne gilikmanib mataw nan othasayta na i faq tinegam.

<sup>7</sup> Nagah ne gimeb usaqta na ne ahol waq kemeq teq ulum kemiy. Ad ne Kraiis ago matawmo diq iyeq teq ne ginad kazaq emiy. I Kraiis agota iyim ossa nazaqmo Pol-nen in Kraiis agota iyim osaymo haqiy. <sup>8</sup> Iyahta i gihol abin ayahta igta ka i ne giwazid woqgo haqad in a hi igta. I ne tiqemid ne zaway iyeq turgo haqad in i gihin ka igta. Nazaq iyan Aposel abin i giholib usaqta ka ya iluwad imebay a hi woqqaqta.

<sup>9</sup> Teq ne luweq ginad em daqay, Pol i gimen sansandek mar tonaqta kagan in i giritewunnan haqad mar tonaqta haq daqay. Haiqqam. Ne ginad nazaq hi emiy. <sup>10</sup> Teq nabag ne gigo hib nawa mataw asor ya inan kazaq bilaqay, Pol sansandekib gamuk afaqanta amo amo atoranmo gibilenaqta haqay. Ta teq inmo gwahtiqaq in ahol waqsa in ago zaway haiq diqta iyim in gamuk bilaqgo adan sosil iyaqta haqay. <sup>11</sup> Ari mataw nazaq bilaqayta na in i ginan ginad em hasiy. I pesanmo osad gamuk atoranmo sansandekib gibilenaqta nazaqmo i ne nenaq osad teq i tiqemam.

<sup>12</sup> Teq mataw asor ne gilikmanib osad in gimo gihol abin iluwayta nazaq i gihol anan a hi bilaqam. Ad "I mataw ko nogmo" nazaq i a hi bilaqammo. Ta teq mataw na in God ago gamuk anadin a hi emad in gimo an ahol waqad gihol ago daq ulum kemayta na in dimun a haiq. In nazaq an ago daq ulum kemayta na in ginad hi emta adan emay. <sup>13</sup> Ari i nazaq a hi emauqta. I ban God igta na hulosaq gibin samanta iluwnan i hulosaq. Hulosaq God kabiy igta naqmo i anadin emad i gihol abin nazaq bilaqauqta. Teq i gigo kabiy na ayawalin le ne gigo hib iytamo. <sup>14</sup> Nazaq iyan i kwaziqmo ne gigo hib lehta nab i mat ara q ago kabiy aduganib a hi gwahtiw. Na igmo kabiy emta na aduganib le gwahtiqim Kraiis awagamun dimunta ne gibilen.

<sup>15</sup> I ban God igta na hulosaq mataw ta asor gigo kabiy aqumrib i gihol abin samanta a hi iluwauqta. Haiqqam. I ginad kazaq emauq. Ne ginad helmo haqayta na le ayahmo diq tiqiysa teq i dante inaq iyeq ne gilikmanib kabiy kabemmo tiqemam haqauq. <sup>16</sup> Emeq teq og saw ne wigilehun ban usaqta nab i leheq Yesus awagamun dimunta in tigibilenammo haqauq. Na ezaqgo uliq saw mataw asor kabiy tiqemiyta nab i in giquimrib gihol abin samanta waqnan gituw hiqiytaqta. <sup>17</sup> God ago marib gamuk usaqta ka i anadin emauq. Gamuk na bilam,

Mat inmo ahol abin iluwnan haqad in Iyah-taqmo aqumrib ahol abin iluwan ham. *Jeremaya 9.24*

<sup>18</sup> Gamuk na alulin in kazaq. Mat inmo ago zawayib abin eman ayah iyaqta na in

Iyahta ago kabibiy mat a haiq. Ari Iyahta inmo mat asen baysihad ago kabiy balaw tona mat naqmo in Iyahta ago kabibiy matmo diqta.

## 11

*Pol abin Aposel katiyta nagan gihaqenib a hi usaqta*

<sup>1</sup> Ari ne tok nemeq ginad emiysa ya gamuk ara q inad hi emta tibilaqnan. Bilaqsa ne huritad asormo hi bilaqiy. <sup>2</sup> God anad ne in amomo diq anan moqad ago hib soqoteq inaq os daqayta nazaq ya inad usaqmo. Na ezaqgo ya Kraiis inaq gamuk emim mataw aw barasta ara q mat inaq asit a hi usta waqim aduw ugayta nazaq nogmo ya ne giwazeq Kraiis tuqgdaiq haqad ya in hel diqmo tubulonta. <sup>3</sup> Teq ya rabaiq. Luweq nagah ahulinaqta na in hilhil ago hurit kemim Iv kat ugta nazaqmo mataw i gihar igayta ko in ne ginad hureqsa ne ginad dimunta amulikmo Kraiis ago hib usaqta na tuhulos daqaymo. <sup>4</sup> Ya ne gigo daq tuhurit. Mat ara q ne gigo hib lehim Yesus diqta i anan gibilenta na ago a hi bilaqad in Yesus ta ara q katiyta anan gibilensa ne huritmo huritayta. Ad nazaqmo ne God ago Bugaw diqta mebmemo waqiyta na hulosaq bugaw ta ara q katiyta waqad ne nan kabemmo a hi bilaqaytamo. Teq mat ara q Yesus awagamun dimunta ne mebmemo waqim muziniyta na buliyad in Yesus awagamun lul ta ara q diqta bilaqsa ne huritgomo iyim osayta.

<sup>5</sup> Ne gilikmanib mataw asor in gimo gihol anan bilaqay, I Aposel bunmo giquriyamim danmehmo diq osauq haqayta. Teq ne huritiy. Ya mataw na gihaqenib a hi osaiqta. <sup>6</sup> Helmo ya mat gamuk a hi diq bilaqaiqta teq ya nagah kabemmo ago inad tiqem hasta. Ad i gigo kabiy daq bunmo amalib i ginad awaz meqinta na ulal iysa ne ahol tuwaq kemiya.

<sup>7</sup> Ne ginad emiy. Ya God ago gamuk dimunta na ne gigo hib a lehim gibilenad ya anawun ara q anan a hi bilayta. Teq ya ne gihin wazan eraqsa ya ihol wazan womta na ya daq meqinta em e? <sup>8</sup> Haiqqam. Yesus ago on mataw gidauhan ta asor ya ibunib turad ilumsihsa ya ne gigo hib kabiy emiytaqta. Na bilaqne ya in gigo hib nagah rin tonim amalib ne gilumsihyaiqta nog. <sup>9</sup> Ya ne nenaq osad nagah ara q ago siqim iyeq afaqan na ya a hi negyaiqta. Kam nab ya inaqbaban asor saw Masedoniya hulosaq bolim ya tiqilumsih yaqayta. Sa ya nenaq osad ya ihol wasihim ne yaqgo afaqan sorgo a hi gibilenyaiqta. Ad abeb teq ya afaqan ara q a hi negdaiqmo. <sup>10</sup> Kraiis ago gamuk helta

na ya igemab ussa ya helmo diq kazaq bilaqaiq. Ya mataw gimen kabiy samanmo emaiqta na ago ya ibin iluwaiqta haqaiq. Ad ya ibin kazaq iluwsa ne gigo mat araş saw Akaya-ib ya iqez ka bayid a hikidik woqdaq. <sup>11</sup> Teq nagaqgo ya nazaq ne gimen kabiy emad ya ne gigo nagah araş a hi waşyaiqta? Ya ne ginan inad a hi bilaqsa nazaq emyaiqta ye? Haiqqam. Ya ne ginan inad diq bilaqta na ago God tuhurit.

<sup>12</sup> Teq ya mataw gimen kabiy samanmo emaiqta na ya em tuteqmo a tilehdaiq. Na ezaqgo mataw asor gihol kat ugad bilaqay, I Pol kabiy em nogmo i emaiqta haqay. Nazaq iyan ya God ago kabiy samanmo emad ya mataw na giqez adanin tuşway bugaiq. <sup>13</sup> Mataw nazaq in gimo gihol abin iluwayta na in aposel katiyta. In mataw kat negnan haqad kabiy emayta. Mataw na giholin awaqan bilaqne Kraiş ago Aposel diqta giwaşan nogta teq in hel diq a haiqta. <sup>14</sup> Teq ya mataw na ginan nazaq bilaqsa ne ginadnad hi emiy. Satan ahol buliyim awaqan bilaqne God ago angelo awaqan nog iyaqtamo. <sup>15</sup> Nazaq iyan Satan ago kabibiy mataw nawa ne gilikmanib kabiy emayta na in gihol awaqan buliyad dante titnonta ago kabibiy mataw nog iysa daq na ago ne gihol hi ritenan. Abeb mataw na kabiy meqinta emayta nazaqmo in amenin meqinta tuwaş daqaymo.

*Pol Aposel akabiy an emad afaşan kabemmo sor*

<sup>16</sup> Ya gamuk tibilayta nazaq ya a ta bilaq tonaiq. Ne ya inan mat agadanta hi bilaqiy haqaiq. Ari ne ya inan nazaq ginad emeq na dimunmo. Ne mat anad asorta hulosan gamuk hareshmo bilaqta nazaqmo ne ya ihulosid ya ihol abin asit iluwaiqmo. <sup>17</sup> Ya Iyahta anad muzinin gamuk ka a hi bilaqaiq. Haiqqam. Ya ihol abin iluwaiqta ka ya mat agadanta gamuk bilaq nog iyaiq. <sup>18</sup> Mataw kabemmo in og ka ago daq muzinad gihol abin wazan eraqta. Nazaq iyan ya nazaqmo daq na muzineq ya ihol abin tiqiluwnanmo.

<sup>19</sup> Nabag ne ginad emay, I ginad tişem hasta haqayta. Nazaq iyan ne mataw agadanta gihulossa in gamuk hareshmo bilaqsa ne gigem a hi meqniyaqta. <sup>20</sup> Ad mat araş ne gişeman ne in ago kabibiy mataw samanta iyad ne nan kabemmo a hi bilaqayta. Sa in ne kat negad gigo nagah bunmo samanmo waşsa ne tok nemim kiskismo osayta. Ad in bilaqay. Yaşmo mat ayahta haqad teq in ne gimanmanib hunegsa ne aholibmo hişiyad nan araş a hi ugayta. <sup>21</sup> Ari i ne nenaq osta nab i daş atoranta nazaq a hi emyauqta. Teq ne ginad ezaş emay? I le ne nenaq kiskismo osta na towa ne ginadib i mataw diq a

haiqta daşayta haşay. Nazaq iyan yaşgo daş kiskista na ago ya anadin emad imebay tuwoşaq.

Ta teq aposel katiyta na in gimo gihol awagamun bilaqad gibin iluwsa ya nazaqmo ihol awagamun bilaqad yaşmo ihol abin tiqiluwdaiqmo. (Oyeş, ya mat agadanta gamuk bilaş nog tişyaiq.) <sup>22</sup> Mataw na in Hibru ginedan asor e? Ya Hibru ginedan araşmo. Teq in Isrel gigo God anan helmo haşay ye? Ya nazaşmo Isrel gigo God anan helmo haşaiqta. In Abraham anaynayniz asor e? Ya inaşmo Abraham anaynayin araşmo. <sup>23</sup> In Kraiş ago kabibiy matawta ye? Ya in gişuriyamim Kraiş ago kabiy dimun diqmo emaiqta. (Ya mat agadan diqta gamuk bilaş nog tişyaiq.) Teq ya mataw na gigo kabiy uriyamim ya iholtuw bulad kabiy ayah dişmo emta. Ad ya mataw na gişuriyamim ime kabemmo bit gişirşuran osaytab osta. Teq mataw gime kabemmo inoliyta na in mataw na gişuriyammo. Ad ya ime kabemmo moşnan tonta na in gişuriyammo.

<sup>24</sup> Kam abaynaginmo Juda mataw ya iwazim gime 39 nazaş gusib ya inol titaiy. <sup>25</sup> Teq in gime ezeşmanmo yukib inoliy. Ad in gime amulikmo eraşim ya imalib giş hunegiyimo. Ime ezeşmanmo ya muyib lehsa muy meşniyim kamishmeş wolahta. Teq kam araşab muy meşniyan kam amulikmo taromab zeşab inaşmo ya kamish amalib al tonad luwta. <sup>26</sup> Tutimmo ya uliş-ulişgo luwad inamur a hi emyaiqta. Ya yuw aseseşta urotim lehsa yuw ineqnan tonyaqta. Teq mataw girin inaşta danib ibiyad inol emnan ton yaşayta. Sa yaşmo isenlulmo in ya inol emnan tonsa mataw ta asor Juda a haiqta nagan ya inol emnan ton yaşaymo. Uliş aseseştab ya lehim ossa inol emnan ton yaşayta. Ad ya uliş huloseş danib lehad luwsa inol emnan ton yaşaymo. Ya kamishmeş luwsa mataw inolnan ton yaşayta. Teq mataw asor katiyad "I ni nimaşqaban" haşad teq in ya inol emnan ton yaşaymo.

<sup>27</sup> Ya iholtuw bulad kabiy afaşanta emyaiqta. Sirisirimo taromab ya a hi usyaiqta. Ya didaşnan yuwnan moşad ime kabemmo didaş haişmo osyaiqta. Ad tim inolsa ya nagah araş ihol sişendaşta haiş iyaiqta. <sup>28</sup> Teq yaşmo igo afaşan kawa ya tibilayta ka amomo ya a hi soryaiqta. Haiqqam. Kam bunmo ya Kraiş ago on mataw gidauhan uliş-ulişgo osayta na gigo afaşan inaşmo sorad ya ihol afaşan diş iyyaqta. <sup>29</sup> Ne ginad emiy. Kraiş ago on mataw gilikmanib araş ago zaway hişiyş yaşgo zaway tişiyşayqtamo. Teq in gigo araş daş meşintab woşsa ya ihol afaşan iysa inad timeşniyaqtamo.

<sup>30</sup> Ari ya dante araq haiqgam iyeq yaqmo ihol abin tiqiluwdaiq. Ta teq yaqgo zaway hiqiyān ya ihol ulumsihgo dan haiqmo osta naqmo ago ya ihol abin iluwdaiqta. <sup>31</sup> Helmo ya bilaqaiq. I Iyahta Yesus Amam God abin tuteqmo soramta na inmo ya igem ahol waq kemad ya a hi katiyaiqta na ago in tuhuritaq. <sup>32</sup> Na in kazaq. Kwaziqmo ya uliq Damaskus-ib ossa King Aretas ago ahagenibta na in uliq na wamuzad osim bilaqan uliq na ago dan ez bunmo tawan emiyta, in ya iwazeq iqirqurnan haqad. <sup>33</sup> Teq haiq. Ya iyogniz asor ya iwaqim kararib iqemim teq in gel asan ban ihulosan wole ogib hitiqim ya tukim lehsa mat na a hi iwaz.

## 12

*Pol nagah araq mataw sen qwayim ahol waqayta nazaq nog ahol waqsa God gamuk awaz meqinta ug*

<sup>1</sup> Ya ihol adanin qwaynan haqad dante araq haiqgam iyim ya ihol abin iluweq a tileh tutnan. Gamuk ka asit a hi ilumsihdaqta teq ya bilaqmo tibilaqdaiqta. Ad mat araq sen qway nog iyim Iyahta ago nagah asor gibiyad teq in gamuk ulilemabta huritta na ago ya ne tigibilendaq. <sup>2</sup> Ya Kraiss ago mat araq abin kazaq huritta. Kwaziqmo God in mat na waqim ad ago uliq Heven-ibmo diq gwalahita. Teq in gwalahita na ago ulig 14 nazaq tihiqiy. Mat na asan inaqmo gwalahita o haiq in awitanmo gwalah o ya inad a hi emaiq. God amomo huritta. <sup>3-4</sup> Ari God in mat na waqim ad ago uliq Paradais-ib gwalahita naqmo ago ya huritta. Teq ya teko bilayta nazaq ya a ta bilaq tonaiq. In asan inaqmo gwalahita o haiq in awitanmo gwalah o ya inad a hi emaiq. God amomo huritta. Mat na gwalehim gamuk lul araq diqta hurit. Hurit in bilaqgo anad siqim iyaq. Sa gamuk na aguninin ayah diqmo iyan in bilaqgo ago zaway haiqmo. <sup>5</sup> Ya mat naqanta abin tiqiluwdaiqta. Teq yaqmo kabiy emta na ago ya ihol abin iluwnan ituw hiqiyayq. Ari tutimmo yaqgo zaway hiqiyān ya ihol ulumsihgo dan haiqmo osaiqta naqmo ago hib ya ihol abin tiqiluwdaiq.

<sup>6</sup> Helmo ya ihol abin diq tiqiluwnan haqad ya mat agadanta gamuk bilaq nog a hi iydaiq. Na ezaqgo ya gamuk heltaqmo bilaqdaiqta. Teq yaqmo ihol wasihim ya ihol abin a hi iluwaiqta. Luweq mataw yaqgo gamuk teq yaqgo daq diqta na anadin a hi emad in yaqgo daq asor ahol a hi waqiyta na inaqmo bilaqad in ya ibin samanta iluwid ulilibmo diq gwalehdaq haqad.

*Nagah araq sasug nogta Pol asan ulum tayyaaq*

<sup>7</sup> Helmo, ya God ago uliq nab gwalehan in ago nagah dimdimunta kabemmo iqisihunta. Teq ya nagah na anadin emad ya inad dimniysa ihol abin wazid eraqgo God huloss. Nazaq iyan in nagah araq bilaqne sasug nogta eman bolim ya isan tuqulumaq, ya ihol wazid woqsa ihol abin a hi iluwdaiq haqad. Nagah na Satan ago hib osim bolim in bilaqne Satan ago nantut nog iyim ya iholib usaqta. <sup>8</sup> Ussa ya ime ezeqmanmo Iyahta inaq gamuk emad tubulon, in ya iholib nagah na walemdaq haqad. <sup>9</sup> Teq in ya kazaq ibilan. Ya a hi walemdaq ham. Ya igem dimunta nigsa ni zaway diq iyeq afaqan na tisordaq ham. Na ezaqgo ham ya mat ago zaway haiqta na ulumsihad amalib kabiy emsa yaqgo zaway in aholib ulal tiqiy hasaqta ham. Iyahta nazaq ibilenan muran ya mat yaqgo zaway haiqta nazaq ya ihol abin iluwnan inad diq bilaqdaqta. Ya nazaq emsa Kraiss ago zaway ayahmo ya iholib ussa ya loyin kemaiqta. <sup>10</sup> Nazaq iyan ya ihol loyinsa yaqgo zaway hiqiyssa kam nab ya inad dimniysa tok nemim osaiqta. Kraiss abin ya iholib usaqta na ago mataw ibilawunad afaqan yagad teq in ya imeqin tonayta. In nazaq emsa ya God ago kabiy emad ihol bibiyowunaiqta. Teq daq nazaq iholib gwahtiqsa ya igem kiskismo ussa nan kabemmo a hi bilaqaiqta. Na ezaqgo ya ihol loyinsa yaqgo zaway hiqiy nog iyaqta nab Kraiss ago zaway ya iholib bolsa ya iwaz timeqniyaiqta.

*Pol in uliq Korin on mataw God anan helmo haqayta na zaway nag*

<sup>11</sup> Ya mat agadanta gamuk bilaq nog tiqiy. Teq negmo ya igem wizan ya gamuk nawa na tibilayta. Negmo ya ibin dimunta na bilaq nagiyta. Teq ne a hi bilaqan iyan yaqmo ihol abin tibilay. Helmo ya mat ibin haiqta teq ya mataw nawa ne ginan Aposel danneb diqta haqayta na gihagenibta a haiq. <sup>12</sup> Ya ne gilikmanib osad Aposel ago kabiyimo diqta emad ya ituw a hi hiqiyayqta. Daq azawayin inaqta amo amo kabemmo teq kabiy aseseqtaqmo ya ne gigo hib giqemsa ya Aposel diqta na ago ne tuhurit kemiy. <sup>13</sup> Ya Kraiss ago on mataw gidauhan ta asor na gigo hib kabiy daq emta nazaqmo ya ne gigo hib tiqemtamo. Ari ya in gigo hib kabiy emta na araq ne gigo hib a hi emid ne bilaqsa ya huritiq. Helmo daq araq ya in gigo hib emim teq ya ne gigo hib a hi emta na in kazaq. Ne didaq nagah yaqgo haqad ya a hi gibilenan ne ya iwamuzgo giholtuw a hi buliy. Yaqgo daq na ne ginadib meqniyyid ne ginad dimunta yagad yaqgo daq meqinta na walemad anadin ta hi emiy.

<sup>14</sup> Ari ya ime ezeqmanta ne gigo hib lehnan ihol tuwastitayim osaiq. Ya ne gigo hib leheq didaq nagh yaggo a hi gibilenid ne ya iwamuzad giholtuw a hi bul daqay. Na ezaqgo ya ne gigo nagh waqnan inad a hi bilaqay. Ya negmo giwaqnan inad bilaqayta. Ne ginad emiy. Onmin in ginenmaman gimen didaq nagh zaygo mani humab a hi wolayta. Haiqqam. Ginenmaman naqmo in gigo onmin gimen nagh zaygo mani humab wolayta. <sup>15</sup> Nazaq iyan ya inad dimniya yaqgo nagh bunmo ne gimen hulosa ya ihol nog inaqmo tuhulos-daiq. Ya ne ginan inad ayahmo bilaqsa ta ne ya inan ginad asitmoqmo bilaqdaq e?

<sup>16</sup> Ya nenaq osad afaqan a hi negta na ago ne ginad tiqem hasayta. Teq luweq ne ginad em daqay, Pol kat igad ago soysoy amalib i gihureqan i in aqez muzta haq daqay. <sup>17</sup> Ya mataw asor giqeman ne gigo hib lehiyta na in ne kat negad ne gigo nagh asor samanmo yaqmen waqiy ye? <sup>18</sup> Ya Taitus abe yahsa in ne gigo hib lahta. Lehsa i gimaqbab ara q na ya eman in inaq lahmo. Lehim Taitus kat negad ne gigo nagh asor samanmo wam e? Teq in anad dimunta negad nenaq kiskismo osta nazaq i nenaq a hi ostamo ye? Ad in ne gilumsihnan kabiy dimunta ne gimen emyaqta nazaqmo i a hi em negtamo ye?

<sup>19</sup> I gamuk kazaq bilaqsa nabaq ne huritad ginad emay, Pol ayogniz nenaq in gimo gihol ulumsihnan haqad gihol adanin qwayim gamuk ka i gibilenayta haqay. Haiqqam. God i gibiyasa i Kraisa ago on mataw iyim i gamuk ka helmo ne gibilenauq. I giyogniz dimun diqta, kabiy daq bunmo i emauqta na in negmo zaway negid ne giwaz meqniyeq tur daqay haqad i emauqta. <sup>20</sup> Ya rabaq. Luweq ya le ne gigo hib gwahtiqeq ya ne ginan inad emaiqta nazaq nog ne a hi iysa ta ne ya inan ginad emayta nazaq nog ya a hi iydaiqmo. Teq ya le ne gigo hib gwahtiqeq ne gilikmanib daq meqinta kagzaqta ahol waqdaq haqad ya rabaqmo. Ne an muga teq ne an agem meqinta ugsa teq ne gigem meqniya teq ne an rabunad giholbin giholbinmo ossa teq ne an agilehunan bilaqsa teq ne yuw alozin a luwsa teq ne girerey emsa teq ne ginad hi emta adan emad ginadibmo kabiy daq emsa luweq ne daq nagan emsa ya gibiydaiq haqad ya rabaq. <sup>21</sup> Teq luweq ne gigo mataw asor kwaziqmo daq anumlan inaqta em yaqayta na teq asor an haresmo hureqeq inaq us yaqayta na teq asor gihol bilaq adan ayahmo giholib ussa in muzin yaqayta nagan in ginad a hi buliyeq gigo daq meqinta nagan gileh a hi negsa ya gibiydaiq haqad ya rabaqmo. In nazaq emad luwsa ya ne gigo hib a ta gwahtiqid nab yaqgo God ne gimeb iwazid woqeq ya

iqutil tartaysa mataw nan a hi huritayta na ginan gaq wazad tuqsadaiq.

## 13

*Korin on mataw Kraisa ago nan huritayta na in ginad helmo haqayta na alowan ton daqay*

<sup>1</sup> Muran ya ime ezeqmanta ka ne gigo hib leheq ya mataw nan a hi huritayta na hazizirib tigiqemdaiq. Nazaq haqad ya God ago marib gamuk ara q usaq na anadin tiqemaiq. Gamuk na bilam,

Mataw giger o ezeqman nazaq in giqez rom toneq gamuk ara qibmo bilaqid teq in gigo gamuk na zaway iyeq nazaqmo tuqs tutdaq ham. *Lo 19.15*

<sup>2</sup> Ya ime gigerta le ne nenaq osad ya eraqim mataw kwaziqmo daq meqinta emiyta na giyogniz bunmo nenaq gidek wazim gibilen kem. Ad muran ya pesanmo osad ya kazaq in gidek wazim a ta gibilen tonaiq. Ya ne gigo hib muleqeq ta leheq teq ya mataw daq meqinta emay na gilowan a hi tondaq haqaiq. <sup>3</sup> Na ezaqgo negmo ya igem ulumad bilaqay, Ezaq teq Kraisa ni niqezab gamuk bilaqayta na ago i hurit kemam haqayta. Ari ne ginad emiy. Kraisa ne giwastitaynan haqad in ne girabunad daq kiskista a hi negaqta. Haiqqam. In ne gilikmanib kabiy awaz meqin diqta emaqta. Sa ya ne gigo hib leheq nazaqmo diq ya tiqemdaiqmo. <sup>4</sup> Helmo kwaziqmo Kraisa ago zaway haiqta nog iyan mataw in ayib dom woliyta. Teq muran in God ago zaway amalib kayeqmo luw osaqta. Ari i Kraisa inaq soqotim osad in og kab zaway haiqmo osta nazaq i osauqtamo. Teq i God ago zaway amalib Kraisa inaq kayeqmo osad i ne gilumsihnan giwastitayauqta.

<sup>5</sup> Kraisa ne giduganib usaqta na ago ne ginad a hi emay ye? Negmo gihol ulum kemad teq gigem loyin kemiy. Ne Kraisa anan helmo haqad inmo anad muzinad osay o haiq? Ari ne gihol loyinsa ne gidugan samanmo usid nab ne ginad em daqay, Kraisa Yesu i giduganib a hi osaq haq daqay. <sup>6</sup> Ad ne i gilum kemiymo. Gilum kemeq Kraisa i giduganib ossa i in ago kabiy emauqta na ago ne hurit kemiy.

<sup>7</sup> Teq God ne ginad wamuzsa ne i gilum kemad ginad meqinta ara q hi waqiy haqad i ne gimen God bulonauqta. Ta teq Kraisa igmo giduganib osaqta na ulal iysa ne i ginan helmo haq daqay haqad nazaq i God a hi bulonauqta. Haiqqam. Luweq ne i gibiy kireh tansa i mataw katiyta nog iysa ne dan titnonta tuhulos daqay haqad i nazaq ne gimen God bulonauqta. Teq i ginad ayahta ne gigo hib usaqta na in kazaq. Ne i ginan helmo haqay o haiq na

o tob iysa ne God-mo anad muzinad daq dimunta emiy haqauq. <sup>8</sup> Ne ginad emiy. I God ago gamuk helta bayid woqgo i giholib haiqqam. I gamuk helta na ulumsihgomo osauqta. <sup>9</sup> Daq alulin naqmo ago i gigo zaway hiqiysa ta ne giwaz meqniyim ossa nab i ginad tidimniyaq. Ad ne giwaz timeqniy haseq God anad bunmo tumuzin bug daqay haqad i ne gimen God bulonauqta. <sup>10</sup> Ya God ago on mataw gilumsihid in giwaz meqniyeq os daqay haqad Iyahta in ya ibin Aposel ka yagta. Ya mataw giwazid woqgo haqad in ya ibin ka a hi yag. Nazaq iyan ya nenaq nab a hi osad iyan ya sansandek ka mar tonim eman ne gigo hib lehaq. Ne gamuk ka ahol waqad gihol wastitaysa teq ya nawa lehdaiq haqad. Nazaq iyid teq ya leheq ne nenaq midemqanmo osad ya ibin ayahta ka amalib atoranmo a hi gibilendaq.

*Pol ago zeq dimun eman Kraiis ago on mataw uliq Korin-ib osayta na gigo hib lah*

<sup>11</sup> Ya imaqbaban, yaqgo gamuk bolim kawaqmo tihiqiy. Ne ginad dimniysa osiy. Ad ne wastitaye q anonon diqmo osnan haqad giholtuw bulad luwiy. Teq ya ne gigo os wastitaygo gibilenta ka ne huritiymo. Huriteq ne ginad amulikmo iysa zib alowabmo osiy. Ne nazaq emsa teq God i giqeman i an anan ginad bilaqsa zib alowab osauqta na inmo ne nenaq tuqosdaq.

<sup>12-13</sup> Ari God ago on mataw gigo daq titnonta na amalib ne an zeq dimun ugiy. Teq God ago on mataw tawonta kawa osayta ka bunmo in gigo zeq dimun ne negaymo.

<sup>14</sup> Ari Iyahta Yesus Kraiis agem dimunta negsa ne osiy. Teq God ne ginan anad bilaqsa in ago Bugaw Dimunta ne bunmo nenaq usanmo. Nawaqmo.

## Galesiya o Sansandek Pol mar tonan saw Galesiya-ib lahta Gamuk ameb lehaqta

Mataw en ameb diq Yesus anan helmo haqiya na in Juda-mo. An teq abeb Yesus in Pol eman lehim in og saw bunmo on mataw en ta asor Juda a haiqta na gigo hib lehad in mataw na inaqmo Yesus awagamun dimunta gibilenyaq. Gibilensa on mataw na kabemmo bolim le Yesus ago asenlulib tugwahtiqim in Juda mataw helmo haqiya na nenaq tuwastoni. Teq mataw en ta asor helmo haqiya na in God ago maror Moses bilamta na anan uliq arağ ago maror haqad in a hi muzin yaqayta, Juda em yaqayta nazaq. Nazaq iyan mataw na in maror na agamukan a hi muzinsa Juda mataw helmo haqiya na in ginan bilaq yaqay, Mataw na in God ago on matawmo diq a hi iy daqay haq yaqay.

Afağan nazaq gwahtiqan teq Juda mataw asor saw Galesiya-ib lehim Yesus ago dauh nab osiya na suleq katiya gibilenad in ginad tuwalebol yaqay. Ad in giwaz diq meqniyeq mataw en ta asor helmo haqiya na giqemid in God ago maror Moses bilamta na muzinad gihol abatan asan urotan ton yaqay. In bilaq yaqay, Ne gisan a hi uroteq teq ne God ago maror aduganib le a hi gwahtiq daqay haq yaqay.

Haqsa Pol nagah na abin huritimmo in Galesiya ginan anad meqniysa in gimen sansandek ka mar tonim eman in gigo hib tilah, in ginad agadanta na tuwastitaynan haqad. In bilam, I Yesus Kraıs anan helmo haqauqta naqmo amomo i giqeman i God ameb on mataw titnonta kayeqmo kuluwa-kuluwmo osamta tiqiyim osauq ham. Haqad in bilam, Yağgo gamuk ka ya inadibmo a hi bilaqaiqta ham. Teq ya gamuk ka mat arağ ago hib a hi wayta ham. Ya Yesus awagamun bilaqaiqta ka God-mo isihunan ya ne gibilenaiq ham. Nazaq iyan ne ginad katiya na hulosađ gamuk hel diqta ya gibilenaiqta kaqmo ne waz naqmo hiqiyiy ham.

### God inmo Pol atowun eman in Aposel akabiyān emaqta

<sup>1</sup> Yağmo Pol, ya Aposel arağ. Teq mat diq arağ ya itowun eman ya Aposel gwahtiqim a hi luwaiq. Haiğgam. God Yesus Kraıs hodhodab wazan erağim in Amam inaq kabiy na yagiya. <sup>2</sup> Yağmo teq ya imağba-ban ya ginaq kawa osauqta ka, i bunmo

sansandek ka mar tonim saw Galesiya-ib on mataw Kraıs ago nan huritayta na gidauhan bunmo gimen eman leh negaq.

<sup>3</sup> I Gimam God teq i gigo Iyahta Yesus Kraıs inaq in gigem dimunta negad in ne gigem emid kute neman. <sup>4</sup> Yesus Kraıs-mo i Gimam God anad muzinim bolim i gimen ahol nog hulosađim i gigo dağ meqinta tizay bug. Zay bugan og ka ago dağ meqinta nagan i ginad a ta hi wamuzsa muran i samanmo tiluw osauqta. <sup>5</sup> Nazaq iyan kam bunmo i God abin iluwad osuq. Hel diqtaqmo.

*Yesus awagamun amulikmoqmo usaqta*  
<sup>6</sup> Mataw! Ya ne giben arağ diğ huritim ihol turuh nam. Na in kazağ. Kraıs ađem dimunta negad gilumsihan teq God ne gillewunim giwamta. Giwagan sisağ haiq ne gihol buliyim Yesus awagamun lu arağ diğta muzinad ne God gileh ug nog iyim tuqosay. Ya ne giben nazağ huritim ya ritenim inadnad diğ tiğemağ. <sup>7</sup> Helmo, Yesus awagamun arağ arağ haiğgamta. Teq mataw asor ne giwazbalnan haqad in Kraıs ago wagam dimunta na wazbuliyim ne gibilenayta. <sup>8</sup> Ta teq igmo gigo arağ ne gigo hib leheğ Yesus awagamun i mebmemo gibilenta na buliyeğ wagam lu ta arağ gibilenid God in kusluw uğıđ ban meqintab wolehan. Ari angelo arağ Heven-ib gehitiqeq Yesus awagamun buliyeğ wagam ta arağ gibilenid God in kusluw uğıđ in nazağ ban meqintab wolehanmo. <sup>9</sup> Ya nawa tibilayta nazağ ya a ta bilağ tonaiğ. Mat arağ Yesus awagamun ne mebmemo huritim anan helmo haqiya na buliyeğ wagam ta arağ gibilenid God kusluw uğıđ in ban meqinta nab wolehan.

<sup>10</sup> Ya kazağ atoranmo bilaqid ne ya iwazineq inan dimun hağ dağay hağay ya gamuk ka bilaqaiğ e? Haiğgam. God-mo ya inan dimun hağdağ hağay ya gamuk ka bilaqaiqta. Ya matawmo giqemid ginad dimniy dağay hağad kabiy a hi emaiqta. Na ezağgo ya mataw ginad muzinad kabiy emeq teq ya Kraıs ago kabibiy mat a hi iydağ.

#### *Pol in Aposel gwahtimta awagamun*

<sup>11</sup> Ya imağbaban, ya ne hel diqtaqmo gibilenaiğ. Yesus awagamun dimunta ya bilaqaiqta ka mat arağ og kabta eman a hi gwahtimta. <sup>12</sup> Wagam na ya mat arağ ago hib a hi huritta. Teq mat arağ wagam na asuleqin a hi yagtamo. Haiğgam. Yesus Kraıs-mo gamuk na iqisihunta.

<sup>13</sup> Ne yağgo tur os kwaziqta na awagamun tuhuritiya. Ya Juda gigo maror ahaqenib osad ya God ago on mataw Kraıs ago nan huritayta na atoranmo gimeqin tonad giwalebolyaiqta. <sup>14</sup> Kam nab ya mat arağ diğ nazaqta ya luwyaiqta. Yağgo



on mataw gilikmanib ya iyogniz kabemmo giquiryamim ya ameb diq iyim i gisesan Juda gigo daq teq in gigo gunun bunmo ya muzin bugyaiqta.

<sup>15</sup> Ta teq kwaziqmo ya inen a hi iqem-samo God agem dimunta yagad itowun tiqamta. Itowun eman ya tugwahtiqaan teq ya in ago kabiy emgo haqad in tiqililewun. <sup>16</sup> Ililewunad in Atatin tiqiqisihun, iqisi-hunid ya in Atatin awagamun na a leheq on mataw en ta asor Juda a haiqta nagan gibilendaiq haqad. Ari God in Atatin tiqiqisihunan ya teq ezaq tondaiqta na ago ya mat araqaq ago hib lehim a hi susumun ug. <sup>17</sup> Teq ya uliq Jerusalem-ub mataw ya iquiryamim danneb Aposel gwahtiqaitya na gigo hib a hi lehmo. Haiqqam. Ya era hid naqmo saw Arebiya ban lehim tuqos. Osim abeb ya uliq Damaskus-ib muleqim ta leh. <sup>18</sup> Ad abeb ulig ezeqmanmo tihiqiyen teq ya Pita ahol waqnan haqad uliq Jerusalem-ub tugwaleh. Gwalehim ya Pita inaq wik giger nazaq tuqos. <sup>19</sup> Osad ya Aposel asor bunmo a hi gibiyad ya Iyahta amikqan Jems amomo ahol way.

<sup>20</sup> (Gamuk kawa ya ne gimen mar tonaiqta ka God ibiysa ya hel diqmo bilaqaiq. Ya a hi katiyaiq.)

<sup>21</sup> Ari abeb ya saw giger Siriya ayow Silisiya inaq gigo saw ban lehim tiluwyaiq. <sup>22</sup> Luwsa kam nab Yesus ago on mataw gidauhan saw Judiya-ib osiyta na in ya inobun asit ahol a hi waqad in yaqgo a hi hurit kem yaqayta. <sup>23</sup> Teq mataw ya iwagamun asitmo kazaq bilaqsa in hurit yaqay. Mat kwaziqmo i Yesus anan helmo haqsa in i gimeqin tonad luwyaiqta amatin na muran in anad buliyim Yesus awagamun dimunta on mataw tigibilenaq haq yaqay. <sup>24</sup> Haqsa Yesus ago on mataw saw Judiya-ibta na in ya iwagamun asitmo nazaq huritim in God abin tiqiluw yaqay.

## 2

*Aposel bunmo Pol inaq gigem amulikmo iyiy*

<sup>1</sup> Ari ulig 14 nazaq le tihiqiyen ya Barnabas inaq uliq Jerusalem-ub tugwaleh. Gwalehad i Taitus waqim inaq gwalehmo. <sup>2</sup> Teq ya gwalehta na God-mo ya inadib emim ibilenan ya gwalehta. Gwalehim ya Yesus ago on mataw gigo aseseqta na girom tonim nenaq humab tuwol. Humab wolim i gimomo giholbin osad teq ya Yesus awagamun ezaq diqta on mataw en ta asor Juda a haiqta nagan gibilenad luwyaiqta na ago ya mataw aseseqta na tigibilen bug. Luweq ya wagam na wazbuliyeq bilaq kireh tonid teq ya iholtuw bulad luwta na saman iydaq haqad. <sup>3</sup> Teq in yaqgo gamuk araqaq diq a hi wastitaiy. Ad in Grik mat ya inaq lehta

anan Taitus haqay na ahol abatan asan urotgo a hi bilaqiyimo. <sup>4</sup> Helmo, mataw asor urotgo bilaqiyta teq daq na a hi gwahtim. Mataw nazaq bilaqiyta na katiyim bilaqiy, I ne gimaqbaban haqiy. Ta teq haiq. Na in katiyad bo i giwirinad luw yaqay. Na ezaqgo Kraiss Yesus i giqamun hasan i God ago maror Moses bilamta na hulosis samanmo luw osauqta na ago in ahol waq kemnan haqad. Mataw na ginad em yaqay, I on mataw ka i gigo gunun amalib a ta giqirquid in i gigo kabibiy mataw samanta tuqos daqay haq yaqay. <sup>5</sup> Ta teq i ne ginadin emad i mataw na gihaqenib iyim daq na a hi em. Haiqqam. Yesus awagamun dimunta na aduganib gamuk araqaq katiyta hi usan haqad i mataw gimileq iyayta na giqez asit a hikidik muzinta.

<sup>6</sup> Ari ya mataw aseseqta gibilenta na gibiysa in bilaqne mataw gibin inaq nogta teq in ginad asor muturta a hi yayiy.

(Teq mataw na gibin inaq o haiq na ya inadib nagah amik diq iyta. Na ezaqgo God on mataw bunmo gibiysa in gibin araqaqibmo iyaqta. Iysa in asor gigo mo a hi lehaqta.)

Ari ya Yesus awagamun bilaqyaiqta na mataw aseseqta na gibilenan in asit a hi wastitaiy. <sup>7</sup> In ginad kazaq emiy. God Pita atowun emim kabiy ugan in mataw gihol abatan asan urotayta na Yesus awagamun gibilenaqta haqiy. Ad nazaqmo in Pol atowun eman in mataw gisan a hi urotayta na Yesus awagamun gibilenaqta haqiy. <sup>8</sup> (Na ezaqgo God ago zaway Pita aholib kabiy emsa in Juda on mataw gigo Aposel iyta. Ad zaway naqmo ya iholib kabiy emsa ya on mataw en ta asor Juda a haiqta nagan gigo Aposel iytamo.) <sup>9</sup> Nazaq iyan mataw aseseqta na bunmo in God-mo kabiy yaqta na ago ginad tiqem hasiy. Ginad em hasad Jems teq Pita teq Jon in Yesus ago on mataw na gigo dannebta iyim in ya Barnabas inaq giben tuwaziy. Giben wazad in i gibileniy, I garabmo God ago kabiy tiqemam haqiy. Emad ne on mataw en ta asor Juda a haiqta nagan gigo hib lehsa i mataw gihol abatan asan urotayta na gigo hib tileham haqiy. <sup>10</sup> Haqad teq in gamuk amulikmo igiyta na in kazaq. I giger Kraiss ago on mataw gina haiqta na ginadin emad gilumsiham haqad in i gibileniy. Teq ya inad nazaq tekomo tuqusta iyan ya in giqez na muzinnan inad diq tibilam.

*Pol in Pita ago daq meqinta eman ulal iy*

<sup>11</sup> An teq abeb Pita uliq Antiyok-ib bolim osad in ago daq meqinta araqaq ulal iyan ya in inaq an nob ugim turadmo ya wad. <sup>12</sup> Na ezaqgo Jems ago mataw asor uliq nab a hi bolsamo Pita in Kraiss ago on mataw Juda a haiqta na gigo bitab leheq

nenaq didaq neqyaqta. Ari abeb Jems ago mataw na bo gwahtiqim in Antiyok mataw Kraiss anan helmo haqiyta na gihol abatan asan urotgo giwaz timeqniy yaqay. Sa Pita in Jems ago mataw na girabunad in ayogniz Juda a haiqta na gihulosim giholib tihiqiyayq. <sup>13</sup> Samo Juda mataw Yesus anan helmo haqiyta na bunmo eraqim Pita asen muzim daq katiyta na inaq tiqem yaqaymo. Emsa in gigo daq katiyta na Barnabas anad tuhurammo. <sup>14</sup> Ta teq ya mataw na gibiyasa in gigo daq na Yesus awagamun helta na inaq a hi rirensa ya in bunmo gimeb Pita kazaq bulon. Ni Juda matta hay. Teq ni uliq kab bolim osad ni on mataw Juda a haiqta kagan gigo daq muzinad in osayta nazaq ni osayta hay. Teq muran ezaq haqad ni ninad buliyim mataw Juda a haiqta ka gibe yahid in Juda gigo maror ahaqenib iyeq muzingo ni gibilenaq hay?

### **I Yesus anan helmo haqauqta naqmo amomo i giqeman i God ameb titnonta iyim osauqta**

*On mataw Yesus anan helmo haqayta naqmo in God ameb on mataw titnonta*

<sup>15</sup> Helmo, ya iyogniz nenaq i Juda-mo gisenlulib gwahtiqim i gibin Juda mat usaqta. I on mataw en ta asor Juda a haiqta nagan gilulib a hi gwahtiqim in gibin mataw God ago gunun itiyonayta nazaq i gibin a hi usaqta. <sup>16</sup> Teq i ginad kazaq emauq. God ago maror Moses bilamta na ago gunun in mat ara q emid God ameb titnonta a hi iydaq haqauq. Mat Yesus Kraiss anan helmo haqauqta naqmo God in anan mat titnonta haqauqta haqauq. Haqad i Juda mataw asor i inaqmo Kraiss Yesus anan helmo haqid God i ginan mataw titnonta tihaqdaq haqad i Moses ago gunun na akabiyan hulosaqad i Kraiss-mo anan helmo tihawta. Na ezaqgo on mataw God ago maror Moses bilamta na ago gunun akabiyan emim teq in God ameb titnonta a hi iyayta na ago iyan.

<sup>17</sup> Ari God i ginan mataw titnonta haqdaq haqad i in ago maror Moses bilamta na hulosaqad i Kraiss amomo anan helmo haqad inaq soqotim osauqta. Nazaq iyan on mataw en ta asor Juda a haiqta na in God ago maror ahaqenib a hi osayta nazaq nog i tiqiyim osauqta. Teq i ginad ezaq emam? Kraiss i giqeman i gibin mataw God ago maror Moses bilamta na anadin a hi emad daq meqinta emayta nazaq nog i tiqiy haqam e? Haiq kidik! <sup>18</sup> Ya Kraiss anan helmo tihaqim ya God ago maror Moses bilamta na wolzilay nog iyan in ago zaway ya inad wamuzgota na tihiqiy bug. Ari abeb nagah ya wolzilayan timta na ya waz

ta eraqid mataw ya ibiyasa ya maror Moses bilamta na ahaqenib osad ago gunun itiyonaiqta amatin nog a ta iydaiq. <sup>19</sup> Na ezaqgo kwaziqmo ya God ago maror na itiyonsa maror na ya iyon bilaqan ya moyta nog tiqiy. Moqim muran ya maror na ahaqenib a ta hi osaiqta. Ad teq ya kayeq ta iyim ya maror na ago gunun anadin a ta hi emad ya God anadmo diq muzingo osaiqta. Na in kazaq, Ya Kraiss aholib tisoqotan mataw in ayib dom wolad ya inaqmo ayib dom wol nog tiqiyimo. <sup>20</sup> An muran yaqmo diq kayeqmo a hi osaiqta. Haiqqam. Kraiss ya iduganib kayeq iyim osaiqta. Inmo ya in anan ad bilaqsa in ya imen ahol nog hulosaqad ilumsih. Ilumsihan muran ya og kab osad God atatin anan helmo haqsa inmo ya iqeman ya kayeqmo osaiqta. <sup>21</sup> Nazaq iyan God agem dimunta on mataw negad gilumsihaqta na ya eman daq samanta a hi iyaq. Ari God ago maror Moses bilamta na in on mataw giqemid God ameb titnonta iyid teq nagaqgo Kraiss mom? In samanta moq nag.

### **3**

*God ago maror Moses bilamta na adan teq Yesus anan helmo haqgo adan*

<sup>1</sup> Ne Galesiya-ib matawta, ne God ago maror Moses bilamta na a ta muzinnan tonad ne ginad hi emta adan tiqemay. Nog ne kusluw negan ne ginad agadan iyaq? I Yesus Kraiss awagamun dimunta gibilensa ne bilaqne gime anonabmo Yesus ayib dom wolana ussa ahol waq nog tiqiyiyta. <sup>2</sup> Ya nagah ara q ago tisuusun negnan. Ne God ago maror Moses bilamta na adan muzinim God ago Bugaw Dimunta waqiy o haiq ne Yesus awagamun dimunta na anan helmo tihaqim teq ne Bugaw Dimunta na waqiy? <sup>3</sup> Ne agadan hi iyiy. Mebmebmo diq ne God ago Bugaw Dimunta ago zawayib God ameb mataw titnonta iyiyta. Ari muran negmo gigo zaway amalib ne gihol emid God ameb tidimniy hasnan haqad ne ginad emay ye? <sup>4</sup> Daq kabemmo ne giholib gwahtimta na samanta gwahtim e? Teq ya inad emaiq. Daq nagan ne samanta a hi loyiniy haqaiq. <sup>5</sup> Nazaq iyan ne ezaq tonan God ne gilikmanib daq azawayin inaqta emad teq in ago Bugaw Dimunta negaqta? Ne God ago maror Moses bilamta na ago gunun muzinsa in nazaq gidimun tonaqta o haiq, ne Yesus awagamun huritim anan helmo haqiyta na ago in ne gigo hib daq aseseqta na giqemaq?

<sup>6</sup> God ago marib Abraham abin kazaq usaqta.

Abraham God aqez anan helmo haqan God in anan mat titnonta ham. *Jenesis 15.6*

<sup>7</sup> Ad nazaqmo muran on mataw God anan helmo haqayta na in Abraham atatniz tiqiyaytamo. <sup>8</sup> Teq on mataw en ta asor Juda a haiqta nagan in inaqmo God anan helmo haqsa God in ginan titnonta haqqaq-tamo. Daq na agamukan kwaziqmo God ago marib mar tonan tuqusta. Ussa daq na a hi gwahtiqaqmo God in gamuk dimunta kazaq Abraham bulonim bilam, Ninmo nimalib teq ya on mataw en bunmo tigidimun tondaiq ham. *Jenesis 12.3*

<sup>9</sup> Nazaq iyan Abraham helmo haqan God dimun tonta nazaqmo diq God in on mataw helmo haqayta na bunmo gidimun tonaq-tamo. <sup>10</sup> Ari teq on mataw ginad emay, God ago maror Moses bilamta naqmo teq i tigilumsihdaq haqayta, mataw na oseq teq timeqniy has daqay. Na ezaqgo God ago marib gamuk araq mataw ginad nazaq usaqta na ginan kazaq bilam,

On mataw God ago maror Moses mar tonta na ahaqenib osad ago gunun bunmo a hi muz bugayta na, God in on mataw na bunmo kusluw negid in oseq timeqniy has daqayta ham. *Lo 27.26*

<sup>11</sup> Teq God ago gamuk kazaq bilammo, On mataw God aqez anan helmo haqan in ginan titnonta hamta naqmo in God inaq dimunmo tuqos daqayta ham. *Habakuk 2.4*

God ago gamuk nazaq bilaqan i ginad emauq. Mat araq God ago maror Moses bilamta na muzinim ahol eman God ameb titnonta iyta na haiq diq haqauqta. <sup>12</sup> God ago maror Moses bilamta ago adan na in i ginad helmo haqauqta na ago a haiqta. Haiqqam. Na in i giholtuw bul ago nagahta. God ago gamuk tibilam,

On mataw God ago maror Moses bilamta na muzinad ago gunun akabiyan em bugid teq maror na qiqemid in God inaq dimunmo tuqos daqay ham. *Lo 18.5*

<sup>13</sup> Ta teq i bunmo God ago maror Moses bilamta na a hi muz bugim i bunmo timeqniyim osta. Teq i maror na itiyonim God ameb timeqniyim osta na ago mebay Kraim inmo ahol ugim sorim i gizayan i God ago maror kwaziqta na ahaqenib a ta hi osauqta. Kraim i gigo ban waqim in meqniy hasim osta. Na ezaqgo God ago gamuk bilam,

Mataw ayib qiqothenan turayta na bunmo God in kusluw negan in ameb timeqniy hasim osayta ham. *Lo 21.23*

<sup>14</sup> Nazaq iyan Kraim Yesus afaqan ayahta on mataw gidanin qwayim usta na waleman God Abraham dimun tonta nazaqmo in muran on mataw en ta asor Juda a haiqta nagan tigidimun tonaqmo. Gidimun tonsa

i on mataw Yesus anan helmo haqauqta na bunmo i God ago Bugaw Dimunta waqauqta, kwaziqmo God ignan hel diqmo bilamta nazaq.

*God ago maror Moses bilamta na gwahtiqaq in God Abraham gamuk hel diqmo bulonta na a hi walam*

<sup>15</sup> Ya imaqbaban, ya mataw gigo daq araq anan tibilaqnan. I gilikmanib mat araq a hi moqadmo nog diq in ago ahuran nagah waqdaqta na agamukan bunmo in wastitayim mar tonaqta. Mar tonim tumoqan abeb mat araq diq gamuk na a hi othasad teq in anadibmo gamuk ta araq samanta a hi emaqtamo. <sup>16</sup> Ari kwaziqmo God in Abraham teq Abraham anaynayin araq abeb teq gwahtiqaqta na inaq gidimun tonnan haqad in hel diqmo bilamta. Bilaqan gamuk na God ago marib tuqusaqta. Teq gamuk nab God bilam, 'Abraham anaynayin' nazaq in a hi bilam. In amun amulikmo anan bilaqad in 'Abraham anaynayinmo' ham. An Abraham anaynayin na Kraim-mo.

<sup>17</sup> Ari yaqgo gamuk nawa na alulin in kazaq. Mebmeb diqmo God in Abraham inaq an adugan wazim in hel diqmo bulonta. In gamuk na bilaqan abeb ulig 430 nazaq le tihiqiyan teq God ago maror Moses bilamta na tugwahtim. Gwahtiqaq maror na in God Abraham inaq an adugan wazta na eman samanta a hi iyaq. Haiqqam. Maror na in God ago gamuk amebta in hel diqmo Abraham bulonta na a hi walam. <sup>18</sup> Ari i God ago maror Moses bilamta na muzin buqeg ago os dimunta waqamta nazaq iyid teq i ginad kazaq em nag. God hel diqmo haqad ago os dimunta Abraham samanmo ugnan bilamta na le saman tiqiy haq nag. Teq haiq. God in ago os dimunta Abraham samanmo ugnan haqad gamuk hel diqmo bulonta.

<sup>19</sup> Ari nazaq iyan teq nagaqmo God ago maror Moses bilamta na gwahtim? Na in kazaq. God anad i gigo daq meqinta na ulal iydaq haqad in ago maror na agununin inaq abeb teq eman gwahtimta. Gwahtiqaq gunun na nazaqmo ussa le Abraham anaynayin in dimun tonnan hel diqmo bilamta na tugwahtiqaq haqad in anad amta. God ago gunun kwaziqta na angelo giqezab gwahtiqaq mat liqabmo turyaqta na waqim garahab gehitiqaq teq ago walmataw nagta. <sup>20</sup> Teq mat liqab turyaqta na akabiyan kazaq. Mat na mataw giger gilikmanib turad in araq ago gamuk waqim teq in araq na ugaqta. Teq God amulikmo iyim in ago gamuk hel diqta na inmo Abraham uqta. Nazaq iyan in Abraham gamuk uqta na in maror kwaziqta na uriyamta.

*God ago maror Moses bilamta na in i gimam giwarinta nog iyim in i giqad Kraiss ago hib lehaqta*

<sup>21</sup> Nazaq iyan God ago maror Moses bilamta na in God i gidimun tonnan hel diqmo bilamta agamukan na ago bab daqagya? Haiq kidik! God in gunun ara q i muzeq kayeqmo osamta na igid teq i bilaq nag, I God ago gunun naqmo muzinad in ameb on mataw titnonta iyauq haq nag. Nazaq iyid teq gunun na in God samanmo gidimun tonnan hel diqmo bilamta agamukan na wazid woq nag. <sup>22</sup> Teq haiq. God ago gunun Moses bilamta na in on mataw bunmo giqirquran in daq meqintamo ahaqenib osayta. Nazaq iysa iyan God mataw gidimun tonnan hel diqmo bilamta agamukan na in maror kwaziqta na agurmamnib a hi bolaqta. Haiqqam. Gamuk dimunta na i ginad helmo haqauqta agurmamnib bolaqta. Bolim in on mataw Yesu Kraiss anan helmo haqayta naqmo gigo hib anon emaqta.

<sup>23</sup> Ari Yesu anan helmo haqgo akaman na a hi gwahtiqsamo God ago maror Moses bilamta na in i giqirquran ossa le Yesu anan helmo haqgo adanteqin na ulalab tugwahtim. <sup>24</sup> Nazaq iyan God ago maror Moses bilamta na in i gimam giwarinta nog iyim in i giwamuzim ossa le Kraiss tugwahtim. Na ezaggo God anad i Kraiss anan helmo haqsa teq in i ginan on mataw titnonta haqdaq haqad in anad usta. <sup>25</sup> Ari muran i Kraiss anan helmo haqamta adan na tugwahti qan i gimam giwarinta na ahaqenib a ta hi osauq.

*I ginad helmo haqauqta naqmo i giqemam i God atatinz iyim osauqta*

<sup>26</sup> Ne bunmo Kraiss Yesu aholib soqotim inaq osad ne God atatinz tiqiyim osayta. <sup>27</sup> Na ezaggo ne Kraiss abinib yuw huzim ago dauhib gwahti qiyta nab ne God atatin Kraiss waqim giholsihen nog giholib eman ne gisan awaqan amo amo na tuqulilem nog iy. <sup>28</sup> Nazaq iyan ne gilikmanib Juda mat haiq teq Grik mat haiqmo. Ad ne gilikmanib kabibiy mat samanta haiq teq mat samanmo luw osaqta haiqmo. Ne gilikmanib mat haiq teq aw haiqmo. Muran ne bunmo Kraiss Yesu ago hib soqotim ne bunmo gihol ara qibmo tiqiyiy. <sup>29</sup> Ad ne Kraiss agota tiqiyim ne Abraham anaynaynizmo tiqiyim osaytamo. Nazaq iyan kwaziqmo God in Abraham anaynayniz nenaq gidimun tonnan hel diqmo bilamta agamukan na in ne gimem usaqtamo.

#### 4

*I bugaw meqinta gigo kabibiy mataw samanta nog ossa Kraiss gilumsihan i God atatinz tiqiy*

<sup>1</sup> Ari yaqgo gamuk alulin diq na ya kazaq bilaqdaiq. Amun aqenta amam ago nagah bunmo giwageq giwamuzdaqta. Nazaq iyan amam ago nagah nagan bunmo in amun aqenta na ago diqta. Amun na abin nazaqta teq in amun osad in bilaqen amam ago kabibiy mat samanta nog osaq. <sup>2</sup> Ossa mataw asor amun na wamuzad ginad dimunta ugsa in gihaqenib osad le amam kam anan bilamta nab in amam ago nagah na tigiwaqta.

<sup>3</sup> Teq i nazaqmo amun nog ossa bugaw meqmeqinta og ka ago daq wamuzayta nagan in i giqemam i in gigo kabibiy mataw samanta iyim osta. <sup>4</sup> Ossa God kam anan bilaqan usta na tugwahti qan kam nabmo in atatin eman tubol. Bolim in aw ara q agemab gwahti qan aw na eman in God ago maror Moses bilamta na ago akamnib gwahti qim maror na ahaqenib tuqos. <sup>5</sup> God anad in atatin leheq i on mataw maror kwaziqta na ahaqenib osauqta na gizayid i God atatinz diq iyeq osam haqad in atatin na eman og kab bolta.

<sup>6</sup> Nazaq iyan ne God atatinz tiqiyim iyan God in Atatin ago Bugaw eman i ne nenaq gigemab bolim osad in God lilewunim anan kazaq biyaqta, "O kabay," haqaq, "Ni ya imam" haqaqta. <sup>7</sup> Nazaq iyan ne kabibiy mataw samanta a ta hi iyay. Haiqqam. Ne God ago onnin tiqiyim osayta. Nazaq iyan God ago nagah dimdimunta in ago onnin diqta negdaqta na in ne inaqmo tinegdaqmo.

*Pol in Galesiya on mataw ginan anad ayahmo meqniy*

<sup>8</sup> Kwaziqmo ne God ago a hi huritsa og ka ago god katiyta nagan ne giqirquran ne in gihaqenib osad in gigo gunun akabananan kabemmo em yaqayta. Teq nagah nagan in god diq a haiqta. <sup>9</sup> Ari muran ne God diqta na ago tuhurit kemiy. Ta teq ya kazaq ne tigibilen kemnan. Danmeb God in ne gigo tuhuritan teq ne in ago huritiyta haqaiq. Nazaq iyan nagaqgo ne hureq hasim og ka ago bugaw na gigo hib muleqeq ta lehnan tonay? Bugaw meqinta nagan gigo zaway ayah diq haiqta teq in giholib nagah ara q ne gilumsihdaqta na haiqmo. Teq ta nagaqgo in ne a ta giqirquid ne in gihaqenib osad gigo kabibiy a ta eman ginad bilaqaq? <sup>10</sup> Muran ne Juda gigo maror muzinad ne kam teq kalam teq ulig nulinad teq ne zeq akaman teq urom akaman inaqmo anadin emad kam amulik-mulikmo na ago agununin bunmo ne muzin bugayta. Nabag ne ginad emay, I gunun muzinad God ameb titnonta iyauq haqay. <sup>11</sup> Ne nazaq emsa ya inad emaiq, Ya ne gilikmanib kabiy samanta em haqaiq. Haqad ya ne ginan inad ayahmo meqniyaq.

<sup>12</sup> Ya imaqbaban, ya ne ginan inad meqniysa kazaq gibilenaig, Ya osaiqta kazaq nogmo ne osiy haqaiq. Na ezaqgo kwaziqmo ya nenaq osad ya ne nogmo iyim osta. Ossa kam nab ne ya a hi imeqin toniy. <sup>13</sup> Ya nenaq osta na ne anadin ta emiy. Kam nab ya nenaq osnan inad a hi emta teq ya igo moq inaq iyim ya ime amebta ne nenaq osad Yesus awagamun dimunta gibilen. <sup>14</sup> Ya moqad ne gigo hib ossa ne ya iwamuzad giholtuw diq buliyta. Ta teq ne ya inan gituw a hi hiqiyisa gileh a hi yagiya. Haiqgam. God ago angelo araq ne gigo hib lehid ne wazineq alowan ton nagiyta nazaq nogmo diq ne ya ilowan toniy. Helmo, Kraiss Yesus-mo ne gigo hib le gwahtiqid ne gigem dimunta ugad wazin nagiyta nazaqmo ne ya ilowan toniyta. <sup>15</sup> Kam nab ne ya inan ginad bilaq naqmo hiqiyyaqta. Teq muran ne gigo ginad dimniy na edowa? Kam ya nenaq moqad osta nab ya ihol dimniyan haqad negmo gimeqnagin araq othaseq ya imeqnagnib emnan bilaqiyta. Ya ne helmo ginan bilaqaiq. <sup>16</sup> Ari muran ya ne ginad wastitaynan gamuk helta kazaq gibilensa ne ya inan i gigo bab haqay ye?

<sup>17</sup> Ne huritiy. Mataw ne gihureqnan haqad kagin negayta na in ne ginadin diq a hi emayta. Haiqgam. In ne gigel tonid ne ya gileh yagad teq ne in ginadin emad gimen giholtuw bul daqay haqad in soysoy na negayta. <sup>18</sup> Helmo. Ya nenaq osad ya imomo ne gimen iholtuw bulad gilumsihdaiqta na in dimun diq a haiq. Ya nenaq a hi ossa mataw ta asor in inaqmo ne gidimun tonnan haqad giholtuw bul daqayta na in dimunmo diq. Teq mataw nawa ne ginad hureqayta na in negmo diq ginadin a hi emayta. <sup>19</sup> Yaqgo onmin, ya ne gibibiyowunad ihol titiyaq, bilaqne aw amun emnan ahol titiyaqta nazaq nog. Ne bilaqne God ago amun Kraiss nogmo diq tugwahtiq hasid nab teq ya ihol titiyaqta ka tihiqiydaq. <sup>20</sup> Ya ne ginan inadnad diq tiqemaig. Ad ya kab pesanmo osad ya inad emaiq, Ya ne gigo hib nenaq osad teq ya gamuk awaz meqin ka huload kiskismo gibilen nagta haqaiq.

*Hagar ayow Sara inaq gigo gamuk awowun*

<sup>21</sup> Ne mataw God ago maror Moses bilamta na ahaqenib osnan ginad bilaqayta na ya susumun negid ne amenin emiy. Maror naqmo gibilensa ne hurit daqay ye? <sup>22</sup> God ago marib Abraham awagamun kazaq usaqta. In atatiniz giger osiyta na gigo araq anen kabibiy aw samanta. Sa araq na anen in aw samanmo anadibmo luw osyaqta. <sup>23</sup> Teq kabibiy aw samanta atatin na in mataw og kabta gigo daq

amalib gwahtimta. Ari aw samanmo luw osyaqta na in aw nignigta iyan in ago amun na God ago gamuk hel diqta in Abraham ugta naqmo amalib in gwahtimta. <sup>24</sup> Wagam ka amuganib gamuk awowunta usaq. On giger na in God ago maror kwaziqta Moses wamta na teq gamuk helta God Abraham bulonta na gitowun emiyta. Kabibiy aw samanta anan Hagar haqayta na in God ago maror garah Sainay-ib gwahtimta na atowun. In kabibiy awta iyim iyan ago onmin in giqemaqta na in kabibiy on mataw samanta iyim osaytamo. <sup>25</sup> Hagar in garah Sainay kantri Arebiya-ib turaqta na atowun. Teq in uliq Jerusalem muran usaqta na atowuntamo. Aw na ago onmin nenaq in muran kabibiy on mataw samanta iyim osayta. <sup>26</sup> Ari Jerusalem araq ulilib usaqta nab on mataw bunmo samanmo ginadibmo luw osayta. Uliq naqmo in i ginen diqta. <sup>27</sup> Na ezaqgo God ago mar kazaq bilam,

Ni aw amun a hi emad nignig iyim osaqta na ni ninad dimniyan ham. Aw ni amun emgo santitiy a hi loyinaqta na ni ninad dimniysa bar waz naqmo hiqiy ham. Na ezaqgo aw samanmo osaqta na ago onmin kabemmo diq iyim in aw aduw inaqta na ago onminta giquriyamayta ham. *Aisaya 54.1*

<sup>28</sup> Ya imaqbaban, ne aw samanmo luw osyaqta na atatin Aisak nogta. God ago gamuk in hel diqmo bilamta naqmo amalib ne in ago onmin tugwahtiqiyta. <sup>29</sup> Teq kwaziqmo Abraham ago amun og ka ago daqib gwahtimta na in amun God ago Bugaw Dimunta ago zawayib gwahtimta na meqin tonyaqta. An muran ne daq naqanta ahol tuwaqaymo. Mataw God ago maror Moses bilamta ahaqenib os tutayta na in ne afaqan negayta. <sup>30</sup> Teq God ago mar ezaq bilam? In bilam,

Kabibiy aw samanta na atatin inaq gimuzid lehiy ham. Na ezaqgo kabibiy aw samanta ago amunta na in aw samanmo luw osaqta ago amun na inaq gimamgo ahuran nagah araqqibmo a hi waq daqay ham. *Jenesis 21.10*

<sup>31</sup> Nazaq iyan ya imaqbaban, i kabibiy aw samanta ago onmin a haiq. Haiqgam. I aw samanmo luw osaqta ago onminta.

**I God ago maror Moses  
bilamta na ahaqenib  
giqirquran ossa Kraiss i  
giqamun na hasan muran  
God ago Bugaw Dimunta i  
gigo tur os wamuzsa i daq**

## **dindimunta gimaqbaban gigo hib emam**

### **5**

*I God ago maror Moses bilamta na ahaqenib a ta hi osad i samanmo luw osuq*

<sup>1</sup> Ari Krai asanad i samanmo luw osamta haqad in i giwaqan i Moses ago gunun i giqirquran osta na ahaqenib a ta hi osauqta. Nazaq iyan ne zaway diq iyeq turiy. Ad mataw ne a ta giqirquran tona ne in giqez othasad giholibmo hiqiyiy.

<sup>2</sup> Yaqmo Pol kazaq diq gibilensa ne gidek emeq hurit kemiy. Mataw na gihol abatan asan urotgo gibilensa ne giqez hi muziniy. Haiqmo diq. Ne maror kwaziqta na anan helmo haqad gisan urotid teq Krai ne gimen kabiy amta na a ta hi gilumsihdaq.

<sup>3</sup> Ne mataw gisan urotgo ginad emayta na ya ne bunmo a ta gibilen tonaiq. Ne nazaq ginad emad ne God ago maror Moses bilamta na ahaqenib tilehnan tonay. Nazaq ne emad ne maror na ago gunun amikmikta na bunmo tumuzin daqaymo.

<sup>4</sup> Ad ne ginad emay, I God ago maror Moses bilamta na ago gunun muzin bugeq teq i God ameb titnonta iyam haqayta na, ne bunmo gihol adanin qwayim Krai ago hib a ta hi soqotay. Ne God agem dimunta in samanmo negaqta na tuhulosiy. <sup>5</sup> Na ezaqgo i Bugaw Dimunta ago zawaymo amalib Krai asan helmo tihaqim i God ameb mataw titnonta tiqiy. Iyim God i gidimun tonnan bilamta nazaq diq in tiqemdaq haqad i baq tunim osad gihol husisiqaq. <sup>6</sup> Mat Krai Yesu inaq tisoqotta na anadib gisan urotayta na in nagah a haiq. Teq in anadib gisan a hi urotayta na in nagah a haiqmo. Mat na anadib mataw Krai asan helmo haqad teq in on mataw bunmo ginan ginad bilaqta naqmo in daq hel diqta.

<sup>7</sup> Kwaziqmo ne Krai asan muzad ne dimun diqmo sib yaqayta. Ta teq nog ne gigo dan qwayan ne gamuk helta na a ta hi muzinay? <sup>8</sup> God ne gililewunta na in ne ginad buliyan ne maror kwaziqta na a hi muznan tonay. Haiqgam. <sup>9</sup> Ne gamuk araq mataw bilaqad luwayta ka anadin emiy. Yis asitmo naqmo bret araq ahol bunmo eman huhuw nemaqta. <sup>10</sup> Teq ya inad emaiq Iyahta ne ginad wamuzsa ya inad usaq nazaq ne ginad tuqsdaqmo haqaiq. Sa mat nog ne ginad eman agadan iyaqta na in ago daq na amenin naw meqin diqta tuwaqdaq haqaiq.

<sup>11</sup> Ya imaqbaban, kwaziqmo ya mataw gihol abatan asan urotgo gibilenyaiqta. Teq muran ya nazaq a ta hi bilaqsa iyan Juda mataw bab yaqayta. Ari ya gisan urotgo bilaq tutsa teq Juda mataw muran ya a hi

imeqin ton nagiy. Ad ya Yesu ayib dom wolan momta agamukan a hi gibilensa in ya inan gigem a hi meqniy nagiy. <sup>12</sup> Mataw na ne gisan urotgo gibilenad in ne giritewu-nayta. Teq ya mataw na ginan inad kazaq emaiq. Mataw gisan urotgo giwaz meqniyayta na in gimo gihol abatan asan urotad in gihol abatan gikayogin inaqmo uroteq huneg nagiy mo haqaiq!

<sup>13</sup> Ya imaqbaban, God anad ne samanmo tiluw os daqay haqad in ne gililewunta. Teq luweq ne ginad em daqay, I gunun haiqmo osauq haqad ne giholmo anad tumuzin daqay. Haiqgam. Ne anan ginad bilaqsa an ulumsihad osiy. <sup>14</sup> Na ezaqgo God ago marib gamuk amulik kaqmo in God ago maror Moses bilamta na agamukan wol net bugaqta. Gamuk na bilam,

Ni ninmo nihol anan ninad bilaqta nazaqmo ni niyow anan ninad bilaqan ham. *Wok Pris 19.18*

<sup>15</sup> Ari ne an mugad an meqin tonad osad teq ne gihol waziy. Ne bunmo araqibmo tihiqiy daqay.

*God ago Bugaw Dimunta ago daq teq gigem kwaziqta ago daq*

<sup>16</sup> Teq yaqmo kazaq diq ne gibilenaq. God ago Bugaw Dimunta dan giqisihunsa ne lehiy haqaiq. Ne nazaq emad teq ginad meqinta bolsa ne a hi muzin daqay. <sup>17</sup> Na ezaqgo i ginad meqinta gwahtiqayta na in God ago Bugaw Dimunta anad nog a haiqta. Sa God ago Bugaw Dimunta anad in ne gigem kwaziqta na anad nog a haiqmo. In gigermo an geg ugsa ne daq asor emnan ginad bilaqta na a hi emayta. <sup>18</sup> Ari Bugaw Dimunta dan giqisihuneq giqad lehid teq ne God ago maror Moses bilamta na ahaqenib a ta hi os daqay.

<sup>19</sup> Gigem kwaziqta ago adan na ulalab usaqta. Ni an haresmo hureqim inaq usaqta na teq ni daq anumlan inaq emaqta na teq ni nimebay haiqmo daq haresmo emaqta na, <sup>20</sup> teq ni god katiyta muzinaqta na teq ni liqiy tagum emaqta na teq ni mataw bab negaqta na teq ni mataw ne-naq an mugaqta na teq mat araq ago os dimniysa ni ahol waqad nigem meqniyaqta na teq ni nigem meqinta mataw negaqta na teq ni ninmo nihol anadin emaqta na teq ni mataw bunmo gigo gamuk geg ugaqta na teq ni mataw gihuseraqta na, <sup>21</sup> teq ni mat araq ago nagah dindimunta utetaqta na teq ni yuw atoranta uluwim nifaqin hulosaqta na teq ni niyogniz nenaq yuw uluwad daq hares emaqta na teq daq naqanta kabemmo i gigem kwaziqta na giqeman gwahtiqayta. Kwaziqmo ya ne gidek wazta nazaqmo ya ne gidek a ta wazim kazaq ne gibilenaq. On mataw daq meqinta nagan emayta na bunmo in God

ago maror aduganib le a hi gwahtiq daqay haqaiq.

<sup>22</sup> Ari God ago Bugaw Dimunta in daq kazaq eman i giholib gwahtiqaqta. Ni on mataw ginan ninad diq bilaqayta na teq ni ninad dimniysa osaqta na teq ni nigem kute nems a osaqta na teq ni hidmo nigem a hi meqniyaqta na teq ni mataw gilowan tonaqta na teq ni daq dimunta emaqta na teq ni gamuk bilamta nazaqmo diq ni emaqta na, <sup>23</sup> teq ni mataw nenaq kiskismo osaqta na teq ni ninad in nihol anononmo wamuzaqta na, daq nagan bunmo Bugaw Dimunta giqeman i giholib gwahtiqayta. Gunun araq diq daq nagan giwasihdaqta na haigqam. <sup>24</sup> Teq Krai Yesu ago on mataw bunmo in gigo gigem kwaziqta na ayib dom wolani in ago zaway alulin tihiqiy. Hiqiyani mataw na ginad meqinta bolsi in daq meqinta haresmo emnan ginad em yaqayta na tihiqiyimo.

<sup>25</sup> God ago Bugaw Dimunta i giqeman i kayeqmo osauqta. Nazaq iyan Bugaw Dimunta dan giqisihunad giqad lehsa i muzineq inaq lehmo lehuq. <sup>26</sup> Leahd i gihol abin hi iluwuq. Ad i an agem hi ulumad i ango nagah hi utetuq.

## 6

*Ni naga didaqin amagin leyaqta naqmo anon ni tuwaqdaq*

<sup>1</sup> Ya imaqbaban, mat araq daq meqinta emid ne mataw God ago Bugaw Dimunta inaq luwayta na ahol waqad ne mat na inaq midemqanmo ago daq na wastitayiy. Ad negmo gihol asawan woltayiyimo. Luweq mat na ago daq meqinta na ne gilum waqid ne inaqmo woq daqaymo. <sup>2</sup> Ne nazaq an ulumsihad mat araq aholib afaqan gwah-tiqsa ne bunmo agerab loqeq inaq garabmo afaqan na soriy. Daq nazaq ne emad teq ne maror Krai igta na tuwol net bug daqay. <sup>3</sup> Na ezaqgo i bunmo gigo zaway haiqta. Nazaq iyan mat nog anad emad bilaqay. Ya asittaqmo haqayta, mat na inmo ahol kat ugaqta. <sup>4</sup> Ningo kabiy daq ni emaqta na bunmo ni ulum kemad dimun meqin na ni ahol waq kem. Ahol waq kemad ni niyow ago kabiy hi ulum kem. Na ningo nagah a haiq. Ni ninmo ningo luw os anadin em. Ne bunmo nazaq emeq teq ne gihol abin iluw daqayta na alulin negmo giholib usdaq. <sup>5</sup> Na ezaqgo on mataw amulik-mulikmo gigo kabiy in em daqayta naqmo in tiqem daqay.

<sup>6</sup> Mat God ago gamuk asuleqin waqayta na in ago nagah dimdimunta inaq na asor husereq suleq anamren ugan.

<sup>7</sup> Ne gihol hi kat ugiy. God in mat araq ago kamolmol a haiqta. Mat araq ago kabiyab naga didaqin leyaqta na in didaq

naqmo anon tayim waqayta. <sup>8</sup> Mat agem kwaziqta anad muzinad daq emsa teq in ago daq na aholib anon emsa mat na ahol meqniyeq tumoqdaq. Ari mat God ago Bugaw Dimunta muzinad daq emsa teq Bugaw Dimunta mat na emid in kayeqmo kuluwa-kuluwmo tuqosdaq. <sup>9</sup> Teq i kabiy dimunta emad gihol husisiqsa gituw hi hiqiyani. I kabiy dimunta emgo gidan sosil a hi iyid teq didaq waqgo akamnib i gigo kabiy dimunta na anon kabemmo tuwaqam. <sup>10</sup> Nazaq iyan kam bunmo i daq dimunta emgo adanteqin inaq iyadmo i on mataw bunmo gigo hib daq dimunta emuq. Ad i gimaqbaban helmo haqayta na ginadin emad gidimun tonuq.

*Kraisi ayib dom wolani momta na ago Pol anadin emad anad ayahmo dimniy*

<sup>11</sup> Mar aseseqta yaqmo ihol abenan ne gimen mar tonta ka ne ahol waqiy.

<sup>12</sup> Mataw nawa ne gihol abatan asan urotnan bilaqayta na in nagaggo nazaq emay? In gihol abin ayahta waqgo haqad daq nazaq emayta. Ad in kazaq ginad emay. Luweq i Kraisi ayib dom wolani momta na adan diq muzinsa Juda mataw gisan urotayta na in afaqan ig daqay haqayta. <sup>13</sup> Mataw gisan urotayta na in God ago maror Moses bilamta na anonon a hi muzin bugayta. Ta teq in ne gisan uroteq ne giqumnibmo in gibin emid ayahmo iydaq haqad in nazaq emayta. <sup>14</sup> Teq ya nagah araq ago hib ibin dimunta waqnan ituw hikidik iyaq! I gigo Iyahta Yesu Kraisi ayib dom wolani momta naqmo ago hib ya ibin dimunta waqgo inad bilaqay. Ay nab og ka ago anad meqinta ya iholib usta na moqad in ya inad hureqgo azawayin na inaqmo tumommo. <sup>15</sup> Gihol abatan asan urotgo adan na in nagah diq a haiqta. Teq mat asan a hi urotayta na nazaqmo in nagah diq a haiqtamo. God i giqeman i mat muturta iyim osauqta naqmo in nagah heltaqmo. <sup>16</sup> Ya inad on mataw ginad ya inad nog usaqta na bunmo gigem kiskis iysa God in ginan anad meqniyan haqaiq. On mataw naqmo in God ago on mataw Isrel-mo diq iyim osayta.

<sup>17</sup> Ya Yesu asen muzad ago kabiy emsa mataw ya inoliyta na abatlan ya isanib kawa usaqta. Nazaq iyan muran teq abeb mat araq in afaqan araq ta hi yagan.

<sup>18</sup> Ya imaqbaban, I gigo Iyahta Yesu Kraisi agem dimunta negsa ne osiy. Hel diqtaqmo.

**Efesus**  
**Sansandek Pol mar tonan**  
**uliy Efesus-ib lahta**  
**Gamuk ameb lehaqta**

Pol bit gicirquran osaytab osad in sansandek ka mar tonta (Efesus 3.1; 4.1). Mar tonim in mat anan Tikikus haqay na ugan in waqim ad uliy Efesus-ib tilah (Efesus 6.21-22). Teq mataw asor gamuk ka anan ginad emay, Pol anad on mataw uliy Efesus-ibta na gamuk ka ahol waqeq teq in Yesus ago dauh uliy sinsin usayta nagab em lehid in ahol tuwaq daqaymo haqad in mar tonta haqay.

Sansandek ka ago asor gigerta na in kazaq: Efesus 1-3 teq Efesus 4-6. Asor danmebta nab Pol bilam, God in atatin Yesus Kraiss amalib Juda on mataw teq on mataw en ta asor Juda a haiqta nagan bunmo inaqmo ayahmo gidimun tonta ham. In Kraiss eman bolim in on mataw bunmo giyon ahol nog hulosan muran on mataw Kraiss aholib soqotim inaq osayta na bunmo in bilaqne on mataw en amulikmota tiqiyiy ham. In gilikmanib an geg ug na tihiqiyian in bunmo gigem araqibmo tiqiyim osay ham. Teq sansandek ka ago asor gigerta nab Pol kazaq bilam, Kraiss ago on mataw ginad amulikmo ussa in an alowan tonad teq in gigo os kwaziqta na gileh ugad in God ago daq titnonta naqmo tumuzin daqay ham.

Teq Pol in Kraiss ago on mataw ned amo amo na gicisihunid in en amulikmo tiqiyiyta na ago ginad em daqay haqad in gamuk awowun kazaq gibilan, God ago on mataw bunmo in God ago bit anon nog iysa Kraiss in tituq liqab diqta nog iyim bit na anon bunmo soraqta ham (Efesus 2.19-22). Sa on mataw na gihol amulikmo iysa Kraiss in gihol na ago afaqin ham (Efesus 4.1-16). Teq on mataw na bilaqne aw aduw ahaqenib os nog iysa Kraiss in aw na aduw nog osaq ham (Efesus 5.22-32).

**God Kraiss eman bolim i**  
**gimen dante wastitayan i on**  
**mataw muturta tiqiy**

<sup>1</sup> Ari yaqmo Pol. God-mo anad bilaqan ya Kraiss Yesus ago Aposel iyta. Ya sansandek ka God ago on mataw tawonta uliy Efesus-ib Kraiss Yesus ago nan huritad muzinayta na gimen mar tonim eman leh neqaq.

<sup>2</sup> I Gimam God teq i gigo Iyahta Yesus Kraiss inaq in gigem dimunta negad in ne gigem emid kiskismo usan.

*Kraiss i gimen kabiy amta na amalib God i ayahmo gidimun ton*

<sup>3</sup> I God abin iluwuq. In i gigo Iyahta Yesus Kraiss ago God teq in Yesus Amamtamo. In i giqeman i Kraiss aholib soqotim inaq ossa in i giwitan gidimun tonim ago os dimunta Heven-ib usaqta na tiqig bug. <sup>4</sup> Na in kazaq. Kwaziq diqmo God og ka a hi emadmo in i Yesus inaq soqoteq osamta na ago tibilaqan usta. In i ginan anad am, In Yesus inaq soqoteq teq in ya imeb yaqgo on mataw tawonta iyeq os daqay ham. Osad daq araq ananin waq daqayta in giholib haiq iysa in ya inan ginad diq bilaqsa os daqay ham. God i gimen daq nazaq diq tiqem igdaq haqad in aholyon i gitowun tiqamta.

<sup>5</sup> Gitowun emim in Yesus Kraiss ago kabiy amalib i giwarinan i inmo ago onmin tugwahtiw, in kwaziqmo anad bilaqan usta nazaq. <sup>6</sup> God in atatin Yesus anan anad diq bilaqsa in agem dimunta ugaqta. Nazaq iyan i Yesus inaq soqotim ossa God agem dimunta atatin ugaqta nazaqmo in agem dimunta samanmo naw nog i igaqta. Igsa i in ago agem dimunta ayahmo igaqta na anadin emad i abin iluwauqta.

<sup>7</sup> Yesus Kraiss inmo ahol anedan hulosis i gizayim giwamta. Giwaqan muran i in aholib soqotim inaq ossa in anedan na i gigo daq meqinta tisuhol bugan God in anadin a ta hi emaqta. God agem dimunta ignan haqad in nazaq i gimen dante dimun diqta na am. <sup>8-9</sup> Emad in agem dimunta nawa na ayahmo diq igan giyunin bugan i ginad thastitay. Hastitayan God anad ulilemim usta na in i gicisihunan i ginad tiqem has. Na ezaqgo God i gilumsihnan anad bilamta na Kraiss ago hib ulal iysa i ahol waqim God anad ulilemabta na ago tuhuri. <sup>10</sup> Teq God anad na in kazaq. In nagah bunmo giwamuzad dan ugeq ugeq le in anad usaqta nazaqmo in tugwahtiq bugdaq. Gwahtiq bugid nab teq nagah bunmo Heven-ibta teq ogibta inaqmo in Kraiss ahaqenib iyeq wastitayeqmo tuqos bug daqay.

<sup>11-12</sup> God nagah bun diqmo giwamuzad giqemsa in tekomo anad tiqamta nazaqmo diq in gwahtiqayta. Ad kwaziqmo in anad am, Juda on mataw teq danmeb Kraiss anan helmo haqsa ya iholyon giwaqid in yaqgo on matawmo diq iyeq tuqos daqay ham. Osad ya in gidimun tonta na ago in anadin emad in tuteqmo ya ibin tiqiluw daqay ham. Nazaq iyan God in i Juda asor ginan anad amta nazaqmo in bilaqan i in anad na muzinin danmeb Kraiss anan helmo tihawta.

<sup>13</sup> Ari ne on mataw Juda a haiqta na, ne inaqmo Yesus awagamun dimunta na tuhuritiymo. Ne God ago gamuk helta na



huritim ginad emiy, God i inaqmo tigiwaqdaq haqad ne Krai anan helmo tihaqiy. Haqad ne Krai inaq soqotim ossa God in ago Bugaw Dimunta ne tinag, in ago on mataw bunmo negnan hel diqmo bilamta nazaq. Negan ne ginad emay, Helmo, i God ago on matawmo diq tiqiyim osauqta haqay. <sup>14</sup> I Yesus anan helmo haqauqta na bunmo i God ago Bugaw Dimunta tuwawta. Waqim inaq osad i ginad emauq, God ago Bugaw i giholib usaqta ka in God ago os dimunta in teq igdaqta na atowun nog i giholib usaqta haqauq. God ago Bugaw Dimunta ka i giholib ussa le God i giwaqid i in ago on mataw tiqiy hasamta haqauq. Haqad God i gidimun tonta na i anadin emad abin tutimmo iluwaqta.

*God Efesus on mataw ginad emid hastitaydaq haqad Pol in bulon*

<sup>15</sup> Ari mataw ne givin kazaq bilaqsa ya huritta. Ne Iyahta Yesus anan helmo haqad ne God ago on mataw tawonta na bunmo ginan ginad bilaqta. <sup>16</sup> Ya ne givin nazaq huritim tutimmo ya God inaq gamuk emad esey ugaqta. <sup>17</sup> I gigo Iyahta Yesus Krai ago God in i Gimam iyim uliq Heven-ib abin teq ahol anuwan ayahta inaq osaqta. Nazaq iyan ya in inaq gamuk emad ya ne ginadin emad kazaq bulonaiq, God haqaiq ni ninad dimunta Efesus on mataw na negsa in ginad awaz meqniyan haqaiq. Awaz meqniysa ni ningo gamuk alulin ulilemim usaqta na emid in gimeb ulal iysa in ningo hurit hasiy haqaiq. <sup>18</sup> Ad ni in ginad emid hastitayanmo haqaiq. Hastitaysa ni in giwaqeq gidimun tonnan haqad gililewunta na ago in ginad emiy haqaiq. Ginad emad in ningo os dimunta abin inaqta na ago huritiy haqaiq. Ningo on mataw tawonta bunmo in ningo os dimunta na tuwaqim in mataw ginaghan inaqta nog iyim osayta haqaiq. <sup>19</sup> Teq ya God kazaq bulonaiqmo, Efesus mataw na in ningo zaway awaz meqinta i on mataw ni ninan helmo haqauqta giholib kabiy emaqta na ago in loyiniymo haqaiq. Loyinad ningo zaway in nagah ayah diqmo iyan in a hi ulum kem daqayta na ago in ginad em hasiymo haqaiq.

<sup>20</sup> Zaway naqmo kwaziqmo Krai aholib kabiy eman in hodhodab usim ta eramta. Eraqan God ago zaway naqmo Krai eman in Heven-ib gwalehim God aben aqabun ban tuqos woqim osaqta. <sup>21</sup> Osad muran in bugaw aseseqta zaway amo amo wazayta nagan teq angelo giwaz meqmeqinta maror nog iyim ulilib osayta nagan bunmo giquriyamim in ulilibmo diq osaqta. Osad in nagah aseseqta givin inaqta nagan bunmo giquriyamad kam muturta teq gwahtiqaqta nab in abin nazaqmo

tuqos tutdaqta. <sup>22</sup> God in on mataw Krai ago nan huritayta na ginadin emad in nagah bunmo giqeman Krai ahaqenib tiqiy bugsa in Krai eman nagah na bunmo gifaqin tiqiy. <sup>23</sup> Teq on mataw Krai ago nan huritayta na in Krai anon iyim in Krai ahol bunmo iyim osayta. Sa Kraismo in og kait inaq giwaleq ton bugim osaqta.

## 2

*God i giqeman i Krai inaq kayeqmo osauqta*

<sup>1</sup> Kwaziqmo ne God ago gunun itiyonad daq meqinta haresmo emsa ne gigo daq meqinta naqmo ne ginol eman ne giwitan God ameb tumoqim us. <sup>2</sup> Kam nab ne og ka ago gunun haresmo muzinad ne bugaw meqinta kaitab ulilib luwayta gigo gifaqin na anad muzin yaqaytamo. Bugaw meqinta danmebta na ago zaway awaz meqinta in mataw nan a hi huritayta na gigemab kabiy emad gibe yahsa in God aqez othasayta. <sup>3</sup> Kwaziqmo i bunmo nan a hi huritad ginad meqinta gwahtiqa i muzmo muzinyauqta. Muzinad i giholmo i ginad wamuzsa i gigem kwaziqta naqmo ago adan muzinyauqta. I nazaq diq iyim ginenan gigemab hitiqan iyan God i ginan agem meqniyyaqta, in on mataw nan othasayta bunmo ginan agem meqniyyaqta nazaq.

<sup>4-5</sup> Helmo i gigo daq meqinta naqmo i ginol eman i bilaqne mataw tumowta os nog iyyauqta. Teq God i ginan anad bilaq naqmo hiqiysa in i ginan anad ayahmo meqniyyaq. Nazaq iyan in Krai eman kayeq iyta nab in i giqeman i Krai inaq kayeq tiqiyimo. (Na God anadibmo agem dimunta negim in nazaq ne gilumsihim giwamta.) <sup>6</sup> Ari i Krai inaq araqibmo kayeq tiqian God in i Krai Yesus inaq giwazan tiqeraw. Eraqan in i giqeman i Krai aholib soqotim inaq ulilib Heven-ib tuqos nog iyaq. <sup>7</sup> God agem dimunta ayahmo igad in Krai Yesus ago kabiy naqmo amalib i gilowan diq tonta. In anad abeb kam muturta nab in ayahmo i gidimun tonta na in on mataw bunmo giqisihunnan haqad in nazaq amta. <sup>8</sup> Na in kazaq. God agem dimunta negan ne Krai anan helmo haqan in ne gilumsihim giwamta. Daq nawa na negmo gigo zawayib ne eman a hi gwahtimta. Haiqqam. God anadibmo samanmo ne gilumsihim giwamta. <sup>9</sup> Teq ne giholtuw bulad kabiy daq dimdimunta emiyta na ago amenin in ne gilumsihim giwamta nazaq a haiqmo. Nazaq iyan mat araq inmo ahol abin wazid

eraqdaqta adanteqin haiq tiqiy. <sup>10</sup> Godmo i gıqeman i mataw muturta iyim osauqta. I in ago kabiy daq dimdimunta emad luwamta haqad in i gıqeman i Kraıs Yesus aholib soqotim inaq tuqosauq. God anad i in ago kabiy dimdimunta na emad osamta haqad in kwaziqmo i gıbinib kabiy na tuwastitayan usta.

*Krais in Juda mataw teq mataw en ta asor Juda a haiqta nagan bunmo inaqmo giqeman in mataw en amulikmo tiqiyiy*

<sup>11</sup> Ari ne on mataw Juda a haiqta na ne ginad emiy. Ne gısesan gilulib gwahtiqim ne in gigo maror ahaqenib osayta. Ari Juda matawta na nazaqmo in gısesan gigo maror ahaqenib osad in gihol abatan asan urotayta. Ad in ne gıbin wazan woqsa ginan bilaqay, Mataw gısan a hi urotayta haqay. Teq daq na in gıbenabmo eman gısanib gwahtıaqta. <sup>12</sup> Ad kwaziqmo ne Kraıs abin a hi hurit yaqayta na ne anadin emiyimo. Kam nab ne Kraıs ago hib pesan diqmo os yaqayta. Osad ne Isrel gigo maror aduganib a hi os yaqay. Ad God in Isrel gısesan nenaq an adugan wazad in giwamuzeq gidimun tonnan hel diqmo gibılensa ne asan ban os yaqay. Nazaq iyan God teq ne gilumsihdaqta nazaq ne ginad a hi em yaqay. Sa God ne gıholib hiqıyan ne og kab dante haresmo samanta muzad luw yaqay.

<sup>13</sup> Kwaziqmo ne God ago hib pesanmo diq osiyta. Ari muran Kraıs moqan anedan womta na amalib God ne gıqeman ne Kraıs Yesus inaq soqotim osad ne God agerabmo diq tuqosayta. <sup>14</sup> Na in kazaq. Juda mataw in mataw en ta asor Juda a haiqta nagan bunmo nenaq an geg ugayta. An geg ugsa daq na gıgel tonan in gımi gımo iyim araıqımo a hi osayta. Teq Kraıs inmo ahol anedan amalib gel na wolbiyayan mataw na gilikmanib bab usta na tihiqiy bug. Hiqiy bugan Kraıs in mataw na bunmo giwastonan in mataw en amulikmo tiqiyiy.

<sup>15</sup> Kraıs i gımen ahol nog hulosta nab in God ago maror Moses bilamta na aduganib gunun amikmikta gıqusta na gimuzan maror kwaziqta na akaman tihiqiy. In nazaq emim in mataw en bunmo inmo aholib giwastonan in mataw en muturta amulikmo tiqiyim in bab huload araıqımo tuqosay. <sup>16</sup> Na in kazaq. Kraıs inmo ahol amalib on mataw en bunmo giwastonim in gigo ban wam. Waqan mataw ayib dom wolan in moqim on mataw na bunmo gıbinib God inaq an anobun tuwastitayiy. In daq nazaq emim in mataw en bunmo gilikmanib an geg usta na wol eman tihiqiy. <sup>17</sup> Hiqıyan in ago kabıbiy mataw gıqeman in lehim bab tihiqiyta na agamukan ne mataw pesanmo

osiyta na gibilenad in mataw sinsin osiyta na tigıbileniymo. <sup>18</sup> Na ezaqgo Kraıs in i on mataw bunmo gımen dante wastitayan muran God ago Bugaw amulik naqmo i bunmo gilumsihsa i araıqımo Gimam Iyah agerab loqauqta.

*Krais ago on mataw bunmo in God ago bit nogta*

<sup>19</sup> Nazaq iyan muran ne God ago maror asan ban iyim mataw begbegta og saw haresmo luw yaqayta nazaq ne a ta hi luway. Haiqgam. Ne God ago on mataw tawonta na bunmo nenaq araıqımo God ago maror aduganib tugwahtiqim ne in asenlulmo diq tiqiyim osayta. <sup>20</sup> Ne bilaqne God aholyon bit amta nazaq nog. Sa God ago Aposel teq in ago nantut nagan in bilaqne tituq gan nog iysa God in gımalib ago bit na wazan tıgeraqay. Sa Kraıs Yesus in bit na ago tituq liqab diqta iyim in bit na anon bunmo tısoraq. <sup>21</sup> Sorsa bit na aditin bunmo Kraıs aholib soqotim ussa Iyahta Kraıs-mo in bit na ulum tutsa in ayah iyad God ago bit tawonta nog tiqıyaq. <sup>22</sup> Sa ne inaqmo Kraıs Yesus ago hib soqotan in ne giwaqim Juda on mataw na nenaq girom tonan ne bunmo God ago bit in ago Bugaw Dimunta bo osaqta na tiqıyiy.

### 3

*Pol ago kabiy in Yesus awagamun dimunta on mataw en ta asor Juda a haiqta nagan gibılenaqta*

<sup>1</sup> Daq alulin nazaq iysa iyan yaqmo Pol ya ne on mataw Juda a haiqta na gilumsihnan haqad Kraıs Yesus ago gamuk gibılenaqta. Teq ya kabiy naqmo emsa mataw ya iwazim iqırquran ya bit kab tuqosaiq. <sup>2</sup> Nabag ne yaqgo tuhuritiyta. God on mataw en ta asor Juda a haiqta nagan inaqmo gilumsihna agamukan na in ya yagan ya gamuk na wamuzad ne gibılenaqta. <sup>3</sup> Gamuk na kwaziqmo ulilemim usta. Teq God eman yaqgo hib ulal iyan ya ago tuhurit. Huritım ya gamuk na asıtmo nawa ne gımen mar tonan ne ahol tuwaqiy.

<sup>4</sup> Kraıs boleq on mataw en bunmo gilumsihdaqta na agamukan ulilemim usta. Teq ya ne gımen gamuk nawa mar tonta na ne ahol tuwaqeq teq ya Kraıs ago kabiy alulin hurit kenta nazaq ne ginad tiqem has daqaymo. <sup>5</sup> Kwaziqmo God gamuk na ulileman ussa in mataw a hi gibılennyaq. Ari muran God ago Bugaw Dimunta in God ago Aposel tawonta na teq in ago nantut tawonta na gamuk ulilemabta na tigıbilan. <sup>6</sup> Gamuk na kazaq bilam, On mataw en ta asor Juda a haiqta nagan in Juda mataw nenaq araıqımo Yesus awagamun dimunta tuwaqim in bunmo araıqımo Gimam God atatniz tiqiyim osayta ham. Osad

in bunmo mataw en amulikmo iyim in bunmo Kraiss anon amulikmo tiqiyimo ham. Iyan God in Kraiss Yesus amalib on mataw gidimun tonnan haqad hel diqmo bilamta agamukan na in muran Kraiss ago on mataw bunmo gigota tiqiy ham.

<sup>7</sup> God ya itowun emim agem dimunta yagad in ago zaway ya iholib tiqam. Eman zaway na amalib ya Yesus awagamun dimunta na akabiyani emaiqta. <sup>8</sup> God ago on mataw tawonta na bunmo gilikmanib ya ibin amik diq usaqta. Ta teq God kabiy dimunta na samanmo naw nog yag. Kabiy na ya on mataw en ta asor Juda a haiqta nagan gibilenid Kraiss in gilumsihtha na ago in hurit daqayta. Teq Kraiss i gilumsihtha na in nagan ayah diqmo iyan i a hi ulum kemamta. <sup>9</sup> God nagan bunmo giqeman osayta. Ad in on mataw en ta asor Juda a haiqta nagan gilumsihgo anad usta na in isihan kam sisaqmo diq ulilemim usta. Teq muran ya in anad ulilemim usta na ulalabmo bilaqsa on mataw en bunmo tuhurit kemayta. <sup>10</sup> Nazaq iysa iyan on mataw Yesus ago nan huritad abin sorsa God anad dimdimunta amo amo na in gigo hib ulal tiqiyay. Ulal iysa Heven-ib angelo giwaz meqinta maror gan osayta na teq bugaw aseseqta givin inaqta nagan bunmo in tuhurit kemaymo.

<sup>11</sup> Kwaziq diqmo God daq nazaq emnan haqad anad emad osta. Ossa muran i gigo Iyahta Kraiss Yesus gwahtiqim in God anad na tuwol net bug. <sup>12</sup> I Kraiss anan helmo haqad aholib soqotim inaq osad i God agerab loqnan a hi rabauqta. Haiqqam. Muran i God anognib gwahtiqsa nagan araq i gidanin a hi qwayaq. <sup>13</sup> Nazaq iyan muran ya ne gibilenaiq. Ya ne gilumsihad santitiy soraiqta ka luweq ne ya ibiyad gidan sosil iydaq haqaiq. Haiqqam. Ne ya inan ginad dimniyan. Ya ne gimen afaqan ka sorsa God ago hib ne givin inaq tiqiyay. Gibin inaq iyeq abeb teq ne le tugwahtiqeq dimunmo tuqos daqay.

*Kraiss ago on mataw Efesus-ib osayta na giwaz meqniyeq tur daqay haqad Pol in gimen God bulon*

<sup>14</sup> I Gimam Iyahta ne gilumsih naqmo hiqiyta na ya anadin emad ya in ayon ibakbakan ulum laquwaiqta. <sup>15</sup> In on mataw Heven-ib teq og kab osayta na bunmo Gimamta teq inmo bilaqan on mataw en bunmo in gimo gimaman og kabta gihagenib osaytamo. <sup>16</sup> Ya in ayon ibakbakan ulum laquwim turad ya ne gimen kazaq God bulonaiqta. God haqaiq ni nibin teq ningo zaway ayahmo usaqta nazaqmo ni Efesus on mataw na ayahmo gilumsihmo haqaiq. Gilumsihad ni ningo Bugaw emid le in giduganib usad in ginad gigem inaq

emid awaz meqniyan haqaiq. <sup>17</sup> Awaz meqniysa on mataw na Kraiss anan helmo haqsa Kraiss in gimuganib osanmo haqaiq. Sa Kraiss in ginan anad bilaqta na in loyinnad giwaz meqniyeq turiy haqaiq. Bilaqne ay aninin og aduganib wolehim og waz naqmo hiqiyta ay na zaway iyim turaqta nazaq nog haqaiq. <sup>18-19</sup> Nazaq iyeq teq Kraiss agem dimunta negaqta na in loyin kemiy haqaiq, ningo on mataw tawonta bunmo loyinaqta nazaq haqaiq. Loyinsa Kraiss i ginan anad bilaqta na in nagan ayah diqmo iyim ago sisaq pesanmo lehaqta na ago in ginad emiy haqaiq. Teq nagan na ulilibmo diq gwalehim abeqar ogibmo diq wolehaqta na ago in hurit kemiy haqaiq. Hurit kemeq Kraiss ago daq na ayah diqmo iyim i ginad bunmo uriyamta nazaq in ginad emiyimo haqaiq. Efesus on mataw na in nazaq diqta iyid teq ningo daq teq ninad dimdimunta nagan bunmo in giholib ate gwaleq usan haqaiq.

<sup>20</sup> Ari God ago zaway i gigemab kabiy emaqta na amalib in i gidimun diq tonaqta. Teq i ginad emad susumun ugauqta na in i igad in nagan asor i anadin a hi emta inaqmo em igaqtam. Igsa i nulingo biyab haiq. <sup>21</sup> Nazaq iyan kam bunmo tuteqmo on mataw Kraiss ago nan huritayta na in God abin iluwiy. Sa God in Kraiss Yesus ago hib abin ayahta waqanmo. Waqsa daq na muran useq le on mataw gidauhan abeb teq gwahtiq daqay na gigo kamub iyeq in nazaqmo leh tutan. Hel diqtaqmo.

## **I Kraiss anon nog iyim osad God ago daq dimdimunta naqmo i emuq**

### 4

*Kraiss ago on matawta na bunmo in Kraiss anon*

<sup>1</sup> Yaqmo Pol, ya Iyahta ago kabiy emaiqta na ago ya iqirquran osaiqta. Osad ya atoranmo kazaq ne gibilenaiq. God ne gililewunan ne in agota tiqiyim osayta haqaiq. Nazaq iyan ne anonon diqmo luw osad ne gigo daq bunmo in God ago liley na inaq rirneqmo usan. <sup>2</sup> Ne gihol wazid woqsa daq kiskistaqmo giyogniz gigo hib emiy. Emsa giyow araq ne gimeqin tonid ne gigem hidmo hi meqniyan. Haiqqam. Ne an alowan tonad an anan ginad bilaqsa osiy. <sup>3</sup> Sa God ago Bugaw Dimunta anad dimunta negsa ne gigem amulikmo iyeq osiy. Osad ne giholtuw bulad zib alowab osgo adan muziniy. Muzinsa daq na bilaqne am nog ne giqirquid ne mataw en amulikmo iyeq osiy.

<sup>4</sup>Krais anon amulikmo usaqta. Sa Bugaw Dimunta in amulikmo osagtamo. Ad nazaqmo God ne gililewunan ne in ago on mataw bunmo nenaq wastonim ne bunmo araqibmo God teq gidimun tondaqta na amen emim osayta. <sup>5</sup>Teq i gigo Iyahta amulikmo osagtamo. Ossa i bunmo God ago gamuk helmota amulikmo wazad i bunmo daq amulikmo muzinim Krais abinib yuw huzauqtamo. <sup>6</sup>Teq God amulikmoqmo osad in i bunmo Gimamta. In ago on mataw bunmo inmo ahaqenib iysa in giwamuzaqta. Giwamuza in gigo kabiy daq bunmo inmo anad muzinaqta. Sa in ago on mataw na bunmo gilikmanib in nenaq osagtamo.

<sup>7</sup>I bunmo God ahaqenib araqibmo iyim osauqta. Ta teq Krais in ago zaway araqibmo a hi igaqta. Haiqqam. In anad emad zaway ezaqta in igdaqta naqmo in i amulik-mulikmo naw nog samanmo tiqig. <sup>8</sup>Na ago God ago marib gamuk araq kazaq bilam,

In bab emim mataw kabemmo giqirqurim teq in giqad ulilibmo tugwalah ham. Gwalehim in ago walmataw naw amo amo tinag ham. *Buk Song 68.18*  
<sup>9</sup>Teq gamuk nawa bilam, "In gwalah" hamta na alulin in kazaq. Danmeb in pesanmo ulilib osim ogib gewomta. <sup>10</sup>Teq mat pesanmo gewomta naqmo muleqim gwalehad in kait uriyamim ulilibmo diq a ta gwalah. Nazaq iyan in og saw bunmo tuwaleq ton bugim osaqta.

<sup>11</sup>Teq in ago on mataw naw amo amo kazaq nagta. Mataw asor in Aposel akabiyan nag. Sa asor in God ago nantut akabiyan nag. Sa asor in uliquliggo luwad Yesus awagamun dimunta on mataw gibilengo akabiyan nag. Sa asor in God ago sipsip giwamuzgo akabiyan negad in mataw asor God ago gamuk asuleqin bilaqgo akabiyan nag. <sup>12</sup>In ago on mataw tawonta na giwaz meqniyeq ago kabiy dimunmo tiqem daqay haqad in naw amo amo na nagta. Negan in kabiy amo amo na emsa Krais anon ayah iyaqta. <sup>13</sup>Ari i bunmo nazaq an ulumsihad kabiy amo amo na emad teq i bunmo ginad helta amulikmo ussa i God atatin ago tuhurit kemam. Hurit kemeq nab i gihol tizilimdaq. Zilimad teq i Krais anon wolnet bugid in bilaqne mat ahol bunmo usaqta nog iyad in anon afaqin inaq tirirendaq.

<sup>14</sup>I nazaq diq tiqiyeq teq i amun amikta os nog a ta hi iyam. Sa mataw gimileq meqinta nagan gigo suleq katiyta bilaqsa i bilaqne muy kamisib lehsa tim bolad sorsa in haresmo lehaqta nazaq i a hi iyam. Mataw na gimileq iyad yuw hunegsa i huriteq a hi muzinam.

<sup>15</sup>Haiqqam. I mataw ginan ginad bilaqsa gamuk heltaqmo gibilenam. I nazaq toneq teq i Krais anon nog iyeq ayah tiqiy bugamta. Ayah iy bugeq i gifaqin Krais ago towubmo tugwahtiqeq inaq diq tisoqotamta. <sup>16</sup>Krais i gifaqin iyim ossa i abensen ameqnagin teq in ahol anaghan bunmo iyim osauqta. Sa i gifaqin na zaway igsa i kabiy anononmo emauqta. Emad i bunmo an soqotim araqibmo diq osad i ananan ginad bilaqsa osauqta. I nazaq emad ossa Krais anon na ayah iyad in awaz diq timeqniyaq.

*Krais ago on mataw loq gel muturtab luwiy*

<sup>17</sup>Ari i bunmo Iyahta ahaqenib iyim osad iyan ya gamuk ka atoranmo kazaq diq ne gibilenaiq. On mataw God abin a hi huritayta na gigo daq ne hi muziniy haqaiq. On mataw na ginad agadanmo diq iysa in daq hi emnanta kabemmo emayta. <sup>18</sup>In ginad romriq iyan in ginad a hi em hasayta. Ad in gigem soqotim ussa in ginad dimunta araq a hi usaqta. Nazaq iyan in God ago maror asan ban osad in ago os dimuntab nab bo a hi gwahtiqayta. <sup>19</sup>In daq meqinta emim gihol a hi loyinat gimebay a hi woqagta. Sa ginad meqinta bolsa in a hi wasihad adan emmo emayta. Mataw nazaqta in daq meqinta anumlan inaqta bunmo emnan ginad diq bilaqayta.

<sup>20</sup>Ari ne Krais ago suleq waqiya na in ne daq meqinta nazaq emgo a hi bilamta. <sup>21</sup>Ne Krais ago tuhuritiyta. Ad ne in ago suleq bunmo tuwaqiya. Suleq na ne daq helta Yesus i giqisihunta naqmo asuleqin ne waqiya. <sup>22</sup>Waqaq suleq na bilam, Ne gigo os kwaziqta na gileh ugad ne ta hi muziniy ham. Na ezaqgo ne gigem kwaziqta na eraqad kat negsa ne nagah haresmo utet yaqayta. Sa daq naqmo ne gihol meqin tonyaqa. Teq ne Krais ago suleq na huritim ne gigem kwaziqta na muzan tilah. <sup>23</sup>Teq suleq na kazaq bilammo. Ne ginad buliyid muturta iyan ham. <sup>24</sup>Ne ginad muturta iyid teq ne mat muturta ago daq waqeq tubusan nog giholib emiy ham. God-mo ne giqeman ne on mataw muturta gwahtiqayta. Gwahtiqim ne gigo daq God ago daqmo nog iyaq. Nazaq iyan ne mutur iyim daq titnonta emad ne God ago on mataw tawon diqta iyim osayta.

<sup>25</sup>Nazaq iyan ne gamuk katiyta ago adan hulosity. Hulosad i gimaqbaban Krais aduganibta na nenaq gamuk emad i nan heltaqmo an bulonad osuq. Na ezaqgo i bunmo mat amulik naqmo ahol asor iyim osauqta. <sup>26</sup>Teq ne gigem meqniysa ne gihol waz naqmo hiqiyeq daq meqinta hi emiy. Ad ne gigem meqniyaqta na hulosity sisaqmo hi usanmo. Haiqqam. Zeq a hi

woleh bugsa ni hidmo leheq nimaqbab nog ni nigem meqinta ugta na inaq an anobun wastitayiy. <sup>27</sup> Luweq ne Satan ayon dan has ugid in ne gilikmanib gwahtiqeq ne gigo os timeqin tondaq.

<sup>28</sup> Teq mataw rin tonad luwayta na in ta hi rin toniy. Haiqqam. In Kraiss anan helmo tihagim in daq titnonta muzinad in gimo gibenab kabiy daq tiqem daqay. In nazaq emeq teq mataw nagah ago siqim iysa in gimo gigo nagah amalib tigilumsih daqay.

<sup>29</sup> Gamuk meqinta araq diq ne giqezab hi gwahtiqan. Haiqqam. Gamuk dimunta mataw gilumsihid in giwaz meqniyeq os daqayta naqmo ne bilaqiy. Bilaqsa mataw ginad siqim iyayta na huritad in ginad tizilimdaq.

<sup>30</sup> Teq ne God ago Bugaw Dimunta emid ahol afaqan hi iyan. Bugaw na in God ne gizayan ne in ago on mataw tiqiyiyta na atowun nog ne giholib usaqta. Tow na ne giholib ussa le Yesus ta boldaqta akaman nab teq God ne giwaxid ne in ago tiqiy has daqay haqad in nagta.

<sup>31</sup> Teq ne yuwlozin bilaqayta na adan hulosa tayiy. Ad ne gigem meqniyaqta na teq ne an wadad haresmo an mugad an bilawunayta na ne hulosa bugiyimo. Ad gigem meqniysa an meqin tonayta adan na ne aban diq emad luwiy. <sup>32</sup> Ne an alowan tonad an agem dimunta ugad osiy. Osad ne gimaqbaban daq meqinta negsa ne walemad anadin ta hi emiy. Ne Kraiss aholib soqotan God ne gigo daq meqinta walemim anadin a ta hi emaqta nazaqmo ne emiy.

## 5

### *I saw anuwanib luwuq*

<sup>1</sup> Ne God ago onnin iyan in ne ginan anad diq bilaqayta. Nazaq iyan ne in asen muzeq in daq em nogmo ne emiy. <sup>2</sup> Ad Kraiss i ginan anad bilaqsa in i giyon ahol nog hulosta nazaqmo ne an anan ginad bilaqsa osiyimo. Na ezaqgo Kraiss ahol tamaz nog God ugan God ameb in bilaqne tamaz ahuran dimunta nog iyan in huritim anad diq bilamta.

<sup>3</sup> Teq ne an haresmo hureqeq inaq hi usiy. Ad ne daq anumlan inaqta bunmo hi emad mataw asor gigo nagah hi utetiymo. Daq nawa ya ginan bilayta na ne aban emsa in abin asit ne gilikmanib hi gwahtiqan. I God ago on mataw tawonta iyim i nazaq wastitayeq osamta. <sup>4</sup> Teq ne gamuk meqinta teq gamuk agadanta teq gamuk akamolmolin inaqta meqinta nagan ne hi bilaqiy. God ago on mataw gamuk naqanta a hi bilaqayta. Haiqqam. Ne gamuk meqinta na hulosaq gamuk dimuntaqmo amalib God eseymo uguy. <sup>5</sup> Ne gamuk ka

huriteq ginad diq em hasiy. On mataw an haresmo hureqim inaq usayta na teq mataw daq anumlan inaqta emayta na teq mataw nagah haresmo utetayta na in God ago maror aduganib gihin haiqta. Mat nagah haresmo utetaqta na in bilaqne god katiyta abin iluwaqta nazaq nog iyaq. Mataw naqanta nagan bunmo in God ayow Kraiss inaq gigo os dimunta nab le a hi gwahtiq daqayta.

<sup>6</sup> Ne gihol waz naqmo hiqiyiy. Luweq mat araq kat negad ago gamuk samanta gibilensa ne muzin daqay. Ne nazaq hi emiy. Mataw gamuk samanta muzinad God ago gunun othassa God in ginan agem meqniysa faq negaqta. <sup>7</sup> Nazaq iyan ne mataw naqanta giholib hiqiyad nenaq araqlib hi luwiy. <sup>8</sup> Kwaziqmo ne romriqab osiyta. Ari muran ne Iyahta aholib ti-soqotim ne inaq saw anuwanib tuqosay. Nazaq iyan ne on mataw saw anuwanib luwayta nazaq nog ne luwiy. <sup>9</sup> Na ezaqgo ne saw anuwanib daq emsa saw anuwan naqmo in ne gigo daq dimdimunta teq ne gigo daq titnonta teq ne gigo daq helta nagan bunmo gigeman anon kabemmo tisorqenaqta. <sup>10</sup> Teq naga daqin ne emsa Iyahta anad dimniyaqta naqmo ne nagunad luwiy. <sup>11</sup> Mataw romriqab osad daq samanta emsa ne gilumsihad ginaq hi emiy. Haiqqam. Ne gigo daq dimunta naqmo amalib ne mataw gigo daq meqinta emid ulal iyan. <sup>12</sup> Na ezaqgo daq hares mataw ulilemim emayta na in meqin diq iysa i giqezabmo bilaqnan gimebay woqaqta. <sup>13</sup> Ari nagah bunmo saw anuwanib gwahtiqimmo ulal iyaqta. Nazaq iyan saw anuwan naqmo in daq bunmo alulin eman ulalab gwahtiqayta. <sup>14</sup> Daq naqmo ago mataw bar wazad kazaq bilaqayta.

Mat ni usaqta na ni eraq haqayta.

Eraqeq ni hodhod huloseq asan ban gwahtiq haqayta.

Gwahtiqeq ni Kraiss ahol anuwanib os haqayta.

<sup>15</sup> Nazaq iyan ne gihol wamuzad luwiy. Ad ne mat anad haiqta luw nog hi iyiy. Haiqqam. Ne bilaqne mat anad inaqta luw nog iyiy. <sup>16</sup> Muran kam kab daq meqinta haresmo gwahtiqim tilehaq. Nazaq iyan ne kam abu hi ulumad ne God ago kabiy em naqmo hiqiyiy. <sup>17</sup> Ad ne agadan hi iyad Iyahta anad ezaq usaqta na ago ne ginad em haseq nazaqmo ne emiy.

<sup>18</sup> Teq ne yuw atoranta ayahmo uluwad gimaqbel hi hulosity. Haiqqam. Yuw na mataw ginad wamuzsa in daq hi emnanta emad in gimo gihol meqin tonayta. Ari negmo teq ne God ago Bugaw Dimunta ban ugid in ayahmo ne giholib usad ne ginad wamuzan. <sup>19</sup> Sa ne gimaqbaban

neñaq humab woleq lotu abarin teq Buk Song-ib bar usaqta nag teq bar asor Bugaw Dimunta ne ginadib eman gwahtiaqta nagan ne wazad osiy. Osad ne Iyahta ayon bar nagan wazad ne gigemabmo diq in abin iluwiy. <sup>20</sup> Teq ne giholib daq bunmo gwahtiaqta na ago ne i gigo Iyahta Yesus Krai abinib i Gimam God esey ugiy.

*On mataw an tuwaqiyta gimen gamuk*

<sup>21</sup> Krai ne gibiy muzsa ne in wazinad ahaqenib iyeq osiy.

<sup>22</sup> Teq ne on mat tuwaqiyta na, ne Iyahta ahaqenib iyim osayta nazaq ne gidugniz gihaqenib iyeq osiy. <sup>23</sup> Na ezaqgo mat in awe afaqinta. Bilaqne Krai in on mataw inmo ago nan huritayta na gigo gifaqin iyim osayta nazaq nog. Teq Krai in ago on mataw na gilumsihim giwaqan in Krai anon nog iyim osayta. <sup>24</sup> Ad Krai ago on mataw in ahaqenib iyim osayta nazaqmo on in gidugniz gihaqenib iyeq in ginad muzin bugiy.

<sup>25</sup> Sa ne mataw aw tuwaqiyta na, ne giqonan ginan ginad bilaqan. Krai in ago on mataw ginan anad bilaqsa in gilumsihnan haqad ahol nog hulosta nazaqmo ne giqonan ginan ginad bilaqan. <sup>26</sup> Krai in ago on mataw na giqemid tawon diq iy daqay haqad in gimen ahol nog hulosta. In nazaq emim teq in ahol awagamun na in ago on mataw negan in tuhuritiyta. Huritum in gamuk na anan helmo haqad yuw huzan Krai in gigem suholan in ameb ginumlan tihiqiy. <sup>27</sup> Ginumlan hiqiy in giwaqan dimun diqmo iyan Krai aholyon tigiwam. Krai ago on mataw na giholib gibatlan araq hiqiy gisan dimun diq iya in gihol awaqan dimunmo diq tiqiy hasaqta. Nazaq iyan in Krai ago on mataw tawon diqta iyim in giholib daq araq ananin waq daqayta na a hi usaqta.

<sup>28</sup> An nazaqmo mataw aw tuwaqiyta na in gimo gihol anan ginad bilaqta nazaqmo in giqonan ginan ginad bilaq daqaymo. Mat in awe alowan tonad na inmo ahol alowan tonaqtamo. <sup>29</sup> Mat araq diq inmo ahol bab ugad a hi meqin tonaqta. Haiqqam. Mataw bunmo in gimo gihol alowan tonad in gihol anononmo wamuza- yta. Teq Krai in ago on mataw giyon nazaq emaqtam. <sup>30</sup> Na ezaqgo i inmo ahol anaghan nog iyim ossa in nazaq i gidimun tonaqta.

<sup>31</sup> Daq alulin naqmo ago mat in anen amam gihuloseq in awe aholib tisoqotdaq ham. Soqoteq in giger gihol amulikmo iyeq tuqos daqay haqad in bilam ham. *Jenesis 2.24*

<sup>32</sup> Mat awe inaq ezaq tonim gihol amulikmo iyayta na alulin ulilemimmo diq ussa i a hi ulum kemamta. Teq ya gamuk na

waqim Krai ago on mataw neñaq giholib emim ya in ginan bilaqaiq. <sup>33</sup> Ari ne mataw amulik-mulikmo bunmo ne gihol anan ginad bilaqta nazaqmo ne giqonan ginan ginad bilaqan. Sa aw aduw wazinad ahaqenib iyeq osan.

## 6

*Pol in onmin ginenmaman nenaq gimen gamuk bilam*

<sup>1</sup> Onmin, ne ginenmaman nenaq araqibmo Iyahta aholib soqotim inaq osayta. Nazaq iyan ne ginenmaman gigo gamuk huritiy. Daq na God ameb dimun diqta. <sup>2</sup> Na ezaqgo God ago mar kazaq bilam,

Ni ninenmam gizeq hurit ham. *Lo 5.16a* Ari God in ago gunun asor tibilaqim teq in gunun nawa na bilaqim abitanib in gamuk araq i gidimun tondaqta na tutim in kazaq hel diqmo bilam,

<sup>3</sup> Ni ninenmam gizeq huriteq teq ningo os dimniysa ni og kab sisaqmo tuqos- daq ham. *Lo 5.16*

<sup>4</sup> Ari onmin gimaman ne gigo onmin gimeqin tona in gigem hi meqniyiy. Haiqqam. Ne in giwamuzad gigo daq wasti- tayad Iyahta ago suleq dimunta amalib in gibileniy.

*Kabibiy mataw gigo aseseqta na nenaq gimen gamuk*

<sup>5</sup> Ari ne kabibiy mataw samanta, ne ginamreniz og kabta na gihaqenib iyeq osad ne girabunad gizeq hurit kemiy. Ad ne Krai ago gamuk muzinayta nazaq ne in gizeq muzinad ne ginad giger hi iyan.

<sup>6</sup> Luweq ne ginad em daqay, I gigo aseseqta kawa osay haqad ne kat negad in gimebmo kabiy emsa in ne ginan ginad dimniy daqay. Haiqqam. Ne Krai ago kabibiy mataw iyim ne God anad muzinim mataw na gigo kabiy emayta. Nazaq iyan ne gihol bunmo kabiy ugad ne hi katiyad anononmo emiy. <sup>7</sup> Ne giholtuw bulad gigem dimniysa kabiy emiy. Na ezaqgo ne matawmo gigo kabiy a hi emay. Haiqqam. Ne Iyahta ago kabiy emayta. <sup>8</sup> Ad ne ginad kazaq emiy. Mataw samanno luw osayta na in gigo kabiy dimunmo emid Iyahta in amenin naw dimunta tinedaq. Ad nazaqmo kabibiy mataw samanta na in gigo kabiy dimunmo emid Iyahta naw dimunta naqmo in tinedaqmo.

<sup>9</sup> Ari ne kabibiy mataw gigo aseseqta, ne gigo kabibiy mataw samanta gimen daq dimuntaqmo emiy. Ad ne tor negad ginol- nan tona in rabayta na ne hulosiyy. Iyahta Heven-ib osayta na in ne gigo Iyahta teq in kabibiy mataw samanta na gigo Iyahtamo. Ad in mataw gibin naqta gigo a hi lehaqta.

Haiqqam. In mataw bunmo gimen daq amulikmo emaqta.

*Krais ago on mataw in mataw bab emayta nog luwiy*

<sup>10</sup> Ari yaqgo gamuk ta asor usaqta na in kazaq. Ne Iyahta inaq soqoteq ago zaway waqad ne giwaz meqniyeq osiy. <sup>11</sup> God bab emgo abalawun negaqta na bunmo ne waqeq gihol siheniy. Gihol sihenid teq Satan ulilemeq ne gimen kilek amidon hunegsa ne zaway iyeq titur daqay. <sup>12</sup> Na ezaqgo i matmo inaq bab a hi emauqta. Haiqqam. I bugaw meqinta gigo aseseqta nag teq og ka ago bugaw marorta nagan teq nagan aseseqta giwaz meqin diqta kam aromriq inaq ka ago daq wamuza yta nag teq bugaw meqinta ulilib luwad mataw gimeqin tonayta nagan nenaq i an wolauqta. <sup>13</sup> Nazaq iyan God bab emgo abalawun bunmo negaqta na ne waqeq giholib emiy. Giholib emeq teq kam araq bab meqinta boldaqta nab ne zaway iyeq tursa bab na bo ne ginolsa ne a hi woq daqay. Haiqqam. Ne gihol anononmo wastitayeq teq ne bab na inaq an wolad ne giwaz meqniyeq titur daqay.

<sup>14</sup> Nazaq iyan ne gihol wastitayeq zaway iyeq turiy. Ne God ago gamuk helta waqeq let nog gihulib hureqid usan. Ad teq Krais ago daq titnonta ne emayta na in bilaqne gibanisih ain-ibta na nog ne giholib usan. <sup>15</sup> Sa kam bunmo ne gihol wastitayeq God ago gamuk dimunta mataw gigem eman kute nemaqta na ne bilaqgomo iyeq osiy. Ad ne God ago gamuk bilaqgo iyim osayta na ne bilaqne gisendugan nog gisenab emeq turiy. <sup>16</sup> Nagah na bunmo ne giholib emeq teq ne ginad helmo haqayta na dareq nog ne wazeq turiy. Tursa mat meqinta na ago kilek amidon faq oyaqta na ne gimen hunegsa ne dareq na amalib tuqot has daqay. <sup>17</sup> Ad God ne gilumsihim tigiwamta na agamukan in bilaqne hat ain-ibta ne gifaqin isih eq us nog iyan. Sa ne Bugaw Dimunta ago baqir wazeq turiy. Baqir na in God ago gamuk naqmo.

<sup>18</sup> Bugaw Dimunta ne ginad wamuzsa tuteqmo ne God inaq gamuk emad in ne gilumsihgo haqad ne buloniy. Ad tuteqmo ne gihol asawan woltayad osiy. Teq kam bunmo ne God ago on mataw tawonta na gimen God bulonad ne daq na hi hulosisiy.

<sup>19</sup> Teq ne yaqmen God bulonsa in ya ilumsihanmo. Ilumsihsa teq ya iteb inmo ago nantut gwahtiqa ya a hi rabad Yesu awagamun dimunta alulin ulilemim usta na tibilaq sireqdaiq. <sup>20</sup> Ya God abinib gamuk na bilaqad luwsa iqirquriyta. Teq ya bit kab osad ya God ago nantut na bilaq tutaiqta. Nazaq iyan ne yaqmen God

bulonsa ya rab bayid woqsa ya God-mo anad muzinad ago gamuk na tibilaqdaiq.

*Gamuk asor*

<sup>21</sup> Ari ya kab ezaq iyim osaiqta na teq ya naga emad osaiqta na ago Tikikus tigibilendaq. Tikikus in i gimaqbab araq dimun diqta. Teq in Iyahta kabiy ugta na emad atuw a hi hiqiyaqta. <sup>22</sup> Ya in eman nawa lehim i ezaq diq osauqta na ago teq in ne gibilensa ne gigem zaway tiqiydaq.

<sup>23</sup> Ari i Gimam God teq Iyahta Yesu Krais inaq in ne on mataw Krais abin wazinayta na bunmo gilumsihsa ne gigem kute nemsas osiy. Osad ne ginad helmota na waz naqmo hiqiyad ne an anan ginad bilaqsa osiy.

<sup>24</sup> Ari on mataw tutimmo i gigo Iyahta Yesu Krais anan ginad bilaqta na bunmo God in agem dimunta negsa in osiy. Nawaqmo.

## Filipay

### Sansandek Pol mar tonan uliq Filipay-ib lahta Gamuk ameb lehaqta

Pol ame amebta kamis urotim saw Masedoniya-ib gwahtimta nab in le uliq Filipay-ib Yesus awagamun dimunta na bilam (Aposel 16.8-15 nab teq ni ahol waq). Abeb in lehim uliq araqaq ossa mataw in wazim irquriy. Irquran ossa Kraiss ago on mataw uliq Filipay-ibta na huritim in Pol amen mani asor urotim mat anan Epafroditus ugan in waqim ad Pol ago hib tilah, Pol aholyon didaq nagah zaydaq haqad. An Pol mani na waqim anad ayahmo dimniysa in Filipay on mataw na esey negnan haqad gimen sansandek ka mar tonta (Filipay 1.5; 4.10-19).

Teq gamuk ka alulin ta asor kazaq usaqmo. 1) Pol ezaq iyim osaqta na ago in gibilan (Filipay 1.12-26; 4.10-19). 2) Teq in Filipay on mataw na ginad helta zaway ug, luweq Pol irquran osaqta na ago in ginad meqniysa in Kraiss abinib afaqan sornan gituw hiqiy daqay haqad (Filipay 1.27-30; 4.4). 3) Teq in Filipay ginad enqenunid in gihol wazid woqsa ginad amulikmo iyeq os daqay haqad in bilam (Filipay 2.1-11; 4.2-5). 4) Teq in Timoti ayow Epafroditus inaq gibin iluwmo, abeb mataw giger na le uliq Filipay-ib gwahtiqid Filipay mataw na in giwazineq gilowan ton daqay haqad (Filipay 2.19-30). 5) Teq in Filipay on mataw na gidek waz, in mataw gihol abatan asan urotgo bilaqayta na teq mataw gihol bilaqgo adan muzinayta na gigo in girabuneq giholib hiqiy daqay haqad (Filipay 3.1-4.1).

### Filipay on mataw Pol inaq yow emim ayahmo ulumsihan Pol in ginan anad dimniy

<sup>1</sup> Yaqmo Pol ya iyow Timoti inaq i giger Kraiss Yesus ago kabibiy matawta iyim i sansandek ka mar tonim eman uliq Filipay-ib God ago on mataw tawonta Kraiss Yesus inaq soqotim osayta na teq in gigo mataw danmebta na teq in gigo kabibiy matawta nagan bunmo gigo hib lehaq.

<sup>2</sup> I Gimam God teq i gigo Iyahta Yesus Kraiss inaq in gigem dimunta negad in ne gigem emid kiskismo usan.

*Pol God esey ug*

<sup>3</sup> Kam bunmo ya ne ginadin emad yaqgo God esey ugaiqta. <sup>4</sup> Esey ugad sirisirimo ya ne bunmo ginan inad dimniysa ne gimen God bulonaiqta. <sup>5</sup> Na ezaqgo mebmemo

ne Yesus awagamun huritiyta nabmo ne ya inaq wastonim i araqibmo wagam dimunta na akabiyman emyauqta. Emad luwim bo muran i kabiy na garabmo tisor tutauq. <sup>6</sup> God-mo kabiy dimunta na alulin ne gilikmanib amta. Emim inmo kabiy na wamuzad oseq le Kraiss Yesus ta boldaqta akamnib nab teq in emid tihiqiy bugdaq.

<sup>7</sup> God agem dimunta igad ago kabiy i gibenab eman ya nenaq i araqibmo kabiy na emauqta. Sa ya iqirquran uliq kab ossa ne yaqgo afaqan na sorad ne bilaqne giqirquran os nog iyaymo. Ad mataw Yesus awagamun geg ugsa ya amenin emad gibilen sireqsa ne ya ibunib turayta. Turad ne ya ilumsihsa i araqibmo wagam dimunta na zaway ugsa in awaz timeqniyaq. Ya ne giloyinsa ne ya inan ginad diq bilaqta. Nazaq iyan ya kazaq inad dimun diqta ne bunmo negaiqta ka in daq dimunta. <sup>8</sup> God ameb ya helmo bilaqaiq. Kraiss Yesus ne ginan anad bilaqta nazaqmo ya ne bunmo ginan inad bilaqsa ne ginadin diq emaiqta.

<sup>9</sup> Ya ne gimen God bulonad kazaq bilaqaiq, God haqaiq, ni mataw na gilumsihad ginad emid hastitaysa in anan ginad bilaqgo ginad em hasiy haqaiq. Ginad em hasa daq na in gilikmanib ayahmo iyan haqaiq. <sup>10</sup> Ad in daq bunmo gilum kemad emnanta naqmo amomo in emad osiy haqaiq. In nazaq emad oseq le Kraiss ta boldaqta akaman nab in gigemab ginumlan haiq diq iysa in giholib daq araqaq ananin waq daqayta hi usan haqaiq. <sup>11</sup> Ad kam nab Yesus Kraiss abin titnonta naqmo amomo in giholib ayahmo usan haqaiq. In on mataw nazaq diqta iyid teq ni nibin ayahta in gigo hib waqsa on mataw bunmo nibin tiqiluw daqay haqaiq.

*Pol irquran osta na ago Yesus awagamun le ayahmo iy*

<sup>12</sup> Ya imaqbaban, ne hurit kemiy. Daq kawa ya iholib gwahtimta ka in Yesus awagamun a hi wasihaq. Haiqgam. In leh tutaq. <sup>13</sup> Nazaq iyan uliq kab Sisa ago bab matawta na teq in ago gavman mataw bunmo teq on mataw ta asor na bunmo in yaqgo tuhuritiy. Huritim in ya inan ginad kazaq tiqemay, Pol Kraiss asen muzinad ago kabiy emaqta na ago in irquran osaq haqay. <sup>14</sup> Teq uliq kab ya imaqbaban Iyahta ago on matawta na kabemmo in ya iqirquran ossa ibiyad in zaway diq tiqiyay. Zaway iyad in a hi rabad God ago gamuk atoranno bilaqayta.

<sup>15</sup> Helmo, mataw na gigo asor ginad meqinta yagad in ya ibin wazid woqsa in gibin ayah idyaq haqad in Kraiss awagamun bilaqayta. Sa ta asor ginad dimunta yagad in Kraiss awagamun bilaqayta. <sup>16</sup> Mataw



ginad dimunta na in yaqgo tuhurit kemay. Ad in ginad emay, God-mo bilaqan Pol gavman matawta na Yesus awagamun gibilen sireqgo haqad in bit giqirquran osayta nab osaq haqay. Haqad in ya inan ginad bilaqsa in Krai awagamun bilaqayta. <sup>17</sup> Ari mataw gihar yagayta na in on mataw gihureqid in ya ihuloseq in gigo hib lehnan haqad in Krai awagamun bilaqayta. In ginad dimunta ussa nazaq a hi emayta. Haiqqam. Ya iqirquran kab ossa in ya iholib afaqan ta ara q emid ya inad ayahmo meqniydaq haqad in nazaq emayta. <sup>18</sup> Teq ya inad a hi meqniyaq. Mataw asor na ginad meqinta ussa in Yesus awagamun bilaqayta. Sa asor na daq helta emayta. Teq in bunmo Krai awagamun bilaqsa on mataw kabemmo huritayta. Nazaq iyan ya inad dimniysa osaiq.

*Pol in Filipay gilumsihnan haqad in hidmo moqgo anad a hi amta*

Teq ya inad dimniyaqta na a hi hulosaq. <sup>19</sup> Haiqqam. Ya inad kazaq diq emaiq. Ne yaqmen God bulonsa in Yesus Krai ago Bugaw Dimunta yagsa ya zaway iyeq osad a hi woqdaiq haqaiq. In ya ilumsihsa afaqan kawa ya iholib usaqta ka le tihiqiyid ya dimunmo God ameb tuqosdaiq haqaiq. <sup>20</sup> Ya inad emaiq, In ya ilumsihsa ya imebay asit a hi woqdaq haqaiq. Ya zaway diq iyeq ossa Krai abin ayahta yaqgo hib tuwaqdaq haqaiq. Nazaq iyid teq ya kayeqmo osdaiq o haiq, mataw ya inol emid moqsa, daq bunmo ya iholib gwahtiqdaqta na amalib ya Krai abin emid ayah tiqiydaq haqaiq. Haqad ya God amen emad ihol tuhosisiqaq. <sup>21</sup> Na ezaggo ya og kab kayeqmo osad na ya Krai inaq tisoqotim dimunmo osaiqta. Ari ya moqeq na ya tidimniy hasdaiq.

<sup>22</sup> Teq ya isan ka kayeqmo osad ya God ago kabiy emad on mataw kabemmo gilumsihaiqta. Ya naga danteqin diq muzindaiq? Dante giger na dimun. <sup>23</sup> Nazaq iyan ya inad giger tiqemaiq. Ya isan ka huloseq leheq Krai inaq osnan inad ayahmo usaqta. Ya Krai inaq osdaiqta na in og ka ago os uriyameq dimun diqmo iydaqta. <sup>24</sup> Teq ya ne ginadin emaiqmo. Na ezaggo ya kayeqmo osad ne tigilumsihdaiqta haqad. Ari ya gihuloseq leheq ya ne a ta hi gilumsihdaiq. <sup>25</sup> Nazaq iyan ya inad emaiq, Ya ne gihuloseq a hi lehdaiq haqaiq. Haiqqam. Ya ne bunmo nenaq og kab tuqos tutdaiq haqaiq. Osad ya ne gilumsihsa ne ginad helmo haqayta na ayah iysa ne ginad dimniysa tuqos daqay. <sup>26</sup> Nazaq iyid teq ya le ne gigo hib a ta gwahtiqid ne ya inan ginad dimniysa Krai Yesus abin tiqiluw daqay.

*Filipay on mataw Krai anan helmo haqad in abinib santitiy sor daqayta*

<sup>27-28</sup> Ari ya ne gigo hib leheq nenaq osdaiq o haiq ya kab ne gigo hib pesanmo ossa tuteqmo ne daq kazaq emad osiy. Ne gigo luw os bunmo Krai awagamun na inaq rireneqmo lehan. Sa ne gigem amulikmo iyeq giwaz meqniyeq turiy. Ad ne ginad amulikmo iyeq ne an ulumsihad mataw Yesus awagamun wazbuliynan tonsa ne wagam na anononmo gibilen kemiy. Teq ne gigo bab na gihar negsa ne hi girabuniy. Ne nazaq emsa teq ya le ne gibiydaiq o haiq ya ne gigo hib pesanmo osad ya ne gibin dimunta nazaq tuhuritdaiq.

Ari ne nazaq giwaz meqniyad tursa ne gigo bab ne gibiyad in gihol loyinin ginad emay, I teq timeqniyam daqagya haqay. Sa negmo ginad emay, God-mo i giqeman i kazaq giwaz meqniyim turauqta haqay. Nazaq iyan i teq leheq in inaq dimunmo tuqosam haqay. <sup>29</sup> God ne ginad eman hastitayan ne Krai anan helmo tihaqayta. Teq ne Krai anan helmo haqgmo haqad in ne a hi giwamta. Haiqqam. Ne Krai anan helmo haqad in abinib santitiy sor daqaymo haqad in ne giwamta. <sup>30</sup> Kwaziqmo Krai ababun bab yagsa ne ya ibiy yaqayta. Teq muran ya bab na em tutsa ne huritad bab amulik nabmo ne tituraymo.

## 2

*I gihol wazid woqsa i gimaqbaban ginan ginad meqniyan*

<sup>1</sup> Ari ne Krai aholib soqotim inaq osad ne gigem zaway iyim osayta. Ossa Krai ne ginan anad bilaqsa ne gigem kiskismo usaqta. Teq God ago Bugaw Dimunta ne bunmo giduganib ussa ne gigem dimunta mataw negad ginan ginad meqniyaqta. <sup>2</sup> Ne nazaq emsa ya ne ginan inad tidimniyaq. Ari ne gigo daq dindimunta na ulumsiheq ne ginad amulikmo ussa ara qibmo an anan ginad bilaqsa osiy. Osad ne gigem amulikmo ussa ne ginad amulikmo usanmo. Ne nazaq emsa teq ya ne ginan inad tidimniy naqmo diq hiqiydaq. <sup>3</sup> Ne negmo gihol anadin emad gibin ayahta waqgo hi emiy. Haiqqam. Ne gihol wazid woqsa an abin iluwad an ahaqenib iyeq osiy. <sup>4</sup> Ne negmo gihol ulumsihgomo daq hi emiy. Haiqqam. Ne giyogniz ginadin emad in gilumsihiyimo.

*Krai inmo ahol wazan woqan God abin wazan eram*

<sup>5</sup> Krai Yesus anad usta nazaqmo ne ginad usan.

<sup>6</sup> In God diq iyim osta.

Teq in ago ban ulilibta na anad a hi waz.

<sup>7</sup> Haiqqam. In ago ban ulilibta na hulosisim in abin wazan woqan in kabibiy mat samanta abin waqim ahol ug.

Ugad in mat diq asan waqim bo tugwahtim.

<sup>8</sup> Gwahtiqim in mat diq iyim osad ahol wazan woqsa in God-mo aqez muzinim lemo in tumom.

Teq in dante dimuntab a hi mom. In ayibmo dom wolana momta.

<sup>9</sup> In nazaqmo ahol abin wazan woqan teq God in abin wazan ulilibmo diq iy.

Ad God in anan araq mataw bunmo ginan uriyamta na tuqug.

<sup>10</sup> Ugan teq mataw bunmo Heven-ib osayta na teq og kab osayta na teq og aduganib usayta nagan bun diqmo in Yesus anan biyad teq in ayon gibakbakan tuqulum laquw daqay.

<sup>11</sup> Ad in bunmo bilaq daqay, Yesus Kraisa in Iyahta haq daqay.

Haqsa Amam God abin ulilibmo diq gwale tuqusdaq.

*I ulig oyaq nazaq nog mataw gilikmanib osuq*

<sup>12-13</sup> Ari ya iyogniz, negmo teq kazaq emiy. Ne yaqgo nan hurit yaqayta nazaqmo ne muran em tutad osiy. Teq ya nenaq ossa ne nan huritiy haqad ya a hi bilaqaiq. Haiqqam. Muran kam kab ya ne gihulosim uliq kab pesanmo ossa ne ya iqez ka hurit naqmo hiqiyiy haqaiq. Ne ginad emiy. God-mo ne gimuganib kabiy emad in ne ginad wazan eraqsa in anad usaqta nazaqmo ne kabiy daq emayta. Nazaq iyan God ne giwaqnan haqad gimen dante amta na ne muzinad gihol anononmo wamuzad ne rabad gihol harara nemsada dante na muzinad luwiy.

<sup>14</sup> Kabiy daq bunmo ne emad na ago ananin kabemmo ne bilaqad an hi mugiy. <sup>15-16</sup> Ne nazaq emad oseq teq ne gigemab ginunlan hiqiyisa afaqan araq a hi em daqay. Haiqqam. On mataw meqmeqinta muran kam kab osayta ka gilikmanib ne God ago onmin dimun diqta iyeq tuqos daqay. Osad on mataw na daq hihiq emsa ne os dimunta kayeqmo os tut daqayta na agamukan tigibilen daqay. Ne gamuk dimunta na gibilenad ne bilaqne ulig kaitab oyayta nazaq nog ne on mataw God gileh ugayta na gilikmanib oyad tuqos daqay. Ne nazaq diq emid teq Kraisa ta boldaqta akaman nab ya ihol abin iluwad bilaqdaiq, Ya kabiy samanmo a hi em haqdaiq. Ad yaqgo zaway hunegan le saman a hi iy haqdaiq.

<sup>17</sup> Ne Yesus anan helmo diq haqad God ago kabiy emad ne gihol bunmo tamaz nog God ugayta. Sa abeb mataw ya inol emid inedan wain ayun nog ne gigo naw

na amalib wazbalid woqsa i agaribmo gihol tamaz nog God tuqugam. Ya ihol nazaq diq loyinaiqta teq ya inad a hi meqniyaq. Haiqqam. Ne ya inan ginad dimniysa ya inad tidimniyaqmo. <sup>18</sup> Ad nazaqmo ya ne ginan inad dimniysa ne ginad dimniyanmo.

*Pol Timoti emid uliq Filipay-ib lehnan bilam*

<sup>19</sup> Ari Iyahta Yesus anad bilaqid teq ya Timoti emid nawa ne gigo hib hidmo tilehdaq. Leheq in muleq ta boleq ne ezaq osayta na awagamun ibilenid ya igem zaway tiqiydaq haqad. <sup>20</sup> Yaqgo mat araq Timoti nogta haiqqam. In anad ya inad nog iyim in ne ginadin diq emaqta. <sup>21</sup> Mataw asor bunmo in gimo gihol anadin emad in Yesus Kraisa ago kabiy anadin diq a hi emayta. <sup>22</sup> Teq negmo Timoti ago tuhuritiya. In mat atuw inaqtta. Amun amam ulumsihaqta nazaq in ya ilumsihsa i garabmo Yesus awagamun dimunta akabiyana emauqta. <sup>23</sup> Nazaq iyan ya bit kab ossa yaqgo hazizir le ezaq iyid ya ahol waqad teq ya Timoti emid hidmo nawa ne gigo hib tilehdaq. <sup>24</sup> Teq ya inad emaiq, Asit naqmo Iyahta yaqmen dan emid ya ne gigo hib tilehdaqmo haqaiq.

*Pol Epafroditus emid uliq Filipay-ib lehnan bilam*

<sup>25</sup> Teq ya inad emaiq, Ya Epafroditus ne gigo hib emid in muleqeq ta lehdaq haqaiq. Na in ya imaqbab nog iyim ya inaqtta i araqqimo kabiy emad Yesus ago bab nenaq an wolauqta. Kwaziqmo ne mat na yaqgo hib eman bolim in ya ilumsihad osim bo muran tiqiy. <sup>26</sup> Iyim in muran ne gibiyana anad diq meqniyaqta. Ad in moqad usta na ago ne huritim ginadnad emiyta na ago in agem afaqan iyaqmo. <sup>27</sup> Helmo in moq waqim tumoqnan tonta. Teq God in anan anad meqniy. Anad meqniysa in Epafroditus amomo anan anad a hi meqniysa in ya inan anad meqniymo. In anad kazaq am. Pol irquran osoqta na ago afaqan sorsa in ayow na moqid ago afaqan na ayah diqmo isihdaq haqad in Epafroditus ulumsihan a hi mom. <sup>28</sup> Nazaq iyan ya in emid ne gigo hib lehnan inad ayahmo bilaqay. In ne gigo hib lehid ne ahol waqad teq ne ginad tidimniydaq. Sa ya ne ginadin emad inadnad kabemmo emaiqta na asit tihiqiydaq. <sup>29-30</sup> Nazaq iyan in le ne gigo hib gwahtiqid ne ginad dimniysa Iyahta abinib in waqiy. In Kraisa ago kabiy aduganib moqnan tonta. Ne ya ilumsiheq yaqgo kabiy ka asor a hi em daqayta iyan in ame wolnetnan haqad inmo ahol nog hulonsan ton. Nazaq iyan ne mataw naqanta gibin tiqiluw daqay.

## 3

*Mat Krai anan helmo haqaqta naqmo in mat titnonta*

<sup>1</sup> Ya imaqbaban, yaqgo gamuk ta asor usaqta na in kazaq. Ne Iyahta anan ginad dimniyan. Gamuk na ya ne gimen tumar tonta. Teq ne gamuk na anadin emad dimunmo tuqos daqay haqad ya a ta mar tonnan ituw a hi hiqiyayq.

<sup>2</sup> Mataw gihol abatan asan urotgo bilaqayta na gigo ne gihol waz naqmo hiqiyiy. Na in bilaqne gaun karuw asan mugtitay nog iyim in mataw gisan meqin tonayta. In bilaqay, I mataw gisan urotsa in God ago dauhibta iyay haqayta. <sup>3</sup> Haiqgam. Igmo God ago dauhibta iyim tuqosauqta. Igmo God ago Bugaw Dimunta amalib God ayon lotu emauqta. Ad Krai Yesu amomo i gilumsihan i in abin iluwauqta. Teq i ginad emauq, Gisan akabiyen kabemmo emayta na asit a hi gilumsihdaq haqauqta.

<sup>4</sup> Ari gisango daq nagan mataw gilumsihdaqta iyid ya kwaziqmo tidimniy nagta. Mataw asor gisango daq kabemmo emim in ginad emay, Daq kaqmo i tigilumsihdaq haqayta. Teq gisango daq na gigo hib ya mataw na giquriyamim ya ihol abin tidimniyim usta. <sup>5</sup> Ya inen iqeman yaqgo kam 8 nazaq tiqiyen mataw ya isan urotiyta. Teq ya Bensamin anaynayin araq iyim ya Isrel mat diqta araq. Nazaq iyan ya Hibru gigo ned watwatmota. Teq ya Farisi araq iyim ya God ago maror Moses bilamta na anononmo muzinyaiqta. <sup>6</sup> Ya God ago kabiy emnan zaway diq iyim ya Yesu ago on mataw gimuzad gimeqin tonyaiqta. Teq ya God ago maror Moses bilamta na ago gunun muzin bugsa mataw ya ilum kemim yaqgo afaqan araq ahol a hi waqad in ya inan mat titnonta haq yaqayta.

<sup>7</sup> Kwaziqmo ya inad emyaiq, Ya Juda gigo maror muzin bugta na ago God tiqiwaqdaq haqyaiq. Ta teq muran ya Krai ago tuhurit kemim ya gisango daq bunmo emta na in bilaqne nagh samanta nog tiqiy. <sup>8</sup> Helmo ya bilaqaiq. Ya ibin dimunta usta na ya inadib in nagh diq a haiqta. Ari yaqgo Iyahta Krai Yesu ago ya tuhuritta naqmo in nagh heltaqmo. Ya Krai amomo ago hib soqotnan haqad nagh bunmo ya inad wazta na ya tuhulos bug. Ad Krai amomo ilumsihdaq haqad ya gunun akabiyen kabemmo emta na ya inadib in bilaqne naga hekbel didaq asan nog tiqiy. <sup>9</sup> Ya Krai amomo ago hib soqotnan inad bilaqay. Ad ya God ago maror Moses bilamta na muzinad matawmo gigo hib ihol abin titnonta waqnan inad a hi bilaqay. Haiqgam. Ya Krai anan helmo haqeq God-mo ago hib ibin titnonta waqnan inad usaq. Gibin titnonta na mataw Krai anan

helmo haqsa God-mo in gibin na negaqa. <sup>10</sup> Ya Krai ago hurit kemnan inad ayahmo usaqta. Teq God ago zaway Krai wazan eramta na ya iholib loyinnanmo. Ad Krai santitiy sorta nazaqmo ya in ago santitiy na asor sornanmo. Ya nazaq emeq teq Krai santitiy sorim le in momta nazaqmo ya in asen muzeq in amta nazaq ya emnanmo. <sup>11</sup> Ya ihol nazaq bibiyowunad oseq teq Krai hodhodab eramta nazaqmo ya hodhodab useq tiqeraqdaqmo haqaiq.

*Pol zaway diq iyeq sibeq le God tow amta nab in gwahtiqnan bilam*

<sup>12</sup> Ya Krai ago daq naway na giwaq bugan tiqiyunin nazaq ya a hi bilaqdaq. Teq ya mat dimun diq tiqiy hasta nazaq a haiqmo. Krai Yesu ya iwaqan ya in ago tiqiyta. Nazaq iyan muran ya in ago daq nagan wazeq ihol ugid yaqgo tiqiy bugdaq haqad ya iholtuw bulad tiluwaiq. <sup>13</sup> Ya imaqbaban, ya inad kazaq emaiq. Ya Krai ago daq nagan a hi waz bugaiqta haqaiq. Teq daq amulikmo ya emaiqta na in kazaq. Kabiy daq bunmo ya ibun ban tilahta nagan anan ya idek zizalsa nagh dimunta ya inobun ban usaqta naqmo ya waznan iholtuw diq bulaiqta. <sup>14</sup> Ya zaway diq iyeq sibeq le God yaqmen tow eman usaqta nab gwahtiqeq naw dimunta na tuwaqdaq haqad ya iwaz meqniyim iholtuw bulad luwaiqta. Naw na God ya ililewunan ya dante Krai Yesu yaqmen amta na muzineq gwale Heven-ib tiqiyeq teq ya tuwaqdaqta.

<sup>15</sup> Ari i on mataw ginad tizilimta na, i bunmo ginad nawa ya tibilayta nazaqmo usan. Ad ne ginad ta araq usid teq God giquisihunid ne ginad tiqem has daqay. <sup>16</sup> Teq nagh bunmo ago i ginad tiqem hasauqta naqmo i waz naqmo hiqiyad adan emuq.

<sup>17</sup> Ya imaqbaban, ne ya isen muzeq ya daq em nogmo ne emiy. Ne ezaq luw os daqayta na ago i tigibilen bug. Nazaq iyan mataw i gisen muzad daq emsa ne gibiy kemiy. <sup>18</sup> Na ezaqgo mataw kabemmo Krai ago kruse gihar ugad osayta. Ya ime kabemmo ne gidek wazad mataw na ginan tigibilenta. Ad muran ya a ta gibilen tonad ya imeqil woqay. <sup>19</sup> Mataw na oseq teq tihiqiy daqayta. In gihol ginadmo bilaqne in gigo god nog iyan in daq amo amo amebay inaqta emad luwayta. Teq in gimebay a hi woqayta. Haiqgam. In gihol abin iluwad ginad dimniysa osayta. Mataw naqanta in og ka ago naghahmo ginadin emayta.

<sup>20</sup> Ari igmo i on mataw Heven-ibta. Mat i gilumsiheq ta giwaqdaqta na amatin in saw nabmo oseq teq a ta gewoqdaqta. Na i gigo Iyahta Yesu Krai-mo. I in baq

tunad gihol husisiqsa osauqta. <sup>21</sup> In ago zaway ayahnta amalib nagh bunmo giqemid ahaqenib tiqiy bugdaqta. Ad in ago zaway naqmo amalib i gihol meqinta ka emid inmo ahol anuwanta nog iyeq dimun diq tiqiydaqta.

#### 4

*I gigem amulikmo iyeq ginad dimniysa osad ginad dimunta waquq*

<sup>1</sup> Nazaq iyan ya imaqbaban dimunta, ya tibilayta nazaqmo ne Iyahta ago hib soqoteq giwaz meqniyeq turiy. Ya ne ginan inad bilaqsa ya ne gibiyann igem gaqaqta. Ne bilaqne yaqgo kabiy anawun dimun diqta nog iysa ya ne ginan inad tidimniyaqta.

<sup>2</sup> Teq ya on giger Yuodiya ayow Sintike inaq ginan inad meqniysa ya kazaq atoranmo gibilenaiq. Ne giger Iyahta ago on iyim iyan ne gigem amulikmo iyeq osiy haqaiq. <sup>3</sup> Ad mat ni yaqgo mangteqsor diqta na ya ni kazaq nibilenaiq, Ni on giger na gilumsih haqaiq. In giger ya iteqsormo diq iyan i garibmo Yesus awagamun dimunta na akabiyann emyauqta. Sa Klemen teq ya iyogniz ta asor ya nenaq kabiy emyauqta na in on giger na nenaq kabiy em yaqaytamo. In bunmo ginan God ago buk mataw kayeqmo tuteqmo os daqayta ginan usaqta nab mar tonan usaq.

<sup>4</sup> Ari ne bunmo Iyahta ago hib tisoqotim osad iyan tuteqmo ne ginad dimniysa osiy. Ya gamuk na a ta bilaq tonnan. Ne ginadmo dimniyan.

<sup>5</sup> Teq ne tok nemeq kiskismo ossa on mataw bunmo ne gigo daq na ahol waq kemiy. Iyahta ne gigerabmo diq osaqta. <sup>6</sup> Sa ne nagh araqq anan ginad hi meqniyan. Haiqqam. Ne gigo kabiy daq bunmo ago ne God bulonad susumun ugiy. Ad ne God inaq gamuk emad susumun ugad teq ne esey ugiy. <sup>7</sup> Ne Kraiss Yesus aholib soqotim inaq ossa God-mo ne gigem ginad wamuzsa ne gigem kiskismo tuqusdaq. Sa afaqqan ne giholib gwahtiqsa ne ezaq tonim gigem kute nemaqta na ago ne a hi hurit daqay.

<sup>8</sup> Ya imaqbaban, yaqgo gamuk ta asor usaqta na in kazaq. Ne ginad kazaq emad osiy. Naga daqqin in helta teq in abin dimunta teq in titnonta teq in anumlan haiqta teq in awaq dimunta teq in ulalab emnanta, daq naqanta bunmo ne anadin emad luwiy. Daq dimdimun diqta teq daq bunmo i abin wazid eraqqnaq diqta nagan bunmo ne anadin emad adan emiy. <sup>9</sup> Daq emnanta na bunmo ya anan gibilenan ne huritim tuwaqiyta. Teq ya daq na bunmo emsa ne yaqgo hib ahol tuwaq kemiymo. Nazaq iyan ne daq dimdimunta nagan

emsa God i gigem eman kiskismo usaqta na in ne nenaq tuqosdaq.

*Filipay on mataw Pol amen naw eman bolan in anad ayahmo dimniy*

<sup>10</sup> Kam sisaq nog ne ya inan ginad meqniyaqta na ya asit a hi loyinta. Helmo ne ya inadin em yaqayta teq ne gigo dan hiqiyayaq. Ari muran Iyahta ne gimen dan eman ne ya tiqilumsihay. Nazaq iyan ya inad diq dimniyaq. <sup>11</sup> Teq ya nagh ago siqqim iyim osta na ago ya a hi bilaqaiq. Haiqqam. Ya nagh osgo inaq o haiq na ya inad a hi meqniysa ya igem dimunmo usaqta. <sup>12</sup> Kam asor ya mat ina haiqta nog osaiqta. Ad kam asor yaqgo nagh kabemmo inaq iyim osaiqta. Kam asor ya didaq kabemmo neqaiqta. Ad kam asor ya zarow diq iyim osaiqta. Teq ya kam bunmo igem dimniysa osgo adan na ya tuhurit kem. Nazaq iyan ya nagh kabemmo inaq iyim osaiqta na ago ya a hi bilaqad ya igem dimniysa osaiqta. Ad ya nagh kabemmo ago siqqim iyim osaiqta na ago ya a hi bilaqad ya igem dimniysa osaiqatamo. <sup>13</sup> Kraiss-mo ya zaway yagsa ya kam bunmo igem dimniysa osaiqta.

<sup>14</sup> Teq ne yaqgo afaqqan na gihol ugim soran ya inad tidimniyaq. Na ne daq dimunta emay. <sup>15</sup> Ne mebmemo Yesus awagamun dimunta huritiyta nab ya nenaq osim teq ya eraqqim saw Masedoniya hulossim lehssa Yesus ago dauh araqq ya a hi ilumsihiy. Haiqqam. In yaqgo hib nagh tuwaqqim teq in amenin emim nagh araqq a hi yagiy. Kam nab ne gimomo ya ilumsihiyta. Na ne Filipay on mataw, ne tuhuritiyta. <sup>16</sup> Teq ya ne gihulossim le uliq Tesalonaika-ib kabiy emad nagh ago siqqim iysa ne ya ilumsihim teq ne a ta ilumsih toniy. <sup>17</sup> Teq ya ne gigo nagh anan a hi sunaiq. Haiqqam. Ya inad kazaq emaiq. Ne ya ilumsihsa ne gigo daq dimunta na anon kabemmo tisorqendaq haqaiq. Sa abeb God ne gigo daq anon kabemmo na ahol waqqad in amenin dimunta tineqdaq haqaiq. Na ago ne ya ilumsihan ya inad tidimniyaq.

<sup>18</sup> Ari Epafroditus ne gigo naw a bolim ya ibenab tiqqam. Eman ya ne gigo nagh na waqqan in tiqiyunin. Nagh ne yag daqayta na ne uriyamim nagh asor bunta inaqmo ne emiy. Ne gigo naw na bilaqne faqqaqasin ahuran dimunta nog iyan God tamaz na waqqim agem tidimniyaq. <sup>19</sup> Teq yaqgo God ago nagh dimdimun diqta bunmo Kraiss Yesus ago hib usaqta. Nazaq iyan ne Kraiss aholib soqotim inaq ossa nagh bunmo ago ne siqqim iyayta na God-mo negid tigiyunindaq. <sup>20</sup> I Gimam God abin tuteqmo kuluwawuluwmo iluwuq. Hel diqtaqmo.

*Gamuk asor*

<sup>21</sup> Ya ne gigo hib on mataw Kraiſ Yesuſ aholib soqotim God ago on mataw tawonta iyim osayta na bunmo yaqgo zeq dimun ka in negaiq. Sa ya imaqbaban Kraiſ ago on mataw ya nenaq kawa osaiqta ka in zeq dimun ne negaymo. <sup>22</sup> Teq God ago on mataw tawonta kab osayta na bunmo in gigo zeq dimun ne negad in gilikmanib mataw asor Sisa ago bitab kabiſ emayta na in ne ginadin emad in gigo zeq dimun eman nawa lehaqmo.

<sup>23</sup> I gigo Iyahta Yesuſ Kraiſ agem dimunta ne bunmo negan. Nawaqmo.

**Kolosi**  
**Sansandek Pol mar tonan**  
**uliq Kolosi-ib lahta**  
**Gamuk ameb lehaqta**

Kolosi in uliq araq saw Esiya-ib usta. Teq Pol uliq nab lehim Yesus awagamun a hi gibilan. Haiqqam. In uliq Efesus-ib irquran osad in mataw ta asor giqeman uliq araq araqaq God ago kabiy emnan lehad in uliq Kolosi-ib lehiymo. Lehim in Yesus awagamun dimunta gibilenan Kolosi on mataw asor helmo tihaqiy.

Ari abeb Kolosi on mataw na gilikmanib mataw asor suleq katiyta bilaqad in on mataw gigo ginad helta na walebolnan tonsa Pol tuhurit. Mataw na bilaq yaqay, Ne i gigo gunun ka muzinad ne didaq nagah udinad teq ne gihol abatan asan urotiy haq yaqay (Kolosi 2.11, 16-17; 3.11). Teq ne angelo gimen lotu emiy haq yaqay (Kolosi 2.18). Ad in bilaq yaqay, I gimomo God ago nagah ulilemabta kabemmo ahol tuwawta haq yaqay (Kolosi 2.18).

Nazaq iysa iyan Pol Kolosi gimen sansandek ka mar tonim in gigem zaway neggo haqad eman lahta. In kazaq bilam, Kraisi in nagah bunmo gifaqin iyim in amomo i ta giwaqdaqta ham. Sa dante ta asor na in i a hi gilumsihdaq ham. Dante katiyta nagan in i giqad Kraisi ago hib pesan diqmo lehdaqta ham. Ad in bilam, God in Kraisi-mo amalib nagah bunmo giqeman gwahtiqiyta ham. Teq Kraisi ago hib God ago anad awaz meqinta teq in ago zaway bunmo ulal tiqiy bugaqta ham. Kraisi i gimuganib ussa i on mataw muturta iyim i Kraisi-mo ago daq muzinauqta ham.

Pol bit giqirquran osaytab osad in sansandek ka mar tonim mataw giger Tikikus ayow Onesimus inaq negan in ad uliq Kolosi-ib a lehiyta. Teq Pol in Filemon amen sansandek mar tonad in Onesimus naqmo anan gamuk kabemmo bilamta.

**Kraisi in nagah bunmo**  
**gifaqinta iyan os kayeqmo**  
**kuluwa-kuluwmo osayta na**  
**alulin teq God ago daq**  
**bunmo inmo aholib giquis**  
**bugaqta**

<sup>1-2</sup> Ari yaqmo Pol. God-mo anad bilaqan ya Kraisi Yesus ago Aposel iyta. Ya inaqbab Timoti inaq i giger sansandek ka God ago on mataw tawonta uliq Kolosi-ib osayta na ne gimen mar tonan lehaq. I bunmo araqaqimo Kraisi aholib soqotim inaq osad iyan ne i gimaqbabmo diq iyim osayta.

Osad ne Kraisi ago gamuk muzinad gituw a hi hiqiyayta.

I Gimam God agem dimunta negad in ne gigem emid midemeqmo usan.

*Uliq Kolosi on mataw Yesus anan helmo diq haqiy*

<sup>3-6</sup> Ari kwaziqmo mataw asor Yesus awagamun dimunta ne gigo hib a lehim gibileniy. In gamuk helta na ne gibilensa God ne gimen os dimun diqta wastitayan Heven-ib usaqta na ago ne tuhuritiy. Nazaq iyan muran ne Kraisi Yesus anan helmo haqad ne God ago on mataw tawonta na bunmo gigem dimunta negayta. I ne giwagamun nazaq huritim kam bunmo i gigo Iyahta Yesus Kraisi Amam God inaq gamuk emad i esey ugauqta.

Og saw bunmo mataw Yesus awagamun dimunta bilaqsa on mataw kabemmo huritad anan helmo haqsa gamuk na in gigo hib anon kabemmo emaqta. An nazaqmo ne Yesus awagamun waqiyta nabmo gamuk na in ne gigo hib anon emim emim bo muran tiqiy. Na ezaqgo God agem dimunta ne nagta na ago agamukan ne huritim ne ginad em hasim anan helmo diq haqiyta na ago iyan.

<sup>7</sup> Mat anan Epafra haqayta naqmo in God ago gamuk na ne gigo hib a lehan ne huritiyta. I Epafra inaq garabmo God ago kabibiy mataw iyim osauqta. Teq Kraisi in mat na kabiy ugan in anononmo emad ne gilumsihad atuw a hi hiqiyaqta. <sup>8</sup> Mat na muleqim i gigo hib ta bolim in ne ginan kazaq i gibilan, God ago Bugaw Dimunta ne ginad wamuzsa ne God ago on mataw bunmo ginan ginad bilaqaqta ham.

*God Kolosi on mataw ginad helta usaqta na emid awaz meqniydaq haqad Pol in bulon*

<sup>9</sup> Epafra nazaq i gibilenan kam nab i ne gimen God bulonim bulonim bolim muran i ne gimen bulon tutad i daq na a hi hulosauqta. I ne gimen God susumun ugad i kazaq bilaqauq. God haqauq, ningo Bugaw Dimunta Kolosi on mataw na giholib emid usad in mataw na ginad emid hastitay bugsa in ginad na awaz meqin diq iyan haqauq. Ginad awaz meqniysa in ninmo ninad muzinad luw daqayta na ago in ginad em hasiy haqauq. <sup>10</sup> Ginad em hasad in Iyahta ago on matawmo diq iyeq luw osiy haqauq. Osad in ningo huritayta na in ginadib ayah iysa in ningo hurit kemiy haqauq. Hurit kemad in kabiy dimdimunta emsa kabiy na anon kabemmo gwahtiqsa Iyahta in ginan agem dimniyan haqauq. <sup>11-12</sup> Haqad i bulonauq, God haqauq, ningo zaway ayah diqta mataw ahol waqad nibin iluwayta na in on mataw na gigemab kabiy emsa in giwaz meqniyeq

osiy haqauq. Ossa afaqan amo amo giholib gwahtiqa in sorad gituw hi hiqiyani haqauq. In ginadmo dimniysa osad Gimam Iyah esey ugiy haqauq. Na ezaqgo ninmo mataw na gimen dante eman in teq leheq ningo on mataw tawonta na bunmo nenaq araqibmo ningo os dimunta tuwaq daqay haqauq. Waqeq in ningo saw anuwaniib gwahtiqaq tuqos daqay haqauq.

<sup>13</sup> Kwaziqmo romriq ago zaway awaz meqinta i ginad wamuzsa i osyauqta. Ossa God i gilumsihim giwaqim in atatin Yesus ago maror aduganiib i giqam. God in atatin na anan anad diq bilaqta. <sup>14</sup> Teq God atatin naqmo in i gigo daq meqinta walemad in i gizayan i in agota tiqiy.

#### *Krais in mat ezaqta na ago Pol bilam*

<sup>15</sup> Ari God atatin na i God ahol a hi waqauqta nog i in ahol waqauqta. In nagh bunmo God giqeman gwahtiqa na gigo Iyahta iyim osaqta. <sup>16</sup> Na ezaqgo God in atatin naqmo amalib nagh bunmo Heven-ib teq og kab giquasayta na inaqmo giqeman gwahtiqa. Nagh bunmo i gimeb ulal iyayta na teq nagh bunmo i gimeb ulilemim usayta na teq angelo giwaz meqmeqinta maror nog iyim ulilib osayta nagan teq bugaw aseseqta zaway amo amo wazayta nagan bunmo God Atatin inmo giqeman gwahtiqa. Gwahtiqim nagh na bunmo inmo anad muzingo osayta. <sup>17</sup> Teq nagh na bunmo a hi gwahtiqa inmo tuqosta. Nazaq iyan nagh na inmo ago zawayib gwahtiqim giquasayta. <sup>18</sup> On mataw in ago nan huritayta na bunmo gigo gifaqin inmo. Sa on mataw na bilaqne in anon nog iyim osayta.

In nagh bunmo gilulinta iyim in ameb hodhodab tiqeramta. Nazaq iyan God nagh bunmo giqamta na gilikmaniib inmo danmeb diq iyim osaqta. <sup>19</sup> Na ezaqgo in Amam anad bilaqan Amamgo zaway teq in anad awaz meqinta teq in ago daq bun diqmo atatin na aholib giqu bugaqta. <sup>20</sup> Sa nagh bunmo Heven-ib teq og kab giquasayta na in God geg ugsa God in atatin na eman ayib othenan turad in anedan tuwom. Woqan bab usta na tihiqiy. Hiqiyani God in daq na amalib nagh nagan bunmo gihureqan in ago hib ta bol bugiy.

<sup>21</sup> Kwaziqmo ne gigem meqinta God ugad ne in aholib hiqiy yaqay. Ad ne in anan ginad a hi bilaqsa ne daq meqmeqinta haesmo emad luw yaqay. <sup>22</sup> Luwsa God in atatin eman bolim ne gimen ahol nog hulosis tumom. Moqim in ne gimen dante eman ne God inaq an anobun tuwastitayim osayta. God ne giwastitayid ne in ago on mataw tawonta iyeq ne giholib daq araqaq ananin waq daqayta haiq iysa ne in ameb titnoneqmo tur daqay haqad in daq na

amta. <sup>23</sup> Nazaq iyan ne giwaz meqniyeq ne ginad God anan helmo haqayta na waz naqmo hiqiyeq osiy. Osad God teq ne gidimun tondaqta na ne anan helmo diq haqad ne ginad na hikidik buliyiy. Luweq mat araqaq gihureqid ne Yesus awagamun dimunta huritiya na hulosis daqay. Mataw Yesus awagamun dimunta og saw bunmo a lehim tibilaqiyta. Sa yaqmo Pol ya inaqmo wagam dimunta na ago kabibiy mat iyim osaiqtamo.

#### *Pol in Kolosi gilumsih*

<sup>24</sup> Ya ne gilumsihad ne gimen santitiy sorad ya inad dimniysa kawa osaiq. Na ezaqgo Krais in ago on mataw gilumsihnan haqad santitiy sorta na a hi hiqiy bugsa ya santitiy na ya ihol ugim sorad ya tuwolnet bugaiq. Wolnet bugad ya in ago on mataw in anon nog iyim osayta na tigilumsihaiqmo. <sup>25</sup> God ya itowun emim kabiy yagan ya Krais ago on mataw gigo kabibiy mat iyim osaiqta. Ossa in anad ya ne inaqmo gilumsihaiq haqad in kabiy na ya ibenab eman ya in ago gamuk bunmo ne gibilenaiqta. <sup>26</sup> Kam sisaq diqmo God ago gamuk alulin na ulilemim ussa on mataw bunmo a hi hurit yaqayta. Ari muran kam kab God in ago gamuk ulilemabta na eman inmo ago on mataw tawonta bunmo gimeb ulal tiqiy. <sup>27</sup> God anad in ago gamuk ulilemim usta na on mataw en ta asor Juda a haiqta nagan gigo hib anon kabemmo emsa in ago on mataw bunmo ahol waqad abin iluw daqay haqad in nazaq amta. Teq gamuk ulilemabta na alulin kazaq. Krais in ne on mataw en ta asor Juda a haiqta nagan inaqmo gimuganiib osad in teq ne giwageq giqad le in ago os dimuntab tigiqemdaq. <sup>28</sup> I Krais awagamun naqmo on mataw en bunmo gibilenauqta. Gibilensa God i ginad eman awaz meqniysa i mataw bunmo gidek wazad God ago suleq negauqta. Ad i ginad emauq, I God ago on mataw bunmo gilumsihsa in Krais aholib soqoteq inaq osad in gihol ginad tizilimsa teq i giqad le God ameb tugwahtiqam haqad i kabiy na emauqta. <sup>29</sup> In nazaq diq tugwahtiqdaq haqad ya iholtuw bulad Krais ago zaway ya iholib ayahmo usaqta na amalib ya iwaz meqniyim yaqgo kabiy na atorannmo emaiqta.

## 2

#### *Ne bunmo Yesus anan helmo haqad gamuk katiyta hulosis*

<sup>1</sup> Ari ya ne gimen kabiy ayahmo emad ihol bibiyowunaiqta ka ago ne ginad em hasiy. Ya negmo teq on mataw Laodisiyabta na teq mataw en asor ya inobun ahol a hi waqiyta na nenaqmo gilumsihnan iholtuw bulad luwaiqta. <sup>2</sup> Ya inad God ago

on mataw na bunmo gigem zaway iysa in anan ginad bilaqsa osad in mataw en amulikmo iyeq osiy haqaiq. Teq in ginad helmo haqayta na ayahmo diq iysa in ginad em hasiy haqaiq. Ginad em haseq God ago gamuk helta ulilemim usta na ago in hurit kemiy haqaiq. Teq gamuk ulilemim usta na alulin Kraism-o. <sup>3</sup> Kraism amomo i ginad eman hastitayaqta. Hastitaysa i gamuk ulilemabta na alulin hurit kemim i ginad awaz meqniysa i God ago nagah kabemmo ago ginad em hasauqta.

<sup>4</sup> Ezaq haqad ya kazaq ne gibilenaq? Luweq mat araqaq suleq katiyta negad in ago hilhil amalib ne kat negdaq haqad ya ne gimen gamuk ka mar tonaiq. <sup>5</sup> Ya ne ginaq a hi osaiqta teq ya ne ginadin tutimmo emad ya iwitan ne gigo hib os nog iyaiq. Nazaq iyan ne wastitayimmo osad Kraism anan helmo diq haqsa ya ne ginan inad tidimniyaq.

*I bunmo Kraism ago hib soqoteq teq i giwitan kayeqmo osam*

<sup>6</sup> Ne bunmo Kraism Yesus ahol waq hasim anan i gigo Iyahta haqad ahaqenib iyim osayta. Nazaq iyan ne in aholib soqoteq inaq luw osiy. <sup>7</sup> Osad ne suleq waqiyta nazaqmo ne in ago hib zaway waqad ne ginad helmo haqayta na ayah iyan. Ay aninin ogib sisaqmo wolehsa ay na zaway waqim sisaqmo gwalaqta nazaq nogmo ne zaway iyeq turad tuteqmo ne God esey ugiy.

<sup>8</sup> Ne gihol waz naqmo hiqiyeq osiy. Mataw asor eraqeq og ka ago suleq katiyta alulin haiqta amalib ne giqirureq gihureqeq ghaqad lehnan tonsa ne in gigo gamuk na hi huritiy. Mataw naqanta in gisesan gigo gamuk kwaziqta naqmo in bilaqayta. Teq gamuk na in bugaw meqinta og ka ago daq wamuzayta naqmo gigo hib bolaqta. In gigo suleq na Kraism ago hib a hi bolaqta. <sup>9</sup> Na ezaqgo God ago zaway teq in anad awaz meqinta teq in ago daq bun diqmo Kraism-aholih giquq bugaqta. <sup>10</sup> Teq Kraism abin ayah diqmo iyan angelo giwaz meqinta maror gan osayta na teq nahag aseseqta gibin inaqta nagan bunmo in ahaqenib iyim osayta. Nazaq iyan ne inmo amomo ago hib tisoqotim ne tidimniyim osad ne nagah araqaq ago siqim a hi iyayta.

<sup>11</sup> Teq ne bunmo Kraism aholib soqotan in ne gigem kwaziqta na ago zaway alulin urotim hunegan lehan ne gigem kwaziqta anad a ta hi muzinay. Bilaqne mataw gibenab gihol abatan asan urotim hunegan lehaqta nazaq nog. Teq Kraism abenabmo i gigem kwaziqta ago zaway a hi urot. <sup>12</sup> Haiqqam. Ne Kraism abinib yuw huziyta nab ne Kraism inaq moqim ne inaq hodhodab tuqus nog iyiy. Teq ne God ago

zaway Kraism wazan hodhodab eramta na anan helmo haqan God in ne Kraism inaq giwazan ne araqibmo hodhodab ta eraq nog iyiyimo. <sup>13</sup> Kwaziqmo ne gigem kwaziqta anad muzinad daq meqinta amo amo emsa daq meqinta nagan in ne ginol eman ne giwitan tumoqim usiyta. Teq God in i gigo daq meqinta na bunmo giwalem bugim in i giqeman i Kraism inaq kayeqmo osauqta. <sup>14</sup> I God ago gunun othasta na ago afaqan in i giwazan woqnan tonta. Na ezaqgo nan na in i hazizirib giqemid i amenin meqin diq waqqota. Teq God in nan na ayib dom wolan nan na ago zaway tihiqiy bug. <sup>15</sup> Sa ay nabmo God in bugaw aseseqta zaway amo amo wazayta nagan teq nagah giwaz meqinta gibin inaq iyim maror gan osayta nagan bunmo gigo zaway wolan woqan nahag nagan in mataw bunmo gimeb mataw zaway haiqta nog tiqiyiy.

*I Kraism inaq tumowta*

<sup>16</sup> Nazaq iyan ne didaq haresmo neqad yuw haresmo uluwsa mat araqaq ne ginan meqin haqsa ne in ago afaqan hi iyiy. Teq in kam aseseqta gigo gunun teq kalam mutur gwahtiqaqta ago gunun teq lotu akanan amo amo gigo gunun nagan muzgo gibilensa ne hi huritiy. <sup>17</sup> Nagah gunun emayta nagan in daq helta abeb teq gwahtiqaqta na ago adulan nogta. Teq nagah nagan ginon diq Kraism-o. <sup>18</sup> Mat araqaq sen qwayim nagah ahol wamta na agamukan bilaqad in ne gibe yahad gibilendaq. Ne gihol wazid woqsa angelo-mo giyon lotu emiy haqsa ne in aholib hiqiyta in ne gidanin hi qwayan. Mat nazaqta in mataw og kabta ginad em nog iyad inmo ahol abin iluwim nazaq bilaqayta. Teq in anad na saman diqta. <sup>19</sup> Mat naqanta in i gifaqin Kraism ago hib soqotim a hi osaqta. Ta teq i gifaqin naqmo in i giwamuzsa i in anon nog iyim osauqta. Ossa i gifaqin na in ahuliq teq abensen teq anaghan bunmo didaq negsa in aliklikin teq ahol anaghan bunmo araqibmo an wastonim usayta. Usad in anon na God-mo ago zawayib gwahtiqaqin ayah iyaqta.

<sup>20</sup> Ne bunmo Kraism inaq moqim ne bugaw og ka ago daq wamuzayta na gigo maror ahaqenib a ta hi osayta. Nazaq iyan doq tonnan ne og ka ago on matawta os nog iyad ne og ka ago gunun amikmikta nagan ahaqenib os tutay? <sup>21</sup> Gunun nagan bilaqay, Ni nagah na hi waz haqayta teq didaq na niteb hi em haqayta teq nagah na nibenab hikidik mirirewun haqayta. <sup>22</sup> Teq gunun amo amo nagan in nagah tuteqmo usdaqta na ginan a hi bilaqay. Haiqqam. Mataw in nagah gunun emayta na wazim neqsa in hiqiyayta. Gunun nazaqta na mataw in ginadibmo giqeman gwahtiqaqan



teq in asuleqin i gibilenayta. <sup>23</sup> Helmo i gunun nagan huritsa in bilaqne gunun dimdimunta nog iyayta. Na ezaqgo gunun anamreniz na bilaqay, I giholyon gunun emta kagan muz naqmo hiiqiyad i gihol wazan woqsa i gigem kwaziqta na a hikidik muzinauqta haqayta. Teq haiq. Gunun nawa in emayta na in i gigemab ginad kwaziqta naghaharesmo utetaqta na a hikidik wasihaqta.

### 3

#### *I Krais inaq hodhodab usim ta eraw*

<sup>1</sup> God ne Krais inaq hodhodab giwazan eraqiya. Eraqim muran Krais ulilib gwalehim God aben aqabun ban tuqos woqim osaq. Nazaq iyan ne naghah dimdimunta Krais ago hib usaqta naqmo ginagunad luwiy. <sup>2</sup> Luwad kam bunmo ne naghah dimdimunta ulilib usaqta naqmo anadin emad ne og ka ago naghah nagan anadin diq hi emiy. <sup>3</sup> Na ezaqgo ne tumoqiya. Moqim muran ne kayeqmo osayta alulin na in ulilemim Krais inaq God ago hib usaqta. <sup>4</sup> Krais-mo ne giqeman ne kayeqmo osayta. Abeb in ulalab bo gwahtiqa nab ne Krais inaq araqibmo mataw gimeb ulal tiqiy daqaymo. Ulal iyeq ne Krais ahol anuwani dimniyeq ossa on mataw bunmo ne tigibiy kem daqay.

#### **Krais i gimuganib ussa i on mataw muturta iyim osauqta**

##### *I on mataw muturta tiqiy*

<sup>5</sup> Nazaq iyan ne og ka ago ginad meqinta gigemab usaqta na gileh ugad wolid moqan. Ne an haresmo hureqim inaq usayta na, teq ne daq anumlan inaq emayta na, teq ne gihol atoranno eraqta na, teq ne daq meqinta haresmo emgo ginad bilaqta na, teq ne naghah haresmo utetayta na, daq nagan bunmo ne giholib muzid lehan. Mat naghah haresmo utetaqta na in bilaqne god katiya tumuz nog iyaq. <sup>6</sup> Mataw God aqez othasad daq meqmeqinta nazaq emsa iyan God ago agem meqniy nawa in gigo hib teq gwahtiqaqta. <sup>7</sup> Kwaziqmo ne mataw meqinta na nenaq luw osad ne in gigo daq na em yaqaymo. <sup>8</sup> Teq muran ne daq meqinta nagan bunmo hulos bugiy. Ne gigem meqniyaqta na, teq ne mataw atoranno ginad yaqayta na, teq ne an agem meqinta ug yaqayta na, teq ne an agilehunan bilaq yaqayta na, teq ne gamuk meqinta amalib an wad yaqayta nagan bunmo ne hulos bugiy. Bilaqne mat araq tubusan meqinta hasim hunegan lehaqta nazaqmo ne daq nagan hulos tayiy.

<sup>9</sup> Ne ginad kwaziqta ago daq meqmeqinta inaq na ne gimuzan tilahta. Nazaq iyan ne an hi kat ugiy. <sup>10</sup> Teq ne ginad

muturta na waqim giholib eman in ne ginad kwaziqta na ago ban tuwaq bug. Waq bugan ne God ago tuhurit kensa inmo ne ginad eman mutur iyad ne ginad in anad nog iyaqta. <sup>11</sup> Nazaq iyan mataw ginad buliyim mutur iyayta na bunmo in araqibmo iyim osayta. In gilikmanib Grik mat haiq. Teq Juda mat haiq. Teq mat ahol abatan asan urotta na haiqmo. Teq mat asan a hi urotta na haiqmo. Mataw muturta na gilikmanib mat asen tob bolta na haiqgam teq mat yabyabta haiqmo teq kabibiy mat samanta haiqgam teq mat anadibmo samanmo luwaqta na haiqmo. Krais amomo osad teq in ago on mataw bunmo giduganib osaqtamo.

#### *I ginad dimunta gimaqbaban negad gilowan tonuq*

<sup>12</sup> God ne gitowun emim in aholyon ne tigiwamta. Giwaqan ne in ago on mataw tawon diqta tiqiyim ossa in ne ginan anad diq bilaqta. Nazaq iyan ne daq dimunta kazaqta waqeq giholib emiy. Ne mataw bunmo ginad dimunta negad gilowan toniy. Ad ne gihol wazid woqsa ne mataw nenaq midemqanmo osiy. Osad ne afaqan sorad gituw hi hiiqyan. <sup>13</sup> Ni nimaqbab araq in nimeqin tonid ni nigem hidmo hi meqniya ni tok nemeq os. Osad ni nan ugdaqta na hulosad ni nimaqbab ago daq meqinta na walemad anadin ta hi em. Iyahta ne gigo daq meqinta bunmo tigiwalamta. Nazaq iyan ne an ago daq meqinta walemad anadin a ta hi em daqaymo. <sup>14</sup> Teq daq ameb diqta ne em daqayta na in kazaq. Ne an anan ginad bilaqsa osiy. Daq na in bilaqne am nog ne gituq tonid ne araqibmo titnoneqmo ossa ne gigo os tidimniydaq. <sup>15</sup> Sa Krais ne ginad wamuzsa ne zib alowabmo osiy. Ne nazaqmo os daqay haqad God in ne gililewunim giqeman ne mat amulikmo anon nog iyim osayta. Kam bunmo ne God esey ugad osiy. <sup>16</sup> Osad ne Krais ago gamuk dimunta na alowan tansa in ne giholib anon emeq usan. Ussa ne ginad em hasad suleq dimunta amo amo an bulonad teq ne an adek wazad osiy. Ad Buk Song-ib bar usaqta na teq lotu abarin amo amota na teq bar asor Bugaw Dimunta eman ne ginadib gwahtiqaqta nagan ne wazad gigemabmo diq God esey ugiy. <sup>17</sup> Ad ne gamuk bunmo bilaqayta na teq kabiy bunmo ne emayta na ne Iyahta Yesus-mo abin emid ayah iynan haqad ne emiy. Teq Yesus ayahmo gidimun tonta na ne anadin emad ne Gimam God esey ugad osiy.

#### *Mat ago aw amun nenaq anononmo os daqayta na agamukan*

<sup>18</sup> Ari ne on mat tuwaqiya na, ne gidug-niz giqez huritad gihaqenib osiy. Ne

Iyahta ago on tiqiyim iyan ne nazaqmo os daqayta. <sup>19</sup> Teq ne mataw aw tuwaqiyta na, ne giqonan ginan ginad bilaqsa ne in ginadad atoranmo hi gibileniy. <sup>20</sup> Ari ne onmin, ne ginenmaman giqez huritad ne in ginad muzin bugiy. Iyahta in daq dimunta nazaqta anan anad bilaqqaqta. <sup>21</sup> Teq ne onmin gimaman, ne gigo onmin gigem emid hi meqniyan. Luweq in gihol loyinsa in kabiy araq dimunta emgo biyab a hi iy daqay.

*Kabibiy mataw in gigo aseseqta nenaq anononmo os daqayta agamukan*

<sup>22</sup> Ari ne kabibiy mataw samanta ne gigo mataw aseseqta og kabta na giqez huritad muzinad osiy. Luweq ne ginad em daqay, I gigo aseseqta kawa osay haqad ne kat negad in gimebmo kabiy emsa in ne ginan ginad dimniy daqay. Haiqqam. Ne Iyahta amomo anan rabad ne ginad amulikmo iyeq kabiy anononmo emiy. <sup>23</sup> Ne gigo aseseqta naga kabiy an negid ne ginad bilaqsa emmo emiy. Ne matmo ago kabiy a hi emayta. Haiqqam. Ne Iyahta ago kabiy emayta. <sup>24</sup> Teq ne Iyahta anad muzinad osayta na amenin in ago os dimunta tinegdaq. Na ago ne tuhuritiyta. Nazaq iyan ne ginad emiy. Kraisa amomo in Iyahta iyim ossa ne in amen kabiy emayta. <sup>25</sup> Teq mat daq meqinta emaqta na in nazaqmo Iyahta abenab in ago daq na amenin tuwaqdaqmo. Kam nab Iyahta in on mataw bunmo gimen daq amulikmo emad in mataw asor gigomo a hi lehdaqta.

#### 4

<sup>1</sup> Ari kabibiy mataw gigo aseseqta na, ne gigo kabibiy mataw samanta na gimen daq titnonta emad ne in gilowan toniy. Ne ginad emiy. Ne gigo Iyahta Heven-ib osad in ne gibiy muzaqtamo.

*I bunmo God inaq gamuk emad teq i titnoneqmo luw osuq*

<sup>2</sup> Ne tuteqmo God inaq gamuk emad ne daq na hi hulosisy. Teq ne ginad em haseq God bulonad in ne giqez wazta na ago ne esey ugiy. <sup>3</sup> Ad ne i gimen God buloniyimo. Bulonsa in i gimen dante em igid teq i Kraisa ago gamuk ulilemim usta na on mataw gibilen kemam. Gamuk naqmo ya bilaqsa mataw ya iwazim iqiqruran ya kawa osaiqta. <sup>4</sup> Ne yaqmen God bulonsa ya in anad muzinad ago gamuk ulilemabta na ulalabmo bilaq sireqdaq haqad ya kawa ne gibilenaq.

<sup>5</sup> Ne mataw God ago maror asan ban osayta na gimeb anononmo luw osiy. Ad ne gigo kabiy dimdimunta em daqayta akaman na abu ulumad samanmo hi osiy. <sup>6</sup> Kam bunmo ne on mataw gamuk dimdimunta gibilenad luwsa ne gigo

gamuk akamoymoyan inaq iyan, bilaqne kamis didaq eman aneq dimniyaqta nazaq nog. Ne nazaq emad teq ne ginad em hasad on mataw bunmo giqez amenin tiqem daqay.

*Pol in Tikikus ayow Onesimus inaq giqeman Yesus ago on mataw Kolosi-ib osayta na gigo hib lehiy*

<sup>7</sup> Tikikus teq ya ihol awagamun ne tigi-bilen kemmaq. Mat na in i gimaqbab dimun diqta. In Iyahta ago kabiy emad atuw a hi hiqiyaqta. Teq i mat na inaq araqqibmo Iyahta ago kabibiy mataw iyim osauqta. <sup>8</sup> In i giwagamun gibilenad teq in ne gigem emid awaz meqniyaq haqad ya eman in ne gigo hib nawa lah. <sup>9</sup> Sa ya negmo gigo mat araq Onesimus eman in Tikikus inaq ne gigo hib lahmo. Onesimus in i gimaqbab dimun diqta. Teq in i gilumsihad atuw a hi hiqiyaqta. Mataw giger naqmo teq nagah bunmo i gigo hib kab gwahtimta na ago in ne tigi-bilen bug daqay.

*Pol ayogniz nenaq gigo zeq dimun eman Kolosi giyon lah*

<sup>10</sup> Ari Aristarkus in ago zeq dimun eman nawa ne gigo hib lehaq. Ya mat na inaq giqiqruran bit kab osauqta. Sa Barnabas ayan Mak in ne gimen zeq dimun eman nawa lehaqmo. Ya ne gimen gamuk ta mar tonta nab ya mat na anan ne tigi-bilenta. In le ne gigo hib gwahtiqid teq ne waziniy. <sup>11</sup> Sa mat anan Jisas haqayta na in ago zeq dimun eman nawa lehaqmo. In anan araq Jastus haqaytamo. Juda gilikmanib mataw ezeqman naqmo in ya nenaq araqqib God ago maror akabiy an emauqta. In ya ilumsihsa ya igem dimun dikan iyaqta.

<sup>12</sup> Teq negmo gigo mat anan Epafras haqayta na in ne gimen zeq dimun eman nawa lehaqmo. Mat na in Kraisa Yesus ago kabibiy matta teq in aholtuw diq bulad ne gimen God tutimmo bulonaqta. In anad God ne gilumsihsa ne gihol ginad bunmo zilimsa ne God anan helmo diq haqad giwaz meqniyeq tur daqay haqad in ne gimen God bulonaqta. <sup>13</sup> Mat na in ne gimen kabiy atoranmo emad in mataw uliq Laodisiya-ibta na teq mataw uliq Herapolis-ibta na gimen kabiy ayahmo ammo. Ya in ago hurit kemta iyim ya ne gibilenaq. <sup>14</sup> Sa ya iyow dimunta Luk, mat gihol wastitay akabiy an emaqta na, in ayow Demas inaq ne gimen zeq dimun eman nawa lehaqmo. <sup>15</sup> Ne yaqgo zeq dimun ka i giyogniz uliq Laodisiya-ib osayta na negiy. Ad ne aw anan Nimfa haqayta na teq Yesus ago on mataw in ago bitab humab wolayta na nenaq yaqgo zeq dimun ka in negiyimo.

<sup>16</sup> Ari ne sansandek ka ahol tuwaqeq teq ne Yesus ago on mataw Laodisiya-ib osayta na gimen emid lehan. In in-aqmo sansandek ka ahol waq daqayta. Ad ya sansandek eman Laodisiya-ib lahta na in ne gigo hib em lehid teq na ne ahol waqiyimo.

<sup>17</sup> Teq ne mat anan Arkipus haqayta na kazaq buloniy, Ni Iyahta abenab kabiy wanta na anadin emad ni emid hiqiy bugan haqiy.

<sup>18</sup> Ari ya Pol yaqmo iholbenab yaqgo zeq dimun ka mar tonim ne giyon eman nawa lehaq. Ya bit kab iqirquran osaiqta ka ne anadin emiy.

Ari God agem dimunta negsa ne osiy. Nawaqmo.

# 1 Tesalonaika

## 0

### Sansandek amebta Pol mar tonan uliq Tesalonaika-ib lahta

### Gamuk ameb lehaqta

Uliq Tesalonaika in uliq araq saw Masedoniya-ib usaqta. Pol uliq nab lehim Yesus awagamun gibilensa on mataw kabemmo Pol aqez huritim in Yesus Kraiss anan helmo tihaqiy. Haqsa Juda nazaq gibiyad gigem meqniysa in Pol muzan uliq Tesalonaika hulosis tilah (Aposel 17.1-9 nab teq ni ahol waq). Abeb Pol lehim uliq Korin-ib ossa in ayow Timoti bolim Yesus ago on mataw uliq Tesalonaika-ib ezaq iyim osayta na ago in Pol bulon.

Bulonan Pol in Tesalonaika-ib on mataw ginad helta na zaway ugnan haqad sansandek ka mar ton, in ayogniz giger Timoti ayow Sailas inaq. Mar tonim Pol gamuk alulin kazaqta gibilan. In Tesalonaika on mataw Yesus asen muzinad osayta na ago huritim anad ayahmo dimniysa gibin iluw. Teq Tesalonaika-ib mataw asor Pol abin wazan woqsa Pol ahol adanin qwayim bilam, Ya iyogniz nenaq le ne nenaq osad i Yesus awagamun dimunta gibilenad i ne gigo nagah araq a hi hurew ham. Teq uliq nab Juda mataw helmo a hi haqiyta na in Kraiss ago on mataw afaqan negsa in zaway iyeq turgo haqad Pol gibilanmo. Ad on mataw na in gigo os kwaziqta na gileh ugad in an haresmo hureqeq inaq hi usgo haqad in bilammo.

Teq afaqan araq ayahta in gigo hib us na kazaq. Yesus muleqim hidmo a ta hi bolsa in ago on mataw Tesalonaika-ibta na asor moqsa in giyogniz ginadnad em yaqay, luweq mataw na hodhodab ussa Yesus ta bolid in kam na ahol a hi waq daqay haqad. Sa ta asor bilaq yaqay, Yesus ta boldaqta na sinsin tiqiysa iyan i kabiy hulosaad ginadibmo samanmo osuq haq yaqay. Haqsa Pol bilam, Haiq ham. Yesus ta boleq in mataw tumoqiya na a hi gihulosdaq ham. Danmeb diq in mataw tumoqiya na giwazid hodhodab eraqsa in tigiwaqdaq ham. Haqad in gibilan, Ne Yesus amen emad samanmo hi osiy ham. Ne gituw inaq iyeq mataw aseseqta giqez huritad teq ne kabiy dimdimunta emad osiy ham.

### Pol ayogniz nenaq in Tesalonaika on mataw ginan ginad diq meqniy

<sup>1</sup> Yaqmo Pol, ya iyogniz Sailas ayow Timoti nenaq i gamuk ka mar tonim ne Yesus ago on mataw uliq Tesalonaika-ib osayta na gigo hib eman leh neqaq. I Gimam God teq i gigo Iyahta Yesus Kraiss inaq in ne giwamuzsa ne in gihaqenib osayta.

God agem dimunta negad in ne gigem emid midemeqmo usan.

*Tesalonaika on mataw God anan helmo diq haqsa Pol in ginan anad ayahmo dimniy*

<sup>2-3</sup> Ari kam bunmo i ne ginadin emad God esey ugauqta. Ne God anan helmo haqad kabiy dimunta emayta. Emad ne on mataw ginan ginad bilaqsa gilumsihayta. Teq ne i gigo Iyahta Yesus Kraiss ta boldaqta na anan helmo diq haqad ne amen emad gituw a hi hiqiyayta. I ne gigo daq dimdimunta nagan anadin emad sirisirimo i ne gimen i Gimam God bulonaqta.

<sup>4-5</sup> I gimaqbaban, God ne ginan anad diq bilaqtaqta. Kwaziqmo i God ago gamuk dimunta ne gigo hib a lehim gibilensa i giqezab gamuk gwahtiqaqta na in gamuk amidemqanta nog a hi iyyaq. Haiqqam. I God ago gamuk ne gibilensa God daq azawayin inaqta giqemid gwahtiqaqmo. Gwahtiqaqsa God ago Bugaw Dimunta i gilumsihsa i helmo diq haqad gamuk atoranmo gibilenyaqta. I mataw nazaq diqta iyim ne gilikmanib osad gilumsihyaqta na negmo tuhurit kemiyta. I God ago gamuk ne gigo hib a lehan daq nazaq ne gilikmanib gwahtiqaq in ginad emauq. Helmo God inmo aholyon ne tigiwamta haqauq.

<sup>6</sup> Kam nab ne God ago gamuk huritsa God ago Bugaw Dimunta in ne ginad wazan eraqsa ne ginad dimniysa gamuk na waqim gigemabmo emiy. Emim teq ne i gigo daq muzinad teq ne Iyahta asen muzinim ne afaqan sorad God ago gamuk na a hi hulosisy. <sup>7</sup> Ne nazaq emsa saw giger Masedoniya-ib teq Akaya-ib on mataw God anan helmo haqayta na bunmo in ne gibiyad ta in negmo gisen tumuzinaymo. <sup>8</sup> Teq ne Iyahta ago gamuk eman saw giger Masedoniya teq Akaya gimomo gigo hib a hi lah. Haiqqam. On mataw uliq saw bunmo in ne God anan helmo haqayta na awagamun tuhuritiymo. Bilaqne mataw zoq iysa ahulan uliq-uliqgo lehaqta nazaq nog. Nazaq iyan i mat araq ne gihol awagamun bulonamta na haiq tiqiy. Ne mataw bunmo ne gigo tuhurit bugiy. <sup>9</sup> I uliq-uliqgo luwsa on mataw ne giwagamun bilaqsa i huritauqta. In bilaqay, Pol ayogniz nenaq uliq Tesalonaika-ib lehan mataw nabta na in gigem dimunta negad giwaziniy haqayta. Giwazinad in gigo god katiyta nagan gihulosad in gihol buliyim God helta kuluwa-kuluwmo osaqta na ago

hib tisoqotiy haqayta. <sup>10</sup> Soqotim in God atatin Amamgo saw huloseq muleqeq ta boldaqa na baq tunim osay haqayta.

God atatin na moqan God wazan ta er-amta. Na in Yesus-mo. In i gilumsihsa God ago agem meqniy abeq teq gwahtiqad in bo i a hi gimeqin tondaq.

## 2

*Pol uliq Tesalonaika-ib kabiy amta na anan bilam*

<sup>1</sup> Ya imaqqaban, i ne gigo hib lehim kabiy eman kabiy na le samanta a hi iy. Na ago ne tuhuritiyta. <sup>2</sup> Teq i ne gigo hib le a hi gwahtiqadmo i uliq Filipay-ib osad afaqan ayahta sorta na ago ne tuhuritiymo. Mataw uliq nabta na in i gibilawunad teq in i gimeqin diq ton yaqay. Ta teq i gigo God in i gigem ulumsih naqmo hiqiyisa i bab girabunad gihol a hi hureq has. Haiq. I giwaz diq meqniyim ne gigo hib tileh. Lehan ne gigo uliqab mataw asor nazaqmo i gibaymuzsa i na ago a hi bilaqad God i gimen dante amta agamukan dimunta na i ne tigibilenmo. <sup>3</sup> Teq i a hi rabad ne ginad buliygo gibilenta na alulin in kazaq. I ginad a hi em hasad gamuk bilaq kireh tonim a hi gibilen. Ad i ne ginad hureqid ne i nenaq daq anuflan inaqa emgo i a hi bilaw. Teq i kat negad i gigo soysoy amalib ne a hi gihurewmo. <sup>4</sup> Haiqqam. God i gilum kemim i gimugan ezaq diq iyim usaqta na inmo ahol waq kemaqta. In i gimugan ahol waqan i in ago gamuk bilaq sireqamta iyan in Yesus awagamun dimunta na i gibenab amta. Eman i in ago gamuk na wastitay-immo bilaqauqta. Teq i mataw ginad buliyid in i ginan gigem dimniy daqay haqad i kabiy na a hi emauqta. Haiqqam. I God-mo agem emid dimniydaq haqad kabiy na emauqta.

<sup>5</sup> I ne gigo hib gamuk a lehta nab i soysoy a hi neg. Na ago ne tuhuritiyta. Ad God i gibiyisa i ne gigo nagah samanmo giwaqgo haqad gamuk na a hi gibilenmo. <sup>6</sup> Teq i gibin ayahta waqgo adanteqin nagunim i ne gigo hib kabiy a hi emmo. Ad ne i gibin iluwgo haqad i ne a hi gibilenad teq i mataw ta asor nazaq a hi gibilenmo. <sup>7</sup> Helmo, i Kraiss ago Aposel osauqta. Nazaq iyan i ginad bilaqid i ne qiçemid ne i gilum-sihgo azawayin i giholib kawa usaqta. Teq i nazaq ne a hi gitonad i nenaq kiskismo osta, bilaqne aw in ago onmin gilowan tonad giwamuzim osaqta nazaq. <sup>8</sup> I ne ginan ginad diq bilaqauqta. Nazaq iyan i Yesus awagamun dimunta God igta na i gimomo giholyon a hi wazad i ne gibilenan ne hurit toniyimo. Teq i gamuk amomo ago hib a hi gilumsihta. Haiqqam. I God ago gamuk negad i ne gimen gihol nog

hulosmo. Na ezaqgo i ne giloyinsa ne i giquitil anabun asormo diq iyiyta na ago.

<sup>9</sup> I gimaqqaban, i giholtuw bulad kabiy ayahmo ne gilikmanib emta na ne ahol tuwaqiy. I zeqab taromab inaqaqmo kabiy emyauqta. I ne gimen kabiy emad teq i igmo giholyon kabiy emyauqta. Luweq i Yesus awagamun dimunta God igta na gibilensa ne didaq nagah igad ne gihol husisiqdaq haqad. I afaqan nazaq negnan hulosityauq.

<sup>10</sup> I le ne nenaq ossa ne i gibiy kemiyya. I nenaq osad i gigo daq tawon diq iyim titnonimmo lehsa i daq araç ananin waqamta a hi emyauq. Teq i nenaq osad daq nazaq emsa God i gibiytamo. <sup>11</sup> Mat ago onmin anononmo giwamuzaqta nazaqmo i ne giwamuzyauq. Na ago ne tuhuritiyta. <sup>12</sup> Giwamuzad i ne gigem zaway negnan haqad i ginad awaz meqin amalib gibileneq bilaqyauq, God in ne gililewunim bilaqaq, Ne boleq yaqgo maror aduganib gwahtiqeq osiy haqad in bilaqaq haqyauq. Ne bo tugwahtiqeq teq ne yaqgo os dimunta na tuwaq daqay haqad in bilaqaq haqyauq. Haqad i ne gibe yahad gibilenyauq, Ne gigo luw os in God ago liley na inaç rireneqmo usan haqyauq.

*Yesus ago on mataw uliq Tesalonaika-ibta na in God anan helmo diq haqad zaway iyim turad afaqan soriy*

<sup>13</sup> Ari nagah araç ago i tutimmo God esey ugauqta na in kazaq. Kwaziqmo ne God ago gamuk i qiçezab waqiyta nab ne mat araç og kabta ago gamuk waq nogmo a hi iyiy. Haiq. Ne bilaqne God aqezab gamuk waq nog iyiyta. An helmo, gamuk na in God-mo ago gamukta. Ne gamuk na waqan in ne mataw helmo haqayta na gigemab kabiy atoranmo tiqemaqta. <sup>14</sup> I gimaqqaban, saw Judiya-ib God ago on mataw Kraiss Yesus aholib soqotim ago nan muzinsa in gigo ginedan Juda naqmo in afaqan kabemmo tinegiy. An saw Judiya-ib on mataw na gigo hib daq gwahtimta nazaqmo diq ne gigo hib gwahtimtammo. Ne Yesus anan helmo haqsa iyan negmo gisenlul naqmo in afaqan ne tinegaymo. Ne Yesus ago on mataw gidauhan saw Judiya-ib osayta na gisen muzinim afaqan sorsa i ginad emauq, God ago gamuk ne gigemab kabiy tiqemaq haqauq.

<sup>15</sup> Juda mataw helmo a hi haqayta naqmo in Iyahta Yesus wol emiyta. Ad in God ago nantut ginol emiytamo. Teq mataw naqmo in ne gigo sawab i gimuziytamo. Mataw na in God anad a hikidik muzinad in mataw bunmo gibabunmo diq iyim luwayta. <sup>16</sup> Nazaq iyan i God ago gamuk a luwad on mataw in ta asor Juda a haiqta nagan gibilensa Juda mataw na i gidanin

qwaynan tonayta. In ginad emay, Luweq mataw en ta asor na God ago gamuk huritad anan helmo haqsa God in gilumsiheq ta giwaqdaq haqayta. In nazaq tutimmo emsa in gigo daq meqinta kuluwmo diq iyim ban tuwaq bugaq. Samo God ago agem meqniy in mataw na sisaqmo gimuzad luwim muran in giholib ulal iyim tigiimeqin tonaq.

*Pol le Tesalonaika on mataw a ta gibiygo anad bilaq naqmo hiqiyayq*

<sup>17</sup> I gimaqbaban, i le ne gigo hib ossa Juda mataw na bolim i tigi muziy. Gimuzan i ne ginobun ahol a ta hi waqyauq. Ta teq i gigem ginad inaq ne gigo hib tuqus tutyauq. Kam asimqanta nab i bilaqne onmin amanmaninta ginen gimam haiqta os nog iyyauqta. Osad i ne ginobun ahol a ta waqgo ginad bilaqsa i giwaz meqniyim lehan yo hiqiyauqta. <sup>18</sup> I ne gigo hib lehnan ginad diq bilamta. Yaqmo Pol ya ime kabemmo ne gigo hib lehgo inad emyayqta. Teq haiq. Satan tuteqmo i gidanin qwayyauq. <sup>19</sup> Ari i ne gigo hib lehnan ginad bilaqyaqta na alulin in kazaq. Abeb i gigo Iyahta Yesus ta bolid i in ameb turad naga diq ago i ginad dimniydaq? Teq Yesus in naga diq ago i ginan anad dimniydaqmo? Teq i Yesus ameb tursa naga diq i giholib ussa in i gibiyad giben tiqiluwdaq? Bilaqne i gifaqinib baliy dimunta titoreq Yesus ameb gwahtiqid in i gibiyad ame sirirdaqta nazaq? Nagah nagan bunmo alulin na negmo. <sup>20</sup> Helmo diq. Yesus ameb i giben ayah ydaqta alulin na teq i ginad dimniydaqta alulin na negmo.

### 3

*Pol Timoti eman in Tesalonaika on mataw gilumsihnan lah*

<sup>1</sup> Ari kam sisaqmo i ne gigo a hi huritad osan haiq i ginad tiqem, Yaqmo Sailas inaq uliq Atens-ib kab osad i Timoti emid ne gigo hib tilehdaq haw. <sup>2</sup> Haqad i Timoti eman ne gigo hib nawa tilah. Timoti in i gigo maqbab ara q teq i inaq garabmo God ago kabibiy mataw iyim i ara qibmo Kraiss awagamun dimunta na bilaqyauqta. I ginad em, Timoti leheq in ne gigem zaway ugad teq in ne ginad helmo haqayta na ulumsihid awaz timeqniydaq haw. <sup>3</sup> Awaz meqniyid teq mataw ne gimeqin tonad gibaymuzsa ne gihol a hi hureq has daqay haw. Ne tuhuritiyta. I afaqan nazaq waqamta na God i gimen kwaziqmo tibilaqan ussa i aban a hi emamta. <sup>4</sup> Helmo, kwaziqmo i nenaq osad i gibileneq bilaqyauq, Abeb teq i santitiy waqam haqyauq. Haqan daq nazaqmo diq gwahti qan ne ahol tuwaqay. <sup>5</sup> Nazaq iyan ya ne ginadin emad osan haiq ya hidmo

Timoti eman tilah, ne ginad helmo haqayta na dimunmo usaq o haiq na ago ya huritnan haqad. Luweq Mat I Gilum Waqayta na in ne gilum waqid i ne gilikmanib kabiy emta na le saman tiqiydaq haqad.

*Timoti nan dimunta Pol ago hib a bolan Pol anad dimniy*

<sup>6</sup> Ari Timoti in ne gihulosim muran diq kawaqmo bo tugwahtim. Gwahti qim in ne giwagamun bilaqad ne ginad helta na waz naqmo hiqiyad on mataw bunmo ginan ginad bilaqayta na ago in i tigibilan. Gibilenan gamuk na i gidekib dimunmo diq iy. In bilam, Tesalonaika on mataw na tutimmo i ginadin emad in gigem dimunta igayta haqad in bilam. Ad i ne gibiygo ginad bilaqayta nazaqmo ne i gibiygan ginad bilaqaymo haqad in bilam. <sup>7</sup> I gimaqbaban, i kab ossa mataw i gimeqin tonad afaqan kabemmo igayta. Ta teq ne God anan helmo diq haqad osayta na ago i huritim i zaway muturta waqim i giwaz meqniyim afaqan na tisorauq. <sup>8</sup> Na in kazaq. Ne Iyahta ago hib giwaz meqniyeq ossa i nazaqmo dimunmo tuqosammo. <sup>9</sup> I ne ginadin emad i gigo God ameb i ne ginan ginad diq dimniyayta. Ginad dimniyga tutimmo i God esey ugad i ne ginan gigem dimniyayta na ago i bilaq buggo biyab a hi iyauq. <sup>10</sup> Ad zeqab teq taromab i ginad awaz meqin amalib God bulonim bilaqayq, Ni i giyon dan wastitayid i le mataw ko ginobun ahol ta waquq haqayq. I le ne gibiyad teq nagah asor ne ginad a hi em hasayta na i giqisihunid ne ginad helmo haqayta na awaz timeqniy hasdaq haqad.

*God Tesalonaika on mataw gilumsihgo haqad Pol in bulon*

<sup>11</sup> Teq ya iyogniz nenaq i ne gimen i Gimam God bulonad i kazaq bilaqayq, God haqayq, Ni i gigo Iyahta Yesus inaq i gilumsihid i dan inaq iyeq Tesalonaika gigo hib lehuq haqayq. <sup>12</sup> Haqad i bilaqayq, Iyahta haqayq, ni Tesalonaika on mataw na gilumsihsa in an anan ginad bilaqsa ossa daq na in gilikmanib ayahmo gwahti qan haqayq. Gwahti qsa i in ginan ginad ayahmo bilaqayta nazaqmo in on mataw bunmo ginan ginad bilaqan haqayq. <sup>13</sup> Haqad i ginad emauq, In ne zaway nazaqta negsa teq ne giwaz meqniyeq ossa le i gigo Iyahta Yesus in ago on mataw tawonta bunmo nenaq ta bol daqay haqayq. Bolid kam nab teq ne i Gimam God ameb turad ne giholib daq ara q ananin waq daqayta haiq iysa ne in ago tawon diqta tiqiy daqaymo haqayq.

**Tesalonaika on mataw tuteqmo daq dimimunta emad os daqay**

## 4

*I an haresmo hi hurequq*

<sup>1</sup> I gimaqbaban, i gigo gamuk ta asor usaqta na in kazaq. Ne ezaq luw os daqayta na ago i ne gicisihunan ne ahol tuwaqim ne nazaqmo tiqemay. Ad i God anad emid dimniygo adanteqin muzinsa ne i gibiy kemim dante na ne tumuzinaymo. Nazaq iyan i nenaq araqibmo Iyahta Yesus aholib soqotim osad i ginad awaz meqin amalib kazaq gibilenauq. Ne daq dimdimunta nagan em tutad ne ayah diqmo emiy haqauq.

<sup>2</sup> I Iyahta Yesus ago hib suleq wawta naqmo i ne gibilenan ne tuhuritiyta. Suleq na kazaq bilam, <sup>3</sup> God anad ne in ago on mataw tawon diqta iyeq ne gihol anumlan haiqmo osiy ham. In ago suleq nazaq bilaqan ne in anad na muzinad an haresmo hureqeq inaq hi usiy. <sup>4</sup> Ad ne amulik-mulikmo ginad em hasad ne daq dimunta amalib yow emeq teq an waqiy. An waqad teq ne giqonan nenaq God ameb tawon diqta iyeq osiy. <sup>5</sup> Osad ne gihol atoranmo eraqsa ne ginad meqinta on haresmo giquetayta na ne hikidik muziniy. Na in on mataw en ta asor God abin a hi huritiyta nagan gigo daqta. Mataw nazaqta in God ago asit a hi huritiyta. <sup>6</sup> Luweq ne nazaq emeq teq ne gimaqbab araq kat ugad ago an waq timeqin ton daqay. Ne nazaq hikidik emiy. Na ezaggo Iyahta inmo daq meqinta nazaqta bunmo aqenin waqaqta. I mebmemo ne gidek wazim i atoranmo nazaq gibilenta. <sup>7</sup> I daq anumlan inaqta emgo haqad God i a hi gililewun. Haiqqam. I in ago on mataw tawon diqta iyeq ginumlan haiqmo osgo haqad in i gililewunta. <sup>8</sup> God anad i nazaq wastitayeq osam haqad in ago Bugaw Dimunta igaqta. Nazaq iyan on mataw an waq asuleqin teko ya bilayta na gileh ugad in matmo aqez a hi othasayta. Haiqqam. Na in God-mo aqez othasayta.

*I daq dimunta emad gituw hi hiqiyen*

<sup>9</sup> I gimaqbaban, Ne an anan ginad bilaq ago adan na God-mo ne tigiqisihun. Nazaq iyan ne gimaqbaban Kraiss ago on matawta na ginan ginad bilaqgo agamukan araq ya a ta hi mar ton negdaiq. <sup>10</sup> Helmo ne gimaqbaban saw Masedoniya-ib osayta na bunmo ne gigem dimunta in negayta. Teq muran i ne gibe yahad a ta gibilen tonauq. Ne daq na tuteqmo emsa in ne giholib oy soqotid ne daq na ayahmo emad osiy haqauq. <sup>11</sup> I kwaziqmo gibilenta kazaqmo ne emiy. Ne tok nemeq osad negmo gigo kabiyta naqmo ne anadin emad ne mat ta araq ago nagah anan hi bilaqiy. Ad ne samanmo hi osad kabiy daq emiy. <sup>12</sup> Ne nazaq emad teq ne mataw God ago maror asan ban osayta na nenaq titnoneqmo osad ne nagah araq ago siqim a hi iy daqay.

*Iyahta teq muleqeq i gigo hib ta boldaq*

<sup>13</sup> Ari i gimaqbaban, ne gigo on mataw asor tumoqiya na ago ne ginadnad emgo i hulosaq. On mataw God anan helmo a hi haqayta na in moqeq God inaq kayeqmo os daqayta nazaq in ginad a hi emayta. Nazaq iyan in gigo mat araq moqan in moqab lehim giquitil tartaysa in gaq ayahmo wazayta. Ari luweq ne ginad a hi em haseq ne gisenlul araq moqid ne nazaqmo gaq ayahmo waz daqaymo. Ne nazaq hi emiy. <sup>14</sup> I Yesus moqim ta eramta na anan helmo haqauqta. Nazaq iyan i ginad emauq, God in on mataw Yesus anan helmo haqad osim moqiya na giwaz eraqeq in Yesus inaq ta bol daqay haqauq.

<sup>15</sup> Iyahta i gibilenan i in aqez tutad kazaq ne tigibilenauq. Abeb Iyahta muleqeq ta bolsa nab i on mataw og kab kayeqmo osauqta ka i on mataw tumoqiya na giquriyameq Yesus agerab danneb a hi gwalehamta. <sup>16</sup> Haiqqam. Kam nab Iyahta atoranmo tiqek tondaq. Sa angelo gigo amebta araq in dedibmo lileysa God ago taur tigayondaqmo. Nab teq Iyahta in God ago saw huloseq gehitiqsamo mataw Yesus anan helmo haqad osim moqiya na in danneb tiqeraq daqay. <sup>17</sup> Eraqsa teq Iyahta in i on mataw abeyanta kayeqmo og kab osauqta ka giwaqidmo i kaitab on mataw danneb eraqiya na nenaq tugwaleham. Gwaleheq i ulilib kaitabmo Iyahta ahol tuwaqam. Ahol waqad teq i Iyahta inaq kuluwa-kuluwmo tuqosam. <sup>18</sup> Nazaq iyan abeb ne mataw tumoqiya na ginadin emad ne gamuk nawa teko ya bilayta naqmo amalib ne an bulonad an anad waqad osiy.

## 5

*I gihol asawan woltayad ossa teq Iyahta bolan*

<sup>1</sup> I gimaqbaban, Iyahta kam gineh ta boldaqta na teq in kam ezaqtab gwahtiqaqta na agamukan araq i ne giyan a hi mar tonam. <sup>2</sup> Na ezaqgo ne ginad tiqem hasad osayta. Iyahta ta boldaqta akaman na in bilaqne mat nagah rin tonaqta taromab bolaqta nazaq nog iydaq. <sup>3</sup> Mataw bilaq daqay, Bab tihiqiy bug haq daqay. I nagah araq a hi rabunad i ginad dimniysa tuqosam haq daqay. Haqad in nazaq gadgadmo ossa daq na nan saw haiqmo tugwahtiqaq. Bilaqne aw agem iyim ossa amun baydaqta akaman na anadibmo bolaqta nazaq. Kam na bo tugwahtiqsamo on mataw gihol asawan a hi woltayta na in a hi tuk daqay. Haiqqam. In timeqiy bug daqay.

<sup>4</sup> Ari i gimaqbaban, negmo teq romriqab a hi osayta. Nazaq iyan kam na bo gwahitiqsa ne a hi riten daqay. Bilaqne mat

rin tonaqta bo gwahtiqa bit anamren rite-naqta nazaq nog ne a hi riten daqay. <sup>5</sup> Ne bunmo saw anuwanib tugwahtiğim osayta. Osad ne saw anononmo ahol waqayta. I mataw romriqabta a haiq. Ad i taromab saw ahol a hi waqad luwauqta nazaq i a hi emauqmo.

<sup>6</sup> Nazaq iyan mataw ta asor na gime rursa usayta nazaq nogmo i hi usuq. I gime rireqeq ginad hastitaysa osuq. <sup>7</sup> Na ezaqgo mataw gime rursa usayta na in taromabmo usayta. Ad mataw yuw atoranta uluwim gifaqin hulosaqta na in taromabmo yuw uluwayta. <sup>8</sup> Ari igmo on mataw zeqabta. Nazaq iyan i ginad hastitaysa osuq. Ad i ginad God anan helmo haqauqta na teq i on mataw ginan ginad bilaqta na in bilaqne tubusan ain-ibta mataw gifaqinib emim teq bab emayta nazaq nog i giholib usan. Ad God teq boleq i gilumsiheq ta giwaqdaqta haqad i baq tunim osauqta na in bilaqne balaw ain-ibta mataw gifaqinib emim teq bab emayta nazaq nog i giholib usanmo. <sup>9</sup> God i gitowun eman i in ago agem meqniy waqgo a hi osauqta. Haiqgam. I gigo Iyahta Yesus Krai i gimen dante wastitayan God i gilumsiheq giwaqid i in ago os dimunta waqgo tiqiyim osauqta. <sup>10</sup> Yesus anad i kayeqmo osad i inaq osamta haqauq. Teq in anad i moqeq in inaq tuqosammo haqauq. I in inaq nazaq tuteqmo osamta haqad in i gimen momta. <sup>11</sup> Nazaq iyan ne an ulumsihad an zaway ugayta nazaqmo ne tuteqmo emad ne daq na hi hulosisy.

*God in ago on mataw gilumsihsa in daq dimumunta emad os daqay*

<sup>12</sup> Ari i gimaqbaban, i kazaq atoran nog ne gibilenaq. Ne gigo mataw danmebta ne gilikmanib God ago kabiy emsa ne in giqez huritiy haqauq. Iyahta inmo mataw na giqeman in ne giwamuzad ginad wastitayayta. <sup>13</sup> Ne mataw aseseqta na gigo kabiy anadin emad ne in ginan ginad bilaqsa giwaziniy. Teq ne bunmo zib alowabmo osiy.

<sup>14</sup> Teq i gimaqbaban, i ginad awaz meqin amalib kazaq ne gibilenaqmo. Mataw gituw haiqta na ne ginad wastitaysa in gituw inaq iyiy haqauq. Ad ne mataw nagah haresmo anan rabayta na gigem zaway negad ne mataw giwaz meqin haiqta na gilumsihiy haqauq. Teq ne mataw naqanta bunmo gigo afaqan sorad kiskismo giwastitayiy haqauq.

<sup>15</sup> Mataw daq meqinta negsa ne amenin daq meqinta hi negiy. Haiqgam. Ne an dimun tonad osad ne on mataw God ago maror asan ban osayta na bunmo gidimun toniymo.

<sup>16</sup> Kam bunmo ne ginad dimniysa osiy. <sup>17</sup> Tuteqmo ne God inaq gamuk emiy.

<sup>18</sup> Kam dimuntab teq kam meqintab inaqmo ne daq bunmo giholib gwahtiqaqta na ago ne God esey ugiiy. God anad ne Krai Yesus aholib soqotim osad daq nagzaq emgo in anad bilaqtaqta.

<sup>19</sup> God ago Bugaw Dimunta ne gilikmanib kabiy emsa ne hi wolmiyyi. <sup>20</sup> Ad mataw God ago nantut bilaqsa ne gileh hi negiy. <sup>21</sup> Ta teq ne gamuk bunmo ulum kemad gamuk dimunta naqmo ne waziy. <sup>22</sup> Wazad ne daq meqinta bunmo aban diq emad pesanmo luwiy.

<sup>23</sup> Ari ya ne gimen God kazaq bulonaiq. God haqaiq, ninmo i gigeman i gigem kiskismo usaqta haqaiq. Nazaq iyan ni Tesalonaika on mataw na giqemid in ningo on mataw tawon diqta iyiy haqaiq. Ad ni in ginad teq giwitan teq ginon bunmo wamuzsa in dimunmo titnoneqmo osiy haqaiq. In nazaq ossa le i gigo Iyahta Yesus Krai ta boldaqta nab in giholib daq ara q ananin waq daqayta hi usan haqaiq. <sup>24</sup> God ne gililewunta na in i gilumsihsan bilamta nazaq diq in emaqta. Nazaq iyan ya nawa ne gimen God bulonta nazaqmo in tiqem negdaq.

<sup>25</sup> I gimaqbaban, ne i gimen God buloniymo.

<sup>26</sup> Ari God ago on mataw gigo daq titnonta na amalib ne an zeq dimun ugiiy.

<sup>27</sup> Ya Iyahta abinib gamuk awaz meqin diqta kazaq ne gibilenaq. Gamuk kawa i ne gimen mar tonta ka ne i gimaqbaban nab osayta na bunmo gibilensa in huritiy haqaiq.

<sup>28</sup> Ari, i gigo Iyahta Yesus Krai agem dimunta negsa ne osiy. Nawaqmo.



## 2 Tesalonaika

### o

### Sansandek gigerta Pol mar tonan uliq Tesalonaika-ib lahta Gamuk ameb lehaqta

Pol in ago sansandek amebta na uliq Tesalonaika-ib eman lehan in gigo afaqan asor usta na tihiqiy. Hiqiyen teq afaqan giger ka us tut. Yesus ago on mataw uliq nabta na asor in Kraiss ta boldaqta na ago ginadnad emad bilaq yaqay, Iyahta ago kam na tekomo tugwahtimta daqag haq yaqay. Haqsa ta asor in daq haresmo emad in giholyon kabiy araq emnan gituw hiqiy yaqay. Nazaq iyan teq Pol ayogniz giger Sailas ayow Timoti inaq in sansandek gigerta ka Tesalonaika ginad wastitaygo haqad mar toniy.

Mar tonad Pol kazaq bilam, Iyahta ago kam na a hi gwahtiqaq ham. Ameb diq on mataw kabemmo gireriy emeq daq meqinta haresmo emad in God tuhulos daqay ham. Sa mat gunun othasdaqta na ulalab tugwahtiqdaq ham. Nagah giger na a hi gwahtiqsamo i ginad eman, Iyahta ago kam na a hi gwahtiqaq haqam ham.

Teq Pol in mataw luw maleynizta na gamuk atoranmo gibilenim bilam, Ne tok nemeq osad giholyon kabiy emiy ham. Ne giyogniz gigo didaq neqad samanmo hikidik osiy ham. Haqad in Tesalonaika on mataw na bunmo gibilenim bilam, I God ago suleq negta na bunmo ne waz naqmo hiqiyeq osad ne an ulumsihad osiy ham.

### Iyahta ago kam abeb teq gwahtiqdaqta

<sup>1</sup> Yaqmo Pol ya iyogniz giger Sailas ayow Timoti nenaq i gamuk ka mar tonim ne Yesus ago on mataw uliq Tesalonaika-ib osayta na gigo hib eman lehaq. I Gimam God teq i gigo Iyahta Yesus Kraiss inaq in ne giwamuzsa ne in gihaqenib osayta.

<sup>2</sup> I Gimam God teq Iyahta Yesus Kraiss inaq in gigem dimunta negad ne gigem emid midemeqmo usan.

*Tesalonaika on mataw giwaz meqniyim turad afaqan soriy*

<sup>3</sup> I gimaqbaban, tutimmo i ne ginan God esey ugad daq na i a hi hulosaqta. I nazaq emamta na in dimun diq. Na ezaqgo ne ginad helmo haqayta na in awaz timeqniyaq. Ad ne bunmo an anan ginad bilaqsa ossa ne gigo daq na ne gilikmanib ayah tiqiyaqmo. <sup>4</sup> Nazaq iyan i uliq saw kabemmo luwad i God ago on mataw Yesus ago nan huritayta na gigo hib ne gihin

sorauqta. Sorad i gibilenaq, Tesalonaika on mataw na gibabun in gimeqin tonsa in giwaz meqniyim turayta haqauq. Turad in ginad helmo haqayta na wazad in afaqan teq santitiy sorad gituw a hi hiqiyayta haqauq.

*God daq titnonta amalib i gilum ke-maqta*

<sup>5</sup> Teq muran ne God ago maror aduganib gwahtiqnan haqad afaqan sorayta na in God anad titnonta eman ulal iyaqta. God anad emaq, Ne afaqan sorad oseq teq ne yaqgo maror aduganib gwahtiqgo gihin inaq tiqiy daqay haqauq. <sup>6</sup> Na ezaqgo abeb teq in daq titnonta emad in mataw nawa ne afaqan negayta na giholib amenin emad in mataw na afaqan tinegdaqmo. <sup>7</sup> Negad in ta ne gigo afaqan na walemid ne ginamur tiqem daqay. Ginamur emsa God in i gigo afaqan na walemid i ne nenaq garabmo ginamur tiqemammo. Kam nab Iyahta Yesus Heven huloseq in ago faq amileq ayahta inaqmo bolad in ago angelo giwaz meqinta na nenaq tigehtiq daqay.

<sup>8</sup> Gehititeq in mataw God ago a hi huritad teq in i gigo Iyahta Yesus awagamun dimunta a hi muzinayta na amenin meqin diqta tinegdaq. <sup>9</sup> Negid mataw na timeqniy haseq in nazaqmo kuluwa-kuluwmo tuqos daqay. Osad in Iyahta ago hib pesanmo osad in Iyahta ago zaway mataw ahol waqad abin iluwayta na ahol a ta hi waq daqay. <sup>10</sup> Kam nab Yesus in ago on mataw tawonta na gigo hib abin ayahta waqnan haqad tuboldaq. Bolsa in ago on mataw na in ahol waqad in giquitil riten lamsa in ginad tibilaq gigayindaq. Sa ne inaqmo in ahol waqad abin iluwad ginad tidimniy daqaymo. Na ezaqgo kwaziqmo i ne gigo hib lehim God ne gimen dante amta na agamukan gibilenan ne huritim anan helmo haqiyta na ago iyan.

*Pol ayogniz nenaq in Tesalonaika on mataw gilumsihgo haqad God buloniy*

<sup>11</sup> Kam abebtanta nab ne inaqmo Iyahta abin tiqiluw daqay haqad tutimmo i ne gimen i gigo God kazaq bulonaq. God haqauq, ni Tesalonaika on mataw gililewunan osayta ko giwamuzsa in gigo luw os ningo liley na inaq rireneqmo usan haqauq. Ad ni ningo zaway amalib gilumsihsa in kabiy dimdimunta emnan ginad emayta na em buqiy haqauq. Ad in ni nina helmo haqad ningo kabiy emsa kabiy na anon kabemmo eman haqauq. <sup>12</sup> Anon emsa in ahol waqad in i gigo Iyahta Yesus abin sorsa Yesus in gihin soranmo haqauq. Ad i bulonaq, I gigo God haqauq, ni teq Iyahta Yesus Kraiss inaq gigem dimunta on mataw na negad in giyon daq nazaqmo em negiy haqauq.

## 2

*Mat gunun othasaqta na teq gwahtiqaqta*

<sup>1-2</sup> Ari i gimaqbaban, i gigo Iyahta Yesus Krais muleqeq ta bolsa i bunmo leheq in ago hib humab emamta na ago i ne tigi-bilennan. Luweq mataw asor kat negeq bilaq daqay, Iyahta ago kam na tekomo tugwahtimta haq daqay. Haqad in gihol ulumsihad kazaq bilaq daqay, Bugaw araq anad igan i bilaqauq haq daqay. O in bilaq daqay, Mat araq nazaq bilaqsa i huritta haq daqay. O in bilaq daqay, Pol ayogniz nenaq sansandek mar tonim nazaq bilaqiyta haq daqay. Ari ne gamuk naqanta huriteq ne riteneq hidmo ginadnad hi emiy. <sup>3</sup> Mat araq le nazaq kat negsa ne in aqez hikidik huritiy. Iyahta ago kam na ulilemeq a hi gwahtiqaqta. Haiqqam. Na in atowun inaq kazaq iyeq gwahtiqaqta. Kam na tugwahtiqaqna tonsa mataw kabemmo God ago nan baymuzad in gileh tuqug daqay. Samo mat gunun othasaqta na ulal tiqiydaqmo. Mat nawa na God in ayon bilaqan in oseq teq timeqniy hasdaqta. Daq nagan bunmo tugwahtiqid teq Iyahta ago kam na bo tugwahtiqaq.

<sup>4</sup> Ari mat gunun othasaqta na bo gwahtiqeq in og kab nagah zawayta mataw giwazinad ginan 'i gigo god' haqad gihin iluwayta nagan bunmo gihar tinegdaq. Gihar negad inmo ahol abin iluwad in nagah gisesta nagan bunmo gibayid woqsa in ahaqenib tiqiy bug daqay. Ad in God ago Tempel aduganib gwahtiqeq in ago marorgo ban emeq osad teq in bilaqdaq, Ne gigo god yaqmo kawa haqdaq. <sup>5</sup> Yaqmo Pol kwaziqmo ya nenaq osad ya daq nawa gwahtiqaqta na ago agamukan ne tigi-bilen bugta. Na ago ne gidek tizizal e? <sup>6</sup> Teq muran nagah araq in mat gunun othasaqta na adanin qwaysa in ulal a hi iyaq. Na ne tuhuritiyta. Nagah na in mat na wasihad ossa le in ulal iydaqta ago akaman tugwahtiqid nab teq in ulal tiqiydaq. <sup>7</sup> Na ezaqgo mataw ginad meqinta bolsa in gunun othasayta na alulin diq i gimeb ulilemim ussa i ahol a hi waqauqta. Sa ginad meqinta na mataw gibe yahsa in God ago gunun tuqothesad osayta. Ta teq nagah dimunta nawa ya anan bilayta na in mataw ginad meqinta na wasihsa in gwahtiqim ban a hi waq bugaqta. Ari nagah dimunta na in ginad meqinta adan na wasihad oseq le in ahol tuhureq hasdaq. <sup>8</sup> Hureq hasid nab teq mat gunun othasaqta na ulal tiqiydaq. Ulal iyeq ossa Iyahta Yesus inmo ahol aqurin ulam hasid le mat na wol emid tumoqdaq. Kam nab Iyahta bo gwahtiqadmo in ago zaway bunmo ulal

iysa zaway na le mat na meqin diq tonid in tihiqiydaq.

<sup>9</sup> Ari mat gunun othasaqta na bolsa Satan in abunib turad zaway ugsa in ulal tiqiydaq. Ulal iyeq in Satan ago zaway ayahta na amalib daq katiyta aseseqta azawayin inaqta amo amo giqemid gwahtiqsa mataw ahol waqad in mat na anan helmo tihaq daqay. <sup>10</sup> Mat na daq meqinta amo amo amalib mataw kat negsa on mataw asor teq timeqniy has daqayta naqmo in anan helmo tihaq daqay.

Teq on mataw na oseq meqniy has daqayta na alulin in kazaq. On mataw naqanta in God ago gamuk helta anan ginad bilaqid teq God in gilumsiheq ta giwaqnaqta. Teq in God ago gamuk anan helmo haqnan hulosaqta. <sup>11</sup> Nazaq iyan God in ago zaway amalib mataw nazaqta ginad walebolsa in daq aseseqta katiyta nagan gibiyad ginan helmo haqayta. <sup>12</sup> God in on mataw naqanta giyon dante nazaq em negsa in teq ago hazizir ayahta nab tursa in giyon bilaqid in tihiqiy bug daqay. Na ezaqgo in God ago gamuk helta anan helmo a hi haqad in daq meqinta haresmo emad ginad dimniysa osiyta na ago iyan.

*God in ago on mataw giwaqgo haqad gitowun eman osayta*

<sup>13</sup> Ari i gimaqbaban, Iyahta in ne ginan anad bilaqta. Mebmebmo diq God ne gitowun emim ago Bugaw Dimunta negan in ne giholib usaqta. Usad in ne giwamuza ne God ago on mataw tawonta iyim osad ne in ago gamuk helta anan helmo haqayta. Dante naqmo amalib God in ne gilumsihim giwanta. Nazaq iyan tuteqmo i ne gimen God esey ugamta. <sup>14</sup> God nazaq diq ne gidimun tonnan haqad in i giqeman i ne gigo hib lehim Yesus awagamun dimunta gibilen. Gibilensa God i gigo gamuk na amalib in ne gililewunan muran ne i gigo Iyahta Yesus Krais ago os dimunta na ne giholyon waqgo tiqiyim osayta. <sup>15</sup> Nazaq iyan i gimaqbaban, ne giwaz meqniyeq turad i God ago suleq negta na bunmo ne waz naqmo hiqiyiy. Suleq na i giqezab gibilenta teq i sansandekib mar tonim eman ne gigo hib lahtamo.

<sup>16</sup> Ari i Gimam God teq i gigo Iyahta Yesus Krais inaq in i ginan ginad bilaqta. Ad God agem dimunta igsa i in ago zaway ahiqiy haiqta na waqad i gigem kute nemsas osauqta. Osad in teq ago os dimunta na tiqigdaq haqad i in amen emim osauqta. <sup>17</sup> Nazaq iyan i ne gimen God bulonad i kazaq bilaqauq, God haqauq, ni Tesalonaika-ib on mataw osayta ko gigem zaway negsa in giwaz meqniyeq gamuk dimdimunta bunmo bilaqad teq in kabiyy dimdimunta bunmo emiy haqauq.

**Tesalonaika on mataw  
gilikmanib on mataw gituw  
haiqta osayta na in  
tigiwastitay daqay**

**3**

*Tesalonaika on mataw God bulonid in  
Pol ayogniz nenaq gilumsihdaq*

<sup>1</sup> I gimaqbaban, i gigo gamuk ta asor usaqta na in kazaq. Ne i gimen God bulonsa in i gilumsihan. Gilumsihsa i ne gigo hib Iyahta ago gamuk bilaqan anon kabemmo amta nazaqmo i le og saw bunmo gigo hib bilaqsa in nazaqmo anon kabemmo emeq ameb diq iyan. <sup>2</sup> Ad God in mataw meqinta daq hihiq emayta na gibenab i giwaqid in i hi gimeqin tongo haqad ne i gimen God buloniymo. Na ezaqo, mataw kabemmo God anan helmo a hi haqayta na ago iyan.

<sup>3</sup> Teq Iyahta i gilumsihnan bilamta nazaqmo in emaqta. Nazaq iyan in ne giwamuzad zaway negsa mat meqinta na a hi gimeqin tondaq. <sup>4</sup> I ginad emauq, Iyahta ne ginad wamuzsa i daq bunmo tigi bilenta nagan ne muzinad ne nazaqmo tiqem tut daqay haqauq.

<sup>5</sup> Haqad i ne gimen Iyahta bulonim bilaqauq, Iyahta haqauq, ni Tesalonaika on mataw ko ginad enqenunsa God in ginan anad bilaqta na ago in anadin emad in Kraiss afaqan sorad ahol a hi hureq hasta na ago in anadin emiymo haqauq.

*Mataw bunmo kabiy em daqayta*

<sup>6</sup> I gimaqbaban, i gigo Iyahta Yesus Kraiss abinib i gamuk atoranmo kazaq ne gibilenaq. Mat ara q samanmo osad aholyon kabiy a hi emsa ne aholib hiqiyiy haqauq. Mat naqanta in i gunun negta na othasad a hi muzinaqta. <sup>7</sup> Ne i gisen muzineq daq ezaqta em daqayta na ago ne ginad emayta. Kwaziqmo i ne nenaq osad i samanmo kabiy haiqmo a hi osta. <sup>8</sup> Ad i ne gigo didaq ara q samanmo a hi wawta. Haiqqam. I zayadmo waqyauqta. Luweq i ne gigo didaq nagah samanmo neqsa ne i gigo afaqan sorad gihol husisiqdaq haqad i taromab zeqab inaqmo i giholtuw bulad kabiy atoranmo emyauqta. <sup>9</sup> Helmo i ne gigo hib didaq nagah samanmo waqgo i gihin inaqta. Teq i daq dimunta giqisihunid abeb ne i gisen muzinad nazaqmo em daqay haqad i ne gigo nagah samanmo waqgo hulosta.

<sup>10</sup> Kwaziqmo i ne nenaq osta nab i gunun ara q kazaq em. Mat ara q kabiy emnan atuw hiqiysa ne didaq ugid hi neqan haw.

<sup>11</sup> Teq nagaqgo muran i gamuk nawa na a ta gibilen tonauq? Nabag ne gilikmanib mataw asor luw maleyniztag osayta. Osad in giholyon kabiy a hi emad in mataw ta

asor gigo kabiy naqmo in wamuzgo ginad emayta. I ne gigo wagam asit nazaq huringim i kawa ne tigi bilen sireqauq. <sup>12</sup> Ari ne mataw gituw haiqta na, i Iyahta Yesus Kraiss abinib atoran diqmo kazaq ne gibilenaq. Ne tok nemeq osad kabiy emiy haqauq. Kabiy emad negmo giholyon didaq waqay neqiy haqauq.

<sup>13</sup> I gimaqbaban, ne daq dimunta emad gituw hi hiqiyen. <sup>14</sup> Ad mat aw nog in gamuk kawa i sansandekib mar tonta ka a hi muzinsa ne gibiy kemiy. Gibiy kemad ne mataw na girabunad giholib hiqiyiy. Ne nazaq gitonsa teq in daq emayta na ago gimebay tuwoqdaq. <sup>15</sup> Teq ne mataw na ginan i gibabun haqad hi bilaqiy. Haiqqam. Ne in ginan i gimaqbaban haqad gidekmo waziy.

*Gamuk abebtanta*

<sup>16</sup> Ari i ne gimen kazaq Iyahta bulonaq. Iyahta haqauq, ni i gigem eman midemim usaqta haqauq. Nazaq iyan kam bunmo Tesalonaika on mataw giholib daq amo amo gwahtiqsa ni in gigem emid kute nemsan in nagah ara q diq anan ginad hi meqniyan haqauq.

Ari Iyahta ne bunmo nenaq osad giwamuzan.

<sup>17</sup> Yaqmo Pol ya iholbenab yaqgo zeq dimun ka mar tonim ne giyon eman nawa lehaq. Yaqgo sansandek bunmo ya kazaqmo iholnan mar tonaiqta.

<sup>18</sup> Ari i gigo Iyahta Yesus Kraiss agem dimunta ne bunmo negsa ne osiy. Nawaqmo.

## 1 Timoti

### **Sansandek amebta Pol in Timoti amen mar tonan lahta Gamuk ameb lehaqta**

Timoti in mat araḡ minminta. In anen Juda aw araḡ. Sa in amam Grik mat araḡ teḡ in Juda mat a haiḡta. Teḡ Timoti in uliḡ Litra, saw Awesiya-ib osta. Ossa Pol nab lehim Yesus awagamun dimunta bilaḡsa Timoti huritim Yesus anan helmo tiham. Haḡan Pol in Timoti waḡim inaq lehim God ago kabiy tiḡem yaḡay (Aposel 16.1-3 nab ni Timoti ahol awagamun asitmo ahol waḡdaḡ).

Ari uliḡ asor le tihiqiyan Yesus ago on mataw uliḡ Efesus-ibta na gilikmanib in gigo mataw danmebta asor eraḡim suleḡ katiyta tibilaḡ yaḡay, Pol mebmebmo gibilan, Daḡ kazaḡ teḡ gwahtiḡdaḡ hamta nazaḡ (Aposel 20.29-30 nab teḡ ni ahol waḡ). Mataw na suleḡ katiyta bilaḡsa Pol ayow Timoti inaq lehim nazaḡ gibiyad teḡ Pol in Timoti hulosan uliḡ Efesus-ib mataw katiyta na giḡez wasihnan tuḡos. In Timoti hulosaḡ bulon, Ni kab uliḡ Efesus-ib osad mataw gamuk katiyta amalib suleḡ bilaḡayta na gibilenid in nazaḡ ta hi emiy ham.

Haḡad Pol in saw Masedoniya-ib lehim uliḡ araḡab tuḡosaḡ teḡ in Timoti amen sansandek ka mar tonim eman leh ug, Timoti anadnad a hi emad in awaz diḡ meḡniyeḡ ago kabiy anononmo tiḡemdaḡ haḡad. Pol anad Timoti in mataw aseḡeḡta gamuk katiyta bilaḡayta na giḡez emid hiḡiysa teḡ in Yesus ago on mataw na suleḡ helta gibilenad dante dimunta ḡiḡisihunsa in gigo os ta titnondaḡ haḡad in gamuk ka bilam. Haḡad in anad dimdimunta kabemmo Timoti uḡnan haḡad amen gi-mar tonan sansandek kab usaḡta.

### **Timoti inmo ahol wamuzad teḡ in uliḡ Efesus-ib on mataw Yesus ago nan huritayta na giwamuz tonanmo**

<sup>1</sup> Yaḡmo Pol, ya Kraiḡ Yesus ago Aposel araḡ. God I Gilumsihim Giwawaḡta na teḡ in atatin Kraiḡ Yesus i amen emim osauḡta na inaq in ya inan bilaḡan ya Aposel iyta. <sup>2</sup> Timoti, ya inad Kraiḡ anan helmo haḡaiḡta nazaḡ ni ninad usaḡmo. Nazaḡ iyan ni yaḡḡo amunmo diḡ. Ya ninmen gamuk ka mar tonim eman tileh niḡaḡ.

I Gimam God teḡ i gigo Iyahta Kraiḡ Yesus inaq in gigem dimunta niḡad in ni ninan ginad meḡniysa ni niḡem midemeḡmo usan.

### *I gamuk katiyta bayid woḡan*

<sup>3</sup> Ari kwaziḡmo ya nihuloseḡ saw Masedoniya-ib lehnan haḡad gamuk nibilenta na ya muran a ta nibilen tonaiḡ. Ni nab uliḡ Efesus-ib osad mataw God ago gamuk bilaḡ kireh tonim suleḡ katiyta bilaḡayta na atoranmo gibilenid in nazaḡ ta hi emiy. <sup>4</sup> Ad in tutimmo wagam katiyta bilaḡad teḡ in gisesan giwagamun bilaḡayta na in hulosiymo. Gamuk nazaḡ na in an mug ayah diḡmo eman eraḡaḡta. Eraḡsa in gigo walmataw nenaḡ God ago kabiy emid ayah iygo ginad a hi emayta. Ni ninad em. I ginad God anan helmo haḡauḡta naḡmo in God ago kabiy eman ayah iyaḡta. <sup>5</sup> On mataw God ameb gigem dimunmo anumlan haiḡmo ussa teḡ in giḡolub daḡ araḡ meḡinta a hi loyinad teḡ in gimileḡ a hi iyad God anan helmo diḡ haḡayta, on mataw naḡantamo in an anan ginad bilaḡsa osayta. Nazaḡ iyan ni on mataw giwamuzayta na atoranmo gibilenad ginad wastitaysa in an anan ginad bilaḡsa osiy haḡad ya tinibilenaiḡ.

<sup>6</sup> Teḡ mataw asor in daḡ dimdimunta nawa ya teko ginan bilayta na hulosaḡ in ginad agadan iysa gamuk samantaḡmo bilaḡad luwayta. <sup>7</sup> Mataw na in danmebta iyeḡ God ago maror Moses bilamta na asuleḡin bilaḡnan ginad usaḡta. Ad in gamuk atoran diḡmo bilaḡayta, bilaḡne in ginad em hasayta nog. Teḡ haiḡ. In maror na alulin diḡ ginad a hi em hasadmo bilaḡayta.

<sup>8</sup> Ari i ginad em hasad God ago maror Moses mar tonta na adan emsa maror na i gidimun tonaḡta. Na i bunmo tuhuritta.

<sup>9</sup> Ta teḡ i maror na anan ginad kazaḡ em hasuḡ. God in mataw titnonta giwastitaynan haḡad ago maror kwaziḡta na eman a hi gwahtim. Haiḡgam. God ago maror na in mataw meḡinta giwastitaygo usaḡta. Mataw naḡanta in gunun othasayta teḡ in nan a hi huritayta teḡ in God giḡeh uḡayta teḡ in daḡ hihiḡ emayta teḡ in gigemab ginumlan ayahmo usaḡta teḡ in God bilawunayta teḡ in ginenmaman ginol emayta teḡ in mataw asor ginol emaytamo.

<sup>10</sup> Teḡ in an alulib hureḡad inaq usayta teḡ in Sodom gigo daḡ emayta teḡ in mataw girin tonim giḡaysa in mat araḡ ago kabibiy mataw samanta iyayta teḡ in nan katiyta bilaḡayta teḡ in hazizirib gimileḡ iyad mat dimunta nan uḡayta. God ago maror Moses bilamta na in daḡ meḡinta suleḡ helta bab uḡaḡta nagan bunmo giwasiḡgo usaḡta.

<sup>11</sup> Suleḡ Yesus awagamun dimunta inaq rirenim usaḡta naḡmo i anan suleḡ helta haḡauḡta. Ad wagam nabmo God ago zaway ulal iy bugsa i ahol waḡad i God anan gigem dimniysa abin iluwauḡta. Teḡ ya Yesus awagamun dimunta naḡmo on

mataw wastitayeqmo gibilengo haqad God ya ibenab amta.

*Krais Yesus Pol anan anad meqniyta na ago Pol esey ug*

<sup>12</sup> I gigo Iyahta Krais Yesus ya ilum kemim inan bilam, Pol atuw inaqta in ya inad usaqta tiqem bugdaq ham. Haqad in ya itowun emim zaway yagan ya in ago kabibiy mat iyim osaiqta. Nazaq iyan ya esey diq tuqugaiq. <sup>13</sup> Helmo kwaziqmo ya in abin bilawunad ya in ago on mataw gimuzad gimeqin tonyaiqta. Ad ya in ago nan a hi huritad ya girerey ayahmo emyaiqta. Ta teq ya in ago a hi hurit kenta na ago ya in anan helmo a hi haqad daq nagan emyaiqta. Nazaq iyan in ya in anan anad meqniy. <sup>14</sup> Anad meqniysa i gigo Iyahta na agem dimunta ayahmo yagad ilumsihan ya inad thastitay. Inad hastitayan ya Krais Yesus anan helmo haqad ya on mataw bunmo igem dimunta tinegaiqmo.

<sup>15</sup> Krais Yesus on on mataw God gileh ugad daq meqintab osayta naqmo gilumsihnan og kab bolta. Gamuk nawa na in hel diqtaqmo iyan on mataw bunmo huriteq anan helmo tihagq nagiyta. Teq og kab ya on mataw bunmo giquriyamim ya mat meqin diqta osyaiq. <sup>16</sup> Ossa Yesus hidmo gileh a hi yag. Haiqqam. Ya daq hihiq emad luwsa in ya imen emad sisaqmo os. Osim abeb in ya in anan anad meqniysa in ya ilumsihim tiqiawam. Nazaq iyan Yesus ago anad meqniy na yaqgo hib ulal iysa on mataw ya ibiyad ginad emay, God in mat meqin diqta ko ulumsiheq in i tigilumsihdaqmo haqay. Gilumsihid i inaqmo kuluwa-kuluwmo tuqosam haqay. Haqad in Yesus anan helmo tihagq. <sup>17</sup> Ya God anan inad ayahmo dimniyaqta. In on mataw bunmo gigo king iyim giwamuzad kuluwa-kuluwmo osaqta. Osad in a hi moqdaqta teq in on mataw gimeb ulilemim osad in amomo God diq iyim osaqta. Nazaq iyan i in wazinad abin kuluwa-kuluwmo iluwad osuq. Hel diqtaqmo.

*Timoti zaway iyeq daq meqinta bayid woqan*

<sup>18</sup> Yaqgo amun Timoti, kwaziqmo mataw asor God ago nan tutim ni ninan bilaqiyta nazaqmo ya a ta ni nibilen tonaiq. Ni gamuk na bunmo anadin emad muzin bugsa teq bab ezaq ban bolsa ni inaq an wolad ni niwaz meqniyeq titurdaq. <sup>19</sup> Turad ni God anan helmo diq haqad ni niholib daq ara q meqinta a hi loyindaq. Ni ninad em. Mataw asor giholib daq meqinta ussa in loyinin teq in gileh a hi ugiyta. In gigo daq meqinta nazaq alow ugad osim in Yesus anan helmo a ta hi haqimmo tuwoqiy, bilaqne muy kamisib lehim sarte b ulumworim hitimta nazaq nog. <sup>20</sup> Mataw

na gilikmanib Himeneus ayow Aleksanda inaq in nazaqmo emiyta. Eman ya giger na giqeman Satan abenab tilehiy. In ginad em haseq teq God anan a ta hi bilawun daqay haqad.

## 2

*I God bulonid in on mataw bunmo gilumsihan*

<sup>1</sup> Ari nagah danmeb diq ni emdaqta na in kazaq. Ni mataw gibilenid in sirisirimo God inaq gamuk emad teq in susumun ugiy. Susumun ugad in on mataw bunmo gilumsihgo haqad God buloniy. Sa God in gilumsihsa in esey ugiy. <sup>2</sup> In God inaq gamuk emad bulonsa in king teq gavman bunmo anad dimunta negsa in gigo kabiy dimunmo emiy. Nazaq iyid teq i gigo os dimniysa i tuteqmo afaqan a hi waqam. Ad i God anad muzinad ago daq dimdimunta emsa i gihin dimunta og saw bunmo usdaq. <sup>3</sup> I nazaq osamta na in God I Gilumsihim Giwaqtaqta na ameb dimun diq iyaqta. <sup>4</sup> Na ezaqgo in anad on mataw bunmo inmo ago maror aduganib gwahtiqeq ago gamuk helta huritad ginad em hasad os nagiy haqtaqta.

<sup>5</sup> Na ezaqgo God amulikmo osaqta na in on mataw bunmo gigo God. Sa mat amulikmoqmo God teq on mataw bunmo gilikmanib liqabmo turaqta. Mat na in Krais Yesus-mo. <sup>6</sup> In ago on mataw bunmo bab gibenab giwaqgo haqad in gimen ahol naw nog emim gizayta. God anad usta kam nabmo Krais Yesus daq na eman God anad on mataw bunmo in ago maror aduganib gwahtiqgo usta na ulal tiqiy. <sup>7</sup> Ulal iyan ya nagah na agamukan waqeq a le og saw haresmo bilaqdaiq haqad God ya itowun eman ya Aposel iyta. (Hel diqmo ya bilaqaiq. Ya a hi katiyaiq.) Ya Aposel tiqiyim ya on mataw en ta asor Juda a haiqta nagan suleq negsa in Krais anan helmo haqad in God ago gamuk helta anan ginad tiqem hasay.

<sup>8</sup> Nazaq iyan ya inad on mataw uliq bunmo giben tawonta waz eraqs in gigem meqniy teq an mug hulosa d in God inaq gamuk emiy haqaiq.

*Kabiy dimdimunta naqmo in on gigo balawmo diq*

<sup>9</sup> Ari ya inad on in daq kazaq emiy haqaiq. In tubusan dimunta gihol sihengo in inaq diq naqmo in gihol wastitayeqmo siheneq isihiy. In igmo ag haqad giqensan balaw tonad teq in balaw amo amo kaliloy teq gol teq tubusan anawun ayah diqta nagan in hi emiy. <sup>10</sup> On God anadin emad aqez huritayta na in kabiy amo amo dimdimunta emsa kabiy naqmo in gigo balaw nogmo giholib usan.

<sup>11</sup> Teq mataw God ago gamuk asuleqin bilaqsa on gihol wazid woqsa in gizezmo hiqiyeq gamuk na huritadmo muziniy. <sup>12</sup> Ya on giwasihan in danmeb iyad mataw a hi giwamuzad teq in God ago suleq mataw a hi gibilenayta. Haiqqam. On gizezmo hiqiyeq gamuk huritmo hurit daqay. <sup>13</sup> Ni ninad em. God in Adam eman danmeb gwahtimta. Gwahtiqa abeb teq in awe Iv am. <sup>14</sup> An Adam in gamuk katiyta na anan helmo a hi ham. Haiqqam. In ago awmo gamuk katiyta na huritim God ago gunun itiyonta. <sup>15</sup> Nazaq iyan God in on ginan bilamta nazaqmo in osad in onmin ginen iyeq osiy. Ad in God anan helmo haqad in on mataw ginan ginad bilaqsa God ago daq tawonta naqmo in giqemad osiy. In nazaq emad teq in God ago maror aduganib dimunmo kuluwa-kuluwmo tuqos daqay.

### 3

*Yesus ago on mataw gigo danmebta na in titnoneqmo os daqay*

<sup>1</sup> Gamuk kawa ka in hel diqtaqmo. Mat Yesus ago on mataw gifaqin iyeq giwamuznan haqad anad emaqta na in kabiy dimun diqta utetaq. <sup>2</sup> Nazaq iyan mat Yesus ago on mataw giwamuzdaqta na in mataw gimeb anonon diqmo tur osan. Ad in ago daq bunmo on mataw gimeb dimunmo usanmo. Mat na in aw tuwageq inaq osad in ta mat araq ago aw inaq hi luwan. In ago aw diq naqmo aduw iyeq osan. Ad in worworeq osad in anad em hasadmo daq eman. Sa mataw in ago bitab bolsa in anononmo gilowan tonan. Teq in God ago gamuk alulin anad em hasadmo on mataw suleq negan. <sup>3</sup> In yuw atoranta uluwad afaqin agadan hi iyan. Ad in hidmo agem meqniysa mataw hareso hi ginolan. Haiqqam. In mataw gilowan tonad nenaq kiskismo osan. Ad in mani anan diq hi moqan. <sup>4</sup> Teq in ago aw amun giwamuzad nenaq wastitayeq osad in ago onmin giqemid in ahaqenib iyeq aqez muziniy. <sup>5</sup> Mat in ago aw amun anonon a hi giwamuzdaqta na ezaq teq in Yesus ago on mataw anononmo giwamuzdaq? Na haiqqam.

<sup>6</sup> Teq mat Yesus ago on mataw giwamuzdaqta na in Yesus anan helmo haqad inaq sisaqmo luweq teq in ban na waqan. Mat mutur diqmo Yesus anan helmo hamta na in kabiy na a hi wazdaq. Luweq in yaqmo ag haqad girerey emsa God in Satan ayon bilaqan in ago ban ulilibta hulosta nazaqmo in mat na ayon bilaqeq tumuzdaqmo. <sup>7</sup> Mat in on mataw God ago maror asan ban osayta na gigo hib abin dimunmo usaqta naqmo in Yesus ago on mataw giwamuzdaqta. Luweq mat ahol abin meqinta

araq kabiy nab gwahtiqa mataw asan ban osayta na afaqan ugsa in amebay woqsa Satan ago dobub tuwoqdaq.

*Mataw Yesus ago dauh gilumsihad giyon kabibiy emayta na in wastitayeqmo os daqay*

<sup>8</sup> Ad nazaqmo mataw Yesus ago dauh gilumsihad giyon kabiy amikmikta emayta na in worworeqmo osad in gihin on mataw gilikmanib dimunmo usan. In gimileq iyad gizez giger hi iyan. Ad in wain ayun ayahmo uluweq gifaqin hi hulosisy. Teq in og ka ago nagah kabemmo in gimo gi-holyon waqgo ginad hi usan. <sup>9</sup> In God ameb gigem anunlan haiqmo dimunmo usan. Teq God ago gamuk asuleqin ulilemabta God eman ulal iyta na in waz naqmo hiqiyad adan emad osiy. <sup>10</sup> Mataw kabiy na gihol ugeq emnan bilaqsa ni in gilum kemeq kabiy asor negid in em waqiy. In kabiy anononmo emsa ni gibiyad teq ni giqemid in Yesus ago on mataw gigo kabibiy mataw iyiy.

<sup>11</sup> Sa kabibiy mataw na giqonan in nazaqmo worworeqmo osad in gihin on mataw gilikmanib dimunmo usanmo. In gamuk an agilehunan bilaqayta na hulosisy. Ad in tok nemeq osad gigo kabiy emad in gituw hi hiqiyen.

<sup>12</sup> Ari mataw Yesus ago dauh gigo kabibiy mataw iy daqayta na in aw tuwageq inaq osad in ta mat araq ago aw inaq hi luwiy. In gigo aw diqta naqmo aduw iyeq osiy. Osad in gigo aw amun anononmo giwamuzad nenaq wastitayeqmo osiy. <sup>13</sup> Na ezaggo mataw kabiy na anononmo emsa in gihin on mataw gimeb dimunmo usad in God ameb dimunmo usaqmo. In gihin nazaq ussa in Krai Yesus ago kabiy atoranno emnan a hi rabayta.

*I God anan helmo haqad muzinauqta na alulin in nagah ayah diqta*

<sup>14-15</sup> Timoti, ya hidmo leheq nibiygo inad emaiqta teq ya dan inaq iydaiq o haiq na ya a hi hurit. Nazaq iyan ya ninmen gamuk kawa mar tonim nibilen kemaiq. Ya hidmo ningo hib a hi gwahtiqa ni nimomo nab osad teq ni gamuk ka ahol waqad God asenlul ezaq luw os daqayta asuleqin ka ni gibilendaq. God asenlul na in God kayeqmo osaqta ago on mataw Yesus ago nan huritayta naqmo. Teq on mataw na in God ago gamuk helta waz naqmo hiqiyad asuleqin bilaq sireqsa gamuk na zaway iyim usad a hi woqaqta, bilaqneq tituq ayow salmoq inaq giwaz meqniyim bit anon bunmo sorsa a hi woqaqta nazaq nog. <sup>16</sup> Helmo on mataw God asenlul iyim in anad muzinad ago daq dimdimunta emayta na ago asuleqin in nagah ayah

diqta. Gamuk na alulin ulilemim usan God eman ulal iyta. Na in kazaq.

In mataw ogibta gisan waqim on mataw gimeb gwahtim.

Teq God ago Bugaw Dimunta ago zaway amalib in ahol alulin diqta na ulal iy. Sa angelo in ahol waqiy.

Teq mataw in ahol awagamun a luwad on mataw en bunmo gibileniy.

Gibilensa on mataw og saw bunmo in anan helmo haqiy.

Teq God in waqim ad Heven-ib gwalehan in abin ayah diqmo iy.

## 4

*Gamuk katiyta na ginad walebo-laqta na agamukan*

<sup>1</sup> Ari God ago Bugaw Dimunta in nantut giqezab kam kawa i osauqta ka anan tibi-laq kemaq. In bilaqaq, Kam abebtanta kab mataw in ginad God anan helmo haqayta na tuhulos daqay haqaq. Ad in le mataw giholib bugaw meqinta ussa gamuk katiyta bilaqayta naqmo gigo hib tisoqot daqay haqaq. Soqoteq in bugaw meqinta naqmo gigo gamuk tumuzin daqay haqaq. <sup>2</sup> Mataw gamuk katiyta bilaqayta na in gimileq iyad gamuk ahurit dimunta bilaqayta teq in gigo tur os meqin. Mataw na ginad faq oyan in daq meqinta emad gihol a hi loyinayta. <sup>3</sup> In gunun emim bilaqsa in gigo walmataw an a hi waqayta teq in didaq neqnanta asor udinad a hi neqayta. Teq God-mo didaq in udinayta na giqamta. In anad on mataw yaqgo gamuk helta huritim anan helmo haqayta na in didaq na waqeq ya esey yagadmo in tineq daqay ham. <sup>4</sup> Nagah bunmo God giqamta na in dimunmota. Nazaq iyan i ara q diq a hi hulosomal. Haiqqam. I didaq gunun emiyya na inaqmo waqad God esey ugsa teq in dimunta iydaq. <sup>5</sup> Na ezaqgo nagah giger God ago gamuk teq i God esey ugauqta na in nagah nagan giqeman God ameb tawonta iyaq.

*Timoti in Kraisa ago kabibiy mat dimunta osan*

<sup>6</sup> Ari ni gamuk nawa teko ya tinibilenta na ni nimaqbaban teq nihiyan Kraisa aduganibta na gibilen bugeq teq ni Kraisa Yesus ago kabibiy mat dimunta iydaq. Ad ni God ago gamuk dimunta i ginad helta wazan eraqaqta na anadin emad ni God ago suleq titnonta muz bugad teq ni niwaz timeqniydaq, bilaqne ni didaq neqim nihol zaway iyaqta nazaq nog. <sup>7</sup> Ni wagam katiyta God abin bayan woqaqta na teq ginad samanta alulin haiqta nagan bunmo gileh ug. Gileh ugad ni God ago daq dimdimunta emgo nihol emunad luw. <sup>8</sup> Na ezaqgo mataw saw zunnan haqad gihol

emunad giwaz meqniyayta na in asitmoqmo gilumsihaqta. Ari i God ago daq dimdimunta emgo gihol emunauqta na in ayah diqmo gilumsihaqta. Gilumsihsa muran i God ago os dimuntab tugwahtiqim i giwaz meqniyim osauqta. Ad abeb i moqamta nab i giwitan God inaq ginad dimniysa kuluwa-kuluwmo tuqosammo. <sup>9</sup> Gamuk nawa na in hel diqtaqmo iyan on mataw bunmo huriteq anan helmo tihaq nagiyta.

<sup>10</sup> Na ezaqgo God I Gilumsihim Gi-waqaqta na in on mataw bunmo gilumsihim in gimen dante amta. Eman on mataw God anan helmo haqad dante na muzinsa God in ayah diqmo gilumsihaqta. Nazaq iyan i ginad bunmo God kayeqmo osaqta na ago hib emad i giholtuw bulad ago kabiy atoranno emauqta. <sup>11</sup> Ya gamuk nawa ninmen mar tonta na bunmo ni ningo on mataw na gibilenad asuleqin negsa in muziniy.

<sup>12</sup> Ari ni mataw gimeb titnoneqmo luw os. Luweq ningo walmataw nibiyad in ni ninan amun haqad a hi niwazin daqay. Haiqqam. Ni daq dimdimunta giqisihun. Giqisihunad ni gamuk dimunta bilaqad teq ni wastitayeq luw osad teq ni on mataw ginan ninad bilaqsa teq ni God anan helmo haqad teq ni daq anumlan inaqta aban emsa in nibiy kemiy. Nibiy kemad in nisen muzeq ni daq em nogmo in emiy. <sup>13</sup> Teq ni ya ibaq tuneq osad tuteqmo ni God ago marib gamuk bilaqsa ningo walmataw huritij. Ad ni gamuk na asuleqin negad ginad wazid eraqsa in God anad muzin bugiy.

<sup>14</sup> Kwaziqmo Yesus ago on mataw gilikmanib mataw danmebta asor eraqim in giben ni niholib emim niwazad zaway nigiyta. Ad God ago gamuk in ginadib bolsa in ni ninan bilaqsamo God ago naw ni niholib tubol. Nazaq iyan naw dimunta God nigta na in saman hi usan. Ni anadin emad akabiy an em.

<sup>15</sup> Teq gamuk bunmo kawa ya tinibilenta ka ni muzinad akabiy an em. Ni nazaq emad teq ningo kabiy daq bunmo dimunmo lehsa on mataw bunmo ahol tuwaq daqay.

<sup>16</sup> Ninmo nihol anononmo wamuzad os. Osad ni ninan em haseq ningo suleq bilaq. Ni tuteqmo nazaq emsa teq God in ni nilumsiheq niwaqad in on mataw ni niqez huritayta na inaqmo tigiwaqdaqmo.

## 5

*Timoti in ago walmataw gilowan ton-daq*

<sup>1</sup> Ni mataw aseseqta ginadad gamuk atoranno hi gibilen. Haiqgam. Ni nimam alowan tonad inaq gamuk kiskismo bilaqta nazaqmo ni mataw aseseqta nenaq gamuk em. Ad ni nimaqaban gibilen nogmo ni mataw minminta gibilen. <sup>2</sup> Teq ni ninen inaq gamuk emaq nazaqmo ni on aseseqta nenaq gamuk em. Ad ni nihiyan nenaq gamuk emaqta nazaqmo ni on baras-barasta nenaq gamuk em. Gamuk emad ni in gigo hib ninad araq meqinta hi gwahtiqa.

*Yesus ago on mataw in on waburta saman diqmo osayta na tigilumsih daqay*

<sup>3</sup> Aw araq aduwo moqan in wabur iyim amomo diq osaqta na in aw waburmo diqta. Ni on naqanta ginadin emad tigilumsihdaqta. <sup>4</sup> Ari aw waburta araq ago onmin o in asesan asor osid ni giblensa in ginad em haseq ginen na ulumsihiy. Na in gigo kabiy danmebta. Na ezaqgo in amunibmo ginen gimam gituw bulad luwiyta na amenin in nazaqmo tiqem daqay. Daq na in God ameb dimun diqta.

<sup>5</sup> Teq aw waburmo diqta na in amomo samanmo osad in anad bunmo God-mo ago hib usaqta. Ussa in tutimmo God inaq gamuk emad in on mataw gigo afaqan inaq na gilumsihgo haqad bulonaqta. <sup>6</sup> Ari wabur asor in daq gihol bilaqta naqmo amomo anadin emad osayta. Osad in God anadin diq a hi emad in on mataw gilumsihgo ginad a hi emaymo. Nazaq iyan on naqanta in samanta tumoqiya nog iyim osayta. <sup>7</sup> Ni on waburta gamuk ka gibilensa in muzinad mataw gimeb anononmo luw osiy. In nazaq emsa teq mataw in gigilehunan a hi bilaq daqay. <sup>8</sup> Ari mat aw nog inmo asenlul teq ago ned giwamuzad a hi gilumsihaqta na in God ago suleq dimunta gileh ugaqta. Mat nazaqta in on mataw en ta asor God abin a hi huritim anan helmo a hi haqayta nagan gigo daq meqinta giquriyamim in daq meqin diq emaqta.

<sup>9</sup> Nazaq iyan ni aw wabur kazaqta ulumsihgo anan mar tonid usan. In ago ulig 60 nazaq tiqiya teq in mat tuwaqim inaq osad in ta aw araq ago mat inaq a hi luwta. <sup>10</sup> Aw na ahol abin in kabiy dimdimunta kabemmo amta teq in ago onmin anononmo giwamuzta teq mataw in ago bitab bolan in gilowan tonta teq inmo ahol wazan woqsa in God ago on mataw tawonta na gimen kabiy amikmikta amta. Teq in on mataw meqin ossa gibiyad gilumsihita. Ad in kabiy amo amo dimdimunta kabemmo giqemad in ahol bunmo kabiy nab eman lahta. Aw wabur naqan diqta ulumsihgo ni anan tumar tondaq.

<sup>11-12</sup> Ari on baras-barasta gidugniz tumoqiya na ginan ni hi mar ton. On naqanta in

osim ginad a ta eraqsa in gihol wasihim gunun emiya na itiyonim in Kraisi gileh uqad mat muturta a ta waqgo ginad emayta. In nazaq tona in giben on mataw gimeb timeqniyaq. <sup>13</sup> Teq in daq araq kazaq emaytamo. In gituw hiqiya kabiy haiqmo osad in bitbitmo gwalad tiqad luwayta. Teq in samanmo a hi osayta. Haiq. In gamuk yuwlozin on mataw hareso bilaqayta na huritim luwad in on mataw gigilehunan bilaqayta. Ad in on mataw bunmo gigo kabiy daq emayta na huritnan ginad diq bilaqsa in gamuk hi bilaqanta bilaqaytamo. <sup>14</sup> Nazaq iyan ya inad on barasta gidugniz tumoqiya na in mat a ta waqeq in onmin giqemad in gimo gigo bit wamuzad osiy haqaiq. In nazaq emsa teq mataw i gihar igayta na in i ginan meqin bilaggo adanteqin hiqiyaq. <sup>15</sup> Ni ninad em. On baras-barasta gidugniz tumoqiya na asor in dan titnonta hullosim Satan-mo tumuzad luway.

<sup>16</sup> Ari aw araq Yesus anan helmo haqayta na anenan waburta asor ossa aw na in tigilumsihdaq. Afaqan na in Yesus ago on mataw bunmo gigo a haiqta. Ari on waburta saman diqmo osayta naqmo ne tigilumsih daqay. Luweq ne on waburta bun diqmo gilumsihsa ne gigo nagah siqim iyaq. Siqim iyid ne on wabur ginaghan haiq diqta na a ta hi gilumsih daqay.

*Mataw marorta in gigo kabiy dimunmo emsa i giwazinad gidimun tonam*

<sup>17</sup> Ne gigo mataw danmebta in anononmo ne giwamuzsa ne giwazinad naw dimunta negiy. Ad mataw aseseqta na gilikmanib mataw God ago gamuk bilaqad asuleqin negad giholtuw bulayta na ne naw ayahmo negiy. <sup>18</sup> Na ezaqgo God ago marib gamuk araq kazaq bilam,

Bulmakau wit akabiy an emad wit bay ninalsa ne atenmos am hi waziy ham.

*Lo 25.4*

Ad gamuk araq bilam,

Mat mataw gimen kabiy emsa in amenin tuqg daqay ham. *Luk 10.7*

<sup>19</sup> Teq mat amulikmo era mat danmebta araq amalib nan emsa ni gamuk na hi hurit. Ari mataw giger o ezeqman in gamuk amulik na an ulumsihq bilaqsa ni in gizeq tuhuritdaq. <sup>20</sup> Teq mat danmebta araq daq meqinta emad in hullosnan atuw hiqiya ni Yesus ago on mataw bunmo gimeb mat na wad. Wadsa mataw danmebta bunmo in giyow na mebay waqsa ahol waqad in daq meqinta araq emnan tirab daqay.

*Timoti in mataw gilum kemeq teq God ago kabiyab giqemdaq*

<sup>21</sup> Ari God teq in atatin Kraisi Yesus inaq teq in ago angelo inmo aholyon gilum kemim giwamta na nenaq bunmo in i



gibiysa ya nidek wazim kazaq nibilenaig. Gamuk nawa ya teko nibilenta na ni muz naqmo hiqiyad mataw bunmo gigo hib ni daq araқibmo emad mataw asor gigomo hi leh haqaiq.

<sup>22</sup> Teq ni hidmo mat araқ aholib niben emeq bulonid in God ago kabiy hi eman. Luweq mat na ago daq araқ meqinta akasnaknib ulilemeq usdaq. Ussa teq abeb mat na God ago kabiy tiqemad in ago daq meqinta na inaqmo emsa afaqan na ninmo ningo tiqiydaq. Na ezaqgo ni mat na a hi loyin kemimmo hidmo ni kabiy ugta na ago. Ni nihol asawan woltayad ossa afaqan nazaqta niholib hi gwahtiqaan.

<sup>23</sup> (Teq ni yuw amomo uluwaqta na hulosaq ni wain ayun asitmo uluw tonmo. Ni nazaq emad teq ni nigem titiyaqta na teq niholib moq tutimmo gwalaqta na tihiqiydaq.)

<sup>24</sup> Mataw asor gigo daq meqinta ulalabmo usaqta. Nazaq iyan mataw na hazizirib lehsa in givin meqinta na danmeb le mataw gidekib woqsa teq amatawun in abeb bo gwahtiqaqta. Sa mataw asor gigo daq meqinta ulilemim usaqta. Nazaq iyan mataw na le hazizirib titursa teq in gigo daq na ulal iyaqta. <sup>25</sup> An nazaqmo mataw gigo daq dimunta in ulilemgo abanan haiqmo. Daq dimunta asor ulalabmo diq usaqta teq asor in asitmo ulilem nog iyim usad teq in ulal iyaqta. Nazaq iyan daq dimunta tuteqmo ulilemeq a hi usdaq. Dante nazaqta usaqta iyan ni hidmo mat araқ aholib niben emeq bulonid in God ago kabiy hi eman.

## 6

*Kabibiy mataw samanta na in kabiy dimunmo em daqay*

<sup>1</sup> Kabibiy mataw samanta Yesus anan helmo haqayta na in gigo aseseqta giqez huritad gihagenibmo osiy. Luweq in girerey emsa in gigo aseseqta na gibiyad in God abin bilawunad teq in God ago suleq bilawun daqaymo. <sup>2</sup> Ari kabibiy mataw na asor gigo aseseqta in inaqmo God anan helmo haqsa luweq in gigo kabibiy mataw helmo haqayta na ginad kazaq em daqay, I gigo aseseqta Yesus anan helmo haqad in i gimaqbaban tiqiyiyta haq daqay. Nazaq iyan i in giqez othasad kabiy hi emuq haq daqay. Kabibiy mataw na ginad nazaq hi emiy. Haiqqam. In ginad kazaq emiy. I gigo aseseqta Yesus anan helmo haqsa iyan i in tigilumsiham haqiy. God-mo i gigo aseseqta ginan anad bilaqsa iyan i in gigo kabiy dimunmo tiqemam haqad in ginad nazaq emiy.

*Mani utet adan na in daq meqinta bunmo alulin*

Gamuk kawa ya tinibilendaigta ka ni tuteqmo on mataw gibilenad ginad wazid eraqsa in muzin bugiy. Na in kazaq. <sup>3-4</sup> I gigo Iyahta Yesus KraiS ago gamuk helta na in God ago daq dimdimunta asuleqin i gibilenaqta. Ari mat araқ Yesus ago gamuk na geg ugad anadibmo suleq ta araқ bilaqta, mat na inmo ahol abin wazid eraqnan anad emaqta. Mat naqanta anad a hi em hasad in anad meqin diq usaqta. Ussa in gamukmo amalib an wolnan anad bilaqsa in mataw gigem ulumsa in nagah amikmikta aqanan mugayta. An mugad in anan gigem meqniysa teq in an wadad teq in an bilawunad teq in ginad meqinta gimaqbaban negayta. <sup>5</sup> Teq in tutimmo mataw nenaq gamukib an wolayta. Mataw na ginadib gamuk helta araқ diq a hi ussa in ginad buliyim mataw gigo os meqin tongo ginad emayta. Ad in ginad emay, I God ago daq dimdimunta nagan muzinad teq i es nagah kabemmo tuwaqam haqayta.

<sup>6</sup> Helmo, mat God anad muzinad ago daq dimdimunta emaqta na in God ago nagah dimunta kabemmo aholyon waqim in bilaqne mat anaghan kabemmo inaqta nog iyaq. Nazaq iyan in og ka ago nagah kabemmo waqgo aqutil a hi eraqsa in agem midemimmo usaqta. <sup>7</sup> I ginad emuq. I ginen giqeman i og kab gehitiqad i nagah araқ diq wazim ad a hi gehitiqauqta. Ad nazaqmo i og ka huloseq lehamta nab i nagah araқ diq wazeq ad a hi lehamtamo. <sup>8</sup> Ari i nagah neqqota na teq nagah gihol sihengota na inaq iyeq i bilaqam, Ka dimunmo tiqiy haqam. Haqad i nagah ta asor waqnan ginad a hi emam. <sup>9</sup> Ari mataw mani kabemmo waqnan ginad bilaqta na in dante nagunad luwsa daq meqinta hidmo bo gilum waqtaqta. Gilum waqsa mataw na gigem eraqsa in ginad hi emta adan emad in gimo gihol meqin tonayta. Ta teq in gigo ginad meqinta na giqirgur nog iysa in dante na hulosoq biyab a hi iyayta. Haiqqam. In dante na muzad luwim in meqniy hasim tihiqiyayta.

<sup>10</sup> Mani anan ginad bilaq ago adan na in afaqan amo amo kabemmo giqeman gwahtiqaqta. Mataw asor in giholyon nagah kabemmo tuwal emnan giqutil eraqin in dante nagunad luwad in ginad helta na kiskismo hulosaq le in KraiS anan helmo a ta hi haqiy. In nazaq emad luwim in gimo gihol santitiy kabemmo ugiy, bilaqne em amalib bul aqutil ulumsa in santitiy ayah diqmo waqtaqta nazaq.

*Ni niholtuw bulad God ago os dimunta ahiqiy haiqta na niholyon waq*

<sup>11</sup> Ari Timoti ni God ago matmo diq iyim iyan ni daq meqinta na bunmo gileh ugeq tuk. Tukeq ni God ago daq titnonta naqmo

muzinad luw. Luwad ni God anad muzad ago daq dimdimunta na emad ni in anan helmo haq. Haqad ni mataw ginan ninad bilaqsa ni afaqan sorad nituw hi hiqiyen. Ad ni ningo walmataw giyon daq kiskista em neg. <sup>12</sup> Mat Krai anan helmo haqqa na in bilaqne mat sibim ameb lehim naw waqaqta na nog. Nazaq iyan ni niholtuw diq buleq nibabun bunmo giquiyameq leheq os dimunta kuluwa-kuluwmo osayta na ni niholyon waq. God in os dimunta na nignan haqad nililewunta. Nililewunan ni os dimunta naqmo waqnan haqad kwaziqmo ni on mataw kabemmo gimeb turad Yesus anan helmo hamta.

<sup>13-14</sup> God inmo nagh bunmo giqeman kayeqmo giqusayta. Teq Krai Yesus zaway diq iyim turad in Pontiyus Pailat gamuk bilaq sireqimmo bulonta. Nazaq iyan ya God teq Krai Yesus inaq gimeb atoranmo kazaq nibilenaig, Ni God ago gamuk awaz meqinta in nigta na anononmo muzinad ningo daq bunmo on mataw gimeb dimunmo iysa ni daq arağ ananin waqdaqta niholib hi usan. Ni nazaq emad ossa le i gigo Iyahta Yesus Krai ni nimeb ulalab bo gwahtiqan. <sup>15</sup> God anad usaqta kam nabmo in Yesus Krai tuqulal tondaq. In amomo ameb diq iyim in nagh bunmo giwamuzsa in ago on mataw bunmo in abin iluwayta. In king bunmo gigo King-ta teq in mataw aseseqta bunmo gigo Iyah diqta. <sup>16</sup> In amomo a hi moqadmo kuluwa-kuluwmo osaqta. In ahol anuwan ayahmo oysa iyan mataw agerab a hi loqayta. Mataw in gimeb God ahol waqgo biyab haiqta iyim mat arağ diq in ahol a hi wanta. God in mat nazaqta iyan i in abin tuteqmo iluwuq. Sa in zaway bunmo wazad in nagh bun diqmo giwamuzad kuluwa-kuluwmo osan. Hel diqtaqmo.

*Mat ago mani nagh kabemmo usaqta na in God anan helmo haqad on mataw asor gilumsihan*

<sup>17</sup> Mataw og ka ago nagh kabemmo inaqta na in igmo ag haqsa ni gibilenid in gihol abin hi iluwiy. Ad in ginad bunmo in gigo es nagh nagan gigo hib hi emiy. Nagh na muran useq babeq in tihiqiydaqta. Ni mataw na gibilenid in ginad bunmo God amomo ago hib usan. Na ezaqgo God-mo in nagh dimunta i gigem eman dimniyaqta na bunmo igaqta. <sup>18</sup> Nazaq iyan ni mataw gigo nagh kabemmo inaqta na gibilensa in mataw gina haiqta gilumsihiy. Gilumsihad in gigo nagh kabemmo usaqta nazaqmo in mataw na ayahmo gidimun toniy. Ad in gigo es nagan ginad hi wazsa in mataw meqin ossa gibiyad in gigo nagh kabemmo mataw na gigo hib ibereq negiy. <sup>19</sup> In nazaq giholyon dante wastitayeq teq abeb

in nagh arağ ago siqim a hi iy daqay. Ad in os helta ahiqiy haiqta na inaqmo in giholyon tuwaq daqay.

*Timoti in ago kabiy wamuz naqmo hiqiydaq*

<sup>20</sup> Timoti, God kabiy nigta na ni wamuz naqmo hiqiysa in hi woqan. Ad ni og ka ago gamuk samanta alulin haiqta na gileh ug. Teq mataw bilaqay, I dante ahol tuwaw haqad teq in gigo gamuk God ago gamuk inaq a hi irensa ni mataw nazaq katiyayta na girabunad pesanmo luw. <sup>21</sup> Mataw asor suleq katiyayta na anan helmo haqad muzinim lehim in God ago gamuk helta na tuhulosiy.

Ari God agem dimunta ne bunmo negsa ne osiy. Nawaqmo.

## 2 Timoti

### **Sansandek gígerta Pol in Timoti amen mar tonan lahta Gamuk ameb lehaqta**

Pol ame gígerta uliq Rom-ub irquran osad in Timoti amen sansandek ka mar tonim eman leh ug. Kam nab Pol afaqan kabemmo soryaq. In aholyogniz asor God ago kabiy emnan haqad hulosis lehsa in amomo osyaq. Ossa mat amulik-mulikmo bo Pol ahol waqsa bunmo in Pol aholib hiqiy yaqay. Hiqiyisa Pol ago hazizir amebta nab in amomo iyim tur. Teq in ago hazizir na le a hi dimniyan in anad tiqemyaq, Muran Rom mataw ka ya inol emid ya tumoqdaiq haqyaq. Nazaq iyan in Timoti bulonid agerab hidmo tuboldaq haqad in amen gamuk ka eman lah.

Timoti in Pol inaq kabiy agaribmo emsa Pol in Timoti loyinsa in ago amun diqta nog iyyaq. Nazaq iyan luweq in irquran osaqta na ago Timoti anad meqniy hasdaq haqad in gamuk awaz meqinta kazaq bulon, Timoti, ni ninad helmota na hi hulosaq ni Yesus Kraisa ago wagam dimunta bilaqta na ni waz naqmo hiqiy ham. Ni God ago gamuk na bunmo muzin bugsa mataw afaqan nigad santitiy nigma ni zaway diq iyeq God kabiy nigta na ni emmo em ham.

Pol anad emyaq, Ya moqid teq Timoti in yaqgo ban waqeq God ago kabiy ka em tuteq ad tilehdaq haqyaq. Haqad in Timoti bulonim bilam, Kabiy ka God-mo agota iyan in wamuzsa in a hikidik woqdaq ham. Sa mataw i gisan ka wol emid moqsa i giwitan le God inaq kuluwa-kuluwmo ginad dimniysa osamta ham. Nazaq iyan Timoti ham, ni ya isen muzinad helmo haqad nidan sosil hi iyan ham. Ad teq ni nigem kiskismo ussa ni mataw ginan ninad bilaqsa afaqan bunmo sor ham.

### **Timoti aholtuw bulad God ago kabibiy matmo diq iydaq**

<sup>1</sup> Ari yaqmo Pol. God-mo anad bilaqan ya Kraisa Yesus ago Aposel iyta. Ya on mataw gibilensa in os dimunta God negnan hel diqmo bilamta na ago hurit kem daqay haqad God in kabiy na ya ibenab amta.

<sup>2</sup> Timoti, ni yaqgo amunmo diq nog iysa ya ni ninan inad bilaqta. Ya ninmen gamuk ka mar tonim eman leh nigaq.

I Gimam God teq i gigo Iyahta Kraisa Yesus inaq in gigem dimunta nigad in ni ninan ginad meqniysa ni nigem midemeqmo usan.

*I Yesus awagamun dimunta ago gimebay hi woqan*

<sup>3</sup> Ya isesan God abin wazinad ayon lotu em yaqayta nazaqmo ya emaiqmo. Emad ya igem loyinsa in God ameb dimun diqmo usaq. Timoti, taromab teq zeqab inaqmo ya God inaq gamuk emad ya ni ninadin emad God esey ugaiqta. <sup>4</sup> Ad ya nihulosim lehsa ni nimeqil womta na ya anadin emad ya a ta nibiynan inad diq bilaqaq, ya nibiyeq teq inad tidimniydaq haqad. <sup>5</sup> Teq ni nimileq a hi iyad Kraisa anan helmo diq haqta na ya anadin emaiq. Kwaziqmo ni nises Lowis teq ni ninen Yunis in helmo haqad osiya. An ya inad emaiq in ginad nog ni ninad usaqmo haqaiq. <sup>6</sup> Nazaq iyan kwaziqmo ya iben niholib emim niwazsa ni God ago naw wamta na ni anadin emad akabiyan waz ta eraqsa in niholib ayahmo diq usan. Bilaqne faq miynan tonsa mat ulam haman amileq a ta eraqta nazaq nog. <sup>7</sup> Ni ninad em. God in ago Bugaw igan Bugaw na i giqemid i mataw girabungo a haiqta. Haiqgam. Bugaw na i giqemid i zaway diq iyeq osad i on mataw ginan ginad bilaqsa i gigo luw os anononmo wamuzam haqad in ago Bugaw na igta.

<sup>8</sup> Nazaq iyan ni i gigo Iyahta awagamun ulalab bilaqan nimebay hi woqan. Ad ya Iyahta ago kabiy emsa mataw ya iwazim iqrquran ya kawa osaiqta na ago ni nimebay hi woqanmo. Haiqgam. God zaway nigma ni ya inaq araqibmo Yesus awagamun dimunta akabiyan emad i araqibmo afaqan soruq. <sup>9</sup> I God ago on mataw tawonta iyeq osam haqad in i gililewunim aholyon giwamta. Teq i kabiy dimdimunta emsa in i gibiyad giwamta nazaq a haiq. In anadibmo agem dimunta samanmo igad in i gilumsihim giwamta. Kwaziqmo diq in og ka eman a hi gwahtiqsamo in anad fiqam, Ya on mataw iholyon giwagdaiqta na inad negad ya Kraisa Yesus ago kabiy amalib tigilumsihdaq ham. <sup>10</sup> Haqan muran mat i gilumsihim giwagdaiqta amatin Kraisa Yesusmo bo tugwahtiqim in God anad bilaqan usta na eman ulal tiqiy. In bolim moq ago zaway walemim teq in os dimunta kuluwa-kuluwmo osayta na ago dante eman saw anuwanib tugwahtim. An on mataw Yesus awagamun dimunta huritim anan helmo tihaqayta na in dante na ahol waq kemayta.

<sup>11</sup> Ya Yesus awagamun dimunta naqmo waqeq a le og saw haresmo bilaqdaiq haqad God ya itowun eman ya in ago Aposel iyta. Iyim ya in ago gamuk na asuleqin on mataw negad luwaiqta. <sup>12</sup> Daq alulin naqmo ago ya kawa santitiy waqad osaiqta. Teq ya imebay a hi woqaq. Na ezaqgo ya mat anan helmo haqaiqta na ago ya tuhurit has. In kabiy dimunta ya ibenab amta na inmo wamuz naqmo hiqiyisa yaqgo kabiy na dimunmo ussa le

Krais Yesus ta boldaqta na akaman tugwah-tiqdaq.

<sup>13</sup> Ya suleq dimunta nibilenta na ni anadin emad tuteqmo ni suleq na adan emad os. Osad ni Krais Yesus asen muzad ni God anan helmo haqad teq ni on mataw ginan ninad bilaqan. <sup>14</sup> God ago Bugaw Dimunta i giduganib usaqta na in nilumsihsa ni God kabiy dimunta nibenab amta na anononmo wamuzsa in hi woqan.

<sup>15</sup> On mataw saw Esiya-ibta na bunmo gileh tiyagiy. Ad in gilikmanib mataw giger Figelus ayow Hermogenes inaq tiqihulosiymo. Na ago ni tuhuritta.

<sup>16-17</sup> Teq ya Onesiforus asenlulniz gimen Iyahta bulonaiqta, in mataw na ginan anad meqniydaq haqad. Na ezaqgo ya iqirquran kab ossa Onesiforus in ya iben am waziya ka ago amebay a hi womta. Haiqqam. In uliq Rom-ub kab bolim in aholtuw bulad inagunad luwim le in bo ya tiqibiyta. In sirisirimo bo ya ibiysa ya igem hastitaysa zaway muturta waqyaiq. <sup>18</sup> Nazaq iyan ya inad awaz meqin amalib Iyahta kazaq bulonaiq, Iyahta haqaiq, kam abebtanta nab ni Onesiforus anan ninad meqniyan haqaiq. Teq mat na uliq Efesus-ib ame kabemmo ya ilumsihtamo. Na ago ni tuhurit kamta.

## 2

*Timoti in Krais Yesus ago bab mat dimunta iyeq osan*

<sup>1</sup> Ari yaqgo amun Timoti, Krais Yesus agem dimunta nigad nilumsihaqta na ni anadin emad ni niwaz meqniyeq os. <sup>2</sup> Ad ningo walmataw gilikmanib ni mataw asor gituw inaqta ginagun. Ginagunad gibiyeq teq ni gamuk kwaziqmo ya mataw kabemmo gimeb nibilenan ni huritta na agamukan bunmo ni mataw na neg. Negid teq in gamuk na asuleqin tuteq in gigo walmataw gibileniymo.

<sup>3</sup> Teq ni Krais Yesus ago bab mat dimunta iyeq osad ni santitiy sor, i bunmo Yesus ago kabiy emad santitiy sorauqta nazaqmo. <sup>4</sup> Mat bab emaqta na in kabiy haesmo mataw uliqabta emayta nagan in a hi emaqta. Haiqqam. In ago ayahta anad muzinad in ago ayahta kabiy anan anad bilaqtaqta naqmo amomo in emaqta. <sup>5</sup> Teq mat sibitayim ameb le towub gwahtiqtaqta na in anadibmo a hi sibaqta. Haiqqam. In daq na ago agununin muzinim sibaqta. Ari in gunun nagan itiyoneq in ago naw na a hi waqdaq. <sup>6</sup> Teq mat aholtuw bulim kabiyab didaq layta naqmo in kabiy ame waqim neqayta. Mataw haes in didaq ameta na waqim a hi neqayta. <sup>7</sup> Gamuk naway na ni anadin emsa Iyahta teq ninad emid hastitaydaq. Hastitaysa ni gamuk ezeqman na alulin bunmo ninad tiqem hasdaq.

<sup>8</sup> Tuteqmo ni Yesus Krais anadin em. In Devit asenlulib gwahtiqim in moqim teq ta eramta. Ya Yesus awagamun dimunta nazaqmo bilaqaiqta. <sup>9</sup> Teq ya wagam dimunta na bilaqsa mataw ya inan mat meqin haqad in afaqan amo amo yagim le tiqiqirquriy. Bilaqne ya gavman gigo gunun itiyonim daq meqinta emta nazaq. Ta teq in God ago gamuk irqureq a hi wasih daqay. <sup>10</sup> Nazaq iyan ya on mataw God gilumim aholyon giwamta na ginadin emad ya ituw a hi hiqiysa afaqan ka bunmo soraiqta. Sorad ya inad emaiq, Ya God ago on mataw na gimen afaqan ka sorsa teq in le ban dimunta Krais Yesus in gimen wastitayan usaqta na waqeq in God inaq ginad dimniysa kuluwa-kuluwmo tuqos daqay haqaiq. <sup>11</sup> Teq gamuk araq ya nibilendaiqta ka in hel diqtaqmo.

I Yesus Krais inaq moqeq teq i inaq kayeqmo tuqosam.

<sup>12</sup> Ad i afaqan sorad gituw a hi hiqiysa teq i inaq araqibmo king iyeq tuqosam.

Ari i gileh ugsa teq in i gileh tiqigdaqmo.

<sup>13</sup> Teq i ginad buliyeq i gigo gamuk helta in bulonta na i a ta hi muzinsa in i gigo hib daq nazaq a hi emdaq.

Inmo gamuk helta i gibilanta na tumuzin tutdaq.

Na ezaqgo inmo ago gamuk in bilamta na in a hikidik huloddaq.

*Timoti atuw bulad God ago kabibiy matmo diq iydaq*

<sup>14</sup> Tuteqmo ni gamuk nawa ya teko nibilenta na ningo on mataw ginadib emsa in anadin emad osiy. Ad ni God ameb in gidek wazad gamuk atoranmo gibilensa in gamuk amikmikta aqanan hi mugiy. An mug nazaq na in mat araq a hikidik ulumsihaqta. Haiqqam. Mataw nazaq an mugs mataw ta asor gamuk meqinta na huritad in ginad dimunta usaqta na timeqniyaqta.

<sup>15</sup> Ni niholtuw bulad God ago kabiy emsa in ni ninan anad dimniyan. Ad ni on mataw in ago gamuk helta asuleqin negad ni gamuk na alulin anonon ninad em hasadmo in gibilen. Ni nazaq God ago kabiy wastitayeqmo emad teq ni in ameb turad ningo kabiy anan nimebay a hi woqdaq. <sup>16</sup> Teq ni og ka ago gamuk samanta God abin wazan woqtaqta na bunmo gileh ug. Mataw gamuk naqanta bilaqad oseq in God anad huloseq daq meqinta haesmo emsa le daq naqmo ayahmo diq in gilikmanib tuqusdaq. <sup>17</sup> Ussa in gigo gamuk meqinta na on mataw kabemmo giholib lehdaq, bilaqne mat aholib asulan meqinta gwahtiqim lilihim ban bunmo waqtaqta nazaq nog. Mataw giger Himeneus ayow Filetus inaq in gamuk naqanta bilaqayta.

18 In giger gamuk helta ago dante tuhosim in bilaqay, Mataw hodhodab eraq daqayta akaman na tekomo tugwahtim haqayta. Abeb mataw moqeq in a ta hi eraq daqay haqayta. Haqad in mataw asor ginad helta walebolsa in ginadnad tiqemayta.

19 Teq God ago gamuk awaz meqniyim usad ahol a hi buliyaqta. In bilaqne tituq araƒ zawayta tileyan turaqta nazaq nog. Teq tituq na ahulib gamuk giger mar tonan usaqta na gigo araƒ in kazaq bilam,

Iyahta in ago on matawta na gigo tuhurit ham.

Teq ta araƒ na in bilam,

On mataw Iyahta ahaqenib iyim abin wazinayta na bunmo in daq meqinta gileh ugiy ham.

20 Ni ninad em. Bit araƒ ayahtab reb deg teq yuqsan amo amo giqusaqta. Nagah na asor gol teq silva amalib giqemiya. Teq asor ayib sisoqiya teq asor og soskaqib giqemiya. Nagah na asor in kabiy dimdimunta emgo giqusaqta teq asor in kabiy meqmeqinta emgo giqusaqta.

21 Nazaq iyan on mataw in giholib daq meqinta ya ginan teko nawa tibilayta nagan suhol bugeq in bilaqne gog deg dimdimunta amalib kabiy dimunta emayta nazaq nog tiqiy daqay. Iyeq in bit anamren na amomo agota iysa in giwazsa in aben inaƒ diq tiqiy daqay. Sa bit anamren na in gimalib kabiy dimdimunta emgo haqad wastitayeqmo gigo banab giqemdaq.

22 Nazaq iyan mataw minminta gigemab ginad meqinta gwahtiqaqta nagan ni gileh ugad tuk. Tukeq ni on mataw gigem anumlan haiqmo osad in Iyahta ahaqenib iyim anan biyayta naqmo nenaq luwad ne bunmo God-mo ago daq titnonta muzinad luwiy. Ad ni mataw dimunta na nenaq God anan helmo haqad ne an anan ginad bilaqsa zib alowabmo osiy.

23 Teq mataw nan agadanta bilaqsa in gilikmanib an mug alulin haiqta gwahtiqsa ni gamuk na asor hi bilaq. Mataw gamuk naqanta bilaqad in gigem meqniysa an haresmo wadayta. Na ago ni tuhuritta.

24 Iyahta ago kabibiy mat in mataw nenaq an a hi mugdaqta. Haiqqam. In mataw bunmo gilowan tondaqta. Teq in ago walmataw God ago suleq gibilen sireqsa mataw ta asor in gihar ugsa in mataw na gigo afaqan sorad a hi ginadaqta. 25-26 Haiqqam. Mataw na in ago gamuk othassa in kiskismo ginad wastitaydaqta. Mataw gamuk othasayta na in Satan ago dohub woqan Satan in giwazim giqeman in anad muzinad daq emayta. Teq Iyahta ago kabibiy mat na in mataw naqanta kiskismo giwastitaydaqta. Na ezaqgo luweq God in mataw na gilum-sihid in ginad tubuliy daqay. Ginad buliyeq

gigo daq meqinta gileh ugad teq in God ago gamuk anan ginad em has daqay. Ginad em haseq teq in Satan ago dob bayid woqsa asanib gwahtiqeq osad in ginad hastitaysa dimunmo tuqos daqay.

### 3

*Kam abebtanta na bo sinsin tiqiysa teq on mataw daq meqinta kabemmo em daqay*

1 Ari ni ninad em. Kam abebtanta na tubolsa afaqan meqmeqinta kabemmo kazaq tugwahtiqdaqta. 2 Mataw in gimo gihol anadin emad mani kabemmo waqgo ginad em daqayta. Teq in gihol abin iluwid eraqsa in igmo ag haqad nan meqinta haresmo bilaq daqayta. Teq in ginenman giqez othas daqayta. Teq on mataw in gimen daq dimunta emsa in ginad dimunta a hi neg daqayta. Teq in God gileh ugad daq anumlan inaƒta naqmo emad os daqayta. 3 Teq in mataw amota meqin diq ossa gibiyad in ginan ginad a hikidik meqniydaqta. Teq in mataw ginan gigem meqniyad in ginad na a hikidik buliy daqayta. Teq in mataw gilehunana bilaq daqayta. Teq in giholmo in ginad wamuzdaqta. Teq in gimot meqniysa in mataw haresmo gimeqin ton daqayta. Teq in God ago daq dimunta na bunmo geg ug daqayta.

4 Teq in giyogniz kat negeq giwaqeq bab gibenab giqem daqayta. Teq in ginad hi emta adan muzinad bilaq daqay, Igmo asit-taqmo haq daqayta. Teq in ginad dimniysa osnan ginad bilaqsa in God anan ginad a hi bilaq daqayta. 5 Teq in mataw kat negad God ago daq akabiyakinmo em daqayta. Ta teq in God ago zaway anan helmo a hi haqad in asit diq a hi loyin daqayta. Nazaq iyan ni mataw naqanta girabunad pesanmo luw.

6 Na ezaqgo mataw na gilikmanib asor in le on ginad haiqta na gigo bitab gwalim kat negad ginad wamuzayta. On naqanta gigo daq meqinta kabemmo giholib usad iyan in ginad soqotim usaqta. Sa in gihol gigem eraqsa in muzgomo iyayta. 7 On na tutimmo suleq dimunta huritayta teq gamuk dimunta na ginadib lehim in soqotim a hi usaqta. Nazaq iyan in gamuk helta na anan ginad a hi em hasayta.

8 Mataw nawa daq meqmeqinta nazaq emayta na in gamuk helta bab ugayta, kwaziqmo Janes ayow Jambres inaƒ in Moses bab ugiya nazaqmo. Mataw na ginad meqinta ayahmo ussa in katiyad God anan helmo haqayta. 9 Ta teq in gigo daq na ayahmo diq a hi gwahtiqdaq. Haiqqam. In gigo daq agadanta na gwahtiqsa mataw bunmo ahol tuwaq kem daqay. Kwaziqmo Janes ayow Jambres inaƒ daq agadanta

emsa on mataw ahol waq kemiyta nazaqmo.

*Timoti in God ago gamuk waz naqmo hiqiydaq*

<sup>10</sup> Ari ya ninaq luwad ya on mataw God ago suleq gibilensa ni tuhurit bugta. Ad ni yaqgo daq bunmo ahol waqad ya iholyon dan emim muzaiqta na ago ni tuhuritmo. Teq ya God anan helmo haqaiqta na teq ya ituw a hi hiqiysa kabiy emaiqta na teq ya mataw ginan inad diq bilaqsa ya afaqan sorad ihol a hi hureq hasaiqta na ni ahol tuwamtamo. <sup>11</sup> Teq ya God ago kabiy emsa mataw imeqin ton yaqayta na ago ni tuhurit. Antiyok-ib teq Aikoniyam-ub teq Litra-ib mataw santitiy meqin diq yagiyta na ago ni tuhurit bug. Uliq nab mataw imuzad imeqin tonsa ya afaqan ayahmo sorta. Teq Iyahta ilumsihsa afaqan nagan a hi inol am. <sup>12</sup> Helmo, on mataw Krai Yesu ahalib soqoteq in God ago daq dimdimunta emad luwsa mataw tigimeqin ton daqay. <sup>13</sup> Sa mataw ginad meqinta usaqta na teq mataw katiyayta na in daq hihiq emad oseq in daq meqinta mebmemo em yaqayta na uriyamad in ta daq meqin diqta tiqem daqay. In on mataw kat negad teq in gimo nan katiyta anan helmo tihag daqaymo.

<sup>14</sup> Ari Timoti ninmo nazaq hi em. Haiqgam. On mataw gamuk helta asuleqin nibileniya na gigo tur os ni anadin emad ni suleq in gigo hib huritim anan helmo hamta naqmo ni muzin tut. <sup>15</sup> Teq kwaziqmo ni amunib osad ni God ago mar tawonta na bunmo huritad osim bo muran kawa tiqiy. God ago gamuk naqmo in Krai Yesu anan helmo haqgo adan niqisihunaqta. Nazaq iyan ni gamuk na muzinsa teq God ni nilumsihagq tiniwaqdaq. <sup>16</sup> God ago marib gamuk usaqta na bunmo God ago Bugaw inmo eman gwahtimta. Nazaq iyan gamuk na ayahmo i gilumsihagta. Gamuk nab i God ago suleq helta waqauqta. Teq gamuk na in on mataw ginad meqinta wazan woqaqta. Teq in mataw gigo luw os wastitayaqta. Teq gamuk na in God ago dante titnonta na ago i gibilen kemaqta. <sup>17</sup> Nazaq iyan God ago kabibiy on mataw bunmo in gamuk na wazad in God ago kabiy emgo anaghan ara q ago siqim a hi iyayta. Haiqgam. In God ago kabiy dimdimunta bunmo tiqem bug daqayta.

## 4

*Timoti zaway diq iyeq God ago gamuk bilaqan*

<sup>1</sup> Ari God teq Krai Yesu mat on mataw tumoqiya teq a hi moqayta inaqmo giyon hazizir emdaqta amatin na inaq in ya

ibiyisa ya gamuk ara q awaz meqinta tinignan. Ad Krai Yesu teq on mataw bunmo gimeb ulalabmo boleq ago maror og saw bunmo emid gwahtiqdaqta na ya anadin emad ya atoranmo kazaq tinibile-naiq. <sup>2</sup> Ni on mataw God ago gamuk gibilen. In gamuk na huritnan ginad bilaqsa o haiq in gituw hiqiysa ni na ago a hi bilaqad ni gibilenmo gibilen. Ad ni gamuk awaz meqintaqmo amalib gibilenad giquqtil ulumsa in ginad buliyiy. Teq in daq meqinta emsa ni ginad. Ad in gidan sosil iysa ni zaway neg. Tuteqmo ni God ago suleq gibilenad ni in gigo afaqan bunmo sorad nituw hi hiqiy. <sup>3</sup> Na ezaqgo kam ara q meqinta nawa tubolaq. Kam na bo tugwahtiqid teq mataw in suleq dimunta huritnan ginad a hi bilaqdaq. In gamuk gidek siriraqta naqmo huritnan ginad bilaqsa in mataw ta asor gihureqid in bo suleq in ginad usaqta naqmo bilaqsa in tuhurit daqayta. <sup>4</sup> Ad in gamuk helta na huritnan gituw hiqiysa in gihol buliyeq dante hareso muzad in wagam samanta alulin haiqta naqmo huritnan gidek tiqem daqay. <sup>5</sup> Ari ninmo teq worworeqmo osad mataw afaqan nigsa ni sorad nituw hi hiqiy. Ad ni on mataw God ago gamuk dimunta gibilenad ni kabiy God nigta naqmo ni em bug.

*Pol moqdaqta akaman sinsin tiqiy*

<sup>6</sup> Ari mataw ya inol em daqayta na sinsin tiqiy. Inol emid ya inedan bilaqne mataw wain ayun tamaz emim God anog-nib wazbalan woqaqta nazaq nog tiqiydaq. <sup>7</sup> Ya God ago hab nenaq an wolaq ya wagay dimunta nab iwaz meqniyim titur. Ad God yaqmen tow amta nab ya sibim le tug-wahtiy. Teq ya God ago suleq helta na waz naqmo hiqiyad ya in anad tumuzin bug. <sup>8</sup> Muran mat sibim le towub gwahtiqaqta na ago balaw dimunta gifaqinib emayta na in ya ibaq tunim usaq. Balaw na in kazaq. Iyahta teq ya inan mat titnonta haqid ya ibin nazaqmo iholib tuqus tutdaq. Iyahta daq titnontaqmo amalib on mataw gigo daq ulum kemaqta. Ad in hazizir ayahta emdaqta akaman nab teq in naw na tiyagdaq. Teq in ya imomo naw na a hi yagdaq. Haiqgam. On mataw ginad emay, Iyahta hidmo bolan haqad gihol husisiqsa osayta na bunmo inaqmo in God abenab naw dimunta na tuwaq daqaymo.

*Timoti in Pol ago hib hidmo bolan*

<sup>9</sup> Timoti, ni agudan hi emad hid naqmo yaqgo hib bol. <sup>10</sup> Na ezaqgo Demas in og ka ago nagh anan moqad in ya ihulosim uliq Tesalonaika-ib tilah. Teq Kresens saw Galesiya-ib lehsa Taitus saw Dalmesiya-ib tilahmo. <sup>11</sup> Sa Luk amomo ya inaq kawa osauq. Nazaq iyan ni bolad teq ni Mak

waqeq inaq bol. In mat dimunta iyim in ya kabiyab tiqilumsihdaqta. <sup>12</sup> Teq ya Tikikus eman Efesus-ib lahta.

<sup>13</sup> Ni bolnan teq uliq Trowas-ib ni le Karpus ago bitab yaqgo iholsihen sisaqta ya hulosan nawa usaqta na ni waqeq teq a bol. Ad ni yaqgo buk giwaqmo. Giwaqad buk karuw asanib giqemiya na ni inaqmo giwaq ton. Buk naqmo ya ahol waqnan inad bilaqta.

<sup>14</sup> Aleksanda mat ain akabiyan emaqta na in ya imeqin diq tonta. Abeb teq Iyahta in ago daq na amenin tuqugdaq. <sup>15</sup> Ni mat na ago nihol waz. In God ago gamuk i bilaqta na ababunmo diq.

<sup>16</sup> Ya ime amebta hazizirib gamuk amenin emad tursa mat araq ya ibunib turad gamukib a hi ilumsih. Haiqgam. Mataw bunmo tiqihulos yagiy. Teq ya God bulonaiq, Mataw ya ihulosiyta na gigo daq meqinta na ni walemad anadin ta hi em haqaiq. <sup>17</sup> Ari ya hazizirib tursa Iyahtaqmo ibiy muzad zaway yagyaq, ya in ago gamuk dimunta bilaq sireqsa on mataw en ta asor Juda a haiqta na tuhurit daqay haqad. In nazaq ilumsihim in laiyon ateb iwaqan ya afaqan araq a hi way. <sup>18</sup> Ad nazaqmo muran teq abeb mat nog imeqin tonnan tona Iyahta ilumsihid ya dimunmo tuqosdaiq. Oseq yaqgo kam tugwahtiqid nab teq in ya iwaqeq iqad ago sawab lehid ya in ago maror aduganib dimunmo tuqosdaiq. Nazaq iyan i bunmo tuteqmo Iyahta amomo abin wazid eraqsa osuq! Hel diqtaqmo.

<sup>19</sup> Ari ni Prisila aduw Akwila inaq teq Onesiforus asenluniz na bunmo yaqgo zeq dimun neg. <sup>20</sup> Ya Erastus uliq Korin-ib hulosan osaq. Ari Trofimius ago moq inaq iyan ya Miletus-ib hulosan towa osaq. <sup>21</sup> Ni agudan hi emad hidmo bol. Luweq ni tim meqinta amuditqanta na anobun qwaydaq.

Yubulus teq Pudens teq Linus teq Klodiya teq ni nimaqbaban Kraiss aduganibta na bunmo in gigo zeq dimun ninmen eman nawa lah.

<sup>22</sup> Iyahta ni niwamuzad ninaq osan.

Ari God agem dimunta ne bunmo negsa ne osiy. Nawaqmo.

## Taitus

### **Sansandek Pol in Taitus amen mar tonan lahta Gamuk ameb lehaqta**

Taitus in Juda mat a haiqta. Teq in Yesus anan helmo tihagan Pol in waqim inaq on mataw en ta asor Juda a haiqta na gigo hib Yesus ago kabiy tiqem yaqay. Kam araqaq uliq Jerusalem-ub Aposel in humab ayahta araqaq emsa Pol in Taitus waqim inaq humab nab lehiyta (Aposel 15.2). Teq Pol ame gigermo Taitus eman in uliq Korin-ib kabiy emnan lahm. (2 Korin 7.6-7; 8.6, 16). Teq in giger kabiy emad luwim le nud Krit-ib gwahtiqtim in Yesus awagamun dimunta gibilenim teq in saw nab Yesus ago on mataw gidauhan asor gilulin eman tugwahtiqiy.

Gwahtiqtan teq nud Krit-ib kabiy na a hi hiqiyasamo Pol in Taitus hulosan nab ossa in saw araqaq tilah. Lehim in uliq araqaq tuqosad teq in Taitus amen sansandek ka mar tonim Taitus in kabiy asor usaq na emid hiqiy bugdaq haqad in bulon. Bulonim in bilam, Taitus ham, ni nab osad kwaziqmo ya nibilenta nazaqmo ni uliq bunmo leheq mataw danmebta Yesus ago on mataw giwamuz daqayta na ni gitowun emid osiy ham. Teq ni ninad em hasadmo mataw dimdimunta suleq katiyta bayid woqdaqta naqmo amatawun ni gibiy kemad ni gitowun em ham. Haqad in bilam, Ninmo nihol anononmo wamuzad teq ni Yesus ago on mataw na bunmo ginad enqenunsa in dante titnonta na muzad akabiyan emad osiy ham.

### **Taitus in Yesus ago on mataw nud Krit-ib osayta na gilumsihad gigo daq wastitaysa in ginad helmo haqayta na awaz meqniyan**

<sup>1</sup> Yaqmo Pol, ya God ago kabibiy mat teq ya Yesus Kraisa ago Aposel-mo. Ya God ago on mataw in gilumim aholyon giwamta na gilumsihasa in gigo ginad helta na awaz timeqniydaq haqad in ya iqeman ya in ago kabiy ka emaiqta. Teq ya God ago gamuk helta na on mataw gibilensa in ginad em hasad God ago daq dimdimunta naqmo emad os daqay haqad in kabiy kab ya iqamta. <sup>2</sup> Iqeman ya God ago on mataw na gimen kabiy emsa in God anan helmo haqad in os dimunta kuluwa-kuluwmo os daqayta na amen emad tuqosayta. Kwaziq diqmo God in og ka eman a hi gwahtiqtasamo in ago on mataw os dimunta na negnan hel

diqmo bilamta. Ad in a hi katiyaqta. <sup>3</sup> God I Gilumsihim Giwagaqta na in nazaq bilaqim teq abeb kam inmo anad usta nabmo in ya iwaqim ibenab kabiy eman ya in ago gamuk na waqim bilaqsa ulal tiqiyay.

<sup>4</sup> Taitus, ya sansandek ka ninmen eman nawa lehaq. Ya inad Kraisa anan helmo haqaiqta nazaq ni ninad usaqmo. Nazaq iyan ni yaqgo amunmo diq.

I Gimam God teq in atatin Kraisa Yesus i gilumsihim giwamta amatin na inaq in gigem dimunta nigma ni nigem midememqmo usan.

*Taitus in mataw dimdimunta gitowun emid in Yesus ago on mataw giwamuzad os daqay*

<sup>5</sup> Ari ya kabiy asor liqabmo hulosan usaqta na ni emid hiqiy bugdaq haqad ya nihulosa ni nud Krit-ib nawa osaq. Ni nab osad kwaziqmo ya nibilenta nazaqmo ni uliq bunmo leheq mataw danmebta Yesus ago on mataw giwamuz daqayta na gitowun emid osiy. <sup>6</sup> Teq ni mataw kazaqta gibiyad giwag. In giben dimunta mataw gimeb usaqta. Teq in aw tuwaqim inaq osad in ta mat araqaq ago aw inaq a hi luwayta. Ad in gigo onmin Kraisa anan helmo haqad in daq hihiq a hi emad teq in ginenmaman giqez a hi othasaytamo.

<sup>7</sup> Ni ninad em. Mat Yesus ago on mataw giwamuzaqta na in God-mo ago kabiy emaqta. Nazaq iyan ni mat abin dimunta on mataw gimeb usaqta naqmo ni waqid in Yesus ago on mataw giwamuzan. Mat ni waqdaqta na in yaqmo ag haqad ago on mataw gamuk atoranno a hi gibilenaqta. Ad in agem hidmo a hi meqniyaqta. In yuw atoranta a hi uluwaqta teq in mataw haresmo a hi ginolaqta. Ad in mani kabemmo waqeq tuwal emgo anad a hi emaqtam. <sup>8</sup> Mat na mataw in ago bitab bolsa in gilowan tonaqta. Ad in God ago daq dimdimunta naqmo emnan anad bilaqayta. In mat anad em hasaqta teq in ago daq titnonta. In God anadin diq emad worworim osaqta. <sup>9</sup> Teq in God ago gamuk asuleqin helta i Aposel gigo hib wamta naqmo in waz naqmo hiqiyayta. Mat nazaqta in Yesus ago on mataw God ago suleq dimunta negsa in gigem zaway tiqiy daqayta. Teq in mataw God ago suleq geg ugayta na giqez amenin emsa in giqez tihiqiy daqaymo.

*Nud Krit-ib mataw kabemmo in mataw gigo ginad helta na meqin tonayta*

<sup>10</sup> Ni mataw dimdimunta nazaqta gitowun emid in uliq-uliqgo osad teq in Yesus ago on mataw giwamuzad osiy. Na ezaqgo mataw nabta kabemmo in nan dimunta a hi huritayta. In nan haresmo alulin haiqta bilaqad teq in mataw kat negayta.



Mataw na gilikmanib Juda asor in daq nagan ayahmo emayta. <sup>11</sup> Mataw na in on mataw gigo mani hureqad in daq hi emnanta naqmo asuleqin gibilenayta. Gibilenad in mataw asor gigo aw amun nenaqmo giwazbalsa in gigo os timeqniyaqta. Nazaq iyan ni mataw na gidanin qwaysa in giqez hiqiyiy.

<sup>12</sup> Kwaziqmo Krit gigo mat araq anad awaz meqinta inmo ago on mataw gilum kemim ginan kazaq bilam, Mataw Krit-ibta gimileq meqinta ham. In meqin diqta bilaqne karuw kwasikta ginaq amugnaqta nazaq nog iyim in kabiy haiqmo osad didaq neq naqmo ago in ginad emayta ham. <sup>13</sup> Gamuk nawa na in helmo diq. Nazaq iyan ni mataw na ginadad nan awaz meqinta gibilen. Gibilensa in God ago suleq helta naqmo hurit kemiy. <sup>14</sup> Hurit kemeq in Juda gigo wagam samanta amo amo nagan hi huritiy. Ad mataw ta asor God ago gamuk helta gileh ugad in ginadib gunun amo amo emsa in hi muziniymo. <sup>15</sup> On mataw God ameb gigem anumlan haiqmo osayta na in didaq nagh bunmo wazsa in abusirinan hiqiysa in neqayta. Ari on mataw gimugan meqniyim ussa in Kraiss anan helmo a hi haqayta na in didaq nagh bunmo wazsa abusirinan inaq iyaqta. Na ezaqgo mataw na ginad gigem inaqmo God ameb meqniyim usaqta na ago. <sup>16</sup> Mataw naqanta in giqezabmo bilaqay, I God ago tuhurit haqayta. Teq in daqdaq emsa i gibiyad ginad emauq. Mataw ko God gileh ugim osayta haqauq. Mataw na God ago nan othasad in daq araq dimunta emgo biyab a hi iysa God in gibiyad ame a hikidik bilaqay.

## 2

*On mataw aseseqta in God anad muzinad daq dimunta emiy*

<sup>1</sup> Ari ninmo teq suleq dimunta God ago gamuk helta inaq riranta naqmo ni bilaq. <sup>2</sup> Bilaqad ni mataw aseseqta gibilenid in worworeqmo osad yuw atoranta hi uluwiy. Ad in gihol anononmo wamuzad in God ago gamuk hurit kemeq ginad em hasiy. Ad in on mataw ginan ginad bilaqsa in afaqan sorad gituw hi hiqiyian.

<sup>3</sup> Teq ni on aseseqta gibilenid in luw os dimunta God anan anad bilaqayta naqmo muzinad in mataw gibun ban nan meqmeqinta hi bilaqiy. Teq in wain ayun ayahmo uluwsa ginad hi wamuzan. Ad in daq dimdimunta emgo adan on mataw bunmo giqisihuniy. <sup>4</sup> Giqisihunad in on baras-barasta mat mutur waqiyta na gilumsihad in giholib daq dimdimunta usaqta na asuleqin on barasta na gibilensa in nazaqmo emad osiy. Osad in gidugniz gigo onmin

nenaq gilowan tongo hurit kemiy. <sup>5</sup> Hurit kemad in gihol anononmo wamuzad in aw silumta nog hi iyiy. In haresmo hi luwad in gigo bit teq in gigo mat amun nenaq giwamuziy. Ad in gidugniz giqez huritad gihaqenib osiy. On aseseqta na in nazaq on baras-barasta gibilensa teq mataw God geg ugayta na in God ago gamuk bilawungo adanin haiq tiqiy daqay.

*Taitus in mataw minminta daq dimdimunta giqisihundaq*

<sup>6</sup> Ad nazaqmo ni mataw minminta ginad wazid eraqsa in gimo gihol anononmo wamuziy. <sup>7</sup> Ad ni ningo daq dimdimunta giqisihunsa in nibiyad nazaqmo emiyta. Teq ni on mataw suleq negad nan katiyta inaqmo hi gibilenad ni on mataw gimeb mat nihol akamolmolin inaqta nog hi iy. <sup>8</sup> Kam bunmo ni ninad em haseq suleq heltaqmo gibilen. Ni nazaq emsa teq ningo bab in ningo nan na bayid woqgo biyab a hi iy daqay. Ad in gimebay woqsa in i giholehunan bilaqgo adanteqin haiq tiqiy daqaymo.

*Kabibiy mataw in gigo aseseqta giqez hurit daqay*

<sup>9</sup> Ni kabibiy mataw samanta gibilenid in gihol wazid woqsa in gigo aseseqta giqez huritiy. Huritad in kabiy bunmo dimunmo emsa in gigo aseseqta gigem dimniyan. Teq in gigo aseseqta kabiy agamukan gibilensa in amenin emad hi othasiy. <sup>10</sup> Ad in gigo aseseqta gigo nagh hi rin toniymo. Kabibiy mataw na in gigo aseseqta giqez huritad kabiy anononmo emsa in gigo aseseqta na in ginan ginad diq tibilaqdaq. Sa on mataw bunmo in gibiyad in i gigo God I Gilumsihaqta na ago suleq huritnan ginad tibilaqdaqmo.

*I God ago daq dimdimunta na muzinad i Kraiss muleqeq ta boldaqta na baq tuneq osuq*

<sup>11</sup> I ginad emuq. God in on mataw bunmo agem dimunta negad in gilumsiheq ta giwaggo adanteqin tuwastitay. Wastitayan dante na ulalabmo tugwah-tiqim usaq. <sup>12</sup> Ussa dante na agamukan i ginad wastitaysa i God gileh ugyauqta na huload i ginad dimunta tiqemauq. Ad i og ka ago daq gihol bilaqayta na huload i dan titnonta na tumuzinauq. Helmo muran i og kab on mataw nan a hi huritayta gilikmanib osauqta. Teq God dante dimunta na i giqisihunsa i ahol waqad i gihol wamuzad teq i daq dimdimunta God anan anad bilaqayta naqmo i emad luwauqta. <sup>13</sup> I nazaq God anad muzinad Yesus Kraiss muleqeq ta boldaqta na amen emad i ginad dimniysa osauqta. Yesus Kraiss-mo in i gigo God Awaz Meqinta teq

in i gilumsiheq ta giwaqdaqta. In teq ulalabmo ahol abalawun anuwan diqta na oysa bo tugwahtiqaq. <sup>14</sup> Inmo i gimen ahol nog hulosisim momta. In moqeç ahol naw nog emeq in i gizayid i daq meqinta ahaqenib a ta hi osam haqad in daq na amta. Teq in i gibusirinan suholid hiqiyid i in ago on matawmo diq iyeq giholtuw bulad daq dimdimunta emad osamta haqad in i gilumsihihim aholyon giwamta.

<sup>15</sup> Kam bunmo ni gamuk nawa na ningo on mataw gibilen. Gibilenad ni in ginad wazid eraqsa in gamuk na muziniy. Ad ni on mataw nan othasayta na ginadsa in ginad buliyiy. Ni mat nibin inaq nog iyeq mataw atoranno gibilensa teq in ni nibilawunad ninan amun a hi bilaq daqay.

### 3

*God i gidimun tonan iyan i in anad muzinad daq dimuntaqmo emuq*

<sup>1</sup> Ni ningo on mataw gibilensa in mataw marorta teq gavman gigo aseseqta bunmo gihaqenib iyeq osad nan huritiy. Ad in kabiy dimunta emgo gihol wastitayeqmo osiy. <sup>2</sup> Osad in an agilehunan hi bilaqad in gamukib an hi mugiy. Kam bunmo in tok nemeq osad in on mataw bunmo gidimun toniy.

<sup>3</sup> Ni ninad em. Kwaziqmo i inaqmo ginad dimunta haiqgam iyan i nan othasad osyauqta. Ossa mataw kat igsa i God ago dan titnonta na huloseq dante haresmo muzyauqta. I giholmo in i ginad wamuzsa i bunmo daq hares emad an gihar ugyauqta. Sa mataw i ginan ginad a hi bilaqsa ta igmo an agem meqinta ugyauqtamo.

<sup>4</sup> I nazaq meqin diqta iyim ossa God I Gilumsihaqta na agem dimunta igad in i ginan anad bilam. Anad bilaqsa in i gimen dante dimunta amta na eman ulalab i gimeb gwahtiqa sa i ahol tuwaw. <sup>5</sup> Ahol waqsa God in dante nabmo i gilumsihihim tigiwam. Teq i daq dimdimunta emsa in i gibiyad agem dimunta igad gilumsihta nazaq a haiq. I mataw meqin diqta osta teq God anadibmo i ginan anad meqniysa in i gilumsihihim giwamta. Giwaqim in i gimugan suhol nog iyan i on mataw muturta tiqiy. Ad in ago Bugaw Dimunta igan in bo i gilumsihihim i gigo os buliyim muturta tiqiyimo. <sup>6</sup> Yesu Kris-mo i gilumsihad gimen dante wastitayan God in ago Bugaw Dimunta na ayahmo wazbalan i giyon tihitim. <sup>7</sup> God anad in dante naqmo amalib i giwastitayid i in ameb on mataw titnonta iyeq osam haqad in nazaq i gilumsihta. In i gilumsihihim giwaqan muran i os dimunta kuluwa-kuluwmo osamta na i giholyon waqgomo tiqiyim osad i ginad emauq. Helmo i tuwaqamta haqauq.

<sup>8</sup> Gamuk nawa ya tinibilenta na in hel diqtaqmo.

Teq ya inad ni tuteqmo gamuk nawa ya teko nibilenta na ningo on mataw gibilensa gamuk na in ginadib oy soqotan. Oy soqotsa ningo on mataw God anan helmo haqayta na in gituw hi hiqiysa in daq dimdimunta naqmo emad osiy. Na ezaggo God ago daq dimdimunta naqmo in hel diqta teq in on mataw bunmo gilumsihaqta. <sup>9</sup> Teq mataw nan agadanta bilaqad an muga ni gilumsihad asor hi bilaq. Ad in gisesan giwagamun nagan ago an muga ni giholib hiqiyeq pesanmo tur. Ad mataw gihol husereq an baysa ni in giban diq em. Teq in God ago maror Moses bilamta na ago agamukan amikmikta anan an wadsa ni niqezmo hiqiyeq luw. Daq nawa an mugayta na in saman diqta. In i gilumsihihim i kabiy araç dimunta a hi emamta.

<sup>10</sup> Teq mat araç Yesu ago on mataw gihusernan tonsa ni in adek wazeq bulon. Ari ni nime giger nazaq bulonid in a hi huritsa teq ni mat na aholib hiqiyad gileh ug. <sup>11</sup> Ni ninad em. Mat naqanta in dan titnonta tuhulosim in daq katiyta naqmo anan helmo haqad in daq meqinta ago kabibiy matmo tiqiyim osaqta. Mat naqanta ago daq meqinta naqmo in mat na ayon bilaqan in God ago faq waqgomo tiqiyim osaqta.

*Taitus boleq Pol ahol waqan*

<sup>12</sup> Ari ya Artemas o Tikikus emid ningo hib lehid teq ni niwaz diq meqniyeq yaqgo hib bol, uliq Nikopolis haqayta nabmo. Ya inad emaiq. Kam meqinta urom atimun inaq bolsa ya uliq nabmo leheq teq tuqos-daiq haqaiq. <sup>13</sup> Teq mataw giger Senas mat midiyesin wazaqta na ayow Apolos inaq in ni nihuloseq lehsa ni gilowan tonad gilumsihihim. Gilumsihihim in danib lehad nagah araç ago siqim hi iyiy. <sup>14</sup> Teq ni ningo on mataw na bunmo gibilenid in kabiy dimdimunta emad osiy. Osad in on mataw nagah osgota siqim diq iysa gibiyad in gimo gigo nagah amalib gilumsihihim. In daq nazaq emad teq in samanmo a hi ossa God ago kabiy gibenab usaqta na anon kabemmo tisorqendaq.

<sup>15</sup> Ari on mataw ya ginaq kawa osauqta ka in gigo zeq dimun eman ningo hib lehaq. Ad nazaqmo ni i gigo zeq dimun ka i giyogniz Yesu anan helmo haqad nawa osayta na gibilenmo.

Ari God agem dimunta ne bunmo negsa ne osiy. Nawaqmo.

## Filemon

### o

# Sansandek Pol in Filemon amen mar tonan lahta Gamuk ameb lehaqta

Filemon in mat araq ayahta Yesus anan helmo haqad uliq Kolosi-ib osta. Teq in ago kabibiy mat samanta araq anan Onesimus haqayta na in Filemon hulosis tukim uliq Rom-ub tilah. Lehim luwad uliq nab in Pol ahol waqim teq in Kraiss abin huritim anan helmo tiham.

In anad buliyim Kraiss Yesus anan helmo tihaqim teq in muleqeq ago ayahta ago hib ta leheq in tukta na ago afaqan wastitaynan haqad anad tiqam. Anad emsa kam nab Pol irquran osad in Onesimus inaq leheq Filemon ahol waqgo haiq iy. Nazaq iyan in Onesimus ayon dante wastitaynan haqad in sansandek ka mar tonim uqim eman in ago ayahta ago hib ta lah. Sansandek kab Pol in Filemon kazaq bulon, Ningo kabibiy mat samanta ka hi wad ham. In Kraiss anan helmo tihaqim muran in ningo maqbab tiqiy ham. Nazaq iyan ni inaq an anobun wastitayeq teq ne an anan ginad bilaqsa osiy ham.

## Filemon ago kabibiy mat tukim lehim abeb in Yesus anan helmo haqan Pol eman Filemon ago hib muleqim ta lah

<sup>1</sup> Ari yaqmo Pol. Kraiss Yesus abin ya iholib usaqta na ago ya bit giqirquran osaya kab osaiq.

Filemon, ni i giyow dimun diqta. Teq i ninaq araqibmo Iyahta ago kabiy emauqta. Ya teq i gimaqbab Timoti inaq i giger sansandek ka mar tonim ningo hib eman lehaq. <sup>2</sup> Sa i gihiy Apiya teq Arkipus, mat i inaq araqib Iyahta ago bab nenaq an wolauqta amatin na, teq Yesus ago on mataw ningo bitab humab wolayta na nenaq bunmo gimen sansandek ka i mar tonim eman leh negaqmo.

<sup>3</sup> I Gimam God teq i gigo Iyahta Yesus Kraiss inaq in gigem dimunta negad ne gigem emid midemeqmo usan.

*Pol in Filemon ago daq dimdimunta anan anad dimniy*

<sup>4</sup> Ya sirisirimo ni ninadin emad yaqgo God bulonad esey diq ugaiqta. <sup>5</sup> Na ezaqgo kam bunmo mataw ni ninan kazaq ibilenay, Filemon in Iyahta Yesus anan helmo diq haqad in God ago on mataw tawonta

na bunmo ginan anad bilaqta haqay. <sup>6</sup> Haqsa ya huritim ya ninmen God bulonim bilaqaiq, God haqaiq, Filemon in Kraiss ayon daq dimunta kabemmo emdaqta na ni isihunid in anad em hasad in amaqbab Yesus anan helmo haqayta na gilumsih naqmo hiqiyana haqaiq. <sup>7</sup> Helmo kadoy, ni God ago on mataw tawonta bunmo ginan ninad bilaqad gilumsihsa in gigem hastitaysa zaway muturta waqayta. Ya ningo daq nazaqta na awagamun huritim inad dimniyasa igem zaway diq tiqiyaqmo.

*Filemon in ago kabibiy mat Onesimus bilaqne amaqqab waq nog iydaq*

<sup>8</sup> Nazaq iyan ni yaqmen daq araq emdaqta na ago ya tinibilennan. Helmo ya Kraiss abinib gamuk atoranmo nibilenid ni yaqmen daq na emgo azawayin ya iholib usaqta. <sup>9</sup> Teq ya gamuk awaz meqinta a hi nibilendaiq. Ya Pol ya mat adinowan tiqiyta. Ad Kraiss Yesus abin ya iholib usaqta na ago muran ya iqirquran kawa osaiqta. Ya ninaq an anan ginad bilaqsa ya inad awaz meqin amalib gamuk ka nibilendaiq. <sup>10</sup> Ni yaqgo amun Onesimus waqeq alowan ton haqaiq. Ya uliq kab iqirquran ossa Onesimus bo ya ibiyasa ya Kraiss awagamun bulonan in huritim anan helmo tiham. Haqan nab ya in amam nog tiqiy. <sup>11</sup> Kwaziqmo in ni ninaq osad in kabiy araq dimunta amalib a hi nilumsihyaqta. Ari muran in anad buliyim in ya teq ni inaq garabmo ayahmo i tigilumsihdaq.\*

<sup>12</sup> Muran ya Onesimus eman in ningo hib muleqim ta lehaq. In ya iquutilmo diqta. <sup>13</sup> Nazaq iyan ya wasihid in ningo ban waqeq ilumsihad kab osdaq haqad ya inad emta. Ya Yesus awagamun dimunta bilaqsa mataw ya iwazim iqirquran ya bit kab osaiq. Sa ninmo kab osta iyeq ni tuteqmo ya ilumsih nagta. Nazaq iyan ni ya ilumsih nagta na amenin ya ningo kabibiy mat Onesimus ka wasihgo inad emta. <sup>14</sup> Teq ni ninad a hi bilaqdaq haqad ya nazaq a hi em. Ni ninad bilaqsa teq ni daq dimunta kawa ya anan bilaqaiqta ka ni ninadibmo em yagdaqta na in dimun. Ari ya nibe yahid ni ninad a hi bilaqsa iqez muzdaqta na ya loyinsa in dimun a haiq.

<sup>15</sup> Helmo Onesimus in ni nihulosim in tukim bolim kab kam asitmo tuqosta. Teq ya inad emaiq. In saman yaqgo hib a hi bol haqaiq. Ni mat na ta waqeq inaq tuteqmo anononmo os daqayta naqmo ago in ni nihulosim kab bol haqaiq. <sup>16</sup> Ta teq muran in ningo hib lehid ni kabibiy mat nog a hi waqdaq. Helmo in ningo kabiy emdaqta. Teq in ningo hib lehid ni nimaqqab araq

\* 1:11: Griik nanib gamuk Onesimus ka alulin 'gilumsih' haqayta.

anan ninad bilaqta nazaq nog ni tuwaqdaq. Ya mat na loyinsa in ya imaqbab dimun diqta nog iyaq. Sa in ningo hib ta lehid ni nazaq tiloyindaqmo. Ad ne giger araqibmo Iyahta aholib soqoteq inaq osad ni mat na anan ninad bilaq gigayindaq.

<sup>17</sup> Nazaq iyan ni ya ibiysa ya ninaq i giger an ulumsihad Iyahta ago kabiy araqib emauqta nazaq iyid teq ni Onesimus waqeq nigem dimunta ugad inaq os. Ni nigem dimunta ya yagad inaq os nagta nazaq. <sup>18</sup> Teq in ningo nagah araq meqin tonta o ningo amenin araq in ago hib ussun ari ni in ananta ningo hib usaqta na suholeq abanab ni ya inanta mar ton. <sup>19</sup> Yaqmo Pol ya kawa ibenabmo nan ka mar tonaiq. Ya teq nagah na tuwastitaydaiq. Teq ya ayahmo nilumsihta na amenin ningo hib usaqmo. Helmo ni amenin na yagnan haqad ni nihol bunmo yagdaqta. Teq ya na ago a hi nibilendaiq. <sup>20</sup> Ya imaqbab dimunta, ni yaqgo gamuk ka hurit. Ya ninaq araqibmo Iyahta aholib soqotim osauqta. Nazaq iyan ni ya ilumsihad daq dimunta kawa ya anan tinibilenta ka ni em yag. I giger Kraismog ago dauhibta iyim iyan ni ya igem emid hastitaysa ya inad dimniyan.

<sup>21</sup> Ni yaqgo gamuk ka tumuzindaq haqad ya ninmen sansandek ka mar ton nigta. Ad ya inad emaiq, Ni yaqgo gamuk ka muzinad ni ninadibmo nagah asor ya anan a hi bilayta inaqmo ni tiqem yagdaq haqaiq.

<sup>22</sup> Teq yaqgo gamuk araq usaqmo. Ni niyogniz nenaq yaqmen God bulonsa in ya ilumsi hid ya bit ka huloseq gwahti qdaiq haqad ya ne gibilenaiq. Ya inad emaiq. Ne nazaq God bulonsa in ne gizez tuhuridaq haqaiq. Huriteq teq in yaqgo dan wastitayid a ya ne gigo hib ta lehdaiq haqaiq. Nazaq iyan ningo bit adugan araq ya le usdaiqta na ni wastitay yag.

*Pol ayogniz asor in Filemon zeq dimun ugiy*

<sup>23</sup> Epafra in Kraismog Yesu ago afaqan sorad in kawa ya inaq girquran osauq. In ago zeq dimun eman ningo hib lehaq. <sup>24</sup> Sa ya iyogniz Mak teq Aristarkus teq Demas teq Luk in nazaqmo in gigo zeq dimun eman ningo hib lehaqmo. In ya nenaq araqibmo Yesu ago kabiy emauqta.

<sup>25</sup> Ari Iyahta Yesu Kraismog agem dimunta negsa ne osiy. Nawaqmo.

## Yesus in angelo giquriyam bugta

### Hibru Gamuk ameb lehaqta

Mat araq in Juda on mataw Yesus anan helmo haqiyta na asor gilumsihnan haqad sansandek ka mar tonta. Juda on mataw na in Hibru nan bilaq yaqayta iyan in ginan araq Hibru usaqtamo. Teq nog diq sansandek ka mar tonta na i a hi hurit.

Juda on mataw na in Yesus ago suleq muzinad ossa in gigo walmataw asor afaqan negad gimeqin ton yaqay. Gimeqin tonsa on mataw na in Yesus huloseq gigo lotu kwaziqta nabmo in muleqeq ta lehnan ginad em yaqay. In ginad nazaq emsa sansandek ka anamren in ginad meqinta na wastitayid in giwaz meqniyeq Yesus in gimen dante amta na a hi hulosa daqay haqad in gimen sansandek ka mar tonta.

Sansandek ka in nagah aseseqta ezeqmanmo ginan bilamta. Danmebta na in kazaq. Yesus in God atatinmo diq. In og kab osad afaqan kabemmo teq santitii ayahmo sorim teq in abin ayah diqta wam. Daq naqmo amalib Yesus in i gilumsiheq ta giwaqdaqta amatin tiqiyim osaqta (Hibru 2.10). Nazaq iyan in abin ayahta na angelo gibin teq Moses abin teq Juda gigo tamaz mat danmebta na abin tigiquriyam bug.

Teq gamuk afaqin gigerta na in kazaq. Yesus bolim i gimen ahol nog hulosisim inmo ahol tamaz nog God ugim in i gigo daq meqinta amebay tisuhol bug. Suhul bugan God in anan bilaqan in i gigo tamaz mat danmebta iyim osaqta. Osad in i gimen dante wastitayim i le God amebmo diq gwahtiqamta na ago dan ez in tihas ig. Nazaq iyan in i gimen kabiy emaqta na in Juda gigo mataw tamaz em yaqayta na gigo kabiy tuquriyam bugmo.

Teq gamuk afaqin ezeqmanta na in kazaq. Yesus i gimen dante dimunta na eman i abu a hi ulumad i giwaz meqniyeq afaqan sorad gituw a hi hiqiyam. I mataw kwaziqmo osiyta na ginadin emad in God anan helmo haqad osim moqiyta nazaqmo diq i emam. On mataw kwaziqta na gime le os dimunta Heven-ib usaqta na ahol waq nog iyad in afaqan sorad ginadnad a hi em yaqayta. Ari i nazaq a hi emeq luweq i Yesus muzad inaq lehad teq dan aliqabmo i gihol buliyeq ta muleqam. Nazaq iyan mat sansandek mar tonta na bilam, Afaqan amo amo ne giholib gwahtiqsa ne gigo ginad helmota na ne waz naqmo hiqiysa le ne gigo moq akamnib iyan ham. Ne Yesus ago hib gime ussa in ago daq na ne muziniy ham. Ad ne an wamuzad an agem zaway ugad ne bunmo araqiabmo os dimunta nab le gwahtiqiy ham.

#### *God atatin in gamuk ig*

<sup>1</sup> Kwaziqmo God in ame kabemmo i Juda gisesan gibilenad in daq amo amo amalib in ago gamuk eman nantut giqezab gwahtiqyaqta. <sup>2</sup> Ari muran kam abebtanta kab God in atatinmo aqezab i tigibilan. God in atatin na atowun emim in zaway bunmo abenab tiqamta. Ad in atatin na amalib og teq kait teq nagah bunmo giqeman gwahtiqiyta. <sup>3</sup> Amam ahol anuwan teq abin ayahta na in amidon na aholib us bugaqta. Sa amidon na ago zaway teq in anad awaz meqinta teq in ahol anaghan bun diqmo in amammo nogta. In ago gamuk awaz meqinta na amalib nagah bunmo zaway negsa in usayta. Teq in on mataw gigo daq meqinta gisuholan gibusirinan tihiqiy bugan teq in gwale King Awaz Meqin Diqta ulilib osaqta na aben aqabun ban tuqos wom.

#### *God atatin abin in angelo gibin uriyamta*

<sup>4</sup> God atatin abin in angelo gibin uriyamta. Nazaq iyan in ban waqim osaqta na in nazaqmo angelo gigo ban uriyamaqtamo. <sup>5</sup> Na ezaqgo kwaziqmo God in ago amidon na kazaq bulon, Ni ya itatin ham. Muran ya ni tiniqulal tonaiq haqad in bilam ham. *Buk Song 2.7*

Ad in ta bilam,

Ya in amam iyeq ossa in ya itatin iyeq tuqosdaq ham. *2 Samuel 7.14*

Ari kam gineh diq God in atatin anan bilamta nazaqmo in angelo araq anan bilam? Na haiqqam. <sup>6</sup> Teq in ago Amidon aqenta na emid og kab tubolnan haqad in kazaq ta bilam,

God ago angelo bunmo in amun qaqmo abin iluwiy ham. *Lo 32.43*

<sup>7</sup> Ari in ta angelo ginan kazaq bilam,

In ago angelo giqeman in tim nog iyim luwayta ham. Ad in giqeman in faq amileq nog iyim ago kabiy emad luwaytamo ham. *Buk Song 104.4*

<sup>8</sup> Teq God in atatinmo anan kazaq bilam, Ni God ham. Ni king iyeq kuluwa-kuluwmo tuqosdaq ham. Osad ni ningo maror aduganib daq titnonta amalib ningo on mataw tigiwamuzdaq ham.

<sup>9</sup> Ni daq titnontaqmo anan ninad bilaqsa ni daq meqinta anan nigem meqniyaqta ham. Nazaq iyan ningo God in ni nimaqbelab masil wazbalan woqsa in ni ninan bilam, Ni niyogniz gilikmanib ninmo nibin ayahta iyeq ni ninad dimniysa osdaq haqad in bilam ham. *Buk Song 45.6-7*

<sup>10</sup> Ad in atatin bulonim kazaq bilammo, Iyahta ham kwaziqmo diq ni og ka eman gwahtiqim in awaz timeqniyim usaqta ham. Ad ninmo nibenab ni kait teq nagah bunmo ulilib usayta na giqamta ham.

<sup>11</sup> Og kait inaq timeqniydaqta ham. Teq ninmo nazaqmo kuluwa-kuluwmo tuqos tutdaqta ham. Nagah giger na in kwaziq tiqiy has daqayta ham. Bilaqne tubusan kwaziq iyim tartay bugaqta nazaq in tiqiy daqay ham.

<sup>12</sup> Teq nagah nagan kwaziq iyid ni bilaqne mat aholsihen hasim ayaqta nazaq nog ni giqaydaq ham. Giqayeq teq ni nagah nagan giwazbuliyid muturta tiqiydaq ham. Bilaqne mat tubusan kwaziqta hasim hunegad muturta waqim aholib emaqta nazaq nog ham.

Teq ningo daq a hi buliysa ni osaq nazaqmo ni tuqos tutaqta ham. Ad ni kuluwa-kuluwmo osad ningo kam a hi hiqiydaq ham. *Buk Song 102.25-27*

<sup>13</sup> Teq God in atatin kazaq bulonmo, Ni ya iben iqabun ban kab ya imen emad ossa ya ningo bab giqemid nisen ahaqenib tiqiy bug daqay ham. *Buk Song 110.1*

Teq kam gineh diq God in angelo araq anan nazaq bilamta? Na haiqqam.

<sup>14</sup> Ari angelo in naga matawun diqta? In bugawta teq in God ago kabiy emayta. God in giqeman lehad in on mataw God ago os dimunta teq waq daqayta naqmo gilumsihayta.

## 2

*God i gilumsihim ta giwaaqta na in daq ayah diqta*

<sup>1</sup> God atatin ahol abin in ayah diqmo. Nazaq iyan gamuk i tuhuritta na i gimaqbelab waz naqmo hiqiyad muzinuq. Luweq i gidan sosil iysa i gamuk tuhuritta na kiskismo hulosa ta muleqam. <sup>2</sup> Kwaziqmo God ago gamuk angelo gibenab bolta na in awaz meqin diq usyaqta. Ussa mat araq in gamuk na ago gunun araq othasad itiyoneq in daq meqinta amta na ago afan waqyaqta. <sup>3</sup> Ari muran God in i gilumsiheq ta giwaqnan haqad dante muturta amta ka in daq ayah diqta. Nazaq iyan i daq ayahta na gileh ugeq abeb i gigo daq meqinta na ago afan i waqad i edob tukeq leham? I tukamta adanteqin araq haiqmo diq.

God i gilumsiheq ta giwaaqdaqta agamukan na Iyahta inmo danmab bilamta. Bilaqsa mataw in ago gamuk na huritim in aqez tutad i gibilenim bilaqiy, Nagah ka i gime anonabmo ahol wawta haqiy.

<sup>4</sup> Haqsa God inmo gamuk na zaway ugnan haqad in mataw na gisen baysihad daq azawayin inaqta amo amo emad in kabiy azawayin inaqta amo amo giholib eman tugwahtiqyaqmo. Gwahtiqsa God anad bilaqsa in anadiimo ago Bugaw Dimunta naw nog on mataw tinegyaqmo.

*Yesus amomo i gilumsiheq ta giwaaqdaqta*

<sup>5</sup> Ari abeb og ka ahol buliyeq mutur i ydaqta na i anadin emuq. God in og muturta na wamuzgo haqad angelo a hi giqam. Haiqqam. <sup>6</sup> Mat araq God ago marib gamuk kazaq emim in bilam,

God ham, on mataw ogibta in ezaq diq iyan teq ni in ginadin emaqta? ham. Doh haqad ni on mataw ogibta ginadin emad ni anononmo giwamuzaqta? ham.

<sup>7</sup> Ni on mataw giqeman in kam asitmo angelo gihaqenib iyim osayta ham. Teq ni giwazinad gibin ayahta na negan in og kab nagah bunmo giquriyamim in ameb diq iyim osayta ham. <sup>8</sup> Ossa ni nagah bunmo eman on mataw gihaqenib ussa in giwamuzayta ham. *Buk Song 8.4-6*

God in nagah bunmo mataw gihaqenib emad in nagah araq hulosa mataw gihaqenib samanmo a hi usaqta. Ta teq muran nagah bun diqmo mataw gihaqenib ussa in giwamuzayta nazaq i ahol a hi waqyaqta. <sup>9</sup> Ari Yesus teq i ahol waqyaqta. God in Yesus eman in kam asitmo angelo gihaqenib iyim osta. Daq na amalib God agem dimunta igad in Yesus eman bolim in on mataw og saw bunmo gigo ban waqim in gimen santitiy ayahmo sorad osim momta. Nazaq iyan God Yesus wazan eraqan teq in wazinad ahol abin ayahta ugan muran in nagah bunmo giquriyamim ameb diq iyim osaqta.

<sup>10</sup> God in nagah bunmo gilulinta teq in nagah bunmo giqamta. In ago onmin helmo haqayta na kabemmo giwaaqeq giqad in ago saw anuwanta nab tugwalehnan haqad in Yesus eman in santitiy ayahmo sorta. Sorim teq in mataw giwaaqeq ban dimuntab giqemdaqta amatin dimunta tiqiy. Nazaq iyan God in Yesus eman santitiy sorta na in daq dimunta am.

<sup>11</sup> Na ezaqgo Yesus in God ago on mataw bunmo giqeman in God ago onmin tawon diqta iyayta. Sa Yesus amam in God-mo. Nazaq iyan Yesus in God ago onmin na ginan ya imagniz teq ya ihian haqnan amebay a hi woqyaqta. <sup>12</sup> Inmo bilam,

Ya teq ni nibin ya imagniz ihian gigo hib tibilaqdaq ham. In humab woleq

ni ninan sorsa ya in gilikmanib nenaq bar wazad ya ni nibin tiqilw-daiqmo ham. *Buk Song 22.22*

<sup>13</sup> Ad in ta bilam,

Ya ihol bunmo God ago hib emim ya inmo amen tiqemaiq ham. *Aisaya 8.17*

Teq in bilam,

Ahol waqiy ham. God in ago onmin ka ya ibenab eman ya nenaq i kawa osauq ham. *Aisaya 8.18*

*Yesus i gilumsihnan haqad mat diq iy*

<sup>14</sup> Ari onmin nawa ya teko ginan bilayta na in mataw diqta gisan ginedan inaqtta. Nazaq iyan Yesus in nazaqmo mataw gisan waqim in mat diq iyta. In moqeq i gibabun moq ago azawayin wamuzim osaqta na ago zaway alulin tuwolnan haqad in mat diq iyta. Teq i gigo bab na Satanmo. <sup>15</sup> On mataw bunmo amunib osad le adinowan iyim in moqnan rabayta. Rabsa Satan in gigo rab na muzinim giqirquran in anad muzinad osayta. Ari Yesus in bab na abenab on mataw giwaqid in gibabun na anad a ta hi muzin daqay haqad in momta.

<sup>16</sup> Helmo. Yesus in angelo gilumsihnan a hi mom. Haiqqam. In on mataw Abraham asen muzinad helmo haqayta naqmo ginadin emad in momta. <sup>17</sup> Teq Yesus in amaqbaban helmo haqayta na gilumsihnan haqad in ginogmo diq iyan daq bunmo in amaqbaban giholib gwahtiqaqta nazaqmo in aholib gwahtimtam. Nazaq iyan muran in tamaz mat danmebta tiqiyim in on mataw anad negad ago kabiy anononmo emaqta. Emad in mataw gigo daq meqinta amenin emad in God ago agem meqniy walemaqta. <sup>18</sup> In santituy ayahmo sorsa og ka ago daq bunmo ulum waqsa in loyin kamta. Nazaq iyan on mataw giholib daq gilumwaqgo gwahtiqsa in anononmo gilumsihdaqta.

## **Yesus in Moses uriyam bugta**

### **3**

*Yesus abin Moses abin uriyamta*

<sup>1</sup> Ya imaqbaban tawon diqta, God ulilib osad ne gililewunan ne inaqtta in ago on matawta tiqiyiy. Ne Yesus-mo anadin emiy. God in eman in i gimen gamuk helta a bolta teq in i gigo tamaz mat danmebta iyim osaqta. Ossa i in abin nazaq diqmo on mataw gibilenauqta. <sup>2</sup> God kabiy na ugan in og kab osad God anad bunmo tumuzin bugta. Kwaziqmo Moses in God ago on mataw giwamuzad God anad muzin bugad kabiy emyaqta nazaqmo Yesus amtamo. <sup>3</sup> Teq og kab mataw maqbab iyim osayta na gigo hib in gimam ayahta naqmo abin in atanziz bunmo gibin uriyamaqta. Ad

nazaqmo Yesus abin in Moses abin yahmo uriyamaqtamo. <sup>4</sup> Mataw gisenlul amulikmulikmo in gisesan gilulib gwahtiqaqta. Teq God inmo on mataw en bunmo giqeman gwahtiqiyta. <sup>5</sup> Moses in God ago kabibiy mat dimunta iyim in God anad bunmo muzinad God ago on mataw gimen kabiy emad osyaqta. Kabiy emad in God nagah abeb teq emid gwahtiqdaqta na agamukan in ago on mataw gibilenyaqta. <sup>6</sup> Ari Kraiss in God atatin diq iyim in God anad bunmo tumuz bugtamo. Muzinim muran in God ago on mataw bunmo gifaqin iyim in giwamuzim osaqta. Nazaq iyan in amomo i gilumsihdaqta na i anan helmo haqauq. Ad in teq i gidimun tondaqta na i amen emad i ginad dimniya abin bilaquq. I ginad helta na waz naqmo hiqiyad teq i inaqtta God ago on mataw Yesus giwamuzim osaqta na tiqiyammo.

*Mataw nan othasayta na in God ago saw ginamur emayta nab le a hi gwahtiq daqay*

<sup>7</sup> Nazaq iyan i God ago Bugaw Dimunta aqez God ago gamukib usaqta ka i hurituq. Gamuk nab God kazaq i gibilenaq.

Muran ne ya iqez huriteq teq ne gigem hi soqotan haqauq. <sup>8</sup> Kwaziqmo ne gisesan nan a hi huritad ya iqez othasiyta nazaq ne hi emiy haqauq.

Kam nab in saw amatawun haiqtab osad ya ilum waqiyta haqauq. <sup>9</sup> Saw nab ne gisesan ya inan helmo a hi haqad ilum waq yaqayta haqauq. Ilum waqsa ya daq azawayin inaqtta kabemmo eman gwahtiqsa in ulig 40 nazaq ahol waqad luwiyyta haqauq. Teq haiq, in ginad asit a hi emiyta haqauq.

<sup>10</sup> Nazaq iyan ya in ginan bilay, Tutimmo in gigem yaqgo hib pesanmo usaqta hay haqauq. In yaqgo maror anan ginad a hi em hasayta hay haqauq.

<sup>11</sup> Haqad ya igem meqniya in ginan bilay, Helmo diq in yaqgo saw ginamur emayta nab le a hikidik gwahtiq daqay hay haqauq. *Buk Song 95.7-11*

*Isrel on mataw God ago gamuk othasiyta nazaq i hi emuq*

<sup>12</sup> Ya imaqbaban, ne gihol waziy. Luweq ne gilikmanib gimaqbab ara q anad meqinta agemab ussa in anad helta na huload God Kayeqmo Osaqta na gileh tuquqdaq. <sup>13</sup> God ago marib in kam anan Muran hamta na akaman muran kawa i osauq. Nazaq iyan kam bunmo ne gamuk dimuntaqmo an bulonad an zaway ugiy. Luweq ne gilikmanib mat ara q anad meqinta gwahtiqad kat ugsa in muzinad luwad agem tisoqotdaq. <sup>14</sup> Kwaziqmo i God anan helmo hawta naqmo i ginadib us tutan. Us tutsa i ginad helmota na

waz naqmo hiqiyeq ossa le i gigo moq akamnibmo iyan. I daq nazaq emad oseq teq i Kraiss ago on matawmo diq tiqiyam. <sup>15</sup> Daq alulin na ago iyan God in ago gamukib kazaq bilam,

Muran ne ya iqez huriteq teq ne gigem hi soqotan ham. Kwaziqmo ne gisesan nan a hi huritad ya iqez othasiyta nazaq ne hi emiy ham. *Buk Song 95.7-8*

<sup>16</sup> Ne gisesan na gigo kamub gigan diq God aqez huritim teq in girerey emad ago gamuk othasiyta? Na on mataw bunmo Moses giwaqim isip hulosisim giqad lahta naqmo in daq na emiyta. <sup>17</sup> Teq in ulig 40 nazaq saw amatawun haiqta nab ossa God in gigan diq ginan agem meqniyta? Na on mataw daq meqinta emiyta naqmo in ginan agem meqniyta. Agem meqniyan mataw na moqim gisan saw amatawun haiqta nabmo giqusiyta. <sup>18</sup> Teq God in mataw gigan diq ginan bilam, Helmo diq ham in yaqgo saw ginamur emayta nab le a hi gwahtiqt daqay ham? Na on mataw in ago gamuk othasiyta naqmo in ginan nazaq bilamta. <sup>19</sup> Nazaq iyan i ginad emuq. On mataw na in God ago gamuk anan helmo a hi haqsa iyan God giwasihan in ago saw ginamur emayta nab le a hi gwahtiqt.

## 4

*God ago on mataw ginomo in God ago saw ginamur emaytab gwahtiqtayta*

<sup>1</sup> Ari God in ago on mataw giqemid in ago saw ginamur emaytab le tugwahtiqt daqay haqad in hel diqmo tibilamta. Bilaqan in ago gamuk hel diqta na akaman a hi hiqiyad in muran us tutaq. Nazaq iyan i gihol diq wazuq. Luweq gamuk na akaman us tutsa ne gilikmanib mat araqt le saw nab a hi gwahtiqt daq haqad. <sup>2</sup> I God ago gamuk dimunta tuwawta. Teq kwaziqmo Isrel in God ago gamuk dimunta tuwagiytamo. Ta teq in gamuk na huritim anan helmo a hi haqan gamuk na a hi gilumsih.

<sup>3</sup> Na ezaggo i on mataw God anan helmo tihawta naqmo God ago saw ginamur emayta nab le tugwahtiqtamta. God bilamta nazaq. In bilam,

Ya igem meqniysa in ginan bilay, Helmo diq in yaqgo saw ginamur emayta nab le a hikidik gwahtiqt daqay hay ham. *Buk Song 95.11*

Helmo gamuk na in Moses ago kamub daq gwahtimta naqmo anan bilamta. Ta teq kwaziqt diqmo og ka mutur gwahtimta nabmo God in ago kabiy eman tihiqiyta.

<sup>4</sup> Na ezaggo God ago mar asor ban gamuk araqt kam 7-ta na anan kazaq bilam,

God in ago kabiy bunmo emim tihiqiyam kam 7-ta nab in anamur am ham. *Jenesis 2.2*

<sup>5</sup> Teq gamuk teko i huritta nab in kazaq ta bilammo,

Helmo diq in yaqgo saw ginamur emayta nab le a hikidik gwahtiqt daqay hay ham. *Buk Song 95.11*

<sup>6</sup> Mataw kwaziqmo God ago gamuk dimunta huritiyta na in gamuk na othasad in le a hi gwahtiqtayta. Ta teq mataw ginamur em daqayta agamukan na in us tutaq. Us tutsa i ginad emauq, On mataw ta asor teq God ago saw ginamur emayta nab le tugwahtiqt daqay haqauq. <sup>7</sup> Ari on mataw kwaziqta na le a hi gwahtiqt. An ulig kabemmo le tihiqiyam teq God in kam ta araqt mataw le gwahtiqt daqayta na Devit aqezab eman gwahtiqtas in bilam, 'Muran' ham. Teko i bilawta nazaq. Gamuk na bilam,

Muran ne God aqez huriteq teq ne gigem hi soqotan ham. *Buk Song 95.7-8*

<sup>8</sup> Ari kwaziqmo Josuwa in ago on mataw na giqad leheq giqemid in ginamur tiqemid teq gamuk nawa bilam, 'Muran' hamta na akaman tihiqiy nag. Hiqiyid God in kam ta araqt mataw le ginamur em daqayta na anan a ta hi bilaqt nag. <sup>9</sup> Nazaq iyan i ginad emauq, God ago on mataw ginamur em daqayta akaman muran us tutaq haqauq. Us tutsa kwaziqmo God in kam 7-ta nab anamur amta nazaqmo in ginamur tiqem daqaymo haqauq. <sup>10</sup> Teq on mataw God ago saw ginamur emaytab gwahtiqtin ginamur emayta na in kabiy bunmo tuhulosim teq in ginamur emayta. Kwaziqmo God ago kabiy tihiqiyam in anamur amta nazaq. <sup>11</sup> Nazaq iyan i bunmo zaway diq iyeq saw ginamur emayta nab le gwahtiqt. Luweq i gigo mat araqt in nan othas adan muzineq kwaziqmo Isrel nan othasiyta nazaqmo in emeq in tuwoqdaq haqad.

<sup>12</sup> God ago gamuk kayeqmo usad kabiy atoran diqmo emaqta. In baqir ame gigermota na uriyamim in ame meqin diqta. Gamuk na in mat ulum turim amuganibmo diq lehim aditin titim usaqta na ulum tayan milhesaqta. In liqabmo diq lehim mat anad hares agemab usaqta na giqurotan giholbin iyim usaqta. Nazaq iyan gamuk na in i ginad gigemab ulilemim usaqta na bunmo eman ulal iyaqta. <sup>13</sup> Nagah bunmo God giqamta nagan gigo araqt diq in God ameb a hi ulilemdaq. Haiqqam. Nagah nagan bunmo ulalab God amebmo diq giqusayta. Ussa God in i gigo daq bunmo i emauqta na anononmo ulum kemaqta.

**Yesus Heven-ib God ago maror muturta na ago tamaz**



## mat danmebta iyim osaqta

*Yesus in i gigo tamaz mat danmebta*

<sup>14</sup> Ari i gigo tamaz mat danmebta arağ nawa osaqta. In ulilib Heven-ibmo diq le tugwahtimta. Na in God atatin Yesus-mo. Nazaq iyan i in awagamun helta nazaq bilaqad i ginad hi buliyuq. <sup>15</sup> Na ezaqgo i gigo tamaz mat danmebta na in i ginan anad meqniyaqta. Gilumwaq meqinta i giholib gwahtiqaqta nazaqmo in aholib gwahtim-tamo. Ta teq in woqim daq meqinta arağ a hi am. <sup>16</sup> Nazaq iyan God in ago ban tawontab ossa Yesus i gisen baysihsa i hi rabad God agerabmo diq loquq. I Yesus abinib in agerab loqsa in i ginan anad meqniysa agem dimunta tiqigdaq. Sa i gigo afağan ezaq usaqta na i bulonsa in i tigilumsihdaq.

### 5

*Tamaz mat danmebta Yesus-mo i gilum-siheq ta giwaqdaq*

<sup>1</sup> Ari mat arağ in tamaz mat danmebta iydaqta na adan kazaq. God inmo mataw gilikmanib mat arağ atowun eman in gwahtiqim ban na waqaqta. Waqim in ago on mataw bunmo gigo ban waqim God anognib turad in gibinib naw amo amo God ugad teq in daq meqinta walengo atamazin emaqta. <sup>2</sup> Teq tamaz mat danmebta na inaqmo in ago zaway haiqta iyim in ago walmataw ginad a hi em hasad God ago dan titnonta hulosaqta na nenaq kiskismo lehaqta. <sup>3</sup> In mat diq iyim iyan in on mataw gigo daq meqinta walengo atamazin emad teq inmo ago daq meqinta walengo atamazin in emaqmo.

<sup>4</sup> Tamaz mat danmebta na abin ayah diqta. Mat arağ in kabiy na anadibmo ahol a hi ugdaqta. God-mo mat lilewunan in kabiy na waqaqta. Kwaziqmo in Aron lilewunta nazaqmo.

<sup>5</sup> Ad nazaqmo Yesus in tamaz mat danmebta abin ayahta na in anadibmo ahol a hi ugmo. Haiqqam. God-mo Yesus atowun emim bulon, Ni ya itatin ham. Muran ya ni tiniqulal tonaiq haqad in bilam ham. *Buk Song 2.7*

<sup>6</sup> Teq God ago mar asor ban in kazaq bilammo,

Ni tamaz mat Melkisedek ago dauhibta iyeq ni tamaz akabiyin kuluwaw-kuluwmo emad tuqosdaq ham. *Buk Song 110.4*

<sup>7</sup> Kwaziqmo Yesus og kab osad in anad emyaq, God ya ilumsiheq iwaqid ya a hi moq hasdaiq haqyaq. Haqad in God inaq gamuk emad susumun ugad in atoranmo ek tonad ago gaq inaq ame kabemmo bulonya. Bulonad in ahol wazan woqsa in

God wazinat ahaqenib iyim osyaq. Nazaq iyan God in aqez tuhurit. <sup>8</sup> Yesus in God atatin. Ta teq in santitiy ayahmo sorad in ahol suleq ugad God aqez muzingo in hurit kamta. <sup>9</sup> Hurit kemim teq in tamaz akabiyin emdaqta na ago amatin dimun diqta tiqiyim in os kayeqmo kuluwaw-kuluwmo osayta na alulin iyim osaqta. Ossa on mataw inmo aqez huritad muzinsa in os dimunta na negaqta. <sup>10</sup> Nazaq iyan God in atatin na atowun emim bulon, Ni Melkisedek nogmo iyeq tamaz mat danmebta tuqosdaq ham.

*I onmin amikmikta os nog hi iyuq*

<sup>11</sup> Ya inadib Melkisedek agamukan kabemmo bilaqdaigta usaq. Na ya gibilen nagta teq ne gimaqbel soqotim usad ginad a hi hastitayaq. Nazaq iyan ya gamuk na alulin giqisihunnan haqad teq ya ne gibibiyowunaq. <sup>12</sup> Kam sisaqmo ne God ago gamuk huritad osiyta. Osim muran negmo gamuk na asuleqin mataw tigibilen nagiyta. Teq haiq. Ne gimaqbel siqim diq iyim ussa ne God ago suleq kiskista ne danmeb huritiyta naqmo ne a ta huritnan os nog iyay. Ne didaq atoranta neqgo ahun haiqta daqag. Ne susmo neqgo ginad usaqta. <sup>13</sup> Teq onmin amikmikta naqmo in sus neqayta. Ad in daq dimunta emgo adan a hikidik hurit kemayta. <sup>14</sup> Ari on mataw aseseq tiqiy bugiyta naqmo didaq atoranta neqayta. On mataw naqanta in tutimmo gihol suleq ugad ginad emunad in daq ulum kemad dimun meqin haqgo in tuhurit kemiyta.

### 6

*I zaway iyeq ossa teq God i tigilumsihdaq*

<sup>1-2</sup> Ari Krai ago suleq kiskista ne danmeb huritiyta nab i roreq hi usuq. I ginad buliyeq gunun samanta a hi gilumsihaqta nagan gileh uggo agamukan teq i God anan helmo haqgo agamukan teq i yuw huzgo asuleqin teq i mataw giholib giben emeq giwazgo agamukan teq mataw moqiyta na bunmo eraq daqayta na agamukan teq mataw hazizirib tureq gigo daq meqinta amenin waqad kuluwaw-kuluwmo os daqayta na agamukan nagan bunmo i ta hi bilaquq. I bit ago tituq tileyeq teq i tituq na titeqeq a ta leyamta na in dimun a haiq. Nazaq iyan i gamuk asamelan haiqta na hulosaq i suleq awaz meqinta mataw ginad tizilimta huritayta naqmo i bilaq tuteq a lehuq. <sup>3</sup> Ari God i gibiyisa i mataw nazaqta iyid teq i suleq awaz meqinta nab tileham.

<sup>4</sup> Ne ginad emiy. God in mataw asor ginad eman hastitayan in naw dimunta Heven-ib usim hitimta na waqim tiloyiniy. Sa God ago Bugaw Dimunta in giholib tuqoy soqotmo. <sup>5</sup> Mataw na in God ago

gamuk loyinan in dimunmo diq iyta. Teq in God ago kam muturta azawayin inaq abeb teq gwahtiqdaqta na tiloyiniymo. <sup>6</sup> Ari in nagah dimdimunta na loyineq teq abeb in God gileh ugeq ari in ginad ta buliyeq gigo daq meqinta na gileh uggo akaman haiq tiqiydaq. Na ezaqgo in gigo daq naqmo amalib in bilaqne God atatin ayib dom a ta wolan in ulalab tursa mataw ahol waqad bilawunayta nazaq nog in tiqem daqay.

<sup>7</sup> Urom sirisirimo ogib woqsa og na yuw dimunta waqad didaq eman anon dimunmo emsa og na in dimunta. Og naqantab on mataw didaq akabiyan emim in giholyon didaq dimdimunta waqad dimunmo osayta. Nazaq iyan God in og naqanta anan anad dimniyaqta. <sup>8</sup> Ari og nab sirisirimo urom woqsa teq in am ta amo amo asasuqin inaqta naqmo emid gwalsa og na in dimun a haiqta. In God ameb timeqniyim ussa abeb faq tuqoywor-daqta.

<sup>9</sup> I giyogniz dimunta, muran i gamuk atoran diqmo ne gibilenaug. Ta teq i ne ginan ginad kazaq emaug, God ne gi-waqan ne inmo ago on mataw tiqiyim osayta haqauq. Ossa afaqan nawa i anan bilawta nazaq ne gigo hib a hi gwahtiqdaq haqauq. <sup>10</sup> God in meqin a haiqta. Nazaq iyan ne kabiy dimunta emayta na ago in adek a hi zizaldaq. Sa ne in anadin emad ago on mataw tawonta na ginan ginad bilaqsa gilumsih yaqayta na ago in adek a hi zizaldaqmo. Ne daq naqanta muran tiqem tutayta. <sup>11</sup> Teq i ginad ayahmo ne bunmo gigo hib usaqta na in kazaq. Ne amulik-mulikmo nazaqmo God ago kabiy atorano emad os tutiy haqauq. Ne nazaq emad teq ne ginadnad emad "God teq i gilumsiheq ta giwaqdaq o haiq?" haqad ne ginad kabemmo nazaq a hi usdaq. Ad ne ginad amulikmo God amomo ago hib ussa le in ne giyon kam anan bilamta nabmo teq in ne tigidimun tondaq. <sup>12</sup> Ne gituw hi hiqiyin. Mataw God amen emim osad gituw a hi hiqiy yaqayta naqmo gisen ne muzinad luwiy. Mataw na in God anan helmo haqad gituw a hi hiqiyisa osim muran in nagah God negnan hel diqmo gibilanta na tuwaq bugim osayta.

*I God ago gamuk anan helmo diq haquq*

<sup>13</sup> Kwaziqmo God in Abraham nagah arağ ugnan haqad hel diqmo bulonta. Bulonad in mat arağ ahol abinib helmo ulilib bilaqdaqta na haiqgam iyan inmo ahol ananib in helmo diq ulilib ham. <sup>14</sup> In bilam, Ya helmo diq bilaqaiq ham. Ya ni ayahmo diq nidimun tonad nibar tonid teq abeb ni nisesan kabemmo diq tug-wahtiq daqay ham. *Jenesis 22.17*

<sup>15</sup> God nazaq bilaqan Abraham in nagah na amen emad in hidmo atuw a hi hiqiy. An abeb nagah bunmo God ugnan haqad hel diqmo bulonta na in tuwaq bug.

<sup>16</sup> Mataw og kabta in gamuk helmo diq ulilib tihaqnan haqad in mat arağ abin in giban uriyamta naqmo biyad in helmo haqayta. Teq in nagah arağ anan an muga in gigo arağ eraqeq helmo diq ulilib haqid mataw na bunmo giqez hiqiyayta. <sup>17</sup> Ari God in ago on mataw gidimun tonnan hel diqmo bilamta. Ad in anad a hi buliydaqta na ago in on mataw na giqisihunnan haqad in ago gamuk na zaway ugad in helmo diq ulilib ham. <sup>18</sup> Teq nagah giger na God ago gamuk teq in helmo ulilib hamta na in a hi buliydaqta. Sa God in nagah giger na amalib i a hi kat igdaqta. Hikidik. Nazaq iyan in teq i gidimun tondaqta na agamukan i gigo hib bolan i gamuk na waz naqmo hiqiyayta. I gamuk na waz naqmo hiqiyad i tukim lehim in ago hib ulilemim osad i a hi rabad giwaz meqniyim osauqta. <sup>19</sup> Nagah giger na in i giholib bilaqne anka afaqan meqinta i gihol waz nog iyim usaqta. Teq anka na in Tempel aduganibmo diq tubusan ayahta othenan usaqta na agilehni b gwahti lehim usaqta. <sup>20</sup> Sa Yesus in tamaz mat dannebta Melkisedek ago dauhibta tiqiyim in i gimen dan emad in danneb Tempel aduganib tubusan na agilehun ban le tugwahtimta. Gwahtiqim in i gimen tamaz akabiyan kuluwa-kuluwmo emad osaqta.

## 7

*Melkisedek abin ayahmo diq*

<sup>1</sup> Melkisedek in uliq Salem gigo king-ta teq in God Ulilib Diqta ago mat tamaz emyaqta arağ. Kwaziqmo Abraham in mataw en ta asor gigo king nenaq an wolim in ginol emad luwim muleqim aquliqab ta lehsa Melkisedek in danib ahol waqad bar tonta. <sup>2</sup> Bar tonan Abraham in bab emad luwim nagah wanta na huseran humab 10 nazaq iyan in humab amulikmo waqim Melkisedek tuqug.

Teq mat na aholnan Melkisedek haqayta na alulin in 'Daq titnonta ago king-ta' haqayta. Teq alulin ta arağ na in 'Salem gigo king-ta' haqaytamo. Ad gamuk Salem haqayta na alulin in 'gigem kiskista' haqayta. Nazaq iyan in on mataw gigem kiskismo usaqta na gigo king-tamo. <sup>3</sup> Melkisedek anen nog teq in amam nog na i a hi hurit. In bilaqne anen amam haiqta nog osaq. Teq in asesan ginan na i a hi huritmo. Ad in anen amta akaman na teq in momta akaman na i a hi huritmo. Nazaq iyan in God atatin na adulan nog iyim in tamaz mat kuluwa-kuluwmo os nog iyaqta.

<sup>4</sup> Ne Melkisedek anadin emiy. In abin ayah diqmo. I gises aqenta Abraham in bab emad luwim nagah dimdimunta giwamta na huseran humab 10 nazaq iyan in humab amulikmo Melkisedek ugta. <sup>5</sup> Ari abeb Abraham ases Liway anaynayniz gwahtiqa God in gitowun emad tamaz em akabiyan tinag. Negan God ago maror Moses bilamta na ago gunun araq bilaqaan Isrel on mataw bunmo in gigo nagah bunmo huserid humab 10 nazaq iyid in humab amulik-mulikmo Liway anaynayniz na tineg yaqay. Isrel mataw bunmo Abraham asenlulib gwahtiqa in Liway mataw na nenaq maqbab iyim osiyta. Ta teq Liway asenlulibta na in gimaqbaban ta asor na bunmo gigo hib in gigo nagah ahumaban amulik-mulikmo waq yaqayta.

<sup>6</sup> Ari Melkisedek in Abraham ases Liway asenlulibta a haiq. Ta teq in Abraham ago nagah asor inmo aholyon wamta. Waqad in mat God dimun tonnan hel diqmo bulonta na tubar tonmo. <sup>7</sup> Ari mat mataw gibar tonaqta na in mat ayahta. Sa mataw in gibar tonaqta na in mat ayahta na ahaqenib osayta. Mataw bunmo ginad nazaq emayta.

<sup>8</sup> Teq Liway mataw Isrel gigo nagah asor waqayta na in mataw diq iyim moqayta. Ari Melkisedek teq haiq. In momta na abin God ago marib a hi ussa iyan in bilaqne tuqos tut nog iyaqta. <sup>9</sup> Helmo Liway matawta naqmo in gimaqbaban Isrel gigo nagah asor waqayta. Ta teq i kazaq bilaqam. Kwaziqmo Abraham in ago nagah huserim humab amulikmo Melkisedek ugsa Abraham ases Liway in ago nagah asor huserim humab amulikmo Melkisedek tuqugmo. <sup>10</sup> Na ezaggo Melkisedek in Abraham danib ahol waqaan Abraham in ago nagah asor Melkisedek ugsa kam nab Liway in ases Abraham aholib usad in bilaqne ases inaqa garabmo in gigo nagah asor Melkisedek ugiyta nog tiqiyiy.

*Tamaz mat danmebta muturta na in tamaz mataw kwaziqta na tigiquriyam bug*

<sup>11</sup> Ari Liway mataw in gigo tamaz akabiyan na amalib on mataw giqeman God ameb titnonta a hi iy hasayta. Nazaq iysa iyan God in tamaz mat ta araq abeb teq gwahtiqaqta na anan bilam. Helmo, God in Liway mataw gigo tamaz akabiyan naqmo aqumnib in ago maror Moses bilamta na Isrel on mataw nagta. Ta teq abeb God bilam, Mat ta araq teq gwahtiqaqta na in Melkisedek-mo ago dauhibta iyaq ham. Mat na Aron asenlul Liway mataw giduganib gwahtiqaq nazaq in a hi bilamta. <sup>12</sup> Nazaq iyan mataw tamaz emayta

na gidauhan buliysa God ago maror kwaziqta na tubuliydaqmo. <sup>13</sup> Teq God in mat ta araq anan bilam, "In tamaz mat iyeq tuteqmo osdaq" hamta amatin na in Liway asenlulib a hi gwahtimta. In mataw en ta araq gilikmanib gwahtimta. Teq mataw en ta araq na gilikmanib mat araq diq gwahtiqeq God ayon tamaz em abanan nab in tamaz akabiyan a hi em yaqayta. <sup>14</sup> Na in kazaq. I gigo Iyahta in Isrel gises Juda-mo asenlulib gwahtimta. Na i bunmo tuhuritta. Teq gem Juda matawta na in tamaz akabiyan em daqay haqad Moses in gimen gamuk araq nazaq a hi bilamta.

<sup>15</sup> Teq tamaz mat muturta Melkisedek nogta na gwahtiqaan i ahol tuwaqim teq i ginad tiqem hasauq. Tamaz em akabiyan kwaziqta na in God anad eman a hi diq ulal iysa in tamaz akabiyan muturta na waqim a bo kwaziqta na abanab tiqam haqauq. <sup>16</sup> Teq mat muturta na in mataw og kabta gigo gunun muzinin Liway asenlulib gwahtiqaan tamaz mat a hi iya. Haiqgam. Mat na tuteqmo kuluwakuwmo osdaqta naqmo ago azawaynib in tamaz mat iya. <sup>17</sup> Na ezaggo God in anan kazaq bilam,

Ni tamaz mat Melkisedek ago dauhibta iyeq ni tamaz akabiyan kuluwakuwmo emad tuqosdaq ham. *Buk Song 110.4*

<sup>18</sup> Gamuk naqmo amalib God in maror kwaziqta na muzan tihiqiy. Na ezaggo maror na in samanta ago zaway hiqiyim usta. <sup>19</sup> God ago maror Moses bilamta na in nagah araq diq eman God ameb dimniyeq a hi usyaqta. Nazaq iyan God in dante ta araq dimun diqta maror kwaziqta uriyamta na tiqem ig. Em igan i dante nabmo gwahtiqaan muzinad le God agerabmo diq tiloqaqta.

<sup>20</sup> Ari God in Yesus samanmo eman tamaz mat danmebta a hi iy. Haiqgam. In helmo diq ulilib haqadmo in Yesus atowun eman in tamaz mat danmebta iya. Ari tamaz mataw ta asor na bunmo gimen daq nazaq a hi em yaqayta. Mat araq helmo ulilib haqad gitowun eman in tamaz emgo amatawun a hi iy yaqayta. <sup>21</sup> Teq Godmo in helmo diq ulilib haqad Yesus anan bilaqaan Yesus in mat tamaz emaqta amatin iya. God ago gamuk kazaq bilam,

Iyahta in helmo ulilib tibilam ham. Ad in anad a hikidik buliydaq ham. Ni tamaz akabiyan kuluwakuwmo emad tuqosdaq haqad in bilam ham. *Buk Song 110.4*

<sup>22</sup> God nazaq bilaqaan Yesus in tamaz akabiyan na waqim emad in God ago maror muturta na zaway ugsa in a hi hiqiyaqta. Nazaq iyan maror muturta na in God ago

maror kwaziqta na uriyamim in dimun diq iyaqta.

<sup>23</sup> Tamaz mataw aqenta nagan moqsa mataw asor muturta gwahtiqeq in gigo ban waq yaqayta. Nazaq iyan mataw kabemmo in tamaz amatawun iyeq os yaqayta. <sup>24</sup> Ari mat ta araq muturta na gwahtiqim ban tuwaqim in tamaz akabiyen emsa mat araq bo in ago ban a hi waqayta. Na ezaqgo in kuluwa-kuluwmo osaqta na ago iyan. <sup>25</sup> Nazaq iyan in on mataw gimen dante wastitayan in God agerab loqsa in gilumsihsa in tutimmo dimunmo osayta. Na ezaqgo mat na kayeqmo kuluwa-kuluwmo osad in on mataw gimen God bulonad osaqta na ago iyan.

<sup>26</sup> Tamaz mat danmebta nawa ya anan teko tibilayta naqmo in i tigilumsihdaqta. In tawon diqta iyim in aholib daq araq in ananin waqdaqta haiqgam. In ahol abusirinan haiqta teq in mataw daq meqinta emayta na gigo hib pesanmo luwaqta. Nazaq iyan in kait uriyamim gwalehim God ago saw aduganibmo diq ban tuwaqim osaqta. <sup>27</sup> Tamaz mataw kwaziqmo os yaqayta na in kam bunmo tamaz em yaqayta. Emad danmeb in gimo gigo daq meqinta walemgo atamazin emeq teq in gigo walmataw gigo daq meqinta nagan gimen tamaz in em yaqaymo. Ari Yesus nazaq a hi amta. In ahol naw nog God ugad in ame amulikmoqmo tamaz na amta. <sup>28</sup> God ago maror Moses bilamta na in mataw gihol awaz meqin haiqta ginan bilaqan in tamaz mataw danmebta iyayta. Ari God ago gamuk in helmo ulilib hamta na in God ago maror kwaziqta na abeb gwahtimta. Gwahtiqim in God atatinmo atowun amta. Eman God atatin na in tamaz mat danmebta dimun diqta tiqiyim in nazaqmo kuluwa-kuluwmo osaqta.

## 8

*Yesus tamaz mat danmebta iyim Heven-ib osaqta*

<sup>1</sup> Ari gamuk kawa i bilaqauqta ka alulin in kazaq. I gigo tamaz mat danmebta naqan diqta Heven-ib God Awaz Meqinta ago ban tawonta na aqabun ger ban nab osaqta. <sup>2</sup> In God ago bit Adugan Tawon Diqta nab tamaz akabiyen emaqta, God ago lotu abitan Heven-ib turaqta nabmo. Bit na mataw wazan a hi eramta. Haiqgam. Iyahtaqmo bit na wazan eramta.

<sup>3</sup> Tamaz mataw danmebta bunmo gigo kabiy in naw amo amo God ugad teq in ayon tamaz emayta. Nazaq iyan Yesus in tamaz mat danmebta iyim in nazaqmo God ayon tamaz tiqamtamo. <sup>4</sup> Ta teq Yesus og kab oseq in tamaz mat danmebta a hi iy nagta. Na ezaqgo God ago maror

Moses bilamta na tibilaqan tamaz danmebta naw amo amo God ugayta na in og kab ban tuwaqim osayta na ago iyan. <sup>5</sup> Teq kwaziqmo Moses in God ago bit karuwsanibta na wazid eraqnan tonsa God in adek wazim bulon,

Ni garah abigmanib gwalehim ossa ya bit adulan niqisihunta nazaqmo diq ni bit na anaghan bunmo em gwahtiqan ham. *Kisim Bek*  
25.40

Nazaq iyan i ginad emauq, Mataw og kab lotu akabiyen emayta na in daq hel diqta Heven-ib usaqta na adulan teq atowunmo emad osayta haqauq. <sup>6</sup> Ari muran Yesus tamaz akabiyen tuwaqim in og kab tamaz mataw bunmo gigo kabiyta na uriyamim in kabiy dimun diqta emaqta. Ad in God teq on mataw gilikmanib turad in God ago maror muturta na akabiyen emsa maror muturta na in nazaqmo God ago maror kwaziqta na uriyamaqtamo. Na ezaqgo God in ago maror muturta amalib i gidimun tonnan hel diqmo bilamta nazaq in maror kwaziqta na anan a hi bilamta.

*God ago maror muturta na in ago maror kwaziqta na uriyam*

<sup>7</sup> Ari God ago maror kwaziqta na in dimunta iyid God in maror ta araq muturta ka emid a hi gwahtiq nagta. <sup>8</sup> Ta teq God ago maror kwaziqta na akamnib Iyahta in ago on mataw gigo daq meqinta ulalab eman gwahtiqsa in nan negad bilam, Yaqmo Iyahta ya kazaq bilaqaiq ham. Ahol waqiy ham. Ya teq Juda on mataw saw Isrel-ibta na teq saw Judiya-ibta na bunmo nenaq yaqgo maror muturta tinegdaiq ham. Kam na kowa tubolaq ham.

<sup>9</sup> Kwaziqmo ya Juda gisesan giben wazim giqad Isip hullosim lehta nab ya mataw na yaqgo maror kwaziqta na tineg ham. Negan in yaqgo maror na a hi muzinsa ya in gileh negyaiq ham. Nazaq iyan maror muturta ya negdaiqta na in maror kwaziqmo ya in gisesan negta nazaq nog a hi iydaq ham. Yaqmo Iyahta ya nazaqmo bilaqaiq ham.

<sup>10</sup> Ari yaqgo maror muturta ya abeb teq Isrel on mataw negdaiqta na in kazaq ham. Yaqgo maror na agamukan bunmo ya in ginadib tiqemdaiq ham. Ad ya gamuk na in gigemab tumar tondaqmo ham. Teq ya in gigo God iyeq ossa in yaqgo on mataw iyeq tuqos daqay ham. Yaqmo Iyahta ya nazaqmo bilaqaiq ham.

<sup>11</sup> Kam nab on mataw na in an suleq a ta hi ug daqay ham. Ad in bilaq daqay, Ne Iyahta ago huritiy nazaq in a ta

hi bilaq daqaymo ham. Haiq ham. Yaqgo on mataw bunmo gibin inaqta teq gibin haiqta inaqmo in yaqgo tuhurit daqay ham. <sup>12</sup> Na ezaqgo ham on mataw na in yaqgo gunun othassa ya in ginan inad timeqniydaq ham. Inad meqniysa ya in gigo daq meqinta na walemad anadin a ta hi emdaiq ham. *Jeremaya 31.31-34*

<sup>13</sup> Ari gamuk nawa nab God in bilam, Yaqgo maror muturta ham. In nazaq bilaqad in ago maror danmebta na eman in kwaziqta tiqiy. Teq nagah kwaziq tiqiyta na in sisaqmo a hi useqmo tihiqiy bugdaq.

## 9

*Tamaz mataw danmebta in karuw anedan amalib tamaz em yaqayta*

<sup>1</sup> God ago maror danmeb gwahtimta na in ago lotu emgo agununin inaqta teq in ago lotu abitan og kab turtamo. <sup>2</sup> Bit lotu em yaqayta na karuwsanibmo wazan eramta. Teq bit na adugan amebta nab lam teq ban teq bret God anognib eman usaqta nagan in giqusta. Bit adugan amebta na anan Adugan Tawonta haqayta. <sup>3</sup> Teq in tubusan ayahta bit adugan nab othenan ussa abe ban bit adugan amikta usta na in anan Adugan Tawon Diqta haqayta. <sup>4</sup> Ad faq aqasin ahuran dimun diqta gwalaqta abanan gol-ib emiyta na teq God ago maror amebta abitan amikta na in bit adugan nab giqusta. God ago maror amebta abitan amikta na in gol amalib isih bugiyta. Teq bit amikta na amuganib manna bret arebun gol-ib emiyta inaq in us. Teq Aron ago katek ahokan gwalta na teq gig giger God in ago maror amebta agamukan mar tonta na inaqmo in bit amikta na amuganib giqusmo. <sup>5</sup> Ad angelo gidulan gigermo gihol awaqan dimun diqta God ahol anuwan nogta na in bit amikta na amalib adek adek ban an nob ugim turad in bit na ahununan isihim turiy. Angelo giger na gisenlotab ban usta nab in ned wazbalid God ago agem meqniy suholyaqta na abanan us. Teq muran ya nagah nagan alulin bilaq hasgo akaman haiq.

<sup>6</sup> Ari tamaz em anaghan na wastitay bugan tihiqiyen teq kam bunmo mataw tamaz emayta na in bit adugan amebta nabmo le gwahtiqim kabiy emayta. <sup>7</sup> Ari bit adugan giger ta nab teq tamaz mat danmebta amomo le gwahtiqaqta. Ulig amulikmulikmo in ame amulikmo le gwahtiqad in samanmo le a hi gwahtiqaqta. In ned waqim teq a le gwahtiqaqta. Ned na amalib inmo aholyon tamaz emad ago daq meqinta walemim teq in ago on mataw ginad a hi emadmo daq meqinta emiyta na gigo afaqan in walemaqta. <sup>8</sup> Daq

naqmo amalib God ago Bugaw Dimunta in kazaq i giqisihun kemaq. Lotu abitan amebta na tur tutsa i naga danteqin diq muzeq bit Adugan Tawon Diqta nab le gwahtiqamta na in i gimeb ulal a hi iyaq. <sup>9</sup> Tamaz akabiyen kwaziqta na in muran kam kab suleq kazaq igaqta. Bit kwaziqta nab in naw amo amo God ugayta teq in ayon tamaz amo amo emaytamo. Ta teq tamaz em adan kwaziqta na in mataw God amen tamaz a bolayta na giqeman in God ameb a hi dimniyayta. <sup>10</sup> Daq kwaziqta na in on mataw gisanmo wastitaygo usaqta. Teq gunun amo amo didaq neqgota na teq yuw uluwgota na teq mataw huzeq gisan abusirinan muzgota nagan bunmo in kuluwa-kuluw usgo a haiqta. God anad on mataw gunun nagan muzinad ossa le in nagah bunmo giwastitaydaqta akaman iydaq haqad in nagta.

*Krais inmo ahol anedan amalib tamaz am*

<sup>11</sup> Ari Krais muran tubolim in dante dimun diqta God i giyon amta na ago tamaz mat danmebta iyim osaqta. In lotu abitan ta araq dimun diqta nab le gwahtiqim teq in i gimen dante na wastitayta. Bit na in lotu abitan karuwsanib emiyta na uriyem bugta. Teq bit na mataw gibenab a hi emiytamo. Na ezaqgo bit na in og ka ago a haiqta. <sup>12</sup> Teq Krais in memeq anedan teq bulmakau amidon anedan amalib bit na aduganib gwahtiqim a hi lah. Haiqgam. Inmo ahol anedan amalib in ame amulikmoqmo bit adugan Tawon Diqta nab gwahtimta. Gwahtiqim in i giwaqid i tuteqmo in agota iyeq osam haqad in i gizayim amenin inmo anedan na tiqam. Emim teq in bit adugan nab le a ta hi gwahtiqdaqta tiqiy.

<sup>13</sup> Ari God ago maror kwaziqta na akam-nib on mataw in God ameb gihol abusirinan inaq iysa mataw tamaz emayta na kazaq giton yaqay. In memeq ginedan teq bulmakau matmatta ginedan waqeq bulmakau awta anon bunmo oyworta na abutbutan waqeq ned inaq buliyeq teq in mataw na gimalib hures lam yaqayta. In nazaq gitonsa teq on mataw na in God ameb gisan abusirinan hiqiysa in dimunmo os yaqayta. <sup>14</sup> Ari muran Krais anedan in nagah nagan bunmo tigiquriyam bugta. Krais aholib daq araq meqinta a hi ussamo in Bugaw Dimunta tutimmo osaqta na ago zaway amalib inmo ahol tamaz nog God ugta. Ugan tamaz na in i gisan abusirinan amomo a hi suholta. Haiqgam. Na in gunun samanta a hi gilumsihaqta na ago afaqan ne giholib ussa ne gigem meqin loyin yaqayta na inaqmo suholan tihiqiy bugan ne God Kayeqmo

Osaqta na ago kabibiy on matawta tiqiyim osayta.

*Krais anedan naqmo in God ago maror muturta na zaway ugaq*

<sup>15</sup> Ari Yesus in daq nazaq emim in God ago maror muturta emid anon emdaqta amatin tiqiy. In God ago maror kwaziqta na ago akamnib moqim in daq meqinta amenin usta na tizay bug. Zay bugan on mataw God gililewunim ago os dimunta ahiqiy haiqta negnan gibilanta na in os dimunta na waqgo adanteqin inaq tiqiyiy.

<sup>16</sup> Mat araq a hi moqadmo nog diq in ago ahuran nagh waqeq wamuzdaqta na agamukan in sansandekib tumar tondaq. Mar toneq in a hi moqsa ago ahuran nagh agamukan na samanta akabiyan haiqmo usdaq. <sup>17</sup> Na ezaqgo gamuk anamren a hi moqsamo ago ahuran nagh agamukan na in ago zaway haiqgam. Ari mat na tumoqid teq in ago gamuk na azawayin inaq tiqiydaq. <sup>18</sup> Daq alulin naqmo ago kwaziqmo in karuw wol emim anedan tuwazbalan teq God ago maror kwaziqta na azawayin inaq tiqiyim usyaq. <sup>19</sup> Mebmemo diq Moses in ago walmataw bunno God ago maror agamukan gibilenad in maror na ago gunun bunno gibilen bug. Gibilen bugim teq in bulmakau amidon anedan teq memeq matta anedan waqim in yuw inaq buliy. Buliyim in sipsip ahulgen kakaqta waqim ay hisop aben amotnib am wazim teq in ned yuw inaq buliyan usta na ulum turim in God ago maror agamukan buk-ib mar tonta na amalib ned hures lamad teq in on mataw bunno gimalib ned na hunagmo. <sup>20</sup> In gimalib ned hures lamadmo bilam, Ned ka God ago maror in ne muzingo gibilanta na zaway ugaqta ham. <sup>21</sup> Ad nazaqmo Moses in lotu abitan karuwsanibta na teq deg bunno amalib tamaz akabiyan em daqayta na inaqmo gimalib ned na hures lam tonmo. <sup>22</sup> God ago maror Moses wamta na bilaqsa nedmo woqim nagh bunno giqeman God ameb gibusirinan hiqiyayta. Helmo, ned araq a hi woqid teq God in on mataw gigo daq meqinta a hi walemdaq.

*Krais inno ahol tamaz gan emim in i gigo daq meqinta na tisuhol bug*

<sup>23</sup> Nagh amo amo lotu abitan kwaziqta nab giqusta na in nagh Heven-ib giqusaqta na gidulanmo iyim usta. Sa in karuwmo ginedan amalib nagh nagan suholan God ameb gibusirinan hiqiyayta. Ari teq karuw ginedan na in nagh hel diqta Heven-ib giqusaqta na giwastitaygo ago zaway haiqta. Tamaz araq karuw ginedan uriyamdaqta naqmo amomo in nagh nagan tigiwastitaydaqta. <sup>24</sup> Nazaq iyan Krais lotu abitan og kab gibenabmo emiyta nab in le a hi gwahtimta. Bit

gibenab emiyta na in bit diq Heven-ib turaqta na adulanmo. Nazaq iyan Krais in bit diq Heven-ib turaqta nabmo le gwahtimta. Gwahtiqim muran in i gilumsihad God anognib tituraq.

<sup>25</sup> Teq og kab tamaz mat danmebta na in ulig bunno ned tamaz emgota wazim bit adugan Tawon Diqta nab le gwahtiqaqta. Teq in ned wazaqta na inno ahol anedan a haiqta. Ari Yesus nazaq ame kabemmo tamaz a hi amta. <sup>26</sup> Na ezaqgo in ame kabemmo ahol tamaz gan emnan haqad teq og mutur gwahtimta nab iyim bo muranmo in tuteqmo santitiy sor nagta. Teq haiq. Muran kam abebtanta kab Krais ulalabmo tugwahtim. Gwahtiqim in on mataw gigo daq meqinta tigiwalem bugnan haqad in ame amulikmoqmo inno ahol tamaz gan God tuqug. Ugim in tamaz araq a ta udaqta na haiq tiqiy. <sup>27</sup> Na ezaqgo God in mataw bunno giyon bilaqan in gime amulikmoqmo moqeq teq hazizirib tur daqayta. <sup>28</sup> Ad nazaqmo Krais ame amulikmoqmo ahol tamaz gan emim in mataw kabemmo gigo daq meqinta inno ahol ugim sorim tumomta. Abeh teq in ame gigerta gwahtiqdaqta nab in daq meqinta walemgo a hi boldaq. Haiqgam. In on mataw in amen emad osayta naqmo giwaqnan haqad in bo a ta gwahtiqdaqta.

## 10

*Tamaz kwaziqta na in daq meqinta a hi walemyaqta*

<sup>1</sup> Ari God ago maror Moses bilamta na aduganib nagh dimdimunta abeb teq gwahtiqdaqta na gidulanmo ussa i ahol waqauqta. Nagh nagan ginon diq maror nab a hi usaqta. Nazaq iyan ulig bunno mataw tamaz emayta na in tamaz amulik naqmo emsa tamaz na in mataw God agerab loqayta na giwastitayan in God ameb a hi dimniy hasayta. <sup>2</sup> Ari tamaz na in mataw giqemid dimun diq tiqiy hasid teq in ulig ta araq nab tamaz na a ta hi em nagiy. Na ezaqgo tamaz na in mataw lotu-ib bolayta na giwastitayid in gigemab gigo daq meqinta na a ta hi loyin nagiy. <sup>3</sup> Teq haiq. In ulig bunno tamaz emsa daq na in mataw ginad enqenunsa in gigo daq meqinta usaqta na ginadin a ta emayta. <sup>4</sup> Na ezaqgo bulmakau matmatta ginedan teq memeq matmatta ginedan in mataw gigo daq meqinta giwalemgo azawayin haiqta. <sup>5</sup> Nazaq iyan Krais in og kab tubolnan haqad in amam kazaq bulon, Karuw wol emim ninmen tamaz emayta na teq naw amo amo nigayta na ginan ni ninad a hi bilaqaq ham. Na ago iyan ni yaqmen mat diq asan tuwastitayim eman usaq ham. <sup>6</sup> Daq

meqinta atamazin teq karuw anon bunmo faqab eman oyworaqta na ni ginan ninad a hi dimniyaq ham.

<sup>7</sup> Teq ya bilay, Yaqmo kawa osaiq hay ham. Kwaziqmo ningo marib ya ibin mar toniyta nazaqmo ya ni ninad tumuzinnan haqad ya kawa tubol hay ham. *Buk Song 40.6-8*

<sup>8</sup> Gamuk naway nab in danmeb bilam, Karuw wol emim ninmen tamaz emayta na teq naw amo amo ni nigayta na ginan ni ninad a hi bilaqaq ham. Ad in bilam, Daq meqinta atamazin teq karuw anon bunmo faqab eman oyworaqta na ni ginan ninad a hi dimniyaq ham. Ta teq mataw in God ago maror Moses bilamta naqmo ago gunun muzinim in tamaz amo amo nagan emayta. <sup>9</sup> Ad teq gamuk nab in bilam, Yaqmo kawa osaiq ham. Ya ni ninad tumuzinnan haqad kawa tubol ham. In nazaq haqad in tamaz kwaziqta na baymuzad abanab in tamaz muturta na eman tuqusaq. <sup>10</sup> Daq na Godmo anad nazaq usan in gwahtimta. Nazaq iyan Yesus ame amulikmo inmo ahol tamaz nog God ugan daq naqmo amalib i gihol tidimniyim i God ago on mataw tawonta tiqiyim osauqta.

*Krais tamaz amta naqmo in daq meqinta walemaqta*

<sup>11</sup> Mataw tamaz emayta na bunmo in gigo banab turad kam bunmo in tamaz akabiyan emayta. In tamaz akabiyan emad in tamaz adan amulik naqmo tutimmo emayta. Ta teq tamaz na in gigo daq meqinta a hikidik walemaqta. <sup>12</sup> Ari Krais in daq meqinta tigiwalemnan haqad in ame amulikmoqmo tamaz am. Eman tamaz na in kuluwa-kuluwmo usaqta. Krais nazaq tiqemim teq in God aben aqabun ban tuqos wom. <sup>13</sup> Os woqim osad God in ago bab bunmo giqemid asen ahaqenib iy bug daqayta na akaman in baq tunim osaqta. <sup>14</sup> Na ezaqgo tamaz amulik naqmo in on mataw God in gitowun emim aholyon giwaqan osayta na gigeman in tidimniy hasayta. Dimniy hasim in God ago on mataw tawon diqta iyim osad in nazaqmo tuqos tut daqayta.

<sup>15</sup> Teq God ago marib Bugaw Dimunta in nagah nagan anan i gibilenaqmo. Gamuk na bilam,

<sup>16</sup> Yaqgo maror muturta abeb teq ya mataw negdaiqta na in kazaq ham. Yaqgo maror na agamukan bunmo ya in gigemab tiqemdaiq ham. Ad ya gamuk na in ginadib tumar tondaiqmo ham. Yaqmo Iyahta ya nazaqmo bilaqaiq ham. *Jeremaya 31.33*

<sup>17</sup> Haqad in gamuk na tibilaqim teq in bilam,

Ya in gigo daq meqinta teq in yaqgo gunun othasayta na walemad anadin a ta hi emdaiq ham. *Jeremaya 31.34*

<sup>18</sup> Yesus daq meqinta tigiwalem bugan God in daq meqinta nagan anadin a ta hi emaqta. Nazaq iyan daq meqinta walemgo atamazin araq a ta emnanta na haiq tiqiy.

*I God anan helmo haqad agerab diq loquq*

<sup>19</sup> Nazaq iyan, ya imaqbaban, Yesus anedan i giwastitayan i a hi rabad God ago bit adugan Tawon Diqta nabmo i le tugwahtiqam. <sup>20</sup> Yesus anedan na in i gimen dan muturta tutimmo usaqta eman tugwahtim. Dan na le tubusan ayahta God ago bitab othenan usaqta na agilehun ban le gwahtimta. Teq tubusan na inmo anon. <sup>21</sup> Yesus in i gigo tamaz mat danmebta awaz meqinta iyim osad in God ago on mataw bunmo giwamuzaqta.

<sup>22</sup> Yesus inmo ahol anedan i gigemab hures lamad in i gunun itiyonim ginad meqniyaqta na suholan tihiqiy bug. In yuw dimunta amalib i gihuz igan i gisan abusirinan haiq tiqiy. Nazaq iyan i ginad helta usaqta na ago i zaway diq iyad i gigem God ameb titnonimmo ussa i God agerab loquq. <sup>23</sup> God i gidimun tonnan haqad hel diqmo bilamta nazaqmo in tiqemdaq. Nazaq iyan in teq i gidimun tondaqta na abin i bilaqad i ginad hi buliyuq. Ad i ginadnad emad hi hureq hasuq. <sup>24</sup> I an anadin emad an abe yahad i on mataw ginan ginad bilaqsa kabiy dimuntaqmo emuq. <sup>25</sup> Teq mataw asor gituw hiquysa in Yesus ago on mataw nenaq humab a ta hi wolayta nazaq i hi emuq. Haiqqam. Ne ginad emiy. Krais ago kam na bolim sinsin tiqiy. Nazaq iyan ne tuteqmo humab woleq an bulonad an zaway ugad osiy.

*I God atatin gileh hi uguq*

<sup>26</sup> Ari luweq i Krais ago gamuk helta na huritad ginad tiqem haseq teq abeb i ginadibmo daq meqinta a ta emad luwam. I nazaq tonsa teq tamaz araq i gigo daq meqinta a ta walemdaqta na haiqqam.

<sup>27</sup> Naqmo i rabad God ago hazizir ayahta na amen emad i in ago faq meqinta ago bab ginoy emdaqta naqmo i baq tuneq tuqosam. <sup>28</sup> Kwaziqmo mat araq God ago maror Moses bilamta na itiyonsa mataw giger o ezeqman nazaq in ahol waqeq in leheq nagah in gimeb ahol waqiya na tibilaq yaqay. Bilaqsa mataw huriteq in mat na anan ginad a hi meqniysa in wol emid tumoqyaq. <sup>29</sup> Ari muran mat helmo tihaqim teq in anad buliyim a God atatin gileh ta ugaqta na ne mat naqanta anan ginad ezaq emay? Mat na afaqan ayah diqmo a hi waqdaqmo e? God atatin anedan God ago maror zaway ugaqta na in mat naqanta

eman in God ago mat tawon diqta iyim osta. Ta teq in anad buliyim God gileh ugad in ned na eman in bilaqne ned samanta nog iyaq. Ad God agem dimunta ugad ago Bugaw Dimunta ugan in Bugaw na tibilawunaqmo. <sup>30</sup> God ago marib gamuk ara q kazaq bilam,

Daq meqinta aqenin waqgo na yaqgo kabiy ham. Yaqmo teq mataw daq meqinta emiyta na amenin tinegdaiq ham. *Lo 32.35*

Teq gamuk ara q kazaq ta bilam,

Iyahta in ago on mataw hazizirib tigilum kendaq ham. *Lo 32.36*

An gamuk nawa na anamren ago i tuhurit kenta. <sup>31</sup> Helmo, God Kayeqmo Osaqta na in ni faq nignan haqad niwazid teq ni rab naqmo diq hiqiydaqta.

*I ginad helta usaqta na awaz meqniyeq usan*

<sup>32</sup> Ne mebmemo Yesus abin huritim anan helmo haqiyta na ne anadin ta emiy. Kam nab God in ne ginad eman hastitayan ne ginad anuwan ina q tiqiyta. Sa mataw ne geg ayahmo negsa ne afaqan kabemmo sorad gituw a hi hiqiy yaqayta. <sup>33</sup> In ulalab on mataw bunmo gimeb ne mebay negad gibilawunad afaqan neg yaqayta. Ad kam asor in nazaqmo ne giyogniz afaqan negsa ne in gilumsihad in gigo afaqan na ne sor yaqaytamo. <sup>34</sup> Ad ne gigo mataw asor giqirquran ossa ne in ginan ginad meqniysa le gibiy yaqayta. Sa kam asor mataw in ne gigo nagah haresmo ginadibmo giwaqsa ne ginad dimniysa a hi giwasih yaqayta. Ne ginad em yaqay, I gigo nagah dimun diqta tuteqmo usdaqta na in a hi waq daqay haq yaqayta.

<sup>35</sup> Nazaq iyan ne ginad Kraiss anan helmo haqayta na ne hulosis hi woqan. Ne ginad helta ago amenin ayahmo waqnanta usaq.

<sup>36</sup> Ne giwazmo meqniyeq God amen emad gituw hi hiqiyman. Ne nazaq God anad muzinad oseq teq naw in negnan hel diqmo bilamta na ne tuwaq daqay. <sup>37</sup> God in ago gamukib kazaq tibilam,

Sisaq haiq mat boldaqta na in tuboldaq ham. In agudan a hi emdaq ham.

<sup>38</sup> Sa yaqgo on mataw titnonta na in helmo haqad oseq teq in dimunmo kayeqmo tuqos daqay ham. Ari in helmo haqad oseq gihol hureqid teq ya in ginan inad a hi dimniydaq ham. *Habakuk 2.3-4*

<sup>39</sup> Teq i ne nenaq i mataw gihol hureqim meqniyayta na nog a haiqta. I helmo haqad kayeqmo dimunmo osamta aqon matawun tiqiyim osauqta.

## **I God anan helmo diq haqad giwaz meqniyeq turam**

## **11**

*I helmo haqauqta na ago adan alulin*

<sup>1</sup> Ari i helmo haqauqta na ago adan kazaq. I nagah bunmo God ignan bilamta na amen emim osad i ginad emauq, Helmo diq God tiqigdaq haqauq. Haqad i nagah na i gimeqnaqgnib ahol a hi waqad i ginad emauq, Nagah na hel diqmo tuqusaqta haqauq. <sup>2</sup> Mataw aseseqta kwaziqmo osiyta na in nazaq God anan helmo haqsa God in ginan anad dimniyyaqta.

<sup>3</sup> Teq i helmo haqad ginad kazaq emauq, God gamukmo bilaqan kait og ina q gwah-timta haqauq. In nagah i gimeb ulilemim usaqta na amalib nagah bunmo i ahol waqauqta na giqamta haqauq.

*Abel, Enok teq Nowa in God anan helmo haqiyta*

<sup>4</sup> Teq Abel in God ayon tamaz emad anan helmo diq hamta. Haqad in ago tamaz in abab Kein ago tamaz uriyamim dimun diq iya. Nazaq iyan God in Abel ago tamaz anan anad dimniysa in Abel anad helta na ahol waqad anan mat titnonta ham. Abel tumomta teq in God anan helmo hamta awagamun na in i suleq dimunta gibilen tutaq.

<sup>5</sup> Teq Enok helmo haqad osim a hi moqsamo God in waqim ad Heven-ib tugwalah. God in Enok anon awitan ina qmo waqim a gwalehan mataw og kabta in nagunim teq ahol a ta hi waqiy. Na ezaqgo God ago marib i gamuk kazaq ahol waqauqta. Gamuk na bilam, God in Enok waqim ad a hi gwalehadmo in Enok anan anad tidimniy ham. <sup>6</sup> Na ezaqgo mat God anan helmo a hi haqsa God in anan anad a hikidik dimniydaqta.

Haiqqam. Mat God agerab loqnan anad usaqta na in kazaq anad emdaq. God helmo diq osa qta haqdaq. Ossa mataw giholtuw bulad God nagunad luwsa teq God in gimeb ahol ulal tonad gidimun tonaqta haqdaq. Mat anad nazaq emaqta naqmo in God agerabmo diq loqaqta.

<sup>7</sup> Teq Nowa in God anan helmo haqan God in nagah abeb teq gwahtiqdaqta na ago Nowa anadib emad tubulon. Bulonan in nagah nazaqta ahol a hi wamta teq in God ago gamuk na huritim anan helmo haqadmo in muy ara q tiqam. Emim muy nab in ago aw amun nenaq le gwahtiqim in dimunmo osad a hi moqiyta. Nowa ago daq naqmo amalib in on mataw God gileh ugiyta na gigo daq meqinta eman ulal iyan in timeqniy has bugiy. Sa Nowa-mo abin God ameb titnonimmo usta. Na ezaqgo in God anan helmo haqan God in anan mat titnonta ham.



*Abraham God anan helmo haqan God in awe Sara inaq gidimun ton*

<sup>8</sup> Teq God in Abraham og araq ugid ingo iydaq haqad in lilewunim og nab lehgo tubulon. Bulonan Abraham God aqez na anan helmo haqad in eraqim tilah. Lehadmo in edob diq lehyaqta na ago in a hi hurityaq. <sup>9</sup> In helmo haqad lehim God kwaziqmo og ugnan hel diqmo bulonta nabmo in gwahtiqliq in mat begbegta nog iyim og nab saw haresmo tiluw osyaq. Osad in bit karuwsanibta emim ossa in atatin Aisak teq Aisak atatin Jakob inaq in bit naqantab og nab tuqos yaqaymo. Teq God in Abraham og ugnan haqad hel diqmo bulonta agamukan na in Aisak ayow Jakob inaq gimen ustamo. <sup>10</sup> Abraham og nab luwad in uliq ta araq teq gwahtiqliqta na amen emyaq, uliq na gwahtiqliq in nab abe emeq tuteqmo tuqosdaq haqad. Na ezaqgo God-mo in uliq na wazid eraqdaqta teq uliq na ezaq diq iyeq usdaqta na God-mo anadib usaqta.

<sup>11</sup> Teq Abraham God anan helmo haqsa in awe amun uggo azawayin aholib tubol.\* In awe Sara aw nignigta. Teq in awe amun ugdaqta akaman tekomo tuhulosta. Teq in anad emyaq, God amun yagnan hel diqmo bilamta nazaqmo in tiqemdaq haqyaq. <sup>12</sup> Nazaq iyan mat adinowan iyim aholib amun emgo azawayin tihiqiyta na alulib mataw en araq tugwahtiqliq. Mataw na kabemmo diq gwahtiqliqta, bilaqne kaitab ulig turayta na teq kamis adekib ibur giquisayta nazaq nog in gwahtiqliq. Gwahtiqliq teq mat araq diq in ginulingo ahun haiqqam.

<sup>13</sup> Mataw nawa i giwagamun huritim bolta na bunmo in God anan helmo haqad osim tumoqiyta. Teq in kayeqmo osad in og God negnan hel diqmo gibilanta na a hi waqiyta. Haiqqam. In pesanmo turad nagah abeb teq gwahtiqliqta na aholmo waqad in ginad tidimniy yaqayta. Ginad dimniysa osad in bilaq yaqay, I bilaqne on mataw uliq araqaqta bolim og kab begbeg os nog iyaq haq yaqayta. <sup>14</sup> On mataw gamuk asen naqanta bilaqsa i huritad ginad emauq, Mataw na giholyon og araq tinagunay haqauqta. <sup>15</sup> Ari mataw na in gigo og in hulosisim boliyta na anadin em tutad teq in muleqeq ta leh nagiyta. <sup>16</sup> Teq in gigo og na in anadin a ta hi em yaqay. Haiqqam. In og araq dimun diqta Heven-ib usaqta naqmo waqnan ginad bilaqyaq. Nazaq iyan in God anan i gigo God haqsa God amebay a hi woqyaq. Na ezaqgo in mataw na gimen uliq araq tuwastitayan usta na ago iyan.

\* 11:11: Mataw asor in Grik nan-ib gamuk ka ahol waqad ginad emay, Sara-mo God anan helmo haqad amun emgo azawayin wamta haqay.

<sup>17-18</sup> Ari God in Abraham bulonim bilam, Ni nitatin Aisak-mo ago onmintan naqmo ginan Abraham asenlulibta haq daqay ham. *Jenesis 21:12*

Haqan Abraham in God aqez na anan helmo tiham. Nazaq iyan abeb God in Abraham ulum waqad atatin wol emgo bulonan Abraham in Aisak tamaz nog God ugnan ton. God in Aisak-mo ago hib Abraham dimun tonnan hel diqmo bulonsa Abraham tuhuritta. Teq in atatin amulikmo osta na tamaz nog God uggo tiqiyim os. <sup>19</sup> Na ezaqgo in anad am, Aisak moqid teq God wazid ta eraqdaq ham. An in nazaq nogmo tiqiy. Aisak moggo banab usim ta eraqan teq in amam ta wam.

*Aisak, Jakob teq Josep in God anan helmo haqiyta*

<sup>20</sup> Teq Aisak in God anan helmo haqad in atatin Jakob ayow Iso inaq gibar tonad in giger gigo hib nagah abeb teq gwahtiqliqta na ago tigibilan.

<sup>21</sup> Teq Jakob in God anan helmo haqad osim tumoqnan tonadmo in atatin Josep atatin giger na gibar ton. Gibar tonim hulosaq teq in ago katek wazim ulum ugim in kuh tonim God abin tiqiluw.

<sup>22</sup> Teq Josep in God anan helmo haqad osim tumoqnan tonadmo bilam, Abeb teq Isrel in Isip huloseq tileh daqay ham. Haqad in leh daqayta nab teq in ahol aditin waqeq ad lehgo in tibilammo.

*Moses in God anan helmo hamta*

<sup>23</sup> Teq Moses anen agemab hitiqan anen amam in gigo amun na ahol waqan in dimun diq iyyaqta. Nazaq iyan in king ago gunun itiyonnan a hi rabad in God-mo anan helmo haqad in gigo amun na kalam ezeqman nazaq ulileman us.

<sup>24</sup> Teq Moses ayah tiqiyim in God anan helmo haqad osad in anad tiqam, Ya inan bilaq daqay, King Fero amiy ago amun Isip-ubta haq daqay na ya hulosaq ham. <sup>25</sup> Na ezaqgo in daq meqinta ago adan muzinad kam asitmo anad dimniysa osnan atuw hiqiyyaqta. In God asenul nenaq afaqan sornan anad bilaqyaqta. <sup>26</sup> Kraiss in ago on mataw gimen mebay sornan anad bilamta nazaqmo in mebay na sornan anad bilammo. Ad in anad emyaq, Yaqgo on mataw gimen mebay sordaiqta na in Isip gigo os dimunta anaghan nag bunmo giquiryamta haqyaq. Na ezaqgo in naw dimunta God teq ugdaqta naqmo in anadin tuteqmo emad luwyaqta.

<sup>27</sup> Teq Moses God anan helmo haqad osad in eraqim Isip hulosisim tilah. Lehssa

Isip gigo king na ahol waqad agem timeqniyyaq. Ta teq Moses in king na anan a hi rab. In ame le God i ahol a hi waqauqta na ahol waq nog iyad in zaway diq iyeq oswaq.

<sup>28</sup> Teq Moses God anan helmo haqad in ago on mataw gibilenan in Pasova adidaqan wazim teq in ned waqim in gigo dan ezab tiqemiy. In nazaq tonid teq angelo boleq Isip gitatniz aqenta ginol emad in Isrel gigo onmin gihulosid dimunmo os daqay haqad.

*Isrel on mataw kabemmo in helmo diq haqiyta*

<sup>29</sup> Teq Isrel on mataw Isip hulosisim lehiyta na in God anan helmo haqad Kamis Kakaqta urotsa kamis hureq hasan in og amayqanta bay nog iyim lehiyta. Lehsa Isip mataw na in Isrel gimuzim lehad in nazaqmo kamis urotam haqad lehsamo kamis na muleqim gineqanmo tumoqiy.

<sup>30</sup> Teq Isrel on mataw na in God anan helmo haqad in uliq Jeriko ago gel lilut ugad kam 7 nazaq in luwanmo gel na tuwom.

<sup>31</sup> Teq danatab aw Rahab in God anan helmo haqsa Isrel mataw giger in ago uliqab saw wirinin bolan in agem dimunta negad gilumsihita. Nazaq iyan in ago uliqab on mataw God aqez othasiyta na moq bugsa in nenaq a hi momta.

<sup>32</sup> Teq ya naga gamukinmo a ta bilaq tutdaiq? Ya Gideon teq Barak teq Samson teq Jepta teq Devit teq Samuel teq God ago nantut nagan giwagamun bilaqgo akaman haiq. <sup>33</sup> Mataw na in God anan helmo diq haqad in bab emim king kabemmo gidauhan nenaq gibayan woq yaqayta. Teq in gigo walmataw giwamuzad in daq titnonta amalib gigo daq ulum kemeq amenin neg yaqayta. Teq God nagah negnan hel diqmo gibilanta na in tuwaq yaqayta. Teq in laiyon gitenmos ituq yaqayta. <sup>34</sup> In God anan helmo haqad faq ayahta oysa in wolmiy yaqayta. Teq in baqir aban emsa baqir a hi gilum emyaqta. In gihol moqsa in zaway waqim gihol ta dimniy yaqayta. Teq in bab emgo giwaz meqin diq iy yaqayta. Ad in uliq en ta asor gigo mataw bab emayta na gimuzid leh yaqayta. <sup>35</sup> Teq on asor God anan helmo haqsa in gigo onmin tumoqiyta na hodhodab eraqid in nenaq ta os yaqayta.

Ta teq mataw God anan helmo haqiyta na asor bab in ginol titayan moq yaqayta. Moqsa mataw ta asor gilumsihnan tona in hulos yaqayta. In ginad em yaqay, Abeb i hodhodab eraqeq kayeqmo dimun diqmo tuqosamta haq yaqayta. <sup>36</sup> Sa mataw dimdimunta na asor bab in afaqan negad gibilawunad teq in gusib giwistayad teq in sen-ibmo giqirquid os yaqayta. <sup>37</sup> Teq

in mataw na asor gimalib gig hunegad teq in asor ay gugur amalib giqurot tay yaqayta. Teq in baqir amalib ginol emsa moq yaqayta. Sa mataw dimdimunta na asor in sipsip teq memeq gisan tubusan nog weleq luw yaqayta. In gihol ago nagah bunmo ago siqim iysa mataw in afaqan negad teq in giholib daq meqin diqta em yaqayta. <sup>38</sup> Nazaq iyan in haresmo lehad og amatawun haiqtab teq garahab teq gig akuduqniq teq og akuduqniq in ulilemeq os yaqayta. In mataw dimdimun diqta. In og kab mataw meqinta nenaq a hi os nagiyta in os yaqayta.

<sup>39</sup> On mataw na bunmo in God anan helmo haqad in gihol abin dimun diqta God ameb usyaqta. Ta teq in og kab osad in nagah dimunta God negnan haqad hel diqmo gibilanta na a hi waqiyta. <sup>40</sup> Na ezaqgo God in i bunmo gimen dante araqq dimun diqta teq gwahtiqaqta na in ahol waqan usta. In anad am, Mataw kwaziqmo ya inan helmo haqad osiyta nagan in dante na hidmo ahol a hi waq daqay ham. In on mataw abeb teq gwahtiqaq ya inan helmo haq daqay na gibaqq tursa in bunmo araqqimmo dimniy has daqay haqad in anad usta.

## 12

*I Yesus ahol waqad anan helmo haquq*

<sup>1</sup> God ago on mataw dauh biyahta nawa ya ginan bilayta na in i gililut igim turad in i God anan helmo haqamta na adan-teqin giqisihunayta. Nazaq iyan i nagah afaqanta giholib usaqta na bunmo teq giholib daq meqinta i ginad hureqaqta na i hulos buquq. Ad i gituw hi hiqiyisa God i gimen dan emim bilam, Bo kazaq sibiy hamta naqmo i muzeq sibuq. <sup>2</sup> I Yesus anan gime diq tih neman. Inmo i ginad helmota na alulin teq inmo i ginad helta na tuwol netdaqta. Yesus abeb teq os dimunta waqeq anad dimniysa osdaqta na anadin emad in zaway diq iyim afaqan sorad tursa le in ayib othenanmo tumom. In ay nab moqdaqta ago mebay na anadin eman in nagah diq a hi iyta. An muran in God ago ban tawonta na aqabun ban tuqos woqim osaqta.

*God i giwastitaynan haqad afaqan igaqta*

<sup>3</sup> Ne ginad em hasiy. Kwaziqmo mataw meqinta in Yesus bab diq ug yaqayta. Ta teq in awaz meqniyim turad ahol a hi hureq hasyaq. Na ne anadin emad ne gihol husisiqsa gituw hi hiqiytan. <sup>4</sup> Helmo ne og ka ago daq meqinta bayid woqgo haqad inaq bab emayta teq bab na amuganib ne ginedan asor a hi woqaqta. <sup>5</sup> Teq God in ne gigem zaway ugnan bilamta na anan ne

gidek tizzal e? In ne ginan yaqgo onminmo diq haqad in kazaq ne gibilan,

Yaqgo amun ham, Iyahta suleq nigsa luweq ni suleq na anan nagah samanta haqdaq ham. Ad luweq in ni ni-wastitaynan haqad ninolsa ni nituw hiqiydaq ham.

<sup>6</sup> Ne nazaq hi emiy ham. Iyahta in on mataw ginan anad diq bilaqaqta naqmo suleq negaqaqta ham. Teq in on mataw giwaqim ginan yaqgo onmin haqqaqta na bunmo in gusib giwistitayaqtaqta ham. *Gutpela Sindaun 3.11-12*

<sup>7</sup> Nazaq iyan ne zaway diq iyeq tursa God ne giwastitayan. Amun amam in ago amun ayon emaqta nazaq nog in ne giyon emaq. Og kab mat araq in ago amun a hi wastitaydaqta haiqqam. <sup>8</sup> Ad nazaqmo God in ago onmin bunmo giwastitayaqtaqta. Ari in ne a hi giwastitayid teq ne in ago onmin diq a hi iy daqayta. Haiqqam. Ne bilaqne onmin danatabta nog iy daqayta. <sup>9</sup> Ne ginad emiy. I gimaman og kabta na in i giwastitaysa i giwazinauqta. Nazaq iyan i Gimam i giwitan giwamuzaqta na in i giwastitaysa i in aqez huritad ahaqenib a hi osam e? Na haiqqam. I in aqez hurit kemeq ahaqenib iyeq kayeqmo osamta. <sup>10</sup> I gimaman og kabta na in ginadibmo kam asitmoqmo i giwastitayaqta. Ari God-mo i gidimun tonnan haqad giwastitayaqta. In anad emaq, Ya tawon diqta iyim osaiqta nazaq nog yaqgo onmin os daqaymo haqad in i giwastitayaqta. <sup>11</sup> I Gimam Iyahta na in i giwastitaysa i ginad a hi dimniysa gigem afaqanmo loyinauqta. Teq abeb in i giwastitayta na anon emsa i giholib daq titnonta gwahtiqa i gigem kiskismo tuqusaqta.

*I giditin itiwuneq zaway iyeq turuq*

<sup>12</sup> Nazaq iyan ne giben husisiqim wo yuk tonad usaqta na waz ta eraqan. Ad ne gibakbakan harara nemaqta na itiwunid awaz ta meqniyan. <sup>13</sup> Ne giholyon dan wastitayid titnonan. Ne nazaq emeq teq ne dan na muzinad gisen kok tonim usaqta na a hi meqniy hasdaq. Haiqqam. Ne dan titnonta na muzadmo ne gisen kok tonim usaqta na tidimniydaq.

<sup>14</sup> Ne zaway diq iyeq mataw bunmo ne-naq zib alowabmo osiy. Ad negmo gihol God ugad ne God ago daq tawonta naqmo ne muziniy. Mat aholib God ago daq tawonta a hi usaqta na in abeb Iyahta ahol a hi waqdaq. <sup>15</sup> Teq ne an wamuz naqmo diq hiqiyiy. Luweq ne gimaqbab araq woqeq God agem dimunta ugaqta na in hulosdaq. Ad ne an wamuzad ne gigo araq in bilaqne ay aninin agon inaqaqta nazaq nog hi iyan. Luweq ay na gwaleq anon emsa

ne bunmo God ameb gihol anumlan inaq iy daqay. <sup>16</sup> Teq ne gilikmanib mat araq God gileh ugim inmo anad meqinta muzaqta na in ne nenaq hi osan. Mat nazaqta araq in Iso daq amta nazaqmo in emad in God ago nagah dimdimunta anan nagah a haiq haqsa ne mat na hidmo wastitayiy. Iso in Aisak atatin aqenta iyim in amango nagah kabemmo waqdaqta abin dimunta usta. Teq in abin dimunta na amikqan ugad amenin in didaq deg amulikmo waqim namta. <sup>17</sup> Wagam na ne tuhuritiyta. Abeb in amam ago hib nagah dimunta na waqnan bulonsa amam gileh tuqug. Gileh ugan Iso gaqad ame kabemmo bulonyaqaqta teq in anad buliyydaqta akaman haiq tiqiy.

*I uliq Jerusalem Heven-ib usaqta nab tugwahtiw*

<sup>18</sup> Ari og ka ago saw araq ne God ago nagah ahol waqad waz daqayta nab ne le a hi gwahtiqaqta. Ne ginad emiy. Kwaziqmo Isrel on mataw garah araq asenab gwahtiqaqim turad in gime anonab daq kabemmo gwahtiqaqta ahol waqiyta. Garah nab faq ayahta oysa romriq dub diq tiqan saw arab inaq iysa tim awaz meqinta sibyaq. <sup>19</sup> Sa taur gayonsa in mat araq gamuk bilaqsa huritiyta. Isrel on mataw bunmo gamuk na huritad in rabad teq in Moses kazaq buloniy. Ni God bulonid in i gimen gamuk araq ta hi bilaqan haqiy. <sup>20</sup> Na ezaqgo teko God in gamuk atoranta kazaq gibilan, Mat araq o karuw araq in asen garah ka asitmo mirirewunidmo ne gig hu-neqeg wol emid moqan ham. *Kisim Bek 19.12-13*

Haqsa Isrel mataw gamuk na huritim in gigo zaway tihiqiy bugyaq. <sup>21</sup> Helmo, daq aseseqta nagan gwahtiqaqta mataw bunmo rab titay yaqay. Sa Moses inaqmo nagah nagan ahol waqad bilara,

Ya rab ilum netsa ihol harara nemsasaiq ham. *Lo 9.19*

<sup>22</sup> Ari negmo teq ne le garah nab a hi gwahtiqaqiy. Haiqqam. Ne garah ta araq anan Sayon haqaytab tugwahtiqaqiyta. Teq ne God Kayeqmo Osaqta na ago uliq Jerusalem Heven-ib usaqta nab ne tugwahtiqaqiyimo. Uliq nab angelo kuluw diqmo humab wolim ginad dimniysa osayta. <sup>23</sup> Teq ne God ago onmin Gimango nagah kabemmo tuwaqim in atatiniz aqenta nog iyim osayta na gigo humabub ne tugwahtiqaqiyimo. On mataw na gibin Heven-ib mar tonan usaqta. Teq ne God on mataw bunmo gilum kemaqta na agerab tugwahtiqaqiyimo. Sa ne on mataw titnonta God gilumsihan giwitan tidimniy hasim osayta na gigerab tugwahtiqaqiyimo. <sup>24</sup> Teq ne Yesus-mo ago hib tugwahtiqaqiyimo. In i gimen God ago maror muturta a bolta.

Ad ne Yesus anedan in ne gimalib hures lamta na ago hib tugwahtiқыymo. Ned na in Abel anedan uriyamim in i gimen gamuk dimun diqta bilaqta.

*I gihol wamuz naqmo hiqiyuq*

<sup>25</sup> Ne gihol wazy. Luweq ne gidek hiqiyad God aqez othas daqay. Kwaziqmo God aqez og kab gwahtiқim in on mataw gidek wazim gamuk atoran diqmo gibilensa in huritiyta. Ta teq mataw na God aqez na gileh ugiyta. Gileh ugan God faq negsa in tuk daqayta asawan nagun yo hiqiy yaqayta. Ari muran God aqez Heven-ibmo hitiqad i gidek wazaqta. Gidek wazsa i in aqez na othaseq i edob tukeq leham? Na hikidik. <sup>26</sup> Kwaziqmo Isrel on mataw garah na asenab tursa God aqez iyanmo og ahol wolta. Ari muran in ago gamuk hel diqta araq tuqus tutaq. Gamuk na bilam, Abeb ya og emid in ame amulikmoqmo ahol a ta woldaq ham. Teq ya og amomo emid ahol a hi woldaq ham. Og kait inaqmo ya giqemid in gihol tuwol daqay ham. *Haqay 2.6*

<sup>27</sup> Ari in bilam, Og ame amulikmoqmo ahol a ta woldaq hamta. Nazaq iyan i ginad emauq. God in og kait inaq giqemid gihol wolsa nagh bunmo gihol woldaqta na hiqiy bugsa nagh ahol wol haiqta naqmo amomo in tuqus tutdaq haqauq.

<sup>28</sup> Nazaq iyan i God ago maror ahol wol haiqta na aduganib gwahtiқim osad i ginad dimniysa God esey uguq. Ad i in anad muzinad daq in anan anad bilaqta naqmo amalib i in ayon lotu emuq. Lotu emad i in anan rabad abin wazinad osuq. <sup>29</sup> Na ezaggo i gigo God in bilaqne faq ayahta eraqim nagh meqmeqinta bunmo oy bugaqa nazaq noqta.

### 13

*I gimaqbaban ginan ginad diq bilaqan*

<sup>1</sup> Ari ne bunmo maqbab nog an anan ginad bilaqsa osiy. <sup>2</sup> Sa mataw uliq araqaqta ne gigo bitab bolsa ne gilowan tonad nenaq osiy. Na ezaggo daq na amuganib mataw asor in angelo-mo giwaqim giqad bitab a lehim nenaq osiyta. In angelo boliyta nazaq in ginad a hi emiy. In ginad emiy, Ka matmo bol haqiy.

<sup>3</sup> Teq ne gimaqbaban giqirқuran osayta na ginadin emad gigo afaqan soriy. Bilaqne mataw ne inaqmo giqirқuran osayta nazaq nog. Ad mataw gibaymuzan afaqan sorayta na ne ginadin emiyymo. Bilaqne in afaqan sorsa ne in nenaq araқibmo afaqan sorayta nazaq nog.

<sup>4</sup> Mat aw inaq an waqayta na in daq dimunta. Teq mat awe inaq an tuwaqeq in God ameb ginumlan haiqmo dimunmo osiy. Ne ginad emiy, Abeb teq God in on

mataw an haresmo hureqim inaq usiyta na teq in an alulib hureqim inaq usiyta na bunmo gigo daq meqinta na amenin meqin diqta tinegdaq.

<sup>5</sup> Ne mani anan ginad hi bilaqan. Sa nagh ne inaqta naqmo ne wazad ne mat araq ago nagh ta asor hi utetiy. God inmo tibilam,

Ya ne giholib hiqiysa ne samanmo a hi os daqay ham. Haiqmo diq ham. *Lo 31.6*

<sup>6</sup> Nazaq iyan i gigem zaway ugad kazaq bilaqam,

Iyahta ya ilumsihsa ya a hi rabdaiq haqam. In ya iwamuzsa mat araq a hi imeqin tondaq haqam. *Buk Song 118.6*

*I Yesus muzeq inaq lehad gimebay hi woqan*

<sup>7</sup> Ne gigo mataw danmebta God ago gamuk gibileniyta na ne ginadin emiy. In og kab kabiy daq dimdimunta emad ossa in gigo kabiy na anon kabemmo emsa in amenin dimunta waqiyta. Na ne anadin emad ne in gisen muzad in God anan helmo haqiyta nazaqmo ne helmo haqiyymo.

<sup>8</sup> Yesus Kraisa ago daq a hi buliyaqta. In irimo osta nazaqmo in muran osaq. Teq in nazaqmo kuluwa-kuluwmo tuqus tutdaqmo. <sup>9</sup> Nazaq iyan suleq amo amo ahuritan araq diqta na in ne ginad hureqsa ne God ago dan hi hulosisy. God aqem dimunta igaqta naqmo in i giqemid i zaway iyeq turamta. Ari didaq agununin amo amo mataw asor bilaqayta na in i gigem zaway a hi ugdaq. Mataw gunun na muzinsa gunun na a hi gilumsihsa in luwayta.

<sup>10</sup> I gigo tamaz em abanan ta araq turayta. Teq mataw God ago bitab tamaz akabiyann kwaziqta emayta na in i gigo ban nab karuw waqeq neqgo gibin haiqta.

<sup>11</sup> Tamaz akabiyann kwaziqta na amuganib tamaz mat danmebta in karuw anedan waqim ad le bit adugan Tawon Diqta nab gwahtiқim in daq meqinta atamazin emaqta. Emim teq in karuw na ginon uliq asan ban faqmeb hunegan oyaqta.

<sup>12</sup> Nazaq iyan Yesus inmo anedan amalib on mataw giqemid in God ago tawonta iy daqay haqad in nazaqmo uliq asan ban santitiy sormo. <sup>13</sup> Daq naqmo ago i uliq asan ban Yesus agerab leheq in nan meqinta waqad mebay sorta nazaqmo i mebay soruqmo. <sup>14</sup> Na ezaggo og kab i gigo uliq araq tuteqmo usdaqta na haiqqam. I uliq abeb teq gwahtiқdaqta naqmo anan saw waqauqta. <sup>15</sup> Nazaq iyan Yesus i gimen dante tuwastitayan i tuteqmo God abin iluwauqta na tamaz nog God uguq. Mataw God anan i gigo God haqayta naqmo giqezab gamuk nazaqta gwahtiқaqta. <sup>16</sup> Ad ne on mataw gigo hib

daq dimunta emiymo. Teq ne gigo asor nagah ago siqim iysa ne negmo gigo nagah na amalib gilumsihiy. God in tamaz naqan diqtaqmo anan anad bilaqaqta.

*God i giqemid i dimunmo osamta*

<sup>17</sup> Ne gigo mataw danmebta na ne giwamuzad osayta. Abeb teq God in susumun negsa in kabiy bunmo emiyta na ago agamukan God tubulon daqay. Nazaq iyan ne in giqez huritad gihaqenibmo osiy.

Ne nazaq emsa teq in ginad dimniysa gigo kabiy anonon diqmo emad in gigem afaqan a hi iydaq. Ari ne giqemid gigem afaqan iysa teq in ne gimen kabiy anononmo a hi emad a hi gilumsihi daqay.

<sup>18</sup> Teq ne i gimen God bulonad susumun ugsa in i gilumsihan. Na ezaqgo i gihol loyinad i God ameb gigem dimunmo ussa kam bunmo i titnoneqmo lwnnan ginad bilaqaqta. <sup>19</sup> Teq yaqmo inad awaz meqinta amalib kazaq ne gibilenaiqmo. Ne yaqmen God bulonsa in hidmo iqemid ya ne gigo hib muleqeq ta lehiq haqaiq.

<sup>20</sup> God in Sipsip Anamren awaz meqin diqta na hodhodab wazan ta eramta. In anad i gigo Iyahta Yesus eraqeq inmo anedan amalib God ago maror muturta na zaway ugsa maror na tuteqmo usdaq haqad in wazan eramta.

Ari i gigem kiskismo usdaqta na alulin God-mo. <sup>21</sup> In ne gilumsihsa teq ne daq dimunta bunmo emgo tiqiyad ne in anadmo diq tumuzin bug daqay. Ad in Yesus Kraisa kabiy amta na amalib i bunmo giduganib daq in anan anad bilaqaqta na emid tugwahtiqaq. Nazaq iyan i tuteqmo kuluwa-kuluwmo Yesus abin iluwuq. Hel diqtaqmo.

*Gamuk abebtanta*

<sup>22</sup> Ya imaqbaban, ya inad awaz meqin amalib kazaq bilaqaiq, Ne gidek emeq yaqgo gamuk ka huritad gituw hi hiqiyhan haqaiq. Na ezaqgo ya ne gigem zaway uggo haqad sansandek kab gamuk siqimmo mar tonta. <sup>23</sup> I gimaqbab Timoti irquran osan in hasiyta na ago ne tuhuritiy. Ari in yaqgo hib hidmo gwahtiqaq teq ya inaq i leheq ne tigibiyam.

<sup>24</sup> Ari i gigo zeq dimun ka ne waqeq ne gigo mataw marorta na teq God ago on mataw tawonta na bunmo negiy. Sa Yesus ago on mataw Italiy-ib osim boliyta na in gigo zeq dimun ne gimen eman nawa leh negaqmo.

<sup>25</sup> Ari God agem dimunta ne bunmo negsa ne osiy. Nawaqmo.

## Jems Gamuk ameb lehaqta

Sansandek ka mat araq anan Jems haqay ka mar tonta. Mataw kabemmo ginad emay, Yesus amikqan Jems naqmo gamuk ka mar tonta haqay. Mat na Yesus ago dauh uliq Jerusalem-ub osiyta na gigo maror iyim osta (Aposel 15.13; 21.18). Sa Juda on mataw Yesus anan helmo haqiya ta na kabemmo le uliq saw haresmo ossa Jems in ginad helta ulumsihid awaz meqniydaq haqad gimen gamuk ka mar tonta.

On mataw na Yesus anan helmo haqiya teq in gidan sosil iysa afaqan kabemmo in gigo hib usyaq. Daq meqinta gilum waqsa in ginad meqinta haresmo em yaqay. Teq mataw ginaghan kabemmota na in mataw gina haiqta gibayan woqsa in igmo ag haq yaqay. Sa in an mugad an agem meqinta ug yaqay. Mataw na Yesus anan helmo haqiya teq in ginad helta na akabiyan asit a hi em yaqayta.

Nazaq iysa iyan Jems gamuk kabemmo atoran diqmo gibilan. In anad dimdimunta gibilenad in mat anad em haseq ahol anononmo wamuzdaqta na ago in bilam. Ad in bilam, Mat Yesus anan helmo haqta na samanmo a hi osdaq ham. Haiqqam ham. Mat na amaqbaban gilowan a hi toneq in samanta Yesus anan helmo haqtaqta ham. Mat dimunta God ago gamuk huritim adan emaqta ham. Ad inmo ahol anadin a hi emad in amaqbaban bunmo gilumsihad in mataw asor gigomo a hi lehaqta ham. Teq in bilam, Yesus ago on mataw in gitenmos wamuzad in mataw gigilehunana a hi bilaq daqay ham. Haiqmo diq ham. Mataw Yesus anan helmo diq haqayta na in gihol amileq amalib God abin iluwad teq in giyogniz gamuk dimdimunta in gilumsihdaqta naqmo neg daqayta ham.

### Daq meqinta gilum waqsa i giwaz meqniyeq turad teq i God inaq dimunmo osam

*Jems sansandek ka mar tonta*

<sup>1</sup> Yaqmo Jems. Ya God teq Iyahta Yesus Kraiss inaq gigo kabibiy matta. Ne gem Isrel on mataw gidauhan 12 nazaq og saw haresmo le osayta na gimen sansandek ka ya mar tonim eman leh negaq. Zeq dimun ne bunmo.

<sup>2</sup> Ya imaqbaban, afaqan amo amo ne giholib gwahtiqsa ne ginadmo dimniyan. <sup>3</sup> Na ezaqgo afaqan nawa ne giholib gwah-tiqtaqta nagan in ne ginad helmo haqayta na ulum waqtaqta. Ulum waqsa ne ginad na hel diqta iyid teq ne tuteqmo giwaz

meqniyeq turad a hi woq daqay. <sup>4</sup> Ad ne tuteqmo giwaz meqniyeq turad teq ne gihol kazaq tiloyin daqay. Ne ginad gihol bunmo tiziliman ne tidimniy hasim nagah araq ago siqim a hi iyayta nazaq ne gihol tiloyin daqay.

*Mat anad dimunta ago siqim iyeq teq in God bulonan*

<sup>5</sup> Ari ne gilikmanib mat araq anad dimunta ago siqim iyeq teq in God bulonid God anad dimunta ayahmo tuqugdaq. On mataw ginad dimunta waqnan God bulonsa in a hi ginadaqta. Haiqqam. In nagah na negnan anad diq bilaqtaqta. <sup>6</sup> Teq mat na helmo diq haqad God susumun ugad in anad giger hi eman. Na ezaqgo mat anad haresmo emaqta na in bilaqne tim bolad kamis sorsa haresmo eraqtaqta nazaq nog. <sup>7</sup> Mat nazaq anadnad emaqta na in ahol kat ugeq Iyahta teq nagah araq tiyagdaq haqad nazaq in anad hi eman. <sup>8</sup> Haiqqam. Mat nazaqta na anad giger usaqta. Ad daq bunmo in emaqta na in dante amulikmo a hi muzaqta.

*Mataw ginaghan inaqta na giyogniz mataw ginaghan haiqta na nenaq gimen gamuk*

<sup>9</sup> I gimaqbaban ginaghan haiqta na God ameb gibin inaq iyim osayta na ago in gihol abin iluwiy. <sup>10</sup> Teq mataw gigo nagah kabemmota na in gibin God ameb Yesus ago on mataw bunmo gibin nog usaqta na ago in gihol abin iluwiyimo. Na ezaqgo sisihun azizorin emim asitmo usim hiqiyaqta nazaq nog mat anaghan inaqta tihiqiydaqmo. <sup>11</sup> Zeq gwalim huramad afanfan diq iyad sisihun oysa in miliyawim mayaqa. Maysa sisihun na azizorin murwoqim ogib woqsa in awaqan dimunta na timeqniyaqta. Ad nazaqmo mat ago nagah kabemmo inaqta na in bilaqne sisihun azizorin mayim hiqiyaqta nazaq nogmo. In ago kabiy kabemmo emad luwad in kiskismo hiqiyeq le tihiqiy bugdaqmo.

*God i gidimun tonad in i giqemid i daq meqintab woqgo a hi gilum waqtaqta*

<sup>12</sup> Mat afaqan sorad awaz meqniyim turatna in tidimniyim osaq. Na ezaqgo afaqan na mat na ulum waqsa in sorad a hi woqid teq God in ago os dimunta kuluwaku-luwmo osayta na naw nog tuqugdaq. Iyahta in on mataw inmo anan ginad bilaqtaqta na bunmo naw na negnan haqad hel diqmo tibilamta. <sup>13</sup> Teq daq meqinta mat araq ulum waqsa mat na kazaq hi bilaqan. God-mo ya ilum waqtaq haqad in nazaq hi bilaqan. Haiqqam. Daq meqinta God anad hureqgo ago zaway haiqta. Sa God daq meqinta amalib on mataw a hi

gilum waqaqtamo. <sup>14</sup> Mat aw amulik-mulikm gigemab ginad meqinta usaqta naqmo gwahtiqaq gilum waqaqta. Ginad meqinta na gilum waqad kat negad gi-hureqsa in adan emgo gigem eraqaqta. <sup>15</sup> Ad in gigem eraqaqta na tizilimim teq in daq meqinta eman tugwahtiqaqta, bilaqne aw agemab amun tizilimim teq asan ban gwahtiqaqta nazaq nog. Ad daq meqinta na le ayah tiqiy bugim in anamren ulumronan ban meqintab tuwolehaqta.

<sup>16</sup> Ya imaqbabanmo diq, ne gihol hi kat ugiy. <sup>17</sup> Nagah dindimunta on mataw samanmo naw nog waqayta nagan bunmo ulilib usim gehitiqaqta. Nagah anuwanta kaitab oyayta na ginamren naqmo in naw tawonta nagan giqeman i gimen bo hitiqaqta. Teq i Gimam Iyahta na ago daq a hi buliyaqta. Ad zeq nagah ara q amalib worireqsa awitan sisaqmo iyim gwalehim a siqim ta iyaqta nazaq nog God a hi iyaqtamo. <sup>18</sup> Inmo anad usta na tuwol net bugnan haqad in ago gamuk helta na amalib i giqeman in asenlulib gwahtiwa. God anad in teq nagah bunmo in giqamta na giwastitayid dimniy daqayta atowun nog igmo danmeb dimniy haseq tuqosam haqad in i giwamta.

## **I God anan helmo diq haqad daq dindimunta emad osam**

*I God ago gamuk huritad muzinuu*

<sup>19</sup> Ya imaqbabanmo diq, ne bunmo nagah ka ago hurit kemiy. Kam bunmo ne gidek emeq gamuk huritgo haqad gihol wastitayad osiy. Teq ne gamuk amenin hidmo hi bilaqad ne gigem hidmo hi meqniyanmo. <sup>20</sup> Na ezaqgo mat agem meqniyaqta na in God ago daq titnonta a hi emaqta. <sup>21</sup> Nazaq iyan daq anumlan ina qta teq daq meqinta ne giholib kabemmo diq gwahtiqaqta na ne muzid leh bugan. Ad ne gihol wazid woqsa God ne gigemab gamuk dimunta layta na ne wamuzad alowan toniy. Na ezaqgo God ago gamuk dimunta na ago azawayin ina qta. In ne gilumsiheq giqemid ne dimunmo tuqos daqayta.

<sup>22</sup> Teq ne God ago gamuk na huritad muziniy. Luweq ne gamuk na samanta huritad akabiy an asit a hi emad teq ne gihol tikat ug daqay. <sup>23</sup> Mat God ago gamuk huritad teq in adan a hi emaqta na in bilaqne mat galas-ib ahol adulan ahol waqayta nazaq nog. <sup>24</sup> Mat na ahol anobun galas-ib ahol waqim teq in ahol buliyim lehad hidmo in anobun ezaqta na ago in adek zizalaqta. <sup>25</sup> Ari mat God ago maror dimun diqta na agamukan anononmo ahol waqad muzinad atuw a hi hiqiyaqta, mat na tidimniyim osaqta. Na ezaqgo God ago maror na in mataw giqeman samanmo luw osayta. Mat nazaqta in gamuk na

huritim adek a hi zizalaqta. In mat kabiyta iyim gamuk na akabiy an emad atuw a hi hiqiyaqta.

<sup>26</sup> Ari luweq mat ara q ahol buloneq bilaqdaq, Ya God anadin diq emad ayon lotu emaiqta haqdaq. Haqad teq in anonon atenmos a hi wamuzdaqta. Mat nazaqta na inmo ahol agem tikat ugad in samanta God anadin emad ayon lotu emaqta. <sup>27</sup> Ari ni God anadin emad ayon lotu emdaqta na adantegin diq kazaq. Onmin ginenmaman tumoqan in amanmaninta osayta na teq on waburta giholbin iyim afaqan sorayta nagan ni le gibiyad tigilumsihdaq. Ad ni ningo luw os anonon diqmo wamuzad og ka ago daq anumlan ina qta na ni aban diq tiqemdaqmo. Lotu adan nazaqta na i Gimam God ameb dimunta anumlan haiqmo usaqta.

## **2**

*I on mataw bunmo gimen daq ara qibmo em neguq*

<sup>1</sup> Ari ya imaqbaban, i gigo Iyahta Yesus Krai abin ayahmo diqta. Nazaq iyan ne in amomo anan helmo haqad og kab ne on mataw bunmo gimen daq ara qibmo em negiy. <sup>2</sup> Luweq mat ara q tubusan dimunta teq ring gol-ibta asor aholib emeq teq in ne gigo lotu abitnib nab le tugwahtiqaq. Sa mat ta ara q anaghan haiqta ago tubusan anumlan ina qta aholib emeq in le ne gigo humab nab tugwahtiqaqmo. <sup>3</sup> Id teq ne mat ago tubusan dimuntab ahol sihanta naqmo alowan tonad ne kazaq bulon daqay, Kadoy ni ban dimun diqta kab os woqeq os haq daqay. Ad mat anaghan haiqta na ne kazaq bulon daqay, Ni kobmo le tur haq daqay. O ne bilaq daqay, Kab ya isen agerabmo os woqeq os haq daqay. <sup>4</sup> Ne nazaq emad ne ginad meqinta na amalib negmo gihol huserim ne gigo asor ginan meqin haqad asor ne ginan dimun haqayta.

<sup>5</sup> Ya imaqbaban dimun diqta, ne huritiy. On mataw og kab matawta gimeb ginaghan haiqmo osayta naqmo God in gitowun emim ginad helta ayahmo diq negaqta. Ad in mataw naqmo aholyon giwaqan in teq ago maror aduganib tugwahti q daqayta. Na ezaqgo in hel diqmo kazaq bilam, Mataw ya inan ginad bilaqaqta naqmo ya giwaqad in boleq yaqgo maror aduganib ginad dimniysa tuqos daqay ham. <sup>6</sup> Ta teq ne mat anaghan haiqta na mebay ugayta. Ne huritiy. Mataw ginaghan kabemmo ina qta naqmo in ne gibayan woqsa in afaqan kabemmo negayta. Mataw naqmo ne giwaqim giqad hazizirib lehayta. <sup>7</sup> Ad mataw naqmo Krai abin dimunta ne giholib usaqta na bilawunayta. Nazaq a haiq

e? <sup>8</sup> Teq i gigo King diqta na ago maror God ago marib usaqta na bilam,

Ni nihol anan ninad bilaqta nazaqmo ni niyow anan ninad bilaqan ham.  
*Wok Pris 19.18*

Nazaq iyan ne maror na tuwol net bugeq teq ne tidimniy daqay.

<sup>9</sup> Ari ne mataw asormo gilowan tonad asor ne gileh negad ne daq meqinta tiqemay. Samo i gigo King ago maror na in ne ginan bilaqan ne daq meqinta emayta amatawun tiqiyim osay. <sup>10</sup> Na ezaqgo mat ara q God ago maror aduganib gunun bunmo muzinad teq in gunun na gilikmanib gamuk amulikmoqmo itiyoneq mat na bilaqne gunun bunmo itiyonta nog tiqiydaq. <sup>11</sup> Na in kazaq. God bilam,

Ni an alulib hureqeq inaq hi us ham. *Lo 5.18*

Ad in kazaq bilammo,

Ni mat hi wol em ham. *Lo 5.17*

Ari ni mat ara q ago aw inaq a hi luwad teq ni mat wol emid moqid nawaqmo ni gunun itiyonaqta amatin tiqiyim ni timeqniy. <sup>12</sup> Ari ne God ago gunun an anan ginad bilaqgota na ahaqenib iyim muzinad ne gunun ta ara q diq ahaqenib a hi osayta. Sa abeb God in ago gunun dimunta naqmo amalib ne gilum kemeq in ne gigo daq amenin tinegdaq. Nazaq iyan ne gihol anononmo wamuzad ne gigo gamuk teq ne gigo daq bunmo gunun an anan ginad bilaqgota na inaq rireneqmo usan. <sup>13</sup> Na ezaqgo mat mataw ginan anad meqniysa gilowan a hi tonaqta na God in mat na hazizirib ulum kemad anan anad asit a hi meqniydaqmo. Ari mat mataw ginan anad meqniysa gilowan tonaqta na in God ago hazizirib turnan a hi rabaqta.

*Mat God anan helmo haqad teq in daq dimdimunta a hi emaqta na in anad helta na samanta usaq*

<sup>14</sup> Ya imaqbaban, mat bilaqaq, Ya Kraiss anan helmo haqaiqta haqad teq in daq dimunta a hi emaqta, mat na Kraiss anan samanta helmo haqaqta. Mat nazaqta ago anad helta na in mat na tuqulumsihdaq e? Na haiqqmo diq. <sup>15-16</sup> Ne gimaqbab ara q teq ne gihiy ara q in gigo giholsihen dimunta haiqqam iyim teq in didaq neq daqayta haiqqam iysa ta ne gilikmanib mat ara q in gibileneq bilaqdaq. Ne gigem dimniysa lehiy haqdaq. Tim hi ginolan haqdaq. Ne gigem ayah iyan haqdaq. Haqad teq in giholgo nagah nagan a hi negid mat na aqez ezaq teq gilumsihdaq? Na haiqqam. <sup>17</sup> Nazaq iyan i ginad helta na samanmo usad daq ara q dimunta eman a hi gwah-tiqsamo i ginad na moqim a hi gilumsihdaqta.

<sup>18</sup> Teq mat ara q ya ibileneq bilaqdaq. Mat ara q anad helta ulilemim usaqta haqdaq. Sa mat ta ara q daq dimunta emaqta haqdaq. Mat nazaq bilaqdaqta na anad meqin. Ni daq dimunta ara q a hi emsa ezaq teq ya ninad helta na ahol waqdaq? Na haiqqam. Ari ya daq dimunta emaiqta naqmo amalib ya inad helta usaqta na tiniqisihundaiq. <sup>19</sup> God amulikmo osaqta na ni anan helmo haqaqta. Ni ninad na dimun. Teq bugaw meqinta nagan inaqmo God anan helmo haqaytamo. Ta teq in God ago hazizirib turgo in rab naqmo hiqiyayta.

<sup>20</sup> Mat ni ninad siqim diq. Ya bilay, Mat God anan helmo haqad teq in daq dimunta a hi emaqta, mat na ago anad helta saman diqta usaq hay. Haqan ni yaqgo gamuk nawa na alulin hurit kemnan e? Ari ni hurit. <sup>21</sup> Kwaziqmo i gises Abraham in atatin Aisak tamaz emgo abanab emim teq in God ugnan tonta. In nazaq tonan God in ago daq in amta naqmo ahol waqim teq in Abraham anan bilam, Mat titnonta ham. <sup>22</sup> Ne ginad emiy. Abraham ago daq dimunta na in anad helta na inaq garabmo diq lehyaqta. Lehadin ago daq dimunta naqmo in anad helta eman tidimniy has. <sup>23</sup> Abraham daq na emim in God ago marib gamuk ara q usaqta na tuwol net bug. Gamuk na kazaq usaq.

Abraham God aqez anan helmo haqan God in anan mat titnonta ham. *Jenesis 15.6*

Nazaq iyan mataw in Abraham anan God ayowmo diq haqiy. <sup>24</sup> Ari ne ginad emiy. God in mat anad helta naqmo amomo ahol waqim anan mat titnonta a hi haqaqta. Haiqqam. In mat ago anad helta na ahol waqad teq in ago daq dimunta na inaqmo ahol waq tonim in anan mat titnonta haqaqta.

<sup>25</sup> Ad nazaqmo Josuwa ago mataw asor in aw danatabta anan Rahab haqay na ago hib bolan in giwazinad gilowan tonim giqeman in mataw gime titonim dante ta ara q waqim tilehiy. Nazaq iyan God in aw na ago daq dimunta na ahol waqim teq in anan aw titnonta ham. <sup>26</sup> Ne ginad emiy. Mat awitan asan amuganib a hi usaqta na in tumomta. Ad nazaqmo mat God anan helmo haqad teq in anad helta na akabiyan ara q a hi emaqta, mat na anad helta na tumomtamo.

### 3

*I giteb gamuk gwahtiqaqta na ago i gihol waz naqmo hiqiyuuq*

<sup>1-2</sup> Ya imaqbaban, ne gilikmanib mataw kabemmo diq God ago suleq anamreniz nog iyeq on mataw suleq hi negiy. Na ezaqgo i bunmo daq kabemmo em kireh tonauqta na ago iyan. Abeb God in mataw



bunmo gilum kemdaqta nab in i mataw ganim ago suleq on mataw gibilenta na gilum kem naqmo hiqiyad kamolmol a hi igdaqta. Nazaq iyan mat tutimmo gamuk anononmo bilaqad in gamuk arağ diq a hi bilaq kireh tonaqta, mat na tidimniy hasim ahol bunmo anononmo wamuzaqta.

<sup>3</sup> Ne ginad emiy. I hos giteb ain asugin asor eman ussa i na wamuza in edob i ginad usaqta nab in lehayta. Nagah amik diqta giteb usaqta na i wazsa hos abensen teq ahol bunmo in anobun naqmo muzim lehaqta. <sup>4</sup> Teq ne muy anadin emiymo. Muy asor in aseseq diqmo. Sa tim awaz meqinta eraqim bolim othassa in kamis amalib sibim lehayta. Sa muy anamren in muy ago stia amik diqta na wazsa in anad saw edob usaqta nabmo muy ayah diqta na lehaqta.

<sup>5</sup> Ad nazaqmo i gimileq in i ginon bunmo ago anaghan arağ amik diqtaqmo. Ta teq in yaqmo ag haqad kabiy aseseqta anan bilaqta. I ginad emuq. Faq amik diqta naqmo garanab eraqim in ay bunmo tuqoy bugaqta. <sup>6</sup> Teq i gimileq na bilaqne faq nogmota. I gihol anaghan bunmo gilikmanib inmo mat meqin diqta. In usad gamuk meqmeqinta teq daq meqmeqinta bunmo eman gwahtiqad in i ginon bunmo eman anumlan inaq iyaqta. Ad in bilaqne faq afanta nog iyim eraqad in i gigo luw os bunmo mideran oyaqta. Teq i gimileqib faq gwahtiqaqta na in saw faq oyad a hi miyaqta naqmo ago faqta.

<sup>7</sup> Karuw kwasikta amo amo teq ah amo amo teq kwanib amo amo teq nagah kamisib luwayta amo amo nagan bunmo in marmar iyeq i matawmo gihaqenib os daqayta. Helmo, mataw in karuw nagan bunmo giqeman marmar tiqiyiyta. <sup>8</sup> Ta teq igmo gihol amileq emid marmar iygo i bunmo biyab a haiqta. I gimileq naqmo eraqim in gamuk arağ meqinta bilaqdaqta na nagunad anamur a hi emaqta. In bilaqne nagah ahulinaqta ate afan ayahmo atemosib usim bo gwahtiqaqta nazaq nog. <sup>9</sup> I gimileq na amalib i Gimam i gigo Iyahta iyim osaqta na abin iluwauqta. Ad i gimileq naqmo amalib i on mataw God giqeman inmo nog gwahtiqim osayta na gimeqin tongo agamukan bilaqauqtamo. <sup>10</sup> Gamuk dimunta God abin iluwauqta na teq gamuk meqinta mataw gimeqin tonauqta na inaqmo gigermo i gitenmos amulikmo nabmo gwahtiqayta. Ya imaqbaban, daq naway na a hi gwahtiq nagta gwahtiqaq. <sup>11</sup> Ne ginad emiy. Yuw yayibta nab yuw diq teq kamis inaq arağibmo gwahtiqdaq e? <sup>12</sup> Ya imaqbaban, ne ya ibileniy. Ay fik abenab oliv anagin gwahtiqdaq e? Sa am wain ahulib fik anagin

gwahtiqdaq e? Na nazaqmo kamis ahol buliyeq yuw dimunta a hi iyaqtaqmo.

*Mat anad dimunta usaqta na in daq dimunta emaqta*

<sup>13</sup> Ari ne gilikmanib nog diq anad awaz meqin diq iysa in anad em hasaqta? Mat nog aholnan nazaq bilaqtaqta na in ago luw os mataw gimeb dimniysa in anad em hasad mataw giyon daq kiskista emsa in ahol waq kemiy. <sup>14</sup> Ari ne kam bunmo an anan gigem meqniysa gibin ayahta waqgo haqad an bakikiyan ugad teq ne gihol abin samanta hi iluwiy. Ne nazaq gimileq iyad ne God ago gamuk helta na adan a hi emayta. <sup>15</sup> Ginad meqinta nazaqta na uliq ulilib nab usim a hi gewoqtaqta. Na in og ka agota teq in gigem kwaziqta ago nagahta teq in bugaw meqinta gigo ginad nogta. <sup>16</sup> Na ezaqgo mataw an anan gigem meqniysa gibin ayahta waqgo haqad an bakikiyan ugsa in gigo os meqniysa daq meqinta bunmo in gilikmanib gwahtiqayta.

<sup>17</sup> Ari ginad dimunta ulilib usim gewoqtaqta na in anumlan haiqta. Teq in mataw nenaq kiskismo osaqta. Ginad dimunta na in mataw gilowan tonad teq in gigo nan huritayta. In mataw ginan anad ayahmo meqniyaqta teq in anon dimunta kabemmo emaqta. Ginad dimunta na in mataw asor gigo mo a hi lehad teq in aqez giger iyad amaqbaban a hi kat negaqta. <sup>18</sup> Ad mataw ginad dimunta nazaqmo usaqta na in giyogniz nenaq kiskismo ossa an mug teq an wol hiqiyayta. Teq mataw ginad dimunta na in gigo walmataw nenaq kiskismo osad in daq titnonta didaq amagin nog walmataw gigemab leysa in gwalim anon emsa daq titnonta kabemmo on mataw na giduganib gwahtiqayta.

## 4

*Mataw og ka ago nagah meqmeqinta anan ginad diq bilaqsa in God gihar ugayta*

<sup>1</sup> Naga daqin diq ne gilikmanib usim an wol teq bab hares eman gwahtiqaqta? Ne gigem atoranmo eraqsa ginad meqinta haresmo gwahtiqim ginad hureqsa ne an gihar ugayta naqmo in an wol na eman gwahtiqaqta. Ne daq nazaq a hi emayta ye? <sup>2</sup> Ne nagah amo amo waqnan ginad bilaqsa teq ne a hi waqayta. Nazaq iyan ne gigem meqniysa an gem ugayta. Ne nagah kabemmo utetad teq ne waqan yo hiqiyayta. Nazaq iyan ne an wolad bab ayahmo eman eraqtaqta. Ne God susumun a hi ugayta na ago ne nagah a hi waqayta. <sup>3</sup> Ad teq nagah asor ne anan susumunayta na ne a hi waqaytammo. Na ezaqgo ne ginad titnonim a hi ussamo ne nagah na ginan susumunayta. Ne nagah na waqeq muran

kam kabmo ne ginad dimniysa osgo ne susumunayta. <sup>4</sup> Aw aduw hulosis mat ta araq inaq luwaqta nazaq nog ne God gileh ugim og ka ago anad meqinta hares muzad osayta. Teq mat og ka ago anad meqinta inaq yow emaqta na in God gihar ugaqta. Na ago ne ginad a hi emay ye? Nazaq iyan mat og ka ago anad meqinta ayow iyim osaqta na, in God ago bab iyim osaqta. <sup>5</sup> Gamuk araq God ago marib kazaq bilam, God ago tim nawa in i gimuganib eman usaqta na in God amomo agota ham. Nazaq iyan i og ka ago anad meqinta inaq yow emsa God agem meqniyaqta ham. Ne ginad ezaq emay? God ago gamuk nawa bilamta na in gamuk samanta haqay ye? Haiqqam.

<sup>6</sup> Teq God agem dimunta igaqta na in i gigem kwaziqta na uriyamim ayahmo diq gilumsihaqta. Nazaq iyan God ago marib gamuk araq kazaq bilam, God in mataw girerey emayta na geg neqaqta ham. Ad in mataw gihol wazan woqsa osayta na agem dimunta neqaqta ham. *Gutpela Sindaun 3.34*

<sup>7</sup> Nazaq iyan ne God ago nan huritad ahaqenibmo osiy. Osad teq ne Satan othasid in ne gihulosad titukdaq. <sup>8</sup> Ne God agerabmo diq loqsa in ne gigerab tigeldaqmo. Ne mataw daq meqinta emayta na, ne giben suholid ginumlan hiqiyen. Ad ne mataw ginad giger usaqta na, ne ginad meqinta na walemid dimunta naqmo amomo usan. <sup>9</sup> Ne God anad a hi muzinayta na ago ne giquitil tartaysa gaqad osiy. Ad ne yuquwayta na hulosis ne ginad buliyeq gaq waziy. Teq ne gigem dimniysa osayta na hulosis ne gigem afaqan iysa osiy. <sup>10</sup> Ne bunmo Iyahta ameb gihol wazid woqsa teq in ne giwazid tiqeraq daqay.

#### *I gimaqbaban gigilehunan hi bilaquq*

<sup>11</sup> Ya imaqbaban, ne an agilehunan hi bilaqiy. Mat in amaqqab araq ago daq ulum kemim anan meqin haqad teq in agilehunan bilaqaqta, mat na in God ago maror gileh ugad in bilaqne maror na ulum kemim anan meqin haq nog iyaqtamo. Teq ni God ago maror ulum kemeq anan meqin haqeq ni maror na ahaqenib osad muzinaqta nog a ta hi ydaq. Haiqqam. Ni bilaqne maror na anamren mataw gigo daq ulum kemim amenin neqaqta na nog tiqiyaq. <sup>12</sup> Teq mat amulikmo maror igaqta. Teq in amomo mataw gigo daq ulum kemim amenin neqaqta. In amomo mat ulumsehida in dimunmo tuqosdaqta teq in amomo mat meqin tonid in tihiqiydaqta. Ni nibin ezaqta iyan ni bilaqne maror anamren nog iyim ni niyow ago daq ulum kemim anan meqin haqayta?

#### *I girerey hi emuq*

<sup>13</sup> Ari ne gigo asor bilaqay, Muran o babeq i taun-ib leheq ulig amulikmo nazaq i gigo es zayad mani kabemmo waqad oseq teq ta bolam haqayta. Ne yaqgo nan ka huritiy. <sup>14</sup> Nagah babeq gwahtiqaqta na ago ne a hi huritayta. Teq ne og kab osayta na in bilaqne naga daqin diq nog? Ne bilaqne onqas gwalim asitmo usimmo tihiqiyaqta nazaq noqta. <sup>15</sup> Ne kazaq bilaq nagiy. Iyahta anad bilaqid teq i dimunmo osad kabiy kazaq kazaq emamta haq nagiy. <sup>16</sup> Ta teq ne igmo ag haqad gihol abin iluwayta. Daq nawa ne girerey emayta na in meqin diqta. <sup>17</sup> Nazaq iyan ni daq dimunta araq emnanta anadin emeq teq ni daq na a hi emeq na ni daq meqinta tiqam.

## 5

#### *Mataw gigo nagah kabemmo inaqta na in abeb naw meqinta tuwaq daqay*

<sup>1</sup> Ari ne mataw gigo nagah kabemmotata na, ne yaqgo gamuk ka huritiy. Ne gigo daq meqinta na amenin nawa ne giholib tugwahtiqaqna tona na ne anadin emad ne atoranmo gaqad osiy. <sup>2</sup> Ne gigo es nagah bunmo tililih bugim usaqta. Ad ne gigo tubusan bunmo bidbid tumuktitayiy. <sup>3</sup> Ne gigo gol teq silva na God ameb samanta iyim usaqta. Hazizirib teq ne gigo nagah naqmo in ne gigo daq meqinta emid ulal ydaq. Ulal iysa ne gigo es nagah na bilaqne faq nog ne giholib oy soqoteq in ne gisan tuqoywordaq. Nagaqgo ne kam abebtanta kab ne giholyon es kabemmo tuwal emad osay? <sup>4</sup> Ahol waqiy. Kabibiy mataw ne gigo kabiyaw wit urotan ne kat negad in gigo naw asor wasihim a hi negiy. Teq in gigo naw asor rin toniyta na in muran atoranmo lileyad aholib ulal emad usaq. Sa kabibiy mataw na inaqmo lileysa in gizeq gwale Iyahta Zaway Bunmo Wazaqta na adekib tuwoqay. <sup>5</sup> Ne ogib kab osad nagah dimdimunta bunmo waqad ne gihol bilaqsa tuqosayta. Osad ne didaq nagah dimdimunta neqad giyuninsa ne gisan huhuw nems a ne gigem dimniysa osayta. Ta teq ne bilaqne bulmakau amidon anon ayahmota wol emeq neqgo tiqiyim osaqta nazaq nogmo ne osayta. <sup>6</sup> Ne hazizirib mataw titnonta giyon bilaqad ginol emsa in moqayta. Ad ne ginadibmo mataw na gimeqin tona in tok nemim nan araq a hi bilaqayta.

#### **I giwaz meqniyeq osad God inaq gamuk emad teq i Iyahta baq tuneq osuq**

*I gigem zaway iyeq afaqan sorad teq i Iyahta baq tuneq osuq*

<sup>7</sup> Ari ya imaqbaban, ne giholib afaqan gwahtiqsa ne sormo sorad Iyahta boldaqtta na baq tuneq osiy. Osad ne kazaq ginad emiy. Kabiy anamren ago kabiyab didaq tileyim teq in og ka ago didaq dimdimunta na baq tunim osaqtta. Mat na agem kiskismo diq ussa urom amebta na woqan teq urom abebtanta na inaqtmo tuwoqan in didaq na titayaqta. <sup>8</sup> Ad nazaqmo ne afaqan sorad Iyahta amen emad ne gigem kiskismo usanmo. Ussa ne gigem zaway ugad gituw hi hiqiy. Na ezaqgo Iyahta ta boldaqtta na ago kam sinsin tiqiy.

<sup>9</sup> Ya imaqbaban, ne yuwlozin ta hi bilaqiy. Ne daq na a hi huloseq teq abeb ne hazzirib turad nab ne gigo daq meqinta na amenin meqin diqta tuwaq daqay. Ne ahol waqiy. Mat ne gigo daq ulum kemmaqta na ahol tuwastitayim in bo tugwahtiqgo haqad nawa dan ezab tituraq.

<sup>10</sup> Ya imaqbaban, ne God ago nantut kwaziqmo Iyahta abinib gamuk bilaqiyta na ginadin ta emiy. In gigo bab gimeqin tona in gigem kiskismo ussa in afaqan na sorad gituw a hi hiqiy yaqayta. Nazaq iyan ne in gisen muzad nazaqmo emiy. <sup>11</sup> Na ezaqgo i ginadib mataw afaqan sorad gituw a hi hiqiyta na in muran tidimniyim osay haqauq. Teq Job agem zaway ugim afaqan aseseqta sorim atuw a hi hiqiyta na awagamun ne tuhuritiy. Ad wagam nab Iyahta anad in Job wamuza le in ago afaqan tihiqiydaq haqad anad amta na ne ahol tuwaqiyimo. Job awagamun nab Iyahta i ginan anad diq meqniysa agem igaqta na i ahol waq kemaqta.

*I gigo gamuk zaway ugnan helmo ulilib hi bilaq*

<sup>12</sup> Ari ya imaqbaban, daq danmeb diqta ne muzin daqayta na in kazaq. Ne gamuk araqt atoranta bilaqnan haqad ne helmo ulilib hi bilaqiy. Ad ne Heven anan teq og ka anan teq nagah asor giwaz meqinta nagan ginan biyad helmo diq haqad nazaq ne hi bilaqiyimo. Haiqgam. Ne bilaqeq, Ege ya tiqemdaiq haqeq na ne nazaqmo emiy. Ad ne bilaqeq, Haiqgam ya a hi emdaiq haqeq na ne nazaqmo emiyimo. Luweq ne katiyad samanta helmo diq haqid God ne giyon bilaqid ne amenin meqinta tuwaq daqay.

*Mat titnonimmo luwaqta na in God bulonsa in ago gamuk azawayin inaq iyaq*

<sup>13</sup> Ari ne gilikmanib gimaqbab araqt ahol afaqan iyaq e? Mat na God bulonan. Teq ne gigo araqt anad dimniysa osaqt e? In bar wazad God abin soran. <sup>14</sup> Ad ne gilikmanib gimaqbab araqt ago moqt inaq iyeq in Yesus ago on mataw gigo danmebta nagan gililewunan. Gililewunid boleq in mat na amen God bulonad Iyahta abinib in mat na

afaqinib masil wazbalid woqan. <sup>15</sup> Mataw danmebta na helmo diq haqad God bulonid teq mat moqaqta na a hi moqdaq. Iyahtaqtmo mat na wazid tiqeraqdaq. Ad mat na ago daq meqinta asor aholib usid teq Iyahta daq nagan tigiwalemdaqmo. <sup>16</sup> Nazaq iyan ne gigo daq meqinta giholib usaqtta na ulum hasid gwahtiqsa ne daq emiyta na ago an buloniy. Ad God ne gigo moqt wastitayid gihol dimniygo haqad ne an ulumsihad God buloniymo. Mat titnonta God inaqt gamuk emsa in ago gamuk na azawayin inaq iyaq kabiy atoranno emaqta. <sup>17</sup> Mat anan Elaija haqayta na in i nogtamo osyaq. Teq in urom hi woqan haqad anad awaz meqin amalib God bulonan ulig ezeqmanmo teq aweweqtta na asormo urom asit a hi wom. <sup>18</sup> Ad teq abeb in a God ta bulonan kaitab urom tuwom. Woqan og didaq eman a ta gwalim lah.

*Mat araqt dante titnonta hulosisid i waqeq ad dan dimunta nab a ta boluq*

<sup>19</sup> Ya imaqbaban, ne giyow araqt God ago gamuk helta na adan huload in dante ta araqt muzeq lehsa ne gigo araqt le waqeq ad muleqeq dante helta nab a ta bolan. <sup>20</sup> Teq mat nazaq ayow haresmo luwsa in hureqim dan titnontab a ta bolaqta na in gamuk ka hurit keman. In nazaq ayow daq meqinta emaqta na ulumsihad in ayow na awitan a hi moqdaq. God in ayow na ago daq meqinta kabemmo usaqtta na giwalemad anadin a ta hi emdaq. Nawaqmo.

## 1 Pita

### **Sansandek amebta Pita mar tonta Gamuk ameb lehaqta**

Pita sansandek ka mar tonim Yesus ago on mataw uliq saw haresmo le osiyta na gimen eman lahta. On mataw na gigo uliq diqtab afaqan gwahtiqa in tukim le uliq haresmo tuqos yaqay. Ossa Pita uliq Romub osad in gimen gamuk ka mar tonta. Teq in uliq na anan diq biynan atuw hiqiyisa in gamuk awowun hulim anan Babilon hamta (1 Pita 5.13).

Yesus ago on mataw na le begbeg iyim osad afaqan aseseqta sorsa Pita in gigem zaway negnan haqad gimen sansandek ka mar tonta. In bilam, Ne Yesus Kraiss awagamun dimunta na anadin ta emiy ham. Ne Yesus anan helmo haqayta na in nagah ayah diqta iyan ne waz naqmo hiqiyiy ham. Ad ne afaqan sorad ginadnad hi emiy ham. Daq na in ne ginad helta ulum waqsa awaz timeqniy hasdaq haqad in ne giholib gwahtiqaqta ham. Yesus daq araq meqinta a hi amta teq in santitiy ayahmo sorta ham. Sorim in moqim ta eraqim bilam, Teq ya ta boldaiq haqad in bilam ham. Ne in ago gamuk awaz meqinta na anadin emad in boldaqta na ago ne baq tuneq osiy ham. Osad ne God ago saw anuwanib ossa on mataw God ago maror asan ban osayta na in ne gibiyad gigo daq dimdimunta nagan ahol waq kemiy ham. Sa ne gihol bunmo God abenab emid in ne giwamuzad ossa le ne in ago hib tugwahtiqaq daqay ham.

### **I Yesus ago on mataw tawonta iyim iyan i daq dimuntaqmo emad nagah dimunta i waqamta na baq tuneq osuq**

<sup>1-2</sup> Yaqmo Pita, ya Yesus Kraiss ago Aposel araq. Ne Yesus ago on mataw saw Pontus teq saw Galesiya teq saw Kapadosiya teq saw Esiya teq saw Bitiniya gigo og saw haresmo begbeg nog iyim osayta na gimen sansandek ka ya mar tonim eman ne gigo hib lehaq. Kwaziqmo diq ne a hi gwahtiqaqamo i Gimam God in ne gigo tuhuritim in aholyon ne gitowun tiqamta. Gitowun emim abeb in ne giwaqim ago Bugaw Dimunta negan ne in ago on mataw tawonta tiqiyiy. God in Yesus anedan ne giholib hures laman ne gibusirinan tihiqiyan ne Yesus Kraiss ago gamuk huritad muzinayta.

God agem dimunta negad ne gigem eman kute nemaqta na in ne gigo hib ayahmo diq gwahtiqaqan.

*Os dimunta Heven-ib i gibaq tunim usaqta*

<sup>3</sup> Ari i God abin iluwuq. In i gigo Iyahta Yesus Kraiss ago God teq in Yesus Amamtamo. In i ginan anad ayahmo meqniyisa i gimen dante wastitaynan haqad in Yesus Kraiss hodhodab wazan eram. Eraqan dante naqmo amalib God i giqeman i gimugan muturta iyim i teq in ago os dimunta na tuwaqam haqad amen emim osauqta. <sup>4</sup> In ago os dimunta igdaqta na a hi meqniydaqta teq in anumlan haiqta teq in ahiqiy haiqta. Teq God nagah na ne gimen tuwastitayim Heven-ib eman usaqta. <sup>5</sup> Ne God anan helmo haqsa iyan in ago zaway ayahta amalib ne giwamuzaqta. In ne giwamuzad ossa le kam abebtanta nab in atatin Heven-ib ulalambo boleq in ne ta giwaqid ne ban dimuntab tuqos daqay.

<sup>6</sup> Ari God in ago os dimunta negdaqta na ago ne anadin emad ne ginad bilaq gigayinsa osayta. Ta teq muran kam asitmo kab God-mo bilaqan gilumwaq amo amo ne giholib gwahtiqaq ne gihol afaqan diq iyaq. <sup>7</sup> Daq nawa na amalib God ne gigem ulum kemaqta. Ne ginad emiy. Gig anan gol haqayta na anawun ulilibta teq in usim hiqiyayta. Teq mataw in gol faqab wiza anumlan muruwoqim woqsa gol watwat dimun diqta naqmo us tutaqta. Ari ne ginad helta na in gol uriyamim in nagah ayah diqta. Ad nazaqmo gilum waq amo amo ne giholib gwahtiqaq in ne ginad helta na ulum kemaqta. Ulum kema ne ginad helta na hel diqmo usid teq kam abebtanta Yesus Kraiss ulal iyaqta nab God in ne gimin sorid gwalisa in ne giwazind gibin ayahta tinegdaq. <sup>8</sup> Ne Yesus ahol a hi waqadmo anan ginad bilaqayta. Ne muran gimeb ahol a hi waqayta teq ne in anan helmo tihaqad ne ginad bilaq gigayinsa gigem dimun diq iyaqta. Ad ne gimugan dimun diq iyaqta na ago ne bilaq buggo biyab a hi iyaqta. <sup>9</sup> Yesus ulal iyaqta nab ne ginad helta na anon emsa ne os dimunta na tuwaq daqay.

<sup>10</sup> Kwaziqmo God ago nantut in God teq ne gilumsiheq ta giwaqdaqta na ago in bilaq yaqayta. Ad in God teq agem dimunta ne negad gidimun tondaqta na ago susumunad in gamuk na alulin nagun diq titay yaqayta. <sup>11</sup> Kraiss ago Bugaw in God ago nantut na giholib usad in Kraiss afaqan amo amo soreq teq abin ayahta waqdaqta na ago agamukan in nantut na giqezab eman gwahtiqaq. Sa nantut na in giqezab gamuk gwahtiqaqta na alulin nagunad in susumun yaqay, Nagah na kam

gineh teq gwahtiqaq? haq yaqay. Teq mat afaqan soreq abin ayahta waqdaqta na nog diq? haq yaqay. <sup>12</sup> Haqsa God in nantut na giqisihunan in ginad tiqemiy, Nagah i anan bilawta na i gimen a hi gwahtiqaqta haqiy. In ginad emiy, Mataw abeg gwahtiqaqta naqmo gimen gamukta i bilawta haqiy. An muran God in ago Bugaw Dimunta eman Heven-ib tihitim. Hitiqan mataw in God ne giyon dante wastitayta na awagamun dimunta a lehim Bugaw Dimunta ago zaway amalib ne tigibileniy. Gamuk dimunta gibileniyta na in nagah ayah diqta iyan angelo inaqmo huritgo ginad bilaqaqta.

*I God ago on mataw tawon diqta iyeq osgo haqad in i gililewun*

<sup>13</sup> Ari nazaq iyan tuteqmo ne daq dimunta emgo haqad ginad emad osiy. Osad ne gihol anononmo wamuziy. Abeg Yesus Kraiss ulalab boldaqta nab teq God agem dimunta negad tigidimun tondaq. Nazaq iyan ne nagah dimunta na amen emad ne ginadnad hi emad ginad helta amulikmo iyeq usan. <sup>14</sup> Ne onmin nan huritayta nazaq nog ne osiy. Kwaziqmo ne ginad a hi emad osad ne gigem atoranmo eraqsa ne daq meqinta amo amo em yaqayta nazaq ne ta hi emiy. <sup>15</sup> Mat ne gililewunna na in tawon diqta osaqta. Nazaq iyan ne gihol bunmo God ugad ne gigo luw os bunmo in tawon diq iyanmo. <sup>16</sup> Na ezaqgo God ago marib in kazaq bilam, Ya tawon diq iym osaiqta nazaq nogmo ne tawon iyeq osiy ham. *Wok Pris 11.44-45; 19.2; 20.7*

*God naw ayah diqmo amalib i gizayim giwam*

<sup>17</sup> Ne God anan biyim bilaqay, 'I Gimam' haqayta naqmo in on mataw bunmo araqqibmo gilum kemad gigo daq ahunibmo amenin negaqa. Negad in mataw asor gigomo a hi lehaqta. Nazaq iyan ne og ka anan i gigo diq hi haqad ne God abin wazinad ahaqenib osiy. <sup>18</sup> Osad ne nagah ka anadin emiy. Ne gimaman gigo hib daq asor samanta alulin haiqta ne waqim muzinsa daq nagan in ne giqirquran osiyta. Ossa God ne gizayim in ne giqamun na tihasa. Ta teq in gol teq silva amalib ne a hi gizayta. Na ezaqgo nagah nagan useq hiqiydaqta. <sup>19</sup> Nazaq iyan in Kraiss anedan tawon diqta naqmo amalib ne gizayim giqamun na hasta. Bilaqne mataw sipsip amidon aholib abatlan teq asulan araqq haiqta na anedan amalib God ayon tamaz emayta nazaq nog in am. <sup>20</sup> God kwaziqmo og eman a hi gwahtiqaqsa in Kraiss atowun eman ne gizayeq giwaqgo in osta. Osan teq muran kam abebtanta kab God in eman

in ne gilumsihgo haqad ulalabmo bo tugwahtim. <sup>21</sup> Gwahtiqaqim in ne tigilumsihan ne ginad emay, Helmo diq, God in Kraiss hodhodab wazan eraqan in abin ayahta tuqug haqay. Haqad ne God anan helmo haqad in teq ne gidimun tondaq haqad ne baq tunim tuqosay.

*I gimaqbaban ginan ginad bilaqan*

<sup>22</sup> Ari ne God ago gamuk helta muzinad ne gigemab gibusirinan usta na tihiqiyasa ne osayta. Ad ne gimileq a hi iyad ne gimaqbaban Yesus ago on matawta na ginan ginad bilaqaqta. Nazaq iyan muran ne gigemabmo diq an anan ginad bilaqsa osiy. <sup>23</sup> God-mo ne giqeman ne mufur a ta gwahtiqaqta. Teq ne ginen gimam giqeman ne osim teq moqayta nazaq nog in ne a hi giqamta. In ne giqeman ne mutur iym osad tuteqmo kuluwa-kuluwmo tuqos daqayta. Na ezaqgo God in ago gamuk awaz meqinta tuteqmo usdaqta naqmo amalib ne giqeman ne muturta gwahtiqaqta. <sup>24</sup> God ago gamuk bilam, On mataw bunmo bilaqne sishun nog ham. Teq in gibin bilaqne sishun azizorin nog ham. Sishun na miliyawaqta ham. Teq azizorin na muruwoqim tiqayta ham. <sup>25</sup> Ari Iyahta ago gamukmo teq kuluwa-kuluwmo usdaqta ham. *Aisaya 40.6-8*

An Iyahta ago gamuk na in Yesus awagamun dimunta mataw a lehim ne gibileniyta naqmo.

## 2

*Yesus in tituq dimunta tutimmo turaqta nazaq nog*

<sup>1</sup> Ari ne on mataw muturta tiqiyim iyan ne daq meqinta kagan bunmo hulosiy. An agem meqinta ugayta na teq an kat ugayta na teq gimileq iyayta na teq gigem meqniyaqta na teq an agilehunan bilaqayta nagan ne hulosa bugiy. <sup>2-3</sup> Iyahta ne gidimun tonsa ne gihol tiloyiniya. Nazaq iyan ne amun sosilta nog iyeq God ago sus dimun diqta giwitan neqim aseseq iyayta na ne tuteqmo neqnan ginad bilaqan. Ne sus na neqsa ne giwitan zilimeq tihemid teq God ne tigiwaqdaq.

<sup>4</sup> Iyahta Yesus in bilaqne tituq araqq kayeqmo turaqta nazaq nog. On mataw tituq na anan meqin haqad baymuziyta. Teq God anadib tituq na in dimunmo diq iyan in aholyon wamta. Nazaq iyan ne Iyahta Yesus ago hib boliy. <sup>5</sup> Boleq ne bilaqne tituq kayeqmo turayta nog iysa God in ne gimalib inmo aholyon lotu abitan tiqemdaq. Nazaq in emid teq ne in ago on mataw tamaz emayta tawon diqta iyeq osad ne Yesus Kraiss abinib ne gihol

tamaz nog God ugsa in ne gibiyad anad bilaqdaqta. <sup>6</sup> Na ezaqgo daq na agamukan God ago marib kazaq usaqta.

Ahol waqiy ham. Ya uliq Sayon-ib tituq araƣ tileyan turaq ham. Tituq na ya ahol waƣan in bit anon bunmo sordaƣta iyan ya inadib in dimun diq iysa ya iholyon wayta ham. An on mataw tituq na anan helmo haqayta na bunmo in ya imeb turad gimebay a hi woqdaq ham. *Aisaya 28.16*

<sup>7</sup> Nazaq iyan ne mataw helmo haqayta na ginadib Kraiss in dimun diqta. Teq mataw helmo a hi haqayta na ginadib Kraiss in bilaqne,

Tituq araƣ mataw bit wazayta anan 'meqin' haqad hunegan lahta nazaq noƣta. Ta teq muran tituq naqmo awaz meqniyim bit anon bunmo sorim turaqta. *Buk Song 118.22*

<sup>8</sup> Teq mataw ginad helta haiqta na gigo hib Kraiss in bilaqne,

Gig araƣ danib usad mataw gisen woltayan woqnan tonayta nazaq nog. Mataw in gig nab gisen woltayim in dan titnonta na muzeq ta lehgo hulosaqta. *Aisaya 8.14*

Mataw naqanta in God ago gamuk othasad in gisen gig nab wolhamim woqayta. Kwaziqmo God in giyon tibilaqan usta nazaqmo in emayta.

<sup>9</sup> Ari negmo teq God in ne gitowun eman ne in ago walmat tiqiyim osayta. Ad ne King ago mataw tamaz emayta nog iyim osaytamo. Osad ne God ago on mataw tawon diqta iyim ahaqenib osad ne in amomo anad muzinayta. Mebmebmo ne romiqab ossa God ne gililewunan ne romriq na hulosis bolim in ago saw anuwan dimun diqta nab tugwahtiqiyta. In kabiy aseseqta dimdimun diqta emaƣta na agamukan ne on mataw bunmo gibilen daqay haqad in ne gitowun emim aholyon giwamta.

<sup>10</sup> Kwaziqmo ne God ago on mataw a haiqta.

Teq muran ne in ago on mataw tiqiyiy.

Kwaziqmo God ne ginan anad a hi meqniyyaqta.

Teq muran in ne ginan anad timeqniyaq.

## **I on mataw God ago maror asan ban osayta na gimeb titnoneqmo luw osuq**

*I God ago kabibiy on mataw nog iyeq osuq*

<sup>11</sup> Ari ya iyognizmo diq, ya atoranno kazaq ne gibilenaiq. Ne on mataw gisen tob bolta nog iyeq og kab begbegta os nog iyiy. Ad ne og ka ago ginad meqinta na bunmo gileh ugiy. Ginad meqinta na in ne ginad helta inaƣ na wolaqta. <sup>12</sup> Ne titnoneqmo on

mataw God ago maror asan ban osayta na gimeb luwiy. Luwsa mataw na in ne gigo daq ahol waqad in ne gigilehunan bilaqad ginan meqin haqad oseƣ teq abeb in ginad tiqem has daqay. God in on mataw hazizirib qiƣemnan boldaqta nab teq mataw asan banta na in ne gigo daq dimdimunta in ahol waqiyta na anadin a ta emad in God abin tiqiluw daqay.

<sup>13</sup> Ari ne Iyahta anadin emad gavman bunmo qiƣez huritiiy. Rom gigo king in danmeb diqta iyim iyan ne in aqez muziniy. <sup>14</sup> Muzinad ne gavman amikmikta king qiƣeman osayta na qiƣez huritiiyimo. Na ezaqgo maror amikmikta nagan in mataw daq meqinta emayta na faq neggo osayta. Ad in mataw daq dimunta emayta na gibin iluwgo osaytamo. <sup>15</sup> God anad ne daq dimdimunta amalib mataw ginad haiqta gamuk samanta negayta na qiƣez tuwasih daqay. <sup>16</sup> Ne mat araƣ ago kabibiy mat nog iyeq hi luw osiy. Ta teq ne ginad kazaq hi emiymo. I mat araƣ diq ahaqenib a hi osad iyan i daq hihiq ginadibmo tiqemam haqad ne ginad nazaq hi emiy. Haiqgam. Ne ginad kazaq emiy, I mat araƣ ahaqenib a hi osad iyan i God amomo ago kabibiy on mataw iyim osauqta haqiy. <sup>17</sup> Ne on mataw bunmo giwaziniy. Ad ne gimaqba-ban Yesus ago on matawta na bunmo ginan ginad bilaqanmo. Teq ne God rabunad Rom gigo king na abin waziniymo.

### *I Kraiss asen muzad afaqan soruq*

<sup>18</sup> Ari ya kabibiy mataw samanta tigi-bilennan. Mataw ne gibunib turad giwamuza ne in gihaqenibmo osad girabunad qiƣez muzin bugiy. Ya mataw dimdimunta ne gibunib turad gilowan tonayta na gimomo ginan a hi bilaqaiq. Haiqgam. Mataw meqinta kabiy afaqanta negayta na inaƣmo gihaqenib ne osiymo haqaiq. <sup>19</sup> Osad ne God anad muzinad kabiy dimunmo emiy. Emsa ta ne gigo aseseqta na in ginadibmo ginolid ne santitiiy na samanta sorsa God agem dimunta tineqdaq. <sup>20</sup> Na ezaqgo ne daq meqinta emeq ago asantitiiyin sorad nan a hi bilaqsa nagaqgo God naw dimunta tineqdaq? Ari ne kabiy anononmo emsa ne gigo aseseqta samanta ne ginolid, ne qiƣez hiiqiyeq afaqan na sorsa God agem dimunta negad in ne tigidimun tondaq.

<sup>21</sup> Ne dante dimunta naqmo muzingo haqad God in ne gililewunta. Na ezaqgo Kraiss in nazaqmo daq araƣ meqinta a hi amta teq in ne gimen santitiiy sorta. Sorad in anad ne in asen muzeq in daq em nogmo ne tiqem daqaymo haqad in ago daq nawa na ne qiqisihunta.

<sup>22</sup> In daq arağ meqinta a hi am. Ad in gamuk arağ katiyta a hi bilammo. *Aisaya 53.9*

<sup>23</sup> Mataw gamuk meqinta ugsa in amenin emim gamuk meqinta a hi nag. In santitiy sorad teq in ago bab na gimeqin tongo a hi bilam. Haiqqam. In ahol bunmo God ago hib emad in anad am, God teq mataw bunmo gigo daq anononmo tuqulum kemdaq ham. <sup>24</sup> Krajs ayib dom wolani in i gigo daq meqinta na bunmo inmo ahol ugim afağan na sorad tur. In i giwastitayid teq i daq meqinta hulosa tayeğ tuteqmo daq titnonta emam haqad in afağan na i giyon sorta. In santitiy sorim anedan womta na amalib ne giqeman tidimniyiy.

<sup>25</sup> Kwaziqmo ne bunmo bilaqne sipsip an hulosisim haresmo le luw nog iyiyta. Teq muran ne muleqim Sipsip Ginamren Diqta na ago hib ta bolan in ne giwamuzim tuqosaqta.

### 3

#### *On mataw an tuwaqiyta gimen gamuk*

<sup>1</sup> Ari ne on mat tuwaqiyta na, ne gidugniz gihaqenib osiy, kabibiy mataw in gigo aseseqta gihaqenib osayta nazaq. Osad ne gidugniz asor God ago gamuk a hi huritayta na ne in gamuk arağ a hi gibilensa in ne gigo luw os dimunta naqmo ahol waqad ginad buliyeq God ago hib tubol daqay. <sup>2</sup> Na ezaqgo in ne gibiyta ne titnonimmo luwad teq ne in giwazinim gihaqenibmo osayta naqmo in ginad tubulydaq. <sup>3</sup> Ad ne gihol awağan dimniydaq haqad gisan amomo hi balaw toniy. On asor in gisan amomo anadin emad in giqensan otsireqad balaw dimdimunta gol-ibta wazad tubusan amo amo giholib emayta. <sup>4</sup> Ari negmo teq ne gimugan inaqmo balaw tonid ne giwağan dimniy hasan. Ne gihol wazid woqsa tok nemeq kiskismo luw osiy. Balaw nazaqta a hi hiqiydaqta teq in God ameb dimun diqta. <sup>5</sup> Kwaziqmo on dimunta God anadin diq em yaqayta na in balaw naqanta amalib gihol balaw tonad in gidugniz gihaqenib os yaqayta. <sup>6</sup> Ne Sara anadin emiy. In aduw Abraham ahaqenib osad anan yaqgo ayahta haqayqta. Ari ne nagah arağ ago a hi rabad daq dimdimunta nagan tiqemad teq ne Sara-mo amigniz nog tiqiy daqay.

<sup>7</sup> Ad nazaqmo ne mataw aw tuwaqiyta na, ne ginad em hasad ne gigo on nenaq osiy. On in giwaz meqin a haiqta. Nazaq iyan ne giqonan giwazinad gilowan toniy. Ad ne ginad kazaq emiy, God in i gigo on ka inaqmo aqem dimunta negan in teq ago os dimunta in giholyon tuwaq daqaymo haqiy. Haqad ne giqonan nenaq nazaq wastitayeğmo osad teq ne God inaq gamuk emsa in ne giqez tuhuriddaq.

#### *Tuteqmo i on mataw bunmo gimen daq dimunta emuq*

<sup>8</sup> Ari yaqgo gamuk ta asor usaqta na in kazaq. Ne bunmo gigem amulikmo iyeğ osad arağibmo afağan soriy. Ad ne an anan ginad bilaqsa an alowan tonad osiy. Teq ne gihol wazid woqsa luwiy. <sup>9</sup> Mataw ne gimeqin tonsa ne amenin hi emiy. Ad in gamuk meqinta negsa ne amenin nan meqinta hi negiyimo. Haiq. Mataw ne gimeqin tonsa ne God bulonid in mataw na gidimun tonan. Ne daq nazaq emgo haqad God ne gihiluwenta. Ne nazaq emsa teq God ne tigidimun tondaqmo. <sup>10</sup> Na ezaqgo,

Mat arağ in os dimuntab osnan anad emad, teq in og kab osad kam dimunta ahol waqnan haqad, in gamuk meqinta hi bilaqan. Ad in aqezab nan katiyta arağ hi gwahtiğanmo. <sup>11</sup> In daq meqinta bunmo gileh ugad in daq dimuntaqmo muzan. Ad in aholtuw bulad on mataw bunmo nenaq kiskismo osad in daq na hi hulosan.

<sup>12</sup> Na ezaqgo, Iyahta in on mataw titnonta gibiy kemaqta. Ad in adek emad in mataw na gigo susumun huritaqtamo. Teq Iyahta in on mataw daq meqinta emayta na gigo babmo diq. *Buk Song 34.12-16*

#### *I daq dimunta emad ago afağan waqamta na dimunmo*

<sup>13</sup> Ne daq dimdimunta emnan giwaz diq meqniysa nog teq ne giwazid woq daqay? <sup>14</sup> Ari ne daq dimunta emsa mataw santitiy negsa ne ginad hi meqniyan. God teq ne gidimun tondaqta na ago ne tidimniyim osayta. Nazaq iyan mataw na ne gimeqin tonsa ne girabunad gihol afağan hi iyan. <sup>15</sup> Teq ne gigemabmo diq Krajs abin wazinad ossa in amomo ne gigo Iyahta iyeğ osan. Ad God teq ne tigiłumsihdaq haqad ne amen emad luwsa mataw asor ne ginad helta na ago susumun negid ne in giqez amenin emgo ginad em haseqmo luwiy. <sup>16</sup> Teq ne in gigo susumun na amenin emad ne gihol wazid woqsa kiskismo gibileniy. Ad ne gigem God ameb titnoneqmo ussa ne Krajs asen muzinad daq dimunta emiy. Ne nazaq emsa teq mataw ne gibilawunim gamuk meqinta negayta na in ne gibiyad gimebay tuwoqdaq. <sup>17</sup> Na ezaqgo God anad bilaqid teq i daq dimunta emad ago afağan tisoram. Na in dimunmo. Ari i daq meqinta emad ago afağan soramta na in meqin diq.

#### *Krajs i giwaqgo haqad moqim ta eram*

<sup>18</sup> Krajs in on mataw gigo daq meqinta walemnan haqad in nazaqmo santitiy sorim tumom. Moqim in santitiy na a ta hi sordaq. In mat titnonta teq in mataw meqinta gigo ban waqim in gimen mom, in

i giwaqeq giqad God agerab lehnan haqad. Mataw in asanmo wol eman momta. Teq God in awitan wazan ta eram. <sup>19</sup> Teq in awitan naqmo lehim on mataw giwitan giqirquran osiyta na gamuk gibilan. <sup>20</sup> On mataw na in kwaziqmo Nowa ago kamub God ago gamuk othasad osiyta. Kam nab Nowa muy emad luwsa God in mataw na ginad buliygo haqad gibaq tunim sisaqmo osta. Teq haiqgam. On mataw kabemmo haiq 8 nazaqmo muyib gwalim ossa uq tihitim. Hitiqim muy na sorsa God yuw naqmo amalib Nowa asenlul nenaq gilumsihan in dimunmo osad a hi moqiy.

<sup>21</sup> Ari daq na in bilaqne muran ne yuw huzayta na adulan nog. Yuw huzgo adan na in ne gilumsihsa ne a hi moqaytamo. Teq ne yuw huzim gisanib ginumlan hiqiytaqta nazaq a haiq. Naqmo God in Yesus Kraihs hodhodab wazan ta eramta na ago ne anan helmo tihaqim ne gigem God ameb tidimniyim usad iyan ne God anad muzinim yuw huzayta. <sup>22</sup> Yesus Kraihs Heven-ib gwalehim in God aben aqabun ban osaqta. Ossa angelo teq bugaw asesta zaway amo amo wazayta na teq nagaq giwaz meqinta gibin inaq iyim maror gan osayta nagan bunmo in ahaqenib tiqiy bugim osay.

## **Gilumwaq ayahta Yesus ago on mataw giholib gwahtiqa in santitiy soriy**

### 4

*I gigem kwaziqta ago daq bunmo hulosuq*

<sup>1</sup> Ari Kraihs in aholib santitiy ayahmo sorta. Nazaq iyan in anad usta nazaqmo ne ginad ussa ne giwaz meqniyeq osiy. Na ezaggo mat Yesus santitiy sorta nazaq in aholib santitiy soraqta, mat naqanta in ahol wasihim daq meqinta a ta hi emaqta. <sup>2</sup> Mat nazaq emaqta na in agem kwaziqta atoranno eraqad anad hureqsa in muzinnan anad a hi bilaqta. In og kab osad God amomo anad muzinad oseq le in tumoqdaq haqad in anad emaqta. <sup>3</sup> Kwaziqmo ne Kraihs anan helmo a hi haq yaqayta nab ne on mataw God ago maror asan ban osayta na gigo ginad meqinta muzinad ne daq hihiq na dimunmo tiqemiy. Ari muran ne daq meqinta nagan ta hi emiy. Mataw asan banta na in daq giholib bilaqta naqmo emad osayta. Osad in nagaq haresmo uteyayta teq in yuw atoranta uluwim gifaqin hulosaqta teq in giyogniz nenaq garak ayahmo emayta teq in humab wolim yuw uluwad daqdaq emayta teq in God ago gunun othasad god katiyta giyon lotu emayta. <sup>4</sup> Teq muran in daq hihiq haresmo em

titursa ne nenaq araqiab humab wolim daq meqinta nagan a ta hi emayta. Sa in nazaq ne gibiyad in giholib turuh nemsas ne gibilawunayta. <sup>5</sup> Teq mat mataw kayeqmo osayta teq mataw tumoqiyta inaqmo bunmo gigo daq ulum kemeq amenin negdaqta amatin na in ahol tuwastitayim hazizir emgomo tiqiyim nawa osaqta. Abeb teq mataw ne gibilawunayta na in nagaqmo ne gibin nazaq meqin toniyta na ago in mat na tubulon daqay. <sup>6</sup> Daq alulin naqmo ago on mataw tumoqiyta na a hi moqadmo in Yesus awagamun dimunta na huritiyta. Huritim ossa teq God in gigo daq gilum kemim giyon bilaqan in tumoqiy, mataw bunmo moqayta nazaq. Ta teq in gamuk dimunta na tuhuritim in giwitan kayeqmo osayta, God kayeqmo osaqta nazaq.

*God naw igta na akabiyan I anonon diqmo emuq*

<sup>7</sup> Ari nagaq bunmo hiqiydaqta akaman na sinsin tiqiy. Nazaq iyan ne giholib anononmo wamuzad ne ginad em hasad God inaq gamuk emiy. <sup>8</sup> Teq daq ameb diqta ne em daqayta na ne tuteqmo an anan ginad bilaqsa osiy. Na ezaggo mat in ago walmataw ginan anad bilaqsa in mataw na gigo daq meqinta kabemmo walemad anadin a ta hi emaqta. <sup>9</sup> Teq Yesus ago on mataw ne gigo bitab bolsa ne gilowan tonad nan kabemmo hi bilaqiy. <sup>10</sup> Ne amulik-mulikmo naw waqiyta nazaqmo ne an ulumsihiy. Ne nazaq toneq teq ne God ago naw amo amo in samanmo nagta na anononmo tuwamuz daqay. <sup>11</sup> Mat ara q in gamuk bilaqgo anawun waqsun, in God ago gamukmo diq bilaqan. Ad mat ara q in mataw gilumsihgo anawun waqsun, in God zaway ugaqta naqmo amalib mataw gilumsihan. Ne Yesus Kraihs abinib ne gigo naw akabiyan nazaq emad God abin emid ayah iyan. In amomo abin ulilibmo diq ussa in nagaq bunmo gigo Iyahta iyeq kuluwa-kuluwmo osan. Hel diqtaqmo.

*I Yesus afaqan sor nog i sorad ginad dimniyan*

<sup>12</sup> Ari ya iyognizmo diq, muran afaqan meqin diqta ne giholib gwahti qim faq nog ginoysa ne ritenad ginad hares emad “Ka naga daqin diq i giholib gwahti qaq?” nazaq ne ginad hi emiy. Afaqan na ne gilum waqgo giholib gwahti qta. <sup>13</sup> Gilumwaq na ne gigo hib gwahti qsa ne santitiy Kraihs sor nogmo ne sorayta. Nazaq iyan ne ginad dimniyan. Ne nazaq ginad dimniysa afaqan sorid teq abeb Kraihs abin ayahta inaq ulalab bo gwahti qsa ne ahol waqad ginad dimniysa gigem dimun diq i ydaq. <sup>14</sup> Kraihs abin ne giholib usaqta na ago mataw gamuk meqinta negayta. Nazaq



iyane ne tidimniyim osayta. Na ezaqgo God ago Bugaw Dimunta abin ayah diqta inaqta na in ne giholib tuqusaqta. <sup>15</sup> Helmo ne mat araƣ wol emeq o ne nagaƣ araƣ rin toneq o ne daq araƣ meqin diqta emeq o ne mataw gigo kabiy meqin toneq, ne daq nagan ago asantitiyin waƣad ne gimebay tuwoqdaqta. Teq ne daq nawa ya teko ginan gibilenta na araƣ diq emeq ago mebay hi waqiy. <sup>16</sup> Ari Kraiƣ abin ne giholib ussa na ago ne santitiy waƣad teq ne gimebay hikidik woƣan. Haiqgam. Kraiƣ abin ne giholib usaqta na ago ne ginad dimniysa ne Godmo abin iluwad osiy.

<sup>17</sup> Ari muran God in mataw gigo daq gilum kemdaqta akaman na tubol. Bolan in hazizir na alulin emad danmeb inmo ago on matawta gigo daq ulum kemeq amenin tinegdaq. Negeq hulosaƣ in mataw God ago gamuk dimunta gileh ugad a hi huritayta na gigo hib hazizir na emid tihiqiydaq. Ari God danmeb inmo ago on mataw gilum kemeq faq negsa teq ta mataw nan othasayta na in ezaq diq gihol loyin daqay? <sup>18</sup> Teq, God ago on mataw in God ago os dimuntab gwahtiƣgo afaƣan diq iysa, ta mataw God gileh ugad daq meqinta emayta na in teq ezaq gwahtiƣ daqay? *Gutpela Sindaun 11.31*

<sup>19</sup> Nazaq iyan mataw God anad muzinim santitiy waƣayta na in gihol God abenab emad teq in daq dimuntaqmo emad osiy. God inmo i giqamta teq in i gilumsihnan bilamta nazaqmo diq in tiqemdaq.

## 5

*Yesus ago on mataw gigo danmebta nagan in gigo walmataw gilowan ton daqay*

<sup>1</sup> Ari yaqmo Yesus ago on mataw gigo mat danmebta araƣ teq ya imebmo diq Kraiƣ santitiy sorsa ahol wayta. Teq abeb God ulalabmo ago on mataw gidimun tonad gibin dimunta negsa ya inaqmo ibin dimunta tuwaqdaiqmo. Nazaq iyan ya ne glikmanib mataw danmebta na atoranno kazaq gibilenaiq. <sup>2</sup> Ne ginad bilaqsa God ago sipsip anononmo giwamuziy. Luweq mataw ne gituw bulsa ne kabiy na emad gituw tihiqiy daqay. Teq ne mani waqgo kabiy na hi emiymo. Haiqgam. Ne kabiy na gihol bunmo ugad ne ginad bilaqsa emiy. <sup>3</sup> Godmo ne gigo sipsip na ne gibenab giqamta. Nazaq iyan ne in giwamuzad ne igmo ag haqad gibayid hi woqiy. Haiqgam. Ne daq dimuntaqmo ne gigo sipsip giqisihuniy. <sup>4</sup> Ne nazaq emsa teq Sipsip Ginamren Danmeb Diqta na bo ulalab tugwah-tiqad in ne kabiy emiyta na anawun balaw

araq tutimmo dimunmo usaqta na tinegdaq. Negid ne waqeq king gigo balaw nog gifaqinib emid mataw bunmo ne gibiyad gibin tiqiluw daqay.

*I gihol God abenab emuq*

<sup>5</sup> Ari on mataw ta asor na bunmo ya kazaq ne gibilennan. Ne mataw danmebta na gihaqenib iyeq osiy. Teq ne bunmo gihol abin wazid woqsa ne an alowan tonad osiy. Na ezaqgo,

Mataw in gimo gihol abin wazan eraqsa God in geg negaƣta. Teq mataw gihol wazan woqsa God in agem dimunta negaƣta. *Gutpela Sindaun 3.34*

<sup>6</sup> Nazaq iyan ne gihol wazid woqsa God ago zaway ayahta na ahaqenib osiy. Ossa le kam inmo atowun amta nabmo teq in ne gibin wazid tiqeraqdaq. <sup>7</sup> God anad negsa ne osayta. Nazaq iyan ne gigo afaƣan teq nagaƣ bunmo ne anan ginad meqniyaqta na ne God ugid in soran.

<sup>8</sup> Ne worworeq osad gihol asawan woltayad osiy. I gibabun Satan in bilaqne laiyon araƣ atoranno gayonad on mataw gineqgo ginagunad luwaqta nazaq nog in luwaqta. <sup>9</sup> Teq ne ginad helta na amalib giwaz diq meqniyeq ossa laiyon na ne giwaznan tonsa ne othasid lehan. Ad ne ginad emiy. Ne gimaqbaban Yesus ago on mataw og saw bunmo osayta na in inaqmo ne afaƣan sor nog in soraytamo haqiy. <sup>10</sup> God agem dimunta negad ayahmo gilumsihna ne afaƣan sorad a hi woq daqay. Ne in inaq ago os dimunta ahiqiy haiqta nab garabmo os daqay haqad in ne gililewunan muran ne Kraiƣ aholib soqotim inaq tuqosay. Nazaq iyan ne kam asitmo kab afaƣan tisorid teq inmo ne gisen baysihad zaway negsa ne dimniy haseq giwaz meqniyeq titur daqay. <sup>11</sup> God in nagaƣ bunmo gigo Iyahta iyeq in zaway bunmo wazad kuluwa-kuluwmo osan. Hel diqtaqmo.

*Gamuk asor*

<sup>12</sup> Ari gamuk asimqanta nawa ya bilaqim bolta na ya Sailas bulonsa in ne gimen mar tonta. Ya inadib mat na in ya iholyowmo diqta. God agem dimunta negaƣta na ago agamukanmo diq ya kawa ne gigem zaway uggo haqad tigibilen. Gibilennan ne gamuk ka muzinad giwaz meqniyeq turiy.

<sup>13</sup> Ari Yesus ago on mataw uliq Babilonib\* kab osayta na in ne zeq dimun tinegay. God in on mataw na inaqmo gililewunim aholyon gitowun eman in ne gimaqbaban iyim osayta. Sa Mak inaqmo ago zeq dimun eman ne gigo hib lehaqmo. Mat na in bilaqne ya itatinmo diq noqta. <sup>14</sup> Teq ne

\* 5:13: Pita in uliq Babilon hamta na in gamuk awowun hulim Rom anan nazaq biyta.

nazaqmo an anan ginad bilaqsa an zeq  
dimun ugiymo.

Ari ne on mataw Krais aholib soqotim  
inaq osayta na, ne bunmo gigem kute  
nemsa osiy. Nawaqmo.

## 2 Pita o Sansandek gigerta Pita mar tonta Gamuk ameb lehaqta

Aposel gigo kamub Yesus ago on mataw kabemmo ginad em yaqay, Yesus hidmo ta boldaq haq yaqay. Haqsa teq haiq. Yesus hidmo a hi bolsa mataw danmebta na tumoq bug yaqay (2 Pita 3.4). Sa mataw katiyta asor eraqim bilaq yaqay, Ahol waqiy haq yaqay. Nabag Aposel bilaqiy, Yesus ta boldaq haqiy na in gimileq iyim ginadibmo gamuk na bilaqiy haq yaqay. Yesus a ta hi boldaq daqag haq yaqay. Ad Aposel bilaqiy, Kam abebtanta nab Yesus boleq hazizir emad on mataw bunmo gilum kemdaq haqiyta na in a hi gwahtiqdaqmo haq yaqay. Haqad mataw katiyta na in Aposel giqez na wazan woqsa in gimo gibin eman danmeb iyyaq. In ginad em yaqay, Nagah ara q i rabunamta na haiq tiqiy haq yaqay. I yuw atoranta uluwad an haresmo hureqeq inaq usad teq daq naqanta bunmo i tiqem bugamta haq yaqay.

Haqsa teq sansandek ka bilam, Mataw suleq katiyta bilaqay na in teq amenin meqin diqta God abenab tuwab daqay ham. Ne mataw na giqez hikidik huritiy ham. Aposel gamuk ne gibileniyta naqmo amomo ne waz naqmo hiqiyeq osad teq ne God ago hurit kemad ne Iyahta Yesus Kraiss ago tuhurit kem daqaymo ham. Aposel in gimebmo diq Yesus ahol waqsa Yesus suleq negsa in huritiyta ham.

Teq sansandek ka bilam, Helmo diq, Yesus teq ta boldaqta ham. Teq in hidmo a hi bolaqta na alulin kazaq ham. Ne gigo ara q aban iygo God anad a hi bilaqag ham. In anad ne bunmo ginad buliyeq gigo daq meqinta gileh ugiy haqad in ne gibaq tunim sisaqmo osaq ham (2 Pita 3.9).

### I daq dimdimunta emad mataw meqinta na giqez othasuq

<sup>1</sup> Yaqmo Saimon Pita, ya Yesus Kraiss ago kabibiy matta teq ya in ago Aposel-mo.

Yesus Kraiss-mo in i gigo God iyim in i gilumsihim giwamta. In daq titnonta emim in ago suleq i Aposel igta naqmo in ne nagtamo. Negan i ginad helta usaqta nazaq nogmo ne ginad ussa iyan ya ne gimen sansandek ka mar tonim eman leh negaq.

<sup>2</sup> Ne God teq i gigo Iyahta Yesus inaq gigo tuhurit kemiyta. Nazaq iyan in gigem dimunta negsa ne gigem kute nemaqta na in ne gigo hib ayahmo diq gwahtiqan.

### God aholyon i gitowun am

<sup>3</sup> Ari God in ahol abin ayahta na teq in ago daq dimdimun diqta na igid i gigo tiqiydaq haqad in i gililewunta. Gililewunan i in ago tuhurit keman iyan in ago zaway ayahta na i giholib tiqam. Eman i titnoneqmo God ago daqib luwamta tiqiyim osauqta. <sup>4</sup> I on mataw nazaqta tiqiyman God ago gamuk aseseqta dimdimun diqta na bunmo in i gigo tiqiyim usaqta. Gamuk nab God in ago on mataw bunmo gidimun tonnan haqad hel diqmo bilamta. Ad in anad ne mataw gigem atoranno eraqsa nagah haresmo utetad og kab timeqniyim osayta na ne gihuloseq dimunmo os daqay haqaqta. Ne nazaq osad teq ne inmo ago zaway teq ago daq bunmo waqeq giholib emeq in os nogmo ne os daqay haqad in anad emaqta. Ne nazaq diq iyeq os daqay haqad in ago nagah dimdimunta nawa ya teko ginan tibilayta na in ne nagta.

<sup>5</sup> Daq alulin naqmo ago ne giholtuw bulad daq dimdimunta kazaq emiy.

Ne Yesus ago suleq huritim anan helmo haqiyta na ne ulumsihad daq helta naqmo ne emiy.

Ad ne daq helta emayta na ulumsihad ne God ago hurit kemiyimo.

<sup>6</sup> Teq ne God ago hurit kemayta na ulumsihad ne gihol anononmo wamuziyimo.

Ad ne gihol anononmo wamuzayta na ulumsihad ne afaqan sorad gituw hi hiqiymanmo.

Teq ne afaqan sorad gituw a hi hiqiydaqta na ulumsihad ne God ago daq dimdimuntab luwiymo.

<sup>7</sup> Ad ne God ago daq dimdimuntab luwayta na ulumsihad ne maqbab os nog iyad an alowan toniyimo.

Teq ne an alowan tonayta na ulumsihad ne an anan ginad bilaqsa osiyimo.

<sup>8</sup> Ne daq dimunta nawa nagan bunmo waqeq giholib emid in ne gilikmanib ayahmo ussa teq ne i gigo Iyahta Yesus Kraiss ago hurit kemayta na in samanmo akabiyman haiqmo a hi usdaq. Haiqgam. Ne ginad dimunta na anon kabemmo diq tisorqendaq. <sup>9</sup> Ari teq mat aholib daq dimdimunta nagan a hi usaqta na in ame hiqiyim nagah anogibmo diq usaqta na in ahol a hi waqaqta. Mat nazaqta na kwaziqmo God in ago daq meqinta walem bugan in God ameb ahol abusirinan tihiqiyta. Hiqiyman muran in na ago adek zizalan anadin a ta hi emaqta. <sup>10</sup> Nazaq iyan ya imaqbaban, ne gituw diq buleq daq dimdimunta nagan em bugiy. Em bugsa teq God ne gilumim aholyon giwamta na abin ne giholib oy soqoteq tuqus tutdaq. Ne nazaq emad teq ne a hikidik woq daqay. <sup>11</sup> Ad ne gibin dimun diqta inaq iyeq ne i gigo Iyahta Yesus Kraiss, mat i

gilumsihim giwamta na ago maror kuluwakuwmo usdaqta na aduganib ne le tugwahti q daqay.

<sup>12</sup> Na ago iyan ya gamuk nawa teko tibibilenta na ya kam bunmo a ta gibilen tondaigta. Helmo, ne gamuk na ago ginad tiqem hasiyta. Ginad em hasad ne gamuk helta na amalib zaway diq iyim titurayta. <sup>13</sup> Ta teq ya a hi moqad isan ka kayeqmo osad ya ne ginad enqenunsa ne yaqgo gamuk ka anadin tuteqmo tiqem daqay. Ya nazaq emdaigta na ya inadib in daq dimun diqta haqaiq. <sup>14</sup> Na ezaqgo, ya inad emaiq, ya kam asitmo a ta oseq teq ya isan ka tuhulosdaiq haqaiq, i gigo Iyahta Yesus Krai isiqisihunta nazaqmo. <sup>15</sup> Nazaq iyan ya iholtuw diq bulad gamuk ka ne tigibilendaig. Ya nazaq emeq abeb ya tumoqid teq kam bunmo ne yaqgo gamuk ka anadin emad tuqos daqay.

*Aposel God anuwan Krai aholib oysa ahol waqiy*

<sup>16</sup> Ari i gigo Iyahta Yesus Krai azawayin inaq ame amebta bolta na awagamun i ne tibibilenta. Teq i wagam samanta mataw ginadibmo yuw hunegad bilaqayta na i muzinim Yesus awagamun na a hi gibilen. Haiqqam. I gime anonabmo diq Yesus ahol anuwan ayahta na ahol wawta. <sup>17</sup> Yesus Amam God in atatin wazinim abin ayahta ugad in saw anuwan lul ara q diqta na aduganib aqez gwahtiqim Yesus anan bilam, Ka ya itatin ham. Ya in anan inad bilaqsa igem dimun diqta ugaiqta ham. <sup>18</sup> I Yesus inaq garah abigmanib God agerabmo diq ossa God aqez na Heven-ib hitiqsa i huritta. <sup>19</sup> Huritim muran i nantut gigo gamuk in kwaziqmo God ago marib mar toniyta na anan helmo tihaqauqta. Ne nantut gigo gamuk na anadin diq emad teq ne dimunmo tuqos daqay. Na ezaqgo gamuk na bilaqne lam saw aromriq inaqtab oy nog iyaqta. Teq ne gamuk na anadin emad anuwanib osad le Yesus ta boldaqta nab ne tidimniy daqay. Kam nab in ne ginad emid tihastitay bugdaq. Hastitaysa teq in ago gamuk na ne gigemab oyad tuqusdaq. Bilaqne saw hastitaysa ulig boy gabolim oyad turaqta nazaq nog.

<sup>20</sup> Ari teq nagh ameb diqta ne ginad em has daqayta na in kazaq. Nantut kwaziqmo God ago gamuk bilaqiyta na, mat ara q in anadibmo gamuk na alulin a hi bilaqdaq. <sup>21</sup> Na ezaqgo God ago nantut na in ginadibmo gamuk na eman a hi gwahtimta. Haiqqam. God ago Bugaw Dimunta inmo mataw na ginad wamuzsa in God gamuk nagta naqmo agamukan bilaqiyta.

## 2

*Mataw meqinta Yesus ago on mataw ginad walebolay*

<sup>1</sup> Ari kwaziqmo nantut katiyta asor Isrel gilikmanib gwahtiqiyta nazaqmo teq mataw asor in ne gilikmanib eraqeq suleq katiyta on mataw tigibilen daqaymo. In ulilemeqmo gamuk katiyta bilaqad in ne gigo on mataw asor ginad helta na tigimeqin ton daqay. Ad in Mat Iyahta in giza-yim giwamta na gileh tuqug daqaymo. In daq nazaq emad oseq hidmo in timeqniy daqay. <sup>2</sup> Ta teq in osadmo in gigo daq gihol bilaqayta na amo amo ne gigo on mataw giqisihunsa kabemmo in tumuzin daqay. Muzinsa mataw God ago maror asan ban osayta na in gibiyad in gamuk helta adan-teqin na anan meqin tihaq daqay. <sup>3</sup> Mataw suleq katiyta bilaqayta na giholib nagh utet adan naqmo ayahmo usdaqta. In nan katiyta negad in ne gigo mani teq ne gigo nagh haresmo tuhureq daqay. Teq kwaziqmo God mataw na giyon bilam, In teq timeqniy daqay hamta na in samanta a hi usaqta. Haiqqam. God in mataw na gimeqin tonnan haqad ahol tuwastitayim nawa giba q tunim osaq.

<sup>4</sup> Ne ginad emiy. Kwaziq diqmo angelo asor daq meqinta eman God gilowan a hi ton. Haiqqam. In giwazim saw meqinta nab gihunegan wolehan in am awaz meqin diqta amalib giqirquran in saw aromriq inaqtab nab tuqosay. Osad in nawa God ago hazir ayahta na amen emay.

<sup>5</sup> Teq kwaziqmo on mataw God gileh ugsa in gihulosan a hi osiyimo. Haiqqam. In uq eman hitiqim on mataw meqinta na bunmo tiginam. Teq uq na a hi hitiqsamo Nowa in on mataw na God anad muzingo haqad gibilenyaqta. Nazaq iyan uq na hitiqim mataw tigineqsa God in Nowa teq on mataw ta asor <sup>7</sup> nazaq nenaq gilumsihim giwagan in a hi moqiy.

<sup>6</sup> Teq God in uliq giger Sodom ayow Gomora inaq gidimeran oy bugan gisawnib faq abekoq naqmo us. In nazaq uliq giger na gimeqin tonan mataw na gihol amagin tartayan in gisesan ginaynayniz asor og kab a ta hi osayta. An daq nawa gwahtimta nagan gigo hib i ginad tiqem hasauqta. Abeb on mataw God gileh ugayta na bunmo gigo hib afaqan nazaqmo teq tugwahtiq-daq haqauqta.

<sup>7</sup> Teq uliq giger na meqniysa God in mat titnonta anan Lot haqayta na ulumsihim waqan in a hi mom. Lot uliq Sodom-ub osad in mataw nan a hi hurit yaqayta na gigo daq gihol bilaqayta naqmo em titursa gibiyad in ahol afaqan diq iyyaqta. <sup>8</sup> Helmo, mat titnonta na Sodom gilikmanib

osad kam bunmo in gigo daq meqinta nagan ahol waqad teq in gigo gamuk meqinta na in hurityaqmo. Mat na agem God ameb titnonim usyaqta teq in mataw na God ago gunun othassa gibiyad in anad ayahmo meqniysa ahol meqin diq loyinyaqta.

<sup>9</sup> Ari Iyahta in Lot ago hib daq amta na i anadin emad ginad emuq. Iyahta in ago dauh giwamuzgo tuhurit kamta haquq. Daq gilum waqta na in Iyahta ago dauh giholib gwahtiqa in gilumsiheq ta giwaqdaqta. Ad in mataw daq meqinta emayta na giwamuzgo tuhurit kamtamo. In mataw na giwamuzad faq negsa le hazizir abebtanta na akaman tugwahtiqaq. <sup>10</sup> Gwahtiqaq mataw God ago nan a hi huritad gigem atoranmo eraqsa daqdaq emad gibusirinan meqinta giholib usaqta na in Iyahta ago faq meqin diqmo tuwaq daqay.

Ari mataw suleq katiyta bilaqayta na ginadibmo luwad in a hi rabad in gigo daq hihiq na atoran diqmo emayta. Ad in bugaw aseseqta meqinta dimunta inaqmo gibilawunna a hi rabayta. <sup>11</sup> Teq God ago angelo giwaz meqinta na in nazaq a hi emayta. In mataw na giquiryamim in gigo zaway ayah diqta teq in Iyahta ameb bugaw aseseqta na a hi gibilawunayta. Haiqqam.

<sup>12</sup> Mataw meqinta na in bilaqne karuw ginad haiqta nog. In daq gisanib usaqta naqmo muzinayta. In ginen giqemiyta nabmo iyim bo muran kam kab in saman diqta giwazeq ginol emgomo iyim luwayta. In naghah aseseqta kabemmo ago a hi huritim in naghah nagan gibilawunayta. Mataw karuw kwasikta ginol eman moqayta nazaqmo God in mataw na ginol emid tumoq daqaymo. <sup>13</sup> Moqeq teq in daq meqinta emad luwiya na amenin waqad timeqniy has daqay. Mataw na giholmo in ginad wamuzsa in zeqabmo daq hares gihol bilaqta naqmo emnan ginad diq bilaqta. In ne gigo didaq neq ahumabnib gimileq iyad nenaq osad in haresmo ek tonad daq hihiq emad gihol bilaqsa osayta. Osad in ne giqeman ne ginumlan inaq iysa gihin timeqniyaqta. <sup>14</sup> Kam bunmo mataw na in an alulib hureqeq inaq usnan ginad emayta. Teq in tutimmo saw waqad daq meqinta araq in em daqayta na nagunad in ginamur a hi emad nazaqmo luwayta. In mataw ginad a hi zilimta na kat negad gihureqsa in daq meqintab woqayta. Teq in mataw gigo naghah uteteq giwaqgo gihol emunayta. God in mataw na tukusluw negan in oseq teq timeqniy daqayta. <sup>15</sup> In dan titnonta tuhulosim agadan tiqiyiy. In Beor atatin Balam asen tumuziy. Mataw asor Balam daq meqinta emgo mani ugsa in anad diq bilaqyaqta. <sup>16</sup> Teq in God ago gunun itiyonim daq araq meqinta emnan

tonsa ago donki gamuk a hi emaqta na in bilaqne mat gamuk em nog iyim anamren wad. Wadan Balam daq agadanta emgo anad amta na in a ta hi am.

<sup>17</sup> Teq mataw suleq katiyta bilaqayta na in saman diqta bilaqne yuw yayibta mayan mataw le a ta hi soqorayta nazaq nog. Ad in bilaqne onqas tim ayahta sibat sor hasa haresmo lehaqta nazaq nogmo. God in mataw na gimen uliq aromriqin meqin diqta araq in leheq os daqayta na tuwastitayan usaqta. <sup>18</sup> Mataw na in gigo daq meqinta na bayinad in haresmo ek tonad luwayta. In mataw kat negad daq gihol bilaqta naqmo giqisihunad teq in gihureqayta. Gihureqsa mataw ilatow agmo dante katiyta rabunad hullosim tukiyta na in muleqim dante meqinta nab a ta bolayta. Bolad in mataw katiyta girabunim giben lel hasim tukiyta na a ta gimuznan tonayta. <sup>19</sup> Mataw meqinta na bilaqay, Hel diqtaqmo haqay, ne i ginad ka muzinad teq ne ginadibmo luwad ginad dimniysa tuqos daqay haqayta. Ta teq mataw na in daq meqinta ago kabibiy mataw samanta iyim in ginadibmo a hikidik luw osayta. Haiqqam. In gigo daq meqinta naqmo in gigo ayahta nog iyim gibe yahsa in oseq teq timeqniy daqayta. Na ezaqgo, naga daqin in mat anad wamuz naqmo hiqiyayta naqmo in bilaqne mat na ago ayahta nog iysa mat na in daq na ago kabibiy mat nog iyaqtaqmo.

<sup>20</sup> Helmo, mataw dante katiyta rabunim tukiyta na in i gigo Iyahta Yesus Kraiss, mat i gilumsihim ta giwamta na ago tuhuritiyta. Huritim in ogib kab daq anumlan inaqta na hullosim in gihol tidimniyim luwayta. Ari abeb in daq meqinta nagan a ta emsa teq daq na awaz diq timeqniyeq mataw na a ta giqirquid in timeqniy has daqay. Mebmebmo in giqirquid osiyta nab in meqin nog osiyta. Ari daq meqinta na a ta giqirquid in meqniy haseqmo tuqos daqayta. <sup>21</sup> Mataw nazaqta in dan titnonta na ahol a hi waq nagiyta. Na ezaqgo, in dan na ahol tuwaqim muzad luwiya teq in gihol buliyim ta muleqiy. Muleqad in God ago gamuk awaz meqinta in nagta na gileh ugad in muleqim ta lehim timeqniy hasim osayta. <sup>22</sup> Ossa gamuk giger mataw bilaqad luwayta nazaqmo diq in giholib gwahtiqaqta. Gamuk araq bilam,

Gaun nilim lehim abeb in muleqim ta bolim anilqan na a ta neq tonaqta ham. *Gutpela Sindawun 26.11*

Ad gamuk ta araq na bilam, Bul yuw dimuntab tuhuzim lehim teq in ta muleqim hufak a ta huz tonaqta ham.

*Iyahta hel diqmo tuboldaq*

<sup>1</sup> Ari ya iyognizmo diq, ka yaqgo sansandek gigerta ya mar tonim eman ne gigo hib lehaq. Ya ne ginad wazid eraqsa ne gamuk helta na anadin a ta emad ginad titnondaq haqad ya sansandek giger ka ne gimen mar tonta. <sup>2</sup> Nazaq iyan ne ginad titnoneq God ago nantut tawonta kwaziqmo gamuk bilaqiyta na ne anadin diq ta emiy. Ad ne i gigo Iyahta, mat i gilumsihim ta giwamta amatin na ago gamuk awaz meqinta na anadin ta emiy. Gamuk na Aposel mebmemo ne gigo hib a lehim gibilensa ne tuhuritiya.

<sup>3</sup> Ari teq nagah ayah diqta ne ginad em has daqayta na in kazaq. Kam abebtanta nab teq mataw in God ago nantut teq in ago Aposel gigez na anan helmo a hi haqad in gigo gamuk na bilawunad teq in gigemab ginad meqinta naqmo in tumuz daqay. Muzad in kazaq bilaq daqay, <sup>4</sup> Mat bilam, Hel diqtaqmo ya ta boldaiq hamta na edowa? haq daqay. I gisesan tumoqiya kam nabmo iyim bo muranmo daq lul araq diq nazaq gwahtiqa i ahol a hi waqauq haq daqay. Og mutur gwahtiqaq nagah bunmo usta nazaqmo in muran us tutaq haq daqay. <sup>5</sup> Mataw na in God ago gamuk helta kawa usaq ka ago a hi bilaqad in nazaq katiyeq bilaq daqayta. Gamuk helta na kazaq bilam, Kwaziqmo God bilaqanmo kait gwahtimta ham. Gwahtiqaq teq God a ta bilaqan yuw ayahmo og isihim usta na le araqibmo humab wolan og ka yuwmeb gwahtimta ham. <sup>6</sup> Ad abeb God bilaqan yuw naqmo uq nog hitiqa on mataw kam nab osiya na timeqniy has bugiy ham. <sup>7</sup> Teq kait og inaq muran usayta ka in teq faqab oyworeq hiqiy bug daqay haqad God aqez nazaq tibilalaqan usaqmo. Kam nab mataw God gileh ugayta na hazizirib turad timeqniy hassa og ayow kait inaq timeqniy daqaymo.

<sup>8</sup> Ya iyognizmo diq, ne gamuk amulikmo ka ago ne gidek hikidik zizalan. Iyahta in kam amulikmo loyinsa in bilaqne ulig 1,000 nazaq nog iyaqta. Ad in ulig 1,000 nazaq loyinsa in bilaqne kam amulikmo nog iyaqta. <sup>9</sup> Mataw asor ginad emay, Iyahta hel diqmo haqad daq asor emnan bilamta na in emnan agudan emaq haqayta. Teq Iyahta in agudan a hi emaqta. Haiqgam. In ne bunmo gigem buliygo haqad anad emad in mat araq meqniy hasgo atuw hiqiyayta. Nazaq iyan in ne gimen emim sisaqmo osaqta.

*Og teq kait inaq tihiqiydaq*

<sup>10</sup> Ari teq Iyahta ago kam bilaqne mat rin tonaqta bol nog iydaq. Bolsa kam nab kait dedibmo ahulan iyeqmo tihiqiydaq. Ad nagah aseseqta kaitab oyad turayta na

faq ginoy hasid tihiqiy daqay. Hiqiya og ka teq kabiy bunmo ogib emiya na inaqmo God ameb ulal tiqiy hasdaq. <sup>11</sup> Ari nagah bunmo nazaq tihiqiydaqta na ago ne anadin emad ne mataw ezaq diqta iyeq os daqay? Ne gihol bunmo God ugad teq ne in anadin emad ago daq dimdimunta muzin bugiy. <sup>12</sup> Ne nazaq emad God ago kam na baq tunsu in bo gwahtiqaq. Ad ne giholtuw bulad kam na abe yahsa in hidmo gwahtiqaq. Kam na gwahtiqaq samo faq kait oyid tihiqiydaqta. Hiqiya faq na og gig nagah nagan bunmo ginoysa in midemeq yuw nog mimaseq tihiqiy bug daqaymo. <sup>13</sup> Ta teq i ne nenaq i God gamuk hel diqmo bilamta na anan helmo haqad i og kait muturta gibaq tunim osauqta. Og saw muturta nabmo God ago daq titnonta naqmo giqu bugdaqta.

*I gihol asawan diq woltayad Iyahta amen emeq osuq*

<sup>14</sup> Ari ya iyogniz, ne nagah muturta nagan gimen emeq osad ne gihol God ameb anuqlan haiqmo usan. Ad ne gihol asawan woltayad ne daq meqinta ananin waq daqayta na aban diq emad luwiy. Ad ne God inaq gigem araqibmo iyeq osiy. Ne nazaq emad ossa le Iyahta ago kam gwahtiqaqta nab in bo ne gibiyan. <sup>15</sup> I gigo Iyahta in i gilowan tonad gimen sisaqmo emaqta na ne ahol waqad ginad emiy, In i gilumsihem ta giwaqgo haqad sisaqmo i gibaq tunim osaqta haqiy. Teq God in i gimaqbab dimunta Pol anad dimunta ugsa in ne giyon gamuk kaqanta tumar tontamo. <sup>16</sup> In ago sansandek bunmo nab in nagah ka ago bilaqta. Helmo, in ago gamuk asor ulal diq a hi iya i ginad em hasgo afaqan iyauqta. Nazaq iyan mataw ginad haiqta dante hareso muzayta na in God ago gamuk bunmo walebolayta nazaqmo in Pol ago gamuk na walebolaymo. Teq in gamuk na walebolad in gimo gihol meqin tonayta.

<sup>17</sup> Nazaq iyan ya iyognizmo diq, daq nawa teq gwahtiqaqta na ago ne tuhuritim ne gihol wamuz naqmo hiqiyiy. Sa mataw God ago gunun othasayta na in ne gihureqsa ne in gigo suleq katiya na hi huritad ne ginad helta hulosaq dante hareso muzinad hi luwiy. <sup>18</sup> Ne nazaq gihol asawan woltayad ossa i gigo Iyahta Yesus Krai, mat i gilumsihim ta giwamta na, in agem dimunta negsa daq na ne gigo hib ayahmo usan. Sa ne in ago ginad tiqem hasiyta na in ne ginadib ayahmo ussa ne in ago hurit kemiy.

Ari i Iyahta abin iluwsa in abin nazaqmo muran teq abeb kuluwa-kuluwmo usan. Hel diqtaqmo.

## 1 Jon Sansandek amebta Jon mar tonta Gamuk ameb lehaqta

Mataw asor in Yesus ago on mataw gihulosim lehim in giholbin iyim osad bilaq yaqay, I gisan ka in og kabta iyim in meqin diq haq yaqay. Nazaq iyan God Atatin mat diq asan waqeq a hi gwahtiq nagta haq yaqay. I ginad emauq haq yaqay, Yesus in God Atatin a haiq haq yaqay. Haqad in bilaq yaqay, I God ago diqta na i gimomo tuhurit haq yaqay. Huritim i ginad em hasim daq meqinta a ta emauqta haq yaqay. Haqad in Yesus ago on mataw ta asor na gihureqnan ton yaqay. Sa Yesus ago mataw na gamuk katiyta na huritim dante doqag diq in hel diqta na ago in ginadnad tiqem yaqay.

Sa mat anan Jon haqay na in Yesus ago on mataw na gilumsihid in God ago gamuk helta hurit kemeq ginad kabemmo em yaqay na huload in ginad amulikmo usdaq haqad in gimen sansandek ka mar tonta. In bilam, Mat i gime anonabmo ahol waqad teq i giben le in ahol wazta naqmo anan i gibilen kemaq ham. Gibilen kemid ne ginad i ginad nogmo iyid i bunmo giwastoneq Gimam God teq in Atatin Yesusmo nenaq ginad dimniysa tuqosam ham (1 Jon 1.3).

Teq in bilam, Ne mataw katiyta na gigo nan hi huritiy ham. Mataw nazaq bilaqayta na in God ago a haiqta ham. In Krai bab ugayta ham. Helmo Yesus in mat diqmo iyim gwahtimta ham. Gwahtiqan on mataw in anan helmo haqayta naqmo in God atatniz iyim in Gimam Iyah na ago hurit kemayta ham. Ad in God anan ginad bilaqsa in on mataw ginan ginad bilaqayta ham. Teq in bilam, Ne gamuk ka ahol waqeq ginad em daqay, Helmo, i os dimunta kuluwa-kuluwmo osayta na tuwaqim osauq haq daqay haqad ya gamuk ka ne gimen mar tonta ham (1 Jon 5.13).

### I saw anuwanib luwad i mataw romriqabta na giholibmo hiqiyid in hi kat igiy

*Gamuk mataw giqeman kuluwa-kuluwmo osayta na ulal iy*

<sup>1</sup> Ari i God ago gamuk mataw giqeman kayeqmo osayta na anamren anan tibilaqnan. Gamuk na anamren in mebmebmo diq osta. Teq in og kab bolim ago gamuk na bilaqsa i huritad teq i gime anonabmo

ahol wawta. I gamuk na anamren ahol waq hasad i giben in aholib emim asan waztamo. <sup>2</sup> Kayeqmo osayta anamren na ulal iyan i ahol tuwaqim i in ago gamuk na tutim ne tigibilenauq. Gamuk na anamren in mataw kayeqmo tutimmo osayta na alulinmo diq. Kwaziqmo in Amam inaq osta. Osim in ulal iyan i ahol tuwawta. <sup>3</sup> I in ahol waqim ago gamuk tuhuritim i ta ne gibilenauq, gibilenid ne ginad i ginad nogmo iyid i bunmo wastoneq zib alowab tuqosam haqad. I Gimam Iyahta na Atatin Yesus Krai inaq gigo hib i tisoqotim i in nenaq zib alowab tuqosauqta. <sup>4</sup> Ad i ne nenaq araqibmo nazaq tuqosad teq i ginad tidimniy hasdaq haqad i gamuk ka tumar ton negauq.

#### *I saw anuwanibmo luwuq*

<sup>5</sup> Yesus Krai gamuk bilaqsa i huritta na i tutad kazaq diq ne gibilenauq. God in bilaqne saw anuwan noqta. In aholib romriq asit a hi usaqta. <sup>6</sup> Nazaq iyan i giqezabmo bilaqauq, I God inaq zib alowab osauq haqad teq i romriqabmo luwad na i gimileq iyad gamuk helta adan a hi muzinauqta. <sup>7</sup> Ari God saw anuwanib luw nogmo i luwad teq i Yesus ago on matawta na bunmo nenaq araqibmo zib alowabmo osauqta. Ossa God Atatin Yesus anedan na in i gigo daq meqinta tisuhol bugaqta.

<sup>8</sup> Teq i bilaqauq, I daq meqinta a hi emauqta haqad na i gigem kat ugsa gamuk helta i gigemab a hi usaqta. <sup>9</sup> Ari i gigo daq meqinta na ulum hasid gwahtiqsa teq God bilamta nazaq in tiqemdaq. In daq titnonta emad i gigo daq meqinta na walemad i gigemab daq katiyta usaqta nagan in tisuhol bugdaq.

<sup>10</sup> Teq i bilaqauq, I daq meqinta araq asit a hi emta haqad na i God eman in mat amileq inaqta tiqiyay. I nazaq gihol kat ugsa God ago gamuk i gigemab a hi usaqta.

## 2

#### *Yesus in i giteqsormo diq*

<sup>1</sup> Yaqgo onmin, ne daq meqinta hi emiy haqad ya gamuk ka mar tonan ne gigo hib lehaq. Ta teq ne daq araq meqinta emid, ari i giteqsor araq i gigo ban waqeq i gimen Gimam Iyahta bulondaqta na in nawa osaq. Na Yesus Krai mat titnonta naqmo. <sup>2</sup> God i gigo daq meqinta nagan ginan agem meqniysa Yesus inmo ahol tamaz nog ugan in ago agem meqniy i gigo hib usta na tihiqiy. Teq Yesus in i gimomo gigo daq meqinta anadin emad i gimen ahol nog hulosta nazaq a haiq. Haiqqam. In og kab on mataw en bunmo gigo daq meqinta anadin emad in ahol tamaz nog God uqta.

*Mat Yesus ago daq muz naqmo hiqiyagta naqmo in Yesus ago tuhurit kamta*

<sup>3</sup> Yesus Kraiis gamuk awaz meqinta igta nagan i tumuzin bugad teq i kazaq ginad emam, I Kraiis ago tuhurit hasta haqam. <sup>4</sup> Ari mat ara q bilaqaaq, Ya Kraiis ago tuhurit hasta haqad teq in Kraiis ago gamuk awaz meqinta nagan a hi muzinad, mat na katiysa gamuk helta in agemab a hi usaqta. <sup>5</sup> Ari mat Kraiis ago gamuk muzinaqta na in God anan anad bilaq naqmo hiqiyagta. Nazaq iyan i God anan ginad bilaqsa ago gamuk tumuzinad teq i ginad kazaq emam, I Kraiis inaq soqotim osauqta haqam. <sup>6</sup> Teq mat nog bilaqaaq, Ya Kraiis aholib tisoqotim diq inaq luwaiq haqaaqta, mat na Kraiis luw nogmo in luwan.

<sup>7</sup> Ya iyognizmo diq, gamuk kawa ya ne gimen mar tonaiqta ka in mutur a haiqta. Haiqqam. Ka gamuk kwaziqta ne mebmemo tuwaqim osayta naqmo. Teq gamuk kwaziqta na in Yesus awagamun ne tuhuritiyta naqmo. <sup>8</sup> Ta teq gamuk ya ne giyon kawa mar tonaiqta ka in bilaqne gamuk mutur nogtamo. Na ezaqgo romriq tihiqiynan tonsa saw anuwan hel diqta na tuqoyaq. Oysa Kraiis gamuk na muzinsa i tumuzinauqmo. <sup>9</sup> Nazaq iyan mat nog bilaqaaq, Ya saw anuwanib osaiqta haqad teq in amaqbaban Kraiis aduganibta na ginan agem meqniysa, mat na romriqab os tutaqta. <sup>10</sup> Ari mat in amaqbaban agem dimunta nega qta na in saw anuwanib osaqta. Ossa saw anuwanib nab nagaq ara q mat na asen woltayid woqda qta na haiqqam. <sup>11</sup> Teq mat in amaqbaban Kraiis aduganibta na ginan agem meqniysa, mat na romriqab osad teq in romriqab luwaqtamo. Luwsa romriq mat na ameqnagin il tonan in naga danteqin muzaqta na a hi huritaq.

<sup>12</sup> Ya qgo onmin, God in Yesus abinib ne gigo daq meqinta tigiwalam.

Nazaq iyan ya gamuk ka ne gimen mar tonaiq.

<sup>13</sup> Ne onmin gimaman, ne mat kwaziq diqmo osim bo muran in os tutaqta na ago ne tuhuritiyta.

Nazaq iyan ya gamuk ka ne gimen mar tonaiq.

Ne mataw minminta, ne mat meqinta na bayan tuwom.

Nazaq iyan ya gamuk ka ne gimen mar tonaiq.

<sup>14</sup> Onmin amikmikta ne Gimam Iyah ago tuhurit kemiy.

Nazaq iyan ya gamuk ka ne gimen tumar ton.

Ne onmin gimaman, ne mat kwaziq diqmo osim bo muran in os tutaqta na

ago ne tuhuritiyta.

Nazaq iyan ya gamuk ka ne gimen tumar ton.

Ne mataw minminta, ne gigo zaway inaq tiqiyiy.

Ad God ago gamuk ne giduganib tuqusaq. Teq ne mat meqinta na bayan tuwom.

Nazaq iyan ya gamuk ka ne gimen tumar ton.

*I og ka ago daq anan ginad hi bilaqan*

<sup>15</sup> Ari ne og ka ago daq meqmeqinta na ginan ginad hi bilaqan. Mat og ka ago daq meqinta nagan ginan anad bilaqaaqta na in Gimam Iyah anan anad a hi bilaqaaqta. <sup>16</sup> Na ezaqgo og kab on mataw God gileh ugayta na in daq kazaq emayta. In gigem atoranmo eraqaaqta teq in gimeqnagin nagaq ahol waqad utetayta teq in gimin ayahta waqnan haqad giholtuw bulad luwayta. Teq daq nawa na bunmo Gimam Iyah ago hib a hi bolaqta. Haiqqam. Daq meqinta nagan in og kaqmo agota. <sup>17</sup> Teq og ka tihiqiyda qta. Sa mataw gigem atoranmo eraqsa in nagaq haresmo utetayta na in og ka inaq tihiqiy daqaytamo. Ari mat God anad muzinad osaqta na in kuluwakuwmo tuqos tutda qta.

*Kraiis ababun tugwahtiqiy*

<sup>18</sup> Ari yaqgo onmin amikmikta, muran i kam abebtanta na ago kamub tugwahtiqim osauq. Kwaziqmo Kraiis ababun teq gwahtiqda q haqsa ne tuhuritiyta. An muran ne huritiyta nazaqmo diq Kraiis ababun kabemmo tugwahtiqay. Gwahtiqsa i mataw na gibiyad ginad emauq, I kam abebtanta ago kamub tugwahtiqim osauq haqaaq. <sup>19</sup> Mebmemo mataw na i gilikmanib osim teq in i gihulosim tilehiy. Mataw na in i gigo diq a haiqta. In i gigo walmatawta iyeq teq in i gilikmanib tuqos tut nagiyta. Teq in i gihulosim le giholbin luwsa in i gigo diq a haiqta na ulal tiqiy bugaq.

<sup>20</sup> Ari negmo teq ne nazaq a haiqta. Mat Tawonta na in Bugaw Dimunta amalib ne tigibalaw tonan ne bunmo Kraiis ababun na gigo tuhurit kemay. <sup>21</sup> Nazaq iyan ne God ago gamuk helta na a hi huritiyta haqad ya gamuk ka a hi mar ton negaiq. Haiqqam. Ne gamuk helta na tuhuritiyta na ago ya ne gimen gamuk ka mar tonaiq. Teq God ago gamuk helta na aduganib gamuk ara q katiyta a hi usaqta na ne tuhuritiymo.

<sup>22</sup> Ari i mataw gimileq inaqta na kazaq tigibiy kemam. Mat nog Yesus gileh ugad bilaqaaq, Yesus in Kraiis\* a haiq haqaaqta naqmo in mat amileq iyaqta. Mat nazaq bilaqaaqta na in Kraiis ababun iyim in i Gimam God teq in Atatin inaq gileh nega qta. <sup>23</sup> On mataw God Atatin gileh ugayta bunmo in

\* 2:22: Gamuk Kraiis ka alulin "God mat emid bo i gilumsihda qta na amatin" haqayta.



asan ban osad in i Gimam Iyah na inaq a hi osayta. Ari on mataw God Atatin anan 'Krais' haqayta na, in bunmo Krais inaq osad in i Gimam Iyah inaq tuqosaymo.

*Bugaw Dimunta gamuk helta alulin i gibilenaqta*

<sup>24</sup> Ari ne gamuk mebmemo huritiyta na in ne gigemab ussa ne waz naqmo hiqiyiy. Gamuk mebmemo ne huritiyta na in ne gigemab us tutsa teq ne Gimam Iyahta na Atatin inaq gigo hib tuqos tut daqay. <sup>25</sup> Teq Krais gamuk mebmemo hel diqmo gibilanta na in kazaq. In i giqemid i kayeqmo kuluwa-kuluwmo tuqosam haqad in bilanta.

<sup>26</sup> Ya mataw ne kat negad luwayta ko ginan gibilenad ya ne gimen gamuk ka mar tonaiq. <sup>27</sup> Ari negmo teq Krais in Bugaw Dimunta amalib ne gibilaw tonan Bugaw Dimunta ne nenaq tuqosaqta. Nazaq iyan ne ginad dimunta ago siqim a hi iysa mat araq in ne suleq a hi negdaqta. Na ezaqgo Krais ne gibalaw tonim Bugaw Dimunta negan Bugaw Dimunta naqmo in nagah bunmo ago ne gibilenaqta. Gibilenad in a hi katiyad gamuk heltaqmo bilaqta. Nazaq iyan Bugaw Dimunta suleq nagta nazaqmo ne Krais aholib soqoteq inaq osiy.

*Muran i God ago onmin tiqiyim osauq*

<sup>28</sup> Ari yaqgo onmin, ne Krais aholib soqoteq inaq os tutiy. Ne Krais inaq tuteqmo ossa teq abeb in ta boldaqta nab i bunmo gimebay a hi woqsa i giwaz meqniyeq anognib tituram. <sup>29</sup> Teq Krais in mat titnon diqta na ago ne ginad tiqem haseq teq ne ginad kazaq em daqay. Krais in on mataw daq titnonta emayta bunmo giqeman in gimugan mutur iyan in God ago onmin tiqiyim osay haq daqay.

### 3

<sup>1</sup> Mataw! I Gimam Iyahta i ginan anad diq bilaqta na ne anadin emiy. Muran i giban God ago onmin nazaq usaqta. An helmo diq i God ago onmin tiqiyim osauq. Ta teq on mataw God gileh ugayta na in i giban nazaq usaqta na ago in a hi hurit kemayta. In God ago a hi huritayta na ago in i gigo a hi huritaytamo. <sup>2</sup> Ya iyogniz, muran i God ago onmin iyim osauqta. Teq abeb i ezaq diq iyeq osamta na in muran ulal a hi iysa i na ago ginad a hi em hasauq. Ari Krais bo ulalab gwahtiqdaqta nab i inmo nog tiqiyamta naqmo ago i ginad em hasauqta. Na ezaqgo kam nab in mat ezaq diqta iyim osaqta na i ahol tuwaq kemam. <sup>3</sup> Ari on mataw bilaqay, I teq Krais nog tiqiyam haqad baq tunim osayta na bunmo in gimo gimugan suholan ginumlan tihiqiy bug. Hiqiy bugan Krais agem anumlan haiqmo osaqta nazaqmo in osaytamo.

<sup>4</sup> On mataw daq meqinta emayta bunmo in God ago maror tuqothasiyta. Na ezaqgo God ago maror othasayta adan naqmo in daq meqinta alulin. <sup>5</sup> Teq Krais in i gigo daq meqinta giwalemnan bolta na ago ne tuhuritiy. Ad Krais aholib daq araq meqinta a hi usaqta na ago ne tuhuritiymo. <sup>6</sup> Nazaq iyan mat Krais aholib soqotim inaq osaqta na in daq meqinta adan a ta hi muzinaq. Ari mat araq daq meqinta adan muzinsa i ginad emam, Mat na in Krais asit ahol a hi waqim in Krais ago a hi huritmo haqam.

<sup>7</sup> Onmin, ne gihol waziy. Luweq mat araq kat negdaq. Mat daq titnonta emaqta na in God ameb titnonimmo luw osaqta, bilaqne Krais titnonimmo luw osaqta nazaqmo. <sup>8</sup> Satan danmebmo diq daq meqinta amta. Nazaq iyan on mataw daq meqinta emayta na in Satan-mo asenlulibta. Teq God atatin in mat meqinta na ago kabiy meqin tonnan haqad in ulalab gwahtimta.

<sup>9</sup> On mataw God in giqeman in ago onmin tiqiyiyta na bunmo in daq meqinta adan a hi muzinayta. Na ezaqgo on mataw na God alulib gwahtiqim in Gimam Iyahta na nogmo iyayta. God in mataw na giqeman in ago onmin tiqiyim in daq meqinta adan muzgo giholib a hi usaqta. <sup>10</sup> Ari ezaq toneq teq i God ago onmin teq Satan ago onmin gibiy kemam? Na in kazaq. Mat daq dimunta a hi emaqta na in God asenlulibta a haiq. Ad mat in amaqbaban ginan anad a hi bilaqta na in God ago a haiqtamo.

## I bunmo an anan ginad diq bilaqsa osuq

*I an anan ginad bilaqgo adan na Yesus i tigiqisihun*

<sup>11</sup> Ne Krais ago suleq danmeb waqiyta na in kazaq bilam, I gimaqbaban ginan ginad bilaqan ham. <sup>12</sup> Nazaq iyan i mat anan Kein haqayta na asen hi muzuq. In mat meqinta na asenlulibta iyim in amikqan na wol eman tumomta. Teq nagaqgo in amikqan wol eman mom? In ago daq meqin iysa in ama ago daq dimun diq iyta na ago in wol eman momta.

<sup>13</sup> Ya imaqbaban, mataw God gileh ugayta na in gigem meqinta negsa ne gihol turuh nemsas ginadnad hi emiy. <sup>14</sup> I tuteqmo gimaqbaban ginan ginad bilaqsa osad teq i ginad kazaq emam. I moq hasamta adanteqin na tuhulosim i kayeqmo kuluwa-kuluwmo osamta na ago danteb gwahtiqim tilehauq haqam. Ari mat in amaqbaban ginan anad a hi bilaqta na in moq ago danibmo luwaqta. <sup>15</sup> Mat agem meqinta amaqbab ugaqta na in bilaqne amaqbab na wol eman momta nog tiqiy. Ad mat mataw ginol emaqta na aholib os kayeqmo kuluwa-kuluwmo

osayta na alulin a hi usaqta. Na ago ne tuhuritiy.

<sup>16</sup> Yesus i gilumsihnan haqad inmo ahol nog hulosta. In daq nazaq eman i ahol waqad i an anan ginad bilaqsa osamta na ago tuhurit kemaug. Nazaq iyan i nazaqmo gihol nog huloseq gimaqbaban tigilumsihamtamo. <sup>17</sup> Ari mat nog og ka ago es nagh dimdimunta kabemmo inaq iym teq in amaqbab ara q nagh ago siqim iysa in ahol waqad a hi ulumsihaqta, mat na agem soqotim usaq. Mat nazaqta na in God anad a hi muzinad in amaqbaban ginan anad a hi bilaqta. <sup>18</sup> Yaqgo onmin, i gimaqbaban ginan ginad bilaqsa i katiyeq gizezab gamuk dimunta amomo hi neguq. Haiqqam. I daq helta amalib gigem dimunta negad i akabiyan inaqmo em neguq.

*Krais ago on mataw bunmo zaway diq iyeq God ameb turiy*

<sup>19</sup> I nazaq gimaqbaban ginan ginad bilaqsa osad teq i ginad kazaq emam, I gamuk heltaqmo muzinauqta haqam. Nazaq haqad teq i God ameb osad i gigem kute nemsu tuqosam. <sup>20</sup> Ta teq i God ameb gigem loyinsa in dimun diq a hi iysa i ginad kazaq emuq, I ginad siqim iysa igmo gihol a hi diq ulum kemaugta haquq. Teq God anad i ginad uriyamim in i gigo diq tuhurit kamta haquq. I nazaq ginad emad teq i God ameb gigem midemeqmo tuqusdaq.

<sup>21</sup> Ya iyognizmo diq, I gigemab daq ara q meqinta a hi loyinat nab i God ameb zaway diq iym turauqta. <sup>22</sup> Turad i nagh ara q ago susumun ugsa in i iagta. Na ezaqgo i in ago gamuk muzin bugad i ginad emauq. I daq in anan anad bilaqta naqmo i emauqta haquq. <sup>23</sup> Teq God gamuk awaz meqinta gibilanta na in kazaq. I in atatin Yesus Krais anan helmo haqam. Haqad in atatin gunun igta na i muzinad i an anan ginad bilaqsa osam. <sup>24</sup> On mataw God ago gamuk muzin bugayta na bunmo in God inaq ossa God in mataw na nenaq osaqmo. Osad in ago Bugaw Dimunta igan i giduganib ossa i God inaq osauqta na tiloyin kemaug.

#### 4

*I bugaw bunmo gilum kemeq gibe alulin hurit kemaug*

<sup>1</sup> Ya iyognizmo diq, mataw God abinib nantut katiyta bilaqayta kabemmo og kab leh bolad luwayta. Luwsa bugaw amo amo mataw katiyta na ginad wamuzsa in gamuk bilaqayta. Nazaq iyan ne mataw na bunmo ginan helmo hi haqiy. Ne mataw na gilum kemeq in giholib bugaw usaqta na in God ago hib bol o haiq na ne hurit kemiy. <sup>2</sup> Ari God ago Bugaw Dimunta daq kazaq emsa

ne ahol tuwaq has daqay. Mataw bilaqay, Yesus Krais in mat diq iym og kab bolta haqayta, mataw naqanta giholib God ago Bugaw Dimunta usaqta. <sup>3</sup> Ari mataw Yesus anan nazaq a hi bilaqayta na bunmo in gigo bugaw ta ara q inaq luwayta. Bugaw na in Bugaw Dimunta God ago hib bolaqta na a haiqta. In mat Krais bab ugaqta naqmo ago bugawta. Mataw nazaqta teq bol daqay haqsa ne kwaziqmo tuhuritiyta. Teq mataw na muran og kab tugwahti qim gigo kabiy tiqemay.

<sup>4</sup> Yaqgo onmin, ne God agota tiqiyim osayta. Teq in ago Bugaw Dimunta ne giholib usaqta na in mat meqinta og ka wamuzim osaqta na uriyamim in awaz meqin diqta. Nazaq iyan in ne giholib ussa ne mataw nantut katiyta bilaqayta nagan bunmo tigiuriyamim osayta. <sup>5</sup> Mataw katiyayta na in og ka agota. Nazaq iyan in og ka ago agamukan bilaqsa mataw God gileh ugayta na in gigo gamuk huritayta. <sup>6</sup> Ari i ne nenaq i God agota. Mat God ago tuhuritta na in i gigo gamuk ka huritaqtamo. Teq mat God ago a haiqta na in i gigo gamuk ka a hi huritaqta. Daq na amalib teq i Bugaw gamuk helta bilaqayta na teq bugaw gamuk katiyta bilaqayta na tigibiy kemam.

*Mat God anan anad bilaqsa in amaqbaban ginan anad bilaqanmo*

<sup>7</sup> Ya iyognizmo diq, daq an anan ginad bilaqayta na in God ago daqmo diq. Nazaq iyan i an anan ginad diq bilaqan. Teq mat mataw ginan anad bilaqayta na in God ago amun iym in God ago tuhurit kemaqta. <sup>8</sup> I an anan ginad bilaqayta na alulin God-mo. Nazaq iyan mat in mat ta ara q anan anad a hi bilaqayta na in God ago a hi huritta. <sup>9</sup> God in atatin amulikmo osta na eman og kab bolta, in i gilumsihid i kayeqmo kuluwa-kuluwmo tuqosam haqad. God daq nazaq emim in i ginan anad bilaqayta na i gilikmanib ulal tiqiy bug. <sup>10</sup> I iturim God anan ginad a hi bilam. Haiqqam. God inmo iturim i ginan anad bilamta. Anad bilaqsa in atatin eman og kab bolim in ahol tamaz nog God ugim i gigo daq meqinta bunmo tigiwalam bug. Daq an anan ginad bilaqayta na adan diq nawaqmo.

<sup>11</sup> Ya iyognizmo diq, God nazaq i ginan anad ayahomo bilaqan iyan i nazaqmo an anan ginad bilaqsa osamtamo. <sup>12</sup> Mat ara q diq ameb God ahol a hi wamta. Ta teq i an anan ginad bilaqsa ossa God i gilikmanib ulalab osaqta. Ossa in ago daq an anan ginad bilaqayta na i gilikmanib gwahti q hasaqta.

<sup>13</sup> God inmo ago Bugaw Dimunta igan iyan i ginad emauq, I God inaq ossa ta

in i ginaq osaqmo haqauq. <sup>14</sup> Teq Gimam Iyah in atatin eman bolan i gimeb in ahol tuwaqim i on mataw gibilenib bilaqauq, Gimam Iyah in Atatin eman bolim in og kab on mataw bunmo gilumsihim gimen dante tiqamta haqauq. <sup>15</sup> Ari on mataw bilaqay, Yesus in God atatin haqayta na God in on mataw na nenaq ossa in God inaq osaytamo. <sup>16</sup> Nazaq iysa iyan i ginad emauq, Helmo diq God i ginan anad diq bilaqagta haqauq. Ad in agem dimunta igsa i gihol nazaq diq tiloyinauq.

I an anan ginad bilaqsa osauqta na alulin God-mo. Teq mat in amaqbaban ginan anad bilaqagta na in God inaq ossa God in mat na inaq osaqtam. <sup>17</sup> I og kab osad Kraiss daq emaqta nazaq nog i emauq-tamo. Emsa daq an anan ginad bilaqayta na i gilikmanib tugwahtiqliq hasaq. Nazaq iyan abeb God ago hazizir akaman bo tugwahtiqlisa i a hi rabamta. <sup>18</sup> On mataw an anan ginad bilaqsa osayta na in a hi rabayta. Haiqqam. In giholib an anan ginad bilaqgo adan na awaz timeqniysa in God ago hazizirib turnan a hi rabayta. Ari on mataw an agem meqinta ugayta naqmo teq rabayta. Na ezaqgo in gigo daq meqinta na anadin emad in teq God ago hazizirib turad amenin meqinta tuwaq daqay haqad in rabayta. On mataw na giholib an anan ginad bilaqgo adan sosil iysa iyan in rabayta.

<sup>19</sup> God danmebmo diq i ginan anad bilaqan muran i an anan ginad bilaqsa osauqtam. <sup>20</sup> Mat aw nog bilaqag, Ya God anan inad bilaqagta haqad teq in agem meqinta amaqbab ugaqta, mat na katiyaqta. Na ezaqgo mat in amaqbab ahol waqayta na anan anad a hi bilaqeq in God ahol a hi wamta na anan anad a hi bilaqdaqmo. <sup>21</sup> Teq Kraiss gamuk awaz meqinta igta na in kazaq bilam, Mat God anan anad bilaqagta na in amaqbab ginan anad tibilaqdaqmo ham.

## 5

*Kraiss ago on matawta na in og ka ago zaway bayan woqaqta*

<sup>1</sup> On mataw Yesus anan Kraiss haqayta bunmo in God ago onmint. Teq on mataw Gimam Iyah na anan ginad bilaqsa in Gimam ago onmin bunmo ginan ginad bilaqaytam. <sup>2</sup> Ad nazaqmo i God anan ginad bilaqsa ago gamuk muzin bugad teq i ginad emam, I God ago onmin ginan ginad tibilaqagmo haqam. <sup>3</sup> Teq i ezaq toneq God anan ginad bilaqdaq? Na in kazaq. I in ago gamuk muzin bugamta naqmo. Ad in gamuk gibilanta na in afaqan diq a haiqta. <sup>4</sup> On mataw God ago onmin iyim osayta na bunmo in og ka ago daq meqmeqinta

na gibayan woqaqta. Teq i og ka ago daq meqinta inaq an wolim bayan woqaqta na alulin in kazaq. I God anan helmo haqauqta naqmo. <sup>5</sup> Nog diq zaway iyim og ka ago daq meqinta inaq an wolim bayan woqaqta? Mat Yesus anan bilaqag, Helmo in God atatin haqagta naqmo in og ka ago daq meqinta bunmo giquiryamaqta.

*God in atatin anan tibilaq siram*

<sup>6</sup> Yesus Kraiss in yuw ned inaq gimalib ahol alulin ulal tonta. In yuw huzta na amomo ahol eman ulal a hi iy. Haiqqam. In yuw ned inaqmo gimalib ahol ulal tonta. <sup>7</sup> Ulal tonan God ago Bugaw Dimunta in Kraiss ahol alulin na i gibilen sireqaqta. Na ezaqgo Bugaw Dimunta na gamuk heltaqmo bilaqagta. <sup>8</sup> Teq nagah ezeqman naqmo in Kraiss ago i gibilen sireqaqta. God ago Bugaw Dimunta teq yuw na teq ned naqmo. Teq nagah ezeqman na gigo gamuk in amulikmota. <sup>9</sup> Mataw og kabta gamuk bilaqsa i helmo haqauqta. Ari God gamuk bilamta na in mataw og kabta gigo gamuk tuquriyamta. Na ezaqgo gamuk nawa God tibilamta na in atatinmo anan bilamta.

<sup>10</sup> Mat God atatin anan helmo haqagta na in God ago gamuk in atatin anan bilamta na tuwaqan in agemabmo diq usaqta. Ari mat God anan helmo a hi haqagta na in God anan mat katiyaqta haqagta. Na ezaqgo God in atatin anan bilaqan teq mat na God aqez na anan helmo a hi haqagta na ago iyan. <sup>11</sup> Teq God in atatin anan gamuk i gimen bilamta na in kazaq. Mataw kayeqmo tuteqmo os daqayta na alulin in atatin ago hib usaqta. Sa God in os dimunta kayeqmo osayta na i tiqig. <sup>12</sup> Mat God atatin inaq osaqta na in kayeqmo tuteqmo tuqosdaq. Ari mat God atatin inaq a hi osaqta na in kayeqmo tuteqmo a hi osdaq.

*I kayeqmo tuteqmo osamta na ago i tuhurit kemam*

<sup>13</sup> Ne on mataw God atatin anan helmo haqayta na ya ne gimen gamuk ka mar tonaiq. Ne gamuk ka ahol waqeq ginad em daqay, Helmo, i os dimunta kuluwakuwmo osamta na tuwaqim osauq haq daqay haqad ya gamuk ka mar ton.

<sup>14</sup> Teq i ginad emauq, I nagah araq God ignan anad usaqta na anan bulonid in i gizeq na tuhuritdaq haqauq. I ginad nazaq emad i God susumun ugnan a hi rabauqta. <sup>15</sup> Helmo, i God-mo anad muzinad susumun ugsa in i gizeq huritaqta. Nazaq iyan i nagah araq God ignan anad usaqta na anan susumun ugad i ginad emauq, I nagah anan susumun ugauqta ka i waqmo diq tuwaqam haqauq.

<sup>16</sup> Ari mat araq in amaqbab araq daq meqinta emsa in ahol waqsa daq na in amaqbab na emid awitan moq hasdaqta

nog a hi iyid teq mat na in amaqbab na amen God tubulondaq. Bulonid God in amaqbab na ulumsiheq os kayeqmo tuteqmo os daqayta na tuqugdaq. Mataw asor gigo daq meqinta in mataw na giqemid giwitan a hi moq has daqayta. Nazaq iyan ya bilaqaiq, Ne mataw naqanta gimen God buloniy haqaiq. Ari daq ara q meqin diqta nawa usaqta. Mataw daq meqinta na emim in gimo gihol adanin qwayim in giwitan tumoq hasayta. Nazaq iyan mataw daq meqin diqta na emsa ne in gimen God buloniy nazaq ya a hi bilaqaiq. <sup>17</sup> Daq God anad a hi usaqta nagan bunmo in daq meqinta. Teq daq meqinta nagan asor in mat eman awitan a hi moq hasaqta.

<sup>18</sup> God ago onminmo diq daq meqinta adan a hi muzinayta. Haiqqam. God atatin aqenta na in God ago onmin na giwamuz naqmo diq hiqiysa mat meqinta na a hi gimeqin tonaqta. Na ago i tuhurit.

<sup>19</sup> Teq i God ago onmin iyim ossa mat meqinta na in og kab on mataw God gileh ugayta na bunmo giwamuzim osaqta na ago i tuhuritmo.

<sup>20</sup> Teq i ginad emauq, God Atatin og kab bolim i ginad eman hastitaysa i God hel diqta na ago tuhurit haqauq. Huritim i in inaq osad i in atatin Yesus Krai inaq tuqosauqmo. Yesus Krai in God hel diqta. Teq on mataw os kayeqmo tuteqmo os daqayta na alulin inmo.

<sup>21</sup> Yaggo onmin, ne god katiyta bunmo gihulosad gileh negiy. Nawaqmo.

## 2 Jon

### Sansandek gigerta Jon mar tonta Gamuk ameb lehaqta

Yesus ago on mataw gigo mat danmebta araƣ anan Jon haqayta na in sansandek ka mar tonta. Teq in ago gamuk alulin emim in 'Aw ayah' hamta na mataw kabemmo ginad emay, Jon in on mataw Yesus ago nan huritayta na gidauhan araƣ giyon sansandek ka mar tonad in gamuk abarawun hulim ginan 'Aw ayah' hamta haqay.

Kam nab mataw asor luwad in suleq katiyta gibileneq bilaq yaqay, Yesus in mat diq asan waqim a hi gwahtimta haq yaqay. Haqsa Jon bilam, Mataw na ne gigo hib le gwahtiqid ne gigem dimunta negad hi gilumsihiy ham. Ne mataw katiyta na gilowan tonad na ne bilaqne in gigo kabiy katiyta na em nog tiqiy daqay ham. Nazaq iyan ne mataw na gigo gihol waz naqmo hiqiyey osiy ham. Osad ne God ago gamuk helta waz naqmo hiqiyad ne an anan ginad dimniysa osiy ham.

### I God ago gamuk helta na waz naqmo hiqiyey osad i mataw gamuk katiyta bilaqayta na gigo gihol wazuq

<sup>1</sup> Ari Yesus ago on matawta gigo mat danmebta araƣ yaqmo kawa.

Aw ayah,\* God ni nilum kemim aholyon tiniwamta. Ya ni teq ningo onmin nenaq gimen sansandek ka mar tonim eman ne gigo hib lehaq.

Ya helmo ne gibilenaq. Ya ne ginan inad diq bilaqayta. Teq ya imomo haiq. On mataw God ago gamuk helta huritayta na bunmo in ne ginan ginad bilaqaymo. <sup>2</sup> Na ezaqgo gamuk helta na i gigemab usad in i ginaq kuluwa-kuluwmo tuqus tutdaq na ago iyan. <sup>3</sup> I gamuk helta na muzinad an anan ginad bilaqsa ossa i Gimam God teq in atatin Yesus Kraiss inaq in gigem dimunta igad teq in i ginan ginad meqniysa i gigem midemeqmo usan.

*I bunmo an anan ginad bilaqgo adan muzinuu*

<sup>4</sup> Ari ningo onmin asor in i Gimam Iyahta gibilanta nazaqmo in ago gamuk helta muzinsa ya in giban nazaq huritim inad ayahmo dimniy. <sup>5</sup> Teq muran aw ni ya kazaq atoranmo nibilenaq. I an

anan ginad bilaqsa osuq. Gamuk nawa na ya gunun araƣ muturta a hi nibilenaq. Haiqqam. I gunun mebmemo wawta naqmo ya a ta nibilen tonaiq. <sup>6</sup> Teq i an anan ginad bilaqsa osamta na adan kazaq. God gunun igta na i muzin bugam. Teq ne gunun an anan ginad bilaqgota na tuteqmo muz daqayta na ago ne mebmemo huri-tiyta.

*I Kraiss ago gamuk waz naqmo hiqiyuu*

<sup>7</sup> Nazaqgo ya kazaq bilaqaiq? Na ezaqgo mataw gimileq iyayta kabemmo i gihulosim og saw haresmo tilehiy. Mataw na bilaqay, Yesus Kraiss in mat diq asan waqim og kab a hi gwahtimta haqay. Teq mat nazaq bilaqayta na in mataw kat negad in Kraiss ababunmo diq iyim luwaqta. <sup>8</sup> Nazaq iyan ne gihol asawan woltoyad osiy. Luweq i God ago os dimunta akabiyan ayahmo emim negta na ne tihik hules daqay. Ne mataw katiyayta na gigo gihol waz naqmo hiqiyad teq ne os dimunta na tuwaq daqay. <sup>9</sup> On mataw Kraiss ago asuleqin helta na amomo a hi muzinad in sibim ameb lehim suleq ta asor katiyta inaqmo muzinayta, mataw naqanta in God inaq a hi osayta. Ari on mataw suleq helta na amomo muzinad osayta, mataw naqmo in Gimam Iyah inaq osad in Atatin inaq osaytamo. <sup>10</sup> Nazaq iyan mat araƣ Kraiss ago asuleqin helta na waqeq ne gigo hib ad a hi bolid ne mat katiyta na nan dimunta bulonad gigem dimunta ugad hi ulumsihiy. <sup>11</sup> Na ezaqgo ne mat naqanta wazineq alowan tonsa in ne giyow nog nenaq osad ago suleq katiyta bilaqsa ne bilaqne mat na inaq araƣbmo suleq katiyta na bilaq nog iy daqay.

*Mat marorta na leheq on mataw na gibiyan bilam*

<sup>12</sup> Ari yaqgo gamuk kabemmo gibilendaqta usaq. Teq ya gamuk na sansandek kab mar tonnan inad a hi bilaqay. Ya inad emaiq, Ya ne gigo hib leheq i an anobun ahol waqad teq ya gamuk na gibilendaq haqaiq. Gibilendad teq ya nenaq i ginad tidimniy hasdaq haqaiq.

<sup>13</sup> Ari ni nimaqbab God in ulum kemim aholyon wamta na ago onmin kawa osayta ka in gigo zeq dimun eman ne gigo hib lehaq. Nawaqmo.

\* 1:1: Mataw asor ginad emay, Gamuk 'Aw ayah' usaqta ka Jon in on mataw Yesus anan helmo haqayta na gidauhan araƣ gitowun emim in nazaq bilamta haqay.

### 3 Jon

## Sansandek ezeqmanta Jon mar tonta Gamuk ameb lehaqta

Yesus ago on mataw gigo mat dänmebta anan Jon haqayta naqmo in sansandek ka mar tonmo. Mar tonim in mat ayahta arağ anan Gayus haqayta na ago hib eman lah. Gayus in mat arağ dimun diqta. In Yesus ago on mataw bunmo ginan anad bilaqyaqta. Sa mataw pesanta Yesus ago kabiy emnan bolsa in agem dimunta negad in giwaqim nenaq ago bitab osyaqta. In nazaq emsa Jon in abin wazan eram.

Teq Gayus ago hib mat arağ anan Diyotrefes haqay na osyaq. Mat na in Yesus ago on mataw gilikmanib inmo abin emid ayah iygo haqad in Jon aqez othasyaq. Othasad in Yesus ago mataw pesanta na bolsa gibaymuzyaq. Sa inmo ago walmataw asor in Yesus ago kabibiy mataw na gilumsihan tonsa Diyotrefes giwasihad gimuzsa in lotu-ib Yesus ago on mataw nenaq humab a ta hi em yaqay. Diyotrefes nazaq emsa Jon in Gayus ayon gamuk ka emim in mat na ago ahol asawan woltaygo agamukan mar ton ugim teq in mat arağ anan Demitriyus haqay na ugan in waqim ad Gayus ago hib tilah.

### I God ago kabibiy mataw gilumsiham

<sup>1</sup> Ari Yesus ago on matawta gigo mat danmebta arağ yaqmo kawa.

Gayus, ya ninmen sansandek ka mar tonim eman ningo hib lehaq.

Ya helmo nibilenaq, Ya ni ninan inad diq bilaqyaqta. <sup>2</sup> Yaqyow dimunta, God ameb ni niwitan dimun diqmo usaqta nazaqmo ni nihol teq ningo nagaq bunmo dimunmo usanmo haqad ya ninmen God bulonaqta. <sup>3</sup> I gimaqbaban asor bolim ni daq helta emsa in gimeb nibiyiyta na ago tiqibileniy. Helmo, ni tutimmo God ago gamuk helta muzinad osaqta agamukan na ya huritim ya inad ayahmo dimniy. <sup>4</sup> Na ezaggo nagaq arağ diq ya inad eman dimniy naqmo hiqiyaqta haiqqam. Yaqgo onmin gamuk helta muzinad osayta naqmo amomo ya huritim inad dimniy hasaqta.

#### *Gayus kabiy dimunmo emaqta*

<sup>5</sup> Yaqyow dimunta, God ago gamuk bilamta nazaqmo diq ni i gimaqbaban Kraiss ago kabiy emayta na gilumsihaqta. Gilumsihad mataw na asor uliq arağabta bo osayta na ago ni a hi bilaqad ni in gilumsihaqta. <sup>6</sup> Teq ni mataw gilumsihata na asor muleqim ta bolim in Yesus ago on

mataw kab osayta na gibilenim in ni ninan bilaqiy, I mat na ago hib lehan in i ginan anad diq bilamta haqiy. Nazaq iyan ya kazaq nibilenaq. Abeb mataw na le ningo hib a ta gwahtiqid ni gilumsiheq giqemid in ni nihulosad ginad dimniysa lehiy. Ni nazaq God anad muzinad gilumsihadaqta na in dimun diq. <sup>7</sup> Na ezaggo mataw na in Yesus abinib kabiy emnan haqad uliquliggo lehad luwayta. Luwad in on mataw en ta asor Juda a haiqta nagan gigo hib kabiy emad in amenin arağ a hi waqayta. <sup>8</sup> Nazaq iyan i mataw naqanta tigilumsiham. Gilumsihad i nenaq garabmo gamuk helta na akabiyian tiqemam.

#### *Diyotrefes daq meqinta emaqta*

<sup>9</sup> Ari ya Yesus ago on mataw ningo hib nawa osayta na gimen gamuk arağ mar tonim eman ne gigo hib tilahta. Teq mat anan Diyotrefes haqayta na in mat danmebta iygo haqad in i gigo gamuk na huritim gileh ugaqta. <sup>10</sup> Nazaq iyan ya ningo hib leheq teq ya in ago daq meqinta na ulalabmo tibilaqdaiq. In i gimalib nan meqinta alulin haiqta emaqta. Ad in daq naqmo amomo a hi emaqta. I gimaqbaban Kraiss ago kabiy emad luwim le in ago hib gwahtiqsa in agem dimunta negad nenaq a hi osaqta. Ad in ago mataw asor i gimaqbaban na gilowan tonnan ginad bilaqsa mat na in giwasihad gimuzsa in Yesus ago on mataw nenaq humab a ta hi wolayta.

#### *Demitriyus daq dimunta emaqta*

<sup>11</sup> Yaqyow dimunta, mataw daq meqmeqinta emsa ni gisen hi muz. Haiqqam. Ni daq dimdimuntaqmo em. Mat daq dimunta emaqta na in God ago matmo diqta. Ari mat daq meqinta emaqta na in God asit ahol a hi wamta.

<sup>12</sup> On mataw bunmo in mat anan Demitriyus haqayta na anan dimunta haqayta. Teq in ago daq God ago gamuk helta na inaq rirenim diq lehsa in abin dimunta na ulal iyaqmo. Sa yaqgo walmataw nenaq i mat na abin dimunta bilaqauqtamo. Teq i mat na anan helmo bilaqauqta na ago ni tuhuritta.

#### *Mat marorta na in Gayus ahol waqnan bilam*

<sup>13</sup> Ari yaqgo gamuk kabemmo nibilendaqta usaq. Teq ya sansandek kab mar tonnan inad a hi bilaqaq. <sup>14</sup> Ya inad emaiq. Sisaq haiq ya le tinibiydaiq haqaiq. Kam nab teq i an anobun ahol waqad an tubulonam.

Ne gigem kute nemsas osiy. Ni niyogniz kab osayta na in gigo zeq dimun eman ningo hib lehaq. Teq ni i giyogniz nab osayta na ginan amulik-mulikmo biyad i gigo zeq dimun ka ni negmo. Nawaqmo.

## Jud Gamuk ameb lehaqta

Sansandek ka Yesus amikqan anan Jud haqay na in mar tonta. On mataw Yesus ago nan huritayta na gidauhan araƒ gilikmanib mataw gimileq meqinta asor eraqim in nagah sen qwayim ahol waqiyta na amalib suleq katiyta gibileneq bilaq yaqay, I Yesus anan helmo tihaqim i God ago maror Moses bilamta na ahaqenib a ta hi osauq haq yaqay. Nazaq iyan i gunun araƒ muzinamta na haiq tiqiy haq yaqay. I samanmo diq luwad i gihol bilaqgo adan naqmo i muzinad tuqosam haq yaqay.

Haqsa teq Jud bilam, Haiq ham. Ne mataw na gigo gamuk katiyta na hi huritiy ham. Mataw nazaq bilaqayta na in Yesus awagamun helta na geg ugayta ham. God in ago on mataw in anan helmo haqayta na gimen dante amulikmo em nagta ham. Em negan on mataw in aqez na othaseq in amenin meqin diq tuwaq daqay ham. Nazaq iyan ne Yesus awagamun mebmemo waqiyta naqmo ne waz naqmo hiqiyad ne gihol anononmo wamuzeq osiy ham.

### Ne ginad God anan helmo haqayta na wamuz naqmo hiqiyad ne Yesus awagamun dimunta ababun giqez othasiy

<sup>1</sup> Yaqmo Jud ya Yesus Kraiss ago kabibiy mat araƒ. Ad ya mat anan Jems haqayta na amikqanmo.

Ne mataw God ago liley huritim muzinayta na gimen ya sansandek ka mar tonim eman nawa leh negaq. I Gimam God ne ginan anad bilaqayta. Sa Yesus Kraiss ne giwamuzsa ne dimunmo osayta.

<sup>2</sup> God ne ginan anad meqniyaqta na teq in ne gigem eman kiskismo usaqta na teq ne an anan ginad bilaqsa osayta na in ne gigo hib ayahmo diq gwahtiƒan.

*Yesus awagamun dimunta ababun in Yesus ago on mataw gilikmanib gwahtiƒiy*

<sup>3</sup> Ya iyognizmo diq, God in i teq ne nenaq araƒibmo gilumsihim giwamta na agamukan asor ya sansandek kab ne giyon mar tondaƒ haqad inad bilamta. Ta teq afaƒan araƒ nawa ne gigo hib gwahtiƒsa iyan ya inad buliyim muran ya gamuk ta araƒ kazaq gibilenaiq. God in ago on mataw tawonta suleq nagta na ne waz naqmo hiqiyeq osiy haqaiq. Suleq na God in i tiqigim in suleq ta araƒ muturta igdaqta haiq tiqiy. Nazaq iyan mataw ta asor God ago suleq na bab ugad wazbuliyan tona

ne giqoƒasid lehiy. <sup>4</sup> Na ezaqgo mataw asor ulilemim lehim in nawa ne gilikmanib gwahtiƒim kat negad osayta. Teq God kwaziqmo mataw naqanta giyon tibilaaƒan usaqta. Ussa mataw na in teq God ago hazizirib gwahtiƒeq gigo daq meqinta na amenin meqin diq tuwaq daqayta. Mataw na in God agem dimunta igaqta na asuleqin wazbuliyim bilaqay, God agem dimunta igaqta haqayta. Nazaq iyan i ginadibmo daq hares i gihol bilaqayta naqmo i emmo emuq haqayta. In nazaq haqad Yesus Kraiss gileh ugayta. Teq Yesus Kraiss amomo in i gigo Maror teq i gigo Iyahta iyim osayta.

<sup>5</sup> Ne ginad emiy. Kwaziqmo Isrel on mataw Isip-ub giqirƒuran ossa Iyahta in gilumsihim giwaq bugan in saw na hulossim gigo os meqinta na gileh tuqug bugiy. Teq haiq. Abeb Iyahta in on mataw na gilikmanib asor in ago helmo a hi haqiyta na ginol eman tumoƒiy. Helmo, ne wagam na tuhurit bugiyta teq ya ne ginad enqenunsa ne nagah na anadin a ta em daqay haqad ya a ta gibilen tonaiq. <sup>6</sup> Ad nazaqmo kwaziqmo angelo asor in giben ayahta usta na itiyonim in gigo banmo diq God nagta na tuhulosiy. Hulossa Iyahta in ginan agem meqniyan in angelo na gibensen am awaz meqinta a hi tartaydaqta na amalib tigiƒirƒur. Giqirƒurim giƒeman in saw aromriƒ inaƒtab osad in God ago hazizir akaman ayahta na amen emad nawa osayta. <sup>7</sup> Ad nazaqmo kwaziqmo mataw uliq Sodom-ubta na teq uliq Gomora-ibta na teq uliq asor in gigerab sinsin usiyta nagan in God aqez othasiyimo. Othasad in an haresmo hureqim inaƒq usad teq mat in mat ta araƒ ahol waqad ahol eraƒsa in inaƒq daq meqinta em yaqaymo. Emsa God giƒeman in saw faƒ tutimmo oyad a hi miyaqta nab gihol titiysa osad in on mataw bunmo gimen tarin nog iyim osayta.

<sup>8</sup> Ta teq mataw muran kawa ne gilikmanib gwahtiƒim kat negad osayta na in nazaq diq emaytamo. In sen qway nog iyim nagah ahol waqiyta na bilaqad in daqdaƒ emad God ameb in gihol anumlan inaƒq iyaqta. Ad in nan dimunta othasad in angelo giwaz meqmeqinta nagan inaƒqmo gibilawunaytamo. <sup>9</sup> Teq kwaziqmo angelo gigo amebta Maikel in Satan inaƒq an mugad nog diq Moses asan waqdaƒta na ago in bilaqad Maikel in Satan wadad gamuk atoranta amalib a hi bilawun. Haiqgam. In kazaq bulon, Iyahtaƒmo teq ninadsa ni niqez tihiqiydaq haqad in bulonta. <sup>10</sup> Ta teq mataw katiyta nawa ya in ginan teko tigibilenta na in bugaw giwaz meqinta nagan gilulin a hi hurit hasim in a hi girabunadmo gibilawunayta. Mataw na ginad ayemyemqanta karuw kwasikta ginad nog. Ad in gigo daq meqinta gisanib

usaqta naqmo in muzinayta. Muzinsa in gigo daq meqinta na in gimo gimeqin tonaqta. <sup>11</sup> Mataw na oseq teq timeqniy has daqayta. Na ezaqgo in Kein daq am nogmo in emayta. Ad in ginad helta hulosad Balam daq agadanta amta nazaq in emad in mataw gigo mani hureqad suleq katiyta gibilenayta. Teq Kora ayogniz nenaq God aqez othasan in ginol eman moqiyta nazaqmo in God aqez othasad osim moqaytamo.

<sup>12</sup> Tutimmo ne Yesus ago on mataw nenaq humab wolim zib alowab ossa mataw katiyta na bolim nenaq osad in ne gigo daq na eman God ameb meqniyaqta. Ad in ne gigo humabub osad in ne gigo daq na a hi wazinad in gimo gihol naqmo in anadin emayta. In saman diqta bilaqne onqas dubta tim waqim ad haris haresmo lehsa in urom waqim ad a hi bolaqta nazaq nog. Teq in bilaqne ay araq anon emdaqta akamnib anon a hi emim teq may bugan mataw abeqar inaqmo titeqim hunegan lehaqta nazaq nogmo. Ay nazaqta na ame gigermo tumomta nog. <sup>13</sup> Mataw na gigo luw os in bilaqne kamis wolim bolsa mataw in giwasihgo biyab a hi iyaqta nazaq nog. Ad in daq amebay inaqta haresmo ulalabmo emayta, bilaqne kamis wolim bolad asabalbalin husta yuw amalib ulalab bolaqta nazaq nogmo. Teq in bilaqne ulig asor kaitab oyad turim anononmo gigo dan muzim a hi lehayta nazaq nog. Nazaq iyan God in gimen ban aromriq inaqta na tuwastitayan usaqta. Ussa mataw na teq ban meqinta nab kuluwa-kuluwmo tuqos daqayta.

<sup>14</sup> Mat anan Enok haqayta na in Adam asenlul ago anulingan 7-ta nab in gwahtimta. Gwahtiqim in nagah abeb teq gwahtiqdaqta na ago bilaqad in mataw meqinta na ginan kazaq bilam, Iyahta in ago angelo tawonta kuluwmo diq ginaq bolsa ya gibiy ham. <sup>15</sup> In boleq mataw bunmo hazizirib gilum kemeq gigo daq meqinta amenin bunmo tineg bugnan ham. Kam nab Iyahta in mataw God gileh ugad anad a hi muziniyta na ginan bilaqsa in gihol tiloyin kem daqay ham. Giloyin kemad in God gihar ugad gamuk atoranmo buloniyta na anadin a ta emad in gigo daq na loyinsa in daq meqin diqta tiqiydaq ham.

<sup>16</sup> Teq mataw katiyta ne gilikmanib nawa osayta na in tutimmo gigem meqniysa nan kabemmo bilaqayta. Ad in ginad meqinta gigemab usaqta naqmo muzinayta. In gihol abin atoranmo iluwad teq in mataw ginad wamuzgo haqad soysoy negayta.

*Ne ginad helta naqmo in ne gigem zaway ugad usan*

<sup>17</sup> Ari ya iyognizmo diq, i gigo Iyahta Yesus Kraiss ago Aposel in nagah abeb

teq gwahtiqdaqta na ago tibilaqiyta. Bilaqan muran ne gamuk na anadin ta emiy. <sup>18</sup> Yesus ago Aposel in kazaq ne gibileniy, Kam abebtanta na bo sinsin tiqiysa mataw God ago gamuk helta na tibilawun daqay haqiy. Ad in God gileh ugad in ginad meqinta gigemab gwahtiqsa in tumuzin daqay haqiy. <sup>19</sup> Mataw nazaq emayta na in Yesus ago on mataw gihuserayta. Teq in og ka ago ginad meqinta muzinsa God ago Bugaw Dimunta in gimuganib a hi usaqta.

<sup>20</sup> Ya iyognizmo diq, ne mataw naqanta hikidik gimuziniy. Tuteqmo ne ginad tawon diqta God anan helmo haqayta na amalib ne giwaz meqniyeq turiy. Ad kam bunmo ne God ago Bugaw Dimunta ago zaway amalib God ina q gamuk emiy. <sup>21</sup> God ne bunmo ginan anad bilaqsa ne in agerabmo diq iyeq ossa in ne giwamuzan. Teq i gigo Iyahta Yesus Kraiss ne ginan anad meqniysa in ago os dimunta kuluwa-kuluwmo osayta negnan bilamta na ne amen emeq osiy. <sup>22</sup> Ad ne mataw ginad helta asitmo usaqta na ginan ginad meqniysa gilowan toniy. <sup>23</sup> Mataw asor faq ginoyan tonsa ne giwazeq gihureqid in ne gigo hib ta boleq dimunmo osiy. Teq mataw asor gigo daq meqinta in bilaqne giholsihen anumlan ina qta nazaq nogmo giholib usaqta. Nazaq iyan ne mataw na ginan ginad meqniysa ne gihol waz naqmo hiqiyad teq gilumsihiy. Gilumsihad ne mataw na gigo giholsihen anumlan ina qta na rabunad hi waziy.

*I bunmo God abin iluwuq*

<sup>24</sup> Ari God ne giwamuzsa ne a hi woq daqay. Ad in ne giqemid ne in anognib gwahtiqeq ahol anuwan ayahtab turad ne giholib daq araq ananin waq daqayta na hiqiysa ne ginad dimniysa titur daqay. <sup>25</sup> God amomo in God iyim osaqta. Teq in i gigo Iyahta Yesus Kraiss ago kabiy amalib i gilumsihim ta giwamta. Nazaq iyan i bunmo God abin sorid ulilib gwalsa in amomo i bunmo gigo maror ameb diqta iyeq osan. Ad in amomo zaway bunmo wazsa nagah bun diqmo in ahaqenib iyeq osad anad muziniymo. Kwaziqmo diq in nazaqmo osta. Ad kam kab in nazaqmo osaqta. Teq abeb in nazaq tuqos tutdaqmo. Hel diqtaqmo.



## Revelesen o Krais gamuk ulilemabta Jon isihunta Gamuk ameb lehaqta

Kwaziqmo uliq Rom-ub on mataw Yesus ago nan huritayta na in kam meqin diqta waqiy. Kam nab Rom gigo king bilaqyaq, Yaqmo god haqyaq. Ne bunmo ya iwazinad gibakbakan orqayeq yaqmen tamaz emiy haqyaq. Haqsa Yesus ago on mataw gituw hiqiysa bilaq yaqay, Haiq haq yaqay, i gigo King amulikmo osaq haq yaqay. In anan Yesus haq yaqay. Haqsa Rom in on mataw na gimeqin diq tonad afaqan kabemmo negad teq in kabemmo ginol eman moq yaqay. Sa Jon in on mataw na gigem zaway negid in giwaz meqniyeq afaqan na sorad Yesus gileh a hi ug daqay haqad in gimen sansandek ka mar tonta.

Gamuk kab nagah kabemmo muran gwahtiqaqta na teq abeb gwahtiqdaqta na ago gamuk awowun giqusaqta. Teq gamuk awowun ka alulin in kazaq. Yesus Krais in Iyahta iyim osad in og kab ago on mataw bunmo giwamuzim osaqta. Ossa uliq Heven-ib nagah kayeqta bunmo in God teq in Atatin inaq gibin iluwad osayta. Teq og kab kabiy daq bunmo in God-mo anad muzinin lehaqta. Lehsa kam abeb-tanta nab teq God in Yesus abenab ago bab bunmo giwazid woqsa in Satan wazid tuwoqdaqmo. Kam nab Yesus in ago kabiy emid tihiqiyid teq God in on mataw zaway diq iyim osad gihol a hi hureq hasiyta na naw tinedaq. Negid in God inaq ginad dimniysa kuluwa-kuluwmo osad in afaqan araq a ta hi waq daqay. Na ezaggo bab bunmo tihiqiyid God in nagah bunmo emid muturtamo tiqiydaq.

Nazaq iyan kam bunmo Yesus ago on mataw inmo abinib afaqan sorayta na in gamuk ka ahol waqad in ginad a hi meqniysa afaqan sorad giwaz meqniyeq tuqos daqay.

### **Yesus Krais in ago on mataw gidauhan 7 nazaq gimen nan am**

<sup>1</sup> Gamuk ka kwaziqmo ulilemim ussa Yesus Krais eman ulalab gwahtimta. Gwahtiqan God in Yesus-mo atowun emim gamuk ka uqta. In anad Yesus gamuk ka waqeq ago kabibiy mataw gibilensa in nagah hidmo gwahtiqdaqta na ago tuhurit daqay haqad. An Yesus in ago angelo araq eman ago kabibiy mat Jon ago hib lehim gamuk ka bulonta. <sup>2</sup> Bulonan Jon in God ago gamuk teq Yesus abin in huritta ka mar

tonad in ameb nagah ahol wamta kagan awagamun inaqmo wastitayimmo tumar tonmo. <sup>3</sup> Mat God ago nantut agamukan ka ahol waqad bilaqaqta na in gamuk ka muzin bugeq teq in tidimniydaq. Ad on mataw gamuk ka huritad osayta na in nazaqmo gamuk ka muzin bugeq teq in tidimniy daqaymo. Na ezaqgo nagah ka akamun sinsin tiqiyaqta na ago iyan.

*Jon in Yesus ago on mataw gidauhan 7 nazaq gimen gamuk mar ton nag*

<sup>4-5</sup> Yaqmo Jon. Ya gamuk ka mar tonim eman Yesus ago on mataw gidauhan 7 saw Esiya-ib osayta na gigo hib lehaq.

I gigo God kwaziqmo osta teq muran in os tutaqta teq abeb in boldaqtamo. In teq bugaw 7 in ago ban tawonta na ameb turayta na teq Yesus Krais inaq in bunmo gigem dimunta negad teq in ne giqemid gigem kute nemsas osiy.

Yesus in God ago gamuk wastitayimmo diq bilaqaqta. Teq mataw tumoqiyyta gilikmanib inmo danneb hodhodab eramta. Eraqim in king og kabta na bunmo giwamuzim osaqta. I gigo daq meqinta i giqirquran ossa inmo anedan amalib i giqamun na tihis ig. <sup>6</sup> Has igim in i giqeman i in ago maror aduganib tugwah-tiqim i God ago on mataw tamaz emayta tiqiyim osaqta. Nazaq iyan kam bunmo i Yesus abin ayahta na iluwsa in zaway diq iyeq nagah bun diqmo giwamuzad kuluwaw-kuluwmo osan. Hel diqtaqmo.

<sup>7</sup> Ne gidek emiy.

In onqas amalib oseq bolsas on mataw bunmo ahol tuwaq daqay, mataw emub ulumiyta na inaqmo.

Ahol waqad on mataw en bunmo og kab osayta na gaq wazad ginad meqniy naqmo hiqiy daqay.

In nazaqmo diq tiqiydaq. Hel diqtaqmo.

<sup>8</sup> God Iyahta bilam, Nagah bunmo gilulin na yaqmo ham. Ad nagah bunmo hiqiydaqta akaman na yaqmo wazaiqta ham. God Zaway Bunmo Wazaqta na in nazaq bilamta. In muran osaqta teq kwaziqmo in osta teq in abeb boldaqtamo.

*Jon in Krais ahol wam*

<sup>9</sup> Ya ne gimaqbab Jon. Ya nenaq i araqibmo Yesus muzad afaqan sorauqta. Ad Yesus ne giqeman ne God ago maror aduganib osayta nazaqmo in ya iqeman ya ne nenaq God ago maror aduganib tuqosaiqta. Teq in ne zaway negsa ne afaqan sorad gituw a hi hiqiydaqta nazaqmo in ya ilumsihsa ya afaqan sorad ituw a hi hiqiydaqta. Ya God ago gamuk anan helmo haqad Yesus abin ulalabmo bilaqaiqta na ago mataw ya iwazim nud anan Patmos haqayta kab iqemiy. <sup>10</sup> Iqeman ossa ari Iyahta ago kam Sande araqab in

ago Bugaw Dimunta ya iholib ayahmo bol. Bolan ya ibun ban mat araƣ atoranno lileysa ya in aqez bilaqne taur ulamayta nazaq nog ya hurit. <sup>11</sup> Sa mat na lileyim bilam, Nagah bunmo ni ahol waqdaqta na ni buk-ib mar toneq emid Yesus ago on mataw gidauhan 7 na gigo hib lehan ham. Yesus ago dauh uliq Efesus-ibta na teq uliq Samerna-ibta na teq uliq Pergamum-ubta na teq uliq Tayataira-ibta na teq uliq Sardis-ibta na teq uliq Filadelfiya-ibta na teq uliq Laodisiya-ibta na gigo hib ni nagah ahol waqdaqta na agamukan emid lehan ham.

<sup>12</sup> Haqsa ya ihol tubuliy, mat nog ibilenaqta na ahol waqdaqta haqad. Ya ihol buliyim lam 7 nazaq gol-ib emiyta ahol way. <sup>13</sup> Ahol waqad ya mat araƣ lam na gilikmanib tursa ahol tuwaymo. Mat na awaqan bilaqne Mat Atatin awaqan nog. In ago tubusan sisaqta asen isih bugta. Teq in nagah araƣ gol-ibta am gan abanib huregan usta. <sup>14</sup> In afaqin teq aqensan bunmo hus diq sipsip ahulgen teq onqas nogta. Ad in ameqnagin bilaqne faq amileq oyaq nazaq nogtamo. <sup>15</sup> Teq in asen awaqan bilaqne ain baras faq ayahta ameb usim akakaqan iyad hikliyanagta nazaq nogta. Ya in aqez huritsa bilaqne yuw ayahta sibat ahulan iyaq nazaq nog ya huritta. <sup>16</sup> Teq in aben aqabun ban ulig 7 nazaq giwazta. Ad baqir araƣ ame gigerta ame meqin diqta atenmosib gwahtiqim usta. Teq in anobun bilaqne zeq atoranno oyaq nazaq nog ya ahol wayta.

<sup>17</sup> Ahol waqad ya in asen agerab woqim ya bilaqne mat tumomta nog iyim us. Ussa in aben aqabun ger ya iholib emim iwazad ibilan, Ni hi rab ham. Ya mat aqen diqta teq ya mat abebtantamo ham. <sup>18</sup> On mataw kayeqmo kuluwa-kuluwmo osayta na alulin yaqmo ham. Ya tumoyta ham. Teq ni ya ibiy ham. Ya kayeqmo osaiq ham. Osad ya kuluwa-kuluwmo tuqos tut-daiq ham. Yaqgo zaway kazaq usaq ham. Ya mataw tumoqiyta gidanin has negid in mataw moqiyta gigo uliq huloseq tugwah-tiq daqay ham. Teq ya in gidanin otid in uliq nab tuqos tut daqay ham. <sup>19</sup> Nazaq iyan nagah ni ahol tuwamta ka bunmo ni mar ton ham. Ad nagah muranta teq nagah abeb teq gwahtiqdaqta na inaƣmo ni mar tonmo ham. <sup>20</sup> Ari ya iben iqabnib ulig 7 usaqta ka teq lam gol-ib emiyta ka gilulin ulilemim usaqta na ya tinibilennan ham. Ulig 7 na in yaqgo on mataw gidauhan 7 na gigo angelo amulik-mulikmo gitowun ham. Teq lam 7 na in yaqgo dauh 7 naqmo gitowun ham.

## 2

*Yesus in ago on mataw uliq Efesus-ib osayta na gimen gamuk bilam*

<sup>1</sup> Haqad mat na ya ibilenim bilam, Ari ni yaqgo on mataw uliq Efesus-ib osayta na gigo angelo amen gamuk kazaq mar ton ham.

Mat aben aqabnib ulig 7 giwazaqta na teq in lam gol-ib emiyta 7 gilikmanib luwaqta na, mat na kazaq ne gibilenaq ham. <sup>2</sup> Ya ne gigo kabiƣ daq bunmo ne emayta na tuhurit ham. Ad ne giholtuw bulad zaway iyim tursa ya tigibiymo ham. Ne mataw meqinta nenaq osnan gituw hiqiyayta ham. Teq mataw katiyad bilaqay, I inaƣmo aposel-mo haqayta na ne gilum kemim gigo daq katiyta na ahol waq kemayta ham. <sup>3</sup> Ya ibin ne giholib usaqta na ago mataw ne gimeqin tonayta ham. Gimeqin tonsa ne zaway diq iyim turad afaqan na sorad gituw a hi hiqiyayta ham. Ne gigo daq na bunmo ya tuhuritta ham.

<sup>4</sup> Teq yaqgo gamuk araƣ kazaq ne gigo hib lehaq ham. Mebmebmo diq ne ya inan helmo haqiyta nab ne ya inan ginad diq bilaqayta ham. Ari muran ne ya inadin ayahmo diq a hi emayta ham. <sup>5</sup> Nazaq iyan ne ban ulilibta nab osim woqiyta na anadin emiy ham. Ne ginad buliyeq ne gigo daq meqinta gileh ugad mebmebmo ne daq dimdimunta em yaqayta na ne a ta em toniy ham. Haiq iyid ya ne gigerab leheq ne gigo lam na abanab tuwalem-daiq ham. Ne ginad a hi buliyid ya nazaqo tiqem-daiq ham. <sup>6</sup> Teq ne gigo daq dimunta araƣ na in kazaq ham. Ne on mataw Nikolas muzayta na gigo daq huloso mo diq hulosaqta ham. Ya nazaqmo ham. Ya in gigo daq anan inad a hi bilaqatamo ham. <sup>7</sup> Ari mat adek inaƣta na in Bugaw Dimunta yaqgo on mataw gidauhan bunmo gamuk gibilenaqta ka huriteq anad eman ham. On mataw zaway meqinta giquriyam bug daqayta na bunmo ya gibilenid in ay anon neqim kuluwa-kuluwmo osayta na tineq daqay ham. Ay na God ago saw dimunta Paradais-ib turaqta ham.

*Yesus in ago on mataw uliq Samerna-ib osayta na gimen gamuk bilam*

<sup>8</sup> Haqad mat na ibilenim bilam, Ari ni yaqgo on mataw uliq Samerna-ib osayta na gigo angelo amen gamuk kazaq mar ton ham.

Mat aqen diqta na teq abebtanta na, in ne gibilenaq ham. In momta teq muran in kayeqmo osaqta ham. Mat na kazaq ne gibilenaq ham. <sup>9</sup> Ne afaqan sorad samanmo ginaghan haiqmo osayta na ya tuhurit ham. Ta teq ne giwitan

gigo nagh kabemmo diq usaqta ham. Ad mataw asor ne gibilawunayta na ya tuhuritmo ham. Mataw na bilaqay, I Juda-mo gisenlul haqayta ham. Teq in Juda gisenlul a haiqta ham. Na in Satan-mo asenlul ham. <sup>10</sup> Ari afaqan kazaq teq ne gigo hib gwahtiqa ne hi rabad gihol asawan woltayeq osiy ham. Ne gidek emiy ham. Satan teq ne asor gihunegid bit giqirquran osaytab tileh daqay ham. Daq na ne gilum waqgo giholib gwahtiqaqta ham. Gwahtiqaq ne afaqan teq santitiy na kam 10 nazaq tisor daqay ham. Sorad ne helmo haqad oseq le ne moq daqayta akaman nab ne moqiy ham. Id teq ya os dimunta kuluwa-kuluwmo osayta na naw nog tinekdaiq ham. <sup>11</sup> Ari mat adek inaqa na in Bugaw Dimunta yaqgo on mataw gidauhan bunmo gamuk gibilenaqta ka huriteq anad eman ham. Mat aw nog zaway meqinta giquriyam bugeq in moq gigerta na a hi loyin daqay ham.

*Yesus in ago on mataw uliq Pergamum-ub osayta na gimen gamuk bilam*

<sup>12</sup> Haqad mat na ibilenim bilam, Ari ni yaqgo on mataw uliq Pergamum-ub osayta na gigo angelo amen gamuk kazaq mar ton ham.

Mat ago baqir ame gigerta ame meqin diqta inaq na in kazaq ne gibilenaq ham. <sup>13</sup> Ya uliq ne osayta na ago tuhurit kem ham. Satan in ago marorgo ban eman ne gigo uliq nabmo diq usaqta ham. Ta teq ne ya ibin waz naqmo hiqiyayta ham. Kwaziqmo mat ya inad muz bugad yaqgo gamuk bilaqyaqta anan Antipas haqayta na in ne gilikmanib ossa mataw wol emiyta ham, uliq Satan osaqa nabmo ham. Teq kam meqinta nab ne ya inan helmo diq haqad gileh a hi yayiy ham.

<sup>14</sup> Ari yaqgo gamuk asor kazaq ne gigo hib lehaq ham. Ne gigo mataw asor Balam ago daq muzinayta ham. Kwaziqmo Balam in Balak isihunan Balak in Isrel on mataw kat negad gihureqsa in daq meqintab woq yaqayta ham. Balak in Isrel on mataw kat nega in god katiyta giyon tamaz akaruwan neqad teq in an haresmo hureq yaqayta ham. <sup>15</sup> An nazaqmo Nikolas asenlul nenaq in daq meqinta ne giqisihunsa ne gigo asor in muzinaytamo ham. <sup>16</sup> Nazaq iyan ne ginad buliyad ne gigo daq meqinta na gileh ugiy ham. Ne nazaq a hi emid teq ya hidmo ne gigo hib tilehdaiq ham. Leheq yaqgo baqir iteb kawa usaqta ka amalib ya mataw na nenaq an tuwoldaiq ham. <sup>17</sup> Ari mat adek inaqa na in Bugaw Dimunta yaqgo on mataw gidauhan bunmo gamuk gibilenaqta ka

huriteq anad eman ham. Mat aw nog in zaway meqinta giquriyam bugid ya manna bret kaitib woqim ulilemim usaqta na tinekdaiq ham. Ad ya gig araq husta tinekdaiqmo ham. Gig nab in giholnan muturta mar tonan usaqta ham. Mat araq diq in ginan muturta na a hi huritdaq ham. Mat gig wamta naqmo amomo in aholnan muturta na tuhuritdaq ham.

*Yesus in ago on mataw uliq Tayataira-ib osayta na gimen gamuk bilam*

<sup>18</sup> Haqad mat na ibilenim bilam, Ari ni yaqgo on mataw uliq Tayataira-ib osayta na gigo angelo amen gamuk kazaq mar ton ham.

God atatin na ham in ameqnagin bilaqne faq atoranmo oyaq nazaq nogta ham teq in asen bilaqne ain baras hikliyan nog iyaqta ham in kazaq ne gibilenaq ham. <sup>19</sup> Ya ne gigo daq bunmo ne emayta na ago tuhurit ham. Ne on mataw ginan ginad diq bilaqyaqta ham. Teq ne ya inan helmo haqaytamo ham. Ne on mataw gilumsihad kabiy dimunta emayta ham. Ad ne afaqan sorad zaway diq iyim turayta ham. Teq muran ne gigo daq dimunta ne emayta na in kwaziqmo ne daq em yaqayta na giquriyam bugaq ham. Daq bunmo ne emayta na ya tuhuritta ham.

<sup>20</sup> Teq yaqgo gamuk araq kazaq ne gigo hib lehaq ham. Ne aw anan Jezebel haqayta na hulosan in ne gilikmanib osaqa ham. Aw na bilaqay, Ya God ago nantut araq haqay ham. Haqad in yaqgo kabibiy on mataw kat nega in an haresmo hureqad teq in god katiyta giyon tamaz akaruwan neqayta ham. <sup>21</sup> Ya inad aw na anad buliyan haqad ya hulosan osaqa ham. Ta teq haiq ham. In ago daq meqinta na gileh ugnan atuw hiqiyay ham. <sup>22</sup> Nazaq iyan ne gidek emiy ham. Ya aw na moq araq ayahta tuqugdaiq ham. Ad aw na ayogniz in inaq daq meqinta emayta na in ginad buliyeq aw na ago daq meqinta na a hi hulosisid teq ya afaqan ayahmo in tinekdaiqmo ham. <sup>23</sup> Negad ya aw na ago onmin ginol emid tumoq daqaymo ham. Nazaq iyid teq yaqgo on mataw gidauhan bunmo in yaqgo tuhurit kem daqay ham. Ya mataw bunmo ginad teq gigem gilum kemaiqta ham. Gilum kemad ya ne amulik-mulikmo gigo daq ahunibmo amenin tinekdaiq ham.

<sup>24</sup> Ari ne on mataw ta asor uliq Tayataira-ib osayta na ham ne aw na ago suleq meqinta a hi muziyta ham. Ad daq asor anan Satan ago suleq awaz meqinta haqayta na ago ne a hi huritiytamo ham.

Ya ne kazaq gibilenaiq ham. Ya kabiy afaqanta araq a hi negdaiq ham. <sup>25</sup> Daq amulikmo ne em daqayta na in kazaq ham. Nagah bunmo ne wazayta na ne waz naqmo hiqiyeq ossa le ya muleqeq ta boldaiq ham. <sup>26</sup> Ari mat aw nog in zaway meqinta giquriyam bugad teq in yaqgo daq bunmo muzinad oseq le in gigo kam abebtanta iyid teq,

Ya on mataw na zaway negid in on mataw en bunmo tigiwamuz daqay ham.

<sup>27</sup> Giwamuzad in gwatuq ain-ibta wazeq amalib ginol titaysa in dauh amikmikta tiqiy daqay ham.

Bilaqne mat reb wolzilayid tiqdaqta nazaq ham.

Ya imam zaway yagan ya on mataw giwamuzaiqta nazaq ya in zaway negid in on mataw tigiwamuz daqaymo ham. <sup>28</sup> Ad in bab bunmo giquriyamiyta na amenin ya ulig boy na tinegdaiq ham. <sup>29</sup> Ari mat adek inaqtta na in Bugaw Dimunta yaqgo on mataw gidauhan bunmo gamuk gibilenaqta ka huriteq anad eman ham.

### 3

*Yesus in ago on mataw uliq Sardis-ib osayta na gimen gamuk bilam*

<sup>1</sup> Haqad mat na ibilenim bilam, Ari ni yaqgo on mataw uliq Sardis-ib osayta na gigo angelo amen gamuk kazaq mar ton ham.

Mat aholib God ago bugaw 7 giqusaqta na teq in ulig 7 giwazaqta na in kazaq ne gibilenaq ham. Ya ne gigo daq bunmo ne emayta na ago tuhurit ham. Ne gibin mataw God anan helmo diq haqayta nazaq usaqta ham. Teq haiq ham. Ne bilaqne mataw tumoqiya nog iyay ham. <sup>2</sup> Nazaq iyan ne gime rireqeq saw waqad osiy ham. Ne gigo daq dimunta amulik-mulikmo us tutaq ham. Daq nagan tihiqiynan diq tonaqta teq ne ulumsihsa in hi hiqiyan ham. Na ezaqgo ya ne gigo daq araq God ameb titnonim usaqta na ahol a hi waqaiq ham. <sup>3</sup> Nazaq iyan gamuk ne kwaziqmo huritim waqiya na ne anadin ta emiy ham. Anadin emad ne ginad buliyad gamuk na anononmo muziniy ham. Ari ne gime rireqeq saw a hi waqsa teq kam araq ne a hi hurit daqayta nab ya tuboldaiq ham. Bolad mat rin tonaqta kiskismo bolaqta nazaq ya boleq ne tigitirawundaiq ham.

<sup>4</sup> Teq ne gigo on mataw asor Sardis-ib osayta na in gigo tubusan eman anumlan inaq a hi iyta ham. On mataw na dimunta iyim abeb in tubusan husta emid ya nenaq loq gelad tiluwamta ham. <sup>5</sup> Mat aw nog in zaway meqinta

giquriyam bugid teq ya tubusan husta giholib tiqemdaiq ham. Ad yaqgo buk on mataw kayeqmo kuluwa-kuluwmo os daqayta ginan usaqta nab ya in ginan a hi suholdaiq ham. Teq ya in gibin ya imam ago angelo nenaq gimeb tibi-laqdaiq ham. <sup>6</sup> Ari mat adek inaqtta na in Bugaw Dimunta yaqgo on mataw gidauhan bunmo gamuk gibilenaqta ka huriteq anad eman ham.

*Yesus in ago on mataw uliq Filadelfiya-ib osayta na gimen gamuk bilam*

<sup>7</sup> Haqad mat na ibilenim bilam, Ari ni yaqgo on mataw uliq Filadelfiya-ib osayta na gigo angelo amen gamuk kazaq mar ton ham.

Mat tawon diqta na teq in daq helta alulin diqta na teq in King Devit ago ban waqim abinib turaqta na teq in dan ez hasid a hi ot daqayta na teq in dan ez otid a hi has daqayta na, mat na kazaq ne gibilenaq ham. <sup>8</sup> Ya ne gigo daq bunmo ne emayta na ago tuhurit ham. Ne ahol waqiy ham. Ya ne ginognib dan ez hasan usaq ham. Mat araq dan ez na otdaqta haiq ham. Teq ne gigo zaway asitmo na ago ya tuhuritmo ham. Ta teq ne yaqgo gamuk muzinad ne ya gileh a hi yayayta ham. <sup>9</sup> Ne gidek emiy ham. Mataw asor bilaqay, Igmo Juda gisenlul haqad teq in Satan-mo asenlulta na, mataw na in Juda gisenlul a haiqta ham. Na in mataw gimileq meqinta ham. Nazaq iyan ne gime tih nemeq usan. Ya mataw na giqemid in boleq negmo ginognib gibakbakan tuqulum laquw daqay ham. Ya nazaq gitonid teq in ginad tiqem daqay, Ya negmo ginan inad diq bilaqtaqta haq daqay ham. <sup>10</sup> Ya ne gibilenan ne zaway diq iyim turad afaqan tisoriyta ham. Nazaq iyan ya ne giwamuzad gilumsihsa afaqan on mataw bunmo gilum waqdaqta na in ne a hi gimeqin tondaq ham. Afaqan na in nawa on mataw og saw bunmo osayta na gigo hib tugwahtiqnan tonaq ham. <sup>11</sup> Ya hidmo ne gigo hib nawa tilehaiq ham. Nazaq iyan nagah ne gibenab tuwazayta na ne waz naqmo hiqiyyi ham. Luweq mat araq ne gigo ban waqeq naw ne waq nagiya na inmo waqdaq ham.

<sup>12</sup> Ari mat aw nog in zaway meqinta bunmo giquriyam bugid teq ya in giqemid in tituq nog yaqgo God ago bitatur daqay ham. Turad in God ago bit na huloseq asanib asit a ta hi gwahtiq daqay ham. Sa yaqgo God aholnan teq in ago uliq anan ya on mataw na giholib tumar tondaq ham. Uliq na anan Jerusalem Muturta haqayta ham. Yaqgo God in uliq na emid in Heven huloseq gehitiqdaqta ham. Ad yaqmo

iholnhan muturta ya in giholib tumar tondaigmo ham. <sup>13</sup> Ari mat adek inaқта na in Bugaw Dimunta yaqgo on mataw gidauhan bunmo gamuk gibilenaқта ka huriteq anad eman ham.

*Yesus in ago on mataw uliq Laodisiya-ib osayta na gimen gamuk bilam*

<sup>14</sup> Haqad mat na ibilenim bilam, Ari ni yaqgo on mataw uliq Laodisiya-ib osayta na gigo angelo amen gamuk kazaq mar ton ham.

Mat heltaqmo haqad God ago gamuk bunmo titnonimmo bilaqta na teq in nagah bunmo God gıqamta na alulinmo diqta na, mat na kazaq ne gibilenaq ham. <sup>15</sup> Ya ne gigo daq bunmo ne emayta na ago tuhurit ham. Ne mudıtqan diq a haiq ham. Teq ne afan diq a haiqmo ham. Ya inad ne afanfan iyiy haqaiq ham. O ne mudıtqan diq iyiy haqaiq ham. <sup>16</sup> Teq haiq ham. Ne afanfanta teq mudıtqanta gigo liqabmo iyayta ham. Ne afanfan diq a hi iyayta ham. Teq ne mudıtqan diq a hi iyaytamo ham. Nazaq iysa iyan ya ne ginan ituw hiqiysa iteb ginilid ne tugwahtiq daqay ham.

<sup>17</sup> Ne ginad emay i gigo mani kabemmo haqayta ham. I ginaghan kabemmo usaqta haqayta ham. I nagah arağ ago siqim a hi iyauq haqayta ham. Teq haiq ham. Ne meqin diq osayta na ago ne ginad a hi emay ham. Mataw ne gibiyad in ginad diq meqniyaқта ham. Ne gime haiqta teq ne saman diqmo gibe aholmo osayta ham. Ad negmo nagah na ago ginad a hi em hasayta ham. <sup>18</sup> Nazaq iyan ya inad ka diqta ne tinegnan ham. Ne yaqmo igo gol ka zayiy ham. Gol ka faq oyan anaghan meqin usta na muruwoqim tihitimta ham. Ne yaqgo gol ka zayeğ teq ne nagah arağ ago siqim a ta hi iy daqay ham. Ad ne yaqgo tubusan husta zayeğ giholib emiy ham. Emeq ne gibe aholmo luwad gimebay woqaқта na tihiqiydaq ham. Ad ne yaqgo marasin zayeğ gimeqnagnib emiy ham. Emeq ne saw anononmo ahol tuwağ daqay ham. <sup>19</sup> Ya mataw ginan inad bilaqta na ginadad ya in gigo daq wastitayiqta ham. Nazaq iyan ne giwaz diq meqniyyi ham. Ad ne ginad buliyeğ gigo daq meqinta gileh ugiy ham.

<sup>20</sup> Ahol waqiy ham. Ya dan ez wol hamad turaiq ham. Mat arağ ya iqez huritad dan has yağid teq ya gwahtiqeq in inaq tuqosdaiq ham. Osad ya inaq i garabmo didaq tineqam ham. <sup>21</sup> Ari mat aw nog in zaway meqinta gıquriyam bugid teq ya in gibilenid in ya inaq yaqgo ban tawontab osad nagah bunmo tigiwamuz daqay ham. Ya zaway

meqinta bunmo gıquriyam bugim teq ya imam inaq ago ban tawontab os woqim osad nagah bunmo giwamuzaiqta nazaq ham. <sup>22</sup> Ari mat adeksan inaқта na in Bugaw Dimunta yaqgo on mataw gidauhan bunmo gamuk gibilenaқта ka huriteq anad eman ham.

## **Sipsip Amidon in Heven-ib buk arağ hasan nagah meqmeqinta on mataw ogib osayta na gigo hib gwahtim**

### **4**

*Heven-ib nagah bunmo God abin iluwayta*

<sup>1</sup> Ari daq na abe ban ya saw ahol waqim kaitib dan ez arağ hasan ussa ya ahol way. Ahol waqsa mat mebmemo aqez ahuritan bilaqne taur ahuritan nog iysa ililewunta na in ya a ta ibilenim bilam, Ni kab gabol ham. Gabolid ya nagah bunmo abeb teq gwahtiqdaqta na tiniqisihundaig ham. <sup>2</sup> An hid naqmo God ago Bugaw Dimunta ya iholib ayahmo tubol. Bolan ya king ago ban tawonta arağ Heven-ib ussa ahol way. Ad mat arağ ban tawonta nab ossa ya ahol waymo. <sup>3</sup> Mat na ahol anuwan in bilaqne gig jaspas teq gig kakaқта anan koniliyan haqayta na ginuwan nogta. Teq nagah arağ bilaqne mam kaitib gwalağ nazaq nogta in ban tawonta na amatin inaq gililut negim us. Ad mam na awaqan bilaqne gig kuletta anan emerald haqayta na awaqan nog. <sup>4</sup> Sa marorgo ban kabemmo 24 nazaq in ban tawonta na lilut ugim usiymo. Sa mataw marorta 24 nazaqmo in ban nagab osiy. Mataw marorta na gigo tubusan sisaқта teq in hus diqta. Ad in gifaqinib king gigo balaw gol-ib emiyta gıqusta. <sup>5</sup> Teq ban tawonta liqabmo usaқта nab ya ime lehim mewlig hikliyanim haresmo lehsa ya ahol way. Ad ya idek emim nagah haresmo ahulan teq kait ahulan ayahmo ya hurit. Teq ban tawonta na ameb lam 7 nazaq oyad os. Lam 7 na in God ago bugaw 7 naqmo. <sup>6</sup> Teq ban liqab ussa na anobun ban nagah arağ bilaqne kamis ayahta hikliyanad ussa ya ahol way. Kamis na ame dimun diq wazmisiwunan usta.

Teq nagah aweweğmo kayeqmo osayta ban liqabmo usaқта na adek adek ban gıtursa ya gibiy. In gimeqnagin kabemmota gihol bunmo isih bugta, ginobun ban teq gibun ban inaqmo. <sup>7</sup> Nagah aweweğ na gigo arağ awaqan laiyon awaqan nogta. Teq gıgerta na awaqan bulmakau matta awaqan nogta. Teq ezeqmanta na anobun bilaqne mat anobun nogta. Teq aweweğta na awaqan bilaqne tırgaw melim lehaq

nazaq nogta. <sup>8</sup> Nagah aweweq kayeqmo osayta na giben gayik 6 nazaq giqusta. Ad in gimeqnagin na giben gayik adeqlo tab usad in gihol bunmo giqisih bugta. Tutimmo zeqab taromab inaqmo in bilaqay,

Iyahta God Zaway Bunmo Wazaqta haqayta.

In tawon diqta haqayta.

In tawon diqta haqayta.

In tawon diqta haqayta.

Kwaziqmo in osta haqayta.

Teq muran in os tutaqta haqayta.

Ad abeb teq in boldaqtamo haqayta.

Haqad in gamuk na bilaqad in ginamur a hi emayta.

<sup>9-10</sup> Teq Kuluwakuluw ago ban tawonta nab ossa nagah aweweq kayeqmo osayta na in wazinad abin iluwad esey ugayta. Sa mataw marorta 24 na in Kuluwakuluw anognib gihol hulosan woqim usad abin iluwayta. Ad teq in gifaqinib balaw gol-ibta na in waqim hunegan le ban na asenab woqaqta. <sup>11</sup> Ad in bar wazad bilaqay,

I gigo Iyahta teq i gigo God haqay ni nibin dimun diqmo usaqta haqayta.

Mataw ni nimomo nibin iluw daqay haqayta.

In ni nimomo niwazin daqay haqayta.

Ni nimomo zaway bunmo wazaqta haqayta.

Na ezaggo ninmo nagah bunmo giqamta na ago haqayta.

Ninmo ninad bilaqsa nagah na bunmo osayta haqayta.

Ninmo ninad bilaqsa ni nagah na giqeman gwahti qiyta haqayta.

## 5

*Heven-ib buk ara q otan ussa Jon ahol wam*

<sup>1</sup> Ari God in ago ban tawonta nab ossa buk ara q aben aqabnib ossa ya ahol way. Buk na in sansandek ara q sisa q diqta anobun ban abun ban inaqmo mar emim teq in tal tonim ay aqagin 7 nazaq giwaqim amalib adek eman soqotta. <sup>2</sup> Ad ya angelo ara q awaz meqin diqta ahol waymo. In atoranmo lileyim kaza q bilam, Nog ahol abin dimun diqta in buk ka waqeq aqagin hiknerad teq in hasdaq? ham. <sup>3</sup> Haqan Heven-ib teq ogib teq og aduganib mat ara q diq buk na haseq aduganib gamuk usaqta ahol waqdaqta na haiq diqmo. <sup>4</sup> Mat ara q buk na haseq adugan diq ahol waqdaqta haiqqam iyan ya ga q ayahmo tigaqyaiq. <sup>5</sup> Gaqsa mataw marorta 24 na gigo ara q ya ibilenim bilam, Ni hi ga q ham. Mat bab emim ago bab bunmo tigiquriyam bugta ko ni ahol waq ham. Isrel gigo gem anan Juda haqayta na giduganib laiyon gwahti qdaq haqad bilaqiyta na inmo kowa ham.

Teq King Devit asenlul giduganib atitoqin gwahti qdaq haqiyta na in kowaqmo tura q ham. Nazaq iyan inmo buk aqagin 7 na hiknereq buk na tihasdarta ham.

*Jon in Sipsip Amidon ahol wam*

<sup>6</sup> An ya ime lehim Sipsip Amidon ara q wol eman momta nog tursa ya ahol way. In King ago ban tawonta na agerab turad in nagah aweweq kayeqmo osayta na teq mataw marorta 24 ban lilut ugim osayta na gilikmanib turyaq. Tursa in afaqinib adanidin 7 nazaq tursa teq ameqnagin 7 nazaqmo ussa ya ahol way. In ameqnagin na in God ago bugaw 7 God giqeman og saw bunmo lehayta naqmo.

<sup>7</sup> Ari Sipsip Amidon na lehim mat ban tawontab aben aqabnib buk wazim osta na abenab buk na tuwam. <sup>8</sup> In buk na waqanmo nagah aweweq kayeqmo osayta na teq mataw marorta 24 na in gihol hulosan Sipsip Amidon na anognib tuwoqiy. In bunmo gita teq deg gol-ibta aduganib nal ahuran dimunta usaqta na in waziy. Nal ahuran dimunta na in God ago on mataw tawonta gigo gamuk in God bulon-ayta naqmo atowun. <sup>9</sup> In nagah na wazim ogib usad in bar ara q murta kaza q waziy.

Ni nibin dimun diqta iyim ni buk na waqeq aqagin tihiknerdaq haqiy.

Na ezaggo in ni ninol eman ni momta haqiy.

Moqim ni ninedan amalib

on mataw en bunmo,

teq gigo nan bunmo,

teq gisan bunmo,

teq uliq saw haresmo osayta na bunmo gigo hib,

ni on mataw gizayan in God ago tawonta tiqiyim osayta haqiy.

<sup>10</sup> Ni on mataw na giqeman in God ago maror aduganib gwahti qim,

in God ago on mataw tamaz emayta tiqiyim,

in God amomo anad muzad luwayta haqiy.

Teq in bunmo maror iyeq ogib on mataw bunmo tigiwamuz daqaymo haqiy.

*Heven-ib nagah bunmo Sipsip Amidon abin iluwiy*

<sup>11</sup> Ari ya saw a ta waqim angelo kabemmo teq nagah aweweq kayeqmo osayta na teq mataw marorta 24 na in King ago ban tawon diqta na lilut ugim tursa ya gibiy. Gibiysa in gidauhan kuluwmo diq handret milyon nazaq turad giqez iysa ya hurit. <sup>12</sup> Sa in atoranmo lileyim kaza q bilaqiy,

Sipsip Amidon kwaziqmo wol eman momta na abin dimun diqmo usaqta haqiy.

In awaz meqin diqta haqiy.

In ago nagh dimdimunta kuluwmo haqiy.  
 In anad awaz meqintaqmo haqiy.  
 In zaway bunmo wazaqta haqiy.  
 On mataw bunmo in wazin daqayta haqiy.  
 On mataw bunmo in abin iluw daqayta haqiy.  
 On mataw bunmo in anan ginad dimniysa esey diq ug daqayta haqiy.  
<sup>13</sup> Sa Heven-ib teq ogib teq og aduganib teq kamisib nagh bunmo God giqeman kayeqmo osayta na in bilaqiy.  
 On mataw bunmo in mat ban tawontab osaqta na ayow Sipsip Amidon na inaq ginan ginad dimniyyi haqiy.  
 Ad in giwazinad gibin iluwiy haqiy.  
 Teq in giger zaway bunmo wazad in nazaqmo kuluwa-kuluwmo osiy haqiy.  
<sup>14</sup> Sa nagh aweweq kayeqmo osayta na bilaq yaqay, Hel diqtaqmo haq yaqay. Haqsa mataw marorta <sup>24</sup> na gihol hulosan ogib woqim usad in God abin tiqiluwiy.

## 6

### *Sipsip Amidon buk aqagin gihiknar*

<sup>1</sup> Ari ya Sipsip Amidon ahol waqsa in buk aqagin araq tihiknar. Anmo nagh aweweq kayeqmo osayta na gigo araq aqez bilaqne kait ahulan iyaq nazaq nog iyad in bilam, Ni bol haqsa ya hurit. <sup>2</sup> Samo ya saw waqim hos araq husta ahol way. Teq mat araq hos na amalib kilek wazim bolsa ya ahol waymo. Ahol waqsa king gigo balaw gifaqinib emayta araq ugan in mat bab giquiyamdaqta tiqiyim in ago bab ginolnan tilah.

<sup>3</sup> Sa Sipsip Amidon buk aqagin gigerta na tihiknar. Anmo nagh kayeqmo osaqta gigerta na bilam, Ni bol haqsa ya hurit. <sup>4</sup> Samo hos ta araq kakaqta bo tilah. Lehsa mat hos na amalib osta na zaway ugan in tamaz akaman muz bugid mataw an wol emid moq daqayta na ago azawayin in aholib us. Sa in baqir araq ayahta ugiyimo.

<sup>5</sup> Sa Sipsip Amidon buk aqagin ezeq-manta na tihiknar. Anmo nagh kayeqmo osaqta ezeqmanta na bilam, Ni bol haqsa ya hurit. Samo ya saw a ta waqim hos araq dubta bo lehsa ya ahol way. Teq mat hos na amalib osta na abenab in skel araq wazim os. <sup>6</sup> Sa nagh aweweq kayeqmo osayta na gigo araq in bulonim bilam, Ni leheq ningo kabiy emsa mataw didaq ago siqim iyiy ham. Siqim iyeq teq in kam amulikmo ago kabiyta amenin mani waqeq in wit deg amikta amulikmo o bali deg amikta ezeqmanmo zayiy ham. Ta teq ni masil ayow wain ayun inaq hi gimeqin ton ham.

<sup>7</sup> Sa Sipsip Amidon buk aqagin aweweqta na tihiknar. Samo nagh kayeqmo osaqta

aweweqta na bilam, Ni bol haqsa ya hurit. <sup>8</sup> Samo ya saw a ta waqim mat araq hos maliyta amalib osim bo lehsa ya ahol way. Mat hos na amalib osta na anan Moq haqayta. Teq on mataw tumoqiya gigo uliq anan Hades haqayta na in Moq muzim inaq lehyaq. Ad giger na gibenab in zaway kazaq waziy. In leheq baqir teq zarow teq moq haresmo teq ogib karuw kwasikta nagan gimalib in mataw ginol em daqayta. Ginol emsa on mataw kabemmo tumoq bug daqay.

<sup>9</sup> Sa Sipsip Amidon buk aqagin abaynaginta na tihiknar. Samo ya ime lehim ban God ayon tamaz emayta na ahaqenib on mataw tumoqiya giwitan ossa ya gibiy. On mataw na God ago gamuk waz naqmo hiqiyad bilaqsa bab ginol eman moqiya. <sup>10</sup> Ya gibiyisa in atoranno lileyim kazaq God buloniy, Iyahta haqiy ni titnonim diq osaqta haqiy. Teq ningo daq bunmo hel diqtaqmo haqiy. I kam sisaqmo nibaq tunim tuqos haqiy. Kam gineh teq ni on mataw ogib osayta na hazizirib giqemeq in i ginedan wazbaliyta na aqenin ni in gigo hib tuwaqdaq? haqiy. <sup>11</sup> Haqan in on mataw na amulik-mulikmo tubusan husta sisaqta tinegiy. Negad in kazaq gibileniy, Ne ginamur asitmo ta emiy haqiy. Ne gimaqbaban asor ne nenaq garab kabiy emiyta na in teqmo ginol emsa moqay haqiy. In ne ginol emiyta nazaqmo in ne gimaqbaban na ginol emid tumoq bugid nab teq God in hazizir ne anan bilaqiyta na tiqemdaq haqiy.

<sup>12</sup> Sa Sipsip Amidon buk aqagin 6-ta na tihiknar. Samo ya saw a ta waqsamo kanawrigrig araq ayahta ogib sibsya ya ahol way. Sa zeq ame dub diq zamor nog iysa kalam ame kakaq diq ned nog iy. <sup>13</sup> Sa kaitib ulig milhesad ogib woqiy. Bilaqne ay fik anon teqmo hems tim sibað ulelsa anon muruwoqim woqaqta nazaq nog. <sup>14</sup> Teq kait tihiqiy nog iyimo. Sansandek sisaqta netbulsa bolaqta nazaq nogmo in iyta. Sa garah bunmo teq nud bunmo woltayim kobmo diq loqiy. <sup>15</sup> Sa og ka ago maror aseseqta bunmo teq mataw gibin inaqta na teq mataw bab emayta gigo aseseqta na teq mataw ginaghan inaqta na teq mataw giwaz meqinta na teq mataw beg-begta mataw gigo kabiy samanmo emayta na teq mataw gigo og inaqta na bunmo in tukim le gig akuduqniq teq garahab gig aseseqta gihaqenib ulilemiy. <sup>16</sup> Ulilemad in gig aseseqta garah inaqmo gibilenim bilaqiy, Ne i gimalib woqeq giqisihiy haqiy. Giqisihid i mat ban tawontab osaqta na ameb ulilemuq haqiy. Id teq Sipsip Amidon ago agem meqniy inaq boleq in i a hi gimeqin tondaq haqiy. <sup>17</sup> Na ezaqgo haqiy Sipsip Amidon amam inaq in daq meqinta

anan gigem meqniydaqta akaman ayahta na tugwahtim haqiy. Gwahtiqaŋ in gigo gigem meqniy na on mataw ginolsa nog diq turad a hi meqniydaq? haqiy.

## 7

*Isrel on mataw 144,000 nazaq God ago tow gisanib waqiy*

<sup>1</sup> Nagah nagan tugwahtiqaŋ abeb ya ime a ta lehim angelo aweweŋmo og ago abeqil aweweŋmo nab tursa ya gibiy. In tim aweweŋmo og abeqil ban sibayta na wasihim tur yaŋ, tim na leheq ogib teq kamisib a hi sibat teq in ay araŋ a hi woldaŋmo haŋad. <sup>2</sup> Sa teq angelo ta araŋ saw zeŋ gwaŋaŋta ban osim bolsa ya ahol way. Na in God Kayeŋmo Osaŋta na ago atowun wazim ad bolyaŋ. Bolad in atoranmo lileyim angelo aweweŋ God zaway negan in og teq kamis inaq gimeŋin tongo osayta na gibilan. <sup>3</sup> In bilam, Ne og teq kamis teq ay hidmo hi gimeŋin toniysa ham. I gigo God ago kabibiy on mataw gimaŋbelab i tow emid teq ham. <sup>4</sup> Ari in on mataw ganim diŋ gimaŋbelab tow emiyta na ya hurit. Na in Jakob atatniz 12 na gigo gem bunmo gigo hib Isrel on mataw 144,000 nazaq in tow na waqiyta.

<sup>5</sup> Juda ago gemub on mataw 12,000 nazaq tow waqiy.

Sa Ruben ago gemub on mataw 12,000 nazaq tow waqiy.

Sa Gat ago gemub on mataw 12,000 nazaq tow waqiy.

<sup>6</sup> Sa Aser ago gemub on mataw 12,000 nazaq tow waqiy.

Sa Naptaliy ago gemub on mataw 12,000 nazaq tow waqiy.

Sa Manase ago gemub on mataw 12,000 nazaq tow waqiy.

<sup>7</sup> Sa Simeon ago gemub on mataw 12,000 nazaq tow waqiy.

Sa Liway ago gemub on mataw 12,000 nazaq tow waqiy.

Sa Isakar ago gemub on mataw 12,000 nazaq tow waqiy.

<sup>8</sup> Sa Zebulun ago gemub on mataw 12,000 nazaq tow waqiy.

Sa Josep ago gemub on mataw 12,000 nazaq tow waqiy.

Sa Bensamin ago gemub on mataw 12,000 nazaq tow waqiy.

*On mataw dauh biyahta God abin iluwiy*

<sup>9</sup> Ari nagah na abeb ya saw a ta waŋim on mataw dauh biyah diŋmo humab wolim tursa ya gibiy. On mataw na kuluwmo diŋ iyan mat araŋ ginulin bugdaqta biyah haiŋ. Teq in on mataw en bunmo teq og saw bunmo teq gisan bunmo teq nan bunmo gigo asor kabemmo bolim humab

nab turiyta. In tubusan husta sisaŋta gi-holib emim teŋ in King ban tawontab osaqta na ayow Sipsip Amidon na inaq ginog-nib turad in gibenab guren anan wazim turiy. <sup>10</sup> Turad in atoranmo lileyeq kazaŋ bilaŋ yaŋ, I gigo God ban tawontab osaqta na ayow Sipsip Amidon na inaq haŋ yaŋ, in gimomo on mataw gilumsihim gi-waŋim giŋeman ban dimuntab osayta haŋ yaŋ.

<sup>11</sup> Sa angelo bunmo in King ban tawontab osaqta na teŋ mataw marorta 24 na teŋ nagah aweweŋ kayeŋmo osayta na gililut negim turad in bunmo gibakbakan ulum laŋuwim turad teŋ in ginobun mulbunim ogib wom. Woŋan in God abin tiŋiluw yaŋ. <sup>12</sup> Ad in bilaŋ yaŋ, Hel diŋtaŋmo haŋ yaŋ.

I gigo God amomo anan i ginad dimniyan haŋ yaŋ. Ad i in abin ayahta na iluwuŋ haŋ yaŋ. In amomo anad awaz meŋin diŋta haŋ yaŋ. I in amomo wazineŋ esey diŋ uguŋ haŋ yaŋ. In awaz diŋ meŋniysa ago zaway ayah diŋmo haŋ yaŋ. In nazaŋmo kuluwa-kuluwmo osan haŋ yaŋ. Hel diŋtaŋmo haŋ yaŋ.

*Yesus ago on mataw gigo santitiy tihiqiy*

<sup>13</sup> Ari mataw marorta 24 na gigo araŋ in ya kazaŋ susumun yaŋ. On mataw tubusan husta sisaŋta giŋemiya ko in gigan diŋ? ham. In edob diŋ boliyta? ham. <sup>14</sup> Haŋan ya in ago gamuk amenin emim bilay, Mat ayah hay ninmo hurit hay. An in ya kazaŋ ibilan, On mataw ko bab gibenab afaŋan teŋ santitiy kabemmo diŋ waŋim sorad in giŋuriyam bugim teŋ boliyta ham. In gigo tubusan na in Sipsip Amidon anednib suholan hus diŋ tiŋiy ham.

<sup>15</sup> Nazaŋ iyan in God ago ban tawonta na anognib tituray ham. Ad in taromab teŋ zeŋab inaqmo God ago bitab osad ago kabiy emayta ham.

God in ago ban tawonta nab osad inmo on mataw na giwamuzad nenaŋ tuŋosdaqta ham.

<sup>16</sup> Osad in on mataw na giwamuzsa in gigem a ta hi moŋdaq ham. Teŋ in ginatguman a ta hi ziziŋdaqmo ham.

Zeŋ a ta hi ginoysa in saw afanta a ta hi loyin daŋaymo ham.

<sup>17</sup> Na ezaggo Sipsip Amidon King ago ban tawonta anognib turaŋta na inmo tiŋiwamuzdaqta ham.

Bilaŋne mat ago sipsip giwamuzaqta nazaŋmo ham.



Giwamuzad in giqad yuw yayibta araq mataw uluwim kayeqmo kuluwakuwumo osayta nab in giqad tilehdaqta ham.

Teq God in gimeqil woqaqta na suholid in a ta hi gaq daqayta ham.

## 8

*Sipsip Amidon buk aqagin 7-ta na tihiknar*

<sup>1</sup> Ari Sipsip Amidon buk aqagin 7-ta na tihiknar. Anmo Heven-ib saw titok nam. Nagah bunmo ahulan a hi iysa le 30 minit nazaq tiqiy. <sup>2</sup> An ya angelo 7 God ameb turayta gibiyisa in taur 7 nazaq amulikmulikmo negiy. <sup>3</sup> Negan in taur wazim tursa angelo ta araq bolim in God ayon faq aqasin ahuran dimunta emayta abanan na agerab titur. Ban na in gol-ibta teq in King ago ban tawonta na ameb turayta. Ari angelo na in ban na agerab turad in deg amikta gol-ibta araq waz. Wazsa nal ahuran dimunta ayahmo ugiy, in miderid oysa aqasin gwalad in God ago on mataw tawonta gigo gamuk in God bulonayta na inaq wastoneq gwalehdaq haqad. <sup>4</sup> An angelo na in nal ahuran dimunta na banab emim mideran oysa aqasin God ago on mataw tawonta gigo gamuk na inaq wastonim God anognib tugwalehyaq. <sup>5</sup> Sa teq angelo na in ban nab faq waqim degib emsa deg ate tugwal. Ate gwalan in faq na hunegan wole ogibmo tuwom. Woqanmo kait ahulan iysa saw garak ayahmo gwah-tiqiyaq. Sa mewlig hikliyansa og haresmo ahol tuwolyaq.

*Angelo aweweçqmo taur ulamiy*

<sup>6</sup> Ari angelo 7 taur 7 waziyta na in ulamgo haqad gihol tuwastitayiy. <sup>7</sup> Gihol wastitayim angelo amebta na ago taur tuqulam. Ulaman gig teq faq in ned inaq wastonim ogib tuwoqyaq. Woqad faq na og ayahmo teq ay kabemmo tiginoy. Ginoyad in sishun bunmo tuqoy bugmo.

<sup>8</sup> Sa angelo gigerata na ago taur tuqulam. Ulaman nagah araq bilaqne garah ayahta faq oyad usaqta nazaq nog tugwahtim. Gwahtiqanmo in hunegan wole kamismebmo tuwom. Woqan kamis asor ayahmo buliyim ned nog iy. <sup>9</sup> Sa nagah kayeqta kamisib usayta na kabemmo teq muy kamisib luwayta na kabemmo timeqniyyiy.

<sup>10</sup> Sa angelo ezeqmanta na ago taur tuqulam. Ulaman ulig araq ayahta kaitib turim milhesimmo ogib tuwom. Ulig na atoranmo oyyaq, bilaqne sul mideran oyaqta nazaq. Na in woqim yuw diq og amalib sibaqta na teq yayib gwahtiqaqta na kabemmo gimalib wom. <sup>11</sup> Ulig na anan Am Agon Meqinta haqayta. In yuw nagan

gimeb woqan yuw na agon iysa mataw kabemmo uluwan gigem oy zizilaysa in tumoqiy.

<sup>12</sup> Sa angelo aweweçqta na ago taur tuqulam. Ulaman zeq ayow kalam inaq teq ulig bunmo ginolan in ginuwan asor ayahmo tihiqiy. Hiqiyen zeqab saw anuwan asor ayahmo hiqiyisa saw ame huhim us. Sa taromab nazaqmo kalam teq ulig ginuwan asor ayahmo tihiqiyimo.

<sup>13</sup> Sa ya saw a ta waqim tirgaw araq melim kaitibmo diq lehsa ya ahol way. In melim lehad teq in atoranmo kazaq lileysa ya hurit. In bilaqyaq, On mataw ogib osayta haqyaq ne timeqniyyiy haqyaq. Ne timeqniyyiy haqyaq. Ne timeqniyyiy haqyaq. Angelo ezeqmanta na in teq gigo taur tuqulam daqayta haqyaq. Ulamsa afaqan aseseq diqta ne gigo hib tugwahtiqdaqta haqyaq.

## 9

*Angelo abaynaginta na ago taur ulam*

<sup>1</sup> Ari angelo abaynaginta na ago taur tuqulam. Ulaman ulig araq Heven-ib turim ogib gewoçsa ya ahol way. Ahol waçsa yay araq sisaqta abe milhastata ago ambitan in ulig na tuqugiy. <sup>2</sup> Ugan in yay na ago dan ez tihas. Hasanmo faq aqasin yay aqezab nab tugwahtiqyaq, bilaqne ay humab araq ayahta oyad aqasin gwahtiqaqta nazaq. Faq aqasin yay nab gwahtiqad zeq ame isihsa kait dub tiqiyaaq. <sup>3</sup> Sa nagah araq bilaqne siksik madawrek nogta kabemmo faq aqasin na amuganib gwahtiqim ogib haresmo tileh yaqay. Lehad teq in zaway araq bilaqne kakhah gigo zaway nazaq nogta in waqiy. <sup>4</sup> Zaway waqan teq in siksik madawrek na kazaq gibileniy, Ne ogib sishun teq kwasin-kwasan teq ay bunmo hi gimeqin toniy haqiy. Haiq haqiy. Ne on mataw God ago tow gimaqbelab a hi usaqta naqmo ne gimeqin toniy haqiy. <sup>5</sup> Gimeqin tonad ginol emid hi moqiy haqiy. Santitiy naqmo ne on mataw na negsa le kalam abaynagin nazaqmo iyan haqiy. Ari santitiy in negiyta na in bilaqne kakhah on mataw giluman gisan titiydaqta nazaq nog iyyaq. <sup>6</sup> Teq kam nab on mataw gisan titiy naqmo diq hiqiyisa in moqgo adanteqin naguneq teq in ahol a hi waq daqay. In moqgo diq ginad bilaq daqayta teq haiq. Moq in giben lehad haseq titukdaq.

<sup>7</sup> Siksik madawrek na givaqan bilaqne hos bab emgo abalawun giholib usaqta nazaq nogta. Teq in gifaqinib balaw araq bilaqne king gifaqinib balaw gol-ibta emayta nazaq nog ussa in ginobun bilaqne mat anobun nogta nazaq ya gibiy. <sup>8</sup> Teq in giqensan sisaqmo diq bilaqne on asor giqensan sisaqta na nog teq in gite bilaqne laiyon gite nog. <sup>9</sup> Sa bab emgo abalawun

atoranta gibanib usta na in bilaqne tubusan ain-ib emiyta nazaq nogta in giban isihim us. Teq in melad giben gayik ahulan bilaqne hos kabemmo wilka kabemmo hureqim bab emnan lehayta nazaq nog ya huritta. <sup>10</sup> Teq siksik madawrek na gibilikin bilaqne kakhah gibilikin gilumaqta na nog. In kalam abaynaginmo on mataw gimeqin tongo azawayin gibiliknib usaqta. <sup>11</sup> Siksik madawrek na gigo king inaqta. King na in angelo-ta teq in yay sisaqta abe milhasta nab osaqta. Hibru nanib angelo na anan kazaq biyayta, Abadon haqayta. Teq Grik nanib in anan Apolyon haqayta.

<sup>12</sup> Ari afaqan danmebta na tihiqiy. Teq ne gidek emiy. Afaqan amebta na abe ban afaqan giger teq boldaqta nawa usaqta.

#### *Angelo 6-ta na ago taur ulam*

<sup>13</sup> Ari angelo 6-ta na ago taur tuqulam. Ulanan God amen tamaz em abanan gol-ibta God anognib turaqta na ago abeqil aweweç ate inaqta na gilikmanib mat araç aqez gwahtiqim gamuk bilaqsa ya hurit. <sup>14</sup> Mat aqez na in angelo 6-ta taur wazim turta na kazaq bulon, Angelo aweweçmo yuw Yufretis-ib giqirquran osayta na ni gihasin in lehiy ham. <sup>15</sup> Haqan in angelo aweweçmo giqirquran osiyta na tigihas. Angelo aweweçmo na in ulig nabmo teq kalam nabmo teq kam nabmo teq zeq adulan nabmo diq gwahtiqeq on mataw kabemmo ginol emid moq daqayta na ago in giqirquran osiyta. In angelo aweweçmo na gihasan in on mataw kabemmo ginol eman tumoq bugiy. <sup>16</sup> Ari teq mataw hos-ibta ganim diq le bab emiyta na ya hurit. In kuluwmo diq 200 milyon nazaq. <sup>17</sup> Ad yaqço sen qway nab mataw hos-ib ossa ya gibiyta na giwaqan kazaq diq ya gibiy. Mataw na gigo bab emgo abalawun atoranta giban isihim usta na awaqan kakaqta teq rawezta teq maliyta. Teq hos na gifaqin bilaqne laiyon gifaqin nog. In giteb faq amileq teq faq aqasin teq gig afanta maliyta anan salfa haqayta na gwahtiqeq lehaq. <sup>18</sup> Nagah ezeqman meqin diqta faq teq faq aqasin teq gig afanta maliyta na in on mataw kabemmo ginol eman moqiyta. <sup>19</sup> Ari hos na gigo zaway in gitenmosib teq gibiliknib usaqta. Teq in gibilikin awaqan bilaqne naga ahulinaqta afaqin inaqta nog. Nazaq iyan in ginaghan giger na amalib on mataw gimeqin ton yaqayta.

<sup>20</sup> Ari on mataw asor afaqan nagan giwaqan a hi moqiyta na in os tutad in ginad buliyad gigo daq meqinta na a hikidik hulosa yaqay. In bugaw meqinta teq god katiyta gidulan gibenab emim giyon lotu em yaqayta. Nagah na gidulan gol teq silva teq ain baras teq gig teq ay nagan gimalib in giqem yaqayta. Teq god katiyta na saw

a hi waqayta teq in a hi loq gelayta teq in gidek emad gamuk a hi huritayta. <sup>21</sup> Ad on mataw na ginad buliyim gigo daq in mataw asor ginol eman moq yaqayta na teq in liqiy em yaqayta na teq in an haresmo hureq yaqayta na teq in nagah haresmo rin ton yaqayta na in a hi hulosiymo.

## 10

### *Angelo araç Jon buk ugan in nam*

<sup>1</sup> Ari ya angelo araç awaz meqinta Heven-ib gehitiqsa ahol way. In onqas araç waqim tubusan nog ahol isihan teq kaitib mam gwalaqta na afaqinib us. In anobun bilaqne zeq anuwanaq nog iysa asen gigermo bilaqne faq oy gigayinaqta nazaq nog iyyaq. <sup>2</sup> Angelo na in buk amikta araç hasan ussa abenab waz. Wazad teq in asen aqabun ger waqim kamis amalib emad asen anasaran ger na in waqim og amalib am. <sup>3</sup> Emim teq in atoranmo lilay, bilaqne laiyon atoranmo gayonaqta nazaq. In lileyan tihiqiyan kait ahulan 7 na amenin emiy. <sup>4</sup> An kait ahulan 7 na amenin emim le tihiqiyan ya gamuk na tumar tondaq hay. Haqadmo mat araç aqez Heven-ib ibilensa ya hurit. Na in bilam, Kait ahulan 7 gamuk bilaqiyta na ninadibmo usan ham. Na ni hi mar ton ham.

<sup>5</sup> Ari angelo kamis ayow og inaç gimalib tursa ya ahol wayta na in aben aqabun ger wazan ulilibmo gwal. <sup>6</sup> Gwalsa teq in Kuluwakuluw kait teq og teq kamis teq nagah bunmo saw nagab kayeqmo luwayta inaç giqamta na anan biyad in kazaq bilam, Helmo diq Mat Iyah ya ibiyaç ham. Kam tihiqiy ham. <sup>7</sup> Angelo 7-ta na ago taur tuqulamdaç ham. Ulamsa kam nab God in anad ulilemim usta na emid tihiqiy bugdaç ham. In ago kabibiy mataw ago nantun negsa bilaç yaqayta nazaqmo diq in tiqemdaç ham.

<sup>8</sup> Ad mat aqez na Heven-ib gwahtiqim kazaq ya a ta ibilan, Ni leheq angelo kamis ayow og inaç gimalib turaqta na abenab buk hasan usaqta na ni waç ham. <sup>9</sup> Haqan ya angelo na agerab lehim bulon, Ni buk amikta na yaç hay. An angelo na ibilenim bilam, Ni buk ka waqeq neq ham. Ni neqsa in niziynib bilaqne kubiç akokin aneqan nog iysa ni loyindaqta ham. Ari ni tilonid nigemab woleheq teq in agon tiqiydaçta ham. <sup>10</sup> Haqanmo ya in abenab buk amikta na waqim tiney. Neqan in ya iziynib bilaqne kubiç akokin nog dimun diq ya loyin. Teq ya neqim tilonan ya igemab in agon meqin diq iyyaq. <sup>11</sup> Sa mat aqez na in ya kazaq ibilan. Ni yaqço nan a ta tutad on mataw en amo amo og saw bunmo osad gigo nan amo amo bilaqayta nagan teq in gigo king kabemmo osayta na nenaç gigo

hib ni daq abeb teq gwahtiqaqta na ago ananin a ta bilaqdaq ham.

## 11

*Mataw giger gwahtiqim God ago gamuk bilaqiy*

<sup>1</sup> Ari God uriw araq titnonta amalib naga gitowun waqayta na tiyag. Uriw na ago sisaq bilaqne katek wazim ulum ugayta nazaq nogta. In uriw na yagad ibilan, Ni eraqeq yaggo Tempel teq bit nab tamaz em abanan turaqta in ina q gitowun waq ham. Ad ni on mataw bit nab lotu emayta na gitowun waqmo ham. <sup>2</sup> Teq yaqgo bit aqezab humab wodayta asawun na ni hulosad atowun hi waq ham. Na ezaqgo ham saw na ya on mataw en ta asor Juda a haiqta nagan tinegta ham. Dauh amo amotag nag in yaqgo uliq tawonta nab boleq uliq na giholyon waqeq kalam 42 nazaq in wamuz daqayta ham. <sup>3</sup> Sa yaqgo mataw giger ya ibin bilaq daqayta na ya giqemid uliq nab tileh daqay ham. In tubusan meqinta abiyornaqta giholib emeq teq in leheq yaqgo nantut bilaq daqayta ham. In yaqgo nantut bilaqsa kam 1,260 nazaqmo tihiqiydaq ham.

<sup>4</sup> Ay oliv giger teq lam giger on mataw bunmo gigo Iyahta na anognib turayta na in mataw giger naqmo gitowunta. <sup>5</sup> Teq mat aw nog in mataw giger na gimeqin tonnan tonsa mataw na giteb faq gwahtiqeq le in gigo bab na ginoy bugid tumoq daqay. Helmo diq. Mat aw nog in giger na gimeqin tonnan ginad em daqayta na in dante naqmo amalib tumoq daqayta. <sup>6</sup> Teq mataw giger na kait wasihgo azawayin in giholib usdaqta. In kait wasihid urom a hi woqsa in God ago nantut bilaqad tiluw daqay. Ad in yuw buliyid ned iygo azawayin teq moq meqinta amo amo amalib on mataw ogibta gimeqin tongo azawayin in giholib tuqusdaqmo. Mataw giger na in daq nagan ginadibmo emid gwahtiqaqta.

<sup>7</sup> Ari mataw giger na boleq God ago gamuk bilaq bugid tihiqiyid teq karuw kwasikta yay abe milhastab gwahtiqaqta na in giger na nenaq an wlad zaway diq iyeq ginol emid tumoq daqay. <sup>8</sup> Moqid in gisan uliq ayahta na agemab ulalabmo giqusdaq. Teq uliq gisan usdaqta na mataw gamuk abarawun bilaqad anan Sodom haqayta teq in anan Isip haqaytamo. Uliq nabmo mataw giger na gigo Iyahta ayib dom wolan momtamo. <sup>9</sup> Sa mataw gisan araq araq uliq amo amo-ibta teq nan amo amo bilaqayta teq og saw bunmo osayta na kabemmo boleq kam ezeqman teq awewe qta asormo in giger na gisan ahol waqad tiluw daqay. Luwad in mataw giwasihid in giger na gisan a hi giyay ton daqay.

<sup>10</sup> Mataw giger na tumoqid teq on mataw og kab osayta na ginad dimniysa in yuquwad bar wazad teq in an naw tuqug daqay. Na ezaqgo nantut giger na osad in on mataw bunmo ogib osayta na afaqan ayahmo diq neg yaqayta na ago iyan.

<sup>11</sup> Ari kam ezeqman teq awewe qta na asormo tihiqiyen God ago tim mataw giqeman kayeqmo osayta na lehim giger na giholib gwahtiqan in kayeq ta iyiy. Kayeq iyim in eraqim tursa on mataw in gibiyad rab naqmo diq hiqiy yaqay. <sup>12</sup> Sa Heven-ib mat araq in giger na dedibmo gibilensa in huritiy. Mat na bilam, Ne giger kab gaboliy ham. Haqan in onqasib Heven-ib gwalehsamo in gigo bab na tigibiyiy. <sup>13</sup> Sa kam nabmo kanawrig araq ayah diqta tugwahtim. Gwahtiqad og ahol wolsa uliq ayahta na ago abeqil 10 giqusta na gigo amulikmo tartayim tuwom. Woqan kanawrig ayahta na siban on mataw kabemmo diq 7,000 nazaqmo tumoqiy. Moqsa on mataw ta asor na bunmo osad in rab naqmo diq hiqiyad teq in God Heven-ib osaqta na abin tiqiluwiy.

<sup>14</sup> Ari afaqan giger aseseq diqta na tihiqiy. Teq ne gidek emiy. Afaqan ezeqman ta asit naqmo tuboldaq.

*Angelo 7-ta na ago taur ulam*

<sup>15</sup> Ari angelo 7-ta na ago taur tuqulam. Ulanan mataw kabemmo giqez atorannmo Heven-ib lileysa ya hurit. In bilaqiy,

Muran king bunmo ogib osayta na in i gigo Iyahta teq in ago Kraisa inaq gigo maror ahaqenib tiqiy bugiy haqiy.

Sa i gigo Iyahta in nagah bunmo giwamuzad in nazaqmo king ayah diqta iyeq kuluwa-kuluwmo tuqosdaq haqiy.

<sup>16</sup> Haqsa mataw marorta 24 God ameb in gigo marorgo banab osayta na in gibak-bakan ulum laquwim turad ginobun mulbunim ogib woqsa in God abin tiqiluwiy.

<sup>17</sup> Abin iluwad in bilaqiy,

Iyahta God haqiy ni zaway bunmo wazaqta haqiy.

Ni kuluwa-kuluwmo osim bolim muran ni os tutaqta haqiy.

Ni ningo zaway ayah diqta na ulal tonim muran ni King ayahta iyim nagah bun diqmo giwamuzim osaqta haqiy.

Nazaq iyan i esey nigauq haqiy.

<sup>18</sup> Mataw en bunmo in ni gihar nigad gigem meqniy yaqayta haqiy.

Sa ta ninmo nigem meqniydaqta akaman na muranmo tugwahtim haqiy.

Gwahtiqan mataw tumoqiyta bunmo in ningo hazizirib gwahtiqeq titur daqay haqiy.

Tursa ni ningo nantut ningo kabiy em yaqayta na teq ningo on mataw

tawonta na teq on mataw ni ninan rabad nibin wazin yaqayta nagan bunmo gibin inaqtta teq gibin haiqta na inaqtmo ni in gigo daq dimunta na amenin tinegdaq haqiy.

Ad mataw in on mataw gimeqin tonad ginol eman moqiyta na ni in ginol emid tumoq bug daqaymo haqiy.

<sup>19</sup> Ari mataw marorta 24 na gamuk bilaqim tihiqiy an God ago Tempel Heven-ib turaqta na ago dan ez tihis. Hasanmo God ago maror gigib mar tonim mataw nagta na ago abitan amikta in God ago Tempel aduganib ulalabmo tugwahtim. Gwah-tiqanmo mewlig hikliyanim haresmo lehsa kait ahulan ayahmo diq iyyaq. Ad og ahol wolsa gig amikmikta urom nog kaitib woqyayq.

## Satan ayogniz nenaq timeqniy hasiy

### 12

*Jon in aw araq teq nagah ahulinaqta ayahta inaq gibiy*

<sup>1</sup> Ari nagah lul araq diqta kaitib gwah-tiqsa ya ahol way. Nagah na in kazaq. Aw araq osad in zeq anuwan waqim bilaqne tubusan nog ahol sihenim osta. Teq in asen ahaqenib kalam oyad ussa ulig 12 nazaq bilaqne king ago balaw nog afaqinib giquyayq. <sup>2</sup> Aw na agem iyim ossa amun tubaysa in ahol titiysa tiqek tonya. <sup>3</sup> Sa nagah lul ta araq diq kaitib gwahtimmo. Na in nagah ahulinaqta ayahta kakaqta afaqin 7 nazaq inaqtta teq adanidin 10 nazaqmo afaqinib nagab gituryayq. Sa in afaqin 7 nagab king ago balaw amikta 7 nazaq giquyayqmo. <sup>4</sup> Nagah ahulinaqta na abiliknib in ulig kabemmo kaitib turiyta na giworonan ogibmo tuwoqiy.

Ari nagah ahulinaqta na in aw amun emid ya tilondaiq haqad amen emim os. <sup>5</sup> Ossa aw na amun matta tiqam. Amun na God atowun eman in teq gwaquw ain-ibta wazeq on mataw en bunmo giwamuzdaqta. Aw na amun tiqeman hid naqmo in amun waqim ad God agerab gwalehim God ago ban tawonta nab tiqemiy. <sup>6</sup> Sa aw na eraqim tukim saw amatawun haiqtab tilah. Saw nab in osad anamur emdaqta haqad God in ayon tuwastitayan usta. Aw na saw nab ossa in alowan tonad wamuzad didaq ugsa kam 1,260 nazaq tiqiydaq.

<sup>7</sup> Ari Heven-ib bab araq ayahta gwah-tim. Na angelo gigo amebta Maikel in ago angelo nenaq nagah ahulinaqta ayahta na inaq bab tiqem yaqay. Bab emsa nagah ahulinaqta na ago walmataw nenaq in eraqim bab na amenin tiqem yaqaymo. <sup>8</sup> Amenin emad nagah ahulinaqta na ayogniz nenaq gigo zaway haiqgam iyan in

Heven-ib a ta osgo haiq tiqiyiy. <sup>9</sup> Nazaq iyan God ago angelo eraqim in nagah ahulinaqta na wazim hunegan ogibmo tuwom. Nagah ahulinaqta na in mat meqinta kwaziqmo osta naqmo. In anan Mat I Gigilehunan Bilaqtaqta haqayta teq in anan Satan haqaytamo. Mat na in og kab on mataw God gileh ugayta na bunmo gikat negaqtta. Teq God ago angelo in nagah ahulinaqta na ago walmataw nenaqmo giwazim gihunegan ogibmo tuwoq bugiy.

<sup>10</sup> Sa Heven-ib mat araq aqez atoranmo lileyim kazaq bilaqsa ya hurit.

I gigo God in i bunmo gilumsiheq giwagqsa in ago zaway ulal iysa in king ayah diqta iyeq osdaqta akaman na tugwahtim ham.

Teq in ago Kraiss zaway bunmo wazdaqta akaman na tubolmo ham.

Na ezaqgo ham mat meqinta i gimaqbaban gimalib nan emaqta na hunegan ogib tuwom ham.

Mat na taromab teq zeqab inaqtmo i gimaqbaban gigilehunan God ameb bilaqtaqta ham.

<sup>11</sup> Sa nagah gigermo i gimaqbaban na gilumsihan in dimunmo turiy ham.

Na Sipsip Amidon anedan na teq God ago gamuk in atoranmo wazad bilaq yaqayta naqmo in gilumsihsa in gigo bab meqinta na uriyamiy ham.

Ad in bab meqinta na inaq an wolad in ogib kayeqmo os tutgo ginad a hi diq bilaqyaq ham.

In ginad em yaqay, I gibabun ka inaq an wolad oseq moqamta na dimunmo haq yaqay ham.

<sup>12</sup> Nazaq iyan ne on mataw bunmo Heven-ib osayta na ne ginad dimniyyiy ham.

Ari og ninyow kamis inaq ne timeqniyyiy ham.

Satan ne gigo hib ogib nab tihitim ham. Hitiqim in ago kam siqim diq tiqiyayta na ago in agem timeqniy hasaq ham.

<sup>13</sup> Ari nagah ahulinaqta hunegan ogib womta na inmo ahol tiloyin. Loyinad in agem meqniysa lehim aw amun matta tiqamta na wol emnan muzad tiluwyayq. <sup>14</sup> Sa God tirgaw ayahta aben gayik gigermo waqim aw na tuqug, in amalib meleq tukeq saw amatawun haiqtab in ayon ban wastitayan usaqta nab tilehdaq haqad. An saw nab in aw na alowan tonad didaq ugsa le ulig ezeqmanmo teq ulig aweweqtta na asormo tiqiy.

<sup>15</sup> Ari aw na tukim lehsa nagah ahulinaqta na nilad ateb yuw ayahmo gwah-tiqsa yuw na in uq ayahta nog iyim aw na ago hib sibim tilehyaq, in aw na soreq ad leheq neqid moqdaq haqad. <sup>16</sup> Samo og in aw na ulumsihim ate akim in nagah

ahulinaqta ateb yuw gwahtimta na titolon bug. <sup>17</sup> Nazaq emsa nagah ahulinaqta na in aw na anan agem diq meqniysa in ahol buliyim tilah, in le aw na ago onmin nenaq bab emnan haqad. Aw na ago onmin in God ago gunun muzin bugad teq in Yesus awagamun anan helmo haqad adan emad osayta.

Ari nagah ahulinaqta na kamisib lehim lan ezab titur.

## 13

### *Karuw kwasikta giger gwahtiqiy*

<sup>1</sup> Ari karuw kwasikta araƣ afaƣin 7 nazaq inaƣta teƣ afaƣinib nagab adanidin 10 nazaqmo gitursa in kamis amuganib usim bo asan ban gwahtiqsa ya ahol way. Teƣ king gigo balaw gifafinib emayta nazaqta in adanidin 10 nagab giqussa ya gibiyimo. Sa in afaƣin 7 nagab inmo ahol anan meqmeqinta hi bilaqnanta giqusyaqmo. In aholnan amo amo nagan in gamuk haresmo amalib God bilawunayta naqmo giqusta. <sup>2</sup> Ya karuw kwasikta na ahol waƣsa in ahol awaƣan bilaqne kasiq kwasikta ayahta anan lepa haqayta na awaƣan nog. Teƣ in asen bilaqne kudor ayah nenan diqta anan bea haqayta na asen nog iysa atenmos bilaqne laiyon atenmos nogta ya ahol way. Sa nagah ahulinaqta lan ezab turta na in ago zaway ayahta teƣ inmo ahol abin ayahta teƣ in ago marorgo ban in amalib osad nagah giwamuzaqta na in nagah nagan bunmo karuw kwasikta na tuƣug bug.

<sup>3</sup> Teƣ karuw kwasikta na ago afaƣin araƣab asulan awaz meqinta wol emid moƣgota nazaq nogta ussa ya ahol way. Sa hidmo asulan meqinta na mayimmo tidimniy. Nazaq iyan on mataw bunmo in daq na ahol waƣad gihol riten lamsa in karuw kwasikta na tumuzin yaqay. <sup>4</sup> Muzinad in nagah ahulinaqta na inmo ago zaway karuw kwasikta na ugsa ahol waƣad in bunmo nagah ahulinaqta na abin wazin yaqay. Ad in karuw kwasikta inaƣmo abin wazinad bilaq yaqay, Mat araƣ karuw kwasikta ka nog a haiq haq yaqay. Mat araƣ karuw kwasikta ka babub uriyamdaqta haiqmo haq yaqay.

<sup>5</sup> Ari God in karuw kwasikta na aholibmo hiqiyin in yaqmo ag haqad atoranno God anan bilawunad in on mataw giwamuzad kalam 42 nazaqmo tiluw. <sup>6</sup> Luwad in ate akim God tibilawunyaq. Bilawunad in God abin meqin diq tonad teƣ in God ago bit in osaƣta na abin timeqin tonyaƣmo. Bit na in Yesus ago on mataw God inaƣ Heven-ib osayta naqmo. <sup>7</sup> Sa God in karuw kwasikta na aholib hiqiyin in God ago on mataw tawonta na gimuzim ginolad giwazan woq yaqay. Ad in ago zaway ayahta na amalib

on mataw en bunmo teƣ gisan bunmo teƣ gigo nan bunmo teƣ in uliq saw bunmo osayta na bunmo tigiwamuzyaq.

<sup>8</sup> In nazaq emsa teƣ ogib kab on mataw kuluw diqmo in karuw kwasikta na abin wazinad ayon lotu tiqem daqay. Kwaziq diqmo God og ka eman a hi gwahtiqsamo in on mataw kayeqmo tuteqmo os daqayta na ginan Sipsip Amidon ago buk-ib mar tonan tuƣusaƣta. Ari on mataw Sipsip Amidon kwaziqmo wol eman momta na ago buk-ib giholnan a hi usaƣta naqmo in karuw kwasikta na ayon lotu tiqem daqayta.

<sup>9</sup> Mat aw nog in gidek inaƣ iyeq teƣ in gamuk ka huritiy.

<sup>10</sup> Kam meqinta nab in God ago mat araƣ ayon bilaqeq,

“In bit giqirquran osayta nab lehan” haqid,

mat na bit nab tilehdaq.

Ad in God ago mat araƣ ayon bilaqeq, “Baqirib wol emiy” haqid,

mat na baqiribmo tumoqdaq.

Daq nazaqta teƣ gwahtiqdaƣta iyan God ago on mataw tawonta na in gituw hi hiqiyisa ginad helta na waz naqmo hiqiyeq osiy.

<sup>11</sup> Ari karuw kwasikta ta araƣ og aduganib gwahtiqsa ya ahol way. In abigmanib adanidin giger bilaqne sipsip adanidin nogta afaƣinib tursa in gamuk emyaƣta na bilaqne nagah ahulinaqta na ago gamuk bilaq nog iyyaq. <sup>12</sup> Karuw kwasikta giger ta na in karuw kwasikta amebta na anognib turad in karuw kwasikta amebta na ago zaway bunmo amalib ago kabiy emyaq. Kabiy emad in on mataw ogib kab osayta na gigemnan in karuw kwasikta amebta na ayon lotu tiqem yaqay. Karuw kwasikta amebta naqmo in ahol asulan awaz meqinta wol emid moƣgota na waƣan teƣ asulan na hidmo mayim dimniy bugta.

<sup>13</sup> Ari karuw kwasikta giger ta na in kabiy azawayin inaƣta amo amo kabemmo gige-myaq. Giqemad in on mataw gimeb faq amileq emid ulilib kaitibmo useq milheseq ogib hitiqyaq. <sup>14</sup> God in karuw kwasikta giger ta na aholibmo hiqiyin in karuw kwasikta amebta na anognib daq azawayin inaƣta emad in on mataw ogib kabta gikat negyaq. Kat negad in gibilenyaq. Ne on mataw og kab osayta haqyaq ne karuw kwasikta amebta ka ahol adulan emeq abin iluwiy haqyaq. Karuw kwasikta kwaziqmo baqirib qwayan asulan awaz meqinta wol emid moƣgota gwahtiqim teƣ in mayan a hi momta na adulan ne emiy haqyaq. <sup>15</sup> In nazaq gibilenan in karuw kwasikta amebta na adulan tiqemiy. Eman teƣ karuw kwasikta giger ta na zaway waqim in tim ulam hasan karuw kwasikta amebta

na adulan aduganib lehan adulan na kayeq iyim gamuk tibilaqyaq. Sa karuw kwasikta gigerta na gibilenyaq. Mat aw nog in karuw kwasikta amebta adulan ka wazinad ayon lotu a hi emsa teq na ne wol emid moqan haqyaq.

<sup>16</sup> Ari karuw kwasikta gigerta na bilaqan on mataw bunmo gisanib tow araqtuwaqiy. Asor giben aqabnib waqsa asor gimaqbelab waqiy. On mataw gihin inaqta teq gihin haiqta teq mataw ginaghan kabemmo usaqta teq ginaghan haiqta teq mataw gigo og inaqta teq mataw begbeg osayta nagan bunmo in tow na gisanib waqiy. <sup>17</sup> Sa karuw kwasikta gigerta na gunun eman mat aw nog in karuw kwasikta amebta na ahol anan o ago ahol anulingan in gisanib a hi waqiyta na in on mataw ta asor na gigo hib didaq nagah osgota a hikidik zay yaqayta. Ad mat araqtu in on mataw gisan samanmo usaqta na gigo hib nagah araqtu a hikidik zayyaqta.

<sup>18</sup> Ari ne ginad em has ago adanteqin kawaqmo. Mat anad inaqta na in karuw kwasikta amebta na ago ahol anulingan ka anononmo nulineq ulum kewan. In ahol anulingan nawa na in mat diqtu ago ahol anulinganta. Teq in ahol anulinganta kawa usaqta ka in 666 naqmo.

## 14

*Sipsip Amidon ago on mataw bar murta wazi*

<sup>1</sup> Ari ya saw ahol a ta waqim Sipsip Amidon in mataw 144,000 nazaqtu nanaqtu garah Sayon abigmanib tursa ya gibiy. Mataw na gimaqbelab Sipsip Amidon Amam inaq giholnan mar tonan ussa ya gibiy. <sup>2</sup> Sa Heven-ib saw ahulan araqtu bolsa ya hurityaiqtu. Saw ahulan na bilaqne yuw kabemmo sibaqta ahulan teq kait ahulan ayahmo nazaqtu nogta ya hurityaiqtu. Teq ya idekib nagah na ahulan huritsa in bilaqne mataw kabemmo gita wolsa ahulan dimunta gwahtiqaqta nazaqtu nog ya hurityaiqtu. <sup>3</sup> Mataw biyahta na in King ago ban tawontab osaqta na teq nagah aweweqtu kayeqmo osayta na giyogniz mataw marorta 24 na nanaqtu gimeb turad in bar araqtu murta waz yaqay. On mataw God ago maror asan ban osayta na in bar na ago a hi huritayta. On mataw og kabta gilikmanib mataw 144,000 God gizayta naqmo gimomo in bar na wazayta. <sup>4</sup> Mataw biyahta na in on nanaqtu daqtu meqinta anumlan inaqta a hi emiyta. Na ezaqgo in gihol wasihim aw inaq asit a hi usiyta na ago iyan. Mataw na Sipsip Amidon ezaqya lehsa in muzim inaq lehaytamo. God in on mataw og kabta bunmo gilikmanib mataw biyahta naqmo

gizayim giwamta, bilaqne mataw kabiy ame waqayta nazaqtu nog. Giwaqan mataw na in God ayow Sipsip Amidon na inaq gigota tiqiyim osayta. <sup>5</sup> Mataw na gimileqtu a hi iyayta teq in daqtu araqtu meqinta ananin waqtu daqayta na giholib a hi usaqtamo.

*Angelo ezeqman God ago gamuk bilaqiy*

<sup>6</sup> Ari ya angelo araqtu God ago nan dimunta kuluwa-kuluwmo usaqta na on mataw ogib osayta gibilennan haqtu kaitib melim lehad luwsa ya ahol way. In ago kabiy in on mataw en amo amo teq gisan amo amo teq gigo nan amo amo teq uliq saw haresmo osayta na bunmo in God ago gamuk dimunta na gibilenaqta. <sup>7</sup> Angelo na in atoranmo lileyim bilam, God in on mataw bunmo hazizirib giqemeqtu gigo daqtu amenin negdaqtu na akaman tugwahtim ham. Nazaqtu iyan ne God anan rabad abin iluwad ayon lotu emiy ham. In og, kait, kamis teq yuw diqtu na bunmo inmo giqamta ham.

<sup>8</sup> Haqan angelo ta araqtu gigerta in angelo amebta, na muzim abeb bolad in kazaqtu bilam, Uliqtu ayahta Babilon tuwoqtu bug ham. Helmo in timeqniy has ham. Uliqtu na in on mataw en bunmo gihureqan in ago daqtu meqinta emad gihol atoranmo eraqsa in an haresmo hureqad nanaqtu usaqayta ham. Bilaqne wain ayun atoranta negan in uluwim ginad dimunta hulosisyta nazaqtu nog ham.

<sup>9-10</sup> Haqanmo angelo ta araqtu ezeqmanta na in angelo giger ameb boliyta na gimuzim bolad in atoranmo lileyim bilam, Mat aw nog in karuw kwasikta abin iluwayta teq in ahol adulan ayon lotu emayta teq in gimaqbelab o gibenab ago atowun waqayta, on mataw na bunmo in wain ayun lul araqtu meqin diqtu tuquluw daqay ham. Wain ayun na in God ago agem meqniy naqmo ham. Sa God in wain ayun na yuw inaq buliyid asit amidemqan a hikidikmo iydaqtu ham. Haiqqam ham. On mataw na God ago agem meqniy watwatmo tuquluw daqayta ham. Uluwad in God ago angelo tawonta nagan giyow Sipsip Amidon inaq gimeb santitiy meqin diqtu waqsa gig oyaqta anan salfa haqayta na ginoy titaydaqtu ham. <sup>11</sup> Ginoy titaysa mataw na gisan oyad aqasin kam bunmo gwalehdaqtu ham. On mataw na karuw kwasikta na abin iluwad teq in adulan ayon lotu emiyta ham. Teq in karuw kwasikta na atowun in gisanib waqiyta ham. Nazaqtu iyan in zeqab taromab inaqmo santitiy waqtu ginamur haiqmo os daqayta ham.

<sup>12</sup> Daqtu nazaqtu diqtu gwahtiqdaqtu iyan God ago on mataw tawonta bunmo giwaz meqniyeqtu ginad helta na waz naqmo hiqiyeq osiy. God ago on matawta na

in God-mo ago gunun muzin bugad Yesus anan helmo diq haqad osayta.

<sup>13</sup> Ari teq Heven-ib mat araq lileyim gamuk kazaq ibilensa ya hurit. In bilam, Ni nan kazaq mar ton ham. Muran teq abeb on mataw Iyahta anan helmo haqad osimmo moqayta na bunmo tidimniyeq os daqay haqad ni nazaq mar ton ham. Teq God ago Bugaw Dimunta bilaqaq, Nazaqmo haqaq. On mataw na giholtuw bulad kabiy emiyta na hulosad in ginad dimniysa ginamur tiqem daqay haqaq. Na ezaqgo in giholtuw bulad kabiy emiyta na anon abeb teq tugwahtiqaqta haqaq.

*Ogib didaq heman urotgo akaman gwahtim*

<sup>14</sup> Ari ya saw ahol a ta waqim onqas husta araq ahol way. Ahol waqsa mat araq awaqan bilaqne Mat Atatin awaqan noqta onqas na amalib ossa ya ahol waymo. In afaqinib king ago balaw gol-ib emiyta ussa teq baqir ame meqin diqta in abenab wazyaq. <sup>15</sup> Sa angelo araq God ago bit hulosis asan ban gwahtiqaq in mat onqas amalib osta na lilewunim bulon, Didaq bunmo tiham ham. Heman muran didaq urotgo akaman tiqiy ham. Nazaq iyan ni ningo baqir na amalib didaq giqurot ham. <sup>16</sup> Haqan mat onqas amalib osta na ago baqir wazim hunegad didaq hemim ogib gituraqta na in tigiqurot bugyaq.

<sup>17</sup> Sa angelo araq God ago bit Heven-ib turaqta na hulosis asan ban gwahtiqaq in inaqmo baqir ame meqinta wazim ad bo tugwahtim. <sup>18</sup> Gwahtiqaq angelo ta araqta in ago zaway in God ayon tamaz emayta ago faq wamuzaqta na in God amen tamaz em abanan na hulosis asanib gwahtiqaq in angelo baqir ame meqin diqta wazaqta na atoranmo lilewunim bulon, Ogib wain anagin tighemim usaq ham. Nazaq iyan ningo baqir ame meqin diqta na waqeq amalib am wain anagin aqurna na giquroteq ginuw bug ham. <sup>19</sup> Haqan angelo na ago baqir wazim hunegad ogib wain anagin aqurna na bunmo giqurotim tiginuw. Ginuwim gihunegan wain anagin bay ninaleq ayun waqgo banib tuwom. Ban na in God ago agem meqniymo atowun. <sup>20</sup> In wain anagin na hunegan uliq asan ban bay ninalgo banib woqan in tigibay ninaliy. Bay ninalan ned ayahmo ban nab gwahtiqaq lehim saw ayahmo isihim us, 300 kilomita nazaq. Ad ned na gabolim hos ateb ain usaqta nabmo diq iy.

## 15

*Angelo 7 nazaq in nagah meqin diqta 7 giwazim turiy*

<sup>1</sup> Ari nagah lul araq diqta kaitib gwahtiqaq na ahol waqim ihol riten lam. Ya

angelo 7 nazaq gibiyta in nagah meqin diqta 7 nazaq in amalib on mataw gimeqin ton daqayta na giwazim tursa ya gibiy. Nagah meqinta na akaman tihiqiy bugid teq afaqan araq a ta hi gwahtiqaq. Nagah meqinta 7 na hiqiyid teq God ago agem meqinta na inaqmo tihiqiy bugdaqmo.

<sup>2</sup> Sa ya nagah ta araq diq bilaqne kamis ayahta nog ahol waymo. Kamis na awaqan bilaqne faq teq galas inaq wastonan usaqta ya ahol waq nog iy. Teq on mataw biyahmo in God gita nagta na wazim kamis na adekib tursa ya gibiyimo. On mataw nawa na in karuw kwasikta teq in ahol adulan na inaq bab emim giquriyamad in gisanib karuw kwasikta na atowun a hi waqiyta. <sup>3</sup> In turad God ago kabibiy mat Moses ago bar wazad teq in Sipsip Amidon ago bar waz yaqaymo. In bar wazad bilaq yaqay,

Iyahta God haq yaqay,

Ni zaway bunmo wazaqta haq yaqay.

Ni daq aseseqta amo amo giqemaqta haq yaqay.

I ningo daq nagan gwahtiqaq ahol waqad i gihol turuh nemaqta haq yaqay.

Ningo daq bunmo in titnonta teq in hel diqtaqmo haq yaqay.

Ni on mataw en bunmo gigo King-ta haq yaqay.

<sup>4</sup> Iyahta ninmo nimomo tawon diq iyim osaqta haq yaqay.

Nazaq iyan on mataw bunmo nirabunad nibin tiqiluw daqay haq yaqay.

Mataw bunmo boleq ninognib lotu tiqem daqay haq yaqay.

Na ezaqgo ningo daq dimdimunta na in mataw bunmo gimeb ulalabmo tugwahtim haq yaqay.

<sup>5</sup> Ari nagah na tihiqiy an abe ban ya saw ahol a ta waqim bit karuwsanibta God abin eman ulal iyyaqta na in Heven-ib Tempel nog iyim turad aqez hasim ussa ya ahol way. <sup>6</sup> Sa angelo 7 na in nagah meqin diqta on mataw gimeqin tondaqta anaghan giwazim in God ago bit na hulosis bo asanib tugwahtiqaq. In tubusan dimunta anumlan haiqta hikliyanaqta giholib emiyta teq nagah araq gol-ibta am gan gibanib hureqan us. <sup>7</sup> Sa nagah aweweq kayeqmo osayta na gigo araq in deg gol-ib emiyta 7 nazaq a bolim angelo 7 na amulik-mulikmo tinag. Deg nab God kuluwa-kuluwmo osaqta na ago agem meqinta ate gwalim usaqta. <sup>8</sup> Sa God ahol anuwun teq in ago zaway inaqmo atoranmo oysa aqasin gwahtiqaq Tempel na adugan tuwaleq ton bugyaq. Sa mat araq le bit nab gwahtiqaqta haiq iyyaq. Ari angelo nagah meqin diqta 7 nazaq giwazayta na gigo kabiy tihiqiyid nab teq mataw le Tempel nab a ta gwahtiqaq daqay.

## 16

*Angelo in God ago agem meqniy degib usta na ogib wazbaliy*

<sup>1</sup> Ari ya mat araq aqez God ago bit adugan ban gwahtiğim angelo 7 na atoranmo gililewunsa ya kazaq hurit. In bilam, Ne God ago agem meqinta adeгнаq 7 na wazeq a le ogib wazbalid woqan ham.

<sup>2</sup> Haqan angelo amebta na lehim God ago agem meqinta adeгнаq in wazta na wazbalan ogib woqanmo gisulan awaz meqinta ahuran meqin diqta mataw gisanib gwahtiqeq tilehyaq. On mataw karuw kwasikta na atowun gisanib waqim teq in ayon lotu em yaqayta naqmo giholib gisulan na gwahtiqayta.

<sup>3</sup> Sa ta angelo gigerta na lehim God ago agem meqinta adeгнаq in wazta na wazbalan kamisib woqanmo kamis buliyim mat momta anedan nog iyim gwahtiqeq lehyaq. Sa kamisib nagah bunmo kayeqmo luwayta na tumoq bugiy.

<sup>4</sup> Sa ta angelo ezeqmanta na lehim God ago agem meqinta adeгнаq in wazta na wazbalan yuw sibaqta teq yuw yayib bolaqta nagab tuwom. Woqanmo yuw nagan buliyim ned nogmo gwahtiqeq lehyaq. <sup>5</sup> Sa angelo yuw bunmo giwamuzaqta na in kazaq bilaqsa ya hurit. In bilam,

God ham ni muran osad teq kwaziqmo diq ni ostamo ham.

Ningo daq dimun iysa ni tawon diq iyim osaqta ham.

Ad ni mataw gigo daq meqinta na tuqulum kemim ni in gigo daq na ahunibmo amenin tinag ham.

<sup>6</sup> Mataw na in ningo nantun kabemmo teq ningo on mataw tawonta kabemmo ginol emsa ginedan mutbalim wom ham.

Nazaq iyan ni mataw meqmeqinta na ned negan in tuquluwiy ham.

Na in gigo daq meqinta na ago anawun anonon diqmo in tuwaqiy ham.

<sup>7</sup> Sa mat araq aqez God amen tamaz em abanan nab gwahtiğim kazaq bilaqsa ya hurit.

Nazaqmo ham, Iyahta ham, ni zaway bunmo wazaqta ham.

Ni on mataw gigo daq ulum kemad gimen gamuk heltaqmo bilaqsaqta ham.

Teq ni mataw gigo daq ahunibmo amenin negaqta ham.

<sup>8</sup> Ari angelo aweweqta na lehim God ago agem meqinta adeгнаq in wazta na wazbalan zeq amalib tuwom. Woqanmo zeq zaway diq iyim in era mataw ogibta tiginoy emyaq. <sup>9</sup> Zeq oyad afan meqin diqta na mataw ginoy naqmo hiqiysa in gigem meqniysa God tibilawun yaqay. God inmo nagah mataw gimeqin tonyaqta na bunmo

giwamuzaqta teq mataw na ginad buliyim God abin a hikidik iluw yaqay.

<sup>10</sup> Sa angelo abaynaginta na lehim God ago agem meqinta adeгнаq in wazta na wazbalan karuw kwasikta na ago marogro ban in amalib osad ago on mataw giwamuzaqta nab tuwom. Woqanmo on mataw karuw kwasikta muzinad ago maror ahaqenib osiyta na gigo hib romriq kwasik diqta tugwahtiqayq. Sa santiyi giholib gwahtiqsa in meqin diq loyinad gimileq mugad os yaqay. <sup>11</sup> Mataw na gisanib gisulan titiy naqmo hiqiysa iyan in God Ulilib Osaqta na tibilawun yaqay. Ta teq in ginad buliyad gigo daq meqinta na gileh a hikidik ug yaqay.

<sup>12</sup> Sa angelo 6-ta na lehim God ago agem meqinta adeгнаq in wazta na wazbalan yuw ayahta anan Yufretis haqayta nab woqanmo yuw na tumay bug. May bugan zeq gwaldaqta ban king asor teq bolnan haqad osiyta na gimen dan tugwahtim.

<sup>13</sup> Sa nagah ahulinaqta ayahta na teq karuw kwasikta na teq nantun katiyta na in gite akan waqit meqinta gihol anumlan inaqta giwaqan kuter nogta ezeqmanto tugwahtiqiy. <sup>14</sup> Kuter ezeqman na in bugaw meqin diqta teq in daq amo amo azawayin inaqta emayta. In og saw bunmo haresmo leheq luwad in king aseseqta nagan gikat negsa in gigo bab mataw giwazeq giqad bo humab tuwol daqayta. Humab woleq in God Zaway Bunmo Wazaqta na ago kam ayahta nab in bab ayahta wazid tiqeraqdaqta.

<sup>15</sup> Ne Yesus aqez ka huritiy. In bilaqay, Mat arin inaqta bolaqta nazaq nog ya ne gigo hib tuboldaiq haqay. Nazaq iyan mat a hi usad ago tubusan wastitayim ahol agerab emaqta naqmo in tidimiyim osaqta haqay. Na ezaqgo ya boldaiqta nab mat na ago bit huloseq asan ban gwahtiqeq on mataw gimeb abe aholmo a hi luwdaqta na ago haqay.

<sup>16</sup> Ari waqit meqinta ezeqman na in king na giwaqim giqad bo saw araqab gihumab tuwoliy. Saw na Hibiru nanib in anan Armagedon haqayta.

<sup>17</sup> Sa angelo 7-ta na lehim God ago agem meqinta adeгнаq in wazta na wazbalan kait amalib tuwom. Woqanmo Tempel-ib God ago ban tawonta nab mat araq aqez atoranmo lileyim bilaqsa ya kazaq hurit. In bilam, Nawaqmo tihiqiy ham. <sup>18</sup> Sa mewlig haresmo hikliyansa kait ahulan ayahmo diq tiqiyyaq. Sa kanawrig ayah nenan diqta tisib. Kwaziq diqmo mataw mutur gwahtiqim og kab osiyta nab iyim bolim bo kam nabmo og ka nazaq ahol a hi wolta.

<sup>19</sup> Og ahol wolan uliq ayahta Babilon na mizilayim aholor ezeqmanmo iysa og saw bunmo gigo uliq aseseqta nagan bunmo



tuwoq bugiymo. Kam nab God in uliq ayahta Babilon na anadin emim in ago agem meqniy bilaqne wain ayun agognaqta nazaq nog in negan tuquluw bugiy. <sup>20</sup> Sa nud bunmo tukim lehsa garah bunmo woqim mataw garah araq ahol a ta hi waqiy. <sup>21</sup> Sa kaitib wayway aseseqta gigo afaqan 50 kilo nazaqta urom nog mataw gimalib woqyaq. Wayway aseseqta na kaitib woqim mataw gimeqin diq tonsa mataw gigem meqniysa God tibilawun yaqay. Na ezaqgo in afaqan na loyinsa giholib meqin diq iysa iyan na ago.

## 17

*Aw ayahta mataw gihureqaqta na in afaqan ayahmo wam*

<sup>1</sup> Ari angelo 7 deg wazim turiyta na gigo araq in ya igerab gelim kazaq ibilan. Ni bolid aw danatabta awaz meqinta yuw aseseqta giqurumnib osaqta ko in ago daq meqinta amenin waqsa ya ni tiniqisihunnan ham. <sup>2</sup> Ogib kab king bunmo in aw na inaq usiyta ham. Teq aw na in on mataw bunmo gihureqan in ago daq meqinta emad gihol atoranno eraqsa in an haesmo hureqad inaq us yaqayta ham. Bilaqne in wain ayun atoranta negan in uluwim ginad dimunta hulosisim daq emiyta nazaq nog ham.

<sup>3</sup> Haqsa God ago Bugaw Dimunta ya iholib ayahmo bolan angelo na ya iwaqim isorim iqad og amatawun haiqtalib tilah. Lehan saw nab aw araq in karuw kwasikta kakaqta araq amalib ossa ya ahol way. Karuw kwasikta na aholnan kabemmo in asanib mar tonan giqusta. Ad in aholnan amo amo na bunmo abilaqan ahuritan meqin diqta, bilaqne gamuk amalib God bilawunayta nazaq nog. Karuw kwasikta na afaqin 7 nazaq inaqta teq adanidin 10 nazaq afaqinib nagab gituriy. <sup>4</sup> Sa aw na ago tubusan kakaqta awaqaan bilaqne king gigo tubusan awaqaan nog. Sa in ago balaw dimdimunta gol-ibta teq ago kallioy gig awaq dimdimunta amo amo amalib giqemiya aholib giquis. Aw na abenab in gog araq gol-ibta wazyaq. Sa gog na aduganib daq amo amo God ameb lilihim usaqta na teq aw na danatab luwad daq amebay inaq emaqta nagan bunmo in gog nab ate gwalim giquis. <sup>5</sup> Teq aw na amaqbelab in ahol agamakan abarawunta araq kazaq mar tonan us.

YA ULIQ BABILON AWAZ MEQINTA ON  
DANATABTA GINENMO DIQ YAQMO DAQ  
GOD AMEB LILIHIM USAQTA NA  
ANAMREN YAQMO DIQ

<sup>6</sup> Aw na in God ago on mataw tawonta ginedan uluwim ahol agadan iysa ya ahol way. On mataw na Yesus anan helmo

haqsa iyan in ginol eman moqiyta. Ya nagaq na ahol waqad ihol turuh nem naqmo diq hiqiyyaq.

<sup>7</sup> Sa angelo na kazaq ibilan. Ni nagaqgo nihol turuh nemaq? ham. Ya teq aw na alulin tinibilendaq ham. Teq karuw kwasikta aw sorad a luwaqta na teq in afaqin 7 na teq in adanidin 10 nazaq usaqta na gilulin ya tinibilendaqmo ham. <sup>8</sup> Karuw kwasikta nawa ni ahol tuwamta na in kwaziqmo osta ham. Ad muran in a ta hi osaqa ham. Teq abeb in yay abe milhasta na huloseq a ta gwahtiqdaq ham. Gwahtiqeq luwad oseq le in timeqniy hasdaqta ham. In kwaziqmo osta teq in a ta hi osaqta teq abeb in ta boldaqta na ago on mataw giholnan God ago buk-ib haiqta naqmo in karuw kwasikta na ahol waqad gihol riten lamdaqta ham. Buk nab on mataw kayeqmo tuteqmo os daqayta na giholnan usaqta ham. Kwaziq diqmo God og ka eman a hi gwahtiqsamo in on mataw na ginan buk nab mar tonan tuqusaqta ham.

<sup>9</sup> Mat anad dimunta inaqta na in nagaq ka ago tuhurit kemdaq ham. Karuw kwasikta na ago afaqin 7 na in garah 7 nazaq gitowun ham. Sa aw na in garah 7 na gibigmanib osaqta ham. <sup>10</sup> Sa afaqin 7 naway na in king 7 nazaq gitowunmo ham. King abaynagin nazaq tuqosiya teq muran king 6-ta na in osaqa ham. Sa king 7-ta na teq gwahtiqdaqta ham. In gwahtiqeq asitmo tuqosdaq ham. <sup>11</sup> Ossa teq karuw kwasikta kwaziqmo osta teq muran in a ta hi osaqta na in abeb a ta gwahtiqeq in king 8-ta nazaq nog tiqiydaq ham. In ago daq king 7 na gigo daq nog iyaqta teq in gwahtiqeq luwad oseq teq in timeqniy hasdaqta ham.

<sup>12</sup> Ad ni karuw kwasikta afaqinib adanidin 10 nazaq ahol giwamta na in king 10 nazaq gitowun ham. Teq king 10 na in gigo ban waqim a hi osay ham. Abeb in gwahtiqeq karuw kwasikta na inaq zaway waqeq teq in kam asitmoqmo zeq adulan amulikmo nazaq in king iyeq tuqos daqay ham. <sup>13</sup> King nagan ginad amulikmoqmo usdaqta ham. Ad in gigo zaway teq gihin aseseqta na bunmo in karuw kwasikta na tuqug daqay ham. <sup>14</sup> King nagan in Sipsip Amidon ago walmataw nenaq bab emsa Sipsip Amidon ago mataw na nenaq eraqeq king nagan babub tigiquriyam bug daqay ham. Na ezaqgo Sipsip Amidon in king bunmo gigo King-ta teq in mataw aseseqta bunmo gigo Iyah Diqta ham. Teq Sipsip Amidon ago walmataw na gihin kazaq usaqta ham. Sipsip Amidon inmo mataw na gililewunim aholyon gilumim giwamta ham. Giwaqaan in ago nan muzinad gituw a hi hiqiyayta ham.

<sup>15</sup> Haqad angelo na kazaq a ta ibilan. Aw danatabta yuw aseseqta gigerab ossa ni ahol wamta na ham yuw na in on mataw bunmo gitowun ham. Og kab mataw en amo amo gidauhan og saw hareso osad gigo nan amo amo bilaqayta gitowun na in yuw aseseqta naqmo ham. <sup>16</sup> Sa karuw kwasikta adanidin 10 na giyow karuw kwasikta ta araq na inaq in aw danatabta na gigem meqin diqta tuqug daqay ham. Ad in aw na abin meqin diq toneq ago tubusan nagah nagan bunmo giwaqid in begbeg iyeq abe aholmo tiluwdaq ham. Sa king 10 na giyow karuw kwasikta na inaq in aw na amizan neqad teq in asan hunegid le faqmeb gwale tuqoywordaq ham. <sup>17</sup> God in king 10 na giqeman in ginad amulikmo iyim gigo zaway in wazayta na bunmo in eman karuw kwasikta na ahaqenib lehan iyan in daq nazaq em daqayta ham. Ad in God-mo anad muzinad daq nazaq emad ossa teq nagah bunmo God anan bilamta na tugwahtiq bugdaq ham. <sup>18</sup> Teq aw ni ahol wamta na in uliq ayah diqta og kab king bunmo giwamuzaqta naqmo atowun ham.

## 18

### *Uliq ayahta Babilon timeqniy*

<sup>1</sup> Ari nagah na tihiqiyanmo angelo araq awaz meqinta Heven hulosisim gehitiqsa ya ahol way. In ahol abalawun oy naqmo hiqiyisa ogib kab saw bunmo hastitayan saw anuwan ayahmo us. <sup>2</sup> Sa in atoranmo lileyim bilam,

Uliq ayahta Babilon timeqniy has ham.  
In timeqniy has ham.

Meqniy hasim muran in bugaw meqinta gigo uliqta tiqiy ham.

Uliq na bugaw meqmeqinta nagan teq ah meqmeqinta ginumlan inaqta mataw in ginan gituw hiqiyayta nagan bunmo gigo ban tiqiy ham.

<sup>3</sup> Na ezaqgo uliq nawa na in on mataw en bunmo gihureqim giqeman in gihol atoranmo eraqsa ginad meqinta hareso gwahtiqyaqta ham.

Bilaqne in wain ayun atoranta uluwim ginad dimunta hulosisyta nazaq ham.

Sa ogib kab king bunmo in uliq na inaq daq amebay inaqta kabemmo emiytamo ham.

Uliq na amatawun in ginad bilaqgo anaghan anan diq moqsa iyan og kab mataw mani akabiyan emayta na bunmo in gigo es nagah uliq nab a le zayad mani ayahmo waq yaqayta ham.

<sup>4</sup> Ari mat ta araq aqez Heven-ib gwahitiqsa ya kazaq hurit. In bilam,

Yaqgo on matawta ham ne uliq na huloseq bo asanib gwahtiqiy ham.

Luweg daq meqinta in emayta na ne giholib soqotid ne em daqaymo ham.

Emsa mataw na in gigo daq meqinta na amenin meqinta waqsa ne nenaq araqibmo tuwaq daqaymo ham.

<sup>5</sup> Uliq na ago daq meqinta kuluwmo diq iyim in an amalib amalib gwale ulilibmo diq tiqiy ham.

Iyan God ahol waqad in uliq na anadin tiqemaq ham.

<sup>6</sup> Uliq na in bilaqne aw danatabta nog iyim mataw giyon daq amta nazaqmo ne in ayon emiyto ham.

Emad ne aw na ago daq meqinta in amta na amenin ugad teq ne a ta ug toniy ham.

In yuw atoranta gogib buliyim mataw negan uluwiyta nazaqmo ne yuw atoran diqta gogib emeq teq ne gog gigermo ugid in uluw bugan ham.

<sup>7</sup> Aw na inmo ahol abin ayahmo iluwta na teq in daq ahol bilaqgota kuluwmo amta na nazaqmo diq ne in santitiy ayahmo ugsa in ame kabemmo gaq wazan ham.

Na ezaqgo ham inmo ahol anan bilaqaq, Ya maror ayah diqta haqaaqta ham.

Ya wabur a haiqta haqaaqta ham.

Ya gaq a hikidikmo wazdaiqta haqaaqta ham.

<sup>8</sup> Teq Iyahta God ago zaway ayahta inaqta in Babilon ago daq tuqulum kemim anan bilam,

Uliq na timeqniydaq haqad in bilam ham.

Nazaq iyan moq meqin diqta teq santitiy ayahmo

teq zarow akaman amik a haiqta in kam amulik nabmo uliq nab tugwahtiq bugdaqta ham.

Gwahtiqsa teq faq eraqeq uliq Babilon oyid in tihiqiy bugdaq ham.

<sup>9</sup> Ari kam nab og kab king bunmo uliq na inaq gihol bilaqsa osad inaq us yaqayta na in uliq na faq ayahmo oyad aqasin gwalehsa in ahol tuwaq daqay ham. Ahol waqad in ginad meqniysa gigem afaqan iysa gaq wazad tuqos daqay ham. <sup>10</sup> Osad in uliq na afaqan meqin diq waqsa ahol waqad in rabad pesanmo turad bilaq daqay,

Uliq Babilon timeqniy haq daqay ham.

In timeqniy haq daqay ham.

Uliq ayah diqta teq kam amulik nabmo in ago daq meqinta na anawun tuwaq bug haq daqay ham.

<sup>11</sup> Sa og saw bunmo mataw mani akabiyan emayta na in uliq Babilon anadin emad ginad meqniysa gigem afaqan iysa gaqad tuqos daqay ham. Na ezaqgo Babilon on mataw na in mataw mani akabiyan emayta na gigo es a ta hi zay

daqayta na ago iyan ham. <sup>12</sup> Es naway na gol teq silva teq gig dimdimunta anawun ayahmota teq gig kamisibta anan bokbok haqayta teq tubusan husta dimun diqta anan linen haqayta teq tubusan kakaqta anawun ulilibta teq tubusan dimunta anan silk haqayta teq ay anan sitron haqayta teq karuw aseseqta gite sisogim nagah dimdimunta giqemayta teq nagah amo amo ayib teq baras-ib teq ain-ib teq gig amarmarin inaqta na gimalib giqemayta anawun ayahmota nagan bunmo gizaygo akaman tihiqiy ham. <sup>13</sup> Teq ay sinamon asan ahuran dimunta teq gunay teq nagah araq nal nogta aqasin ahuran dimunta gwahtiqaqta teq masil ahuran dimunta giger mir ayow frenkensens inaq teq wain ayun teq oliv amasilan teq mel dimunta teq wit anagin teq bulmakau teq sipsip teq hos teq wilka teq kabibiy on mataw gizayad gimenin waqayta nagan bunmo gizaygo akaman tihiqiyamo ham. Nagah nagan bunmo mataw mani akabiyen emayta na in uliq nab a leheq a ta hi gizay daqayta ham. <sup>14</sup> Kam nab mataw mani akabiyen emayta na in uliq Babilon buloneq bilaq daqay,

Nagah dimdimunta ni anan diq moqaqta na bunmo in ningo hib tihiqiy haq daqay ham.

Ningo nagah dimdimunta teq ningo balaw dimdimunta na bunmo nabagag tilehan mataw ahol a ta hi waq daqay haq daqay ham.

<sup>15</sup> Sa mataw mani akabiyen emad uliq nab mani ayahmo waq yaqayta na in uliq na santitiy ayahmo waqsa ahol waqad teq in tirab daqay ham. Ad in hulos ugeq pesanmo turad teq in gaq wazad gigem afaqan iysa tuqos daqay ham. <sup>16</sup> Mataw na bilaq daqay,

Uliq ayahta na timeqniy haq daqay ham. In timeqniy haq daqay ham.

Kwaziqmo on mataw na tubusan dimunta anan linen haqayta na teq tubusan kakaqta awaqan bilaqne king gigo tubusan awaqan nogta na in giholib giqem yaqayta haq daqay ham.

Sa in gigo balaw dimdimunta gol-ibta teq gigo kaliloy gig awaq dimdimunta amo amo amalib giqemiyta in giholib usyaqta haq daqay ham.

<sup>17</sup> Teq kam amulikmo nawaqmo in gigo es nagah nagan bun diqmo tihiqiy haq daqay ham.

Ari muy anamreniz teq mataw muyib luwad uliq aseseqta asorib lehayta na teq muy ago kabibiy mataw teq mataw bunmo kamisib mani akabiyen emad luwayta na in bunmo pesanmo turiy ham. <sup>18</sup> Turad faq amileq aqasin inaq gwalad oysa in ahol waqad dedibmo bilaq yaqay, Uliq araq

abin in uliq ayahta ko abin nog a haiqta haq yaqay ham. <sup>19</sup> Haqad mataw na og abutbutan waqim in gimo gifaqinib emad teq in gaqad gigem afaqan iysa lileyeq bilaq yaqay,

Uliq ayahta ko timeqniy haq yaqay.

In timeqniy haq yaqay ham.

Mataw gigo muy inaq na bunmo in uliq nab mani ayahmo waq yaqayta haq yaqay ham.

Ta teq kam amulikmoqmo uliq ayahta na timeqniy has haq yaqay ham.

<sup>20</sup> Haqad mat na a ta bilam,

Heven-ib angelo bunmo ham, ne ginad dimniyan ham.

Teq God ago nantut teq in ago Aposel teq in ago on mataw tawonta na bunmo ham ne nagah muran uliq nab gwahtimta na ago ne ginad dimniyanmo ham.

Uliq ayahta na in ago daq meqinta amalib ne gimeqin tonan muran God in uliq na ago daq meqinta na amenin tuqug bug ham.

<sup>21</sup> Ari gamuk na tihiqiyenmo angelo ta araq awaz meqinta in gig araq bilaqne gig ayah nenan diqta amalib wit wol ninalayta nazaq nogta in waqim hunegan kamismeb woqsa in bilam,

Kazaqmo teq uliq ayahta Babilon waqeq atoranno hunegid tuwoqdaqmo ham.

Woqid teq mataw uliq na ahol a ta hi waq daqay ham.

<sup>22</sup> Nazaq iyid teq Babilon ham mataw in gita ahulan teq mataw bar amo amo waz yaqayta giqez teq taur ahulan teq kadug ahulan ne gigo hib a ta hi hurit daqay ham.

Ad ne gigo uliqab in mataw kabiy amo amo em yaqayta na gisawanmo tuwaq daqay ham.

Teq on mel akabiyen emad wit anagin wol ninalayta na gihulan ne gigo uliq na amuganib a ta hi gwahtiqdaq ham.

<sup>23</sup> Lam anuwan ne gigo hib a ta hi oydaq ham.

Sa ne gigo hib on mataw an a ta hi waq daqay ham.

Na ezaqgo ne gigo mataw mani akabiyen em yaqayta na in og kab mataw aseseqta gibin inaqta iyim in igmo ag haqad osiyta ham.

Teq ne gigo liqiy amalib ne on mataw og saw bunmo gikat negiy ham.

<sup>24</sup> Teq God ago nantut kabemmo teq in ago on mataw tawonta kabemmo ginol eman ginedan womta na ago mebay uliq nab usta ham.

Ad on mataw bunmo babub ginol eman ginedan womta na ago mebay uliq nab ustamo ham.

## 19

*Uliq Babilon meqniyan Heven-ib on mataw ginad dimniyiy*

<sup>1</sup> Ari nagah na abun ban ya Heven-ib on mataw biyahmo osad gamuk atoranmo bilaq nog iysa ya hurit. Mataw na bilaqiy,

I God abin iluwuq haqiy.

I gigo God amomo in i giwaqim giqeman i ban dimuntab osauqta haqiy.

I in amomo abin sorid ulilibmo gwalehdaq haqiy. In amomo ago zaway ayah diqmota haqiy.

<sup>2</sup> God in on mataw gigo daq ulum kemad heltaqmo bilaqta haqiy.

Teq in mataw gigo daq ahunibmo amenin negaqtta haqiy.

Aw danatabta awaz meqinta na in on mataw bunmo ogibta meqin tonad gihureqan in ago daq muziniyta haqiy. Nazaq iyan God in aw na ago daq meqinta na amenin tuqug haqiy.

Aw na in God ago kabibiy mataw ginol eman moqiyta haqiy. Nazaq iyan God in ago on mataw ginedan womta na aqenin aw na ago hib tuwam haqiy.

<sup>3</sup> Haqad in gime gigerta a ta lileyim bilaqiy, I God-mo abin iluwuq haqiy.

Uliq ayahta na oyad faq aqasin tutimmo kuluwa-kuluwmo gwalaqta haqiy.

<sup>4</sup> Sa God ago ban tawontab ossa mataw marorta 24 na giyogniz nagah aweueq kayeqmo osayta na nenaq in gibakbakan ulum laquwim turad God amen lotu emad kazaq bilaq yaqay,

Hel diqtaqmo haq yaqay.

I God abin iluwuq haq yaqay.

<sup>5</sup> Sa God ago ban tawonta nab mat araq aqez gwahtiqim bilam,

God ago kabibiy on mataw teq on mataw God rabunad abin wazinayta na bunmo ne God abin iluwiy ham.

Ne mataw gibin inaqtta teq gibin haiqta inaqtmo God anan wazid ulilibmo gwalehan ham.

*Sipsip Amidon aw waqnan tonsa neqwaq ayahta gwahtim*

<sup>6</sup> Ari on mataw kabemmo humab wolim gamuk bilaqayta nazaq ya hurit nog iy. In gihulan bilaqne yuw ayahta sibim lehad ahulan kabemmo iyaqta nazaq nog iyad teq in bilaqne kait ahulan ayahmota nog iyyaqmo. On mataw na bilaq yaqay,

I God abin iluwuq haq yaqay.

I gigo Iyahta God zaway bunmo wazaqta haq yaqay.

In king ayah diqtaqmo iyim nagah bunmo giwamuzim osaqta haq yaqay.

<sup>7</sup> Muran i in anan ginad dimniysa abin iluwuq haq yaqay.

Sipsip Amidon aw waqdaqta ago akanun tugwahtiqan awe na ahol tuwastitayim osaqta haq yaqay.

<sup>8</sup> God in tubusan hus diqta anan linen haqayta araq anumlan haiqta aw na ugan in aholib tiqam haq yaqay.

Tubusan husta dimunta na in God ago on mataw tawonta gigo daq dimunta naqmo atowun.

<sup>9</sup> Sa angelo araq ibilan, Ni nan ka mar ton ham. God on mataw gimen nan eman in teq Sipsip Amidon ago aw waq adidaqan ayahtab bol daqayta na, mataw na muran tidimniyim osayta ham. Ad in ya ibilan, Nan kaway ka in God ago nan hel diqtaqmo ham. <sup>10</sup> Angelo na nazaq haqsamo ya in anognib ihol hulosan tuwom, ya in ayon lotu emnan haqad. Teq haiq. In ya ibilan, Ni nazaq hi ton ham. Ni nimaqbaban nenaq ne Yesus abin bilaqad ago kabiy emayta ham. Sa ya nazaqmo ne gigo kadoy iyim i araqibmo kabiy na emauqta ham. Ni God amomo ayon lotu em ham. Na ezaggo God ago Bugaw Dimunta inmo mataw ginad wamuzsa in ago nan tutim Yesus abin bilaqayta ham.

*Yesus hos husta amalib ossa Jon ahol wam*

<sup>11</sup> Ari ya ime gwalehim kait misireq nog iyim aqez hassa hos husta araq nab tursa ya ahol way. Sa hos na amalib mat araq os. Mat na anan Akatiy Haiqta haqayta teq in anan araq Heltaqmota haqayta. In daq titnonta amalib mataw gigo daq gilum kemaqta. Teq in daq titnonta amalib ago bab ginolaqtamo. <sup>12</sup> Mat na ameqnagin bilaqne faq amileq nogta. Ad in afaqinib king gigo balaw dimdimunta hikliyanagta kabemmo giqusaqta. Teq mat na aholnan inmo asanib mar tonan usaqta. Mat araq diq in aholnan na a hi huritsa in amomo aholnan na ago huritta. <sup>13</sup> In aholib tubusan sisaqta usaqta na nedmo huz uqta. Teq mat na anan God Ago Gamuk haqayta. <sup>14</sup> In ago angelo bab emayta na tubusan husta anan linen haqayta anumlan haiqta giholib emim teq in hos husta gimalib osad mat na muzad inaq lehayta. <sup>15</sup> Sa mat na ateb baqir araq sisaqta ame meqinta gwahtiqim usaqta. Baqir na amalib in ogib on mataw en bunmo ginoldaqta. Ad in gwatuq ain-ibta wazaqta na amalib on mataw bunmo atoranmo giwamuzdaqta. In ago bab ginolad gibayid woqsa bab na in God Zaway Bunmo Wazaqta na ago agem meqniy tiloyin kem daqay. Bilaqne mataw wain ayun waqgo abanib wain anagin bay ninalsa ayun gwahtiq bugaqta nazaqmo in ago bab gibaydaqta. <sup>16</sup> Mat na ago tubusanib teq abetab in ahol anan kazaq mar tonan usaqta.

KING BUNMO GIGO KING-TA TEQ MATAW  
ASESEQTA BUNMO GIGO IYAH DIQTA

<sup>17</sup> Ari angelo araq zeq ame ituqim tursa ya ahol way. In turad ah bunmo kaitib melad luwayta na atoranmo gililewunim gibilan, Ne bunmo boleq God ago neqwaq ayahta kab humab woliy ham. <sup>18</sup> Humab woleq teq ne mataw marorta teq mataw bab emayta gigo aseseqta teq mataw giwaz meqinta teq hos kabemmo ginamreniz nenaq kuluwmo gimizan ne tineq daqay ham. Ne mataw amo amo gimizan neq daqay ham. Mataw gina inaqta teq kabibiy mataw samanta teq mataw gibin inaqta teq mataw gibin haiqta inaqmo bunmo gimizan ne tineq daqay ham.

<sup>19</sup> Ari karuw kwasikta na in og ka ago king bunmo gigo bab mataw nenaq giqad bolim gihumab wolim ossa ya gibiy. Mataw na in mat hos amalib osaqta na ago bab mataw nenaq an tuwolnan haqad in bolim humab woliy. <sup>20</sup> Teq haiq. In karuw kwasikta na ayow nantut katiyta na inaq giwazim tigiqirquriy. Nantut katiyta naqmo in karuw kwasikta na ameb daq azawayin inaqta kabemmo emyaqta. Emad in on mataw karuw kwasikta atowun gisanib waqiyta na gikat negsa in karuw kwasikta na adulan ayon lotu em yaqayta. In karuw kwasikta ayow nantut katiyta na inaq giwazim giqirquran in kayeqmo os-samo gihunegan le faq ayahtab tuwoqiy. Faq na bilaqne yuw akurorqanta ayahta nog iysa gig anan salfa haqayta na kabemmo oyad usayta. <sup>21</sup> Mataw giger na le faqmeb tuwoqanmo mat hos-ib osaqta na in ago baqir atenmosib gwahtiqim usaqta na amalib mataw giger na gigo dauh ginol eman tumoq bugiy. Moq bugan ah bunmo bolim mataw tumoqiyta na gimizan neqim gigem aseseq nenan tiqiy bug.

## 20

*Angelo araq Satan irquran in ulig 1,000 nazaq os*

<sup>1</sup> Ari angelo araq Heven hulosis gehitiqsa ya ahol way. In yay abe milhasta na ago ambitan teq sen araq ayahta inaqmo abenab wazim ad bo hitim. <sup>2</sup> Hitiqim in nagah ahulinaqta ayahta na tuwaz. Nagah ahulinaqta na kwaziqmo osta teq in anan giger Mat I Gigilehunan Bilaqtaqta haqayta teq Satan haqaytamo. Angelo na in nagah ahulinaqta na wazim sen-ib irquran in ulig 1,000 nazaqmo tuqos. <sup>3</sup> Teq angelo na Satan irqurim in wazim yay abe milhasta nab hunegan woqan in adanin atoranmo ot, Satan gwahtiqeq on mataw a ta hi kat negdaq haqad. Ari Satan irqurid ossa ulig 1,000 na le tihiqiy bugid nab teq in adanin

hasid in asanib gwahtiqeq kam asitmoqmo a ta luwdaq.

<sup>4</sup> Ari ya marorgo ban tawonta kabemmo gibiy. Sa mataw kabemmo ban nagab ossa ya gibiyimo. Ossa God in gibenab maror eman in mataw hazirib gilum kemad osiy. Teq on mataw kabemmo Yesus anan helmo haqad abin iluwad teq in God ago gamuk waz naqmo hiqiyiyta na giwitan ya gibiyimo. Mataw na gigo daq nazaqmo usan iyan in gigo bab baqiribmo ginat urot tayan moqiyta. Teq in karuw kwasikta na atowun gibenab teq gimaqbelab a hi waqad in karuw kwasikta na ago ahol adulan na inaq gimen lotu a hi emiytamo. Mataw na kayeq ta iyim ulig 1,000 nazaq Yesus inaq king iyim osad in nagah bunmo giwamuzad osiy. <sup>5</sup> Ossa on mataw tumoqiyta ta asor na bunmo in kam nab kayeq a hi iyiyta. Haiq. In ussa le ulig 1,000 na tihiqiyid teq in kayeq tiqiy daqayta. Ari mataw dimdimunta nawa kayeq iyiyta na in mataw darneb hodhod huloseq eraq daqayta na gigo dauhibta. <sup>6</sup> Mat aw nog kam amebta nab kayeq iy daqayta na in God ago on mataw tawon diqta iyeq tidimniy haseq os daqayta. Moq giger na in on mataw na giwazid a hi woq daqay. Mataw na in God teq in atatin Kraiss inaq gigo mataw tamaz emayta tiqiyeq tuqos daqay. Ad ulig 1,000 nazaq in Kraiss inaq king iyeq osad nagah bunmo tigiwamuz daqay.

### *Satan timeqniy has*

<sup>7</sup> Ari abeb ulig 1,000 na tihiqiy bugid teq in Satan adanin hasid in asanib bo tugwahtiqdaq. <sup>8</sup> In bo asanib tugwahtiqeq teq in on mataw og saw bunmo osayta na gikat negad tiluwdaq. On mataw na ginan giger Gog haqayta teq Magog haqaytamo. Satan in on mataw na kat negad gihureqsa in God ago on mataw nenaq bab emgo haqad bo humab tuwol daqay. Mataw humab wol daqayta na in kabemmo diq bilaqne kamisdekib ibur usaqta nazaq nog iy daqayta.

<sup>9</sup> Teq ya on mataw na gibiyisa in og saw bunmo hulosis bolim God ago uliq in anan anad bilaqtaqta na lilut ugim turad in God ago on mataw tawonta uliq nab osiyta na bunmo gimen tawan emiy. Teq haiq. Heven-ib faq gehitiqim bab meqinta na bunmo ginoyworan tumoq bugiy. <sup>10</sup> Moq bugan teq in mat gikat nagta anan Satan haqayta na wazim hunegan in faq ayahtab gig salfa oyad usaqta nab le tuwom. Faq nabmo karuw kwasikta ayow nantut katiyta na inaq osayta. Ossa in Satan hunegan wolehim in ezeqman iyim nenaq faq nab tuqosiy. Mataw ezeqman na

in tuteqmo zeqab taromab inaqmo santitiy waqad tuqos daqay.

*Heven-ib hazirir ayahta gwahtim*

<sup>11</sup> Ari king ago ban araq ayahta husta tursa ya ahol way. Ad Mat ban tawonta nab ossa ya ahol waymo. In ban nab ossa og ayow kait inaq rabunim titukiy. Tukim lehad teq in mataw gimeb ulilem daqayta na abanan haiq iyiy. <sup>12</sup> Sa on mataw tumoqiyyta bunmo gibin inaqta teq gibin haiqta inaqmo eraqim ban tawonta na ameb tursa ya gibiy. Gibiyad buk asor gihasan ussa ya ahol waymo. Ahol waqsa in buk ta araq has toniyimo. Buk araq nab in on mataw os kayeqmo kuluwa-kuluwmo os daqayta na giholnan mar tonan usta.

Ari buk ta asor iturimmo gihasiyyta nagab in on mataw biyahta na kayeqmo osad daq emiyta na giwagamun amulik-mulikmo gimar tonan usta. Na in ahol waqad in giyon meqin bilaqsa in gigo daq ahunibmo amenin tuwaq yaqay. <sup>13</sup> Sa mataw kamisneb woqan kamis gineqan moqiyyta na kamis gihulosan in hazirir ayahta nab tugwahtiq bugiy. Teq mataw tumoqiyyta gigo uliq na nazaqmo in mataw nab osayta na bunmo gihulosan tugwahtiq bugiyimo. Mataw moqiyyta na bunmo gwahtiqim tursa Mat king ago ban tawontab osta na in amulik-mulikmo gigo daq meqinta kwaziqmo in emiyta na tigilum kemyaq. <sup>14</sup> Teq daq na abeb in Moq ayow mataw tumoqiyyta gigo uliq anan Hades haqayta na inaq gihunegan le faq ayahta nab tuwoqiy. Faq ayahta yuw akurorqan nogta na in anan Moq Gigerta haqayta. <sup>15</sup> Teq mat aw nog in giholnan buk mataw kayeqmo kuluwa-kuluwmo os daqayta nab a hi usid na in giwazeq gihunegid le faq ame ayahta nab tuwoq yaqaymo.

**God nagah bunmo buliyan muturta iy**

**21**

*Kait muturta ayow og muturta inaq gwahtim*

<sup>1</sup> Ari nagah na abeb og muturta teq kait muturta inaq ussa ya gibiy. Kait og inaq kwaziqmo gwahtiqim usiyta na tihiqiy bug. Sa kamis a ta hi usmo. <sup>2</sup> Ad God ago uliq tawonta Heven-ib usim gewoqsa ya ahol waymo. Na Jerusalem muturta. Uliq na ago balaw dimun diqta, bilaqne aw mat waqnan haqad balaw dimunta aholib giqemim ahol wastitayim ago mat waqnan tonaq nazaq nog. <sup>3</sup> Sa God ago ban tawonta nab mat araq aqez gwahtiqim atoranmo lileysa ya kazaq hurit. In bilam, Ne gidek emiy ham. Muran God in ago on mataw nenaq tuqosdaq ham. Ossa on mataw na in

God-mo ago on matawmo diq tiqiy daqay ham. Helmo ham, God inmo on mataw na nenaq tuqosdaq ham. <sup>4</sup> Osad in mataw gaqsa gimeqil gimeb usaqta na tisuholdaq ham. Teq mataw na a ta hi moq daqay ham. Ad in gaq a ta hi waz daqaymo ham. In a ta hi gaqad teq in gihol a ta hi tityidaq ham. Daq kwaziqmo usta nagan tihiqiy bugdaq ham.

<sup>5</sup> Sa Mat ban tawontab osaqta na bilam, Ahol waqiy ham. Ya nagah bunmo giqeman muturta tiqiyiy ham. Haqad teq in bilam, Nan ka mar tonid usan ham. Nan ka in hel diqta teq in kazaqmo diq tugwahtiqdaqta ham. <sup>6</sup> Haqad in ya ibilenim bilam, Nawaqmo tihiqiy ham. Nagah bunmo gilulin na yaqmo ham. Ad nagah hiqiydaqta akaman na yaqmo wazaiqta ham. Ya nagah bunmo wolnet bugim osaiqta ham. Mat anat ziziqsa ya yuw yayibta mataw uluwim kayeqmo osayta na samanmo ugid in tuquluwdaq ham. <sup>7</sup> Mat aw nog in zaway meqinta bunmo gigureyam bugeq in yaqgo nagah dimdimunta na tuwaq daqay ham. Sa ya in gigo God ossa in yaqgo onmin os daqay ham. <sup>8</sup> Ari mataw zaway meqinta nagan rabunad hureq hasayta na teq in ya inan helmo a hi haqayta na teq in daq meqinta amo amo emayta na teq in mataw ginol emayta na teq in danatab on nenaq luwayta na teq in tagum liqiy emayta na teq in god katiyyta muzayta na teq in katiyyayta na mataw na bunmo in gigo uliq faq ayahta yuw akurorqan nogta gig salfa oyad usaqta nab in tuqos daqayta ham. Daq naway na anan moq gigerta haqayta ham.

*Jon uliq Jerusalem muturta ahol wam*

<sup>9</sup> Ari angelo araq yaqgo hib tubol. Na in angelo <sup>7</sup> nagah meqinta on mataw gimeqin tonaqta na adegnaq ame gwalim ussa in waziyyta na gigo araq in yaqgo hib bolta. Bolim in ya ibilan, Ni holid ya Sipsip Amidon awe tiniqisihunnan ham. Muran Sipsip Amidon in aw na tuwaqdaqta ham. <sup>10</sup> Samo God ago Bugaw Dimunta ya iholib ayahmo bolanmo angelo na ya isorim iqad garah sisaqta ulilibmo gwalahna nab in ya iqad tugwalah. Gwalehim in God ago uliq tawonta Jerusalem Heven hulosisim gewoqsa tiqiqisihun. <sup>11</sup> Sa God ahol anuwun ayahmo uliq nab oysa ya ahol way. Uliq na ya ahol waqsa in hikliyanog nog iyyaqta, bilaqne gig dimunta hikliyanaqta anawun ayahmota na nog. Teq uliq na anuwun bilaqne gig jaspas anuwun nog teq in awaqan dimun diq galas hikliyanog iyyaqta. <sup>12</sup> Sa uliq na ago gel in sisaqta teq in ulilibmo gwalahna. Gel na ago dan ez <sup>12</sup> nazaq ussa teq dan ez nab angelo amulik-mulikmo nazaq turim lehiy. Teq Isrel gisesan <sup>12</sup> na giholnan dan ez

nagab giqusim lahmo. <sup>13</sup> Gel asor ger zeq gwalaqta ban nab dan ez ezeqmanmo us. Teq asor ger ban dan ez ezeqmanmo usmo. Teq na agerab gel asor ger zeq wolehaqta ban nab dan ez ezeqmanmo usmo. Teq ta na agerab asor ger ban dan ez ezeqmanmo usmo. <sup>14</sup> Sa gel na asenab gig aseseqta 12 nazaq gel zaway ugim usiy. Gig nab Sipsip Amidon ago Aposel 12 na giholnan mar tonan giqu.

<sup>15</sup> Sa angelo gamuk ibilenyaqta na in aytan gol-ibta araq waz, aytan na amalib in uliq na atowun waqad teq in ago dan ez teq ago gel inaqmo gitowun waqdaq haqad. <sup>16</sup> Uliq ayahta na ago azizinan aweweqmo araqibmo usiy. Sa ago sisaq ulil ban gwalahtha na teq ago sisaq og muzim lahta na bunmo in araqibmo. Angelo na ago aytan amalib uliq ayahta na atowun waqan in atowun 2,200 kilomita nazaqmo iy. Teq ago azizinan teq ago sisaq gwalahta na bunmo in araqibmo 2,200 kilomita nazaqmo diq iyim usmo. <sup>17</sup> Sa angelo na in uliq ayahta na ago gel atowun tuwammo. An gel ago sisaq ulilib gwalahta na atowun in 65 mita nazaqmo iy. Angelo na in matawmo gigo mita in wazayta naqmo amalib nagah na gitowun wamta.

<sup>18</sup> Uliq ayahta na ago gel in gig anan jaspa haqayta na amalib emiyta. Teq uliq na aduganib bit ban bunmo in gol-ibmo emiyta. Nazaq iyan in awaqaq bilaqne galas nog hikliyanyaqta. <sup>19</sup> Teq uliq na ago gel asenab gig aseseqta zaway ugad usiyta na awaqaq dimun diqta teq in gig dimdimunta anawun ayahmota amalib gig aseseqta na gibalaw toniyta.

Gig amebtha na anan jaspa haqayta.

Sa gig gigerta rawezta na anan sapaya haqayta.

Sa gig ezeqmanta husta na anan aget haqayta.

Sa gig aweweqta kuletta na anan emerald haqayta.

<sup>20</sup> Sa gig abaynaginta na anan sadonikis haqayta. Gig na kakaqta husta inaqmo ahulib usaqta.

Sa gig 6-ta kakaqta na anan koniliyan haqayta.

Sa gig 7-ta maliyta na anan krisolait haqayta.

Sa gig 8-ta kuletta nog na anan beril haqayta.

Sa gig 9-ta maliyta nog na anan topas haqayta.

Sa gig 10-ta na anan krisopres haqayta. Na ahulib maliyta teq kuletta usaqta.

Sa gig 11-ta dubta na anan hayasin haqayta.

Sa gig 12-ta kakaqta na anan ametis haqayta.

<sup>21</sup> Gel na ago dan ez 12 nab bokbok aseseqta husta 12 nazaq in dan ez nog iyim giqu. Dan ez amulikmo nab bokbok amulikmo husta us. Sa uliq aduganib dan lahta na in gol-ibmo emiyta. Ad dan na anuwan diq iyad in bilaqne galas nogmo hikliyanyaqta.

<sup>22</sup> Ari uliq nab Tempel araq tursa ya ahol a hi way. Na ezaqgo Iyahta God Zaway Bunmo Wazaqta na ayow Sipsip Amidon inaq in Tempel os nog iysa ya gibiy. <sup>23</sup> Sa uliq ayahta nab zeq ayow kalam inaq gigo kabiy haiq tiqiyiymo. Na ezaqgo God-mo ahol anuwan uliq ayahta na anuwan ugaqta. Sa Sipsip Amidon anuwan bilaqne lam oy nog iyad in uliq na anuwan ugaqtamo. <sup>24</sup> Anuwan ugsa on mataw en bunmo in uliq ayahta nab boleq anuwan nab tiluw daqayta. Sa ogib king bunmo in gigo balaw es dimdimun diqta anawun ayahmota giwaqeq giqad uliq nab a tubol daqaytamo. <sup>25</sup> Uliq nab tarom a hi iyaqta. Saw anuwan naqmo tutimmo usaqta. Nazaq iyan in uliq na ago dan ez 12 na a hi otayta. <sup>26</sup> Sa ogib on mataw en bunmo in gigo nagah dimdimunta giqussa amalib gihol abin dimunta waqayta na in giwaqeq giqad boleq uliq ayahta nab giqemid ussa mataw bunmo uliq na tuwazin daqayta. <sup>27</sup> Sa nagah anumlan inaqta teq mataw daq meqmeqinta amo amo emayta teq mataw nan katiyta bilaqayta nagan in le uliq ayahta na amuganib a hikidik gwahtiq daqayta. Haiqmo diq. On mataw giholnan Sipsip Amidon ago buk os kayeqmo kuluwa-kuluwmo os daqayta nab usaqta naqmo in le uliq ayahta nab tugwahtiq daqayta.

## 22

*Nagah giger yuw ayow ay inaq on mataw giqeman kayeqmo osayta na Jon gibiy*

<sup>1</sup> Ari angelo na in yuw mataw uluwim kayeqmo kuluwa-kuluwmo osayta na tiqiqisihun. Yuw na bilaqne galas hikliyan nog iyad usaqta. Teq yuw na in God ayow Sipsip Amidon inaq gigo ban tawonta na aqiradnib gwahtiqim lehaqta. <sup>2</sup> Ad uliq na amuganib yuw na agerab ay anon neqim kuluwa-kuluwmo osayta na tursa yuw na ay asenlotab lehaqta. Ay nawa na anon amo amo 12 nazaq giqemaqta. Ad kalam araqab in anon araq emad kalam araqab in anon araq emaqta. Emad in nazaq emim emim lehaqta. Ad ay na anan in on mataw en bunmo giwastitaygo usaqta. <sup>3</sup> Teq nagah bunmo God kusluw negan meqniyim giquusayta na in uliq nab a hi us daqay. Sa God ayow Sipsip Amidon inaq gigo ban tawonta uliq nab tursa

God ago kabibiy on mataw in ayon lotu tiqemad os daqay. <sup>4</sup> Ad mataw na in God anobun ahol waqsa God aholnan mataw na gimaqbelab tuqusdaqmo. <sup>5</sup> Tarom tihiqiydaq. Sa zeq teq lam nagan bunmo gikabiy tihiqiydaqmo. Na ezaqgo Iyahta God ahol anuwan in ago on mataw gimalib tukuramdaq. Sa on mataw na kuluwaw-kuluwawmo king iyeq tuqos daqay.

*Yesus teq hidmo ta boldaq*

<sup>6</sup> Ari God ago angelo na ibilenim bilam, Gamuk ka hel diqtaqmo ham. God bilamta nazaqmo diq in tugwahtiqdaq ham. Na ezaqgo Iyahta God inmo anad nantut negsa in ago gamuk bilaqayta ham. Ad in ago kabibiy mataw nagah teq hidmo gwahtiqdaqta na giqisihungo haqad in ago angelo eman kawaqmo tubol ham.

<sup>7</sup> Haqad in ya ibilan, Yesus bilam, Ne gidek emiy ham. Ya hidmo ne gigo hib tilehdaiq haqad in bilam ham. On mataw God ago nantut agamukan buk kab ussa muzinayta na in tidimniyim osayta haqad in bilam ham.

<sup>8</sup> Ari yaqmo Jon, ya gamuk ka huritta teq ya nagah ka bunmo ahol wayta. Ya nagah ka agamukan tuhuritim teq ya imeb nagah ka ahol tuwaqimmo ya God ago angelo na anognib ibakbakan ulum laquwim turad in ayon lotu tiqemdaiq hay. <sup>9</sup> Sa angelo na ibilan, Sey! ham. Ni nazaq hi ton ham. Ni nimaqbaban God ago nantut nagan teq on mataw bunmo gamuk buk kab ussa muzinayta na in God ago kabibiy emayta ham. An nazaq nogmo ya in ago kabiy emaiqtamo ham. Ni God amomo ayon lotu em ham. <sup>10</sup> Ad in a ta ibilenim bilam, Nagah abeb teq gwahtiqdaqta ago agamukin buk-ib usaqta ka ni hi ulilem ham. Na ezaqgo nagah na gwahtiqdaqta akaman sinsin tiqiy ham. <sup>11</sup> Nazaq iyan on mataw daq meqmeqinta emayta na in daq meqinta naqmo em tuteq a lehiy ham. Sa on mataw daq amebay inaqtta emayta na in daq amebay inaqtta naqmo em tutiy ham. Sa on mataw daq dimdimunta emayta na in daq dimdimunta naqmo em tutiy ham. Sa on mataw God amomo anadin emayta na in God amomo anadin em tutiy ham.

<sup>12</sup> Yesus bilam, Ne gidek emiy ham. Ya hidmo ne gigo hib tilehdaiqta ham. Ad on mataw gimen naw ya negdaiqta na kawa ya ibenab giquusaqta ham. Mataw daq ezaqta emiyta nazaqmo ya amenin tinegdaiqta ham. <sup>13</sup> Nagah bunmo gilulin na yaqmo ham. Ad nagah bunmo hiqiydaqta akaman na yaqmo wazaiqta ham. Ya mat aqen diqta ham. Teq ya mat abebtantamo ham. Ya nagah bunmo wolnet bugim osaiqta ham.

<sup>14</sup> On mataw gigo tubusan tisuholiyta na in tidimniyim osayta ham. In gibin inaq iyeq ay anon neqim kayeqmo kuluwaw-kuluwawmo osayta na tineq daqay ham. Ad God in gihulosid in uliq ayahta na ago dan ezab le tugwahtiq daqay ham. <sup>15</sup> Teq mataw daq meqmeqinta emayta na teq liqiy emayta na teq an haresmo hureqayta na teq mataw ginol eman moqayta na teq god katiyta muzayta na teq nan katiyta bilaqayta na teq daq katiyta emgo ginad diq bilaqayta nagan bunmo in bilaqne gaun asannaqta meqinta nog iyeq God ago uliq dimunta na asan ban tuqos daqayta ham.

<sup>16</sup> Haqad in bilam, Yaqmo Yesus yaqgo angelo eman in gamuk ka ni nibilennan nawa ningo hib lahta ham. Nazaq iyan ni gamuk ka tuteq yaqgo on mataw gidauhan bunmo gibilen ham. Ya Devit asenlul amuganib gwahtiyta ham. Teq ulig boy na yaqmo ham.

<sup>17</sup> Ari God ago Bugaw Dimunta in Yesus bulonim bilaqaq, Ni bol haqaq. Sa Sipsip Amidon awe na nazaqmo in bulonim bilaqaq, Ni bol haqaqmo. Sa ne on mataw nan ka huritayta na ne bunmo kazaq in buloneq bilaqiy, Ni bol haqad ne nazaq haqiyimo. Ari mat aw nog yuwnan moqad ginat ziziqaqta na in boliy. Teq mat aw nog yuw mataw uluwim kayeqmo kuluwaw-kuluwawmo osayta na uluwnan ginad bilaqaqta na in boleq yuw na samanmo waqeq uluwiy.

*Jon in on mataw buk ka agamukan huritayta na bunmo gamuk awaz meqin diqta nag*

<sup>18</sup> Ari ya on mataw God ago nantut agamukan buk kab huritayta na bunmo nan awaz meqinta kazaq ne gibilenaq. Mat araq anadibmo gamuk ta asor muturta nantut ka amalib emid teq buk ka ago daq meqmeqin diqta teq gwahtiqdaqta na bunmo God ginuweq mat naqmo amalib emid in aholib tugwahtiqdaqta. <sup>19</sup> Teq mat araq anadibmo God ago nantut ananin usaqta ka ago gamuk araq walemid God in mat na walemid in nagah dimdimunta buk ka anan bilamta ka a hi waqdaq. Mat nazaqta na in ay anon neqim kuluwaw-kuluwawmo osayta na a hi neqeq in God ago uliq tawonta nab a hi osdaqtam.

<sup>20</sup> Mat nagah teq gwahtiqdaqta ananin kawa ne gimen bilamta na in bilaqaq, Helmo haqaq. Ya hidmo ne gigo hib tilehdaiqta haqaq.

Hel diqtaqmo. Iyahta Yesus ni bolmo bol.

<sup>21</sup> Ari i gigo Iyahta Yesus in God ago on mataw tawonta na bunmo agem dimunta negsa in osiy. Nawaqmo.